


# PULU YEMONGA UNGU KONDEMO



The New Testament in the Andelale Dialect of the Umbu-Ungu  
Language of Papua New Guinea

**PULU YEMONGA UNGU KONDEMO**  
**The New Testament in the Andelale Dialect of the Umbu-Ungu Language of Papua New Guinea**

**Nupela Testamen long tokples Umbu-Ungu Andelale long Niugini**

Copyright © 1998 Wycliffe Bible Translators, Inc.

Language: Umbu-Ungu Andelale (Umbu-Ungu)

Dialect: Andelale

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-04

---

PDF generated using Haiola and XeLaTeX on 25 Aug 2023 from source files dated 22 Nov 2019  
9fc3d58a-5325-55b3-ba6b-701bb0030e5e

## Contents

MATEYU . . . . .	1
MAKO . . . . .	89
LLUKU . . . . .	143
JONO . . . . .	233
Lipa Mundorumu Yema . . . . .	294
RÓMO . . . . .	370
U-KORINI . . . . .	415
PE-KORINI . . . . .	457
GALLESIA . . . . .	486
EPESASI . . . . .	503
PILLIPAI . . . . .	517
KOLLOSI . . . . .	527
U-TESALLONAIKA . . . . .	537
PE-TESALLONAIKA . . . . .	546
U-TIMOTI . . . . .	551
PE-TIMOTI . . . . .	565
TAITASI . . . . .	574
PILLIMONÓ . . . . .	581
IPURU . . . . .	584
JEMISI . . . . .	621
U-PITA . . . . .	633
PE-PITA . . . . .	646
JONO KUMBÍ-LEPAMÓ . . . . .	654
JONO TALO-SIPAMÓ . . . . .	664
JONO YOPOKO-SIPAMÓ . . . . .	666
JUTU . . . . .	668
LIPA ORA SIRIMU . . . . .	673
Imbi Marenga Ungu-Pulumá . . . . .	713

## SEMANE PEANGAMO

### Mateyu, Mako, LLuku, Jono Keme, Onone Toringi Bokuma

*Aku Bokumanga Ungu-Pulu Mare*

**Yesusinga semanemondo “semane peangamo” nilimulumunga ungu-pulumu**  
**Mako** 1:1 molemo. **Ye kisene** Yesusi mana mania ombo molopale sepa andopa molorumu mele semanemo bokuna toringi. ‘**Makone** boku se u torumu. **Mateyu LLukutolone** pe bokutolo toringili. **Jonone** paa pe boku torumu.’ ningu pilielemele. **Makone** torumu bokumu ponjili mele, **Mateyu LLukutolone** toringili bokutolo sulu mele. Kanu boku yopokonga semane kinia ungu kinia molemo mele selu-sipamo. Aku-na-kolo **Jonone** konopuni pilipale bokuna torumu mele lupa. Yuni torumu bokuna semane molemomo sika Yesusinga semanemola na-kolo **ye yopokone** semane awisili toringima yuni naa topa, Yesusini nirimu ungu awisili **Jono** yuni mindi torumu, ye yopokone naa toringi. **Ye kise** aku-pokane bokuma walu naa toringi. Onone yu-mele-mele ‘Yesusi molorumu mele kinia ungu-mane sirimu unguma kinia yombomane pilkuli konopuni apuruku pilku sangi.’ ningu semanema pilku apuruku bokuna toringi.

**Mateyu** kinia **Jonotolo** mindi Yesusi lombili andoli yetolo molko Yesusi pulu polopa yunga kongonomo andopa serimu kinia pea andoringi, yuni serimu mele sumbi siku kanoko, nirimu unguma sumbi siku pilieringili. ‘Boku Mako ye **Makone** sika boku torumu liemu Yesusi lombili andorumu ye Pitane semane topa sirimuma pilipale bokuna torumu.’ ningu pilielemele. Yombo marene pilkuli ‘**Mateyu LLukutolone** **Makone** u torumu bokumu kanokole mare manda manjiku toringilinje.’ ningu pilielemele. **LLuku** yu konopu pilipa kondoli peli ye-doketamo molopale, Yesusi molopa andopa serimu mele yuyu andopa mangilipa pilipa, semane awisili mimi sipa pilipa bokuna torumu „Kolossi 4:14, **LLuku** 1:1-4.”

Yesusi yu sika Pulu Yemonga kandi Malo na-kolo yu mana-ye molombando meringi yombomanga anda-kolepalima **Mateyu LLukutolone** semane bokuna toko „**Mateyu** 1:1-17, **LLuku** 3:23-37„; yu meringi mele semanemo **kanu yetolone** mindi toringilila.

Ungu se kamu piliani: Ye talo molo yopokone semane selumu toringi kinia kanokole, akuma pali mimi siku kanokole kanga-kolte lupa lupa toringi mele kanani.

Ya ungu-pulumu pora nikimu.

### **MATEYU** **Seman Peangamo MATEYUni Torumu Bokumu**

*I Bokumunga Ungu-Pulu Mare*

Ungu-pulu mare inia yakondo gomo 1 molemo.

Imbi **Mateyunga** ungu-pulumu “Ye-Awylimuni we sirimumu”. Yu Romo-gapomano kou-takisi lindeli yemo molopili Yesusini yuntu “Na lombili ou.” nirimu. Yunga imbi se **LLipai** „Mako 2:14-15, LLuku 5:27-29“. Yuni boku **Mateyu** sika torumu nimba para silimú ungu se bokumunga sukundu naa nimba molemo. Aku-na-kolo koronganu pilipa kondoli perimu yombo marene pilkuli ‘**Mateyuni** sika i bokumu torumu.’ ningu pilieringimunga kiniá kepe aku sipu nimbu pilielemolo.

**Mateyuni** Yesusinga semanemo bokuna tombando ‘Pulu Yemone yunga yombo-mando “Walte ono nokopa kondomba ye nokoli se ono molongena lipu mundumbu.” nimba, u nimba talitorumu yemo, Yesusi yu kanu yemo ombo molorumu mele Isirele yombomane paa pilkuli “Yu sika aku yemo.” ningu kuru mondangi.’ nimba, Yesusinga semanemo tombando kanu ye nokoli Karasimu pe ombo molopa semba mele u Yesusi mana mania ombo naa molopili u ningu siringi mele Yesusini ombo

molopa serimu semanema wale awisili topa sirimu. Pe wendo ombá mele u ningu siku bokuna toringi ungu mare **Mateyuni** mindi nimba sirimu „**Mateyu** 1:22-23, 2:15, 2:17-18, 2:23, 4:14-16, 8:17, 12:17-21, 13:35, 27:9-10“. “Ye nokoli kingi Depitini kalopa liltimu yemo” wale awisili bokuna torumula, akumunga pulumu selu-sipamo. Pulu Yemo ye nokoli kingimu molombamonga ungu awisili bokuna torumula.

Yesusini ungu-mane sirimu awisili bokuna torumu „**Mateyu** kolomongo-awili 5-7 pali, 10 pali, 13 pali, 18 pali, 24-25 pali“.

Ungu-pulu mare boku ambolkonomonga paa pealemekondo i-sipa mele molemo kanani: “23. Krais”, “32.1 Pikinini Bilong Devit”, “32.2. Pikinini Bilong God”, “32.3. Pikinini Bilong Man”, “20. kingdom” .

Ya ungu-pulumu pora nikimu.

*1:1—4:16*

## **Yesusi Mana Molomba Orumu Mele Semanemo**

*1:1-17*

*Yesusi Karasi Kalko Liftingi Yombomanga Imbimanga Semanemo*

<sup>1</sup> „Isirele yombomanga u-pulu-pulu anda-kolepa, Eporayamo kinia pe yandopa ononga ye nokoli kingi awili, Depiti kinia alone Yesusi Karasi kalko litingili mele i-sipa:

<sup>2</sup> Eporayamone Aisake merimu;

Aisakene Jekopo merimu;

Jekopone Juda kinia Judanga genupilima merimu;

<sup>3</sup> Judane Péresi kinia Sera kinia merimu, kanu yetolonga anumu Tema;

Péresini Esirono merimu;

Esironone Ramo merimu;

<sup>4</sup> Ramone Aminadape merimu;

Aminadapene Nasono merimu;

Nasonone Sallimono merimu;

<sup>5</sup> Sallimonone Boasi merimu, Boasi yunga anumu Reyapo;

Boasini Opete merimu, Opete yunga anumu Rute;

Opetene Jesi merimu;

<sup>6</sup> Jesini ye nokoli kingi Depiti merimu.

Depitini Sollomon merimu. Sollomononga anumu u Yurayanga ambo menumu molorumu. Pe Depitini kanu ambomo yakala kolopa Yuraya topa kondopa ambomo yu liltimu.

<sup>7</sup> Sollomonone Riapoamo merimu;

Riapoamone Apaya merimu;

Apayane Eta merimu;

<sup>8</sup> Etane Josipate merimu;

Josipatene Joramo merimu;

Joramone Asaya merimu;

<sup>9</sup> Asayane Jotamo merimu;

Jotamone Eyasi merimu;

Eyasini Esikaya merimu;

<sup>10</sup> Esikayane Manasa merimu;

Manasane Emosi merimu;

Emosini Josaya merimu;

<sup>11</sup> Josayane Jekonaya kinia yunga genupilima merimu.

Josaya kolopili yunga malopili molangi opa-tou yomboma Isirele yomboma kinia ongo opa sekole toko munduku Isirele yombo awisili ka siku ononga kolea-awili Bepillono mengo purungi.

<sup>12</sup> Ka siku mengo puringi kinia pe  
Jekonayane Sialtele merimu;

Sialtelene Serapapele merimu;

<sup>13</sup> Serapapelene Apayate merimu;

Apayatene Ellayakimu merimu;

Ellayakimuni Eso merimu;

<sup>14</sup> Esone Sedoke merimu;

Sedokene Ekimu merimu;

Ekimuni Ellayate merimu;

<sup>15</sup> Ellayatene Elliesa merimu;

Elliesane Matano merimu;

Matanone Jekopo merimu;

<sup>16</sup> Jekopone Josepo merimu.

Josepo Marianga menu. Josepone Maria u naa lipili Maria yu bolango olo mondopa molorumu. Pe ambo yetolo moloringili kinia Mariane Yesusi merimu.

„Pulu Yemone “Ono nokopa kondomba ye nokoli se lipu mundumbu.” u nimba taltorumu yemo pe Yesusi aku yemo ombo molorumu-kulu, yunga imbi se pea sikuli ‘Karasimu’ niringila.

<sup>17</sup> Eporayamo kinia Eporayamone yandopa-yandopa kalopa lipa Depiti kalopa lipa serimu yema „Yesusinga“ anda-kolepa tene-po moloringi. Depiti kalopa lipale pe yandopa-yandopa u Bepillono yombomane Juda yombo mare ka siku kolea Bepillono anju naa mengo pangilipale liltimu anda-kolepa tene-pola moloringi. Juda yombo mare ka siku kolea Bepillono mengo puringi kinia pe yandopa-yandopa ye nokoli Karasimu kalko litingi kinia ye tene-pola moloringi.

### *1:18,25 Pulu Yemonga Minimuni Marianga Olona Kango Se Mondondorumu, Maria Yuni Yesusi Karasi Merimu Semanemo*

<sup>18</sup> Yesusi, Pulu Yemone “Ono nokopa kondomba ye se lipu mundumbu.” nimba u nimba taltorumu ye nokoli Karasimu, yu meringi semanemo i-sipa:

Yunga anumu Marianga pulu lierimu yombomane “Maria Josepone lipili.” ningi koronga niringi-na-kolo u Josepo pea seluna naa peangili Mini Kake Sélimuni Maria yunga olona bolango se mondondorumumu Maria yuyu pilierimu. <sup>19</sup> Kanu-kinia yunga ye Josepo yu ye sumbi nílimu molorumu-kulu Maria olo mondorumu kinia pilipale ‘Maria olie naa polopili.’ nimba ‘Yombo awisili molangi yu semu mele nimbu para naa sipu yu yuyu molomba kinia kiyongo nimbu we “Kamu pu.” niembo.’ konopu lierimu.

<sup>20</sup> Josepo aku sipa konopu kimbu sipa molopili Ye-Awylimunga angello sene Josepo uru kaima se sipa nimbale: “Josepo, ye nokoli kingi Depitini kalopa liltimu yemo, Mini Kake Sélimuni Maria ungu se serimu-kulu yu olo mondolemo kene nuni yu linindu pipili naa kolko, li.” ,nirimu., <sup>21</sup> “Yu kango kanopa limba. Kanu kangomone yunga yomboma ‘Ononga konopuna ulu-pulu-kiri selemelema pepili molkole mindili nonge.’ nimba ono lipa tapondopa, mindili nolemolá aulkana wendo lipa, yu-kinia pea molko kondonge aulkana lipa mondomba kene yunga imbi siku “Yesusi” nieni.” nirimu.

<sup>22</sup> Aku sipa wendo orumu uluma pali koronga-u Pulu Yemone ungu-umbu tondorumuma pilipa yomboma nimba sirimu ye sene ulu mare pe wendo ombá u nirimu mele kamu wendo orumu. Akumu i-sipa:

<sup>23</sup> “Piliayo.

Ambo wenepo sene bolango olo mondopale  
kango se memba.

Kanu-kinia yunga imbi siku “Imenuele” ningí.”

nirimu. I imbibimunga ungu-pulumu ‘Pulu Yemo olio-kinia molemo’.

<sup>24</sup> Josepo uru pepa makilipale Ye-Awilimunga angellomone nirimu mele pilipa lipa sepale ambomo liltimu. <sup>25</sup> Aku-na-kolo yu bolangomo u naa mepili “Seluna naa peambili.” nirimu. Pe Mariane kango se merimu kinia Josepo yuni yunga imbi sipa “Yesusi” nirimu.

## 2

2:1-12

### *Pilipa Kondoli Peli Ye Pokore Yesusi Ongo Kanoringi Semanemo*

<sup>1</sup> Erote kolea Judia disiriki yombomanga ye nokoli kingimu molopili Mariane kolea Judia, Betellieme taonona Yesusi merimu. Kanu walemanga ena wendo oli koleana pilipa kondoli peli ye pokore alieli ‘ulu mare wendo okomonje piliamili.’ ningu kombokandima mimi siku kanoko moloringi yema kolea-awili Jerusalleme ongo ninguli: <sup>2</sup> “Juda yombomanga ye nokoli kingimu molomba kango meringimu sena molemoye? Olio ena wendo olemo koleana molopole ye se ye nokoli kingimu molomba meringimu lipa ora sili kombokandi se pulu-pulu wendo ombo gilierimu kanopole nirimulumuni, yu popo topo imbi ambolopo paka tondomolondo okomolo.” niringi.

<sup>3</sup> Ye nokoli kingi Erote i ungumu pilipale ‘Ye se yu kolali sepa kingimu molomba lepomo.’ nimba pilipale yu mini-wale mundupa, Jerusalleme yomboma pali mini-walela mundoringi.

<sup>4</sup> Kanu-kinia yuni Juda yombomanga Pulu Yemo popo tondoringi ye awilima pali kinia, Pulu Yemonga ungu-manemanga puluma pilku mane siringi yema pali kinia, “Sukundu waa.” nimbale ono mangilipa pilipa nimbale: “Pulu Yemone “Ono nokopa kondomba ye se lipu mundumbu.” nimba, nimba talitorumu ye nokoli Karasimu sena mengemondo niringiye?” nirimu.

<sup>5</sup> Onone yundu ninguli: “Kolea Judia disiriki sukundu Betellieme taonona yu menge. Pulu Yemone ungu-umbu tondorumuma pilipa yomboma nimba sirumu ye ‘Maikane, pe aku sipa wendo ombámondo u nimba boku torumu akuna molemo kanumu. Yuni nimbale:

<sup>6</sup> “Betellieme, Juda koleana sukundu lemó kolea se,  
yu kolea Juda sukundu kolea-awilimanga  
yu kolea mania se mólo.

Yunga sukundu ye nokoli awili se wendo ombá,  
aku yemone nanga Isirele yombomanga  
sipisipi tapu-yemo molopa ono nokomba.”  
nirimu kanumu.” niringi.

<sup>7</sup> Kanu-kinia we-yomboma naa kanoko naa pilku molangi Erotene pilipa kondoli peli yema “Waa.” nimba kombokandimu pulu-pulu wendo ombo gilierimu walemo mangilipa pilipale nirimumuni, yundu ningu siringi kinia <sup>8</sup> pilipa onondo nimbale: “Ono Betellieme pungu kangomo wamoko koro-pay! Kanoko lendekole na ongo ningu sieyo. Na kepe yu ombo popo topo imbi ambolopo paka tondambo wambo.” nirimu. <sup>9</sup> Kingimuni aku sipa nirimu pilkuli ono kelko pungu kano-puringi.

Kanu-kinia ena wendo oli koleana molkole kombokandi kanoringimu ono puringina kumbi lepa pumbá pumbale kangomo molorumu ulka imuna pumba ola gilierimu. <sup>10</sup> Onone kombokandimu kanokole konopu paa awili seko siringi. <sup>11</sup> Ulkana sukundu punguli kangomo kinia anumu Maria kinia moloringilina pungu kanoko lenderingi. Kanokole kangomonga kumbikerena komorongo toko pondoko ma kanokole yu popo toko imbi ambolko paka tondoringi. Paka tondokole ono wale peanga mengo oringima apisiku méle peangama wendo liku yu siringi. Kou-gollo

kinia, paura kalolemele kinia muna paa toli paura se kinia, wambola muna paa toli se kinia, aku mélema yu siringi.

<sup>12</sup> Kanu-kinia Pulu Yemone ono uru-kaima sipa onondo nimbale: “Ono Erote molemona kelko pu naa pangí, mólo.” nirimu kinia pilkuli ono aulka senga lupa ongole ulkando puringi.

**2:13-15**

### *Josepone Anumu Malotolo Kolea Isipi Memba Kowa Purumu Semanemo*

<sup>13</sup> Kanu-kinia pilipa kondoli peli yema kelko puringi kinia Ye-Awilimunga angello sene Josepo uru-kaima sipa nimbale: “Ye nokoli kingi Erotene nondopa yunga ami-yemando “Kangomo koroko toko kondo-paa!” nimbá kene nu ola molkole kangomo kinia anumu kinia liku mengo kolea Isipindu kowa pungu molo-payo. Ne anju molkole ningimuni, pe nane “Kelko yando waa.” nimbú kinia wangí. U mólo.” nirimu. <sup>14</sup> Aku nirimu kinia pilipale Josepo ola molopale ipulieli anungulutolo lipa memba Isipindu purumu. <sup>15</sup> ‘Erote kolomba kinia kelepo ulkando pumulú.’ ningu u Isipi anju moloringi. Aku seringimunga Pulu Yemone ungu-umbu tondorumuma pilipa yomboma nimba sirimu ye ,Osia,ne ulu se pe wendo ombá u nirimu mele kamu wendo orumu. Akumu i-sipa:

“Pulu Yemone nimbale:  
“Nanga kangomondo

“Kolea Isipi munduku kelko  
wendou.” nirindu.” nirimu.”

nimba kanu ye ,Osia,ne nirimu kanumu.

**2:16-18**

### *Ye Nokoli Kingi Erotene Betellieme Kango-Pamema Topa Kondorumu Semanemo*

<sup>16</sup> Kanu-kinia anumu lapatolo Yesusi pea Isipi pungu molangi, pilipa kondoli peli yemane Erote yu liku peke tondoringi kinia pilipale Erote yuni mumindili paa awili sepa kolorumu. Mumindili kolopale ami-ye marendo nimbale: “Betellieme taono kinia Betellieme nondopa lemó koleama kinia kanumanga pungu kango kalia-ingi talo ombo puli kangoma kinia kalia-ingi talo naa pora nili kangoma kinia koroko toko kondo-paa!” nirimu. Kombokandi kanoko pilipa kondoli peli yemane kombokandimu pulu polopa wendo ombo gilierimu walemo yundu ningu siringi mele pilipale kalia-ingi aku sipa nirimu.

<sup>17</sup> Aku sipa serimumunga koronga-u Pulu Yemone ungu-umbu tondorumuma pilipa yomboma nimba sirimu ye Jeremayane ulu se pe wendo ombá u nirimu mele wendo orumu. <sup>18</sup> Yuni nimbale:

“Ono kolea Rama sukundu ungu se pilieringi;

    kola seringi pilku,  
yombo kololemele kinia kola selemele mele  
    kola aku siku seringi pilieringi.

Ambo Reselene yunga bolangomanga kola serimu.

Yu ‘Konopu pe nipili.’ ninguli seringi-na-kolo

    yunga bolangoma naa moloringi-kulu  
        yu kondo kolopa mindi molorumu.”

nimba Jeremayane u aku nirimu kanumu.

**2:19-23**

### *Josepone Anumu Malotolo Kelepa Isirelendo Yando Memba Orumu Semanemo*

<sup>19</sup> Pe Erote kolorumu kinia Ye-Awilimunga angello sene Josepo Isipi molopili urukaima sipa nimbale: <sup>20</sup> “ “Kangomo toko kondangi koro-paa.” nirimu yemo kolorumu kene ola molko anumu malotolo liku mengo kolea Isirelendo kelko pu.” nirimu kinia

<sup>21</sup> pilipale yu ola molopa anumu malotolo lipa memba Isirelendo purumu.

<sup>22</sup> Aku-na-kolo Akellesi yunga lapa Erote kolali sepa ye nokoli kingimu molopa kolea Judia disiriki nokorumu pilipale Josepo yu kanuna kelepa pumbándo pipili kolorumu. Kanu-kinia Pulu Yemone uru-kaima sipa nimbale: "Marena tongenje kene akuna naa pu." nimba yundu liepi-liepi torumu kinia yu kelepa kolea Gallilli disiriki pumba <sup>23</sup> akuna lierimu Nasarete taonona pumba molorumu-kulu Pulu Yemone ungu-umbu tondorumuna pilku yomboma ningu siringi yemane ‚Yesusi-kinia, ulu se pe wendo ombá u niringi mele kamu wendo orumu. Onone ninguli:

"Yombomane yu imbi leko

"Yu Nasarete taono ye se." ningí."

niringi kanumu.

### 3

3:1-12

#### *No Lindeli Jonone Konopu Topele Toringi Yomboma No Linderimu Semanemo*

<sup>1</sup> ‚Yesusi Nasarete taonona we molopili, No Lindeli Jono omba kolea Judia disiriki sukundu kolea ku lielina opa-ungu nimbale: <sup>2</sup> "Pulu Yemo ye nokoli kingimu molomba walemo nondopa wendo ombá sekemo kene ononga ulu-pulu-kiri seringi konopuna pelemoma munduku kelko konopu topele taa." nirimu.

<sup>3</sup> Kanu yemo ‚u naa molopili paa koronga-u, Pulu Yemone ungu-umbu tondorumuna pilipa yomboma nimba sirimu ye Aisayane Pulu Yemonga ungu se nimba sipa boku torumu. Kanu ungumu i-sipa:

"Kolea ku lielina yombo senga kerena

ungu se nimbale:

"Awilimu ombá aulkamo seko wamondaa.

Yu ombá aulka kangama

toko sumbi siee." nikimu."

nirimu. ‚Jonone paa pe sembá mele Aisayane u aku sipa nimba panjipa bokuna torumu..

<sup>4</sup> Jono yu kongi kemelenga indimuni seli wale se pakopa, kongi kangimuni seli kako se topale, kuli-kulkumba kinia pilimu-no kinia aku langitolo mindi nomba molorumu. <sup>5</sup> Kanu-kinia kolea-awili Jerusalleme yomboma kinia Jerusalleme lierimu kolea Judia disiriki pali yomboma kinia kolea Jodane pali yomboma kinia kanu yemo molorumuna punguli niringimuni, <sup>6</sup> no Jodane sukundu punguli onone ulu-pulu-kiri seringima ningu para siringi kinia yuni ono no linderimu. <sup>7</sup> Yuni ‚Juda yombomanga ye awili, Parisima kinia Sadusima kinia awisili no lingíndu oringi kanopale nirimununi, ono iri topa nimbale:

"Kolo topa yomboma sepa kinjeli wambiyemonga waloma, Pulu Yemo mumindili kolomba walemonga nawene "Ono talopa leko paa." nimu kinia ono 'Pulu Yemone naa sepa kinjepili.' ningu 'No liemili.' ningu okomeleye? <sup>8</sup> Ono sumbi siku molko, ulu peangama mindi seko molonge kinia ono ulu-pulu-kiri seringima paa sika munduku kelko konopu topele tongue mele mona lemba. <sup>9</sup> "Olio anda-kolepa Eporayamone kalopa liltimu yomboma molemolomonga yombo peangama molemolo." ningu aku siku ningu naa piliaa. Nane ono nimbu sikiru: 'Pulu Yemone i koumando "Eporayamone kalopa liltimu yomboma au leangi." nilkanje kouma Eporayamone kalopa liltimu yomboma molemolá.' nikiru. Ono Eporayamone kalopa liltimu yomboma molemelemonga unguri naa selemo.

<sup>10</sup> "Unju peke tomba lumu Pulu Yemone koronga unju puluna ambolopa ola lipa molemo. Unju mongo peanga naa tomba unjuma yuni peke topale sepena kalomba.

<sup>11</sup> Nane ulu-pulu-kirima siye kolko konopu topele tolemele yomboma sika no lindiliu. Aku-na-kolo ye se akilepa ombámo yuni ‚Pulu Yemonga, Mini Kake Sélimu kinia sepemo kinia ono lindimba ‚lingí.. I nanga bulkundu akilepa ombá yemo yunga

tondolomo paa olandopa, nanga tondolomo paa maniandopa. Na yu-kinia manda mólo. Yombo awilimanga kongono kiri seli kendemande-yombomane sika ononga yombo awilimanga kongono kiri sendengendo kimbu-su wendo lindilimili-na-kolo nanga akilepa ombá yemonga kimbu-su wendo lindimbu kanu kongonomo paa olandopa mele nane sendembo manda naa selka, „na ye paa kiri.„

<sup>12</sup> “Yuni yunga rasi-witi apurolí apulu-pokomo ambolopale yunga rasi-witi mongoma kinia rasi-witi kiluma kinia apurumbando molemo. Yunga rasi-witi apurolí polomo sepa wamombando rasi-witi pali ‘wendo liembo.’ nimba apurupale mongoma lipa rasi-witi taltolemo mingina ‘Liepili.’ nimba taltombando mingi topa, pe kiluma lipa maku topa sepe naa kumbulupa nomba pepa mindi pulimúna kalomba.” nirimu.

*3:13-17*

### *Jonone Yesusi No Linderimu Semanemo*

<sup>13</sup> Jonone yomboma no lindipa molopili Yesusi kolea Gallilli disiriki mundupa kelepale nirimumuni, ‘Jonone na no lindepili.’ nimba Jono no Jodane molorumuna yu purumu. <sup>14</sup> Orumu kinia Jonone nimbale: “Aku paa mólo. Nane nu no nambi sepo lindambo ningu nikinuye? Nuni na no lindilinanje peanga.” nirimu.

<sup>15</sup> Aku-na-kolo Yesusini pundu topa nimbale: “Mólo. Ulu kake seli uluma pali manda sepili kene nikiru mele sei.” nirimu. Kanu-kinia Jonone “Manda.” nimbale yu no linderimu.

<sup>16</sup> Yesusi no lipa pora sipale nona sumbi sipa wendo orumu. Wendo ombá orumu kinia mulúmu kengeya lepa anju yando purumu, Pulu Yemonga Minimu, kera waembono mele, mania om̄ba Yesusi molorumuna pumba kangina ola molorumu kanorumu. <sup>17</sup> Kanu-kinia muluna ola ungu se wendo ombale, “I nanga konopu mondolio kangomo. Yu-kinia konopu sипу molio.” nirimu.

## 4

*4:1-11*

### *Kurumanga Nokoli Setenene Yesusi Kondi Torumu Semanemo*

<sup>1</sup> Yesusi „no lillimu kinia Pulu Yemonga Minimu yu-kinia om̄ba molopale nirimumuni, „Minimu yuni ‘Kurumanga nokoli, depelemone yu kondi topili.’ nimba Yesusi kolea ku lielina memba purumu. <sup>2</sup> Akuna Yesusi oli se koro talo mele kere-langí naa noli we molopa perimu kinia yu gelene kolopa molorumu.

<sup>3</sup> Kanu-kinia kondi toli „kuru Setene, om̄ba yundu nimbale: “Nu Pulu Yemonga Malo liemu i kouma ‘Pellawa kaloli au liepili.’ ni.” nirimu.

<sup>4</sup> Aku-na-kolo yuni pundu topa nimbale: “Pulu Yemonga bokumuni nimbale: ‘Kere-langimane mindi

yomboma konde mololi ulu-pulumu naa silimú.

Pulu Yemone ungu nilimúma pali

pilku liku sekó molonge kinia

konde mololi ulu-pulumu lingí.’

nimbá molemo.” nirimu.

<sup>5</sup> Kanu-kinia depelemone Yesusi lipa kolea-awili Jerusalleme, akumundu ‘kolea-awili kake seli’ nílimu, akuna memba pumba Pulu Yemo popo toko kaloringi ulka-tembelena memba, paa ola imuna pumba anjipale nirimumuni, <sup>6</sup> yundu nimbale: “Nu Pulu Yemonga Malo liemu nu lipa tapondomba kene po ningu mania pu.” „nirimu.” “Pulu Yemonga bokumuni nimbale:

‘Pulu Yemone yunga angellomane

‘Nu ongo nokangi.’ nimbá.

Onone nu ‘Kou sene kepe naa topili.’ ningu

nu ononga kimane okoko lingí.’  
nimba molemo kanumu. Aku sipa nirimu kene pilkuli aku siku sei.” nirimu.

<sup>7</sup> Yesusini yundu nimbale: “Pulu Yemonga yombomando ungu se pea nimba molemóna. Akumu i-sipa:  
‘Pulu Yemo ononga Ye-Awilimuni “Sembó.” nilimú mele  
‘Sika nilimúnje molo kolo tolemonje kanamili.’  
ningu onone yu manda manjiku naa sangi.  
nimba molemóna kanumu.” nirimu.

<sup>8</sup> Kelepa depelemone yu lipa mulu se paa olandopa lierimuna ola memba pumba anjipale, yu ma-koleama pali kinia koleamanga méle peangama pea lipa ora sipa <sup>9</sup> yundu nimbale: “Nu nanga kumbikerena komorongo toko pondoko mania molko na popo toko nanga imbi ambolko paka tondonu liemu i nu kanokono ma-koleana lemó mélema pali nu simbú.” nirimu.

<sup>10</sup> Kanu-kinia Yesusini yundu nimbale: “Setene, nu anju pa! Pulu Yemonga bokumuni nimbale:  
‘Pulu Yemo ononga Ye-Awilimu manjiku popo toko  
imbi ambolko paka tondoko,  
yunga kongonoma manjiku sendeko molangi.’  
nimba molemo kanumu.” nirimu.

<sup>11</sup> Kanu-kinia depelemo Yesusi yu mundupa kelepa yu purumu. Purumu kinia mulu-koleana angelloma ongo Yesusi nokoringi.

4:12-17

### *Yesusini Kolea Gallilli Disiriki Pulu Polopa Yomboma Ungu Nimba Sirimu Semanemo*

<sup>12</sup> Kanu-kinia „No Lindeli, Jono ka siku ka-ulcana panjeringi kinia pilipale Yesusi kelepa kolea Gallilli disirikindu yando omba <sup>13</sup> Nasarete taonona ombale nirimumuni, pe aku taonomo mundupa kelepa Kapeniamate taono, nomu Gallilli kelona lierimu, akuna pumba ‘Kiniá i koleamo nanga kamu molombo koleamo liepili.’ nimba akuna molorumu. Kapeniamate ye Sepullano kinia Napatallaitolone kalko liltungili yomboma u moloringi koleana lierimu. <sup>14</sup> „Kapeniamate taonona pumba molorumumunga, koronga-u Pulu Yemone ungu-umbu tondorumuma pilipa yomboma nimba sirimu ye Aisayane ulu se pe wendo ombá u nirimu mele kamu wendo orumu. Aisayane nimbale:

<sup>15</sup> “Sepullanone kalopa liltimu yomboma  
pelemele koleamo kinia,  
Napatallaini kalopa liltimu yomboma  
pelemele koleamo kinia,  
nomuna pulimú aulkamo no Jodane nekendo  
lemó koleamo kinia,  
kolea Gallilli wikindu yombo-lupa awisili  
molemele koleamo kinia,  
aku koleamanga molemele yomboma  
„paa simbulu tolina molemele.”

<sup>16</sup> Kanu yombo paa simbulu tolina molemelema  
pa tondolo paa awili-sepa seli se kanoringi.  
Kololi ulu-pulumu aki topa simbulu tondolemo  
koleana pelemele yombomanga koleana  
pa sendekemo.”

nirimu.

4:17—9:34

## **Yesusini Pulu Yemo Ye Nokoli Kingimu Molopa Mélema Nokombamonga Semane, Peangamo Topa Sipa, Kuru Torumu Yomboma Sepa Peanga Sirimu Semanema**

<sup>17</sup> „Kapeniame omba molorumu, kanu walemonga Yesusini yomboma pulu polopa unguma nimba sipa nimbale: “Pulu Yemo ye nokoli kingimu molopa nokomba walemo nondopa wendo ombá sekemo kene , ‘Pulu Yemo yuni nokomba yombo-manga talapena sukundu molamili.’ ningu, ulu-pulu-kiri selemelema munduku kelko konopu topele taa.” nirimu.

**4:18-22**

### *Yesusini Ye Kisendo “Na Lombili Waa.” Nirimu Semanemo*

<sup>18</sup> Yesusi nomu Gallilli kelona andopale genungulu talo kanorumu, akutolo Saimono kinia genu Enderutolo oma lili wale se nomuna toko munduku moloringili kanorumu. Pe Saimononga imbi se Pita niringila. Oma liltingili akumu olonga kou-kongono seringili kanumu. <sup>19</sup> Aku siku seko moloringili kanopa nimbale: “Na lombili wangili. Oma lingilindu oma lili wale se liku nona mania mundulimbili kinia omama walena omba pelemo mele, pe ‘nanga kongonomo sengelendo nanga ungumu pilku ningu siliku andongele kinia yomboma nanga talapena sukundu ongo molangi.’ nimbu ‘Olo na lombili wale.’ nikiru.” nirimu. <sup>20</sup> Aku nirimu kinia pilkuli popenge seko olonga oma lili walema munduku kelko Yesusi lombili puringili.

<sup>21</sup> Kanu-kinia yu kanga-kolte wiltu pumbale genungulu talo lupa kanorumu, akutolo Seperi malo Jemisi kinia Jemisi genu Jonotolo, lapa Seperi kinia ononga nona andoli sipina sukundu oma lili walema toko tandoko moloringi kanopale olo mangilipale “Na lombili wale.” nirimu. <sup>22</sup> Aku nirimu kinia pilkuli olonga lapa Seperi kinia nona andoli sipimu popenge seko munduku kelko Yesusi yu lombili puringili.

**4:23-25**

### *Yesusini Kolea Gallilli Disiriki Ungumu Nimba Silipa Andopa Yombo Kuru Torumu Awisili Sepa Peanga Sirimu Semanemo*

<sup>23</sup> Kanu-kinia Yesusi kolea Gallilli disiriki sukundu koleamanga pali andopa, yomboma maku toko Pulu Yemonga ungumu pilieringi ulkamanga yomboma ungu-mane sipa, Pulu Yemo nondopa ye nokoli kingimu molopa nokomba mele semane peangamo topa sipa, yombo kuru lupa-lupa torumuma kinia kangina ulu awisili serimuma sepa peanga sirimu.

<sup>24</sup> Yuni serimu mele semanemo kolea Siria poropinji koleamanga pali anju anju purumu pilkuli ononga yombo kuru lupa-lupa torumu yomboma kinia, mindili lupa-lupa nongo moloringi yomboma kinia, yombomanga konopumanga kuru molko amboloringi yomboma kinia, amu toringi yomboma kinia, kimbu ki kukorumu yomboma „pali„, yu molorumuna mengo oringi kinia yuni ono sepa peanga sirimu. <sup>25</sup> Yombo paa awisili yu lombili puringi. Kolea Gallilli disiriki yomboma kinia, ‘Kolea-Awili Rureponga Talo’ niringi kolea yomboma kinia, kolea Judia disiriki lierimu kolea-awili Jerusalleme yomboma kinia, kolea Judia sukundu lierimu we-koleamanga moloringi yomboma kinia, no Jodane nekendo koleamanga yomboma kinia, paa awisili yu lombili puringi.

**5:1—8:1**

## **Yesusini Yu Lombili Andoringi Yomboma Ungu-Mane Sirimu Unguma**

## 5

<sup>1</sup> Yesusini yombo awisili maku toko yu lombili puringima kanopale ma-pangina ola pumba molorumu kinia yu lombili andolima yu molorumuna oringi. <sup>2</sup> Kanu-kinia yuni ono ungu-mané sipa nimbale:

5:3-12

*Olio Konopu Peanga Pepili Molomolo Ungu-Pulumu Yesusini Nimba Sirimu Semanemo*

<sup>3</sup> "Yombo konopuna koropa pulimú pilielemene yomboma Pulu Yemo ononga ye nokoli kingimu molopa ono nokolemomonga ono "Konopu peanga pepili molko kondangi." nilimú aulkana molemele.

<sup>4</sup> "Yombo kola seko konopu kiri pepili molemele yomboma Pulu Yemone "Ono konopu peanga pepa toyombo topili." nimbámonga ono "Konopu peanga pepili molko kondangi." nilimú aulkana molemele.

<sup>5</sup> "Yombo taka leko molko yombo lupama pilku molemele yomboma ma-koleama pali Pulu Yemone ono simba lingímunga ono "Konopu peanga pepili molko kondangi." nilimú aulkana molemele.

<sup>6</sup> "Pulu Yemone "Saa." nilimú ulu sumbi nilima sengendo yakala kolko molemele yomboma manda molongemonga ono "Konopu peanga pepili molko kondangi." nilimú aulkana molemele.

<sup>7</sup> "Yombo lupama kondo kololemele yomboma Pulu Yemone kondo kolombamonga ono "Konopu peanga pepili molko kondangi." nilimú aulkana molemele.

<sup>8</sup> "Yombo konopu kake sepili molemele yombomane Pulu Yemo kanongemonga ono "Konopu peanga pepili molko kondangi." nilimú aulkana molemele.

<sup>9</sup> " 'Yomboma konopu seluna pupili molangi.' nilimili yomboma Pulu Yemone 'Ono nanga bolangoma.' nimbámonga ono "Konopu peanga pepili molko kondangi." nilimú aulkana molemele.

<sup>10</sup> "Pulu Yemone "Saa." nilimú ulu sumbi nilima seko molemelemonga yombo lupamane ono mindili silimili 'akumunga, Pulu Yemo ononga ye nokoli kingimu molombamonga ono "Konopu peanga pepili molko kondangi." nilimú aulkana molemele.

<sup>11</sup> "Na pilku molemele yomboma, ono nanga yomboma molemelemonga we-yombomane ono ungu-taka tondoko mindili siku, ungu kiri lupa lupama ononga bulkundu kolo toko nindingí kinia ono "Konopu peanga pepili molko kondangi." nilimú aulkana molemele. <sup>12</sup> Yombomane ono aku siku mele selemelemonga, ono mulu-koleana pungí kinia kanuna Pulu Yemone ono méle kalopa kondomba kene konopu paa awili seko siku konopu peanga pepili molayo. Yombomane kiniá ono mindili silimili mele aku siku ono naa molangi koro-u Pulu Yemone ungu-umbu tondorumuma pilku yomboma ningu siliku andoringi yomboma we-yombomane ono kepe mindili siringila kanumu." ,nirimu..,

5:13

*Olio Api-Kusamo Mele Molemolo Ungu-Ikumu*

<sup>13</sup> "Ono ma-koleana yombomanga api-kusa mele molemele. 'Akumu méle peanga-,na-ku loyu songo naa sembá kinia 'Yu kelepa songo sepili.' nimbu ungu se manda semoloye? Yu kongono sembá tondolo se kelepa naa pembamonga we topo eltomolo kinia yomboma kimbumane kulku sembambu singí kinia papu.

5:14-16

*Olio Pa Sélimu Molemolo Ungu-Ikumu*

<sup>14</sup> "Ono ma-koleana yombomanga pa sendelima molemele. Kolea-awili ma-pangina ola lembamo manda lopi naa senge. <sup>15</sup> Yombomane sepe-llame kandokole mingina sukundu naa panjilimili. 'Mélema kanangi, ulka sukundu pa sepili.' ningu polo senga

ola taltolemele. <sup>16</sup> Aku sipa mele ‘Olione ulu peangama selemolo mele yombomane kanokole olionga Lapa, mulu-koleana molemomo, kape niengi.’ ningu ononga pa selemomone yomboma kanangi, pa sendangi.” ,nirimu.,

**5:17-20**

### *Mosisini Pulu Yemonga Ungu-Mane Sirimumanga Ungu-Pulu Se*

<sup>17</sup> “Nane ‘Pulu Yemonga ungu-manema ,Mosisini, bokuna torumu unguma kinia Pulu Yemone ungu-umbu tondorumuma pilku yomboma ningu siringi yemane bokuna toringi unguma kinia ‘mania pupili.’ nimbá okomo.’ ningu naa piliangi. Nane ‘Kanu unguma kamu mania pupili.’ nimbú naa okoro. ‘Aku ungumanga ungu-pulu pelemoma kamu wendo opili.’ nimbú okoro. <sup>18</sup> Nane onondo paa sika nikiru: “Mulu matolo u pora naa nipili Pulu Yemonga ungu-manemanga ungu kanga-kolte kepe paa we mania naa pumbá. Ungu-manemanga pali ungu awili kangamanga pali kongonoma u wendo ombá.” nikiru. <sup>19</sup> Akumunga, yombo sene kanu ungu-manemanga ungu-mane kanga se kepe pulua topa, yombo lupama mane sipale “Pulua tangi.” nimbá yombomo Pulu Yemo ye nokoli kingimu molopa nokolemo koleana yunga imbi paa mania molomba. Aku-na-koło yombo sene kanu ungu-manema pilipa lipa sengena panjipa molopa, yombo lupama mane simba yombomo Pulu Yemo ye nokoli kingimu molopa nokolemo koleana yunga imbi paa olandopa molomba. <sup>20</sup> Nane ono nimbu sikiru: “Parisima kinia Pulu Yemonga ungu-manemanga puluma pilku mane silimili yema kinia onone ulu sumbi nilima selememe ungumanga olandopa ono we-yombomane naa engi liemu, Pulu Yemo ye nokoli kingimu molopa yombo nokolemo talapena sukundu ono paa naa pungu molonge.” nikiru. ‘Kanu yemane ungu-manema pilkuli selememe mele lupa. Pulu Yemone kanopa ulu sumbi nilima nimba kanolemo mele lupa.,’ ,nirimu.,

**5:21-26**

### *Mumindili Kololimunga Ulu Se*

<sup>21</sup> “Koro-u ,Mosisini, anda-kolepalimando ungu-mane se sirimumu ono pilielemele. Kanu ungu-manemo i-sipa:

“Ono yomboma toko naa kondangi.

Yombo topa kondomba yombomo kotena liku anjiku

“Yu pundu topili.” ningu umbuna singí.”

nirimu kanumu. <sup>22</sup> Aku-na-koło kiniá nane ono kanu ungu-manemonga ungu-pulumu i nimbu simbú sekero: “Yombo sene yunga genu kinia mumindili kolomba yombomo ,willisi-,kotena liku anjiku “Yu pundu topili.” ningu umbuna singí.” nikiru. Yombo sene yunga genundu ungu-taka tondopa “Nu kamakoye?” nimbá yombomo poropinjili-kotena mengo pungu kote sendenge. Yombo sene yombo sendo “Nu paa kongi mele aroma tolimu!” nimbá yombomo sepe-koleana pumbá.

<sup>23</sup> “Aku siku senge yomboma umbuna menge kene nuni ‘Pulu Yemone na kanopa peanga piliepili.’ ningu yunga mélema sepena kaloli polona Pulu Yemo kongi molo kera popo toko kalko sinindu mengo ongole nu genane nu-kinia we mumindili se kolomba pilkuli ninimuni, <sup>24</sup> nu Pulu Yemo kalko sini mélema Pulu Yemo popo toko kaloli polo pundukundu we liepili taltokole kelko anju pungu genando “Konopu seluna pupili sere lepo manda molambili.” ningu pungu ni-punguli, pe kelko ongo nu Pulu Yemo kaloni mélema ongo yu kalko sieni.

<sup>25</sup> “Nu kote sendemba sembá yombomo ‘Konopu seluna pupili manda molambili ungu se sambo.’ ninguli welea sani. Aku naa senu liemu nu kote sendemba yombomone nunga kote pilieli yemo molombana memba pumba simbanje. Pe kote pilieli yemone nu ka-ulka nokoli yemo lipa simba, yuni nu ka-ulkana lipa mundumba.

<sup>26</sup> Nane nundu paa sika nimbu sikirumu: “Nu ka-ulkana wendo onindu pundu paa pali tokole mindi wendo onimu. We manda wendo naa oni.” nikiru.” „nirimu..”

5:27-30

### *Wa Ulu-Kirinale Sélimunga Ungu Se*

<sup>27</sup> „U Mosisini, ungu-mané se sirimumu ono pilieleméle.

Kanu ungu-manemo i-sipa:

‘Ambo ye pulima ye lupama kinia  
wa ulu-kirinale naa seko,  
ye ambo lilima ambo lupama kinia  
wa ulu-kirinale naa sangi.’

nirimu kanumu. <sup>28</sup> Aku-na-kolo kiniá nane ono „kanu ungu-manemonga ungu-pulumu, i nimbu sikiru: “Ye sene ambo se kanopale ‘Yu pea kopu sepo pelembolánje papu.’ konopu lemó akumu konopuna sukundu ambomo kinia kamu wa ulu-kirinale selemo.” nikiru.

<sup>29</sup> “Nunga mongotolone mélse kanokole konopuni ‘Liemboa.’ ningú pilku ulu-pulu-kiri se senu liemu mongotolo akuku eltani. Nunga mongotolo giliepili nu sepe-koleana liku mundungí kinia manda naa sembá kene kangimunga mélse wendo liku eltokole molko kondoni kinia papu. <sup>30</sup> Nunga kitolone ulu-pulu-kiri se senu liemu aku kitolo kari leko eltani. Nunga kitolo giliepili nu sepe koleana liku mundungí kinia manda naa sembá kene kangimunga mélse wendo liku eltokole molko kondoni kinia papu.” „nirimu..”

5:31-32

### *Yemane Ononga Amboma “Kamu Paa.” Nilimilimunga Ungu Se*

<sup>31</sup> „U Mosisini, ungu-mané se sipa nimbale:

“Ye sene yunga ambomondo  
‘Kamu pupili.’ nimba makorombando  
ambomo “Kamu pu.” nimbá mele  
pepá se topa ambomo sipale

yundu “Kamu pu.” nimbaaku sepili.”

nirimu kanumu. <sup>32</sup> Aku-na-kolo nane kiniá ono nimbu sikiru: “Ye puli ambo se ye se kinia wa ulu-kirinale naa sepili yunga yemone yu makoropa “Kamu pu.” nimu liemu ‘Wa ulu-kirinale seli ambomo molopili.’ nimbaaku selemo. “Pu.” nimba makorolemo ambomo pe ye sene yu limú kinia kanu yemo kepe wa ulu-kirinale selemóna.” nikiru.” „nirimu..”

5:33-37

### *“Ono ‘Ungu Se ‘Sika Nikimulu.’ Ningú Kuru Mondangi.’ Ningú Mi Leko Pulu Yemo Imbi Naa Leangi.” Nirimu Ungu Se*

<sup>33</sup> “Koro-u „Mosisini, anda-kolepalimando ungu-mané se pea sirimumu ono pilieleméle. Kanu ungu-manemo i-sipa:

‘Paa sika sembó.” ningú, ningú panjiku  
mi lenge ungumu pulua naa tangi.

Awilimundu “Paa sika sembó.” ningú, ningú panjiku  
mi lenge mele paa sikaaku siku sangi.”

nirimu kanumu. <sup>34</sup> Aku-na-kolo kiniá nane ono nimbu sikiru: “ ‘Paa sika nikimu.’ ningú piliangi.’ ningú méle awili senga imbi leko paa mi naa leangi. Mulu-koleamo kepe imbi leko mi naa leangi. Aku koleamo Pulu Yemo molopa mélema nokolemo koleamo kene aku naa sangi.” nikiru. <sup>35</sup> Ma-koleamo kepe imbi leko mi naa leangila. Akumu Pulu Yemo yunga kimbu mundulimú polomo kanumu. Jerusalleme kepe imbi naala leangi. Akumu Ye Nokoli Kingi Paa Awilimunga kolea-awilimu kanumu.

<sup>36</sup> Nunga pengemo kepe. Akumu nuni penge-indi se ‘Kake sepili.’ molo ‘Pombora

topili.' ningu ulu se manda naa sení kene pengemo mangilku imbi leko mi naa leaa.  
 37 Ulu se sika sení liemu sumbi siku "Sembó." nieni. Naä sení liemu "Naa sembó." nieni. Ulu-kirimanga pali ulu-pulumu pelemo ,kuru,muni ambololemo yombomane mindi ungu sulu seko niliku pungu mi lemele." „nirimu..,

5:38-42

*Olio Seko Kinjingí Yomboma Pundu Naa Tamili Ungu Se*

38 „U Mosisini, ungu-maneme se sirimumu ono pilielemele. Kanu ungu-manemo i-sipa:

"Yombo sene yombo senga mongomo  
 topa akundumba kinia  
 yunga mongomo toko akundangila.  
 Yombo sene yombo senga ungúmu  
 topa langondomba kinia  
 yunga ungúmu toko langondangila."

nirimu kanumu. 39 Aku-na-kolo kiniá nane ono nimbu sikiru: "Ono sepa kinjimba yombomo anju unguri naa seko, 'We sepa kinjepili.' niengi. Yombo sene nunga kumbikere ekendonga laruwa tomba kinia topele toko 'Ekendonga kamu laruwa topili.' nieni." nikiru. 40 Yombo sene 'Nunga wale-pakolimu liembo.' nimba kote sendemba sembá yombomo nunga wale sulu peangamo kepe 'pea we lipili.' nieni. 41 „Romo ami, ye sene nu ambolopale "Nuni na liku tapondoko mako senga ,nanga mélema mendani, pambili." nimba kinia mako senga pea yu we liku tapondoko mélema mendeko pani. 42 "Mélse si." nimba mawa sembá yombomo mawa sembá mélemo we sieni. "Kou se pundu anjiku si." nimba yombomo "Mólo." naa nieni." „nirimu..,

5:43-48

*Yesusini "Opa-Tou Yomboma Konopu Mondaa." Nirimu Ungu Se*

43 „U Mosisini, ungu-maneme se sirimumu ono pilielemele. Kanu ungu-manemo i-sipa:

"Opa-geramemo konopu mondoko,  
 opa-toumu kanoko kiri piliani."

nirimu kanumu. 44 Aku-na-kolo kiniá nane ono nimbu sikiru: "Onone ononga opa-touma konopu mondoko, ono seko kinjilimili yomboma 'Pulu Yemone sepa kondopili.' ningu Pulu Yemo ononga ningu mawa sendangi. 45 Ononga 'Lapa mulu-koleana molemomonga bolangoma molamili.' ningu aku siku sangi." nikiru. Yuni yombo kiri peangama molemelena 'Ena topili.' nilimú. Yombo ulu sumbi nilima selemele yomboma kepe yombo ulu sumbi nilima naa selemele yomboma kepe ononga pea pali 'Lo topili.' nilimúla.

46 "Ono konopu mondolemele yomboma mindi konopu mondolemele kinia Pulu Yemone kanopa peanga pilimbaye? „Romo gapomano, kou-takisi limili yombo ,kirima, kepe anju yando akula selemele kene ,ono kanoko kiri pilielemele yomboma pea konopu mondonge kinia peanga. 47 Onone ononga pulu lemó yombomando mindi "Ono manda molemeleye?" nilimili kinia we-yombomane selemele mele maniadopa, onone selemele mele olandopaye? Ultukundu yombomane aku sikula naa selemeleye? 48 Akumunga „Mosisini sirimu ungu-manema we pilku naa seko, ononga Lapa mulu-koleana molemo ye paa sumbi nílimu molemo mele ono aku siku yombo sumbi nilima molangi." „nirimu..,

6:1-21

*Konopu Talo Peli Kolo Toli Yemane Ulu Peangama Selemele Mele Semolo Kinia Pulu Yemone Olio Méle Naa Kalomba Ungu Mare*

## 6

6:1-8

*Ulu Kake Selimanga Ungu Pokore*

<sup>1</sup> „Yesusini ungu mare nimba molopale nirimumuni, ungu mare pea nimbale: „ ‘Yombomane ‘Olio yombo paa peangama. Uluma paa sepo kondolemolo.’ ningu kanangi.’ ningu yomboma kanoko molangi ononga ulu peangama paa naa sangi. Aku siku senge kinia yombomane ono kape ningí. Kanu kape ningí unguma ononga méle kalólimu lingímunga ononga mulu-koleana molemo Lapamone ono méle naa kalomba.

6:2-4

*Yombo Koropa Pulima Lipu Tapondomolomonga Ungu Se ,6:1-21 pali kanani*

<sup>2</sup> „Ononga mulu-koleana molemo Lapamone aku siku senge yomboma méle naa kalomba, kene onone yombo koropa pulima kondo kolko ‘Lipu tapondamili.’ ningu kou-mone se singíndu ‘Semolo mele yombomane kanangi.’ ningu, ru ningu mélse naa siengi. Topele-mapele toli yemane ‘Na yombomane kape niengi.’ ningu yomboma maku toko Pulu Yemonga ungumu pilieli ulkamanga kinia aulkamanga kinia we-yombo awisilini mongone kanangi yombo koropama liku tapondolemele. Aku yemane selemele mele onone aku siku naa sangi. Nane onondo paa sika nimbu sikiru: “Aku selemelemonga ono yombomane kape nilimili unguma ononga méle kalólimu koronga limili.” nikiru.

<sup>3</sup> “Aku-sipa na-kolo onone yombo koropama kondo kolko mélse singíndu ‘Yombomane paa naa kanangi. Yombo se pea kopu sepo andolembolomone kepe naa kanopili, lopi sepo kiyongo nimbu lipu tapondambo.’ niengi. <sup>4</sup> Kanu-kinia yombomane naa kanangi, senge mele yombo se naa ningu sikuli koropa puli yombo se liku tapondonge kinia ononga ‘mulu-koleana molemo, Lapamone lopi seko selemele uluma kanolemomone ono méle kalomba.’ nirimu.”

6:5-15

*Pulu Yemo Kinia Ungu Nimbu Mawa Semolomonga Ungu Se ,6:1-21 pali kanani*

<sup>5</sup> “Ono Pulu Yemo kinia ungu ninguli topele-mapele toli yemane Pulu Yemo kinia ungu nilimili mele aku siku naa saa. Kanu topele-mapele toli yemane ‘Na ye paa peangamo molio mele yombo awisilini mongone kanoko na kape niengi.’ ningu yomboma maku toko Pulu Yemonga ungu pilieli ulkamanga kinia aulkamanga kinia yomboma kanoko molangi konopu siku gilku Pulu Yemo kinia ungu nilimili. Nane onondo paa sika nimbu sikiru: “Aku siku selemelemonga ono ononga méle kalólimu koronga limili kanumu.” nikiru. <sup>6</sup> Aku-sipa na-kolo ono Pulu Yemo kinia ungu ningíndu ononga suluminiana sukundu pungu ulka-kuna pipi sikuli kanu lopi seli koleana ononga ‘mulu-koleana molemo, Lapa naa kanolemele yemo-kinia ungu niee. ‘Yu akuna molemo.,’ Aku senge kinia ononga ‘mulu-koleana molemo, Lapa lopi seko selemele uluma kanolemomone ono pe méle kalomba.

<sup>7</sup> “‘Na Pulu Yemo kinia ungu niembo.’ ninguli Isirele talapemonga ultu molemele yombomane ononga kuruma molo pulu ye kolo tolima kinia ungu ningíndu we ungu awisili nilimili mele aku siku naa sangi. Kanu yombomane ‘Na ungu awisili nimbú kinia pilimba.’ ningu aku siku nilimili kanumu. <sup>8</sup> Ononga ‘mulu-koleana molemo, Lapamo u mawa naa sangi ono méle mólo tolemo mélema yuni pilipa kanolemo kene kanu yombomane selemele mele aku siku naa sangi.

<sup>9</sup> “Ono Pulu Yemo kinia ungu ningíndu i-siku niengi:  
“Olionga mulu-koleana moleno Tata,  
yombomane ‘Nu imbi ola molopa  
ye kake seli peangamo moleno.’

ningu molangi.

<sup>10</sup> Nu ye nokoli kingimu molko

yomboma nokoni walemo wendo opili.

Nunga ungumu mulu-koleana pilku liku selemele mele

aku siku ya ma-koleana pilku liku sangi.

<sup>11</sup> Olio kiniá kere-langi nomolo mele kiniá siyo.

<sup>12</sup> Yombomane olio seko kinjengi kinia

siye kolopo ulu se naa semulu mele

aku sikula olione nu sepo kinjemulu uluma

siye kolko olio ulu se naa seyo.

<sup>13</sup> Olio ‘Ulu sene kondi topili.’ naa nengu

ulu-kirimanga pali ulu-pulumu pelemo ‘kuru,muni

‘olio naa ambolopili.’ nengu yunga kína wendo liyo.

‘Nu koleama kinia mélemanga pali

ye nokoli kingimu molko,

tondolo olandopamo nu-kinia pepa,

nu imbi paa olandopa molopa

nu-kinia pa tondolo sepa pepili

alieli molko mindi pulinu kene

aku sipa sepili..’

ningu aku siku Pulu Yemo kinia ungu niengi.

<sup>14</sup> “Yombomane ono seko kinjingí uluma ‘We mania pupili.’ nengu siye kolongi liemu ononga mulu-koleana molemo Lapamone ononga ulu-pulu-kirima ‘Mania pupili.’ nimba siye kolombala. <sup>15</sup> Aku-na-kolo yombomane ono seko kinjingí uluma ‘We mania naa pupili.’ nengu siye naa kolongi liemu ononga mulu-koleana molemo, Lapamone ononga ulu-pulu-kirima ‘Mania naa pupili.’ nimba siye naa kolombala.” ‘nirimu..’

**6:16-18**

### *Kere-Langi Naa Nongo We Moloringi Ulu, Pulumunga Ungu Se 6:1-21 pali kananí*

<sup>16</sup> “Ono kere-langi naa nongo mi toko we molonge ungu-pulumu sengendo topele-mapele toli yemane ‘Na nono nimbu molambo.’ nilimili mele aku siku naa niengi. Kanu yemane ‘Na kere-langi naa nombondo mi topo molio mele yombomane kanangi.’ nengu ono kumbikere seko ononga kumbikerema seko kinjiku molemele. Nane onondo paa sika nimbu sikiru: “Kanu yemane aku selemeleonga yombomane ono kape nilimili unguma ononga méle kalólimu koronga limili.” nikiru.

<sup>17-18</sup> “Aku-na-kolo ono kere-langi naa nongo mi toko we molongendo ‘We-yombomane na aku sekero mele naa kanangi. Tatane manjipa kanopili.’ nengu we-yombomane kanonge unguma naa sangi. Aku senge kinia ononga mulu-koleana molemo, Lapa lopi seko selemele unguma kanolemomone ono méle kalomba.” ‘nirimu..’

**6:19-34**

### *Pulu Yemonga Mélema Konopu Kimbu Sipu Molopo Mana-Mélema Konopu Kimbu Sipu Naa Molamilimunga Ungu Se*

**6:19-24**

### *Mulu-Koleana Mélema Taltopo Mana-Mélema Yakala Naa Kolopo Molamilimunga Ungu Se*

**6:19-21**

### *Méle Kande-Kandema Mulu-Koleana Taltolemolomonga Ungu Se*

<sup>19</sup> “Ya ma-koleana méle taltolemelema urolo topa koka molo lurinia melemane ongo seko kinjiku, wa lili yema ongo mélema wa limili kene ‘ya mana, kamako molopo méle kande-kandema lipu taltamili.’ ni naa niengi. <sup>20</sup> Aku naa sekole mulu-koleana mélema urolo naa topa koka molo lurinia mélsene ombo sepa naa kinjipa, wa lili yema ongo wa naa limili kene ono mulu-koleana ‘pe pungimunga, ‘méle kande-kande pe limulúma u liepili.’ ningu ya ma-koleana ulu peangama seko molangi. <sup>21</sup> Ononga taltolemele mélema lemó kolea akuna ono konopuni pilku yakala kolko molemele kene ‘mulu-koleana mindi mélema liepili.’ ningu molangi.” nirimu..

6:22-23

*Yombomanga Mongomo Sepe-LLame Melemonga Ungu Se ,6:19-34 pali kanani*

<sup>22</sup> “Nunga mongomo nunga kangimunga sepe-llame melemo. Aku kene nunga mongo peanga gilimú kinia nu kangi pali pa sepili moleno kinia nu molko kondoleno. <sup>23</sup> Aku-sipa na-kolo nunga mongomo kiri lemba kinia nunga kangi pali simbulu topili andoni. Kanu-kinia nunga kangina pa seli pembamo topele topa simbulu tomba kinia akumu paa kamu simbulu tomba.” ,nirimu..

6:24

*Yombo Sene Ye Awili Talonga Kongono Waltikele Manda Naa Sembamonga Ungu Se ,6:19-34 pali*

<sup>24</sup> “Yombo sene ye awili talonga kongono lipa sere lepa manda naa sendeba. Ye awili se konopu kiri panjipa, se yakala kolomba. Molo aku naa semu liemu ye awili senga ungu nimbáma paa konopu sipa pilipa lipa kongono nimbáma tondolo mundupa sendepa, se konopu kiri panjipa yunga ungu nimbáma naa pilipa semba. Yombomane Pulu Yemonga kongonomo kinia Kou-Monemonga kongonomo-tolo liku sere leko manda naa sendenge.

6:25-34

*Yesusini “Na Lombili Andolemelema, Mini-Wale Munduku Konopu Awisili Naa Leaa.” Nirimu Ungumu ,6:19-34 pali*

<sup>25</sup> “Akumunga nane ono ‘senge mele, nimbu siembo: ‘Kangikundu molopo kondamili.’ ningu konopu awisili kimbu naa siengi. Kere-langí nongemonga kepe no nongemonga kepe mulu-maminia pakongemonga kepe akumanga konopu awisili kimbu siku naa molangi. Ono manda molonge mele ungu-pulumu kere-langí kinia mulu-maminia kinia mindiyé? <sup>26</sup> Kerama kaname. Kere-langí se panjikuli nou lemó kinia liku mengoulkando pungu taltoko naa nolemele-na-kolo ono yombomanga mulu-koleana molemo Lapamone kerama kere-langí silimú. Kerama we mele ono yomboma olandopamonga yuni ono naa nokombaye? <sup>27</sup> Ononga yombo sene konopu awisili kimbu simbamone yu kolomba ena se manda ‘We liepili.’ nimbáye? Manda naa nimbá.

<sup>28-29</sup> “Ono pakonge mélemanga konopu awisili nambi semu-na kimbu silimiliye? Pellawa-sindima mana olemo mele ono naa kanolemeleye? Pellawa-sindimane kongono kála seko naa seko, mulu-maminia se seko naa wamolemele-na-kolo pellawa-sindima molemele mele olandopa, ‘ye nokoli kingi, Sollomon kongono awisili sepale wale paa peangama pakopa au nirimu mele maniadopa. <sup>30</sup> Era sindi tolemoma kiniá-mele molemo, opali-mele poroko sepena kalolemelema Pulu Yemone aku sipa nokopa kondolemo liemu ono ‘Pulu Yemone olio manda nokombanje.’ ningu kanga-kolte mindi pilku kuru mondolemele yomboma pakonge mélemanga yuni manda lipa naa tapondombaye? Ono paa sika lipa tapondomba.

<sup>31</sup> “Pulu Yemone kerama kinia era sindima kinia aku we-mélema aku sipa nokolemo, kene ono konopu awisili kimbu sikuli ‘Es, kere-langí se sena lipu nomolonje?’ ; molo

‘No sena kolopo nomolonje?’ ; molo ‘Wale-pakoli sena lipu pakomolonje?’ ningu pilku naa molangi. <sup>32</sup> Pulu Yemonga yomboma naa molko ultukundu molemele yombomane aku siku selemene-na-kolo ononga mulu-koleana molemo Lapamone ono yunga yombomanga méle molo tolemoma kanopa molemo. <sup>33</sup> „Ono kere-langi nongemanga kinia mulu-maminia pakongemanga kinia konopu naa kimbu siku,, Pulu Yemo ye nokoli kingimu molopa yomboma nokolemo uluma kinia yu kanopa kake selemo kanolemo uluma kinia mélema kinia ‘Kumbi lepo sambo.’ konopu leko molangi. Aku senge kinia yuni we-mélema kepe ono simba. <sup>34</sup> Yuni aku sembá kene ‘Opali nambi sembonje?’ ningu kiniá konopu awisili kimbu naa siengi. Opalimunga kere-langi molo mélema aku opali, kiniámonga kere-langi molo mélema kinia, opalimunga kinia, liku sere leko naa piliangi. Enamanga yu-mele-mele umbunama pelemo pembama kanu enamanga, mindi. Kiniá umbuna wendo ombáma kinia opali talu umbuna wendo ombámanga kinia sere leko konopu kimbu naa siengi.” „nirimu..”

## 7

7:1-5

*Olio Anju Yando Apurupu Selemolo Mele Ungu Se*

<sup>1-2</sup> „Yesusini ungu mare nimba molopale ungu mare pea nimbale:„

“Onone anju yomboma ,selemene uluma, apurungí kinia aku sipa „Pulu Yemone, ono selemene mele yando apurumbala. Onone anju yombomane selemene mele apuruku kanokole “Seko kinjikimili. Sekemele mele Pulu Yemone kanopa kiri piliepili.” ningí mele „Pulu Yemone, aku sipa ono apurumba. Aku sembá kene ‘Pulu Yemone, olio ungu selemoloma naa apuropili.’ ningu onone yomboma selemene unguma naa apurangila.

<sup>3</sup> “Nuni genanga mongona norupulu se lemómo kanoleno-na-kolo nunga mongona unju-kaliu awili se lemómo naa kanoleno akumu nambi semu-na selenoye? <sup>4</sup> Nunga mongona unju-kaliu awili lemómo naa kanokole genando “Ano, nunga mongona norupulu se lemómo wendo lindambo.” nambi seko nilinuye? <sup>5</sup> Topele-mapele toli yombomo, nuni nunga mongona lemó unju-kaliu awilimu u wendo likuli pe kanoko kondoko genanga mongona lemó norupulumu manda wendo lindení.” „nirimu..”

7:6

“*Ungumu Pilkuli Liku Mokoli Senge Yomboma Semane-Peangamo Naa Toko Siengi.*”  
*Nirimu Ungu Se*

<sup>6</sup> “ ‘Pulu Yemonga’ nilimili mélema liku owáma naa sieme. Nombale pe topele topa ono nombanje kene aku naa sangi. Ononga méle peangama kongima gilingína toko naa mundangi. Kimbuni kulungíne kene aku naa sangi.” „nirimu..”

7:7-12

*Pulu Yemo Mawa Senge Mélema Simbamonga Ungu Se*

<sup>7</sup> „Lapa, mulu-koleana molemo yemo,, mélema mawa seko “Si.” niengi. Aku senge kinia mélema sika simba lingí. „Lapa molemona, mélema korangi. Aku senge kinia mélema sika kanoko lingí. Ulka kerepuluna gilku “Sukundu wamili.” niengi. Aku ningí kinia “Sukundu waa.” nimba ulka-kuna tondomba. <sup>8</sup> Mawa senge mélema sika simba lingí; koronge mélema sika kanoko lingí; “Sukundu wamili.” ningí kinia sika ulka-kuna tondomba. Aku sembá kene aku saa.

<sup>9</sup> “Ononga ye se yunga malo ombale “Tata, pellawa kaloli se nambo si.” nimbá kinia yunga lapane yu kou-mulu se simbaye? <sup>10</sup> Molo kangomone “Tata, oma se nambo si.” nimbá kinia yunga lapane wambye se simbaye? <sup>11</sup> Pe ono konopu kiri pepili molemele yombomane aku siku ononga bolangoma méle peangama silimili liemu ononga Lapa mulu-koleana molemomone “Mélema si.” ningu mawa senge yomboma méle peangama paa olandopa naa simbaye? „Paa simbamo..” <sup>12</sup> Akumunga,

'Yombomane nu-kinia sangi.' konopu leno mele nuni anju yomboma aku siku sani. 'Aku sangi.' ninkinu ulumuni Mosisini Pulu Yemonga ungu-mane sirimu bokuna torumumanga pulumu kinia, Pulu Yemone ungu-umbu tondorumuma pilku yomboma ningu siringi yemane bokuna toringi ungumanga pulumu kinia, lipa sere lepa nilimú kene aku siku anju yando yomboma-kinia seko kondangi." ,nirimu.,

7:13-14

*"Kerepulu Paa Kangana Ono Suku Pangi." Nirimu Ungu Se*

<sup>13</sup> "Ono pala kere-pingiya kangamonga paa pang. Kolea kirina pulimú kere-pingiyamo paa awilimu, akuna pulimú aulkamo paa anju yando pumba paa pará lemó akuna yombo awisili kala naa seko we pulimili. <sup>14</sup> Aku-na-kolo alieliconde molopa kondopa mindi puli koleana pulimú kere-pingiyamo paa kanga, yunga aulkamo paa sengepea seli kangamo lemó-kolo yomboma akuna pungindu kala selemellemonga yombo selu selu ningu mindi aku aulkamo kanokole pulimili. Aku selemel kene ono kanu kere-pingiya kangamonga pang." ,nirimu.,

7:15-27

*Jesusini "Pulu Yemonga Ungumu Naa Pilku "Sika-Unguma Nikimulu." Ningu Kolo Toko Ningu Sili Yema Onge Kanoko Kondoko Molaa." Nimba Liepi-Liepi Torumu Ungu Se*

<sup>15</sup> "Pulu Yemone ungu-umbu tondombama naa pilku we kolo toko yando ningu singí yema onge kene kanoko kondoko molaa. Kongi sipisipi paa taka leko molemele mele aku siku kanu yomboma ongo molonge-na-kolo owá-palakoma paa gelene kolcole 'Mélse topo namili.' ningu andoko molemele mele aku siku kanu yombomane 'Ono mindili nangi. Ono sepo kinjamili.' ningu molemele. <sup>16</sup> Kanu kolo toli yomboma ongo ulu sengema kanokole, 'Ono sika kolo tolima.' ningu kanonge. 'Amu namili.' ningu takeme manda olko toko nolemoláye? Molo 'Ipono se namili.' ningu silipu manda akuku nolemoláye? Paa mólo. 'Amu lupa, takeme lupala; ipono lupa, silipu lupala.' ningu kanolemele. 'Aku siku mele Pulu Yemone sika ungu-umbu tondolima pilku yomboma sika ningu silimili mele lupa, Pulu Yemone ungu-umbu naa tondolima yomboma kolo toko ningu silimili mele lupala ningu kanonge..' Unjuma mongo tolemo kinia kanokole 'Ima nomolo lémo. Ima naa nomolo lémo.' ningu kanoko imbi silimili kanumu. <sup>17</sup> Unju peangamone mongo peangamo tolemo; unju kirimuni mongo kirimu tolemo. <sup>18</sup> Unju peangamone mongo kiri se manda naa tomba; unju kirimuni mongo peanga se manda naala tomba. <sup>19</sup> Unju mongo peangama naa tomba unjuma pali peke tokole sepena kalolemele. <sup>20</sup> Unjuma mongo tolemo kinia kanokole, "Imu peanga, imu kiri." ningu apurulimili mele, onge yombo kanumane senge uluma onone kanokole yomboma molemele mele sika aku siku kanonge.

<sup>21</sup> " 'Yombomane nando 'Ye-Awilimu.' nilimili yomboma pali Pulu Yemone nokolemo mulu-koleana sukundu pungí.' ningu naa piliayo. Tata mulu-koleana molemomonga unguma pilku liku senge yomboma mindi akuna pungí. <sup>22</sup> Yomboma apurumba wale kanumu wendo ombá kinia yombo awisilini nando ninguli: "Ye-Awilimu, nane nunga imbi lepo nunga unguma nimbu sirindu kanumu; nunga imbi lepo yombomanga konopumanga kuru moloringima "Ongo ultu paa." nirindu kanumu; nunga imbi lepo ulu-tondolo awisili serindu kanumu." ningí. <sup>23</sup> Aku-na-kolo aku siku ningí kinia nane onondo nimbili: "Na ononga imbima paa naa pilipu ono kanopo imbi naa siliu. Ono Pulu Yemonga ungumu naa pilku liku seringi kene nanga kumbikerena naa ongo anju paa." nimbú.

7:24-27

*Ulka Takolemele Mele Ungu-Ikumu ,7:15-27 paliu*

<sup>24</sup> “Akumunga, i nanga unguma pilku liku senge yomboma ono ye se molemo mele niembo: Ye pilipa kondoli perimu ye se yuni yunga ulkamo ‘Ingi nimba giliepili.’ nimba kou-polona ola takorumu. <sup>25</sup> Pe lo topa no topa poporome topale ulkamo paa topa kalambili simba serimu-na-kolo ulka-simumu kou-polona gilierimu-kulu topa sikise naa sikisipa ingi nimba we gilierimu. Nanga unguma pilku liku selememe yomboma ono kanu yemo mele molemele.

<sup>26</sup> “I nanga unguma pilku liku naa senge yomboma ono ye se molemo mele niembo: Ye pilipa kondoli naa perimu ye sene yunga ulkamo okiyana ola takorumu. <sup>27</sup> Pe lo topa no topa poporome topale ulka kanumu topa kalambili sipa paa bulu-balu sirimu. Nanga unguma naa pilku liku senge yomboma ono kanu yemo mele molemele.” nirimu.

7:28—8:1

### *Yesusi Yomboma Mane Sipa Pora Sipale Ma-Pangina Maniando Orumu Semanemo*

<sup>28</sup> Yesusini aku unguma nimba pora sirimu kinia yuni mane sirimu pilku moloringi yombomane yuni ungu-mane sirimu mele pilkuli mini-wale mundoringi. <sup>29</sup> Pulu Yemonga ungu-manemanga puluma pilku ono mane siringi yemane we mane siringi mele Yesusini aku sipa mane naa sirimu. Namba lierimu yemane pipili naa kolko tondolo munduku mane siringi mele aku sipa mane sirimu-kulu pilkuli ono mini-wale mundoringi.

## 8

<sup>1</sup> Yesusi ma-pangina maniando ombá orumu kinia yombo awisili liku maku toko yu lombili oringi.

8:2-4

### *Yesusini Kuru-Laká Norumu Ye Se Sepa Peanga Sirimu Semanemo*

<sup>2</sup> Kanu-kinia ye se kuru laká nomba perimumu Yesusi orumuna omba yunga kumbikerena komorongo langopa yundu nimbale: “Ye-Awilimu, nunga konopumuni na ‘peanga liepili.’ konopu lienu liemu nuni na manda seko peanga sini.” nirimu kinia <sup>3</sup> Yesusini yemo kini ambolopa yundu nimbale: “‘Nu peanga liepili.’ konopu lekero kene peanga liepili.” nirimu kinia popenge sepa kuru lakámo nomba kelierimu. <sup>4</sup> Kanu-kinia Yesusini yundu kelepa nimbale: “Nuni ya ulu sekeromo yombo selurindu kepe paa naa ni. Sumbi siku pungu Pulu Yemo popo tondoli yemo nunga kangimu liku ora siku, ‘Na kelepo kangi peanga liepili moltoro kene.’ ningu Mosisini “Sei.” nimba panjerimu mele pilku liku senindu “Pulu Yemo popo toko kalko sie.” nirimu mélemo liku Pulu Yemo popo tondoli yemondo “Kalondou.” ningu yu sieni. Pe yombomane nu kanokole ‘Yu sika kangi peanga liepili molemo.’ ningu piliangi kene nikiru mele iseli-u se-pu.” nirimu. <sup>5</sup> “Aku siku sení kinia yombomane nu kanoko kiri naa pilingí, nu kelko we-yomboma molemelena manda seluna pungu moloni.” nirimu.

8:5-13

### *Isirele Yombomanga Ultu Mololi Ami Ye Nokoli Senga Kendemande-Ye Kuru Torumumu Yesusini Sepa Peanga Sirimu Semanemo*

<sup>5</sup> Yesusi Kapeniamie taonona sukundu purumu kinia Romo yombomanga ami-ye wane anderete nokorumu ye se yu orumuna omba yundu mawa sepa nimbale: <sup>6</sup> “Ye-Awilimu, nanga kendemande-yemo kimbu ki kolopa pora sipa mindili nomba perepa ulkana liepili okoro.” nirimu.

<sup>7</sup> Yesusini yundu “Ombo sepo peanga simbu.” nirimu.

<sup>8-9</sup> <sup>8</sup> Aku nirimu kinia pilipale, ami-ye wane anderete nokorumu yemone yundu pundu topa nimbale: “Ye-Awilimu, na ye kirimu mele molio, nu nanga ulkana oni kinia manda naa sembá. Na ye sene kepe nokopa molemo, yunga ungumu pilipu lipu

selio. Nane kepe ami-ye mare nokopo molio. Kanu yemanga sendo "Pu." niliu kinia yu pulimú. Molo sendo "Ou." niliu kinia yu olemo. Molo nanga kongono sendeli kendemande-yombo sendo "I-siku sei." niliu kinia yu aku sipa selemo kanumu. Aku sipala, nuni ungu se we nini kinia nanga kendemande-yemo konde pumbá kene nuni we ni." nirimu.

<sup>10</sup> Yesusini yu nirimu mele pilipale yu konopu awisili kimbu sipa yu lombili oringi yombomando nimbale: "Nane onondo paa sika nimbu sikirumu: "I Isirele yombomanga talapena ultu mololi yemone na ungumuni mindi manda sembó mele nimba olandopa tondolo mundupa kuru mondolemo mele koleamanga pali, Isirele koleana sukundu kepe, yombo selurini kepe aku siku ningu pilieringi mele paa naa kanorundu." nikiru. <sup>11</sup> Nane onondo paa sika nimbu sikirumu: "Ena mundi olemo koleamanga kinia ena pulimú koleamanga kinia yombo awisili wendo ongo Pulu Yemo ye nokoli kingimu molopa nokolemo mulu-koleana sukundu Eporayamo kinia Aisake kinia Jekopo kinia pea ongo kere-langì nongo molonge. <sup>12</sup> Aku-na-kolo Pulu Yemone 'yunga yomboma' nimba taltorumu 'Isirele, yomboma yu nokopa molemo koleana pungu molemolá yomboma yuni topa makoropa simbulu tolina mundumba. Kanuna paa mindili nongole kola seko perekò molonge." nikiru." nirimu.

<sup>13</sup> Aku nimbale yuni ami-ye wane anderete nokorumu yemondo nimbale: "Nane nu 'manda sendemba' ningu kuru mondonu mele sendendu kene pu." nirimu. Kanukinia yuni aku sipa nirimu enamonga kendemande-yemo yu kuru topa kelepa peanga liepili molorumu.

8:14-17

### *Yesusini Pitanga Kolepa-Ambomo Kinia Yombo Awisili Kuru Torumuma Sepa Peanga Sirimu Semanemo*

<sup>14</sup> „Kanu-kinia, Yesusi Pitanga ulkana sukundu pumbale Pitanga kolepa-ambomo kuru topa kangi norumu-kulu aniembo lierimu kanopale, <sup>15</sup> yunga kimu ambolorumu kinia kangi nomba kelierimu kinia ambomo ola gilipa wendo omba Yesusi kere-langì sipa yu nokorumu.

<sup>16</sup> Pe kolea ipu lemba serimu kinia konopuna kuru molorumu yombo awisili Yesusi molorumuna mengo oringi kinia yuni kurumando "Ongo wendo paa." nirimu kinia ongo wendo puringi. Kuru torumu yomboma pali sepa peanga sirimula. <sup>17</sup> Aku sipa serimumunga koronga-u Pulu Yemone ungu-umbu tondorumuma pilipa yomboma nimba sirimu ye Aisayane ulu se pe wendo ombá u nirimu mele kamu wendo orumu. Aisayane nimbale:

"Yuni yuyu olio kuru torumuma makoropa,  
olio aniembo lierimulu kuruma  
lipa ultu mundorumu."

nirimu.

8:18

### *„Semanemonga imbimu inia anjukundu 8:23-27 kanani.„*

<sup>18</sup> „Walte, Yesusi „Gallilli nomu kelona molopili, yombo awisili liku maku toko yu liku makapu seko moloringi kanopale nirimumuni, „lombili andolimando, "Nomuna nekendo pamili waa." nirimu.

8:19-22

### *Yesusi Lombili Andolemolomonga Ungu Se*

<sup>19</sup> „Aku-na-kolo u naa pumba we giliepili, Pulu Yemonga ungu-manemanga puluma pilipa mane sirimu ye se yu gilierimuna omba yundu nimbale: "Ungu Mane Silimu, nu puni koleamanga pali nu lombili ombó." nirimu.

<sup>20</sup> „Aku nirimu kinia, Yesusini yuntu nimbale: “Pílie! Owá-palakoma ulka pelemelemanga pelemele; kerama ononga ulka takolemelemanga pelemele, aku-na-kolo Mania Ombo Mana-Ye Au Lierimu Yemonga pelemo kolea se naa lemó ‚kene, nu ‘Yu lombili pumbuli manda naa molombo.’ ningu pilkuli na lombili wani. We naa wani.” nirimu.

<sup>21</sup> Kanu-kinia yu lombili andorumu ye sene yuntu nimbale: “Ye-Awili mu, nu kamu lombili wambo mangali u pumbu nanga lapamo ‚kinia pea molambo. Pe yu kolomba kinia, óno sepole nu lombili ombó.” nirimu.

<sup>22</sup> Aku-na-kolo Yesusini yuntu ‚ungu-iku topa, nimbale: “Yombo kololi yombomane yombo kolongema óno sangi. Aku-na-kolo nu na lombili ou.” nirimu.

8:18,23-27

### *Poporome Awili Se Torumumuni Yesusinga Ungumu Pilipa Lilltimu Semanemo*

<sup>23</sup> Aku nimbale ‚nomu Gallilli nekendo pumbándo, nona andoli sipi senga sukundu purumu kinia yu lombili andolima yu lombili sukundu puringila. <sup>24</sup> Kanu-kinia ‚nomuna pungí puringi kinia, poporome awili se nomuna torumu. Aku serimu-na nomumu apisipa ola ombale sipimu lipa aki tomba serimu-na-kolo Yesusi we uru perimu. <sup>25</sup> Kanu-kinia onone yu uru perimuna pungu toko makisindiku ninguli: “Ye-Awili mu, olio liku tapondoyo. Olio nona wangokomolo.” niringi.

<sup>26</sup> Yu ‚makilipa, onondo nimbale: “ ‘Pulu Yemone olio nokomba.’ ningu paa kanga seko mindi kuru mondoli yema, ono nambi semu-na mini-wale mundukumiliye?” nirimu. Aku nimbale ola molopa poporomemo kinia nomumu-tolo iri torumu. Kanu-kinia poporomemo topa kelepa nomumu lope naa sepa paa we lierimu.

<sup>27</sup> „Yuni serimu mele kanokole, yemane mini-wale munduku ninguli: “Apa! I yemo nambolka yerenje? Poporomemone kepe nomumuni kepe yunga ungumu pilku liku kelkembele.” niringi.

8:28—9:1

### *Kuru Paa Awisili Ye Talonga Konopuna Molopa Ambolorumuma Yesusinga Topa Makororumu Semanemo*

<sup>28</sup> Kanu-kinia yu ‚lombili andolima kinia pea, nomu nekendo pumba kolea Gadara puringi kinia kanu kolea Gadara ye talo, konopuna kuru molorumu yetolo, yombo-óno-koleana wendo ongo yu molorumuna oringili. Olo paa enge ningu yomboma tonguele seringilimunga we-yomboma olo peringili koleana ‘Olone ono tonguele.’ ningu aulkana ongo naa puringi. <sup>29</sup> Yesusi kanokole tondolo munduku mangilku ninguli: “Pulu Yemonga Malo, olio-kinia ungu nambolka unguri senindu onuye? Olio mindili lipa simba walemo u wendo naa opili nuni iseli-u olio mindili liku sini okonoye?” niringili.

<sup>30</sup> Akuna anjupa kolea senga umbu-kongi awisili ímu nongo moloringi ‚kanokole, <sup>31</sup> kurumane Yesusi mawa seko ninguli: “Olio toko makorokole ‘ne kongimanga konopumanga molo-pangi.’ ni.” niringi kinia

<sup>32</sup> yuni onondo nimbale: “Manda, akuna pang.” nirimu kanu-kinia ‚kuruma, kanu yetolonga konopuna wendo ongole kongi akuna moloringimanga konopumanga pungu moloringi kinia kanu kongima pali amu toko lisiku pungu kopona pukua toko nomuna sukundu pungu nona wangoringi.

<sup>33</sup> „Ungu akuma wendo orumu kinia kanokole, kongi tapu seko moloringi yema kowa punguli niringimuni, taonona pungu akuna moloringi yomboma ononga kongima serimu mele kepe kuruma konopuna moloringi yetolo serimu mele kepe semane toko siringi. <sup>34</sup> Niringi mele pilkuli taonona moloringi yomboma pali Yesusi molorumuna ongo kanokole yu mawa seko ninguli: “Olionga koleana naa mololi kelko pu.” niringi.

## 9

<sup>1</sup> Kanu-kinia Yesusi kelepa nona andoli sipi senga sukundu pumbale nirimumuni, nomu „Gallilli, yakondo omba yunga kolea „Kapeniame taono, orumu.

9:2-8

*Jesusini Kimbu Ki Kolopa Pora Sirimu Ye Senga Ulu-Pulu-Kirima Mundupa Kelepa, Yu Sepa Peanga Sirimu Semanemo*

<sup>2</sup> Yu „Kapeniame kelepa, omba molorumuna ye marene kimbu ki kolopa pora sirimu ye se taropola seko mengo oringi. Onone ‘Yesusini i yemo manda sepa peanga simba.’ ningu kuru mondokole yu mengo oringi Yesusini kanopa pilipale kimbu ki kolopa pora sirimu yemondo nimbale: “Nanga kangomo, nunga konopu peanga liepili. Nunga konopuna ulu-pulu-kiri serinu pelemoma mania pupili, mundupu kelkero.” nirimu.

<sup>3</sup> Aku nirimu kinia pilkuli Pulu Yemonga ungu-manemanga puluma pilku mane siringi ye marene onono konopumane pilkuli, ‘I yemone Pulu Yemo marake sekemo.’ ningu pilieringi.

<sup>4</sup> Ono konopu lieringi mele Yesusini pilipa nimbale: “Ono nambi semu-na konopu leko kinjikimiliye? <sup>5</sup> I yemondo “Nunga ulu-pulu-kirima mania pupili, siye kolkoro.” nimbú kinia ono ulu se naa kanokole ‘Pe nilse nikimu.’ konopu lengeye? Molo “Ola gilku nunga kunungumu liku mengo kimbu-kongono seko andou.” nimbú kinia yu ola gilimbane naa gilimbanje mona lemba manda kanokole ‘Aku sipa kála sepa nikimunje?’ konopu lengeye? <sup>6</sup> Aku-na-kolo ‘‘Mania Omba Mana-Ye Au Lierimu Yemo tondolo pelemomone ya ma-koleana yombomanga ulu-pulu-kirima “Mania pupili, siye kolkoro.” manda nimbá.’ ningu piliangi.’ nimbu aku sipu nindu.” nirimu.

Aku nimbale kimbu ki kolopa pora sili yemondo nimbale: “Nu ola gilku nunga kunungumu liku mengo ulkando pu.” nirimu. <sup>7</sup> Aku nirimu kinia yemo ola gilipa ulkando purumu. <sup>8</sup> Yombo awisili akuna maku toko moloringimane yuni aku serimu kanoko mini-wale mundukuli, mana-yomboma ulu-tondolo aku mele senge tondolomo sirimu Pulu Yemonga imbi ambolko paka tondoko kape niringi.

9:9-13

*Jesusini Mateyundu “Na Lombili Ou.” Nirimu Semanemo*

<sup>9</sup> Kanu-kinia Yesusi pumbá pumbale nirimumuni, kou-takisi lipa molorumu ye se, yunga imbi Mateyu, kanopale yuntu “Na-kinia pea pambil lombili ou.” nirimu. Kanu-kinia Mateyu yu ola gilipa yu lombili purumu.

<sup>10</sup> Pe Yesusi Mateyunga ulkana kere-langı nomba molorumu kinia kou-takisi lili yema kinia, „Juda ye awilimane, “ulu-pulu-kirima seli ye”, niringi, wema kinia awisili ongo Yesusi kinia yu lombili andoli yema kinia ono pea mania molko kere-langı noringi. <sup>11</sup> Ono aku siku seluna kere-langı nongo moloringi-kulu, Parisi yemane kanokole yu lombili andolimando mangilku pilku ninguli: “Ononga ungu-mane sili yemo kou-takisi lili yema kinia ulu-pulu-kirima seli ye wema kinia ono-kinia yu nambi semu-na kere-langı pea nokomeleye?” niringi.

<sup>12</sup> Aku siku niringi mele pilipale Yesusini onondo nimbale: “Kuru naa tolemo yomboma doketana naa pulimili. Kuru tolemo yomboma mindi doketana pulimili kanumu. <sup>13</sup> Nane “Yombo sumbi nilima na molombona wangi.” nimbúndu makoleana naa oruntu. ‘Ulu-pulu-kiri seli yomboma na molombona wangi.’ nimbúndu oruntu. Ulu-pulu-kiri seli yomboma lipu tapondombondo oruntu kene ono pungu Pulu Yemonga bokuna molemo ungu senga pulumu pungu pili-payo. Pulu Yemone nimbale:

“ ‘Na mélema popo toko kalko siengi.’  
nimbu pilipu naa molio.  
‘Ono yombo lupama konopu mondoko

kondo kolangi.’  
 nimbu pilipu mindi molio.”  
 nirimu kanumu.” nimba Yesusini nirimu.  
**9:14-17**

*Yombomane Walte Walte Kere-Langi Naa Nongo Mi Tolemele Ulumunga Ungu Se*

**14** Pe „No Lindeli, Jono lombili andoringi yema Yesusi molorumuna ongole yuntu mangilku pilku ninguli: “Olio kinia Parisi yema kinia olio alieli kere-langi mi lepo naa nolemolo na-kolo nu lombili andolima aku siku naa selemele akumu nambi semu-na naa selemeleye?” niringi.

**15** „Aku siku niringi kinia pilipale, Yesusini pundu topa onondo „ungu-iku se topa yu toko kondonge kolombamonga ungu se nimba, nimbale: “Ambo limba ye se yunga pulu lemó yema kinia molemo kinia ono konopu sikuli “Kola sepo kere-langi naa namili.” manda ningíye? Manda naa ningí. Pe mindi, ambo limba yemo ono molongena ongo wendo lingí kinia kanu walemanga sika „konopu kiri panjiku, kere-langi naa nongendo mi lenge. „Iseli-u mólo.„

**16** “Mulu-maminia u se sungu nilimú kinia olione mulu-maminia paa konde senga se kopisipu lipu, sungu nilimúmunga naa topo tandolemolo kanumu. Yombo sene aku sipa topa tandolkanje kanu mulu-maminiamo nona panjilka kinia mulu-maminia konde kopiselimu kanga lepa lli nimbale mulu-maminia umu kelepa kamu awili sepa sungu nilka.

**17** “Kongi-meme kangimuni seli mingi-u senga no-waene konde naala kololemololo kanumu. Yombo sene mingi-u senga no-waene konde se kolkanje kanu no-waenemo mingina sukundu pepale pe akolka kinia kanu mingi-umu naa akopa sungu nilka. Kanu-kinia nomo kepe mingimu kepe kamu kiri lelka. Akumunga no-waene konde kongi-meme kangimuni seli mingi kondena mindi kololemololo kanumu. „Pe nomo akolemo kinia kangimuni seli mingi kondemo anju yando pumba sungu naa nilimúmunga, nomo kinia mingi kondemo pea manda lemó.” nirimu.

**9:18-26** *monga 9:18-19, 23-26*

*Bola Se Kolorumumu Yesusini Sepa Konde Lipa,*

**9:20-22**

*Kuru Se Topa Naa Kelierimu Ambo Se Sepa Peanga Sirimu Semanetolo*

**18** Yesusini Jononga lombili andoli yemando ungu nimba molopili „Juda yomboma maku toko Pulu Yemonga ungumu pilieringi ulka se, nokorumu ye se Yesusi molorumuna ombo yunga kumbikerena komorongo langopa yuntu nimbale: “Nanga bolamo kiniá iseli kolopa pora sikimu. Aku-na-kolo nu ongo yu kimuni amboloni kinia yu konde pumbá.” nirimu.

**19** Aku nirimu kinia Yesusi ola gilipa yu lombili purumu. Yesusi lombili andolima pea puringila.

**20-21** Kanu-kinia ambo se molorumu kanumunga pena perimu walema pora naa nirimu. Yu pena mindi pepili kalia-ingi engaki-rurepo ombo purumu. Kanu ambomone ‘Yunga wale-pakolimu mindi ambolondu liemu na peanga lemba.’ nimba pilipale Yesusi pumbá purumu kinia bulkundu ombo, yunga wale-pakolimunga pundumu ambolorumu. **22** Ambolorumu kinia Yesusi topele topa yu kanopa nimbale: “Bolamo, nu konopu peanga pepili moloyo. ‘Nu manda sepa peanga simba.’ konopu lienu kanu ulumuni nu peanga lekemo.” nirimu. Kanu enamonga ambomo peanga lepa we molorumu.

**23** Kanu-kinia Yesusi „Juda yomboma maku toko Pulu Yemonga ungumu pilieringi ulkamo, nokoli yemonga ulkana sukundu ombole yombo awisili molko kondo kolko,

kolape-mingi toko pondoko, kola awili-seko seko moloringi kanopale yuni nimbale:  
<sup>24</sup> "Ono anju pame! Bolamo kolou naa kolomu. We uru mindi pelemo." nirimu. Aku nirimu kinia ,bola kanumu sika kolopa pora sirimu pilkuli yuni "We uru pelemo." nirimumunga, yu ungu-taka tondoko tawe senderingi.

<sup>25</sup> Kanu-kinia yombo maku toko moloringima pulu sipa pena-pena sepale ,bola ónomo lierimu, kisipina pumba yunga kimu ambolorumu kinia bolamo ola molorumu. <sup>26</sup> I ulu-tondolo serimumunga semanemo kanu koleamonga sukundu lierimu koleamanga pali anju anju purumu pilieringi.

9:27-31

### *Yesusini Mongo Kiri Lierimu Ye Talo Sepa Peanga Sirimu Semanemo*

<sup>27</sup> Yesusi kanu koleamo mundupa kelepa pumbá purumu kinia mongo kiri lierimu ye talo yu lombili ongo mangilku ninguli: "Ye Nokoli Kingi, Depitini Kalopa Liltimu Yemo, nu olto kondo kolou." ningu wale awisili niliku oringili.

<sup>28</sup> Yu ulka senga sukundu purumu kinia mongo kiri lieli yetolo yu molorumuna lombili oringili kinia yuni olo mangilipale: "Olo na mawa sekembele mele 'Manda sembá.' konopu lekembele molo móloye?" nirimu kinia olone ninguli: "Ye-Awilimu, 'Manda sení.' konopu lekembolo." niringili.

<sup>29-30</sup> Kanu-kinia yuni olonga mongotolonga ambolopa nimbale: "Nane 'manda sembá.' konopu lekembele mele aku sipa wendo opili." nirimu kinia olonga mongotolo peanga lierimu, mélema kelko kanoringili. Yesusini olo tondolo mundupa mane sipa nimbale: "Olone i ulu wendo okomomo yombo seluri kepe paa naa piliangi, naa ningu siele!" nirimu. <sup>31</sup> Aku-na-kolo olo pena pungu Yesusini serimu mele aku koleamonga sukundu lierimu koleamanga pali semane toko siliku andoringili.

9:32-34

### *Kuru Sene Ye Senga Kere Pipi Sirimumu Yesusini Topa Makororumu Kinia Yu Unga-Taka Tondoringi Semanemo*

<sup>32</sup> Kanu yetolo Yesusi munduku kelko pungilí puringili kinia ye se konopuna kuru molorumumunga ungu se naa nirimu ye se Yesusi molorumuna mengo oringi.

<sup>33</sup> Yesusini yemonga konopuna molorumu kuru kanumu topa makororumu kinia ungu naa nirimu ye kanumuni ungu nirimu-kulu yombo maku toko moloringimane kanokole konopu awisili kimbu siku ninguli: "U Isirele koleana sukundu i-sipa ulu se wendo naa orumu kanumu." niringi.

<sup>34</sup> Aku-na-kolo Parisi yemane ninguli: "Kurumanga nokolimuni yu lipa tapondolemo-na yuni kuruma topa makorolemo." niringi.

9:35.11:1

## **Yesusini Yunga Lombili Andolima 'Kongono Sangi Paa.'** **Nimba Lipa Mundorumu Semanemo**

9:35.10:1

### *Yesusini Yomboma Kondo Kolorumu Semanemo*

<sup>35</sup> Yesusi kolea-awilimanga kinia kolea-kangamanga pelepa andopale nirimumuni, Juda yomboma maku toko Pulu Yemonga ungumu pilieringi ulkamanga pumba ungu-mané sipa; Pulu Yemo ye nokoli kingimu molopa yomboma nokolemo nokomba ungu-pulumunga semane peangama topa sipa; kuru lupa-lupama torumu yomboma sepa peanga sirimula. <sup>36</sup> Yombo paa awisili yu molorumuna ongo liku maku toko moloringima kanopale ono umbu-konopu naa pepili andoko, kangima enge naa perimu-kulu ono onono manda liku naa tapondoko molkole ono kongi sipisipima ononga tapu-ye se naa molorumumunga we moloringi mele ono aku siku moloringi-kulu kanopale ono paa kondo kolorumu. <sup>37</sup> Kanu-kinia ,yombo awisili 'Yuni lipa

tapondopili.’ ningu moloringi-kulu kanopale, lombili andolimando nimbale: “Kere-langi awisili kaliana nou lemó-na-kolo kongono-ye awisili mólo. <sup>38</sup> Na ye selumu mindi i kongonomo sekero kene, Kere-Langimanga Pulu Yemo mawa sekole yuni “Kere-langi nou lielima lingí kongono senge yomboma yunga kaliana lipa mundopili.” niee.” nirimu.

*Kolomongo-Awili 10*

## **Yesusini Yunga Ye Engaki Rurepo Kongono Sipa Lipa Mundupa Ono-Kinia Ulu Wendo Ombá Mele Nimba Sirimu Semanemo**

**10**

*10:1-15*

### *Yesusini Lipa Mundorumu Ye Engaki Rurepo Kongono Sirimu Semanemo*

<sup>1</sup> Yesusini yu lombili andoli ye engaki rurepondo “Yando waa.” nimbale onone yombomanga konopuna kuru molemoma “Ongo wendo paa.” ningu toko makoronge tondolomo sipale, yombo kuru tolima kinia kangi pange-mange selima kinia “Peanga liepili.” ningí engemo sirimu.

*10:2-4*

### *Yesusini Lipa Mundorumu Yemanga Imbima*

<sup>2</sup> Yuni “Nanga kongonomo sende-paa.” nimba lipa mundorumu ye engaki rureponga imbima i-sipa: U Saimono, yunga imbi se ‘Pita’ niringila, yu keme yunga genu Enderu keme, Jeperinga malo Jemisi keme Jemisi yunga genu Jono keme, <sup>3</sup> Pillipu, Batollomiu keme, Tomasi keme kou-takisi liltimu ye Mateyu keme, Allapiasinga malo Jemisi keme Tadiasi keme, <sup>4</sup> “Olio Juda yomboma oliolio gapomano molamili.” niringi talape ye Saimono keme, Yesusi pe lipa opa-touma sirimu ye Judasi Isikeriote keme, akuma.

<sup>5</sup> Yesusini aku ye engaki rurepo lipa mundupa onondo nimbale:

“Yombo-lupama molemelena naa pang. Sameria yombomanga taono senga kepe naala pang. <sup>6</sup> Isirele yomboma mindi ononga kongi sipisipi pena lo liku pelemele mele aku siku molemele yomboma molemelena mindi pang. <sup>7</sup> Ono molemelena pungí punguli, onondo “Pulu Yemo ye nokoli kingimu molopa yomboma nokomba walemo nondopa wendo ombá sekemo.” niliku pang.

<sup>8</sup> “Kuru tomba yomboma seko peanga siku, kolko lenge yomboma ‘Lomboroko ola molaa.’ ningu, kuru laká nombá yomboma ‘Umbu-kangi giliepili.’ ningu, kuru konopuna molopili molonge yomboma ‘Konopuna naa molangi, ongo wendo pang.’ ningu selko pang. I kongonomo sengemonga tondolomo kou se molo mélsene topo toko naa likimili kene anju yomboma aku siku liku tapondokole ningimuni, ‘Kou se liemili.’ ningu naala sangi. We sangi.

<sup>9</sup> “Pungíndu kou-gollo mare molo kou-sillipa mare molo kou-kopa mare kakona panjiku mengo pu naa pang. <sup>10</sup> Méle-wale kepe wale-pakoli talo kepe kimbu-su kepe apulu-mingi kepe naa mengo we pang. Yombo kongono sendelemomo kongono sendelemomo yombomone kere-langi simba kinia papu kene mélse mei naa meangi. We pang.

<sup>11</sup> “Pe kolea-awili senga molo kolea-kanga senga sukundu punguli ningimuni, yomboma mangilku pilkuli “Ye nawe ye peanga se molemomonga oliondo “Pea peamili waa.” nimbáye?” niengi. Kanu-kinia se ningu singí kinia pilku yu kanoko lendekole kanu yemonga ulkana pungu yu-kinia mindi pea peko molkole pe aku koleamo munduku kelko pang. Ulka pinia-pinia naa andoko ulka seluringa mindi

kere-langi nongo peangi., <sup>12</sup> „Kolea senga pungu ye peanga se liku ora singí kinia kanoko lendeko, yunga ulkana sukundu punguli ningimuni, ulka pulu yombomando “Ono konopu peanga pepili molaa.” nieyo. <sup>13</sup> Kanu-kinia kanu yombomane “Pea peamili sukundu waa.” ningi liemu, ononga ungu peanga ningi kanumu kanu yomboma-kinia pepili. Aku-na-kolo kanu yombomane konopu peanga naa panjiku, “Pea peamili waa.” naa ningi liemu ungu peanga u sukundu punguli ningi kanumu “Ono-kinia naa pepili.” nengu, kelko mengo ,ono munduku kelko yando wangi..

<sup>14</sup> “Yombo sene onondo “Pea peamili waa.” ni naa nengu onone ungu ningima pilku naa língi liemu kanu ulkamo molo kanu taonona yombo kirima munduku kelko pungíndu ,kanu koleana yomboma ‘Kamu molko kinjangi. Pulu Yemone ono lipa naa tapondomba mele piliangi.’ nengu, ononga kimbuna kanu koleamanga ma gilimba mamo kulu toko pang. <sup>15</sup> Nane ono paa sika nimbu sikirumu: “Kote walemo wendo ombá kinia kolea-awili Sodomo kinia Gomoratolo olonga yomboma ,u ulu-pulu-kiri awisili sika seringi-na-kolo, olonga kote kanga mele pemba. Aku-sipa na-kolo i yombo onondo “Sukundu waa.” ni naa nengu ononga ungu pilku naa lingi yomboma kote walemo wendo ombá kinia ononga kote awilimu pemba.” nikiru.

10:16-25

### *Umbuna Lupa Lupa Mare Wendo Ombá Mele Unzu Se ,Kolomongo-Awili 10 pali kananu*

<sup>16</sup> “Ono lipu mundukuru yema ono sipisipi melema, yombo owá-palako awili kirimane sipisipi topa nolemo mele yomboma molemelena ono lipu mundukuru. „Nanga ungumu andoko nengu singi kinia pilku kiri pilkuli yombomane ono mindili liku singi., Yomboma owá-palako mele aku siku molemele kene kongi-ka wambiyema pilipa kondolimu paa pelemo-na uluma sembando mimi sipa pilipa selemo mele ono aku wambiyema mele molko, kera waembono molemo mele molangi. „Aku keramone mélema mindili sipa sepa kinjimba ulu-pulu se naa pelemo.,

<sup>17</sup> “Yomboma mimi siku kanangi. Onone , ‘Na lombili andoli yomboma mindili nongo, kolangi.’ nengu,, ono ,mare liku ambolkole, kanjollomanga makumanga mengo pungu kote sendeko, ono ,mare, Juda yomboma maku toko Pulu Yemonga ungumu pilielemele ulkamanga liku mengo pungu kopene tongela. <sup>18</sup> Ono nanga yomboma molongemonga ono ,mare ka siku, yombo-lupamanga gapomano ye awilima kinia ye nokoli kingima kinia molongena ,kote sendengendo, mengo pungila. Aku siku senge kene ono onono kanoko kondoko molaa. Aku-na-kolo kote sendenge kinia kotena gilkuli kanu yema kinia kanu yema nokonge ye nokolima kinia onone ‘Nanga ungumu piliangi.’ nengu ono nengu singi. <sup>19</sup> Aku-sipa na-kolo ono ka siku kote sendenge kinia ‘Kotena nambolka unguri nimulúnje? Olio ungu se mangilku pilingí kinia nambolka unguri pundu topo nimulúnje?’ nengu mini-wale naa mundangi. Aku senge enamonga ono ungu ningi mele pilingí. <sup>20</sup> Ono ungu ningima onono pilkuli naa ningi. Ononga ,mulu-koleana molemo, Lapanga Minimu ononga kerena molopale nimba simba unguma onone anju ningi kene konopu kimbu naa siku, pilingí mele niengi.

<sup>21</sup> “Aku walemanga, genuni yunga genu ,nanga yombo molombamonga, ‘Kolopili toko kondangi.’ nimba kote sendemba. Lapane yunga bolangoma akula sembá. Bolangomane kepe ononga anupili lapali-kinia mumindili kolko kotena mengo pungu “Toko kondangi.” ningila. <sup>22</sup> Nanga yomboma molongemonga yombomane pali ono-kinia konopu kiri panjingí, na-kolo na munduku naa kelko walema pora naa nipili tondolo munduku molonge yomboma ,Pulu Yemone, lipa tapondopa ‘Mindili nonge koleana naa pungu, pea molopo kondopo mindi pamili.’ nimbá. <sup>23</sup> Kolea senga yombomane ‘Ono mindili nangi.’ nengu seko kinjingí kinia kolea senga kowa pang. Nane onondo paa sika nikirumu: “Ono kolea Isirele sukundu koleamanga pali andoko

nanga kongonomo seko pora naa sindangi Mania Ombo Mana-Ye Au Lierimu Yemo „kelepa yando, ombá.” nikiru.

<sup>24</sup> “Mane sili ye se lombili pungu unguma pilielemele yomboma ‘Ononga mane silimu maniandopa, ono olandopa.’ manda naa ningí. Kendemande-yombo sene ‘yunga nokoli yemo maniandopa, yu olandopa.’ manda naala nimbá. <sup>25</sup> Lombili pumba unguma pilielemo yombomo kinia yunga ungu-mane silimú yemo kinia selu-siku molembele akumu manda. Kendemande yombomo kinia yunga nokoli yemo kinia selu-siku molembele akumu mandala. Ulka pulu yemonga ungu naa pilielemele yombomane yu-kinia mumindili kolko iri tongendo „kurumanga nokoli Setenenga imbi manda manjiku, “Yu Belsipuli” ningi imbi lemele kanumu. Pe kiniá ulka pulu yemondo aku siku níngi liemu yunga ulkana pelemele yombomando pali paa awili seko olandopa ungu kirima ningíla.

10:26-31

#### *Pulu Yemo Mindi Pipili Kolangi Ungu Se ,Kolomongo-Awili 10 pali kanani*

<sup>26</sup> „Nanga opa-toumane na seko kinjilimili mele ono na lombili andoli yema sika seko kinjingíla, akumunga ono kanu yomboma pipili naa kolayo. Aki tolemo ungumanga selu kepe pe aki naa topa pali penambelena lemba. Lopi selemo ungumanga selu kepe pe lopi naa sembá. Kanu uluma kinia unguma pali yombomane pali pilingí kene pipili naa kolangi. <sup>27</sup> Nane onondo simbulu tolina niliu unguma pa selina nieyo. Ungu ólo toko ningí onono komuna pilingí unguma ulka imuna ola gilku ru ningi niengi.

<sup>28</sup> “Kangimu mindi toko kondokole minimu manda toko naa kondonge yomboma pipili naa kolayo. „Pulu Yemo mindi pipili kolayo.. Yuni kangimu kinia minimu kinia peatolo sepe-koleana manda topa kondomba kene yu-mindi pipili kolaa.

<sup>29</sup> “Kera kaltendepale paa kangamo molemo, topo toko lingíndu kera talo pea kou mongo selu mele mindi pulimú kanumu. Aku-na-kolo se kolopa we mania naa pulimú. Kanu kerama na lombili andoli yombomanga „mulu-koleana molemo, Lapamone kanolemo. <sup>30</sup> Ono „na lombili andolima, ononga penge-indima kepe yuni koronga selu selu nimba pali kambu torumu. <sup>31</sup> Ononga „mulu-koleana molemo, Lapamone aku sipa ono molemele mele kanopa mololepa pulimú kene „Yombomane olio seko kinjingí.” ningi, pipili naa kolayo. Kera kaltendepale yu kou paa koltalo mele pulimú-na-kolo kanu keramo Pulu Yemone kanopa molemo. Ono yomboma paa olandopa awilima kanopale ono paa nokopa kondopa molomba.

10:32-33

#### *“Olio Yesusinga Yomboma Molemolo.” Nimulúndu Pipili Naa Kolamili Ungu Se*

<sup>32</sup> “Yombo sene yombomanga kumbikerena ola gilipale “Na Yesusinga yombomo molio.” nimbá kinia nane Tata mulu-koleana molemomonga kumbikerena ola gilipuli “Aku yombomo nanga yombomo.” nimbúla. <sup>33</sup> Aku-na-kolo yombomanga kumbikerena “Yesusi yu nawe? Yu na naa pilkiru.” aku sipa nimbá yombomo yu nane Tata mulu-koleana molemomonga kumbikerena “Aku yombomo yu nawe? Yu na naa pilkirula.” nimbú.

10:34-39

#### *Yesusi Konopu Paa Olandopa Mondangi Ungu Se ,Kolomongo-Awili 10 pali kanani*

<sup>34</sup> “‘Ya mana-yomboma opa naa seko seluna konopu seluna pupili molangi.’ nimbú orundu.’ konopu naa leangi. Ono yomboma ‘Taka leko molko konopu seluna pupili molangi.’ nimbúndu naa orundu. ‘Mumindili kolko opa sangi.’ nimbúndu orundu.

<sup>35-36</sup> ‘Yombomane sangi.’ nimbúndu orundu mele i-sipa:

“Ye sene yunga lapa kinia opa sepili,

lemenu sene yunga anumu kinia opa sepili,

malo senga menuni yunga bamu kinia opa sepili.  
 Ulka seluna pelemele yomboma opa-tou molonge.”  
 ‘Aku sangi.’ nimbúndu orundu.

<sup>37</sup> “Yombo sene na olandopa konopu naa mondopa, yunga lapa molo anumu olandopa konopu mondomba yombomo ‘Nanga yombo molopili.’ nimbúmu manda naa sembá. Yombo sene na olandopa konopu naa mondopa, yunga malo molo lemenu olandopa konopu mondomba yombomo ‘Nanga yombo molopili.’ nimbúmu manda naa sembá. <sup>38</sup> Yombo sene ‘Yu lombili pambo.’ nimbale yomboma unju-perana gilku mindili nongo kololemele mele yuni unju-pera mele gomo lembando ‘Na yu lombili pumbúndu mindili nondu liemu peangala; kolondu liemu peangala.’ naa nimu liemu ‘Nanga yombo molopili.’ nimbúmu manda naa sembá. <sup>39</sup> Yombo se ya ma-koleana ‘Na molopo kondopo, nondopo naa kolambo.’ nimba pilielemo yombo se kolopale kolea kirina mindili nomba molopa mindi pumbá. Aku-na-kolo yombo se na lombili andopa nanga kongonomo sendembando ‘Ya mana mindili nombo molombo kinia mandala, kolombo kinia mandala.’ nimbá yombo se konde molopa kondopa mindi pumbá.

**10:40-42**

*Karasinga Yomboma Liku Tapondonge Yomboma, Méle Kalolima Lingí Ungu Se 10:pali kanani*

<sup>40</sup> “Ono kolea senga pungí kinia yombo sene ‘Pea molamili waa.’ nimba lipa tapondolemo yombomone na pea aku sipa lipa tapondolemola. Na ‘Pea molambili ou.’ nilimú yombomone na “Ma-koleana pu.” nimba lipa mundorumu yemo ‘Pea molambili ou.’ nilimúla. <sup>41</sup> Yombo sene Pulu Yemone ungu-umbu tondolemoma pilipa yomboma nimba silimú yombo se olemo kinia ‘Yu Pulu Yemone ungu-umbu tondolemoma pilipa yomboma nimba silimú yombo se kene’ nimba pilipale “Pea molambili ou.” nimba lipa tapondolemo yombomo Pulu Yemone yunga ungumu nimba silimú yombomo méle kalomba mele kanu lipa tapondolemo yombomo kepe selu-sipa-meles kalombala. Yombo sene Pulu Yemonga ungumu pilipa lipa konopu sumbi nipili molemo yombo se olemo kinia ‘Yu Pulu Yemonga ungumu pilipa lipa konopu sumbi nipili molemo yombo se kene.’ nimba pilipale ‘Pea molambili ou.’ nimba lipa tapondolemo yombomo ‘Pulu Yemone’ kanu yombo sumbi nili se méle kalomba kinia yu lipa tapondolemo yombomo kepe selu-sipa-meles kalombala. <sup>42</sup> Yombo sene ono nanga lombili andoli yombo imbi naa mololi yombo se kanopa ‘yu nanga lombili andoli yombo se kene’ nimba kanopale yu lipa tapondopa we no kepe kolopa simu liemu nane ono paa sika nimbu sikirumu, “kanu yombomo paa sika méle kalólimu limba.” nikiru.” nirimu.

**11:1.16:20**

## **Yesusi Molemo Mele Nimba Silimú Ungu Mare**

### **11**

**11:1**

*Yesusi Ungu-Mane Silipa Andorumu Semanemo*

<sup>1</sup> Yesusini yu lombili andoli ye rurepondo yunga kongono sendenge mele mane sipa pora sipale nirimumuni, yu kanu koleamo mundupa kelepa kolea Gallilli disiriki taonomanga andopa mane sipa ‘Pulu Yemonga, ungumu nimba sirimu.

**11:2-19**

*No Lindeli Jonone ‘Yesusi Yu Nawenje Piliambo.’ Nimba Jono Yunga Lombili Andoli Ye Mare Yesusi Molorumuna Lipa Mundorumu Semanemo*

<sup>2</sup> ‘Pulu Yemone “Nanga yomboma nokopa kondomba ye se lipu mundumbu.” nimba u nimba talitorumu ye nokoli, Karasimuni ulu-tonadoloma serimumunga Jono

ka-ulkana pepa pilipale nirimumuni, "Yesusindu i-siku i-siku mangilku pilindangi!" nimba yu lombili andoli mare Yesusi molorumuna lipa mundorumu. <sup>3</sup> Kanu yema Yesusi molorumuna ongo yu mangilku pilindiku ninguli: "Pulu Yemone olio nokopa kondomba yere "Lipu mundumbu." nimba, nimba panjerimu yemo 'Ombá.' nimbu nokopo molemolo kanumu nu molo se lupa ombámo nokopo molamiliye?" niringi.

<sup>4</sup> Jesusini onondo pundu topa nimbale:

"Onone ya kanokomele mele kepe pilkimili mele kepe pungu Jono ningu si-payo.

<sup>5</sup> Mongo kiri lieli yomboma mongone kanoko,

kimbu kiri lieli yomboma manda andoko,

kuru laká nolima umbu-kangi gilipa,

komu sílima komuni pilku,

kolopa lielima ola molemele kepe,

koropa pulima semane peangamo topo siliu pilielemela

kanumu. Aku siku Jono ningu sieyo. <sup>6</sup> Na kanokole 'Yu sika kanu yemo molemo.' ningu kuru mondokole, kelko konopu talo naa panjiku molonge yomboma ono Pulu Yemone "Konopu peanga pepili molko kondangi." nilimú aulkana molemele." nirimu.

<sup>7</sup> Jono lombili andolima pungí puringi kinia Jesusini kelepa yombo awisili maku toko moloringimando Jonondo nimbale: "Kolea ku lielina Jono no lindipa molorumu kinia, ono kanu kolea ku lielina nambolka kanonge puringiye? Lkepania mele poporomene lope-lope sendepa molorumu se kanonge puringiye? <sup>8</sup> Mólo kanumu. Alieli kanolemele mele kanonge naa puringi liemu, ungu nambolkare kanongendo puringiye? Ye se mulu-maminia paa peangama pakopa molorumu-na kanonge puringiye? Akumu mólolola. Yombo mulu-maminia paa peangama pakolemelema ye nokoli kingimanga ulkana manjiku molemele kanumu.

<sup>9</sup> "Aku sili se kanonge naa puringi liemu, Pulu Yemone ungu-umbu tondolemoma pilipa yomboma nimba sili ye se kanonge puringiye? Akumu sika na-kolo nane onondo nimbu sikiru: "Jono yu sika Pulu Yemone ungu-umbu tondolemoma pilipa yomboma nimba sili ye se na-kolo yu Pulu Yemone ungu-umbu tondorumuma pilipa nimba sili ye we se mólo." nikiru. <sup>10</sup> Yuni Pulu Yemone u "Lipu mundumbu." nirimu yemonga aulkamo sepa wamomu kanumu. Kanu yemondo Pulu Yemonga bokuna sukundu molemo ungu se i-sipa:

'Pulu Yemone yunga Malondo nimbale:.'

"Pilieyo. Nanga ungu se nindimba yemo

nane nu puni aulkana yu kumbi lepo lipu mundukuru.

Yuni nunga aulkamo akisindimba." nirimu.'

kanu ungumu bokuna molemo. <sup>11</sup> Nane onondo paa sika nimbu sikirumu: "U mana moloringi yombomanga se No Lindeli Jono-kinia manda mólo. Jono olandopa mele. Aku-na-kolo kiniá wale kondemo wendo okomo. Kanu walemo Pulu Yemo ye nokoli kingimu molopa nokolemo yombomanga se paa imbi naa molopa paa koropa puli yombomo olandopa; Jono yu maniadopa." nikiru. 'U moloringi yomboma mania mele; kiniá na 'Sika.' ningu kuru mondongemonga konopu peanga pemba yomboma olandopa.' <sup>12-13</sup> Jono u mana naa ombo molopili ungu-manema pelemo boku Mosisini torumuma kinia, Pulu Yemone ungu-umbu tondorumuma pilku yomboma ningu siku bokuna toringi bokuma kinia, aku bokumane Pulu Yemonga unguma ningu siku, Jono kinia Pulu Yemone "Ono nokomba ye nokoli se lipu mundumbu." nimba, nimba panjerimu yemo kinia ongele mele unguma niringi. Aku-na-kolo Jono orumu kinia yandopa Pulu Yemo ye nokoli kingimu molopa yomboma nokolemo ulumu paa tondolo mundupa wendo ombo yunga opa-touma topa mania mundulimúla; ye enge nilimane aku ulumu ambolongendo tondolo munduku ta ningu lingí sekemelela.

<sup>14</sup> Ungu se nimbú sekeromo pilielemolo konopu lingí liemu piliangi. Pulu Yemonga bokuna „Pulu Yemone ungu-umbu tondolemoma pilipa yomboma nimba simba ye, Illainja ombá.” nirimu ye kanumu Jonondo nirimu. <sup>15</sup> I nikiru mele komu gilimú yombomane paa mimi siku piliaa!” ,nirimu.,

<sup>16</sup> “Kiniá mana molemele yomboma nambolka mélse ono manda manjipu manda nimbúnje? ,Ono molemele mele i-sipu nimbu siembo:, Ono yomboma maku tolemele koleana bolangoma pepe perekolemele mele. Kanu bolangomanga marene ne anju molemele bolango mare ,pea pepe perekolemele molonge aulka se koroko kelkole, onondo mangilku ninguli:

<sup>17</sup> “Konane nímulu kinia

ono ‘Pea konane niemili.’ naa ningu “Mólo.”níngi.

Pe kelepo kola semulu kinia

ono ‘Pea kola samili.’ ni naaníngi.

‘Pea pepe perekolemele molomolo aulka se mólo lepomo..”

nilimili. „Kiniá molemele yomboma ono kanu bolangoma mele molemele., <sup>18</sup> Na kinia No Lindeli Jono kinia oltone nilimbulu unguma onone pilku kiri pilielemole; selembolo mele kanoko kiri pilielemolela,. Jono ombale ga kinia no-waene kinia naa nomba molorumu kinia ,kanoko kiri pilku, ninguli: “Yunga konopuna kuru se molemo.” niringi. <sup>19</sup> Pe Mania Omba Mana-Ye Au Lierimu Yemo ombo ga kinia no-waene kinia norumu kinia ,kanoko kirila pilku, ninguli: “Yu ga awisili nomba kiri pilipa, no-waene awisili nomba amu topa selemo yemo. Yu kou-takisi lili yema kinia, ulu-pulu-kiri selemele yombo wema kinia ‘Yu-kinia pulu liepili pea kopu sepo molamili.’ nimba selemo.” nilimilila. ,Onone aku siku Jono kanoko kirila pilielemole. Na kanoko kirila pilielemole., Aku-na-kolo pilipa kondoli ulu-pulumu Pulu Yemokinia pelemo-na yuni selemo sembá mele kanokole ‘Papu selemo.’ ningí.” nirimu.

11:20-24

*Yesusini Kolea Marenga Yomboma Konopu Topele Naa Toringimunga “Molko Kinjangi.” Nirimu Semanemo*

<sup>20</sup> Aku nimbale Yesusi kolea u andopa ulu-tondolo awisili serimu koleamanga ,moloringi yomboma, yuni serimu mele kanokole ononga ulu-pulu-kirima kanoko kiri pilku munduku kelko konopu topele naa toringi kanopale yuni ono iri topa nimbale: <sup>21</sup> “Kolea Korasini kinia Besaida taonotolonga ,molemele yomboma, mindili nongo paa molko kinjingí! Kanu koleatolonga sukundu ungu tondolo awisili serindu,-na-kolo akuna molemele yomboma konopu topele naa tolemele,. Kolea awili Taya kinia Saidonotolonga sukundu ,ungu tondolo se naa serindu-na-kolo kanu koleatolonga sukundu, nane ungu tondolo aku sipu selka kanolemolánje kanu koleatolonga ,yombomane, ono ulu-pulu-kiri selemelema koronga munduku kelko, bulu siku, konopu topele tolemolá. <sup>22</sup> Akumunga nane onondo nimbu sikiru: “Pe kote walemo wendo ombá kinia kanu kolea Taya kinia Saidonotolonga ,yomboma ulu-pulu-kiri selemelemonga, ononga kote kanga mele pemba. Aku-na-kolo ono kolea Korasini kinia Besaidatolonga ,yomboma nane ulu-tondoloma serindu kinia kanokole konopu topele naa toringimunga, kote walemo wendo ombá kinia ononga kote awili mele pemba.” nikiru.

<sup>23</sup> “Kapeniame taono ,yomboma onone, ‘Mulu-koleana pumbu molamili.’ konopu lekemeleye? Aku manda mólo. ,Onone nanga unguma alieli pilielemole-na-kolo konopu topele naa tolemelemonga, ono kolea kirina pungu molonge. Ononga koleana sukundu ulu-tondolo awisili serindu,-na-kolo ono konopu topele naa toringi,. Kolea-awili Sodomo sukundu ,ulu-tondolo se naa serindu-na-kolo kanu koleana sukundu, nane ungu tondolo aku sipu selka kanolemolánje yomboma konopu topele tolemolá, pe kiniá kepe kanu koleamo we lelka. <sup>24</sup> Akumunga nane ono ,Kapeniame

yombomando, nimbu sikirumu: "Kote walemo wendo ombá kinia kolea Sodomo ,yomboma u ulu-pulu-kiri awisili sika seringi-na-kolo, ononga kote kanga mele pemba. Aku-na-kolo ono kolea Kapeniame ,yomboma nane ulu-tondolo serinduma kanokole konopu topele naa toringi yomboma,, kote walemo wendo ombá kinia ononga kote awili mele pemba." nikiru." nirimu.

**11:25-30**

*Yesusini "Na Molombona Ongo Paa Sika Koro Molonge." Nirimu Semanemo*

**25** Aku walemanga Yesusini nimbale:

"Tata, Mulu Matolo Nokoko Moleno Ye Nokolimu, nane nu-kinia 'Ange.' nikiru. "Olio pilipa kondoli pelemo. Olio oliolio ungu-manga puluma pali pilipu kondole-molo." ningu pilielemene yomboma ono nane kiniá selio ungu-manga pulumu nuni 'Naa piliangi.' ningu naa ningu sirinu. Yombo bolango pame mele molko nane niliu ungu-ma komu sendeko molemele yomboma mindi nane selio ungu-manga pulumu 'Piliangi.' ningu, ono ningu sirinu kanumunga nu kape nimbu 'Papu serinu.' nikiru. **26** Sika, Tata, nuni 'aku sipa wendo ombá kinia konopu simbú.' ningu aku siku serinumunga ,aku sipa wendo okomo..," ,nirimu.,

**27** „Pulu Yemondo aku sipa nimbale kelepa yombo moloringimando nimbale: „Mélema pali Tatane na sirimu. Yombo sene Malo paa sika molemo mele pilipa kanopa imbi silimú yombo se mólo; Lapane mindi yu kanopa imbi silimú. Yombo sene Lapa paa sika molemo mele pilipa kanopa imbi silimú yombo se mólo. Malone mindi kanopa imbi silimú; Malone 'Lapa lipu ora siembo.' nimbá yomboma ono Lapa kanoko imbi singíla.

**28** "Ono kongono mindili siku selemele yomboma kinia, konopuna umbuna selemo yomboma kinia, na moliona wayo. Onge kinia na pea konopu seluna pumbámonga nane 'Konopu pe nipili koro molaa.' nimbú. **29** Nando "Nunga kongono seleno mele pea ambolambili. Nu nanga ungu-mané sílimu molani. Nunga ungu ninima pilipu lipu molambo." ningu sayo. Na taka lepo molopo, yombomane na seko kinjilimili kinia pilipu siye kolopo molio-na i nikiru mele ono na molombona ongo senge kinia ononga konopuma pe nimbá. **30** Nanga kongono seliomo pea ambolombolo kinia taka leko sení. Méle pe nilima mindi siliu kene moliona waa." nirimu.

## 12

**12:1-14**

*Yesusi Yuni Sambate Walemo Nokolemomonga Semane Se*

**12:1-8**

*Juda Yombomanga Koro Moloringi Wale Sambatemonga Ungu Se*

**1** Walte, ,koro moloringi, wale Sambate senga, Yesusi kinia yu lombili andolima kinia rasi-witi kaliamanga ongo puringi kinia yu lombili andoli yema gelene kolkole rasi-witi mongo mare inia toko noringi. **2** Aku seringi kinia kanokole Parisi yemane Yesusi yundu ninguli: "Kána! ,Koro molemolo, wale Sambatemonga 'Kongono naa sangi.' nimba pelemo ungu-manemo nu lombili andoli yemane ungu-manemo pulua tokole aku siku sekemele." niringi.

**3** Yesusini pundu topa nimbale: "Ono Pulu Yemonga bokuna sukundu ,anda-kolepa ye nokoli kingi, Depitini serimu mele nimba molemo semanemo kanokole semanemonga pulumu naa pilielemeye? Depiti kinia yu pea puringi yema kinia ono gelene kolkole niringimuni, **4** Depiti Pulu Yemo molorumu serele-ulkana sukundu pumba, Pulu Yemonga kumbi-kerena lierimu pellawa kalolima lipa nomba, yu pea puringi yema sirimu noringila kanumu. Kanu pellawa kalolimando Pulu Yemone ungu-mané se sipa nimbale:

“We-yombomane paa naa nangi!

Pulu Yemo popo tondoli yema manjiku nangi!”

aku sipa mele nirimu ,kanu ungu-manemo pulua torumu, kanumu. „Ono konopu talo nambi semu-na lemeleye? Depiti yuni u aku serimu mele ono pilku kiri naa pilielememonga pe kiniá na lombili andoli yemane sekemele mele naa kanoko kiri piliaa..” „nirimu..”

<sup>5</sup> “Ungu-mane se pelemóla. “Pulu Yemo popo tondoli yemane ,koro mololi, wale Sambatemanga Pulu Yemonga ulkana kongono selemele kinia Sambate walemanga ungu-manemo pulua tolemele-na-kolo aku kongono selemelemonga mongo naa pemba.” nimba molemo akumu naala pilielememelye? <sup>6</sup> Nane onondo nimbu sikiru: “Méle konde se kiniá pelemo akumu Pulu Yemo popo toko kalolemele ulkatembelemonga olandopamo.” nikiru. <sup>7</sup> „Pulu Yemone nirimu ungu se yunga bokuna molemo mele i-sipa:”

“Onone yomboma kondo kololemele kinia  
kanopo peanga pilielio.

Na popo toko kongima kalolemele akumu  
unguri mólo.”

nilimú, akumunga ungu-pulumu ono Parisi yemane pilielemolánje i ye ulu seko naa kinjikimili yema “Seko kinjikimili.” naa nilimolá. <sup>8</sup> Mania Ombo Mana-Ye Au Lierimu Yemone Sambate walema nokolemo yemo molemo-na ,Sambate wale-kinia yomboma molko kondongendo senge mele manda nimbá kanumu..” nirimu.

**12:9-14**

*Sambate Wale Kinia Yesusini Ki Kiri Lierimu Ye Se Sepa Peanga Sirimu Semanemo*  
*12:1-14 pali*

<sup>9</sup> Kanu-kinia Yesusi aku koleamo mundupa kelepa pumba Juda yomboma maku toko Pulu Yemonga ungumu pilieringi ulka senga purumu. <sup>10</sup> Kanu ulkana ye se molorumu, yunga ki se kamu kolopa kukorumu. Kanu-kinia akuna moloringi ye marene ‘Yesusini sepa kinjimba kinia kote sendamili.’ ningu yu mangilku pilku ninguli: “Koro molemolo wale Sambate-kinia yombo kuru tolemoma sepo peanga simulú kinia manda molo aku semulu liemu Pulu Yemonga ungu-manemo pulua tomoloye?”

<sup>11</sup> Yesusini yemando pundu topa nimbale: “Sambate wale kinia ye senga kongi sipisipi se muruna topa mania mundumba kinia sipisipi ari selemo yemone kundupa ola lipa memba naa ombáye? <sup>12</sup> Aku liemu sipisipi maniadopa mele, yomboma paa olandopa, akumunga, Sambate wale kinia ulu peangama manda naa semoloye?” nirimu.

<sup>13</sup> Aku nimbale ki kolopa kukorumu yemondo nimbale: “Nunga kimu siniu si.” nirimu kinia yemone yunga kimu siniu sirimu kinia yunga ki ekendo peanga lierimu mele ki kiri lierimumu kelepa kamu peanga lierimu. <sup>14</sup> Aku-sipa na-kolo ,Yesusini aku serimu kinia kanokole, Parisi yemane pena pungu maku toko “Yu nambi sepo topo kondomoloye?” ningu aulka se kororingi.

**12:15-21**

*Yesusi Pulu Yemonga Sika Kendemande, Yemonga Ungu Se*

<sup>15</sup> „Parisi yemane, yu tonge seringi pilipale Yesusi aku koleamo mundupa kelepa purumu. Kanu-kinia yombo awisili Yesusi purumu mele yu lombili puringi kinia yuni yombo kuru torumuma pali sepa peanga sipa <sup>16</sup> nimbale: “Na sika yemo molopole i ulu-tondoloma sekero mele onone yombo lupa marendo naa ningu siee!” nirimu.

<sup>17</sup> Aku sipa wendo orumumunga koronga-u Pulu Yemone ungu-umbu tondorumuma pilipa yomboma nimba sirimu ye Aisayane ulu se pe wendo ombá u nirimu mele kamu wendo orumu. Aisayane nimbale:

**18** “I yemo

nanga nimbu taltorundu kongonomo sendeli yemo;  
 nane i yemo konopu mondopo,  
 yu kanopo paa peanga pilielio yemo.  
 Nanga Minimu yunga konopuna panjindimbu.  
 Yuní ma-koleana yomboma pali  
 nane ono sumbi sipu nokombo mele nimba simba.

**19** Yombomane yu iri tonge kinia

yuni pundu topa ungu se naa nimba,  
 ungu se tondolo mundupa naa nimba,  
 yomboma andoko molemele koleamanga  
 yuni opa-ungu naa nimbá.

**20** Kamaye enge naa nilimú se elke naa topa,  
 sepe-llame mimi sipa naa nolemo kinia  
 kamu topa naa kumundumba.

‘Pulu Yemone yomboma kamu sumbi sipa  
 nokomba walemo kamu wendo opili.’ nimba  
 yu aku sipa naa sepa taka lepa molomba.

**21** Kanu-kinia mana-yomboma pali

‘Yuni ‘olio mindili naa namili.’ nimba  
 lipa tapondomba.’ ningu molonge.”  
 nirimu ungu akumu wendo orumu.

**12:22-37**

*“Yesusi Kinia Kurumanga Nokoli Setene Kinia Kopu Seko Kongono Selembele.”*  
*Niringi Semanemo*

**22** Kanu-kinia ye se yunga konopuna kuru se molorumu-na mongo kiri lepa mélema naa kanopa ungu naa nirimu ye se Yesusi molorumuna mengo oringi kinia Yesusini yemo sepa peanga sirimu kinia kanu yemo ungu nimba mélema kanorumu. **23** Aku serimu kanokole yombomane pali mini-wale munduku ninguli: “I yemo ,ye nokoli kingi, Depitinga Malonje?” niringi.

**24** Aku-sipa na-kolo aku niringi ungumu pilkuli Parisi yemane ninguli: “Mólo. Kurumanga nokoli Belsipuli mindi  
 i ye Yesusinga konopuna molopale yu tondolo silimú-na yuni kuruma topa makorolemo.” niringi.

**25** Onone aku siku konopuni pilieringi mele Yesusini pilipale , ‘Yesusi ‘Setene-kinia opa-tou moloringimunga Setenene yu naa lipa tapondolka.’ ningu paa piliangi.’ nimba, onondo nimbale: “Yombo talape se konopu seluna naa pupili molko suku-singina ówa panjiku ono onono opa sekó lupa lupa molemele kinia kanu talapemo pora nilimú. „Molo, kolea senga yomboma molo ulka seluna pelemele yomboma konopu seluna pupili naa molko ono onono opa selemele kinia kanu yombo talapemo sungu siku yu-mele-mele molemele. **26** Aku sipala, Setenene yunga kuru se makorolkanje aku selkamonga yunga talapemo kinia opa mele selka. Pe yunga talapemo nambi sepa manda molemoláye? „Pora nilka.„

**27** “Ungu se piliangila. Nane Belsipulinga tondolomone kuruma makorolio liemu ononga yemane nawenga tondolomone kuruma makorolemeleye? Akumunga, „ononga ye kuruma makorolemele yemane ‘Pulu Yemone olio tondolo silimú-na olione kuruma makorolemolo.’ ningu pilielemele-na, onone nando i nikimili unguma kanu yemane pilku apurukuli “Ono kolo tokomele.” ningí. **28** Aku-sipa na-kolo sika Pulu Yemonga Minimuni na tondolo silimú-na nane kuruma makorolio liemu

Pulu Yemo ye nokoli kingimu molopa yomboma nokomba walemo ono molemelena koronga wendo omu.” „nirimu.”

<sup>29</sup> “Ungu se pea i-sipa: Ye enge nili sene yunga ulkamo nokopa kondolemo kinia ye sene we manda sukundu ombo mélema wa lipa memba pulimúye? Akumu manda mólo. U wa noli yemone ye enge nílimunga kimbu kima ka topale yunga ulkana manda ombo mélema wa limú kanumu.

<sup>30</sup> “Na naa lipa tapondolemo yombomone na-kinia opa-tou molemo. Yombo sene na lipa tapondopa „kongi sipisipima,“ sukundu naa limú yombomone „kongi sipisipima,“ topa bulu-balu silimú. <sup>31</sup> Akumunga, nane onondo nikiru: “Yombo sene ulu-pulu-kirima sepa, ungu-taka tondopa nimba kinjilimú uluma Pulu Yemone manda ‘Mania pupili.’ nimba siye kolomba. Aku-sipa na-kolo yombo sene Pulu Yemonga Minimu nimba kinjipa ungu-taka tondopa yunga imbimu marake mele semba uluma Pulu Yemone ‘Mania naa pupili.’ nimba siye naa kolomba.” nikiru. <sup>32</sup> Mania Ombo Mana-Ye Au Lierimu Yemo ungu-taka tondopa ungu nimba kinjilimú yombomo aku sipa ulu-kiri selemoma Pulu Yemone ‘Mania pupili.’ nimba siye kolomba. Aku-sipa na-kolo Mini Kake Sélimu, ni ulu se selemoma kinia, yombo sene ungu-taka tondopa, opa sepa sipa „Yuni naa sekemo. Kurumanga nokoli Setenene yu lipa tapondolemo-na aku selemoma.” „ nilimú yombomo aku sipa ulu-kiri selemoma kiniá kepe mulu ma pora nimbá wale kinia kepe ‘Mania naa pupili.’ nimba paa siye naa kolomba.

**12:33-35**

### *Unju Kirimane Mongo Kirima Tolemo Ungu Se*

<sup>33</sup> “Unju peanga se kanokole ‘Mongo peangama tomba nomolo.’ ningu kanolemele. Unju kiri se kanokole ‘Mongo kirima tomba manda naa nomolo.’ ningu kanolemele. Unju se mongo tolemo kinia kanokole ‘I unjumu peanga, i unjumu kiri.’ ningu apuruku kanolemelemonga aku siku ningu kanolemele. <sup>34</sup> Ono Parisi yema, kolo topa yomboma sepa kinjeli wambiyemonga waloma, ono ye kiri molemelemane nambi seko ungu peangama manda ningíye? Yombo se yunga konopuna pelemo unguma mindi kerena nilimú akumunga ono ye kirimane nambi seko ungu peangama manda ningíye? <sup>35</sup> Aku sipa mele, yombo peanga sene yunga konopuna ulu peanga pelemoma selemoma, aku-na-kolo yombo kiri sene yunga konopuna ulu-kiri pelemoma selemoma.

<sup>36-37</sup> “Akumunga nane onondo nimbu sikirumu: “Pulu Yemone yomboma kote sendemba walemonga onono ungu nilimilima apurupa pilipale “Nu yombo peangamo, nu yombo kirimu.” nimba akumunga yombomane mana we ungu nilimilima pali kepe apurupa pilipale “Aku unguma nambi semu-na niringiye?” nimba.” nikiru.” nirimu.

**12:38-45**

### *Yesusindu “Nu Sika Pulu Yemone Lipa Mundorumunje Kanamili, Ulu-Tondolo Se Sei.” Niringi Kinia Yesusini Pundu Topa Nirimu Mele Semanemo*

<sup>38</sup> Kanu-kinia Parisi ye mare kinia Pulu Yemonga ungu-manemanga puluma pilku mane siringi ye mare kinia onone Yesusindu ninguli: “Ungu Mane Sili Yemo, ‘Nu sika Pulu Yemone ‘Kongono sendani.’ nimba mana lipa mundorumunje olio kanamili.’ ningu Pulu Yemone mindi manda ulu-tondolo selemoma mele se sei.” niringi.

<sup>39</sup> Yesusini pundu topa nimbale: “Kiniá mana molemele yomboma kiri mindi molemele. Ono seko kinjiku Pulu Yemo pilku mokoli selemoma yombomane “Pulu Yemone mindi ulu-tondoloma manda selemoma mele kanamili sei.” ningu na mawa selemoma. Aku-na-kolo „Pulu Yemone na lipa mundorumu-na ombo moltoro. Yakinia kopu sepo kongono selembolo mele lipa ora simba ulu-tondolo se wendo naa ombá. Pulu Yemone ungu-umbu tondorumuma pilipa yomboma nimba sirimu ye

Jona-kinia wendo orumu ulu akumuni mindi lipa ora silimú manda kanonge. <sup>40</sup> Oma awili sene Jona topa penge mundorumu kinia yu omamonga olona ipulieli tangoli wale yopoko molopa perimu ,kinia omamone yu nomu kelona meku topa wendo mundorumu kinia yu kelepa we molorumu, mele Mania Omiba Mana-Ye Au Lierimu Yemo ,kolomba óno seko panjingí kinia, aku sipa ipulieli tangoli wale yopoko mana sukundu pepale ,lomboropa ola molomba.„

<sup>41</sup> “U kolea-awili Ninipa yomboma ,sika molko kinjeringi-na-koło Pulu Yemone ungu-umbu tondorumu mele, Jonane ,pilipa, Ninipa yomboma pumba nimba sirimu kinia pilkuli seko kinjeringi mele kanoko kiri pilku konopu topele toko molko kondoringi. Aku seringimunga kiniá molemele yombomane Jonanga olandopa ye se ya molemo yemonga ungumu pilku mokoli seko naa pilielemelomonga kote walemo pe wendo ombá kinia Ninipa yombomane kotena gilku, kiniá molemele yombomando “Seko kinjeringi. Mindili nonge kinia peanga.” ningí.” „nirimu..”

<sup>42</sup> “U olio Isirele yombomanga ye nokoli kingi Sollomonu yu ye paa tondolo se molopa, yu ungu lupa lupama pilipa kondolimu pepili molorumu mele kolea Sipa nokorumu ambo nokoli kuwinimu pilipale, Sollomonone ungu peangama mindi nirimu mele pilimbando yu kolea suluna molopale ,Sollomon molorumuna, wale awisili aulkana pelepa orumu. Aku sipa serimumunga, ye nokoli Sollomononga olandopa ya molemo yemone nilimú ungumu kiniá mana molemele yombomane naa pilku, mokoli selemelelomonga kote walemo wendo ombá kinia kolea Sipa ambo nokoli kuwinimuni nimbale: “Nane Sollomonone ungu peanga nirimu mele pilimbundu aulka suluna orundu-na-koło Sollomononga olandopa molorumu yemone nirimu ungumu ono naa pilku, mokoli seringi yombomaaku seringimunga ono papu mindili nonge.” nimbá.” „nirimu..”

12:43-45

### Kuru Se Yombo Senga Konopuna Kelepa Orumu Semanemo

<sup>43</sup> “Kuru se ye senga konopuna wendo ombale, no naa mololi koleamanga pumba manda koro molomba kolea se korolemo. Se naa kanopa lendepale <sup>44</sup> yuni nimbale: “Na u molopole wendo ondu ulkana kelepo pambo.” nimba yu omiba yu u molopa purumu ulkamo kanolemo kinia ulka pole lepa sepa peanga sepa we lepa yombo se naa molemo kinia kanopale nilimúmuni, <sup>45</sup> yu kelepa anju pumbale kuru kara puli paa olandopa yopoko-pakara lipa memba omiba ono pea kanu ulkana sukundu pungu molemele. Kanu-kinia kanu yemo u molopa kinjilimú-na-koło pe paa kamu olandopa mele molopa kinjilimú. Aku sipa, kiniá ya seko kinjiku molemele yomboma pe kamu molko kinjingí.” nirimu.

12:46-50

### Yesusinga Anumu Kinia Genupili Kinia Akumanga Semane Se

<sup>46</sup> Yesusi yombo maku toko moloringima ungu-mane sipa molopili yunga anumu kinia genupili kinia yu-kinia ungu ningíndu ongo pena gilieringi. <sup>47</sup> Yombo sene yundu nimbale: “Aminia kinia genali kinia onone nu-kinia ungu ningíndu ongo pena gilimili.” nirimu.

<sup>48</sup> Yesusingi yundu pundu topa ,ungu-iku topa, nimbale: “Nanga anumu nawe? Nanga genupili namele?” nimbale nirimumuni, <sup>49</sup> yu lombili andoli yomboma lipa ora sipa nimbale: “I yomboma nanga anumu kinia nanga genupilima molemele. <sup>50</sup> Nanga Lapa mulu-koleana molemomone “Sangi.” nilimú mele pilku liku selemele yomboma nanga anumu kinia nanga genupili kinia nanga kemulupili molemele mongaaku sipu nikiru.” nirimu.

13:1-53

## Yesusingi UNGU-IKU MARE TORUMU UNGUMA

## 13

*13:1-3*

*Yesusini Ungu-Iku Mare Torumumanga Pulu-Pulu Ungumu*

<sup>1</sup> Yombo maku toko moloringimando aku sipa nimba pora sipale nirimumuni, Yesusi ulkana molopa pena pumba nomu kelona pumba mania molorumu. <sup>2</sup> Yombo paa awisili yu molorumuna ongo maku toko moloringimunga nona andoli sipi se nona ola lierimumunga suku pumba mania molorumu, yomboma nomu kelona gilieringi. <sup>3</sup> Yuni onondo ungu awisili nimba simbando ungu-iku pokore torumu.

*13:3-9,18-23*

*Ye Sene Kere-Langi Umbu Kaliana Tanda Sirimu Ungu-Ikumu*

Ungu-iku se i-sipa topa nimbale: "Piliame!"

"Ye sene rasi-witi umbu kaliana andopa tanda sirimu.

<sup>4</sup> Tanda silipa andorumu kinia umbu mare aulkana mania purumu, kanuma keramane ongo liku noringi. <sup>5</sup> Umbu mare kou perimuna mania pumbale ma kanga-kolte mindi lierimu-kulu nondopa töko nimba wendo orumu. <sup>6</sup> Aku-na-kolo pulkonio naa mundorumu-kulu ena serimu kinia kanuma kolorumu. <sup>7</sup> Umbu mare siri-ka mélemo molorumuna mania purumu, siri-ka mélemo wendo omba witi umbuma topa norumu-kulu omba peanga naa lepa „mongo se naa torumu.“ <sup>8</sup> Umbu mare ma peangana mania purumuma wendo omba mongo peangama torumu. Mare mongo towapu kise mele topa, mare mongo towapu yopoko mele topa, mare towapu selu mele torumu." „nirimu..“ <sup>9</sup> „Aku nimbale, "Yombo komu-pea lemomane i ungumu piliaa." nirimu.

*13:10-17*

*Yesusindu "Ungu-Ikuma Nambi Semu-Na Tolenoye?" Ningu Mangilku Pilieringi Semanemo*

<sup>10</sup> Yesusi lombili andolima yu molorumuna ongo yundu ninguli: "Nu yombomando ungu se ninindu ungu-ikuma alieli nambi semu-na tolenoye?" niringi.

<sup>11</sup> Yuni onondo pundu topa nimbale: "Pulu Yemo ye nokoli kingimu molopa yomboma kinia mélema kinia nokolemomonga ulu-pulu yu yuyu pilierimu kanu ulupuluma 'Kiniá ono ,na lombili olemele yomboma, piliangi.' nimbale ono nimba sikimu. Aku-na-kolo we-yomboma nimba naa sikimu. <sup>12</sup> Pulu Yemonga ungumu pilku molemele yomboma paa oladopa nimba simba pilingí. Pe paa awisili pilingí. Aku-na-kolo naa pilku molemele yomboma ono kanga-kolte pilielemene ungumu kepe wendo limba.

<sup>13</sup> 'Ono mongone kanokole naa kanoko,  
komuni pilkuli naa pilielemene.'

akumunga nane we-yomboma onondo 'Unguma nimbu siembo.' nimbili ungu-ikuma mindi topo siliu.

<sup>14</sup> "Aku siku seko molemelemonga koronga-u Pulu Yemone ungu-umbu tondoruma yomboma nimba sirimu ye Aisayane "Aku siku senge." u nirimu mele wendo olemo. Aisayane nimbale:

"Onone alieli komuni pilingí-na-kolo  
konopuni pilkuli paa naa pilingí;  
mongone kanonge-na-kolo  
mélse paa sika naa kanonge.

<sup>15</sup> I yombomanga konopuma paa pipi silimú;  
onone ungu pilingindu komu naa sendeko molemele;  
ononga mongoma kumbulku molemele.

Aku siku seko molemelemonga  
naa kanoko naa pilku molemele.

I uluma aku sipa naa selkanje  
 onone ononga mongone kanoko  
 komuni pilku  
 konopuni pilkuli topele tolemolá,  
 kanu-kinia nane 'Ono peanga liepili molangi.' nilka."  
 nirimu. „Aisayane aku sipa nirimu mele, aku siku kiniá we-yomboma seko molemele.

<sup>16</sup> "Aku-sipa na-kolo ,na lombili andolima, onone mongone paa sika kanoko komuni paa sika pilku molemelemonga ono Pulu Yemone "Konopu peanga pepili molko kondangi." nilimú aulkana molemele. <sup>17</sup> Nane onondo paa sika nimbu sikirumu: "U moloringi yomboma, Pulu Yemone ungu-umbu tondorumuma pilku yomboma ningu siringi yema kinia, Pulu Yemonga unguma pilku liku sumbi siku moloringi yomboma kinia, kanu yombo awisili kiniá ono mongone kanoko molemele mélema kinia uluma kinia kanongendo "Kanamola!" ningu moloringi-na-kolo naa kanoringi. Ono kiniá komuni pilku molemele unguma pilingindu "Piliámola!" ningu moloringi-na-kolo naa pilieringi akumunga „nane "Kiniá sika kanoko sika pilielememonga ono Pulu Yemone sewi anjilimú aulkana molemele." nikiru.,

*13:18-23*

*, Ungu-ikumunga imbimu inia yakondo 13:36-43 kanani*

<sup>18</sup> "Akumunga, yombo sene rasi-witi umbu tanda sirimu ungu-ikumunga pulumu kiniá niembo piliayo.

<sup>19</sup> „Umbu mare tanda sirimu aulkana mania purumu kanumanga ungu-pulumu i-sipa: „ Yombo sene Pulu Yemo ye nokoli kingimu molopa mélema nokolemomonga ungumu pilipale naa pilielemo kinia ulu-kirimanga pali ulu-pulumu pelemo „kuru,muni omiba umbu tanda sili konopuna pumba pelemoma waltikele toropa wendo limú.

<sup>20</sup> Umbu mare tanda sirimu kou perimuna mania purumuma yombo mare aku sílma molemele. Onone ungumu pilkuli waltikele sumbi siku konopu siku pilku limili.

<sup>21</sup> Aku-sipa na-kolo ono pulkonio naa mundukuli ungumu kanga-kolte mindi pilku molemele. Pe ono konopuna umbuna selemo kinia molo ono Pulu Yemonga ungumu pilku liku molemele mele yombo lupamane kanoko kiri pilkuli ungu-taka tondoko seko kinjiku mindili silimili kinia ononga pilielemele unguma siye kololemele.

<sup>22</sup> Umbu mare tanda sirimu siri-ka mele molorumuna mania purumuma yombo mare kepe aku sílma molemele. Onone ungumu pilielemele kinia konopuna umbuna selemo umbunama kinia, méle awisili taltokole 'Aku mélemane olio lipa tapondolemo tapondomba.' ningu pilku molemele uluma kinia, kanu sili ulu mare wendo omiba ungu kanumu topa nolemo kinia ungumuni uluri naa sepa kere-langí mongo naa tolemo.

<sup>23</sup> Umbu mare tanda sirimu ma peangana mania purumuma yombo mare aku sílma molemele. Onone ungumu pilkuli ungu-pulumu pilku kondolemele. Pe ono kere-langí mongo tolemele. Kanu yombo marenga kere-langí mongo towapu kise mele topa, yombo marenga mongo towapu yopoko mele topa, marenga mongo towapu selu mele topa, aku sipa tolemo.

Ungu-ikumunga ungu-pulumu aku sipa." nirimu.

*13:24-30,36-43*

*Era Se Kinia Kere-Langi Peangamo Kinia Kaliana Orumu Ungu-Ikumu*

<sup>24</sup> Yesusini ungu-iku se pea yomboma topa sipa nimbale:

"Pulu Yemo ye nokoli kingimu molopa mélema nokolemo akumu i-sipa mele:

Ye sene yunga kaliana rasi-witi umbu peangama tanda sirimu. <sup>25</sup> Aku-na-kolo yomboma uru peringi kinia yunga opa-tou ye se omiba era „rasi-witi none seli era,

umbu se witi kaliana tanda sipale kelepa purumu. <sup>26</sup> Kanu-kinia umbu peangama wendo omba witi mongo torumu kinia era kinia pea wendo orumu mele mona molorumu kanoringi.

<sup>27</sup> Kanu-kinia kalia pulu yemonga kongono sendeli yema ongo yundu ninguli: "Ye-Awilimu, nunga kaliana kere-langì umbu peangare tanda naa sirinuye? Pe kiniá era nambi sepa wendo okomoye?" niringi.

<sup>28</sup> Yuni onondo nimbale: "Sena. Opa-tou ye sene aku era umbuma omba tanda sirimu lepomo." nirimu.

Kongono sendeli yemane ninguli: "Era pea waka-maka wendo okombele kene pumbu erama akupu lipu maku tamili.' konopu lekenoye?" niringi.

<sup>29</sup> Aku-na-kolo yuni nimbale: "Mólo. Era sengi liemu witi pea pulu akungínje. <sup>30</sup> Witi pe kamu lipu maku tomolondo u pea ongo molangili. Pe witi kamu limulú walemo wendo ombá kinia nane witi kari leko lindingí yombomando nimbili: "U era kalongendo liku piye seko maku tokole ningimuni, pe witi liku nanga witi taltolio ulkana maku toko taltangi." nimbú." nirimu." nimba, Yesusini "Pulu Yemo ye nokoli kingimu molopa yomboma nokolemo akumu aku sipa mele." nirimu.

**13:31-33**

### *Unju Masetete Umbumunga Ungu-Ikumu Kinia Pellawa Akoli Mele Isimunga Ungu-Ikutolo.*

<sup>31</sup> Ungu-iku se pea yomboma topa sipa nimbale:

"Pulu Yemo ye nokoli kingimu molopa yomboma nokolemo akumu i-sipa mele: Ye sene unju masetete umbu se lipa <sup>32</sup> yunga kaliana umbumu mundorumu. Masetete umbu akumu kere-langì umbumanga pali yu paa kangamo na-kolo wendo omba awi lemo kinia kaliana molemo mélemanga pali yu paa awilimu. Kamu awi lepa unju mele gilimú kinia kerama kanu unjuna ongo kolamanga pelemele. „Pulu Yemo ye nokoli kingimu molomba mele aku sipa..” nirimu.

<sup>33</sup> Ungu-iku se pea yomboma topa sipa nimbale:

"Pulu Yemo ye nokoli kingimu molopa yomboma nokolemo akumu i-sipa mele: Ambo sene yu kere-langì pellawa akondoli méle isi kanga-kolte pellawa awisilinga mundorumu kinia pellawa pali akorumu. „Pulu Yemo ye nokoli kingimu molomba mele aku sipa..” nirimu.

**13:34-35**

### *Yesusini Ungu-Ikuma Mindi Torumumunga Ungu-Pulu Se*

<sup>34</sup> Kanu unguma pali Yesusini yombomando nimbando yu ungu-iku mindi topa nirimu. We ungu se onondo sumbi sipa naa nimba ungu-iku manjipa topa nirimu.

<sup>35</sup> Aku sipa serimumunga koronga-u Pulu Yemone ungu-umbu tondorumuma pilipa yomboma nimba sirimu ye sene u nirimu ungu se kamu wendo orumu. Akumu i-sipa: "Nane i ,ungu nimbúndu,

ungu-iku ,manjipu, topo nimbú.

Pulu Yemone u mulu matolo serimu kinia kepe

yandopa yandopa kepe ,ningu

wendo munduku naa niringi,

lopi sepa perimu unguma ,nimbúndu

ungu-iku mindi topo, nimbú."

nirimu.

**13:36-43**

### *„Ungu-ikumunga imbimu inia yakondo 13:24-30 kana*

<sup>36</sup> „Yesusini ungu-iku akuma topa pora sipale, „yu maku toko moloringi yomboma mundupa kelepa ulkando purumu kinia yu lombili andolimane yu molorumuna

ongo ninguli: "Kaliana era orumu ungu-ikumunga ungu-pulumu olio ningu para si." nirangi.

<sup>37</sup> Yuni pundu topa nimbale:

"Kere-langi umbu peangama tanda sirimu yemo Mania Ombo Mana-Ye Au Lierimu Yemo. <sup>38</sup> Kaliamo ma-kolea pali. Kere-langi umbu peangama yombo 'Pulu Yemo nanga ye nokoli kingimu molopili.' nilimilimunga ononga konopumanga Pulu Yemone tapu sepa molopa nokolemo yomboma. Era-umbu akuma ulu-kirimanga pali ulu-pulumu pelemo ,kuru,munga yomboma. <sup>39</sup> Era-umbu tanda sirimu opa-tou akumu ,kurumanga nokoli, depelemo. Witi sukundu liku maku tonge wale akumu ma-kolea pora nimbá walemo. Witi mongoma sukundu lingí yomboma mulu-koleana angelloma.

<sup>40</sup> "Erama liku maku tokole sepena kalolemele mele ma-kolea pora nimbá walemonga aku sipa. <sup>41</sup> Mania Ombo Mana-Ye Au Lierimu Yemone yunga angelloma lipa mundumba, onone 'Yomboma Pulu Yemonga unguma naa pilku, seko kinjiku molangi.' nilimili yomboma pali kinia, ulu-pulu-kiri selemele yomboma pali kinia, Pulu Yemone tapu sepa molopa nokolemo yomboma molongena wendo liku maku tokole ningimuni, <sup>42</sup> sepe awili nomba pelemo koleana sukundu toko mundungi, kanuna yomboma kola seko paa mindili nongo perek molonge. <sup>43</sup> Kanu walemanga konopu sumbi nili yomboma ononga Lapa ye nokoli kingimu molopa nokolemo koleana ena pa selemo mele ono aku siku kanuna pa sepili molonge.

"Yombo komu-pea lemomane i ungumu piliaa." ,nirimu..

*13:44-53*

*Yesusini Ungu-Iku Kanga Mare Torumu Ungu-Ikumanga Se: 13:44 Ye Sene Kou-Benge Se Kalia Senga Lopi Seko Taltoringi Kanopa Liltimu Ungu-Ikumu*

<sup>44</sup> ,Yesusini aku nimbale kelepa nimbale:

"Pulu Yemo ye nokoli kingimu molopa yomboma nokolemo akumu i-sipa mele: Kou-mone mokopu se kalia senga u lopi seringi we perimu kanumu ye sene pe walte kanopa lipale kelepa aki torumu. Aki topale konopu sipa pumba yunga mélema pali lipa makete sepa kou pokore yando lipale kanu kaliano pumba topo topa yando liltimu. ,Pulu Yemo ye nokoli kingimu molomba mele aku sipa.." ,nirimu..

*Se 13:45-46*

*Kulumbu Kou Awili Puli Se, 'Péllé' Nili, Akumunga Ungu-Ikumu; 13:44-53 pali*

<sup>45</sup> "Pulu Yemo ye nokoli kingimu molopa yomboma nokolemo akumu i-sipala: Kou-bisinisi seli ye sene kulumbu se 'péllé' nili peangama koropa molorumu. <sup>46</sup> Kanukinia kulumbu péllé kou paa awisili puli se kanopale nirimumuni, yu pumba yunga mélema pali makete sepa kou yando lipale kanu kulumbu péllemo topo topa yando liltimu. ,Pulu Yemo ye nokoli kingimu molomba mele aku sipa.." ,nirimu..

*Se: 13:47-50*

*Oma Lili Walemonga Ungu-Ikumu; 13:44-53 pali*

<sup>47</sup> "Pulu Yemo ye nokoli kingimu molopa yomboma nokolemo akumu i-sipa melela: Oma lili wale se nomuna toko mundoringi kanumuni oma lupa lupama liltimu.

<sup>48</sup> Walemo paa peke lierimu kinia kunduku liku nomu kelona taltokole, mania molko apurukuli peangama liku wale-basikete pokorenga mundoringi-na-kolo kirima toko eltoringi.

<sup>49</sup> "Ma-koleamo pora nimbá walemonga aku sipala: Mulu-koleana angelloma ongole ningimuni, yombo seko kinjiku molongema kinia yombo sumbi siku molko kondongema kinia liku apuruku <sup>50</sup> yombo seko kinjiku molongema liku sepe awili

we nomba pelemo koleana toko sukundu mundungí, kanuna kola seko paa mindili nongo perekó molonge.” ,nirimu..

*Se 13:51-52*

*Ye Sene Méle Kondema Kinia Méle Uma Kinia Pea Wendo Limú Ungu-Ikumu. 13:44-53 pali kanani*

<sup>51</sup> „Ungu-ikuma topa pora sipale Yesusini lombili andolima mangilipa pilipa nimbole: „

“Aku unguma pali ungu-puluma ono piliengiye?” nirimu.

Onone yundu ninguli: “Piliemulu.” niringi.

<sup>52</sup> Yuni onondo nimbole: “Aku liemu Pulu Yemonga ungu-manemanga puluma pilku mane silimili yemane Pulu Yemo ye nokoli kingimu molopa yomboma nokolemomonga unguma mane silimulu kinia pilku liku molemele kanu yema ono i-sipa: Ulka pulu ye sene yunga méle peanga kande-kande taltolemomanga méle kondema kinia méle uma kinia pea wendo limú.” nirimu.

<sup>53</sup> Yesusini aku ungu-ikuma topa pora sipale kanu koleamo mundupa kelepa yu purumu.

*13:54-58*

*Yesusi Molopa Akorumu Kolea Nasarete Yombomane Yunga Ungumu Pilku Mokoli Seringi Semanemo*

<sup>54</sup> Mundupa kelepa pumbale yunga pulu-kolea „Nasarete”, taonona ombale Juda yomboma maku toko Pulu Yemonga ungumu pilieringi ulkana sukundu pumba yomboma mane sirimu kinia pilkuli ono pungu-pungu ningu mini-wale munduku ninguli: “I yemo yunga pilipa kondolimu kinia yunga ulu-tondolo selemomanga tondolomo kinia yu sena liltimuye? <sup>55</sup> Yu ulkama takorumu yemonga malo móloye? Maria yunga anumu naa molemoye? Jemisi, Josepo, Saimono, Judasi keme, yunga genupili móloye? <sup>56</sup> Yunga kemulupili kinia pali olio kinia pea naa molemoye? Yu paa sika aku yemo molemomo..”

Aku liemu yunga pilipa kondolimu kinia yunga ulu-tondolo selemomanga tondolomo kinia yu sena liltimuye?” niringi. <sup>57</sup> „Aku siku unguma ningu, yu ungu nimba uluma sepa molorumu mele kanoko kiri pilku yu-kinia paa konopu kiri panjeringi.

Kanu-kinia ,ono yu-kinia mumindili koloringimunga ulu-pulumu pilipale, Yesusini onondo nimbole: “Pulu Yemone ungu-umbu tondolemoma pilipa yomboma nimba silimú ye se koleamanga pali imbi ola molemo, yombomane pali yunga unguma pilku limili. Aku-sipa na-kolo yunga pulu-koleana yu-kinia pea kopu seko molemele yomboma mindi yuni nilimú ungumu pilkuli ‘Yu olionga we-yere. Yu imbi mololi ye se mólo.’ ningu yu nilimú unguma naa pilku, liku bulu silimili.” nirimu.

<sup>58</sup> Kanu-kinia yu ,ungu nimba uluma sepa yu yuyu molorumu mele ‘Sika.’ ningu, kuru naa mondoringimunga yu kanu koleana ulu-tondolo awisili naa serimu, koltalo mindi serimu.

## 14

*14:1-12*

*Ye Nokoli Kingi Eretene No Lindeli Jono Topa Kondorumu Semanemo*

<sup>1</sup> Kanu walemanga kolea Gallilli disiriki nokorumu ye nokoli kingi Eretene Yesusini serimu mele semane toringi pilipale <sup>2</sup> yu-kinia kopu seko molko yu liku tapondoringi tapu-yemando nimbole: “I unguma selemo yemo No Lindeli Jono lepomo! Yu kolopale lomboropa wendo omumunga ulu-tondoloma sembá tondolomo yu-kinia pelemo.” nirimu.

<sup>3-4</sup> „Kingi Eretene aku sipa nirimu ungumunga pulumu i-sipa:“ U walte Eretene yunga genu Pillipunga ambo menu Erodiasi mangopa liltimu. „No Lindeli, Jonone Erote aku sipa serimu kanopale yundu alieli nimbale: “Nuni „Pulu Yemonga, ungu-mane se pulua toko genanga ambomo mangoko liltinu. Akumu seko kinjerinu.“ nirimu kinia Eretene yu lipa ka sipa ka-ulkana panjerimu. <sup>5</sup> Ka-ulkana panjipale ‘Yu topo kondambo.’ konopu lierimu-na-kolo we-yombomane ‘Jono yu Pulu Yemone ungu-umbu tondolemoma pilipa yomboma nimba silimú ye se molemo.’ ningu kanoringimunga yu pipili kolopale Jono topa naa kondorumu.

<sup>6</sup> Pe walte kingi Eretenga meringi walemo wendo orumu kinia Erodiasi lemenu ulkana sukundu ombo, yema maku toko kanoko molangi yu denisi serimu. Eretene ambo-wenepomo aku serimu kanopa paa peanga pilipa <sup>7</sup> yundu nimbale: “Nando “Si.” nini mélemo paa sika simbú.” nimba, nimba panjipa Pulu Yemonga imbi lepa mi lierimu. <sup>8</sup> Yuni aku sipa nirimu-na anumuni pilipale lemenu ungu se nimba sirimu kinia pilipale ambo-wenepomone Eretendo nimbale: “No Lindeli Jononga „nomimu kari leko yunga, pengemo pellete senga taltoko yando si.“ nirimu. „Jonone u alieli “Erote kinia Erodiasitolone seko kinjeringili.“ nirimumunga mumindili kolopale Erodiasini ‘Yu kolopili. Sika kolomunje na kanambo.’ nimba “Pengemo ongo si.“ nirimu.„

<sup>9-10</sup> Yuni aku sipa mele mawa serimu-na pilipale Erote konopu umbuna serimu-na-kolo yuni “Paa sika simbú.” nimba, nimba panjipa Pulu Yemonga imbi lepa mi lierimu mele kepe, yu konopu topele tomba kinia yu-kinia pea kere-langgi nongo moloringi yema yu kanoko kiri pilingí mele kepe, aku ungutolo pilipale, ka-ulkana nokoringi yemando ungu se nimba mundupale “Yuni mawa sepa “Si.” nikimu mele siengi kene „No Lindeli, Jononga „nomimu kari leko yunga, pengemo yando mengo waa.“ nirimu. <sup>11</sup> Aku nirimu kinia pilkuli Jono toko kondoko, yunga pengemo pellete senga taltoko, yando mengo ongo ambo-wenepomo siringi kinia yuni lipa anumu molorumuna memba pumba sirimu.

<sup>12</sup> Aku seringi pilkuli Jono lombili andoringi yema ongo yunga ónomo liku mengo pungu óno sekole Yesusi molorumuna pungu semane toko siringi. „Kingi Eretene No Lindeli Jono u aku sipa topa kondorumu kolorumumunga pe Yesusini ulu-tondoloma serimu mele pilipale “Jono nomi kari lierindu yemo lomboropa ola molemo lémo.“ nirimu.„

**14:13-21**

### *Yesusini Ye Paip Tausini Kere-Langi Sirimu Semanemo*

<sup>13</sup> „Ye nokoli kingi, Eretene No Lindeli Jono topa kondorumu pilipale nirimumuni, Yesusi yu molorumu koleamo mundupa kelepa ‘Senga nanu molambo.’ nimba nona andoli sipi senga sukundu pumba nomu „Gallilli, nekendo pumba kolea ku lieli senga yuyu pumbá purumu. Aku-na-kolo yombo awisili yu aku serimumu pilkuli ononga koleama munduku kelko kimbu anjiku nomu kelona makaye seko pungu yu purumuna akileko lombili puringi. <sup>14</sup> Yesusi no-kelona ombale yombo paa awisili akuna maku toko moloringi kanopale ono kondo kolopa ononga kuru torumuma ‘Peanga liepili.’ nimba ono sepa peanga sirimu.

<sup>15</sup> Pe ipupini ena pumbá serimu kinia yu lombili andolima yu molorumuna ongo yundu ninguli: “I koleana yombo se naa pelemele, ena kamu pukumu kene ya maku toko molemele yomboma ‘Pungu kolea marenga kere-langgi topo toko li-pangi.’ ni.” niringi.

<sup>16</sup> Aku-na-kolo yuni yu lombili andolimando pundu topa nimbale: “Nambi semuna ‘yombo akuma ‘We pang.’ niembo.’ ningu nikimiliye? Onone onono yomboma kere-langgi mare liku siee.” nirimu.

<sup>17</sup> Onone yundu ninguli: "Ya kere-langi awisili naa taltolemele. Pellawa kaloli kanga se-pakara kinia oma kaloli talo kinia aku kere-langi pokore mindi lemó." niringi.

<sup>18</sup> Yuni "Na moliona yando mengo waa." nirimu.

<sup>19</sup> Kanu-kinia yombomando "Eрана mania molaa." nimbale yuni kanu pellawa kaloli se-pakara kinia oma talo kinia lipale mulu-koleana olando sipa kanopa „Pulu Yemo kinia, "Ange." nimba pellawa kalolima ambolopa pike lepa „oma kinia, lombili andolima moke sepa sipale "Anju yomboma siee." nirimu, onone yomboma moke seko siringi. <sup>20</sup> Ono pali kanu kere-langima noringi kinia olo serimu. Pe lombili andolimane kere-langi kakena lierimuna liku maku toko wale-basikete engaki rurepo toko peke siringi. <sup>21</sup> Kere-langi noringi yema manjipa paip tausini mele. Ambo bolango „mare pea kere-langi noringi, akuma olandopa.

*14:22-33*

#### *Yesusi Nomuna Ola Kimbu Anjipa Orumu Semanemo*

<sup>22</sup> „Yomboma kere-langi sirimu noringi, kinia Yesusini yu lombili andoli yemando sumbi sipa nimbale: "Maku toko molemele yomboma nane "Pangi." niembo. Ono nona andoli sipina ola pungu no nekendo kumbi leko paa." nirimu. <sup>23</sup> Yombomando "Paa." nimbale yu yuyu Pulu Yemo kinia ungu nimbando ma-pangina ola purumu. Kanu-kinia ena pumba kolea kala torumu kinia akuna yuyu molorumu.

<sup>24</sup> Sipimu no nekendo pumbándo nomu awi-suku-singina kokele pumbá purumu kinia sipi kumbikundu mendo sipa poporomene topa, nomu torumula kinia nomo ola pumba mania ombo serimu, sipimu topa ola-munda mania-munda sepa topele-mapele torumu.

<sup>25</sup> Kanu-kinia ipulielo kolea muni naa liepili „yu lombili andolima sipina ola molko, purringina Yesusi nona ola kimbu anjipa ombá orumu. <sup>26</sup> Onone yu nona ola kimbu anjipa orumu kanokole niringimuni, pipili awili seko kolkole "Kuru se okomaa!" ningi mini-wale mundoringi kinia <sup>27</sup> Yesusini popenge sepa onondo nimbale: "Ono konopu tondolo pupili molayo. Na mindi okoro. Pipili naa kolaa." nirimu.

<sup>28</sup> „Yuni aku nirimu pilieringi kinia, Pitane pundu topa nimbale: "Ye-Awilimu, akumu sika nu nunu onu liemu nu okonona na nona ola gilipu wambo mangiliei." nirimu.

<sup>29</sup> Yuni "Ou." nirimu kinia Pita sipina ultu pumba pukua topa nona mania pumbale nona ola kimbu kulupa Yesusi molorumuna pumbá purumu.

<sup>30</sup> Aku-sipa na-kolo poporome tondolo torumu kinia kanopale pipili kolopa yu nona wangomba sepale, "Ye-Awilimu, na liku tapondou!" nimba ru nirimu.

<sup>31</sup> Kanu-kinia Yesusini ki siniu sipa mundupa Pita kundupa ola lipa yundu nimbale: "Nane molio mele kepe uluma manda sembó mele kepe "Sika." ningi kangakolte mindi kuru mondoleno yemo. U 'Yuni na lipa tapondomba, sika nona ola manda pumbú.' konopu lekole kelko konopu topele nambi semu-na toko 'Na no wangombonje?' ningi pilienuye?" nirimu.

<sup>32</sup> Sipina suku purringili kinia poporome topa kelierimu. <sup>33</sup> Aku serimu-na kanokole sipina suku moloringi yemane Yesusinga imbi ambolko paka tondoko kape ningu "Nu paa sika Pulu Yemonga Malo lepomo." niringi.

*14:34-36*

#### *Yesusini Kolea Geneserete Kuru Torumu Yombo Awisili Sepa Peanga Sirimu Semanemo*

<sup>34</sup> Kanu-kinia „Yesusi kinia yu lombili andolima kinia Gallilli, nomu nekendo punguli nomu kelona kolea Geneserete lierimuna wendo oringi. <sup>35</sup> „Kanu koleana sipina mania oringi kinia, akuna moloringi yemane Yesusi kanoko imbi sikuli akundu lierimu koleamanga moloringi yomboma pali ningu mundoringi kinia yombomane kuru torumu yomboma pali yu ombo molorumuna mengo ongole niringimuni,

36 “‘Nunga wale-pakoli pundumu kepe ambolangi.’ ni.” ningu mawa seringi. Kanukinia kuru torumu yombomane yunga wale-pakolimu amboloringi yomboma pali kamu peanga lierimu.

## 15

*15:1-20*

*Mélema Kake Selemomonga Pulumu Kinia Mélema Kalaro Molemomonga Pulumu-Tolonga Ungu Mare*

*15:1-9*

*Pulu Yemonga Ungu-Manema Olandopa, Anda-Kolepalimanga Ungu-Manema Maniandopa, Ungu Se*

<sup>1</sup> Kanu-kinia Parisi ye mare kinia, Pulu Yemonga ungu-manemanga puluma pilku mane siringi ye mare kinia ono Jerusalleme munduku kelko Yesusi molorumuna ongo yu mangilku pilku ninguli: <sup>2</sup> “Olionga anda-kolepalimane “Saa.” niringi ungu-manemo nu lombili andolimane nambi semu-na pulua tolemeleye? „Anda-kolepalimane “Saa.” niringi mele mimi sipu pilipuli olione kima kulumiye tolemolo mele, ononga kima aku siku kulumiye naa toko kere-langi we nolemele kanumu.” niringi.

<sup>3</sup> Jesusini pundu topa nimba: “Onone kepe ononga anda-kolepalimane “Saa.” niringi mele mindi pilku liku sengendo Pulu Yemonga ungu-manema nambi semu-na pulua tolemeleye? <sup>4</sup> Akumunga Pulu Yemone nimba:

“Aminieli lanielinga unguma pilku liku,  
liku awi siku saa.”

nimba  
“Yombo sene yunga anumundu molo lapando  
ungu se nimba kinjipa iri tomu liemu  
kanu yombomo toko kondangi.”

nirimu kanumu. <sup>5</sup> Aku-sipa na-kolo ono yemane ninguli: “Yombo sene yunga anumu lapatolondo nimba: “Nane olo méle mare lipu tapondopo silkama koronga ‘Pulu Yemo simbú.’ nimbu panjerindu kanumunga olo manda naa lipu tapondopo simbú.” nimba kinia <sup>6</sup> ,aku sipa nimbámonga, yunga lapa imbi ambolopa paka tondomba ungu se naa pemba.” nilimili. Aku siku nilimili ungumuni ‘Anda-kolepalimane mane siringi unguma olandopa.’ ningu ‘Pulu Yemone nirimu ungumu uluri mólo. Mania pupili.’ nilimili.

<sup>7</sup> “Ono ,ungu-manema pilku mane silimili yema kinia Parisi yema kinia, ono topele-mapele toli yema molemele! Pulu Yemone ungu-umbu tondorumuma pilku yomboma nimba sirimu ye Aisayane onondo nirimu mele papu nirimu. „Onone kiniá selemele mele yuni u nimba Pulu Yemonga bokuna torumu molemo mele i-sipa:„

<sup>8</sup> Pulu Yemone nimba:  
“Kanu yomboma ononga keremane na kape ningu  
‘Ye awili olandopamo.

Nu lipu awi silimulu.’ ningu  
na imbi ambolko paka tondolemele-na-kolo  
ononga konopuma kinia nanga konopumu kinia  
seluna naa pulimú. Lupa lupa pelemo.

<sup>9</sup> Onone ‘Nanga imbi  
ambolopo paka tondamili.’ ningu  
na we popo toko kape nilimili.

Mana-yombomane mane silimili unguma mindi  
mane sikuli

'I ungu-manema Pulu Yemone  
 "Saa." nilimú ungu-manema.'  
 ningu pilku liku selemele,  
 akumunga na sika popo tongue kinia  
 unguri naa sembá."  
 nirimu kanumu." nirimu.

**15:10-20**

*Ulu Marene Yomboma Sepa Kalaro Mondondolemomanga Ungu Se ,15:1-20 pali*

**10** Aku nimbale Yesusini maku toko moloringi yombomando "Na moliona waa." nimba onondo nimbale: "Nane ,aku nikirumunga ungu se, nimbú sekero ungumu komu sendeko ungumunga pulumu pilku kondayo. **11** Yombomanga kangina ultukundu lepale kerena pumba olona sukundu pulimú mélsene ,Pulu Yemo manda popo tongue aulkamo pipi silimú, kalaro se manda naa mondolemo. Yombomanga konopumanga sukundu pepale wendo olemo ulumane mindi yomboma kalaro mondolemo." nirimu.

**12** Aku nirimu pilkuli niringimuni, yu lombili andolima yu molorumuna ongo ninguli: "Nu aku siku nikinu mele pilkuli Parisi yemane paa pilku kiri piliengi mele nu pilkinuye?" niringi.

**13** Aku-na-kolo Yesusini pundu topa ,ungu-iku topa Parisima moloringi mele nimba, nimbale: "Nanga mulu-koleana molemo Lapamone umbu naa panjerimuma pali pulu akumba.

**14** I yemane nilimili mele konopu kimbu siku naa pilku molangi. Ono mongo kiri lielimane ,mongo kiri lielima, aulka liku ora silimili yema molemele. Mongo kiri lieli ye sene mongo kiri lieli ye se aulka se lipa ora sipa ki ambolopa memba pumbá kinia olo peatolo kombuna topa mania mundumba." nirimu.

**15** ,Kalaro molemomonga ungu-ikumu aku sipa torumu kinia pilipale, Pitane yundu nimbale: "Aku ungu-ikumunga pulumu nambolkanje? Ningu para si." nirimu kinia

**16** Yesusini onondo nimbale: "Kiniá kepe naa pilkimiliye? **17** Yombo senga kangina ultu lepale kerena pulimú mélse olona sukundu pumba ultu ombo le-muruna kamu pulimú mele naa pilkimiliye? **18-19** Kerena sukundu pulimú mélemane unguri naa selemo kanumu. Ulu-kirima u konopumuni pilkuli pe kamu wendo olemomonga konopuna pepale kerena wendo olemo kanu mélemane mindi ,Pulu Yemo popo tomba aulkamo pipi silimú, kalaro se mondolemo. Kanu mélema i-sipa:

Konopumuni ulu-kirima pilielemene,  
 yomboma toko kondolemele,  
 ambo ye pulima molo ye ambo lilima yombo lupama kinia ulu-kirinale selemele,  
 wa ulu-kirinale lupa-lupama andoko selemele,  
 wa nolemele,  
 kolo toko yomboma kote sendelemele,  
 'Yomboma pipili kolko molko kinjangi!' ningu ungu-bulkundu nindilimili,  
 ulu-pulu akuma pilku selemele. **20** Aku selemele ungu akumane yomboma ,Pulu Yemonga kumbikerena pungí aulkamo pipi silimú, kalaro se mondolemo. Aku-sipa na-kolo ki u naa kulumiye toko kere-langí we sumbi siku nolemele ulu-pulumuni ,yombo senga konopuna sukundu, kalaro se naa mondolemo." nirimu.

**15:21-28**

*Kenane Ambo Sene 'Yesusini Ulu-Tondolo Se Manda Sembा.' Nimba Kuru Mondorumu Semanemo*

**21** Kanu-kinia Yesusi molorumu kolea ,Geneserete, mundupa kelepa ,Juda yomboma moloringi kolea Gallilli disiriki ultukundu, kolea-awili Taya kinia Saidonotolo lierimu koleana sukundu purumu. **22** Akuna purumu kinia kolea Kenane ambo se molorumu, yu wendo ombo tondolo ru nimba nimbale: "Ye-Awili, Ye Nokoli Kingi

Depitini Kalopa Liltimu Yemo, nanga bolamo kuru se konopuna sukundu molopa yu tondolo ambololemo kene nuni na kondo kolou!" nirimu. <sup>23</sup> Aku-na-koło Yesusini yundu ungu se pundu topa naa nirimu.

Kanu-kinia yu lombili andolimane ongo yundu ninguli: "Ambomone nu mangilipa olio lombili okomomo ,siye sekemo, kene 'Anju pupili.' ni." niringi.

<sup>24</sup> Ambomo yu ambo-lupa, Juda ambo se mólo, nimba kanopale, Yesusini ,yundu, nimbale: "Pulu Yemone na Isirele yombo talapemonga kongi sipisipi talopa lemele mele molemele yomboma molemelena mindi lipa mundorumu kanumu. Yombo talape lupama molemelena lipa naa mundorumu." nirimu.

<sup>25</sup> Aku sipa nirimu kinia pilipale ambomo ombo yunga kumbikerena komorongo langopa ma kanopa nimbale: "Ye-Awilimu, na liku tapondou." nirimu.

<sup>26</sup> Aku nirimu kinia Yesusini pundu topa ,ungu-iku se topa, nimbale: "Bolango-manga kere-langima lipu owáma simulú kinia manda naa sembá." nirimu.

<sup>27</sup> Ambomone nimbale: "Ye-Awilimu, sika nikinu-na-koło owámane kepe ononga pulu yombomanga kere-langi pundu mania pulimúma liku nolemele kanumu." nirimu.

<sup>28</sup> Kanu-kinia Yesusini yundu nimbale: "Ambomo, nu manda sembó mele paa awili seko kuru mondoleno kene mawa sekono mele aku sipa wendo opili." nirimu kinia yuni aku sipa nirimu mele aku enamonga ambomonga lemenu peanga lepa manda molorumu.

15:29-39

*Kere-Langi Naa Lepa Kolea Ku Lieli Senga Yesusini Ye Po Tausini Kinia Ambo Bolangoma Kinia Kere-Langi Sirimu Semanemo*

15:29-31

*Yesusini Yombo Kuru Torumuma Sepa Peanga Sirimu Semanemo*

<sup>29</sup> Kanu-kinia Yesusi kanu koleamo mundupa kelepa Gallilli nomu kelona ,aulka se lierimuna, ombo pumba ma-pangi senga ola pumba mania molorumu.

<sup>30</sup> Kanu-kinia yu molorumuna yombo paa awisili oringi.

Kimbu kiri lierimu-na aulka mimi siku naa andoringi yomboma kinia, mongo kiri lierimu yomboma kinia, kimbu ki karaye serimu yomboma kinia, ungu manda naa niringi yomboma kinia, aku sipa kuru lupa-lupa torumu yombo awisili mengo ongo yu molorumuna nondoko taltoringi kinia yuni ono sepa peanga sirimu.

<sup>31</sup> Ungu naa niringi yomboma ungu niringi;

kimbu ki karaye serimu yombomanga kibu kima kelepa sumbi sipa gilierimu; kibu kiri lierimu-na aulka mimi siku naa andoringi yomboma manda andoringi; mongo kiri lierimu yomboma mongone mélema kanoringi; aku sipa ulu-tondoloma wendo orumu kinia kanokole we maku toko moloringi yombomane paa konopu awisili kibu siku, Pulu Yemo ono Isirele yomboma nokorumu popo toringi Pulu Yemo kape ningu imbi ambolko paka tondoringi.

<sup>32</sup> Kanu-kinia Yesusini yu lombili andolimando "Na moliona waa." nimba onondo nimbale: "I yombo maku toko molemelema na kondo sekemo. Wale yopoko na-kinia molongi, pe kiniá ga nonge se naa lemó. Ono kere-langi naa nongo we pungí kinia aulkana kibu ki pange-mange sepa, topa ne-munda ya-munda sembá kene 'Ono gele sepa pepili ulkando paa.' naa nimbú." nirimu.

<sup>33</sup> Aku nirimu kinia pilkuli yu lombili andolimane ninguli: "Sika nikinu-na-koło, i kolea ku lielina molemolo. I yombo paa awisili manda nonge mele pellawa kaloli sena lembana lipu simulúye?" niringi.

<sup>34</sup> Yesusini onondo “Pellawa kaloli nambi seko taltokomeleye?” nimba mangilier-imu kinia

onone “Pellawa kaloli yopoko-pakara kinia oma koltalo kinia taltokomolo.” niringi.

<sup>35</sup> Kanu-kinia yuni maku toko moloringi yombomando “Mania molaa.” nimbale,

<sup>36</sup> pellawa kaloli yopoko-pakara kinia omama kinia lipa Pulu Yemo kinia “Ange.” nimba, kere-langi akuma pike lepa yu lombili andolima sirimu kinia onone yomboma moke seko siringi. <sup>37</sup> Yomboma pali nongo kiri pilieringi. Pe kere-langi kakena lierimuna lombili andolimane liku wale-basiketemanga lakilieringi, wale awili yopoko-pakara peke lierimu. <sup>38</sup> Ye po tausinini aku kere-langima noringi. Ambo bolangoma kinia pea kere-langi noringi.

<sup>39</sup> Kanu-kinia Yesusini maku toko moloringi yombomando “Ulkando paa.” nimbale nirimumuni, nona andoli sipi senga sukundu pumba, „nomuna nekendo, kolea Makatane purumu.

## 16

16:1-4

*Juda Ye Awilimane Yesusindu “Nu Sika Pulu Yemone Ya Mana Lipa Mundorumunje Kanamili, Lipa Ora Simba Ulu-Tondolo Se Sei.” Niringi Semanemo*

<sup>1</sup> „Kolea Makatane purumu, kinia Yesusi molorumuna Parisi yema kinia Sadusi yema kinia ono ongo, ‘Yuni nambi sembanje? Kanamili.’ ningu yu manda manjiku mawa seko ninguli: ‘Ungu Mane Sili Yemo, ‘Nu sika Pulu Yemone ‘Kongono sendani.’ nimba ya mana lipa mundorumunje kanamili.’ ningu mulu-koleana molemo Pulu Yemone mindi manda ulu-tondolo selemo mele se sei.” niringi.

<sup>2</sup> Yesusini pundu topa nimbale: “Ipupini ena pumbándo mulúmu kondoli selemo kinia kanokole ‘wale peangamo wendo ombá lémo.’ nilimili. <sup>3</sup> Orili-u kolea tangombando kolea kupa topa mulúmu simbulu tolemo kinia kanokole ‘Lo ombá lémo.’ ningu pilielemele kanumu. Mulúmu kanokole ‘koleamo i-sipa i-sipa sembá.’ ningu kanolemele-na-kuo i walemanga uluma wendo oleloma kanokole ungumanga pulumu manda naa pilielemele. <sup>4</sup> Kiniá mana molemele yomboma yombo kirima mindi molemele. Ono seko kinjiku, Pulu Yemo siye kolko, méle lupama konopu mondolemele kanu yombomane “Pulu Yemone mindi ulu-tondoloma manda selemo mele kanamili sei.” ningu na mawa selemele. Aku-na-kuo „Pulu Yemone na lipa mundorumu-na ya ombo moltkoro. Yu-kinia kopu sepo kongono selembolo mele, lipa ora simba ulu-tondolo se wendo naa ombá. „Pulu Yemone ungu-umbu tondorumuma pilipa yomboma nimba sirimu ye, Jonane serimu ulumuni mindi lipa ora silimú mele manda kanonge. Se pea wendo naa ombá.” nimbale ono mundupa kelepa purumu.

16:5-12

*Parisi Yema Kinia Sadusi Yema Kinia Ononga Pellawa Akoli Méle ‘Isi’ Nílimunga Unku-Ikumu*

<sup>5</sup> Ono „Gallilli nomu, nekendo pungíndu „Yesusi, lombili andoli yema pellawa kaloli komu sindiku naa mengo puringi. <sup>6</sup> „Kanu-kinia, Yesusini onondo „liepi-liepi topa ungu-kuo topa, nimbale: “Paa mimi siku kanaa! Parisi yema kinia Sadusi yema kinia onone pellawa akoli méle isi taltolemele kanoko kondaa!” nirimu.

<sup>7</sup> Aku sipa nirimu kinia pilkuli yu lombili andoli yemane onono angelema ningu ninguli: “Olio pellawa kaloli „nomolo, mare naa lipu membo omulumunga aku sipa nikimunje.” niringi.

<sup>8</sup> Aku siku niringi mele pilipa Yesusini onondo nimbale: “Ono ‘nane manda lipa tapondomba.’ ningu kanga-kolte mindi kuru mondolemele yema, “Pellawa kaloli naa memulu.” ningu nambi semu-na angelema nikimiliye? <sup>9</sup> Ono kiniá kepe naa pilku kondolemeleye? Pellawa kaloli se-pakara ye paip tausini moke seko siringi

mele komu sindilimiliye? „Nongo pora siringi kinia, kere-langì kakena lierimuma liku wale-basikete awisili toko peke siringi mele komu sindiku naa pilkimiliye?

<sup>10</sup> “Molo pellawa kaloli yopoko-pakara moke seko ye po tausini siringi mele naa pilku, „nongo pora siringi kinia, wale-basikete awili mare kere-langì kakena lierimuma toko peke siringi mele naa pilku molemeleye? <sup>11</sup> ‘Yuni sika pellawa kalolimundu naa nikimu.’ ningu nambi semu-na naa piliengiye? ‘Parisi yema kinia Sadusi yema kinia pellawa akoli méle isi taltolemelemo mimi siku kanangi.’ nimbu nikiru.” nirimu. <sup>12</sup> Yuni aku nirimu kinia pilkuli onone ‘pellawa kalongendo isi mundulimili akumundu naa nikimu. Parisi yema kinia Sadusi yema kinia onone ungu-mane siringi ungumando nikimu.’ ningu pilieringi. „‘Parisi yema kinia Sadusi yema kinia onone ungu-mane mare kolo toko siringima yunga lombili andolimane paa naa piliangi.’ nimba nirimu mele ningu pilieringi..”

**16:13-20**

*Pitane Yesusindu “Pulu Yemone “Olio Nokopa Kondomba Ye Se Lipu Mundumbu.” Nimba, Nimba Taltorumu Ye Nokoli Akumu Nu.” Nirimu Semanemo.*

<sup>13</sup> Yesusi kolea-awili Sisaria-Pillipai lierimu koleana pumbale nirimumuni, yu lombili andolimando mangilipa nimbale: “Mania Ombo Mana-Ye Au Lierimu Yemondo yombomane yu imbi leko nawe nilimiliye?” nirimu.

<sup>14</sup> Onone yundu ninguli: “Marene “Nu No Lindeli Jono ,kolorumu, kiniá kelepa lomboropa ola molemo..” ningu pilku, marene “Nu ,Pulu Yemone u konde molopili olando liltimu ye, Illinja kelepa ombo molemo.” ningu pilku, marene nu “Jeremaya molo Pulu Yemone ungu-umbu tondorumuma pilipa yomboma nimba sirimu ye ,u kolorumu kiniá lomboropa ola molemo, se lupa.” nilimili.” niringi.

<sup>15</sup> Aku niringi pilipa Yesusini onondo nimbale: “,We-yombomane aku siku nilimili,-na-koło ono onono na nawe nilimiliye?” nirimu.

<sup>16</sup> Saimono Pitane pundu topa nimbale: “Nu Konde Molopa Mindi Puli Pulu Yemonga Malo, „Pulu Yemone ‘Olio nokopa kondomba ye se lipu mundumbu.’ nimba u nimba taltorumu ye nokoli, Karasimu.” nirimu.

<sup>17</sup> Yuni aku nirimu pilipale Yesusini yundu nimbale: “Jona Malo Saimono, nu Pulu Yemone “Konopu peanga pepili molko kondangi.” nilimú aulkana moleno. I ninkinumu mana-yombo sene nu naa nimba simu. Tata mulu-koleana molemomone nimba simu. <sup>18</sup> Ungu se pea nundu nikirula: Nunga imbi Pita, „kanu imbibunga ungu-pulumu ‘kou-mulu’ kanumu..” Kanu kou-mulumunga ola nanga yombo talapemo lipu maku topo mondombo. Kanu-kinia kololi ulu-pulumunga tondolomone i nanga talapemo topa mania manda naa mundumba, mólo. <sup>19</sup> Pulu Yemo ye nokoli kingi molopa yomboma nokomba ulka-kimu nu simbú. Kanu-kinia nuni mana mélsendo “Mólo..” nini mélemo mulu-koleana sukundu “Mólo..” nimbála. Nu mana mélsendo “Manda..” nini mélemo mulu-koleana sukundu “Manda..” nimbála.” nirimu.

<sup>20</sup> Kanu-kinia yu lombili andolimane Yesusindu “Pulu Yemone “Ono nokopa kondomba yere lipu mundumbu..” u nimba taltorumu ye nokoli Karasimu nu ongo moleno.” niringi kanu ungumundu yuni onondo tondolo mundupa nimbale: “Onone anju yombo selurindu kepe na kanu yemo molio mele ,iseli-u, paa naa ningu siee!” nirimu.

**16:21—20:34**

**Yesusi Yu Nondopa Kolombando Yunga Lombili  
Andolimando Yuni “Selio Mele Ono Aku Siku Sangi.”  
Nimba Mane Sirimu Semanemo**

**16:21-28**

*Yesusi Yu Toko Kondonge Kinia Kolopa Lomboropa Ola Molopa, Pe Ombá Mele U-Pulu-Pulu Nimba Para Sipa, Yomboma Yu Lombili Pungíndu Senge Mele Nirimu Semanemo*

<sup>21</sup> Kanu-kinia Yesusi yu lombili andolimane yuntu, "Pulu Yemone olio "Nokopa kondomba ye se lipu mundumbu."

u nimba taltorumu ye nokoli Karasimu nu." ningu, ningu para siringi kinia pilipale, yuni yu-kinia wendo ombá mele pulu polopa ono sumbi sipa nimba sipa nimbale: " 'Na mindili awisili nombondo kolea-awili Jerusalleme paa pumbú.' nimbu pilipu molio. Juda yomboma nokolemele tapu-yema kinia, Pulu Yemo popo tondoli ye awilima kinia, Pulu Yemonga ungu-manemanga puluma pilku mane silimili yema kinia, onone na paa toko mindili kondonge. Na toko kondonge kolombo kinia wale talo ombo pumbá kinia yopoko-sipamonga Pulu Yemone nando 'Lomboroko ola molou.' nimbá." nirimu.

<sup>22</sup> Aku nirimu kinia pilipale, Pitane yu anju lipa memba pumbale yu pulu polopa iri topa nimbale: "Ye-Awilimu, aku siku paa naa ni! Nu nikinu mele aku sipa paa wendo naa ombá." nirimu.

<sup>23</sup> Aku-sipa na-kolo, yuni kurumanga nokoli Setenene ungu-umbu tondorumu mele pilipale nirimu-kulu pilipale, Yesusini topele topa Pitando nimbale: "Setene, nu anju pa! Pulu Yemone nando "Sei." nirimu kongono sembó sekeromo pipi sini sekено kene nu anju pa! Nuni na seko sembambu sini sekено. Nu Pulu Yemone konopu lemó mele naa leno. Yombomane konopu lemele mele mindi leno." nirimu.

<sup>24</sup> Kanu-kinia Yesusini yu lombili andolimando nimbale: "Yombo sene 'Yu lombili pambo.' nimbale yuni yunga konopumuni pilielemo mélemanga 'Topo mania mundambo.' nimba yomboma unju-perana peko mindili nongo kololemele mele yuni unju-pera mele gomo lembando 'Na yu lombili pumbúndu mindili nondu liemu peangala; kolondu liemu peangala.' nimbale na lombili opili. We naa opili. <sup>25</sup> Yombo sene yunga mana konde molopa naa kololi ulu-pulumu ambolomba sembá kinia yu kolopale sika molopa kinjipa mindi pumbá. Aku-na-kolo yombo sene na konopu mondopale nanga kongonomo "Sendambo." nimba sembá kinia yu kolopale yu konde molopa kondopa mindi puli ulu-pulumu sika kanopa limba. <sup>26</sup> Akumu nambi semuna nikiruye? Yombo sene mana-mélema pali yu yuyu lipa taltopale yu mini pali Pulu Yemo naa molomba koleana pumba mindili nomba molopa kinjilkanje kanu mélemane kanu yombomo nambi sepa lipa tapondolkanje? Lipa naa tapondolkamo. Molo yombo sene 'Na mini pali konde molopo kondopo mindi pambo.' nimbale yu nambolka mélsene mini pali konde molopa kondopa mindi puli ulu-pulumu topo topa likaye? Mélsene manda topo topa naa limba.

<sup>27</sup> "Mania Ombo Mana-Ye Au Lierimu Yemo pe Lapanga tondolo pa sélimu kinia yunga, mulu-koleana, angelloma kinia pea ombá. Ombale yuni olio ya manayomboma yu-meles-meles selemolo ungu-manga olio yu-meles-meles pundu tombamonga nane aku nikiru.

<sup>28</sup> "Nane onondo paa sika nimbu sikirumu: "Ono ya gilkimilimanga mare u kolou naa kolangi Mania Ombo Mana-Ye Au Lierimu Yemo ye nokoli kingimu ombo molopa mélema kinia yomboma kinia pali nokomba ombá kanonge." nikiru." nirimu.

*Yesusinga Kangimu Se Lupa Au Lierimu Semanemo*

<sup>1</sup> Yesusini, yu lombili andolimando aku sipa nimbu sirimu kinia, pe koro se ombo purumu kinia Pita keme Jemisi keme Jemisi genu Jono keme ono lipa memba pumba mulú paa olandopa polorumu senga ola purumu. 'Olio oliolio mindi molamili.' nimba ono akuna lipa memba purumu. <sup>2</sup> Akuna puringi kinia ono kanoko molangi yunga

kangimu topele topa, yunga kumbikeremo ena tondolo topa yombomanga mongo takele selemo mele pa awili-sepa sepa, yu pakorumu mulu-maminiamma pa selemo mele aku sipa kake serimu.<sup>3</sup> Yuaku sipa molopili, „Juda yombomanga korongau moloringili ye awili talo,“ Mosisi kinia Illainjatolo ongo Yesusi kinia ungu nengu mona gilieringili kanoringi.

<sup>4</sup> Kanu-kinia Pitane Yesusindu nimbale: “Ye-Awilimu, olio ya molopomolo peanga lepomo. Nuni “E.” ninu liemu, ulka-takaya yopoko takondombo. Se nunga, se Mosisinga, se Illainjanga takondombo.” nirimu. <sup>5</sup> Yuniaku sipa nimba molopili kupa tondolo pa seli se ombo ono aki torumu kinia kupana sukundu ungu se wendo ombo nimbale: “I yemo nanga konopu mondolio Malomo. Yu kanopo paa peanga pilielio. Yuni ungu nimbáma pilku liengi.” nirimu.

<sup>6</sup> Aku nirimu pilkuli yu lombili andoli ye „yopoko, paa mini-wale mundukuli manamania molko tamalu peringi. <sup>7</sup> Ono tamalu peringina Yesusi ombo ono ambolopa nimbale: “Mini-wale naa munduku ola giliaa.” nirimu. <sup>8</sup> Pe olando siku kanoringi kinia Yesusi yuyu molorumu kanoringi.

<sup>9</sup> Mulú polorumumunga mania onge oringi kinia Yesusini ono mane sipa nimbale: “Onone kiniá kanongi mele iseli-u yombo seluri kepe nengu naa siengi. Pe mindi, Mania Ombo Mana-Ye Au Lierimu Yemo kolopale lomboropa ola molomba kinia semanemo toko anju siengi. U mólo!” nirimu.

<sup>10</sup> Aku nirimu kinia pilkuli yu lombili andolimane ,yu sika molorumu mele nengu kanokole, yundu mangilku pilku ninguli: „Pulu Yemone ‘Olio nokopa kondomba ye se lipu mundumbu.’ nimba taltorumu ye nokoli Karasimu nu liemu, Pulu Yemonga ungu-manemanga puluma pilku mane silimili yemane “Illinja „kelepa, kumbi lepa ombá. „Ye nokoli Karasimu pe akilepa ombá..” nilimili mele nambi semu-na nilimiliye? „Illinja kelepa naa opili nu koronga orunu molenko kanumu..” nirangi.

<sup>11</sup> Yesusini pundu topa nimbale: “ “Illinja „kelepa, kumbi lepa ombale mélema pali sepa sumbi simbá.” nilimili kanumu sika nilimili. <sup>12</sup> Aku-sipa na-kolo „akumunga ungu se pea nimbu sikirula..” Piliame. Illinja koronga orumu. Yu orumu kinia „kanu yemane, yu kanoko imbi naa siku ‘Yu we-yere.’ konopu lekole ‘Yu-kinia semolo.’ nengu pilieringi uluma pali seringi. Aku siku mele Mania Ombo Mana-Ye Au Lierimu Yemo mindili liku singila.” nirimu.

<sup>13</sup> Aku sipa nirimu kinia pilkuli lombili andolimane ‘No Lindeli Jonondo nikimu.’ nengu pilieringi.

**17:14-21**

### *Yesusini Kuru Se Makororumu Semanemo*

<sup>14</sup> „Yesusi kinia yu lombili andoli ye yopoko kinia, ono „mulúna mania, ongole yomboma maku toko moloringina oringi kinia ye se Yesusi orumuna ombo komorongo langopa <sup>15</sup> mawa sepa nimbale: “Ye-Awilimu, nanga kangomo kondo koloyo. Yu ámu tolemo-na mindili awili sepa nolemo. Alieli-alieli yu sepena pumba nomanga pulimú. <sup>16</sup> Nu lombili andoli yema molongina kangomo membo ondu kinia onone yu manda seko peanga naa singí.” nirimu.

<sup>17</sup> Aku nirimu kinia pilipale Yesusini „yomboma iri topa, nimbale: “Kiniá molemele yomboma ono „‘Pulu Yemone uluma sika manda sembá.’ nengu, kuru naa mondolemele. Ono konopu karaye sepa pepili molemele yomboma, na ono wale nambi sepo mane sipu ulu mare lipu ora simbú kinia mimi siku pilingíye? „Na ono-kinia siye sekemo..” nimbale

“Na moliona kangomo mengo waa.” nirimu. <sup>18</sup> Mengo oringi kinia Yesusini kanu kurumu iri torumu kinia yu kangomonga „konopuna, ombo wendo purumu kinia kanu enamonga kangomo manda molorumu.

**17:19-21**

*'Pulu Yemonga Tondolomo Na-Kinia Pelemo.' Nimbu Kuru Mondopole Manda Semolo Mele Ungu Se*

<sup>19</sup> Aku serimu kinia kanokole Yesusi lombili andoli yema Yesusi yuyu molorumuna ongo mangilku pilku ninguli: "Kuru akumu olione nambi semu-na manda naa makoromulye?" niringi kinia

<sup>20</sup> Yesusini pundu topa nimbale: „‘Pulu Yemone sika olio lipa tapondomba.’ ningu, paa kanga-kolte mindi kuru mondolemelemonga ulu-tondolo i-silima manda naa selemele. Nane ono paa sika nimbu sikirumu: “Unju senga mongo akumu méle paa kanga-na-kolo kanu mongomo mana mundulimili kinia unju akopa gilimú mele, aku sipa onone ‘Pulu Yemone olionga unguma pilimba. Olio lipa tapondomba.’ ningu kanga-kolte mindi kuru mondokole i pololemo mulúmundu “Anju pungu ne koleana giliei.” ningí kinia sika aku sipa pumba gilimba. ‘Samili.’ ningí ungumanga ulu manda naa senge ulu se naa pemba. <sup>21</sup> ‘Pulu Yemo mawa seko kere-langi mi leko naa nongole kuru i-silima yombomanga konopumanga manda makoronge. Ulu-tondolo i-silima we manda naa senge.’” nirimu.

17:22-23

*Yesusini Yu Toko Kondonge Kinia Kolopale Lombokora Ola Molomba Mele Wale Talo-Sipa Nirimu Semanemo*

<sup>22</sup> „Pe walte,“ kolea Gallilli disiriki pungu moloringi kinia Yesusini yu lombili andolimando nimbale: “Mania Ombo Mana-Ye Au Lierimu Yemo †ka sikuli yu toko kondonge, yema anju singí kinia <sup>23</sup> onone yu toko kondonge. Kolopale wale yopoko-sipamonga Pulu Yemone yundu ‘Lombokoro ola molou.’ nimbá.” nirimu. Aku nirimu pilkuli ononga konopuna sukundu meme kuluepe perimu-kulu pilkuli paa kondo koloringi.

17:24-27

*Pulu Yemo Popo Toringi Ulka-Tembelena Yesusini Kou-Takisi Torumu Semanemo*

<sup>24</sup> Pe Yesusi kinia yu lombili andolima kinia Kapeniamer taonona oringi kinia Pulu Yemo popo toringi ulka-tembelemonga kou-takisi liltingi yema ongo Pita mangilku ninguli: “‘Nunga ungu mane sili yemone ulka-tembelemonga kou-takisi tolemo.’ konopu lekemolomo. Sikaye?” niringi kinia <sup>25</sup> Pitane “Tolemo.” nirimu.

Kanu-kinia Pita ulkana sukundu pumbale ungu se nimbá serimu kinia Yesusini yu u mangilipa nimbale: “Saimono, nu nambolka konopu lekenoye? Ye nokoli kingimane kou-takisi lupa lupama lingíndu namele “Taa.” nilimiliye? Ononga yomboma kinia kou-takisi limili molo yombo lupama “Taa.” nilimiliye?” nirimu.

<sup>26</sup> Pitane pundu topa nimbale: “Yombo lupamando “Takisi taa.” nilimili.” nirimu.

Aku nirimu kinia pilipale Yesusini yundu nimbale: “Aku liemu kingimunga yombomane takisi naa tonge. <sup>27</sup> Aku-sipa na-kolo takisi naa tombolo kinia ulka-tembele-takisi limili yemane olto kanoko kiri pilingí manda naa sembá kene nomuna pungu uku mundu-pani. Uku mundukuli oma se toni aku omamonga keremo angara sendeni kinia kou se pemba, aku koumu likuli mengo pungu oltonga pea liku sere leko takisi tou.” nirimu.

18

18:1-14

*Yomboma Bolango Mele Molongemonga Ungu Mare  
Se 18:1-4*

*Pulu Yemone Ye Nokoli Kingimu Molopa Nokolemo Yombomanga Yombo Paa Imbi  
Olandopa Molemomonga Ungu Se*

<sup>1</sup> Aku walemonga Yesusi lombili andolimane yu molorumuna ongo yu mangilku pilku ninguli: "Pulu Yemo ye nokoli kingimu molopa nokolemo yombomanga nawe paa olandopa molemoye?" niringi. <sup>2</sup> Onone mangilieringi mele Yesusini pilipale yu bolango kanga se "Na moliona ou." nimba ono moloringina mondopa <sup>3</sup> onondo nimbale: "Nane ono paa sika nimbu sikirumu: "Ono konopu topele toko bolango kangama mele naa molongi liemu Pulu Yemo ye nokoli kingimu molopa yomboma nokolemo koleana sukundu paa manda naa pungí." nikiru. <sup>4</sup> Akumunga, yombo sene 'Na we-yombomo molambo. Nanga imbi se olandopa naa molopili.' nimba i bolango kangamo mele molemo yombomo yu Pulu Yemo ye nokoli kingimu molopa nokolemo koleana yombo imbi paa mololimu molemo." „nirimu..

Se: 18:5-11

*Olio Karasinga Yomboma Kondi Tolemele Ulumanga-Kinia Olio Ulu-Pulu-Kiri Selemolo Uluma Kinia Aku Ulumanga Yesusini Ungu-Mane Sipa Ungu-Iku Torumu Semanemo , 18:1-14 pali*

<sup>5</sup> „I bolangomondo ungu se pea niembo: „ Yombo sene 'Na Ye-Awilimunga yombomo molio.' nimba i bolangomo mele lipa tapondomba kinia kanu yombomone aku sembamonga na lipa tapondombala.

<sup>6</sup> "Aku-na-kolo yombo sene i „bolango, kangamonga „mele yombo, se „na 'Sika' nimba, kuru mondolemo „bolango, kanga se 'Ulu-kirima sepili.' nimba kondi tombamonga kanu „bolango, kangamo kuru mondolemo mele mundupa kelepa bulu simu liemu „bolango, kangamo u kondi naa topili kanu yombomo kou paa awili se moko toko nomina lendeko 'Yu kamu kolo-popili.' ningu paka toko nomuna paa maniakondo mundulimolánje paa papu.

<sup>7</sup> „Na, 'Sika' ningu kuru mondolemele yomboma kelko bulu siku munduku kelenge unguma ya mana lemómonga na ono kondo sekemo. Sika aku sipa uluma wendo ombá-na-kolo yombo sene nanga yombo se kondi tombamonga kanu yombomo na bulu sipa anju pumu liemu kanu kondi tomba yombomo mindili nomba paa molopa kinjimba.

<sup>8</sup> "Nunga kitolone molo kimbutolone ulu-pulu-kiri se semu liemu aku kitolo molo kimbutolo kari leko eltani. Nu konde mololko mindi puni koleana kitolo molo kimbutolo naa giliepili puni kinia peanga. Nunga kimbu ki pali we giliepili sepe naa kumbulupa nomba pepa mindi pumbá koleana liku toko mundungí kinia kiri. <sup>9</sup> Molo nunga mongotolone mélse kanokole konopumuni 'liemboa.' ningu pilku ulu-pulu-kiri se senu liemu aku mongotolo akuku eltani. Nu konde mololko mindi puni koleana mongotolo naa giliepili puni kinia peanga. Mongo talo we giliepili nu sepe-koleana sukundu liku toko mundungí kinia kiri." „nirimu..

<sup>10</sup> "I „bolango, kangama „mele yomboma„nga se kanoko kiri pilku 'Yu koropamo.' ningu paa naa sangi. Ononga nokolemele mulu-koleana angelloma alieli Tata mulu-koleana molemona pea molemele kene „aku naa saa.. <sup>11</sup> „Mania Omiba Mana-Ye Au Lierimu Yemone 'Yombo aulka lo liku molko kinjilimili yomboma koropo lipu tapondambo.' nimba orumu kanumu..” „nirimu..

Se 18:12-14

*Kongi Sipisipi Talopa Lierimumunga Ungu-Ikumu , 18:1-14 pali kananu*

<sup>12</sup> "Ono nambolka ningu pilkimiliye? 'Ye sene kongi sipisipi paip paono mondolka kinia, se talopa lelkanje, yuni sipisipi po paono tene kelepa nani wema ma-pangina molangi mundupa kelepa pumba, talopa lelka sipisipimu kanopa limbando korolepa naa pulka.' konopu lekemeleye? <sup>13</sup> Nane onondo paa sika nimbu sikirumu: "Sipisipi talopa lelka kanumu kanopa lipale kanu sipisipimu-kinia paa olandopa konopu silka. Talopa naa lemoláma we konopu silka."

nikiru. <sup>14</sup> Aku sipala ononga Lapa mulu-koleana molemomone i bolango kangama „mele molemele yomboma,“ ‘aulka lo liku molko kinjingí kinia paa kiri.’ nimba molemólá.” „nirimu..”

*18:15-35*

*Olio Seko Kinjingí Yomboma-Kinia Semolo Mele Ungu Talo*

*Se 18:15-20*

*Karasinga Yombo Sene Nu Sepa Kinjimba Kinia Nuni Yu-Kinia Seni Mele Ungu-Mane Se*

<sup>15</sup> „Na lombili andolimanga, genu sene nu sepa kinjemu liemu nu pungu sepa kinjimba yombomo pea ololo molangili kanu ulu-pulu-kirimu yuni nu sembá mele ningu sieni. Nuni nini ungumu sepa kinjimba gena piliemu liemu gena kinia olo kelko manda selu-siku molongele. <sup>16</sup> Aku-sipa na-kolo nuni nini ungumu yu naa piliemu liemu pe nuni ‘I ungumu pora nipili kene sembó mele yombo mare kanoko molangi kelepo niembo.’ ninguli, kanonge yombo talo molo yopoko liku gena molombana mengo ongo ono kanoko molangi genando ‘Seluna molambili.’ kelko nieni. Kanu-kinia nuni sení kinia genane sembá mele kanu yombomane kanokole yombo lupamando manda semane toko singí. <sup>17</sup> Kanu-kinia yuni ononga ungumu kepe naa piliemu liemu Karasinga yombo talapemondo pungu ningu sieni. Pe Karasinga yombo talapemo kepe genane naa piliemu liemu ‘Yu olionga genu mólo. Yu ultukundu molko konopu topele naa toli yomboma mele molemo lémo.’ ningu kanayo.

<sup>18</sup> “Nane onondo paa sika nimbu sikirumu: “Ya mana onone „uluma kinia yomboma kinia, “Mólo.” ningí kinia Pulu Yemone mulu-koleana sukundu “Mólo.” nimbála; onone mana “Manda.” ningíma Pulu Yemone mulu-koleana sukundu “Manda.” nimbála.” nikiru.

<sup>19</sup> „Akumunga, nane onondo ungu se pea nimbu sikirumu: “Ononga yombo talone ya mana “I sipu mawa sambili.” ningu panjengili liemu olone mawa sengele mele mulu-koleana molemo Tatane olonga mawa sengele mele aku sipa sendemba.” nikiru. <sup>20</sup> Yombo „koltalo,, talo molo yopoko, na ononga Ye-Awilimu imbi leko mangilku, ‘Pea kopu sepo molemolo.’ konopu leko maku toko molemelemanga na ono-kinia molemolo-na „mawa senge mele Tata yuni aku sipa sendemba.”” nikiru.

*Se 18:21-35*

*Kongono Sendeli Ye Sene Kongono Kopu Seko Seringi Ye Se Kondo Naa Kolorumu Ungu-Ikumu 18:15-35 pali*

<sup>21</sup> Yesusini yombo seko kinjilimilimando ungu-mane aku sipa sirimu, kinia yu molorumuna Pita nondopa ombo yu mangilipa pilipa nimbale: “Ye-Awilimu, nanga genu sene na wale nambi-sepa sepa kinjimba kinia na we ‘Mania pupili.’ nimbu siye kolomboye? Wale sepen yuni sembá mele siye kolopo we molopole engaki-sipamonga ‘Pundu topili.’ nimbú kinia peangaye?” nikiru.

<sup>22</sup> Yesusini pundu topa nimbale: “Nane “Wale sepen mindi yuni nu sepa kinjimba kinia yuni sembama siye kolko kelko pilku naa molou.” ni naa nikiru. “Wale sepen anderete sependi sepen yuni nu sepa kinjimba walema pali yu sepili, siye kolko we molou.” nikiru.

<sup>23</sup> “Akumunga Pulu Yemo ye nokoli kingimu molopa mélema nokolemo akumu i-sipa mele:

“Walte ye nokoli kingi sene yunga kongono nokondoringi kendemande-yomboma kinia pundu gilierimuma ‘Kiniá mimi sipu kanopole “Pundu tangi.” niembo.’ nikiru.

<sup>24</sup> Aku sipa nirimu kinia kingimuni kou tene milliono kina mele u pundu gilierimu ye se kumbi leko yu molorumuna mengo oringi. <sup>25</sup> Aku-na-kolo yu manda aku kou pundumu tomba aulka se paa naa lierimu-kulu ye-awilimuni nimbale: “Manda, i

yemo kinia yunga ambo bolangoma kinia yunga mélema pali kinia makete seko kou-mone likuli koumu ongo pundu tondangi.” nirimu.

<sup>26</sup> Aku nirimu-kulu pilipale kendemande-yemo ye nokolimunga kumbikerena komorongo langopa tamalu pepa mawa sepa nimbale: “Nuni na kondo kolko we nokoko moloyo. Nane pundu pali tombo.” nirimu.

<sup>27</sup> „Kanu-kinia, ye nokolimuni yunga kendemande-yemo paa kondo kolopa yu kendemande-yemo kinia pundu gilierimumu pali “Yu sepili. Kelko pundu naa tani.” nimba kamu siye kolopa yemo ka naa sipa “We pu.” nirimu.

<sup>28</sup> Aku-na-kolo „ka singí seringi, kendemande-ye kanumu yu pena pumba kendemande-ye se yunga kou wane anderete kina mele sirimumu kanopale, yu pumba yunga nomina ambolopa ‘Yu kolopili.’ nimba ambolopa elkele lakurupale “Nanga kou sirindumu pundu tou!” nirimu.

<sup>29</sup> Aku serimu kinia yuni tomba serimu yemo yunga kumbi-kerena komorongo langopa tamalu pepa mawa sepa nimbale: “Nuni na kondo kolko we nokoko moloyo. Nane pundu pali tombo.” nirimu.

<sup>30</sup> Aku-na-kolo kendemande-ye lupamone “Mólo, paa iseli pundu tani.” nimbale “Nu ka-ulkana pekole pundu toko pora siku wendo wani.” nimba yu ka sipa ka-ulkana panjerimu.

<sup>31</sup> Yuni aku serimu mele kendemande-ye wemane kanokole ono konopu kiri panjiku pungu ononga ye nokolimundu kendemande-yetolo seringili kanoringi mele kondi toringi.

<sup>32</sup> Kanu-kinia ye nokolimuni aku niringi pilipale kendemande-ye yunga pundu “Naa toko we pu.” nirimu kendemande-ye kanumu “Yando ou.” nimba yundu nimbale: “Kendemande-ye kirimu, nuni na tondolo munduku mawa senu-na nu na-kinia pundu paa awili sepa gilierimumu “Yu sepili, naa tou.” nimbili we siye kolondu kanumu. <sup>33</sup> Pe nane nu we kondo kolondu mele nuni aku siku kendemande-ye se nambi semu-na kondo naa kolonuye?” nirimu.

<sup>34</sup> Ye nokolimuni yu mumindili kolopale ka-ulka nokoko ka-ulkana peringi yomboma seko mindili kondoringi yema yu lipa sirimu. Yuni nimbale: “Nu mindili nongole pundu tani. U pundu pali toko pora sikuli pe mindi wendo wani. U mólo.” nirimu.” nimba Yesusini nirimu.

<sup>35</sup> „Yesusi yuni aku nimbale ungu-ikumunga pulumu kamu nimbale: „Aku sipala, genalini ono aku siku seko kinjingí kinia ono kerena mindi “Mania pupili. Siye kolkoro.” we ningu, sika munduku naa kelko, we konopuni pilku molongi liemu, kendemande-yemonga ye nokolimuni kendemande-yemo sepa kinjerimu mele, mulu-koleana molemo Tatane siye naa kolko we konopuni pilku molonge yombo kanuma ononga ulu-pulu-kirima ‘Mania naa pupili.’ nimba, we siye naa kolopa kanu ulu-pulu-kirimanga “Mindili nangi.” nimba aku sembala.” nirimu.

## 19

19:1-12

*Yemane Ononga Amboma “Kamu Paa.” Nilimilimunga Ungu Se*

<sup>1</sup> Yesusini aku sipa unguma nimba pora sipale nirimumuni, kolea Gallilli disiriki mundupa kelepa kolea Judia disiriki pumba no Jodane kimbilipa nekendo purumu.

<sup>2</sup> Kanu-kinia yombo awisili yu lombili oringi kinia yuni kuru torumu yomboma sepa peanga sirimu.

<sup>3</sup> Parisi ye mare yu molorumuna ongo ‘Yu nambolka nimbánje? Nimba kinjimbanje manda manjipu piliamili.’ ningu yu mangilku pilku ninguli: “Ye sene yu yuyu pilipale yunga ambomo “Kamu pu.” nimba kinia manda sembá molo aku sembá kinia ungu-mane se pulua tombaye?” niringi.

<sup>4</sup> Yuni anju pundu topa nimbale: "Pulu Yemone ungu nirimu yunga bokuna molemo mele kanoko kambu naa tongiye?

U-pulu-pulu, Pulu Yemone mélema sepale,  
yuni yombo sembando

yemo kinia ambomo kinia sepa

<sup>5</sup> nimbale:

"Aku sipu sendumunga ye sene ambo se lipale  
yunga anumu lapatolo mundupa kelepa  
yunga ambomo kinia ololo seluna kopu seko peko  
kangi selumu mele „molko  
olonga konopu seluna pupili, molongele."

nirimu kanumu naa piliengiye? <sup>6</sup> Pulu Yemone aku sipa nirimu-kulu ye se ambo se limú kinia kangi selumu mele molembele-na olo kelko talo mele naa molembele, olo yombo selumu mele molembele. Yombo selumu molembele kene Pulu Yemone ambo ye talo 'Selumu molangili.' nilimú ambo yetolo yombo sene liku lupa lupa naa mundangi. Aku sengi liemu manda naa sembá." nirimu.

<sup>7</sup> Aku sipa nirimu kinia onone ninguli: "Aku liemu Mosisini ungu-manse se sirimu mele nambi semu-na sirimuye? Mosisini nimbale:

"Ye sene yunga ambomondo

'Kamu pupili.' nimba makorombando

ambomo "Kamu pu." nimbá mele

pepá se topa ambomo sipale

yundu "Kamu pu." nimba aku sepili."

nirimu kanumu." niringi.

<sup>8</sup> Yesusini nimbale: "Mosisini sika aku sipa nirimu-na-kolo ono kála seko Pulu Yemone ambo yetolo konopu sere leko molongele mele ungu-manse sirimumu pilku mokoli seko naa pilieringi-kulu yuni "Aku sangi." nirimu. Aku-na-kolo u-pulu-pulu, 'Pulu Yemone mélema kokele sepa wamorumu kinia,' ungu-manse aku sipa se naa perimu kene <sup>9</sup> nane ono i-sipu nimbu sikiru: "Ye sene yunga u limú ambomo makoropa "Kamu pu." nimbale kelepa ambo se limú kinia aku yemone wa ulu-kirinale selemo. Yemonga ambomone ye se kinia wa ulu-kirinale semu liemu manda topa makoromba. We mólo. „Pu.” nimba makorolemo ambomo pe ye sene yu limú kinia kanu yemo kepe wa ulu-kirinale selemóla." nikiru." nirimu.

<sup>10</sup> Yuniaku nirimu kinia pilkuli, yu lombili andoli yemane yundu ninguli: "Ye sene ambo limú kinia nuni nikinu mele aku siku molongele mele ungu-manse se pelemo liemu ye se ambo naa lilkanje papu." niringi.

<sup>11</sup> Aku-na-kolo Yesusini pundu topa nimbale: "I ungu,-mane sikiru, mu yombomane pali manda naa pilku lingí. 'Pulu Yemone,' nimba taltopa tondoloma simba yomboma mindi manda 'amboma ye naa pungu yema ambo naa liku, senge. <sup>12</sup> Ye mare anupilini melemele kinia amboma kinia seluna kopu seko peko ulu-kirima senge enge se naa pelemo. Ye mare 'Amboma kinia seluna naa peangi.' ningu ononga láka lindilimili. Marene onono 'Ye nokoli kingi Pulu Yemonga yema molopo yunga kongonoma manjipu sendamili.' ningu ono onono mi leko ambo naa limili. I ungumu yombo pilku lingí yomboma piliangi." nirimu.

**19:13-15**

***Yesusini Bolangomando "Pulu Yemone Ono Sewi Anjepili." Nirimu Semanemo***

<sup>13</sup> Kanu-kinia yombomane ononga bolangoma 'Yesusi yunga kimuni ambolopa Pulu Yemo kinia ononga mawa sendepili.' ningu yu molorumuna mengo oringi. Aku-na-kolo yu lombili andolimane iri toko „Naa mengo waa." , niringi.

<sup>14</sup> „Mólo.” niringi kinia, kanopale Yesusini nimbale: “Pulu Yemo ye nokoli kingimu molopa nokolemo yombo talape akumu i bolangoma mele molemele yomboma ononga yombo talapemo kene onone i bolangoma na moliona wangí pipi siku “Mólo.” naa niee.” nirimu. <sup>15</sup> Aku nimbale yuni bolangoma „kondo kolopa, yunga kimuni ono selu selu nimba ambolopale kanu koleana mundupa kelepa purumu.

19:16-30

### *Ye Kamako Senga Semane Se*

<sup>16</sup> Walte ye se Yesusi molorumuna omba yundu mangilipa pilipa nimbale: “Ungu Mane Sili Yemo, na nambolka ungu peangamo sembó kinia konde molopa kondopa mindi puli ulu-pulumu limbuye?” nirimu.

<sup>17</sup> Yesusini yundu nimbale: “Nuni na nambi semu-na ulu peangamondo mangilku pilkinuye? Yombo selu mindi peanga molemo. Nuni ‘conde molopo kondopo mindi puli ulu-pulumu limbu.’ konopu lienu liemu „Pulu Yemonga, ungu-mane „Mosisini yando nimba sirimuma, sengena panjiku seko molani.” nirimu.

<sup>18</sup> Yemone mangilipa nimbale: “Aku ungu-manemanga semando nikinuye?” nimba mangilierimu kinia

Yesusini pundu topa nimbale:

““Yombo toko naa kondangi.” nimba,

“Ambo ye pulima molo

ye ambo lilima yombo lupama kinia  
wa ulu-kirinale naa sangi.” nimba,

“Mélema wa naa liengi!” nimba,

“Yombomanga kote

colo toko naa sendangi.” nimba,

<sup>19</sup> <sup>19</sup> “Aminieli lanieli kinia seko kondoko,

ungu ningí mele pilku liku seko molangi.” nimba,

“Ono onono yu-mele-mele konopu mondoko

ononga kangimu onono

kondo kolko nokolemele mele  
aku sikula pulu lemó yomboma

konopu mondoko nokoko molangi.” nimba,

ungu-mane akuma sirimu pelemo kanumu.” nirimu.

<sup>20</sup> Aku nirimu kinia pilipale kanu kango-yemone nimbale: “Na kanu ungu-manema pali pilipu lipu sepo molio. Pe kiniá nambolka uluri olandopa samboye?” nimba mangilierimu.

<sup>21</sup> Yesusini yundu pundu topa nimbale: “Nu ‘kamu ye sumbi nílimu molambo.’ konopu lienu liemu nu pungu nunga méle taltolenoma pali kou-mone li-punguli, kou-mone linima yombo koropama moke seko sikuli na lombili ou.” nirimu. “Nunga „mana-,mélema aku sení kinia mulu-koleana nunga méle kande-kandema lemba.” nirimu.

<sup>22</sup> Kanu kango-yemo méle paa awisili taltorumumunga Yesusini yundu aku nirimu kinia pilipale yu konopu kiri panjilipa anju purumu.

<sup>23</sup> Aku serimu-kulu kanopale, Yesusini yu lombili andolimando nimbale: “Pulu Yemo ye nokoli kingimu molopa nokolemo koleana sukundu pungíndu yombo kamakoma paa kála seko sukundu pungí. <sup>24</sup> Onondo kelepo nikiru: “Kongi kamele „kongi paa awili se-na-ko, kale suru tolina sukundu pumbándo kála kanga mele sepale pumbá. Aku-sipa na-ko yombo kamakoma Pulu Yemo ye nokoli kingimu molopa nokolemo koleana sukundu pungíndu kála paa awili mele seko pungí.” nikiru.” nirimu.

<sup>25</sup> Aku nirimu kinia pilkuli yu lombili andolima paa mini-wale munduku pungupungu ninguli anju yando kerepale ningu ninguli: "Aku liemu mindili nolemolá aulkana nawe manda wendo pumba, molopo kondomolo aulkana pumbaye? Se mólonje." niringi.

<sup>26</sup> Yesusini ono neme-neme nimba kanopa nimbole: "Sika yomboma onono manda mólo na-kolo Pulu Yemone manda sendemba. Pulu Yemo yuni unguma pali manda selemo. Ungu se yuni manda naa sembá se mólo." nirimu.

<sup>27</sup> Yuni aku nirimu kinia pilipa Pitane yundu nimbole: "Pe olio-kinia nambolka uluri wendo ombáye?" Olio olionga mélema pali mundupu kelepo nu lombili purumulu kene méle nambolka mélema limulúye?" nirimu.

<sup>28</sup> Yesusini nimbole: "Nane onondo paa sika nimbu sikirumu: "Pe 'Pulu Yemone, mélema pali 'conde pupili.' nimba kinia Mania Ombo Mana-Ye Au Lierimu Yemo yunga ye nokoli kingi polo pa tondolo selina molopa yomboma nokomba kinia, ono na lombili andolemele yema pea ye nokoli kingi polo rureponga molkole ningimuni, Isirele yombo talape rurepo nokonge." nikiru. <sup>29</sup> Yombo na konopu mondoko nanga kongonomo sendengendo ononga ulkama, genupilima, kemulupilima, anupilima, lapalima, bolangoma, koleama, akuma munduku kelieringi 'mele kelenge, yomboma pali, ya mana paa olandopa méle awisili likuli,conde molko kondoko mindi puli ulu-pulumu lingíla. <sup>30</sup> Aku-sipa na-kolo kiniá awili molemele yombomanga awisili pe 'Pulu Yemo ye nokoli kingimu molopa nokomba koleana, yombo koropama molonge; kiniá koropa pupili molemele yomboma pe yombo awilima molonge." nimba Yesusini nirimu. Yesusini yu lombili andolimando ungu se pea nimbole: "

## 20

20:1-16

### *Unju-Waene Kalia Seli Yemanga Unju-Ikumu*

<sup>1</sup> "Aku nikiru ungumunga 'ungu se niembo:' Pulu Yemone ye nokoli kingimu molopa yomboma nokolemo akumu i-sipa mele:

"Walte kalia pulu ye sene 'Kongono sendeli ye mare yunga unju waene kaliana kongono sendangi.' nimba paa orili-u pumba li-purumu. <sup>2</sup> "Kongono sangi." nimba lilltimu yemando nimbole: "Kiniá senge walemonga ono kou-mone paip kina paip kina nimbu méle kalombo." nirimu kinia

onone "Manda." niringi kinia

yuni ono yunga unju waene kaliana "Kongono sangi paa." nimba ono lipa mundorumu.

<sup>3</sup> Pe, orili-u nani killoko mele serimu kinia, yu kelepa yomboma maku toringi koleana pumba ye mare akuna we gilieringi kanopa <sup>4</sup> onondo nimbole: "Ono kepe 'nanga, unju-waene kaliana kongono sendangi payo. Pe nane ono kou seluna méle kalombo." nirimu <sup>5</sup> kinia ono puringi.

Pe awi-tangoli serimu kinia kepe, ipupini tere killoko mele serimu kinia kepe, kelepa aku sipa pumba ye mare pea lilltimula.

<sup>6</sup> Ipupini paip killoko mele serimu kinia 'kelepa, pumba ye mare we gilieringi kanopale onondo nimbole: "Enamanga pali kongono naa seko ya inia nambi semu-na we gilimiliye?" nirimu.

<sup>7</sup> Onone yundu ninguli: "Ye sene olio kongonona naa limu-na we gilimulu." niringi.

Yuni onondo nimbole: "Ono kepe 'nanga, unju-waene kaliana kongono sende-paa." nirimu.

<sup>8</sup> Ena pora nirimu kinia unju-waene kalia pulu yemone yunga kongono nokoli yemondo nimbole: "Kongono sekemele yema 'sukundu waa.' ningu ono kongono sengimunga méle kalonindu paa akileko ongi yema pulu polko méle kalko pungu

kumbi leko ongi yema paa akileko méle kalou.” nirimu.<sup>9</sup> „Aku nirimu kinia, ipupini paip killoko mele serimu kinia “Kongono sendangi.” nimba lilltimu yema „kumbi leko, ongo paip kina paip kina nimba sirimu liltingi.”<sup>10</sup> Akileko ongo kongono senderengi yema kou aku siku liltingi kanokole kumbi leko ongo kongono senderengi yema ongole ‘Olio kou olandopa mele limulú.’ konopu lieringi-na-kolo ono paip kina paip kina nimba sirimu liltingila.

<sup>11</sup> Likuli onone kalia pulu yemondo iri toko ninguli: <sup>12</sup> “Akileko ongi yema ena selu manjiku kongono sengi, olio orili-u ombo kongono awili-sepo semulu, ena awili tomumuni olio paa nomu kanumu, na-kolo ono kinia olio kinia kou selu-siku sakinumu, manda naa sekemo.” nirungi.

<sup>13</sup> Yuni ononga ye sendo pundu topa nimbale: “Kangomo, nane nu sepo naa kinjikiru. “Paip kina simbú.” nindu kinia “Manda.” ninu kanumu. <sup>14</sup> Kou sikirumu liku mengo puyo. Nanga konopuni mindi pilipuli akilepa omu yemo nu sikiru mele yu aku sipu sindu. <sup>15</sup> Nanga taltolio mélemanga konopuni pilipuli manda naa semboye? Molo pe ongi yema kou awili-sepo sindumunga nu konopu kiri panjikinuye?” nirimu. „nimba Yesusini nirimu.,

<sup>16</sup> „Ungu-iku akumu topa pora sipale ungu-ikumunga pulumu kamu nimbale: „Aku sipala, akileko onge yomboma „Pulu Yemone nokolemo talapena sukundu, kumbi leko pungí; kumbi leko onge yomboma akileko pungí.” nirimu.

20:17-19

### *Yesusini Yu Kolopale Lomboropa Ola Molomba Mele Kelepa Wale Yopoko-Sipa Nimba Para Sirimu Semanemo*

<sup>17</sup> Kanu-kinia Yesusi kolea-awili Jerusalleme pumbá purumu kinia yu lombili andoli engaki rurepo ‘na kinia ono kinia oliolio molamili.’ nimba ono lipa anju memba pumba onondo nimbale:

<sup>18</sup> “Piliame. Olio Jerusalleme pumulú pukumulu. Akuna pumulú kinia Mania Ombo Mana-Ye Au Lierimu Yemo ye sene ‘Tangi.’ nimba Pulu Yemo popo tondoli ye awilima kinia, Pulu Yemonga ungu-manemanga puluma pilku mane silimili yema kinia, lipa simba, onone yu kote sendeko ‘Yu kolopili tangi.’ ninguli <sup>19</sup> Juda ye naa molemèle yema liku singí. Kanu-kinia kanu yemane yu ungu-taka tondoko, ka-pultane toko, ‘Yu kolopili.’ ningu unju-perana uku toko panjingí. Kolopale wale yopoko-sipamonga Pulu Yemone yundu ‘Lomboroko ola molou.’ nimbá.” nirimu.

20:20-28

### *Jemisi Kinia Jonotolonga Anumuni Yesusi Mawa Sepale “Nu Mulu-Koleana Pungu Moloni Kinia Nanga Kangotolo Nu-Kinia Awilitolo Molangili.” Nirimu Semanemo*

<sup>20</sup> Pe-mele Seperi malo Jemisi kinia Jonotolonga anumu Yesusi molorumuna ombo komorongo langopa yundu “ ‘Nu ungu se sani.’ nimbu mawa sembó okoro.” nirimu kinia

<sup>21</sup> yuni yundu nimbale: “Nambolka unguri ‘nane sendambo.’ ningu nikinuye?” nirimu.

Ambomone nimbale: “Nu pe ye nokoli kingimu moloni kinia i nanga kango talo ‘olo nu kinia pea ye nokolima molamili.’ ningu, ‘olonga se nunga ki-lomekondo mondoko se nunga ki-tarokondo mondani.’ nimbu mawa sekero.” nirimu.

<sup>22</sup> Yesusini onondo nimbale: “Mawa sekemele mele ono pilku naa kondokomele. Na no-mingina no nondopo nombómo olo manda nongeleye? nirimu kinia olone “Manda nombolo.” niringili.

<sup>23</sup> Yuni olondo nimbale: “Na no-mingina no nombómo pe olo paa sika nongele-na-kolo nane olo “Nanga wangutolonga ongo molangili.” nimbúmu manda naa sembá. Tatane yuyu akuna molongeletolo koronga nimba taltorumu.” nirimu.

<sup>24</sup> Genungulu „Jemisi kinia Jonotolone ‘Yesusinga wangutolonga molambili.’ , ningu mawa seringili mele pilkuli lombili andoli ye rureponga talo ‚wemane, olo-kinia konopu kiri panjeringi.

<sup>25</sup> Kanu-kinia Yesusingi ono “Waa.” nimbale nirimumuni, onondo nimbale: “Olio Juda yombomanga ultu molemele yombo talapemanga ye nokolima ononga yomboma tondolo munduku nokoko kongono enge nilima alieli silimili. Ye imbi ola molemo yema ononga yomboma ‘Mindili nangi.’ ningu nokolemele. Yombomane ononga ye nokolimanga unguma pilkuli mokoli senge aulka se naa lemó. Aku siku selemele mele onone pilielemene kanumu. <sup>26</sup> Aku-sipa na-kolo ‚we-yombomanga ye nokolimane ononga yomboma tondolo munduku nokolemele mele na lombili andoli yema, ono onono aku siku anju yando naa sangi. Ononga ye se ‘Na imbi olandopa molopili. Na ye-awilimu molambo.’ nimbá yemo ononga kongono sendeli yemo molopili. <sup>27</sup> ‘Na ononga ye nokolimu molopo ono nokambo.’ nimbá yemo ononga kongono kendemande sendeli yemo molopili. <sup>28</sup> Aku sipala, Mania Ombo Mana-Ye Au Lierimu Yemo kepe ‘Yombomanga ye-awilimu molopo ono nokambo. Onone nanga kongono sendeli kendemande-yomboma molangi.’ nimba naa orumu. ‘Yombomanga kongono sendeli kendemande-yemo molopo ono lipu tapondopo, ulu-pulu-kirimane ono ka sipa nokolemo mele naa sepili manda molangi kene na yombo awisilinga nimbu pundu tondopo nanga kangimu sipu, ononga kolali sepo kolondambo.’ nimba orumu.” nirimu.

20:29-34

### *Yesusingi Ye Mongo Kiri Lierimu Talo Sepa Peanga Sirimu Semanemo*

<sup>29</sup> Yesusi kinia yu lombili andolima kinia ono kolea-awili Jeriko munduku kelko pungí purungi kinia we-yombo awisili yu lombili purungi. <sup>30</sup> Kanu-kinia mongo kiri lierimu ye talo aulka lomolomena molko Yesusi ombo purumu mele pilkuli yundu tondolo ru ningu mangilku ninguli: “Ye-Awilimu, ‚ye nokoli kingi, Depitini kalopa liltimu yemo, olto kondo kolou.” nirungili.

<sup>31</sup> Yombomane olo iri toko “Ungu naa nili takaloko molale.” nirungili.

Aku-na-kolo olone paa tondolo ru ningu mangilku ninguli: “Ye-Awilimu, Depitini kalopa liltimu yemo, olto kondo kolou.” nirungili.

<sup>32</sup> Yesusi we gilipale “Olo wale.” nimba olondo nimbale: “Nane olo nambi sambo konopu lekembeleye?” nirimu kinia

<sup>33</sup> mongo kiri lierimu yetolone ninguli: “Ye-Awilimu, ‚oltonga mongotolo ‘Kelepa umbu-mongo giliepili.’ nieni.’ konopu lekembolo.” nirungili.

<sup>34</sup> Kanu-kinia Yesusingi olo kondo kolopa mongona ambolorumu kinia olo popenge sepa mongoma peanga lierimu, mélema kanokole, Yesusi lombili purungili.

*Kolomongo-Awili 21-25*

## **Yesusi Jerusalleme Pumbale Yomboma Mane Sirimu Semanema**

### **21**

21:1-11

### *Ye Nokoli Kingi Se Kolea Senga Sukundu Purumu Kinia Seringi Mele Yesusi Jerusalleme Sukundu Pumbá Purumu Kinia Aku Siku Seringi Semanemo*

<sup>1</sup> Yesusi kinia yu lombili andolima kinia, ono kolea-awili Jerusalleme nondoko ongo, ma-pangi se ‘Ma-Pangi Unju Ollipi Kalia’ nili akuna lemó kolea-kanga Betepasi orungi. Kanu-kinia Yesusingi yu lombili andoli ye talo lipa mundupale, <sup>2</sup> olondo nimbale: “Ne kolea-kanga kanokombelena punguli kongi dongi se ka seko panjingímu kinia yunga walomo pea ne sukundu molongele kanongele, kanutolo pungu posiku yando mengo wangili pale. <sup>3</sup> Posingilí seko molongele kinia yombo sene olondo ungu

se nimu liemu olone i-siku niengili: "Ye-Awiliyu 'Dongimuni mepili.' nimu-na ombo likimbulu." niengili. Aku ningilí kinia yuni sumbi sipa "Manda, mengo pale." nimbá." nirimu.

<sup>4</sup> Aku sipa wendo orumumunga koronga-u Pulu Yemone ungu-umbu tondorumuma pilipa yomboma nimba sirimu ye sene ulu se pe wendo ombá u nirimu mele kamu wendo orumu. Akumu i-sipa:

<sup>5</sup> "Onone kolea-awili Sayono yombomando i-siku niengi: "Kanayo!  
Ono molemelena ononga ye nokoli kingimu okomo.

Yu ye imbi naa mololi yemo mele

taka lepa molemomo

kongi dongi bulu-mingina molopa okomo.

Kongi dongi senga walomonga bulu-mingina

molopa okomo." ningu, ningu siee."

nirimu kanumu. „Aku nirimu mele Yesusini serimu.„

<sup>6</sup> Kanu-kinia lombili andolitolo pungu Yesusini "Se-pale." nirimu mele se-puringili.

<sup>7</sup> Oalone kongi dongimu kinia yunga walomo kinia mengo ongole, onone ononga mulu-maminama kulku dongitolonga bulu-mingina ola pauwa toringi kinia Yesusi kanuna ola molorumu. <sup>8</sup> Yombo maku toringimanga awisilini ononga mulu-maminama kulku yu ombá aulkana pauwa tolko pungu, marene kipi gomo langoko liku yu ombá aulkana pauwa tolko puringi. <sup>9</sup> Kumbi leko puringi yombomane kepe akileko puringi yombomane kepe kalkarukumba leko unju ambololeko pungu ninguli:

„Ye Nokoli Kingi, Depitini Kalopa Liltimu Yemo

'Imbi ola molopili.' niemili.

Pulu Ye Yawene lipa mundorumu-na

yunga kongonomo sendemba okomo yemo  
molopa kondopili.

Mulu-koleana ola yu imbi ola molopili."

niliku puringi.

<sup>10</sup> Yesusi Jerusalleme sukundu purumu kinia kanu kolea-awilimunga sukundu moloringi yomboma pali konopu awisili kimbu sikuli "Imu nawe?" niringi.

<sup>11</sup> Maku toko moloringi yombomane ninguli: "Imu Pulu Yemone ungu-umbu tondolemoma pilipa yomboma nimba silimú ye Yesusi, kolea Gallilli disiriki Nasarete taono ye se." niringi.

**21:12-13**

### *Ulka-Tembelena Bisinisi Seko Kou Liku Moloringi Yema Yesusini Topa Makororumu Semanemo*

<sup>12</sup> Yesusi „Jerusalleme sukundu pumbale nirimununi,“ Pulu Yemo popo toko kaloringi ulka-tembelena „Juda yombo naa molemele yomboma 'Pulu Yemo popo tamili.' ningu maku tolemele kolea" niringi akuna, sukundu pumba kanopale akuna mélema makete seko moloringi yomboma kinia, mélema topo toko liku moloringi yomboma kinia akuma kanopale ono pali topa makoropa, kou-mone lupa lupama topele toko anju siringi yombomanga poloma kinia, kera waembono makete seringi yombomanga mania moloringi poloma kinia, topele topa, topa bulu-balu sipale,

<sup>13</sup> onondo nimbale: "Pulu Yemonga bokuna ungu se i-sipa nilimú:

'Yombomane nanga ulkamondo

"Pulu Yemo kinia ungu nilimulu ulkamo." ningí.'

kanumu. Unku aku sipa molemo-na-kolo onone i ulkamo

'wa nolemele yomboma lopi seko molemele ulkamo'

mele ningu pilkuli aku siku selememe." nirimu.

**21:14-17**

*Ulka-Tembelena Ulu-Peanga Mare Wendo Orumu Kinia Juda Ye Awilima Kinia Yesusi  
Kinia Angelema Niringi Mele Semanemo*

<sup>14</sup> Kanu-kinia Yesusi ulka-tembelena molopili yombo mongo kiri lepa, kimbu ki kiri lierimu yombo awisili yu molorumuna oringi kinia yuni ono sepa peanga sirimu.

<sup>15</sup> Aku-sipa na-kolo yuni we-yombo sene manda naa selka ulu-tondolo peangama serimu mele kinia, ulka-tembelena bolangomane tondolo ru ninguli:

“Ye Nokoli Kingi Depitini Kalopa Liltimu Yemo

‘Imbi ola molopili.’ niemili.”

niringi mele kinia, kanu ulutolo wendo orumu mele kanokole Pulu Yemo popo tondoringi ye awilima kinia Pulu Yemonga ungu-manemanga puluma pilku mane siringi yema kinia onone konopu kiri panjiku <sup>16</sup> Yesusi mangilkuli: “Andi bolangomane ungu nikimili mele nu ‘naa, pilkinuye?’ niringi.

„Aku-sipa na-kolo,“ Yesusini onondo nimbale: “Na pilkiru. „Andi bolangomane sekemele mele, ungu se bokuna molemo mele ono naa kanolemeleye? Kanumu i-sipa molemo:

‘Bolango kangama kinia bolango pamema kinia

„Pulu Yemo, nu paa kape ningí mele mane sirinu.“

aku ungumu bokuna molemo mele ono naa kanolemeleye?” nirimu.

<sup>17</sup> Aku nimbale yu kanu yema mundupa kelepa kolea-awili „Jerusalleme, ultukundu pumba kolea-kanga Betani pumba akuna perimu.

21:18-22

*Yesusini Unju Piki Se Iri Torumu Kinia Kolorumu Semanemo*

<sup>18</sup> Orili-u „Jerusalleme nondopa lierimu kolea Betani mundupa kelepa Yesusi, kelepa kolea-awili „Jerusalleme, pumbá purumu kinia yu gele serimu. <sup>19</sup> Kanu-kinia yu orumu aulka kelona unju piki se gilierimu kanopale nondopa pumba kanorumu kinia unju mongo se topa naa perimu, gomo mindi serimu kanorumu. „Gomo mindi serimu-na, kanopale “Nu kelko mongo se naa tani.” nirimu kinia unju piki kanumu waltikele kolorumu.

<sup>20</sup> Aku ulumu wendo orumu kinia kanokole yu lombili andolimane paa mini-wale munduku ninguli: “I unju pikimu nambi sepale waltikele kolomuye?” ningu mangilieringi.

<sup>21</sup> Yesusini pundu topa nimbale: “Nane onondo paa sika nimbu sikirumu: “Ono konopu talo sepa naa pepili „Pulu Yemone nanga ungumu sika pilimbamonga nimbú mele ‘paa sika wendo ombá.’ ningu, kuru mondongi liemu nane i unju pikimu sendu mele manda senge. Unjuma mindi mólola. Ne ma-pangimunu “Ungú toko nomu-kusana sukundu pu.” ningí kinia pumbála. <sup>22</sup> ‘Olio „Pulu Yemone paa sika lipa tapondombamonga ‘Samili.’ nimulú mele sika manda aku sipu semolo.’ molo ‘Nimulú kinia sika aku sipa wendo ombá.’ ningu, kuru mondokole „Pulu Yemo kinia, ungu ningu mawa senge mele pali Pulu Yemone sika sendembamonga kanu uluma sika wendo ombá.” nikiru.” nirimu.

21:23-27

*Yesusi Namba Sirimumunga Angelema Niringi Semanemo*

<sup>23</sup> Kanu-kinia Yesusi „kamu Jerusalleme ombo, ulka-tembele kerepuluna ombo, yomboma ungu-mane sipa molorumu kinia ye mare, Pulu Yemo popo tondoringi ye awilima kinia, Juda yombomanga tapu-yema kinia ono ongo yu mangilku pilku ninguli: “Nu namba nambolka nambamo likuli i kongonomo selenoye? Nawene i kongonomo ‘Se-pu.’ nimba nu nambamo sipa lipa mundorumuye?” niringi.

<sup>24</sup> Yesusini onondo pundu topa nimbale: “Nane ono ungu se mangilipu piliambola. Pe nane ono mangilimbu mele onone na sumbi siku pundu toko níngi liemu ‘Na i kongonomo sambo.’ nimba namba sirimumunga pulumu ono nimbu simbula.

<sup>25</sup> „Nane i-sipu ono mangilipu pilkiru: „U „No Lindeli, Jono omba yomboma no linderimu kinia yu mulu-koleana molemo yemonga kongonomo sendembando yomboma no linderimu molo ya mana-yombomanga kongonomo sendembando yomboma no linderimuye? „Nawene “Sei.” nirimu-na serimuye? Ningu siee.,” nirimu.

„Yuni aku sipa mangilierimu mele pilkuli, onone onono angelema ningu ninguli: “Yuni mangilkimu mele olione pundu topo, ‘Jono, yu mulu-koleana „molemo yemonga kongono sendembando yomboma no linderimu.’ nímulu liemu yuni oliondo nimbale: ‘Aku liemu ono Jonone nirimu ungumu nambi semu-na ‘I ungumu sika.’ ningu naa pilku liltingiye?’ nimbá. <sup>26</sup> Molo olione nimbili: ‘Yu mana-yombomanga „kongono sendembando yomboma no linderimu.’ nímulu liemu we-yombomane ‘olio tongenje’ nimbu pipili kolkomolo. We-yombomane „No Lindeli Jono, yu paa sika Pulu Yemone ungu-umbu tondorumuma pilipa yomboma nimba sirimu ye se molorumu.’ ningu pilielemele kene olio nambi semolonje?” ningu onono aku siku angelema niringi.

<sup>27</sup> „Onono aku siku anju yando angelema ninguli, „Yesusindu pundu toko ninguli: „Nuni mangilkinu mele, olio naa pilkimulu.” niringi.

Aku siku niringi kinia pilipale Yesusini onondo nimbale: “Manda. „Nane ono mangilkiru ungumunga ungu se pundu toko naa nikimilimunga, onone na mangilkimili ungumunga ungu se pundu topo nando i kongonomo ‘Se-pu.’ nimba na lipa mundupa namba sirimu yemonga imbimu ono naa nimbu simbula.” „nirimu.,

21:28-22:14

*Juda Ye Awilimane ‘Pulu Yemone Yesusi Naa Lipa Mundorumu-na Orumu.’ Ning Yu Bulu Siku Ungumu Naa Pilku Liltingimunga Yesusini Ono-Kinia Ungu-Iku Yopoko Torumu Ungu-Ikuma*

Se 21:28-32

### *Ye Senga Kango Talonga Ungu-Ikumu*

<sup>28</sup> „Yesusini kelepa kanu Juda yombomanga ye awilimando nimbale: „Ono nambolka konopu lekemeleye? Ye se yunga kango talo moloringili. Yu pumba kango komomondo nimbale: “Kangomo, kiniá nu unju-waene kaliana pungu kongono se-pu.” nirimu.

<sup>29</sup> Yuni pundu topa lapando “Mólo, na naa pumbú.” nirimu, aku-na-koło pe yu konopu topele topale purumu.

<sup>30</sup> Lapa pumba komomondo nirimu mele aku sipa akiliumundu nirimu „kinia, yuni pundu topa “Se-pumbú.” nirimu, aku-na-koło naa purumu.

<sup>31</sup> Kanu kangotolonga nawene lapanga ungumu pilipa lipa serimuye?” nirimu.

Onone pundu toko “Komomo.” niringi.

Yesusini onondo nimbale: “Nane onondo paa sika nimbu sikirumu: “Ono „Juda yombomanga ye-awilima, Pulu Yemo ye nokoli kingimu molopa nokolemo talapena sukundu „kumbi leko naa pungí.. Kou-takisi lili yema kinia wapora toli amboma kinia „kanu yomboma, ono Juda yombomanga ye-awilimane kanoko kiri pilielemele, kumbi leko pungí.” nikiru. <sup>32</sup> „No Lindeli, Jono omba ono sumbi siku molonge aulkamo lipa ora sirimu kinia onone yu nirimumu ‘Kolo tokomo.’ konopu leko yunga ungumu kuru naa mondoringi-na-koło kou-takisi lili yema kinia wapora toli amboma kinia yuni nirimu ungumu ‘Sika.’ ningu kuru mondoringi. Aku-sipa na-koło kanu ambo ye kirimane aku seringi kinia kepe kanokole ‘Konopu topele topo ‘Yuni sika nikimu.’ nimbu kuru mondamili.’ naa niringila. Akumunga „kanu ambo ye “Sepo kinjilimulu.” ningu konopu topele tolemele yomboma Pulu Yemo molemona kumbi leko pungí..” „nirimu..”

Se: 21:33-46

*Unju-Waene Kalia Nokoringi Ye Kirimanga Ungu-Ikumu ,21:28—22:14 pali kanani*

<sup>33</sup> „Aku nimbale Yesusini kanu ye awilimando kelepa nimbale:，“Ungu-iku se pea tambo piliayo:

“Kolea pulu ye sene unju-waene kalia sepale pala serimu. Kaliana sukundu loyakolo akupa waene-no ingi sepa mondombando sepa wamopale nirimumuni, pe kalia nokonge ulka takaya se polo kulupa ola takorumu. Ye mare kanopa lipa onondo nimbale: “Nanga kaliamo tapu sendeko unju mongoma inia toko nokondangi. Pe waene mongo polo tomba kinia unju mongoma moke sepo, kongono sendenge mele mare ono liengi mare na liembo.” nimba kanu kaliamo ono sipale yu kolea paa suluringa pumba molorumu.

<sup>34</sup> Kanu-kinia pe waene-mongo polo tomba serimu kinia kalia pulu yemone yunga kendemande-ye mare “Nanga waene-mongo siengi pungu liku mendeko wangipaa.” nimba kalia nokoringi yema moloringina lipa mundorumu. <sup>35</sup> Aku-sipa na-kolo kendemande-yema ,oringi kinia, kalia nokoli yemane ono ambolko likuli se kopene toko, se toko kondoko, se kouni toringi.

<sup>36</sup> Kelepa kalia pulu yemone kendemande-ye mare awisili mele lipa “Nanga waene-mongo lindi-paa.” nimba lipa mundorumu, u kendemande-ye koltalo mele lipa mundorumu. Aku-na-kolo kalia nokoli yemane u-pulu-pulu oringi kendemande-yema-kinia seringi mele pe kendemande oringi yema-kinia akula seringi.

<sup>37</sup> Kanu-kinia kalia pulu yemo yuni ,konopuni pilipale, ‘Nanga kangomo pipili kolko yunga unguma pilku liku, yu waene-mongoma singi.’ konopu lepale yunga malo lipa mundorumu. <sup>38</sup> Aku-sipa na-kolo kalia nokoli yemane kalia pulu yemonga malo ombá orumu kanokole onone onono ninguli: “Andi okomo yemo pe lapanga mongémélema limba yemo okomo. Yu topo kondopo i kaliamo olio kamu liemili.” ninguli <sup>39</sup> onone yu ambolko liku kaliana ultu mundukuli yu toko kondoringi.” ,nimba Yesusini nirimu..,

<sup>40</sup> „Yesusini ungu-iku akumu topa pora simbando kanu Juda yombomanga ye-awilimando mangilipa nimbale:„

“Kalia nokoli yemane aku seringimunga kalia pulu yemo ombale kanu kalia nokoli yema-kinia yuni nambolka unguri sembá konopu lekemeleye?” nirimu.

<sup>41</sup> Onone yundu pundu toko ninguli: “Yuni kanu ye kirima ‘kamu molko kinjangi.’ nimba sepa kinjipale kalia nokonge ye lupa mare lipa waene-mongo polo tomba kinia waene-mongoma moke seko, mare kalia pulu yemo singi yema kaliamo simba.” nirungi.

<sup>42</sup> Yesusini ,Pulu Yemonga Juda yomboma nokoringi yemane yu toko kondonge mele pilipale, onondo nimbale: “Pulu Yemonga bokuna sukundu molemo ungu se kanoko naa pilielemeye? ,Aku ungumu i-sipa mele:„

“Ulka takoringi yemane

kanoko kiri pilku toko eltoringi kou kanumu  
kiniá kelepa ulka-simu mele

ulka enge sindeli kou awili peangamo.

Ye-Awilimuni aku ungumu serimu olione

kanopo paa peanga pifielemolo.”

nimba molemo kanumu. <sup>43</sup> Aku ,nirimu,munga nane ono ,Pulu Yemonga Juda yomboma, nimbu sikirumu: “Pulu Yemo ononga ye nokoli kingi molopa ono nokolemo mele mundupa kelepale nimbámone, yombo talape lupa sene yunga ungumu pilku liku seko molongema lipa nokomba.” nikiru. <sup>44</sup> ,I kou ,nikiru,munga ola yombo se a topa topale bele mélema elke tomba. Aku-na-kolo yombo se molombana ola koumu ombo yu topale kanu yombomo topa norupulu tomba.” nirimu.

<sup>45</sup> Kanu-kinia Pulu Yemo popo tondoringi ye awilima kinia Parisi yema kinia Yesusini ungu-iku torumuma pilkuli onone yu toko kondonge seko moloringi mele yuni nirimu pilkuli <sup>46</sup> onone yu ka singí seringi-na-kolo yombomane 'Yu Pulu Yemone ungu-umbu tondolemoma pilipa yando nimba silimú ye se.' konopu lieringi-kulu yomboma pipili kolkole yu iseli-u ambolko ka naa siringi.

## 22

Se 22:1-14

*Ye Se Ambo Limbamonga Kere, Langi Noringi Ungu-Ikumu, 21:28—22:14 pali kananu*

<sup>1</sup> Yesusini kelepa ungu mare ,Juda ye awilimando nimbando, ungu-iku se pea topa nimbale:

<sup>2</sup> "Pulu Yemo ye nokoli kingimu molopa yomboma nokolemo akumu i-sipa mele: "Ye nokoli kingi sene yunga malo ambo limbamonga kere-langi awisili kalondorumu. <sup>3</sup> Koronga "Ye ambo limba kere-langi pea namili sukundu wangi." nirimu yomboma yunga kendemande-yombomando " "Kiniá kere-langi namili waa." ni-paa." nimba mundorumu, na-kolo pungu aku siku niringi kinia ono "Naa omolo." niringi.

<sup>4</sup> Kelepa kendemande-ye mare lupa lipa mundupa nimbale:  
" "Kere-langi pea namili wangi." nirindu yombomando pungu ninguli: "Kere-langi sepa mimi sepa pora simu. Yunga kongi kao peleama kinia kongi kao walo wami selima kinia tomu. Kere-langi pali sepa mimi sepa taltolemo kene ye ambo limbamonga kere-langi pea namili waa." ni-paa." nirimu.

<sup>5</sup> Aku-sipa na-kolo pungu niringi kinia naa pilku siye kolko, se yunga kaliana pumba, se yunga bisinisina pumba, <sup>6</sup> marene kingimunga kendemande-yema ambolko liku seko kinjikuli toko kondoringi.

<sup>7</sup> ,Aku seringimunga, kingimu mumindili kolopa yunga ami-yemando nimbale: "Ono molemelena pungu toko kondoko ononga koleamo sepe leko to-paa." nimba ono lipa mundorumu kinia punguli, nirimu mele seringi.

<sup>8</sup> Kanu-kinia kingimuni yunga kendemande-yemando nimbale: "Ye ambo limbamonga kere-langi taltolemolo-na-kolo "Pea namili wangi." nirindu yomboma nonge manda naa sembá kene <sup>9</sup> ono pungu aulka lupa lupa lemomanga pali pungu yombo kanongema "Ye ambo limbamonga kere-langi pea namili waa." ni-paa." nirimu. <sup>10</sup> Pilkuli kanu kendemande-yema aulkamanga pali pungu yombo kanoringima pali liku maku toringi. Yombo peangama kinia yombo kirima kinia pea liku maku toringi. Kanu-kinia ye ambo limbamonga koleana yomboma paa ongo sengepea seko moloringi.

<sup>11</sup> Ongo moloringi kinia kingimu "Yombo maku toko molemelema kano-pambo." nimba ono moloringina ombale, yomboma ye ambo limba ,makuna ongemonga wale-pakoli kamuma 'pakoko sukundu wangi.' ningu siringi, wale-pakolimanga ye se wale-pakoli akumanga se naa pakopa molorumu kanopale <sup>12</sup> yuntu nimbale: "Kangomo, nu ye ambo limba wale-pakoli se naa pakokono kanokoro kene nu aulka semonga sukundu onuye?" nirimu kinia kanu yemone unguri naa nirimu.

<sup>13</sup> Kanu-kinia kingimuni kere-langi nokoringi kendemande-yemando nimbale: "I yemo kimbu kima ka toko pena kolea simbulu tokomona toko pena mundaal!" nirimu. Akuna yomboma paa mindili nongo kola seko perekon molonge." ,nimba Yesusini nirimu..

<sup>14</sup> ,Aku nimbale Yesusini ungu-ikumunga pulumu kamu nimbale: „Sika ,Pulu Yemone, yombo awisilindu "Waa." nilimú-na-kolo yombo koltalo mindi nimba taltopa "Sukundu waa." nilimú." nirimu.

*"Gapomano Kou-Takisi Tamili Molo Móloye?" Ningu Yesusi Mangilku Pilieringi Semanemo*

<sup>15</sup> Yesusini aku sipa nirimu, kinia ‚pilkuli, Parisi yema ultu pungu ono onono liku maku toko ninguli: “ ‘Yesusini ungu se nimba kinjepili.’ nimbu nambi samiliye?” ningu angelema ninguli niringimuni, <sup>16</sup> ono lombili andolima kinia ye nokoli kingi Erotenga talape ye mare kinia liku Yesusi molorumuna liku mundoringi, ono pungu Yesusindu ninguli:

“Ungu Mane Sili Yemo, olio pilielemolo, ‘nuni ungu sikama mindi ningu, Pulu Yemone “Saa.” nilimú uluma paa sika unguma mane siku, nu yombo seluringa kepe konopu kimbu naa siku, yomboma pipili naa kolko onondo pali ungu selu-siku ningu silinu.’ konopu lemolo. <sup>17</sup> Aku siku ningu molenomonga nu nambolka konopu lekenoye? Olione Romo Gapomano Ye Paa Awili Kumbina ‘Sisa’ nili se kou-takisi tomulu liemu manda molo móloye? Pulu Yemone akumundu ungu-mane sirimu ungu-mane nambolka nimba pelemoye? Ningu si.” niringi.

<sup>18</sup> Aku-sipa na-kolo Yesusini yu-kinia konopu kiri panjiku yu seko kinjingí seringi pilipa onondo nimbale: “Ono kolo toko topele-mapele toli yema, ‘Yuni nimba kinjepili.’ ningu nambi semu-na na manda manjiku kolo toko mangikimiliye?

<sup>19</sup> Takisi tolemele kou-mongo se na liku ora siee.” nirimu.

Onone yu molorumuna kou-mongo se mengo ongo yu siringi.

<sup>20</sup> Kanu-kinia Yesusini onondo nimbale: “I kouna nawenga kumbikeremo kinia imbimu molemoye?” nirimu.

<sup>21</sup> Onone yudu ninguli: “Romo Gapomano Ye Paa Awili Kumbina Sisamonga kumbikeremo kinia imbimu molemo.” niringi.

Kanu-kinia yuni onondo nimbale: “ ‚Kou-monemo Sisamonga, kene Sisamonga mélema Sisamo yuyu siku, Pulu Yemonga mélema Pulu Yemo yuyu siee.” nirimu.

<sup>22</sup> Yuni aku sipa ‚paa sumbi sipa, nirimu mele pilkuli, ‘Yu paa pilipa kondoli pelemo yemo lepomo.’ ningu pilku, konopu awisili kimbu sikuli yu munduku kelko ono puringi.

22:23-33

*“Kololemele Yomboma Lombokoko Ola Molkole Kelko Nambi Sengenje?” Ningu Yesusi Mangilku Pilieringi Semanemo*

<sup>23</sup> Kanu yema Yesusi kinia kou-takisi toli ungumu ningu pora siringi kinia, pe aku enamonga Sadusi ye mare Yesusi molorumuna oringi. Sadusi yema ono ‘Pulu Yemone pe kololemele yomboma topa naa makisindimba, lombokoko ola naa molonge.’ ningu pilku moloringi talapemo. Aku Sadusi yema ongo Yesusi mangilku pilku ninguli:

<sup>24</sup> “Ungu Mane Sili Yemo, ‚Pulu Yemonga ungu-manema olio sirimu ye, Mosisini ungu-mane sipa nimbale:

“Ambo limba ye se bolango naa membale

kolomba kinia kanu yemo yunga genu

molombamone yunga ambo-wayamo lipa

genu lipa tapondopa bolango mendepili.”

nirimu aku sipa bokuna molemo kanumu. <sup>25</sup> Aku ungu-manemonga ulu se olionga ye mare-kinia wendo orumu mele nu mangilipu piliamili..”

“Genupili yopoko-pakara moloringi. Komomo ambo lipale kolorumu. Bolango se naa molopili kolorumu-kulu yunga bulkundu genumuni ‚yunga genu kolorumu-munga, bolango ‘Mendambo.’ nimba ambo-wayamo kelepa liltimu. <sup>26</sup> Aku-sipa na-kolo bolango se naa mendepale yu we kolorumula. Yunga bulkundumuni kanu ambomo liltimula-na-kolo yu kepe we kolorumula. Aku selko punguli ye yopoko-pakara pali bolango selu kepe naa mengole kolko pora siringi kinia akiliemu we kolorumula. <sup>27</sup> Pe ambomo yu kolorumula. <sup>28</sup> Akumunga, kololemele yomboma pe

lomboroko ola molonge kinia kanu ambomo ye yopoko-pakara pali ya mana liltingi-kulu ambomo yu ye paa nawenga menu molombaye?" niringi.

<sup>29</sup> Yesusini onondo pundu topa nimbale: "Ono Pulu Yemonga bokuna ungu molemoma kinia, Pulu Yemo kinia tondolo pelemo mele kinia, naa pilku lo limilimunga ,yomboma pe sengemondo nikimili mele pilku sunduku kolo tokomele..

<sup>30</sup> Lomboroko ola molonge yombomanga yema ambo naa liku, amboma ye naa pungu, aku paa naa senge. Mulu-koleana molemele angelloma molemele mele aku siku molonge. ,Angellomane mana-yomboma selemele mele naa selemele kanumu., Aku sengemonga , 'Ono Pulu Yemonga ungumu pilku sunduku lawa selemele.' nikiru..

<sup>31-32</sup> "Aku-sipa na-kolo ,ono Sadusimane, 'Kololemele yomboma lomboroko ola naa molonge.' konopu lemelemonga ungu se Pulu Yemone onondo nirimumu onone naa kanoko pilielemeleye? Yuni i-sipa nimbale:

"Na Eporayamo kinia Aisake kinia Jekopo kinia  
ononga Pulu Yemo molio." nirimu.

Pulu Yemonga bokuna aku ungu molemomo naa kanoko pilielemeleye? , 'Ononga Pulu Yemo molorundu.' naa nirimu. 'Ononga Pulu Yemo molio.' nirimu kanumu., Pulu Yemo yu kololi yombomanga Pulu Yemo molo; yu konde mololi yombomanga Pulu Yemo." nirimu.

<sup>33</sup> Yuni aku nirimu mele yombo maku toko moloringimane pilkuli yunga ungu-manne sirimu unguma pilkuli pungu-pungu ningu paa konopu awisili kimbu siringi.

22:34-40

### *Pulu Yemone Ungu Mane Sirimu Ungu-Manemanga Talo Olandopamonga Semanemo*

<sup>34</sup> Aku-sipa na-kolo Yesusini aku ungu nirimumuni Sadusi yemanga ungumu pipi sinderimu, ono ungu se naa perimu-na Parisi yemane pilkuli ono liku maku toko ,Yesusi molorumuna, oringi. <sup>35</sup> ,Oringi kinia, ononga ye se, yu Pulu Yemonga ungu-manemanga puluma pilipa kondorumu yemone 'Yuni nimba kinjimbanje manda manjipu piliambo.' nimba Yesusindu mangilipa pilipa nimbale: <sup>36</sup> "Ungu Mane Sili Yemo, Pulu Yemone ungu mane sirimu pelemomanga nambolka ungu-manemo yu olandopaye?" nirimu.

<sup>37</sup> Yesusini yundu nimbale:

"Ungu-mane olandopamo i-sipa:

'Onone ononga kamelema kinia,

ononga minima kinia,

ononga pilipa kondolima kinia,

akumane Ye-Awilimu ononga Pulu Yemo manjiku

tondolo munduku konopu mondangi.'

aku nimba pelemo. <sup>38</sup> Aku ungu-manemo yu paa tondolo, olandopamo.

<sup>39</sup> Talo-sipa ungu-manemo yu-kinia selu sipa mele. Akumu i-sipa:

'Onone onono yumele-mele konopu mondoko

ononga kangimu onono

kondo kolko nokolemele mele

aku sikula pulu lemó yomboma

konopu mondoko nokoko molangi.'

nimba pelemo. <sup>40</sup> Pulu Yemonga ungu-mane Mosisini sirimuma pali kinia, Pulu Yemone ungu-umbu tondorumuma pilku yomboma ningu siringi yemane bokuna toringi unguma pali kinia, kanu ungumanga pulumu aku ungu-manetolo mindi." nirimu.

22:41-46

### *Yesusini "Ye Nokoli Karasimu Nawenga Maloye?" Nimba Mangilierimu Semanemo*

<sup>41</sup> Kanu-kinia Parisi yema aku siku we maku toko molangi Yesusini onondo i-sipa mangilipa nimbale: <sup>42</sup> "Pulu Yemone "Ono nokopa kondomba ye se lipu mundumbu." u nimba taltorumu ye nokoli Karasimundu onone nambolka konopu lekemeleye? Yu nawe? Yu nawene kalopa limba konopu lemeleye?" nirimu kinia

onone ninguli: "Ye nokoli Karasimu yu ye nokoli kingi, Depitini kalopa limba ye se." niringi.

<sup>43</sup> Yuni kelepa ono mangilipa nimbale: "Aku liemu ,Pulu Yemonga, Minimu Depitinga konopuna molopale ungu se nirimu kinia Depitini pilipale ye nokoli Karasimundu "Ye-Awilimu" nirimu akumu nambi semu-na nirimu konopu lekemeleye? Depiti yuni ,ye Karasimu molomba mele, i-sipa nirimu:

<sup>44</sup> "Ye-Awili ,Pulu Ye Yawene,  
nanga Ye-Awilimundu nimbale:

" 'Nunga opa-touma nuni nokani.' nimbu,  
pe ono topo mania mundundumbu kene  
iseli-u nu ,na kinia pea  
kopu sepo ye nokolitolo molopo  
mélema nokambil, Karasimundu  
nanga ki-lomekondo ongo molani." nirimu."

nimba Depitini nirimu kanumu. <sup>45</sup> Depitini ,ye nokoli Karasimu, yuntu "Nu nanga Ye-Awilimu." nirimu liemu yu pe nambi sepa Depitini kalopa limba ye se ,mindy, molombaye?" nirimu.

<sup>46</sup> ,Yesusini aku sipa mangilierimu mele pilkuli, ye akuna moloringimanga sene ungu selu kepe pundu toko manda naa niringi. ,Onone yu mangilku pilieringi unguma pali yuni pundu topa anju nimba kondorumu pilkuli, pe kelko yu ungu se mangilku pilingindu pipili kolko naa mangilieringi.

## 23

### Kolomongo-Awili 23

*Jesusini Juda Yombomanga Ye Awilima Umbuna Awili Yopoko-Pakaranga Se-manemo  
23:1-12*

*Parisi Yema Kinia UNGU-Manema Pilku Mane Siringi Yema Kinia Onone Seko  
Kinjeringi Ulumanga UNGU Se*

<sup>1</sup> Kanu-kinia Yesusini yombo maku toringima kinia, yunga lombili andoli yema kinia, ungu nimba sipa nimbale:

<sup>2</sup> "Pulu Yemonga ungu-manemanga puluma pilku mane silimili yema kinia Parisi yema kinia onone Mosisini ungu-manemanga puluma mane sirimu mele yandopa mane silimili. <sup>3</sup> Akumunga, kanu yemane ono mane silimilima pali mimi siku pilku sangi, na-kolo kanu yemane mane silimili mele kanu yema onono pilku liku naa selemelemonga kanu yema onone ungu selemelema manda manjiku naa sangi.

<sup>4</sup> Yombo sene wale umbuna seli se sepa mimi sepale yombo se 'mepili.' nimba ola lipa buluna mendelemo mele ,aku siku kanu yemane yombomando ungu-mane siku "I-siku i-siku saa." ningu, umbuna silimili-na-kolo kanga-kolte kepe 'Lipu tapondopo meamili.' naa nilimili.

<sup>5</sup> "Kanu yemane ungu selemelema 'we samili.' ningu naa selemele. 'Yombomane olia kanokole 'molko kondolemele.' ningu kanangi.' ningu unguma selemele. Pulu Yemonga ungu-manema molemo pepá se kuluepe toko mambelena molo kína ka tongendo 'Yomboma paa kanangi.' ningu kuluepe paa awili seko toko, ononga wale-pakolimanga ka moko toko mondongendo ka sulu peanga mare awili seko moko toko mondolemele. <sup>6</sup> Yombomane kere-langì nongo yombomando "Namili waa."

nilimili kinia kanu yema ongole ye awilimanga polo kumbikundu ‘olio molamili.’ ningu konopu siku molemelela. Yomboma maku toko Pulu Yemonga ungumu pilielemele ulkana sukundu punguli mania molongendo ye awilima molemele polo peanga akuna ‘molamili.’ ningu mendo pungu polo akuna konopu siku molemelela. <sup>7</sup> Yomboma maku toko molemele koleana andongendo mongo-kenge seko ‘We-yombomane olio kanoko kape niengi.’ ningu pilkuli konopu siku pilku andoko molemelela. Yombomane onondo ‘Rapai’ nilimili kinia paa konopu silimilila.

<sup>8</sup> „Kanu yemane aku selemele,-na-kolo ononga nokoli ye awili selumu mindi molemo, ono pali genupili molemele kene yombomane “ono olionga Rapaima.” naa niengi. <sup>9</sup> Ononga Lapa selumu mindi molemo, akumu mulu-koleana molemo, akumunga mana-yombo sendo ‚‘olionga ye awilimu’ ningu, ‚‘Tata’ naa niengi. <sup>10</sup> Pulu Yemone “Ono nokopa kondomba ye se lipu mundumbu.” u nimba taltorumu ye nokoli Karasimu mindi ononga nokoli ye awilimu molemo kene yombomane onondo ‚‘olio nokolemo yemo’ , ningu “Ye-Awilimu” naala niengi. <sup>11-12</sup> Yombo sene yunga imbimu yuyu ambolopa paka tomba kinia ‚‘Pulu Yemone’ yunga imbimu topa mania mundumba; yombo sene yunga imbimu yuyu topa mania mundumba kinia ‚‘Pulu Yemone’ yunga imbimu ambolopa paka tondomba kene ononga ye se ono nokomba ye awili se molopa ononga kongono kendemande yemo molopili.” ‚nirimu.,

23:13-36

*Parisi Yema Kinia Ungu-Manema Pilku Mane Siringi Yema Kinia Akumando Yesusini  
Iri Topa Seko Kinjeringimunga Mindili Nonge Mele Nirimu Semanemo*

<sup>13</sup> „Yu lombili andolimando ungu nimba kelepale Yesusini Juda yombomanga ye awili moloringimando nimbale:„

“Ono Pulu Yemonga ungu-manemanga puluma pilku mane silimili yema kinia, Parisi yema kinia, ono mindili nongo paa molko kinjingí! Ono topele-mapele toli yema! Onone yomboma Pulu Yemo ye nokoli kingimu molopa nokolemo mulu-koleana pungí pulimili kerepulumu pipi silimili. Ono onono sukundu naa pulimili; yombo lupama pungí selemele kinia aulkamo pipi siku “Mólo.” nilimilila.

<sup>14</sup> „Ono ungu-manemanga puluma pilku mane silimili yema kinia Parisi yema kinia ono mindili nongo paa molko kinjingí! Ono topele-mapele toli yema! Onone ambo-wayama likuamu tondoko ononga ulkama wa liku, onone ‘Yomboma kanangi.’ ningu Pulu Yemo kinia unguma sulu seko we ningu gilimili, akumunga kote walemo wendo ombá kinia ono-kinia umbuna awili sepa pemba.,„

<sup>15</sup> “Ono ungu-manemanga puluma pilku mane silimili yema kinia Parisi yema kinia ono mindili nongo paa molko kinjingí! Ono topele-mapele toli yema! ‘Yombo selu mindi kepe konopu topele topa olio lombili andomba kinia papu.’ ningu makoleamanga kimbu-kongono seko kolea sulumanga pungu, nomu-kusa sipimanga andolemele-na-kolo pe yombo se sika onone nilimili unguma pilipa lipa konopu topele topa lombili andolemo kinia kanu yombomo sepa kinjilimú mele paa olandopa, onone seko kinjilimili mele maniadopa, akumunga yu sepe-koleana paa sika pumbá aulkamo akisindilimili.

<sup>16</sup> “Ono mongo kiri lielimane „Mongo kiri lieli,“ yomboma aulkamo lipu ora siemili.” nilimili yema ono mindili nongo paa molko kinjingí! Onone yomboma mane siku ninguli: “Yombo sene mi lembando ‘ulka-tembelemo’ imbi lepa “Paa sika sembó.” nimbale pe “Sembó.” nimba panjimba mele naa sembá kinia unguri mólo. Aku-sipa na-kolo yombo sene mi lembando “ulka-tembelena ape kandoringi kou-gollomo” imbi lepa “Paa sika sembó.” nimbale pe “Sembó.” nimba panjimba mele

naa sembá kinia manda naa sembá. Yu sika kamu sepili." nilimili. <sup>17</sup> Ono aroma toko mongo kiri lieli yema! Méle nambolka mélemo olandopaye? Kou-gollo akumu méle-olandopamo molo Pulu Yemo molemo ulka-tembelemone kou-gollo nimba taltopa 'Pulu Yemonga' nimba kake sendelemo ulkamo olandopaye?

<sup>18</sup> "Onone ungu se pea yomboma mane siku ninguli: "Yombo sene mi lembando 'Pulu Yemo popo toko mélema kalolemele polomo' imbi lepa "Paa sika sembó." nimba pe "Sembó." nimba panjimba mele naa sembá kinia unguri mólo. Aku-sipa na-kolo yombo sene mi lembando "aku polona ola mélse singímu" imbi lepa "Paa sika sembó." nimba pe "Sembó." nimba panjimba mele naa sembá kinia manda naa sembá. Yu sika kamu sepili." nilimili. <sup>19</sup> Ono mongo kiri lieli yema! Méle nambolka mélemo olandopaye? Polona ola 'Pulu Yemo popo toko kalondangi.' ningu silimili mélemo olandopamo molo polomone kanu mélema nimba taltopa 'Pulu Yemonga' nimba kake sendelemo polomo olandopaye?

<sup>20</sup> "Akumunga, yombo sene mi lembando 'Pulu Yemo popo toko mélema kalolemele polomo' imbi lemba kinia méle polona ola lemba mélemo kepe imbi lepa mi lemba. <sup>21</sup> Aku sipala yombo sene mi lembando 'ulka-tembelemo' imbi lemba kinia ulka-tembelemo kinia akuna sukundu molemo yemo kinia imbi lepa mi lemba. <sup>22</sup> Yombo sene mi lembando 'mulu-koleamo' imbi lemba kinia Pulu Yemo ye nokoli kingimu molopa kolea nokombando molemo polomo kepe aku polona ola molemo yemo kepe imbi lepa mi lembala.

<sup>23</sup> "Ono ungu-manemanga puluma pilku mane silimili yema kinia, Parisi yema kinia, ono mindili nongo paa molko kinjingí! Ono 'sika-unguma nikimulu.' ningu kolo toko topele-mapele toli yema! Kere-langí kalongendo 'songo sepili.' ningu ononga kaliana méle-kanga lupa lupa olemomanga inia toko kere-langina mundulimili akumanga ungu-mane se pelemomo pilku rureponga talo rureponga talo ningu taltolemelemanga selu selu Pulu Yemonga ningu yu silimili. Aku selemele-na-kolo ungu-mane tondolo olandopa mare munduku kelko naa pilku selemele. 'Yomboma apuruku yombo awilima liku tapondoko yombo kirima seko kinjiku naa seko, yomboma naa apuruku pali kondo kolko, Pulu Yemo 'Sika.' ningu kuru mondoko "Semolo." nilimili mele sumbi siku seko molko, aku sangi.' nimba pelemo ungu-manemando nikiru. Ungu-mane wema pilku selemele munduku naa kelko 'mare naa selemele' nikiru akuma pali selemolánje peanga. <sup>24</sup> Ono mongo kiri lieli yemane ",Mongo kiri lieli, yomboma aulkamo lipu ora siemili." nilimili yema, ono ",ungu-mane wema tondolo munduku pilku seko, ungu-mane tondoloma naa pilku selemele, aku selemele mele ungu-iku topo niembo;," Kere-langí nongendo méle kanga lopalo molo lomu kere-langina pelemo kanokole 'Naa namili.' ningu wendo liku eltolemele, na-kolo kongi kao se kere-langina pelemo kinia naa kanoko we liku toko penge mundulimili.

<sup>25</sup> "Ono ungu-manemanga puluma pilku mane silimili yema kinia Parisi yema kinia, ono mindili nongo paa molko kinjingí! Ono topele-mapele toli yema! Pellete kapomanga ultukundu kulumiye toko kondolemele-na-kolo akumanga sukundu kere-langí pelemoma onone tondolo munduku wa liku, onone onono nonowalene kolko onono konopu kimbu siku limili uluma. <sup>26</sup> Ono mongo kiri lieli Parisi yema! Pellete kapomanga sukundu kulumiye tonge kinia ultukundu kepe kake sembá.

<sup>27</sup> "Ono ungu-manemanga puluma pilku mane silimili yema kinia Parisi yema kinia, ono mindili nongo paa molko kinjingí! Ono topele-mapele toli yema! 'Yombo-óno-koleamo kanoko peanga piliangi.' ningu pene kake sélimu ape kondolemele

mele ono aku silima mele molemele. Yombo-óno-koleama sika ultukundu peanga lemó kanolemele-na-koło sukundu yombo kololimanga belema kinia méle purolı norupuluma kinia peke lepa pelemo. <sup>28</sup> Ono aku siku mele molemele. Yombomane ononga kangikundu kanokole ‘Ono ye sumbi nilima’ konopu lemele-na-koło ononga konopumanga sukundu kolo toli uluma kinia ulu-pulu kirima kinia mindi sengepea sepa pelemo.

<sup>29</sup> “Ono ungu-manemanga puluma pilku mane silimili yema kinia Parisi yema kinia ono mindili nongo paa molko kinjingí! Ono topele-mapele toli yema! Pulu Yemone ungu-umbu tondolemoma pilku yando ningu sili yema kololemele kinia ononga óno selemele koleama seko wamoko, sumbi nili yombomanga óno-koleama au silimili. <sup>30</sup> Aku sekole onone ninguli: “Olio olionga anda-kolepalima-kinia molemolánje onone Pulu Yemone ungu-umbu tondorumuma pilku yomboma ningu siringi yema toko kondoringi kinia olionga anda-kolepali naa lipu tapondopo ono naa tolemolá.” nilimili. <sup>31</sup> Aku nilimilimunga ‘Kanu yema toko kondoringi yombomane kalko liltingi yema molemolo.’ ningu onono liku ora silimili. <sup>32</sup> Aku liemu manda ononga anda-kolepalimane pulu polko seko kinjeringi mele onone kamu sangi.

<sup>33</sup> “Yomboma nongo kondoli, kongi-ka-wambiyema! Ono kolo topa yomboma sepa kinjeli wambiyemonga waloma! Pulu Yemone onondo “Seko kinjeringimunga sepe-koleana paa.” nimbá kinia ono manda kowa pungí aulka se lembaye? <sup>34</sup> Akumunga, nane Pulu Yemone ungu-umbu tondombama pilku yomboma ningu singí yema kinia, pilipa kondoli pemba yema kinia, mane singí yema kinia, ono molemelena lipu mundukuru. Aku yemanga mare toko kondoko, mare ‘Kolangi.’ ningu unjuperana uku toko panjiku, mare ono maku toko Pulu Yemonga ungumu pilieli ulkamanga mengo pungu ka-pultane toko, koleamanga ‘tamili.’ ningu pulú siku akileko lombili pungí. <sup>35</sup> Aku sengemonga u-pulu-pulu ‘Pulu Yemone mulu matolo serimu kinia, kepe yandopa kiniá kepe yombo sumbi nilima toko kondoringimunga ulu-umbunama ono „Juda yombomanga ye-awilima,-kinia pemba. „Pulu Yemonga bokuna, u-pulu-pulu sumbi nili ye Epele kinia, yandopa moloringi yombo sumbi nilima kinia, yandopa „Pulu Yemonga bokumu pora nilimú akuna, Berekia malo Sekaraya kinia toko kondoringi akumanga pali ulu-umbunama ono-kinia pemba. Sekaraya akumu Pulu Yemonga ulka suluminia lierimu ulkamo kinia Pulu Yemo popo toko mélema kaloringi polomo kinia awi-suku-singina toringi kanumu. <sup>36</sup> Nane paa sika onondo nikiru: “U seko kinjeringi ulumanga pali ulu-umbunama i yombo kiniá molkomelema-kinia pemba.” nikiru.” „nirimu.”

23:37-39

### *Jerusalleme Yomboma Toko Kalonge Pilipale Yesusini Ono Kondo Kolorumu Se-manemo*

<sup>37</sup> „Aku nimba Yesusini Jerusalleme moloringi yomboma yu kondo kolopa akumundu ungu se nimba nimba:„

“O Jerusalleme „yomboma“, Jerusalleme „yomboma“, Pulu Yemone ungu-umbu tondorumuma pilku yomboma ningu siringi yema toko kondoko, yuni yomboma ‘liku tapondangi.’ nimba ono moloringina lipa mundorumu yema kouni toko kondoko selemele yomboma, kera-gulta anumumuni yunga waloma lipa yunga poumuni aki topa nokolemo mele nane wale awisili ono aku sipu nokolka-na-koło onono “Mólo.” niringi. <sup>38</sup> Akumunga piliame! „Opa-touma ono tonge onge kinia Pulu Yemone kelepa ono naa nokopa naa lipa tapondombamonga, opa-toumane ongo sika toko munduku ononga koleamo kinia ononga ulka-tembelemo kinia kamu toko kalongemonga ono

ku penge. <sup>39</sup> Akumunga nane ono ungu se pea nimbu sikiru: “Ono „Jerusalleme yomboma“, onone nando

“Pulu Ye Yawene lipa mundorumu-na okomo yemo  
imbi ola molopa, molopa kondopili.”

ningí walemonga na kelko kanonge. U mólo.” nikiru.” nirimu.

## 24

### *Kolomongo-Awili 24-25tolo*

*Yesusini Pe Mulu Matolo Pora Nimbá Semba Kinia Ungu Mare Wendo Ombámonga  
Ungu Mare Nimba Sirimu Unguma 24:1-42 Yesusini Ulu Umbuna Selima Pe Wendo  
Ombámando Nimba Sirimu Semanemo*

24:1-2

*Ulka-Tembelemo Toko Kalongemonga Yesusini Ungu Se Nirimu Semanemo*

<sup>1</sup> Kanu-kinia Yesusi „Pulu Yemo popo toko kaloringi, ulka-tembelena ultu pumba aulkana pumbá purumu kinia yu lombili andolima ongo ulka-tembelemonga ulka lupa-lupa „paa peanga gilieringima, yu “Kanou.” ningu liku ora siringi. <sup>2</sup> Aku seringi kinia, yuni onondo nimbale: “Ya „ulka-tembele peanga gilimú, kanokomele mélema pali paa sika nimbu sikirumu: „Pe walte ya kolea-awili Jerusalleme yomboma mindili nonge walemo wendo ombá kinia, i ulka-tembelemo sikisikuli kouma pali toko mania mundungí.” nikiru.” nirimu.

24:3-14

*Umbuna Awisili Wendo Ombámanga Yesusini Nirimu Semanemo 24:1-42 pali*

<sup>3</sup> Kanu-kinia yu ma-pangi Unju Ollipi Kaliana ola pumba mania molorumuna we-yomboma naa molangi yunga lombili andoli yema ongo ono onono molkole yundu mangilku pilku ninguli: “Nuni nikinu mele sewale wendo ombáye? Pe nu nondoko oni sení walemo kinia kepe ma pora nimbá walemo kinia kepe wendo ombándo u nambolka uluri sembá kinia olio kanopole “Kiniá ombá sekemo.” nimbu pilimulúye? Ningu si.” ningu mangilieringi.

<sup>4</sup> Yuni onondo nimbale:

„Kanu uluma wendo ombámonga ungu mare, yombomane ono kolo toko singí kene kanoko kondoko molangi. <sup>5</sup> Ye awisili ongo na molio mele yu-melete-melete kolo toko ninguli: „Pulu Yemone “Ono nokopa kondomba ye se lipu mundumbu.” u nimba talitorumu ye nokoli Karasi, akumu na.” ninguli aku siku kolo toko singí kene kanoko kondoko molangi. Yombo awisilini kanu yemanga unguma pilku liku “Sika nikimili.” ningí.

<sup>6</sup> “Kolea marenga opa awili-seko senge mele pilku, ‘Opali talu opa awili i-sipa i-sipa wendo ombá.’ ningu we ningí kinia pilkuli mini-wale naa mundangi. Opa sengema kinia aku uluma Pulu Yemone ‘U wendo opili. Laye-kolte pe mele ya ma-koleamo pora nimbá.’ nimba, nimba panjerimumunga aku uluma sika wendo ombá-na-kolo aku-kinia mulu matolo u naa pora nimbá. <sup>7</sup> „Mulu ma pora nimbá walemo u wendo naa opili, yombo talape awili se kinia talape awili se kinia opa seko, ye nokoli kingi marenga talapema kinia marenga talapema kinia opa senge. Ya ma-kolea senga senga gele lepa, ma jimi-jimi sepa, aku sipa sembá. <sup>8</sup> Ambo sene bolango kokele kanopa limbando u bulu mini topa mindili nolemo mele, mulu ma pora nimbá walemo kokele wendo ombándo umbuna lupa-lupa aku sipama u wendo ombá.” „nirimu..”

<sup>9</sup> “Kanu uluma wendo ombá walemanga ‘Na lombili andoli yomboma, mindili nongo, kolangi.’ ningu „ono mare, kote seko ka singí. Nanga yomboma molko nanga unguma andoko ningu singímunga koleamanga pali yombomane ono-kinia mumindili kolko konopu kiri panjingí. <sup>10</sup> „Kanu umbunama wendo ombá, walemanga na ‘Sika.’ ningu kuru mondonge yombo awisili kuru mondonge mele munduku kelko

anju yando onono konopu kiri panjiku, 'Karasinga yomboma molemelemonga mindili nangi.' ningu ononga opa-touma liku singí. <sup>11</sup> ,Kanu walemanga, Pulu Yemone ungu-umbu tondolemoma naa pilku we kolo toko yando ningu singí yombo awisili wendo ongela. Aku senge kinia we-yombo awisilini 'Sika nikimili.' ningu ononga unguma pilku lingí. <sup>12</sup> Ulu paa kiri awisili olandopa olandopa wendo ombámonga nanga yombomane ,anju yando, konopu mondonge mele ,kinia, na konopu mondonge mele kinia, munduku kelengela. <sup>13</sup> Aku-sipa na-kolo nanga ungumu munduku naa kelko mulu ma pora naa nipili tondolo munduku molonge yomboma ,Pulu Yemone, lipa tapondopa 'Mindili nonge koleana naa pungu pea molopo kondopo mindi pamili.' nimbá. <sup>14</sup> Pulu Yemone ye nokoli kingimu molopa yomboma nokombamonga semane peangamo 'Yomboma pali piliangi.' ningu koleamanga pali andoko ningu singí kinia pe mulu ma pora nimbá walemo kamu wendo ombá." ,nirimu.,

*24:15-28*

*Ye Nokoli Karasimu Kelepa Ombá Sembá Kinia Umbuna Paa Awili Sepa Wendo Ombá Mele Ungu Se ,24:1-42 pali*

<sup>15</sup> „Na i bokumu tokoro yemone ono boku kanokomele yombomando ungu se niembo: „Yesusini nirimu, ungumu inia anjukundu molemo akumu ono imbi kanokomele yombomane ungu-pulumu paa pilku kondangi.' nimbu nikiru:  
„Yesusini nimbale:,,

"Pulu Yemone ungu-umbu tondorumuma pilipa yomboma nimba sirimu ye Denielene bokuna imbi topa nimba sirimu mele yombo sepa pipili kondoli mele paa kirimu ,ulka-tembelena sukundu, Pulu Yemonga ulka-suluminia kake selina gilimbamonga kolea akumu paa kalaro molomba mele nirimu, bokuna molemo. Aku mélemo akuna wendo omba gilimba kanokole <sup>16</sup> , 'Umbuna awilima wendo ombá sekemo.' ningu pilku, kolea Judia poropinji koleamanga molonge yomboma ,ononga koleama munduku kelko, ma-pangi lembamanga kowa pangí. <sup>17</sup> Yombo se ulka imuna ola molopili ,aku sipa wendo ombá kinia kanopale, kowa pumbándo mania ombo 'Mélema lipu membo pambo.' nimba ulkana sukundu naa pupili. <sup>18</sup> Yombo se kaliana molopale , 'Kowa pambo.' nimba, kelepa ulkando pumba yunga ali-wale sulumu naa lipili. ,Sumbi siku kowa mindi pangí., <sup>19</sup> Aku sipa wendo ombá walemanga ambo bolango mondongema kinia, ambo bolango ame singíma kinia, ,ono manda lisiku kowa naa pungímunga, ono-kinia paa umbuna wendo ombámonga ono kondo sekemo.

<sup>20</sup> "Pulu Yemo mawa sekole, 'Ali selemo olimanga kinia ,koro molopo manda naa andomolo, wale Sambatemanga kinia manda kowa naa pumulú kene kanu walemanga kanu umbunama wendo naa opili.' nieyo. <sup>21</sup> Kanu walemanga umbuna paa awilima wendo ombá, u mulu matolo pulu polopa serimu kinia kepe, yandopa kiniá kepe umbuna aku sipa se wendo naa orumu. Pe kepe aku sipa umbuna awilima naa wendo ombála. <sup>22</sup> ,Kanu umbunama wendo ombá kinia Pulu Yemone, 'Nondopa pora nipili.' nimba u naa nimba panjilkanje yomboma pali kololemolá. Aku-sipa na-kolo Pulu Yemone 'Nanga yomboma molangi.' nimba taltoramu yomboma 'Pali naa kolangi.' nimba 'Umbuna wale akuma nondopa pora nipili.' nimba, nimba panjerimu.

<sup>23</sup> "Kanu umbunama ombo pemba walemanga yombo marene ninguli: "Kanaa! Pulu Yemone "Olio nokopa kondomba ye se lipu mundumbu." u nimba taltoramu ye nokoli Karasimu ya ombo molemo." ningí molo "Nena ombo molemo." ningí kinia ononga unguma naa pilku, 'Sika nikimili.' ningu kuru naa mondangi! <sup>24</sup> Ye mare ongo kolo toko ninguli: "Pulu Yemone nimba taltoramu ye nokoli Karasimu na." ningí, molo kolo tokole "Pulu Yemone ungu-umbu tondomuma pilipuli ombo nimbu sikimulu." ningí. 'Yomboma pali, Pulu Yemone 'Nanga yomboma molangi.'

nimba taltorumu yombomane kepe peke tondopo, nikimulu mele ‘Sika.’ ningu kuru mondangi! ningu Pulu Yemone mindi ulu-tondolo manda selemoma mele manda manjiku ulu paa tondolo awisili senge. Aku-sipa na-koło Pulu Yemonga yomboma aku siku kondi tonge kinia ononga unguma naa pilku, siye kolonge.<sup>25</sup> Pe ulu akuma wendo ombá mele ‘Ono u piliangi.’ nimbu ya nimbu sikiru mele piliaa.

<sup>26-27</sup> “Wendo ombá mele nimbu sikiru, pilkimili, kene pe yombo sene nimbale: „Ye nokoli Karasimu, ne yombo naa peli kolea ku lielina molemo.” nimbá kinia ‘Kanamili.’ ningu akuna naa payo. Molo “I ulkamonga suluminiana molemo.” ningi liemu onone ‘Sika nikimili.’ ningu kuru naa mondangi! Muluna kariapá selemoma ena mundi wendo olemo koleana kepe ena pulimú koleana kepe kariapá selemoma waltikele kanolemele, aku sipa Mania Om̄ba Mana-Ye Au Lierimu Yemo ‘kelepa, mania ombá kinia koleamanga pali yombomane yu waltikele kanonge aku kene “Ya molemo ongo kanaa.” ningi kinia, molo “Ne molemo pungu kano-paa.” ningi kinia, ononga unguma naa piliangi.<sup>28</sup> Méle kololi se lemó koleana kerama ongo maku tolemele kanumu.

24:29-31

*Mania Om̄ba Mana-Ye Au Lierimu Ye Yesusi Kelepa Wale Talo-Sipa Ombámonga  
Ungu Se 24:1-42 pali*

<sup>29</sup> “Kanu walemanga aku mindili nonge nikiru uluma wendo ombá kinia pe sumbi sipa „ulu lupa lupa mare wendo ombála. Akuma i-sipa: „Kolea tangombando ena pa selemoma mele

naa sepa, simbulu topa,  
oli ipulieli pa selemoma mele naa sepa,  
kombokandima muluna mania om̄ba,  
muluna gilimú méle tondoloma

lope-lope sepa anju yando pumba,  
aku sipa ulu lupa lupama wendo ombá.”

<sup>30</sup> Kanu uluma wendo ombá kinia Mania Om̄ba Mana-Ye Au Lierimu Yemo kamu ombá sembá mele lipa ora simba mélse muluna gilimba kinia ‘kanokole, koleamanga pali yombomane paa kola awili-seko senge. Pe kanoko molangi Mania Om̄ba Mana-Ye Au Lierimu Yemo tondolo púlimu kinia, pa awili-sepa sélimu kinia, kupa senga sukundu molopa kamu mania ombá yombomane kanonge.<sup>31</sup> Kanu-kinia bikollo ungu paa tondolo sepa nipili yuni yunga angelloma lipa mundumba kinia ono winju mendo anju yando mulu ‘ma koleamanga, pali pungu Pulu Yemone ‘Nanga yomboma molangi.’ nimba u nimba taltorumu yomboma sukundu sukundu lingí.

24:32-35

*Unju Pikima Selemoma Mele Kanopole Ungu-Pulu Se Pilielemolo Mele Ungu Se 24:1-42  
pali*

<sup>32</sup> “Unju pikimuni selemoma mele pelemo kene pilkuli ungu-pulumu piliaa. Unju piki kolamanga kirikiri sepa gomo tolemo kinia kanokole ‘Kiniá ena sembá walemo wendo ombá sekemo lémo.’ ningu pilielemene.<sup>33</sup> Aku sipala, i ulu “Wendo ombá.” nikiruma sika wendo ombá kinia kanokole ningimuni ‘Yu paa sika nondopa ombá sekemo. Yu paa kamu okomo.’ ningu pilingí.<sup>34</sup> Nane onondo paa sika nimbu sikirumu: “Kiniá molemele yomboma u naa kolangi i “Wendo ombá.” nikiru uluma pali wendo ombá.<sup>35</sup> Mulú matolo kinia pora nimbá-na-koło nanga ungu niliuma paa pora naa nimbá. ‘Niliu mele pali paa sika wendo ombá..’” nikiru.” ‘nirimu..’

24:36-44

*Ulu Umbunama Kinia Pulu Yemonga Malo Kinia Wendo Onge Walemo Yombomane  
Naa Pilielememonga Ungu Se 24:1 pulu polko kanou*

<sup>36</sup> „Mania Om̄ba Mana-Ye Au Lierimu Yemo paa sika ombá, na-kolo yu ombá walemo naa pilielemolo. Ipulieli ombáne, tangoli ombáne naa pilielemolo. Mulu-koleana angelloma kepe naa pilielemelela. Pulu Yemonga Malo kepe naala pilielemo. Tata yuyu mindi ‚aku walemo, pilipa molemo.’ „nirimu..”

<sup>37</sup> “U ye Noa molopili yombomane seringi mele Mania Om̄ba Mana-Ye Au Lierimu Yemo ombá sembá kinia yombomane aku siku sengela. <sup>38</sup> ‚Ma-koleamanga pali, no u naa topili yomboma kere-langì nongo, yema ambo liku, amboma ye pungu, aku uluma mindi seko mololko puringi. Noa nona andoli sipi ulkamonga sukundu purumu kinia kepe ono aku uluma mindi we seko moloringi. <sup>39</sup> Ono ‚Noanga ungumu, naa pilku aku siku uluma mindi seko molangi no topa ‚koleama pali none aki topa, yomboma pali topa kondorumu. Pe Mania Om̄ba Mana-Ye Au Lierimu Yemo kelepa ombá walemonga u Noa molopili seko moloringi nikiru mele aku siku seko molongela. <sup>40</sup> Yu ombá walemonga ye talo kondena unju toko gilingili kinia ‚Pulu Yemonga angello sene om̄ba, ye se we molopili mundupa kelepa se lipa memba pumbá. <sup>41</sup> Ambo talo kere-langì kalongele seko molongele kinia ‚angello se om̄ba, ambo se we molopili mundupa kelepa se lipa memba pumbá.

<sup>42</sup> “Akumunga ononga Ye-Awilimu ombá walemo paa naa pilielemel kene ‘Yu ombá.’ ningu kanoko molaa.” „nirimu..”

24:43—25:30

### *Pe Ulu Wendo Ombámanga Ungu-Iku Pokore 24:1 pulu polko kanou*

<sup>43</sup> “Ono i ungumu konopu kimbu siku piliayo: Ulka pulu ye sene ipulieli wa noli ye sene yunga ulkamo om̄ba bultupa mélema wa limba mele pilkanje ‘Wa noli yemo ombá.’ nimba nokopa molka kinia wa noli yemo yu manda sukundu naa olka. <sup>44</sup> Aku siku ono nokoko molaa. Mania Om̄ba Mana-Ye Au Lierimu Yemo ombá enamo naa pilielemel kene ‘Yu sika ombá.’ ningu aku siku nokoko molangi.” „nirimu..”

Se 24:45-51

### *Kendemande-Yomboma Nokondolemo, Kendemande-Yombomonga Ye-Awilimu Kelepa Ombale Kendemande, Yombomo-Kinia Semba Mele Ungu-Ikumu 24:1—25:30 pali kananî*

<sup>45</sup> “Akumunga ungu se niembo:” Kongono sendeli kendemande-ye nawene kongono sepa kondondolemo kinia kanopale yunga ye awilimuni ‘Yuni kongono siliuma sumbi sipa selemomonga yu kongono simbú kinia sepa kondombamonga na kelepo konopu kimbu sipu naa molombo.’ nilimúye? Kendemande-ye se aku sipa mele sepa kondopa molemomo kanopale yunga ye awilimuni yu nimba taltopa yundu nimbale: “Kongono sendeli kendemande-yomboma pali nokondoko ononga kere-langì nongema ena wa siliumunga ono nangi moke seko sieni, nokondoko molou.” nimba ‚yu senga pulimú..” <sup>46</sup> Pe ye awilimuni kongono simumu kanu kongono sendeli kendemande-yemone mimi sipa sendepa molopili ye awilimu kelepa omu liemu kendemande-yemo yu konopu sipili. <sup>47</sup> Nane onondo paa sika nimbu sikirumu: “Kanu ye awilimuni kanu kendemande-yemondo “Nanga méle taltolioma pali nuni nokondou.” nimba.” nikiru.

<sup>48-49</sup> Aku-sipa na-kolo, ye awilimuni kanu kendemande-yemondo nimbale: “Nanga kendemande-yomboma pali nokondou.” nimba senga pulimú kinia, kanu kendemande-yemone sepa kinjipa “Nanga ye-awilimu welea naa ombá.” konopu lepale yuni nokondolemo kendemande-yomboma kopene topa, no nongo amu toli yema kinia kere-langì nomba no tondoloma nombale, aku sipa sepa kinjipa molomu liemu <sup>50</sup> walte kanu kendemande-yemo ‘Yunga ye awilimu ombá.’ nimba naa pilipa ‚kongono sirimu mele naa sepa, walu sepa kinjipa molomba kinia ombá. <sup>51</sup> Om̄ba ‚kanu yemo sepa molomba mele kanopale, yu paa kopene topa kondopale, kolo tolemele yombo topele-mapele toli yomboma ‚kolea-kiri, molemelena ‘Pupili.’ nimba

lipa mundumba. Kanu koleana yomboma paa mindili nongo kola seko pereko molonge.” „nirimu..”

## 25

*Se: 25:1-13*

*Ambo-Wenepo Rureponga Talone Seringimunga Ungu-Ikumu ,24:43—25:30 pali kananis*

<sup>1</sup> „Aku nimbale nirimumuni, Yesusini yuyu kelepa ombá mele ungu mare pea nimba nimbale:”

“Mania Om̄ba Mana-Ye Au Lierimu Yemo kelepa wale talo sipa mana mania om̄ba kinia, Pulu Yemo ye nokoli kingimu molopa yomboma nokomba akumu i-sipa mele:

“Ye se ambo limba uluma yomboma pea sengendo kanu yomboma maku toko moloringina yemo om̄ba serimu kinia pilkuli ‘Ipulieli om̄ba.’ ningu ambo-wenepo rureponga talo ononga sepe-llamema liku “Yu aulkana limulú.” ningu puringi. <sup>2</sup> Kanu ambo-wenepomanga se-pakara konopu naa pepili aroma toko moloringi; se-pakara pilipa kondoli pepili moloringi. <sup>3</sup> Konopu naa pepili aroma toko moloringi ambo-wenepomane ononga sepe-llamema mengo puringi-na-kolo llame karasene pea naa mengo puringi. <sup>4</sup> Aku-na-kolo pilipa kondoli pepili moloringimane karasene kinia ononga sepe-llamema kinia mengo puringi. <sup>5</sup> Ambo limba yemo welea naa orumukulu ambo-wenepoma pali uru orumu-na uru peringi.

<sup>6</sup> Kanu-kinia awi-amburumi ungu se wendo om̄ba nimbale: “Ambo limba yemo okomo kanayo! Aulkana liengi waa!” nirimu.

<sup>7</sup> Kanu-kinia ambo-wenepoma ola gilku sepe-llame ‘Awili-sepa nopili.’ ningu seko mimi seringi. <sup>8</sup> Konopu naa pepili moloringi ambo-wenepomane pilipa kondoli pepili moloringi ambo-wenepomando ninguli: “Olionga sepe-llamema kumbulkumu kene ononga karasene mare olio liku munduku siee.” niringi kinia

<sup>9</sup> pilipa kondoli pepili moloringi ambo-wenepomane pundu toko ninguli: “Karasene ono kinia olio kinia manda naa sembanje. Ono sitoana pungu ononga topo toko lipaa.” niringi.

<sup>10</sup> Kanu-kinia sitoana topo toko lingíndu puringi kinia ambo limba yemo orumu. Kanu-kinia ye ambo limbamonga kere-langì akuna nongendo maku toringi yomboma, pilipa kondoli pepili moloringi wenepoma pea ulkana suku puringi. Kanu-kinia ulka kuna toko ingi siku kere-langì nongo moloringi.

<sup>11</sup> Pe kere-langì nongo molangi ambo-wenepo sitoana puringima ongo ninguli: “Ye-Awilimu, Ye-Awilimu, olionga kuna ongo lindei.” niringi.

<sup>12</sup> Aku-sipa na-kolo yuni onondo pundu topa nimbale:  
“Nane onondo paa sika nimbu sikirumu: Na ononga imbima naa pilkiru. „Ultukundu molemelema manda sukundu naa onge..” nirimu.” „nimba Yesusini nirimu..”

<sup>13</sup> „Aku nimbale yuni kelepa nimbale:” “Aku sipa sembá kene Mania Om̄ba Mana-Ye Au Lierimu Yemo kelepa om̄ba walemo kepe ono naa pilku, orili-u om̄báne tangoli om̄báne, ipulieli om̄báne, naa pilielemele kene yu om̄ba nokoko kondoko molaa.” „nirimu..”

*Se: 25:14-30*

*Ye Awili Sene Yunga Kendemande-Yema Kou Mare Sipale Senga Purumu Ungu-Ikumu ,24:43—25:30 pali*

<sup>14</sup> „Nimbale Yesusini ungu-iku se pea topa nimbale:”

“Pulu Yemone ye nokoli kingimu molopa yomboma nokolemo akumu, i-sipa melela:

“Ye se kolea senga pumba molombando yunga kendemande-yema “Waa.” nimba yunga mélema “Nokondaa.” nimbale nirimumuni, <sup>15</sup> onone kongono selemele mele pilipa apurupa yunga mélema ono moke sepale ye se kou paip tausini kina mele sipa,

se kou tu tausini kina mele sipa, se wane tausini kina mele sirimu. Aku sepale yu purumu.

<sup>16</sup> Ye paip tausini kina liltimumu sumbi sipa pumba kanu koumuni bisinisi sepale nirimumuni, kou paip tausini kina olandopa pumba liltimu. <sup>17</sup> Aku sipala ye tu tausini kina liltimumu olandopa tu tausini kina pumba liltimu. <sup>18</sup> Aku-sipa na-kolo wane tausini kina liltimumu pumba 'Lopi sambo.' nimba yuni mana muru akupa yunga nokoli yemonga koumu lowaya serimu.

<sup>19</sup> Kanu-kinia wale awisili omiba purumu kinia kanu kendemande-yemanga nokoli yemo omiba onondo nimbale: "Kouma ono serigi mele kanambo liku ora siee." nirimu.

<sup>20</sup> Kanu-kinia paip tausini kina liltimu yemone paip tausini kina olandopa pumba liltimumu memba omiba nimbale: "Ye-Awilimu, nuni na paip tausini kina sirinu kanumu. Nane paip tausini kina olandopa pumbu liltindumu i ambolkoro kanou." nirimu.

<sup>21</sup> Nokoli yemone yundu nimbale: "Kendemande-ye peangamo, paa papu serinu. Kongono kanga-kolte mele sirindumu nuni seko kondorunumunga "Nuni nanga méle awisili nokondou." nimbú kene nu ongo na kinia pea kopu sepo konopu sipu molambili ou." nirimu.

<sup>22</sup> Ye tu tausini kina liltimu yemo yu kepe omiba nimbale: "Ye-Awilimu, nuni na tu tausini kina sirinu kanumu. Nane tu tausini kina olandopa pumbu liltindumu i ambolkoro kanou." nirimu.

<sup>23</sup> Yunga nokólimuni yundu nimbale: "Kendemande-ye peangamo, paa papu serinu. Kongono kanga-kolte mele sirindumu nuni seko kondorunumunga nanga méle awisili "Nu nokondou." nimbú kene nu ongo na kinia pea kopu sepo konopu sipu molambili ou." nirimu.

<sup>24</sup> Kanu-kinia wane tausini kina liltimu yemo kepe omiba nimbale: "Ye-Awilimu, nane pilipuli, 'Nu bisinisi tondolo munduku seko 'Kou-mone lipu taltombomonga yomboma mindili nongi liemu mandala.' ningu ,kendemande-yomboma 'Kongono kála seko sangi.' ningu siku, ono méle koltalo siku mélema pali nunu mindi lilinu yemo; kalia yombomane panjindilimili kinia nu nunu kere-langí mélema we akuku liku; rasi-witimunga kilu kinia mongotolo yombo wemane kilu toko apurundulimili kinia nu nunu rasi-witi mongo we lilinu mele.' na pilierindu. <sup>25</sup> ,Aku siku selenomonga, nane nu pipili kolopole na pumbu nunga kou na sirinumu mana lowaya serindu. Kanu koumu i ambolkoro kanuyo. I nunga koumu nunu sikiru li." nirimu.

<sup>26</sup> Aku nirimu kinia pilipale nokoli yemone yundu pundu topa nimbale: "Seko kinjeli kendemande-ye kirimu, nuni pilkuli, 'Kalia yombomane panjindilimili akuna na nanu kere-langí mélema we akupu lipu; rasi-witimunga kilu kinia mongotolo yombo lupamane apurundulimili kinia na nanu rasi-witi we liu.' ningu pilierinu lémo. <sup>27</sup> Aku siku pilkuli nanga kou-monemo kou-benge ulkana taltolenanje papu. Aku selenanje na ombo nanga koumu wendo lipuli kou kanga-kolte ola panjiku silimolá lilkala." ,nirimu.,

<sup>28</sup> ,Kanu kendemande-yemondo aku sipa nimba pora sipale yuni we-kendemande-yemando nimbale: "I yemo sepa kinjerimu kene yunga koumu wendo likuli tene tausini kina ambolkomo yemo siee." ,nirimu.,

<sup>29</sup> "Mélema taltolemo yombomo nane mare pea simbú, yu paa awisili taltomba. Aku-sipa na-kolo mélema naa taltolemo yombomo yu taltolemoma kepe wendo limbu kene aku siku sekole, <sup>30</sup> kendemande-ye kirimu simbulu tolina liku paka toko pena mundayo. Akuna yomboma paa mindili nongole kola seko perekò molonge." nirimu." nimba Yesusini nirimu..

*Mania Om̄ba Mana-Ye Au Lierimu Ye Yesusini Yomboma Pali Kote Sendepa Pilimbamonga Semane Se 24:1 pulu polko kanow*

<sup>31</sup> „Aku nimbale yu pe kelepa om̄ba sembá mele nimba nimbale:„

“Mania Om̄ba Mana-Ye Au Lierimu Yemo yunga tondolo pa sélimu kinia ombale nimbámone, yunga mulu-koleana angelloma kinia pali onge kinia tondolo pa selina suku ye nokoli kingi polomo lembana yu molomba. <sup>32</sup> Yunga kumbikerena ma-koleana yomboma pali liku maku tondonge. Kanu-kinia kongi tapu seli ye sene yunga kongima apurupale kongi sipisipima lupa lipa mundupa, kongi memema lupa lipa mundulimú mele aku sipa Ye Nokoli Kingimuni yombo maku toko molongema apurupale nimbámone, <sup>33</sup> yombo kongi sipisipi mele molongema yunga ki-lomekondo lipa mundupa, kongi memema mele molongema yunga ki-tarokondo lipa mundumba.

<sup>34-36</sup> Aku sepale, yuni yunga ki-lomekondo molonge yombomando nimbale: “Na gelene kolorundu kinia onone na kere-langı siringi. Na no nonowalene kolorundu kinia onone no kolko siringi. Na aulka ponenge orundu kinia onone na “Pea molamili ou.” niringi. Na pulua wambale naa panjipu we-we andorundu kinia mulu-maminia se siringi. Na kuru torumu kinia nokoringi. Na ka-ulcana perindu kinia ongo kanoringi. Tatane ‘Ono molko kondangi.’ nirimu-na konopu peanga pepili molemele yomboma, onone ulu akuma na-kinia seringi kene, ya ongo, u mulu matolo naa liepili Tatane yu nokomba koleana ono pea ‘Kopu sepo molomolo.’ nimba, nimba panjerimu koleana sukundu waa.” nimbá.

<sup>37</sup> Aku sipa nimbá kinia pilkuli sumbi nili yombomane pundu toko yundu ninguli: “Ye-Awilimu, sewale nu gelene kolorunu kinia kanopole nu kere-langı sirimuluye? Sewale nu no nonowalene kolorunu kinia kanopole nu no kolopo sirimuluye? <sup>38</sup> Nu ye-ponengemo sena molorunu kinia kanopole “Ulka sukundu molamili ou.” sirimuluye? Mulu-maminia naa pakoko we-we andorunu kinia kepe nu sena kanopole mulu-maminia sirimuluye? <sup>39</sup> Nu kuru torumu kinia kepe, ka-ulcana perinu kinia kepe, sewale ombo kanorumuluye?” ningí.

<sup>40</sup> „Aku siku ningí kinia, Ye Nokoli Kingimuni onondo pundu topa nimbale: “Nane onondo paa sika nimbu sikirumu: “I nikiru mele i nanga genupili imbi naa mololi se kepe liku tapondoringi akumu na liku tapondoringi.” nikiru.” nimbá.

<sup>41-43</sup> Kanu-kinia yunga ki-tarokondo molonge yombomando nimbale: “Pulu Yemone ‘Ono molko kinjangi!’ nilimú yomboma, na gelene kolorundu kinia onone na kere-langı se naa siringi. Na no nonowalene kolorundu kinia onone na ‘no nambo.’ ningi kolko naa siringi. Na aulka ponengemo orundu kinia na “Pea molamili ou.” naa niringi. Na mulu-maminia se naa pakopo we-we andorundu kinia na mulu-maminia se naa siringi. Na kuru torumu kinia na naa nokoringi. Na ka-ulcana perindu kinia na naa ongo kanoringi. „Onone na aku siku naa liku tapondoringi, kene ono nanga kumbikerena naa ongo anju pungu, „kurumanga nokoli, depelemo kinia yunga angelloma kinia ononga sepe we nomba pepa mindi pulimú pumbá sepe kalondorundu akuna anju paa.” nimbá.

<sup>44</sup> Aku sipa nimbá kinia pilkuli kanu yombomane kepe pundu toko ninguli: “Ye-Awilimu, nu gelene kolorunu kinia kepe, no nonowalene kolorunu kinia kepe, nu ponenge leko orunu kinia kepe, we-we andorunu kinia kepe, kuru torumu kinia kepe, ka-ulcana perinu kinia kepe, olione nu aku siku molorunu kinia sewale kanopole nu naa lipu tapondorumuluye?” ningí.

<sup>45</sup> „Aku siku ningí kinia, yuni onondo pundu topa nimbale: “Nane onondo paa sika nimbu sikirumu: “Onone i nanga genupili yombomanga imbi naa mololi se naa liku tapondoringi aku kinia na naala liku tapondoringi.” nikiru.” nimbá.

<sup>46</sup> “Kanu-kinia kanu ,seko kinjilimili, yomboma pungu kamu alieli-alieli molko kinjiku mindi puli koleana pungí, aku-na-kolo sumbi nili yomboma pungu kamu alieli-alieli molko kondoko mindi puli koleana pungí.” ,nimba Yesusini, nirimu.

*Kolomongo-Awili 26-28*

## **Yesusi Mindili Nomba Kolopa, Kelepa Lomboropa Ola Molorumu Semanemo**

### **26**

**26:1-5**

#### *Yesusi Tongendo Langi Niringi Semanemo*

<sup>1</sup> Yesusini ,yu pe yando ombá mele, ungu akuma nimba pora sipale yunga lombili andolimando nimbale: <sup>2</sup> “Ono pilkimili, wale talo we om̄ba pumbá kinia Pulu Yemone olionga anda-kolepalima Naa Topa We Om̄ba Purumu Mele Pilielemolo Walemo wendo ombá. Aku walemo wendo ombá kinia Mania Om̄ba Mana-Ye Au Lierimu Yemo “Kolopili unju-perana ola uku toko panjangi.” ningu liku anju singí.” nirimu.

<sup>3</sup> Yesusini aku sipa nirimu walemonga Pulu Yemo popo tondoringi ye awilima kinia, Juda yomboma nokoringi tapu-yema kinia, ono Pulu Yemo popo tondoringi ye awili olandopa ‘Kayapasi’ nili ye akumunga ulkana pungu liku maku tokole niringimuni, <sup>4</sup> Yesusi kiyongo ningu ka siku tongendo langi ningu moloringi. <sup>5</sup> Ningu molko ninguli: “,Nondopo tamili,, aku-na-kolo Pulu Yemone olionga anda-kolepalima Naa Topa We Om̄ba Purumu Mele Pilielemolo Walemanga , ‘uluma sepo molamili.’ ningu, yombo awisili ya Jerusalleme ongo maku toko molongemonga yu iseli-u topo kondomolo kinia onone olio-kinia mumindili kolko opa senge kene iseli-u naa topo, keleamili.” niringi.

**26:6-13**

#### *Ambo Sene Yesusinga Pengena Wambola Ondondorumu Semanemo*

<sup>6</sup> Kolea-kanga Betani ye se u kuru laká nombale kelierimu ye se, imbi leko “Ye Kuru Laká Noli Saimono” niringi kanumunga ulkana Yesusi molopili <sup>7</sup> ambo se wambola mingi paa peanga se yu molorumuna memba orumu. Kanu wambola paa muna tolimumga kou-mone paa awili sepa purumu. Akumu memba ombale Yesusi kere-langi noli polo molorumuna memba om̄ba , ‘Yu sepo kondambo.’ nimba, pengena ondondorumu. <sup>8</sup> Yuni aku serimu kinia kanokole Yesusi lombili andolima konopu kiri panjiku ninguli: “Aku wambolamo nambi semu-na we seko kinjikinuye? <sup>9</sup> Aku wambolamo kou-mone limolánje kou awisili lipuli yombo koropama moke sepo silimolá.” niringi.

<sup>10</sup> ,Onone ambomondo, aku siku ,niringi, pilipa Yesusini onondo nimbale: “I ambomo-kinia nambi semu-na ungu awisili nikimiliye? Yuni na-kinia ungu peanga se semu. <sup>11</sup> Yombo koropama ono-kinia alieli molonge-na-kolo na ono-kinia alieli naa molombo. <sup>12</sup> Na kolombo kinia óno sengemonga yuni i wambola muna tolimu nanga kangina ondondomu. <sup>13</sup> Nane onondo paa sika nimbu sikirumu: “Ma-koleamanga pali i ,nanga, semane peangamo andoko toko singí kinia i ambomone kiniá semu semanemo kepe ‘Yombomane pilkuli ‘Yuni sepa kondorumu.’ ningu piliangi.’ ninguli aku semanemo toko singíla.” nikiru.” nirimu.

**26:14-16**

#### *Judasini Yesusi Yunga Opa-Touma “Lipu Simbu.” Nimba, Nimba Panjerimu Semanemo*

<sup>14</sup> Kanu walemonga Yesusi yu lombili andoli ye rurepo akumanga ye se, yunga imbimu Judasi Isikeriote, Pulu Yemo popo tondoringi ye awilima moloringina pumba, <sup>15</sup> ono manglipa pilipa nimbale: “Nane ono Yesusi ambolko ka singí aulka se lipu ora

sindu liemu onone na „kou, nambi seko singíye?” nirimu. „Aku nirimu kinia pilkuli, onone kou-sillipa mongo wane-paono-tene kambu toko yu siringi. <sup>16</sup> Kanu-kinia yu kelepa yando ombale Yesusi lipa ono simba aulka se koropa molorumu.

**26:17-25**

### *Yesusi Lombili Andolima Kinia Pea Kamu Kere-Langi Noringi Semanemo*

<sup>17</sup> Pellawa Akoli Mele Isimu Naa Munduku Pellawa We Kalko Noringi Koromonga pulu-pulu walemo wendo orumu kinia „Juda yombomane Pulu Yemone u ononga anda-kolepalima Naa Topa We Ombo Purumu mele pilingindu kongi sipisipi walo se toko nonge mele pilkuli niringimuni, Yesusi lombili andoli yema yu molorumuna ongo mangilku pilku ninguli: “Pulu Yemone olianga anda-kolepalima Naa Topa We Ombo Purumu mele pilimulúndu kongi sipisipi walo se kiniá nonimu kolea sena pumbu sepo wamo-pamili konopu lekenoye?” nirangi.

<sup>18</sup> „Aku siku nengu mangilieringi kinia, Yesusini, ye se molomba mele ono lipa ora sipa, nimbale: “Ne kolea-awili „Jerusalleme, sukundu punguli, ne ye akumu molombana pungu yundu i-siku niengi: “Ungu Mane Síli Yemone i-sipa nimu: “Na-kinia ulu se wendo ombá walemo nondopa wendo ombá sekemo. Nungaulkana sukundu na kinia na lombili andolima kinia olio Pulu Yemone olianga anda-kolepalima Naa Topa We Ombo Purumu mele pilimulúndu kongi sipisipi walomo nomolo.” nimu.” niengi.” nirimu.

<sup>19</sup> Kanu-kinia lombili andolima pungu Yesusini nirimu mele se-punguli niringimuni, Pulu Yemone ononga anda-kolepalima Naa Topa We Ombo Purumu mele pilingí kongi sipisipi walo nongemo seko wamoko taltoringi.

<sup>20</sup> Kanu-kinia, ipupini ena pumba kala torumu kinia Yesusi kinia lombili andoli ye rurepo kinia „ongo, kere-langì noli polona moloringi. <sup>21</sup> Kere-langì nongo moloringi kinia Yesusini nimbale: “Nane onondo paa sika nimbu sikiru: “Ononga ye sene na lipa nanga opa-touma simba.” nikiru.” nirimu.

<sup>22</sup> „Aku nirimu kinia pilkuli, ononga konopumanga umbuna awili-sepa serimu pilkuli yu-mele-mele mangilku ninguli: “Ye-Awilimu, nando nikinuye?” nirangi.

<sup>23</sup> Yesusini pundu topa nimbale: “„Ono nanga ye rureponga, ye se na-kinia kere-langima polo awi-suku-singina ola lemó se waltikele lipu nombolo yemone na lipa, opa-touma anju simba. <sup>24</sup> Kiniá Mania Ombo Mana-Ye Au Lierimu Yemo-kinia senge mele koronga-u nengu panjeringi semanemo „Pulu Yemonga, bokuna molemo mele sika opa-toumane senge, aku-na-kolo yu lipa opa-touma simba yemo mindili nomba paa molopa kinjimba. Yu molopa kinjimbamonga ye akumu anumuni naa melkanje papu. Yu mindili naa nolka.” nirimu.

<sup>25</sup> Yesusini aku sipa nirimu pilipale Judasi, yu lipa anju simba serimu yemo, yuni yundu nimbale: “Rapai, nikinu yemo na mólonje?” nimba mangilierimu kinia Yesusini yundu “Sika, nu.” nirimu.

**26:26-30**

### *Yesusi Yu Kolorumu Mele ‘Pe Pilku Molangi.’ Nimba Kere-Langi Sirimu Noringi Semanemo*

<sup>26</sup> Ono kere-langì nongo molangi Yesusini berete se lipa Pulu Yemo-kinia “Ange.” nimba ambolopa peke lepa yu lombili andolima sipa nimbale: “Imu nanga kangimu ono liku nangi.” nirimu.

<sup>27</sup> Pe no-waene-kapo se lipale Pulu Yemo-kinia “Ange.” nimba ono sipa nimbale: “I no-waenemo, ono pali liku nangi. <sup>28</sup> I „no-waene, sikirumu nanga mememo. Pulu Yemone „yu kinia yunga yomboma kinia molonge mele, ungu se nimba panjipa mi lierimu kanu ungumu ‘Kamu wendo ombo pepili.’ nimbu ‘Yombo awisilinga ulupulu-kirima kamu mania pupili. Pulu Yemone kelepa naa kanopa, siye kolopili.’ nimbu nanga mememo ondondopole „kolombo, aku mememo imu. Akumu ono pali

liku nangi.<sup>29</sup> Nane onondo i-sipu nimbu sikirumu: "Iseli-u na no-waene kelepo paa naa nombó. Pe mindi, Pulu Yemo ye nokoli kingimu molopa nokolemo koleana onokinia no-waene kondemo kelepo nombó." nirimu.

<sup>30</sup> „Kere-langi nongo pora sikuli, ono Pulu Yemonga konane se ninguli, pena pungu Ma-Pangi Unju Ollipi Kaliana ola puringi.

26:31-35

*Pitane Yesusi "Naa Kanolio." Nimba Mele Yesusini Yu U Nimba Sirimu Semanemo*

<sup>31</sup> Kanu-kinia Yesusini yu lombili andolimando nimbale: "Paa kiniá ipulieli 'opatoumane, na-kinia senge ulumu kanokole onone pali na munduku kelenge. 'Aku siku senge mele, Pulu Yemone u nirimu yunga bokuna molemo kanumu. Pulu Yemone 'ungu-iku se topa, nimbale:

" "Kongi sipisipi tapu-yemo tangi." nimbú,

yu tongue kinia sipisipima bulu-balu ningí."

nirimu, 'aku mele kiniá wendo ombá'.<sup>32</sup> Iseli-u na toko kondonge kinia ono sika bulu-balu ningí,-na-kolo na lomboropo ola molopole nimbúmuni, na kumbi lepo kolea Gallillindu pumbú, 'ono pe akileko akuna onge kinia kelepo pea molomolo.' nirimu.

<sup>33</sup> Yesusini aku sipa nirimu kinia pilipa, Pitane nimbale: "Nu-kinia ulu se wendo ombámonga kanokole onone pali 'Nu sika.' ningu kuru mondolemele mele mania pumbá kinia nu aku siku munduku keliengi liemu nane nu paa mundupu naa kelembro, paa mólo." nirimu.

<sup>34</sup> Yesusini pundu topa nimbale: "Nane nu paa sika nimbu sikirumu: "Paa kiniá ipulieli, kera gulta u ko naa topili nuni 'pipili kolcole, wale yopoko nando kolo toko 'Yu nawe? Na naa kanolio." nini." nirimu.

<sup>35</sup> Aku-na-kolo Pitane yundu nimbale: "Na nu-kinia kopu selembolomonga olto pea "Topo kondomolo." ningi liemu kepe nu "Naa kanolio." paa naa nimbú." nirimu. Lombili andoli ye wemané pali " "Nu naa kanolemolo." paa naa nimulú." niringila.

26:36-46

*Kolea Gesemani Yesusini Pulu Yemo Kinia Ungu Nimba Mawa Serimu Mele Semanemo*

<sup>36</sup> Kanu-kinia Yesusi kinia yu lombili andoli yema kinia kolea 'Gesemani' nilina puringi. 'Akuna puringi, kinia yuni onondo nimbale: "Na anju pumbu Pulu Yemo kinia ungu ni-pukuru kene ono ya molaa." nirimu.<sup>37</sup> Aku nimbale Pita kinia Seperi malo 'Jemisi kinia Jonotolo, pea lipa memba pumbale, 'Na seko kinjingí ulumu paa nondopa wendo ombá sekemo.' nimba pilipale, yu yuyu kondo kolopa konopu kiri panjipa kameléna mindili sepili molorumu.<sup>38</sup> Yuni onondo nimbale: "Nanga konopuna umbuna paa awili se sepomo kene na kolombo none sekemo. Ono uru naa peko na-kinia pea kopu sepo nokopo kondopo molamili, ono ya we mimi siku kanoko molaa." nirimu.

<sup>39</sup> 'Aku nimbale, yu yuyu kanga-kolte anju pumba komorongo langopa tamalu pepa Pulu Yemo-kinia ungu nimba mawa sepa nimbale: "Nanga Tata, na nondopo 'mindili noli, no-mingina no nombómo 'Naa nambo.' nini aulka se lemó liemu paa papu na-kolo 'Nane sepole nanu konopu simbú.' konopu lekero mele naa sambo. Nuni kanoko peanga piliení ulumu mindi sambo." nirimu.

<sup>40</sup> Aku nimbale kelepa yunga lombili andoli ye yopoko moloringina yando ombo ono uru peringi kanopa Pitando nimbale: "Ono uru naa peko na-kinia ena kanga-kolte manda

we kanoko kondoko naa molemoláye?<sup>41</sup> 'Kurumanga nokoli Setenene, olio kondi tomba kinia sepo kinjimulú kene.' ninguli 'uru naa peko, Pulu Yemo-kinia ungu ningu kanoko kondoko molaa. Sika 'sepo kondamili.' nimbu konopumane pilielemolo-na-kolo semolondo kangimu siye sepa tondolo naa pulimú." nirimu.

<sup>42</sup> Aku sipa nimbale yu kelepa anju pumba u Pulu Yemo-kinia ungu nimba mawa serimu mele kelepa nimbale: "Nanga Tata, na 'Mindili noli, no-mingina nomo nani.' nirinu nomo naa nombó kinia we pemba liemu nuni 'Wendo opili.' konopu leno mele na-kinia wendo opili." nirimu.

<sup>43</sup> Kelepa yando orumu kinia ono uru orumu-kulu kelko uru peringi kanopale <sup>44</sup> yu kelepa wale yopoko-sipa anju pumba Pulu Yemo-kinia ungu u nimba mawa serimu mele kelepala nirimu.

<sup>45</sup> Kelepa yando ombo lombili andolimando nimbale: "Nambi semu-na we uru peko mulu pilku molemeleye? Kaname! Yemone Mania Ombo Mana-Ye Au Lierimu Yemo 'toko kondonge, ulu-pulu-kiri selemene yema lipa simba enamo wendo ombá sekemo.

<sup>46</sup> Ola gilku pamili wame! Na lipa anju simba yemo okomo kanaa!" nirimu.

26:47-56

### *Yesusi Ka Siringi Semanemo*

<sup>47</sup> Yesusini ,kolea Gesemanu yu lombili andolimando ,aku nimba molopili yu lombili andoli rurepo akumanga ye Judasi orumu. Pulu Yemo popo tondoringi ye awilima kinia, Juda yombomanga tapu-yema kinia, kanu yemane liku mundoringi ye awisili, yombo toli lu-pultama kinia kopema kinia mengo, Judasi kinia oringi. <sup>48</sup> U Yesusi molorumuna naa wangsi Yesusi Juda ye awilima lipa simba nimba panjerimu ye ,Judasini, ono Yesusi yu ipulieli manda kanonge mele nimba sipa nimbale: "Nane ye se kanopole kangulumbu akumu Yesusi. Yu ambolko ka siee." nirimu. <sup>49</sup> ,Aku yema, oringi kinia ,Judasini, yu Yesusi molorumuna sumbi sipa ombale "Rapai, nu akuna gilienu lémo." nimba ombo yu kangulorumu.

<sup>50</sup> Aku serimu kinia Yesusini yundu nimbale: "Ano, nuni sení okono mele sumbi siku sei." nirimu.

Judasini Yesusi kinia serimu mele, kanokole oringi yemane yu liku ka siringi.

<sup>51</sup> Aku seringi kinia kanopale Yesusi pea kopu seko gilieringi ye sene yunga lu-koyamo kulu topa wendo lipa Pulu Yemo popo tondoringi ye awili olandopamonga kendemande-ye se topa yunga komu se topa laká lenderimu, aku komumu wendo orumu.

<sup>52</sup> ,Yuni aku serimu kinia kanopale, Yesusini yundu nimbale: "Nunga lu-koyamo kelko lakilí! Lu-koya liku yombo tonge yomboma lu-koyane toko kondongela, aku kene , 'Mólo.' nimbu lu-koyamane ulu se naa samili,. <sup>53</sup> Nane nanga Tata mangilipuli "Liku tapondou." nilkanje yuni angello ami talape rurepo, molo olandopa malapunga selu molo talo, popenge sepa na "Liku tapondangi paa." nimba lipa mundulka akumu nu naa pilkinuye? <sup>54</sup> Aku-sipa na-kolo ,angellomane ongo opa-toumane na 'naa tangi.' ningi liku tapondolemolánje, Pulu Yemonga bokuna na-kinia wendo ombá nimba molemo mele nambi sepa wendo olkaye?" nirimu.

<sup>55</sup> ,Aku nimbale, Yesusini ,yu ka singí oringi, ye awisili ongo moloringimando nimbale: "Na 'yombo topo wa noli yere molio.' konopu lekole na ka singíndu yombo toli lu-pultama kinia kopema kinia mengo okomeleye? Ulka-tembele ,kerepuluna we-yomboma maku toko molemele, koleana alieli ono pea molemolo kinia ungu-mane sипу molio kinia na liku ka naa silimili kanumu. <sup>56</sup> Aku-sipa na-kolo i-sipa wendo okomo ulumanga pali Pulu Yemone ungu-umbu tondorumuma pilku yomboma ningi siringi ye marene ulu mare ,na-kinia, pe wendo ombá mele u ningi bokuna toringi molemo mele kamu wendo okomo." nirimu.

Kanu-kinia yu lombili andolima pali , 'Olio pea ka singínje.' ningi pilkuli, yu munduku kelko ono talopa leko puringi.

26:57,59-68

### *Juda Ye Awilimane Onono Yesusinga Kote Pilku Yu Seko Kinjeringi Semanemo*

<sup>57</sup> Kanu-kinia Yesusi ka sikuli Pulu Yemo popo tondoringi ye awili olandopa Kayapasi molorumuna mengo puringi. Pulu Yemonga ungu-manemanga puluma pilku mane siringi yema kinia, Juda yombomanga tapu-yema kinia, onone , ‘Yesusi kote sendepo piliamili.’ ningu, akuna u ongo maku toko moloringi.

26:58,69-75

*Pitane Wale Yopoko Kolo Topa “Yesusi Yu Naa Kanolio.” Nirimu Semanemo*

<sup>58</sup> Aku-sipa na-kolo ,Yesusi mengo puringi kinia, Pita lombili akilepa taka lepa pumba, Pulu Yemo popo tondoringi ye awili olandopamongaulkana, ulka gilipa pala mele lipa makapu serimu, awi-suku-singina yombo maku toringi kolea we lierimuna paa sukundu pumba, ‘Yesusi nambi sengenje piliambo.’ nimba ,Yesusi nokoko moloringi, ele-yema kinia molorumu.

<sup>59</sup> Pulu Yemo popo tondoringi ye awilima kinia, Juda yombomanga kanjollo yema pali kinia, akumane Yesusi yu toko kondongendo ulu se sepa kinjerimu ulu se ‘Yombo sene ‘yu i-sipa i-sipa sepa kinjerimu.’ nimba kolo topa nipili.’ ningu yombo se koroko moloringi kinia <sup>60</sup> yombo awisili ongo ungu mare kolo toko niringi-na-kolo onone yu manda toko kondonge ungu se naa niringi.

Laye-kolte pe mele yombo talo ongo <sup>61</sup> ,kolo toko, ninguli: “I yemo i-sipa nirimu ,pilierimbulu,: “I Pulu Yemo ,popo toko kaloli, ulka-tembelemo nane topo sikisipuli wale yopoko ombo pupili ulka-tembele ,konde, se manda kolali sepo takombo.” nirimu. ,Yuni aku nirimumunga ‘Yu Pulu Yemo mele molio.’ konopu lepale aku nirimumu nimba kinjerimunje.,” niringili.

<sup>62</sup> Aku niringili pilipale Pulu Yemo popo tondoringi ye awili olandopamo ola gilipa Yesusi mangilipa nimbale: “Ungu se pundu toko naa nikinuye? Nu ,ningu kinjerinu mele, nikimbilimu nambolka ulumu ningu kinjerinumundu nikimbiliye?” nirimu.

<sup>63</sup> Aku-na-kolo Yesusi ungu se pundu topa naa nimba we gilierimu.

Pulu Yemo popo tondoringi ye awili olandopamone yundu kelepa nimbale: “,Nu moleno mele paa sika ningu sieni., Konde Molopa Mindi Puli Pulu Yemo pilipa molopili “Paa sika nikiru.” ningu mi lecole, Pulu Yemo yunga Malo, yuni olio “Nokopa kondomba ye se lipu mundumbu.” nimba, nimba taltorumu ye nokoli Karasimu sika nu molo móloye? Olio paa ningu si!” nirimu.

<sup>64</sup> Yesusini nimbale: “Akumu na.” ,nirimu,. “Ungu se pea onondo pali nikirula. Pe walte Mania Ombo Mana-Ye Au Lierimu Yemo, Ye Tondolo Olandopa Púlimu ,kinia mélema nokombando, yunga ki-lomekondo molopa, kupamanga ola molopa mania ombá ono kanonge.” nirimu.

<sup>65</sup> Aku sipa nirimumunga , ‘Yu Pulu Yemo mele molio.’ nimba nirimu-kulu, pilipale Pulu Yemo popo tondoringi ye awili olandopamone ,paa pilipa kiri pilipa, yunga wale-pakolimu yuyu ambolopa sungu sipa nimbale: “Kiniá yu yuyu paa sika Pulu Yemo ungu-taka tondokomo kene pilipuli mongo liltimu mele nimba simba yombo se pea nambi semu-na koromoloye? Yu yuyu paa sika Pulu Yemo ungu-taka tondokomo pilkimulu. <sup>66</sup> Nambolka konopu lekemeleye? ,Yu-kinia nambi samiliye?,” nirimu kinia onone ninguli: “Yu Pulu Yemo ungu-taka tondopa marake semumunga topo kondomulu liemu papu.” niringi.

<sup>67</sup> Kanu-kinia onone yunga kumbikerena elkambe toko munduku, ki-lumuni toringi. Marene yu laruwa toko ninguli: <sup>68</sup> “Nu ‘Pulu Yemone olio nokopa kondomba ye se “Lipu mundumbu.” u nimba taltorumu ye nokoli Karasimu molio.’ nilinu kene nawene nu tokomonje ningu para si.” niringi.

26:69-75

*Semanemonga imbimu inia yakondo 26:58 molemo..*

<sup>69</sup> Kanu-kinia Pita yu pena mele, yomboma liku maku toringi koleana molorumu kinia kongono sendeli kendemande-ambo se Pita molorumuna omba yundu nimbale: "Nu kepe Gallilli disiriki ye Yesusi kinia pea kopu seko moloringi kanumanga ye se lémo." nirimu.

<sup>70</sup> Aku-sipa na-kolo akuna moloringi yomboma pali kanoko molangi Pitane kolo topale "Mólo." nimba "Nu nikinu mele na naa pilkiru." nirimu.

<sup>71</sup> Aku nimbale Pita yu ulka kerepuluna pumba molopili kongono sendeli kendemande-ambo sene yu kanopale akuna moloringi yombomando nimbale: "I yemo yu Nasarete ye Yesusi kinia pea kopu seko molongi ye se lémo." nirimu.

<sup>72</sup> Pitane kelepa "Mólo. Nuni nikinu yemo na naa kanolio." nimbale Pulu Yemonga imbi lepa mi lierimu.

<sup>73</sup> Kanga-kolte pe mele, Pita gilierimuna nondoko gilieringi yemane ,yu ungu wallopkolte lupa mele nirimu mele pilkuli, yu gilierimuna ongo yundu ninguli: "Kolea Gallilli disiriki yombomane ungu nilimili mele nu aku siku ungu nikinu pilkimulu. 'Yesusi kinia yu lombili andoli yema kinia kolea Gallilli disiriki yemala,' nu kepe Gallilli ye se, aku kene 'Nu paa sika yu lombili andoli ye se lémo.' konopu lekemolo." nirungi.

<sup>74</sup> Aku niringi kinia Pitane Pulu Yemonga imbi lepa tondolo mundupa mi lepa nimbale: "Paa sika nikiru. Ono nikimili yemo paa naa kanolio. Kolo tokoro liemu Pulu Yemone na topa kondopili." nirimu.

Aku nirimu kinia popenge sepa kera gulta ko torumu.

<sup>75</sup> Aku serimu kinia pilipale Yesusini yundu "Kera gulta u ko naa topili nuni wale yopoko kolo tokole "Yu naa kanolio." nini." nirimu ungu kanumu Pita kelepa pilierimu. Pilipale , 'Ama, paa sepo kinjendu lepomo. 'Paa naa sembó.' konopu lierindu mele sika sendu.' nimba pilipale, pena pumba kola paa awili-sepa serimu.

## 27

27:1-10

### *Ye Judasi Kinia Ulu Se Wendo Orumu Semanemo*

<sup>1</sup> Orili-u kolea kokele tangorumu kinia Pulu Yemo popo tondoringi ye awilima kinia, Juda yombomanga tapu-yema kinia onone pali ,Yesusinga kotemo pilku pora sikuli, 'Yu topo kondamili.' ningu, ningu panjeringi. <sup>2</sup> Aku ningu panjikuli yu liku, ka toko, mengo pungu, 'Romo, gapomano ye nokoli Paillate molorumuna mengo pungu kote senderingi.

<sup>3</sup> Kanu-kinia Judasi, yu Yesusi lipa yunga opa-touma sirimu ye kanumu, Yesusinga kotemo pilkuli "Kolopili, toko kondangi." niringi kinia pilipale yuni Yesusi ono lipa sirimu mele pilipa kiri pilipale kelepa konopu topele topa ononga kou-sillipa wane paono tene u yu siringima kelepa memba pumba Pulu Yemo popo tondoringi ye awilima kinia Juda yombomanga tapu-yema kinia sipa nimbale: <sup>4</sup> "Nane ye ono lipu sindu kanu yemo yu ungu se sepa naa kinjeli yemo 'Toko kondangi.' nimbu lipu sindumu paa ulu-pulu-kiri se sendu." nirimu.

Aku-sipa na-kolo onone pundu toko ninguli: "Akumu olionga ungu se mólo. ,Nu nunu mindi olio liku sinu., Akumu nunga kongonomo." niringi.

<sup>5</sup> Kanu-kinia Judasi yuni kou-sillipa kanuma memba pumba ,Pulu Yemo popo toringi, ulka-tembele palana topa anjukundu mundupale yu ono mundupa kelepa anju purumu. Anju pumbale 'Ka nombo kolambo.' nimbale ka se lipa memba pumbale ka nomba kolorumu.

<sup>6</sup> Pulu Yemo popo tondoringi ye awilimane kou kanuma „mania-polona, lierimu kanoko liku ninguli: “I kouma yombo topo kondomolondo símuluma kene ulka-tembele kouma kinia sere lepo taltomolo kinia manda naa sembá. Akumunga ungu-mane se pelemo kene naa taltamili.” ninguli <sup>7</sup> ungu se nengu panjiku ninguli: “I kou-monemane mingi-sosipene mane sepa wamolemo yemonga mamo topo topo liemili. Yombo ma se naa lepa ononga kolea suluna yombo ya ongo molemelemanga yombo kolongema akuna óno sangi.” ninguli aku siku topo toko liltingi. <sup>8</sup> „Kanu kou-monemane ye se toko kondonge aulkamo akisindingi koumane, aku seringimunga kanu mamo imbi leko ‘Yombo Toko Meme Ondoringi Mamo’ niringi mele kiniá kepe aku sipu nilimulu.

<sup>9-10</sup> „Juda ye awilimane, aku siku seringimunga Pulu Yemone ungu-umbu tondoru-muma pilipa yomboma nimba sirimu ye Jeremayane ulu se pe wendo ombá u nirimu mele kamu wendo orumu. Yuni nimbale:

“Ye-Awilimuni nando “Sei.” nirimu mele  
    ono aku siku sengendo  
Isirele yombomane “Ye akumu kou-sillipa  
    wane paono tenene topo toko liengi.”  
    niringi kouma likuli,  
kanu koumane mingi-sosipene  
    mane sepa wamorumú yemonga mamo  
    topo toko liltingi.”  
nirimu kanumu mele kamu wendo orumu.

27:1-2,11-26

### *Romo-Gapomano Ye Nokoli Paillate Kote Pilipa Molopa Yesusinga Kotemo Pilipale “Kolopili.” Nirimu Semanemo*

<sup>11</sup> Judasi aku sipa sepa molopili Yesusi Romo gapomano ye nokoli „Paillate, molorumumunga kumbikerena gilierimu kinia kanu ye nokolimuni „yunga kotemo pilipale, yu mangilipa pilipa nimbale: “Nu Juda yombomanga ye nokoli kingimu molo móloye?” nirimu.

Yesusini pundu topa nimbale: “Sika nikinu. Akumu na.” nirimu.

<sup>12</sup> Pulu Yemo popo tondoringi ye awilima kinia, „Juda yombomanga, tapu-yema kinia, onone Yesusi kote sendeko Paillatendo „kolo toko, ungu awisili ninguli ningíndu “Yesusi yu sepa kinjilimú.” nengu yu kote senderingi kinia Yesusi yu ungu se naa nimba we gilierimu.

<sup>13</sup> „Yesusini ungu se naa nirimu kanopale, Paillatene yundu nimbale: “Nu ulu kiri awisili serinu nikimili mele nu naa pilkinuye?” nirimu kinia

<sup>14</sup> Yesusi „yu sepa kinjerimu niringi mele, pundu topa ungu seluri kepe naa nimba „we gilierimu kinia kanopale Romo, gapomano ye nokoli kanumuni paa mini-wale mundupa konopu awisili kimbu sirimu.

<sup>15-16</sup> „Yesusi kote sendeko molangi, „ye se, yunga imbi Barapasi, yu mongo liltimu mele yomboma pali pilku moloringi kanu yemo yu ka-ulcana perimu. „Kalia-ingi senga senga, Juda yombomane kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilingindu kere-langi noringi walema wendo orumu kinia onone ka-ulcana perimu ye se imbi leko “Wendo liku mundou.” nengu mawa seringi kinia „Romo, gapomano ye nokolimuni kanu yemo wendo lipa yomboma sirimu. <sup>17</sup> „Aku siku se-pu-pu seringi walema kamu wendo ombo pepili Yesusi kote senderingi pilipale nirimumuni, „Juda yomboma liku maku toko moloringi kinia Paillatene ono mangilipa nimbale: “Ye nawe ka-ulcana wendo lipu ono siembo konopu lekemeleye? Ye Barapasi wendo lipu siembo, molo onone “Pulu Yemone “Ono nokopa kondomba ye se lipu mundumbu.” u nimba talitorumu ye nokoli Karasimu.” nilimili ye Yesusi wendo lipu siemboye?” nirimu.

<sup>18</sup> „We-yomboma Juda yombomanga ye awilima munduku kelko ononga unguma liku mokoli seko Yesusinga ungumu pilku yu lombili andoringimunga Juda yombomanga ye awilima, Yesusi-kinia konopu kiri panjikuli kote senderingi-na pilipale Paillatene aku sipa nirimu.

<sup>19</sup> Paillate kote pilieli polona „molopa ‘Juda ye awilimane pundu toko ungu se ninginje.’ nimba nokopa, molorumu kinia yunga menuni ungu se yu molorumuna nimba mundupa nimbale: “Nuni andi ye sumbi nilimu ungu se naa sei. Kiniá yu kaima sepo kanondumunga nanga konopuna umbuna awisili wendo omu kene yu ungu se paa naa sei.” nirimu.

<sup>20</sup> „Paillatene “Ka-ye nawe wendo lipu siemboye?” nirimu kinia pilkuli, Pulu Yemo popo tondoringi ye awilima kinia, „Juda yombomanga, tapu-yema kinia, onone we-yomboma kondi toko ungu-umbu tondokole ““Yesusi topa kondopili. Barapasi wendo lipa sipili.” niee.” niringi.

<sup>21</sup> „Aku niringi kinia pilipale Romo, gapomano ye nokolimuni onondo “Yetolonga ‘nawe wendo lipu siembo.’ konopu lekemeleye?” nimba mangilierimu kinia onone pundu toko ninguli: “Ye Barapasi ‘wendu liku yando si.’” niringi.

<sup>22</sup> Aku niringi kinia pilipale Paillatene onondo nimbale: “Aku liemu, onone “Pulu Yemone “Ono nokopa kondomba ye se lipu mundumbu.” u nimba taltorumu ye nokoli Karasimu.” nilimili ye Yesusi, nambi samboye?” nimba mangilierimu kinia onone pali “Yu unju-perana kolopili uku toko panjei!” niringi.

<sup>23</sup> Aku niringi pilipale yuni onondo nimbale: “Aku nambi semuye? Yu mongo nambolka mongore limuye?” nirimu.

Aku-sipa na-kolo onone „kelko, paa tondolo munduku ninguli: “Mólo! Yu kolopili, unju-perana uku toko panjei!” niringi.

<sup>24</sup> Yunga ungumu naa pilku, opa senge seringi kanopale Paillatene no mare kolopa lipa, yombo liku maku toko gilieringima kanoko molangi ki kulumiyé topa nimbale: “I yemo toko kondonge kolomba kinia ono-kinia ungu pemba; nanga ungu se naa pemba.” nirimu.

<sup>25</sup> „Aku sipa nirimu kinia pilkuli, yombomane pundu toko ninguli: “Yu tonge kolombamonga umbuna pembamo olio kinia olionga bolangoma kinia pepili.” niringi.

<sup>26</sup> Kanu-kinia ye Barapasi ka-ulkana wendo lipa ono sirimu. „Aku sepale, Yesusi lipa ‘yunga ami-yema, sipa nimbale: “Yu ka-pultane tokole pe ‘Unju-perana kolopili.’’ ningu mengo pungu unju-perana uku toko panji-paa.” nirimu.

27:27-31

### *Romo Ami-Yemane Yesusi Ungu-Taka Tondokole “Kolopili.” Ningu Mengo Puringi Semanemo*

<sup>27</sup> Kanu-kinia „Romo, gapomano ye nokolimunga ami-yemane Yesusi liku kanu ye nokolimun perimu ulka awili akuna sukundu „yomboma liku maku toko moloringi koleana, punguli, ononga ami talape yema pali “‘Yesusi ya molemona, sukundu-sukundu waa.’” niringi. <sup>28</sup> Kanu-kinia yunga mulu-maminama kulku wendo lindiku, ‘Yu ye nokoli kingi se none sepili.’ ningu mulu-maminia kondoli peanga se pakondoko, <sup>29</sup> unju-ka koko molorumu se mulkowe seko ‘Ye nokoli kingimunga waniemo.’ ningu pengena mere mundunduku, kingimane unju kope se we ambololemele mele koló se liku yunga ki-lomekondo amondokole niringimuni, yu gilierimuna komorongo toko pondoko ungu-taka tondoko imbi we kólo toko amboloko paka tondongendo “Juda yombomanga ye nokoli kingimu, nu gilinuye?” ningu <sup>30</sup> yunga kumbikerena elkambe toko kandoko, koló kope ambolorumumu liku yunga pengena kope to-pu-pu seringi.

27:31-66

*Yesusi Toringi Kolorumu Kinia Óno Seringi Semanemo  
27:31-44*

*Yesusi Unju-Perana Ola Uku Toko Panjeringi. Unju-Perana Pepili Juda Yombomane  
Yu Ungu-Taka Tondoringi Semanemo*

<sup>31</sup> Yu aku siku ungu-taka tondoko pora sikuli mulu-maminia kondolimu kulunduku, yunga u panjerimu mulu-maminiamma kelko panjindikuli "Yu unju-perana kolopili, panji-pamolo." ningu yu liku mengo puringi.

<sup>32</sup> „Romo ami-yemane Yesusi Jerusalleme palana, ultu mengo pungí punguli niringimuni, kolea Sairini ye se, yunga imbi Saimono, ambolko liku ka mele siku Yesusi kolomba unju-peramo "Kolali seko mendei." ningu siringi. <sup>33</sup> „Punguli, kolea Golkota pungu akuna moloringi. „Golkotanga ungu-pulumu 'penge-bele lieli koleamo' .." <sup>34</sup> „Yesusi akuna mengo punguli niringimuni, 'Yomboma mindili naa nangi.' ningu, no-waenena sukundu marasene kombili seli se munduku taltoringi aku no-waenemo 'Yu nopili.' ningu, siringi-na-kolo aku no-waenemo nomba pilipale "Mólo." nimba naa norumu.

<sup>35</sup> Kanu-kinia ,ami-yemane ,yu unju-perana ola panjikuli unjumu liku ola anjeringi. „Aku sekole, u unjuna ola uku toko naa panjikuli, yunga mulu-maminia ,kulunduku taltoringima, 'Moke samili.' ningu ono yu-mele-mele lingí mele pilingindu kou-kate seko pe mulu-maminiamma liltingi. <sup>36</sup> Pe yu unju-perana ola giliepili tapu seko kanoko moloringi. <sup>37</sup> 'Yu mongo liltimu mele yomboma kanangi.' ningu

I YE YESUSI JUDA YOMBOMANGA YE NOKOLI KINGIMU  
ningu imbi toko yunga pengena olakondo unjuna mondoringi.

<sup>38</sup> Opa seko mélema wa liltingili ye talo pea unju-pera talonga uku toko panjeringila. Se Yesusi yunga ki-lomekondo uku toko, se ki-tarokondo uku toko panjeringi.

<sup>39</sup> Akuna ongo puringi yombomane Yesusi ,kanoko kiri pilkuli yu, ungu-taka tondoko iri-mele toko <sup>40</sup> ninguli: "Aa! "Ulka-tembelemo sikisipuli kelepo wale yopoko ombo pupili takopo limbu." nirimu yemo, 'Naa kolambo.' ningu nu nunu liku tapondou. Nu sika Pulu Yemonga Malo liemu unju-perana mania ou." niringi.

<sup>41</sup> Aku sikula Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, „Juda yombomanga, tapu-yema kinia, onone kepe yu ungu-taka tondoko ninguli: <sup>42</sup> "Yu yombo wema 'Naa kolangi.' nimba lipa tapondorumu-na-kolo yu yuyu 'Naa kolambo.' nimba manda naa lipa tapondokomo. Yu 'Isirele yombomanga ye nokoli kingimu ,molio.' nilimú mele sika aku sipa, molemo liemu yu yuyu unjuna mania opili. Yu yuyu unjuna mania ombá kinia kanopole 'Yu sika olionga ye nokoli kingimu.' nimbu tondolo mundupu pilimulú. <sup>43</sup> Yuni 'Pulu Yemone na lipa tapondomba.' nimba kuru mondopa molemo kanumu; yu "Pulu Yemonga Malo molio." nilimú kene Pulu Yemone yu kanopa peanga pilipa, 'Yu mania we olkanje papu.' konopu liemu liemu manda, yu ombo yu lipa tapondopa ,unjuna wendo lipili.. „Aku sipa semu liemu 'Yu sika Pulu Yemonga Malo.' nimbu kuru mondomolo.." niringi.

<sup>44</sup> Wa noli ye talo yu-kinia unjutolonga uku toko panjeringi yetolone yu aku siku ungu-taka tondoringilila.

27:45-56

*Yesusi Kolorumu. Kolorumu Kinia Ulu Mare Wendo Orumu Semanemo*

<sup>45</sup> „Yesusi unjuna ola we pepili, awi-tangoli ena tuwellepo killoko serimu kinia kolea pali simbulu topale, pe ipupini ena tere killoko serimu kinia kelierimu. <sup>46</sup> Ipupini ena tere killoko mele serimu kinia Yesusini ru nimba nimbale: "Elloi, Elloi, llama sapakatani."

nirimu. Akumu Juda yombomanga ungu se. Akumunga pulumu i-sipa:  
"Nanga Pulu Yemo, nanga Pulu Yemo,

na nambi semu-na munduku kelienuye?”  
nirimu.

<sup>47</sup> Akuna nondoko gilieringimanga marene yuni aku nirimu kinia pilku „sunduku, ninguli: “Piliame. Yu Illainja mangilkimu.” niringi.

<sup>48</sup> Aku nirimu kinia pilieringimanga ye se popenge sepa lisipa pumba ulú-pinja mele se lipa no-waene kombili seli mare akuna panjipale, ‘Yesusi no-waene kombili seli pinjana pelemomo nopili.’ nimba memba ombo unju-pepena senga ka topa olando sirimu. <sup>49</sup> „Aku-na-kolo yu no-waenemo sirimu mele kanokole, we-yombomane ninguli: “Mólo. Kiniá unjuna we pepili. Illainjane sika yu ‘Naa kolopili.’ nimba lipa tapondopa mania limbando okomonje, kanopo kanamili.” niringi.

<sup>50</sup> Yesusini ungu se tondolo ru nimbale, pe yunga minimundu ‘Pu.’ nimba yu kolorumu.

<sup>51</sup> Yu aku sipa kolorumu kinia „ulu awili mare, waltikele „wendo orumu. Pulu Yemo popo toko kaloringi ulka-tembele „Jerusalleme sukundu gilierimu akuna sukundu Pulu Yemo molorumu, suluminia paa kake sélimunga kerepuluna „Yomboma sukundu naa pangí.’ ningu u alieni, mulu-maminia awili sene pipi siku panjeringi gilierimu. „Yesusi kolopa pora sirimu kinia, kanu mulu-maminiamo awi-suku-singina olakondo maniendo sipa olá torumu. „Aku sepa,“ ma jimi-jimi se sepa, kou awilima topa ungu-mangu topa, <sup>52</sup> yombo u óno seringi koleama anju yando pumba, Pulu Yemonga yombo kake seli u koloringima „Pulu Yemone,“ topa makisinderimu. <sup>53</sup> Lomboroko ola molko óno-kolea peringina wendo ongole, Yesusi pe lomboropa ola molorumu kinia Pulu Yemonga kolea-awili kake selina sukundu punguli yombo awisili ‘Kanangi.’ ningu purungi.

<sup>54</sup> „Romo, ami-ye wane anderete nokorumu yemo kinia, yu pea Yesusi serimu mele tapu seko kanoko moloringi ami-yema kinia, onone ma jimi-jimi sepa ulu lupa lupama wendo orumu kinia kanokole ono paa mini-wale munduku ninguli: “I yemo yu paa sika Pulu Yemonga Malo lepomo.” niringi.

<sup>55</sup> Ambo awisili mele, „Yesusi unju-perana kolorumu, akuna sulu seko kanoko gilieringi. U kanu amboma „ononga pulu-“kolea Gallilli disiriki munduku kelko Yesusi lombili andoko liku tapondoko nokoko „Jerusalleme pea,“ oringi amboma. <sup>56</sup> Ononga ambo se Makatalla taono ambo Maria, se Jemisi kinia Josese kinia olonga anumu Maria, se ye Seperinga malotolonga anumu.

27:57-61

### *Yesusi Óno Seringi Semanemo*

<sup>57</sup> Ipupini, kolea kala tomba serimu kinia Arimatia taono ye kamako se, yunga imbi Josepo, yu kepe Yesusi lombili andorumu ye se, yu ombo <sup>58</sup> „Romo gapomano ye nokoli, Paillate molorumuna pumba, “Yesusinga ónomo na si.” nimba mawa serimu kinia Paillatene yu “Ónomo lipili.” nimba „ami-yemando nimba mundorumu.“

<sup>59</sup> „Paillatene “Manda.” nirimu kinia, Josepo pumba ónomo mania lipa, mulu-maminia konde sene lipa okorumu. Okopale <sup>60</sup> kou-kande konde se, Josepo yu ‘Kolombo kinia akuna na óno sangi.’ nimba kou-kande se akupa taltorumu kou-kandemonga sukundu memba pumba taltorumu. Taltopale kou-kande kerepuluna kou awili se perele-marele memba ombo pipi sipale yu kelepa purumu. <sup>61</sup> Makatalla taono ambo Maria kinia Maria se kinia olo kou-kandemo lierimu kerepuluna nondoko „yu ónomo kou-kandena taltorumu mele kanoko, moloringili.“

27:62-66, 28:11-15

### *Ami-Ye Marene Yesusi Óno Seringi Koleamo Nokoringi Semanemo*

<sup>62</sup> „Kanu-kinia,“ ‘Opali „koro molomolo,“ wale Sambatemo.’ ningu pilkuli, kiniá-me, mélema undu-undu siringi kanu walemo pora nirimu kinia opalikundu Pulu

Yemo popo tondoringi ye awilima kinia, Parisi yema kinia, ono „Romo gapomano ye nokoli, Paillate molorumuna pungu liku maku toko gilku<sup>63</sup> ninguli: “Ye-Awilimu, ye kanumu u naa kolopa we molopale yombomane ‘Sika.’ ningu kuru mondonge unguma kolo topa nirimu kanu yemo yu “Kolopole wale yopoko omba pumbá kinia lomboropo ola molombo.” nirimu olio pilierimulu kene<sup>64</sup> „nuni ami-yemando, “Kanu yemo „oleanga, óno engi kou-kandemo wale yopoko paa mimi siku nokaa!” nieni. Naa nokonge kinia yunga lombili andoli yemane ónomo ongo wa liku mengo punguli “Yu lomboropa ola molopa omba pumu.” ningí. Aku siku kolo toko ningí kinia yu u ‘‘Sika nikimu.’ niengi.’ nimba kolo torumu ungumu maniandopa, onone ‘Yombomane ‘Yuni sika aku sipa semu.’ niengi.’ ningu kolo tonge ungumu paa olandopa pemba.” niringi.

<sup>65</sup> Paillatene „Juda ye awilimando, pundu topa nimbale: “Aku liemu,, ami-ye mare liku mengo pungu, “Yemo óno engi koleamo nokoko kondangi.” ningu mondoko, ‘Yombomane óno-koleamo ungu se naa sangi.’ ningu ‘Aulkamo tondolo pipi siemili.’ konopu lenge mele sangi.” nirimu. <sup>66</sup> „Aku nirimu kinia, pilkuli ami-ye mare liku mengo pungu, yombo óno-kou-kandemo pipi siringi koumu pala seko pele leko ononga imbimu akuna toko mondokole, “Ami-yema akuna nokoko molangi.” ningu mondokole „ono puringi..”

## 28

### Kolomongo-Awili 28

*Yesusi Lombokora Ola Molopale Serimu Mele Semanemo  
28:1-10*

*Yesusi Lombokora Ola Molorumu Kinia Ambo Talone Yu Kanoringili Semanemo*

<sup>1</sup> „Koro moloringi, wale Sambatemo pora nimba, ononga pulu-pulu kongono walemo wendo ombándo kolea tangombando muni lierimu kinia Makatalla taono ambo Maria kinia, Maria se kinia, pungu „Yesusinga, ónomo taltoringi kou-kandena ónomo, kanongele puringili.

<sup>2</sup> Ye-Awilimunga mulu-koleana angello se mania orumu kinia ma jimi-jimi paa tondolo sepa serimu. Angellomone omba kou-kandena pumba kou-kande kerepu-lumu pipi siringi koumu wendo lipa perele-marele memba pumba taltopa akuna ola molorumu. <sup>3</sup> Kanu angellomonga kumbikeremo kariapá sepa pa selemo mele pa sepa, mulu-maminia pakorumuma kalopora topa paa kake selemo mele kake serimu. <sup>4</sup> Yesusi óno-kolea nokoringi ami-yema angellomo kanoko paa mini-wale munduku pungu-pungu ninguli yombo kololimane ungu naa ningu ungu se naa selemele mele ono aku siku unguri naa seko we moloringi.

<sup>5</sup> Angellomone ambotolondo nimbale: “Pipili naa kolale. Yesusi ‘Kolopili.’ ningu talko unju-perana uku toko panjeringi kanu yemo kanongele okombele na pilkiri. <sup>6</sup> Yu ya naa lemó. „Kolopole wale yopoko-sipamonga, lomboropo ola molombo.” u nirimu aku mele semu. Ónomo u lierimu koleamo ongo kanale. <sup>7</sup> Kanokole popenge seko pungu yunga lombili andolima i-siku ningu siengili: “Yesusi óno-koleana lepale lomboropa ola molopa kolea Gallilli disirikindu kumbi lepa pulimú kene ono akuna yu kanonge.” ningu siengili. „Ungu nimbu sindimbundu ondu, kanu ungumu nimbu pora sikiru.” nirimu.

<sup>8</sup> „Angellomo aku sipa omba mona molopale nirimu mele, kanoko pilkuli ambotolo pipili kolko kamelé paa akoko, aku sipa konopu talo pepili lisiku pungu yunga lombili andolima ningu singilí puringili. <sup>9</sup> „Lisiku pungilí puringili kinia, Yesusi lipa

sinjipa olo aulkana kanopa lipale "Okombeleye?" nirimu. Kanu-kinia alone yunga kimbukundu pungu kangulku yu kape ningu imbi ambolko paka tondoringili.

<sup>10</sup> Kanu-kinia Yesusingi olondo nimbale: "Pipili naa kolcole, olo pungu nanga genupilindu i-siku niengili: "Kolea Gallillindu pang. Yu akuna kanonge." ni-pale." nirimu.

28:11-15

*Óno-Koleamo Nokoringi Ami-Ye Mare Pungu Pulu Yemo Popo Tondoringi Ye Awilimando Yesusinga Ónomo Kou-Kandena Ulu Se Wendo Orumu Mele Ningus Si-Poringi Semanemo*

<sup>11</sup> Ambotolo kelko yando ongele oringili kinia Yesusinga óno-kou-kandemo nokoringi ami-ye mare kolea-awili 'Jerusalleme' sukundu pungu Pulu Yemo popo tondoringi ye awilimando uluma wendo orumu mele pali ningu si-poringi.

<sup>12</sup> 'Pilieringi kinia, popo tondoringi ye awilima, Juda yombomanga ye awilima kinia pea maku tokole ono kinia 'ungu ningu ninguli: "We-yomboma i uluma wendo omu mele pilkuli "Yesusi lomboropa ola molomunje." ningi kene 'Naa piliangi.' nimbu nambi samolonje?" ningu, angelema ninguli senge mele ningu panjikuli niringimuni, ami-yema kou-mone awisili siku <sup>13</sup> onondo ninguli: "Yombomane "Yesusi nambi semuye?" ningu mangilingí kinia onone i-siku niengi: "Ipulieli uru pemulu kinia yunga lombili andolimane kiyongo ningu ongo yu liku mengo púngi." niengi. <sup>14</sup> 'Olio Juda yomboma nokolemo Romo, gapomano ye nokolimuni 'aku engi mele, ungu se piliemu liemu ' "Ono seko kinjikimili kene mindili nangi." naa niengi!' nimbu olione ononga lipu tapondopo yu-kinia ungu nimulú, kanu-kinia 'Onone óno-koleamo mimi siku naa nokoko we uru pengi.' konopu lepale mindili lipa naa simba." niringi.

<sup>15</sup> Aku niringimunga pilkuli ami-yemane kou-mone liku onone "Niee." niringi mele yombomando niringi. Akumunga yandopa kiniá i 'boku tokoro' walemo kepe Juda yombomanga koleamanga pali i ungumu anju anju pulimú pilkuli yombo awisilini kanu semanemo toko molemele.

28:16-20

*Yesusi Omba Yu Lombili Andolima "Nanga Kongonomo Sende-Paa." Nimba Lipa Mundorumu Semanemo*

<sup>16</sup> 'Ambotolo punguli kanoko pilieringili mele semane toko siringili, kinia pilkuli Yesusi lombili andoli ye rureponga yopoko kolea Gallilli disiriki pungu, Yesusingi ma-pangi se imbi lepa u "Akuna wang." nirimu ma-pangina puringi. <sup>17</sup> Akuna pungu Yesusi kanokole niringimuni, yu kape ningu yunga imbi ambolko paka tondoringi-nakolo marene 'Yesusi kolorumu. Imu Yesusi molo nawenje?' ningu konopu talo seko lieringi.

<sup>18</sup> Kanu-kinia Yesusi yu nondopa omba onondo nimbale: "Tatane nando "Nu nunu mulu-koleana mélema kinia yomboma kinia, ma-koleana mélema kinia yomboma kinia nokani." nimba tondolomo na sirimu, na-kinia pelemo. <sup>19</sup> Aku 'tondolo na sirimumu ono simbú ono-kinia pemba, kene ono ma-koleamanga pali pungu 'Yomboma pali nanga ungumu pilku liku, nanga lombili andolima molangi.' ningu, pungu ningu si-punguli ningimuni, 'pilku liku molonge' yomboma no lindingindu Lapa kinia Malo kinia Mini Kake Sélimu kinia ononga imbi mangilku ono no lindiku, <sup>20</sup> onondo "Na lombili andolimane sangi." nirindu mele pali 'Aku yomboma sangi.' ningu ono mane siengi. Aku siku niliku andoko molonge kinia na ono-kinia alieli molambo mulu matolo pora nimbá." nirimu.

'Aku pea.'

## MAKO Semane Peangamo MAKOne Torumu Bokumu

### *I Bokumunga Ungu-Pulu Mare*

Ungu-pulu mare inia yakondo gomo 1 molemo.

I bokumu torumu yemonga imbimu bokuna sukundu naa molemo, aku-na-kolo ‘**Makone** torumunje.’ ningu pilielemele. ‘**Makone** sika boku torumu liemu Mako 14:51-52 kango-ye sene ulu se serimu akumu **Mako** yuyunje.’ ningu pilielemele. ‘Imbimu nimba para naa sirimumunga yu yuyu lémo.’ ningu pilielemele. Yunga imbi ‘**Jono Makon**’ ningu lieringila (Lipa Mundorumu Yema 12:12). **Mako** kolea-awili Romo purumu, Pita pea moloringili ungu talo molemo (Pe-Timoti 4:11, U-Pita 5:13. U-Pita akuna Pitane “Bepillono” nirimu akumu “Romo” nimbamondo nirimu). Pitane Yesusinga semanemo topa sirimu ungu mare Lipa Mundorumu Yema 10:37-42, 2:14-41, 3:12-26, 4:8-12, 5:29-32 molemo.

Wale awisili, wale paono talo mele, “Yesusini mane sirimu” molo Yesusi imbi lembando “ungu mane sili yemo”, aku sipa unguma bokuna torumu molemo. Yesusi unju-perana kolorumumunga ungu awisili mele bokuna molemo (12:12, 14:1-2, 15:10 molopa, 8:31, 9:31, 10:33). Yesusini yu molorumu mele “Ningu para naa siengi.” nirimu mele 1:34,44, 3:11, 5:43, 7:36-37, 8:26,30, 9:9 molemo. Yesusi mana-ye se molorumu (3:5, 6:6,31,34, 7:34, 8:12,33, 10:14, 11:12), aku-na-kolo Pulu Yemonga malomo molorumula (1:1,11, 3:11, 5:7, 9:7, 12:1-11, 13:32, 15:39).

Semanemo tombando **Makone** u No Lindeli Jonone serimu semanemo topa, Jonone Yesusi no linderimu kinia kurumanga nokoli Setenene Yesusi kondi torumu mele semanemo ponjipa torumu. Pe yomboma umbuna awisili meringimunga kanopale Yesusi ono kondo kolorumu mele bokuna molopa, Yesusini yomboma mane sirimu mele semane mare molemo. Yesusini ulu serimumunga ungu-pulumu yunga lombili andoli yemane naa pilieringi-na-kolo walte walte kanga kanga seko ungu-pulumunga mare pilku Yesusi sika molorumu mele pilieringi.

Ye awisili Yesusi-kinia opa-tou molko, umbunama siringi mele semane mare molopa, yu toringi kolorumu mele semane mare molemo. Aku-na-kolo kolorumu kinia semanemo pora naa nirimu. Yesusi kelepa lomboropa ola molorumu mele semane mare bokuna kamu molemola.

Ya ungu-pulumu pora nikimu.

*1:1—3:6*

### **Pulu Yemo Ye Nokoli Kingimu Molopa Yomboma Nokolemo Nokomba Mele Nimbando Yesusi Orumu Semanemo**

*1:2-8*

*No Lindeli Jonone Konopu Topele Toringi Yomboma No Linderimu Semanemo*

<sup>1</sup> Yesusi, Pulu Yemone “Olio nokopa kondomba ye se lipu mundumbu.” u nimba taltorumu ye nokoli Karasimu, Pulu Yemonga Malo, yunga semane peangamo pulu polorumu mele ‘ya inia tombo tokoro.‘

<sup>2</sup> Yesusi, Pulu Yemone nimba taltorumu ye nokoli Karasimunga semane peanga imu wendo ombándo ye se u ombo sembá mele, Pulu Yemone ungu-umbu tondorumuma pilipa yomboma nimba sirimu ye Aisayane Pulu Yemonga ungu se nimba bokuna torumu akuna molemo mele i-sipa:

‘Pulu Yemone nimba:’ “Pílie!”  
Nane ‘Nanga ungu-umbu tondolima pilipa

nimba sipili.' nimbu lipu mundumbu yemone  
nunga aulkamo akisindepili.' nimbu  
yu "Kumbi leko pu." nikiru.'

<sup>3</sup> 'Kolea ku lielina  
'kumbi lepa pumbá' ye senga kerena  
ungu se nimbale:

"Ye-Awilimu ombá aulkamo sekó wamame.  
Yu ombá aulka kangama toko sumbi siee."  
nimba."

nimbá." nikimu.'  
nimba ,Aisayane No Lindeli Jonone paa pe sembá mele u aku sipa nimba sipa bokuna torumu molemo.,

<sup>4-5</sup> Akumunga, 'semane peangamo pulu polombando No Lindeli, Jono kolea ku lieli senga wendo om̄ba ,aku sipa, ungu mare yomboma nimba sipa molorumu. Kolea Judia disiriki yomboma pali kinia kolea Judianga kolea-awili Jerusalleme yomboma pali kinia ono yu molorumuna pungu yunga ungumu pilingíndu puringi. Yuni ungu se onondo nimba sipa nimbale: "Ono ulu-pulu-kiri selemelema kanoko kiri pilku konopu topele tokole 'Pulu Yemone olionga ulu-pulu-kirima 'We mania pupili.' nimba siye kolopili.' ningu 'No liemili.' ningu waa." nirimu. Aku sipa nirimu kinia ononga ulu-pulu-kiri seringima ningu para siringi kinia yuni ono no Jodane nona no linderimu.

<sup>6</sup> Jono kongi kamelenga indimuni seli wale-pakoli se pakopa, kongi kangimuni seli kakomo topale, kulkumba kinia pilimu-no kinia aku langitolo mindi nomba molorumu.

<sup>7-8</sup> Yuni yomboma ungu nimba sirimu mele i-sipa: "Nane sika ono no lindiliu-nako lo ye se akilepa ,nondopa, ombá ,sekemo, mo yuni ono ,Pulu Yemonga, Mini Kake Sélimu lindimba ,lingí,. I na akilepa ombá yemo yunga tondolomo paa olandopa, nanga tondolomo paa maniadopa, na yu-kinia manda mólo. Yombo awilimanga kongono kiri sendeli kendemande-yombomane sika ononga yombo awilimanga kongono kiri sendengendo mania molko ononga yombo awilimanga kimbu-suma ka pilka tondolemele-na-kolo na ye paa kirimu moliomonga kanu ombá yemo yunga kimbu-su ka pilka tondoli kanu kongonomo paa olandopa mele, nane sendelkanje manda naa selka. ,Na ye paa kirimu, yu ye paa awilimu.," nirimu.

**1:9-11**

### *Jonone Yesusi No Linderimu Semanemo*

<sup>9</sup> 'Jono yomboma no lindipa molorumu, kanu walemo kinia Yesusi kolea Gallilli disiriki Nasarete taono mundupa kelepa ,Jono molorumuna, orumu kinia Jonone yu no Jodane nona no linderimu. <sup>10</sup> ,Yesusi no lipa pora sipale, nona wendo om̄ba gilierimu kinia sumbi sipa mulúmu kengeya lepa anju yando purumu kanopale, Pulu Yemonga Minimu, kera waembono mele, mania om̄ba Yesusi molorumuna pumba kangina ola molorumu kanorumula. <sup>11</sup> Kanu-kinia muluna ola ungu se wendo om̄ba nimbale: "Nu nanga konopu mondolio kangomo. Nu-kinia konopu sipu molio." nirimu.

**1:12-13**

### *Kurumanga Nokoli Setenene Yesusi Kondi Torumu Semanemo*

<sup>12</sup> ,Yesusi no liltimu kinia Pulu Yemonga Minimu yu-kinia om̄ba molopale nirimu-muni,, sumbi sipa Minimuni Yesusi kolea ku lielina lipa mundorumu. <sup>13</sup> ,Akuna purumu kinia,, oli se koro talo Yesusi aku kolea ku lielina takara mélema kinia molopili ,kurumanga nokoli, Setene om̄ba yu kondi torumu. Kanu-kinia ,mulu-koleana, angelloma ongo yu nokoringi.

**1:14-15**

*Yesusini Kolea Gallilli Disiriki Yunga Kongonomo Pulu Polopa Serimu Semanemo*

<sup>14</sup> Kanu-kinia „No Lindeli, Jono ka siku ka-ulkana panjeringi kinia pilipale Yesusi kelepa kolea Gallilli disiriki ombo Pulu Yemonga semane peangamo topa silipa andorumu. <sup>15</sup> „Topa silipa andopa, nimbale: “Kiniá enamo kamu wendo okomo, Pulu Yemo ye nokoli kingimu molomba enamo nondopa wendo okomo kene ulu-pulu-kirima munduku kelko konopu topele toko, ‘Semane peangamo yu sika ungumu.’ ningu kuru mondaa.” nirimu.

1:16-20

*Yesusini Ye Kisendo “Na Lombili Waa.” Nirimu Semanemo*

<sup>16</sup> „Aku sipa nilipa andopa, Gallilli nomu kelona andopale Yesusini Saimono kinia Saimono genu Enderutolo oma lili wale se nomuna toko munduku moloringili kanorumu. Oma liltingili akumu olonga kou-kongono seringili kanumu. <sup>17</sup> „Aku siku seko moloringili kanopale, Yesusini olondo nimbale: “Na lombili wale. Oma lingilindu oma lili wale se liku nona mania mundulimbili kinia omama walena ombo pelemo mele, pe ‘nanga kongonomo sengelendo nanga ungumu pilku ningu siliku andongele kinia yomboma nanga talapena sukundu ongo molangi.’ nimbu ‘Olo na lombili wale.’ nikiru.” nirimu. <sup>18</sup> „Aku nirimu kinia pilkuli, popenge seko olonga oma lili walema munduku kelkole Yesusi lombili puringili.

<sup>19</sup> „Kanu-kinia, yu kanga-kolte wiltu pumbale, Seperinga malo Jemisi kinia Jemisi genu Jono kinia olonga nona andoli sipina sukundu molko oma lili walema toko tandoringili kanopale <sup>20</sup> waltikele olondo “Wale.” nirimu. Kanu-kinia lapa Seperi kinia kongono yema kinia sipina sukundu molangi munduku kelkole Yesusi lombili puringili.

1:21-28

*Ye Senga Konopuna Kuru Se Molorumumu Yesusini Topa Makororumu Semanemo*

<sup>21</sup> „Kanu ye pokore Yesusi lombili puringi kinia, yu kinia ono Kapeniame taono puringi. Kanu-kinia „koro moloringi, wale Sambatemo wendo orumu kinia Yesusi Juda yomboma maku toko Pulu Yemonga ungumu pilieringi ulkana sukundu pumba yomboma mane sirimu. <sup>22</sup> Mane sirimu kinia Pulu Yemonga ungu-manemanga puluma pilku ono mane siringi yemane we mane siringi mele Yesusini aku sipa mane naa sirimu. Namba lierimu yemane pipili naa kolko tondolo munduku mane siringi mele yuni aku sipa mane sirimu-kulu pilkuli yombomane mini-wale mundoringi.

<sup>23</sup> Kanu-kinia ulka kanuna sukundu kuru se ye senga konopuna molopa yu ambolorumu ye se molorumu, „yemonga konopuna sukundu molorumu kanu kurumuni yu “Ungu ni.” nimba ulku torumu-na, <sup>24</sup> yuni opa-ungu nimba nimbale: “Nasarete taono ye Yesusi, nu pea olio „kuruma,-kinia seluna kopu sepo manda naa molomolo. Nu olio-kinia nambi semu-na onuye? Nu olio toko kondoni onuye? Nane nunga imbi pilieilio. Nu Pulu Yemonga Ye Kake Sélimu.” nirimu.

<sup>25</sup> „Aku sipa nirimu kulu pilipale, Yesusini kanu kurumu iri topa yundu nimbale: “Nu ungu naa ningu yemonga konopuna ongo wendo pu.” nirimu kinia <sup>26</sup> kurumuni yemo ambolopa tondolo mundupa puru-puru sipale kalli nilipa ombo wendo purumu.

<sup>27</sup> „Yesusini aku serimu kanokole, yomboma pungu-pungu ningu, mini-wale munduku ono onono anju yando ninguli: “I ungumu nambolka unguri sekemonje? Ungu-mane konde se wendo ombámo. Ye namba lieli sene we-yombomando “Saa.” nilimú mele i yemone kurumando kepe aku sipa nilimú kinia kanu kuruma yunga ungumu pilku liku selemele.” niringi. <sup>28</sup> Kanu-kinia kolea Gallilli disiriki koleamanga pali yuni aku sipa serimu mele semanemo popenge sepa para-nanga lepa purumu pilieringi.

1:29-34

### *Yesusini Pitanga Kolepa-Ambomo Kinia Yombo Awisili Sepa Peanga Sirimu Semanetolo*

<sup>29</sup> Kanu-kinia Yesusi-kinia, yu lombili andoli yema kinia, ono kanu maku toko Pulu Yemonga ungumu pilieringi ulkamo munduku kelko wendo ongole niringimuni, ono kinia, Jemisi Jonotolo kinia ono pungu Saimono kinia Enderutolonga ulkana puringi.

<sup>30</sup> Ulkana sukundu puringi kinia Saimononga kolepa-ambomo kuru topa kangi nopili lierimumu Yesusi ningu siringi. <sup>31</sup> Aku siku niringi pilipale ambomo lierimuna pumba yunga kimu ambolopale yu ola lilltimu kinia kangi nomba kelierimu kinia ambomone 'ola gilipa wendo ombale, oringi-yema kere-langi sipa nokoramu.

<sup>32</sup> Pe kolea kalá topa ena purumu kinia, kuru torumu yomboma kinia, konopuna kuru molorumu yomboma kinia, Yesusi molorumuna mengo oringi. <sup>33</sup> Kanu koleana moloringi yomboma pali Saimononga ulka-kerepuluna ongo maku toringi. <sup>34</sup> Kanu-kinia Yesusini yombo kuru lupa lupa torumu awisili sepa peanga sipa, yombomanga konopuna moloringi kuru awisili topa makororumula. Kurumane Yesusi 'Pulu Yemonga Malo, yu Pulu Yemone nimba taltopa lipa mundorumu ye nokoli Karasimu, molorumu mele pilieringi-kulu yuni onondo "Molio mele anju ningu naa siee." nimba ononga kerema pipi sirimu.

1:35-39

### *Yesusi Yu Yuyu Senga Molopa Pulu Yemo Kinia Ungu Nimba, Kolea Gallilli Disiriki Ungu Nimba Silipa Andorumu Semanemo*

<sup>35</sup> Orili-u, kolea muni u naa lepa simbulu topa pepili Yesusi ola molopa penando pumbale nirimunumi, kolea ku lieli senga pumba, akuna Pulu Yemo-kinia ungu nimba molorumu. <sup>36</sup> Saimono kinia pea moloringi yema kinia ono yu koroleko lombili punguli niringimuni, <sup>37</sup> yu kanoko lendeko yundu ninguli: "Yombomane pali nu korokomele." niringi.

<sup>38</sup> Aku niringi pilipale, yuni onondo nimba: "Na kolea marenga kepe ungu nimbu siembo kene i koleamo mundupu kelepo kolea senga pamili. Ne nondopa lemó koleamanga pamili. Na koleamanga pali ungu nimbu simbundu mana-mania orundu kanumu." nirimu.

<sup>39</sup> Aku nimba: yu kolea Gallilli disiriki sukundu koleamanga pali andopa Juda yomboma maku toko Pulu Yemonga ungumu pilieringi ulkamanga sukundu pumba ungu nimba sipa, yombomanga konopuna kuru moloringima topa makororumu.

1:40-45

### *Yesusini Kuru Laká Norumu Ye Se Sepa Peanga Sirimu Semanemo*

<sup>40</sup> Walte kuru laká nomba perimu ye se Yesusi molorumuna ombo yunga kumbikerena komorongo langopa yu mawa sepa nimba: "Nunga konopumuni na 'Peanga liepili.' konopu lienu liemu nuni na manda seko peanga sini." nirimu.

<sup>41</sup> Kanu-kinia Yesusini yu paa kondo kolopale yunga kimuni yemo ambolopa yundu nimba: "'Nu peanga liepili molani.' konopu lekero kene peanga liepili molou." nirimu kinia <sup>42</sup> kuru lakámo popenge sepa nomba kelierimu, yemo peanga lepa umbu-kangi lilltimu.

<sup>43-44</sup> Kanu-kinia Yesusini yu ungu se tondolo mundupa nimba: "Nuni ya ungu sekeromo yombo selurindu kepe paa naa ni! Sumbi siku pungu Pulu Yemo popo tondoli yemo nunga kangimu liku ora siku, 'Na kelepo kangi peanga liepili molkoro kene.' ningu Mosisini "Sei." nimba ungu-mane sirimumu pilku liku senindu "Pulu Yemo popo toko kalko siee." nirimu mélemo liku Pulu Yemo popo tondoli yemondo "Kalondou." ningu yu sieni. Pe yombomane nu kanokole 'Yu sika kangi peanga liepili molemo.' ningu piliangi kene nikiru mele iseli-u se-pu." nirimu.

<sup>45</sup> Aku-na-kolo yemo yu anju pumbale ungu awisili yombo awisilindu anju anju nimba para silipa andopa, Yesusini yu-kinia serimu semanemo topa sirimu. Yemone

aku serimu-kulu Yesusi , ‘Yombo awisili na molombona nondoko nondoko ongo maku naa tangi.’ nimba , kelepa taonomanga sukundu mona manda naa andopale kolea ku lielina molorumu, aku-na-kolo kanuna yombo awisili kolea lupa lupamanga molko sukundu sukundu ongo yu molorumuna maku toringi.

## 2

2:1-12

*Yesusini Kimbu-Ki Kolopa Pora Sirimu Ye Senga Ulu-Pulu-Kirima We Siye Kolopa, Yu Sepa Peanga Sirimu Semanemo*

<sup>1</sup> Wale mare ombo purumu kinia Yesusi Kapaniame taono kelepa sukundu purumu. Yu u perimu ulkana kelepa ombo molorumu yombomane pilkuli <sup>2</sup> ono awisili ongo ulkana sukundu sukundu ongo liku maku toko moloringi kinia ulka kanuna ekelepa serimu-kulu yombo mare molonge kolea se naa lierimu-kulu pena moloringila. Yuni ono ,Pulu Yemonga, ungumu nimba sipa molorumu.

<sup>3</sup> ,Yuni nirimu mele aku siku maku toko pilku molangi, yombo mare kimbu ki kolopa pora sirimu ye se mengo oringi. Kanu yombomanga ye kisene kanu yemo taropola seko mengo Yesusi molorumuna onge oringi-na-kolo <sup>4</sup> yombo awisili ulkana ekelepa seko gilieringi-kulu yu molorumuna nondoko mengo pungí aulka se naa lierimu-kulu ulka imuna mengo ola punguli Yesusi molorumuna kana-kana ulkamo sikisikuli yemo taropola pali moko toko mania mundoringi.

<sup>5</sup> , ‘Yesusini i yemo manda sepa peanga simba.’ ningi, kuru mondokole yu mengo oringi kanopa pilipale Yesusini kimbu-ki kolopa pora sirimu yemondo nimbale: “Nanga kangomo, nunga konopuna ulu-pulu-kiri serinu pelemoma mania pupili, we siye kolkoro.” nirimu.

<sup>6-7</sup> ,Kanu-kinia,, Pulu Yemonga ungu-manemanga puluma pilku mane siringi ye mare onono akuna molko ,Yesusini aku nirimu kinia pilkuli pilku kiri pilku, konopu kimbu sikuli, “Nendi yemone ungu aku sipa nambi semu-na nikimuye? Yu Pulu Yemo marake sekemo. Yombomane ulu-pulu-kiri selemelema nawene ‘Mania pupili, siye kolkoro.’ manda nimbáye? Pulu Yemone mindi manda selemo.” ningi onono ningi pilku molko konopu kimbú siringi.

<sup>8</sup> Kanu-kinia Yesusini ono aku siku konopu kimbú siku moloringi mele yunga konopumuni sumbi sipa pilipa onondo nimbale: “Onone ,nane nikirumunga, aku siku nambi semu-na konopu kimbú sikimiliye? <sup>9</sup> I yemondo “Nunga ulu-pulu-kirima mania pupili, we siye kolkoro.” nimbú kinia ono ulu se naa kanokole ‘Pe nilse nikimu.’ konopu lengeye? Molo “Ola gilku nunga kunungumu liku mengo kimbu-kongono seko andou.” nimbú kinia yu ola gilimbane naa gilimbanje mona lemba manda kanokole ‘Aku sipa kála sepa nikimunje.’ konopu lengeye? <sup>10</sup> Aku-sipa nakolo ‘ ‘Mania Ombo Mana-Ye Au Lierimu Yemo tondolo pelemomone ya ma-koleana yombomanga ulu-pulu-kirima “Mania pupili, we siye kolkoro.” manda nimbá.’ ningi piliangi.’ nimbu aku sipu nindu.” nirimu.

Aku nimbale kimbu-ki kolopa pora sili yemondo nimbale: <sup>11</sup> “Nane ‘Nu ola gilku nunga kunungumu liku mengo ulkando pu.’ nikiru.” nirimu. <sup>12</sup> Aku nirimu kinia yemo ola gilipa popenge sepa kunungumu lipa memba, ono pali kanoko molangi ombo pena purumu. Yu aku serimu kanokole ono pungu-pungu ningi miniwale mundukuli Pulu Yemonga imbi ambolko paka tondoko yu kape ningi ninguli: “Olio i ulu wendo okomo kanokomolo mele u walte kepe ulu se aku sipu paa naa kanorumulu.” niringi.

2:13-17

*Yesusini Mateyu LLipaindu “Na Lombili Ou.” Nirimu Semanemo*

<sup>13</sup> Yesusi ,ulkamo mundupa kelepa, pena pumbale kelepa Gallilli nomu kelona pumba andopa molorumu. Kanu-kinia yu molorumuna yombo awisili ongo liku maku toko moloringi kinia yuni ono mane sirimu.

<sup>14</sup> Kanu-kinia yu pumbá pumbale nirimumuni, Allapiasi malo LLipai kou-takisi liltingi ulkana ,kou-takisi lipa, molorumu kanopale yundu “Nu na-kinia pea pambililombili ou.” nirimu. Kanu-kinia LLipai yu ola gilipa yu lombili purumu.

<sup>15</sup> Pe Yesusi LLipainga ulkana kere-langi nomba molorumu kinia kou-takisi lili yema kinia, „Juda ye awilimane, “ulu-pulu-kiri seli ye” ,niringi, ye wema kinia awisili ongo Yesusi kinia yu lombili andoli yema kinia ono pea mania molko kere-langi norangi. Aku sili yombo awisili alieli yu lombili andoringimunga ono awisili ,akuna lombili pungu, pea kere-langi nongo moloringi.

<sup>16</sup> Yesusi yu “ulu-pulu-kiri selima” niringi yombo wema kinia kou-takisi lili yema kinia pea kere-langi nongo moloringi kanokole Parisi ye marene, Pulu Yemonga ungu-manemanga puluma pilku mane siringi kanu yemane, Yesusi lombili andolimando ninguli: “Kou-takisi lili yema kinia, ulu-pulu-kirima seli wema kinia, ono-kinia yu nambi semu-na kere-langi pea nokomeleye?” niringi.

<sup>17</sup> Aku siku niringi pilipale Yesusini onondo nimbale: “Kuru naa tolemo yomboma doketana naa pulimili. Kuru tolemo yomboma mindi doketana pulimili kanumu. Nane “Yombo sumbi nilima na molombona wangi.” nimbündu ma-koleana naa oruntu. ‘Ulu-pulu-kiri seli yomboma na molombona wangi.’ nimbündu oruntu. Ulu-pulu-kiri seli yomboma lipu tapondombondo oruntu.” nirimu.

2:18-22

### *Yombomane Walte Walte Kere-Langi Naa Nongo Mi Lemele Ulumunga Ungu Se*

<sup>18</sup> „No Lindeli, Jono lombili andoringi yema kinia, Parisi yema lombili andoringima kinia, ono wale marenga kere-langi mi leko naa norangi mele walte aku siku seko moloringila. „Aku seringi-kulu, yombo mare Yesusi molorumuna ongo yu mangilku pilku ninguli: “Jono lombili andolima kinia, Parisi yema lombili andolima kinia, alieli kere-langi mi leko naa nolemele-na-kolo nu lombili andolima aku siku naa selemele akumu nambi semu-na naa selemeleye?” niringi.

<sup>19</sup> „Aku siku niringi kinia pilipale, Yesusini pundu topa onondo ,ungu-iku se topa yu toko kondonge kolombamonga ungu se nimba, nimbale: “Ambo limba ye se yunga pulu lemó yema kinia molemo kinia ono konopu sikuli “Kere-langi mi lepo naa namili.” manda ningíye? „Manda naa ningí..” <sup>20</sup> Aku-sipa na-kolo pe, ambo limba yemo ono molongena ongo wendo lingí kinia kanu walemanga sika „konopu kiri panjiku, kere-langi naa nongendo mi lenge. „Iseli-u mólo..” „nirimu..”

<sup>21</sup> “Mulu-maminia u se sungu nilimú kinia olione mulu-maminia paa konde senga se kopisipu lipu, sungu nilimúmunga naa topo tandolemolo kanumu. Yombo sene aku sipa topa tandolkanje kanu mulu-maminiamo nona panjilka kinia mulu-maminia konde kopiselimu kanga lepa lli nimbale mulu-maminia umu kelepa kamu awili sepa sungu nilka.

<sup>22</sup> Kongi-meme kangimuni seli mingi-u senga no-waene konde naala kololemolo kanumu. Yombo sene mingi-u senga no-waene konde se kolkanje kanu no-waenemo mingina sukundu pepale pe akolka kinia kanu mingi-umu naa akopa sungu nilka. Kanu-kinia nomo kepe mingimu kepe kamu kiri lelka. Akumunga no-waene konde kongi-meme kangimuni seli mingi kondena mindi kololemolo kanumu.” nirimu.

2:23—3:6

### *Koro Moloringi Sambate Walemonga Semane Talo Se: 2:23-28*

*Yesusi Yuni Sambate Walemo Nokolemomonga Semane Se*

<sup>23</sup> Walte, „koro moloringi, wale Sambate senga, Yesusi kinia yu lombili andolima kinia rasi-witi kaliasi manga onto puringi kinia yu lombili andoli yemane rasi-witi mongo mare „nongendo, inia toringi. <sup>24</sup> Aku seringi kanokole Parisi yemane Yesusindu ninguli: “Kána! „Koro molemolo, wale Sambatemonga ‘Kongono naa sangi.’ nimba pelemo ungu-manemo nambi semu-na nu lombili andoli yemane manemo pulua tokole aku siku sekemeleye?” niringi.

<sup>25</sup> Yesusini pundu topa nimbale: “Ono Pulu Yemonga bokuna sukundu „anda-kolepa ye nokoli kingi, Depitini serimu mele nimba molemo semanemo kanokole „semanemonga pulumu, naa pilielemeye? Depiti kinia yu pea puringi yema kinia ono „kere-lang, mólo torumu, munga, gelene kolokole niringimuni, <sup>26</sup> Pulu Yemo popo tondoringi ye awili olandopa Apayata molopili Depiti Pulu Yemo molorumu serele-ulana sukundu pumba, Pulu Yemonga kumbikerena lierimu pellawa kalolima lipa nomba, yu pea puringi yema sirimu noringila kanumu. Kanu pellawa kalolimando Pulu Yemone ungu-mane sipa nimbale:

“We-yombomane paa naa nangi!

Pulu Yemo popo tondoli yema manjiku nangi!”  
nirimu „kanu ungu-manemo pulua torumu, kanumu.  
„Ono konopu talo nambi semu-na lemeleye? Depiti yuni u aku serimu mele ono pilku kiri naa pilielememonga pe kiniá na lombili andoli yemane sekemele mele kanoko kiri naala piliaa!” nirimu.

<sup>27</sup> Aku nimba ungu se pea nimbale: “Pulu Yemone ‘Yomboma molko kondangi.’ nimba „koro molonge, wale Sambatemo lipa ono sirimu kanumu. ‘Sambate walemo pepa kondopili.’ nimba yomboma lipa Sambate walemo naa sirimu. <sup>28</sup> Akumunga Sambate walemo kepe Mania Ombo Mana-Ye Au Lierimu Yemo nokolemo yemo molemo-na ‘Sambate wale kinia yomboma molko kondongendo senge mele manda nimbá kanumu.’” nirimu.

### 3

Se: 3:1-6

*Sambate Wale Kinia Yesusini Ki Kiri Lierimu Ye Se Sepa Peanga Sirimu Semanemo (2:23-28 kinia pea)*

<sup>1</sup> Pe walte Yesusi pumba Juda yomboma maku toko Pulu Yemonga ungu pilieringi ulka senga purumu. Kanu ulkana ye se molorumu, yunga ki se kamu kolopa kukorumu. <sup>2</sup> Kanu-kinia akuna moloringi ye marene ‘Yesusini ulu se sepa kinjimba kinia yu kote sendemolo.’ ningi ulu se sepa kinjimba se „alieli koroko molkole, ‘Koro molemolo, wale Sambate kinia yuni yemo sepa peanga simbanje.’ ningi yu mimi siku kanoko moloringi. <sup>3</sup> Yesusini kanu ki kolopa kukorumu yemondo nimbale: “Yomboma molemelena onto ola giliei.” nirimu.

<sup>4</sup> Kanu-kinia yemando nimbale: “Sambate wale kinia ulu nambolka ulu se manda semoloye? ‘Sambate walemonga ungu-manemone “Sangi.”’ nilimú mele samili.’ nimbu yomboma lipu tapondomolo kinia manda molo sepo kinjimulú kinia mandaye? ‘Naa kolangi konde pang.’ nimbu semolomo manda molo topo kondomolomo mandaye?’ nimba mangilierimu kinia pilkuli onone ungu se pundu toko naa ningi we moloringi.

<sup>5</sup> Yuni ono neme-neme nimba kanopale mumindili kolopa ono yemo kondo naa koloringi kanopale lakopa konopu kiri panjipale ki kolopa kukorumu yemondo nimbale: “Nunga kimu siniu si.” nirimu kinia yemone yunga kimu siniu sirimu kinia ki kolopa kukorumumu kelepa kamu peanga lierimu.

<sup>6</sup> „Yesusini aku serimu kinia kanokole, Parisi yema pena pungu, ono kinia ye nokoli kingi Erotenga talapena yema kinia maku toko “Yu nambi sepo topo kondomoloye?” ningu aulka se kororingi.

3:7—6:6

## **Yesusini Yu Tondolo Perimu Mele Yomboma Lipa Ora Sirimu-Na-Kolo Kolea Pulu Yombomane ‘Yu Sika Pulu Yemone Lipa Mundorumu Ye Nokoli Karasimu.’ Ning Naa Pilieringi Semanemo**

3:7-12

*Yombo Paa Awisili Gallilli Nomu Kelona Yesusi Molorumuna Ongo Maku Toko  
Moloringi Semanemo*

7-8 Yesusi kinia yu lombili andolima kinia ono Gallilli nomu puringi kinia yombo awisili lombili puringila. Kolea Gallilli disiriki yomboma kinia, Judia disiriki yomboma kinia, kolea-awili Jerusalleme yomboma kinia, Idumia disiriki yomboma kinia, no Jodane nekendo lemó koleamanga yomboma kinia, kolea-awili Taya kinia Saidonotolo lierimu koleamanga yomboma kinia, aku koleamanga moloringi yomboma pali Yesusi uluma sepa molorumu mele pilkuli yu molorumuna oringi.

9-10 Yesusini yombo awisili sepa peanga sirimu-kulu yombo kuru lupa lupa torumumane ‘Yu ambolamili.’ ningu yu gilierimuna nondoko pungíndu ekelepa seringi-kulu Yesusini yu lombili andolimando nimbale: “Yombo paa awisili ongo molemele. Yomboma na molombona nondoko ongo ekelepa naa sangi kene sipi se nondoko mengo ongo taltangi. Na molombona yomboma nondoko ongo ekelepa senge kinia sipina sukundu pumbú.” nirimu.

11 „Yombomanga konopumanga, kuru moloringimane yu kanokole alielie komorongo toko pondoko tondolo ru ningu ninguli: “Nu Pulu Yemonga Malo.” niringi,  
12 aku-na-kolo Yesusini onondo nimbale: “Yu ‚sika, molemo mele ‚yombomane naa piliangi kene, paa naa ningu para siee!” nirimu.

3:13-19

*Yesusi Yu Yuyu Lipa Mundumba Yema Nimba Taltorumu Semanemo*

13 „Pe walte, Yesusi yu ma-pangi senga ola pumbale yuyu pilipale ‘yu kinia pea kopu sepo molamili.’ nimba pilierimu yemando “Waa.” nirimu kinia yu molorumuna oringi. 14-15 Oringi yemanga ye engaki rurepo lipa, yu kinia pea kopu seko molko, “Ono nanga kongonomo sende-pangi lipu mundumbu yema molangi.” nimba ono nimba taltorumu. ‘Ono koleamanga andoko Pulu Yemonga semane peangamo toko si-pungu, yombomanga konopumanga kuru molombama toko makoronge tondolomo ono-kinia pepili andoko toko makorangi lipu mundumbu.’ nimba kanu ye engaki rurepo aku sipa nimba taltorumu.

16 Kanu ye rurepo nimba taltorumumanga imbima i-sipa: Saimono (yunga imbi se Pita) yu keme, 17 Seperi malo Jemisi keme, Jemisi genu Jono keme, (olo imbi se Boanekesi sirimula. Boanekesi yunga ungu-pulumu mulú tolimuma malotolo.) olo kinia, 18 „Pita genu, Enderu keme, Pillipu, Batollomiu, Mateyu, Tomasi akupoko keme, Allapiasinga malo Jemisi keme, Tadiasi keme, “Olio Juda yomboma oliolio gapomano molamili.” niringi talape ye Saimono keme, 19 Judasi Isikeriote, Yesusi pe lipa opa-touma sirimu yemo keme, ‚aku yema ‘yunga kongonomo sende-pangi lipu mundumbu.’ nimba taltorumu yema.„

3:20-30

*“Yesusi Kinia Kurumanga Nokoli Setene Kinia Kopu Seko Kongono Selembele.”  
Niringi Semanemo*

<sup>20</sup> Kanu-kinia Yesusi kinia yu lombili andolima kinia ono ulka senga sukundu puringi kinia yombo awisili akuna ongo liku maku toko moloringi-kulu ono kere-langi nonge ena se kepe paa naa lierimu. <sup>21</sup> Kanu-kinia Yesusi pulu lierimu yomboma „Yesusini aku serimu mele, pilkuli “Kangomo paa amu tomu.” ningu yu lingí oringi.

<sup>22</sup> Pulu Yemonga ungu-manemanga puluma pilku mane siringi ye mare Jerusalleme molko oringi kanu yemane ninguli: “Kurumanga nokoli Belsipuli Yesusinga konop-una molopale yu tondolo silimú-na yuni kuruma topa makorolemo.” niringi.

<sup>23</sup> Aku siku niringi pilipale „Yesusi Setene-kinia opa-tou moloringilimunga ‘Setenene yu naa lipa tapondolka paa piliangi.’ nimba, Yesusini onondo “Waa.” nimbale onondo ungu-iku topa nimbale: “Setenene Setene yuyu nambi sepa topa makoram-baye? <sup>24</sup> Yombo talape se konopu seluna naa pupili molko suku-singina ówa panjiku ono onono opa seko lupa lupa molemele kinia kanu talapemo pora nilimú. <sup>25</sup> „Molo, ulka seluna pelemele yomboma konopu seluna pupili naa molko ono onono opa selemele kinia kanu yombo talapemo sungu siku yu-mele-mele molemele. <sup>26</sup> Aku sipala, Setenene yunga kuru se makorolkanje aku selkamonga yunga talapemo kinia opa mele selka. Pe yunga talapemo manda naa molemolá. Pora nilka.

<sup>27</sup> “Ye enge nili sene yunga ulkamo nokopa kondolemo kinia ye sene we manda sukundu ombo mélema wa lipa memba pulimúye? Akumu manda mólo. U wa noli yemone ye enge nílimunga kimbu kima ka topale yunga ulkana manda ombo mélema wa limú kanumu.

<sup>28</sup> „Akumunga, nane onondo paa sika nimbu sikiru: “Yombomane ulu-pulu-kirima seko „Pulu Yemo, ungu-taka tondoko ningu kinjilimili uluma kinia, ononga ulu-pulu-kiri wema kinia pali „Pulu Yemone, ‘Mania pupili.’ nimba siye kolomba. <sup>29</sup> Aku-sipa na-ku yombo sene Mini Kake Sélimu ungu-taka tondopa, nimba kinjipa, marake selemo yombomo yu Pulu Yemone aku sipa ulu-pulu-kiri selemoma ‘Mania naa pupili.’ nimba paa siye naa kolomba. ‘Alieli pepa mindi pupili.’ nimbá.” nikiru.” nimba Yesusini, nirimu.

<sup>30</sup> Onone “Yu kuru se yunga konopuna molemo.” niringimunga „aku siku Mini Kake Sélimu ningu kinjeringimunga, Yesusini onondo aku sipa nirimu.

**3:31-35**

### *Yesusinga Anumu Kinia Genupili Kinia Akumanga Semane Se*

<sup>31-32</sup> Kanu-kinia yombo awisili mania „molko, Yesusini „mane sirimu unguma pilku, molangi yunga anumu kinia genupili keme yu-kinia ungu ningíndu ongo pena gilkü “Yu-kinia ungu niemili opili.” ningu ungu se ningu mundoringi kinia yombomane yundu ninguli: “Aminia kinia genali keme nu-kinia ungu ningíndu ongo pena gilimili.” niringi.

<sup>33</sup> Yesusini onondo pundu topa nimbale: “Nanga anumu nawe? Nanga genupili namele?” nimbale nirimumuni, <sup>34</sup> yunga ungumu mania molko pilku moloringi yomboma neme-neme nimba kanopa nimbale: “I yomboma nanga anumu kinia nanga genupilima molemele. <sup>35</sup> Pulu Yemone “Sangi” nilimú mele pilku liku selemele yomboma nanga anumu kinia nanga genupili kemulupilima keme molemelemonga aku sипу nikiru.” nirimu.

**4:1-34**

## **Yesusini Ungu-Iku Mare Torumu Unguma**

### **4**

**4:1-2**

### *Yesusini Ungu-Iku Mare Torumumanga Pulu-Pulu Semanemo*

<sup>1</sup> Walte Yesusi kelepa „Gallilli, nomu kelona pumba yomboma mane sipa molorumu kinia yombo paa awisili yu molorumuna ongo maku toko moloringimunga nona

andoli sipi se lierimumunga suku pumba mania molorumu, yomboma nomu kelona gilieringi.<sup>2</sup> Yuni onondo ungu awisili nimba simbando ungu-iku pokore torumu.

'Ono mane siembo.' nimbale ungu-iku se i-sipa topa nimbale:

4:3-9,13-20

## *Ye Sene Kere-Langi Umbu Kaliana Tanda Sirimu Ungu-Ikumu*

<sup>3</sup> "Piliame. Ye sene rasi-witi umbu kaliana andopa tanda sirimu.

<sup>4</sup> Tanda silipa andorumu kinia umbu mare aulkana mania purumu, kanuma keramane ongo liku noringi.

<sup>5</sup> Umbu mare kou perimuna mania pumbale ma kanga-kolte mindi lierimu-kulu nondopa téko nimba wendo orumu. <sup>6</sup> Aku-na-kolo pulkonio naa mundorumu-kulu ena serimu kinia kanuma kolorumu.

<sup>7</sup> Umbu mare siri-ka mele molorumuna mania purumu, siri-ka mélemo wendo omba witi-umbuma topa norumu-kulu omba peanga naa lepa mongo se naa torumu.

<sup>8</sup> Umbu mare ma peangana mania purumuma wendo wendo ombo akopale mongo peangama torumu. Mare mongo towapu-selu mele topa, mare mongo towapu-talo mele topa, mare towapu-kise mele torumu.” , nirimu.

<sup>9</sup> Aku nimbaile “Yombo komu-pea lemomane i ungumu piliaa.” nirimu.

4:10-12

*Yesusindu "Ungu-Ikuma Nambi Semu-Na Tolenoye?" Ningu Mangilku Pilieringi  
Semanemo*

<sup>10</sup> Pe we-yomboma pali puringi kinia yu lombili andoli ye engaki rurepo kinia yombo mare pea yu kinia moloringima kinia, onone yu mangilku ninguli: "Nu yombomando ungu se ninindu nambi semu-na ungu-iku tolenoye?" niringi.

<sup>11-12</sup> Yuni onondo pundu topa nimbale: "Pulu Yemo ye nokoli kingimu molopa yomboma kinia mélema kinia nokolemomonga ulu-pulu u yuyu pilierimu kanu ulu-puluma 'Kiniá ono na lombili olemele yomboma, piliangi.' nimbale ono nimba sikimu. Aku-sipa na-kolo ultu molemele yomboma 'Unguma nimbu siembo.' nimbili ungu-ikuma mindi topo siliu.

„Pulu Yemone Aisayanga kerena nimbaile: „

‘Ono mongone kanokole naa kanoko,

komuni pilkuli naa pilielemele.

Konopumuni pilkuli topèle tolemolá kinia,

„Pulu Yemone, ononga ulu-pulu-kirima

'Mania pupili.' nimba siye kolka.'

nirimu akumunga we-yombomando ungu-ikuma mindi tollo." nirimu.  
412-22 (K. ilo, i. d. i. i. l. 412-2)

<sup>12</sup> Alas, said the Hawaiian, "I had a bird, a sparrow, 'U-

<sup>13</sup> Aku nimba Yesusini onondo kelepa nimba: "Ungu-iku topo nindu akumunga ungu-pulumu naa pilielemeye? Akumu naa pilkuli we-ungu-ikumanga pali ungu-pulumu nambi seko pilingiye? „Ungu-ikumunga pulumu i-sipa:„

<sup>14</sup> Kere-langi umbu tanda sirimu yemone tanda sirimu umbuma „Pulu Yemonga, ungumu. <sup>15</sup> Umbu mare tanda sirimu aulkana mania purumuma yombo mare aku siku mele molemele. Onone ungumu pilielemele kinia pe „kurumanga nokoli, Setenene sumbi sipa ombo ungu tanda sili konopuna pumba pelemoma wendo limú.

<sup>16</sup> Aku sipala, umbu mare tanda sirimu kou perimuna mania purumuma yombo mare aku siku mele molemele. Onone ungumu pilkuli waltikele sumbi siku konopu siku pilku limili. <sup>17</sup> Aku-na-kolo ono pulkonio naa mundukuli ungumu kanga-kolte mindi pilku molemele. Pe ono konopuna umbuna selemo kinia molo ono ,Pulu Yemonga, ungumu pilku liku molemele mele yombo lupamane kanoko kiri pilkuli ungu-taka tondoko seko kinjiku mindili silimili kinia ononga pilielemele unguma siye kololemele.

18-19 Umbu mare tanda sirimu siri-ka mele molorumuna mania purumuma yombo mare kepe aku siku mele molemele. Onone ungumu pilielememe-na-kolo konopuna umbuna selemo umbunama kinia, méle awisili taltokole ‘Aku mélemane olio lipa tapondolemo tapondomba.’ ningu pilku molemele uluma kinia, méle naa taltolemelema yakala kolko ‘liemili.’ konopu lemele ulu mare kinia, kanu sili ulu mare wendo omba ungu kanumu topa nolemo kinia ungumuni uluri naa sepa kere-langi mongo naa tolemo.

20 Umbu mare tanda sirimu ma peangana mania purumuma yombo mare aku siku mele molemele. Onone ungumu pilkuli ungu-pulumu pilku kondoko ungumu kamu pilku limili. Pe ono kere-langi mongo mele tolemele. Kanu yombo marenga kere-langi mongo towapu-selu mele topa, yombo marenga mongo towapu-talo mele topa, marenga mongo towapu-kise mele topa, aku sipa tolemo.

‘Ungu-ikumunga ungu-pulumu aku sipa.’ nirimu.

*4:21-25*

### *Sepe-Llamemonga Ungu-Ikumu*

21 ‘Aku nimbale ungu-iku se pea topa nimbale:’

“Yombomane sepe-llame kandokole mingina sukundu panjilimiliye? Molo polo maniakondo taltolemeleye? Polo senga ola taltolemele kanumu. 22 Aku sipa mele, kiniá lopi selemo mélema pe walte mona lemba yomboma kanonge; kiniá aki topa lemó mélema pe walte pa sembá kinia yombomane kanu mélema kanonge.

23 Yombo komu-pea lemomane ‘ungu nikirumu, piliaa.’ nirimu.

24 “Onone ungu pilielememe akumu mimi siku piliangi. Onone mélema yomboma silimili mele ‘Pulu Yemone,’ ono aku sipa méle kalomba. Mare olandopa simbala.

25 Mélema taltolemo yombomo nane mare pea simbú, yu paa awisili taltomba. Aku sipa na-kolo mélema naa taltolemo yombomo yu taltolemoma kepe wendo limbu.” nirimu.

*4:26-32*

### *Pulu Yemo Ye Nokoli Kingimu Molemomonga Ungu-Iku Talo*

*Se: 4:26-29*

### *Kere-Langi Umbuma Tóko Nimba Omba Akolemomonga Ungu-Ikumu*

26 Yesusini ungu se pea nimbale:

“Pulu Yemo ye nokoli kingimu molopa yomboma nokolemo akumu i-sipa mele:

“Ye sene kere-langi umbu mana tanda silimú. 27 Aku yemo ipulieli uru pepa, tangoli ola molopa ‘andopa kongono sepa,’ selemo kinia kere-langi umbu tanda silimúma téko nimba omba akolemo-na-kolo aku sipa selemomonga pulumu yemone nimba naa kanopa naa pilielemo. 28 Kere-langi umbu tolemoma mamone yu yuyu ‘wendo opili.’ nilimú. Ú kumbi lepa téko nilimú. Pe gomo tolemo. Pe kere-langi mongo tolemo. 29 Pe kere-langi nou lemó kinia ‘Kere-langi inia topo sukundu sukundu limbu walemo wendo okomo.’ nimbale kere-langi umbu tolemo yemone kere-langi inia tolemo. ‘Pulu Yemo ye nokoli kingimu molopa yomboma nokolemo aku sipa molemo.’ nirimu.

*Se: 4:30-32*

### *Unju Masetete Umbumunga Ungu-Ikumu*

30 Pe Yesusini onondo kelepa nimbale:

“Pulu Yemo ye nokoli kingimu molopa yomboma nokolemo akumu nambolka mélse mele niemboye? ‘Yu kingimu molopa yomboma nokolemo mele piliangi nimbu siembo.’ nimbali nambolka ungu-ikumu topo niemboye?” ‘nimbae nirimumuni, kelepa ungu-iku se pea topa nimbale:’

<sup>31</sup> "Pulu Yemo ye nokoli kingimu molopa yomboma nokolemo akumu unju masetete umbu mele. Yomboma kere-langí umbu kaliana mundulimilimanga pali unju masetete umbumu yu paa kangamo. <sup>32</sup> Aku-na-kolo kaliana mundulimili kinia wendo omba akolemo kinia kaliana molemo mélemanga pali yu paa awilimu. Kamu akopa unju-mele gilimú kinia kerama kanu unju kolamanga ongo pelemele. Pulu Yemo ye nokoli kingimu molopa yomboma nokolemo mele aku sipa." nirimu.

4:33-34

### *Yesusini Ungu-Ikuma Mindi Torumumunga Ungu-Pulu Se*

<sup>33</sup> Yesusini unguma yomboma nimba simbando ungu-iku awisili aku sipama topa sirimu. Ono manda pilingí mele topa sirimu. <sup>34</sup> Ono ungu se nimba simbando ungu-iku se mindi torumu. „Ungu se sumbi sipa naa nimba sirimu., Aku-na-kolo yu kinia yu lombili andolima kinia ono onono moloringi kinia yuni yunga ungumanga puluma pali ono sumbi sipa nimba para sirimu.

4:35-41

### *Poporome Awili Se Torumumuni Yesusinga Ungumu Pilipa Liltimu Semanemo*

<sup>35</sup> Kanu walemonga kolea kala torumu kinia Yesusini yu lombili andoli yemando nimbale: "Nomu nekendo pamolo." nirimu kinia <sup>36</sup> nona andoli sipi senga Yesusi u suku molopale unguma nirimu akuna suku yu we molopili nomu kelona maku toko moloringi yomboma munduku kelko yu mengo puringi. Sipina puringi kinia sipi mare pea puringila. <sup>37</sup> Kanu-kinia, nomuna pungí puringi kinia poporome paa awili se nomuna torumu. Aku serimu-na nomumu apisipa ola ombale no sipina sukundu sukundu ombo peke lepale sipimu memba nona mania pumbá serimu, <sup>38</sup> aku-na-kolo Yesusi sipimunga bulkundu penge-kanda wale senga we uru perimu. Yu lombili andoli yemane yu toko makisindiku ninguli: "Ungu Mane Sili Yemo, olio nona wangopo kolomolomonga nu mini-wale naa pukumuye?" nirungi.

<sup>39</sup> Yu makilipale poporamemo iri topa nomumundu nimbale: "Taka leko molou!" nirimu kinia poporamemo topa kelepa nomumu lope naa sepa paa we lierimu.

<sup>40</sup> Kanu-kinia yuni lombili andolimando nimbale: "Ono nambi semu-na mini-wale mundukumiliye? „Selio mele wale awisili kanolemele-na-kolo, yandopa kiniá kepe 'Olio naa nokombanje.' ninguli pilku kuru naa mondolemeleye?" nirimu.

<sup>41</sup> „Yuni serimu mele kanokole, yemane mini-wale munduku pipili awili seko kolkole anju yando onono mangilku ninguli: "Apa! I yemo nawenje? Poporamemone kepe nomumuni kepe yunga ungumu pilku liku kelkembele." nirungi.

## 5

5:1-20

### *Kuru Paa Awisili Ye Senga Konopuna Molopa Ambolorumuma Yesusini Topa Makororumu Semanemo*

<sup>1</sup> Kanu-kinia, Yesusi kinia yu lombili andoli yema kinia, ono „nona andoli sipina, nomu nekendo pungu kolea Gerasa puringi. <sup>2</sup> Akuna oringi kinia Yesusi sipina wendo orumu kinia konopuna kuru molorumu ye se, yombo-óno-koleana pelepa andorumumu popenge sepa wendo omba yu molorumuna orumu. <sup>3-4</sup> Kanu yemo, yombo-óno-koleana yunga perimu koleamo lierimu. „Kurumu yunga konopuna molorumumunga yu paa enge nirimu-kulu, yombomane yu alieli-alieli ka wemane kinia, ka-sénene kinia kepe yu kimbu kima ka toringi ka-sénema yu sungu sipa, kimbutolo anakapa toko panjeringimu elke-malke tondorumu. Ye seluri kepe enge se perimu-na 'Yu taka lepa molopili.' nimba manda ambolopa nokomba ye se paa naa molorumu. <sup>5</sup> Alieli, ipulieli kepe tangoli kepe, yombo-óno-koleana kinia mapangimanga kinia kalli nilipa andopa, yunga kangimu yu yuyu kou „nee gilieli, marene kopisilipa andopa molorumu.

<sup>6-8</sup> Kanu yemone sulu sepa molopa Yesusi kanopale Yu molorumuna lisipa orumu. „Orumu kinia, Yesusini nimbale: “Kurumu, i yemonga konopuna ongo wendo pu!” nirimu mele pilipale yemone yunga kumbikerena komorongo langopa tamalu pepa yundu tondolo ru nimba nimbale: “Yesusi, Pulu Ye Paa Olandopa Awilimunga Malo, na-kinia ungu nambolka unguri senindu onuye? ‘Pulu Yemonga imbimu leko mi leko “Paa sika nikiru. Na mindili paa naa lipu simbú.” ni!’ nimbu mawa sekero.” nirimu.

<sup>9</sup> Aku nirimu kinia Yesusini yemondo mangilipa nimbale: “Nunga imbi nawe?” nirimu kinia

yuni nimbale: „Olio paa awisili kene, nanga imbi Paa Awisili.” nirimu. <sup>10</sup> Aku nimbale wale awisili Yesusi mawa sepa nimbale: “Olio ‘ongo wendo pang.’ ningu toko makorokole “I koleamo munduku kelko kolea luparenga paa.” ni naa ni.” niringi.

<sup>11</sup> Akuna ma-pangi senga umbu-kongi awisili ímu nongo moloringi kanokole <sup>12</sup> kurumane Yesusi mawa seko ninguli: “Olio „toko makorokole, “Ne kongima molemelena pungu, ononga konopuna molo-pang.” ni.” niringi kinia

<sup>13</sup> yuni “Manda, akuna pang.” nirimu kinia kuruma kanu yemonga konopuna wendo ongole kongi akuna moloringimanga konopumanga pungu moloringi kinia kanu kongima amu toko lisiku pungu kopona pukua toko nomuna sukundu pungu nona wangoringi. Kongi kanuma „paa awisili,” tausini talo mele.

<sup>14</sup> „Ulu akuma wendo orumu-na kanokole, kongi tapu seko moloringi yema talopa leko punguli niringimuni, kolea awilina moloringi yomboma kinia, kolea kangamanga moloringi yomboma kinia, ulu akuma wendo orumu mele semane toko siliku purungi. Kanu semanemo pilieringi yomboma ‘Uluma wendo orumu mele kanamili.’ ningu wendo pungu <sup>15</sup> Yesusi molorumuna ongole u kuru paa awisili konopuna molko ongo wendo purungi yemo mulu-maminia pakopa, umbu-konopu pepili molorumu kanokole ono pipili koloringi. <sup>16</sup> Yesusini serimu mele mongone kanoringi yombomane pe oringi yomboma ningu siringi. Kuru awisili konopuna moloringi yemo kinia, kongima-kinia uluma wendo orumu mele semanemo toko siringi. <sup>17</sup> Kanu-kinia yomboma „paa mini-wale mundukuli, Yesusi mawa seko ninguli: “Olionga koleana naa mololi kelko pu.” niringi.

<sup>18</sup> Aku siku niringi pilipale Yesusi pumbándo nona andoli sipina suku pumbá purumu kinia kuru awisili konopuna u molko wendo oringi yemone yundu nimbale: “Pea pambil.” nimba mawa serimu.

<sup>19</sup> Aku-na-kolo Yesusini “Mólo.” nimba yundu nimbale: “Nu ulkondo pungu Ye-Awilimuni nu kondo kolopa ‘Molko kinjenu mele pora nipili.’ nimba, lakopa sepa kondomu mele nunga pulu lemó yomboma ningu si-pu.” nirimu. <sup>20</sup> Yesusini aku nirimu-na pilipale ye kanumu pumba yunga kolea, ‘Kolea-Awili Rureponga Talo’ niringi koleana andopa Yesusini lakopa sepa kondorumu mele nimba sirimu. Nimba sirimu kinia pilkuli yomboma pali paa pungu-pungu ningu mini-wale mundoringi.

**5:21-43 (5:21-24,35-43)**

*Bola Se Kolorumumu Kinia, (5:24-34) Kuru Se Topa Naa Kelierimu Ambo Se Kinia, Olonga Semanetolo*

<sup>21</sup> Yesusi „yu lombili andolima kinia, nona andoli sipina sukundu pumba nomu yakondo kelepa ombale nomu kelona wendo orumu kinia yombo awisili yu molorumuna ongo liku maku toko kakapu seko moloringi. Yu nomu kelo akuna molopili <sup>22</sup> Juda yomboma maku toko Pulu Yemonga ungumu pilieringi ulka se nokorumu ye se, yunga imbi Jairasi, Yesusi molorumuna orumu. Kanu-kinia yu Yesusi kanopale Yesusi yunga kimbuna nondopa omba mania molopa tamalu pepa <sup>23</sup> yundu tondolo mundupa mawa sepa nimbale: “Nanga bola-nanamo nondopa

kolomba sekemo kene 'Yu konde pumba manda molopili.' ningu ongo yu kimuni ambolou." nirimu. <sup>24</sup> Aku nirimu-na pilipale Yesusi yu pea puringili.

Pungilí puringili kinia yombo awisili liku maku toko lombili pungu yu kakapu seko ekelepa seko pea puringi. <sup>25</sup> Kanu-kinia ambo se molorumu kanumunga pena perimu walema pora naa nirimu. Yu pena mindi pepili kalia-ingi engaki rurepo ombo purumu. <sup>26</sup> Yu doketa awasilimanga yunga kurumu 'Pora nipili.' nimba andorumu-na-kolo mindili mindi siringi. Yunga kou-mone pali ono sirimuna-kolo yunga kuru pora naa nirimu. We topa olandopa mindi purumu. <sup>27</sup> Kanu ambomo Yesusi ulu-tondoloma serimu mele semanema pilipale yomboma maku toko gilieringina sukundu ombo Yesusinga bulkundu ombo yunga wale-pakolimu ambolorumu. <sup>28</sup> 'Yunga wale-pakolimu mindi ambolondu liemu na peanga lemba.' nimba pilipale aku serimu. <sup>29</sup> 'Ambolorumu kinia, waltikele yunga kuru torumu kanumu pora nirimu, yunga kangimu u umbuna perimu mele peanga lierimu pilierimu.

<sup>30</sup> Aku-sipa na-kolo 'yu Yesusinga wale-pakolimu ambolorumu kinia, Yesusi yuni yomboma lipa tapondoli tondolo mare yunga kangina ombo ultu purumu sumbi sipa pilipale topele topa kanopa yombomando mangilipa pilipale, "Nanga wale-pakolimu nawene ambolomuye?" nirimu.

<sup>31</sup> Aku-na-kolo 'yuni mangilierimu mele pilkuli, yu lombili andoli yemane pundu toko ninguli: "Yombo awisili nu gilinuna nondoko nondoko ongo kakapu seko ekelepa seko gilkimili kanumu. Pe nambi semu-na "Nawene na ambolomuye?" nikinuye?" niringi.

<sup>32</sup> Aku-sipa na-kolo Yesusi mongo male-male sepa koropale "Akumu nawene semuye?" nimba we gilierimu.

<sup>33</sup> Kanu-kinia tondolo sene yunga kangina kurumu pora nirimu pilipale ambomo paa pipili kolopa kangima puru-puru nipili Yesusi molorumuna ombo mania molopa tamalu pepale yu ulu seriuma pali nimba para sirimu.

<sup>34</sup> Yesusingi yudu nimbole: "Bolamo, 'Nu manda sepa peanga simba.' ningu kuru mondonu kanu ulumuni nu peanga lekemo. Nu kuru pora nimba konopu pe nipili molo-pani." nirimu.

<sup>35</sup> Yesusingi ambomondo aku sipa nimba molorumu kinia, ye mare, yomboma maku toko Pulu Yemonga ungu pilieringi ulka nokoli ye Jairasinga ulkana molkole ongo Jairasindu, ninguli: "Nunga bolamo kolopa pora simu. Nambi semu-na Ungu Mane Sili Yemo 'Mindili nopili.' ningu we mengo oniye?" niringi.

<sup>36</sup> Aku-na-kolo Yesusingi ono niringi ungumu pilipa naa lipale ulka nokoli yemondo nimbole: "Mini-wale naa mundoyo. 'Nunga bolamo nane 'Manda lipa tapondomba.' ningu, kuru mondou." nirimu.

<sup>37</sup> Kanu-kinia yuni maku toringi yombomando "Naa ongo anju paa." nimbole Pita keme Jemisi keme genu Jono keme akuma mindi lipale "Pea pamolo." nirimu. <sup>38</sup> Ulka nokoli yemonga ulkana oringi kinia yombo awisili molko kondo kolko kola awili-seko seko moloringi kanorumu. <sup>39</sup> Yu ulka sukundu pumbale yombo moloringimando nimbole: "Ono nambi semu-na kola seko kalli ningu molemeleye? Bolamo kolou naa kolomu. We uru mindi pelemo." nirimu. <sup>40</sup> Aku-na-kolo aku nirimu kinia onone yu ungu-taka tondoko tawe senderingi.

Yomboma pali makoropa pena-pena sepale, bolamonga anumu lapatolo kinia, kanu lombili andoli ye pokore kinia lipa memba bola ónomo lierimu suluminiana purumu.

<sup>41</sup> Pumbale bolamonga kimu ambolopa Juda yombomanga ungu lepa yudu "Tallita kumi!" nirimu. (Ungu akumunga pulumu i-sipa: " "Bolamo, nu ola molou." nikiru." nirimu.) <sup>42</sup> Aku nirimu kinia bolamo popenge sepa ola molopale andorumu. (Bola kanumu kalia-ingi engaki rurepo mele ombo pupili yu molopale kolorumu kinia

Yesusini omba sepa konde liltimu.) „Akumu kanokole, yu kinia moloringi yomboma pungu-pungu ningu mini-wale awili seko mundoringi.

<sup>43</sup> Kanu-kinia Yesusi yuni onondo tondolo mundupa nimbale: “Ungu i sekeromo yombo selurindu kepe anju pungu paa naa ningu siee!” nimbale „anumundu, nimbale: “Bolamo kere-langgi mare liku si.” nirimu.

## 6

6:1-6

*Yesusi Molopa Akorumu Kolea Nasarete Yombomane Yunga Ungumu Pilku Mokoli Seringi Semanemo*

<sup>1</sup> Yesusi molorumu koleamo mundupa kelepa yunga pulu-kolea „Nasarete, purumu, yu lombili andoli yema pea puringi. <sup>2</sup> „Koro moloringi, wale Sambatemo wendo orumu kinia ono maku toko Pulu Yemonga ungumu pilieringi ulkana sukundu pumbale yomboma mane sipa molorumu. Yunga ungumu pilku moloringi yombo awisilini pungu-pungu ningu mini-wale munduku ninguli: “Ne yemo aku unguma sena liltimunje? Yunga pilipa kondolimu kinia yunga ulu-tondolo selemomanga tondolomo kinia yu sena liltimuye? <sup>3</sup> Yu ulkama takondorumu yemo móloye? Yu Maria malo móloye? Jemisi, Josepo, Judasi, Saimono keme, akuma yu ononga genu móloye? Yunga kemulupili olio kinia pea naa molemoloye? „Yu paa sika aku yemo molemomo.” nirangi. ‘Yu paa we-yemo nambi sepa i tondoloma yu-kinia pelemoye?’ ningu pilkuli ono yu kanoko kiri pilku yu-kinia paa konopu kiri panjeringi.

<sup>4</sup> Kanu-kinia „ono yu-kinia mumindili koloringimunga ulu-pulumu pilipale, Yesusini onondo nimbale:

“Pulu Yemone ungu-umbu tondolemoma pilipa yomboma nimba silimú ye se koleamanga pali imbi ola molemo, yombomane pali yunga unguma pilku limili. Aku-sipa na-kolo yunga koleana yu-kinia pea kopu seko molemele yomboma kinia, yunga pulu lemó yomboma kinia, ono mindi yuni nilimú ungumu pilkuli ‘Yu olionga we-yere. Yu imbi mololi ye se mólo.’ ningu yu nilimú unguma naa pilku, mokoli selemele.” nirimu. <sup>5</sup> „Yunga ungumu pilku mokoli seringi-kulu, kolea akuna yuni ulu-tondoloma manda naa serimu. Kuru torumu yombo selu selu nimba mindi kimuni ambolopale sepa peanga sirimu. <sup>6</sup> Yu „ungu nimba uluma sepa molorumu mele, ‘Sika.’ ningu kuru naa mondoringimunga yu paa konopu awisili kimbu sirimu.

6:6—8:21

*Yesusini Yunga Tondolomo Lipa Ora Sirimu-Na-Kolo Yu Lombili Andolimane Yu Sika Molorumu Mele Pilku Imbi Naa Siringi Ungu Mare*

6:6-13,30-32

*Yesusini Ye Engaki-Rurepo “Kongono Se-Paa.” Nimba Lipa Mundorumu Semanemo*

Kanu-kinia Yesusi kolea-kanga lupa lupamanga andopale „Pulu Yemonga ungumu, mane silipa andorumu.

<sup>7</sup> Yesusini yu lombili andoli engaki-rurepondo “Waa.” nimbale onone yombomanga konopumanga kuru molemoma “Ongo wendo paa.” ningu toko makoronge tondolomo sipale ono talo talo nimba “Koleamanga ando-paa.” nimba lipa mundorumu.

<sup>8-9</sup> „Lipa mundupale, ono senge mele ungu-mane sipa nimbale:

“Pungíndu ono mélema naa meangi. Apulu-mingima mindi liku ambolko pang. Kimbu-su mondonge manda-na-kolo wale-pakoli talo kepe kere-langgi kepe méle-wale kepe naa mengo, kou-mone kakona kepe naa panjiku we pang.

<sup>10</sup> “Pe kolea senga sukundu punguli akuna molongendo ulka seluringa sukundu punguli akuna mindi peko moltkole pe aku koleamo munduku kelko pang. „Ulka pinia-pinia naa andoko ulka seluringa mindi kere-langgi nongo peangi.“ <sup>11</sup> Kolea marenga sukundu pungí kinia kolea pulu-yombomane “Pea peamili waa.” ni naa

ningu onone ungu ningíma pilku naa língi liemu kanu koleana yombo kirima munduku kelko pungíndu kanu koleana yombomane ono “pea peamili.” naa ningu ononga unguma naa pilku liltingimunga ‘Ono kamu molko kinjangi! Pulu Yemone ono lipa naa tapondomba mele pilangi.’ ningu ononga kimbuna kanu koleamanga ma gilimbama kulu toko pangi.” nirimu.

<sup>12</sup> „Yu lombili andolima yuni aku sipa lipa mundorumu-na pilku, punguli yombo-mando ninguli: “Ulu-pulu-kiri selemelema kanoko kiri pilku konopu topele taa.” ningu <sup>13</sup> yombomanga konopuna kuru awisili moloringima „‘Ongo wendo paa.’ ningu, toko makoroko, kuru torumu yombo awisili ‘Peanga liepili.’ ningu ononga kangina unju ollipi-mongo no ondoko kandondoko seko peanga siku, selko andoringi.

6:14-29

### *Ye Nokoli Kingi Erotene No Lindeli Jono Topa Kondorumu Semanemo*

<sup>14</sup> Kanu-kinia Yesusi yunga imbimu yomboma pilku lieringimunga ye nokoli kingi Erote Yesusini serimu mele semane toringi pilierimula.

„Yesusini sepa nirimu mele pilkuli, yombo marene ninguli: “I uluma selemo yemo No Lindeli Jono lepomo! Yu kolopale lomboropa wendo omumunga ulu-tonadoloma sembá tondolomo yu-kinia pelemo.” ningu moloringi.

<sup>15</sup> Yombo marene ninguli: “Yu, u konde molopili Pulu Yemone olando liltimu ye, Illainja kelepa ombo molemo.” niringi.

Yombo marene ninguli: “Pulu Yemone ungu-umbu tondorumuma pilku yomboma ningu siringi ye koro-u moloringi yema mele yuaku sipa Pulu Yemonga ungu-umbu tondolemoma pilipa yando nimba silimú yemo molemo.” niringi.

<sup>16</sup> „Yombomane aku siku ningu pilieringi,-na-kolo ye nokoli kingi Erotene, Yesusi yuni serimu mele semane toringi, pilipa nimbale: “I uluma selemo yemo ‘No Lindeli, Jono, ‘Yunga pengemo wendo pupili.’ nimbu nomi kari lierindu kanu yemo. Yu kolopale lomboropa wendo omu lepomo.” nirimu.

<sup>17-18</sup> „Kingi Erotene aku sipa nirimu ungumunga pulumu i-sipa: „U walte Erotene yunga genu Pillipunga ambo-menu Erodiasi mangopa liltimu. „No Lindeli, Jonone Erote aku sipa serimu kanopale yundu alieli nimbale: “Nuni, Pulu Yemonga, ungu-mane se pulua toko genanga ambomo mangoko liltinu. Akumu seko kinjerinu.” nirimu kinia Erotene yu lipa ka sipa ka-ulkana panjerimu. <sup>19-20</sup> Jonone aku nirimumunga ambo Erodiasini yu mumindili kolopa “Yu topo kondambo.” nimba molorumu-na-kolo Erotene ‘Jono yu konopu sumbi sipa pepa Pulu Yemonga ye kake sélimu molemo.’ nimba kanopa yu pipili kolopale nokopa kondorumumunga ambo Erodiasini Jono-kinia ungu se manda naa serimu. Jonone ungu nirimuma pilipale ye nokoli kingi Erote yu paa konopu awisili lipa mundupa mini-wale mundorumu-na-kolo aku unguma yu paa konopu sipa pilierimu.

<sup>21</sup> Pe walte, „ambo Erodiasi, konopuni pilipa molorumu ungumu manda sembá walemo wendo orumu. Wendo orumu mele i-sipa: Kingi Erote meringi walemo wendo orumu kinia yunga kendemande-ye awilima kinia, yunga ami-yemanga ye nokolima kinia, kolea Gallilli disiriki yombomanga ye nokoli awilima kinia, onondo “Kere-langí pea namili waa.” nirimu. <sup>22</sup> „Ono ongo yu-kinia pea kere-langí nongo molangi, Erodiasi lemenuulkana sukundu ombo ono moloringina denisi serimu. Erote kinia, yu-kinia pea kere-langí nongo moloringi yema kinia onone ambo-wenepomoaku serimu kanoko paa peanga pilieringi. Kingimuni paa kanopa peanga pilipale ambo-wenepomondo nimbale: “Nuni yakala kolkono mélse na mawa séa. Mawa sení mélemo nu simbú.” nirimu. <sup>23</sup> Pulu Yemonga imbi lepa mi lepale yundu kelepa nimbale: “Paa sika nikiru. Nuni na mawa sení mele se paa sika simbú. Nane ye nokoli kingimu molopo nokolio koleamonga ekendo kepe “Si.” ninu liemu paa sika simbu.” nirimu.

<sup>24</sup> Erotene yuntu nirimu mele pilipale ambo-wenepomo pena pumba, anumu molorumuna pumba mangilipa nimbale: "Méle nambolka mélemo 'Si.' niemboye?" nirimu kinia

anumuni nimbale: " "No Lindeli Jononga ,nomimu kari leko yunga, pengemo si." ni." nirimu.

<sup>25</sup> Anumuni aku nirimu pilipale yu kingimu molorumuna popenge sepa lisipa ombo mawa sepa nimbale: "Paa iseli-u No Lindeli Jono ,nomi kari leko, yunga pengemo pellete senga taltoko yando si." nirimu. „Jonone u alieli "Erote kinia Erodiasitolone seko kinjeringili." nirimumunga mumindili kolopale Erodiasini 'Yu kolopili. Sika kolomunje na kanambo.' nimba "Pengemo ongo si." nirimu..

<sup>26</sup> Yuni aku sipa mele mawa serimu kinia pilipale Erote paa konopu umbuna serimu-na-kolo yuni "Paa sika simbú." nimba, nimba panjipa Pulu Yemonga imbi lepa mi lierimu mele kepe, yu konopu topele tomba kinia yu-kinia pea kere-langí nongo moloringi yema yu kanoko kiri pilingí mele kepe, aku ungutolo pilipale, "Yuni mawa sepa "Si." nikimu mele "Mólo." manda naa nimbú." nimba pilipale <sup>27</sup> yu nokoringi ami-yemanga se lipa mundupale „No Lindeli, Jono ,nomi kari leko, yunga pengemo yando mengo ou." nirimu kinia kanu ami-yemone ka-ulkana pumba Jononga nomimu kari lepale <sup>28</sup> yunga pengemo pellete senga taltopa yando memba ombo ambo-wenepomo sirimu kinia yuni anumu sirimu.

<sup>29</sup> Aku seringi pilkuli Jono lombili andoringi yema ongo yunga ónomo liku mengo pungu óno seringi. „Kingi Erotene No Lindeli Jono u aku sipa topa kondorumu kolorumumunga pe Yesusini ulu-pondoloma serimu mele pilipale "Jono nomi kari lierindu yemo lomboropa ola molemo lémo." nirimu..

6:30-44

### *Yesusini Ye Paip Tausini Kere-Langi Sirimu Semanemo*

<sup>30</sup> Yesusini "Nanga kongonomo sende-paa." nimba lipa mundorumu yema yu molorumuna kelko yando ongole niringimuni, ulu seringima kinia yomboma ungu-mane siringima kinia yu semane toko siringi. <sup>31</sup> Aku-sipa na-kolo yombo awisili ongo pungu ongo pungu ,seko ungu ningu panjiku, seringimunga Yesusi kinia ,yuni lipa mundorumu ye yando oringima, kinia kere-langí nonge ena kanga-kolte kepe naa lierimumunga kanopale Yesusini yemando nimbale: "Ono onono yombo naa mololi kolea ku senga kanga-kolte koro molangi kene na-kinia pea pamili waa." nirimu. <sup>32</sup> Kanu-kinia ono onono mindi nomuna andoli sipi senga suku pungu yombo naa mololi kolea ku lieli senga purungi.

<sup>33</sup> Aku-sipa na-kolo pungí purungi kinia kanokole yombo awisili Yesusi kinia yu lombili andolima kinia kanoko imbi siringimunga koleamanga yomboma pali kimbu-kongono seko lisiku nomu kelona makaye seko pungu ono nomuna wendo pungí koleana kumbi leko pungu nokoko gilieringi. <sup>34</sup> Yesusi nomu kelona ultu ombo kanopa yombo paa awisili akuna ongo maku toko moloringi kanopale ono kongi sipisipi tapu seli ye se naa mololi sipisipima mele ku peko moloringi-kulu nimba kanopale ono kondo kolopa ungu awisili mane simba serimu.

<sup>35</sup> Kanu-kinia ,mane sipa molopili, ena pumbá serimumunga yu lombili andolima yu molorumuna ongo yuntu ninguli: "I koleana yombo se naa pelemele, ena kamu pukumu kene <sup>36</sup> ya maku toko molemele yomboma "Pungu kolea marenga kere-langí topo toko li-pangí." ni." niringi.

<sup>37</sup> Aku-na-kolo yuni ,yu lombili andolimando, pundu topa nimbale: "Onone onono yomboma kere-langí mare liku siee." nirimu.

Onone yu mangilku ninguli: " 'Kakopoi-ye sene oli engaki kongono sepale méle kalólimu limú kou-monemane olio kere-langima topo topo lipuli yomboma siemili.' ningu nikinuye?" niringi.

<sup>38</sup> „Aku siku niringi pilipale, yuni ono manglipa pilipa nimbale: “Pellawa kaloli nambi sepa taltokomeleye? Pungu kano-paa.” nirimu.

Pungu koroko kanoko lendeko yu molorumuna kelko ongo ninguli: “Ya kere-langi awisili naa taltolemele. Pellawa kaloli kanga se-pakara kinia oma kaloli talo kinia ‚aku kere-langi pokore mindi lemó.’” niringi.

<sup>39</sup> Kanu-kinia Yesusini nimbale: “Yombomando “Era kondili nilina maku toko mania molangi.” niee.” nirimu kinia <sup>40</sup> yomboma towapu talo molo towapu kise ningu maku toko moloringi.

<sup>41</sup> Kanu-kinia Yesusini pellawa kaloli se-pakara kinia oma talo kinia kanuma lipale mulu-koleana olando-sipa kanopa „Pulu Yemo kinia, “Ange.” nimba pellawa kalolima ambolopa peke lepa lombili andolima moke sepa sipale “Anju yomboma siee.” nirimu, ‚onone, yomboma ‚moke seko siringi. Oma talo kepe lipa moke sepa yomboma pali sirimula. <sup>42</sup> Ono pali kanu kere-langima noringi kinia olo serimu. <sup>43</sup> Kanu-kinia lombili andolimane pellawa kaloli kinia oma kinia kanumanga kakena lierimuma liku maku toko wale-basikete engaki rurepo toko peke siringi. <sup>44</sup> Kere-langi noringi yema-manjipa paip tausini mele.

6:45-52

### *Yesusi Nomuna Ola Kimbu Anjipa Orumu Semanemo*

<sup>45</sup> „Yomboma kere-langi sirimu noringi, kinia Yesusini yu lombili andoli yemando sumbi sipa nimbale: “Maku toko molemele yomboma nane “Pangi.” niembo. Ono nona andoli sipina ola pungu no nekendo, Besaida taono lemóna, kumbi leko paa.” nirimu. <sup>46</sup> Kanu-kinia yomboma mundupa kelepale yu yuyu Pulu Yemo kinia ungu nimbando ma-pangina ola purumu. <sup>47</sup> Kanu-kinia ena pumba kolea kala torumu kinia sipimu nomu awi-suku-singina purumu, Yesusi yuyu ma-pangina molorumu. <sup>48</sup> Sipi kumbikundu mendo sipa poporomene torumumunga ‚yu lombili andoli yema sipina suku molcole, sipimu nomu kelona mengo pungíndu pereringi kanopale ipulieli kolea muni naa liepili ono puringina yu nona ola kimbu anjipa ombá ombale ono sipina pungu molangi yuni ono topa akilendepa yu kumbi lepa pumbá orumu. <sup>49-50</sup> Aku-na-kolo yu lombili andolimane pali yu nona ola kimbu anjipa orumu kanokole niringimuni, paa pipili awili seko kolcole “Kuru se okomaa!” ningu mini-wale mundoringi kinia Yesusini popenge sepa onondo nimbale: “Ono konopu tondolo pupili molayo. Na mindi okoro. Pipili naa kolaa.” nirimu.

<sup>51-52</sup> Kanu-kinia yu sipina suku purumu kinia poporome topa kelierimu. Aku serimu-na kanokole paa mini-wale mundoringi. Yuni ‚u tangoli, pellawa kalolima ‚moke, serimumunga pulumu naa pilku we konopu lo liku moloringi. Yu-kinia tondolo se perimu-na pellawa kalolima-kinia ulu-tondolo se serimu mele mimi siku naa pilkuli ono konopu naa perimu-na kanu tondolomone poporomemo topa kelierimu mele kepe naa pilkuli poporomemo topa kelierimu kinia kanokole ono paa mini-wale mundoringi.

6:53-56

### *Jesusini Kolea Geneserete Kuru Torumu Yombo Awisili Sepa Peanga Sirimu Semanemo*

<sup>53</sup> „Yesusi kinia yu lombili andolima kinia, nomu ‚Gallilli, nekendo punguli nomu kelona kolea Geneserete lierimuna wendo ongole sipimu ka seringi. <sup>54</sup> Sipina mania oringi kinia akuna moloringi yombomane Yesusi popenge seko kanoko imbi sikuli

<sup>55</sup> akundu lierimu koleamanga pali lisiku pungu yu andorumu koleama pilkuli ononga kuru torumu yomboma liku taropola seko yu andorumuna mengo oringi.

<sup>56</sup> Yu andorumu koleamanga pali, kolea kangamanga kinia, kolea awilimanga kinia, kolea wemanga kinia, aku koleamanga yomboma maku toko moloringi koleamanga kuru torumu yomboma mengo ongo taltokole, “ ‘Nunga wale-pakoli pundumu kepe

ambolangi.' ni." ningu mawa seringi. Kanu-kinia kuru torumu yombomane yunga wale-pakolimu amboloringi yomboma pali kamu peanga lierimu.

## 7

7:1-23

*Mélema Kake Selemomonga Pulumu Kinia Mélema Kalaro Molemomonga Pulutongga Ungu Mare*

7:1-13

*Pulu Yemonga Ungu-Manema Olandopa, Anda-Kolepalimanga Ungu-Manema Maniandopa, Ungu Se*

<sup>1</sup> „Walte, Parisi ye mare kinia Pulu Yemonga ungu-manemanga puluma pilku mane siringi ye mare kinia ono Jerusalleme munduku kelko Yesusi molorumuna ongo maku toko moloringimane <sup>2</sup> yu lombili andolimane ki kalaro molopili u kulumiye naa toko kere-langi we ambolko norangi kinia kanokole kanoko kiri pilieringi. <sup>3</sup> (Sika kalaro naa molorumu-na-kolo, Parisi yema kinia we-Juda-yomboma kinia ononga anda-kolepalimane "Saa." niringi mele pilku liku sengendo u ki pali nona munduku kulumiye toko kondokole kere-langi pe norangi. We naa norangi. <sup>4</sup> Makete-koleana pungu ulkando ongole ki u kulumiye naa tokole „maketena topo toko liltingi, kere-langima naa norangi. Anda-kolepalimanga seringi ulu-pulu lupa lupa awisili pilku liku seko moloringila. Kapoma kinia, mingima kinia, kere-langi norangi poloma kinia, aku sipa mélema alieli-alieli we kulumiye toringi.)

<sup>5</sup> „Juda yombomane aku siku seringi,-kulu Parisi yema kinia, Pulu Yemonga ungu-manemanga puluma pilku mane siringi yema kinia, onone „Yesusi lombili andolimane aku siku ki kulumiye naa toko kere-langi we norangi kanokole, Yesusindu mangilku pilku ninguli: "Anda-kolepalimane "Saa." niringi mele nunga lombili andolimane nambi semu-na naa pilku liku selemeleye? Ononga kima kalaro molopili kere-langi nolemele kanumu." niringi.

<sup>6</sup> Jesusini onondo pundu topa nimbale: "Ono „ungu-manema pilku mane silimili yema kinia Parisi yema kinia, ono topele-mapele toli yema molemele! Pulu Yemone ungu-umbu tondorumuma pilipa yomboma nimba sirimu ye Aisayane onondo nirimu mele papu nirimu. „Onone kiniá selemele mele yuni u nimba Pulu Yemonga, bokuna torumu molemo mele i-sipa:

„Pulu Yemone nimbale:„

“Kanu yomboma ononga keremane na kape ningu

‘Ye awili olandopamo.

Nu lipu awi silimulu.’ ningu

na imbi ambolko paka tondolemele-na-kolo

ononga konopuma kinia nanga konopumu kinia

seluna naa pulimú. Lupa lupa pelemo.

<sup>7</sup> Onone ‘Nanga imbi

ambolopo paka tondamili.’ ningu

na we popo toko kape nilimili.

Mana-yombomane mane silimili unguma mindi

mane sikuli

‘I ungu-manema Pulu Yemone

“Saa.” nilimú ungu-manema.’

ningu pilku liku selemele,

akumunga na popo tonge kinia

unguri naa sembá.”

nirimu kanumu. <sup>8</sup> Pulu Yemone “Saa.” nirimu ungu-manema munduku kelkole anda-kolepalimane “Saa.” niringi mele mindi ambolko molemele.” ,nimba Yesusini, nirimu.

<sup>9</sup> ,Yesusini, ungu mare pea onondo nimbale: “Ononga anda-kolepalimane “Saa.” niringi mele pilku liku sengendo Pulu Yemone “Saa.” nirimu ungu-manema bulu silimili mele papu selemeleye? <sup>10</sup> Akumunga Mosisini nimbale:

“Aminieli lanielinga unguma pilku liku,  
liku awi siku saa.”

nimba

“Yombo sene yunga anumundu molo lapando  
ungu se nimba kinjipa iri tomu liemu  
kanu yombomo toko kondangi.”

nirimu kanumu. <sup>11</sup> Aku-sipa na-kolo ono ,Juda yombomanga tapu-yema,ne ninguli: “Ye sene yunga anumu lapatolondo nimbale: “Nane olo méle mare lipu tapondopo silkama koronga ‘Pulu Yemo simbú.’ nimbu panjerindu kanumunga olo manda naa lipu tapondopo simbú.” nimbale <sup>12</sup> yunga anumu lapatolo naa lipa tapondomba kinia papu.” ningu mane silimili. <sup>13</sup> Aku siku mane silimili ungumuni ‘Anda-kolepalimane mane siringi ulu-puluma olandopa.’ ningu ‘Pulu Yemone nirimu ungumu uluri molo. Mania pupili.’ nilimili. Onone ulu lupa lupa awisili aku siku seko molemele.” nirimu.

7:14-23

### *Mélemane Yomboma Sepa Kalaro Mondondolemomonga Ungu Se (7:1-23 pali kanani)*

<sup>14</sup> Aku nimbale Yesusini maku toko moloringi yombomando “Na moliona waa.” nimba onondo nimbale: “Nane ,aku nikirumunga ungu se, nimbú sekero ungumu onone pali komu sendeko ungumunga pulumu pilku kondayo. <sup>15</sup> Yombomanga kangina ultukundu lepale kerena pumba olona sukundu pulimú mélsene ,Pulu Yemo manda popo tonge aulkamo pipi silimú, kalaro se manda naa mondolemo. Yombomanga konopuna sukundu pepale wendo olemo ulumane mindi yomboma kalaro mondolemo. <sup>16</sup> (Yombo komu-pea lemba yomboma i ungumu mimi siku piliangi.” nirimu.)

<sup>17</sup> Kanuna maku toko moloringi yomboma Yesusini mundupa kelepa ulkana sukundu purumu kinia yu lombili andolimane yu mangilku pilku ninguli: “Aku ungu-ikumunga pulumu nambolkanje? ningu para sieni.” niringi kinia

<sup>18-19</sup> Yesusini onondo nimbale: “Kiniá kepe naa pilkimiliye? Yombo senga kangina ultu lepale sukundu pulimú mélse yunga konopuna naa pumba, olona sukundu pumba ultu ombo le-muruna kamu pulimúmunga yu kalaro manda naa mondolemo mele naa pilkimiliye?” nirimu. (Yesusini aku sipa nirimumunga “Kere-langimane pali yomboma kalaro se naa mondolemo.” nimbando nirimu.)

<sup>20-21</sup> , “Kerena sukundu pulimú mélemane aku sipa unguri naa selemo.” nimbale, yuni kelepa nimbale: “Yombo senga konopuna sukundu pepale wendo olemo kanu mélemane yombo se ,Pulu Yemo popo tomba aulkamo pipi silimú, kalaro se mondolemo. Ulu-pulu-kirima u konopumuni pilkuli ,pe kamu selemelemonga, “Konopuna pepale wendo olemo mélemane kalaro mondolemo. ,We naa selemele.,” ,nikiru., Kanu mélema i-sipa:

Konopumuni ulu-kirima pilielemele;  
wa ulu-kirinale lupa lupama andoko selemele;

wa nolemele;

yomboma toko kondolemele;

ambo ye pulima molo ye ambo lilima yombo lupama kinia ulu-kirinale selemele;

<sup>22</sup> yombomanga méle taltolemelema ‘Na liembo.’ nilimili;  
ulu-pulu-kiri lupa lupama selemele;

colo tolemele;  
yombomane kanokole pipili kololemele uluma pipili naa kolko sumbi siku selemele;  
yombo lupama molemele mele kepe ononga mélema yama mengo 'Yu malo.'  
konopu lemele;  
'Yomboma pipili kolko kinjangi!' ningu ungu-bulkundu nindilimili;  
'Na imbi ola molemo. Na pilipa kondoli olandopa pelemo. Yombo lupama tondolo  
se naa pelemo.' ningu kara pulimili;  
amu toli uluma selemele;  
ulu-pulu akuma pilku selemele. <sup>23</sup> Aku ulu-pulu-kirima pali yombomanga konopuna  
sukundu pepa wendo olemomane yomboma kalaro mondolemo, yomboma 'Pulu  
Yemonga kumbikerena pungí aulkamo pipi silimú, kalaro mondolemo. 'Ultu lepa  
olona pulimú mélemane unguri naa selemo.' nirimu.

7:24-30

### *Kolea Ponisia Ambo Sene 'Yesusini Ulu-Tondolo Se Manda Sembá.' Nimba Kuru Mondorumu Semanemo*

<sup>24</sup> Kanu-kinia Yesusi molorumu kolea 'Geneserete, mundupa kelepa 'Juda  
yomboma moloringi kolea Gallilli disiriki ultukundu, kolea-awili Taya kinia Saidono-  
tolo lierimu koleana sukundu purumu. Akuna purumu kinia yombomane yu  
'naa kanangi.' nimba ulka senga sukundu pumba molorumu-na-colo yu ombo  
molorumu mele yomboma pilieringi. <sup>25-26</sup> Yesusi yu ombo molorumu akumu pilipale  
ambo se yu molorumuna sumbi sipa ombo yunga kumbikerena mania molopa  
tamalu perimu. Kanu ambomo yu 'Pulu Yemonga, Juda yombomanga talapena  
ultukundu ambo se, kolea Siria poropinji sukundu kolea Ponisia disiriki yunga pulu  
koleamo. Ambomonga lemenunga konopuna kuru se molopa ambolorumu-kulu  
Yesusi molorumuna ombo mania molopa tamalu pepa yundu mawa sepa nimbale:  
"Nanga bolamo kuru se konopuna sukundu molemo kene yu 'kondo kolko,' kurumu  
toko makorou." nirimu.

<sup>27</sup> 'Ambomo yu ambo-lupa, Juda ambo se mólo, nimba kanopale, Yesusini  
ambomondo 'ungu-iku se topa, nimbale: "Bolangoma kere-langí u nangi olo sepili.  
Ononga kere-langima lipu owáma simulú kinia manda naa sembá." nirimu.

<sup>28</sup> Ambomone yundu nimbale: "Ye-Awilimu, sika nikinu-na-colo owámane kepe  
bolangomanga kere-langí pundu mania pulimúma liku nolemele kanumu." nirimu.

<sup>29</sup> Kanu-kinia Yesusini yundu nimbale: "Ambomo, nu aku siku nikinumu papu  
nikinu. Aku siku nikinumunga kuru kanumu nunga bolamonga konopuna sukundu  
molopa ombo wendo pumu kene nu 'konopu peanga lelko, pu.' nirimu. <sup>30</sup> Yesusini  
aku sipa nirimu pilipale, ambomo kelepa ulkando pumba kanorumu kinia lemenu  
konopuna kuru se naa molopili uru peli polona ola we molorumu kanorumu.

7:31-37

### *Yesusini Ye Komu Sipa Ungu Naa Nirimu Se Sepa Peanga Sirimu Semanemo*

<sup>31</sup> Yesusi kolea-awili Taya mundupa kelepa kolea-awili Saidono sukundu ombo  
pumba, 'Kolea-Awili Rureponga Talo' niringi koleana sukundu ombo pumba, Gallilli  
nomu kelona 'sukundu, orumu.

<sup>32</sup> Akuna moloringi yombomane yu molorumuna ye komu sipa ungu sumbi sipa  
naa nirimu ye se mengo ongo "Yu peanga liepili, nunga kimuni ambolou." ningu  
tondolo munduku mawa seringi.

<sup>33</sup> Kanu-kinia yombo kakapu seko moloringima mundupa kelepa "Oltolo molam-  
bili." nimba kanu yemo senga memba pumbale nirimununi, komutolonga ki-  
sundu sukundu mundupa, elkambe topa yemonga alimbolomo kimuni ambolopale,  
<sup>34</sup> mulúna olando sipa kanopa, tondolo mundupa múlu lipa, Juda yombomanga ungu  
lepa yemondo nimbale: "Epata!" nirimu. (Kanu ungumunga pulumu "Komumuni

piliei!" nirimu.) <sup>35</sup> Aku nirimu kinia popenge sepa yemo komu-pea lepa yu ungu manda pilipa, alimbolomo takele serimu kanumu peanga lepa umbu-alimbolomo gilierimu kinia yu ungu sumbi sipa nirimu.

<sup>36</sup> Kanu-kinia Yesusini onondo tondolo mundupa nimbale: "Nane i ulu sekero mele anju yombo selurindu kepe paa naa ningu siee!" nirimu. Aku-na-kolo yuni "Mólo." nimba wale awisili nirimu mele pilku mokoli seko yomboma anju-anju yuni serimu mele semane toko siliku mindi andoringi. <sup>37</sup> Yu serimu mele kanoringi yomboma kinia, anju semane toko siringi pilieringi yomboma kinia, ono paa mini-wale munduku ninguli: "Apa! Yuni selemo uluma peangama mindi selemo. "Komu silimúma ungu pilku, ungu naa nilimilima ungu ningu, saa." nilimú kinia kepe unguma pilku unguma ningu selemele." niringi.

## 8

8:1-10

*Kere-Langi Naa Lepa Kolea Ku Lieli Senga Yesusini Ye Po Tausini Kinia Ambo Bolangoma Kinia Kere-Langi Sirimu Semanemo*

<sup>1</sup> Walte Yesusi molorumuna yombo awisili kelko ongo liku maku toko moloringi. Moloringi koleana nonge kere-langi se naa lierimu-kulu Yesusini yu lombili andolimando "Na moliona waa." nimba onondo nimbale: <sup>2</sup> "I yombo maku toko molemelema na kondo sekemo. Wale yopoko na-kinia molongi, pe kiniá ga nonge se naa lemó. <sup>3</sup> Mare aulka suluna oringimunga nane "Ono gele sepa pepili ulkando paa." nilkanje ono aulkana kimbu ki pange-mange sepa, topa ne-munda ya-munda selka." nirimu.

<sup>4</sup> Aku nirimu kinia pilkuli yu lombili andolimane yundu pundu toko ninguli: "Sika nikinu-na-kolo, i kolea ku lielina molemolo. I yomboma manda nonge mele pellawa kaloli sena lembana lipu simulúye?" niringi.

<sup>5</sup> Yesusini onondo "Pellawa kaloli nambi seko taltokomeleye?" nimba mangilierimu kinia

onone "Yopoko-pakara taltokomolo." niringi.

<sup>6</sup> Kanu-kinia yuni maku toko moloringi yombomando "Mania molaa." nimbale, pellawa kaloli yopoko-pakara lipa „Pulu Yemo-kinia, "Ange." nimba, akuma peke lepa yu lombili andolimando "Yomboma moke seko siee." nimba ono sirimu. Nirimu kanu mele seringi. <sup>7</sup> Ono oma kaloli kanga pokore kepe taltoringila, akuma lipa „Pulu Yemo-kinia, "Angela." nimbale yu lombili andolimando "Ima yomboma moke seko siee." nirimu.

<sup>8</sup> Yomboma „kere-langima, noringi kinia olo serimu. Pe kere-langi kakena lierimuna lombili andolimane liku wale-basiketemanga lakilieringi, wale awili yopoko-pakara peke lierimu. <sup>9</sup> Ye po tausinini aku kere-langima noringi.

Kanu-kinia Yesusini maku toko moloringi yombomando "Ulkando paa." nimbale nirimumuni, <sup>10</sup> yu lombili andolima kinia yu kinia ono nona andoli sipina sukundu pungu, „nomuna nekendo, kolea Dallamanuta puringi.

8:11-13

*Juda Ye Awilimane Yesusindu "Nu Sika Pulu Yemone Ya Mana Lipa Mundorumunje Kanamili, Ulu-Tondolo Se Sei." Niringi Semanemo*

<sup>11</sup> Akuna puringi kinia Parisi yema Yesusi molorumuna ongo, 'Yuni nambi sembanje? Kanamili.' ningu yu manda manjiku mawa seko ninguli: "Ungu Mane Sílimu, 'Nu sika Pulu Yemone 'Kongono sendani.' nimba ya mana lipa mundorumunje kanamili.' ningu mulu-koleana molemo „Pulu, Yemone mindi manda ulu-tondolo, selemo mele se sei." niringi.

<sup>12</sup> „Aku siku mangilieringi kinia pilipa kiri pilipale Yesusi, yunga konopuna paa umbuna serimu-na mülü awili sepa lipa nimbale: “Kiniá mana molemele yombomane “Pulu Yemone mindi ulu-tondoloma manda selemo mele kanamili sei.” ningu na nambi semu-na mawa selemeleye? „Na molio mele nambi semu-na “Sika.” we naa ningu kuru mondolemeleye? „Nane ono sika nimbu sikiru: “„Na Pulu Yemo kinia kopu sepo kongono selembolo mele, lipa ora simba kanonge ulu-tondolo se, kiniá mana molemele yomboma-kinia wendo naa ombá.” nikiru.” nirimu. <sup>13</sup> Aku sipa nimbale nirimununi, ono mundupa kelepa sipina sukundu kelepa pumbale nomuna nekendo purumu.

8:14-21

### *Parisi Yema Kinia Ye Nokoli Kingi Erote Kinia Ononga Pellawa Akoli Mele ‘Isi’ Nilimunga Ungu-Ikumu*

<sup>14</sup> „Kanu-kinia ono nomuna nekendo pungíndu Yesusi lombili andoli yema, pellawa kaloli komu sindiku naa mengo puringi. Pellawa kaloli selu mindi sipina suku lierimu, se pea mólo. <sup>15</sup> Kanu-kinia Yesusini onondo liepi-liepi topa „ungu-iku topa, nimbale: “Paa mimi siku kanaa! Parisi yema kinia „ye nokoli kingi, Erote yunga yema kinia onone pellawa akoli méle isi taltolemelemo kanoko kondaa!” nirimu.

<sup>16</sup> Aku sipa nirimu kinia pilkuli yu lombili andoli yemane onono angelema ningu ninguli: “Olio pellawa kaloli „nomolo, mare naa lipu membo omulumunga aku sipa nikimunje.” niringi.

<sup>17</sup> Aku siku niringi mele pilipale Yesusini onondo nimbale: “Onone “Pellawa kaloli naa memulu.” ningu nambi semu-na angelema nikimiliye? Kiniá kepe ono naa kanoko, mimi siku wamoko naa pilkimiliye? Na tondolo se perimu-na pellawa kalolima-kinia ulu-tondolo se serindu mele ono naa pilieringiye? Ono konopu naa pepili molemelemonga nane nikiru mele ungu-pulumu naa pilkimiliye? <sup>18-19</sup> Ono mongo gilimú-na-kolo mélema naa kanokomeleye? Komu gilimú-na-kolo unguma naa pilkimiliye? Pellawa kaloli se-pakara lipu peke lepo ye paip tausini moke sepo sirindu kanumu ono komu sindikimiliye? „Nongo pora siringi kinia, kere-langì kakena lierimuma liku wale-basikete nambi seko toko peke siringiye?” nirimu kinia „yu lombili andolimane, yundu pundu toko “Engaki-rurepo.” niringi.

<sup>20</sup> „Yuni onondo kelepa nimbale: „Pe pellawa kaloli yopoko-pakara lipu peke lepo „ye, po tausini moke sepo sirindu kinia „nongo pora siringi kinia, wale-basikete awili nambi seko kere-langì kakena lierimuma toko peke siringiye?” nimba mangilierimu kinia

onone yundu pundu toko “Yopoko-pakara.” niringi.

<sup>21</sup> Yuni onondo „kelepa, nimbale: “Onone kiniá kepe mimi siku wamoko naa pilkimiliye?” nirimu.

8:22—10:52

### **Yesusini Yunga Lombili Andolima Mane Sirimu Semanemo**

8:22-26

#### *Yesusini Mongo Kiri Lierimu Ye Se Sepa Peanga Sirimu Semanemo*

<sup>22</sup> Yesusi kinia, yu lombili andolima kinia, ono Besaida taonona puringi kinia mongo kiri lierimu ye se Yesusi molorumuna mengo ongo mawa seko ninguli: “Nuni i yemo kimuni ambolou.” niringi.

<sup>23</sup> Aku niringi kinia Yesusini mongo kiri lierimu yemo ki ambolopa taono ultukundu memba pumbale yunga mongo-tolonga elkambe topa kandopa kimuni ambolopa nimbale: “Nu kiniá mélse kanokono molo móloye?” nirimu kinia

<sup>24</sup> yemone olando sipa kanopa nimbale: “Na kiniá yombo mare, ono unju melema ongo pukumili kanokoro.” nirimu.

<sup>25</sup> Yesusini yunga mongotolonga kelepa ambolorumu kinia yemo yu mongo makilipa mélema pali mongotolone sumbi sipa kanorumu.

<sup>26</sup> Yesusini yemondo "Ulkando pu." nimba nimbale: "Nu kelko ulkando punindu ne kolea ,molopo wendo ombulu, akuna ,kelko anju, naa pu." nirimu.

8:27-30

Pitane Yesusindu "Pulu Yemone "Olio Nokopa Kondopa Peanga Simba Ye Se Lipu Mundumbu." Nimba, Nimba Taltorumu Ye-Nokoli Akumu Nu." Nirimu Semanemo

<sup>27</sup> Yesusi kinia yu lombili andolima kinia pungu kolea-awili Sisaria-Pillipai nondopa lierimu kolea kangamanga pungí purringi. Akuna pungí purringi kinia Yesusini yu lombili andolimando mangilipa nimbale: "Yombomane na imbi leko nawe nilimiliye?" nirimu.

<sup>28</sup> Onone yundu ninguli: "Marene "Nu No Lindeli Jono ,kolorumu kanumu kelepa lomboropa ola molemo,." ningu pilielemene; marene "Nu ,Pulu Yemone u konde molopili olando liltimu ye, Illinja kelepa ombo molemo." ningu pilielemene; marene "Nu Pulu Yemone ungu-umbu tondorumuma pilipa yomboma nimba sirimu ye se ,u kolorumu kiniá lomboropa ola molemo,." ningu pilielemene." niringi.

<sup>29</sup> Aku niringi pilipale Yesusini onondo mangilipa pilipa nimbale: ",We-yombomane aku siku nilimili,-na-koło ono onono na nawe nilimiliye?" nirimu.

Pitane pundu topa nimbale: "Nu Pulu Yemone 'Olio nokopa kondomba ye se lipu mundumbu.' u nimba taltorumu ye nokoli Karasimu." nirimu.

<sup>30</sup> ,Pitane aku nirimu pilipale, Yesusini onondo tondolo mundupa nimbale: "Na molio mele ,Pitane kiniá nikimumu, onone anju yombo selurindu kepe ,iseli-u, paa naa ningu siee!" nirimu.

8:31—9:1

Yesusini "Na Toko Kondonge Kinia Kolopole Lomboropo Ola Molombo." U-Pulu-Pulu Nimba Para Sipale Yomboma Yu Lombili Pungíndu Senge Mele Nirimu Semanemo

<sup>31</sup> Kanu-kinia Yesusi yu lombili andolimane yundu , "Pulu Yemone olio "Nokopa kondomba ye se lipu mundumbu." nimba, nimba taltorumu ye nokoli Karasimu nu." ningu, ningu para siringi kinia pilipale, yuni yu-kinia wendo ombá mele pulu polopa ono mane sipa nimbale: "Mania Ombo Mana-Ye Au Lierimu Yemo mindili awisili nombá. Juda yomboma nokolemele tapu-yema kinia, Pulu Yemo popo tondoli ye awilima kinia, Pulu Yemonga ungu-manemanga puluma pilku mane sili yema kinia, onone ,ninguli: "Yu Pulu Yemone naa lipa mundorumu. Yu Pulu Yemonga Malo naa molemo." ningu, yu liku bulu siku yu toko kondonge. Yu toko kondonge kolomba kinia wale talo ombo pumbá kinia yopoko-sipamonga yu lomboropa ola molomba." nirimu.

<sup>32</sup> Yesusi yu-kinia wendo ombá mele aku sipa sumbi sipa nimba para sirimu kinia pilipale Pitane yu anju lipa memba pumbale ,Yesusi yuni "Na toko kondonge." nirimumunga, yu pulu polopa iri torumu. <sup>33</sup> Aku-sipa na-koło ,yuni kurumanga nokoli Setenene ungu-umbu tondorumu mele pilipale nirimu-kulu pilipale, Yesusini topele topa yu lombili andolima kanopa Pita iri topa yundu nimbale: "Setene, nu anju pa! Nu Pulu Yemone konopu lemó mele naa leno. Yombomane konopu lemele mele mindi leno kene anju pu!" nirimu.

<sup>34</sup> Kanu-kinia yombo akuna liku maku toko moloringima pali kinia yu lombili andolima pea "Na moliona waa." nimba onondo nimbale: "Yombo sene 'Yu lombili pambo.' nimba yuni yunga konopumuni pilielemo méle manga 'Topo mania mundambo.' nimba yomboma unju-perana peko mindili nongo kololemele mele yuni unju-pera mele gomo lembando 'Na yu lombili pumbúndu mindili nondu liemu peangala; kolondu liemu peangala.' nimba na lombili opili. We naa opili. <sup>35</sup> Yombo sene yunga mana konde molopa naa kololi ulu-pulumu ambolomba sembá kinia

yu kolopale sika molopa kinjipa mindi pumbá. Aku-na-kolo yombo se na konopu mondopa nanga yombomo molopa, 'Yomboma semane peangamo piliangi.' nimba ono nimba sipa molomba kinia yu kolopale yu konde molopa kondopa mindi puli ulu-pulumu sika kanopa limba.<sup>36</sup> „Akumu nambi semu-na nikiruye?“ Yombo sene mana-mélema pali yuyu lipa taltopale yu mini-pali Pulu Yemo naa molomba koleana pumba mindili nomba molopa kinjilkanje kanu mélemane kanu yombomo nambi sepa lipa tapondolkanje? Lipa naa tapondolkamo.<sup>37</sup> Yombo sene 'Na mini-pali konde molopo kondopo mindi pambo.' nimba yu nambolka mélse mini-pali konde molopa kondopa mindi puli ulu-pulumu topo topa lilkaye? Mélse manda topo topa naa limba.

<sup>38</sup> "Nanga yombo mare ulu-pulu-kiri seko Pulu Yemo munduku kelko méle lupama imbi ambolko paka tondoko molemele yomboma-kinia molkole pipili kolko ninguli: "Olio Yesusinga unguma pilipu lipu, yu lombili andopo molemolo mele we-yombomane naa piliangi." ninguli na kiyongo ningu lombili andolemele yomboma, ono-kinia ungu se pe wendo ombá mele nimbu siembo: Mania Omba Mana-Ye Au Lierimu Yemo pe Lapanga tondolo pa sélimu kinia ,mulu-koleana, angello kake selima kinia ,mania, ombá sembá kinia, kanu we-yomboma molongena yunga yomboma mona molongendo we-yomboma molongena kanokole, yu u naa opili 'Olio yunga yomboma molemolo mele we-yombomane naa piliangi.' ningu pipili kolko lopi seko molonge yomboma yuni lipa wekendo kanopa, "Na moliona naa waa." nimbála." nirimu.

## 9

<sup>1</sup> Yesusi yuni onondo ungu se pea nimbale: "Nane onondo paa sika nimbu sikirumu: "Ono ya gilkimilimanga mare u kolou naa kolangi Pulu Yemo ye nokoli kingimu omba, enge nimba molopa, mélema kinia yomboma kinia pali nokomba ombá kanonge." nikiru." nirimu.

*9:2-13*

### *Yesusinga Kangimu Se Lupa Au Lierimu Semanemo*

<sup>2</sup> Yesusini ,yu lombili andolimando aku sipa nimba sirimu kinia, pe koro se omba purumu kinia Pita keme Jemisi keme Jono keme ono lipa memba pumba mulú paa olandopa polarumu senga ola purumu. 'Olio oliolio mindi molamili.' nimba ono akuna lipa memba purumu. Akuna purungi kinia ono kanoko molangi yunga kangimu topele topa,<sup>3</sup> yu pakorumu mulu-maminama ena tondolo topa mongo paa takele selemo mele aku sipa paa kake serimu. Ya mana-yombo sene wale-pakoli se sopone kulumiye topa kake sendemba mele manda mólo. ,Yunga mulu-maminama kake serimu mele paa olandopa.,<sup>4</sup> Yuaku sipa molopili, ,Juda yombomanga koronga-u moloringili ye awili talo,, Illainja kinia Mosisitolo ongo Yesusi kinia ungu ningu mona gilieringili kanoringi.

<sup>5</sup> Kanu-kinia Pitane Yesusindu nimbale: "Rapai, olio ya molopomolo peanga lepomo. Olione ulka-takaya yopoko takondamili. Se nunga, se Mosisinga, se Illainjanga takondamili." nirimu. <sup>6</sup> (Aku-na-kolo aku nirimumu ono pipilini paa koloringi-kulu yuni nimbá mele naa pilipa ungu se walu nirimu.)

<sup>7</sup> Kanu-kinia kupa se omba ono aki torumu kinia kupana sukundu ungu se wendo omba nimbale: "I yemo nanga konopu mondolio Malomo. Yuni ungu nimbáma pilku liengi." nirimu. <sup>8</sup> Pe waltikele, ono mongo male-male seko kanokole yetolo kelko naa kanoringi. Yesusi yu-mindi ono-kinia molorumu kanoringi.

<sup>9</sup> Mulu polarumumunga mania onge oringi kinia Yesusini ono mane sipa nimbale: "Onone kiniá kanongi mele iseli-u yombo seluri kepe ningu naa siengi. Pe mindi, Mania Omba Mana-Ye Au Lierimu Yemo kolopale kelepa lomboropa ola molomba

kinia semanemo toko anju siengi. U mólo!" nirimu. <sup>10</sup> Aku nirimu kinia ono yunga ungumu pilku liku u anju naa niringi-na-kolo "yu "kolopole kelepo lomboropo ola molombo." nikimu ungu kanumunga pulumu nambolka ulurindu nikimunje?" ningu ono onono angelema niringi.

<sup>11</sup> Kanu-kinia yu lombili andolimane ,yu sika molorumu mele ningu kanokole, yundu mangilku pilku ninguli: "Pulu Yemone 'olio nokopa kondopa lipa tapon-domba.' nimba, nimba taltorumu ye nokoli Karasimu nu liemu, Pulu Yemonga ungu-manemanga puluma pilku mane silimili yemane "Illainja ,kelepa, kumbi lepa ombá. 'Ye nokoli Karasimu pe akilepa ombá.,'" nilimili akumu nambi semu-na nilimiliye? "Illainja kelepa naa opili nu koronga orunu moleno kanumu.," niringi.

<sup>12</sup> Yesusini pundu topa nimbale: " "Illainja ,kelepa, kumbi lepa ombale mélema pali sepa wamomba." nilimili kanumu sika nilimili. Aku liemu Mania Ombo Mana-Ye Au Lierimu Yemo kanoko kiri pilku mindili liku singí mele ,Pulu Yemonga, bokuna nambi semu-na imbi toringi molemoye? <sup>13</sup> Aku-sipa na-kolo ,akumunga ungu se pea nimbu sikiru., Piliame! Illainja koronga orumu. Yu orumu kinia ,kanu yemane yu kanoko imbi naa siku, 'Yu we-yere.' konopu lekole 'yu-kinia semolo.' ningu pilieringi uluma pali seringi. Yu-kinia aku siku senge mele u bokuna imbi toringi molemola." nirimu.

9:14-29

### *Yesusini Kuru Se Makororumu Semanemo*

<sup>14</sup> Yesusi kinia yu lombili andoli ye yopoko kinia, ono yu lombili andoli ye wema moloringina yando ongo, yombo paa awisili akuna kakapu seko maku toko moloringi kanoringi. Pulu Yemonga ungu-manemanga puluma pilku mane siringi yemane Yesusi lombili andoli ye wema kinia ungu ningu, ungu mare mangilku pilku moloringi kanoringila. <sup>15</sup> Yesusi orumu kinia kanokole kanu maku toko moloringi yomboma pungu-pungu awili seko ningu yu orumuna lisiku ongo yundu "Ye-Awilimu,, nu okonoye?" niringi.

<sup>16</sup> Kanu-kinia yuni onondo "Onone ungu nambolka ungumu angelema nikimiliye?" nimba mangilierimu kinia

<sup>17</sup> kanu maku toko moloringi yombomanga ye sene pundu topa yundu nimbale: "Ungu Mane Sili Yemo, nanga kangomo kuru se yunga konopuna molemomonga ungu manda naa nilimú-na nu molonu ,konopu lepole, membo ondu. <sup>18</sup> Kurumuni kangomo wale marenga ambolopale yu topa mania mundulimú kinia yu ámu topa, kere apoupu memba, ungú kikili sendepa selemo. Nu lombili andolimando aku semanemo topo sipu onone kanu kurumu 'Makorangi.' nimbu mawa sendu-na-kolo ono manda naa sengi." nirimu.

<sup>19</sup> Aku nirimu kinia pilipale Yesusini yomboma ,iri topa, nimbale: "Kiniá molemele yomboma ono , 'Pulu Yemone uluma sika manda sembá.' ningu, kuru naa mondoko molemele yomboma, na ono-kinia molopo, wale nambi sepo mane sipu ulu mare lipu ora simbú kinia mimi siku pilingiye? ,Na ono-kinia siye sekemo.," nimbale

"Na moliona kangomo mengo waa." nirimu kinia

<sup>20</sup> kangomo yu molorumuna mengo oringi. Mengo oringi kinia ,kangomonga konopuna molorumu, kurumuni Yesusi kanopale kangomo topa mania mundorumu kinia kangomo kimbu kima peua mundupa kere apoupu merimu.

<sup>21</sup> Aku serimu kinia kanopale Yesusini kangomonga lapa mangilipa nimbale: "Kangomo i kurumu sewale pulu polorumuye?" nirimu.

Lapane nimbale: "Yu kokele anumuni merimu kinia aku sipa serimu. <sup>22</sup> Wale awisili yu ámu topa sepena topa mundupa, nona topa mundupa selemo kene nuni manda liku tapondonu liemu olio kondo kolko liku tapondou." nirimu.

<sup>23</sup> Yesusini nimbale: "Nuni nambi semu-na "Manda liku tapondoni molo móloye?" ninkinuye? 'Nane nu manda lipa tapondomba.' ningu kuru mondonu liemu uluma pali sika wendo ombá." nirimu.

<sup>24</sup> Yesusini aku nirimu kinia pilipale kangomonga lapane tondolo ru nimba nimbale: "Nane 'sika nuni liku tapondoni.' nimbu kuru mondokoro-na-kolo 'Sika.' nimbu kuru mondokoro ungumu tondolo mundupu ambolombo mele manda naa sekemo kene 'Sika.' nimbu kuru mondokoro mele 'tondolo pupili.' ningu liku tapondani." nirimu.

<sup>25</sup> „Kanu-kinia, yomboma lisiku sukundu sukundu kanonge oringi kanopale Yesusini kurumu iri topa nimbale: "Kere pipi siku, komu pipi siku seleno kurumu, kangomonga konopuna ongo wendo pungu, kelko paa naa ongo molani. Kamu pu!" nirimu kinia <sup>26</sup> kurumuni kangomo tondolo topa mania mundorumu kinia yu kimbu kima peua mundorumu kinia kurumu kalli nimba yunga konopuna wendo orumu. Kanu-kinia kangomo yu kolopa lierimu none serimu kanokole yombo awisilini "Yu kolomu lémo." niringi. <sup>27</sup> Aku-sipa na-kolo Yesusini yunga kimu ambolopale yu ola liltimu kinia ola gilierimu.

<sup>28</sup> „Kanu-kinia Yesusini kurumu topa makoropa pora sipale,ulkana sukundu ,yu lombili andolima kinia, purumu kinia lombili andolima onone Yesusi pea onono moltkole yu mangilku pilku ninguli: "Kuru akumu olione nambi semu-na manda naa makoromuluye?" niringi kinia

<sup>29</sup> Yesusini pundu topa nimbale: "I ulumu mele semolondo (kere-lang mi lepo naa nombo) Pulu Yemo kinia ungu nimbu mawa semolomone mindi manda semolo. We manda naa semolomo." nirimu.

9:30-33

### *Yesusini Yu Tonge Kinia Kolopa Lomboropa Ola Molomba Mele Wale Talo-Sipa Nirimu Semanemo*

<sup>30-31</sup> Yesusi kinia yu lombili andolima kinia, ono aku koleamo munduku kelko ,yomboma moloringi koleama naa pungu, kolea Gallilli disiriki sumbi siku ongo pungí purungi. Akuna pungí purungi kinia yu lombili andolima ungu-mane silipa purumu-kulu 'Na lombili andolima ungu-mane sikiru mele we-yombomane naa piliangi kene olio we-yombomane naa kanangi, pea naa pamili.' nimba yu kinia yu lombili andolima kinia onono kiyongo ningu purungi. „Yu-kinia pe wendo ombá mele, yuni ono ungu-mane silipa purumu mele i-sipa:

"Mania Omba Mana-Ye Au Lierimu Yemo ka sikuli ,yu toko kondonge, yema anju singí kinia onone yu toko kondonge. Kolopale wale yopoko sipamonga yu lomboropa ola molomba." nirimu.

<sup>32</sup> Aku-na-kolo yuni nirimu ungumu pilku sundukuli 'I ungumunga pulumu nambolkarenje, naa pilkimulu.' niringi-na-kolo "Nambolka ningu ninkinuye?" ningu mangilku pilingindu pipili kolko naa mangilieringi.

9:33-37

### *Pulu Yemo Ye Nokoli Kingimu Molopa Nokolemo Yombomanga Yombo Paa Imbi Olandopa Molemomonga Ungu Se*

<sup>33</sup> „Ongole, kamu Kapeniamate taonona sukundu oringi.

Molonge ulkana sukundu pungu moloringi kinia Yesusini yu lombili andolima mangilipa pilipa nimbale: "Ono aulkana ungu nambolkarenge angelema niliku ongiye?" nirimu. <sup>34</sup> Aku-na-kolo onone 'Olionga ye nawe paa olandopa molemoye?' ningu angelema ningu keru-kuru liltingi-kulu Yesusindu ono niringi mele ningu para singimunga pipili kolcole molko mokoli seringi.

<sup>35</sup> Kanu-kinia Yesusi yu mania molopale yu lombili andoli rurepondo "Na moliona waa." nimba nimbale: "Yombo sene 'Yombomanga awilimu molambo.' nimba

yu we-yombomo molopa yombomanga kendemande-yombomo molopili." nirimu.

<sup>36</sup> Aku nimbale bolango kanga se lipa „yu lombili andolima, gilieringina mondopale nirimunumi, aku bolangomo yuni kangulupa onondo nimbale: <sup>37</sup> "Yombo sene 'Na Ye-Awylimunga yombomo molio.' nimba i bolangomo mele lipa tapondomba kinia kanu yombomone aku sembamonga na lipa tapondombala. Na lipa tapondomba yombomone na manjipa naa lipa tapondombala. Bolangomo lipa tapondombamonga kanu yombomo yuni na lipa mundorumu yemo lipa tapondombala." nirimu.

9:38-41

*Jesusini Nimbale: "Olio Kinia Opa-Tou Naa Molemele Yomboma 'Olionga Opa-Geramema,' Niemili," Nirimu Semanemo*

<sup>38</sup> Yesusi lombili andoli ye, Jonone Yesusindu nimbale: "Ungu Mane Sili Yemo, olio kanomulu, ye sene nunga imbimu lepa mangilipa kuru mare yombomanga konopuna molongima "Ongo wendo paa!" nimba topa makoropa molomu kanomulu. Kanopole yu olio pea kopu sepo naa molemolo kene yundu "Nu aku siku naa sei!" nimulu." nirimu.

<sup>39</sup> Aku nirimu kinia pilipale Jesusini yundu „kanu yemone serimu ungumundu, nimbale: "Yombo sene nanga imbi lepa mangilipa ulu-tondolo se sepale yuni kelepa nondopa nando ungu se manda nimba naa kinjimba kene onone yundu "Mólo!" ni naa niengi. <sup>40</sup> Yombo se olio-kinia opa-toumu naa molemomo olionga opa-geramemo molemo kanumu." „nirimu..

<sup>41</sup> "Nane onondo paa sika nimbu sikirumu: "Ono no nonowale semba kinia yombo sene 'Ono ye nokoli Karasimunga yomboma molemele kene no se nangi kolopo siembo.' nimba ono se kolopa simu liemu, ye nokoli Karasimunga kongono sendenge yomboma yuni méle kalomba kinia kanu yombomo kepe komu naa sindipa yu konopu lipa mundupa méle kalombala." nikiru." nirimu.

9:42-50

*Olio Karasinga Yomboma Kondi Tolemele Uluma Kinia, Olio Ulu-Pulu-Kiri Selemolo Uluma Kinia, Aku Ulumanga Jesusini Mane Sipa Ungu-Iku Torumu Semanemo*

<sup>42</sup> "Yombo sene i bolangomonga „mele yombo, se na 'Sika' nimba kuru mondolemo bolangomo 'Ulu-kirima sepili.' nimba kondi tombamonga kanu bolangomo kuru mondolemo mele mundupa kelepa bulu simu liemu „bolangomo u kondi naa topili, kanu yemo kou paa awili se moko toko nomina lendeko 'Yu kamu kolo-popili.' ningu paka toko nomuna paa maniakondo mundulimolánje paa papu. Aku siku toko mundulimolá kinia yu kolopale pe yu Pulu Yemonga bolango sendo 'Ulu-kirima sepili.' nimba kondi manda naa tolka. Aku-sipa na-kolo yu aku siku nomuna naa mundulimolá kinia yu yomboma kondi tombamonga yu Pulu Yemo-kinia mongo awili pelka kene onone yu nomuna papu paka toko mundulimolá.

<sup>43-44</sup> "Nunga kitolone ulu-pulu-kiri se semu liemu aku kitolo kari leko eltani. Nu konde mololko mindi puni koleana kitolo naa giliepili puni kinia peangamo. Nunga ki talo we giliepili nu sepe-kolea,

„'akuna Pulu Yemo seko kinjilimili yombomanga

korowama kolou naa kolopa nolepa mindi pulimú,  
sepe toko kumundou naa kumundulimili kolea' ,  
akuna sukundu toko mundungí kinia kirimu.

<sup>45-46</sup> "Molo nunga kimbutolone ulu-pulu-kiri se semu liemu aku kimbutolo kari leko eltani. Nu konde mololko mindi puni koleana kimbutolo naa giliepili puni kinia peangamo. Nunga kimbu talo we giliepili nu sepe-kolea,

( 'akuna Pulu Yemo seko kinjilimili yombomanga

korowama kolou naa kolopa nolepa mindi pulimú,  
sepe toko kumundou naa kumundulimili kolea' )

akuna sukundu toko mundungí kinia kirimu.

<sup>47-48</sup> “Molo nunga mongotolone mélse kanokole konopuni ‘liembo.’ ningu pilku ulupulu-kiri se senu liemu aku mongotolo akuku eltani. Nu Pulu Yemo ye nokoli kingimu molopa nokolemo koleana mongotolo naa giliepili puni kinia peangamo. Mongo talo we giliepili nu sepe-kolea,

‘akuna Pulu Yemo seko kinjilimili yombomanga

korowama kolou naa kolopa nolepa mindi pulimú,  
sepe toko kumundou naa kumundulimili kolea’  
akuna sukundu toko mundungí kinia kirimu.

<sup>49</sup> “Yombomane Pulu Yemo popo toko kalolemele mélema singíndu ‘Pulu Yemone kanopale ‘Kere-langì kake selima.’ nimba kanopili.’ ningu api-kusa mundukuli silimili aku siku mele yomboma molongena sepemo, api-kusa mele, yomboma kinia pali wendo ombá. <sup>50</sup> Api-kusa yu méle peangamo na-colo yu songo naa sembá kinia ‘Yu kelepa songo sepili.’ ningu ungu se manda selemeleye? „Api-kusa kere-langimanga mundulimili kinia songo selemo aku siku, ono api-kusa mele molko yomboma kinia anju yando konopu seluna pupili taka leko molangi.” nirimu.

## 10

10:1-12

### *Yemane Ononga Amboma “Kamu Paa.” Nilimilimunga Ungu Se*

<sup>1</sup> Kanu-kinia Yesusi molorumu koleamo mundupa kelepa kolea Judia disiriki pumba no Jodane kimbilipa nekendo purumu. Kanu-kinia kelko yombo awisili yu molorumuna ongo maku toringi kinia alieli aku seringi kinia yuni yomboma ungu-mane sirimu mele maku toringima kelepa mane sirimula.

<sup>2</sup> Parisi ye mare yu molorumuna ongo ‘Yu nambolka nimbánje? Nimba kinjimbanje manda manjipu piliamili.’ ningu yu mangilku pilku ninguli: “Ye sene yu yuyu pilipale yunga ambomo “Kamu pu.” nimbá kinia manda sembá molo aku sembá kinia ungu-mane se pulua tombaye?” niringi.

<sup>3</sup> Yuni anju pundu topa nimbale: “Mosisini aku ulumundu ungu-mane sipa nambolka nirimuye?” nirimu.

<sup>4</sup> Onone ninguli: “Mosisini nimbale:  
“Ye sene yunga ambomondo  
‘Kamu pupili.’ nimba makorombando  
ambomo “Kamu pu.” nimbá mele  
pepá senga topa ambomo sipale  
yundu “Kamu pu.” nimba aku sepili.”  
nirimu.” niringi.

<sup>5</sup> Yesusini nimbale: “Mosisini sika aku sipa bokuna torumu-na-colo ono kara pungu Pulu Yemone ambo yetolo seluna seluna molongele mele ungu-mane sirimumu pilku mokoli seringi naa pilieringi-kulu yuni “Aku sangi.” nirimu. <sup>6</sup> Aku-sipa na-colo upulu-pulu Pulu Yemone mélema sepale  
yuni yombo sembando  
yemo kinia ambomo kinia serimu.

<sup>7</sup> ‘Aku sipa serimumunga ye sene ambo se lipale  
yunga anumu lapatolo mundupa kelepa  
yunga ambomo kinia ololo seluna kopu seko peko,

<sup>8</sup> kangi selumu mele ‘molko  
olonga konopu seluna pupili, molongele.’

Ye se ambo se limú kinia kangi selumu mele molembele-na olo kelko talo mele naa molembele, olo yombo selumu mele molembele. <sup>9</sup> Yombo selumu molembele kene

Pulu Yemone ambo ye talo ‘Selumu molangili.’ nilimú ambo yetolo yombo sene liku lupa lupa naa mundangi. Aku sengi liemu manda naa sembá.” nirimu.

<sup>10</sup> Kelko ulkana sukundu pungu moloringi kinia yu lombili andolimane Yesusi yundu aku ungu-munga pulumu mangilku pilieringi kinia <sup>11</sup> yuni onondo pundu topa nimbale: “Ye sene yunga u limú ambomo makoropa “Kamu pu.” nimbale kelepa ambo se limú kinia aku yemone wa ulu-kirinale sepa, u limú ambomo sepa kinjilimú. <sup>12</sup> Molo ambo se yunga u pulimú yemo mundupa kelepa wendo pumba ye se pulimú kinia aku ambomone wa ulu-kirinale selemóla.” nirimu.

**10:13-16**

### *Jesusini Bolangomando “Pulu Yemone Ono Sewi Anjepili.” Nirimu Semanemo*

<sup>13</sup> Kanu-kinia yombomane ononga bolangoma ‘Yesusi yunga kimuni ambolopili.’ ningyu yu molorumuna mengo oringi. Aku-sipa na-kolo yu lombili andolimane iri toko „Naa mengo waa!”, niringi. <sup>14</sup> „Mólo.” niringi kinia, kanopale Jesusini konopu kiri panjipa ,yu lombili andolima, onondo nimbale: “Pulu Yemo ye nokoli kingimu molopa nokolemo yombo talape akumu i bolangoma mele molemele yomboma ononga yombo talapemo kene onone i bolangoma na moliona wangipipi siku “Mólo.” naa niee!” ,nirimu. <sup>15</sup> “Nane onondo paa sika nimbu sikirumu: “Bolangomane ‘Pulu Yemo olionga ye nokoli kingimu molopili.’ ningyu molemele meleaku siku naa nilimili yomboma yunga koleana sukundu paa naa pungí, mólo.” nikiru.” nirimu. <sup>16</sup> Aku nimbale yuni bolangoma kangulupa yunga kimuni ono selu selu nimba pengena ambolopa ono sepa kondombando “Pulu Yemone “Ono molko kondangi.” nipili.” nirimu.

**10:17-31**

### *Ye-Kamako Senga Semane Se*

<sup>17</sup> Kanu-kinia Yesusi ola gilipa kolea marenga pumbá purumu kinia ye se yu pumbá purumuna lisipa ombo yunga kumbikerena komorongo langopa yundu mangilipa pilipa nimbale: “Ungu Mane Sili Ye Peangamo, na nambolka unguri sembó kinia naconde molopa kondopa mindi puli ulu-pulumu limbuye?” nirimu.

<sup>18</sup> Yesusini yundu nimbale: “Nuni na nambi semu-na “Ye Peangamo” nikinuye? Yombo peanga se mólo. Pulu Yemo mindi peangamo.” nirimu.

<sup>19</sup> „Aku nimbale yemone mangilierimumunga pundu topa nimbale: „Nu ,Pulu Yemonga, ungu-manema ,Mosisini yando nimba sirimuma, pilieno. Yuni nimbale: “Yombo toko naa kondangi.” nimba,

“Ambo ye pulima molo ye ambo lilima yombo lupama kinia wa ulu-kirinale naa sangi.” nimba,

“Mélema wa naa liengi.” nimba,

“Yombomanga kote kolo toko naa sendangi.” nimba,

“Yombomanga mélema kolo toko we naa liengi.” nimba,

“Aminieli lanieli kinia molko kondoko, ungu ningí mele pilku liku molangi.” nimba, ungu-mané akuma sirimu pelemo kanumu.” nirimu.

<sup>20</sup> Aku nirimu kinia pilipale kanu yemone nimbale: “Ungu Mane Sili Yemo, na kangomo molopole aku ungu-manema pali pilipu lipu sepo molorundu mele yandopa kiniá kepe sepo molioomo.” nirimu.

<sup>21</sup> Yesusini yu neme-neme nimba kanopa konopu mondopale yundu nimbale: “Papu seleno-na-kolo ulu selu mindi naa seleno. Nu pungu nunga méle taltolenoma pali kou-mone li-punguli, kou-mone linima yombo koropama moke seko sikuli na lombili ou.” nirimu. “Nunga ,mana-,mélema aku sení kinia mulu-koleana nunga méle kande-kandema lemba.” nirimu.

<sup>22</sup> Kanu yemo méle paa kande-kandema taltorumu-kulu Yesusini yundu aku nirimu kinia pilipale yu kumbikere sepa konopu kiri panjilipa anju purumu.

<sup>23</sup> „Aku serimu-kulu kanopale, Yesusi topele topa yunga lombili andolimando nimbale: “Pulu Yemo ye nokoli kingimu molopa nokolemo koleana sukundu pungíndu yombo kamakoma paa kála seko sukundu pungí.” nirimu. <sup>24</sup> Aku ungumu nirimu „kinia pilkuli, yu lombili andolimane mini-wale mundoringi. Aku-na-kolo Yesusini kelepa onondo nimbale: “Kangoma, Pulu Yemo ye nokoli kingimu molopa nokolemo koleana sukundu pungíndu yomboma paa kála seko pungí. <sup>25</sup> Kongi kamele „kongi paa awili se na-kolo, kale suru tolina sukundu pumbándo kála kanga mele sepale pumbá. Aku-na-kolo yombo kamakoma Pulu Yemo ye nokoli kingimu molopa nokolemo koleana sukundu pungíndu kála paa awili mele seko pungí.” nirimu.

<sup>26</sup> „Aku nirimu kinia pilkuli, yu lombili andolima paa mini-wale munduku pungupungu ningu anju yando kerepale ningu ninguli: “Aku liemu pe kamu mindili nolemolá aulkana nawe manda wendo pumba, molopo kondopo mindi pumulú aulkana pumbaye? Se mólonje?” nirungi.

<sup>27</sup> Yesusini ono neme-neme nimba kanopa nimbale: “Sika yomboma onono manda mólo, aku-na-kolo Pulu Yemone manda sendemba. Pulu Yemo yuni uluma pali manda selemo. Ulu se yuni manda naa sembá se mólo.” nirimu.

<sup>28</sup> Yuni aku nirimu kinia pilipale Pitane yundu nimbale: “„Pe olio-kinia nambolka uluri wendo ombáye?“ Olio olionga mélema pali mundupu kelepo nu lombili purumulu mele pulimulu kanumu.” nirimu.

<sup>29</sup> Yesusini nimbale: “Nane onondo paa sika nimbu sikirumu: “Yombo na konopu mondoko nanga kongono sendeko semane peangamo toko siliku andongendo ononga ulkama, genupili, kemulupili, anupili, lapali, bolangoma, koleama, akuma munduku kelieringi yomboma pali <sup>30</sup> ya mana paa olandopa méle awisili likuli, pe pungí koleanaconde molko kondoko mindi puli ulu-pulumu lingila. Ya mana ulkama, genupili, kemulupili, anupili, bolangoma, koleama kinia, akuma pali awisili olandopa lingila; „na konopu naa mondonge yombomane, ono mindili singila.“ nikiru. <sup>31</sup> Aku-sipa na-kolo kiniá yombo awili molemele yombomanga awisili pe „Pulu Yemo ye nokoli kingimu molopa nokomba koleana, yombo koropama molonge; kiniá koropa pupili molemele yomboma pe yombo awilima molonge.” nirimu.

10:32-34

#### *Yesusini Yu Kolopale Lombokora Ola Molomba Mele Kelepa Wale Yopoko-Sipa Nimba Para Sirimu Semanemo*

<sup>32</sup> Kanu-kinia „Yesusi kinia yu lombili andolima kinia, ono kolea-awili Jerusalleme pungí puringi. Yesusi kumbi lierimuna lombili andolima paa konopu awisili liku munduliku yu lombili puringi. We-yombo akileko lombili oringima kepe mini-wale munduku pipili kololko puringi.

Yesusini „yu lombili andoli, ye engaki rurepo ‘na kinia ono kinia oliolio molamili.’ nimba ono lipa anju memba pumbale yu-kinia wendo ombá mele kelepa pulu polopa nimba sipa nimbale: <sup>33</sup> “Piliame. Olio Jerusalleme pumulú pukumulu. Akuna pumulú kinia Maria Ombo Mana-Ye Au Lierimu Yemo ye sene ‘Tangi.’ nimba Pulu Yemo popo tondoli ye awilima kinia, Pulu Yemonga ungu-manemanga puluma pilku mane sili yema kinia, lipa simba. Kanu-kinia onone yu kote sendeko pilkuli ‘Yu kolopili toko kondangi.’ ningu Juda ye naa molemele ye-lupama liku singí. <sup>34</sup> Kanu-kinia kanu ye-lupamane yu ungu-taka tondoko yunga kumbikerena elkambe toko yu ka-pultane toko yu toko kondonge. Yu toko kondonge kinia wale yopoko-sipamonga lombokora ola molomba.” nirimu.

10:35-45

#### *Jemisi Kinia Jonotolone Yesusi Mawa Sekole “Nu Mulu-Koleana Pungu Moloni Kinia Olto Nu-Kinia Ye Awilitolo Molambili.” Niringili Semanemo*

<sup>35</sup> Kanu-kinia Seperi malo Jemisi kinia Jonotolo olo Yesusi molorumuna ongo ninguli: "Ungu Mane Sili Yemo, nuni 'Olto ulu se sani.' nimbu mawa simboló okombolo." niringili.

<sup>36</sup> Yuni olondo nimbale: "Nambolka unguri 'nane olo-kinia sendambo.' ningu nikimbiliye?" nirimu.

<sup>37</sup> Olone pundu toko ninguli: "Nu pe nunga kolea tondolo pa selina ,ye nokoli kingimu molkole ninimuni, 'olto nu-kinia pea ye nokolima molamili.' ningu, 'olto se nunga ki-lomekondo mondoko se nunga ki-tarokondo mondani.' nimbu mawa sekembolo." niringili.

<sup>38</sup> Yesusini olondo nimbale: "Mawa sekembele mele olo pilku naa kondokombele. Na no-mingina no nombómo olo manda nongeleye? Molo na no limbamu olo manda lingilíye?" nirimu.

<sup>39</sup> Olone yundu pundu toko ninguli: "Manda simboló." niringili.

Yuni olondo nimbale: "Na no-mingina no nombómo pe olo sika nongeleta. No limbamu pe sika lingilíla. <sup>40</sup> Aku-na-kolo nane olo "Nanga wangutolonga ongo molangili." nimbúmu manda naa sembá. ,Pulu Yemone yuyu, akuna molongeletolo koronga nimba talitorumu." nirimu.

<sup>41</sup> Jemisi Jonotolone , 'Yesusinga wangutolonga molambili.' , ningu mawa seringili mele pilkuli lombili andoli rureponga talo wemane olo-kinia konopu kiri panjeringi.

<sup>42</sup> Kanu-kinia Yesusini ono "Waa." nimbale nirimunumi, onondo nimbale: "Olio Juda yombomanga ultu molemele yombo talapemanga ye nokolima ononga yomboma tondolo munduku nokoko kongono enge nilima alieli silimili. Ye imbi ola molemo yema ononga yomboma 'Mindili nangi.' ningu nokolemele. ,Yombomane ononga ye nokolimanga unguma pilku mokoli senge aulka se naa lemó mele, ono pilielemene.

<sup>43</sup> Aku-sipa na-kolo ,we-yombomanga ye nokolimane ononga yomboma tondolo munduku nokolemele mele na lombili andoli yema, ono onono aku siku anju yando naa sangi. Ononga ye se 'Na imbi olandopa molopili. Na ye awilimu molambo.' nimbá yemo ononga kongono sendeli yemo molopili. <sup>44</sup> 'Na ononga ye nokolimu molopo ono nokambo.' nimbá yemo ononga pali kongono kendemande sendeli yemo molopili. <sup>45</sup> Aku sipala, Mania Ombo Mana-Ye Au Lierimu Yemo kepe 'Yombomanga ye awilimu molopo ono nokambo. Onone nanga kongono sendeli kendemande-yomboma molangi.' nimba naa orumu. 'Yombomanga kongono sendeli kendemande-yemo molopo ono lipu tapondopo, ulu-pulu-kirimane ono ka sipa nokolemo mele naa sepili manda molangi kene na yombo awisilinga nimbu pundu tondopo nanga kangimu sipu, kolali sepo kolondambo.' nimba orumu." nirimu.

10:46-52

### *Yesusini Mongo Kiri Lierimu Ye Se Sepa Peanga Sirimu Semanemo*

<sup>46</sup> Kanu-kinia Yesusi kinia yu lombili andolima kinia ono kolea-awili Jeriko oringi. Ongole ono kinia we-yombo awisili kinia Jeriko munduku kelko pungí puringi kinia mongo kiri lierimu ye se, imbi Ba-Timiasi, (akumunga pulumu Timiasi malo,) aulka lomolomena molopa yomboma "Kou-mone siee." nimba mawa serimu.

<sup>47</sup> Kolea Nasarete ye Yesusi ombo purumu mele pilipale mongo kiri lierimu yemo yuni pulu polopa tondolo ru nimba mangilipa nimbale: "Yesusi, ,ye nokoli kingi, Depitini kalopa lilltimu yemo, na kondo kolou!" nirimu.

<sup>48</sup> Yombo awisilini yu iri toko "Nu ungu naa nili také leko molou!" niringi.

Aku-na-kolo yuni paa tondolo ru nimba mangilipa nimbale: "Depitini kalopa lilltimu yemo, na kondo kolou!" nirimu.

<sup>49</sup> Yesusi we gilipale "Yu opili niee." nirimu.

Aku nirimu-kulu ono mongo kiri lierimu yemo mangilku ninguli: "Yuni "Nu ou." nikimu kene konopu peanga leko ola gilku ongo pu." niringi.<sup>50</sup> Yu popenge sepa ola pakorumu wale-pakolimu kulupa ola gilipa Yesusi molorumuna orumu.

<sup>51</sup> Yesusini yuntu nimbole: "Nane nu nambi sambo konopu lekenoye?" nirimu kinia

mongo kiri lierimu yemone nimbole: "Raponai, na mongotolone mélema kanambo nanga mongotolo seko peanga sindani." nirimu.

<sup>52</sup> Yesusini nimbole: "'Nane nunga mongotolo manda sendembo.' ningu kuru mondonumunga nu umbu-mongotolo manda gilkimu kene pu." nirimu. Yesusini aku nirimu kinia yu popenge sepa mongotolo peanga lierimu, mélema kanopale, Yesusi purumu aulkana lombili purumu.

*Kolomongo-Awili 11-16*

## **Yesusi Mindili Nomba Kolopale, Lombokora Ola Molopa Mulu-Koleana Kelepa Purumu Semanemo**

### 11

11:1-11

*Ye Nokoli Kingi Se Kolea Senga Sukundu Pumbá Purumu Kinia Seringi Mele Yesusi  
Jerusalleme Sukundu Pumbá Purumu Kinia Aku Siku Seringi Semanemo*

<sup>1</sup> Yesusi kinia yu lombili andolima kinia, ono kolea-awili Jerusalleme nondoko ongo, ma-pangi se 'Ma-Pangi Unju Ollipi Kalia' nili akuna lemó kolea-kanga talo, Betepasi kinia Betani-tolonga oringi. Kanu-kinia Yesusini yu lombili andoli ye talo lipa mundupa, <sup>2</sup> olondo nimbole: "Ne kolea-kanga kanokombelena punguli kongi dongi walo se, yombo se yunga bulu-mingina waltikele kepe naa molopa andorumumu ka seko panjingímu ne sukundu molomba kanongele, kanumu pungu posiku yando mengo wangili pale. <sup>3</sup> Posingilí seko molongele kinia yombo sene olondo "Aku nambi semu-na sekembeleye?" nimu liemu olone i-siku niengili: "Ye-Awilimu yu 'Dongimuni mepili.' nimu-na ombo likimbulu. Yu dongi walomo kelepa nondopa yando lipa mundumba." niengili." nimba olo lipa mundorumu.

<sup>4</sup> Lipa mundorumu yetolo pungu, kongi dongi walo se, ulka kerepuluna ka seko panjeringimu kanokole kongi kanumu pungu poseringili. Aku siku sengele seringili kanokole <sup>5</sup> akuna gilieringi yombo marene olondo "Kongi dongi walomo nambi semu-na posikimbiliye?" ningu mangilku pilieringi kinia

<sup>6</sup> olone, Yesusini 'i-siku i-siku nieli.' nirimu mele niringili kinia "Manda, 'dongi walomo, mengo pangili." niringi.

<sup>7</sup> Kanu-kinia olone kongi dongi walomo Yesusi molorumuna mengo ongole, onone ononga mulu-maminiamma kulku dongimunga bulu-mingina ola pauwa toringi kinia Yesusi kanuna ola molorumu. <sup>8</sup> Yombo awisilini ononga mulu-maminiamma kulku yu ombá aulkana pauwa tolko pungu, marene unju kipi kaliana pungu kipi gomo langoko liku yu ombá aulkana pauwa tolko puringi. <sup>9</sup> Kumbi leko puringi yombomane kepe akileko puringi yombomane kepe kalkarukumba leko unju ambololeko pungu ninguli:

"'Yunga imbi ola molopili.' niemili!

'Pulu Ye Yawene lipa mundorumu-na

yunga kongonomo sendemba okomo yemo  
molopa kondopili!'

<sup>10</sup> Olionga anda-kolepa ye nokoli kingi Depit, ni

kalopa liltimu yemo,

ye nokoli kingi molomba sekemo yemo

Pulu Yemone sepa kondopa

‘Yu tondolo pupili.’ nipili.  
Mulu-koleana ola yu imbi ola molopili!”  
niliku puringi.

<sup>11</sup> Kanu-kinia Yesusi Jerusalleme sukundu pumbale Pulu Yemo popo toko kaloringi ulka-tembelena pumba akuna sukundu ,seko moloringi uluma, pali kanorumu, akuna-kolo kolea ipu lierimu-na kanopale , ‘Iseli-u ulu se naa sambo.’ nimba, yu lombili andoli ye engaki rurepo kinia ,Jerusalleme, ultukundu pungu, kolea-kanga Betani ,pengé, puringi.

11:12-14,20-26

### *Jesusini Unju Piki Se Iri Torumu Kinia Kolorumu Semanemo*

<sup>12</sup> Orili-u ,Jerusalleme nondopa lierimu, kolea-kanga Betani munduku kelkole ,kelko Jerusalleme pungí puringi kinia, Yesusi yu gele serimu. <sup>13</sup> Kanu-kinia yu unju piki se gomo sepa gilierimumu sulu sepa kanopale ‘Mongo se tomunje.’ nimba nondopa pumba kanorumu-na-kolo, piki mongo torumu walemo u wendo naa orumumunga unju mongo topa se naa perimu, gomoma mindi serimu kanorumu. <sup>14</sup> ‘Gomo mindi serimu-kulu, kanopale “Nu kelko yombomane nonge mongo se naa tani!” nirimu. Aku nirimumu yu lombili andolimane pilieringi.

11:(11,)15-18

### *Ulka-Tembelena Bisinisi Seko Kou Liku Moloringi Yema Yesusini Topa Makororumu Semanemo*

<sup>15</sup> Jerusalleme kamu oringi kinia Yesusi yu Pulu Yemo popo toko kaloringi ulka-tembelena , “Juda yombo naa molemele yomboma ‘Pulu Yemo popo tamili.’ ningu maku tolemele kolea” niringi akuna, sukundu pumba kanopale akuna mélema makete seko moloringi yomboma kinia, mélema topo toko liku moloringi yomboma kinia, akuma kanopale ono pali topa makoropa, kou-mone lupa lupama topele toko anju siringi yombomanga poloma kinia, kera waembonoma makete seko mania moloringi poloma kinia, lipa topele topa, topa bulu-balú sipa, <sup>16</sup> yombomando nimbole: “Yomboma kou-mone lingí makete senge mélema kolea senga lupa makete senge pungíndu ulka-tembele palana naa pangí. ‘Akanale seko pangí.’” nirimu.

<sup>17</sup> Ono mane sipa nimbole: “Pulu Yemonga bokuna ungu se i-sipa nilimú:  
‘Yombomane nanga ulkamondo

“Koleamanga pali yombo talapemane  
Pulu Yemo kinia ungu nilimulu ulkamo.” ningí.’  
kanumu ono naa pilielemeye?  
Ungu aku sipa molemo-na-kolo onone i ulkamo  
‘wa nolemele yomboma lopi seko molemele ulkamo’  
mele ningu pilkuli aku siku selemele.” nirimu.

<sup>18</sup> Yesusini aku nirimu-kulu pilkuli Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, ono yu toko kondonge aulka se kororingi. We-yomboma yuni mane sirimu mele pilkuli mini-wale mundoringi-kulu kanokole kanu Juda yombomanga ye awilimane yu pipili kolko yu toko kondonge aulka se kororingi.

<sup>19</sup> Pe ipupini, kolea kala tomba serimu kinia ,Jerusalleme, ultu pumba ,senga peporumu.

11:20-26

### *(Inia yakondo 11:12-14,20-26 kanani)*

<sup>20</sup> Orili-u, ,unju piki gilierimu koleana, ongo punguli kanu unju pikimu kamu pulu pali kolorumu kanoringi. <sup>21</sup> Aku sipa serimu mele Pitane kanopale ,Yesusini unjumunu oleangakondo nirimu mele, kelepa pilipale yundu nimbole: “Rapai, kána! I unju piki nuni ,oleanga, iri tonumu ,waltikele, kolomu.” nirimu.

<sup>22</sup> Yesusini pundu topa nimbale: "Pulu Yemone nanga ungumu sika pilimba, monga nimbú mele 'Paa sika wendo ombá.' ningu, kuru mondangi! <sup>23</sup> Nane ono paa sika nimbu sikirumu: "Yombo sene 'nane nimbú mele paa sika wendo ombá.' nimba konopu talo sepa naa pepili ne ma-pangimundu "Ungú toko nomu-kusana sukundu pu!" nimbá kinia yu nimbá mele paa sika wendo ombá." nikiru. <sup>24</sup> Akumunga ono i-sipu nimbu siembo: " 'Olio „Pulu Yemone paa sika lipa tapondombamonga ‘Samili.’ nimulú mele sika manda aku sipu semolo.’ molo ‘Nimulú kinia sika aku sipa wendo ombá.’ ningu, kuru mondokole Pulu Yemo kinia ungu ningu mawa senge mele pali Pulu Yemone sika sendembamonga kanu uluma sika wendo ombá.” nikiru." nirimu.

<sup>25</sup> " 'Ulu-pulu-kiri semuluma olionga Lapa, mulu-koleana molemomone 'We mania pupili, siye kolambo.' nipili.' ningu, Pulu Yemo kinia ungu ningu gilkuli yombomane ono seko kinjingimunga konopu kiri panjiku molonge uluma 'We mania pupili. Siye kolamili.' niengila. <sup>26</sup> (Aku-sipa na-kolo yombomane ono seko kinjingí uluma 'We mania pupili.' ningu siye naa kolongi liemu ononga Lapa, mulu-koleana molemomone kepe onone ulu-pulu-kiri sengema 'Mania pupili.' naala nimba siye naala kolomba.)" nirimu.

11:27-33

### *Yesusi Namba Sirimumunga Angelema Niringi Semanemo*

<sup>27</sup> Jerusalleme kelko oringi kinia Yesusi yu ulka-tembelena sukundu andorumu kinia ye mare, Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, Juda yombomanga tapu-yema kinia, <sup>28</sup> ono ongo yu mangilku pilku ninguli: "Nu namba nambolka nambamo likuli i kongonomo selenoye? Nawene i kongonomo 'Se-pu.' nimba nu nambamo sipa lipa mundorumuye?" niringi.

<sup>29</sup> Yesusini onondo pundu topa nimbale: "Nane ono ungu se mangilipu piliambole. Pe nane ono mangilimbu mele na sumbi siku pundu toko níngi liemu 'Na i kongonomo sambo.' nimba namba sirimumunga pulumu ono nimbu simbula. <sup>30</sup> „Nane i-sipu ono mangilipu pilkiru: „U „No Lindeli, Jono ombo yomboma no linderimu kinia yu mulu-koleana molemo yemonga kongonomo sendembando yomboma no linderimu molo ya mana-yombomanga kongonomo sendembando yomboma no linderimuye? „Nawene “Sei.” nirimu-na serimuye?, Ningu siee.” nirimu.

<sup>31</sup> „Yuni aku sipa mangilierimu mele pilkuli, onone onono angelema ningu ninguli: "Yuni mangikimu mele olione pundu topo, 'Jono, yu mulu-koleana „molemo yemonga kongono sendembando yomboma no linderimu..’ nímulu liemu yuni oliondo nimbale: 'Aku liemu ono Jonone nirimu ungumu nambi semu-na 'I ungumu sika.' ningu kuru naa mondoringiye?" nimbá. <sup>32</sup> Molo olione nimbuli: 'Yu mana-yombomanga „kongonomo sendembando yomboma no linderimu..’ nímulu liemu "We-yombomane olio tongenje." ninguaku siku ningíndu pipili koloringi. We-yombomane „No Lindeli, Jono yu paa sika Pulu Yemone ungu-umbu tondorumumu pilipa yomboma nimba sirimu ye se molorumu.' ningu pilielemele kene olio nambi semolonje?" ningu onono aku siku angelema niringi.

<sup>33</sup> „Onono aku siku anju yando angelema ninguli, Yesusindu pundu toko ninguli: „Nuni mangilkinu mele, olio naa pilkimulu." niringi.

Aku siku niringi kinia pilipale Yesusini onondo nimbale: "Manda. „Nane ono mangikiru ungumunga ungu se pundu toko naa nikimilimunga, onone na mangikimili ungumunga ungu se pundu topo, nando i kongonomo 'Se-pu.' nimba na lipa mundupa namba sirimu yemonga imbimu ono naa nimbu simbula." nirimu.

## 12

*12:1-12*

### *Unju-Waene Kalia Nokoringi Ye Kirimanga Ungu-Ikumu*

<sup>1</sup> Walte Yesusini „Juda yombomanga ye awilimando, ungu-ikuma ono topa simbando ungu-iku se i-sipa torumu:

“Ye sene unju-waene kalia sepale pala serimu. Kaliana sukundu loyakolo akupa waene-no ingi sepa mondombando sepa wamopale nirimumuni, pe kalia nokonge ulka-takaya se polo kulupa ola takorumu. Ye mare kanopa lipa onondo nimbale: “Nanga kaliamo tapu sendeko unju mongoma inia toko nokondangi. Pe waene mongo polo tomba kinia unju mongoma moke sepo, kongono sendenge mele mare ono liengi, mare na liembo.” nimba kanu kaliamo ono sipale yu kolea paa suluringa pumba molorumu.

<sup>2</sup> Kanu-kinia pe waene mongo polo tomba serimu kinia kalia pulu yemone yunga kendemande-ye se “Nanga waene-mongo siengi pungu liku mendeko wani pu.” nimba kalia nokoringi yema moloringina lipa mundorumu. <sup>3</sup> Aku-na-kolo kendemande-yemo „orumu kinia, kalia nokoli yemane yu ambolko likuli yu wale awisili kopene toko waene mongo mare naa siku yando we liku mundoringi.

<sup>4</sup> Kelepa kalia pulu yemone kendemande-ye se lipa „Nanga waene mongo lindipou.” nimba lipa, mundorumu. Aku-na-kolo yu „orumu kinia, kalia nokoli yemane yu ambolko likuli toko pengemo toko siku yu seko kinjeringi.

<sup>5</sup> Kelepa kalia pulu yemone kendemande-ye se lipa mundorumu kinia onone yu toko kondoringi. Kendemande-ye mare awisili mele lipa mundorumumanga mare wale awisili kopene toko, mare toko kondoringi.

<sup>6</sup> Kanu-kinia kalia pulu yemo yunga ye selu mindi molorumu, yunga malo, yu konopu mondorumu kangomo. Yuni „konopumuni pilipale, ‘Nanga kangomo pipili kolko liku awi siku, yu waene mongo mare singí.’ konopu lepale yunga malomo kamu lipa mundorumu. <sup>7</sup> Aku-sipa na-kolo kalia nokoli yemane kalia pulu yemonga malo ombá orumu kanokole onone onono ninguli: “Andi okomo yemo pe lapanga mongémélema limba yemo okomo. Yu topo kondopo i kaliamo olio kamu liemili.” ninguli <sup>8</sup> onone yu ambolko liku toko kondoko „yunga ónomo, kaliana toko ultu mundoringi.” nimba Yesusini nirimu.„

<sup>9</sup> „Yesusini ungu-iku akumu topa pora simbando kanu Juda yombomanga ye awilimando mangilipa nimbale:„

“Kalia nokoringi yemane aku seringimunga pe kalia pulu yemone ono-kinia nambolka unguri sembaye? Yu ombo kanu ye kirima topa kondopa, ‘Ye marene lupa kaliamo nokondangi.’ nimba lipa simba.” „nirimu.„

<sup>10</sup> „Yesusini Pulu Yemonga Juda yomboma nokoringi yemane yu toko kondonge mele pilipa onondo nimbale:„ “Pulu Yemonga bokuna sukundu ungu se kanoko naa pilielemeye? „Aku ungumu i-sipa mele:„

‘Ulka takoringi yemane

kanoko kiri pilku toko eltoringi kou kanumu  
kiniá kelepa ulka simu mele  
ulka enge sindeli kou awili peangamo.’

<sup>11</sup> „Ye-Awilimuni aku ungumu serimu olione

kanopo paa peanga pilielemolo.’

nimba molemo kanumu.” nirimu.

<sup>12</sup> „Kanu Juda yombomanga ye awilima, onone Yesusini ungu-iku torumu kanumu pilkuli onone yu toko kondonge seko moloringi mele yuni nirimu pilkuli onone yu ka

singí seringi-na-kolo kanu ye awilimane we-yomboma pipili kolkole yu liku ka naa siringi. Yu munduku kelkole anju puringi.

**12:13-17**

*"Gapomano Kou-Takisi Tamili Molo Móloye?" Ningu Yesusi Mangilku Pilieringi Semanemo*

<sup>13</sup> Pe walte „Juda yombomanga ye awilimane, Parisi ye mare kinia ye nokoli kingi Erotenga talape ye mare kinia liku, ‘Yesusini ungu se nimba kinjepili.’ ningi i-siku i-siku yundu niengi.” ningi Yesusi molorumuna liku mundoringi. <sup>14</sup> Liku mundoringi yemane Yesusi molorumuna ongo yundu ninguli:

“Ungu Mane Sili Yemo, olio pilielemolo, ‘nuni ungu-sikama mindi ningi, nu yombo seluringa kepe konopu kimbu naa siku, yomboma pipili naa kolko onondo pali ungu selu-siku ningi siku, Pulu Yemone “Saa.” nilimú uluma paa sika unguma mane siku, aku siku seleno.’ konopu lemolo. ‘Aku siku seko molenomonga nu nambolka konopu lekenoye?’, Olione Romo Gapomano Ye Paa Awili Kumbina ‘Sisa’ nilimu kou-takisi tomulu liemu manda molo móloye? Yu ‘kou-takisi, simulúne naa simulúne? Pulu Yemone akumundu ungu-mané sirimu ungu-mané nambolkamo pelemoye? Ningi si.’ niringi.

<sup>15</sup> Aku-sipa na-kolo Yesusini ono topele-mapele toli yema molemele mele pilipale onondo nimbale: “‘Yuni nimba kinjepili.’ ningi nambi semu-na na manda manjiku kolo toko mangilkimiliye? ‘Takisi tolemele, kou-mongo se kanambo, mengo ongo siee.’ nirimu kinia

<sup>16</sup> onone yu molorumuna se mengo ongo yu siringi.

Kanu-kinia Yesusini onondo nimbale: “I kouna nawenga kumbikeremo kinia imbimu molemoye?” nirimu.

Onone yundu ninguli: “Romo Gapomano Ye Paa Awili Kumbina Sisamonga kumbikeremo kinia imbimu molemo.” niringi.

<sup>17</sup> Kanu-kinia yuni onondo nimbale: “‘Kou-monemo Sisamonga, kene Sisamonga mélema Sisamo yuyu siku, Pulu Yemonga mélema Pulu Yemo yuyu siee.’ nirimu.

Yuni aku sipa ‘paa sumbi sipa, nirimu mele pilkuli, ‘Yu paa pilipa kondoli pelemo yemo lepomo.’ ningi pilkuli, konopu awisili liku mundoringi.

**12:18-27**

*“Kololemele Yomboma Lomboroko Ola Molkole Kelko Nambi Sengenje?” Ningu Yesusi Mangilku Pilieringi Semanemo*

<sup>18</sup> „Kanu yema Yesusi kinia kou-takisi toli ungumu ningi pora siringi kinia, pe Sadusi ye mare Yesusi molorumuna oringi. Sadusi yema ono ‘Pulu Yemone pe kololemele yomboma topa naa makisindimba, lomboroko ola naa molonge.’ ningi pilku moloringi talapemo. Aku Sadusi yema ongo Yesusi mangilku pilku ninguli:

<sup>19</sup> “Ungu Mane Sili Yemo, ‘Pulu Yemonga ungu-manema olio sirimu ye, Mosisini ungu-mané sipa nimbale:

“Ambo limba ye se bolango naa membale  
ambomo we molopili kolomba kinia  
kanu yemo yunga genu molombamone  
yunga ambo-wayamo lipa  
genu lipa tapondopa bolango mendepili.”

nirimu aku sipa nimba bokuna torumu molemo kanumu. <sup>20</sup> Aku ungu-manemonga ulu se olionga ye mare-kinia wendo orumu mele nu mangilipu piliamili.,

“Genupili yopoko-pakara moloringi. Komomo ambo lipa bolango se naa membale kolorumu. <sup>21</sup> Bolango se naa molopili kolorumu-kulu, yunga bulkundu genumuni ‘yunga genu kolorumumunga bolango ‘Mendambo.’ nimba, ambo-wayamo kelepa liltimu. Yu bolango se naa mendepale yu we kolorumula. Yunga genu bulkundumuni

kanu ambomo liltimula-na-kolo yu kepe we kolorumu. <sup>22</sup> Aku selko punguli ye yopoko-pakara pali bolango selu kepe naa mengole kolko pora siringi kinia akiliuumu we kolorumula. Pe ambomo yu kolorumula. <sup>23</sup> Akumunga, kololemele yomboma pe lomboroko ola molonge kinia kanu ambomo ye yopoko-pakara pali ya mana litingi-kulu ambomo yu ye paa nawenga menu molombaye?" niringi.

<sup>24</sup> Yesusini onondo pundu topa nimbale: "Ono Pulu Yemonga bokuna ungu molemoma kinia, Pulu Yemo-kinia tondolo pelemo mele kinia, naa pilku lo limilimunga ,yomboma pe sengemondo nikimili mele pilku sunduku kolo tokomele,. <sup>25</sup> Lomboroko ola molonge yombomanga yema ambo naa liku, amboma ye naa pungu, aku paa naa senge. Mulu-koleana molemele angelloma molemele mele aku siku molonge. ,Angellomane mana-yomboma selemele mele naa selemele kanumu., Aku sengemonga , 'Ono Pulu Yemonga ungumu pilku sunduku lawa selemele.' nikiru,.

<sup>26</sup> "Aku-sipa na-kolo ,ono Sadusimane, 'Kololemele yomboma lomboroko ola naa molonge.' konopu lemelemonga ungu se niembola. Mosisi unju kanga senga ,sepe nomba perimu sepemoneunjumu naa norumu kanopale nirimumuni, akuna Pulu Yemonga ungu se wendo ombo Mosisindu ungu se nirimu semanemo onone naa kanoko pilielemeye? Pulu Yemone Mosisindu nimbale:

"Na Eporayamo kinia Aisake kinia Jekopo kinia  
ononga Pulu Yemo molio." nirimu.

Pulu Yemonga bokuna Mosisini torumu aku ungu molemomo naa kanoko pilielemeye? , 'Ononga Pulu Yemo molorundu.' naa nirimu. 'Ononga Pulu Yemo molio.' nirimu kanumu., <sup>27</sup> Pulu Yemo yu kololi yombomanga Pulu Yemo mólo; yu yombo konde mololimanga Pulu Yemo. Aku siku pilku sundukuli ono lo limili." nirimu.

12:28-34

*Pulu Yemone Ungu-Mane Sirimu Ungu-Manemanga Talo Olandopamonga Semanemo*

<sup>28</sup> ,Sadusi yema kinia Yesusi kinia, aku siku angelema ningu molangi Pulu Yemonga ungu-manemanga puluma pilipa mane sirimu ye se ombo ono anju yando angelema ningu moloringi ombo pilierimu. Onone ungu mare Yesusindu mangilku pilieringi kinia yuni anju pundu topa nimba kondorumu mele pilipale ungu-mane sirimu yemone Yesusindu mangilipa pilipa nimbale: "Pulu Yemone ungu-mane sirimu pelemomanga pali nambolka ungu-manemo yu olandopamoye?" nirimu.

<sup>29</sup> Yesusini pundu topa nimbale: "Ungu-mane olandopamo i-sipa:  
'Isirele yomboma, piliam!

Ye-Awili Yawe olionga Pulu Yemo  
yu mindi Ye-Awili selumu molemo,  
se lupa mólo.

<sup>30</sup> Onone ononga kamelema kinia,  
ononga minima kinia,  
ononga pilipa kondolima kinia,  
ononga tondolomo kinia,  
akumane Ye-Awili Yawe ononga Pulu Yemo manjiku  
tondolo munduku konopu mondangi."

nimba, ungu-mane paa olandopamo aku sipa ,nimba, molemo. <sup>31</sup> Ungu-mane talo-sipamo i-sipa:

'Onone onono yu-meletele konopu mondoko  
ononga kangimu onono  
kondo kolko nokolemele mele  
aku sikula pulu lemó yomboma  
konopu mondoko nokoko molangi.'

nimba molemo. Aku ungu-manetolonga olandopa se paa naa pelemo, mólo." nirimu.

<sup>32</sup> Yesusini aku nirimu pilipale, yemone yuntu nimbale: "Ungu Mane Sili Yemo, papu nikinumu. Nuni ninguli: "Pulu Yemo selumu mindi molemo. We-se-lupa naa molemo. Yu yuyu molemo." nikinumu paa sika nikinu.

<sup>33</sup> 'Yu konopu mondongendo

onone ononga kamelema kinia,

ononga pilipa kondolima kinia,

ononga tondolomo kinia,

akumane 'Ye-Awilimu ononga Pulu Yemo, manjiku

tondolo munduku konopu mondangi.'

nimba pelemo ungu-manemo kinia

'Ono ononga kangima onono kondo kololemele mele

yombo pulu lemóma aku siku kondo kolangi.'

nimba pelemo ungu-manemo kinia, aku ungu-manetolo semolo kinia olandopa; Pulu Yemo kongima kinia mélema popo topo kalopo "Imu nu sikiru." nilimulu akumu maniandopa." nirimu.

<sup>34</sup> Yuni pundu topa nimba kondoramu pilipale Yesusini yuntu nimbale: "Nu konopu leko molenomonga Pulu Yemone ye nokoli kingimu molopa nokolemo yombo talapena sukundu nondoko puni sekено lémo." nirimu.

Kanu-kinia Yesusindu mangilku pilieringi unguma pali yuni pundu topa anju nimba kondoramu pilkuli, kelko yu ungu se mangilku pilingindu pipili kolko naa mangilieringi.

**12:35-37**

### *Yesusini "Ye Nokoli Karasimu Nawenga Maloye?" Nimba Mangilierimu Semanemo*

<sup>35</sup> Yesusi 'Pulu Yemo popo toko kaloringi, ulka-tembelena sukundu yomboma ungu-mane sipa molorumu. Mane sipa molopa ungu se nimbale: "Pulu Yemonga ungu-manemanga puluma pilku mane sili yemane ninguli: "Pulu Yemone "Ono nokopa kondomba ye se lipu mundumbu." u nimba taltorumu ye nokoli Karasimu ,ye nokoli kingi, Depitini kalopa limba yemo molomba." nilimili akumu nambi semuna "Yu Depitini kalopa limba yemo molomba." nilimiliye? <sup>36</sup> 'Aku nilimili yemane, Depiti yuni yuyu ,kanu yemondo nirimu mele naa pilielemelenje., Mini Kake Sélimu Depitinga konopuna molorumu kinia Depiti yuni ,ye nokoli Karasimu molomba mele, nimbale:

"Ye-Awili ,Pulu Ye Yawene,

nanga Ye-Awilimunu nimbale:

" 'Nunga opa-touma nuni nokani.' nimbu,

pe ono topo mania mundundumbu kene

iseli-u nu ,na kinia pea

kopu sepo ye nokolitolo molopo

mélema nokambili,

nanga ki-lomekondo ongo molani." nirimu."

nimba Depitini nirimu kanumu. <sup>37</sup> Depitini ,ye nokoli Karasimu, yuntu "Nu nanga Ye-Awilimu." nirimu. Pe onone "Yu Depitini kalopa limba yemo ,mindi, molomba." nambi seko pilkuli nilimiliye?" nirimu.

We-yombo awisili maku toko moloringima Yesusini nirimu unguma pilkuli konopu awili-seko siku pilku moloringi.

**12:38-40**

### *Ungu-Manema Pilku Mane Siringi Yemane Seko Kinjeringi Ulumanga Ungu Se*

<sup>38</sup> Yesusini ungu-mane sipa molopale nirimumuni ,liepi-liepi topa, ungu se nimbale:

"Onone Pulu Yemonga ungu-manemanga puluma pilku mane sili yema mimi siku kanoko kondoko ,onone selemele mele manda manjiku naa seko, molayo. 'Yombomane olio kanoko "Ye peangama" niengi.' ningu, kanu yemane wale-pakoli paa sulu peangama, ,ye nokolima pakolemele mele,, pakoko andolemele. Yomboma maku toko molemele koleamanga mongo-kenge seko andonge kinia 'We-yombomane olio kape niengi.' ningu pilkuli konopu siku pilku andoko molemelela. <sup>39</sup> Yomboma maku toko Pulu Yemonga ungumu pilieemele ulkamanga sukundu punguli mania molongendo ye awilima molemele polo peanga akuna mendo pungu polo akuna konopu siku molemelela. Yombomane kere-langi nongo yombomando "Namili waa." nilimili kinia kanu yema ongole ye awilimanga polo kumbikundu 'olio molamili.' ningu konopu siku molemelela.

<sup>40</sup> "Yema kololemele kinia onone kanu yemanga ambo-wayama toko makoroko mundukuli ulkama 'Olionga' ningu we limili. Pulu Yemo kinia ungu ningíndu ningu sulu munduku we kolo toko nilimili. Pulu Yemone we-yomboma ulu-pulu-kiri selemelemonga ono sika "Mindili nangi." nimbá-na-kolo ya ye nikirumane aku uluma selemelemonga Pulu Yemone aku yema "Mindili paa awili seko nangi." nimbá." nirimu.

12:41-44

#### *Ambo-Waya Koropa Sene Ulka-Tembelena Kou-Mone Mundorumu Semanemo*

<sup>41</sup> Yesusi ,Pulu Yemo popo toko kaloringi ulka-tembele, kerepuluna ulka-tembelena sukundu kongono senge kou-monema mundoringi unju-okolona nondopa mania molopale yombo awisilini aku unju-okolona kou-mone ongo mundoringi mele kanopa molorumu. Kanopa molorumu kinia yombo kamakomane kou-mone awisili ongo mundoringi kanorumu. <sup>42</sup> ,Aku sipa kanopa molorumu kinia, ambo-waya paa koropa se omba yu kou-kololi talo mindi mundorumu. Kanu kou-kololitolo lipa sere lepa kou paa koltalo mele mundorumu.

<sup>43</sup> ,Ambo-wayamone aku serimu kanopale, Yesusini yu lombili andolima mangilipa "Waa." nimba onondo nimbale: "Nane onondo paa sika nimbu sikirumu: "Andi ambo-waya koropamo yuni kou-mone mundukumumu paa olandopa mele mundukumu, we mundukumilima maniandopa mele." nikiru. <sup>44</sup> Ono kou-mone awisili taltolemelemanga koltalo mindi ongo mundukumili. Aku-sipa na-kolo ambo-wayamo kou-mone se paa naa taltolemo. Yunga kou koltalo taltomutolo pali memba omba mundomu. Kere-langi nombá kepe se naa taltolemo." nirimu.

## 13

13:1-37

#### *Ulu Umbuna Selima Pe Wendo Ombámonga Yesusini Nimba Sirimu Semanemo*

13:1-2

#### *Ulka-Tembelemo Toko Kalongemonga Yesusini UNGU Se Nirimu Semanemo*

<sup>1</sup> Kanu-kinia Yesusi ,Pulu Yemo popo toko kaloringi, ulka-tembelena ultu pumbá purumu kinia yu lombili andolimanga ye sene yundu nimbale: "Ungu Mane Sili Yemo, tembelemonga ulka lupa lupama kinia, ulkama takoringi kou peanga lupa lupama kanou." nirimu. <sup>2</sup> ,Aku nirimu kinia, Yesusini yundu nimbale: "Ya ,tembelemonga, ulka lupa lupa peanga gilimú kanokomelema, pe ,walte ya kolea-awili Jerusalleme yomboma mindili nonge walemo wendo ombá kinia, i tembelemonga ulkama pali sikisikuli kouma pali toko mania mundungí." nirimu.

13:3-13

#### *Umbuna Awisili Wendo Ombámonga Yesusini Nirimu Semanemo*

<sup>3</sup> Kanu-kinia yu ma-pangi Unju Ollipi Kaliana ola pumba „Pulu Yemo popo toko kaloringi, ulka-tembelena welkendo mania molorumuna we-yomboma naa molangi „yu lombili andoli ye mare, Pita keme, Jemisi keme, Jono keme, Enderu keme ono ongo, ono onono molkole yundu mangilku pilku ninguli: <sup>4</sup> “Nuni nikinu mele sewale wendo ombáye? Pe nuni i nikinu uluma nondopa wendo ombádo u nambolka unguri sembá kinia olio kanopole ‘Uluma i wendo ombá sepomo.’ nimbu pilimulúye? Olio ningu si.” ningu mangilieringi kinia

<sup>5</sup> yuni onondo nimbale:

“Kanu uluma wendo ombámonga ungu mare, yombomane ono kolo toko singí kene kanoko kondoko molangi. <sup>6</sup> Ye awisili ongo na molio mele yu-melete-melete kolo toko ninguli: “Pulu Yemone ‘Nanga yomboma nokopa kondomba ye se lipu mundumbu.’ nimba taltorumu ye nokoli Karasi, akumu na.” ninguli aku siku kolo toko singí kene kanoko kondoko molangi. Yombo awisilini kanu yemanga unguma pilku liku “Sika nikimili.” ningí.

<sup>7</sup> “Kolea marenga opa awili seko senge mele pilku, ‘Opali talu opa awili i-sipa i-sipa wendo ombá.’ ningu we ningí kinia pilkuli mini-wale naa mundangi. Opa sengema kinia aku uluma Pulu Yemone ‘U wendo opili. Laye-kolte pe mele ya ma-koleamo pora nimbá.’ nimba, nimba panjerimumunga aku uluma sika wendo ombá-na-kolo aku-kinia mulu matolo u naa pora nimbá. <sup>8</sup> „Mulu ma pora nimbá walemo u wendo naa opili umbuna awili mare wendo ombá., Yombo talape awili se kinia talape awili se kinia opa seko, ye nokoli kingi marenga talapema kinia marenga talapema kinia opa senge. Ya ma-kolea senga senga ma jimi-jimi sepa, gele lepa, aku sipa sembá. Ambo sene bolango kokele kanopa limbando u bulu-mini topa mindili nolemo mele, mulu ma pora nimbá walemo kokele wendo ombádo umbuna lupa lupa aku sipama u wendo ombá.” „nirimu..”

<sup>9</sup> „Kanu uluma wendo ombá walemanga, yomboma mimi siku kanangi. Onone „Na lombili andoli yomboma mindili nongo, kolangi.’ ningu,, ono „mare liku ambolkole, kanjollomanga makumanga mengo pungu kote sendeko, ono „mare, Juda yomboma maku toko Pulu Yemonga ungumu pilielemele ulkamanga liku mengo pungu kopene tongela. Ono nanga yomboma molongemonga ono „mare ka siku, gapomano ye awilima kinia ye nokoli kingima kinia molongena „kote sendengendo, mengo pungila. Aku siku senge kene ono onono kanoko kondoko molayo. „Aku-sipa na-kolo kote sendenge kinia kotena gilkuli kanu yema kinia kanu yema nokonge ye nokolima kinia, onone ‘Nanga ungumu piliangi.’ ningu ono ningu singí. <sup>10</sup> Semane peangamo ‘Yomboma pali piliangi.’ ningu koleamanga pali andoko u ningu singí „kinia, pe mulu ma pora nimbá walemo kamu wendo ombá..” <sup>11</sup> Ono ka siku kote sendenge kinia u ‘Kotena nambolka unguri nimulúnje? Olio ungu se mangilku pilingí kinia nambolka unguri pundu topo nimulúnje?’ ningu mini-wale naa mundangi. Ono ungu ningíma onono pilkuli naa ningí. Mini Kake Sélimuni ononga kerena molopale nimba simba unguma onone anju ningí kene aku senge enamonga ono ungu ningí mele pilkuli aku siku ningí.” „nirimu..”

<sup>12</sup> „Aku walemanga, genuni yunga kandi genu „nanga yombo molombamonga, ‘Kolopili toko kondangi.’ nimba kote sendemba. Lapane yunga kandi bolangoma akula sembá. Bolangomane kepe ononga kandi anupili lapali-kinia mumindili kolko kotena mengo pungu “Toko kondangi.” ningila. <sup>13</sup> Nanga yomboma molongemonga yombomane pali ono-kinia konopu kiri panjingí, aku-na-kolo na munduku naa kelko walema pora naa nipili tondolo munduku molonge yomboma Pulu Yemone lipa tapondopa ‘Mindili nonge koleana naa pungu pea molopo kondopo mindi pamili.’ nimbá.” „nirimu..”

*Karasi Kelepa Yando Ombá Sembá Kinia Umbuna Paa Awili Sepa U Wendo Ombá Mele Ungu Se*

<sup>14</sup> („Na i bokumu tokoro yemone, ono bokumu kanokomele yombomando ungu se niembo: ‘Yesusini nirimu, ungumu inia maniakondo molemo akumu ono imbi kanokomele yombomane ungu-pulumu paa pilku kondangi.’ „nikiru. Yesusini nimbale:„)

“Yombo, sepa pipili kondoli méle paa kirimu „ulka-tembelena sukundu Pulu Yemonga Ulka Suluminia Kake Sélina Pulu Yemone, “We-yomboma naa pang!” nimba mi tolemo-na yu manda naa pumba gilimba, na-kolo walte akuna gilipale kolea akumu paa sepa kalaro mondomba. Aku mélemo akuna „wendo omba, gilimba kanokole, ‘Umbuna awilima wendo ombá sekemo.’ ningu pilku, kolea Judia poropinji koleamanga molonge yomboma „ononga koleama munduku kelko, ma-pangi lebamanga kowa pang. <sup>15</sup> Yombo se ulka imuna ola molopili „aku sipa ulu se wendo ombá kinia kanopale kowa pumbándo, mania omba ‘Mélema lipu membo pambo.’ nimba ulkana sukundu naa pupili. <sup>16</sup> Yombo se kaliana molopale „Kowa pambo.” nimba, kelepa ulkando pumba yunga ali-wale sulumu naa lipili. „Sumbi siku kowa mindi pang. <sup>17</sup> Aku sipa wendo ombá walemanga ambo bolango mondongema kinia, ambo bolango ame singíma kinia, „ono manda lisiku kowa naa pungímunga, ono-kinia paa umbuna wendo ombámonga ono kondo sekemo.

<sup>18</sup> “Pulu Yemondo mawa sekole, ‘Ali selemo olimanga kanu umbunama wendo naa opili.’ nieyo. <sup>19</sup> Kanu walemanga umbuna paa awilima wendo ombá, Pulu Yemone u mulu ma pulu polopa serimu kinia kepe, yandopa kiniá kepe umbuna aku sipa se wendo naa orumu. Pe kepe aku sipa umbuna awilima naa wendo ombála. Akumunga aku siku Pulu Yemo kinia mawa sangi. <sup>20</sup> „Kanu umbunama wendo ombá kinia, Ye-Awili „Pulu Yemo,ne ‘Nondopa pora nipili.’ nimba u naa nimba panjilkanje yomboma pali kololemolá. Aku-na-kolo Pulu Yemone nimba taltopa ‘Nanga yomboma molangi.’ nirimu yomboma ‘Naa kolangi.’ nimba ‘Umbuna wale akuma nondopa pora nipili.’ nimba, nimba panjerimu.

<sup>21</sup> “Kanu umbuna omba pemba walemanga yombo marene ninguli: “Kanaa! Pulu Yemone ‘Olio nokopa kondomba ye se lipu mundumbu.’ u nimba taltorumu ye nokoli Karasimu ya omba molemo.” ningí molo “Nena omba molemo.” ningí kinia ononga unguma naa pilku, ‘Sika nikimili.’ ningu kuru naa mondangi! <sup>22</sup> Ye mare ongo kolo toko ninguli: “Pulu Yemone nimba taltorumu ye nokoli Karasimu na.” ningí, molo kolo tokole “Pulu Yemone ungu-umbu tondomuma pilipuli ombo nimbu sikimulu.” ningí. ‘Yomboma pali, Pulu Yemone ‘Nanga yomboma molangi.’ nimba, nimba taltorumu yombomane kepe lipu peke tondopo, nikimulu mele ‘Sika.’ ningu kuru mondangi!” ningu Pulu Yemone mindi ulu-tondolo manda selemoma mele manda manjiku ulu-tondolo lupa lupama senge. Aku-sipa na-kolo Pulu Yemonga yomboma aku siku kondi tonge kinia ononga unguma naa pilku, mokoli senge. <sup>23</sup> Akumunga, pe ulu akuma wendo ombá mele ‘Ono u pilangi.’ nimbu ya nimbu sikiru mele pilkuli kanoko kondoko molaa!” „nirimu.”

**13:24-27**

*Mania Omba Mana-Ye Au Lierimu Ye Yesusi Kelepa Wale Talo-Sipa Yando Ombámonga Ungu Se*

<sup>24</sup> “Kanu walemanga aku mindili nonge nikiru uluma wendo ombá kinia pe „ulu lupa lupa mare wendo ombála. Aku uluma i-sipa:„

‘Kolea tangombando ena pa selemo mele

naa sepa, simbulu topa,

oli ipulieli pa selemo mele naa sepa,

<sup>25</sup> kombokandima muluna mania omba,

muluna gilimú mele tondoloma  
 lope-lope sepa anju yando pumba,  
 aku sipa ulu lupa lupama wendo ombá.'

<sup>26</sup> Aku sembá walemonga Mania Ombo Mana-Ye Au Lierimu Yemo tondolo púlimu kinia, pa awili-sepa sélimu kinia kupa senga sukundu molopa kamu mania ombá yombomane kanonge. <sup>27</sup> Ombale yuni yunga angelloma lipa mundumba kinia ono winju mendo anju yando mulu ma koleamanga pali pungu Pulu Yemone 'Nanga yomboma molangi.' nimba u nimba taltorumu yomboma sukundu sukundu lingi.' nirimu.

13:28-31

### *Unju Pikima Selemo Mele Kanopole Ungu-Pulu Se Pilimulú Mele Ungu Se*

<sup>28</sup> "Unju pikimuni selemo aku sipa ungu-iku mele pelemo kene pilkuli ungu-pulumu piliaa. Unju piki kolamanga kirikiri sepa gomo tolemo kinia kanokole 'Kiniá ena sembá walemo wendo ombá sekemo lémo.' ningu pilielemele. <sup>29</sup> Aku sipala, i ulu "Wendo ombá." nikiruma sika wendo ombá kinia kanokole ningimuni 'Yu paa sika nondopa ombá sekemo. Yu paa kamu okomo.' ningu pilingí.

<sup>30</sup> "Nane onondo paa sika nimbu sikirumu: "Kiniá molemele yomboma u naa kolangi i "Wendo ombá." nikiru uluma pali wendo ombá." nikiru. <sup>31</sup> Mulu matolo pora nimbá-na-kolo nanga ungu niliuma paa pora naa nimbá. 'Niliu mele pali paa sika wendo ombá.' nirimu.

13:32-37

### *Yesusi Kelepa Ombá Walemo "Naa Pilielemele Kene Kanoko Kondoko Molangi."*

#### *Nirimu Semanemo*

<sup>32</sup> 'Mania Ombo Mana-Ye Au Lierimu Yemo paa sika ombá,-na-kolo yu ombá walemo naa pilielemolo. Ipulieli ombáne, tangoli ombáne naa pilielemolo. Mulu-koleana angelloma kepe naa pilielemela. Pulu Yemonga Malo kepe naala pilielemo. Tata yuyu mindi 'aku walemo' pilipa molemo. <sup>33</sup> Yu kelepa ombá walemo ono naa pilielemele kene 'Yu ombá.' ningu kanoko kondoko, uru naa peko (Pulu Yemo kinia ungu ningu) molayo. <sup>34</sup> Yu ombá walemo i-sipa: Ye se kolea marenga wale mare molomba pumbá selemo kinia yunga koleamo mundupa kelembando yunga kendemande-yombomando "Nanga koleamo nokondaa." nimbale yunga kongonomo sendenge mele ono yu-mele-mele moke sepa sipa ulka-kerepulu nokolemo yemondo "Na walte ombó kene kanoko molou." nimbale pulimú.

<sup>35</sup> "Ulka pulu yemo sika ombá-na-kolo yu ombá walemo naa pilielemele kene 'Yu ombá.' ningu kanoko molayo. Ipupini ombá, molo awi-amburumi ombá, molo kolea tangombando kera gulta ko tolemo kinia ombá, molo ipulieli-u ombánje, ono naa pilielemele kene <sup>36</sup> 'Na uru peambo waltikele yu lipa sinjipa ombo na kanomba.' ningu, kanoko molangi.' nimbu nikiru.

<sup>37</sup> "Onondo i nikiru mele yombomando pali nikirula, ' 'Ombá.' ningu, kanoko molangi.' nimbu nikiru." nirimu.

## 14

14:1-11

### *Juda Ye Awilimane Yesusi Toko Kondonge Aulka Se Kororingi Kinia Judasini "Lipu Tapondambo."* Nirimu Semanemo

14:1-2

### *Yesusi Tongendo Langi Niringi Semanemo*

<sup>1</sup> 'Juda yombomane kalia-ingi senga senga kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilku, Pellawa Akoli Méle Isi Naa Munduku Pellawa We Kalko Noringi Walemo talu

mele wendo ombándo, kiniá mele Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, onone Yesusi kiyongo ningu ka siku toko kondonge aulka se koroko moloringi. <sup>2</sup> Akumundu angelema ningu ninguli: „Nondopo tamili,“ mangali Pulu Yemone olionga anda-kolepalima Naa Topa We Ombo Purumu Mele „Pilelemolo,“ Walemanga „unguma sepo molamili.“ ningu, yombo awisili ya Jerusalleme ongo maku toko molongemonga yu iseli-u tomolo kinia onone olio-kinia mumindili kolko opa senge kene iseli-u naa topo, keleamili.” niringi.

*14:3-9*

*Ambo Sene Yesusinga Pengena Wambola Ondondorumu Semanemo*

<sup>3</sup> Kolea-kanga Betani ye se u kuru laká nomba kelierimu ye se, imbi leko “Ye Kuru Laká Noli Saimono” niringi kanumunga ulkana Yesusi pumba kere-langí nomba molopili ambo se wambola-mingi paa peanga se yu molorumuna memba orumu. Kanu wambola paa muna toli, natene seko wamoringi, akumunga kou-mone paa awili sepa purumu. Akumu memba ombale Yesusi kere-langí noli polo molorumuna memba ombo „Yu sepo kondambo.“ nimba mingimu kako topa wambolamo pengena ondondorumu.

<sup>4</sup> Yuni aku serimu kinia kanokole kanuna moloringimanga ye marene konopu kiri panjikuli anju yando onono ninguli: “Aku wambolamo nambi semu-na we sepa kinjikimuye? <sup>5</sup> Aku wambolamo kou-mone limolánje kou awisili, kou mongo wane tausini mele, lipuli yombo koropama moke sepo silimolá.” ningu ambomo tondolo munduku iri toringi.

<sup>6</sup> Onone ambomondo aku siku niringi pilipale, Yesusingi onondo nimba: “I ambomo-kinia nambi semu-na ungu awisili nikimiliye? Yuni na-kinia ulu peanga se semu kene yu-kinia ungu awisili naa ningu munduku keleangi. <sup>7</sup> Yombo koropama ono-kinia alieli molonge kene ‘Ono lipu tapondamili.’ ningi walemanga pali ono manda liku tapondonge-na-colo na ono-kinia alieli naa molombo. <sup>8</sup> Ambomone ‘Manda sembó.’ konopu liemu mele semu. Na kolombo kinia óno sengemonga yuni iseli-u i wambola muna tolmu nanga kangina ombo ondondomu. <sup>9</sup> Nane onondo paa sika nimbu sikirumu: “Ma-koleamanga pali „nanga,“ semane peangamo andoko toko singí kinia i ambomone kiniá semu semanemo kepe ‘Yombomane pilkuli ‘Yuni sepa kondorumu.’ ninguli aku semanemo toko singíla.” nikiru.” nirimu.

*14:10-11*

*Judasini Yesusi Yunga Opa-Touma “Lipu Simbu.” Nimba, Nimba Panjerimu Semanemo*

<sup>10</sup> Kanu-kinia Yesusi yu lombili andoli, ye rurepo akumanga ye se, Judasi Isikeriote, ‘Pulu Yemo popo tondoringi ye awilimane Yesusi ka singí aulkamo yuni akisindambo.’ nimba ono moloringina pumba, sembá mele nimba sirimu. <sup>11</sup> Yuni sembá mele nirimu kinia pilkuli ono konopu awili-seko siku “Nu kou-mone se simulú.” ningu, ningu panjeringi. Kanu-kinia yu Yesusi ono lipa simba mele aulkamo koropa molorumu.

*14:12-26*

*Yesusi Lombili Andolima Kinia Pea Kamu Kere-Langi Noringi Semanemo*

<sup>12</sup> Pellawa Akoli Méle Isimu Naa Munduku Pellawa We Kalko Noringi Koromonga pulu-pulu walemo wendo orumu kinia Juda yombomane Pulu Yemone u ononga anda-kolepalima Naa Topa We Ombo Purumu mele pilingindu kongi sipisipi walo se toko nonge mele pilkuli niringimuni, Yesusi lombili andoli yema yu molorumuna ongo mangilku pilku ninguli: “Pulu Yemone olionga anda-kolepalima Naa Topa We Ombo Purumu mele pilimulúndu kongi sipisipi walo se kiniá nonimu kolea sena pumbu sepo mimi se-pamili konopu lekenoye?” niringi.

<sup>13</sup> Aku siku ningu mangilieringi kinia yuni yu lombili andoli talo lipa mundupa nimbale: "Ne kolea-awili „Jerusalleme,“ sukundu punguli, ye se mingina no kolopa memba ombá aulkana pungu kane-kane tokole yu lombili pangili. <sup>14</sup> Yu sukundu pumbá ulkana „sukundu punguli,“ ulka pulu yemondo ninguli: "Ungu Mane Síli Yemone i-sipa mangilipa nimbale: "Na kinia na lombili andolima kinia olione Pulu Yemone olionga anda-kolepalima Naa Topa We Ombo Purumu mele pilimulúndu kongi sipisipi walomo sena nomoloye? Nomolo suluminiamamo sena le moye?" nimu." niengili. <sup>15</sup> Aku ningilí kinia yuni olo ulkamonga olakondo suluminia awili se, akuna kere-langí noli polo se kinia, mania molomolo poloma kinia, mélema pali u seko mimi sengi lembamo, lipa ora simba. Aku suluminiamonga „nomolo sipisipi walomo, seko mimi sangili." nirimu.

<sup>16</sup> Kanu-kinia yu lombili andoli ye akutolo kolea-awili akumunga sukundu pungu, Yesusini nirimu kanu mele ulu akuma seli lierimu kanoko lendekole, akuna Pulu Yemone ononga anda-kolepalima Naa Topa We Ombo Purumu mele pilingí kongi sipisipi walo nongemo seko mimi seko taltoringili.

<sup>17</sup> Ipupini ena pumba kolea kala torumu kinia Yesusi kinia yu lombili andoli rurepo kinia oringi.

<sup>18</sup> Kere-langí nongo moloringi kinia Yesusini nimbale: "Nane onondo paa sika nimbu sikirumu: "Ono pea molopo kere-langí nokomolomanga ye sene na lipa nanga opa-touma simba." nikiru." nirimu.

<sup>19</sup> „Aku nirimu kinia pilkuli, ononga konopuna umbuna serimu pilkuli yu-melee-melee mangilku ninguli: "Ye-Awilimu, nando ninkinuye?" niringi.

<sup>20</sup> Yesusini pundu topa nimbale: "Ono nanga ye rureponga ye se na kinia kere-langima polo awi-suku-singina ola lemó se waltikele lipu nombolo yemone na lipa, opa-touma anju simba." nirimu. <sup>21</sup> "Kiniá Mania Ombo Mana-Ye Au Lierimu Yemo kinia senge mele koronga-u ningu panjeringi semanemo „Pulu Yemonga, bokuna sukundu molemo mele sika opa-toumane senge, aku-na-kolo yu lipa opa-touma simba yemo mindili nomba paa molopa kinjimba. Yu molopa kinjimbamonga yu anumuni naa melkanje peanga. „Yu mindili naa nolka.“" nirimu.

14:22-26

*Yesusi Yu Kolomba Mele ‘Pe Pilku Molangi.’ Nimba Kere-Langi Sirimu Noringi Semanemo (14:12-26 pali)*

<sup>22</sup> Ono kere-langí nongo moloringi kinia Yesusini berete se lipa Pulu Yemo kinia "Ange." nimbale ambolopa peke lepa „yu lombili andolima,“ sipa nimbale: "Imu nanga kangimu ono liku „nangi.“" nirimu.

<sup>23</sup> Pe no-waene kapo se lipale Pulu Yemo kinia "Ange." nimba ono sirimu kinia onone pali „kanu no-waenemo,“ noringi.

<sup>24</sup> Yuni nimbale: "I „no-waene,“ sikirumu nanga mememo. Pulu Yemone „yu kinia yunga yomboma kinia molonge mele, ungu se nimba panjipa mi lierimu kanu ungumu ‘Kamu wendo ombo pepili.’ nimbu yombo awisilinga nimbu nanga mememo ondondopole „kolombo,“ aku mememo imu. <sup>25</sup> Nane onondo paa sika nimbu sikirumu: "Iseli-u na no-waene kelepo paa naa nombó. Pe mindi, Pulu Yemo ye nokoli kingimu molopa nokolemo koleana no-waene kondemo kelepo nombó." nikiru." nirimu.

<sup>26</sup> „Kere-langí nongo pora sikuli, ono Pulu Yemonga konane se ninguli, pena pungu ma-pangi Unju Ollipi Kaliana ola purungi.

14:27-31

*Pitane Yesusi "Na Naa Kanolio." Nimba Mele Yesusini U Yu Nimba Sirimu Semanemo*

<sup>27</sup> Kanu-kinia Yesusini lombili andolimando nimbale: "Pe „opa-toumane na-kinia sengemonga kanokole,“ onone pali na munduku kelenge. Aku siku senge mele Pulu

Yemone u nirimu yunga bokuna molemo kanumu. Pulu Yemone ,ungu-iku se topa, nimbale:

“ “Kongi sipisipi tapu-yemo tangi.” nimbú,  
yu tonge kinia sipisipima bulu-balu ningí.”

nirimu, „aku mele kiniá wendo ombá,. 28 Iseli-u na toko kondonge kinia ono sika bulu-balu ningí,-na-kolo na lomboropo ola molopole nimbúmuni, na kumbi lepo kolea Gallillindu pumbú, ono pe akileko akuna onge kinia ,kelepa pea molomolo,.” nirimu.

29 Yesusini aku sipa nirimu kinia pilipale, Pitane nimbale: “Onone pali ‘Nu sika’ ningu kuru mondolemele mele mania pumbá kinia nu munduku keliengi liemu nane nu aku sipu paa mundupu naa kelembó, paa mólo.” nirimu.

30 Yesusini pundu topa nimbale: “Nane nu paa sika nimbu sikirumu: “Paa kiniá ipulielí, kera gulta wale talo-sipamo u ko naa topili nuni pipili kolkole wale yopoko nando kolo toko “Yu nawe? Na naa kanolio.” nini.” nikiru.” nirimu.

31 Aku-na-kolo Pitane tondolo mundupa nimbale: “Na nu-kinia kopu selem-bolomonga olto pea “Topo kondomolo.” ningi liemu kepe nu “Naa kanolio.” paa naa nimbú.” nirimu. Lombili andoli ye wemane pali “ “Nu naa kanolemolo.” paa naa nimulú.” niringila.

**14:32-42**

### *Kolea Gesemani Yesusini Pulu Yemo Kinia Ungu Nimba Mawa Serimu Mele Semanemo*

32 Kanu-kinia, Yesusi kinia yu lombili andoli yema kinia kolea ‘Gesemani’ nilina puringi. Akuna puringi kinia yuni onondo nimbale: “Na Pulu Yemo kinia ungu ni-pukuru kene ono ya molaa.” nirimu. 33 Aku nimbale Pita keme Jemisi keme Jono keme lipa memba pumbale , ‘Na seko kinjingí ulumu paa nondopa wendo ombá sekemo.’ nimba pilipale, yu yuyu kondo kolopa konopu kiri panjipa kamelená mindili sepili molorumu. 34 Yuni onondo nimbale: “Nanga konopuna umbuna paa awili se sepomomonga na kolombo none sekemo. Ono uru naa peko, ya kanoko kondoko molaa.” nirimu.

35 Aku nimbale yu yuyu kanga-kolte anju pumba komorongo langopa tamalu pepale yu-kinia nondopa wendo ombá mele ‘Wendo naa omu liemu paa peanga.’ nimba Pulu Yemo-kinia ,ungu-iku topa, mawa sepa nimbale: 36 “Nanga Tata, nuni uluma pali manda seleno kene na mindili noli no-mingina no nombómo ‘Naa nambo.’ nieni. Aku-sipa na-kolo ‘Nane sepole nanu konopu simbú.’ konopu lekero mele naa sambo. Nuni kanoko peanga piliení ulumu mindi sambo.” nirimu.

37 Aku nimbale kelepa yunga lombili andoli ye yopoko moloringina yando omba ono uru peringi kanopale Pitando nimbale: “Saimono, nu uru penú lémo. Nu uru naa peko ena kanga-kolte manda we kanoko kondoko naa molenaye? 38 ‘Kurumanga nokoli Setenene, olio kondi tomba kinia sepo kinjimulú kene.’ ninguli ,uru naa peko, Pulu Yemo kinia ungu ningu kanoko kondoko molayo. Sika ‘sepo kondamili.’ nimbu konopumane pilielemolo-na-kolo semolondo kangimu siye sepa tondolo naa pulimú.” nirimu.

39 Aku sipa nimbale yu kelepa anju pumba u Pulu Yemo kinia ungu nimba mawa serimu mele kelepa nirimu.

40 Kelepa yando orumu kinia ono uru paa orumu-kulu kelko uru peringi kanorumu. Onone uru peringimunga pipili kolkole yundu ningí mele naa pilieringi.

41 Kelepa, wale yopoko-sipamonga ,anju pumba Pulu Yemo kinia ungu nimba pumba, kelepa yando omba yuni onondo nimbale: “Nambi semu-na we uru peko múlu pilku molemeleye? Manda peame! Mania Ombo Mana-Ye Au Lierimu Yemo

„tonge, ulu-pulu-kiri selemele yema liku singí enamo wendo ombá sekemo. <sup>42</sup> Ola gilku pamili wame! Na lipa anju simba yemo okomo kanaa!” nirimu.

**14:43—15:47**

*Yesusi Ka Siku, Kote Sendeko, “Kolopili.” Ningu Unju-Perana Ola Toko Panjiku, Óno Seringi Semanemo*

**14:43-52**

### *Yesusi Ka Siringi Semanemo*

<sup>43</sup> Yesusini, kolea Gesemani yu lombili andolimando, aku nimba molopili yu lombili andoli rurepo akumanga ye Judasi orumu. Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, Juda yombomanga tapu-yema kinia, kanu yemane liku mundoringi ye awisili, yombo toli lu-pultama kinia kopema kinia mengo Judasi kinia oringi. <sup>44</sup> U Yesusi molorumuna naa wangi Yesusi Juda ye awilima lipa simba nimba panjerimu ye „Judasini, ono Yesusi yu ipulieli manda kanonge mele nimba sipa nimbale: “Nane ye se kanopo kangulumbu akumu Yesusi. Yu ambolko ka siku mengo pang.” nirimu. <sup>45</sup> „Aku yema, oringi kinia „Judasi, yu Yesusi molorumuna sumbi sipa ombale “Rapai, nu akuna gilienu lémo.” nimba omba yu kangulorumu. <sup>46</sup> Aku serimu kinia kanokole Yesusi liku ka siringi.

<sup>47</sup> Aku serigi kinia kanopale „Yesusi-kinia, nondoko gilieringi ye senga lu koyamo kulu topa wendo lipa Pulu Yemo popo tondoringi ye awili olandopamonga kendemande-ye se yunga komu se topa laka lenderimu, aku komumu wendo orumu.

<sup>48</sup> Kanu-kinia Yesusini, yu ka singí oringi, yemando nimbale: “Na ‘yombo topo wa noli yere molio.’ konopu lekole na ka singíndu yombo toli lu-pultama kinia kopema mengo okomeleye? <sup>49</sup> Ulka-tembele, kerepuluna we-yomboma maku toko molemele, koleana alieli ono pea molemolo kinia ungu-mane sipu molio kinia na liku ka naa silimili kanumu. Aku-sipa na-kolo „Pulu Yemonga, bokuna toringi molemo mele kamu wendo ombámonga onone senge sekemele uluma wendo okomo.” nirimu.

<sup>50</sup> Kanu-kinia yu lombili andolima pali, ‘Olio pea ka singínje.’ ningi pilkuli, yu munduku kelko ono talopa leko purungi. <sup>51</sup> Kango ye se mulu-maminia selu mindi pakopa Yesusi lombili andorumu. Kanu kangomo „Yesusi ka siringi yemane, amboloringi kinia <sup>52</sup> yunga mulu-maminiamo, mindi, ambolko molangi, mélse naa panjipa we-we talopa lepa purumu.

**14:53,55-65, 15:1**

### *Juda Ye Awilimane Onono Yesusinga Kote Pilku Yu Seko Kinjeringi Semanemo*

<sup>53</sup> Kanu-kinia Yesusi, ka sikuli, Pulu Yemo popo tondoringi ye awili olandopamo molorumuna mengo purungi. Pulu Yemo popo tondoringi ye awilima kinia, Juda yombomanga tapu-yema kinia, „Pulu Yemonga, ungu-manemanga puluma pilku mane siringi yema kinia, onone pali, ‘Yesusi kote sendepo piliamili.’ ningi, akuna ongo maku toringi.

<sup>54</sup> Yesusi, mengo purungi, kinia Pita lombili akilepa tako lepa pumba, Pulu Yemo popo tondoringi ye awili olandopamongaulkana, ulka gilipa makapu serimu, awisuku-singina yombo maku toringi kolea we lierimuna paa sukundu pumba, „Yesusi nokoko moloringi, ele-yema kinia sepe pilipa molorumu.

<sup>55</sup> Pulu Yemo popo tondoringi ye awilima kinia, Juda yombomanga kanjollo yema pali kinia, akumane Yesusi yu toko kondongendo ungu se sepa kinjerimu ungu se ‘Yombo sene ‘yu i-sipa i-sipa sepa kinjerimu.’ nipili.’ ningi yombo se kororingi-na-kolo yombo se naa kanoko liltangi. <sup>56</sup> Yombo awisilini ongo ungu mare kolo toko “I-sipa i-sipa sepa kinjerimu.” niringi-na-kolo ononga unguma seluna naa purumu.

<sup>57</sup> Kanu-kinia ye marene yu sepa kinjerimu mele ola gilku kolo toko ninguli:  
<sup>58</sup> "I yemo i-sipa nirimu pilierimulu: "I ,Pulu Yemo popo toko kalolemolo, ulka-tembelemo, mana-yemane takoringimu nane topo sikisipuli mana-yemane manda naa takonge ulka se wale yopoko ombo pupili kolali sepo takombo." nirimu. „Yuni aku nirimumunga 'Yu Pulu Yemo mele molio.' konopu lepale aku nirimumu nimba kinjerimunje,." niringi. <sup>59</sup> Ono kepe laye-kolte lupa lupa niringi, ononga unguma seluna naala purumu.

<sup>60</sup> Aku niringi pilipale Pulu Yemo popo tondoringi ye awili olandopamo ono maku toringina ola gilipa Yesusi mangilipa nimbale: "Ungu se pundu toko naa ninkuye? Nu seko kinjerinu mele nikimilim u nambolka ulumu seko kinjerinumundu nikimiliye?" nirimu. <sup>61</sup> Aku-sipa na-kolo Yesusi ungu se pundu topa naa nimba we gilierimu.

Pulu Yemo popo tondoringi ye awili olandopamone yu kelepa mangilipa pilipa nimbale: "Pulu Yemone olia 'Nokopa kondomba ye se lipu mundumbu.' u nimba taltorumu ye nokoli Karasimu sika nu molo móloye? Kape Nimbu Imbi Ambolopo Paka Tondolemolomonga Malo nu molo móloye?" nirimu.

<sup>62</sup> Yesusini nimbale: "Akumu na." nirimu. "Pe walte Mania Ombo Mana-Ye Au Lierimu Yemo, Ye Tondolo Olandopa Púlimu ,kinia mélema nokombando, yunga kilomekondo molopa, kupamanga ola molopa mania ombá ono kanonge." nirimu.

<sup>63</sup> Aku sipa nirimumunga ,yu 'Pulu Yemo mele molio.' nimba nirimu-kulu, pilipale Pulu Yemo popo tondoringi ye awili olandopamone ,paa pilipa kiri pilipa, yunga wale-pakolimu yuyu ambolopa sungu sipa nimbale: "Kiniá yuni mongo liitimu mele nimba simba yombo se pea nambi semu-na koromoloye? <sup>64</sup> Yu yuyu paa sika Pulu Yemo ungu-taka tondokomo pilkimulu. Nambolka konopu lekemeleye? „Yu-kinia nambi samiliye?," nirimu kinia

onone ninguli: "Yu Pulu Yemo ungu-taka tondopa marake semumunga topo kondomulu liemu papu." niringi.

<sup>65</sup> Kanu-kinia ononga ye marene yunga kumbikerena elkambe toko munduku, yunga kumbikeremo mulu-maminia sene pipi sindikuli ki-lumuni toko , "Nu 'Pulu Yemonga yere molio.' konopu leno kene, nawene nu tokomonje ningu si!" niringi. Ele-yemane yu liku laruwane toringi.

**14:(54),66-72**

### *Pitane Kolo Topa "Yesusi Yu Naa Kanolio!" Nirimu Semanemo*

<sup>66</sup> Kanu-kinia Pita ulka maniakondo, yomboma liku maku toko moloringi koleana molorumu kinia Pulu Yemo popo tondoringi ye awili olandopamonga kendemande-ambo se Pita molorumuna ombale <sup>67</sup> yu sepe pilipa molorumu kanopale neme-neme nimba kanopa nimbale: "Nu kepe Nasarete ye Yesusi kinia pea kopu seko moloringi kanumanga ye se lémo." nirimu.

<sup>68</sup> Pitane kolo topale "Mólo!" nimba "Nu nikinu mele na naa pilkiru!" nirimu. Aku sipa nimbale ulka kerepuluna purumu kinia kera gulta ko torumu.

<sup>69</sup> Pita yu ulka kerepuluna pumba molopili kanu kendemande-ambomone yu kanopale akuna gilieringi yombomando kelepa nimbale: "I yemo Yesusinga talape ye se lémo." nirimu.

<sup>70</sup> Pitane kelepa "Mólo!" nirimu.

Laye-kolte pe mele Pita gilierimuna nondoko gilieringi yemane ,yu ungu laye-kolte lupa mele nirimu pilkuli, yuntu ninguli: "Kolea Gallilli disiriki yombomane ungu nilimili mele nu aku siku ungu nikinu pilkimulu. „Yesusi kinia yu lombili andoli yema kinia kolea Gallilli disiriki yemala,„ nu kepe Gallilli ye se, aku kene 'Nu paa sika yu lombili andoli ye se.' konopu lekemolo." niringi.

<sup>71</sup> Aku niringi kinia Pitane Pulu Yemonga imbi lepa tondolo mundupa mi lepa nimbale: "Paa sika nikiru. "Ono nikimili yemo paa naa kanolio! Kolo tokoro liemu Pulu Yemone na topa kondopili." nikiru." nirimu.

<sup>72</sup> Aku nirimu kinia popenge sepa kera gulta wale talo-sipa ko torumu. Aku serimu kinia pilipale Yesusinga yundu "Kera gulta wale talo-sipa ko naa topili nuni wale yopoko kolo tokole "Yu naa kanolio." nini." nirimu ungu kanamu Pita kelepa pilierimu. Pilipale , 'Ama, paa sepo kinjendu lepomo. 'Paa naa sembó.' konopu lierindu mele sika sendu.' nimba pilipale, kola paa awili sepa serimu.

## 15

15:1-15

*Romo-Gapomano Ye Nokoli Paillate Kote Pilipa Molopa Yesusinga Kotemo Pilipale "Kolopili." Nirimu Semanemo*

<sup>1</sup> Orili-u kolea kokele tangorumu kinia Pulu Yemo popo tondoringi ye awilima kinia, Juda yombomanga tapu-yema kinia, Pulu Yemonga ungu-manemanga puluma pilku mane siringi yema kinia, kanjollo yema pali, ,Yesusinga kotemo pilku pora sikuli, onone pali ,yu senge mele, ungu se ningu panjeringi. Aku ningu panjikuli yu liku, ka toko, mengo pungu, ,Romo-gapomano ye nokoli, Paillate molorumuna mengo pungu kote senderingi.

<sup>2</sup> Paillatene ,Yesusinga kotemo pilipale, yu mangilipa pilipa nimbale: "Nu Juda yombomanga ye nokoli kingimu molo móloye?" nirimu.

Yesusinga yemba: "Sika nikinu. Akumu na." nirimu.

<sup>3</sup> Pulu Yemo popo tondoringi ye awilimane Yesusi kote sendeko Paillatendo ,kolo toko, ungu awisili ninguli ningíndu "Yesusi yu sepa kinjilimú." ningu yu kote senderingi. <sup>4</sup> Aku niringimunga Paillatene Yesusinga nimbale: "Nu ulu kiri awisili serinu nikimili mele pilkuli ungu se pundu toko naa nikinuye?" nirimu. <sup>5</sup> Aku-na-kolo Yesusi ,yu sepa kinjerimu niringi mele, pundu topa ungu selu kepe naa nimba ,we gilierimu kinia kanopale, Paillate mini-wale mundupa konopu awisili lipa mundorumu.

<sup>6-7</sup> ,Yesusi kote sendeko molangi, ,ye se, yunga imbi Barapasi, yu kinia ye mare kinia 'Romo-gapomanomone olio Juda yomboma naa nokopili.' ningu u Romo-gapomanomo kinia opa sekole yombo mare toko kondoringimunga ka-uliana peringi. ,Kalia-ingi senga senga Juda yombomane kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilingindu kere-langgi norangi walema wendo orumu kinia onone ka-uliana perimu ye se imbi leko 'Wendo liku mundou.' ningu mawa seringi kinia ,Romo-gapomano ye nokolimuni, kanu yemo wendo lipa yomboma sirimu.

<sup>8</sup> ,Romo ye nokolimuni kanu walemo wendo orumu kinia aku serimu mele pilkuli, yomboma ongo yundu mawa seko ninguli: "U kalia-ingi selu selu ningu i walemo kinia seleno mele kiniá kepe aku siku sani." niringi.

<sup>9</sup> Aku niringi pilipale Paillatene onondo mangilipa nimbale: " 'Juda yombomanga ye nokoli kingimu wendo lipu ono siembo.' konopu lekemeleye?" nirimu. <sup>10</sup> ,We-yombomane Juda yombomanga ye awilima munduku kelko ononga unguma pilku mokoli seko Yesusinga ungumu pilku yu lombili andoringimunga, Pulu Yemo popo tondoringi ye awilimane Yesusi-kinia konopu kiri panjikuli kote senderingi-na pilipale Paillatene aku sipa nirimu.

<sup>11</sup> Aku-sipa na-kolo Pulu Yemo popo tondoringi ye awilima we-yomboma kondi toko ungu-umbu tondokole " "Yesusi mólo. Barapasi wendo lipa sipili." niee!" niringi.

<sup>12</sup> Aku niringi kinia pilipale Paillatene onondo nimba: "Aku liemu 'Juda yombomanga ye nokoli kingi' nilimilimu nambi sambonje." nimba mangilierimu kinia

<sup>13</sup> onone tondolo munduku ninguli: "Yu unju-perana kolopili uku toko panjei!" niringi.

<sup>14</sup> Aku niringi pilipale yuni onondo nimba: "Aku nambi semuye? Yu mongo nambolka mongore limuye?" nirimu.

Aku-na-kolo onone ,kelko, paa tondolo munduku ninguli: "Mólo! Yu kolopili, unju-perana uku toko panjei!" niringi.

<sup>15</sup> Kanu-kinia Paillatene 'Na-kinia konopu peanga leangi.' nimba ye Barapasi ka-ulkana wendo lipa ono sirimu. 'Aku sepale, Yesusi lipa ,yunga ami-yema, sipa nimba: "Yu ka-pultane tokole pe 'Unju-perana kolopili.' ningu mengo pungu unju-perana uku toko panji-paa." nirimu.

15:16-20

*Romo Ami-Yemane Yesusi Ungu-Taka Tondoringi. Tondokole "Kolopili." Ningu Mengo Puringi Semanemo*

<sup>16</sup> Kanu-kinia ,Romo, ami-yemane Yesusi liku gapomano ye nokolimu perimu ulka awili akuna sukundu yomboma liku maku toringi koleana punguli, ononga ami talape yema pali "Yesusi ya molemona, sukundu sukundu waa." niringi. <sup>17</sup> Akuna ongole niringimuni 'Yu ye nokoli kingi se none sepili.' ningu mulu-maminia kondoli peanga se pakondoko unju ka koko molorumu se mulkowe seko 'Ye nokoli kingimunga waniemo.' ningu pengena mere mundunduku, <sup>18</sup> pe yu ,ungu-taka tondoko, imbi we kólo toko ambolko paka tondongendo "Juda yombomanga ye nokoli kingimu, nu gilinuye?" ningu <sup>19</sup> ,koló kope liku, yu pengena kope to-pu-pu sekole kumbikerena elkambe toko kandoko, yu gilierimuna ongo komorongo toko pondoko tamalu peko yu we kólo toko kape ningu imbi ambolko paka tondoringi.

15:20-47

*Yesusi Toringi Kolorumu Kinia Óno Seringi Semanemo*

15:20-32

*Yesusi Unju-Perana Ola Uku Toko Panjeringi. Unju-Perana Pepili Juda Yombomane Yu Ungu-Taka Tondoringi Semanemo*

<sup>20</sup> Yu aku siku ungu-taka tondoko pora sikuli mulu-maminia kondolimu kulunduku yunga u panjerimu mulu-maminiam kelko panjindikuli "Yu unju-perana kolopili uku topo panji-pamolo." ningu yu liku ultukundu mengo puringi.

<sup>21</sup> ,Romo ami-yemane Yesusi Jerusalleme pala ultukundu mengo pungí punguli niringimuni,, kolea Sairini ye se, yu Allekesanda kinia Rupasitolonga lapa Saimono, yu Jerusalleme pumbá orumu kinia kanokole yu ambolko liku ka mele siku Yesusi kolomba unju-peramo "Kolali seko mendei!" ningu siringi. <sup>22</sup> Punguli kolea Golkota Yesusi mengo pungu akuna moloringi. (Golkotanga ungu-pulumu 'penge bele lieli koleamo' .) <sup>23</sup> ,Yesusi akuna mengo punguli niringimuni, 'Yomboma mindili naa nangi.' ningu, no-waenena sukundu marasene 'mo' nili se munduku taltoringi aku no-waenemo 'Yu nopili.' ningu, siringi-na-kolo naa lipa norumu.

<sup>24</sup> Kanu-kinia ,ami-yemane, yu unju-perana ola uku toko panjikuli unjumu liku ola anjeringi. 'Aku sekole, u unjuna ola uku toko naa panjikuli, yunga mulu-maminia ,kulunduku taltoringima, 'Moke samili.' ningu ono yu-mele-mele lingí mele pilingindu kou-kate seko pe mulu-maminiam liltingi.

<sup>25</sup> Ena topa nane killoko serimu kinia yu unju-perana panjeringi. <sup>26</sup> 'Yu mongo liltimu mele yomboma kanangi.' ningu

I YEMO JUDA YOMBOMANGA YE NOKOLI KINGIMU

ningu imbi toko unjuna ola mondoringi.

<sup>27</sup> Opa seko mélema wa liltingili ye talo pea unju talonga uku toko panjeringila. Se Yesusi yunga ki-lomekondo uku toko, se ki-tarokondo uku toko panjeringi. <sup>28</sup> (Yesusi kinia aku sili seringili ye talo pea unju-pera yopokonga uku toko panjeringimunga ungu se u Aisayane nimba boku torumu mele wendo orumu. Aku ungumu i-sipa:  
 "Yu kepe gapomano ungu-manema pulua toko  
 seko kinjiku mongo lili yomboma kinia  
 liku sere lenderingi."  
 nirimu.)

<sup>29</sup> Akuna ongo puringi yombomane Yesusi „kanoko kiri pilkuli yu, ungu-taka tondoko iri mele toko ninguli: "Aa! "Ulka-tembelemo sikisipuli kelepo wale yopoko ombo pupili takopo limbu." nirinu yemo, <sup>30</sup> 'Naa kolambo.' ningu nu nunu liku tapondoko unju-perana mania ou." niringi.

<sup>31</sup> Aku sikula Pulu Yemo popo tondoringi ye awilima kinia Pulu Yemonga ungu-manemanga puluma pilku mane siringi yema kinia onone kepe yu ungu-taka tondoko ninguli: "Yu yombo wema 'Naa kolangi.' nimba lipa tapondorumu-na-kolo yu yuyu 'Naa kolambo.' nimba manda naa lipa tapondokomo. <sup>32</sup> Yu sika Pulu Yemone olio 'Nokopa kondomba ye se lipu mundumbu.' u nimba talitorumu ye nokoli Karasimu ombo molopa, yu sika olio Isirele yombomanga ye nokoli kingimu molemo liemu yu yuyu unjuna mania opili. Yu yuyu mania ombá kinia kanopole 'Yu sika Pulu Yemone nimba taltopa lipa mundorumu ye nokoli Karasimu. Yu sika olionga ye nokoli kingimu.' nimbu kuru mondomolo." niringi.

Ye talo yu-kinia unjutolonga uku toko panjeringi yetolone yu aku siku ungu-taka tondoringilila.

15:33-41

### *Yesusi Kolorumu. Kolorumu Kinia Ulu Se Wendo Orumu Semanemo*

<sup>33</sup> „Yesusi unjuna ola we pepili, awi-tangoli ena tuwellepo killoko serimu kinia kolea pali simbulu topale, pe ipupini ena tere killoko serimu kinia kelepa tangorumu.

<sup>34</sup> Ipupini ena tere killoko serimu kinia Yesusini ru nimba nimbale:

"Elloii, Elloii, llama sapakatani."

nirimu. Akumu Juda yombomanga ungu se. Akumunga ungu-pulumu i-sipa:

"Nanga Pulu Yemo, nanga Pulu Yemo,

na nambi semu-na munduku kelienuye?"

nirimu.

<sup>35</sup> Akuna nondoko gilieringimanga marene yuni aku nirimu kinia pilku „sunduku, ninguli: "Piliame! Yu Illainja mangilkimu." niringi.

<sup>36</sup> Aku nirimu kinia pilieringimanga ye se lisipa pumba ulú-pinja mele se lipa no-waene kombili seli mare akuna panjipale, 'Yesusi no-waene kombili seli pinjana pelemomo nopili.' nimba memba ombo unju-pepena senga ka topa olando sirimu. Sipa yuni nimbale: "Kiniá unjuna we pepili. Illainjane sika yu „unjuna, mania limbando okomonje, kanopo kanamili." nirimu.

<sup>37</sup> Yesusi ungu se tondolo mundupa nimbale kolorumu.

<sup>38-39</sup> „Romo, ami-ye wane anderete nokorumu ye se Yesusi toringi ami-yema nokopa molorumu kanu yemone Yesusi ungu se nimba kolorumu mele pilipa kanopa nimbale: "I yemo yu paa sika Pulu Yemonga malo lepomo." nirimu.

„Yesusi aku sipa kolorumu kinia ulu awili se waltikele wendo orumu., Pulu Yemo popo toko kaloringi ulka-tembele „Jerusalleme sukundu gilierimu akuna sukundu Pulu Yemo molorumu, Suluminia Paa Kake Sélimunga kerepuluna „ 'Yomboma sukundu naa pang.' ningu u alieli, mulu-maminia awili sene pipi siku panjeringi

gilierimu. „Yesusi kolopa pora sirimu kinia, kanu mulu-maminiamo awi-suku-singina olakondo maniendo sipa olá torumu.

<sup>40</sup> Ambo mare „Yesusi toringi mele, sulu seko kanoko gilieringi. Akumanga ambo se Makatalla taono ambo Maria, se Josesa kinia genu Jemisi kinia olonga anumu Maria, se ambo Sallomi. <sup>41</sup> Yesusi kolea Gallilli disiriki, „kanu ambomanga pulu kolea,“ akuna u we andorumu kinia kanu amboma yu lombili andoko liku tapondoko nokoringi. Yu kinia, Jerusalleme olando oringi ambo awisili wema kepe, ambo pokore kanoko gilieringi akuna ono kepe „Yesusi toringi mele, kanoko gilieringi.

**15:42-47**

### *Yesusi Óno Seringi Semanemo*

<sup>42</sup> Opalikundu „koro moloringi, wale Sambatemo nondopa wendo ombá serimu. Sambate walemo wendo ombá kinia koro molongendo kiniá mele mélema liku undu-undu siringi walemo wendo orumu, aku walemonga „Yesusi u kolopili, kolea kala tomba serimu kinia, <sup>43</sup> Arimatia taono ye Josepo, yu Juda yombomanga kanjollo ye awili se molopa, yu kepe ‘Pulu Yemo ye nokoli kingimu molopa olio nokomba walemo wendo opili.’ nimba nokopa molorumu yemo. Yu ombo pipili naa kolopa „Romogapomano ye nokoli, Paillate molorumuna sumbi sipa pumba “Yesusinga ónomo na si.” nimba mawa serimu.

<sup>44</sup> Yesusi waltikele kolorumu pilipale Paillate yuni „Yomboma unju-perana uku topo panjilimulu kinia ena awisili ombo pupili we pelemele. Pe kiniá yu sika waltikele kolomunje molo nambi semunje?” nimba pilipa, konopu lipa mundupa ami-ye wane anderete nokorumu yemo “Opili.” nimba yundu mangilipale “Yesusi koronga kolomuye?” nirimu. <sup>45</sup> Ami-yema nokoli yemone “E.” nirimu kinia pilipale yuni ami-yema nokolimundu nimbale: “Manda, ya yemone „Yesusinga, ónomo lipili.” nirimu.

<sup>46</sup> „Paillatene “Manda.” nirimu kinia, Josepo pumba mulu-maminia se topo topa lipa ónomo mania lipa, mélumuni okopale kou-kande se u akuku taltoringi kou-kandemonga sukundu memba pumba taltorumu. Taltopale kou-kande kere-puluna kou awili se perele-marele memba ombo pipi sirimu. <sup>47</sup> Makatalla taono ambo Maria kinia Josesa anumu Maria-tolone yunga ónomo „kou-kandena, taltorumu mele kanoringili.

## 16

### *Kolomongo-Awili 16*

#### *Yesusi Ola Molorumu, Yombomane Kanoringi Mele Semanema*

**16:1-8**

#### *Yesusi Lombokoropa Ola Molorumu Kinia Ambo Marene Yu Kanoringi Semanemo*

<sup>1</sup> Ena pumba ipu lierimu kinia „koro moloringi, wale Sambatemo ombo purumu kinia Makatalla taono ambo Maria keme Jemisi anumu Maria keme ambo Sallomi keme onone ‘Yesusinga ónona wambola muna toli pokore ape kandondamili.’ ningu mare topo toko liku „taltoko peringi.“

<sup>2</sup> Pekole paa orili-u, ononga pulu-pulu kongono walemo wendo ombándo ena mundi orumu kinia kanu amboma pungu „Yesusinga, ónomo taltoringi kou-kandena pungí punguli niringimuni, <sup>3</sup> anju yando mangilku ninguli: “Kou-kande kerepulumu pipi sirigi koumu nawene wendo lipa perele-marele memba pumba taltondombanje?” niringi.

<sup>4</sup> Aku-sipa na-kolo ongo olando siku kanoringi kinia kou kanumu, paa kou kapo awilimu, u wendo liku perele-marele mengo pungu taltoringi, „kerepulumu we lierimu, kanoringi. <sup>5</sup> Kou-kandena sukundu punguli kou-kandemonga ki-lomekondo

ye-kango se mulu-maminia sulu paa kake seli se pakopa molorumumu kanokole mini-wale munduku konopu liku mundoringi.

<sup>6</sup> Kanu-kinia yuni onondo nimbale: "Konopu liku naa mundayo. Kolea Nasarete ye Yesusi 'Kolopili.' ningu talko unju-perana uku toko panjeringi kanu yemo kanonge okomelemo na pilkiru. Yu lomboropa ola molopa ombo pumu. Ya naa lemó. Ónomo u taltoringi koleamo ongo kaname. <sup>7</sup> Kanokole anju pungu Pita keme yu lombili andolima kinia pali i-siku ningu siengi: "Yesusi kolea Gallilli disiriki kumbi lepa pulimú kene akuna "Onone na kanonge." u nirimu mele sika onone akuna yu kanonge." ningu si-paa." nirimu.

<sup>8</sup> „Angellomone aku sipa ombo mona molopale nirimu mele, kanoko pilkuli amboma pungu-pungu ningu konopu awisili liku mundukuli kou-kandena ultu pungu munduku kelko paa lisiku puringi. Pipili kolikole yombo selu kepe kanoko pilieringi mele ningu naa siringi.

16:9-13

#### *Makatalla Ambo Maria Kinia Ye Talo Kinia Yesusi Lombokora Ola Molorumumu Kanokole Ningu Siringi Semanemo*

<sup>9</sup> Juda yombomanga pulu-pulu kongono walemo kinia, paa orili-u, Yesusi lomboropa ola molopale nirimumuni, Makatalla taono ambo Maria, u walte kuru yopoko-pakara konopuna moloringima Yesusini topa makororumu ambo kanumu molorumuna pumba, 'Na lomboropo ola molondu we molio mele kanopili.' nimba, lipa ora sirimu. <sup>10</sup> Kanu-kinia Yesusi 'mona gilierimu, kanopale ambomo yu pumba, u Yesusi kinia moloringi yomboma kamelé mindili nongo kola seko moloringina pumbale kanorumu mele ono nimba sirimu. <sup>11</sup> Yuni ono Yesusi konde molorumu mele kanopale nimba sirimu kinia pilkuli 'Yu kolo tokomo.' ningu pilieringi.

<sup>12</sup> „Makatalla ambo Maria Yesusi yu lipa ora sipale nirimumuni, pe 'yu lombili andoringimanga, yombo talo 'kolea-awili Jerusalleme munduku kelko, aulka senga puringilina Yesusi yu kumbikere kangi topele topa yu 'kanangili.' nimba ombo mona gilierimu. <sup>13</sup> Pe yu kanoko imbi sikuli kanu yombotolo kelko yando ongo 'lombili andoli, wemando olone kanoringili mele ningu siringili-na-colo olone ningu siringili mele kepe 'Kolo tokombele.' ningu pilieringila.

16:14-18

#### *Yesusi Ombo Yu Lombili Andolima "Nanga Kongonomo Sende-Paa." Nimba Lipa Mundorumu Semanemo*

<sup>14</sup> Pe walte lombili andoli rureponga yopoko kere-langí nongo moloringina Yesusi ombo mona molopale nirimumuni, ono iri topa nimbale: "Onone na 'Lombokora ola molomu.' ningu kuru naa mondoko, na konde molondu mele yombo marene kanokole ono ningu singi kinia 'Kolo tokomele. Aku paa naa semu, manda naa sembá.' ningu pilku kuru naa mondongi, akumu nambi semu-na aku siku karaye seko ningu pilku kuru naa mondongiye?" nirimu.

<sup>15</sup> „Aku nimba, yuni onondo nimbale: "Ono ma-koleamanga pali pungu yomboma pali semane peangamo toko siliku ando-payò. <sup>16</sup> Ningí mele pilkuli 'Akumu sika nikimili.' ningu kuru mondokole no lingí yomboma 'kote-walemo wendo ombá kinia, Pulu Yemone ono lipa tapondopa 'Ono mindili nolemolá koleana naa pungu, molko kondoko mindi pangí.' nimba. Aku-na-colo 'ono lombili andolimane, ningí mele pilkuli 'Akumu kolo tokomele.' ningu pilkuli mokoli senge yomboma 'kote-walemo wendo ombá kinia, Pulu Yemone 'Ono mindili nongo mindí pungí koleana pangí.' nimba.

<sup>17</sup> " 'Aku semanemo sika.' ningu kuru mondonge yomboma 'Na ono-kinia sika molio mele we-yombomane ningu kanangi.' nimbu kinia ulu-tondoloma senge kinia yomboma kanonge mele i-sipa: Ono nanga tondolomone kuru mare yombomanga

konopumanga molongema toko makoroko; umbu-ungu lupa lupa naa pilingíma ningu; <sup>18</sup> yombo nongo kondoli kongi-ka-wambiyema naa kanoko kimuni ambolonge kinia akumane ono naa nongo kondonge; tomo pelemo no se naa pilku nonge kinia unguri paa naa sembá; kuru tomba yomboma kimuni ambolonge kinia peanga lemba.” nirimu.

*16:19-20*

*Yesusi Mulu-Koleana Olando Liltimu Semanemo*

<sup>19</sup> Ye-Awili Yesusini ,yu lombili andolima,ndo aku sipa nimba pora sirimu kinia ,Pulu Yemone, yu mulu-koleana olando liltimu. Akuna ,imbi ola molopili Pulu Yemo-kinia mélema nokombando, Pulu Yemonga ki-lomekondo pumba molorumu.

<sup>20</sup> Yesusi yu mulu-koleana olando purumu kinia yu lombili andolima koleamanga pali pungu Yesusinga semane peangamo yomboma toko siliku andoringi kinia ‘Onone nanga unguma yomboma ningu singí kinia kanu yombomane ‘Ungu sikamo.’ ningu pilku liengi.’ nimba Ye-Awilimu ono-kinia pumba lipa tapondorumu kinia yuni lipa mundorumu yomboma onone ‘Pulu Yemone mindi ulu-tonadoloma manda selka mele sangi.’ nimba lipa tapondorumu.

„Aku pea..»

## LLUKU Semane Peangamo LLUKUNi Torumu Bokumu

### *I Bokumunga Ungu-Pulu Mare*

Ungu-pulu mare inia yakondo gomo 1 molemo. Ye **LLuku** yu doketa ye se molorumu (Kollosi 4:14). ‘Yu Juda ye se mólonje. Juda yombomanga ultukundu yerenje.’ ningu pilielemele. Yu Pollo kinia pea andoringili (Lipa Mundorumu Yema 16:10-17, 20:5-15, Pe-Timoti 4:11, Pillimono 24).

**LLuku** yuni yuyu “I bokumu tokoro.” nimba para sipa naa torumu-na-kolo yuni Lipa Mundorumu Yemanga bokumu sika torumu liemu ya Semane Peangamo kepe yuni yuyu sika torumula. LLuku 1:3-4 kinia Lipa Mundorumu Yema 1:1-2 kinia molemo ungu mare paa selu sipa mele. **Mateyu, Mako, LLuku, Jono** keme, onone boku toringimanga **LLukuni** torumu bokumu kamu sulu. Semane mare **Mateyu, Mako, Jono** kanu yemane naa toringi semane mare yuyu torumu.

‘Olio mana-yomboma lipa tapondopa, Pulu Yemo bulu sipu ulu-pulu-kiri sele-molomonga mindili nomolo aulkana molemolomonga wendo lipa, Pulu Yemo ye nokoli kingimu molopa yomboma nokopa kondolemo yombo talapena sukundu pumbu molomolo ulu-pulumu liemili.’ nimba Yesusi olionga nimba kolali sepa kolondorumu mele ‘Paa pilipu kondamili.’ nimba **LLukuni** i bokumu torumu.

**LLukuni** pilipale i bokumu torumu ungu-pengémo mele 19:10 molemo (boku ambolkonomonga pealemekondo “21. kisim bek 21.2.” ). Yesusini yuyu “Yombomanga nimbu kolondambo tangi.” nimba alieli konopumuni kimbu sipa molorumu ungu tondolo se 9:51 molemo (Jono 3:14-18).

Ungu se kamu piliani. Ye talo molo yopoko molo kisene ungu selumu molo semane selumu bokuna toringi-na-kolo wale awisili laye-kolte lupa-lupa toringi. Semane se molo ungu se ‘paa mimi sipu piliambo.’ ninguli bokumanga yu-melete-melete molemo mele kanokole boku gomoma wendo liku pali mimi siku kanani. I-sipa mele: **Mako** 1:12-13 ponjili, **Mateyu** 4:1-11 kinia **LLuku** 4:1-13 kinia sulu sepa. Kanu semanemo **Mateyu** **LLukutolone** selu-siku mele bokuna toringili molemo, aku-na-kolo angelloma oringi mele **Mateyuni** mindi torumu (4:11), Setenene “Walte kelepo ombó.” nirimu ungumu **LLukuni** mindi torumu (4:13). Ungu se **LLuku** 11:13 molemo akumu **Mateyu** 7:11 naa molemo. **LLuku** 22:62 Pita kola serimu semanemo **Mateyu Makotolonga molemola-na-kolo Jono** 18:27 naa molemo. Ya ungu-pulumu pora nikimu.

### 1:1-4

#### *LLukuni Yesusinga Semanemo Kokele Pulu Polopa Tombando U-Pulu-Pulu Boku Torumu Semanemo*

<sup>1-2</sup> Ye paa awili Tiopillas, olio molemolo koleana Yesusi kinia ungu wendo orumuma pulu-pulu wendo orumu kinia kanoko, yandopa wendo orumuma kanoko andoko moloringi yombomane pe olio semane toko siringi mele, aku semanemo ‘Sika.’ nimbu kuru mondolemolo kanumu yombo awisilini ‘Aku semanemo bokuna kamu molopili tamili.’ ningu boku toringi.

<sup>3-4</sup> Akumunga pe kelepo nane kepe ‘ ‘Semanemonga pulumu paa pilipu kondambo.’ nimbu u-pulu-pulu wendo orumu mele kepe yandopa ungu lupa-lupama wendo orumu mele kepe akuma pali mangilipu pilipu kondopo molorundu-na nane ‘Aku ungumando yombo marene Tiopillas nundu semane toko ungu-mane silimili mele aku sipa wendo orumu uluma nu piliani.’ nimbu, ‘Nane nundu ungumanga pali paa

sika wendo orumu mele semane topo nimbu siembo.' nimbu, boku topo nu simbú kinia peanga.' nimbu pilipuli aku semanemo topo i bokumu tokoro.

1:5—2:52

## **Ellisapetene No Lindeli Jono Merimu Mele Kinia Mariane Yesusi Merimu Mele Kanu Ulutolonga Semane Mare**

1:5-25

*Mulu-Koleana Angello Sene No Lindeli Jono Menge Mele Kinia Molopa Sembra Mele  
Nimba Sirimu Semanemo*

<sup>5</sup> Ye Nokoli Kingi Erote kolea Judia nokopa molorumu kinia Pulu Yemo popo tondorumu ye se molorumu, yunga imbi Sekaraya. Pulu Yemo popo tondoringi yombomanga talape senga imbi Apaya, Sekaraya yu kanu talapemonga ye se. Sekaraya menu ambo Ellisapete Pulu Yemo popo tondoringi yemanga talape senga ambo se. Olonga pea pulu-pulu anda-kolepamo Pulu Yemo popo tondoringi yemanga pulu-pulu ye nokoli awili Erono. <sup>6</sup> Aku ambo yetolo moloringili mele Pulu Yemone kanopa 'Yombo sumbi nilitolo.' nimba kanorumu. Olone yunga ungu-manema kinia "Yomboma saa." nirimu unguma pali pilku liku seko kondoko moloringili. <sup>7</sup> Aku-sipa na-koło Ellisapete we simbu perimu, bolango se naa meringili. Olo we ambu-anda leko moloringili.

<sup>8-9</sup> Walte Sekarayanga talapemone Pulu Yemo popo toko kaloringi kongono senderingi kinia yu kepe pea Pulu Yemonga kumbikerena kanu kongonomo senderingi. Aku sendeko molkole niringimuni, Pulu Yemo popo tondoringi yemane seringi mele sengendo ononga talapena ye se Pulu Yemo popo toko kaloringi ulka-tembele akumunga kisipina sukundu 'Nawe pumba muna tolemo paura-kekumu yombomanga nimba kalondomanje piliamili.' ningu kou-kate seringi. Aku sekole 'Sekaraya yu kanu kongonomo sendemba.' ningu kanoringi-kulu yu ulka-tembele kisipina sukundu pumba muna toli paura-kekumu kalondo-purumu. <sup>10</sup> Aku sepa gilierimu kinia ulka-tembelena we-yomboma maku toko Pulu Yemo popo toringi koleana yombo awisili Pulu Yemo kinia ungu ningu gilieringi.

<sup>11</sup> 'Sekaraya muna toli paura-kekumu kalondopa gilierimu kinia,' kanu paura-kekumu kalondo-pu-pu seringi polomonga ki-lomekondo Ye-Awilimunga angello se ombo mona gilierimu kanorumu. <sup>12</sup> Akumu kanopale pungu-pungu nimba pipili awili sepa kolorumu.

<sup>13</sup> Kanu-kinia angellomone yundu nimbale: "Sekaraya, pipili naa kolou." nirimu. "Nu Pulu Yemo kinia mawa seleno mele Pulu Yemo yuni pilierimu. Nunga ambomo kango se kanopa limba. Yunga imbi "Jono" ningu sieni. <sup>14</sup> Yu molombamonga nu konopu awili seko siku kamelé akoko moloni. Yu mengele kinia yombo awisili konopu singí. <sup>15</sup> Ye-Awilimuni yu kanopa ye awili peangamo nimba kanomba. Nowaene kinia no-tondoloma kinia waltikele kepe paa naa nopili. Anumunga olona we sukundu molomba kinia Pulu Yemonga Mini Kake Sélimu ombo yunga konopuna molopa manda sembá.

<sup>16</sup> Isirele yombomane ononga Ye-Awili Pulu Yemo liku bulu siringi yombomanga awisili Jonone sembamonga kelko konopu topele toko Ye-Awili Pulu Yemo pea kelko pilku seluna sere leko konopu seluna pupili molonge. <sup>17</sup> 'Pulu Yemone ungu-umbu tondorumuma pilipa yomboma nimba sirimu ye, Illainja tondolo pepili uluma sepa molorumu mele Jono yu aku sipa tondolo pepili uluma sepa molomba. Aku sipa tondolo pepili uluma sepa molombamonga lapalini konopu topele toko bolangoma kelko konopu mondongela; Pulu Yemonga ungu-manema pilku mokoli selemele yombomane konopu topele toko, konopu sumbi nili yombomane selemele mele 'aku

sipu samili.' ningu molongela; Jono yuni sembamonga Ye-Awili mu ombá kinia Ye-Awili mu yunga ungumu sumbi siku pilku lingí yombo talape se molongela." nimba angellomone Sekarayando nirimu.

<sup>18</sup> Aku nirimu kinia pilipale Sekarayane angellomondo mangilipa nimbale: "Aku ninkumu nambi sepo nane 'Sika nikinu.' nimbu pilimbuye?" nirimu. "Na anda lepo nanga ambomo ambu lierimu kanumu. Pe i ninkumu nambi sepa wendo ombámondo nikinuye?" nirimu.

<sup>19</sup> Angellomone pundu topa nimbale: "Nanga imbi Geperiele. Na Pulu Yemonga kumbikerena giliu. I kiniá nundu nikiru mele Pulu Yemone "Aku siku ni-pou." nimba lipa mundomu-na nundu ombo i semane peangamo topo sikiru. <sup>20</sup> Aku-sipa na-kolo nane "Kango mengele." nikirumu 'Kolo tokomonje?' ningu kuru naa mondokono kene i ungumu u wendo naa opili nu ungu naa nili moloni. Pe "Wendo ombá." nikiru mele amboma bolango olona mondokole melemelemanga walema omba pulimú mele aku sipa walema omba pumbá kinia i nikiru ungumu paa sika wendo ombá." nirimu.

<sup>21</sup> Aku siku ungu ningu giliangili Sekaraya ulka-tembelemonga kisipina sukundu koronga-u pumba molopa, welea wendo naa orumu-kulu yomboma ulka-tembelemonga ultukundu yu nokoko gilieringima konopu awisili kimbu siringi.

<sup>22</sup> Kanu-kinia yu wendo ombale nirimumuni, ungu se kerena manda naa nimba kimuni mindi manda manjipa gilierimu kinia kanokole, 'Sekaraya yu kisipina sukundu molopale melse omba gilieli none sepa kumbikere lipa pinjemu-na kanomu.' konopu lieringi.

<sup>23</sup> Pe ulka-tembelena yunga kongono walema pora nirimu kinia yunga ulkando purumu. <sup>24</sup> Ulkando pumba ,ambo Ellisapete kinia peko moloringili kinia, pe Ellisapete bolango olona mondorumu. Mondopale oli se-pakara 'Yombomane yu naa kanangi.' nimba lopi sepa molorumu. <sup>25</sup> Yuni nimbale: "Kiniá na-kinia ungu sekemomo Ye-Awili mu nanga nimba sendekemo. Na bolango se naa merindumunga yomboma na kanoko kiri pilieringi kinia pipili kolorundumunga Ye-Awili mu yuni na kondo kolomu lémo." nirimu.

1:26-38

### *Mulu-Koleana Angello Sene Mariane Yesusi Memba Mele Nirimu Semanemo*

<sup>26</sup> ,Ellisapete bolango olona mondopili oli se-pakara kolopa, talo-pakara sipamo ke topa gilierimu kinia Pulu Yemone mulu-koleana angello Geperiele kolea Gallilli disiriki Nasarete taonona lipa mundorumu. <sup>27</sup> Kanuna ambo-wenepo se, ye se kinia u naa peli we molorumu ambo-wenepomo molorumuna lipa mundorumu. Kanu ambo-wenepomo yunga pulu lierimu yombomane 'Yu ye se pupili.' ningu ala sinderingi yemonga imbi Josepo. Kanu yemo yunga anda-kolepa se ,ye nokoli kingi, Depiti. Ambo-wenepomonga imbi Maria.

<sup>28</sup> Maria molorumuna angello Geperiele omba yundu nimbale: "Ambomo, nu molonuna na okoro. Pulu Yemone nu paa sepa peanga sikimumunga nu maloya. Ye-Awili mu nu-kinia pea kopu seko molembele." nirimu. <sup>29</sup> Aku-sipa na-kolo kanu ungumu pilipale yu konopu awisili kimbu sipale, 'A! I nikimumu nambolka unguri nimba nikimunje?' nimba pilierimu.

<sup>30</sup> Angellomone yundu nimbale: "Maria, Pulu Yemone nu kanopa peanga pilkimu kene pipili naa koloyo. <sup>31</sup> Pílie. Nu pe olona kango se mondokole menimu. Mengole yunga imbi 'Yesusi' ningu sieni. <sup>32</sup> Yu ye nokoli molomba, yu imbi leko 'Paa Olandopa-Ye Molemomonga Malo.' ningila; Ye-Awili Pulu Yemone 'Yunga anda-kolepa Depiti Isirele yombomanga ye nokoli kingi tondolomo molorumu mele yu aku sipa molopili.' nimbala; <sup>33</sup> ononga anda-kolepa Jekopone kalopa liltimu yomboma yuni supulka nokombala; Yu ye nokoli kingi awilimu molopa mindi pumbá." nirimu.

<sup>34</sup> Mariane angellomondo nimbale: "I nikinu ulumu nambi sepa sembamondo nikinuye? Na ye se naa purundu kanumu." nirimu.

<sup>35</sup> Angellomone yundu nimbale: "Nu molonina Paa Olandopa Yemonga Mini Kake Sélimu ombo nunga olona kango se mondondomba. Aku sembamonga kango nuni menimu yu kango kake sélimu molomba; yu imbi lekole 'Pulu Yemonga Malo' ningila.

<sup>36</sup> „Pulu Yemone nu "Sembó." nikimu mele sika sembá. Ulu tondolo se "Sembó." nimbale serimu mele niembo., Nunga pulu lemó ambo Ellisapetendo "Ambo simbu pelemo." nilimili-na-kolo kiniá yu ambo-ambu liepili oli se-pakara kolopa talo-pakara sipamo ke topa giliepili yu kango se olona mondokomo kanumu. <sup>37</sup> Pulu Yemone ulu manda naa sembá ulu se paa naa pelemo. Yuni uluma pali manda selemo kanumu." nirimu.

<sup>38</sup> „Angellomone yundu aku sipa nirimu kinia pilipale, Mariane nimbale: "Na Ye-Awilimunga kongono kendemande ambomo molio. Nuni nikinu mele Pulu Yemo yuni na-kinia aku sipa sepili." nirimu.

Kanu-kinia angellomone Maria mundupa kelepa yu purumu.

1:39-45

#### *Maria Yunga Pulu Lierimu Ambo Ellisapete Pumba Kano-Purumu Semanemo*

<sup>39</sup> Mulu-koleana angellomone Mariando ungu nimba pora sipale kelepa purumu kinia pe Maria kolea Judia disiriki pumba ma-pangi senga ola taono se lierimuna purumu. <sup>40</sup> Pumba akuna ye Sekarayanga ulkana sukundu pumbale ambo Ellisapete kanopa "Na okoro." nirimu kinia kanguloringili.

<sup>41</sup> Ellisapetene Marianga ungumu pilierimu kinia Ellisapete yunga olona bolangomo pukua topa ola mania serimu pilierimu. Kanu-kinia Pulu Yemonga Mini Kake Sélimu Ellisapetenga konopuna pumba molopa manda serimu kinia "I-siku i-siku ni." nirimu mele <sup>42</sup> Ellisapetene ungu tondolo sepa nimba nimbale:

"Ambo molemelemanga pali nu maloya. Ambomanga pali Pulu Yemone nu olandopa sepa peanga sirimu. Bolango nu olona mondolenomo kepe yuni sepa peanga simbala. <sup>43</sup> Na ambo kiri se molonduna nanga Ye-Awilimunga anumu nu onumunga na konopu awisili kimbu sikiru. Aku senumunga na-kinia seko peanga sakinu. <sup>44</sup> Nu ongole "Na okoro." ninu-na komumuni piliendu kinia nanga olona molomu bolangomo paa konopu sipa pukua topa ola mania semu. <sup>45</sup> Ye-Awilimuni nundu nirimu ungumu pilkuli 'Sika nikimu. Yuni "Sembó." nikimu mele sika aku sembá.' ningu kuru mondorunumunga yuni nu sepa peanga sikimu mele sepa peanga simba kene nu konopu siku molani." nirimu.

1:46-56

#### *Pulu Yemone "Ono Nokopa Kondomba Ye Se Lipu Mundumbu." Nimba Taltorumu Ye Nokoli Karasimu Mariane Membá Mele Pilipale Konane Nimba Pulu Yemo Kape Nirimu Semanemo*

<sup>46-47</sup> Ellisapetene nimba pora sirimu kinia Mariane nimbale:

"Pulu Yemo nanga Lipa Tapondopa, Mindili Nombo

Molopo Kinjiliu Aulkana Wendo Lipa,

Manda Molopo Kondombo Aulkana

Lipa Mondomba Yemo kinia

na konopu paa awili sepo sikirumunga

nanga konopumuni

Ye-Awilimu kape nimba

imbi ambolopa paka tondokomo.

<sup>48</sup> Pulu Yemo yuni yunga we-ambo-kendemande kirimu

siye naa kolopa konopu kimbu sirimumunga

nanga konopumuniaku sipa yu kape nikimu.

Yombomane pe pe kepe kalko lingí yombomane nando  
 "Pulu Yemone nu sepa peanga sikimu.  
 Nu maloya." ningí.

<sup>49</sup> *Ye*, Tondolo Pulimuni na ulu tondoloma senderimumunga  
 nando aku siku ningí.

*Ye*, Tondolo Pulimyu ye kake sélimu.

<sup>50</sup> Yu-kinia pipili kolko pilku limili yomboma  
 yuni kondo kolopa molemo.

Onone pe pe kepe kalko lingíma kepe  
 kondo kolopa molopa mindi pumbá.

<sup>51</sup> Yuni yuyu ulu tondoloma serimu.

Yombo kara pungu ononga konopuna  
 onono kape ningu molemele yomboma  
 yuni anju anju topa makoropa mundulimú.

<sup>52</sup> Yomboma yombo-kamako molko  
 koleama nokoko molemelema

yuni topa mania mundupa,  
 yomboma ononga imbima  
 ono onono topa mania mundumbama  
 yuni ononga imbima ambolopa paka tondolemo.

<sup>53</sup> Gelene kololemele yomboma yuni

'Olo sepili.' nimba kere-langí peangama sipa,  
 yombo kamakoma méle seluri kepe naa sipa  
 "We paa." nimba makorolemo.

<sup>54-55</sup> Yuni olionga pulu-pulu anda-kolepalimando  
 "Sembó." nimba, nimba panjerimu ungumu  
 komu naa sipa pilipa molopale

anda-kolepa Eporayamo kinia,

Eporayamo yuni

yandopa yandopa kalopa liltimu yomboma kinia,  
 onondo "Sembó." nimba,  
 nimba panjerimu mele sembando

olio Pulu Yemo yunga kendemande

Isirele yombo molemolo akuma yuni  
 kondo kolopa lipa tapondomba sepa molemo."

nirimu.

<sup>56</sup> Maria Ellisapete kinia pea molangili oli yopoko omba purumu kinia pe Maria yu  
 yunga ulka-koleando kelepa purumu.

**1:57-66**

### *Ellisapetene Kango Jono Merimu Semanemo*

<sup>57</sup> Ellisapete bolango membá walemo wendo orumu kinia yuni kango se kanopa  
 liltimu. <sup>58</sup> Yunga ulka kere pongolo yomboma kinia yunga pulu lierimu yomboma  
 kinia Ye-Awylimuni yu kondo awili sepa kolorumu mele pilkuli ono yu pea konopu  
 siku moloringi.

<sup>59</sup> Wale yopoko-pakara kangomo kanopa lipa taltopa molorumu kinia wale engaki-  
 sipamonga yomboma sukundu sukundu ongo maku tokole yunga kangi se kopisiku  
 makaye seko wendo liku eltokole niringimuni, yunga imbimu yunga lapanga imbi  
 manda manjiku " 'Sekaraya' niemili." niringi.

<sup>60</sup> Aku-na-kolo kangomonga anumuni "Mólo." nimbole "Yunga imbi 'Jono'  
 nimulú." nirimu.

<sup>61</sup> Onone yuntu ninguli: “Olonga pulu lemó yombo senga imbi aku sipa naa molemo.” niringi.

<sup>62</sup> Kanu-kinia onone “Lapane nambolka konopu lekemone, yunga imbi lepa nawe

nimbáne, mangilipu piliamili.” ningu lapando kimuni manda manjeringi kinia

<sup>63</sup> yuni pundu topa kimuni manda manjipa “Boku se siee.” nimbale, yuni bokuna

topa nimbale: “Yunga imbi Jono.” nirimu. Akumu kanokole yombomane paa konopu

awisili lieringi. <sup>64</sup> Kanu-kinia waltikele Sekaraya yunga kerena kelepa ungu nimbale

Pulu Yemo kape nirimu.

<sup>65</sup> Aku serimu-na kanokole yunga ulka kere pongolo yombomane pipili paa koloringi. Kolea Judia disiriki ma-pangima polorumu koleamanga pali aku semanemo mindi tolko puringi. <sup>66</sup> Aku ungumu pilieringi kinia yombomane pali konopu kimbu siku ninguli: “Ungu akumu we naa selemo. Ye-Awilimu i kangomo-kinia molombamonga aku sekemo lémo.” ningu pilkuli “I kangomo pe nambi sepa molombanje?” niringi.

1:67-80

### *Sekarayane Nirimu Konanemo*

<sup>67</sup> Mini Kake Sélimu Jono lapa Sekarayanga konopuna omba molopa manda serimu kinia Sekaraya yuni Pulu Yemone ungu-umbu tondorumu ungu se pilipa, pe wendo ombá mele yomboma nimba sipa nimbale:

<sup>68</sup> “Ye-Awilimu, Isirele yombomanga Pulu Yemo,

yu kape nimbu imbi ambolopo paka tondamili.

Yu omba yunga yomboma lipa tapondopa

umbuna sene ono ambolorumu-na

mindili nongo moloringi kanu umbunamonga

wendo límu-na pilipuli

yu kape nimbu imbi ambolopo paka tondamili.

<sup>69</sup> Pulu Yemo yuni yunga kendemande-ye

‘olianga ye nokoli kingi, Depitini

kalopa liltimu yombomanga ye tondolo peli se

olio ‘Lipa tapondopa mindili nombo

molopo kinjilimulu aulkana wendo lipa,

manda molopo kondomolo aulkana

lipa mondopili.’ nimba simu.

<sup>70</sup> (Yuni ungu-umbu tondorumuma pilku

yando ningu siringi yemane pe sembamondo

koronga-u ninguli:)

<sup>71</sup> “Yuni olio lipa tapondopa

olianga opa-touma topa mundundupa,

olio kanoko kiri pilku mindili silimili yomboma

‘Aku siku naa sangi.

Wendo ongo manda molangi.’ nimba

aku siku selemele aulkana wendo limba.”

niringi mele

kiniá aku sembá sekemo.

<sup>72-73</sup> Olianga anda-kolepalima kondo kolopa,

olianga pulu-pulu anda-kolepa Eporayamo-kinia

“Sembó.” nimba, nimba panjipa mi lierimu mele

“komu naa sipu, nirindu mele sambo.” nimbale

aku sembá sekemo.

<sup>74-75</sup> ‘Pipili naa kolko, nanga kongonomo

tondolo munduku sendeko, konopu kake sepili molko

nane kanopo peanga pilkiru unguma mindi  
 mana seko mololko pang.' nimbale  
 olionga opa-toumane olio toko mindili silimilima  
 'Naa sangi. Olio we molamili.  
 Lipu tapondopo tokomele aulkana wendo limbu.'  
 nimba, nimba panjipa mi lierimu mele  
 'Sambo.' nimbale aku sekemo."  
 nirimu.]

<sup>76</sup> "Nanga kango Jono,  
 nu kumbi leko pungu Ye-Awilimu ombá aulkamo  
 akisindenímunga pilkuli ningímu,  
 yombomane pe nundu 'Olandopa Molemo ,Ye,monga  
 ungu-umbu tondolima pilipa  
 yando nimba sili yemo.' ningí.

<sup>77</sup> 'Ye-Awilimu yunga aulkamo akisindambo.' ninguli  
 nuni yunga yombomando i-siku ningu sini:  
 "Ye-Awilimu yuni ononga ulu-pulu-kiri selememele  
 'Mania pupili.' nimba siye kolopale  
 ono lipa tapondopa  
 mindili nolemolá aulkana wendo lipa,  
 yu-kinia pea molko kondonge aulkana lipa mondomba."  
 ningu, aku ungumu onondo ningu sini.

<sup>78-79</sup> Pulu Yemone olio kondo awili sepa kolopale  
 olio simbulu tolina molopo kololi aulkana molomoloma  
 konopu pe nipili molomolo aulkana  
 'Manda kanoko pang.' nimba  
 'Pa sendepili.' nimba olio molemolona  
 pa sendélimu lipa mundukumu."

nimba Sekarayane nirimu.

<sup>80</sup> Kango Jono yu akopa konopu tondolo pumba manda molorumu. Yu pe Isirele  
 yombomanga kumbikerena kongono sepa molombando u kolea ku lielina pumba  
 molorumu.

## 2

2:1-7

### *Mariane Yesusi Merimu Semanemo*

<sup>1</sup> Jono pamemo molopili, Romo Gapomano Ye Paa Awili Kumbina 'Sisa Okasitasi' nílimuni ungu-mane se nimba panjipale "Romo gapomanomone nokolemo koleamanga molemele yomboma pali imbi liemili." nirimu. <sup>2</sup> (Kiriniasi kolea Siria poropinji nokorumu yemo molopili Romo gapomanomone yombomanga imbima pulu-pulu liltimu.) <sup>3</sup> Unugu-mane akumu Okasitasini nimba panjerimu kinia, yomboma pali ononga anda-kolepalimane kalko litingi koleamanga yu-mele-mele ono puringi.

<sup>4</sup> Ye Josepo kolea Gallilli disiriki Nasarete taonona molopa, Romo ye nokolimuni 'Yomboma imbi liemili.' nirimu, pilipale nirimumuni, Nasarete mundupa kelepa, yu kalopa liltimu anda-kolepa Depiti u perimu kolea Judia disiriki pumba Betellieme taonona purumu. <sup>5</sup> Akuna "Oltonga imbitolo liengi pambili." ningu yu nondopa limba ambo Maria kinia olo akuna puringili. Maria ulka pélimu pea puringili. <sup>6-7</sup> Betellieme sukundu punguli, yombo ponenge ongo pe-pu-pu seringi ulkamo sengepea serimukulu, olo kongi dongi kinia kaoma panjerengi ulkana pungu peringili. Akuna peringili kinia, Maria bolango mini torumu. Pe kango se kanopa liltimu. Aku kangomo

yunga komolayemo. Kanopa lipale mulu-wambale marene lipa kangomo okopa, kongimanga langi noringi okolo senga suku taltorumu.

2:8-15

*Mulu-Koleana Angello Se Mania Omba Kongi Sipisipi Tapu-Ye Mare Ye Nokoli Karasimu Meringi Mele Nimba Sirimu Semanemo*

<sup>8</sup> „Betellieme, ultukundu kongi sipisipi tapu-ye mare era kaliamanga ipulieli ononga sipisipima tapu seko moloringi. <sup>9</sup> Kanu-kinia ono moloringina Ye-Awylimunga angello se omba mona gilierimu kanoko, Ye-Awylimunga pa tondolo-sepa sélimu omba ono moloringi koleana pa serimu kanokole, ono mini-wale awili seko mundoringi.

<sup>10</sup> Aku-na-kolo angellomone nimbale: “Nane ono semane peanga se topo simbú okoro kene pipili naa kolayo. I semanemo yomboma pali konopu singí semanemo. <sup>11</sup> Kiniá u molorumu ye nokoli kingi, Depitinga taonona ambo sene kango se memu. Yu Yomboma Lipa Tapondopa Mindili Nongo Molko Kinjilimili Aulkana Wendo Lipa, Manda Molko Kondonge Aulkana Lipa Mondomba Kangomo; yu Pulu Yemone “Ono nokopa kondomba ye se lipu mundumbu.” u nimba taltorumu ye nokoli Karasimu; yu Ye-Awili. <sup>12</sup> Sika nikiru molo kolo tokoronje ono pungu kanangi mele nimbu siembo. Bolango kiki se mulu-maminiane okoko, kongimanga langi noringi okolo senga taltongemo pungu kanoko lendenge. Aku siku kanoko lendekole nane ‘Sika nimu lémo.’ ningu pilingí.” nirimu.

<sup>13</sup> Aku nirimu kinia popenge seko mulu-koleana angello paa awisili u orumu angellomo gilierimuna ongo mona gilkuli niringimuni, Pulu Yemonga imbi ambolko paka tondoko yu kape ningu ninguli:

<sup>14</sup> “Mulu-Koleana Paa Olandopa Pulu Yemonga imbi  
paa ola molopili.

Mana-yombo yuni kanopa peanga pilielemo yomboma,  
konopu peanga pepili molangi.” niringi.

<sup>15</sup> Aku ninguli ono kongi sipisipi tapu-yema munduku kelko mulu-koleana kelko olando puringi.

2:15-21

*Kongi Sipisipi Tapu-Yema Yesusi Mengo Taltoko Moloringi Mele Pungu Kano-Puringi Semanemo*

Angelloma kelko mulu-koleana olando puringi kinia sipisipi tapu-yemane anju yando ninguli: “Olio Betellieme pumbu i ungu kiniá wendo okomo mele Ye-Awylimuni nimba simu ungu kanumu kano-pamolo.” niringi. <sup>16</sup> Aku ninguli popenge seko punguli niringimuni, Maria Josepotolo moloringili kanoko, bolango kikimu kongimanga langi noringi okolona suku lierimu kanoko lenderingi. <sup>17</sup> Yu kanokole, u angellomone ono aku bolangomondo nimba sirimu mele yomboma ningu siringi.

<sup>18</sup> Kanu-kinia sipisipi tapu-yemane ningu siringi mele pilkuli yombomane konopu awisili kimbu siringi. <sup>19</sup> Aku-sipa na-kolo Maria i unguma kinia ulu wendo orumuma pali konopuna panjipale, pe kepe konopu kimbu sipa molorumu.

<sup>20</sup> Sipisipi tapu-yema kelko yando ongole niringimuni, angellomone nimba sirimu mele pali pilku kanoringimunga Pulu Yemo kape niliku yunga imbi ambolko paka tondoleko yando oringi.

2:21

*Yesusi Imbi Siringi Semanemo*

<sup>21</sup> Kangomo kanoko liku taltoko molangi wale yopoko-pakara omba purumu kinia wale engaki-sipamonga yunga kangi se kopisiku makaye seko wendo likuli, anumuni

yu olona naa mondopili angellomone nirimu mele pilkuli yunga imbi "Yesusi" ningu siringi.

**2:22-38**

*Josepo Kinia Mariatolo Kango Yesusi Mengo Jerusalleme Pungu Ulka-Tembelena  
Sukundu Puringili Kinia Ulu Mare Wendo Orumu Semanemo*

**22-24** Maria bolango merimumunga, "Yu kalaro molemo." niringimunga walema pora nimba, yu kamu kake sepili molomba walemo wendo orumu kinia, Mosisini ungu-mane sirimu se pilku liku sengelendo Josepo kinia olo kolea-awili Jerusalleme punguli niringilimuni, kake sepili molongelendo Pulu Yemo popo toko kalo-puringili. Ye-Awilimunga ungu-mane se u sirimu perimu akumu i-sipa:

· 'Ambo sene bolango kanopa lipale

ambomo yu pena pemba mele molomba.

Pena pemba walema pora nimbá kinia

kake sepili molombando,

kera waembono mele talo molo kera imili mele talo

Pulu Yemo popo topa kalopa sipili.'

nimba ungu-mane aku sipa nimba perimu kanumu pilkuli sengelendo puringili. Ye-Awilimunga ungu-mane nimba perimu se pea pilku liku sengelendo puringilila. Aku ungu-manemo i-sipa:

'Kango komo kanoko lingíma pali

"Ye-Awilimunga" ningu yu siengi.'

nimba perimu kanumu. Aku ungu-manemo nimba perimu-kulu pilkuli 'Oltonga kango komomo Pulu Ye Awilimu siembili.' ninguli Jerusalleme pungilíndu Yesusi mengo puringilila.

**25** Ye-anda se Jerusalleme molopili olo puringili, yunga imbi Simiono. Yu sumbi nirimu yemo; yu Pulu Yemonga ungumu pilipa alieli Pulu Yemo kinia ungu nirimu yemo; yu Isirele yomboma konopu seluna pupili molangi ombo sendemba yemo kanombando nokopa molorumu; Mini Kake Sélimu yunga konopuna sukundu molorumu. **26** Mini Kake Sélimuni yundu ungu se u nimbale: "Nu u we naa koloni. Nu u Ye-Awilimuni "Ono nokopa kondomba ye se lipu mundumbu." nimba taltorumu ye nokoli Karasimu kanokole pe koloni." nirimu. **27** Mini Kake Sélimuni Simiono yu lipa mundorumu-kulu yu Pulu Yemo popo toko kaloringi ulka-tembelena purumu.

Kanu-kinia Yesusi anumu lapatolo ungu-manemone kangomando "Saa." nimba

sirimu mele sengelendo kango Yesusi mengo ulka-tembelena sukundu puringili kinia

**28** Simionone ombo kangomo kangulupa lipa Pulu Yemonga imbi ambolopa paka tondopa nimbale:

**29-30** "Ye Awili Tondolo Olandopamo,

yomboma lipa tapondopa

mindili nolemolá aulkana wendo lipa

nu-kinia pea molko kondonge aulkana

lipa mondomba ye sikinumu

na kiniá nanga mongone kanokoro kinia

u nando ningu panjerinu mele wendo okomo kene

kiniá na nunga kendemande-yemo

konopu pe nipili kolombo." nirimu.

**31** " 'Kanu lipa tapondopa wendo lili ulumu

koleamanga pali yombomane kanangi.' ningu sekeno.

**32** Yu Isirele yombomanga ultu

molemele yombomanga pa sendepa,

nunga Isirele yombomanga imbi  
ambolopa paka tondombando  
pa sendeli mélemo molemo.”

nirimu.

<sup>33</sup> Anumu lapatolo Simionone kango Yesusindu nirimu mele pilkuli konopu awisili kimbu siringili.

<sup>34</sup> Simionone “Pulu Yemone ono sepa kondopili.” nimba Yesusi anumu Mariando nimbale: “Pílie. I kangomo molombamonga Isirele yombo awisili imbi u molorumuma pe mania pungila; awisili imbi u naa molorumuma pe kinia imbi molombala. Yu molomba kinia yombomane kanokole bulu siku ungu-taka tondonge. <sup>35</sup> Ambomo, nu kepe ulu se wendo ombá. Nunga kameléna mindili awili-sepa sembá kinia yombo awisili konopu lenge mele mona lemba.” nirimu.

<sup>36</sup> Pulu Yemone ungu-umbu tondorumuma pilipa yomboma nimba sirimu ambo se, yunga imbi Ana, yu Juda yombomanga talape kanga Asa, ye Panuelenga lemenu; yu paa ambo-ambu lierimu; yunga menu yemo pea molangili kalia-ingi yopokopakara ombo purumu, pe yunga menu kolorumu kinia yu ambo-wayamo molorumu.

<sup>37</sup> Yu mana molopili yunga kalia-ingi paono kise kelepa yopoko ombo pumba paono kise kelepa kise sipamonga yu we molorumu. Yu ulka-tembelemo mundupa naa kelepale alieli kanuna mindi molopa ipulieli kepe tangoli kepe Pulu Yemo popo topa imbi ambolopa paka tondombando alieli kere-langì naa nomba Pulu Yemo kinia ungu nimba mawa sepa mindi molorumu. <sup>38</sup> Simionone Yesusindu ungu nimba molopili ono moloringina kanu ambomo yu ombale „Pulu Yemone kanu kangomo Juda yomboma sirimungu, Pulu Yemo kinia “Ange, papu sekeno.” nirimu. Kanukinia pe Jerusalleme yomboma lipa tapondopa, umbuna sene ono ambolorumu-na mindili nongo moloringi kanu umbunamonga wendo limbando ombá yemo ‘Ombá.’ ningu nokoko moloringi yombomando Ana yuni kango akumu orumu mele kinia sembá mele kinia nimba sirimu.

2:39-40

### *Josepone Yesusi Anungulu Memba Kelepa Nasaretendo Purumu Semanemo*

<sup>39</sup> Josepo Mariatolo olone Ye-Awilimunga ungu-manetolo nimba perimu mele pali pilku liku sekole niringilimuni, olo Yesusi kinia kelko kolea Gallilli disiriki pungu onlonga kolea kanga Nasarete yando oringili.

<sup>40</sup> Kangomo akopa enge nimba molopa yunga konopuna pilipa kondoli awisili ombo pepili molorumu, Pulu Yemone yu kanopa peanga pilipa yu sepa kondorumu.

2:41-52

### *Kango Yesusi Ulka-Tembelena Pumba Serimu Semanemo*

<sup>41</sup> Juda yombomane kalia-ingi senga senga kolea-awili Jerusalleme ongo akuna sukundu Pulu Yemone ononga anda-kolepalima Naa Topa Ola We Ombo Purumu mele pilku ulu mare seringi kanu walema Yesusi anumu lapatolo kepe ‘Kanu walemo piliambil.’ ningu kalia-ingi senga senga Jerusalleme olando puringili. <sup>42</sup> Kango Yesusi molopili yu kalia-ingi engaki rurepo ombo purumu kinia kanu walemo ‘Pulu Yemonga wale.’ ningu koro moloringi walemo kelepa wendo orumu kinia alieli Juda yomboma Jerusalleme puringi mele Yesusi anumu lapatolo kinia yu kinia pea olando puringi.

<sup>43</sup> Jerusalleme pungu, kanu ulumu pilieringi walema pali pora nirimu kinia anumu lapatolo ulka-koleando pungilí puringili kinia kango Yesusi anju molorumu olo naa kanoringili. <sup>44</sup> ‘Olionga yombo mare kinia okomo.’ konopu leko wale selumunga we punguli niringilimuni, pe ipupini kolea kalá torumu kinia pungu aulkana pengendo onlonga pulu lierimu yomboma kinia we-yomboma kinia pea pungu moloringimando

mangilku piliku andoko kororingili. <sup>45</sup> Yu naa kanoko lendekole Jerusalleme kelko pungu koro-puringili.

<sup>46</sup> Wale talo koroko kelkole niringilimuni, pe wale yopoko-sipamonga „Pulu Yemo popo toko kaloringi, ulka-tembelena pungu kanoringili kinia yu akuna sukundu molorumu kanoko lenderingili. Yu ungu-manemanga puluma pilku mane siringi yema kinia pea moloringi, yuni ononga ungu niringima pilipale, anju onondo ungu mare mangilipa pilierimula. <sup>47</sup> Yu onone niringima mimi sipa pilierimu mele kepe, pundu topa nimba kondorumu mele kepe, yombo moloringimane pilkuli onone ‘Yunga pilipa kondoli paa pepamo.’ ningu pilku konopu kimbu siku mini-wale mundoringi.

<sup>48</sup> Olone yu kanu ulkana molorumu pungu kanokole pungu-pungu ningu anumuni yundu nimbale: “Kangomo, olto kinia pea pamili ou naa oli, nambi semu-na senuye? Lanie olto mini-wale mundulipu nu andopo koropo keliembulu.” nirimu.

<sup>49</sup> Aku nirimu kinia yuni anumu lapatolondo nimbale: “Olo ‘koleamanga pali, nambi semu-na na andoko korongiliye? ‘Na ya Tatanga ulkana molemo.’ konopu naa liengiliye?” nirimu. <sup>50</sup> Aku-na-kolo yuni nirimu ungu-pulumu alone naa pilieringili.

<sup>51</sup> Yu olo kinia Nasarete taono maniando pumbale nirimunumi, olonga unguma pilipa sengena panjipa molorumu. Yunga anumuni kanu uluma konopuna panjipa pilipa mindi molorumu.

<sup>52</sup> Yesusi yu akomba akorumu kinia yu pilipa kondoli olandopa olandopa pumba perimu; Pulu Yemo kinia yomboma kinia yu kanoko paa peanga pilku moloringila.

3:1—4:13

## **Yesusini Yunga Kongonomo Sembá Aulkamo Wendo Ombándo Ulu Mare Wendo Orumu Mele Semanema**

### 3

3:1-18

*No Lindeli Jono Omba Yomboma Unguma Nimba Sipa, Konopu Topele Toringi  
Yomboma No Linderimu Semanemo*

<sup>1</sup> Ye Tapiriasi-Sisa, Romo-gapomanomone nokorumu koleamanga pali, Isirele yombomanga kolea akumanga pali kepe, yu ye paa awili kumbinamo molorumu. Yu kanu koleamanga pali Romo ye paa awili kumbinamo molopili kalia-ingi tene-po ombo pumba kalia-ingi tene-paip sipamo wendo orumu kinia yu aku sipa we molorumu. Kanu kalia-ingimunga Pondiasi Paillate kolea Judia disiriki yombomanga ye nokolimu molorumu; Erote kolea Gallilli disiriki yombomanga ye nokolimu molorumu; Erote genu Pillipu kolea Ituria disiriki kinia Terekonaitisi disirikitolo yombomanga ye nokolimu molorumu; LLaiseniasi kolea Apillini disiriki yombomanga ye nokolimu molorumu.

<sup>2</sup> Ono aku koleama nokoko molangi Anasi kinia Kayapositolo Pulu Yemo popo tondoringi ye awili olandopatolo molangili Sekaraya malo Jono kolea ku lielina molorumu kinia Pulu Yemone Jono yu ungu-umbu tondorumu.

<sup>3</sup> Pulu Yemone ungu-umbu tondorumu kinia pilipale Jono yu pumba no Jodane nekendo yakondo andopa yomboma ungu-mane sipa nimbale: “Ono ulu-pulu-kiri selemelema kanoko kiri pilku konopu topele tokole ‘Pulu Yemone olionga ulu-pulu-kirma ‘We mania pupili.’ nimba siye kolopili.’ ningu ‘No liemili.’ ningu waa.” nirimu.

<sup>4</sup> Aku kongonomo Jonone serimu mele yu naa molopili koronga-u yuni yomboma Yesusinga unguma sumbi siku pilku lingí aulkamo lipa taltondomba mele, Pulu Yemone ungu-umbu tondorumuma pilipa yomboma nimba sirimu ye Aisayane nimba boku torumu akuna molemo mele i-sipa:

“Kolea ku lielina  
 ,kumbi lepa pumbá, ye senga kerena  
 ungu se nimbale:

“Ye-Awilimu ombá aulkamo seko wamame.  
 Yu ombá aulka kangama toko sumbi siee.” nikimu.

<sup>5</sup> “Ma-pangima akuku kalambili siku,  
 kolo lemomanga akuku pe toko,  
 aulka akanale-makanale selemoma toko sumbi siku,  
 aulka ola mania pulimúma kolta lenge.

<sup>6</sup> Aku senge kinia  
 Pulu Yemone olio lipa tapondopa

‘Mindili nolemolá aulkana wendo ongo  
 yu-kinia pea molko kondonge aulkana  
 pangí.’ nimba lipa mundumba yemo  
 yombomane pali kanonge.” nikimu.”

nimba Jonone pe sembá mele Aisayane u aku sipa nimba sipa bokuna torumu molemo..”

<sup>7</sup> Yombo awisili Jono molorumuna ‘Yuni olio no lindepili.’ ningu onge oringi kinia yuni kanopale nirimumuni, ono iri topa nimbale:

“Kolo topa yomboma sepa kinjeli wambiyemonga waloma, Pulu Yemo mumindili kolomba walemonga nawene “Ono kowa paa.” nimu kinia ono ‘Pulu Yemone naa sepa kinjepili.’ ningu ‘No liemili.’ ningu okomeleye? <sup>8</sup> Ono sumbi siku molko, ulu peangama mindi seko molonge kinia ono ulu-pulu-kiri seringima paa sika munduku kelko konopu topele tonge mele mona lemba. “Olio anda-kolepa Eporayamone kalopa liltimu yomboma molemolomonga yombo peangama molemolo.” ningu aku siku ningu naa piliame. Nane ono nimbu sikiru: ‘Pulu Yemone i kou-mulumando “Eporayamone kalopa liltimu yomboma au leangi.” nilkanje kou-muluma Eporayamone kalopa liltimu yomboma molemolá.’ nikiru. Ono Eporayamone kalopa liltimu yomboma molemelemonga unguri naa selemo.

<sup>9</sup> Unju peke tomba lumu Pulu Yemone koronga unju puluna ambolopa ola lipa molemo. Unju mongo peanga naa tomba unjuma yuni peke topale sepena kalomba.” nimba Jonone aku nirimu.

<sup>10</sup> Yombo Pulu Yemo kanopa peanga pilielemo ulu-puluma naa selemelema Pulu Yemo yuni “Mindili nangi.” nimba mele Jonone nimba sirimu kinia pilkuli, ongo maku toringi yombomane ninguli: “Aku liemu , ‘Yuni olio “Mindili nangi.” naa nipili.’ nimbu, nambi semoloye?” niringi.

<sup>11</sup> Yuni onondo pundu topa nimbale: “Wale-pakoli talo taltolemele yomboma onone yombo wale-pakoli se naa taltongema moke seko siengi. Kere-langima kepe aku siku sangila.” nirimu.

<sup>12</sup> Kou-takisi lili yema kepe ‘No liemili.’ ningu oringi. Yuni ungu nirimumu pilkuli yundu mangilku pilku ninguli: “Ungu Mane Sili Yemo, olio nambi semolo kinia Pulu Yemo yuni olio kanopa peanga pilimbaye?” niringi.

<sup>13</sup> Yuni onondo nimbale: “Ono kou-takisi likuli gapomano yuni “Kou i-siku liee.” nimba, nimba taltopa simba mele liengi. Onone kolo toko mare ola panjiku limili aku mele naa liengi.” nirimu.

<sup>14</sup> Kanu-kinia ami-ye mare yu mangilku pilkuli, “Olio kepe nambi samiliye?” niringi.

Yuni pundu topa nimbale: “Onone yombomanga kou-mone wa lingíndu kolo toko kopene we naa tangi. Gapomanomone méle kalomba koumu mindi liku taltoko, taka leko molangi.” nirimu.

<sup>15</sup> Jonone serimu mele kanokole yombomane yu-kinia konopu awisili kimbu siku, ‘Pulu Yemone olionga anda-kolepalimando “Ono nokopa kondomba ye se lipu mundumbu.” nirimu ye nokoli Karasimu i yemonje?’ ningu pilku moloringi.

<sup>16</sup> Ningu pilieringi mele pilipale Jonone pundu topa onondo nimbale: “Nane yomboma no mindi lindiliu. Aku-na-kolo ye se ombámo yuni ‘Pulu Yemonga, Mini Kake Sélimu kinia sepemo kinia ono lindimba „lingí. I ombá yemo yunga tondolomo paa olandopa, nanga tondolomo paa maniandopa. Na yu-kinia manda mólo. ‘Yombo awilimanga kongono kiri seli kendemande-yombomane sika ononga awilimanga kongono kiri sendengendo kimbu su wendo lindilimili-na-kolo, ombá yemonga kimbu su wendo lindimbu kanu kongonomo paa olandopa mele nane sendembo manda naa selka, na ye paa kiri. <sup>17</sup> Yuni yunga rasi-witi apurolí apulu-pokomo ambolopale yunga rasi-witi mongo kinia rasi-witi kilu kinia apurumbando molemo. Yunga rasi-witi apurolí polomo sepa wamombando rasi-witi pali ‘wendo liembo.’ nimba apurupale mongoma lipa rasi-witi taltolemo mingina ‘Liepili.’ nimba taltombando mingi topa, pe kiluma lipa maku topa sepe naa kumbulupa nomba pepa mindi pulimúna kalomba.” nirimu.

<sup>18</sup> ‘Yombomane “Olio yombo molopo kinjilimulu yomboma. Olio ulu-pulu-kirima mundupu kelepo konopu topele tamili.” niengi.’ nimba Jonone yomboma ungu-mane awisili aku-sipa sipa, semane peangamo topa sirimu.

**3:19-20**

### *Erotene No Lindeli Jono Ka Sirimu Semanemo*

<sup>19</sup> Walte, pe mele, Jonone kolea Gallilli disiriki yombomanga ye nokoli kingi Erote iri torumula. Yu genunga ambo menu Erodiasi ‘mangopa liltimu, ulumu kinia ulu-pulu-kiri lupa awisili seriuma kinia nimba para sipa yu iri torumu. <sup>20</sup> Jonone yu iri torumumunga Erotene mumindili kolopale yu ka sipa ka-ulkana panjerimu. Yuni aku serimumu sepa kinjerimula.

**3:21-23**

### *Jonone Yesusi No Linderimu Semanemo*

<sup>21</sup> ‘Erotene Jono u ka naa sipili, yombo awisili Jono no lindipa molorumuna ongo no liltingi kinia Yesusi kepe ombe no liltimula. No lipale Pulu Yemo kinia ungu nimba gilierimu kinia mulúmu kengeya lepa anju yando purumu, <sup>22</sup> Pulu Yemonga Minimu, kera waembono mele, mania ombe Yesusi molorumuna pumba kangina ola molorumu. Mulúna ungu se wendo ombe nimbale: “Nu nanga konopu mondolio kangomo. Nu-kinia konopu sipu molio.” nirimu.

**3:23-38**

### *Yesusi Nokorumu Ye Joseponga Anda-Kolepalimanga Semanemo*

<sup>23</sup> Yesusi yu mana molopili kalia wane paono tene mele ombe purumu kinia yunga kongonomo pulu polopa serimu.

Yombomane Yesusindu ‘Josepo malo.’ ningu pilieringi.

Josepo yunga lapa Illai. <sup>24</sup> Illai lapa Matate.

Matate lapa LLipai. LLipai lapa Melkai.

Melkai lapa Janai. Janai lapa Josepo.

<sup>25</sup> Josepo lapa Matatayasi. Matatayasi lapa Emosi.

Emosi lapa Neame. Neame lapa Esillai.

Esillai lapa Nakai. <sup>26</sup> Nakai lapa Meate.

Meate lapa Matatayasi. Matatayasi lapa Semene.

Semene lapa Joseke. Joseke lapa Joda.

<sup>27</sup> Joda lapa Joanane. Joanane lapa Resa.

Resa lapa Serapapele. Serapapele lapa Sialtele.

Sialteple lapa Nerai. <sup>28</sup> Nerai lapa Melkai.  
 Melkai lapa Edai. Edai lapa Kosame.  
 Kosame lapa Ellemadame. Ellemadame lapa Ere.  
<sup>29</sup> Ere lapa Josua. Josua lapa Elliesa.  
 Elliesa lapa Jorimu. Jorimu lapa Matate.  
 Matate lapa LLipai. <sup>30</sup> LLipai lapa Simiono.  
 Simiono lapa Juda. Juda lapa Josepo.  
 Josepo lapa Jonamo. Jonamo lapa Ellayakimu.  
<sup>31</sup> Ellayakimu lapa Mellia. Mellia lapa Mana.  
 Mana lapa Matata. Matata lapa Netane.  
 Netane lapa ,Ye Nokoli Kingi, Depiti.

<sup>32</sup> Depiti lapa Jesi. Jesi lapa Opete.  
 Opete lapa Boasi. Boasi lapa Sallimono.  
 Sallimono lapa Nasono. <sup>33</sup> Nasono lapa Aminadape.  
 Aminadape lapa Ramo. Ramo lapa Esirono.  
 Esirono lapa Péresi. Péresi lapa Juda.  
<sup>34</sup> Juda lapa Jekopo. Jekopo lapa Aisake.  
 Aisake lapa Eporayamo. Eporayamo lapa Tira.  
 Tira lapa Neyo. <sup>35</sup> Neyo lapa Serake.  
 Serake lapa Reu. Reu lapa Pelleke.  
 Pelleke lapa Epe. Epe lapa Silla.  
<sup>36</sup> Silla lapa Kenane. Kenane lapa Apakisate.  
 Apakisate lapa Seme. Seme lapa Noa.  
 Noa lapa LLameke. <sup>37</sup> LLameke lapa Metusalla.  
 Metusalla lapa Inoko. Inoko lapa Jarete.  
 Jarete lapa Mallalle. Mallalle lapa Kenane.  
<sup>38</sup> Kenane lapa Inosi. Inosi lapa Sete.  
 Sete lapa Atame. Atame lapa Pulu Yemo.  
 Atame Pulu Yemonga malo.

## 4

4:1-13

*Kurumanga Nokoli Setenene Yesusi Kondi Torumu Semanemo*

<sup>1</sup> Yesusi ,no liltimu kinia, Mini Kake Sélimu yu-kinia ombo molopa yunga konopuna molopa paa sengepea sepili no Jodane mundupa kelepale nirimumuni, Mini Kake Sélimuni yu kolea ku lielina memba purumu. <sup>2</sup> Akuna Yesusi ,Mini Kake Sélimu kinia molopili, ,kurumanga nokoli, depelemone ombo yu kondi topa molopili oli se koro talo ombo purumu. Kanu walemanga kere-langi naa noli we molopa perimu kinia yu gelene kolopa molorumu.

<sup>3</sup> Kanu-kinia ,kurumanga nokoli, depelemone yu ,kondi topa, nimbale: “Nu Pulu Yemonga Malo liemu i kouma ‘Pellawa kaloli au liepili.’ ni.” nirimu.

<sup>4</sup> Aku-sipa na-kolo yuni pundu topa nimbale: “Pulu Yemonga bokumuni nimbale: “Kere-langimane mindi  
 yomboma konde mololi ulu-pulumu naa silimú.”

nimba molemo kanumu.” nirimu.

<sup>5</sup> Kanu-kinia depelemone Yesusi yu lipa memba pumba ,ma-pangi, paa olana senga anjipale nirimumuni, yu ma-koleama pali waltikele lipa ora sipa, <sup>6-7</sup> yundu nimbale: “I koleamanga pali tondolomo kinia méle peangama kinia Pulu Yemone nando “Nokou.” nimba koronga sirimu. Ima nane ‘Yombo se simbú.’ nindu liemu

manda simbú. Nu na popo toko nanga imbi ambolko paka tondonu liemu i tondolomo kinia méle peangama pali nu lieni simbú.” nirimu.

<sup>8</sup> Kanu-kinia Yesusini depelemundo nimbale: “Pulu Yemonga bokumuni nimbale: “Pulu Yemo ononga Ye-Awilimu manjiku

popo toko imbi ambolko paka tondoko,

yunga kongonomo manjiku sendeko molangi.”

nimba molemo kanumu.” nirimu.

<sup>9-11</sup> Kanu-kinia depelemo yuni Yesusi lipa kolea-awili Jerusalleme memba pumba, „Pulu Yemo popo toko kaloringi, ulka-tembelemonga memba, paa ola imuna memba pumba anjipale nirimumuni, yundu nimbale: “Nu Pulu Yemonga Malo liemu nu lipa tapondomba kene po ningua mania pu.” „nirimu., „Pulu Yemonga bokumuni nimbale: ‘Pulu Yemone yunga mulu-koleana angellomane

‘Nu ongo nokangi.’ nimbá.

Onone nu ‘Kou sene kepe naa topili.’ ningu  
nu ononga kimane okoko lingí.’

nimba molemo kanumu. Aku sipa nirimu kene pilkuli aku siku sei.” nirimu.

<sup>12</sup> Yesusini yundu pundu topa nimbale: “Pulu Yemonga yombomando ungu se pea nimba molemola. Akumu i-sipa:

‘Pulu Yemo ononga Ye-Awilimuni “Sembó.” nilimú mele  
‘Sika nilimúnje molo kolo tolemonje kanamili.’

ningu onone yu manda manjiku naa sangi.’

nimba molemola kanumu.” nirimu.

<sup>13</sup> Depelemone Yesusi kondi topa pora sipale nirimumuni, ‘Pe yu manda kelepo kondi tombo wale se nondopo pilipuli kelepo ombó.’ nimba yu mundupa kelepa purumu.

4:14—9:50

## **Yesusi Kolea Gallilli Disiriki Pumbale Mini Kake Sélimuni Tondolo Sirimu Tondolomone Pulu Polopa Andopa Kongono Serimu Semanemo**

4:14-15

*Yesusi Kolea Gallilli Disiriki Yunga Kongonomo Pulu Polopa Serimu Semanemo*

<sup>14</sup> Kanu-kinia Minimunga tondolomone Yesusi kelepa kolea Gallilli disirikindu yando memba orumu kinia akuna andopa serimu mele semanemo koleamanga pali anju anju purumu pilieringi. <sup>15</sup> Yuni Juda yomboma maku toko Pulu Yemonga ungumu pilieringi ulkamanga pumba ungu-mane sirimu kinia yombomane pali yu kape niringi.

4:16-30

*Yesusi Yunga Kolea Nasarete Purumu Kinia Yunga Pulu Lierimu Yombomane Yunga  
Ungumu Pilku Mokoli Seko Yu Bulu Sikuli Tonge Seringi Semanemo*

<sup>16</sup> Yesusi kolea Gallilli disiriki yomboma ungu-mane silipa andopale nirimumuni, yu Gallilli lierimu kolea Nasarete taono u molopa akorumuna kelepa orumu. Ombale „Juda yombomanga koro moloringi, wale Sambatemonga koleamanga pali ono maku toko Pulu Yemonga ungumu pilieringi ulkamanga yu alieli purumu mele Nasarete ungu pilieringi ulka akuna aku sipa purumu. „Maku toko moloringi kinia, yuni “Na bokumu kanopo niembo.” nimba ola gilierimu. <sup>17</sup> „Pulu Yemonga bokuma nokorumu yemone, Pulu Yemone ungu-umbu tondoromuma pilipa yomboma nimba sirimu ye Aisayane koronga-u torumu bokumu lipa sirimu kinia, Yesusini lipa sukundu ungu molorumu se kanopa nimbale: <sup>18</sup> “Aisayane i-sipa nimbale: „Ye-Awilimunga Minimu na-kinia molemomo

yuni nando nimbale:

"Yombo koropama semane peangamo toko siku,  
ka-ulkana pelemele yombomando

'Wendo ongo we molangi.' ningu,  
mongo kiri lieli yombomando

'Mongo peanga liepili kanangi.' ningu,  
mindili nongo molemele yomboma

'Mindili naa nongo, molko kondangi.' ningu,  
<sup>19</sup> 'Kiniá kalia-ingina Ye-Awilimuni yomboma kanopa  
kondo kolomba kalia-ingimu wendo okomo.'

ningu siliku andou." nimba

Minimuni aku sipa ye se nimba taltopale nirimu."

nimba Aisayane nirimu." nimba Yesusini aku sipa boku kambu topa nirimu.

<sup>20</sup> Ungu akumu kanopa nimba pora sipale bokumu kelepa pipi sipa bokuma nokorumu yemo sipa, "Ungu se niembo." nimba, Yesusi yu mania molorumu. Yomboma pali yu mindi neme-neme ningu kanoko moloringi. <sup>21</sup> Kanu-kinia yuni onondo nimbale: "Kiniá Pulu Yemonga bokuna ungumu kanopo nindu piliengi akuna Aisayane "Wendo ombá." nimba, u nirimu mele kiniá wendo okomo. "Kiniá na sembó okoro ulu akumanga u nirimu." nirimu.

<sup>22</sup> Moloringi yombomane "Yu ye peangamo. Yu paa selemo." ningu yu nirimu mele pilkuli "Paa nimba peanga sikimu." ninguli mini-wale mundoringi. "Aku-sipa na-kolo, onone ninguli: "I yemo, yu nawe konopu lekemoye?" Yu Josepo malo mindi, "olionga we-ye se mindi lémo." niringi.

<sup>23</sup> "Aku-na-kolo, Yesusini, yuyu molorumu mele nirimu kinia pilkuli yu konopu kiri panjeringi mele pilipale, onondo nimbale: "Ungu-iku tolemele manga se nando toko ningí seko molemelenje konopu leker. Onone nando i-siku ningí sekemelenje: "Nu sika doketa moleno liemu nu kuru tomba kinia nunga marasenemo nunu liku nani. Pe nu peanga lemba, kinia kanopole 'Nu sika doketa moleno lémo.' nimbu pilimulú." ninguaku ungu-ikumu na toko singí sekemelenje? Nando ninguli: "Nuni Kapaniame taono ulu-tondoloma serinu pilierimulu mele ya nunga pulu-kolea, 'Nasarete, akuna aku siku sani. Kanopole nu "molio." nikinu mele 'Sika nikinu lémo.' nimbu pilimulú." ningí sekemelenje?

<sup>24</sup> Nane onondo sika nimbu sikirumu: "Yombomane ulu-pulu se selemene mele i-sipa: Pulu Yemone ungu-umbu tondolemoma pilipa yomboma nimba silimú ye sene yunga pulu koleamonga yomboma ungu nimba silimú kinia pilkuli nilimilimuni, onone 'Yu olionga we-yere. Yu imbi mololi ye se mólo.' ningu yuni nilimú unguma naa pilku mokoli selemene. "Kolea lupa yombo marene ongo ungu ningu silimili kinia aku unguma mindi pilku limili. Yombomane aku siku selemene mele onone aku sikula selemene." nikiru. <sup>25</sup> 'Nane paa sika nimbu sikiru mele ono piliangi.' nimbu, 'semane talo tambo.'

"Illainja Pulu Yemone ungu-umbu tondorumuma pilipa, yunga pulu lierimu, Isirele yomboma nimba sipa molopili ulu se wendo orumumu niembo. Pulu Yemone "Lo naa opili." nirimu kinia kalia-ingi yopoko kelepa oli kise se-pakara lo naa ombo paa gele lierimu kinia Isirele koleana sukundu ambo-waya awisili, 'gelene kolko,' moloringi.

<sup>26</sup> Aku-sipa na-kolo Pulu Yemone "Isirele ambo-waya se liku tapondoko kere-langisi." nimba Illainja akuna naa lipa mundorumu. "Isirele ultukundu lierimu, koleawili Saidono nondopa lierimu kolea-kanga Sarepate ambo-waya se, 'Kere-lang'i pora naa nipili.' nimba Pulu Yemone kanu ultukundu ambomo, molorumuna Illainja lipa mundorumu kanumu.

<sup>27</sup> Illaisa kepe u Pulu Yemone ungu-umbu tondorumuma pilipa, yunga pulu lierimu Isirele yomboma, nimba sipa molopili Isirele koleana sukundu yombo awisili kuru laká norumu, aku-na-kolo ono pali selu kepe peanga naa lierimu, kuru laká nomba

we perimu. „Kolea Isirele ultukundu lierimu, kolea Siria ye Neman mindi kuru laká norumu kinia Illaisane yu „lipa tapondopa, sepa peanga sirimu. „Pulu Yemone Illainja kinia Illaisatolo lipa mundorumu-kulu ultukundu yombo talo aku siku liku tapondoringili nikiru mele paa sika nikiru piliaa.”“ nirimu.

<sup>28</sup> Aku sipa mele nirimu kinia pilku kiri pilkuli Pulu Yemonga ungumu pilieringi ulkana sukundu moloringi yomboma pali paa lakoko mumindili koloringi.

<sup>29</sup> Mumindili kolkole ola gilku yu kanu koleana ultu toko pulu siku munduku, kanu koleana nondopa kopó se lierimuna toko mania mundungí seringi. <sup>30</sup> Aku-sipa na-ko-lo yu ono maku toko gilieringina sumbi sipa pumba senga lupa pumbá purumu, yu manda naa amboloringi.

*4:31-37*

### *Kuru Se Ye Senga Konopuna Molorumumu Yesusini Topa Makororumu Semanemo*

<sup>31</sup> Kanu-kinia Yesusi yu kolea Gallilli disiriki lierimu taono se Kapeniamé akuna maniendo purumu. Akuna „koro moloringi, wale Sambatemo wendo orumu kinia Yesusi „Juda yomboma maku toko Pulu Yemonga ungumu pilieringi ulka kanuna sukundu pumba, ono ungu-mane sirimu. <sup>32</sup> Mane sirimu kinia yu namba lierimu yemane pipili naa kolko tondolo munduku mane siringi mele yuni aku sipa mane sirimu-kulu pilkuli yombomane mini-wale mundoringi.

<sup>33</sup> Kanu-kinia ulka kanuna sukundu ye se molorumu kanumu kuru se yunga konopuna sukundu molopa yu ambolorumu „kanu kurumuni yu “Ungu ni.” nimba ulku torumu-na, yemone ungu tondolo mundupa nimba nimbole: <sup>34</sup> Kolea Nasarete ye Yesusi, nu pea olio „kuruma,-kinia seluna kopu sepo manda naa molomolo. Nu olio-kinia nambi semu-na onuye? Nu olio toko kondoni onuye? Nane nunga imbi pilielio. Nu Pulu Yemonga Ye Kake Sélimu.”“ nirimu.

<sup>35</sup> „Aku sipa nirimu-kulu pilipale, Yesusini kanu kurumu iri topa yuntu nimbole: “Nu ungu naa ningu yemonga konopuna ongo wendo pu!”“ nirimu kinia kurumuni yemo topa mania mundupale ombo wendo purumu. Yemo yu unguri naa serimu, we manda molorumu.

<sup>36</sup> „Yesusini aku serimu kanokole, yomboma pungu-pungu ningu, mini-wale munduku, onone onono anju yando ninguli: “I ulumu nambolka uluri sekemonje? Ungu-maneconde se wendo ombámo. Ye namba lieli sene we-yombomando “Saa.” nilimú mele i yemone kurumando kepe aku sipa nilimú kinia kanu kuruma yunga ungumu pilku liku wendo pulimili.”“ nirungi. <sup>37</sup> Kanu-kinia yuni aku sipa serimu mele semanemo kanu koleamonga sukundu lierimu koleamanga pali anju anju purumu pilieringi.

*4:38-41*

### *Yesusini Pitanga Kolepa-Ambomo Kinia Yombo Awisili Kuru Torumuma Sepa Peanga Sirimu Semanetolo*

<sup>38</sup> Kanu-kinia kanu maku toko Pulu Yemonga ungumu pilieringi ulkamo Yesusi mundupa kelepa pumbale nimrumuni, Yesusi Saimono „Pita,nga ulkana sukundu purumu. Akuna Saimononga kolepa-ambomo kuru topa kangi nomba kondopili lierimu-na Yesusindu „Liku tapondou.”“ ningu mawa seringi. <sup>39</sup> Aku siku yu mawa seringi kinia ambomo lierimuna pumba gilipa nimbole: “Kangi manda nou.”“ nirimu kinia kangi nomba kelierimu. Ambomone sumbi sipa ola gilipa wendo ombale, oringi yema kere-langi sipa nokopa molorumu.

<sup>40</sup> Kanu walemonga ipupini, ena pumbá purumu kinia, kuru lupa-lupa torumu yomboma Yesusi molorumuna mengo oringi kinia kanu yomboma ono yu-mele-meles kini ambolopale ono pali sepa peanga sirimu.

<sup>41</sup> „Konopumanga kuru molorumu, yombo awisili „oringi..“ Kanu kuruma,ndo “Ongo wendo paa.”“ nirimu kinia, ongo wendo pungu ru ningu ninguli: “Nu Pulu

Yemonga Malo moleno." niringi. Kurumane yu aku siku imbi sikuli yu „Pulu Yemone nimba taltopa lipa mundorumu ye nokoli, Karasimu!" molorumu mele pilieringikulu yuni ono iri topa "Molio mele anju ningu naa siee." nimba ononga kerema pipi sirimu.

**4:42-44**

### *Yesusi Kolea Gallilli Disiriki Ungu Nimba Silipa Andorumu Semanemo*

<sup>42</sup> Orili-u Yesusi ola molopa penando pumba kolea ku lieli senga purumu kinia yombo awisili yu koroko yu molorumuna ongo yundu ninguli: "Olio-kinia pea kamu molamili. Senga naa pu." ningu mawa seringi. <sup>43</sup> Yuni onondo pundu topa nimbale: "Pea molamili mangali, kolea wemanga pea pumbu, Pulu Yemo ombo ye nokoli kingimu molomba semane peangamo topo silipu andombo. Akumunga na yando lipa mundorumu kanumu." nirimu.

<sup>44</sup> Aku nimbale yu pumba kolea Gallilli „disiriki, sukundu andopa, kolea lupa lupamanga pumba Juda yomboma maku toko Pulu Yemonga ungumu pilieringi ulkamanga pumba kanu semane peangamo topa silipa andorumu.

## 5

**5:1-11**

### *Yesusini Pulu Polopa Ye Mare "Na Lombili Waa." Nirimu Semanemo*

<sup>1</sup> Walte, Yesusi Geneserete Nomu, „akumundu 'Gallilli Nomu' niringila kanumu, „aku nomu kelona gilipa yomboma Pulu Yemonga ungumu nimba sirimu kinia pilingindu ono yu gilierimuna pungu maku toko nondoko nondoko pungu ekelepa seko molko pilieringi. <sup>2</sup> Kanu-kinia yuni nona andoli sipi talo nomu kelona lierimutolo kanopale, oma lili yema koronga nomu kelona wendo pungu ononga oma lili walema kulumiyé toko moloringi kanorumu. <sup>3</sup> Sipi se Saimono Pitanga, akuna sukundu pumbale yuni yundu mawa sepa nimbale: "Sipimu kanga-kolte paka toko nona sukundu mundou." nirimu. Paka topa nona sukundu mundorumu kinia aku sipimunga suku yu mania molopale nirimumuni, no kelona liku maku toko moloringi yomboma ungu-mane sirimu.

<sup>4</sup> Ono ungu-mane sipa pora sipale yuni Saimonondo nimbale: "Sipimu nomu awisuku-singina kunduku mengo pungu oma lili walema nona mania mundou." nirimu.

<sup>5</sup> Saimonone pundu topa nimbale: "Ye Nokolimu, kiniá ipulielí pali oma lili kongono tondolo mundupu sepo molopo tangondopole oma se paa naa límulu. Aku-na-kolo aku nikinu kene walemo nona mania mundambo." nirimu.

<sup>6</sup> Kanu-kinia walema nona mania mundoringi kinia oma awisili walemanga sukundu purungi-kulu walema sipina sukundu lingí seringi kinia sungu nimbá serimu. <sup>7</sup> Walema sungu nimbá serimu kanokole onone ononga oma lili kongono pea kopu seko seringi yema, sipi senga moloringima mangilkuli "Ongo liku tapondangi waa." niringi. Oringi kinia sipi talo pea peke siringi umbuna sepa nona mania pumbá serimu.

<sup>8</sup> Aku ulumu kanopale Saimono Pita Yesusinga kumbikerena ombo mania molopa tamalu pepa nimbale: "Ye-Awilimu, na ulu-pulu-kiri ambololi yemo „nu kake seli yemo.. „Seluna molkombolo manda naa sekemo, kene anju pungu nu lupa molou." nirimu. <sup>9</sup> Saimono kinia, yu-kinia pea moloringima kinia, onone oma awisili waltikele tangoli liltingi kanokole ono pungu-pungu ningu mini-wale mundoringikulu „Saimono yuni aku sipa nirimu.. <sup>10</sup> Seperinga malo Jemisi kinia Jonotolo olo Saimono Pita kinia kongono seluna kopu seko seringili yetolo, olo pea mini-wale mundoringilia.

Kanu-kinia Saimonone nirimumu pilipale Yesusini yundu nimbale: "Nu pipili naa koloyo. Kiniá oma linindu oma lili wale liku nona mania mundulinu kinia omama

walena omba pelemo mele, pe nanga kongonomo sendenindu nanga ungumu pilku ningu siliku andoni kinia yomboma nanga talapena sukundu ongo molonge." nirimu. **11** Kanu-kinia ononga sipitolo nomu kelona mengo ultu ongole, sipitolo mélema pali liepili munduku kelko Yesusi lombili puringi.

**5:12-16**

*Yesusini Kuru-Laká Norumu Ye Se Sepa Peanga Sirimu Semanemo*

**12** „Kolea Gallilli disiriki sukundu lierimu, koleamanga senga Yesusi molorumu kinia ye se kuru-laká awili sepa nomba perimumu omba Yesusi kanopale mania molopa tamalu pepa yu mawa sepa nimbale: "Ye-Awilimu, nunga konopumuni na 'Peanga liepili.' konopu lienu liemu nuni na manda seko peanga sini." nirimu kinia **13** Yesusini yemo kimuni ambolopa yundu nimbale: " 'Nu peanga liepili molani.' konopu lekero kene peanga liepili." nirimu kinia popenge sepa kuru-lakámo nomba kelepa kangimu peanga lierimu.

**14** Kanu-kinia Yesusini yu ungu se tondolo mundupa nimbale: "Nuni ya ulu sekeromo yombo selurindu kepe paa naa ni! Sumbi siku pungu Pulu Yemo popo tondoli yemo nunga kangimu liku ora siku, 'Na kelepo kangi peanga liepili moloko kene.' ningu Mosisini "Sei." nimba ungu-mané sirimumu pilku liku senindu "Pulu Yemo popo toko kalko si." nirimu mélema liku Pulu Yemo popo tondoli yemondo "Kalondou." ningu yu sieni. Pe yombomane nu kanokole 'Yu sika kangi peanga liepili molemo.' ningu piliangi kene nikiru mele iseli-u se-pu." nirimu.

**15** Aku-na-kolo yuni serimu mele anju anju yombo awisilini pilkuli niringimuni, yu molorumuna sukundu-sukundu ongo yu semane peanga topa nirimumu pilingindu ongo, kuru torumu yomboma yuni 'Ono sepa peanga sipili.' ningu oringi kanopale **16** yu ono oringina mundupa kelepa kolea ku lieli senga pumba Pulu Yemo kinia ungu nirimu.

**5:17-26**

*Yesusini Kimbu-Ki Kolopa Pora Sirimu Ye Senga Ulu-Pulu-Kirima Mundupa Kelen-depa, Yu Sepa Peanga Sirimu Semanemo*

**17** Walte Yesusi yuni yomboma ungu-mané sipa molorumu. Kuru toli yomboma sepa peanga sili tondolomo yu-kinia pepili molorumu. Pulu Yemone kanu tondolomo yu sirimu. Parisi yema kinia, Pulu Yemonga ungu-manemanga puluma pilku mane siringi yema kinia, yu ungu-mané sirimuma pilku moloringila. Kanu yema, kolea Gallilli disiriki sukundu lierimu koleamanga moloringima kinia, kolea Judia disiriki sukundu lierimu koleamanga moloringima kinia, kolea-awili Jerusalleme moloringima kinia, Yesusi molorumuna ongo maku toko yu ungu-mané sirimuma pilku moloringi.

**18-19** Yu molorumuna ye marene kimbu-ki kolopa pora sirimu ye se taropola seko mengo onge oringi-na-kolo yombo awisili ulka kerepuluna ekelepa seko gilieringi-kulu ulkana sukundu Yesusi molorumuna nondoko mengo pungí aulka se naa kanokole niringimuni, ulka imuna mengo ola punguli Yesusi molorumuna 'kanakanaka ulkamo sikisikuli, yemo taropola pali moko toko mania mundoringi. **20** 'Yesusini i yemo manda sepa peanga simba.' ningu kuru mondokole yu mengo oringi kanopa pilipale Yesusini kanu yemondo nimbale: "Kangomo, nunga konopuna ulu-pulu-kiri serinu pelemoma mania pupili, we siye kolkoro." nirimu.

**21** Parisi yema kinia, Pulu Yemonga ungu-manemanga puluma pilku mane siringi yema kinia, Yesusini aku nirimu pilkuli 'pilku kiri pilku, konopu kimbú sikuli, "I ye Pulu Yemo marake sekemo yemo nawe? Yombomane ulu-pulu-kiri selemelema nawene 'Mania pupili, we siye kolkoro.' manda nimbáye? Pulu Yemone mindi manda selemo." ningu onono ningu pilku molko konopu kimbu siringi.

<sup>22</sup> Kanu-kinia Yesusini ono aku siku konopu kimbú siku moloringi mele pilipale onondo nimbale: "Onone ,nane nikirumunga, aku siku nambi semu-na konopu kimbú sikimiliye? <sup>23</sup> I yemondo "Nunga ulu-pulu-kirima mania pupili, we siye kolkoro." nimbú kinia ono ulu se naa kanokole 'Pe nilse nikimu.' konopu lengeye? Molo "Ola gilku nunga kunungumu liku mengo kimbu-kongono seko andou." nimbú kinia yu ola gilimbane naa gilimbanje mona lemba manda kanokole 'Aku sipa kála sepa nikimunje?' konopu lengeye? <sup>24</sup> Aku-sipa na-kolo ' 'Mania Ombo Mana-Ye Au Lierimu Yemo tondolo pelemomone ya ma-koleana yombomanga ulu-pulu-kirima "Mania pupili, siye kolkoro." manda nimbá.' ningu piliangi.' nimbu ,aku sipu nindu.' nirimu.

Aku nimbale kimbu ki kolopa pora sili yemondo nimbale: "Nane 'Nu ola gilku nunga kunungumu liku mengo ulkando pu.' nikiru." nirimu. <sup>25</sup> Aku nirimu kinia ono kanoko molangi yemo sumbi sipa ola gilipa yunga kunungumu lipa memba omba pena pumbale Pulu Yemo kape nilipa ulkando purumu. <sup>26</sup> ,Yu aku serimu kanokole, ono pungu-pungu ningu mini-wale munduku Pulu Yemo paa pipili kolko yunga imbi ambolko paka tondoko yu kape ningu ninguli: "Olio i ulu wendo okomo kanokomolomo ulu paa se lupa lepomo." niringi.

5:27-32

### *Jesusini Ye Mateyu LLipaindu "Na Lombili Ou." Nirimu Semanemo*

<sup>27</sup> Kanu-kinia Yesusi ,ulkamo mundupa kelepa, pena pumbale nirimumuni, kou-takisi liitimu ye se, yunga imbi LLipai, kou-takisi lipa molorumu kanopale yundu "Na-kinia pea pambili lombili ou." nirimu. <sup>28</sup> Kanu-kinia LLipai yu ola gilipa kou-takisi mélema we liepili mundupa kelepa yu lombili purumu.

<sup>29</sup> Pe LLipaini yunga ulkana Yesusinga kere-langì awisili kalondorumu. Akuna kou-takisi lili ye awisili kinia, we-ye mare kinia, ono Yesusi LLipaitolo kinia pea mania molko kanu kere-langima noringi. <sup>30</sup> Aku serigi kanokole Parisi yema kinia, Pulu Yemonga ungu-manemanga puluma pilku mane siringi yema kinia, onone Yesusi yu lombili andolimando ninguli: "Ono kou-takisi lili yema kinia ulu-pulu-kirima seli wema kinia ono pea nambi semu-na kere-langì nokomeleye?" niringi.

<sup>31</sup> Aku siku niringi pilipale Yesusini onondo nimbale: "Kuru naa tolemo yomboma doketana naa pulimili. Kuru tolemo yomboma mindi doketana pulimili kanumu.

<sup>32</sup> Nane 'Yombo sumbi nilima na molombona wangì.' nimbündu ma-koleana naa orundu. Ulu-pulu-kiri seli yomboma ,lipu tapondopo, onondo 'Ono ulu-pulu-kiri selemelema kanoko kiri pilku konopu topéle toko ,na molombona wangì.' nimbündu orundu." nirimu.

5:33-39

### *Yombomane Walte Walte Kere-Langi Naa Nongo Mi Lemele Ulumunga Ungu Se*

<sup>33</sup> ,Kanu-kinia, onone Yesusindu mangilku pilku ninguli: ",No Lindeli, Jono lombili andolima kinia, Parisi yema lombili andolima kinia, onone wale marenga kere-langì mi leko naa nongo Pulu Yemo kinia mawa selemele-na-kolo nu lombili andolimane aku siku naa selemele, kere-langì kinia no kinia we nolemele. ,Pe nu lombili andolimane selemele mele peangaye,?" niringi.

<sup>34</sup> Aku siku niringi pilipale Yesusini pundu topa onondo ,ungu-iku se topa yu toko kondonge kolombamonga ungu se nimba, nimbale: "Ambo limba ye se yunga pulu lemó yema kinia molemo kinia ono konopu sikuli "Kere-langì mi lepo naa namili." manda ningíye? Manda naa ningí. <sup>35</sup> Pe mindi, ambo limba yemo ono molongena ongo wendo lingí kinia kanu walemanga sika ,konopu kiri panjiku, kere-langì naa nongendo mi lenge. ,Iseli-u mólo.," nirimu.

<sup>36</sup> Yesusini aku nimbale nirimumuni, ‘U Juda yombomane ulu seringi uluma kinia pe ulu konde wendo okomomo kinia seluna manda naa pengele mele paa piliangi.’ nimba, ungu-iku talo topa nimbale:

“Mulu-maminia u se sungu nilimú kinia olione mulu-maminia paa konde senga se kopisipu lipu, sungu nilimúmunga naa topo tandolemolo kanumu. Yombo sene aku sipa topa tandoikanje kanu mulu-maminiamo nona panjilka kinia mulu-maminia konde kopiselimu kanga lepa lli nimbale mulu-maminia umu kelepa kamu awili sepa sungu nilka. Ulu se i-sipala: Mulu-maminia umu kinia mulú kopiseli kondemo selusili mólo, akumunga akutolo selu-sipa mólo.

<sup>37</sup> Kongi meme kangimuni seli mingi u senga no-waene konde naa kololemolo kanumu. Yombo sene mingi u senga no-waene konde se kolkanje kanu no-waenemo mingina sukundu pepale pe akolka kinia kanu mingi umu naa akopa sungu nilka. Kanu-kinia nomo kepe mingimu kepe kamu kiri lelka. <sup>38</sup> Akumunga no-waene konde kongi meme kangimuni seli mingi kondena mindi kololemolo kanumu.

<sup>39</sup> Ye sene no-waene u se nombale kanu waene umu nomba peanga pilipale no-waene konde nonowalene naa kololemo.” nirimu.

## 6

6:1-11

*Wale Sambatemonga Ungu Talo*

Se: 6:1-5

*Yesusi Yu Sambate Walemo Nokolemomonga Semane Se*

<sup>1</sup> Walte, ‘koro moloringi, wale Sambate senga, Yesusi kinia yu lombili andolima kinia rasi-witi kaliasanga ongo puringi kinia yu lombili andoli yemane rasi-witi mongo mare nongendo inia toko liku kilu toringi. <sup>2</sup> Aku seringi kanokole Parisi yemane Yesusi yandu ninguli: “Kána! ‘Koro molemolo, wale Sambatemonga ‘Kongono naa sangi.’ nimba pelemo ungu-manemo nambi semu-na nunga lombili andoli yemane ungu-manemo pulua tokole aku siku sekemeleye?” nirungi.

<sup>3</sup> Yesusini pundu topa nimbale: “Ono Pulu Yemonga bokuna sukundu ‘anda-kolepa ye nokoli kingi, Depitini serimu mele nimba molemo semanemo kanokole semanemonga pulumu naa pilielemeye? Depiti kinia yu pea puringi yema kinia ono gelene kolkole niringimuni, <sup>4</sup> Depiti Pulu Yemo molorumu serele-ulvana sukundu pumba, Pulu Yemonga kumbikerena lierimu pellawa kalolima lipa nomba, yu pea puringi yema sirimu noringila kanumu. Kanu pellawa kalolimando Pulu Yemone ungu-mane sipa nimbale:

“We-yombomane paa naa nangi.

Pulu Yemo popo tondoli yema manjiku nangi.”  
nirimu ‘kanu ungu-manemo pulua torumu, kanumu. ‘Ono konopu talo nambi semu-na lemeleye? Depiti yuni u aku serimu mele ono pilku kiri naa pilielememonga pe kiniá na lombili andoli yemane sekemele mele kanoko kiri naala piliaa..’ nirimu.

<sup>5</sup> Mania Omba Mana-Ye Au Lierimu Yemone Sambate walema nokolemoma-na ‘Sambate wale kinia yomboma molko kondongendo senge mele manda nimbá kanumu..’ nirimu.

Se: 6:6-11

*Sambate Wale Kinia Yesusini Ki Kiri Lierimu Ye Se Sepa Peanga Sirimu Semanemo (6:1-11 pali)*

<sup>6</sup> Pe walte, koro mololi wale Sambate senga, Yesusi omba Juda yomboma maku toko Pulu Yemonga ungumu pilieringi ulvana sukundu pumbale ungu-mane sirimu. Kanu ulvana ye se molorumu, yunga ki-lomekondo kamu kolopa kukorumu. <sup>7</sup> Kanu-kinia akuna moloringi Parisi yema kinia, Pulu Yemonga ungu-manemanga puluma

pilku mane siringi yema kinia, onone 'Yesusini ulu se sepa kinjimba kinia yu kote sendemolo.' ningu ulu se sepa kinjimba se 'alieli koroko molkole,' 'Koro molemolo, wale Sambate kinia yuni yemo sepa peanga simbanje.' ningu yu mimi siku kanoko moloringi. <sup>8</sup> Ono konopuni pilieringi mele pilipale Yesusini kanu ki kolopa kukorumu yemondo nimbale: "Yomboma molemelena ongo ola giliani." nirimu kinia yemo yu akuna ombo ola gilierimu.

<sup>9</sup> Kanu-kinia yemando nimbale: "Ono i-sipu mangilipu pilkiru. 'Sambate wale kinia ulu nambolka ulu se manda semoloye? 'Sambate walemonga ungu-manemone "Sangi." nilimú mele samili.' nimbu yomboma lipu tapondomolo kinia peanga molo yomboma sepo kinjimulú kinia mandaye? 'Naa kolangi. Konde pang.' nimbu semolomo manda molo topo kondomolomo mandaye?' nimbu mangilkiru." nirimu. <sup>10</sup> Aku sipa ono nimba mangilipale yuni ono pali neme-neme nimba kanopale ki kukoli yemondo nimbale: "Nunga kimu siniu si." nirimu kinia yemone yunga kimu siniu sirimu kinia ki kolopa kukorumumu kelepa kamu peanga lierimu.

<sup>11</sup> Aku serimu kanokole mumindili awili seko kolko onone onono anju yando angelema ningu ninguli: "Sepa kinjikimumunga yu nambi samiliye?" ningu moloringi.

6:12-16

#### *Yesusini Lipa Mundumba Yema Nimba Taltorumu Semanemo*

<sup>12</sup> Pe walte ipulieli Yesusi yu Pulu Yemo kinia ungu nimbando ma-pangi senga ola pumba Pulu Yemo kinia ungu nimba molopili kolea tangorumu.

<sup>13</sup> Orili-u yu lombili andolimando "Waa." nimbale 'Ononga ye engaki rurepo nanga kongonomo sangi lipu mundambo.' nimbale aku yema nimba taltopa onondo nimbale: "Ono 'Nanga kongonomo sende-pangi.' nimbu lipu mundukuru yema." nirimu.

<sup>14</sup> Kanu ye engaki rurepo nimba taltorumumanga imbima i-sipa: 'Saimono (yunga imbi se Pita) yu keme, Pita genu Enderu keme, Jemisi, Jono, Pillipu, Batollomiu keme, <sup>15</sup> Mateyu, Tomasi keme, Allapiasinga malo Jemisi keme, "Olio Juda yomboma oliolio gapomano molamili." niringi talape ye Saimono keme, <sup>16</sup> Jemisi malo Judasi keme, Judasi Isikeriote, Yesusi pe lipa opa-touma sirimu yemo keme, 'aku yema 'nanga kongonomo sende-pangi lipu mundukuru.' nimba, nimba taltorumu yema.'

6:17—7:1

#### *Yesusini Yu Lombili Andoringi Yomboma Mane Sirimu Unguma*

6:17-19

#### *Yesusini Yombo Awisili Kuru Torumuma Sepa Peanga Sirimu Semanemo*

<sup>17</sup> Kanu-kinia yu kinia, yuni "Nanga kongonomo sende-pangi." nimba lipa mundorumu yema kinia, ma-pangina mania oringi kinia yu lombili andoringi yombo awisili kinia, kolea Judia disiriki moloringi yombo awisili kinia, kolea-awili Jerusalleme peringi yombo awisili kinia, nomu-kusa kelona lierimu kolea-awili Taya kinia Saidonotolonga peringi yombo awisili kinia, yu molorumuna sukundu-sukundu ongo liku maku toringi. <sup>18</sup> Yu semane peanga topa, ungu-mane sipa serimu pilingindu ongo, yuni ono kuru torumuma 'Sepa peanga sipili.' ningu oringi. Ononga yombo mare konopumanga kuru kiri molorumuna sepa peanga sirimula. <sup>19</sup> Kuru toli yomboma sepa peanga sili tondolomo yu-kinia pepili molorumu-kulu ono oringima pali 'Yu ambolamili.' ningu yu molorumuna nondoko nondoko oringi. Kanu-kinia ongo yu amboloringi kinia kanu tondolomone ono pea pali sepa peanga sirimu.

6:20-26

#### *Olio Konopu Sipu Molomolo Ungu-Pulumu Kinia Molopo Kinjimulú Ungu-Pulumu Kinia Yesusini Nimba Sirimu Semanemo*

<sup>20</sup> Kanu-kinia Yesusi mania molopa yu lombili andoringima olando sipa kanopa onondo nimbole:

“Ono koropa pulimúma

Pulu Yemo ononga ye nokoli kingimu molopa  
ono nokolemomonga

ono “Konopu peanga pepili molko kondangi.”  
nilimú aulkana molemele.

<sup>21</sup> “Ono kiniá gele selemoma

ono pe walte olo sembamonga

ono “Konopu peanga pepili molko kondangi.”  
nilimú aulkana molemele.

“Ono kiniá kola selemelema

ono pe walte tawe sengemonga

ono “Konopu peanga pepili molko kondangi.”  
nilimú aulkana molemele.

<sup>22</sup> “Mania Ombo Mana-Ye Au Lierimu Yemo  
pilku molemele yomboma,

ono nanga yomboma molemelemonga

we-yombomane ono-kinia konopu kiri panjiku,  
“Olio molemolona anju paa.” ningu,

onondo “Ono yombo kirima.” ningu,

ningu kinjiku, ononga imbima

pilku kiri pilku senge kinia

ono “Konopu peanga pepili molko kondangi.”  
nilimú aulkana molemele.

<sup>23</sup> “Yombomane ono aku siku mele selemelemonga, ono mulu-koleana pungí kinia kanuna ‚Pulu Yemone, ono méle kalopa kondomba kene ‚kanu yombomane ono aku siku seko kinjingí, kinia konopu awili seko siku, konopu paa peanga pepili molangi. Yombomane kiniá ono mindili silimili mele, aku siku ono naa molangi koro-u Pulu Yemone ungu-umbu tondorumuma pilku yomboma ningu siliku andoringi yomboma we-yombomane ono kepe mindili siringila kanumu.

<sup>24</sup> Aku-sipa na-kolo ono méle awisili taltolemele yomboma,

iseli-u kiniá ono molko kondoko

konopu peanga pepili molemele

mélema koronga taltolemele,

pe aku siku naa molongemonga

mindili nongo molko kinjingí.

<sup>25</sup> Ono kiniá olo selemo yomboma

pe walte gelene kolongemonga

mindili nongo molko kinjingí.

Ono kiniá tawe selemele yomboma

pe walte ono kola sengemonga

mindili nongo molko kinjingí.

<sup>26</sup> We-yombomane pali ono kape ningu

alieli onondo “Yombo peangama.” ningí kinia

ono mindili nongo molko kinjingí.

Kanu yombomane onondo

ungu peangama ningu kape ningí mele

u ono naa molangi koro-u

Pulu Yemone ungu-umbu tondorumuma naa pilku

we kolo toko yombo ningu siringi yombomando

i yombomanga anda-kolepalimane

ungu peangama aku siku niringila.

„Pulu Yemonga unguma sumbi siku niringi yombomando kape naa ningu mindili siringi kanumu.“ „nirimu.“

6:27-36

### *Yesusini “Opa-Tou Yomboma Konopu Mondaa.” Nirimu Ungu Se*

<sup>27</sup> „Aku nimbale Yesusini we moloringi yombomando nimbale:“ „Akumu na lombili andolimando nikiru,-na-kolo nane ungu nikiruma pilku molemele yomboma, onondo ungu se pea niembo piliangila. Onone ononga opa-touma konopu mondoko, ono-kinia konopu kiri panjilimili yomboma seko kondoko sangi. <sup>28</sup> Onondo ‘Yombo kirima kene molko kinjangi!’ nilimili yombomando ‘Ono yombo peangama kene molko kondangi.’ niengi. Ono seko kinjilimili yomboma ‘Pulu Yemone lipa tapondopili.’ ningu onone ononga mawa sendangi.

<sup>29</sup> “Yombo sene nunga kumbikere ekendonga laruwa tomba kinia topele toko ‘Ekendonga kamu laruwa topili.’ nieni. ‘Nunga wale-pakoli sulu peangamo liembo.’ nimbá yombomo nunga wale-pakolimu kepe ‘pea we lipili.’ nieni. <sup>30</sup> Mélema si.” ningu mawa senge yomboma pali mélema we sieni. Nunga mélema we limba yombomondo “Kelko nanu si.” ni naa nieni.

<sup>31</sup> “‘Yombomane nu-kinia sangi.’ konopu leno mele, nuni anju yomboma aku siku sani.

<sup>32</sup> Ulu-pulu-kiri selememele yomboma kepe onono anju yando kondo kololemele pilkuli ono yando kondo kololemele yomboma mindi kondo kolonge manda mólo. Ono kanoko kiri pilielemene yomboma pea kondo kolangi. <sup>33</sup> Ulu-pulu-kiri selememele yomboma kepe onono anju yando kondo kolko seko kondolemele pilkuli ono yando kondo kolko seko kondolemele yomboma mindi seko kondonge manda mólo. Ono seko kinjilimili yomboma pea seko kondangi. <sup>34</sup> Ulu-pulu-kiri selememele yomboma kepe onono anju yando pundu anjiku, ‘Walte kelepo sukundu limbu’ ningu pundu anjilimili pilkuli, ono yando pundu tolemele yomboma mindi pundu anjingí manda mólo. Ono pundu naa tolemele yomboma pea pundu anjangi.

<sup>35</sup> “Ulu-pulu-kiri selememele yomboma onono anju yando selememele mele ono ulu se olandopa sangila..” Onone ononga opa-touma kepe kondo kolko, seko kondoko, pundu anjiku, sangi. ‘Onone pe walte kelko aku siku yando sangi.’ ni naa ningu, we sangi. Aku siku senge kinia Pulu Yemonga bolangoma molkole, yuni ono méle awisili kalomba lingí. Pulu Yemo yuni mana-yomboma-kinia aku sipa sepa molemola. Yu seko kinjilimili yomboma kinia, yundu ‘Ange.’ naa ningu we molemele yomboma kinia kanuma sepa kondolemo. <sup>36</sup> Ononga Lapa Pulu Yemo seko kinjilimili yomboma kepe yu aku sipa kondo kolopa we sepa kondolemo mele ono seko kinjingí yomboma aku siku kondo kolko seko kondangi.” „nirimu..“

6:37-42

### *Olio Anju Yando Apurupu Selemolo Mele Ungu Se*

<sup>37</sup> Onone yomboma selememele uluma naa apurungí kinia „Pulu Yemone, ono ulu selememele naa apurumbala. Onone anju yombomane selememele mele apuruku kanokole “Seko kinjikimili. Sekemele mele „Pulu Yemone, kanopa kiri piliepili.” naa ningí kinia „Pulu Yemone, onone selememele mele apurupa kanopale “Seko kinjikinu. Sekeno mele kanopo kiri pilkiru.” naa nimbála. Yombomane ono-kinia seko kinjingí uluma ‘Mania pupili.’ ningu siye kolonge kinia „Pulu Yemone, ononga ulu-pulu-kinima ‘Mania pupili.’ nimba siye kolombala. <sup>38</sup> Onone yomboma pe-pe kepe ‘Pundu naa tangi.’ ningu mélema we singí kinia yuni onoaku sipa we simbala. Mélema simbando koltalo naa simba; olandopa olandopa simba. Onone anju singí kanopale ono yandoaku sipa simbala.” nirimu.

<sup>39</sup> Yesusini onondo ungu-iku se topa sirimula. Akumu i-sipa:

"Mongo kiri lieli ye sene mongo kiri lieli ye se aulka manda lipa ora simbaye? Peatolo kombuna manda naa tolkaye? <sup>40</sup> Ungu-mane pilku mololi yomboma ononga ungu-mane sili yombomo toko mania naa mundulimili. U ungu-mane pilku pungu pora silimili kinia pe mindi ononga ungu-mane sili yombomo pea selu-siku mele molemele.

<sup>41</sup> Nuni genanga mongona norupulu se lemó kanoleno-na-kolo nunga mongona unju-kaliu awili se lemómo naa kanoleno akumu nambi semu-na selenoye? <sup>42</sup> Nunga mongona unju-kaliu awili lemómo naa kanokole genando "Ano, nunga mongona norupulu se lemómo wendo lindambo." nambi seko nilinuye? Topele-mapele toli yombomo, nuni nunga mongona lemó unju-kaliu awilimu u wendo likuli pe kanoko kondoko genanga mongona lemó norupulumu manda wendo lindení." ,nirimu.,

*6:43-45*

#### *Unju Mongo Tolemomanga Ungu-Ikumu*

<sup>43</sup> „Kanu-kinia Yesusini ungu se pea nimba le ungumala pokore topa nimba le: „Unju peangamone mongo kiri se manda naa tomba; unju kirimuni mongo peanga se manda naa tombala. <sup>44</sup> Unju mongo se kanokole kanu mongo torumu unjumu imbi manda silimili. ‘Amu nambo.’ ningu, takeme manda olko toko naa nolemolá. Molo ‘Ipono se nambo.’ ningu, silipu manda mengo naa nolemolá. Amu lupala takeme lupala kanoko, ipono lupala silipu lupala kanolemele kanumu. <sup>45</sup> Aku sipa mele, yombo peanga sene yunga konopuna ulu peanga pelemoma selemo, aku-na-kolo yombo kiri sene yunga konopuna ulu kiri pelemoma selemo. Yombo se yunga konopuna pelemo unguma mindi kerena nilimú.” ,nirimu.,

*6:46-49*

#### *Ulka Takolemele Mele Ungu-Ikumu*

<sup>46</sup> Nane niliu unguma pilku liku naa sekole onone nando “Ye-Awilimu” we nambi semu-na nilimiliye?” ,nimba le pe yuni ungu-iku se pea onondo topa nimba le:

<sup>47</sup> I nanga unguma pilku liku senge yomboma ono ye se molemo mele niembo: <sup>48</sup> Ye se yuni yunga ulkamo ‘Ingi nimba giliepili.’ nimba we ma kinia okiya kinia akupa eltopale, akuna mania kou-polona ola takorumu. Ulkamo aku sipa takopa kondorumu-kulu pe no topa ulkamo paa topa kalambili simba serimu kinia topa sikise naa sikisipa ingi nimba we gilierimu.

<sup>49</sup> Aku-sipa na-kolo i nanga unguma pilku liku naa senge yomboma ono ye se molemo mele niembo: Ye se yunga ulka we ma pange selina ola walu takorumu. Pe no topa ulka kanumu waltikele topa kalambili sirimu.” nirimu.

## 7

*7:1-10*

#### *Isirele Yombomanga Ultu Mololi Ami Ye Nokoli Senga Kendemande-<sub>1</sub> Ye Kuru Torumumu Yesusini Sepa Peanga Sirimu Semanemo*

<sup>1</sup> Yomboma piliangi kanu unguma nimba pora sipale Yesusi Kapeniamae taonona sukundu purumu. <sup>2</sup> Akuna Romo-yombomanga ami-ye wane anderete nokorumu ye senga kendemande-<sub>1</sub>,ye, se yu paa konopu mondorumumu kuru awili sepa topale yu kolomba sepa lierimu. <sup>3</sup> Kanu ami ye nokolimuni Yesusi orumu pilipale yuni Juda tapu-ye mare lipa Yesusi molorumuna mundupa nimba le: “Nanga kendemande-<sub>1</sub>,ye,mo ,kuru awili sepa tomu kene, ongo seko konde li.” nirimu. <sup>4-5</sup> Kanu Juda tapuyemane Yesusi molorumuna ongoaku siku ningu, yunga ningu tondolo munduku mawa sendeko ninguli: “I kendemande-<sub>1</sub>,ye, kolkomomonga ami ye nokolimyu ye paa peanga. ,Yu Juda ye se mólo, na-kolo olio Juda yomboma konopu mondopa, olio maku topo Pulu Yemonga ungumu pililemolo ulkamo yuni takondorumu kene nuni yu liku tapondonu liemu papu.” niringi.

<sup>6</sup> Aku niringi pilipale Yesusi ono kinia kanu yemonga ulkana pumbá purumu. Kanu ulkamonga nondopa orumu kinia kanu ami-ye nokolimuni yunga pulu lierimu yombo mare Yesusi orumuna lipa mundorumu, ongo yundu ninguli: "Ami ye nokolimuni i-sipa nikimu: "Ye-Awilimu, na ye kirimu mele molio, nu nanga ulkana oni kinia manda naa sembá kene nu kála seko ya naa wani. <sup>7-8</sup> Nu molenona na ye kirimu manda naa ombóla konopu liendu. Na ye sene kepe nokopa molemo, yunga ungumu pilipu lipu selio. Nane kepe ami-ye mare nokopo molio. Kanu yemanga sendo "Pu." niliu kinia yu pulimú. Molo sendo "Ou." niliu kinia yu olemo. Molo nanga kongono sendeli kendemande-yombo sendo "I-siku sei." niliu kinia yu aku sipa selemo kanumu. Aku sipala, nuni ungu se we nini kinia nanga kendemande-ye,mo we konde pumbá kene nuni we ungumuni mindi ni." niringi.

<sup>9</sup> Yesusini Romo ami ye nokolimuni nimba mundorumu mele pilipale yu konopu awisili kimbu sipa yu lombili oringi yombomando nimbale: "Nane onondo paa sika nimbu sikiru: "I Isirele yombomanga talapena ultu mololi yemone na ungumuni mindi manda sembá mele kuru mondolemo mele koleamanga pali, Isirele koleana sukundu kepe, yombo selurini kepe aku siku kuru mondoringi mele paa naa kanorundu. Yu 'Sika.' nimba kuru mondolemo mele paa olandopa." nikiru." nirimu.

<sup>10</sup> Aku nirimu pilkuli ami ye nokolimuni Yesusi molorumuna mundorumu yema kanu ami-yemonga ulkana yando ongole kendemande-ye,mo konde purumu kanoringi.

7:11-17

*Kolea Néne Ye Se Kolorumumu Yesusini "Kelko Ola Molou." Nimba Topa Makisinderimu Semanemo*

<sup>11</sup> Yesusi kolea Néne taonondo purumu, yu lombili andolima kinia yombo mare awisili kinia pea puringi. <sup>12</sup> Yu Néne taono pala kerepuluna nondopa purumu kinia ye se kolorumumu óno sengendo taropola seko mengo ultu pungí oringi. Kanu kolorumu yemo yunga anumu lapatolone yu komolayemo meringili kinia pe se lupa naa meangili lapa kolorumu. Pe yunga anumu ambo-wayamo molopili yu kolorumula. Kango kanumu óno sengendo yombo awisili anumu kinia kopu seko puringi.

<sup>13</sup> Ye-Awilimuni ambomo kanopale paa kondo kolopa yundu "Kola naa sei." nirimu. <sup>14</sup> Kanu-kinia yu yombo taropolamonga nondopa ombo taropolamo ombo ambolopale, meringi yema we mengo giliangi yuni nimbale: "Kango-yemo, ola molou." nirimu. <sup>15</sup> Kanu-kinia kolorumu yemo ola molopa yu ungu nirimu. Kanu-kinia Yesusini ye kolorumumu lipa yemo yunga anumu yuyu sirimu.

<sup>16</sup> Yesusini aku serimu-na yombomane pipili kolko ninguli: "Pulu Yemonga ungu-umbu tondolima pilipa yomboma nimba sili ye awili se olia molemolona wendo omu lepomo." ningu Pulu Yemo yunga imbimu ambolko paka tondoko ninguli: "Pulu Yemo yunga yomboma molemelena ombo lipa tapondomu." niringi. <sup>17</sup> I Yesusini serimumunga semanemo kolea Judia disiriki pali kinia Judia ultu kolea lupa lupama pali anju anju purumu pilieringi.

7:18-35

*No Lindeli Jonone 'Yesusi Yu Nawenje Piliambo.' Nimba Jono Yu Lombili Andoli Ye Mare Yesusi Molorumuna Lipa Mundorumu Semanemo*

<sup>18</sup> Yesusini serimu mele Jono yu lombili andolimane yundu ningu siringi kinia yuni yu lombili andolimanga talo "Yando wale." nimbale Yesusi molorumuna olo lipa mundupa nimbale: <sup>19</sup> "Pulu Yemone olia nokopa kondomba yere, "Lipu mundumbu." nimba, nimba panjerimu yemo 'Ombá.' nimbu nokopo molemolo kanumu nu molo se lupa ombámo nokopo molamiliye?" nirimu.

<sup>20</sup> Kanu yetolone Yesusi molorumuna ongo yundu ninguli: "No Lindeli Jonone olto lipa mundupa nimbale: "Pulu Yemone olia nokopa kondomba yere, "Lipu

mundumbu.” nimba, nimba taltorumu yemo ‘Ombá.’ nimbu nokopo molemolo kanumu nu molo se lupa ombá nokopo molamiliye?” nimu.” niringili. <sup>21</sup> Aku siku mangilku pilkuli niringilimuni, ena senga ‚we kanoko giliangili, Yesusini kuru lupa-lupa torumu yomboma kinia, konopumanga kuru molorumu yomboma kinia, mongo kiri lierimu yombo awisili kinia, sepa peanga sipa molorumu kanoringili.

<sup>22</sup> Pe Yesusini olondo pundu topa nimbale: “Olone ya kanokombele mele kepe pilkimbili mele kepe Jono ningu si-pale.

Mongo kiri lieli yomboma mongone kanoko, kimbu kiri lieli yomboma manda andoko, kuru-laká noli yomboma umbu-kangi gilipa, komu sili yomboma komuni pilku, kolopa lieli yomboma ola molemele kepe, koropa puli yomboma semane peangamo topo siliu pilielemela

kanumu. Aku siku Jonondo ningu siele. <sup>23</sup> Na kanokole ‘Yu sika kanu yemo molemo.’ ningu kuru mondokole, kelko konopu talo naa panjiku molonge yomboma ono maloya.” nirimu.

<sup>24</sup> Jonone mundorumu yetolo kelko nendo puringili kinia Yesusini kelepa yombo awisili maku toko moloringimando Jonondo nimbale: “Kolea ku lielina Jono no lindipa molorumu kinia, ono kanu kolea ku lielina nambolka kanonge puringiye? ‚Molo, lkepania mele poporamene lope-lope sendepa molorumu se kanonge puringiye? Jono yu aku sipa mele mólo kanumu.’ <sup>25</sup> Alieli kanolemele mele kanonge naa puringi liemu, ulu nambolkare kanongendo puringiye? Ye se mulu-maminia paa peangama pakopa molorumu kanonge puringiye? Akumu mólolá. Yombo kamako molko, méle awisili taltoko, mulu-maminia paa peangama pakolemelema ye nokoli kingimanga ulkana manjiku molemele kanumu.

<sup>26</sup> “Aku sili ye se kanonge naa puringi liemu, Pulu Yemone ungu-umbu tondole-moma pilipa yomboma nimba sili ye se kanonge puringiye? Akumu sika na-kolo nane onondo nimbu sikiru: “Jono yu sika Pulu Yemonga ungu-umbu tondorumuma pilipa nimba sili ye se na-kolo yu Pulu Yemone ungu-umbu tondorumuma pilipa nimba sili ye we se mólo. <sup>27</sup> Nikiru ye kanumundu Pulu Yemonga bokuna sukundu molemo ungu se i-sipa:

‘Pulu Yemone yunga Malondo nimbale:’

“Pilieyo! Nanga ungu nindimba yemo

nane nu puni aulkana

yu kumbi lepo lipu mundukuru.

Yuni nunga aulkamo akisindimba.” nirimu.’

kanu ungumu bokuna molemo. <sup>28</sup> Nane onondo paa sika nimbu sikirumu: “U mana moloringi yombomanga se ‚No Lindeli, Jono kinia manda mólo. Jono olandopa mele. Aku-sipa na-kolo kiniá wale kondemo wendo okomo. Kanu walemo Pulu Yemo ye nokoli kingimu molopa nokolemo yombomanga se paa imbi naa molopa paa koropa puli yombomo olandopa; Jono yu maniadopa. ‚U moloringi yomboma mania mele; kiniá na ‘Sika.’ ningu kuru mondongemonga konopu peanga pemba yomboma olandopa.’” nikiru.” nirimu.

<sup>29</sup> Yesusini aku sipa nirimu pilkuli we-yomboma kinia kou-takisi liltingi yema kinia Yesusini Jonondo nirimu ungumu pilku peanga pilku Pulu Yemo kape niringi. Kanu yombomane u ‚No Lindeli, Jonone nirimu ungumu pilku peanga pilkuli ono ulu-pulu-kiri seringima bulu siku, konopu topele toko ‘Olio Jonone no lindepili.’ ningu no liltingi. <sup>30</sup> Aku-sipa na-kolo Parisi yema kinia, Pulu Yemonga ungu-manemanga puluma pilku kondoringi yema kinia, onone ‘Pulu Yemone Jono naa mundorumu.’

ningu pilkuli, Pulu Yemone "Yombomanga lipu tapondopo sendembo." nirimu ungumu pilku kiri pilku bulu sikuli pe 'Jonone olio no naa lindepili.' ningu no naa liltingi.

<sup>31</sup> Kanu-kinia Yesusini ungu se pea nimbale: "Kiniá mana molemele yomboma nambolka mélse ono manda manjipu manda nimbúnje? „Ono molemele mele i-sipu nimbu siembo: „<sup>32</sup> Ono yomboma maku tolemele koleana bolangoma pepe pereko molemele mele. Kanu bolangomanga marene ne-anju molemele bolango mare „pea pepe pereko molonge aulka se koroko kelkole, onondo mangilku ninguli:

"Konane nímulu kinia

ono 'Pea konane niemili.' naa ningu

"Mólo." níngi.

Pe kelepo kola semulu kinia

ono 'Pea kola samili.' ni naa níngi.

„Pea pepe perepo molomolo aulka se mólo lepomo.”

nílimili. „Kiniá molemele yomboma ono kanu bolangoma mele molemele., „Na kinia No Lindeli Jono kinia oltone nilimbulu unguma onone pilku kiri pilielemene; selembolo mele kanoko kiri pilielemelala.. Jono ombale ga kinia no-waene kinia naa nomba molorumu kinia „kanoko kiri pilku, ninguli: "Yunga konopuna kuru se molemo." niringi. <sup>34</sup> Pe Mania Omba Mana-Ye Au Lierimu Yemo omba ga kinia no-waene kinia norumu kinia „kanoko kirila pilku, ninguli: "Yu ga awisili nomba siye naa kolopa, no-waene awisili nomba amu topa selemo yemo. Yu kou-takisi lili yema kinia, ulu-pulu-kiri selemele yombo wema kinia 'Yu kinia pulu liepili pea kopu sepo molamili.' nimba selemo." nílimilila. „Onone aku siku Jono kanoko kirila pilielemene. Na kanoko kirila pilielemene., „<sup>35</sup> Aku-sipa na-kolo pilipa kondoli ulu-pulumu Pulu Yemo kinia pelemo-na yunga bolangomane pali yuni selemo mélemando 'Papu selemo.' ningí." nirimu.

7:36-50

### *Ambo Kiri Sene Yesusinga Kimbutolo Kulumiye Tondorumu Semanemo*

<sup>36</sup> Walte, Parisi ye sene Yesusindu "Kere-langì pea nambili ou." nirimu kinia yunga ulkana sukundu pumba akuna kere-langì polona nondopa polo senga mania molorumu kinia <sup>37</sup> kanu koleana molorumu ambo ulu-pulu-kiri seli sene Yesusi yu kanu Parisi yemonga ulkana sukundu kere-langì nomba molorumu pilipale, yu wambola paa komindi se mingi pali lipa akuna memba pumbale nirimumuni, <sup>38</sup> Yesusi molorumuna bulkundu kimbuna nondopa kola sepa gilipale, pe Yesusi yunga kimbutolo kola-mongomane kulumiye tondopa, pe ambomo yunga penge-lapisamo lipa kanu kimbutolo kulu tondopa, kimbutolo kangulupa, wambola memba orumu kanumuni kimbuna ape kandondorumu.

<sup>39</sup> Kanu ulka pulu ye Parisi „Saimono, yuni ambomone aku serimu kanopale yuyu konopumuni pilipale 'I yemo paa sika Pulu Yemone ungu-umbu tondolemo pilielemo ye se molkanje i ambo yu ambolkomomo molemo mele kinia ulu-kiri selemo mele kinia manda pilipale "Na naa ambolko, ongo wendo pu." nilka.' konopu lierimu.

<sup>40</sup> Yesusini „Saimono, konopumuni pilierimu mele pilipa yuntu nimbale: "Saimono, nu ungu se niembo." nirimu kinia

Saimonone pundu topa nimbale: "Ungu Mane Sili Yemo, manda, ni." nirimu.

<sup>41</sup> „Aku nirimu kinia Yesusini yuntu semane se topa nimbale: „Ye sene ye talo kou-mone pundu anjipa sirimu. Ye se wan anderete kina mele sipa, ye se tene kina mele sirimu. <sup>42</sup> Pe olo pea pundu manda naa tondoringili kinia ye pundu anjerimu kanu yemone pundutolo we siye kolopa "Unguri mólo, yu sepili." nirimu. Aku nirimumunga yetolonga nawene yu konopu oladopa mondorumu konopu lekenoye?" nimba Yesusini Parisi yemondo aku nimba mangilierimu.

<sup>43</sup> „Kanu Parisi ye, Saimonone yundu pundu topa nimbale: “Pundu awili anjerimu yemo, konopu lekero.” nirimu kinia

Yesusini “Paa nikinu.” nirimu.

<sup>44</sup> Kanu-kinia Yesusini topele topa kanu ambomo gilierimuna kanopa Saimonondo nimbale: “I ambomo kána! Na nunga ulkana sukundu ondu kinia ‘olio Isirele yombomane ye ponenge kokele olemo kinia selemolo mele, nuni nando aku naa senu. Nuni “Kimbu kulumiye tou.” ningu no naa sinu-na-koło i ambomone nanga kimbutolo yunga kola-mongomane kulumiye tondopa, yunga penge-lapisamo lipa nanga kimbutolo kulu tandomu. <sup>45</sup> Na ondu kinia nuni na naa kangulonu-na-koło i ambomone na ondu kinia kepe yandopa kiniá kepe nanga kimbutolo kangulupa molemo. <sup>46</sup> Na ondu kinia nuni nanga pengena wambola liku ape naa kandondonu-na-koło i ambomone nanga kimbutolo wambola komindi sene ape kandondonu. <sup>47</sup> Yuni ulu-pulu-kiri awisili serimuna mania pumumunga na konopu awili-sepa mondopale aku sipa semu. Aku-sipa na-koło ulu-pulu-kiri koltalo mindi selemo yombomo yunga serimu mele ‘Mania pupili, siye kolkoro.’ nimbá yemo konopu kanga-kolte mondombala.” nirimu.

<sup>48</sup> Ye Saimonondo aku sipa nimba pora sipale nirimumuni, ambomondo nimbale: “Nunga konopuna ulu-pulu-kiri serinu pelemoma mania pupili, siye kolkoro.” nirimu.

<sup>49</sup> Aku nirimu pilkuli yu-kinia kere-langı nongo moloringima yuni nirimu mele pilku kiri pilkuli onone anju yando angelema ningu ninguli: “Yombomane ulu-pulu-kiri selemelema i yemone “Mania pupili, siye kolkoro.” nikimu yemo yu nawe? ‚Na Pulu Yemo.’ konopu lepale nikimunje?,” niringi.

<sup>50</sup> Kanu-kinia Yesusini ambomondo kamu nimbale: “Nane nu ulu-pulu-kiri serinu mele ‘Om̄ba wendo pupili.’ manda nimbú.’ ningu kuru mondoko onumunga na sika aku sипу manda lipu tapondokoro kene nu konopu pe nipili mololko pani.” nirimu.

## 8

8:1-3

### *Ambo Marene Yesusi Nokoringi Semanemo*

<sup>1</sup> Kanu-kinia pe Yesusi pumba, kolea awili kanga akumanga andopale nirimumuni, Pulu Yemo ye nokoli kingimu molopa yomboma nokomba semane peangamo topa silipa, yomboma ungu-mane silipa andorumu. Yu lombili andoli ye engaki rurepo kinia <sup>2</sup> ambo mare kinia yu pea andoringi. Kanu ambomanga mare u kuru topa, mare u kuru ononga konopumanga peringi kinia Yesusini ono pali sepa peanga sirimu. Se, kolea Makatalla ambo Maria, u yunga konopuna kuru yopoko-pakara moloringimando Yesusini “Ongo wendo paa.” nirimu kinia ongo wendo purungi. <sup>3</sup> Se, ambo Joana, Susa menu. Susa yu kolea Gallilli disiriki ye nokoli kingi Eretenga ulka tapu-yemo. Se, ambo Susana. Ono kinia we-ambo awisilini Yesusi nokoringi. Kanu ambomane ononga kou-mone taltoringima likuli Yesusi kinia yu lombili andolima ononga kere-langı mélema topo toko liku siku nokoringi.

8:4-8,11-15

### *Ye Sene Kere-Langi Umbu Kaliana Tanda Sirimu Ungu-Ikumu*

<sup>4</sup> Kanu-kinia Yesusi molorumuna kolea lupa lupamanga moloringi yomboma sukundu sukundu ongo, liku maku toringi kinia yuni onondo ungu-iku se topa nimbale:

<sup>5</sup> “Ye sene rasi-witi umbu kaliana andopa tanda sirimu. Tanda silipa andorumu kinia umbu mare aulkana mania purumu, kanuma yombomane kimbuni kuloringi; mare keramane ongo liku noringila.

<sup>6</sup> Umbu mare kou perimuna mania pumbale akuna no naa molorumu-kulu toko nimba wendo ombo waltikele kolorumu.

<sup>7</sup> Umbu mare siri-ka mele molorumuna mania purumu, siri-ka mélemo wendo ombo witi-umbuma topa norumu-kulu ombo peanga naa lepa ,mongo se naa torumu.,

<sup>8</sup> Umbu mare ma peangana mania purumuma wendo ombo mongo peangama topa, mongo towapu kise mele torumu.” „nirimu.,

„Aku nimbale, “Yombo komu-pea lemomane i ungumu piliaa.” nirimu.

8:9-10

*Yesusindu “Ungu-Ikuma Nambi Semu-Na Tolenoye?” Ningu Mangilku Pilieringi Semanemo*

<sup>9</sup> „Yesusini aku nirimu kinia, yu lombili andolimane yundu ninguli: “Aku ungu-ikumunga pulumu nengu si.” niringi.

<sup>10</sup> Kanu-kinia yuni onondo nimbale: “Pulu Yemo ye nokoli kingimu molopa yomboma kinia mélema nokolemomonga ulu-pulu u yuyu pilierimu kanu ulupuluma ‘Ono kiniá „na lombili olemele yomboma, piliangi.’ nimbale ono ‘Ungu-ikumanga puluma piliangi.’ nimbale ono nimba sikimu. Aku-sipa na-kolo we-yomboma ‘Unguma nimbu siembo.’ nimbili ungu-ikuma mindi topo siliu. „Pulu Yemone Aisayanga kerena nimbale: „

‘Ono mongone kanokole naa kanoko,  
komuni pilkuli naa pilielemene.’

nirimu akumunga we-yombomando ungu-ikuma mindi tolio.” nirimu.

8:11-15

*(Ungu-ikumunga inia yakondo 8:4-8.)*

<sup>11</sup> Aku nimba yuni nimbale: “Aku ungu-ikumunga pulumu i-sipa:

“Kere-langgi umbu tanda sirimu kanu umbuma Pulu Yemonga ungumu.

<sup>12</sup> Umbu mare aulkana mania purumuma yombo mare aku sílma molemele. Onone ungumu pilielemene kinia pe „kurumanga nokoli, depelemo ombo ‘Aku ungu-umku kuru mondongi liemu Pulu Yemone ono lipa tapondopa aulka kirina wendo limba kinia manda mólo.’ nimba ungu tanda sili konopuna pumba pelemoma wendo limú.

<sup>13</sup> Umbu mare tanda sirimu kou perimuna mania purumuma yombo mare aku sílma molemele. Onone ungumu pilkuli konopu siku pilku limili. Aku-na-kolo ono pulkonio naa mundukuli ungumu kanga-kolte mindi pilku molemele. Pe ono konopuna umbuna sembá kinia molo „Setene ombo, manda manjipa kondi-ka sembá kinia, ono pilielemene ungumu siye kololemele.

<sup>14</sup> Umbu mare tanda sirimu siri-ka mele molorumuna mania purumuma yombo mare aku sílma molemele. Onone ungumu pilkuli pe aulkana pungí pungí kinia konopuna umbuna selemo umbunama kinia, méle awisili taltolemele mélema kinia ya makoleana uluma seko konopu singí uluma kinia,aku sili ulu mare wendo ombo ungu kanumu topa nolemo kinia ungumuni uluri naa sepa kere-langgi mongo kamu naa tolemo.

<sup>15</sup> Umbu mare tanda sirimu ma peangana mania purumuma yombo mare aku sílma molemele. Onone ononga konopu peanga pepili molko ungumu pilkuli kanu ungumu kamu liku kuru mondokole, tondolo pupili molemele kinia kanu umbuma kere-langgi mongo „awisili, tolemo.” „nirimu.,

8:16-18

*Sepe-LLamemonga Ungu-Ikumu*

<sup>16</sup> „Yesusini onondo ungu-iku se pea topa nimbale: „

“Yombomane sepe-llame kandokole mingina sukundu naa panjiku polo mani-akondo naa taltokole nilimiilimuni, ‘Yombo ongema kolea pa kanangi ulkana sukundu

pa sepili.' ningu polo senga ola taltolemele. <sup>17</sup> Aku sipa mele, kiniá lopi selemo mélema pe walte mona lemba yomboma kanonge; kiniá aki topa lemó mélema pe walte pa sembá kinia yombomane kanu mélema kanonge.

<sup>18</sup> Aku sembá kene onone ungu pilielemele akumu mimi siku piliangi. Pulu Yemonga ungumu pilku molemele yomboma paa olandopa nimba simba pilingí. Pe paa awisili pilingí. Aku-sipa na-kolo naa pilku molemele yomboma ono kanga-kolte pilielemele ungumu kepe wendo limba." nirimu.

8:19-21

### *Yesusinga Anumu Kinia Genupili Kinia Akumanga Semane Se*

<sup>19</sup> Walte Yesusi ulka senga sukundu molorumu kinia yunga anumu keme genupilima yu kanongendo oringi. Akuna yombo awisili ekelepa seko moloringi-kulu yu molorumuna nondoko manda naa ongole <sup>20</sup>, ungu se ningu mundoringi kinia, yombomane yundu ninguli: "Aminia kinia genali nu kanongendo ongo pena gilimili." nirungi.

<sup>21</sup> Yesusingi onondo pundu topa nimbale: "Pulu Yemonga ungumu pilku liku selemelé yomboma nanga anumu kinia nanga genupilima molemele." nirimu.

8:22-26

### *Poporome Awili Se Torumumuni Yesusinga Ungumu Pilipa Liltimu Semanemo*

<sup>22</sup> Walte, Yesusi kinia yu lombili andolima kinia ono nona andoli sipi senga sukundu puringi kinia punguli, yuni onondo nimbale: "Nomu nekendo pamolo." nirimu kinia akuna pungí puringi. <sup>23</sup> Sipina pungí puringi kinia Yesusi yu uru perimu. Yu uru pepili poporome awili se nomuna torumu. Aku serimu-na, nomumu apisipa ola ombale, no sipimunga sukundu sukundu omiba peke lepale sipimu memba nona mania pumbá serimu kinia ono nona wangonge seringi.

<sup>24</sup> Kanu-kinia yu uru perimuna pungu toko makisindiku ninguli: "Ye Nokolimu, Ye Nokolimu, olio nona wangokomolo." nirungi kinia yu makilipale poporomemo kinia no apisipa ola orumu nomumu-tolo iri torumu. Kanu-kinia poporomemo topa kelepa, nomumu lope naa sepa we lierimu.

<sup>25</sup> Kanu-kinia yuni lombili andolimando nimbale: "'Pulu Yemone olio nokomba.' ningu, kuru naa mondokomeleye?" nirimu.

'Yuni serimu mele kanokole, yemane pipili kolko mini-wale mundukuli anju yando onono mangilku ninguli: "Apa! I yemo nawenje? Poporomemone kepe nomumuni kepe yuni olondo "Sale." nilimú ungumu pilku liku kelkembele." nirungi.

8:26-39

### *Kuru Paa Awisili Ye Senga Konopuna Molko Amboloringima Yesusingi Topa Makororumu Semanemo*

<sup>26</sup> Kanu-kinia nomuna nekendo pungu kolea Gerasa puringi. Nomu yakondo kolea Gallilli, nomu nekendo kolea Gerasa kanumu.

<sup>27</sup> Akuna oringi kinia Yesusi sipimunga wendo omiba kelona gilierimu kinia kanu koleana ye se yu molorumuna orumu. Kanu yemo kuru awisili yunga konopuna moloringimunga mulu-maminia selu kepe naa panjipa, we-we andopa, ulka senga naa pepa, yombo-óno-koleana pelepa andopa molorumu.

<sup>28-29</sup> Kurumuni kanu yemo alieli liltimu-kulu yombomane ka-sénene yu kimbu kima ka toko yu nokoko moloringi-na-kolo ka-sénema sungu sirimu kinia pe kurumuni kolea ku lielina yu memba purumu. Kanu yemone Yesusi kanopale kalli nimba yu gilierimuna mania molopa tamalu pepa tondolo mundupa nimbale: "Yesusi, Pulu Ye Paa Olandopa Awilimunga Malo, na-kinia ungu nambolka unguri senindu onuye? 'Na mindili paa naa lipu simbú.' ni.' nimbu mawa sekero." nirimu. 'Yu kokele ombá orumu kinia, Yesusingi u nimbale: "Kurumu, i yemonga konopuna ongo wendo pu." nirimu mele pilipale yemone aku sipa "Naa sei." nimba mawa serimu.

<sup>30</sup> Aku nirimu kinia Yesusini yemondo mangilipa nimbale: “Nunga imbi nawe?” nirimu kinia

yemo yunga konopuna kuru awisili moloringi-kulu pilipale yuni “Nanga imbi Paa Awisili.” nirimu. <sup>31</sup> Kanu kuru awisilimane wale awisili Yesusi mawa seko ninguli: “Olio ‘ongo wendo pang.’ ningu toko makorokole ‘I ma-koleamo munduku kelko, Pulu Yemone komuru paa lepa mindi pumba pora naa nilimú murumunga ‘olionga ye nokoli Setene walte lipa mundumba, kanu murumunga paa.’ ni naa ni.” ningu mawa seringi.

<sup>32</sup> Akuna ma-pangi senga umbu-kongi awisili ímu nongo moloringi kanokole Yesusi mawa seko ninguli: “Olio ‘toko makorokole, ‘Ne kongimanga konopumanga molo-pangi.’ ni.” niringi kinia

yuni “Manda, akuna pang.” nirimu.

<sup>33</sup> Aku sipa nirimu kinia kuruma kanu yemonga konopuna wendo ongole kongi akuna moloringimanga konopumanga pungu moloringi kinia kanu kongima amu toko lisiku pungu kopona pukua toko nomuna sukundu pungu nona wangoringi.

<sup>34</sup> Ulu akuma wendo orumu-na kanokole kongi tapu seko moloringi yema kowa punguli niringimuni, kolea-awilina moloringi yomboma kinia, kolea-kangamanga moloringi yomboma kinia, ulu akuma wendo orumu mele semanemo toko siliku puringi. <sup>35</sup> Kanu semanemo pilieringi yomboma ‘Uluma wendo omu mele kanamili.’ ningu wendo pungu Yesusi molorumuna ongole u kuru awisili konopuna molko ongo wendo puringi yemo mulu-maminia pakopa, umbu-konopu pepili Yesusi molorumuna nondopa mania molorumu kanokole ono pipili koloringi. <sup>36</sup> Yesusini serimu mele mongone kanoringi yombomane pe oringi yomboma ningu siringi. Kuru awisili konopuna moloringi yemonga konopuna kuruma ongo wendo puringi kinia yemo yu umbu-konopu pepili molorumu mele ningu siringi.

<sup>37</sup> Kanu-kinia kolea Gerasa yomboma pali paa mini-wale mundukuli Yesusi mawa seko ninguli: “Olionga koleana naa mololi kelko pu.” niringi kinia yu kelepa pumbánona andoli sipimunga sukundu purumu. <sup>38</sup> Yu pumbá serimu kanopale, kuru awisili konopuna u molko wendo oringi yemone yundu nimbale: “Pea pambili.” nimba mawa serimu.

Aku-na-kolo Yesusini “Mólo.” nimba yundu nimbale: <sup>39</sup> Nu ulkondo pungu Pulu Yemone nu lakopa sepa kondomu mele nunga yomboma ningu si-pu.” nirimu. Yesusini aku nirimu-na pilipale ye kanumu pumba kolea-awilina sukundu moloringi yomboma pali Yesusini yu-kinia lakopa sepa kondorumu mele nimba sirimu.

*8:40-56munga 8:40-42,49-56*

*Yesusini Bola Se Kolorumumu Sepa Konde Lipa,  
8:43-48*

*Kuru Se Topa Naa Kelierimu Ambo Se Sepa Peanga Sirimu Semanetolo*

<sup>40</sup> Kanu-kinia Yesusi yu nomu yakondo orumu kinia yu ‘Ombá.’ ningu maku toko nokoko moloringi yombomane “Nu papu okono.” ningu konopu siringi.

<sup>41-42</sup> Juda yomboma maku toko Pulu Yemonga ungumu pilieringi ulka se nokorumu ye se, yunga imbi Jairasi, Yesusi molorumuna orumu. Kanu-kinia yu Yesusinga kimbuna nondopa ombo mania molopa tamalu pepa yundu mawa sepa nimbale: “Nanga ulkando pea pambili ou.” nirimu. Yemo yunga bolamo, yunga lemamu selu mindi, yu kalia-ingi engaki rurepo mele ombo purumu kanu bolamo, kuru paa awili sepa torumumunga yu nondopa kolomba sepa lierimumunga ‘yemone Yesusi aku sipa mawa serimu.‘

Pe Yesusi kanu ulkana pumbá purumu kinia yombo awisili liku maku toko yu kakapu seko ekelepa seko pea puringi.

<sup>43</sup> Kanu yombo pea puringimanga ambo se yunga pena perimu walema pora naa nirimu. Yu pena mindi pepili kalia-ingi engaki rurepo ombo purumu. Yu doketamanga yunga kurumu ‘Pora nipili.’ nimba andopa, yunga kou-mone pali ono sirimu-na-kolo kuru kanumu pora naa nirimu. <sup>44</sup> Kanu ambomo Yesusi pumbá purumu kinia bulkundu ombo, yunga wale-pakolimunga pundumu ambolorumu kinia waltikele yunga kuru torumu kanumu pora nirimu.

<sup>45</sup> Aku serimu kinia Yesusini nimbale: “Na nawene ambolomuye?” nirimu. Onone pali “Na mólo.” niringi kinia ,yu lombili andoli ye, Pitane yundu nimbale: “Ye Nokolimu, yombo awisili nu gilinuna nondoko nondoko ongo kakapu seko ekelepa seko gilkimili kanumu.” nirimu.

<sup>46</sup> Aku-sipa na-kolo Yesusini kelepa nimbale: “Na yombo lipu tapondolio tondolo mare nanga kangina ombo ultu pumu-kulu pilipuli yombo sene na ambolomumundu nikiru.” nirimu. <sup>47</sup> Aku sipa nirimu pilipale ambomo yu lopi manda naa sepa, yu serimu mele Yesusi pilipa molorumu kanopale yu kimbu ki puru-puru nipili Yesusi molorumuna ombo mania molopa tamalu pepale, yomboma pilku giliangi yuni ‘Kuru pora nipili.’ nimba ombo yu ambolorumu kinia waltikele peanga lierimu mele nimba para sirimu kinia

<sup>48</sup> Yesusini yundu nimbale: “Ambomo, ‘Nu manda sepa peanga simba.’ ningu kuru mondonu kanu ulumuni nu peanga lekemo. Konopu pe nipili mololko pani.” nirimu.

<sup>49</sup> Yesusini ambomondo aku sipa nimba molorumu kinia, ye se, yomboma maku toko Pulu Yemonga ungumu pilieringi ulka nokoli ye ,Jairasi,nga ulkana molopale ombo ,Jairasindu, nimbale: “Nunga bolamo kolopa pora simu. Ungu Mane Sili Yemo ‘Mindili nopili.’ ningu we naa mengo wani.” nirimu.

<sup>50</sup> Yuni nirimu mele Yesusini pilipale ,ulka nokoli yemondo, nimbale: “Mini-wale naa mundoyo. Nunga bolamo nane ‘Manda lipa tapondomba.’ ningu kuru mondoko moloni kinia yuconde pumba.” nirimu.

<sup>51-53</sup> Kanu-kinia Yesusi yemonga ulkana ombale ulkana sukundu yombo awisili bola kolorumumu kondo kolko kola seko moloringi kanopa onondo nimbale: “Bolamo kolou naa kolomu. We uru mindi pelemo kene kola naa saa.” nirimu. Aku-na-kolo yu sika kolopa pora sirimu pilkuli yuni “We uru pelemo.” nirimumunga onone yu ungu-taka tondoko tawe senderingi. Pe yu ,bolamonga suluminiana, pumbá purumu kinia ‘We-yomboma pali naa ongo anju paa.’ nimbale Pita keme, Jono keme, Jemisi keme, kanu bolamonga anumu lapatolo kinia “Ono mindi pea pamili.” nimba ,bola ónomo lierimu, suluminiana ono memba purumu.

<sup>54</sup> Pumbale bolamonga kimu ambolopa yundu mangilipa nimbale: “Bolamo, nu ola molou.” nirimu kinia <sup>55</sup> yunga mini purumu kanu minimu kelepa sukundu orumu kinia bolamo waltikele ola molorumu. Kanu-kinia Yesusini ,anumundu, nimbale: “Bolamo kere-langi mare liku si.” nirimu.

<sup>56</sup> Yuni serimu mele kanokole bolamonga anumu lapatolo olo paa mini-wale mundoringili-na-kolo yuni olondo tondolo mundupa nimbale: “Ungu i sekeromo yombo selurindu kepe anju pungu paa naa ningu siele.” nirimu.

## 9

9:1-6,10

*Yesusini Ye Engaki Rurepo “Kongono Se-Paa.” Nimba Lipa Mundorumu Semanemo*

<sup>1</sup> Walte Yesusini yu lombili andoli ye engaki rurepondo “Yando waa.” nimbale, onone yombomanga konopumanga kuru molemelema “Ongo wendo paa.” ningu toko makoronge tondolomo sipale, yombo kuru tolima ‘Peanga liepili.’ ningí nambamo sirimu. <sup>2</sup> Aku sipa sepa onondo nimbale: “Ono pungu, Pulu Yemo ombo ye

nokoli kingimu molomba semane peangamo yomboma toko siliku andoko, kuru toli yomboma seko peanga siliku pangi.

<sup>3</sup> Pungíndu, ono mélema naa mengo we pangi. Apulu-mingi kepe, méle-wale kepe, kere-langi kepe, kou-mone kepe, wale-pakoli talo kepe naa mengo we pangi.

<sup>4</sup> Pe kolea senga sukundu punguli akuna molongendo ulka seluringa sukundu punguli akuna mindi peko molkole pe aku koleamo munduku kelko pangi. „Ulka pinia-pinia naa andoko ulka seluringa mindi kere-langi nongo peangi..” <sup>5</sup> Kolea marenga sukundu pungí kinia kolea pulu yombomane “Papu ongi. Pea peamili waa.” ni naa ningu onone ungu ningíma pilku naa língi liemu kanu koleana yombo kirima munduku kelko pungíndu ono bulu siku ungu naa pilku lingimunga kanu koleana yomboma ‘Kamu molko kinjangi! Pulu Yemone ono lipa naa tapondomba mele piliangi.’ ningu ononga kimbuna kanu koleamanga ma gilimbama kulu tokole pangi.” nirimu.

<sup>6</sup> Aku nirimu kinia kanu yema pungu, koleamanga andoko, Pulu Yemonga semane peangamo toko siliku, kuru torumu yomboma seko peanga siliku, selko andoringi.

*9:7-9*

### *Ye Nokoli Kingi Erotene “Yesusi Yu Nawenje?” Nimba Pilierimu Semanemo*

<sup>7-8</sup> Kolea Gallilli disiriki nokorumu ye nokoli kingi Erotene Yesusini serimu mele semane toringi pilipale, ‘I yemo nawenje?’ nimba pilipa sundorumu. Yombo marene ninguli: “I yemo „No Lindeli, Jono „talko kolorumu kanumu, lomboropa wendo omunje.” ningu moloringi. Marene ninguli: „Pulu Yemone u konde molopili olando liltimu ye, Illainja kelepa ombo molemo.” ningu moloringi.

Marene ninguli: “Pulu Yemone ungu-umbu tondorumuma pilku yomboma ningu siringi ye koro-u molko koloringimanga ye se lomboropa wendo orumu.” ningu moloringi.

<sup>9</sup> „Ye nokoli kingi, Erotene „Yesusini serimu mele semane toringi, pilipa nimbale: „No Lindeli, Jono ‘yunga pengemo wendo pupili.’ nimbu nomimu kari lierindu yu kolorumu-na-kolo i ulu-tondolo lupa lupa selemo pilielio yemo yu nawenje?” nirimu. Aku sipa nimbale “I ye Yesusi kanamboa!” nimba molorumu.

*9:10-17*

### *Yesusini Ye Paip Tausini Kere-Langi Sirimu Semanemo*

<sup>10</sup> Yesusini “Nanga kongonomo sende-paa.” nimba lipa mundorumu yema yu molorumuna kelko yando ongole niringimuni ulu seringima yu semane toko siringi. Kanu-kinia kanu yema lipa memba pumba ‘Senga oliolio molamili.’ nimba ono Besaida taonona memba purumu.

<sup>11</sup> Aku-na-kolo yombo paa awisili ono akuna puringi mele pilkuli yu purumuna akileko lombili puringi. We-yomboma oringi kanopale Yesusini onondo “Papu ongi.” nimbale ono Pulu Yemo ombo ye nokoli kingimu molomba semane peangamo topa sipa, ononga yombo kuru torumuma ‘Peanga liepili.’ nimba ono sepa peanga sirimu.

<sup>12</sup> Pe ipupini ena pumbá serimu kinia yu lombili andoli ye engaki rurepo yu molorumuna ongo yundu ninguli: “I koleana yombo se naa pelemele kene ya maku toko molemele yomboma ‘Pungu kolea marenga kere-langi topo toko liku nongo pe-pangi.’ ni.” niringi.

<sup>13</sup> Aku niringi kinia Yesusini lombili andolimando nimbale: “Onone onono yomboma kere-langi mare liku siengi.” nirimu.

Onone yundu ninguli: “Ya kere-langi awisili naa taltolemele. Pellawa kaloli kanga se-pakara kinia oma kaloli talo kinia, aku kere-langi pokore mindi lemó. Molo nuni ‘Olio kolea senga pungu i yombomanga kere-langi topo toko lindi-pangi.’ ningu nikinuye?” ningu mangilieringi. <sup>14</sup> (Kanu yomboma koltalo mólo, ye paip tausini mele akuna moloringi.)

Kanu-kinia Yesusini onondo nimbale: "Yombomando 'ono towapu talo talo ningumania molangi.' niengi." nirimu kinia <sup>15</sup> onone aku siku yombomando niringi kinia yomboma pilku liku aku siku mania moloringi.

<sup>16</sup> Kanu-kinia Yesusini pellawa kaloli se-pakara kinia oma talo kinia kanuma lipale mulu-koleana olando sipa kanopa „Pulu Yemo kinia, "Ange." nimba kere-langi akuma ambolopa pike lepa lombili andolima moke sepa sipale "Anju yomboma siee." nirimu, „onone yomboma moke seko siringi,. <sup>17</sup> Ono pali kanu kere-langima noringi kinia olo serimu. Pe lombili andolimane kere-langi kakena lierimuma liku maku toko walebasikete engaki rurepo toko peke siringi.

9:18-22

*Pitane Yesusindu "Pulu Yemone 'Olio Nokopa Kondomba Ye Se Lipu Mundumbu' Nimba, Nimba Taltorumu Ye Nokoli Akumu Nu." Nirimu Semanemo*

<sup>18</sup> Walte, Yesusi yuyu Pulu Yemo kinia ungu nimba molorumu kinia yu lombili andoli ye pea moloringimando mangilipa nimbale: "Yombomane na imbi leko nawe nilimiliye?" nirimu.

<sup>19</sup> Onone yundu pundu toko ninguli: "Marene "Nu No Lindeli Jono „kolorumu kanumu kelepa lomboropa ola molemomo„." ningu pilielememe; marene "Nu, „Pulu Yemone u konde molopili olando liltimu ye, Illainja kelepa omba molemo." ningu pilielememe; marene "Nu Pulu Yemone ungu-umbu tondorumuma pilipa yomboma nimba sirimu ye se u kolorumu kanumu kelepa lomboropa ola molemo." ningu pilielememe." niringi.

<sup>20</sup> „Aku niringi kinia, yuni onondo mangilipa pilipa nimbale: „We-yombomane aku siku nilimili,-na-kolo onone onono na nawe nilimiliye?" nimba mangilierimu.

Pitane pundu topa nimbale: "Nu „Pulu Yemone 'Olio nokopa kondomba ye se lipu mundumbu.' u nimba taltorumu ye nokoli, Karasimu." nirimu.

<sup>21</sup> Pitane aku nirimu pilipale Yesusini onondo tondolo mundupa nimbale: "Na molio mele „Pitane kiniá nikimumu, onone anju yombo selurindu kepe „iseli-u, paa naa ningu siee!" nirimu.

9:22-27

*Yesusi Yu Toko Kondonge Kinia Kolopale Lomboropa Ola Molomba Mele U-Pulu-Pulu Nimba Para Sipa, Yomboma Yu Lombili Pungíndu Senge Mele Nirimu Semanemo*

<sup>22</sup> „Nimbale, yuni „yu-kinia wendo ombá mele, ono nimba sipa nimbale: "Mania Ombo Mana-Ye Au Lierimu Yemo sika mindili awisili nombá. Juda yomboma nokolemele tapu-yema kinia, Pulu Yemo popo tondoli ye awilima kinia, Pulu Yemonga ungu-manemanga puluma pilku mane sili yema kinia, onone „ninguli: "Yu Pulu Yemone naa mundorumu. Yu Pulu Yemonga Malo naa molemo." ningu, yu liku bulu siku yu toko kondonge. Yu toko kondonge kolomba kinia wale talo omba pumbá kinia yopoko-sipamonga Pulu Yemone yundu 'Lomboroko ola molou.' nimbá." nirimu.

<sup>23</sup> Kanu-kinia Yesusini akuna maku toko moloringimando pali nimbale: "Yombo sene 'Yu lombili pambo.' nimbale yuni alieli yunga konopumuni pilielemé mele yema mundambo.' nimba, yomboma unju-perana peko mindili nongo kololemele mele yuni unju-pera mele gomo lembando 'Na yu lombili pumbúndu mindili nondu liemu peangala; kolondu liemu peangala.' nimba na lombili opili. We naa opili. <sup>24</sup> Yombo sene yunga mana konde molopa naa kololi ulu-pulumu ambolomba sembá kinia yu kolopale sika molopa kinjipa mindi pumbá. Aku-sipa na-kolo yombo sene na konopu mondopale nanga kongonomo "Sendambo." nimba sembá kinia yu kolopale yu konde molopa kondopa mindi puli ulu-pulumu sika kanopa limba. <sup>25</sup> „Akumu nambi semu-na nikiruye?, Yombo sene manamelema pali yuyu lipa taltopale yu mini pali Pulu Yemo naa molomba koleana pumba

mindili nomba molopa kinjilkanje kanu mélemane kanu yombomo nambi sepa lipa tapondolkanje? Lipa naa tapondolkamo.

<sup>26</sup> Nanga yombo mare we-yomboma kinia molko ninguli: “Olio Yesusinga unguma pilipu lipu, yu lombili andopo molemolo mele we-yombomane naa piliangi.” ninguli, na kiyongo ningu lombili andolemele yomboma ono-kinia ulu se pe wendo ombá mele nimbu siembo: Mania Omba Mana-Ye Au Lierimu Yemo pe Lapanga tondolo pa sélimu kinia ,mulu-koleana, angello kake selima kinia ,mania, ombá sembá kinia, kanu we-yomboma molongena yunga yomboma mona molongendo we-yomboma molongena kanokole yu u naa opili ‘Olio yunga yomboma molemolo mele we-yombomane naa piliangi.’ ningu pipili kolko lopi sekó molonge yomboma yuni lipa wekendo kanopa, “Na moliona naa waa.” nimbála.” ,nirimu. ,

<sup>27</sup> Nane onondo paa sika nimbu sikirumu: “Ono ya gilkimilimanga mare u kolou naa kolangi Pulu Yemo ye nokoli kingimu ombo molopa kolea nokombando ombá kanonge.” nikiru.” nirimu.

9:28-36

### *Yesusinga Kangimu Se Lupa Au Lierimu Semanemo*

<sup>28</sup> Yesusinga ,yu lombili andolimando aku sipa nimba sirimu kinia, pe koro se ombo purumu kinia Pita keme, Jemisi keme, Jono keme, ono lipa memba pumba ‘Pulu Yemo kinia ungu niembo.’ nimba ma-pangina ola ono lipa memba purumu. <sup>29</sup> Yuni akuna Pulu Yemo kinia ungu nimba molopili yunga kumbikeremo topele topa, yu pakorumu mulu-maminama ena tondolo topa yombomanga mongo takele selemo mele aku sipa kake serimu. <sup>30-31</sup> Yuaku sipa molopili, ,Juda yombomanga koronga-u moloringili ye awili talo,, Mosisi kinia Illainjatolo, ongo pa serimuna ongo gilkuli olo kinia Yesusi kinia onone Yesusi yu kolea-awili Jerusalleme akuna Pulu Yemone yundu ‘Sei.’ nirimu mele sepa kolomba mele ningu moloringi.

<sup>32</sup> Pita kinia, yu pea akuna moloringi yetolo kinia, ono siye sepa uru ombá serimuna-kolo pe ono makiliku umbu-konopu pepili molkole Yesusi yunga kangi topele topa molorumu mele kinia, yunga tondolo pa serimu mele kinia, yu-kinia gilieringili yetolo pea kanoringi.

<sup>33</sup> Kanu-kinia aku yetolo pungili puringili kinia Pitane Yesusinga nimbale: “Ye Nokolimu, olio ya molopomolo peanga lepomo. Olione ulka-takaya yopoko takondamili. Se nunga, se Mosisinga, se Illainjanga takondamili.” nirimu. (Aku-na-kolo aku nirimumu ,pipili paa kolopale, yuni nimbá mele naa pilipa ungu se walu nirimu.)

<sup>34</sup> Pitane aku sipa nimba molopili kupa se ombo ono aki torumu. Kupana sukundu puringi kinia ono pipili serimu. <sup>35</sup> Kupa torumuna sukundu ungu se wendo ombo nimbándo: “I yemo nanga Malomo. Nane , ‘Ononga’ nimbu, yu nimbu taltopo lipu mundoruntu. Yuni ungu nimbáma pilku liengi.” nirimu. <sup>36</sup> Aku ungumu nimba kelierimu kinia Yesusi yu mindi molorumu kanoringi.

Onone aku siku kanoringi mele anju naa ningu para siku, yombo seluri kepe u naa ningu siringi.

9:37-43

### *Yesusingi Kuru Se Makororumu Semanemo*

<sup>37</sup> Opali, orili-u ,Yesusi kinia yu lombili andoli ye yopoko kinia, ono ma-pangina maniendo onge oringi kinia yombo awisili yu lingí oringi. <sup>38</sup> Oringi yombomanga ye sene Yesusinga nimbale: “Ungu Mane Sili Yemo, ‘Nanga kango nanamo, yu nanga kango selumu mindi, kondo kolko liku tapondani.’ nimbu mawa sekero. <sup>39</sup> Yunga konopuna kuru se pelemomone yu lipa mindili sipa tolemo kinia kangomone kalli nimba, yu ámu topa apoupu memba molemo. Yuaku sipa alieli selemo-na kangomo yu kangima pange-mange selemóla. <sup>40</sup> Nu lombili andolimando aku semanemo topo

sipu onone kanu kurumu ‘Makorangi.’ nimbu mawa sendu-na-kolo ono manda naa sengi.” nirimu.

<sup>41</sup> „Aku nirimu kinia, pilipale Yesusini „yomboma iri topa, nimbale: ‘Kiniá molemele yomboma ono , ‘Pulu Yemone uluma sika manda sembá.’ ningu, kuru naa mondolemele. Ono konopu karaye sepa pepili molemele yomboma, na ono-kinia molopo, wale nambi sepo molopo mane sipu ulu mare lipu ora simbú kinia mimi siku pilingíye? „Na ono-kinia siye sekemo.,’” nimbale pe kanu yemondo nimbale: “Nunga kangomo na moliona mengo u.” nirimu. <sup>42</sup> Memba ombá orumu kinia kanu kurumuni kango kanumu topa lipa mania mundupale yu torumu kinia Yesusini kurumu iri topa kangomo sepa peanga sipale, yu peanga lierimu kinia lapa sirimu. <sup>43</sup> Aku sipa serimu kanokole yomboma Pulu Yemonga tondolomo konopumane pilkuli mini-wale mundoringi.

9:43-45

### *Yesusini Yu Toko Kondonge Kinia Kolopa Lomboropa Ola Molomba Mele Wale Talo-Sipa Nimba Sirimu Semanemo*

Yuni serimu mele ono pungu-pungu ningu mini-wale munduku molangi Yesusini yu lombili andolimando nimbale: <sup>44</sup> I nikiru mele pilku kondayo. Mania Ombo Mana-Ye Au Lierimu Yemo „ka sikuli yu toko kondonge, yema anju singí.” nirimu.

<sup>45</sup> Aku-sipa na-kolo yuni nirimu ungumu pilku sundukuli ‘I ungumunga pulumu nambolkarenje, naa pilkimulu.’ niringi-na-kolo “Nambolka ningu nikinuye?” ningu mangilku pilingindu pipili kolko naa mangilieringi. Pulu Yemone ‘Ono kanu ungumunga pulumu iseli-u naa piliangi.’ nimba serimu kanumu.

9:46-48

### *Pulu Yemo Ye Nokoli Kingimu Molopa Nokolemo Yombomanga Yombo Paa Imbi Olandopa Molemomonga Ungu Se*

<sup>46</sup> „Walte Yesusi lombili andolimane, ono onono anju yando angelema ningu ninguli: “Olionga ye nawe paa olandopa molemoye?” niringi.

<sup>47</sup> Onone konopu lieringi mele pilipale, Yesusi bolango kanga se lipa yu molorumuna nondopa mondopa <sup>48</sup> onondo nimbale: “Yombo sene ‘Na Ye-Awilimunga yombomo molio.’ nimba i bolangomo lipa tapondomba kinia kanu yombomone aku sembamonga na lipa tapondombala. Kanu-kinia na lipa tapondomba yombomone na lipa mundorumu yemo lipa tapondombala. Ononga ye sene ‘Nanga imbimu ola naa molopili.’ nimba, ‘Ye senga lupa imbimu ola molopili.’ nilimú yemo yu ononga paa olandopa molombamonga „aku sipa ulumu pemba.” nirimu.

9:49-50

### *Yesusini Nimbale: “Olio-Kinia Opa-Tou Naa Molemele Yomboma ‘Olionga Opa-Geramema.’ Niemili.” Nirimu Semanemo*

<sup>49</sup> Yesusi lombili andoli ye Jonone Yesusindu nimbale: “Ye Nokolimu, olio kanomulu, ye sene nunga imbimu lepa kuru mare yombomanga konopumanga molongima “Ongo wendo paa.” nimba topa makoropa molomu kanomulu. Kanopole yu olio pea kopu sepo naa molemolo kene yundu “Nu aku siku naa sei.” nímulu.” nirimu.

<sup>50</sup> Aku nirimu kinia pilipale Yesusini yundu „kanu yemone serimu ungumundu, nimbale: “Yombo se olio-kinia opa-tou naa molemo yombomo olionga opa-geramemo molemo kene onone yundu “Mólo.” naa niengi.” nirimu.

9:51—19:28

## **Yesusi Yu Lombili Andolima Kinia Jerusalleme Pumbá Purumu Semanemo**

9:51-56

*Yesusi "Jerusalleme Pambo." Nimbale Pumbá Purumu Kinia Yuni "Peamili." Nirimu Kolea Se Sameria Yombomane "Mólo." Niringi Semanemo*

<sup>51</sup> Kanu-kinia Yesusi kolea-awili Jerusalleme yu kolopale pe mulu-koleana olando pumbá walemo nondopa wendo orumu pilipale konopu tondolo mundupa 'Jerusalle-mendo pambo.' nimbale pumbá purumu.

<sup>52</sup> Yu lombili andoli ye mare lipa mundupa nimbale: "Kiniá ipulieli kolea Sameria lierimu taono se nondopa lembana peamili kene ono akuna pungu olia manda pemolo ulka se koroko liengi." nirimu kinia pungu kororingi. <sup>53</sup> Aku-sipa na-kolo kanu Sameria yomboma <sup>54</sup> ono kinia Isirele yomboma kinia anju yando konopu kiri panjiku moloringimunga, yu Jerusallelendo pumbá purumu kanokole onone "Mólo, ya manda naa penge." niringi.

<sup>54</sup> Aku siku niringi kanokole yu lombili andoli ye Jemisi kinia Jonotolone yundu ninguli: "Ye-Awilimu, 'oltone 'Mulu-koleana sepe wendo omba i Sameria yomboma nomba kondopili.' niembili.' konopu lekenoye?" ningu mangilieringili.

<sup>55</sup> Aku-na-kolo yu topele topa olo kanopa iri topa "Aku ningu kinjikimbili." nirimu kinia <sup>56</sup> ono kinia ono kinia kolea senga pungu pe-poringi.

9:57-62

*Yesusi Lombili Andolemolomonga Ungu Se*

<sup>57</sup> Ono aulkana pungí puringi kinia ye se omba Yesusindu nimbale: "Nu puni koleamanga pali nu lombili ombó." nirimu kinia

<sup>58</sup> Yesusini yundu nimbale: "Pílie! Owá-palakoma ulka pelemelemanga pelemele; kerama ononga ulka takolemelemanga pelemele; aku-na-kolo Mania Ombo Mana-Ye Au Lierimu Yemonga pelemo kolea se naa lemó <sup>59</sup> kene, nu 'Yu lombili pumbuli manda naa molombo.' ningu pilkuli na lombili wani. We naa wani." nirimu.

<sup>59</sup> Kanu-kinia yuni ye sendo nimbale: "Na pea pambili lombili ou." nirimu kinia kanu yemone yundu pundu topa nimbale: "Ye-Awilimu, <sup>60</sup> nu kamu lombili wambo mangali, u pumbu nanga lapamo-kinia pea molambo. Pe yu kolomba kinia óno sepole nu lombili ombó." nirimu.

<sup>60</sup> Aku-sipa na-kolo Yesusini yundu ungu-iku topa kelepa nimbale: "Nanga ungumu naa pilku, yombo kololi yombomane yombo kolongema óno sangi. Nu 'Pulu Yemo omba ye nokoli kingimu molopa yomboma nokomba semane peangamo yomboma piliangi.' ningu toko siliku andani." nirimu.

<sup>61</sup> Kanu-kinia ye sene yundu nimbale: "Ye-Awilimu, nu lombili ombó-na-kolo u pumbu nanga yomboma kondo kolopo 'Molaa.' nimbili pe nu lombili ombó." nirimu kinia

<sup>62</sup> Yesusini yundu nimbale: "Na 'Lombili ombó.' nimba ombale nondopa siye kolomba yombo se yu Pulu Yemo ye nokoli kingimu molopa nokomba koleamonga kongonomo manda naa sembá." nirimu.

## 10

10:1-24

*Yesusini Ye Towapu Yopoko "Paa." Nimba Lipa Mundorumu Kinia Pungu Andokole Kelko Oringi Semanemo*

10:1-12,16

*Yesusini Ye Towapu Yopoko Lipa Mundorumu Semanemo*

<sup>1</sup> Kanu-kinia Yesusi kolea-awili Jerusallelendo pumbá pumbale nirimumuni, yu pumbá purumu kolea marenga ye pokore kumbi lepa lipa mundorumu. Yuni ye towapu yopoko nimba taltopa ye talo talo nimba lipa mundupale <sup>2</sup> ono ungu-iku mele topa nimbale:

"Kaliana kere-langi awisili nou lepa pelemo-na-kolo kanu kere-langima pungu liku taltonge yomboma koltalo kene Kalia Pulu Yemone 'Kanu kere-langima liku taltoli kongonomo pungu senge yomboma kaliana lipa mundopili.' ningu mawa sangi. <sup>3</sup> Ono lipu mundukuru yema ono sipisipi melema, yombo owá-palako awili kirimane sipisipi topa nolemo mele yomboma molemelena lipu mundukuru. 'Nanga ungu andoko ningu singí kinia pilku kiri pilkuli yombomane ono mindili liku singí.' <sup>4</sup> Punguli, wale-tapi kepe, kou-mone kepe, méle-wale kepe, kimbu-su topele toko mondongema kepe naa mengo we pang. Aulkana punguli yomboma kanoko onondo ungu se naa ningu we pang.

<sup>5</sup> Kolea senga sukundu punguli akuna molongendo ulka seluringa pungu pe-punguli u kanu ulka pulu yombomando ninguli: "Ono konopu peanga pepili molangi." niengi. <sup>6</sup> Aku ningí kinia kanu ulkana 'Konopu peanga pepili molambo.' nimbá yombo se molomu liemu yu konopu peanga pepili molomba. Molo aku ningí kinia kanu ulkana 'Konopu peanga pepili molambo.' nimbá yombo se naa molomu liemu ono akuna 'Pangi.' nimbú mundukuru yema onono konopu peanga pepa umbuna se naa sepili molonge. <sup>7</sup> Kongono selemo yemo yu méle papu kalolemele kene pungí ulkana peke, ulka pulu yemone kere-langi simbama nangi. Ulka pinia-pinia naa andoko, ulka seluna mindi kere-langi nongo peangi.

<sup>8</sup> Kolea senga sukundu punguli ningimuni, kanu kolea pulu yombomane onondo "Papu ongi. Olio pea molamili waa." níngi liemu ono kere-langi singíma nongo, <sup>9</sup> akuna kuru tomba yomboma seko peanga siku, onondo ninguli: "Pulu Yemo om̄ba ye nokoli kingimu molopa olio nokomba walemo ono molemelena nondopa ombá." niengi.

<sup>10</sup> Molo kolea senga sukundu punguli kanu kolea pulu yombomane onondo "Ono nambi semu-na ongiye?" ningu, "Pea peamili waa." naa níngi liemu ,kanu koleamo munduku kelko pungíndu, aulkana pungu gilkuli yombomando ninguli: <sup>11</sup> Onone olio liku bulu síngimunga 'Ono kamu molko kinjangi! Pulu Yemone ono lipa naa tapondomba mele paa piliangi.' nimbú, olionga kimbuna ya koleamonga ma gilkimuma kepe kulu topole pukumulu." niengi. 'Akumu piliangi.' ningu aku siku ninguli pe ungu se pea onondo kamu ninguli: "Ono liepi-liepi tamili piliangi.., Pulu Yemo om̄ba ye nokoli kingimu molopa yomboma nokomba walemo nondopa ombá." niengi.

10:12-16

*Jesusini Kolea Marenga Yomboma "Mindili Nongo Molko Kinjingí." Nirimu Semanemo*

<sup>12</sup> Nane onondo paa sika nimbú sikirumu: "Kote walemo wendo ombá kinia kole-awili Sodomo ,yomboma u ulu-pulu-kiri awisili sika seringi-na-kolo, ononga kote kanga mele pemba. Aku-sipa na-kolo i yombo ,onondo "Pea molamili waa." ni naa ningu, ononga ungu pilku naa lingí yomboma,, kote walemo wendo ombá kinia ononga kote awili mele pemba." nirimu.

<sup>13</sup> Kolea Korasini kinia Besaida taonotolo ,akuna molemele yomboma, mindili nongo paa molko kinjingí. Kanu koleatolonga sukundu ulu-tondolo awisili serindu ,na-kolo akuna molemele yomboma konopu topele naa tolemele,. Kolea-awili Taya kinia Saidonotolonga sukundu ulu-tondolo naa serindu-na-kolo kanu koleatolonga sukundu nane ulu-tondolo aku sipu selka kanolemolánje kanu koleatolonga ,yomboma, ono ulu-pulu-kiri selemeléma koronga munduku kelko, bulu siku, konopu topele tolemolá. <sup>14</sup> ,Akumunga, kote walemo wendo ombá kinia kanu kolea-awili Taya kinia Saidonotolonga ,yomboma ulu-pulu-kiri sika selemelémonga, ononga kote kanga mele pemba. Aku-na-kolo ono kolea Korasini kinia Besaidatolonga ,yomboma,

„na ulu-tondoloma serindu kinia kanokole konopu topele naa toringimunga, kote walemo wendo ombá kinia ononga kote awili mele pemba.

<sup>15</sup> Kapaniame taono „yomboma onone, ‘Mulu-koleana pumbu molamili.’ konopu lekemeleye? Aku manda mólo. ‘Onone nanga unguma alieli pilielemene-na-kolo konopu topele naa tolemelemonga, ono kolea kirina pungu molonge.” „nirimu..”

<sup>16</sup> „Aku nimbole yuni lipa mundumba serimu yemando ungu se pea nimbole: „Onone ungu ningima pilipa limba yombomone nane ungu niliu ungumu pilipa limbala. Onone ungu ningíma naa pilipa ‘Olio pea molamili.’ naa nimba sembá yombomone na-kinia ‘Pea naa molambili.’ nimbalá. Nando ‘Pea naa molambili.’ nimbalá yombomone na ma-koleana lipa mundorumu ye kanumundu ‘Pea naa molambili.’ nimbalá.” nirimu. Yesusini aku nimba pora sipale ‘Yunga kongonomo sende-pangi.’ nimba ono lipa mundorumu.

10:17-20

*Ye Towapu Yopoko Yesusini Lipa Mundorumu-Yema Kelko Yando Oringi Semanemo (10:1-12 pea)*

<sup>17</sup> „Walte, Yesusini lipa mundorumu ye towapu yopoko yu molorumuna paa konopu siku yando ongole onone yuntu ninguli: “Ye-Awilimu, olione nunga imbi lepole kuruma kepe olione ungu nirimuluma pilku liku serengi.” niringi.

<sup>18</sup> Yesusini onondo nimbole: “Aku siku selko andoringi kinia „kurumanga nokoli, Setene kariapá mele sepa, topa mania mundorumu nane kanorundu. <sup>19</sup> Piliame! Ono tondolo se sirindu. Yombo nomba kondoli kongi-ka-wambiye molo kiriworo aku mélema ono naa kanoko kulungí kinia aku mélemane ono nanga yomboma ‘Unguri naa sepili.’ nimbu ono kanu tondolomo sirindu. Olio-kinia opa-tou „Setene,“ yu sika tondolo pulimú-na-kolo ono kanu tondolo sirindumunga yuni ono unguri manda naa sembá. <sup>20</sup> Aku-na-kolo aku sipu nikirumunga konopu naa siku, kuruma ononga ungumu pilku liku selemelemonga konopu naa siku; „Pulu Yemone, mulu-koleana „molopa, ononga imbima topa mondorumumunga konopu siku molangi.” nirimu.

10:21-24

*Yesusini Pulu Yemo Kinia ‘Ange.’ Nimbole Kape Nirimu Semanemo*

<sup>21</sup> Yesusini Pulu Yemonga Mini Kake Sélimu kinia konopu awili-sepa sipale Pulu Yemondo nimbole: “Tata, Mulu Matolo Kinia Nokoko Moleno Ye Nokolimu, nane nu-kinia “Ange.” nikiru. ‘Olio pilipa kondoli pelemo. Olio oliolio ungumanga puluma pali pilipu kondolemolo.’ ningu pilielemene yomboma ono nane selio ulumanga pulumu ‘Naa piliangi.’ ningu naa ningu sirinu. Yombo bolango pame ‘mele, molko, nane niliu unguma komu sendeko molemele yomboma mindi nane selio ulumanga pulumu ‘Piliangi.’ ningu, ono ningu sirinu kanumunga nu kape nimbu “Peanga serinu.” nikiru. Sika Tata, nuni ‘aku sipa wendo ombá kinia konopu simbú.’ ningu aku siku serinumunga „aku sipa wendo okomo..” nirimu.

<sup>22</sup> „Pulu Yemondo aku sipa nimbole kelepa yombo moloringimando nimbole: „Mélema pali Tatane na sirimu. Yombo sene Malo paa sika molemo mele pilipa kanopa imbi silimú yombo se mólo; Lapane mindi yu kanopa imbi silimú. Yombo sene Lapa paa sika molemo mele pilipa kanopa imbi silimú yombo se mólo. Malone mindi kanopa imbi silimú; Malone ‘Lapa lipu ora siembo.’ nimbalá yomboma ono Lapa kanoko imbi singíla.” nirimu.

<sup>23</sup> Kanu-kinia yu lombili andoli yema ono onono moloringina pumba ‘Ono mindi piliangi.’ nimba onondo nimbole: “Ono mongone kanolemele mélema kinia uluma kinia kanolemele yomboma ono Pulu Yemone “Konopu peanga pepili molko kondangi.” nilimú aulkana molemele. <sup>24</sup> Nane onondo paa sika nimbu sikirumu: “U moloringi yomboma, Pulu Yemone ungu-umbu tondorumuma pilku yomboma

ningu siringi yema kinia, ye nokoli kingima kinia, kanu yombo awisili kiniá ono mongone kanoko molemele mélema kinia uluma kinia kanongendo "Kanamola!" ningu moloringi-na-kolo naa kanoringi. Ono kiniá komuni pilku molemele mélema pilingindu "Piliámola!" ningu moloringi-na-kolo naa pilieringi." nikiru." nirimu.

*10:25-37*

*Juda Yombomanga Opa-Tou Ye Sene Juda Ye Se Kondo Kolopa Lipa Tapondorumu Semanemo*

<sup>25</sup> Pulu Yemonga ungu-manemanga puluma pilipa kondorumu ye sene 'Yuni nimba kinjimbanje manda manjipu piliambo.' nimba Yesusindu mangilipa pilipa nimbale: "Ungu Mane Sili Yemo, na nambi sembó kinia konde molopo kondopo mindi puli ulu-pulumu limbuye?" nirimu.

<sup>26</sup> Yesusini yuntu nimbale: "Pulu Yemonga ungu-manema Mosisini bokuna torumu bokuna kanokole nambolka nimba molemo kanolenoye?" nirimu.

<sup>27</sup> Yemone pundu topa nimbale: "Pulu Yemonga ungu-manemane nimbale:

'Onone ononga kamelema kinia,

ononga minima kinia,

ononga tondoloma kinia,

ononga pilipa kondolima kinia,

akumane Ye-Awili Yawe ononga Pulu Yemo manjiku

tondolo munduku konopu mondangi.'

nimba pepa,

'Onone onono yu-melete-melete konopu mondoko

ononga kangimu onono

kondo kolko nokolemele mele

aku sikula pulu lemó yomboma

konopu mondoko nokoko molangi.'

nimba pelemo." nirimu.

<sup>28</sup> Yesusini yuntu nimbale: "Nu paa sika ninkumu. Nu aku siku senu liemu molopa mindi puli aulkana puni." nirimu.

<sup>29</sup> Aku-na-kolo Pulu Yemonga ungumanga puluma pilipa yomboma mane sili yemone 'Yombomane 'Na paa pilielemo yemo' ningu piliangi.' nimba kelepa nimbale: "Nanga pulu lemó yomboma namele?" nirimu.

<sup>30</sup> Yesusini ungu se pundu topa nimbale:

"Juda ye se kolea-awili Jerusalleme mundupa kelepa kolea-awili Jeriko pumbá purumu kinia wa noli yema ongo yunga mulu-maminia toroko kulkuliku yu toko taltoko ono puringi. <sup>31</sup> Kanu-kinia Pulu Yemo popo tondoli ye se kanu aulkamonga maniando pumbá pumbale nirimununi, yemo aulkana lierimumu omaba kanopale yu lierimuna siye kolopa aulka kiririma ekendonga omaba purumu. <sup>32</sup> Pe aku sipala Pulu Yemonga kongono sendeli talape LLipai ye se yemo toko taltoringina omaba kanopale yu liepili siye kolopa aulka kiririma ekendonga omaba yu purumula.

<sup>33</sup> Aku-sipa na-kolo Sameria ye se kanu aulkana pumbá ombate yemo lierimuna omaba kanopale yu kondo kolopa, <sup>34</sup> lierimuna nondopa pumba kangi toringimanga wambola kinia no-waene kinia ondopa kandondopale banisini ka tondopale nirimununi, pe yuni yu kangulupa ola lipa yunga kongi-dongi bulu-mingina ola taltopa memba pumbale yombo ponenge ongo pe-pu-pu seringi ulka senga memba pumba taltopa nokopa molorumu. <sup>35</sup> Peringili kinia ipulieli-u yu pumbá sepale nirimununi, kou paip kina mele wendo lipa ulka pulu yemo sipa nimbale: "Yu nokoko kondoyo. Pe i sikiru koumu manda naa sepa nunga kou mare olandopa pumu liemu pe kelepo yando ombole nunga kou pundu tombo." nimba Sameria yemone nirimu." nimba Yesusini aku nirimu.."

<sup>36</sup> „Aku nimba Yesusini kelepa nimbale, “I ye yopoko ongo puringimanga ye wa nolimane toko taltoringi yemonga pulu lierimu yemo nawe? „Juda ye u-pulu-pulu ongo kanoko we ongo puringili yetolonga se molo Juda yomboma-kinia anju yando konopu kiri panjilimili yombomanga ye akilepa orumu yemoye,?” nimba mangilipa pilierimu.

<sup>37</sup> Pulu Yemonga ungumanga puluma pilipa yomboma mane sili yemo yuni nimbale: “Yemone yu we kondo kolorumu yemo lémo.” nirimu.

Kanu-kinia Yesusini yundu nimbale: “Nu pungu aku siku se-pu.” nirimu.

**10:38-42**

### *Yesusi Kinia Ambo Mata Mariatolo Pea Moloringi Semanemo*

<sup>38</sup> Kanu-kinia Yesusi kinia yu lombili andolima kinia ono ongo punguli kolea senga pumba ambo Mata yunga ulkana “Pea molamili ou.” nirimu kinia yu akuna purumu.

<sup>39</sup> Mata yunga genu Maria molopale yu Yesusini ungu peanga nilimú nimbámo ‘Piliambo.’ nimba Yesusi molorumuna omiba nondopa mania molopale nirimumuni, Yesusi ungu nimba molorumu mele yu pilipa molorumu.

<sup>40</sup> Aku-sipa na-kolo Mata yuyu kere-langi kalondopa, kongono sepa molopale yu kongono takaraki lierimu-kulu kanu kongonomo mindi pilipale Yesusi molorumuna pumba nimbale: “Ye-Awilimu, nanga genu na lipa naa tapondokomo-na na nanu mindi kere-langi simbundu kongono sepo moltoro kanokole kondo naa sekemoye? Yuni na ‘Omiba lipa tapondopili.’ ni.” nirimu.

<sup>41-42</sup> Aku nirimu kinia pilipale Yesusini yundu pundu topa nimbale: “Ambo Mata, ulu awisili mele nu konopu awisili kimbu siku konopu umbuna sepili moleno-na-kolo ulu selu mindi nu naa pilku seleno. Kanu ulu peangamo Mariane ‘Sambo.’ nimbale ‘nanga ungumu pilipa, molemo. Kanu ulu peangamo yuni naa sembá aulka se mólo.’ nirimu.

## 11

**11:1-13**

### *Pulu Yemo Kinia Ungu Nímbu Mawa Semolomonga Ungu Se*

<sup>1</sup> Walte, kolea senga, Yesusi yu Pulu Yemo kinia ungu nimba molopale pe nimba pora sirimu kinia yu lombili andoringi ye sene yundu nimbale: “Ye-Awilimu, olio Pulu Yemo kinia ungu nimulú mele mane sieni. „No Lindeli, Jono yu lombili andoringi yema mane sirimu mele olio aku siku mane sieni.” nirimu.

<sup>2</sup> „Aku sipa nirimu kinia pilipale, Yesusini onondo nimbale: “Ono Pulu Yemo kinia ungu ningíndu i-siku mele niengi:

“Tata,

yombomane ‘Nu imbi ola molopa,  
ye kake seli peangamo moleno.’ ningu molangi.

Nu ye nokoli kingimu molko  
yomboma nokoni walemo wendo opili.

<sup>3</sup> Kiniá kepe pe alieli kepe  
olio nomolo kere-langima siyo.

<sup>4</sup> Yombomane olio seko kinjilimili kinia  
siye kolopo ungu se naa selemolo kene

olione nu sepo kinjilimulu kinia  
nuniaku sikula siye kolko

olio ungu se naa seyo.

Olio ‘Ulu sene kondi topili.’ naa nieni.”  
ninguaku siku niengi.” nirimu.

<sup>5</sup> Aku nimba pe onondo ungu se pea nimbale: "Nu nunga pulu lemó yombo se paa ipulieli awi-amburumi molombana pungu yuntu ninguli: "Ano, ga mare siyo. <sup>6</sup> Ye ponenge se kolea senga pumbándo nanga ulkana pemba okomo-na-ko na ga se naa lemó kene nuni na ga mare si." nilina kinia

<sup>7</sup> yuni nundu nimbale: "Nuni na umbuna se aku siku naa si." nilka. "Bolangoma kinia u ulka-kuna sipu uru pemulu kene na ola molopo wendo ombo mélse nu manda naa simbú, mólo." nilka.

<sup>8</sup> Nane onondo nimbu sikiru: "Yu gena molemomonga ola molopa ga naa silka-na-ko na nuni yu kimbu-kimbu siku mawa selinamonga yu siye kolopa wendo omba ga silka." nikiru.

<sup>9</sup> Aku selkamonga ono „nanga lombili andolima,ndo ungu se pea nikirula: „Lapa, Mulu-Koleana Molemo Yemo, „mélema mawa seko "Si." niengi. Aku senge kinia mélema sika simba lingí. „Lapa molemona, „mélema korangi. Aku senge kinia mélema sika kanoko lingí. Ulka-kerepuluna gilku "Sukundu wamili." niengi. Aku ningí kinia "Sukundu waa." nimba ulka-kuna lindimba. <sup>10</sup> Mawa senge mélema sika simba lingí, koronge mélema sika kanoko lingí, "Sukundu wamili." ningí kinia sika ulka-kuna lindimba. Aku sembá kene aku saa." nikiru.

<sup>11</sup> Ononga ye se yunga malo ombale "Tata, oma se nambo si." nimbá kinia yunga lapane wambiye se simbaye? <sup>12</sup> Molo kangomone "Tata, kera-mulu se nambo si." nimbá kinia yunga lapane kiriworo molo makena se lipa simbaye? <sup>13</sup> Pe ono kiri-kiri molemele yombomane aku siku ononga bolangoma méle peangama silimili liemu, ononga mulu-koleana molemo Lapamone „méle paa olandopa simbamoo.. Yombomane yuntu "Mini Kake Sélimu olionga konopuna omba pepili si." ningu mawa senge yomboma yuni ono simba lingí." nirimu.

**11:14-23**

*"Yesusi Kinia Kurumanga Nokoli Setene Kinia Kopu Seko Kongono Selembele."*  
*Niringi Semanemo*

<sup>14</sup> Walte ye se yunga konopuna kuru se molorumu-na ungu manda naa nirimu kinia Yesusini kanu kurumu makoromba makororumu. Kurumu wendo omba ultu purumu kinia kanu yemo ungu nirimu. Aku serimu kanokole yombomane mini-wale munduku moloringi. <sup>15</sup> Aku-sipa na-ko yombo mare „Yesusi-kinia konopu kiri panjeringi, kanumane ninguli: "Kurumanga nokoli Belsipuli Yesusinga konopuna molopale yu tondolo silimú-na yuni kuruma topa makorolemo." niringi. <sup>16</sup> Yombo marene Yesusi manda manjiku "Nambolka nimbánje." ningu yuntu ninguli: "Nu sika Pulu Yemone 'Kongono sendani.' nimba lipa mundorumunje kanamili, mulu-koleana „Pulu Yemone mindi manda sembá, ulu-tondolo se sei." niringi.

<sup>17</sup> Onone aku siku konopumane pilieringi mele Yesusini pilipale „Yesusi Setene-kinia opa-tou moloringilimunga Setenene yu naa lipa tapondolka mele paa piliangi." nimba, onondo nimbale: "Yombo talape se konopu seluna naa pupili molko suku-singina ówa panjiku ono onono opa seko lupa lupa molemele kinia kanu talapemo pora nilimú. „Molo, ulka seluna pelemele yomboma konopu seluna pupili naa molko ono onono opa selemele kinia kanu yombo talapemo sungu siku lupa lupa molonge. <sup>18</sup> Aku sipala, Setenene yunga kuru se makorolkanje aku selkamonga yunga talapemo kinia opa mele selka. Pe yunga talapemo nambi sepa manda molemoláye? „Pora nilka.. Onone nando "Belsipulini yu lipa tapondolemo-na yuni kuruma makorolemo." nikimili kanumu. Sika aku selkanje Belsipuli yunga talapemo pora nilka.

<sup>19</sup> Unzu se piliangila. Nane Belsipulinga tondolomone kuruma makorolio liemu ononga yemane nawenga tondolomone kuruma makorolemeleye? Akumunga, „ononga ye kuruma makorolemele yemane 'Pulu Yemone olio tondolo silimú-na olione kuruma makorolemolo.' ningu pilielemele-na, onone nando i nikimili unguma

kanu yemane pilku apurukuli "Ono kolo tokomele." ningí. <sup>20</sup> Aku-sipa na-kolo sika Pulu Yemone na tondolo silimú-na nane kuruma makorondú liemu Pulu Yemo ye nokoli kingimu molomba walemo ono molemelena koronga wendo omu." „nirimu.„

<sup>21</sup> "Ye enge nili sene opa mélema ambolopa yunga ulkamo nokopa kondolemo kinia ye sene we manda sukundu ombo mélema wa naa limú. Yunga ulka lemó mélema manda lemó. <sup>22</sup> Kanu ulka nokolemo pulu yemone 'Nanga opa mélema ambolopole nanga mélema manda nokopo kondombo.' nilimú-na-kolo yunga opa-tou ye se tondolo olandopa pulimúmu ombo yu tomba sepale opa-toumuni ulka nokolemo yemo topa mania mundupa yu ambololemo opa mélema anju lipa, yunga ulkana lemó mélema lipa memba pumba yunga pulu lemó yomboma moke sepa silimú.

<sup>23</sup> Na naa lipa tapondolemo yombomone na-kinia opa-tou molemo. Yombo sene na lipa tapondopa „kongi sipisipima“ sukundu naa limú yombomone „kongi sipisipima“ topa bulu-balú silimú." „nirimu.„

11:24-26

### *Kuru Se Yombo Senga Konopuna Kelepa Orumu Semanemo*

<sup>24</sup> „Yesusini ungu se pea nimbole:“ "Kuru se ye senga konopuna wendo ombale, no naa mololi koleamanga pumba manda koro molomba kolea-kolo se korolemo. Se naa kanopa lendepa yuni nimbole: 'Na u molopole wendo ondu ulkana kelepo pambo.' nimba. <sup>25</sup> Aku nimbole yu ombo yu u molopa purumu ulkamo kanolemo kinia, ulka pole lepa sepa peanga sepa we lemó kinia kanopale nilimúmuni, <sup>26</sup> yu kelepa anju pumbale, kuru kara puli paa olandopa yopoko-pakara lipa memba ombo ono pea kanu ulkana sukundu pungu molemele. Kanu-kinia kanu yemo u molopa kinjilimú-na-kolo pe paa kamu olandopa mele molopa kinjilimú." nirimu.

11:27-28

### *Yomboma Konopu Singí Aulkamo Yesusini Nimba Sirimu Semanemo*

<sup>27</sup> Yesusini aku sipa nimba molopili maku toko moloringina ambo sene ungu tondolo sepa nimbole: "Nu paa seko kondolenomonga ambo nu memba ame sirimumu yu Pulu Yemone "Konopu peanga pepili molko kondangi." nilimú aulkana molemo." nirimu.

<sup>28</sup> Yesusini nimbole: "Sika na-kolo yombo Pulu Yemonga ungumu pilku liku seko molemele yomboma ono Pulu Yemone paa olandopa "Konopu peanga pepili molko kondangi." nilimú aulkana molemele." nirimu.

11:(16),29-32

### *Yesusindu "Nu Sika Pulu Yemone Lipa Mundorumunje Kanamili, Ulu-Tondolo Se Sei." Niringi Kinia Yesusini Pundu Topa Nirimu Mele Semanemo*

<sup>29</sup> Yesusi molorumuna yombo awisili sukundu ongo liku maku toringi kinia yuni onondo nimbole: "Kiniá mana molemele yomboma yombo-kirima mindi molemele. Ono seko kinjiku Pulu Yemo liku bulu silimili yombomane "Na molopo niliu mele sikanje, kanamili kene Pulu Yemone mindi ulu-tonadoloma manda selemo mele sei." ningú na mawa selemele. Aku-sipa na-kolo „na Pulu Yemo kinia kopu sepo kongono selembolo mele lipa ora simba ulu, se wendo naa ombá. „Pulu Yemone ungu-umbu tondorumuma pilipa yomboma nimba sirimu ye, Jona-kinia wendo orumu ulu akumuni mindi lipa ora silimú manda kanonge. <sup>30</sup> Jona-kinia „oma awili se-kinia, ulu-tondolo se wendo orumu ulumuni Ninipa yomboma-kinia ulu umbuna se wendo ombá mele, lipa ora sirimu aku sipa mele Mania Omba Mana-Ye Au Lierimu Yemo-kinia ulu-tondolo se wendo ombá ulumuni kiniá molemele yomboma-kinia ulu se pe wendo ombá mele lipa ora simba. „Lipa ora simba ulu se lupa wendo naa ombá, naa kanonge..„

<sup>31-32</sup> "U kolea-awili Ninipa yomboma ,sika molko kinjeringi-na-ko Pulu Yemone ungu-umbu tondorumu mele, Jonane ,pilipa, pumba Ninipa yomboma nimba sirimu kinia pilkuli seko kinjeringi mele kanoko kiri pilku konopu topele toko molko kondoringi. Aku seringimunga kiniá molemele yombomane Jonanga olandopa ye se ya molemo yemonga ungumu pilku mokoli seko naa pilielememonga kote walemo pe wendo ombá kinia Ninipa yombomane kotena gilku, kiniá molemele yombomando "Seko kinjeringi. Mindili nonge kinia papu." ningí.

"U ,olio Isirele yombomanga ye nokoli kingi, Sollomonu yu ye paa tondolo se molopa, yu ungu lupa lupama pilipa kondolimu pepili molorumu mele kolea Sipa nokorumu ambo nokoli kuwinimu pilipale, Sollomonone ungu peangama mindi nirimu mele pilimbando yu kolea suluna molopale ,Sollomonu molorumuna, wale awisili aulkana pelepa orumu. Aku sipa serimumunga, ye nokoli Sollomononga olandopa ya molemo yemone nilimú ungumu kiniá mana molemele yombomane naa pilku, mokoli selemelemonga kote walemo wendo ombá kinia kolea Sipa ambo nokoli kuwinimuni nimbale: "Nane Sollomonone ungu peanga nirimu mele pilimbundu aulka suluna orundu-na-ko Sollomononga olandopa molorumu yemone nirimu ungumu ono naa pilku, mokoli serigi yomboma aku seringimunga ono papu mindili nonge." nimbá." ,nirimu.."

11:33-36

### *Pa Sélimunga Ungu Mare*

<sup>33</sup> „Aku nimbale Yesusini ungu se pea nimbale: „Yombomane sepe-llame kandokole loyakolona naa taltoko, mingina sukundu naa taltokole nilimiilimuni, ‘Ulkana sukundu pa sepili. Yombo ongema kolea kanangi.’ ningu polona ola taltolemele.” ,nirimu..”

<sup>34</sup> Nunga mongomo nunga kangimunga sepe-llame mélemo. Aku kene nunga mongo peanga gilimú kinia nu kangi pali pa sepili moleno kinia nu molko kondoleno. Aku-sipa na-ko nunga mongomo kiri lemba kinia nunga kangi pali simbulu topili andoni. <sup>35</sup> Akumunga, nunga kangina pa seli pembamo ‘topele topa simbulu naa topili.’ ningu ,kangi pa sepili molemo mele molko kondoyo,. <sup>36</sup> Nunga kangina pa sepa sengepea sepili molko simbulu selu kepe naa topili moloni kinia nunga kangi konopuma pali pa sepili moloni. Sepe-llame pa selemo kanolemolo mele nunga kangi konoputolo pa sepili moloni.” nirimu.

11:37-54

### *Parisi Yema Kinia, Pulu Yemonga Ungu-Manemanga Puluma Pilku Kondoringi Yema Kinia, Yesusini Iri Tombando Ungu Talo-Pakara Nirimu Semanemo*

<sup>37</sup> Yesusini ungumu nimba pora sirimu kinia kanu Parisi yemanga sene Yesusindu nimbale: “Kere-langì pea nambili ou.” nimbale yu-kinia pumba kere-langì nombando mania molorumu. <sup>38</sup> Aku-sipa na-ko yu u ki kulumiye naa topale ga we norumu kanopale kanu Parisi yemone konopu awisili kimbu sirimu.

<sup>39</sup> Yesusini ,yu konopu kimbu sirimu mele, pilipale ,ungu-iku mele topa, yundu nimbale:

“Ono Parisi yema pellete kinia kapo kinia ultukundu kulumiye tolemele-na-ko akumunga sukundu, ononga konopumanga sukundu mele, kalaro awisili molemo. Ulu-pulu-kirima kinia, mélema wa limili ulu-pulumu kinia akuna pelemo. <sup>40</sup> Ono paa aroma tolemele. Kangi serimu yemone konopumu pea naa serimuye? ,Peatolo serimu kene, ono kangi no leko kake sepili molemele mele aku siku ononga konopu kake sepili molongi liemu peanga. <sup>41</sup> Ono konopu topele tokole yombo koropama kondo kolko ononga taltolemele mélema singí kinia ononga konopu kalaro molemomo kolali sepa kake sepili molonge mele yombomane kanonge.” ,nirimu..”

<sup>42</sup> Parisi yema, ono mindili nongo paa molko kinjingí! Onone kaliana olemo mele kangama elkepa kulua kemu aku sipa mélema mengo kambu toko rureponga talo rureponga talo ningu liku taltokole selu selu ningu wendo liku 'Pulu Yemonga kongono sendeli yema siemili.' ningu silimili. Pulu Yemone aku siku 'Saa.' nirimu mele ono papu selemele-na-kolo ulu olandopa uluma naa selemele. We-yomboma kondo naa kolko, Pulu Yemone yomboma konopu mondolemo mele ono manda manjiku yomboma konopu naa mondolemele. Aku siku ulu olandopa mele selemolánje peanga. Kiniá ulu maniandopama selemele mele munduku naa kelkole aku uluma kinia ulu olandopama kinia peatolo selemolánje peanga. Aku-sipa na-kolo aku siku naa selemelemonga ono mindili nongo paa molko kinjingí!

<sup>43</sup> Parisi yema, ono Juda yomboma maku toko Pulu Yemonga ungumu pilielemeneulkana sukundu punguli mania molongendo ye awilima molemele polo peanga akuna 'molamili.' ningu mendo pungu polo akuna konopu siku molemele. Yomboma maku toko molemele koleamanga mongo-kenge seko andonge kinia 'We-yombomane olio kanoko kape niengi.' ningu pilkuli konopu siku pilku molemelela. Aku selemelemonga ono mindili nongo paa molko kinjingí!

<sup>44</sup> „Parisi yema,„ ono yombo óno-kolea senga 'Yombo inia óno selemele.' ningu naa pilku walu siku kimbu kululimili mele ono aku siku molemelemonga mindili nongo paa molko kinjingí!" nirimu.

<sup>45</sup> Yesusini aku sipa nirimu pilkuli Pulu Yemonga ungu-manemanga puluma pilipa kondorumu ye sene yundu nimbale: "Ungu Mane Sili Yemo, 'Nuni Parisi yema aku siku iri tokonomonga olio kepe iri tokono.' konopu lekemolo." nirimu kinia pilipale

<sup>46</sup> Yesusini kelepa ono ,iri topa, nimbale: "Sika ninkinu. Ono Pulu Yemonga ungu-manemanga puluma pilku kondoli yema mindili nongo paa molko kinjingila! Onone ungu-mane siku 'Saa.' nilimili mele we-yomboma ono pilkuli sengendo umbuna kololemele. Aku siku umbuna awisili mindili siku menge mele 'Meangi.' ningu sikuli onone onono kanga-kolte kepe 'Lipu tapondopo meamili.' naa ningu molemelemonga ono ,kepe, mindili nongo paa molko kinjingila!

<sup>47-48</sup> „Ono Pulu Yemonga ungu-manemanga puluma pilku kondoli yema,„ ononga anda-kolepalimane Pulu Yemone ungu-umbu tondorumuma pilku yomboma ningu siringi yema toko kondoringi. Kiniá, yandopa, ono kanu yema óno seringi koleama au silimili. Anda-kolepalima onone kanu yema toko kondoringi pilku peanga pilkuli pe kiniá ono kanu yema 'Papu toko kondoringi.' ningu onone óno seringi koleama au silimilimunga ono mindili nongo paa molko kinjingila!

<sup>49</sup> „U ononga anda-kolepalimane aku siku seringi, kiniá onone aku siku selemelemonga Pulu Yemo yuyu ungu pali pilipa kondoli yemone u nimbale: "Nane ye mare ungu-umbu tondopo 'Onone yomboma ningu siengi.' nimbu lipu mundupu, ye mare 'Nanga kongonomo sende-paa.' nimbu lipu mundumbu kinia yombomane mundumbu yemanga mare mindili siku, mare toko kondonge." nimba Pulu Yemone nirimu.

<sup>50-51</sup> "Koro-u Pulu Yemone ma kokele sepa wamorumu kinia onone Pulu Yemone ungu-umbu tondorumuma pilku yomboma ningu siringi ye kanuma toko kondoko, pe yandopa yandopa kanu sili yema pali toko kondoringi. Koro-u Atame malo Epele toko kondoko, pe yandopa yandopa kanu sili ye lupa lupama toko kondoleko pungu, pe kamu Pulu Yemone ungu-umbu tondorumu unguma pilipa yomboma nimba sirimu ye Sekaraya Pulu Yemo ,popo toko kaloli, ulka-tembelena sukundu toko kondoringi. Kanuna sukundu suluminia kake sélimu anjukundu lepa, Pulu Yemo popo toko mélema kaloringi polomo yakondo lierimu, kanu suku-singina yu toko kondoringi. U moloringi yombomane kanu yema toko kondoringimunga Pulu Yemone ono sika "Mongo liltingi kene mindili nangi." nirimu-na-kolo kiniá molemele yomboma ono

Pulu Yemone kote pilipale anda-kolepalimane aku siku seringimunga ono "Mongo liltangi kene mindili nangi." nimbála.

<sup>52</sup> Pulu Yemonga ungu-manemanga puluma pilku kondoli yema, onone ungu-manemanga puluma pilku kondolemele-na-kolo "We-yombomane naa piliangi." ningu ono pilingí aulkamo pipi silimili. Ono Pulu Yemonga bokuna molemo ungumu alieli kanolemele-na-kolo apurukuli Pulu Yemone "Ye se ono nokopa kondopa lipa tapondopili." nimbu, nimbu taltopo lipu mundumbu." nirimu yemondo nimba bokuna molemo unguma kanokole pilku sundulimili. Sumbi siku pilingí aulkamo ono naa pulimili; bokuna kanu yemondo nilimú unguma 'Piliamili pamili.' ningu molemele yombo lupama pilingí aulkamo "Mólo." ningu pipi silimilila. Aku selemelemonga ono mindili nongo paa molko kinjingí!" nirimu.

<sup>53-54</sup> Yesusini ,aku ungu mu nimba pora sipale, aku ulkamo mundupa kelepa pumbá purumu kinia yuni iri torumu ye Parisima kinia Pulu Yemonga ungu-manemanga puluma pilku mane siringi yema kinia onone 'Yu ungu nambolka ungu mare pea nimbole, yu ungu nimba kinjimba kinia yu kote sendemolo.' ninguli onone ungu lupa lupa awisili popenge seko mangilku pilkuli "Pundu toko ni." ningu tondolo munduku niringi.

## 12

12:1-3

*Yesusini "Parisi Yema Selemele Mele Manda Manjiku Naa Sangi." Nirimu Semanemo*

<sup>1</sup> Kanu-kinia Yesusi molorumuna yombo tausini awisili liku maku toko gilieringina ekelepa sepili gilieringi kinia yu lombili andoringimando u kumbi lepa nimbole:

"Ono liepi-liepi topo, 'Parisi yema pellawa akoli méle isi taltolemele kanoko kondaa.' nikiru. Ononga isi taltolemele akumu onone , 'Pulu Yemonga ulu peangama selemolo.' ningu , kolo toko topele-mapele tolemele ulumu. , 'Akumu manda manjiku naa sangi.' , nimbu liepi-liepi tokoro. , 'Parisi yemane sika seko kinjiku molemele mele kamu lopi manda naa senge.,' <sup>2</sup> Aki tolemo ulumanga selu kepe pe aki naa topa pali mona lemba. Lopi selemo ulumanga selu kepe pe lopi naa sembá. Kanu uluma kinia unguma pali yombomane pali pilingí. <sup>3</sup> Simbulu tolina ungu niringima yombomane pa selina pilingí. Ulka suluminiana ungu ólo toko niringi unguma ulka imuna ola gilku ru ningu ningí." ,nirimu.]

12:4-7

*Pulu Yemo Mindi Pipili Kolangi Ungu Se*

<sup>4</sup> Nanga pulu lemó yomboma, onondo ungu se nimbu siembo: "Kangimu mindi toko kondokole pe kelko minimu pea ulu se manda naa senge yomboma pipili naa kolangi." nikiru. <sup>5</sup> Aku-na-kolo ono paa pipili kolonge yemo nimbu siembo: "Kangi topa kondopale pe mini pali sepe-koleana manda topa mundumba ,Pulu Yemo, yu pipili kolangi. Paa sika nimbu sikiru. Yu pipili kolangi." nikiru.

<sup>6</sup> Kera kaltendepele paa kangamo molemo, topo toko lingíndu kera se-pakara kou kololi talo mindi pulimú kanumu. Aku-na-kolo Pulu Yemone kanu kerama nokombando komu naa silimú. <sup>7</sup> Piliame! Ono ,na lombili andolima,, ononga penge-indima kepe yuni koronga selu selu nimba pali kambu torumu. Kera kaltendepele yu kou paa koltalo mele pulimú-na-kolo kanu keramo Pulu Yemone kanopa molemo. Ono yomboma paa oladopa awilima kanopale ono paa nokopa kondopa molomba ,kene pipili naa kolaa.," ,nirimu..

12:8-12

*"Olio Yesusinga Yomboma Molemolo." Nimulúndu Pipili Naa Kolamili Ungu Se*

<sup>8</sup> Nane onondo ungu se nimbu siembo: "Yombo sene yombomanga kumbikerena ola gilipa 'Na Yesusinga yombomo molio.' nimbá kinia pe Pulu Yemonga angellomanga kumbikerena Mania Ombo Mana-Ye Au Lierimu Yemone ola gilipa "Kanu yombomo nanga yombo se." nimbála. <sup>9</sup> Aku-sipa na-kolo yombomanga kumbikerena "Yesusi yu nawe? Yu na naa pilkiru." aku sipa nimbá yombomo pe Pulu Yemonga angellomanga kumbikerena Mania Ombo Mana-Ye Au Lierimu Yemone "Aku yombomo yu nawe? Yu na naa pilkiru." nimbála.

<sup>10</sup> Mania Ombo Mana-Ye Au Lierimu Yemo ungu-taka tondopa ungu nimba kinjilimú yombomo aku sipa ulu-kiri selemoma 'Pulu Yemone, 'Mania pupili.' nimba siye kolomba. Aku-sipa na-kolo Mini Kake Sélimu ungu-taka tondopa, ungu nimba kinjipa, yunga imbimu marake selemo yombomo aku sipa ulu-kiri selemomo 'Mania pupili.' naa nimba, paa siye naa kolomba." nikiru.

<sup>11</sup> Kanu-kinia pe ono 'nanga yomboma molonge kanokole' ono ongo ka siku, ono maku toko Pulu Yemonga ungumu pilielemele ulkamanga ye awilima kinia, ye nokolima kinia, gapomano ye awilima kinia ono molongena ono mengo pungu kote sendenge kinia 'Kotena nambolka unguri nimulúnje? Olio ungu se mangilku pilingí kinia nambolka unguri pundu topo nimulúnje?' ningi mini-wale naa mundangi. <sup>12</sup> Akuna Mini Kake Sélimuni onone anju ningí mele mane simba kene mini-wale naa mundangi." nirimu.

12:13-21

### *Ye Kamako Sene Aroma Topa Serimumunga Ungu-Ikumu*

<sup>13</sup> Yesusi molorumuna liku maku toringi yombomanga ye sene yundu nimbale: "Ungu Mane Sili Yemo, nanga genumu kinia oltonga lapane sirimu monge-mélema yuni 'Na mare moke sepa sipili.' ni." nirimu.

<sup>14</sup> Aku-na-kolo Yesusini yundu pundu topa nimbale: "Yemo, 'Nane ononga kote pilindiku ononga mélema moke sendei.' nimba nawene na nimba taltorumuye? Yombo sene nando aku sipa naa nirimu kanumu. Nanga kongono se mólo." nirimu.

<sup>15</sup> Aku nimbale yuni onondo kelepa nimbale: " 'Méle awisili lipu taltopo kamako molambo.' ni naa ningi, 'Mélema lili ulu-pulumu yu ulu-pulu-kirimu kene aku naa sambo.' konopu leko molangi. Yombo sene méle awisili lipa taltolemomonga mini paliconde molopa kondomba aulkamo naa lemó." nirimu.

<sup>16</sup> 'Aku nimbale Yesusini 'Onondo nikiru ungumanga pulumu kamu piliangi.' nimba, yuni ungu-iku se topa nimbale:

"Walte ye kamako se molopale yunga kaliana kere-langí paa awisili orumu.

<sup>17</sup> Akumunga yuni yuyu nimbale: "Kere-langí taltolio ulkama pali sengepea semu, kere-langí awisili kakena lepa we lemó kene nane nambi samboye?" nirimu. <sup>18</sup> Pe kelepa yuni yuyu nimbale: "Kiniá na piliporo. Na i-sipu sambo. Na kere-langí taltolio ulkama sikisipuli kere-langí taltombo ulka paa awilima kelepo takopole akumanga nanga rasi-witi kinia kere-langí kinia nanga kaliana olemo kere-langima pali taltambo. <sup>19</sup> Akuna taltopole na nanu pilipu nimbúndu: Na papu. Na kere-langí awisili, kalia awisili ombo pumbá kinia nombo molombo mele lemó kene koro molopo, kongi nombo, no-waene nombo, konopu sipu molambo." nirimu. <sup>20</sup> Aku-sipa na-kolo Pulu Yemone kanu yemondo nimbale: "Ye aromamo. Kiniá ipulieli nane nunga minimu ombo limbu kinia nunga taltoleno mélema nawene limbaye?" nirimu." nimba Yesusini nirimu..

<sup>21</sup> 'Ungu-ikumu topa pora sipale ungu se pea nimbale: 'Aku sipa mele, 'Na méle kande-kandema taltolio.' nilimili yomboma Pulu Yemone ono kanopale ono yombo koropa pulima nimba pilielemo. Pulu Yemo kanopa peanga pilielemo ulu-puluma

naa seko molemele yomboma ononga minima koropa pupili mele molemele. Kanu yomboma ono aku ungu-iku tokoro yemo mele molemele.” nirimu.

**12:22-31**

*Yesusini Yu Lombili Andoringimando “Mini-Wale Munduku Konopu Awisili Naa Leaa.” Nirimu Ungumu*

<sup>22-23</sup> „We-yombomando, aku sipa nimbale Yesusini yu lombili andolimando kelepa nimbale: „Kolonge kinia mana-mélemane ono naa lipa tapondomba, kene nane onondo ungu se nimbu siembo: ‘Kangikundu molopo kondamili.’ ningu konopu awisili kimbu naa siengi. Kere-langi nongemonga kepe no nongemonga kepe mulu-maminia pakongemonga kepe akumanga konopu awisili kimbu siku naa molangi. Ono manda molonge mele olandopa, kere-langi nonge mele maniandopa; ononga kangi yu olandopa mele, mulu-maminia pakonge maniandopa mele kene kere-langi nonge mele kinia, mulu-maminia pakonge mele kinia, konopu awisili kimbu naa siengi. <sup>24</sup> Kerama kaname. Kere-langi se panjikuli nou lemó kinia liku mengo ulkando pungu taltoko naa nolemele-na-kolo Pulu Yemone kerama kere-langi silimú. Kerama we-méle, ono yomboma olandopamonga yuni ono paa nokomba. <sup>25</sup> Ononga yombo sene konopu awisili kimbu simbamone yu kolomba ena se manda ‘We liepili.’ nimbáye? Manda naa nimbá. <sup>26</sup> Onone ulu kanga-kolte aku sipa mele se manda naa selemelemonga ulu wema ono nambi semu-na konopu awisili kimbu siku molemeleye?

<sup>27</sup> Pellawa sindima kaname. Pellawa sindimane kongono kála seko naa seko, mulu-maminia se seko naa wamolemele-na-kolo pellawa sindima molemele mele olandopa, ye nokoli kingi, Sollomon kongono awisili sepale wale paa peangama pakopa au nirimu mele maniandopa. <sup>28</sup> Era sindi tolemoma kiniá-mele molemo, opali-mele poroko sepena kalolemelema Pulu Yemone aku sipa nokopa kondolemo liemu ono ‘Pulu Yemone olio manda nokbanje?’ ningu kanga-kolte mindi pilielemene yomboma pakonge mélemanga yuni manda lipa naa tapondombaye? Ono lipa tapondomba.

<sup>29</sup> „Pulu Yemone kerama kinia era sindima kinia aku we-mélema aku sipa nokolemo, kene ono konopu awisili kimbu sikuli ‘Es, kere-langi se sena lipu nomolonje?’ ; molo ‘No sena kolopo nomolonje?’ ningu pilku naa molangi. <sup>30</sup> Pulu Yemonga yomboma naa molko ultukundu molemele yombomane aku siku selemele-na-kolo ononga Lapa „Pulu Yemone, ono yunga yombomanga méle mólo tolemoma kanopa molemo ,kene ono kere-langi nongemanga kinia méle pakongemanga kinia konopu awisili kimbu naa siengi.. <sup>31</sup> „Pulu Yemo, ye nokoli kingimu molopa yomboma nokolemo uluma ‘Kumbi lepo sambo.’ konopu leko molangi. Aku senge kinia yuni we-mélema kepe ono simba.” „nirimu..”

**12:32-34**

*Méle Kande-Kandema Mulu-Koleana Taltolemolomonga Ungu Se*

<sup>32</sup> Nanga kongi sipisipi koltalo, ononga Lapa walte ye nokoli kingimu molopa yomboma nokomba kinia ‘Ono pea ye nokolima molko yomboma nokangi.’ nimbá. Yu aku sipa sembando konopu sipa molemomonga pipili kolko naa molangi.

<sup>33</sup> Akumunga ono taltolememele mélema kou-mone liku aku kou-mone lingíma yombo koropama moke seko siengi. Aku siku sekole pe kou kamu mania naa puli koumu liku taltoko, méle kande-kandema liku mulu-koleana ,pe pungímunga, taltoko sangi. Akuna wa lili yema ongo wa naa liku, koka molo lurinia melemane ongo seko kinjiku naa senge. Ono akuna taltonge mélema kamu manda lemba. <sup>34</sup> Ononga taltolememele mélema lemó kolea akuna ono konopumane pilku konopu mondoko molemele kene ‘mulu-koleana mindi mélema liepili.’ ningu molangi.” nirimu.,

**12:35-48**

*Yesusi Wale Talo-Sipa Kelepa Ombámonga “Kongonomo Mimi Siku Seko, Nokoko Kondoko Molangi.” Nirimu Ungu-Iku Talo  
Se: 12:35-40*

*Kendemande-Yombomane Ononga Ye-Awilimu “Yando Ombá.” Ningu Nokoko Molemele Ungu-Ikumu*

<sup>35</sup> „Na lombili andolima, onone ‘Ye-Awilimu kiniá ombánje.’ ningu mulu-maminia pakoko, kako toko, kiya kandoko, molangi. <sup>36</sup> Ye awili se kolea senga pumba, ye se ambo limba kere-langi koyolemele yomboma kinia anju kere-langi nomba molemo kinia yu kelepa ulkando ombámonga yunga kendemande-yombomane ‘Yu ombá.’ ningu ulka-kuna lindingindu nokoko molemele mele ono aku siku molangi. <sup>37</sup> Kanu kendemande-yombomanga ye nokolimu ombá yunga kendemande-yombomana kanopale, uru naa peko we molonge kanomba kendemande-yombomana ono konopu siku molonge.

“Nane onondo paa sika nimbu sikirumu: „Alieli kendemande-yombomane ononga ye-awilimu nokoko kere-langi kalondoko silimili mele yu aku siku nokolemolá-nakolo kendemande-yombomanga, ye-awilimuni, kanu kendemande-yombo peangama konopu sipa, yuni kongono-mulumbale pakopa onondo “Kere-langi noli polona molaa.” nimba ‘Kere-langi nangi.’ nimba ononga kongonomo sendepa ono nokomba.” nikiru. <sup>38</sup> Ipulieli awi-amburumi ombáne, kera gulta ko tomba kinia ombánje, ono uru naa peko nokoko molongi kanomu liemu ono konopu siku molonge.

<sup>39</sup> I ungumu konopu kimbu siku piliayo. Ulka pulu ye sene wa noli ye se yunga ulkamo ombá bultupa mélema wa limba enamo pilkanje ‘Wa noli yemo ombá.’ nimba nokopa molka kinia wa noli yemo yu manda sukundu naa olka. <sup>40</sup> Aku siku ono nokoko molaa. Mania Omba Mana-Ye Au Lierimu Yemo ombá enamo naa pilielemene kene ‘Yu sika ombá.’ ningu aku siku nokoko molangi.” nirimu.

*Se: 12:41-48*

*Kendemande-Yomboma Nokondolemo Kendemande-Yombomonga Ye Nokolimu Kelepa Ombale Kendemande-Yombomo-Kinia Semba Mele Ungu-Ikumu (12:35-40 pea)*

<sup>41</sup> Pitane yuntu nimbale: “Ye-Awilimu, aku ungu-iku toko ningu sakinumu olio ‘nunga lombili andolimando manjiku, ningu sakinu molo yombo wemando pea ningu sakinuye?’ nirimu.

<sup>42</sup> Ye-Awili, Yesusini, pundu topa nimbale:

“Kongono sendeli kendemande-yombo nawene kongono sepa kondondolemo kinia kanopale yunga ye awilimuni ‘Yuni kongono siliuma sumbi sipa selemomonga yu kongono simbú kinia sepa kondombamonga na kelepo konopu kimbu sipu naa molombo.’ nilimúye? Kendemande-yombo se aku sipa mele sepa kondopa molemomo kanopale yunga ye awilimuni yu nimba taltopa yuntu nimbale: “Nuni kongono sendeli kendemande-yomboma pali nokondoko ononga kere-langi nongema ena wa siliumunga ono nangi moke seko sieni, nokondoko molou.” nimba ‘yu senga pulimú.’ <sup>43</sup> Pe ye awilimuni kongono simumu kanu kongono sendeli kendemande-yombomone mimi sipa sendepa molopili ye awilimu kelepa omu liemu kendemande-yombomo yu konopu sipili. <sup>44</sup> Nane onondo paa sika nimbu sikirumu: “Kanu ye awilimuni kanu kendemande-yombomondo “Nanga méle taltolioma pali nuni nokondou.” nimbá.” nikiru.

<sup>45</sup> Aku-sipa na-kolo ‘ye awilimuni kanu kendemande-yombomondo nimbale: “Nanga kendemande-yomboma pali nokondou.” nimba senga pulimú kinia, kanu kendemande-yombomone “Nanga ye awilimu welea naa ombá.” konopu lepale yuni nokondolemo kendemande-yomboma kopene topa, kere-langi nomba no-tondoloma nomba amu topa, aku sipa sepa kinjipa molomu liemu <sup>46</sup> walte kanu kendemande-yombomo ‘Yunga ye awilimu ombá.’ nimba naa pilipa ‘kongono sirimu mele naa

sepa, walu sepa kinjipa molomba kinia ombá. Om̄ba ,kanu yombomo sepa molomba mele kanopale, yu paa kopene topa kondopa, yunga ungumu pilku mokoli seko kongono ambolko naa kondoli yomboma ,kolea kiri, molemelena ‘Pupili.’ nimba lipa mundumba.

<sup>47</sup> Kongono seli yombo se yunga ye awilimuni “I-siku i-siku sei.” nimbá ungumu sumbi sipa pilipale ungumu ta nimbá, molo ‘Nikimu mele naa sembó.’ nimba pilipa aku sipa pilipa lipa naa sembá yombo kanumu yunga ye awilimuni pe yu ‘Mindili paa awili sepa nopili.’ nimba wale paa awisili tomba. <sup>48</sup> Aku-sipa na-kolo “Sei.” nimbá mele mimi sipa naa pilipale we walu sepa kinjimba yombomo yunga ye awilimuni ‘Mindili kanga-kolte mele nopili.’ nimba wale kanga-kolte mele tomba. Yombo méle awisili siringi lipa taltorumu yombomo “Pundu toko méle awisili si.” ningí. Yombo “Méle awisili nokoko molou.” niringi yombomo “Kelko méle awisili si.” ningí.” ,nirimu.]

12:49-53

### *Yesusinga Ungumu Yomboma Pilkuli Opa-Tou Mele Molonge Mele Ungumu*

<sup>49</sup> „Na lombili andolima,, na ya ma-koleana sepe mundumbu orundu. Kanu sepemo iseli-u welea nolkanje papu. Na konopu silka.

<sup>50</sup> Na no limbu ulu akumu na-kinia wendo ombá. Ulu akumu iseli-u wendo naa okomomonga na konopu umbuna sepili molio.” ,nirimu.]

<sup>51</sup> “Ya mana-yomboma opa naa seko seluna konopu seluna pupili molangi.’ nimbu orundu konopu lekemeleye? Aku mólo. ‘Yomboma konopu lupa lupa pepili anju yando opa-tou mele molangi.’ nimbu orundu. <sup>52</sup> Kiniá kepe pe anjupa kepe ulka seluna pelemele yombomanga ,marene nanga ungumu pilku molko marene nanga ungumu pilku mokoli seko molkole,, ono onono opanale seko yombo se-pakara ulka seluna peko, yopoko onono molonge, talo ololo molongele, yu-mele-mele molonge. <sup>53</sup> Lapane malo-kinia opa sepa, malone lapa-kinia opa sepa, seluna manda naa molongele. Anumuni lemenu-kinia opa sepa, lemenuni anumu-kinia opa sepa, seluna manda naa molongele. Bamuni yunga malonga menu-kinia opa sepa, malonga menuni bamu-kinia opa sepa, seluna manda naa molongele. ,Kanu yomboma manda naa molonge..” nirimu.

12:54-56

### *“Kiniá Wendo Olemo Ulumanga Ulu-Pulumu Nambi Semu-Na Naa Pilielemeye?” Nimba Yesusini Mangilierimu Semanemo*

<sup>54</sup> Aku nimbale Yesusini liku maku toringi yombomando nimbale: “Onone kolea kolopale kupa tolemo kinia kanokole “Lo ombá lémo.” nilimili kinia lo sika olemo.

<sup>55</sup> Pe kelepa ipulielu poporome topa, kombokandi gilimú kinia kanokole “Ena tondolo sembá lémo.” ningu pilielemeye kinia ena sika selemo. <sup>56</sup> “,Naa pilkimulu.” nilimili-na-ko lo sika pilielemeye, yombo kolo toko topele-mapele tolima! Ono mulumu kinia ya mamo kinia kanokole ‘kolea i-sipa i-sipa sembá.’ ningu kanolemele-na-ko lo kiniá ,na mana orundu kinia, wendo olemo uluma kanoko molkole kanu ulumanga ulupulumu naa pilielemeye. Aku nambi semu-na ,lipa ora silimú mele, naa kanoko naa pilielemeye?” ,nirimu.]

12:57-59

### *“Yombo Sene “Nu Kote Sendembo.” Nimbá Yombomo Kinia Welea Kelko Yu-Kinia Konopu Seluna Pupili Molongele Uluma Saa.” Nimba Yesusini Nirimu Semanemo*

<sup>57</sup> Onone nambi semu-na uluma pilku apuruku ulu peangama pilku naa selemeye?

<sup>58</sup> Nu kote sendemba sembá yombomo ‘Konopu seluna pupili molambili ulu se sambo.’ ninguli welea sani. Aku naa senu liemu nu kote sendemba yombomone nunga kote pilieli yemo molombana memba pumba simbanje? Pe kote pilieli yemone nu ka-ulka nokoli yemo lipa simba, yuni nu ka-ulka lipa mundumba. <sup>59</sup> Nane

nundu paa sika nimbu sikirumu: "Nu ka-ulka wendo onindu pundu paa pali tokole mindi wendo onimu. We manda wendo naa oni." nikiru." nirimu.

## 13

13:1-5

*Yesusini "Ulu-Pulu-Kiri Selemelema 'Naa Kolamili.' Ningu Bulu Siku Konopu Topele Tangi." Nirimu Semanemo*

<sup>1</sup> Kanu-kinia Yesusini ungu-mane sirimuna moloringi yombo marene yundu semane toko siku ninguli: "Kolea Gallilli disiriki yombo marene Pulu Yemo popo toko mélema kalko molangi ,Romo gapomano ye awili, Paillatene ono topa kondorumu." ningu semane toringi.

<sup>2</sup> Aku semanemo toringi kinia pilipale Yesusini onondo nimbale: "Kanu kolea Gallilli yomboma aku siku mindili noringi-kulu pilkuli 'Gallilli yombo moloringi lupa wemanse ulu-pulu-kiri seringi mele maniadopa, kanu mindili noringi yomboma ulu-pulu-kiri seringi mele paa olandopa.' konopu lekemeleye? <sup>3</sup> Paa sika nane onondo "Aku sipa mólo." nikiru. Ya molkomele yomboma, ono ulu-pulu-kiri selemelema bulu siku munduku kelko konopu topele naa tongi liemu ono aku siku toko kondongela." nirimu.

<sup>4</sup> Pe kelepa Yesusini semane se topa nimbale: "Kolea-awili Jerusalleme sukundu kolea-kanga Silloamo kouni takoli ulka awili olana se topa kalambili sipa topa mania mundupale yombo tene-et topa kondorumu koloringi. Kanu yomboma 'Kolea-awili Jerusalleme yombo lupa moloringimane pali ulu-pulu-kiri seringi mele maniadopa, koloringi yombomane ulu-pulu-kiri seringi mele paa olandopa.' konopu lekemeleye?

<sup>5</sup> Paa sika nane onondo 'Aku sipa mólo.' nikiru. "Ya molkomele yomboma, ono ulu-pulu-kiri selemelema bulu siku munduku kelko konopu topele naa tongi liemu ono aku siku kolongela." nikiru." nirimu.

13:6-9

*Unju Se Mongo Naa Torumumunga Ungu-Ikumu*

<sup>6</sup> Aku nimbale kelepa ungu-iku se topa onondo nimbale:

"Ye sene unju piki se yunga unju waene kaliana umbu lierimu. Pe 'Piki mongo tomba.' nimba ombo kanorumu kinia se naa torumu. <sup>7</sup> Piki mongo se naa torumukulu yunga unju waene kalia tapu-yemondo nimbale: "Pílie. Kalia-ingi talo yopoko pea i unju piki gilimúmunga ombo kanoruntu-na-kolo piki mongo selu kepe naa torumu kene yuni ma-nale we nolemo kene peke toko eltou." nirimu.

<sup>8</sup> Kalia pulu yemone aku sipa nirimu kinia kalia tapu serimu yemone yundu pundu topa nimbale: "Ye-Awilimu, i kalia-ingi selumu mindi aku unjumu we giliepili. 'Unjumu akopa mongo topili.' nimbu unju puluna era sepo, ma mundupu, kongi-le lipu mundupu, sambo. <sup>9</sup> Pe nekendo kalia-ingimunga mongo tomu liemu peanga. Naa tomu liemu kamu peke tani." nirimu." ,nimba Yesusini, nirimu.

13:10-17

*Koro Moloringi Wale Sambate Senga Yesusini Kuru Torumu Ambo Se Sepa Peanga Sirimu Semanemo*

<sup>10</sup> Walte, 'koro moloringi, wale Sambate senga Juda yomboma maku toko Pulu Yemonga ungumu pilieringi ulka senga sukundu Yesusi pumbale yomboma ungu-mane sipa molorumu. <sup>11</sup> Akuna ambo se molorumu, yu kuru topa bulu elke torumu-na ola gilipa siniu simbando perepa molorumu. Yu aku sipa molopili kalia-ingi tene-et ombo purumu. <sup>12</sup> Yesusini kanu ambomo kanopale yundu "Ou." nimba nimbándo: "Ambomo, nu kuru torumumu topa keliepili." nimba <sup>13</sup> ambomo kimuni ambolorumu kinia yu popenge sepa sumbi sipa ola gilipa Pulu Yemo kape nirimu.

<sup>14</sup> Aku-sipa na-kolo kanu ulkamo nokorumu yemo yuni Yesusi „koro mololi, wale Sambatemonga yombo sepa peanga sirimu-kulu kanopa kiri pilipale akuna maku toringi yombomando nimbale: “Kongono-wale talo-pakara lemomanga ‘Kuru tomba yomboma peanga liepili.’ ningu onge manda. „Koro mololi, Sambate walemonga manda mólo.” nirimu.

<sup>15</sup> Yemone aku sipa nirimu kinia Jesusini nimbale: “Ono topele-mapele toli yema, alieli „koro mololi, wale Sambate wendo olemo kinia ono pali yu-melete-melete ononga kongi kao molo kongi dongi kere-langi nomba molemona moki leko no olemo kolea senga ‘No nopili.’ ningu mengo pulimili kanumu. <sup>16</sup> Ono ononga kongima Sambate walemonga papu moki leko nokolemele kene i ambomo Sambate walemonga papu lipu tapondokorola. Kongima maniandopa mele, yomboma olandopa mele kanumu. Akumunga i ambomo, yu Eporayamone kalopa liltimu ambo se, „kurumanga nokoli, Setenene yu kalia-ingi tene-et ka mele sirimu ambomo Sambate walemonga moki lepo nokokoromo sepo kinjikiruye?” nimba mangilierimu.

<sup>17</sup> Yuni aku sipa nirimu kinia kanu ungumuni yu serimu mele kanoko kiri pilieringima olie poloringi-na-kolo we-yombomane yu ulu-tondolo peangama serimu kanokole konopu awili-seko siringi.

13:18-21

### *Unju Masetete Umbumunga Ungu-Ikumu Kinia Pellawa Akoli Méle Isimunga Ungu-Ikumu Kinia*

<sup>18</sup> Kanu-kinia Jesusini „yombomando, kelepa nimbale:

“Pulu Yemo ye nokoli kingimu molopa yomboma nokolemo, méle nambolka mele kanu sílimu lemo? ‘Pulu Yemo ye nokoli kingimu molopa yomboma nokolemo mele piliangi.’ nimbu akumu nambi sepo nimbu siemboye? <sup>19</sup> Akumu i-sipa mele: Ye sene yu unju masetete umbu se lipa yunga kaliana umbumu mundorumu kinia kanu unju umbumu wendo omba awili lepa unjumu gilierimu kinia aku unjumunga kolamanga kerama ongo peringi. Pulu Yemo ye nokoli kingimu molopa yomboma nokolemo mele aku sipa.” nirimu.

<sup>20</sup> Aku nimbale kelepa mangilipa pilipa nimbale: “Pulu Yemo ye nokoli kingimu molopa yomboma nokolemo mele pilingí nambi sepo nimbu siemboye? <sup>21</sup> Akumu i-sipa mele: Ambo sene yu kere-langi pellawa akoli mele isi kanga-kolte lipale pellawa awisilinga mundorumu kinia pellawa pali akorumu. Pulu Yemo ye nokoli kingimu molopa yomboma nokolemo mele aku sipa.” nirimu.

13:22-30

### *Pulu Yemo Molomba Koleana Sukundu Pumulú Mele Yesusini Nirimu Semanemo*

<sup>22</sup> Aku sipa nimbale pe Yesusi kolea-awili Jerusalleme pulimú aulkana pumbá pumbale kolea awilima kinia kangama kinia pumba, akumanga moloringi yomboma ungu-mane sirimu. <sup>23</sup> Kanu yombomanga sene yu mangilipa pilipa nimbale: “Ye-Awilimu, mindili nomolo aulka molemolona Pulu Yemone yomboma lipa tapondopa wendo lipa yu-kinia molko kondonge aulkana lipa mondomba yomboma koltalo mindiyie?” nimba mangilierimu.

Pilipale yuni onondo nimbale: <sup>24</sup> Ulka kerepulu paa kanga si nilina yombo awisili ongo sukundu pungíndu perenge. Akumunga ‘Kanu kerepuluna ono ongo sukundu pungu molongendo kála seko pangí.’ nimbu nikiru. <sup>25</sup> Ulka pulu yemone ola gilipa kuna anjimba kinia ono pena molkole ningímunu, kuna toko mangilku ninguli: “Ye-Awilimu, olio nu kinia pea molamili wamili kene olionga kuna lindei.” ningí kinia yuni onondo nimbale: “Ononga imbima na naa pilipu ono kepe ononga koleama kepe na naa kanolio.” nimbá.

<sup>26</sup> “Yuni aku nimbá kinia onone yundu ninguli: “Nu pea ga norumulu. Olionga koleamanga nu ongole olio ungu-mane sirinu.” ningí.

<sup>27</sup> Aku-sipa na-kolo yuni onondo nimbale: "Ono niembo piliaa. Ononga imbima na naa pilipu ononga koleama na naa kanolio. Ono ulu-pulu-kiri seko molemele yomboma pali na moliona anju paa." nimbá. <sup>28</sup> Akuna ultu moltkole ono ,anda-kolepali, Eporayamo kinia, Aisake kinia, Jekopo kinia, Pulu Yemone ungu-umbu tondorumuma pilku yomboma ningu siringi yema pali kinia, ono Pulu Yemo ye nokoli kingimu molopa nokomba koleana sukundu molonge kanokole ono onono akuna ultu molonge kanokole ono onono mumindili kolko kola seko mini-wale mundungí." nirimu.

<sup>29</sup> Isirele yomboma ono Pulu Yemo ye nokoli kingimu molopa nokomba koleana sukundu ono manjiku naa pungí 'Piliangi.' nimba yuni kelepa nimbale: "Ma-koleana pali yombo mare Pulu Yemo ye nokoli kingimu molopa nokomba koleana sukundu pungu Pulu Yemo pea kere-langì nonge. <sup>30</sup> Piliame. Akileko olemele yombo mare Pulu Yemo ye nokoli kingimu molopa nokomba koleana sukundu kumbi leko pungí. Kumbi leko oringi yombo mare akileko pungí." nirimu.

13:31-35

#### *Jerusalleme Yomboma Toko Kalonge Pilipale Yesusini Ono Kondo Kolorumu Semanemo*

<sup>31</sup> Walte, Yesusi u Jerusalleme naa pumbale kolea senga ungu nimba molorumu kinia Parisi ye marene ongo yundu ninguli: "Ye nokoli kingi, Eretene 'Nu topo kondambo.' nimba molemo kene nu ya naa moltkole senga kowa pu." niringi.

<sup>32</sup> Yesusini onondo nimbale: "Na tomba sekemo yemo, yu kolo topa konopu kiri peli owá-palako pokisi mele akumu molemona i ungumu pungu ningu si-paa." nimba nimbale: "Kiniá mele kepe opali talu mele kepe kuruma yombomanga konopuna pelemoma makoropo, kuru toli yomboma sepo peanga sipu, molopole kanga-kolte pe mele na kongono sepo moliomo pora simbú. <sup>33</sup> Aku-sipa na-kolo Jerusalleme pumbúndu kiniá kepe opali talu kepe na we kongono selepo pumbú. Pulu Yemone ungu-umbu tondolemoma pilipa yomboma nimba silimú ye se koleawili Jerusalleme ultukundu manda naa kolomba kene ,na Pulu Yemone ungu-umbu tondolemoma pilipuli yomboma nimba silimú yemo molio kene, na Jerusalleme ultukundu manda naa kolombo." ,nirimu.."

<sup>34</sup> ,Aku nimbale Yesusini Jerusalleme moloringi yomboma yu kondo kolopa akumundu ungu se nimba nimbale: ,

"O Jerusalleme ,yomboma,, Jerusalleme ,yomboma,, Pulu Yemone ungu-umbu tondorumuma pilku yomboma ningu siringi yema toko kondoko, yuni ono molemele lipa mundulimú yema kouni toko kondoko selemele yomboma, kera gulta anumumuni yunga waloma lipa yunga poutolone okopa lopi sepa nokolemo mele nane wale awisili ono aku sipu nokolka-na-kolo onono "Mólo." niringi. <sup>35</sup> Akumunga piliame. ,Opa-touma ono tonge onge kinia Pulu Yemone kelepa ono naa nokopa naa lipa tapondombamonga, opa-toumane ongo sika toko munduku ononga koleamo kinia ononga Pulu Yemo popo toko kalolemele ulka-tembelemo kinia kamu toko kalongemonga ono ku penge. Nane ono ungu se pea nimbu sikiru:

"Ono Jerusalleme yomboma, onone nando

"Pulu Ye Yawene lipa mundorumu-na okomo yemo

imbi ola molopa, molopa kondopili."

ningí walemonga na kelko kanonge. U mólo." nikiru." nirimu.

## 14

14:1-6

#### *Sambate Wale Senga Yesusini Ye Se Kangi Akorumumu Sepa Peanga Sirimu Semanemo*

<sup>1</sup> „Koro moloringi, wale Sambate senga Parisi ye awili senga ulkana Yesusi kere-langi pea nongendo purumu. Ombo molorumu kinia pea kere-langi nongo moloringi yemane yu neme-neme ningu kanoko moloringi. <sup>2</sup> Yunga kumbikerena ye kangi akorumu se molorumu. <sup>3</sup> Pulu Yemonga ungu-manemanga puluma pilku kondoringi yema kinia, Parisi yema kinia, ono Yesusini mangilipa nimbole: „Koro mololi, wale Sambate kinia kuru toli yombo se sepo peanga silimolánje manda molo móloye?” nirimu. “Pulu Yemonga ungu-manemanga sukundu nambolka nimba molemoye?” nirimu. <sup>4</sup> Aku-sipa na-kolo yundu ungu se pundu toko naa ningu we moloringi. Kanukinia yuni kanu yemo lipa sepa peanga sipale yundu “Pu.” nirimu.

<sup>5</sup> Aku sepale Yesusi yuni pea moloringi yombomando nimbole: “Ono molkomele yombomanga ye senga kango se molo kongi kao se Sambate wale senga no-muru senga mania tomu liemu kanu yemone yunga kangomo molo kongi kaomo popenge sepa wendo naa limbaye?” nirimu. <sup>6</sup> Aku nirimu pilkuli, ‘Olione “Sambate wale senga kango molo kongi-kao no-muru senga wendo limba akumu peanga.” nímulu liemu yuni “Sambate walemo kinia yemo lipu tapondokoro peangala.” nimba.’ ningu pilkuli, ungu se pundu toko ningí aulka se naa lierimu.

**14:7-11**

### *Ono Onono Imbi Toko Mania Mundungímunga Ungu Se*

<sup>7</sup> Parisi ye awilimunga ulkana kere-langi nongendo oringi yomboma ye awilimanga polo kumbikundu ‘olio molamili.’ ningu konopu siku moloringi kanopale Yesusini ono ungu-mane sipa nimbole:

<sup>8-9</sup> “Ye sene nu kinia yombo mare pea “Kere-langi namili waa.” nimba kinia nu ongole ye awilimanga polo kumbikundu senga pungu naa molani. Nu kanu polomonga moloni kinia pe ye awili se yu imbi olandopa molomba ye se yu kepe ‘Kere-langi pea namili ou.’ nimba ye se ombá kinia ulka pulu yemone nundu nimbole: “I ye awilimu nu moleno polo akuna molopili polomo si.” nimba kinia nu pipili kolkole polo se lupa, namba naa lieli yombomanga polo senga pungu moloni.

<sup>10</sup> Akumunga, ye sene nundu “Kere-langi pea namili ou.” nimba kinia yunga ulkana pungu namba naa lieli yombomanga polo senga pungu molani. Akuna moloni kinia ulka pulu yemone nu molonina ombo nundu nimbole: “Ano, i polona naa molko ye awilimanga polona ongo molou.” nimba kinia kere-langi pea nongo molonge yombomane nu-kinia semba mele kanokole nu ‘Ye awilimu.’ ningu kanonge.” nirimu.

<sup>11</sup> “Yombomane onono imbi ambolko paka tolemele yomboma, ‘Pulu Yemone, imbi topa mania mundumba, aku-na-kolo yombo onono imbi toko mania mundulimili yomboma yuni ononga imbima ambolopa paka tondomba.’ nirimu.

**14:12-14**

### *“Kere-Langi Pea Namili Waa.” Nilimulu Mele Ungumu*

<sup>12</sup> Kanu-kinia Yesusini ulka pulu yemondo nimbole: “Nu yombomanga kere-langi kalondokole nunga pulu lemó yomboma kinia, nunga genali kinia, ye kamakoma kinia onondo ‘Kere-langi pea namili waa.’ ni naa nieni. ‘Onone walte kelko pundu mele toko, nando ‘Kere-langi pea namili ou.’ niengi.’ ni naa nieni, mólo! <sup>13</sup> Nu yombomanga kere-langi kalondokole yombo koropama kinia, kimbu ki kinginewe tambulorumu yomboma kinia, kimbu kiri lierimu-na mimi siku aulka naa andoringi yomboma kinia, mongo kiri lierimu yomboma kinia onondo ‘Kere-langi pea namili waa.’ nieni. <sup>14</sup> Onone kanu kere-langima pundu paa manda naa tongemonga nu konopu siku molko kondoni. Walte konopu sumbi nimba pepili molemoye yomboma kolko lomboroko ola molonge aku walemonga ya nikiru mele nu aku siku senimunga méle kalomba lini.” nirimu.

**14:15-24**

### *Kere-Langi Awisili Maku Toko Noringimunga Ungu-Ikumu*

<sup>15</sup> Parisi yemonga ulkana Yesusi pea kere-langi nongo moloringi ye sene Yesusindu nimbale: "Pulu Yemo ye nokoli kingimu molopa nokomba koleana kere-langi nomolo yomboma ,olio," "Konopu peanga pepili molko kondangi." nilimú aulkana molemolo." nirimu. <sup>16</sup> Aku-sipa na-kolo Pulu Yemonga Isirele yomboma Yesusi yunga ungumu naa pilku, mokoli seringimunga mulu-koleana pungu naa molonge pilipale yemone nirimu ungumu pilipale Yesusini ungu se pundu topa ungu-iku se topa nimbale:

"Ye sene 'Yombo awisili pea kere-langi namili kalambo.' nimbale yombo awisilindu " 'Kere-langi kalopole namili waa.' nimbu kinia wang." nimba, nimba mundorumu.

<sup>17</sup> Kere-langi nonge enamo wendo orumu kinia yunga kendemande-yemondo nimba mundupa nimbale: "U "Kere-langi pea namili waa." nirindu yombomando "Kiniá enamonga kere-langi kalondondu kene namili wang." ni-pou." nirimu.

<sup>18</sup> Aku-na-kolo ono pali naa ongendo yu-melete "Takaraki lekemo kene naa omolo." niringi.

Sene nimbale: "Na ma konde se topo tondumu kano-pumbundu na naa ombó kene nindei." nirimu.

<sup>19</sup> Sene nimbale: "Nane kongono seli kongi-kao rureponga talo topo tonduma pumbu kano-pumbundu manda naa ombó kene nindei." nirimu.

<sup>20</sup> Sene nimbale: "Kiniá mindi ambo lindumunga na manda naa ombó." nirimu.

<sup>21</sup> Aku siku niringi kinia pilipale, kendemande-yemo kelepa yando ombale niringi mele yunga ye awilimu nimba sirimu.

Kanu-kinia ulka pulu yemone mumindili kolopale kendemande-yemondo nimbale: "Nu welea lisiku pungu, i kolea-awilimunga aulka awilimanga kinia aulka kanga-manga kinia pungu, yombo koropama kinia kimbu ki kinginewe tambuloli yomboma kinia, mongo kiri lieli yomboma kinia kimbu kiri lierimu-na mimi siku aulka naa andolemele yomboma kinia, ono liku mengo ou." nirimu. <sup>22</sup> Kendemande-yemone aku sepale kelepa omba nimbale: "Ye-Awilimu, ninu mele sendu-na-kolo kere-langi noli polona kolea mare we lemóla." nirimu.

<sup>23</sup> Kanu-kinia ye-awilimuni yunga kendemande-yemondo nimbale: "Aku sekemo kene nu kelko pungu, kolea-awilimunga ultu pungu aulka awilimanga kinia aulka paka-makamanga pungu, yombo kanoko lendenima pali mengo wani. "Mólo." ningí yomboma kepe ta ningu liku mengo wani. Nanga ulkamo si nipili kene awisili wang." nirimu. <sup>24</sup> Paa mi ya kana. Na paa sika ono nimbu sikirumu: "Nane pulu-pulu "Kere-langi pea namili waa." nimbu, nimbu mundorundu yombomanga selu kepe paa naa ongo kere-langi nonge. Paa mólo." nikiru." nirimu." nimba ,Yesusini aku sipa ungu-iku se torumu.

**14:25-33**

### *Olio Yesusi Lombili Andomolo Mele Unzu Mare*

<sup>25</sup> Yesusi aulkana omba purumuna yombo awisili liku maku toko yu lombili andoringi kinia yu we gilipa topele topa kanopa onondo nimbale: <sup>26</sup> "Yombo sene na lombili ombándo na olandopa konopu naa mondopale na lombili manda naa ombá. Yunga lapa kinia, anumu kinia, menu kinia, bolangoma kinia, genupili kinia, kemulupili kinia, yu yuyu kepe, ono pea olandopa konopu mondopa, na manjipa konopu naa mondopale na lombili manda naa ombá. <sup>27</sup> Yombo sene 'Yu lombili pambo.' nimbale yomboma unju-perana peko mindili nongo kololemele mele yuni unju-pera mele gomo lembando 'Na yu lombili pumbundu mindili nondu liemu peangala; kolondu liemu peangala.' naa nimu liemu na lombili manda naa ombála.

<sup>28</sup> Ononga ye sene ulka awili tondolo se takombando yu u naa takopale kanu ulkamonga konopu kimbu sipa yuyu nimbale: 'Ulka takopo pora simbumunga kou-mone manda taltolionje molo mólo tombanje?' nimba pilipale 'Nanga kou-mone

manda taltondu liemu manda takombo.' konopu kimbu sipa naa molombaye? „Aku sipa sembá kanumu.,<sup>29</sup> Yu aku sipa u naa selkanje pe yu kanu ulkamo takombando ulka ponga mindi topo topa lipa polopale pe kou-mone mólo tomba kinia kamu manda naa takopa pelka. Akumunga yombomane yu ungu-taka tondoko tawe sendelemolá.<sup>30</sup> Onone tawe sendeko ungu-taka toko ninguli: "I yemo ulka awili tondolo se takomba takorumu-na-kolo yunga kou-mone mólo torumu-kulu yu manda naa takopa pora sirimu." ningu tawe sendelemolá.

<sup>31</sup> „Se mangilikirula., Ononga ye nokoli senga talapemo kinia ye nokoli kingi senga lupa talapemo kinia opa sengele kinia se yu tomba sembá, se yunga koleana we molomba. Ono omba tomba ye nokoli kingimu yu opa seli ye tuwendi-tausini memba ombá. Aku-sipa na-kolo we molomba ye nokolimu yunga opa seli ye tene-tausini mindi molonge. Kokele tonge onge kinia we molomba ye nokolimu yunga yema mangilipa pilipa nimbale: "Olio opa seli ye tene-tausini mindi molopole olio ongo tonge yomboma anju manda tomolo molo móloye?" ni naa nimbáye? „Aku sipa manda manjipa pilipa molomba kanumu.,<sup>32</sup> Kanu-kinia kanu ye nokoli kingimu yuni 'Olione ono anju manda naa tomolo.' nimba piliemu liemu yunga ye mare lipale, ye tuwendi-tausini memba ombá ye nokolimu aulka suluna ombámonga "Paa." nimba lipa mundupa nimbale: " 'Opa naa sepo we taka lepo molamili kene nane nambolka ungu se samboye?' ningu mangilku pili-paa." nimbá." „nirimu.,

<sup>33</sup> „Ungu-ikutolo topa kelepale nirimumuni, pe ungu-ikutolonga ye talone selembolá mélemonga ungu-pulumu ono nimba sipa nimbale: „Kanu yetolone selembolá, aku sipa mele ononga yombo se yuni 'Na lombili wambo.' nimbale yunga mélema pali kinia, yunga yomboma kinia, yunga kou-mone kinia, yunga kangimu kinia, aku mélema mindi konopu mondopa na olandopa konopu naa mondolemo yombomo na lombili manda naa ombá." „nirimu..

14:34-35

### *Api-Kusamonga Ungu-Ikumu*

<sup>34</sup> „Aku nimbale kelepa nimbale: „Api-kusa akumu méle peangamo na-kolo yu songo naa sembá kinia 'Yu kelepa songo sepili.' ningu ungu se manda semoloye?<sup>35</sup> Kanu api-kusa songo naa sélimu nambi semoloye? 'Kaliana lipu mundumulú kinia kere-langí manda naa ombá; yu ma-nale se mólo.' nimbu kanopole we eltomolo." „nimba,

"Yombo komu-pea lemba yombomane i nikiru mele piliaa." nirimu.

## 15

### *Kolomongo-Awili 15*

*Yesusi Ulu-Pulu-Kiri Seli Yomboma Kinia Alieli Molorumu Mele Juda Yombomanga Tapu-Yemane Kanoko Kiri Pilieringimunga Pilipale Yesusini Pulu Yemo Kanu Yombo Kirima Konopu Mondorumu Mele Nimba Simbando Ungu-Iku Yopoko Torumu Ungu-Ikuma*

*Se: 15:1-7*

### *Kongi Sipisipi Se Talopa Lierimumunga Ungu-Ikumu*

<sup>1</sup> Kou-takisi lili yema kinia ulu-pulu-kirima seli ye wema kinia ono pali Yesusinga ungumu pilingindu yu molorumuna nondoko oringi. <sup>2</sup> Parisi yema kinia Pulu Yemonga ungu-manemanga puluma pilku mane siringi yema kinia onone aku seringi mele kanokole konokono ningu ninguli: "I yemo yu sepa kinjikimu. Ulu-pulu-kirima seli yomboma "Pea molamili waa." nimbale, kere-langí alieli ono pea nongo molemelela." niringi.

<sup>3</sup> Yesusini ono aku siku niringi pilipale ,i ungu-ikuma ono topa sirimu., Ungu-iku imu topa nimbale:

<sup>4</sup> Ononga ye sene kongi sipisipi paip paono mondolka kinia se talopa lelkanje yuni sipisipi po paono tene kelepa nani wema kolea ku lielina molangi siye kolopa pumba, talopa lelka sipisipimu kanopa limbando korolepa naa pulkaye? „Korolepa pulka.“ <sup>5</sup> Pe kanopa lipale yuni konopu sipa apu topa ulkondo memba pulka. <sup>6</sup> Kanukinia ulkondo ombale yemone yunga pulu lemó yombomando kinia yunga ulka kerepongolo selu yombomando mangilipa nimbale: “Nanga kongi sipisipi talopa liemu kanumu kanopo lindu kene pea konopu sipu molamili waa.” nilka.” „nirimu.“

<sup>7</sup> „Nimbale ungu-ikumunga pulumu nimba para sipa nimbale:“ “Nane ono ungu se nimbu sikirumu: “Yombo konopu sumbi nimba pepili molemele yomboma aku siku molemele-na ono ulu-pulu-kirima munduku kelko konopu topele tongue aulka se naa lemó kanumu, kanu yomboma mulu-koleana angellomane konopu we silimili. Aku-sipa na-kolo sipisipi nokoli yemone yunga sipisipi talopa lielimu kanopa lipale paa olandopa konopu silka mele aku sipa ulu-pulu-kiri seli yombo se yunga ulu-pulu-kiri selemoma pilipa kiri pilipa mundupa kelepa konopu topele tombamonga angellomane paa olandopa konopu singí.“ nikiru.” „nirimu.“

*Se: 15:8-10*

#### *Kou-Mone Se Mania Purumumunga Ungu-Ikumu (Kolomongo-Awili 15 pali kanani)*

<sup>8</sup> „Nimbale kelepa ungu-iku se pea topa nimbale:“

“Se i mangilikirula: Ambo se kou-mone suroli mele engaki rureponga talo taltopale nilkamone, pe kanu kou suroli mele se mania pulkanje yu sepe-llame kandopa ulka pole lepa kanopa limbando kultupana topa naa korolkaye? „Paa korolkamo.“ <sup>9</sup> Kanukinia kanu koumu kanopa lipale yunga pulu lemó yomboma kinia yunga ulka kerepongolo selu yomboma mangilipa nimbale: “Nanga kou-mone suroli mania pumu kanumu kanopo lindu kene pea konopu sipu molamili waa.” nilka.

<sup>10</sup> Nane ono nimbu sikirumu: “Kanu ambomo konopu silka mele aku sipa ulu-pulu-kiri seli yombo se yunga ulu-pulu-kiri selemoma pilipa kiri pilipa mundupa kelepa konopu topele tombamonga Pulu Yemonga angellomane konopu singí.“ nikiru.” nirimu.

*Se: 15:11-32*

#### *Kangomone Sepa Kinjerimu-Na-Kolo Lapane Yu We Konopu Mondorumu Mele Ungu-Ikumu (15:pali kanani)*

<sup>11</sup> „Aku nimbale, Yesusini kelepa ungu-iku yopoko-sipamo pea topa ye awilima mane sipa, nimbale:

“Ye se, yunga kango talo moloringili. <sup>12</sup> Walte kango akiliumuni lapando nimbale: “Tata, nu kolonimunga monge-mélema iseli-u moke seko na sini mele sieni.” nirimu kinia kanu yemone yunga talitorumu mélema moke sepale yunga kangotolo sirimu liltingili.

<sup>13</sup> Kanu mélema olo moke sepa sirimu kinia kango akiliumu wale pokore mindi molopale, pe méle sirimuna pali lipa memba aulka sulu senga purumu. Aulka sulu senga pumbale nirimununi, kolea senga pumba molopale yu ‘Kere-langì peangama nambo.’ nimba, ‘Mulu-maminia peangama pakambo.’ nimba kou-mone awili sepa pulimú mélema topo topa lipa panjipale, ‘No nambo.’ nimba topo topa lipa, ‘Amboma pea peamili.’ nimba kou-mone sipa, aku selepa purumu kinia yunga kou-mone mélema pali pora nirimu.

<sup>14</sup> Yunga mélema kinia kou-mone kinia pora nirimu kinia yu paa koropa purumu. Kanukinia yu molorumu koleana gele awili sepa lierimu kinia yu mélema pali mólo torumu kinia yu paa gelene kolorumu. <sup>15</sup> Yu gele serimu-kulu yu kanu kolea pulu ye se molorumuna pumba “Kou-kongono se sambo si.” nimba mawa serimu kinia yuni nimbale: “Manda, nanga kongi tapu sendeko ‘Kere-langima nangi.’ ningi liku

si.” nirimu. <sup>16</sup> „Gelene paa kolopale, ga iniamia kinia konape buluma kinia kongi sirimuna ‘Nambo.’ nimba pilipa molorumu-na-koło yu se naa siringi.

<sup>17</sup> Kanu-kinia pe yu konopu kimbu sipa pilipale yu yuyu nimbale: ‘Tatanga kongono sendelemele yomboma ga awisili nongo olo selemo-na-koło na ya gelene kolopole kamu kolombo sekero. <sup>18</sup> Akumunga na kelepo yando pumbu Tata molemona pumbuli yundu nimbili: “Tata, nu kinia Mulu-Koleana Molemo Yemo kinia nane sepo kinjerindu. <sup>19</sup> Na kango kiri kene nunga marena molombo manda naa sembá kene nunga kongono ye se molambo.” nimbú.’ nimba pilierimu. <sup>20</sup> Aku nimba pilipale yu molorumu koleamo mundupa kelepa, lapa molorumuna pumbá purumu.

Yuulkondo pumbá purumu kinia yunga lapane yu sulu sepa orumu kanopale yu kondo kolopa lisipa pumba yu kangulorumu.

<sup>21</sup> Kanu-kinia kangomone lapando nimbale: “Tata, nu kinia Mulu-Koleana Molemo Yemo kinia nane sepo kinjerindu. Na kango kiri kene nunga marena molombo manda naa sembá kene nunga kongono ye se molambo.” nirimu.

<sup>22</sup> Aku sipa nimba molorumu kinia lapane yunga kongono senderingi kendemandeyemando nimbale: “Welea pungu nanga mulu-maminia peangamo liku mengo ongo yu pakondoko, ki-ongi se liku yunga kína mondondoko, kimbu-su liku yunga kimbura mondondayo. <sup>23-24</sup> Aku sekole kongi kao walo awilimu toko kalondoko molombolona mengo waa.” nirimu. “Nanga kangomo yu koronga-u purumu, ‘Yu kolorumunje.’ nimbu pilierindu-na-koło kiniá yu kelepa okomo. Yu u pumba sepa nema liitimu-na-koło kiniá kelepa okomo kanopo likimulu kene konopu sipu kongi kao nombo molamili.” nirimu kinia ono aku siku konopu siku kongi nongo moloringi.

<sup>25</sup> Aku-sipa na-koło yunga kango komomo kaliana kongono sepa molopale pe ipupini ulkando ombá orumu kinia ono konopu siku musiki toko denisi seko moloringi ungumu pilipale <sup>26</sup> yuni kongono kendemande ye sendo “Ungu se niembo ou.” nimbale nirimumuni, yundu mangilipa nimbale: “Ungu sekemelemo nambi semu-na sekemeleye?” nimba mangilierimu.

<sup>27</sup> Kanu kongono kendemande yemone yundu pundu topa nimbale: “Gena omu-na laniene kanopa yu manda-mele molopa ungu se naa sepa omu-na kanopale konopu sipa “Kongi kao walo awilimu namili.” nimba topa kalomu.” nirimu.

<sup>28</sup> Aku sipa nirimu pilipale kango komomo yu mumindili kolopale “Na ulkana sukundu paa naa pumbú!” nirimu.

Aku nirimu pilipale lapane wendo ombo yundu nimbale: “Olio pea konopu sipu molamili ou.” nimba mawa serimu kinia

<sup>29</sup> lapando pundu topa nimbale: “Pílie! Na alieli, kalia-ingi awisili, nunga kongono sendepo molopole nuni nilinu unguma alieli pilipu lipu sengena panjipu, walte kepe nunga ungu se mokoli naa sepo molio-na-koło nuni nando walte kepe kongi-meme walo se ‘Kangoma kinia pea konopu siku nongo molangi.’ ningu naa silinu. <sup>30</sup> Aku-sipa na-koło kiniá nunga kango se ombo, yuni ambomando “Na pea peambili koumone siembo.” nimba nunga kou-mone ono sipa pora sirimu, kanu kangomo omu kinia nu konopu siku ‘Kongi kao walo awilimu namili.’ ningu tonu lepomo.” nirimu.

<sup>31</sup> Lapane yundu pundu topa nimbale: “Kangomo, nu kinia na pea alieli molembolo kinia nanga mélema pali oltonga. <sup>32</sup> Aku-na-koło kiniá gena kolorumu kanumu kelepa omu. Yu u pumba sepa nema liitimu, kiniá kelepa omu kanopo likimulu kene olio konopu sipu musiki topo kere-langì nombo molkomolo akumu peanga sekemolo.” nirimu.” nimba Yesusini, nirimu.

## 16

16:1-15

Ya Mana Taltolemolo Mélemando Yesusini Ungu Se Nirimu Semanemo

<sup>1</sup> „Aku nimbale, Yesusini yu lombili andolimando nimbale:

“Walte ye kamako se molorumu kinia yunga méle taltorumumanga nokondoli ye se molorumula. Walte yombo marene kamakomo molorumuna ongo, yunga mélema nokondoli yemone serimu mele ongo yundu ninguli: “Nunga méle taltolenomanga nokondoli yemone nu sepa kinjipa, nunga mélema ‘We mania pupili.’ nimba yu akuma nokopa naa kondolemo.” niringi.

<sup>2</sup> Aku niringi pilipale ye-kamakomone kanu yemondo ‘Ou.’ nimba yundu iri topa nimbale: “I ungu nambolka ungumu nikimiliye? Nuni nanga mélema seko kinjilinu mele níngi kinia pilipuli nuni nanga mélema serinu seleno mele bokuna toko, yando sikuli pe pani. Nu nanga mélema kelko manda naa nokani. Nu makorombo.” nirimu.

<sup>3</sup> Kanu mélema nokondoli yemo yuyu nimbale: “Apa! Kiniá nambi samboye? Nanga ye-awilimuni nanga kongono seliomo wendo lipa na makoromba sekemo kene na nambi samboye? Na ma akumbundu tondolo naa pulimú-na aku kongonomo manda naa sembó. Yomboma kere-langi mawa sembondo pipili kolombo.

<sup>4</sup> Akumunga na sembó mele kiniá piliporo. „Nanga ye-awilimuni pundu anjerimu yomboma lipu tapondopole onondo ‘Pundu ekendo mindi tangi, ekendo mania pupili.’ nimbú kinia, pe na makoromba kinia kanu yombomane na konopu siku liku tapondokole nando “Pea peamili ou.” ningí.” nimbale nirimumuni,

<sup>5</sup> yunga ye-awilimuni pundu anjerimu yomboma ‘Yu-mele-mele wangí.’ nimba kumbi lepa orumu yemondo nimbale: “Nanga ye-awilimuni nu-kinia méle nambi sepa pundu anjerimuye?” nimba mangilierimu kinia

<sup>6</sup> yuni pundu topa nimbale: “Unju-ollipi mongo wele mingi paip paono pundu anjerimu.” nirimu kinia

ye-kamakomonga mélema nokondoli yemone yundu kelepa nimbale: “Pundu anjeli bokumu i sikiru; ya mania molko, paip paono toko mondoringi gomomo ora toko eltokole kolali seko gomo kondena wele mingi tu paono tene welea toko mondou.” nirimu.

<sup>7</sup> Yunga bulkundu orumu yemondo nimbale: “Nanga ye-awilimuni nu-kinia méle nambi sepa pundu anjerimuye?” nimba mangilierimu kinia

yuni pundu topa nimbale: “Rasi-witi wale paip paono pundu anjerimu.” nirimu kinia

mélema nokondoli yemone yundu kelepa nimbale: “Pundu anjeli bokumu i sikiru; ya mania molko, rasi-witi wale paip paono toko mondoringi gomomo ora toko eltokole kolali seko gomo kondena rasi-witi wale po paono welea toko mondaa.” nirimu.

<sup>8</sup> Yu aku serimu pilipale ye kamako awilimuni kanu sepa kinjeli yemo yu kape nirimu. Yunga mélema sika wa-mele lipa sepa kinjerimu-na-kolo yunga pilipa kondolimu paa olandopa perimu pilipale yu kape nirimu.

“Ya mana molko, Pulu Yemo konopu naa mondolemele yomboma, ononga pilipa kondolimu paa olandopa; pa selina molko Pulu Yemo konopu mondolemele yomboma ononga pilipa kondolimu maniandopa. We-yombomane yombo se kinia kou-kongono sengendo, molo ulu se sengendo aulkamo sumbi siku kanoko akisiku kondolemele; pa selina melemele yomboma aku sipa tondolomo maniandopa pelemo. We-yomboma aku siku molemelemonga ,ye awilimuni sepa kinjeli yemo aku sipa kape nirimu.” „nimba Yesusini nirimu..”

<sup>9</sup> Nane onondo nimbu siembo: “Kiniá ya mana molkole mana-mélema liku ‘Yomboma nunga genali mele molangi.’ ningu nunga méle taltolenomanga ono liku tapondani. Pe mélema pora nimbá kinia nu kolea peanga kamu alieli-alieli lembana puni kinia akuna molongemané nundu “Ya kamu pea molamili.” ningí.” nikiru.” „nirimu..”

<sup>10</sup> “Yombo sene yombo senga méle koltalo nokopa kondondolemo kinia kanopale ‘Méle awisili simbú kinia nokopa kondondomba lémo.’ nilimú. Yombo sene yombo

senga méle koltalo nokopa kinjindilimú kinia kanopale “Méle awisili simbú kinia nokopa kinjindimba lémo.” nilimú. <sup>11</sup> Nuni ya mana taltolemele mélema nokoko naa kondonu liemu nu paa sika méle kande-kande lupama, Pulu Yemone silimú méle kande-kandema, ‘Nokondani.’ manda naa nimbá. „Ya mana taltolemele mélema maniandopa, Pulu Yemone silimú méle kande-kande lupama olandopa kanumu.„ <sup>12</sup> Nuni ya mana taltoleno mélema paa sika nunga mólo, kanu mélema Pulu Yemonga. Akumunga nuni yunga mélema nokoko naa kondondonu liemu pe yuni ‘nunga taltani.’ nimba simba sepa molemo mélema manda simbaye?

<sup>13</sup> Kendemande-yombo seluni ye awili talonga kongonotolo lipa sere lepa manda naa sendemba. Ye awili se konopu kiri panjipa, se konopu mondomba. Molo aku naa semu liemu ye awili senga ungu nimbáma paa konopu sipa pilipa lipa kongono nimbáma tondolo mundupa sendepa, se konopu kiri panjipa yunga ungu nimbáma naa pilipa semba. Yombomane Pulu Yemonga kongonomo kinia Kou-Monemonga kongonomo kinia liku sere leko manda naa sendenge.” nirimu.

<sup>14</sup> Yesusini aku sipa nirimu pilkuli Parisi yema ono kou-mone kepe mélema kepe konopu paa awisili mondoringimunga yuni ungu nirimumu pilku mokoli seko tawe seringi kinia

<sup>15</sup> Yesusini onondo nimbale: “Ono onono i-siku ninguli: ‘We-yombomane olio Parisi yema konopu sumbi sipa pepa, peangama molemolo kanoko niengi.’ ningu molemele-na-koło ononga konopuna paa sika pelemo mele Pulu Yemone kanopa molemo. Mana-yombomane kanokole ‘Méle paa komindi, méle paa olandopamo.’ nilimili mélema Pulu Yemone kanopa kiri pilielemo.” „nirimu.„

**16:16-17**

### *Ungu-Manemanga Kinia, Semane Peangamonga Kinia, Yesusini Ungu Se Nirimu Semanemo*

<sup>16</sup> „No Lindeli, Jono u mana naa ombo molopili Pulu Yemone yomboma ‘Saa.’ nirimu mele „Pulu Yemonga ungu-manema yando nimba sirimu ye, Mosisini torumu bokuma kinia, Pulu Yemone ungu-umbu tondorumuma pilku yomboma ningu siringi yemane boku toringima kinia, kanu bokumanga molorumu, yandopa yandopa mane siku yomboma ningu siringi. Aku-sipa na-koło kiniá, Pulu Yemone ombo ye nokoli kingimu molopa yomboma nokopa kondomba semane peangamo topo silipu andolemolo. Pulu Yemo ye nokoli kingimu molopa yomboma nokomba yombo talapena sukundu pungu molongendo yomboma ekelepa seko pulimili. <sup>17</sup> Mulumu kinia mamo-tolo walte manda pora nimbá-na-koło Pulu Yemone ungu-manema Mosisini yando nimba sipa boku torumu bokumanga molemo ungumanga imbi torumumanga imbi selu paa kanga-kolte kepe mania manda naa pumbá. Pulu Yemonga ungu-manema pali lepa mindi pumbá.” „nirimu.„

**16:18**

### *Ye Se Ambo Se Wa Limúmunga Yesusini Ungu Se Nirimu Semanemo*

<sup>18</sup> “Ye sene yunga u limú ambomo makoropa “Kamu pu.” nimbale kelepa ambo se limú kinia aku yemone wa ulu-kirinale selemo. “Pu.” nimba makorolemo ambomo pe ye sene yu limú kinia kanu yemo kepe wa ulu-kirinale selemóla.” „nirimu.„

**16:19-31**

### *Ye Kamakomo Kinia Ye-Koropa LLasirasitolonga Semanemo*

<sup>19</sup> „Nimbale Yesusini kelepa semane se topa nimbale:„

“Ye kamako se molorumu. Yunga wale-pakoli paa peanga kou paa olandopa pulima pakopa, alieli yunga ulkana kere-langí peangama mindi nomba perimu. <sup>20</sup> Ye koropa se molorumula, kanumunga imbi LLasiras. Yu enamanga alieli ‘Ye kamakomone yu kondo kolopa kou-mone se molo kere-langí se simbanje.’ ningu yunga ulka kerepuluna ‘Molopili.’ ningu mengo ongo mondoringi. Yunga kangima pali erili

serimu. <sup>21</sup> Kanu erilima owámane ongo pene-mane lieringi. Yu 'Ye kamakomonga kere-langí pundi mania pumbáma lipu nombó.' nimba molorumu.

<sup>22</sup> Pe walte ye-koropamo kolorumu. Kolorumu kinia angellomane yunga minimu liku, „Juda yombomanga pulu-pulu anda-kolepa, Eporayamo molorumuna mengo puringi. Ye-koropamo kolorumula. Yombomane yu óno seringi. <sup>23</sup> Kanu-kinia yu sepe-koleana mindili nomba molopale, yuni mongomone olando-sipa kanopa aulka suluna Eporayamo kanopa LLasirasi pea moloringili kanorumu. <sup>24</sup> Kanopale ungu se tondolo mundupa nimbale: "Toto Eporayamo, na kondo kolkole 'LLasirasini nona ki-sundumu mania mundupale 'Nanga alimbolona monda topili.' nimba sendepili.' ningú yu yando mundoyo. Na i sepemonga paa mindili nombo molio." nirimu.

<sup>25</sup> Aku-sipa na-kolo Eporayamone yundu nimbale: "Toto, u moloringili mele pílie! Olo mana moloringili kinia nu méle kande-kandema taltoko manda molorunu; LLasirasi yunga méle kirima taltopa, molopa kinjerimu kanumu. Pe kiniá yu konopu peanga pepili molemo, nu mindili nongo moleno. <sup>26</sup> Molo nane "E." nilkanje yu andina manda naala olka. Olio kinia ono kinia awi-suku-singina „Pulu Yemone, kombu awilimu liltimu lemó kanumu. Pe kiniá ya molemolo yomboma 'Ono molemelena anju pamili.' ningí kinia manda naa pungila; ononga yomboma 'Yando wamili.' ningí kinia yando manda naa ongela." nirimu.

<sup>27</sup> Kanu-kinia ye kamakomone nimbale: "Aku lepomo kene, Toto, yu nanga pulu koleana pupili mundani nimbu mawa sekero. <sup>28</sup> Nanga genupili se-pakara molemele kanumu. I kolea mindili noli koleana ono kepe naa wangi kene yuni ono liepi-liepi topa ungu nimba sipa kondopili." nirimu.

<sup>29</sup> Aku-na-kolo Eporayamone yundu nimbale: "Mosisini boku torumu bokuma kinia Pulu Yemone ungu-umbu tondorumuma pilku yomboma ningú siringi yemane boku toringi bokuma kinia taltolemele kanumu. Onone kanu bokuma molemo unguma kanoko piliangi." nirimu.

<sup>30</sup> Kanu-kinia ye kamakomone nimbale: "Toto Eporayamo, aku manda mólo. Kolorumu yombo se lomboropa ola molopa ono molemelena pumba nimba simu liemu ulu-pulu-kiri selemelema pilku kiri pilkuli siye kolko konopu topele tonge." nirimu.

<sup>31</sup> Eporayamone yundu nimbale: "Mosinga unguma kinia Pulu Yemone ungu-umbu tondorumuma pilku yomboma ningú siringi yemanga unguma kinia „bokumanga toringi molemo akuma, piliei naa piliengi liemu kolorumu yombo se lomboropa ola molopa pumba nimu liemu yunga ungumu naala pilingí." nirimu." nimba Yesusini semane se aku sipa torumu.

## 17

17:1-4

### *Ungu Kondi Tolemele Ungu Talo*

<sup>1</sup> Yesusini yu lombili andolimando nimbale: „Na, 'Sika.' ningú kuru mondolemele yomboma kelko bulu siku munduku kelenge uluma sika wendo ombá-na-kolo yombo sene nanga yombo se kondi tombamonga kanu yombomo na bulu sipa anju pumu liemu kanu kondi tomba yombomo mindili nomba paa molopa kinjimba.

<sup>2</sup> Nanga yomboma aku sipa kondi tomba yombomo yu kou paa awili se moko toko nomina lendeko 'Yu kamu kolo-popili.' ningú paka toko nomuna paa maniakondo mundulimolánje paa papu.

Aku siku toko mundulimolá kinia yu kolopale pe yu Pulu Yemonga bolango sendo 'Ulu-kirima sepili.' nimba kondi manda naa tolka. Aku-na-kolo yu aku siku nomuna naa mundulimolá kinia yu yomboma kondi tombamonga Pulu Yemone yu 'Mongo

awili sepa likimu.' nimba "Mindili paa nopili." nilka kene onone yu nomuna papu paka toko mundulimolá.

<sup>3</sup> Nanga yomboma, ono onono selemele mele kanoko kondame.

"Gena sene nu-kinia ungu se sepa kinjimba kinia yu molombana pungu ninguli: "Ano, nuni na seko kinjenu." nieni. Aku nini kinia yu pilipa nimbale: "Ano, sika sepo kinjendu kene kondo kolambo." nimbá kinia nu-kinia kanu ulu-kiri sembá ulumu 'Mania pupili.' ningu siye kolani. <sup>4</sup> Kanu-kinia ena selumunga yu wale yopoko-pakara aku sipa nu-kinia sepa kinjipa, pe kelepa wale yopoko-pakara konopu topele topa nundu "Ano, kondo kolambo." nimbá kinia manda, nu wale yopoko-pakara kanu ulu-kiri sembama 'Mania pupili.' ningu siye kolani." nirimu.

17:5-6

### *Olione Yesusinga Ungumu Pilipu Lipu Ambololemolo Ungu Se*

<sup>5</sup> Kanu-kinia Yesusinga u "Nanga kongonomo sende-paa." nimba lipa mundorumu yemane yundu ninguli: "Ye-Awilimuni, nu ungu nilinu mele olio 'Sika ungumu.' nimbu kanga sepo mindi kuru mondopo ambololemolo kene nuni 'awili seko kuru mondoko tondolo munduku ambolangi.' ningu liku tapondani." ningu mawa seringi kinia

<sup>6</sup> „Ye-Awilimuni, onondo pundu topa nimbale: "Unju senga mongo akumu méle paa kangamo-na-koło kanu mongomo mana mundulimulu kinia unju akopa awili lepa gilimú kanumu. Aku sipa mele, ono nane ungu niliu mele unju mongo kanga mele paa kanga-kolte mindi pilku liku ambololemolánje, onone 'Pulu Yemone nanga ungumu manda pilimba.' ningu ya gilkimu unju awili akumundu "Nu pulkonio pali luruku pungu, nomuna kelko giliei." nilimolá kinia kanu unjumu ononga ungumu pilipa lipale aku sipa manda selka." „nirimu.»

17:7-10

### *Pulu Yemonga Kongono Kendemande Senderingi Yombomanga Yesusinga Ungu Se Nirimu Semanemo*

<sup>7</sup> „Nimba ungu se pea nimbale: „Ononga ye se yunga kendemande-ye sene kalia sendemba molo kongi sipisipi tapu sendemba kinia pe ipupini ulkondo ombá kinia yunga ye awilimuni yundu "Ya ongo mania molko ga nou." nimbáye? „Aku manda naa nimbá..» <sup>8</sup> Kanu kongono sendeli yemo yu kongono sepa kelepa ulkando ombá kinia yunga ye awilimuni yundu i-sipa nimbá: "Nanga ga kalondoko boroko sikuli pe na nanu ga nombo pora simbú kinia nu pungu nunga ga kalko nani." nimbá. <sup>9</sup> Ye-awilimuni 'Sei.' nimbá mele yunga kendemande-yemone pilipa lipa sembamonga "Ange, peanga senu." nimbáye? Aku naa nimbá.

<sup>10</sup> Aku sipala, onone Pulu Yemone onondo "Kongono sendaa." nilimú mele pali seko liku ono onono ninguli: 'Olio kendemande-yombo kirima.' niengi. 'Yuni olio "Saa." nilimú mele manjipu sepo, kongono oladopa se naa sepole olio kendemande-yombo kirima molemolo.' niengi." nirimu.

17:11-19

### *Yesusinga Ye Rureponga Talo Kuru-Laká Norumuma Sepa Peanga Sirimu Kinia Juda Yombomanga Opa-Tou Yemone Mindi Ombo "Ange." Nirimu Semanemo*

<sup>11</sup> Yesusi kolea-awili Jerusalleme pumbá pumbale nirimumuni, kolea Gallilli kolea Sameria disirikitolo aulka awi-suku-singina pumbale, <sup>12</sup> kolea kanga senga sukundu purumu. Sukundu purumu kinia kuru-laká noli ye rureponga talo yu aulka ombo purumuna ongo anju-siku gilku <sup>13</sup> onone ru ningu ninguli: "Yesusi, Ye Nokolimu, olio kondo kolou." niringi.

<sup>14</sup> Yuni ono kanopa nimbale: "Pulu Yemo popo tondoli yema molemelena pungu, ononga kangima liku ora si-paa." nirimu. Kanu-kinia ono pungí puringi kinia ono kuru pora nimba umbu-kangi gilierimu.

<sup>15</sup> Onone peanga lierimu kanoringi kinia ye akumanga se yando omba ungu tondolo nimba Pulu Yemonga imbi ambolopa paka tondolepa omba <sup>16</sup> Yesusi gilierimuna mania pumba tamalu pepa yuntu "Paa ange." nirimu. Kanu yemo yu Sameria yemo.

<sup>17</sup> Kanu-kinia Yesusi nimba: "Nane ye rureponga talo sepo peanga naa sinduye? Pe kiniá ye rureponga selu akuma sena molemeleye? <sup>18</sup> Se pea yando ongo Pulu Yemonga imbi ambolko paka naa tondokomeleye? I ye-lupamo mindi okomoye? Isirele ye kuru-laká nomu sepo peanga sinduma sena molemeleye?" nirimu.

<sup>19</sup> Kanu-kinia yuni Sameria yemondo nimba: "Ola gilku puyo. Nane nu manda sembomonga kuru mondonumuni nu peanga liemu." nirimu.

**17:20-37**

*Pulu Yemo Kamu Ye Nokoli Kingimu Molopa Yomboma Kamu Nokomba Walemo Wendo Ombámonga Ungu Se*

<sup>20</sup> Parisi yemane Yesusi mangilku pilku ninguli: "Pulu Yemo ye nokoli kingimu molopa nokomba walemo sewale wendo ombáye?" niringi.

Yesusini onondo pundu topa nimba: "Pulu Yemo ye nokoli kingimu molopa yomboma nokomba walemo wendo ombádo yomboma mongomane kanonge ulu se naa wendo ombá. <sup>21</sup> Ono kiniá ya molemelena Pulu Yemo koronga ye nokoli kingimu molopa yombo mare nokolemo-na yu ye nokoli kingimu molopa yomboma kinia mélema pali nokomba ulumundu yombo sene "Kaname. I wendo okomo." ningu, "Andi wendo okomo." ningu, aku mele manda naa ningí. Kanu walemo koronga wendo okomo lémo." nirimu.

<sup>22</sup> Aku nimba Yesusini yunga lombili andolimando nimba: "Onone "Mania Omba Mana-Ye Au Lierimu Yemo kanga-kolte kanamili." ningí walema wendo ombá-na-kolo naa kanonge. <sup>23</sup> Yombomane "Winia molemo.", "Ya molemo.", ningí. Aku-na-kolo aku siku ningí kinia kolo tongue kene ono lombili naa pang. <sup>24</sup> Kolea kariapá lipa sinjipa selemo kinia koleama pali pa selemo yombomane pali kanolemele. Mania Omba Mana-Ye Au Lierimu Yemo aku sipa mele kelepa ombá. <sup>25</sup> Aku-sipa na-kolo u yu mindili awili sepa nombá, kiniá molemele yombomane yu pilku naa liku bulu singí. „Kanu-kinia kolopa lomboropa ola molopale nimbámone,, pe "Ombá." nikiru mele ombá.

<sup>26</sup> U ye Noa molopili yombomane seringi mele Mania Omba Mana-Ye Au Lierimu Yemo ombá sembá kinia yombomane aku siku sengela. <sup>27</sup> „Ma-koleamanga pali, no u naa topili yomboma kere-langí nongo, yema ambo liku, amboma ye pungu, aku uluma mindi seko mololko puringi. Noa nona andoli sipi ulkamonga sukundu purumu kinia kepe ono aku siku uluma mindi seko molangi no topa ,koleama pali none aki topa, yomboma pali topa kondorumu.

<sup>28</sup> LLote pea moloringi yombomane aku siku seringila. Ono kere-langí nongo bisinisi seko kalia panjiku ulka takoko, we-ulü akuma seko moloringi. <sup>29</sup> Aku-sipa na-kolo LLote kolea-awili Sodomo mundupa kelepa kowa purumu kanu walemonga sepe kinia kou sepene nolima kinia lo mele muluna mania omba Sodomo moloringi yomboma pali topa kondorumu.

<sup>30</sup> Mania Omba Mana-Ye Au Lierimu Yemo kelepa ombá walemonga u seringi nikiru mele pe aku siku seko molongela.

<sup>31</sup> "Yu ombá kanu walemo wendo ombá kinia ulka imuna ola molonge yomboma kelko ulkondo pungu ononga ulka sukundu taltonge mélema pungu naa li-pang. Aku sikula kaliana molonge yomboma mélema liepili taltoko kaliana pungí kinia kanu walemo wendo ombá kinia taltonge mélema kelko pungu naa li-pang. <sup>32</sup> LLote menu serimu mele piliame. „LLote pea Sodomo munduku kelko kowa puringili-na-kolo Sodomo sepe mania orumu-kulu pilipale Pulu Yemonga angello sene u "Iku siku naa kanoko we sumbi siku kowa pale." nirimu mele LLote menu naa pilipa lipa,

iku sipa kanorumu kinia api-kusa au lepa kou mele we gilierimu.,<sup>33</sup> ‘Na naa kolopo konopu simbú uluma mindi sepo molambo.’ ningu Pulu Yemonga ungumu naa pilku lingí yomboma sika kolonge. Aku-sipa na-kolo ‘Na kolondu liemu peangala.’ ningu Pulu Yemonga ungumu pilku liku seko molonge yomboma naa kolko molko mindi pungí.

<sup>34</sup> Nane onondo paa sika nimbu sikirumu: “Mania Ombo Mana-Ye Au Lierimu Yemo kelepa ombá walemonga ipuliel i yombo talo suluminia seluna pengele kinia ,Pulu Yemonga angello sene, ombo yombo se we pepili mundupa kelepa se lipa memba pumbá. <sup>35</sup> Ambo talo kere-langi kalongele seko molongele kinia ,angello se ombo, ambo se we molopili mundupa kelepa se lipa memba pumbá. <sup>36</sup> (Ye talo kondena unju toko gilingili kinia ,Pulu Yemonga angello sene ombo, ye se we molopili mundupa kelepa se lipa memba pumbá.)” nikiru.” nirimu.

<sup>37</sup> „Yuni nirimu mele pilku, onone ninguli: “Ye-Awilim, aku ulumu sena sembaye?” niringi.

Yesusini pundu topa ungu-iku se topa nimbale: “Mélema kolopa lemó koleamanga méle kololima nolemele keramane mélema kolopa lemóma kanokole nongendo mania ongo liku maku tolemele.” nirimu.

## 18

18:1-8

### *Pulu Yemo Kote Pilipa Molombamonga Ungu-Ikumu*

<sup>1</sup> Walte, Yesusini ‘Ono alieli Pulu Yemo kinia ungu ningu siye naa kolangi.’ nimba yu lombili andolimando ungu-iku se topa nimbale:

<sup>2</sup> Walte, kolea senga kote pilierimu ye se molorumu. Kanu kote pilierimu yemo yu Pulu Yemo kepe mana-yomboma kepe, pipili naa kolorumu. <sup>3</sup> Kanu koleana ambo-wayaya se molorumula. Kanu ambomo yuni kote pilieli yemo molorumuna alieli ombo yundu nimbale: “Na sepa kinjerimu yemo kote sendambo. Nuni na liku tapondoko kote pilindei.” nimba mawa se-pu-pu serimu.

<sup>4-5</sup> Ambomo u kokele orumu kinia kote pilieli yemone yundu “Mólo, nunga kote naa pilindimbu.” nirimu-na-kolo ambomo yu alieli ombo mawa serimumunga kote pilieli yemo pilipa kiri pilipa yu yuyu nimbale: ‘Na Pulu Yemo pipili naa kolopo, yomboma kondo naa kolopo molio-na-kolo i ambo-wayamo alieli ombo mangilielemomonga pe kelepa ombo mawa sembá kinia na kamu pilipu kiri pilimbu kene yunga kote pilindambo.’ nirimu.” nimba Yesusini, nirimu.

<sup>6</sup> Ye-Awili ,Yesusini aku ungu-ikumu topa pora sipale, ungu se pea nimbale: “Kote pilierimu ye kirimuni ambo-wayamondo serimu mele piliayo. <sup>7</sup> Aku sipa mele Pulu Yemone yunga yomboma umbuna silimili yomboma aku selemelemonga kote pilieli yemo molopale kote naa sendembaye? Yunga u nimba taltorumu yombomane ipuliel i kepe tangoli kepe alieli “Olionga kote pilindei.” ningu mawa selemele kinia yuni ononga kote naa pilindimbye? Yu u we molopa pe mele “Ono lipu tapondambo.” nimba taka lepa ombáye? <sup>8</sup> Yu sembá mele nimbu siembo: “Pulu Yemo yu welea ombo yunga yomboma lipa tapondombando, ono umbuna silimili yomboma kote sendepale mindili simba.” nikiru. Aku-sipa na-kolo Mania Ombo Mana-Ye Au Lierimu Yemo kelepa wale talo-sipa mania ombá kinia “Yombo marene ‘Yuni ono lipa tapondomba.’ ningu yu mawa seko molonge molo mólonje?” nimba ombo kanomba.” nirimu.

18:9-14

*Ye Parisi Se Kinia Kou-Takisi Lili Ye Se Kinia Olonga Ungu-Ikumu*

<sup>9</sup> Yombo mare ono onone pilkuli ‘Na peanga. Na sumbi sipu molio, yombo lupama molko kinjilimili. Ono yombo kirima. Ono kinia kopu sepo naa molambo.’ ningυ pilku andoko moloringi yombomando Yesusini i ungu-ikumu topa nimbale:

<sup>10</sup> “Ye talo yu-melete-melete ‘Pulu Yemo kinia ungu niembili.’ ningυ Pulu Yemo popo toko kaloringi ulka-tembelena puringili. Se Parisi ye se, se kou-takisi lili ye se.

<sup>11</sup> Parisi yemo pendo sepa ola gilipale yu yuyu konopumuni pilierimu unguma nimbale: “Pulu Yemo, yombo lupama molemele mele na aku sipu naa moliomonga nu “Ange.” nikiru. Ono wa nongo, ulu-pulu-kirima seko, ambo yema wa ulu-kirinale seko, selemele. I kou-takisi lili yemo sepa molemo mele kepe na naa selio. <sup>12</sup> Na koro senga senga wale talo kere-langi mi topo naa nombo, kou-mone kinia mélema kinia méle rureponga talo rureponga talo nimbu liumanga selu selu nimbu nu siliu.” nirimu.

<sup>13</sup> Aku-sipa na-kolo kou-takisi lili yemo nondopa naa om̄ba anju senga lupa ma kanopa gilipa, ‘Na ye paa kiri se.’ nimba pilipale pipili kolopa ki-lumuni yunga uluwina topa gilipa nimbale: “Pulu Yemo, na konopuna ulu-pulu-kiri peli yemo kondō kolou.” nirimu. „nimba Yesusini nirimu.“

<sup>14</sup> Nane onondo paa sika nimbu sikirumu: “I yetolonga Pulu Yemone kou-takisi lili yemonga ulu-pulu-kirima siye kolopa, yu ‘ye sumbi n̄limu.’ nimba kanopa molopili ulkondo purumu, aku-na-kolo Parisi yemo yunga ulu-pulu-kirima konopuna we pepili ulkondo purumu.” nikiru. Yombo onono imbima ambolko paka tolemele yomboma Pulu Yemone topa mania mundumba, aku-na-kolo yombo onono toko mania mundulimili yomboma yuni ononga imbima ambolopa paka tondomba.” nirimu.

**18:15-17**

### *Yesusini Bolangomando “Pulu Yemone Ono Sewi Anjepili.” Nirimu Semanemo*

<sup>15</sup> Kanu-kinia yombomane ononga bolango kangama ‘Yesusi yunga kimuni ambolopili.’ ningυ yu molorumuna mengo oringi. Mengo onge oringi kanokole Yesusi lombili andolimane iri toko „Naa mengo waa.“ , niringi.

<sup>16</sup> Aku-sipa na-kolo Yesusini bolangomando “Waa.” nimbale ,yu lombili andolimando, nimbale: “Pulu Yemo ye nokoli kingimu molopa nokolemo yombo talape akumu i bolangoma mele molemele yomboma ononga yombo talapemo kene onone i bolangoma na moliona wangipipi siku “Mólo.” naa niee.” ,nirimu. <sup>17</sup> Nane onondo paa sika nimbu sikirumu: “Bolangomane ‘Pulu Yemo olionga ye nokoli kingimu molopili.’ ningυ molemele mele aku siku naa nilimili yomboma yunga koleana sukundu paa naa pungí, mólo.” nikiru.” nirimu.

**18:18-30**

### *Ye Kamako Senga Semanemo*

<sup>18</sup> „Walte Juda yombomanga, ye nokoli se Yesusi molorumuna om̄ba yundu mangilipa pilipa nimbale: “Ungu Mane Sili Peangamo, na nambolka unguri sembó kinia naconde molopa kondopa mindi puli ulu-pulumu limbuye?” nirimu.

<sup>19</sup> Yesusini yundu nimbale: “Nuni na nambi semu-na “Peangamo.” nikinuye? Yombo peanga se mólo. Pulu Yemo mindi peangamo.” ,nirimu.

<sup>20</sup> „Aku nimbale yemone mangilierimumunga pundu topa nimbale:“ “Nu „Pulu Yemonga, ungu-manema „Mosisini yando nimba sirimuma, pilieleno. „Aku ungu-manema i-sipa:“

“Ambo ye pulima molo ye ambo liilima yombo lupama-kinia  
wa ulu-kirinale naa sangi.” nimba,  
“Yombo toko naa kondangi.” nimba,  
“Mélema wa naa liengi.” nimba,  
“Yombomanga kote kolo toko naa sendangi.” nimba,

"Aminiel i lanieli kinia molko kondoko,  
ungu ningí mele pilku liku seko molangi." nimba,  
ungu-mane akuma sirimu pelemo kanumu." nirimu.

<sup>21</sup> Aku nirimu kinia pilipale kanu yemone nimbale: "Na kangomo molopole  
aku ungu-manema pali pilipu lipu sepo molorundu mele yandopa kiniá kepe sepo  
molioko." nirimu.

<sup>22</sup> Yu aku nirimu pilipale Yesusini yuntu nimbale: "Papu seleno-na-kolo ungu selu  
mindi naa seleno. Nu pungu nunga méle taltolenoma pali kou-mone li-punguli, kou-  
mone linima yombo koropama moke seko sikuli na lombili ou." nirimu. "Nunga  
,mana-,mélema aku sení kinia mulu-koleana nunga méle peangama lemba." nirimu.

<sup>23</sup> Kanu ye nokolimu méle paa peanga-peanga awisili taltorumu-kulu Yesusini aku  
nirimu kinia pilipale yu konopu kiri panjipa konopu umbuna paa awili-sepa sepili  
anju purumu.

<sup>24</sup> Yu aku sipa purumu kanopale Yesusini yu lombili andolimando nimbale: "Pulu  
Yemo ye nokoli kingimu molopa nokolemo koleana sukundu pungíndu yombo  
kamakoma paa kála seko sukundu pungí. <sup>25</sup> Kongi kamele ,kongi paa awili se na-  
kolo, kale suru tolina suku pumbándo kála kanga mele sepale pumbá. Aku-na-kolo  
yombo kamakoma Pulu Yemo ye nokoli kingimu molopa nokolemo koleana sukundu  
pungíndu kála paa awili mele seko pungí." nirimu.

<sup>26</sup> Yuni aku nirimu pilieringi yombomane ninguli: "Aku liemu mindili nolemolá  
aulkana nawe manda wendo pumba, molopo kondomolo aulkana pumbaye? Se  
mólonje?" niringi kinia

<sup>27</sup> yuni onondo nimbale: "Yombomane paa manda naa selemele uluma Pulu  
Yemone manda sembá. Pulu Yemo yuni uluma pali manda selemo. Ulu se yuni  
manda naa sembá se mólo." nirimu.

<sup>28</sup> ,Yuni aku nirimu kinia pilipale, Pitane yuntu nimbale: ",Pe olio-kinia nambolka  
uluri wendo ombáye? , Olio olionga mélema pali mundupu kelepo nu lombili  
purumulu mele pulimulu kanumu." nirimu.

<sup>29</sup> Yesusini nimbale: "Nane onondo paa sika nimbu sikirumu: "Pulu Yemo omba  
ye nokoli kingimu molopa nokomba walemo wendo ombá mele 'Yomboma piliangi.'  
ningu siliku andongendo ononga ulkama kinia, menupili, genupili, anupili lapali,  
bolangoma, akuma munduku kelenge yomboma pali <sup>30</sup> ya mana paa olandopa mele  
awisili likuli pe pungí koleana konde molko kondoko mindi puli ulu-pulumu língila."  
nikiru." nirimu.

18:31-34

### *Yesusini Yu Kolopale Lomboropa Ola Molomba Mele Kelepa Wale Yopoko-Sipa Nimba Para Sirimu Semanemo*

<sup>31</sup> Kanu-kinia Yesusini ,yu lombili andoli, ye engaki rurepo 'na kinia ono kinia  
olioolio molamili.' nimba ono lipa anju memba pumba onondo nimbale:

"Piliame. Olio kolea-awili Jerusalleme pumulú pukumulu. Akuna pumulú kinia u  
Pulu Yemone ungu-umbu tondorumuma pilku yomboma ningu siringi yemane wendo  
ombá mele ningu bokuna toringi uluma pali Mania Ombo Mana-Ye Au Lierimu Yemo-  
kinia kamu wendo ombá. <sup>32</sup> Juda yombomanga ye awilimane Mania Ombo Mana-  
Ye Au Lierimu Yemo liku Juda ye naa molemele yema singí. Onone yu ungu-taka  
tondoko yu seko kinjiku yunga kumbikerena elkambe toko, <sup>33</sup> yu ka-pultane toko  
yu toko kondonge. Yu toko kondonge kinia wale yopoko-sipamonga lomboropa ola  
molomba." nirimu.

<sup>34</sup> Aku-na-kolo yuni ungu nirimumu pilku sundoringi. Ungu-pulumu naa pilkuli  
ungu nirimumu pilku sundoringi.

18:35-43

### *Yesusini Mongo Kiri Lierimu Ye Se Sepa Peanga Sirimu Semanemo*

<sup>35</sup> Kanu-kinia Yesusi Jeriko taono nondopa ombá orumu kinia mongo kiri lierimu ye se aulka lomolomena molopa yomboma "Kou-mone siee." nimba mawa serimu.

<sup>36</sup> Kanu yemone yombo awisili ongo pungí puringi pilipale yuni "Nambi sekemeleye?" nimba mangilierimu kinia

<sup>37</sup> onone yundu ninguli: "Nasarete ye Yesusi ombo pukumu." ningu, ningu siringi.

<sup>38</sup> Aku niringi pilipale yuni tondolo ru nimba mangilipa nimbale: "Yesusi, ye nokoli kingi, Depitini kalopa liltimu yemo, na kondo kolou." nirimu.

<sup>39</sup> Kumbi leko puringi yombomane yu iri toko "Nu ungu naa nili taka leko molou." niringi.

Aku-na-kolo yuni paa tondolo ru nimba mangilipa nimbale: "Depitini kalopa liltimu yemo, na kondo kolou." nirimu.

<sup>40</sup> Yesusi we gilipale "Yu yando mengo waa." nirimu. Yu Yesusi gilierimuna nondopa orumu kinia Yesusini yundu mangilipa pilipa nimbale: <sup>41</sup> Nane nu nambi sambo konopu lekenoye?" nirimu.

Yuni pundu topa nimbale: "Ye-Awili mu, na mongone mélema kanambo nanga mongotolo seko peanga sendani." nirimu.

<sup>42</sup> Yesusini yundu nimbale: " 'Nane nunga mongotolo manda sendembo.' konopu lienumunga nu umbu-mongo manda giliepili." nirimu. <sup>43</sup> Yesusini aku nirimu kinia yu popenge sepa mongotolo peanga lierimu, mélema kanopale Pulu Yemo kape nimba yunga imbimu ambolopa paka tondolepa Yesusi lombili purumu. Yombomane pali kanu ulu-tondolo wendo orumu, mu kanokole onone kepe Pulu Yemo kape niringi.

## 19

19:1-10

### *Yesusi Kinia Ye Sakiasi Kinia Pea Seringili Semanemo*

<sup>1</sup> Yesusi yu Jeriko taono ombo pumbá purumu. <sup>2</sup> Jeriko akuna, kou-takisi lipa takisi liltingi yema nokorumu ye se, yunga imbi Sakiasi, yu akuna molorumu. Yu méle awisili taltopa yu kamakomo molorumu. <sup>3</sup> Kanu yemone Yesusi orumu kanomba serimu. Yesusi orumuna yombo awisili liku maku toringi-kulu Sakiasi yu ye ponjili-kulu molopale Yesusi manda naa kanorumu. <sup>4</sup> Akumunga Yesusi orumuna kanombando yu lisipa kumbi lepa pumbale unju sikamo-piki nili se Yesusi ombá orumu aulkana nondopa gilierimu aku unjumunga ombo ola purumu.

<sup>5</sup> Yesusi akuna ombale we gilipa olando-sipa kanopa yundu nimbale: "Sakiasi, nunga ulkana kiniá na pea molambili pambili welea mania ou." nirimu kinia

<sup>6</sup> yu popenge sepa mania ombo yundu "Manda." nimba konopu sirimu.

<sup>7</sup> Yesusi Sakiasinga ulkana pea puringili kanokole u akuna liku maku toringi yombomane ninguli: "Yu ulu-pulu-kiri seli ye se kinia 'Molo-pambili.' nimba pukumu." ninguli yu serimu mele kanoko kiri pilieringi.

<sup>8</sup> Kanu-kinia Yesusi kinia Sakiasi kinia olo ulkana sukundu molkole Sakiasi ola gilipa Ye-Awili mundu nimbale: "Ye-Awili mu, nane nundu ungu se niembo pílie. Nanga méle taltolioma ekendo lipu yombo koropama sipuli, pe kou se molo mélse kolo topo wa mele liltindu mélse kelepo wa liltindu mele pundu topo yopoko ola panjipu anju simbú." nirimu.

<sup>9</sup> Yuni aku sipa nirimu kinia Yesusini yundu nimbale: "Kiniá i ulka pulu yomboma Pulu Yemone lipa tapondopa 'mindili nolemolá aulkana wendo ongo, yu-kinia pea molko kondonge aulkana pangí.' nilimú ulu-pulumu likimili. Kiniá i ulka pulu yemo yu kepe anda-kolepa Eporayamone kalopa liltimu ye se kanumu.

<sup>10</sup> Mania Ombo Mana-Ye Au Lierimu Yemone 'Yombo aulka lo liku molko kinjilimili yomboma koropo, ono lipu tapondopo mindili nolemolá aulkana wendo lipu na-kinia molko kondonge aulkana lipu mondombo.' nimba orumu." nirimu.

**19:11-28**

*Ye Awili Sene Yunga Kendemande-Yema Kou Mare Sipale Senga Purumu Ungu-Ikumu*

<sup>11</sup> Aku sipa nirimu pilkuli Yesusi yu kolea-awili Jerusalleme nondopa ombá serimus-kulu kanokole we-yomboma onone 'Pulu Yemo ombo ye nokoli kingimu molomba walemo paa nondopa ombá.' konopu leko moloringi. Onone aku siku pilku moloringi pilipale 'Yesusi' yuni onondo ungu-iku se topa <sup>12</sup> nimbale:

"Ye nokoli senga malo kolea senga aulka sulu pumba yu kingimu molomba namba tondolo se li-pumbale 'Pe yando ombó.' nimbale yu purumu. <sup>13</sup> U naa pupili yunga kendemande-ye rureponga talondo "Waa." nimbale kou kuluepe rureponga talo moke sepa ono yu-mele-mele kou kuluepe selu selu nimba sipa onondo nimbale: "Na wili anju molambo i kou-mone sikiru likimilimunga 'Kou se olandopa pea liemili.' ningu konopu tondolo munduku seko molangi. Pe ombó." nimba yu purumu.

<sup>14</sup> Kanu yemo purumu kinia yunga talapena yomboma yu-kinia konopu kiri pilieringi-kulu ononga ye se 'Yu akilepa pupili.' ningu liku munduku ninguli: " 'I ye nokolimu olianga ye nokoli kingimu naa molopili.' nimbu molemolo.' nindei." ningu yu liku mundoringi.

<sup>15</sup> Pe kanu yemo kingi nambamo sika lipa memba yando orumu kinia u kou-mone sipa purumu kendemande-yemando "Waa." nimbale "Ono kou-mone sirindumunga olandopa kou nambi seko liltingiyi?" nimba mangilierimu.

<sup>16</sup> U kumbi lepa sirimu yemone ombo yundu nimbale: "Ye-Awili, nunga kou kuluepe se sirinu kanumunga ola panjipu kuluepe rureponga talo liltindu." nirimu kinia

<sup>17</sup> ye nokoli kingimuni yundu nimbale: "Kendemande-ye peangamo. Papu serinu. Méle kanga sirindumunga nu seko kondorunu kene nu kolea-awili rureponga talo nokani." nirimu.

<sup>18</sup> Ye talo-sipamone ombo yundu nimbale: "Ye-Awili, nunga kou kuluepe se sirinu kanumunga ola panjipu kuluepe se-pakara liltindu." nirimu kinia

<sup>19</sup> ye nokoli kingimuni yundu nimbale: "Aku siku serinumunga nu kolea-awili se-pakara nokani." nirimu.

<sup>20-21</sup> Pe kendemande-ye se ombo yundu nimbale: "Ye-Awili, nane pilipuli 'Nu bisinisi tondolo munduku seko, 'Kou-mone lipu taltombomonga yomboma mindili nongi liemu mandala.' ningu 'kendemande-yomboma 'Kongono kála seko sangi.' ningu siku, ono méle koltalo siku mélema pali nunu mindi lilitu yemo; kalia yombomane panjindilimili kinia nu nunu kere-langí mélema we akuku liku; kalia naa seleno kaliana kere-langí liku taltoko, nu aku siku seko moleno yemo.' pilipuli pipili kolopo nuni na sirinu koumu kuluepe topo taltorundumu i sikiru." nirimu.

<sup>22</sup> Aku nirimu kinia pilipale ye nokolimuni iri topa yundu nimbale: "Nu kendemande-ye kirimu. 'Nane nunga kote pilimbu kinia, nunga nikinu ungumuni nunu kote sendemba. Nuni pilkuli 'Kalia yombomane panjindilimili kinia na nanu kere-langí mélema we akupu lipu; kalia naa selio kaliana kere-langí lipu taltopo, na aku siph sepo molio.' ningu pilku molenoye? <sup>23</sup> Aku ningu pilkuli nanga kou-monemo kou-benge ulkana nambi semu-na naa taltorunuye? Aku selenanje na ombo nanga koumu wendo lipuli kou kanga-kolte ola panjiku silimolá lilkala." nirimu.

<sup>24</sup> 'Kanu kendemande-yemondo aku siph nimba pora sipale' yuni nondoko gilieringi yombomando nimbale: "I yemo sepa kinjerimu kene yunga koumu wendo likuli kou kuluepe rureponga talo ambolkomo yemo siee." nirimu.

<sup>25</sup> Onone yuntu ninguli: "Ye-Awilimu, yu koronga kou kuluepe rureponga talo ambolkomo kanumu." niringi.

<sup>26</sup> Onone aku niringi kinia ye nokoli kingimuni kelepa nimbale: "Onondo nimbu siembo: "Mélema taltolemo yombomo nane mare pea simbú, yu paa awisili taltomba. Aku-na-kolo mélema naa taltolemo yombomo yu taltolemoma kepe wendo limbu." nikiru." nirimu.

<sup>27</sup> Aku sipa nimbale kanu ye nokoli kingimu yuni ungu se pea nimbale: "Kiniá na seko kinjeringi yomboma mengo wame. Onone nando ninguli: 'I yemo olianga ye nokoli kingimu naa molopili.' niringi kanu yomboma mengo ongo na kanopo molambo ono toko kondaa." nirimu." nimba Yesusini aku sipa kanu ungu-ikumu topa pora sirimu..

<sup>28</sup> Ungu-iku akumu topa pora sipale kolea-awili Jerusallemendo kelepa pumbá purumu.

19:29—21:38

## Yesusi Jerusalleme Ombale, Ulka-Tembelena Yomboma Mane Sirimu Semanemo

19:29-40

*Ye Nokoli Kingi Se Kolea Senga Sukundu Pumbá Purumu Kinia Seringi Mele Yesusi  
Jerusalleme Sukundu Pumbá Purumu Kinia Aku Siku Seringi Semanemo*

<sup>29</sup> Kanu-kinia Yesusi kinia yu lombili andolima kinia, ono kolea-awili Jerusalleme nondoko ongo, ma-pangi se 'Ma-Pangi Unju Ollipi Kalia' nili akuna lemó kolea kanga talo, Betepasi kinia Betanitolonga oringi. Kanu-kinia Yesusini yu lombili andoli ye talo lipa mundupa, olondo nimbale: <sup>30</sup> Ne kolea-kanga kanokombelena punguli kongi dongi walo se, yombo se yunga bulu-mingina waltikele kepe naa molopa andorumumu ka seko panjingímu ne akuna sukundu molomba kanongele kanumu pungu posiku mengo wangili pale. <sup>31</sup> Posingilí seko molongele kinia yombo sene olondo "Dongimu nambi semu-na posikimbiliye?" nimba mangiliemu liemu alone i-siku niengili: "Ye-Awilimu yu 'Dongimuni mepili.' nimu-na ombo likimbulu." niengili." nimba olo lipa mundorumu.

<sup>32</sup> Kanu lipa mundorumu yetolo pungu yuni nirimu mele kanoko lendekole <sup>33</sup> pe kanu kongi dongi walomo posiku moloringili kinia dongi pulu yemane olondo ninguli: "Olianga dongimu nambi semu-na posikimbiliye?" ningu mangilieringi kinia

<sup>34</sup> alone "Ye-Awilimu yu 'Dongimuni mepili.' nimu-na ombo likimbulu." niringili.

<sup>35</sup> Kanu-kinia dongi kanumu liku Yesusi molorumuna mengo oringili kinia onone ononga mulu-maminiamma kulku, dongimunga bulu-mingina ola pauwa tondoko Yesusi kanuna ola mondoringi. <sup>36</sup> Marene ononga mulu-maminiamma kulku yu ombá aulkana pauwa tolko puringi.

<sup>37</sup> Kanu-kinia yu Jerusalleme paa nondopa omba, 'Ma-Pangi Unju Ollipi Kalia' nili akuna mania ombá orumu kinia yu lombili puringi yombo awisili konopu awili-seko siku Yesusini, ulu-tondolo awisili serimu kanoringimanga Pulu Yemo kape ningu ungu tondolo munduku ninguli:

<sup>38</sup> "Pulu Ye Yawene lipa mundorumu-na  
yunga kongonomo sendemba okomo ye nokoli-  
kingimu molopa kondopili.

Mulu-koleana konopu pe nipili molomolo walemo  
welea opili.

Mulu-koleana paa olandopa 'Pulu Yemonga, imbimu  
paa ola molopili lakopo kape niemili."  
niliku puringi.

<sup>39</sup> Aku siku niringi pilkuli pea oringi Parisi ye marene „we-yombomane aku siku niringi mele pilku kiri pilku, yundu ninguli: “Ungu Mane Sílimu, nu lombili andolimane nikimili mele ‘Naa niengi.’ ningu ono iri tou.” niringi kinia

<sup>40</sup> Yesusini onondo nimbale: “Nane onondo i-sipu nikiru: “I yombomane i-siku naa ningu we molongi liemu ya kou-mulu lemomane ru ningí.” nikiru.” nirimu.

**19:41-44**

*Yesusi Kolea-Awili Jerusalleme Kanopale Kondo Kolopa Kola Serimu Semanemo*

<sup>41</sup> Kolea-awili Jerusalleme paa nondopa omba kanumu kanopale nirimumuni, Yesusini kola sepa <sup>42</sup> nimbale: „Jerusalleme yomboma,, kiniá ono kepe mindili naa nongo konopu pe nipili manda molonge aulkamo pilielemolánje peanga. Aku-sipa na-kolo kiniá naa pilielemele, naa pilingí. <sup>43</sup> Ono molongena wale mare wendo ombá, kanu walemanga ononga opa-touma ongo ‘Ononga koleamonga aulka naa liepili.’ ningu ma liku maku toko, pala mele seko opa-touma ono molko makapu seko ‘Ono sukundu molangi.’ ningu aku senge. <sup>44</sup> Aku sekole ningímu, pe Jerusalleme ulkama pali toko sikisiku bulu-balú sikuli sukundu molonge yomboma tonge, aku siku senge walema wendo ombá lémo. Pulu Yemone „ono lipa tapondombando, omu walemo onone naa piliengimunga kanu walema wendo ombá.” nirimu.

**19:45-48**

*Ulka-Tembelena Bisinisi Seko Kou Liku Moloringi Yema Yesusini Topa Makororumu Semanemo*

<sup>45</sup> Yesusi Jerusalleme sukundu pumbale nirimumuni, Pulu Yemo popo toko kaloringi ulka-tembelena „Juda yombo naa molemele yomboma ‘Pulu Yemo popo tamili.’ ningu maku tolemele kolea” niringi akuna, sukundu pumba kanopale akuna mélema makete seko moloringi yomboma topa makoromba makoropale <sup>46</sup> onondo nimbale: “Pulu Yemonga bokuna ungu se i-sipa nilimú:

‘Yombomane nanga ulkamondo

“Pulu Yemo kinia ungu nilimulu ulkamo.” ningí.’

kanumu. Ungu aku sipa molemo-na-kolo onone i ulkamo

‘wa nolemele yomboma lopi seko molemele ulkamo’

mele ningu pilkuli aku siku selemele.” nirimu.

<sup>47</sup> Yuni enamanga alieli ulka-tembelena sukundu „Juda yombo naa molemele yomboma ‘Pulu Yemo popo tamili.’ ningu maku tolemele kolea” niringi akuna, yomboma ungu-mané sirumu. Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, Juda yomboma nokoringi ye awilima kinia, onone yu toko kondonge aulka se kororingi. <sup>48</sup> Aku-na-kolo we-yombomane yunga unguma komu sendeko pilku moloringi-kulu onone yu toko kondonge aulka se naa kanoko liltingi.

## 20

**20:1-8**

*Yesusi Namba Sirimumunga Angelema Niringi Semanemo*

<sup>1</sup> Walte „Pulu Yemo popo toko kaloringi, ulka-tembelena Yesusi akuna maku toringi yomboma ungu-mané sipa, semane peangamo topa sipa molorumu kinia ye mare, Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, Juda yombomanga tapu-yema kinia, ono ongo <sup>2</sup> yu mangilku pilku ninguli: “Nu namba nambolka nambamo likuli i kongonomo selenoye? Nawene i kongonomo “Se-pu.” nimba nu nambamo sipa lipa mundorumuye?” niringi.

<sup>3</sup> Yesusini onondo pundu topa nimbale: “Nane ono ungu se mangilipu piliambola. Ono mangilimbu mele onone na pundu toko niengi. <sup>4</sup> U „No Lindeli, Jono ombo

yomboma no linderimu kinia yu mulu-koleana „molemo yemonga“ kongonomo sendembando yomboma no linderimu molo ya mana-yombomanga kongonomo sendembando yomboma no linderimuye? „Nawene “Sei.” nirimu-na serimuye? Ningu siee.,“ nirimu.

<sup>5</sup> „Yuni aku sipa mangilierimu mele pilkuli, onone onono angelema ningu ninguli: “Yuni mangilkimu mele olione pundu topo, “Jono, yu mulu-koleana „molemo yemonga kongonomo sendembando yomboma no linderimu.,“ nímulu liemu yuni oliondo nimbale: “Aku liemu ono Jonone nirimu ungumu nambi semu-na ‘I ungumu sika.’ ningu kuru naa mondoringiye?” nimbá. <sup>6</sup> Molo olione nimbuli: “Yu mana-yombomanga „kongonomo sendembando yomboma no linderimu.,“ nímulu liemu we-yombomane olio kouni toko kondonge. We-yombomane ‘Jono yu paa sika Pulu Yemone ungu-umbu tondorumumu pilipa yomboma nimba sirimu ye se molorumu.’ ningu pilielemele kene onone olio kouni toko kondonge.” ningu onono aku siku angelema niringi.

<sup>7</sup> Onono aku siku anju yando angelema ninguli, Yesusindu pundu toko ninguli: “Yuni Pulu Yemonga kongonomo sendepale yomboma no linderimu, molo mana-yombomanga kongonomo sendepale yuni yomboma no linderimunje. Olio naa pilkimulu.” niringi.

<sup>8</sup> Aku siku niringi kinia pilipale Yesusini onondo nimbale: “Manda. „Nane ono mangilkiru ungumunga ungu se pundu toko naa nikimilimunga, onone na mangilkimili ungumunga ungu se pundu topo nando i kongonomo ‘Se-pu.’ nimba na lipa mundupa namba sirimu yemonga imbimu ono naa nimbu simbula.” nirimu.

20:9-19

### *Unju-Waene Kalia Nokoringi Ye Kirimanga Ungu-Ikumu*

<sup>9</sup> Kanu-kinia maku toko moloringi yombomando Yesusini ungu-iku imu topa nimbale:

“Ye sene unju waene kalia serimu. Ye mare kanopa lipa onondo nimbale: “Nanga kaliamo tapu sendeko unju mongoma inia toko nokondangi. Pe waene-mongo polo tomba kinia unju mongoma moke sepo, kongonomo sendenge mele mare ono liengi, mare na liembo.” nimba kanu kaliamo ono sipale yu kolea paa suluringa pumba akuna wale awisili molorumu.

<sup>10</sup> Kanu-kinia pe waene-mongo polo tomba serimu kinia kalia pulu yemone yunga kendemande-ye se “Nanga waene-mongo siengi pungu liku mendeko wani pu.” nimba kalia nokoringi yema moloringina lipa mundorumu. Aku-na-kolo kendemande-yemo „orumu kinia, kalia nokoli yemane yu wale awisili kopene toko, waene-mongo mare naa siku, „Yemo molemona kelko pu.” ningu, yando we liku mundoringi.

<sup>11</sup> Kelepa kalia pulu yemone kendemande-ye se lipa „Nanga waene-mongo lindipou.” nimba lipa, mundorumu. Aku-na-kolo kendemande-yemo „orumu kinia, kalia nokoli yemane yu ambolko likuli kopene toko, seko kinjiku, waene-mongo mare naa siku yando we liku mundoringi.

<sup>12</sup> Kelepa kalia pulu yemone kendemande-ye se lipa mundorumu kinia onone yu tokole kaliana ultu mundoringi.

<sup>13</sup> Aku siku seringimunga kalia pulu yemone „konopumuni pilipale, ‘Kiniá na sembó mele piliporo. Nanga malo, na konopu mondolio kangomo, ono yu pipili kolko liku awi siku yu waene-mongo mare singínje.’ konopu lepale „yunga malo lipa mundorumu. <sup>14</sup> Aku-sipa na-kolo kalia nokoli yemane kalia pulu yemonga malo ombá orumu kanokole onone onono ninguli: “Andi okomo yemo pe lapanga mongémélema limba yemo okomo. Yu topo kondopo, i kaliamo olio kamu liemili.” ninguli

<sup>15</sup> onone yu ambolko liku kaliana ultu mundukuli yu toko kondoringi.” „nimba Yesusini nirimu.”

„Nimbale ungu-iku akumu topa pora simbando akuna maku toko moloringi yombomando nimbale:”

“Kalia nokoli yemane aku siku seringimunga pe kalia pulu yemone ono-kinia nambolka unguri sembaye? <sup>16</sup> Yu ombo kanu ye kirima topa kondopale ‘Ye marene lupa kaliamo nokondangi.’ nimba lipa simba.” nirimu.

Kanu-kinia Yesusini aku sipa nirimu kinia pilkuli onone ninguli: “Pulu Yemone ‘Aku sipa wendo naa opili, paa mólo!’ nipili.” niringi.

<sup>17</sup> Yesusini „Pulu Yemonga Juda yomboma nokoringi yemane yu toko kondonge mele pilipale, onondo nimbale: “Pulu Yemonga ungu se bokuna molemomonga ungu-pulumu nambolkanje konopu lemeleye? Aku ungumu i-sipa mele:

‘Ulka takoringi yemane kanoko kiri pilku

toko eltoringi kou kanumu

kiniá kelepa ulka simu mele

ulka enge sindeli kou awili peangamo.”

nimba molemo kanumu. <sup>18</sup> I kou „nikiru,munga ola yombo se a topa topale bele mélema elke tomba. Aku-sipa na-kolo yombo se molombana ola koumu ombo yu topale kanu yombomo topa norupulu tomba.” nirimu.

<sup>19</sup> Kanu-kinia Pulu Yemonga ungu-manemanga puluma pilku mane siringi yema kinia, Pulu Yemo popo tondoringi ye awilima kinia, ono Yesusini ungu-iku torumu kanumu pilkuli onone seko kinjiku yu toko kondonge seko moloringi mele yuni nirimu pilkuli onone kanu enamonga yu ka singí seringi-na-kolo kanu ye awilimane we-yomboma pipili kolcole yu naa liku ka siringi.

20:20-26

### *“Gapomano Kou-Takisi Tamili Molo Móloye?” Ningu Yesusi Mangilku Pilieringi Semanemo*

<sup>20</sup> Kanu-kinia „Juda yombomanga ye awilimane, ‘Yesusi ka sipu „kote sendemolondo, gapomano yemo molombana membo pumulú.”’ ningu molkole yu kanoko moloringi. ‘Yuni ungu se nimba kinjimba kinia ka simulú.’ ninguli ye mare, ‘Konopu sumbi nimba pepili molemolo. Yunga ungumu konopu sipu pilipu molemolo.’ ningu kolo toko molonge ye mare, liku yu molorumuna liku mundoringi.

<sup>21</sup> Kanu yemane ongo yundu „kondi toko, ninguli: “Ungu Mane Sílimu, olio pilipuli, ‘Nu alieli ungu sikama mindi sumbi siku ningu, ungu-mane sikama manjiku sumbi siku mane siku sekole, nu yombo seluringa kepe konopu kimbú naa siku, yomboma pipili naa kolko, onondo pali ungu selu-siku selu selu ningu siku, Pulu Yemone “Saa.” nilimú uluma paa sika unguma mane siku, aku siku seleno.’ konopu lemolo. <sup>22</sup> „Aku siku seko molenomonga nu nambolka konopu lekenoye?”, Olione Romo Gapomano Ye Paa Awili Kumbina Sisamo kou-takisi tomulu liemu manda molo móloye? Pulu Yemone akumundu ungu-mane sirimu ungu-mane nambolkamo pelemoye? Ningu si.” niringi.

<sup>23</sup> Aku-sipa na-kolo Yesusini onone yu seko kinjingindu aku siku peké tondoko mangilieringi pilipale onondo nimbale: <sup>24</sup> „Takisi tolemele, kou-mongo se na liku ora siee.” „nimba onondo kelepa mangilipa pilipa nimbale:” “I kouna nawenga kumbikeremo kinia imbimu molemoye?” nirimu.

<sup>25</sup> Onone yundu ninguli: “Romo Gapomano Ye Paa Awili Kumbina Sisamonga „kumbikeremo kinia imbimu molemo.” niringi.

Kanu-kinia yuni onondo nimbale: “„Kou-monemo Sisamonga, kene Sisamonga mélema Sisamo yuyu siku, Pulu Yemonga mélema Pulu Yemo yuyu siee.” nirimu.

<sup>26</sup> Yuni aku sipa „paa sumbi sipa, nirimu mele pilkuli ‘Olionga ungumu paa pundu topa nimba kondokomo.’ ningu pilku konopu awisili kimbu sikuli ungu se kelko naa niringi. Yomboma kanoko molangi yu peké tondoko mangilieringi kinia yuni ungu se nimba naa kinjerimumunga “Yu ka siemili.” ningí aulka se naa lierimu.

20:27-40

*“Kololemele Yomboma Lomboroko Ola Molkole Kelko Nambi Sengenje?” Ningu Yesusi Mangilku Pilieringi Semanemo*

<sup>27</sup> Kanu yema Yesusi kinia kou-takisi toli ungumu ningu pora siringi kinia, pe Sadusi ye mare Yesusi molorumuna oringi. Sadusi yema ono ‘Pulu Yemone pe kololemele yomboma topa naa makisindimba, lomboroko ola naa molonge.’ ningu pilku moloringi talapemo. Kanu Sadusi yema ongo <sup>28</sup> Yesusi mangilku pilku ninguli: “Ungu Mane Sílimu, ‘Pulu Yemonga ungu-manema olio sirimu ye, Mosisini ungu-manane sipa nimbale:

“Ambo limba ye se bolango naa membale  
ambomo we molopili kolomba kinia  
kanu yemo yunga genu molombamone  
yunga ambo-wayamo lipa  
genu lipa tapondopa bolango mendepili.”

nirimuaku sipa nimba bokuna torumu molemo kanumu. <sup>29</sup> ‘Aku ungu-manemonga ulu se olionga ye mare-kinia wendo orumu mele nu mangilipu piliamili.’

“Genupili yopoko-pakara moloringi. Komomo ambo lipa bolango se naa membale kolorumu. <sup>30-31</sup> ‘Bolango se naa molopili kolorumu-kulu, yunga bulkundu genumuni, yunga genu kolorumumunga bolango ‘Mendambo.’ nimba, ambo-wayamo kelepa liltimu. Yu bolango se naa mendepale yu we kolorumula. Yunga genu bulkundumuni kanu ambomo liltimula-na-ku yu kepe we kolorumula. Aku selko punguli ye yopoko-pakara pali bolango selu kepe naa mengole kolko pora siringi kinia akiliumu we kolorumula. <sup>32</sup> Pe ambomo yu kolorumula. <sup>33</sup> Akumunga, kololemele yomboma pe lomboroko ola molonge kinia kanu ambomo ye yopoko-pakara pali ya mana litingikulu ambomo yu ye paa nawenga menu molombaye?’ niringi.

<sup>34-35</sup> Yesusini onondo pundu topa nimbale: “Ya mana molemele yombomanga yema ambo liku, amboma ye pungu selemele-na-ku Pulu Yemone ‘Yombo kolkole manda lomboroko ola molko mulu-koleana pungu molangi.’ nilimú yombomanga yema ambo naa liku, amboma ye naa pungu, aku paa naa senge. <sup>36</sup> Kanu yomboma lomboroko ola molonge-na ono mulu-koleana molemele angelloma molemele mele aku siku molkole, kelko kolou naa kolkole Pulu Yemonga bolangoma molonge.

<sup>37</sup> Aku-sipa na-ku, ono Sadusimane, ‘Kololemele yomboma lomboroko ola naa molonge.’ konopu lemelemonga ungu se niembola. Mosisini olio lipa ora sirimu mele niembo: Walte Mosisi unju kanga senga, ‘sepe nomba perimu sepemone unjumu naa norumu kanopale nirimumuni,’ akuna yuni ‘Pulu Ye, Yawendo imbi lepa nimbale: “Eporayamo kinia, Aisake kinia, Jekopo kinia ononga Pulu Yemo.”’ nirimu. <sup>38</sup> Pulu Yemo yu kololi yombomanga Pulu Yemo mólo. Yu yomboma pali konde molemele kanopale yu konde mololi yombomanga Pulu Yemo.” nimba Yesusini nirimu.

<sup>39-40</sup> Aku nirimu pilkuli Pulu Yemonga ungu-manemanga puluma pilku mane siringi ye marene kelko yu ungu se mangilku pilingindu pipili kolko yundu ninguli: “Ungu Mane Sílimu, nuni papu nikinu.” niringi.

20:41-44

*Yesusini “Ye Nokoli Karasimu Nawenga Maloye?” Nimba Mangilierimu Semanemo*

<sup>41</sup> Kanu-kinia ‘Juda yombomanga ye awili mare aku siku we moloringi kinia, Yesusini onondo kelepa ungu se nimbale: “‘Pulu Yemone “Ono nokopa kondomba ye se lipu mundumbu.” u nimba talitorumu ye nokoli Karasimu yu, ye nokoli kingi,

Depitinga kalopa limba ye se molomba.' ningu pilielemene, 'aku-na-kolo yu aku sipa manjipa mólo.' <sup>42-43</sup> 'Aku nilimili yemane, Depiti yuni yuyu 'kanu yemondo nirimu mele naa pilielemelenje.' Depitini 'ye nokoli Karasimu molomba mele, konane se konopumuni pilipale bokuna torumu mele i-sipa:

"Ye-Awili 'Pulu Ye Yawene, nanga Ye-Awilimundu nimbale:

"'Nunga opa-touma nuni nokani.' nimbu,  
pe ono topo mania mundundumbu kene

iseli-u nu 'na kinia pea

kopu sepo ye nokolitolo molopo

mélema nokambili,

nanga ki-lomekondo ongo molani." nirimu."

nimba Depitini nirimu. <sup>44</sup> Depitini 'ye nokoli Karasimu, yuntu "Nanga Ye-Awilimu." nirimu. Pe onone "Yu Depitini kalopa limba yemo 'mindi, molomba." nambi seko pilkuli nilimiliye?" nimba Yesusini nirimu.

**20:45-47**

### *Ungu-Manemanga Puluma Pilku Mane Siringi Yemane Seko Kinjeringi Ulumanga Ungu Se*

<sup>45</sup> Yesusi molorumuna yombo awisili liku maku toko moloringima pilku molangi Yesusini yu lombili andolimando 'liepi-liepi topa, ungu se nimbale:

<sup>46</sup> Onone Pulu Yemonga ungu-manemanga puluma pilku mane sili yema mimi siku kanoko kondoko 'onone selemele mele manda manjiku naa seko, molayo. 'Yombomane olio kanoko "Ye peangama" niengi.' ningu, wale-pakoli paa sulu peangama, 'ye nokolima pakolemele mele,' pakoko andolemele. Yomboma maku toko molemele koleamanga andongendo mongo-kenge seko 'We-yombomane olio kape niengi.' ningu pilkuli konopu siku pilku andoko molemelela. Yomboma maku toko Pulu Yemonga ungumu pilielemene ulkana sukundu punguli mania molongendo ye awilima molemele polo peanga akuna 'molamili.' ningu mendo pungu polo akuna konopu siku molemelela. Yombomane kere-lang'i nongo yombomando "Namili waa." nilimili kinia kanu yema ongole ye awilimanga polo kumbikundu 'olio molamili.' ningu konopu siku molemelela.

<sup>47</sup> "Yema kololemele kinia onone kanu yemanga ambo-wayama toko makoroko mundukuli ulkama 'Olionga' ningu we limili. Pulu Yemo kinia ungu ningíndu ningu sulu munduku kolo toko nilimili. Pulu Yemone we-yomboma ulu-pulu-kiri selemelemonga ono sika "Mindili nangi." nimbá-na-kolo ya ye nikirumane aku uluma selemelemonga Pulu Yemone aku yema "Mindili awili seko nangi." nimbá." nirimu.

## 21

**21:1-4**

### *Ambo-Waya Koropa Sene Ulka-Tembelena Kou-Mone Mundorumu Semanemo*

<sup>1</sup> Yesusi 'Pulu Yemo popo toko kaloringi ulka-tembele kerepuluna molopa, ulka-tembelena sukundu kongono senge kou-mone mundoringi unju okolona nondopa molorumu. Akuna molopale yu olando-sipa kanopale ye kamakomane kanu okolona kou-mone ongo mundoringi kanorumu. <sup>2</sup> 'Aku sipa kanopa molorumu kinia, ambo-waya paa koropa se ombo yu kou-kololi talo mindi mundorumu kanopa <sup>3</sup> nimbale: "Nane onondo paa sika nimbu sikirumu: "Andi ambo-waya koropamo yuni kou-mone mundukumumu paa olandopa mele mundukumu, we mundukumilima maniadopa mele." nikiru. <sup>4</sup> Ono kou-mone awisili taltolemelemonga koltalo mindi ongo mundukumili. Aku-sipa na-kolo ambo-wayamo kou-mone se paa naa taltolemo.

Yunga koltalo taltomutolo pali memba ombo mundomu. Kere-langgi nombá se kepe naa taltolemo.” nirimu.

**21:5-36**

*Ulu Umbuna Selima Pe Wendo Ombámonga Yesusini Nimba Sirimu Semanemo  
21:5-6*

*Ulka-Tembelemo Toko Kalongemonga Yesusini Ungu Se Nirimu Semanemo*

<sup>5</sup> Kanu-kinia Yesusi kinia yu lombili andoli yema kinia ono „Pulu Yemo popo toko kaloringi, ulka-tembelemo kolea akuna molkole ulka-tembele paa peanga gilierimu mele kinia ulka-tembelemo takoringi kou paa peanga lupa lupama kinia aku koumanga au siringi mele kinia kanoko, marene ungu anju yando ningu moloringi kinia Yesusini onondo nimbale: <sup>6</sup> “Ya „ulka-tembele peanga gilimú, kanokomele mélema „pe walte ya kolea-awili Jerusalleme yomboma mindili nonge walemo wendo ombá kinia, i ulka-tembelemo sikisikuli kouma pali toko mania mundungí.” nirimu.

**21:7-19**

*Umbuna Awisili Wendo Ombámanga Yesusini Nirimu Semanemo (21:5-36 pali kanani)*

<sup>7</sup> Yesusini aku nirimu pilkuli onone yundu mangilku pilku ninguli: “Ungu Mane Sili Yemo, nuni nikinu mele sewale wendo ombáye? Pe nuni i nikinu uluma nondopa wendo ombándo u nambolka unguri sembá kinia olione kanopole ‘Sika i wendo ombá sepomo.’ nimbu pilimulúye?” ningu mangilieringi kinia

<sup>8</sup> yuni onondo nimbale: “„Kanu uluma wendo ombámonga ungu mare, yombomane ono kolo toko singí kene kanoko kondoko molangi. Ye awisili nanga imbi leko ongole yu-meles-meles kolo toko ninguli: „Pulu Yemone ‘Nanga yomboma nokopa kondopili lipu mundumbu.’ u nimba taltorumu ye nokoli Karasi, akumu na.” ninguli, “„Ma pora nimbá, wale nirimumu wendo ombá sekemo.” ningila. Ono lombili naa pangí. <sup>9</sup> Kolea marenga opa awili-seko senge mele pilku, yombomane ononga ye nokolima tonge pilkuli mini-wale naa mundangi. Opa sengema kinia aku uluma Pulu Yemone ‘U wendo opili. Laye-kolte pe mele ya ma-koleamo pora nimbá.’ nimba, nimba panjerimumungaaku uluma sika wendo ombá-na-kolo aku-kinia mulu matolo u naa pora nimbá.” nirimu.

<sup>10</sup> Kanu-kinia Yesusini yu lombili andolimando kelepa nimbale: “„Mulu ma pora nimbá walemo u wendo naa opili, yombo talape awili se kinia talape awili se kinia opa seko, ye nokoli kingi marenga talapema kinia marenga talapema kinia opa sengela. <sup>11</sup> Ya mana-kolea senga-senga ma jimi-jimi awili-sepa sepa, gele lepa, kuru awili-sepa topa, aku sipa sembá. Yomboma pipili awili-sepa sepa kondoli ulu-tondoloma muluna wendo ombá kanongela.

<sup>12</sup> Aku sipa mele „pe wendo ombá-na-kolo, u naa wendo opili ono nanga yomboma molongemonga ono „mare, liku ambolko, seko kinjingí. Ono „mare, Juda yomboma maku toko Pulu Yemonga ungumu pilielemele ulkamanga liku mengo pungu „akuna kote sendeko”, ono „mare, ka-ulkana mengo pungu panjiku, ono „mare ka siku, ye nokoli kingima kinia gapomano ye awilima kinia molongena „kote sendengendo, mengo pungila. <sup>13</sup> „Ka siku kote sendenge kinia kotena gilkuli kanu yema kinia kanu yema nokonge ye nokolima kinia, onone ‘Nanga ungumu piliangi.’ ningu, ono ningu singí. <sup>14-15</sup> Ono ka siku kote sendenge kinia ‘Ononga kerema kinia konopuma kinia tondolo pupili.’ nimbú kinia onone ningí unguma ono seko kinjingí senge yombomane onone ungu ningí mele ungu ningu pundu tongendo sundungí. Akumunga ono u ongo ka naa siengi ‘Kotena nambolka unguri nimulúnje? Olio ungu se mangilku pilingí kinia nambolka unguri pundu topo nimulúnje?’ ningu mini-wale naa mundangi.

<sup>16</sup> Ononga kandi aminieli lanieli kinia genali kinia, pulu lemba yomboma kinia, onone kepe liku ka siku kote sendekole ono mare toko kondongela. <sup>17</sup> Nanga yomboma molongemonga yombomane pali ono-kinia konopu kiri panjingí. <sup>18</sup> Aku-sipa na-kolo ononga kangina unguri naa sepa penge-indi kepe selu ombo mania naa pumbá. <sup>19</sup> „Nanga yomboma molongemonga onone ono aku siku seko kinjingí kinia, na munduku naa kelko tondolo munduku molonge yomboma mini pali konde molko kondoko mindi puli ulu-pulumu lingí.” „nirimu..”

21:20-24

*Jerusalleme Toko Kalonge Walemonga Yesusini Ungu Se Nirimu Semanemo (21:5-36 pali)*

<sup>20</sup> Pe walte, ami-yema i kolea-awili Jerusalleme yomboma tongendo ongo liku makaye seko molonge kanokole i kolea Jerusalleme yomboma toko mundungí walemo nondopa wendo ombá mele pilingí. <sup>21</sup> „Aku siku mele wendo ombá kanokole ‘Umbuna awilima wendo ombá sekemo.’ ningu pilku, kolea Judia disiriki lierimu koleamanga molonge yomboma „ononga koleama munduku kelko, ma-pangi lembamanga kowa pungu, Jerusalleme sukundu molonge yomboma wendo ongo kowa pungu, Jerusalleme ultu molonge yomboma kelko sukundu naa pangı. <sup>22</sup> Aku walemanga Jerusalleme yombomane u alieli Pulu Yemo seko kinjeringimunga yuni “Ono mindili nangi.” nimbá. Koronga-u yuni ‘Walte aku sipu sembó.’ nimba, nimba panjerimu kanu ungumu yunga ye marene yunga bokuna toringi molemo kanumu. <sup>23</sup> „Pulu Yemone, Jerusalleme yomboma mumindili kolopale ‘Ami-yema ono-kinia mumindili kolko ongo tangi.’ nimbá kinia ulu umbuna seli awisili ono molongena wendo ombá.

“Aku sipa wendo ombá kinia ambo bolango mondongema kinia, ambo bolango ame singíma kinia, „ono manda lisiku kowa naa pungimunga, ono-kinia paa umbuna wendo ombámonga ono kondo sekemo. <sup>24</sup> Jerusalleme yomboma tongue walemanga yombo toli lu-pultamane yombo mare toko kondonge, mare ka siku kolea sulu lupa lupamanga mengo pungí. Juda yombomanga talapena ultu mololi yomboma ya Juda yombomanga kolea-awili Jerusalleme sukundu ongo toko munduku kolea liku kolali seko molonge. Kanu-kinia pe Pulu Yemone ‘Ononga walema pora nipili.’ nimbá kinia Juda yomboma Jerusalleme kelko ongo molonge.” „nirimu..”

21:25-28

*Mania Omba Mana-Ye Au Lierimu Ye Yesusi Kelepa Wale Talo-Sipa Ombámonga Ungu Se (21:5-36 pali)*

<sup>25</sup> „Aku mindili nonge nikiru uluma wendo ombá kinia, ena kinia óli kinia kombokandima kinia „pali, uluma sembá yombomane kanokole pilingí. Ma-koleana nomu-kusane ungu paa awili sepa nimba, paa awili sepa topa piki-maka lepa no tomba kanongela. Uluma aku sipa wendo ombá kinia yombo talapema mini-wale mundungí. <sup>26</sup> Muluna gilimú méle tondoloma lope-lope sepa anju yando pumbá kinia yomboma pipili paa awili seko kolko ‘Ma-koleana nambolka uluri wendo ombá sekemonje?’ ningu pilku konopu paa awisili kimbu singí. <sup>27</sup> Aku uluma wendo ombá kinia Mania Omba Mana-Ye Au Lierimu Yemo tondolo púlimu kinia, tondolo pa awili-sepa sélimu kinia, kupa senga sukundu molopa, kamu mania ombá yombomane kanonge.

<sup>28</sup> Aku uluma pulu polopa sembá kinia Pulu Yemone ono ulu-pulu-kirimane ka sipa nokolemomonga mindili siku molemele koleana wendo lipa, yu-kinia kamu kopu seko manda molonge kolea peangana sukundu limba walemo nondopa wendo ombá kene aku uluma wendo ombá kinia ono ola gilku olando-siku kanangi.” nirimu.

21:29-33

*Unju Pikima Selemo Mele Kanopole Ungu-Pulu Se Pilielemolo Mele Ungu Se (21:5-36 pali)*

<sup>29-30</sup> Yesusini aku sipa nimbale nirimumuni, yu ombá walemo 'Piliangi.' nimba, ungu-iku se topa nimbale: "Unju piki kinia we-unjuma pali kinia sindi topa gomo tolemo kinia kanokole 'Kiniá ena sembá walemo wendo ombá sekemo lémo.' ningu pilielemele. <sup>31</sup> Aku sipala i uluma "Wendo ombá." nikiruma sika wendo ombá kinia kanokole ningimuni, "Pulu Yemo ye nokoli kingimu molomba walemo nondopa wendo ombá sekemo." ningu pilingí.

<sup>32</sup> Nane onondo paa sika nimbu sikirumu: "Kiniá molemele yomboma u naa kolangi i "Wendo ombá." nikiru, uluma pali wendo ombá. <sup>33</sup> Mulu matolo pora nimbá-nakolo nanga ungu niliuma paa pora naa nimbá. 'Niliu mele pali paa sika wendo ombá..' nikiru." ,nirimu.,

*21:34-36*

*Yesusi Kelepa Ombá Walemo "Naa Pilielemelo Kene Kanoko Kondoko Molangi." Nirimu Semanemo (21:5-36 pali)*

<sup>34</sup> Akumunga, naa kanoko molangi kanu walemo ombá paa piliaa! Lopa se yunga tapu andolemona 'Pumbú.' nimba olemo kinia melu leko panjilimilimu naa kanopa 'Yu tomba.' konopu naa lepa walu olemo kinia pe meluna waltikele tolemo, aku siku ono no-tondolo nongo amu toko we umbuna sepili molko konopu naa makiliepili molongi liemu ,Mania Ombo Mana-Ye Au Lierimu Yemo, yu ombá kanu walemo ono naa kanangi lipa sinjipa wendo ombá kene kanoko kondoko pilku molayo. <sup>35</sup> Aku walemo ma-koleana pali yomboma molongena wendo ombá kene <sup>36</sup> onone Pulu Yemo kinia mawa seko ninguli: " 'Na pe Mania Ombo Mana-Ye Au Lierimu Yemonga kumbikerena pumbu ola giliambo kene na enge nipili, i ulu wendo ombámane na topa mania naa mundopili.' ni." ningu alieli kanoko kondoko pilku molaa!" nirimu.

*21:37-38*

*Yombo Awisili Yesusinga Ungumu Pilku Moloringi Semanemo*

<sup>37</sup> Yesusini enamanga alieli-alieli ulka-tembelena yomboma ungu-mane si-pu-pu sepa, ipuliei alieli-alieli Jerusalleme ultukundunga pumba ma-pangi Unju-Ollipi Kaliana ola pumba pe-pu-pu serimu. <sup>38</sup> Yomboma pali paa orili-u 'Yu ungu-mane simbama piliamili.' ningu ulka-tembelena ongo maku to-pu-pu seringi.

*Kolomongo-Awili 22-24*

**Yesusi Mindili Nomba Kolopale, Lomboropa Ola Molopa  
Mulu-Koleana Kelepa Purumu Semanemo**

**22**

*22:1-6*

*Judasini Yesusi Yunga Opa-Touma "Lipu Simbu." Nimba, Nimba Panjerimu Semanemo*

<sup>1</sup> Juda yombomane kalia-ingi senga senga kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilieringi walema, akumu imbi leko 'Pellawa Akoli Méle Isimu Naa Munduku Pellawa We Kalko Noringi Walemo' niringila, aku walemo nondopa wendo orumu kinia

<sup>2</sup> Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, onone Yesusi toko kondonge aulka se koroko moloringi-na-kolo onone , "Olio yombomane kanangi yu ka simulú kinia yombomane olio-kinia mumindili kolko iri tonge." ningu, pipili kolko we moloringi.

<sup>3</sup> Kanu-kinia Yesusi yu lombili andoli ye rurepo akumanga ye Judasi, yunga imbi se 'Isikeriote' nili, kanumunga konopuna ,kurumanga nokoli, Setene ombo sukundu

purumu. <sup>4</sup> Setene yunga konopuna sukundu purumu, kinia yu Pulu Yemo popo tondoringi ye awilima kinia, ulka-tembelemo nokoli ele-yemanga ele-ye awilima kinia, ono moloringina pumbale, ono Yesusi ka singí aulkamo yuni akisindimba mele ono-kinia angelema niringi. <sup>5</sup> Yuni sembá mele nirimu kinia pilkuli ono konopu awili seko siku "Nu kou-mone se simulú." ningu, ningu panjeringi.

<sup>6</sup> Yuni ononga unguma pilipale "Manda." nimba, we-yomboma Yesusi pea naa molonge kinia yu ono lipa simba mele aulkamo koropa molorumu.

22:7-23

*Yesusi Lombili Andolima Kinia Pea Kamu Kere-Langi Noringi Kinia Yu Kolorumu Mele 'Pe Pilku Molangi.' Nimba Kere-Langi Sirimu Noringi Semanemo*

<sup>7</sup> Pellawa Akoli Méle Isimu Naa Munduku Pellawa We Kalko Noringi Walemo wendo orumu kinia Juda yombomane Pulu Yemone u ononga anda-kolepalima Naa Topa We Ombo Purumu mele pilingindu kongi sipisipi walo se toko nonge mele pilipale nirimumuni, <sup>8</sup> Yesusini Pita kinia Jonotolo lipa mundupa nimbale: "Olo pungu, Pulu Yemone olionga anda-kolepalima Naa Topa We Ombo Purumu mele pilimulúndu kongi sipisipi walo se kiniá nomolomo seko mimi se-pale." nirimu.

<sup>9</sup> Olone mangilku ninguli: "Sena sepo mimi se-pambili konopu leko nikinuye?" niringili.

<sup>10</sup> Yuni olondo pundu topa nimbale: "Piliale. Ne kolea-awili Jerusallemendo, punguli, ye se mingina no kolopa memba ombá aulkana pungu kane-kane tokole, yu pumbá mele lombili pungu yu sukundu pumbá ulkana sukundu punguli <sup>11</sup> ulka pulu yemondo ninguli: "Ungu Mane Síli Yemone i-sipa mangilipa nimbale: 'Na kinia na lombili andoli yema kinia olione Pulu Yemone olionga anda-kolepalima Naa Topa We Ombo Purumu mele pilimulúndu kongi sipisipi walomo sena nomoye? Nomolo suluminiamo sena lemoye?' nimu." niengili. <sup>12</sup> Aku ningilí kinia yuni olo ulkamonga olakondo suluminia awili se, akuna kere-langí noli polo se kinia, mania molomolo poloma kinia, mélema kinia akuna u lemóma, lipa ora simba. Aku suluminiamonga 'nomolo sipisipi walomo, seko mimi sangili.' nirimu.

<sup>13</sup> Kanu-kinia olo punguli, Yesusini nirimu kanu mele aku uluma seli lierimu kanoko lendekole, akuna Pulu Yemone ononga anda-kolepalima Naa Topa We Ombo Purumu mele pilingí kongi sipisipi walo nongemo kinia kere-langí nongema seko mimi seko talteringili.

<sup>14</sup> Juda yombomane ipupini kolea kalá torumu kinia Pulu Yemone ononga anda-kolepalima Naa Topa We Ombo Purumu Walemo pilingindu kongi sipisipi walomo nonge enamo kamu wendo orumu kinia, Yesusi kinia yunga kongonomo 'sende-paa.' nimba lipa mundorumu yema kinia ono kere-langí noli polona moloringi. <sup>15</sup> Kere-langí nongo moloringi kinia yuni onondo nimbale: " 'Na mindili u naa nombole i wale wendo okomomonga kere-langima ono kinia pea namili.' paa tondolo mundupu konopu lepo andopo molorundu mele yandopa paa konopu lepo pilipu molio. <sup>16</sup> Nane onondo i-sipu nimbu sikirumu: "Iseli-u i kere-langima na kelepo naa nombó. Pulu Yemo ye nokoli kingimu kamu molomba walemo wendo ombá kinia na no-waene kondemo kelepo nombó kene 'ono onono iseli-u nangi.' nikiru." nirimu.

<sup>17-18</sup> Yu no-waene kapomo lipa ambolopale Pulu Yemondo "Ange." nimba onondo nimbale: "Imu ono onono moke seko nayo. Nane onondo i-sipu nimbu sikirumu: "Iseli-u na no-waene kelepo paa naa nombó. Pe mindi, Pulu Yemo ye nokoli kingimu molopa nokolemo walemo wendo ombá kinia na no-waene kondemo kelepo nombó kene 'ono onono iseli-u nangi.' nikiru." nirimu.

<sup>19</sup> Berete se lipa Pulu Yemo kinia "Ange." nimbale ambolopa pike lepa 'yu lombili andolima, sipa nimbale: "Imu nanga kangimu 'ono liku nangi'. Nanga kangimu 'ononga' nimbu simbú sekeromo imu. Pe-pe kepe, kiniá 'ononga' nimbu sendembo

sekero mele 'Kelepo piliamili.' ningu i beretemo "Nanga kangimu." nimbu sikiru mele ono aku siku berete se nongole liku manjangi." nirimu.

<sup>20</sup> Pe ono kere-langima nongo pora siringi kinia yuni 'berete se kinia serimu mele, aku sipala no-waene kapomo lipa ,ono sipa, nimbale: "I ,no-waene, kapo ,ono sikirumu, nanga mememo. ,Pulu Yemone 'Ono-kinia sembó.' nimba,, ungu se nimba panjipa mi lierimu kanu ungumu 'Kamu wendo omba pepili.' nimbu nane ononga nimbu nanga mememo ondondopole ,kolombo, aku mememo i no-waenemo.

<sup>21</sup> Aku-sipa na-kolo na lipa nanga opa-touma simba yemo na kinia pea i kere-langi nokomolo polona molemo." nirimu. <sup>22</sup> Kiniá Mania Ombo Mana-Ye Au Lierimu Yemokinia senge mele Pulu Yemone koronga-u nimba panjerimu mele sika opa-toumane senge, aku-na-kolo yu lipa opa-touma simba yemo mindili nomba molopa kinjimba." nirimu.

<sup>23</sup> Aku nirimu kinia pilkuli ,yu lombili andolimane, anju yando mangilku ninguli: "Olionga ye nawene ulu akumu sembanje?" niringi.

22:24-30

*Lombili Andolima Anju Yando Angelema Ninguli "Na Imbi Ola Molemo. Na Imbi Ola Molemo." Ningu Moloringi Semanemo*

<sup>24</sup> Aku walemo kinia ungu se pea wendo orumula. Yesusi lombili andolimane, ono onono anju yando angelema ningu ninguli: "Olionga ye nawe paa olandopa molemoye?" ningu keru-kuru liku moloringi.

<sup>25</sup> Yesusini onondo nimbale: "Olio Juda yombomanga ultu molemele yombo talapemanga ye nokolima ononga yomboma tondolo munduku nokoko kongono enge nilima aliehi silimili. Ye imbi ola molemo yema ononga yomboma 'Mindili nangi.' ningu nokolemele yemane ono onono imbi ambolko paka toko, "Olio yomboma nokopo kondopo lipu tapondoli yema." nilimili. <sup>26</sup> Aku-sipa na-kolo ,we-yombomanga ye nokolimane ononga yomboma tondolo munduku nokolemele mele na lombili andoli yema, ono onono aku siku anju yando naa sangi. Ononga ye se imbi ola molomba kinia aku yemo ye koropa mele molopili. Ye nokoli molopa we-yema nokomba yemo kendemande-yemo mele molopa we-yemanga kongono sendepili." nirimu.

<sup>27</sup> "Ye nawe paa ye olandopamoye? Kere-langi nolemo yemo ye olandopamo molo kere-langi peke topa kalopa pellete kulumiye topa aku kongonoma sendelemo yemo ye olandopamoye? Kere-langi nolemo ye akumu ye nokolimu lémo. Aku-sipa na-kolo na aku sipa mólo. Na ,sika ononga ye awilimu, na-kolo ononga kongono sendeli kendemande-yemo mele molopo ono lipu tapondoli yemo molio." nirimu..

<sup>28</sup> Yesusini yu lombili andoli engaki rurepondo kelepa nimbale: "Na umbuna membo mindili nombo molorundu kinia ono na-kinia pea kopu sepo mindili sipu molorumulula. <sup>29</sup> Nanga Lapa ye nokoli kingimu ombo molopa yomboma nokomba kinia nando 'Akuna yomboma nokondopilila.' nilimú nimbá mele nane onondo 'Akuna yomboma nokondangi.' niliu nimbúla. <sup>30</sup> Akuna na ye nokoli kingimu molopo yomboma nokombo kinia ono na kinia pea kere-langi polona molopo ga nombo molomolo. Ono ye nokoli kingi polomanga moltkole ningimuni, Isirele yombo talape rurepo nokonge." nirimu..

22:31-34

*Pitane Yesusi "Naa Kanolio." Nimbá Mele Yesusini Yu Nimba Sirimu Semanemo*

<sup>31</sup> ,Nimbale, Yesusini lombili andoli ye Pitando nimbale: "Saimono, pílie! ,Kurumanga nokoli, Setenene Pulu Yemondo mawa sepa nimbale: "Ono seko kinjingínje manda manjipu kondi topo kanambo." nirimu kinia Pulu Yemone "Manda." nirimu. <sup>32</sup> Aku-sipa na-kolo Saimono, nane Pulu Yemo kinia ungu nimbu nunga mawa sendepo nimbili: "Setene yuni nu aku sembá kinia Pita yuni na naa

mundupa kelepa na pilipa molopili.” nindu. Saimono, Setene kanga-kolte pilku na munduku kelkole, pe konopu topele toko na kelko kuru mondoko molkole ninimuni, genalima konopu tondolo mundundou.” nirimu.

<sup>33</sup> Aku-sipa na-kolo Pitane nimbole: “Ye-Awilimu, nane nu pe siye kolopo kowa lepo pumbú ningu nikinuye? Manda mólo. Olto pea “Ka siemili.”níngi liemu peangala. Molo olto pea “Topo kondamili.”níngi liemu unguri mólo. Pea kolambili.” nirimu.

<sup>34</sup> Yesusini Pitando nimbole: “Pita, nane nundu i-sipu nimbu sikirumu: “Kiniá kera gulta u ko naa topili nuni pipili kolkole wale yopoko nando kolo toko “Yu nawe? Na naa kanolio.” nini.” nikiru.” nirimu.

**22:35-38**

### *Kou-Mone Kinia, Méle-Wale Kinia, Lu-Pulta Kinia, Aku Mélemando Yesusini Ungu Nirimu Semanemo*

<sup>35</sup> Nimbole Yesusini yu ye „rurepondo, pali kelepa nimbole: “Nane ono u , ‘Kongono se-pangi.’ nimbu, lipu mundorundu kinia ‘Kou naa mengo, méle-wale naa mengo, topele toko mondonge kimbu-su naa mengo, we pang.’ nimbu lipu mundorundu kinia ono mélse mólo torumu molo móloye?” nimba mangilipa pilierimu kinia onone “Méle selu kepe mólo naa torumu.” niringi.

<sup>36</sup> Yuni onondo kelepa nimbole: “Aku-sipa na-kolo kiniá na-kinia uluri wendo ombámonga, kou-mone taltolemo yemo kanu kou-monemo lipa ambolopa, méle-wale taltolemo yemo kanu walemo lipa ambolopa, aku siku seko molangi. Opa seli lu-pulta naa taltolemo yemo yunga wale-pakoli se anju sipa lu-pulta se yando lipili.

<sup>37</sup> „Nane aku sipu nambi semu-na nikiru, niembo..” U yombomane nando ningu Pulu Yemonga bokuna toringi molemo mele kiniá wendo ombá sekemo mele i-sipa: “Yu kinia, yombo mongo liku

ulu-pulu-kirima seli yomboma kinia,  
liku sere leko kopu senderingi.”  
niringi bokuna molemo kanumu.” nirimu.

<sup>38</sup> Yuni aku nirimu mele pilku sundukuli onone yundu ninguli: “Ye-Awilimu, ya opa seli lu-pulta talo taltolemolo kanou.” niringi kinia

yuni onondo nimbole: “Ungu manda nimbu, „pamolo..” nirimu.

**22:39-46**

### *Kolea Gesemani Yesusini Pulu Yemo Kinia Ungu Nimba Mawa Serimu Mele Semanemo*

<sup>39</sup> Kanu-kinia Yesusi „ulkamo mundupa kelepa kolea-awili Jerusalleme, ultukundu pumbale nirimumuni, yu alieli ma-pangi Unju-Ollipi Kaliana ola pu-pu-pu serimu mele akuna purumu. Yu lombili andolima yu lombili akileko pea puringi.

<sup>40</sup> Akuna purumu kinia yuni yu lombili andolimando nimbole: “„Kurumanga nokoli, Setenene ‘Olio kondi tomba kinia sepo kinjimulú kene’ ninguli Pulu Yemo kinia ungu ningu mawa seko molaa.” nirimu.

<sup>41</sup> Nimbole yu yuyu kanga-kolte anju pumba komorongo langopa, Pulu Yemo kinia ungu nimba mawa sepa nimbole: <sup>42</sup> “Tata, na mindili noli no-mingina no nombómo ‘Naa nambo.’ konopu lienu liemu aku siku sani-na-kolo ‘Nane sepole nanu konopu simbú.’ konopu lekero mele naa sambo. Nuni kanoko peanga piliení ulumu mindi sambo.” nirimu.

<sup>43</sup> Aku nirimu kinia angello sene mulu-koleana mundupa kelepa Yesusi yu molorumuna om̄ba ‘Yu konopu tondolo pupili.’ nimba serimu mele Yesusini yu kanorumu. <sup>44</sup> Kanu-kinia yu konopuna umbuna awili-sepa sepa, kameléna mindili sepili molopale yu Pulu Yemo kinia tondolo mundupa ungu nimba mawa serimu-na yunga kangina kúru om̄ba kanu kúrumu meme none sepa mana mania purumu.

<sup>45</sup> Yu Pulu Yemo kinia aku sipa ungu nimbale ola gilipa yu lombili andoli yema moloringina yando ombo onone yu kondo kolko molkole uru peringi kanopale  
<sup>46</sup> onondo nimbale: "Ono uru nambi semu-na pekemeleye? 'Kurumanga nokoli Setenene, olio kondi tomba kinia sepo kinjimulú 'kene' ninguli ola molko Pulu Yemo kinia ungu ningu mawa seko molaa." nirimu.

22:47—23:56

*Yesusi Ka Siku, Kote Sendeko, Unju-Perana Ola Toko Kondoko, Óno Seringi Semanemo*  
 22:47-53

### *Yesusi Ka Siringi Semanemo*

<sup>47</sup> Yesusini aku nimba molopili ono moloringina ye awisili oringi. Oringi yemanga se kumbi lepa orumu yemo yu ye Judasi, Yesusi lombili andoli rureponga ye se. Judasi yu Yesusi molorumuna nondopa ombo yu kangulorumu. <sup>48</sup> Aku serimu kinia Yesusini yundu nimbale: "Judasi, opa-tou yemane Mania Ombo Mana-Ye Au Lierimu Yemo 'kanoko imbi siku ka siengi.' ningu nuni na kangulkunuye?" nirimu.

<sup>49</sup> Kanu-kinia Yesusi pea kopu seko gilieringi yemane  
 yu-kinia ulu se wendo ombá serimu mele kanokole onone yundu ninguli: "Ye-Awilimu, opa seli lu-pultamane i yema tamiliye?" niringi kinia <sup>50</sup> ononga ye sene 'yunga lu koyamo lipa ambolopale, Pulu Yemo popo tondoringi ye awili olandopamonga kendemande-ye senga komumu topa laká lierimu kinia komumu ombo mania purumu.

<sup>51</sup> Aku serimu kanopale Yesusini yundu nimbale: "Kiniá manda, keliee!" nimbale torumu yemonga komumu lipa ambolopa tambu sinderimu.

<sup>52</sup> Yesusi ka singí oringi yema i-sipa: Pulu Yemo popo tondoringi ye awili mare kinia, ulka-tembelemo nokoko moloringi ami-yema nokoringi ye mare kinia, Juda yombomanga tapu-ye mare kinia, onone Yesusi ka singí oringi kinia kanopale onondo nimbale: "Na 'yombo topo wa noli yere molemo.' konopu lekole lu-pultama kinia kopema kinia mengo okomeleye? <sup>53</sup> Ulka-tembele kerepuluna alieli ono pea molemolo kinia na ambolko liku ka naa silimili kanumu. Aku-sipa na-kolo kiniá i ena wendo okomomo Pulu Yemone u 'Ononga.' nirimu enamo wendo okomo. Simbulu tolimumga tondolomo kiniá olandopa pelemo." nirimu.

22:54-62

### *Pitane Kolo Topa "Yesusi Na Naa Kanolio." Nirimu Semanemo*

<sup>54</sup> Kanu-kinia onone Yesusi ka sikuli Pulu Yemo popo tondoringi ye awili olandopamonga ulkana sukundu mengo puringi. Yesusi mengo puringi kinia Pita lombili akilepa taka lepa purumu.

<sup>55</sup> Yesusi mengo oringi ulka kanumunga ulka gilipa makapu serimu, sukundu we lierimuna sepe kalko pilku moloringina Pita pumba ono kinia molorumu. <sup>56</sup> Yu akuna molopili 'Pulu Yemo popo tondoringi ye awili olandopamonga,' kendemande-ambo se ombo sepe nomba pa serimuna Pita molorumu kanopale yu neme-neme nimba kanopa nimbale: "I yemo Yesusi kinia pea moloringili kanorundu." nirimu.

<sup>57</sup> Aku-sipa na-kolo Pitane kolo topa nimbale: "Ambomo, aku nikinu yemo na naa kanolio." nirimu.

<sup>58</sup> Laye-kolte pe mele ye se Pita kanopa yundu nimbale: "Nu Yesusinga talape ye se lepomo." nirimu kinia

Pitane yundu nimbale: "Yemo, na akumu mólo." nirimu.

<sup>59</sup> Pe ena-mongo selu mele ombo purumu kinia yombo se 'Pita yu ungu laye-kolte lupa mele nirimu mele pilkuli, yuni tondolo mundupa nimbale: "Kolea Gallilli disiriki yombomane ungu nilimili mele yu aku sipa ungu nikimu pilkiru. 'Yesusi kinia yu

lombili andoli yema kinia kolea Gallilli disiriki yemala,, yu kepe Gallilli ye se, aku kene 'Yu paa sika Yesusi lombili andoli ye se.' konopu lekero." nirimu.

<sup>60</sup> Aku nirimu kinia Pitane yundu nimbale: "Yemo, nu nikinu mele na paa naa pilkiru." nirimu. Aku sipa nimba molopili kera gulta ko torumu.

<sup>61</sup> Kanu-kinia Yesusini topele topa Pita kanorumu kinia Yesusini yundu "Kera gulta u ko naa topili nuni wale yopoko kolo tokole "Yu naa kanolio." nini." nirimu ungu kanumu Pita kelepa pilierimu. <sup>62</sup> Pilipale , 'Ama, paa sepo kinjendu lepomo. 'Paa naa sembó.' konopu lierindu mele sika sendu.' nimba pilipale, pena pumba kola paa awili-sepa serimu.

22:63-71

### *Juda Ye Awilimane Onono Yesusinga Kote Pilku Yu Seko Kinjeringi Semanemo*

<sup>63</sup> Kanu-kinia Yesusi akuna nokoko moloringi ele-yemane yu ungu-taka tondoko, yu laruwa toko, seringi. <sup>64</sup> Yunga kumbikeremo mulu-maminia sene pipi sindikuli ki-lumuni toko , "Nu 'Pulu Yemonga yere molio.' konopu leno kene, nawene nu tokomonje ningu si." niringi. <sup>65</sup> Ungu-taka tondongendo onone yu aku mele ulu awisili seko ungu awisili ningu yu aku siku seko kinjeringi.

<sup>66</sup> Kolea tangorumu kinia Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, kanu Juda yombomanga tapu-ye kanjolloma pali 'Yesusinga kote piliamili.' niringi. 'Ononga ele-yemane, yu ono liku maku toko moloringina mengo puringi kinia onone yundu ninguli: <sup>67</sup> Pulu Yemone olio "Nokopa kondomba ye se lipu mundumbu." u nimba talitorumu ye nokoli Karasimu sika nu molo móloye? Ningu si." niringi.

Yuni onondo nimbale: " "Na akumu molio." nilkanje onone naa pilku "Kolo tokono." nilimolá. <sup>68</sup> Nane onondo ungu se mangilipu pilkanje yando ungu se naala nilimolá. <sup>69</sup> Aku-sipa na-kolo Mania Ombo Mana-Ye Au Lierimu Yemo kiniá kepe pe-pe kepe tondolo pali pelemo Pulu Yemo ,kinia mélema nokombando, yunga kilomekondo molomba." nirimu.

<sup>70</sup> Onone pali yundu ninguli: "Nu "Pulu Yemonga Malo molio." ningu nikinuye?" niringi kinia

yuni nimbale: "Akumu na molio." nirimu.

<sup>71</sup> Onone ninguli: "Yuni mongo liltimu mele nimba simba yombo se pea nambi semu-na koromoloye? Yuni yuyu nimba kinjikimu pilkimulu." niringi.

## 23

23:1-5

### *Romo Gapomano Ye Nokoli Paillatene Yesusinga Kote Pilierimu Semanemo*

<sup>1</sup> Aku ninguli Juda yombomanga ye awilima pali ono ola gilkü Yesusi liku mengo pungu ,Romo gapomano ye nokoli, Paillate molorumuna mengo pungu kote senderingi. <sup>2</sup> Yu kote sendeko Paillatendo ninguli: "I yemone nimbale: "Romo gapomanomone olio Juda yomboma naa nokopili." nimba, "Romo Gapomano Ye Paa Awili Kumbina Sisamo kou-takisi naa tangi." nimba, "Yu yuyu "Pulu Yemone olio nokopa kondomba ye se lipu mundumbu." u nimba talitorumu ye nokoli Karasimu, ye nokoli kingimu molio." nimba molemomo olio pilipu kanolemolo." niringi.

<sup>3</sup> Ono aku siku niringi kinia pilipale Paillatene ,Yesusinga kotemo, yu mangilipa pilipa nimbale: "Nu Juda yombomanga ye nokoli kingimu molenone molo móloye?" nirimu.

Yesusini pundu topa nimbale: "Sika nikinu. Akumu na." nirimu.

<sup>4</sup> Yuni aku nirimu kinia pilipale Paillatene Pulu Yemo popo tondoringi ye awilima kinia, we-yomboma akuna liku maku toringima kinia, onondo nimbale: "I yemo ulu se naa sepa kinjemu." nirimu.

<sup>5</sup> Aku-sipa na-kolo onone ta ningu tondolo munduku ninguli: "Yuni ungu-mane sipale "We-yomboma ulu seko kinjiku, mongo liku sangi." nimba mane sirimu. Yuni u-pulu-pulu kolea Gallilli disiriki ungu akumu mane sipa, pe yandopa kolea Judia disiriki koleama pali silipa andopale, pe kamu ya kolea-awili Jerusalleme ombo ungu akumu mane sipa molemo." niringi.

23:6-12

### *Ye Nokoli Kingi Erote Molorumuna Yesusi Mengo Puringi Semanemo*

<sup>6</sup> Kolea Gallilli" niringi kinia pilipale Paillatene onondo mangilipa pilipa nimbale: "I yemo yu Gallilli ye seye?" sirimu kinia <sup>7</sup> onone "E." niringi pilipa yuni nimbale: "Ye nokoli kingi, Erote, Gallilli disiriki nokolemo yemo, Yesusinga kotemo yuni piliepili yu molemona mengo paa." sirimu. Aku walemonga kanu 'ye nokoli kingi, Erote yu Jerusalleme ombo molorumu-kulu pilipale, "Yu molemona mengo paa." sirimu. 'Paillate yu Jerusalleme lierimu kolea Judia disiriki nokorumu yemo.'

<sup>8</sup> Erote 'molorumuna mengo puringi kinia, yu Yesusi kanopale konopu sirimu. Yu Yesusini ulu serimu mele ungu awisili pilipale, 'Kanu yemo kanamboa!' nimba molopa, 'Yuni ulu-tondolo se sepili kanamboa!' konopu lepa molorumu-kulu yu orumu kinia kanopa konopu sirimu.

<sup>9</sup> Akumunga, Erotene Yesusi ungu awisili mangilipa pilierimu-na-kolo Yesusini ungu se pundu topa naa nimba we molorumu. <sup>10</sup> Pulu Yemo popo tondoringi ye awilima kinia, Pulu Yemonga ungu-manemanga puluma pilku mane siringi yema kinia, akuna gilku onone Eretendo ninguli: "Yesusini i-sipa ungu nimba kinjipa, i-sipa ulu awisili sepa kinjipa molemo." ningu tondolo munduku niringi. <sup>11</sup> Kanu-kinia Erote kinia yunga ami-yema kinia onone 'Yesusi yu ye nokoli mólo, yu we-yere.' ningu ye nokolimane pakolemele mulu-maminia komindi se liku pakondoko, yu ungu-taka tondoko tawe senderingi. Kanu-kinia Paillate molorumuna Erotene Yesusi lipa yando mundorumu.

<sup>12</sup> Paillatene Erote molorumuna Yesusi u naa lipa mundopili Paillate kinia Erote olo opa-tou moloringili. Aku-sipa na-kolo Yesusi-kinia aku seringili walemonga pe olo genungulu mele moloringili.

23:13-25

### *Paillate Kote Pilipa Molopa Yesusinga Kotemo Pilipale "Kolopili." Nirimu Semanemo*

<sup>13</sup> Yesusi Paillate molorumuna yando mengo oringi kinia Paillatene Pulu Yemo popo tondoringi ye awilima kinia, Juda yombomanga tapu-yema kinia, we-yomboma kinia, onondo "Waa." nimba nimbale: <sup>14</sup> Onone "Ye sene yombomando 'Romo gapomanomone olio naa nokopili. Ono-kinia opa sepo topo makoramili.' nimba peke tondopa yombomanga konopuna ulku tondopa molemo." ningu ye se ka siku nanga kotena mengo ongo kote sendelemolá mele i yemo aku siku mele mengo ongo kote sendekemele. Kanu-kinia ono kanoko molangi nane kote pilipuli onone 'Yu sepa kinjerimu.' níngi mele na ulu se naa pilkiru. <sup>15</sup> 'Gallilli disiriki ye nokoli kingi, Erote, yu pea i yemo ulu se sepa kinjerimu se naala pilipale yu kelepa yando mundomu. Pilkimiliye? Yu ulu se sepa naa kinjemu. Yu we nambi semu-na topo kondomoloye?

<sup>16</sup> Ulu se sepa naa kinjemumunga nane yu we kopene topole "Kelko pu." niembo." sirimu.

<sup>17-19</sup> (Kolea-awili Jerusalleme sukundu ye se, yunga imbi Barapasi, 'yu kinia ye mare kinia, 'Romo-gapomanomone olio Juda yomboma naa nokopili.' ningu u Romo-gapomanomo kinia opa sekole yombo mare toko kondoringimunga yu ka siringi. 'Romo-gapomanomongka ka-ulkana kanu ye Barapasi we pepili Juda ye awilimane Yesusi kote senderingi. Juda yombomane kalia-ingi senga senga kolea-awili Jerusalleme ongo akuna sukundu Pulu Yemone ononga anda-kolepalima Naa Topa We Ombo Purumu mele pilieringi walemo wendo orumu kinia Romo gapomano

ye awilimuni ka-ye se ka-ulcana wendo lipa mundupa "Pu." nirimu.) „Aku sipa serimu mele pilieringimunga Paillatene "Yesusindu "Pu." niembo." nirimu kinia pilkuli, onone pali yundu tondolo munduku ninguli: "I yemo mólo. Yu ,kolopili, mengo punguli, Barapasi, ,ka-ulcana, wendo liku si." niringi.

<sup>20-21</sup> Paillatene 'Yesusi we pupili.' nimba onondo ungu se pea nirimu-na-kolo onone yundu wale awisili tondolo munduku ninguli: "Yu kolopili unju-perana uku toko panjei!" ningu moloringi.

<sup>22</sup> Aku niringi kinia yuni onondo kelepa wale yopoko-sipa mangilipa nimba: "Aku nambi semuye? Yu mongo nambolka mongore limuye? Yu ulu se sepa naa kinjemu. Yu we nambi semu-na topo kondomoloye? Nane yu we kopene topole "Kelko pu." niembo." nirimu.

<sup>23</sup> Aku-sipa na-kolo onone ta nengu ungu tondolo munduku ninguli: "Yu kolopili unju-perana uku toko panjei!" niringi kinia onone tondolo munduku niringi mele pilipale Paillatene ono niringi mele sembá serimu.

<sup>24</sup> Kanu-kinia Paillatene kote pilipale onone yu-kinia "Paa sei." nengu ta nengu mawa seringi mele 'Aku sipa sepili.' nirimu kinia <sup>25</sup> ,ye Barapasi,, 'Romo-gapomanomone olio Juda yomboma naa nokopili.' nimba u Romo-gapomanomo kinia opa sepale yombo mare topa kondorumumunga ka-ulcana perimu kanu yemo, wendo lipa ono sipale nirimununi, pe onone 'Yesusi unju-perana kolopili.' niringi mele pilipale "Yu-kinia aku sipa wendo opili." nimba ami-yema sirimu.

23:26-56

### *Yesusi Toringi Kolorumu Kinia Óno Seringi Semanemo*

23:26-43

### *Yesusi Unju-Perana Ola Uku Toko Panjeringi. Unju-Perana Pepili Juda Yombomane Yu Ungu-Taka Tondoringi Semanemo*

<sup>26</sup> ,Romo ami-yemane, Yesusi mengo pungí punguli niringimuni, kolea Sairini ye se, yunga imbi Saimono, yu Jerusalleme pumbá orumu kinia kanoko yu ambolko liku ka mele siku Yesusi kolomba unju-peramo liku pendokona ola taltondokole "Imu mendeko yu lombili akileko pu." niringi.

<sup>27</sup> Yombo awisili yu lombili purringi. Ambo mare yu toko kondongemonga kola selko purringi. <sup>28</sup> Kanu-kinia Yesusini topele topa kanu ambomando nimba: "Jerusalleme amboma, ono na kolombomonga pilkuli kola naa sangi. Ono onono kinia ononga bolangoma kinia ulu pe wendo ombámonga pilkuli kola sangi. <sup>29</sup> Aku sipu nikirumu, nambi semu-na nikiruye? Niembo: Walte ono Jerusalleme yomboma ,seko kinjiku mongo limilimunga umbuna singí, walemo wendo ombá kinia ono kinia ononga bolangoma kinia mindili nonge kinia yombomane ninguli: "Ambo bolango se naa mengo, bolango ame naa siku, simbu molemele amboma, ononga bolango se mindili nombá ono naa kanongemonga ono maloya." ningí. <sup>30</sup> Pe 'yomboma kelko mulu awili pololemomando

"Ma ange topa olio topili." nengu,  
ma-pangimando

"Ma ange topa olio aki topili." ningí.' "  
,nirimu., <sup>31</sup> ,Nimbale pe kamu ungu-iku se topa onondo nimba:, "Unju konde gilimúmu peke tokomele. Aku liemu pe unju kololimu nambi sengeye? Akumunga ,onone ono aku siku umbuna singí, mindili nonge.," nirimu.

<sup>32</sup> Ye talo pea 'Yesusi-kinia kolangi.' nengu unjuna ola uku toko panjingindu mengo purringi. Aku yetolo mongo liltingili yetolo.

<sup>33</sup> Kolea 'Penge Bele' nilina oringi kinia yu kinia mongo liltingili yetolo kinia unju-pera yopokonga ola uku toko panjeringi. Mongo liltingili yetolonga se Yesusi yunga kilomekondo uku toko, se Yesusi yunga ki-tarokondo uku toko panjeringi. <sup>34</sup> Aku seringi

kinia Yesusini nimbale: "Tata, na-kinia sekemele mele yombomane naa pilkimili kene nuni sekemelemonga "Mindili nangi." naa nengu siye kolou." nirimu. „Aku sekole, u unjuna ola uku toko naa panjikuli, yunga mulu-maminia „kulunduku taltoringima, 'Moke samili.' nengu ono yu-melete-melete lingí mele pilingindu kou-kate seko pe mulu-maminiamila littingi.

<sup>35</sup> We-yomboma onone yu seringi mele kanoko we gilieringi-na-kuo ononga ye awilimane yundu ungu-taka tondoko ninguli: "Yu yombo wema 'Naa kolko konde pangí.' nimba lipa tapondorumu mele kiniá yuni 'Naa kolopo unju-perana wendo pambo.' nimba yu yuyu lipa tapondopa unju-perana wendo opili. Yu sika Pulu Yemone nimba taltopa olio 'Nokopa kondopili.' nimba lipa mundorumu ye nokoli Karasimu omba molomu liemu kiniá yu yuyu aku sipa lipa tapondopili." nirungi.

<sup>36</sup> Ami-yema pea yu ungu-taka tondoko molkole no-waene kombili seli se 'Nopili siemili.' nengu singi sekole <sup>37</sup> yundu ninguli: "Nu Juda yombomanga ye nokoli kingimu molonu liemu 'Naa kolopo unju-perana wendo wambo.' nengu nu nunu liku tapondou." nirungi. <sup>38</sup> 'Yu mongo liltimu mele yomboma kanangi.' nengu

I YEMO JUDA YOMBOMANGA YE NOKOLI KINGIMU  
nengu imbi toko unjuna ola mondoringi.

<sup>39</sup> Mongo littingili yetolo unju-perana ola uku toko panjeringi yetolonga sene Yesusindu ungu-taka tondopa nimbale: "Nuni "Pulu Yemone nimba taltopa olio 'Nokopa kondopili.' nimba lipa mundorumu ye nokoli Karasimu 'molio.'" nilinu mele sika molo móloye? Sika aku siku, moleno liemu nu kinia olto kinia pea 'Naa kolamili.' nengu liku tapondoko unju-perana wendo li." nirimu.

<sup>40</sup> Aku-sipa na-kuo mongo littingili yetolonga sene yuni nirimu mele pilipale yu iri topa nimbale: "Nu kinia yu kinia selu-siku mele mindili nongo kolongele mele siengimunga Pulu Yemo pipili naa kolkonoye? <sup>41</sup> Nu-kinia olto sepo kinjerimbulu-munga mindili papu síngi. Aku-sipa na-kuo i yemo yu mongo se naa liltimu." nirimu.

<sup>42</sup> Aku nimba yuni 'Yesusindu' nimbale: "Yesusi, nu ye nokoli kingimu molko mélema nokokole ninimuni, na pilie." nirimu kinia

<sup>43</sup> Yesusini pundu topa yundu nimbale: "Nane nundu paa sika nimbu sikirumu: "Kiniá nu na-kinia pea Yomboma Molko Kondolemele Kolea Peangana pumbu molombolo lémo." nikiru." nirimu.

**23:44-49**

### *Yesusi Kolorumu Semanemo*

<sup>44-45</sup> Yesusi unju-perana ola we pepili awi-tangoli ena tuwellepo killoko serimu kinia kolea pali simbulu topale pe ipupini ena tere killoko kinia ena kelepa topa kolea tangorumu. „Ulu-awili se waltikele wendo orumula. Pulu Yemo popo toko kaloringi, ulka-tembele „Jerusalleme sukundu gilierimu akuna sukundu Pulu Yemo molorumu, suluminia paa kake sélimunga kerepuluna „ 'Yomboma sukundu naa pangí.' nengu u alieli, mulu-maminia awili sene pipi siku panjeringi gilierimu. Kanu mulu-maminiamio awi-suku-singina olá torumu.

<sup>46</sup> Yesusini ungu se tondolo mundupa nimbale: "Tata, nanga minimu 'Nu molenona opili.' nimbu nu sikiru." nirimu. Aku nimbale yu kolorumu.

<sup>47</sup> „Romo, ami-ye wane anderete nokorumu ye se Yesusi toringi ami-yema nokopa molorumu kanu yemone Yesusi ungu se nimba kolorumu mele pilipa kanopale yuni Pulu Yemo kape nimba nimbale: "I yemo yu paa sika ye konopu sumbi nili se lepomo." nirimu.

<sup>48</sup> Kanu-kinia 'Yu unju-perana uku toko panjingí kanomolo.' nengu u liku maku toringi yomboma yu serimu mele kanoko bulu-balú nengu ungu awisili konopu kimbu siku kondo kololko ulkando purungi. <sup>49</sup> Yu-kinia u kopu seko andoringi yema kinia,

kolea Gallilli disiriki munduku kelko yu lombili andoko „Jerusalleme, pe a oringi amboma kinia onone „yu-kinia seringi kolorumu mele, sulu seko kanoko gilieringi.

**23:50-56**

### *Yesusi Óno Seringi Semanemo*

**50-51** Yesusi kolorumu kinia ye se, yunga imbi Josepo, yu Juda yombomanga kanjollo ye awili se molopa, ungu peangama manjipa sepa molorumu. Yu konopu sumbi nili ye se, kolea Judia disiriki Arimatia taono yemo. Yu ‘Pulu Yemo ye nokoli kingimu molopa olio nokomba walemo wendo opili.’ nimba nokopa molorumu yemo. Yu Juda yombomanga kanjollomo sika molorumu, aku-na-kolo kanjollo yemane „u ono onono kote pilkuli, “Yesusi kolopili.” niringi kinia yuni “E.” naa nimba we molorumu. **52** Kanu yemone „Romo gapomano ye nokoli, Paillate molorumuna pumbale “Yesusinga ónomo na si.” nimba mawa serimu.

**53** Paillatene “Manda.” nirimu kinia Josepo pumba ónomo mania lipa, mulumaminia konde sene lipa okopale, kou-kande senga memba pumba sukundu taltorumu. Kanu kou-kandena yombo-óno se u naa taltoringi, yu mindi pulu-pulu taltorumu. **54** Yesusi óno serimu wale akumu kiniá mele, opali mele „koro moloringi, wale Sambatemo nondopa wendo ombá serimu. Sambate walemo wendo ombá kinia koro molongendo kiniá mele, mélema liku undu-undu siringi walemo wendo orumu, aku walemonga Yesusi óno seringi.

**55** U Yesusi kinia kolea Gallilli disiriki munduku kelko yu pea „Jerusalleme, oringi amboma Josepone Yesusi óno serimu kou-kandemo kanoko akuna sukundu ónomo taltorumu mele neme-neme ningu kanokole niringimuni, **56** pe kanoko pora sikuli yando ongo, ‘Yunga ónona wambolama kinia méle lupa muna tolima kandondamili.’ ningu seko mimi seringi. Aku-sipa na-kolo Sambate walemo wendo orumu kinia Pulu Yemonga ungu-manemone

‘Sambate wale kinia koro molangi.’

nirimu mele pilku likuli méle seko mimi seringi mélema sumbi siku óno-koleana naa mengo pungu we taltoko koro moloringi.

## 24

**24:1-12**

### *Yesusi Lomboropa Ola Molorumu Kinia Ambo Marene Yu Kanoringi Semanemo*

**1** „Ononga koro moloringi, wale Sambatemo pora nimba, pulu-pulu kongono walemo wendo ombándo kolea tangomba muni lierimu kinia amboma wambola muna toli u seko taltoringima liku mengo pungu, „Yesusinga, ónomo taltoringi kou-kandena mengo puringi.

**2** Akuna punguli kou-kande kerepulumu pipi siringi koumu perele-marele pumba welkendo lierimu kanokole, **3** sukundu puringi kinia akuna Ye-Awili Yesusinga ónomo u lierimuna naa lierimu kanoringi. **4** Kanu-kinia ‘Ónomo nambi semunje?’ ningu konopu kimbu siku moloringi kinia ye talo kariapá sepale pa selemo mele seli wale-pakoli pakoringili yetolo ono moloringina gilieringili.

**5** Kanokole amboma mini-wale munduku tamalu peringi kinia yetolone onondo ninguli: “Konde molemomo, ya óno-koleana nambi semu-na korokomeleye? **6** Yu ya naa lemó. Lomboropa ola molopa wendo pumu.” „niringili., “Yu „ono-kinia, kolea Gallilli molopa onondo nirimu mele piliayo. Yuni nimba: **7** “Juda yombomanga ye awilimane, Mania Ombo Mana-Ye Au Lierimu Yemo liku talape lupa yombo ulu-pulu-kiri selima yu liku singí, onone yu unju-perana kolopili uku toko panjingí kinia kolopale wale yopoko-sipamonga lomboropa ola molomba.” nirimu kanumu.” niringili.

<sup>8</sup> Kanu-kinia Yesusini u aku nirimu mele ambomane kelko pilieringi.

<sup>9</sup> Kou-kandemo munduku kelko, kelko yando ongole niringimuni, lombili andoli rureponga yopoko kinia akuma pea moloringi yomboma kinia onondo pilku kanoringi mele semane toko siringi. <sup>10</sup> Kolea Makatalla ambo Maria keme, ambo Joana keme, Jemisi anumu Maria keme, ono pea puringi amboma keme, kanu ambomane Yesusini u “Nanga kongonomo sende-paa.” nimba lipa mundorumu ye rureponga yopoko aku semanemo toko siringi.

<sup>11</sup> Aku-sipa na-kolo ambomane niringi ungumu pilkuli ‘Ono kolo tokomele.’ ningu pilku kuru naa mondoringi.

<sup>12</sup> Ambomane niringi unguma kuru naa mondoringi,-na-kolo Pita ola gilipa ónomo taltoringi kou-kandena kanombando lisipa pumba, wake sepa kanopa Yesusinga ónomo okoringi mulu-maminiamma manjipa akuna we lierimu kanopale konopu awisili kimbu sipa ‘I nambolka unguri semunje?’ nimba pilipa yando orumu.

24:13-35

### *Kolea Emeasi Aulkana Ulu Se Wendo Orumu Semanemo*

<sup>13</sup> Yesusi lomboropa ola molorumuaku walemonga ,yu lombili andoringi yombo-manga, yombo talo kolea-kanga Emeasi pungilí puringili. Aku kolea-kangamo kinia kolea-awili Jerusalleme kinia aulkamo laye-kolte sulu mele, illepene killomita mele.

<sup>14</sup> Olone Yesusi kolorumumundu anju yando angelema niliku puringili.

<sup>15</sup> Aulkana aku ulumando angelema niliku pangili Yesusi yuyu olo puringilina ombo olo kinia kopu sepa purumu, <sup>16</sup> aku-na-kolo Yesusi yu ‘We-ye lupare okomo konopu leangili.’ nimbale serimu, olone yu naa kanoko imbi siringili.

<sup>17</sup> Yuni olo mangilipa nimbale: “Olo nambolkamondo angelema niliku pukumbiliye?” nirimu.

Olo Yesusi toringi kolorumumunga nono ningu we gilieringili. <sup>18</sup> Senga imbi Killopasi, akumuni yundu mangilipa nimbale: “Jerusalleme sukundu talko ulu wendo orumuma nu naa kanorunuye? Yombo awisili akuna ongo maku tokole kanoringina-kolo nu pea naa molko kanoringi. Senga lupa moltkole okono lepomo.” nirimu.

<sup>19</sup> Orumu yemone “Nambolka ulumaye?” nirimu.

Olone ninguli: “Kolea Nasarete ye Yesusinga ulu kanuma.” niringili. “Yesusi yu Pulu Yemone ungu-umbu tondolima pilipa yando nimba sili ye se molopale Pulu Yemo kinia olio mana-yomboma kinia kanopo molamili ungu tondoloma nimba ulu tondoloma serimu. <sup>20</sup> Kanu-kinia olionga ningu Pulu Yemo popo tondoli ye awilima kinia olio nokolemele ye awilima kinia ‘Yu kote pilku “Kolopili.” ningu tangi.’ ningu ‘Romo gapomano yema, anju siringi onone ‘Yu kolopili.’ ningu unju-perana uku toko panjeringi. <sup>21</sup> Aku-sipa na-kolo olio pilierimulu, ‘Yu Pulu Yemone lipa mundorumu, ‘Romo gapomano yombomane olio, Isirele yomboma ‘tondolo munduku nokolemelemonga, mindili nombo umbuna sepili molemolomonga olio lipa tapondopa ‘ononga kína, wendo lipa ‘Molko kondangi.’ nimba ‘kolali sepa, olionga ye nokoli kingimu molopa olio nokopa kondomba.’ nimbu pilipu konopu sipu molorumulu-na-kolo yu toko kondoringi. Akumunga ungu se pea i-sipa: Talko toringi, kiniá wale yopoko-sipa mele ombo pukumu.

<sup>22-23</sup> “Pe kiniá ulu se lupa wendo omula. Yu lombili andorumulmanga ambo pokore kiniá ongo níngi mele pilipuli mini-wale mundomulu. Kiniá paa orili-u kanu amboma yu óno seringi kou-kandena pungu kanongi-na-kolo yunga ónomo naa liemu. Ono ongo oliondo ninguli: “Mulu-koleana angello talo kanomulu, olone “Yu we molemo.” níngili.” níngi. <sup>24</sup> Kanu-kinia olio pea molomulu ye talo óno kou-kandena punguli ambomane níngi mele kanongili, aku-na-kolo yu naa kanongili.” niringili.

<sup>25</sup> Aku niringili kinia olo lombili akilepa orumu yemone olondo nimbale: "Olo aroma topombele. Olo konopu naa pelemomonga u Pulu Yemone ungu-umbu tondoringima pilku yomboma ningu siringi yemane yundu niringi bokuna molemo mele mongotolone kanoko komutolone pilkuli konoputolonga liku mengo andolembolánje 'Yesusi-kinia talko siringi mele kinia yuni serimu sekemo mele kinia, kamu alieli pilieembolá lémo. <sup>26</sup> Pulu Yemone ungu-umbu tondorumuma pilku yomboma ningu siringi yemane Pulu Yemone "Ono nokopa kondomba ye se lipu mundumbu." u nimba, nimba talitorumu ye nokoli Karasimu mania ombale, ya ye nikimbilimu talko mindili norumu mele mindili nomba mulu-koleana ye nokoli awili se pumba molomba mele u ningu naa siringiye? Ningu siringi kanumu. Pe kiniá u ningu siringi mele yu aku semu." nirimu.

<sup>27</sup> Aku nimbale Mosisini Yesusi yu yuyu sembá mele u boku marenga topa nirimu mele pulu polopa nimba sipa, yandopa yandopa Pulu Yemone ungu-umbu tondorumuma pilku yomboma ningu siringi yemane yu sembá mele u boku marenga toko niringi mele nimba sipa, aku Pulu Yemonga bokumuni nilimú mele pali nimba silipa yombotolo kinia aulkana purumu.

<sup>28</sup> Yombotolo puringili koleamo nondoko wendo oringi kinia Yesusi we sumbi sipa senga lupa pumbá serimu. <sup>29</sup> Aku-na-kolo alone ta ningu ninguli: "Mólo. Ena pumba ipu nondopa lemba kene pea peamili." niringili-kulu yu olo-kinia pumba molorumu.

<sup>30</sup> Kanu-kinia olo pea kere-langí nongo moloringi kinia yuni pellawa kaloli se lipa Pulu Yemo "Ange." nimba, ambolopa pike lepa olo sirimu. <sup>31</sup> Aku serimu kinia olo yu kanoko olonga Ye-Awili Yesusi ningu kanoringili kinia sepa nema liitimu kelko naa kanoringili. <sup>32</sup> Kanu-kinia olo ololo anju yando angelema ningu ninguli: "Aulkana olto-kinia ombo ungu nimba Pulu Yemonga bokumuni nilimú mele ungu-pulumu nimba silipa omu kinia olto kamelé kongulu topili ombulu kanumu. Ye-Awili Yesusi-kinia ombulumunga aku semu lepomo." niringili.

<sup>33</sup> Kanu-kinia olo ola gilkü kelko sumbi siku Jerusalleme yando ongo, lombili andoli ye rureponga yopoko kinia ono pea maku toko moloringi yombo lupama kinia moloringina puringili.

<sup>34</sup> Sukundu puringili kinia onone olondo ninguli: "Ye-Awilimu paa sika lomboropa ola molomu lémo. Yu yuyu Saimono molomuna pumba mona giliemu." niringi.

<sup>35</sup> Kanu-kinia yombotolone aulkana puringili kinia ye se ombo nirimu mele kepe kanu yemone pellawa kaloli se ambolopa pike lierimu kinia kanoko 'Yu Yesusi.' ningu kanoringili mele kepe onondo semane toko siringili.

24:36-49

### *Yesusi Lomboropa Ola Molopale Lombili Andoli Yomboma Moloringina Orumu Semanemo*

<sup>36</sup> 'Yesusi lombili andoli, yombomane 'Yesusi yu lomboropa ola molorumu kanoringimundu, angelema ningu molangi Yesusi yu ombo ono moloringina sumbi sipa gilipale "Ono konopu pe nipili molaa." nirimu.

<sup>37</sup> Ono 'Yombo kololi senga minimu kanokomolo.' konopu lekole pungu-pungu ningu pipili koloringi. <sup>38</sup> Yuni onondo nimbale: "Mini-wale munduku konopu talo panjiku nambi semu-na molemeleye?" ,nirimu., <sup>39</sup> Nanga kitolo kinia kimbuma kanoko 'Imu na nanu.' ningu kanayo. Ambolko piliame. Nanga kangi kinia bele kinia gilkimu mele minimanga aku sipa gilimúye? 'Aku sipa naa gilimú kanumu.' nirimu.

<sup>40</sup> Aku nimbale yunga kimbu-ki pirimu toringima ono lipa ora sirimu.

<sup>41</sup> Kanu-kinia ono yu kanokole pondeanga konopu siku paa konopu kimbu siringi-na-kolo 'Sikanje molo nambolkare kanokolonje?' ningu konopu talo panjiku we moloringi-kulu yuni ono mawa sepa nimbale: "Kere-langí nombó se ya lemoye? Siee."

nirimu. <sup>42</sup> Onone yu oma kaloli se liku siringi, <sup>43</sup> akumu lipa ono kanoko molangi norumu. „Minimu naa molopo yombomo moltkoro kanangi.“ nimba aku serimu..

<sup>44</sup> Yuni onondo nimbale: “Na u naa kolopo ono-kinia molopole ono ulu wendo ombá mele nimbu sirindu kanu ulumu i wendo okomo. “Mosisi kinia Pulu Yemone ungu-umbu tondorumuma pilku yomboma ningu siringi yema kinia onone nando ningu boku marenga toringi uluma kinia, Pulu Yemonga konane niringi bokuna molemo konanemanne nando nilimú uluma kinia, kanu uluma sika wendo ombá.” nirindu kanumu.” nirimu.

<sup>45-46</sup> Aku nimbale ‘Pulu Yemonga bokumuni nilimú mele pilku kondangi.’ nimba yuni ungu-pulumu ono nimba sipa nimbale:

“Bokuna toringi molemo mele i-sipa: ‘Pulu Yemone “Ono nokopa kondomba ye se lipu mundumbu.” u nimba taltorumu ye nokoli Karasimu mindili nomba kolopale wale yopoko-sipamonga óno-koleana lomboropa ola molomba. <sup>47</sup> Aku sembá kinia kanu ye Karasimu yunga talape yombomane yunga tondolomone yomboma ulu-pulu-kiri sengema pilku kiri pilku konopu topele tonge mele kinia, ulu-pulu-kiri sengema Pulu Yemone siye kolopa kelepa naa pilipa “Aku siku seko kinjeringimunga mindili nangi.” naa nimbá mele kinia, ningu singíndu Isirele yombomanga kolea-awili Jerusalleme pulu polko ningu siku koleamanga pali punguli ningu siliku andonge.’ , <sup>48</sup> aku mele nando u ningu boku toringi.

“Pe kiniá nane serindu uluma kinia na-kinia seringi uluma kinia kanoringi seringi kanokomelemonga yomboma manda ningu singí. <sup>49</sup> Aku-sipa na-ko lo we naa sangi. Pulu Yemone “Simbu.” nimba, nimba panjerimu Minimu nane olando pumbuli lipu mundumbu kene aku Mini Tondolomo yu mulu-koleana mania ombo ‘Ono tondolo pupili molangi.’ nimba ono-kinia molomba kene u senga lupa naa pungu Jerusalleme sukundu we nokoko molaa.” nirimu.

24:50-53

### *Yesusi Mulu-Koleana Kelepa Olando Purumu Semanemo*

<sup>50</sup> Yesusi yu lombili andoringi yomboma kolea-kanga Betani lierimuna nondopana memba pumbale nirimununi, ‘Pulu Yemone ono sewi anjepili.’ nimba yunga kitolo ola mundupa, “Pulu Yemone ono nokopa kondopa ‘Ono konopu enge nipili molangi.’ nipili.” nirimu. <sup>51</sup> Onondo aku sipa nimba molopili ‘Pulu Yemone’ yu mulu-koleana olando liltimu kinia ono mundupa kelepa mulu-koleana olando purumu.

<sup>52</sup> Kanu-kinia onone ‘Yesusi’, yu kape ningu imbi ambolko paka tondokole kamelé paa koke sepili, Jerusallelendo kelko yando oringi. <sup>53</sup> Akuna punguli ‘Pulu Yemo popo toko kaloringi, ulka-tembelena alieli-alieli molko, Pulu Yemone serimumunga “Ange.” ningu yu kape ningu yunga imbi ambolko paka tondoringi.

„Yesusinga semane peanga ekendo topo pora sikiru..”

## JONO Semane Peangamo JONOne Torumu Bokumu

### *I Bokumunga Ungu-Pulu Mare*

Ungu-pulu mare inia yakondo gomo 1 molemo.

**I bokumu torumu yemo** yu "Yesusini konopu mondorumu lombili andoli yemo" (13:23-24, 19:26, 20:2, 21:7,20,23-24). 'Akumu **lombili andoli ye Jono.**' ningu pilielemene. We lombili andolimanga imbima bokuna molemo-na-kolo Jononga imbimu naa molemo. 1:35-42, 18:15-16, 20:2-8 kananila. Jono Pitatolo sika wale mare kopu seko andoringili ungu mare LLuku 22:8,13, Lipa Mundorumu Yema 3:1,3-4,11, 4:1,3,7,13,19 molemo.

**Jonone** konopu lepale boku torumu ungu-pulumu Jono 20:30-31 molemo. Yesusi yu Pulu Yemonga malo kepe, yu Pulu Yemone 'Yomboma lipa tapondopa 'Mindili naa nangi.' nimba kolali sepa kolondopili.' nimba lipa mundorumu ye nokoli Mesaya Karasimu kepe, yu mindi konde molko mindi pungí ulu-pulumu kepe, aku sipa molemo mele 'Yombomane "Sika aku sipa molemo. Sika nanga nimba aku sipa senderimu." ningu kuru mondangi.' nimba **Jonone** i bokumu torumu. "Akumu sika." nimbu kuru mondopole, pe mindili naa nombo, konde molopa mindi puli ulu-pulumu limulú. (Jono 1:7,12-13,17,29,35,40-42, 3:13-18, 4:10,13-14,25-26, 39-42, 7:37-41, 5:21,24-27, 6:33,35,40,47-48,51,53-58, 8:12, 10:7,9, 10:11,14-15, 11:25, 14:6, 15:1,5, 8:42-47,51,56-58. Mare pea molemonje nuni nunu koroyo.) Boku ambolkonomongaa paa pealemekondo ungu-pulu mare "8. bilip", "24. laip", "27. Mesaia", "23. Krais" kinia molemo.

Jono kolomongo-awili 13-17 pali molemo unguma **Jonone** mindi boku torumu.

**Yesusini ungu-iku topa yu yuyu molorumu mele**, méle yopoko-pakara nirimuaku unguma Jonone nimba sirimu: "Gamo molio." nirimu Jono 6:35 molemo; "pa sélimu" 8:12; "ulka kerepulumu" ; "kongi sipisipi tapu sepa kondoli yemo" 10:7,9; 10:11,14-15; "kololima topa makisindelimu kinia molopa mindi puli ulu-pulumu kinia" 11:25; "aulkamo, sika ungumu, konde mololi ulu-pulumu" 14:6; "unju waenemo" 15:1,5. "Na akuma molio." nirimu.

**Jono** yuni pepá yopoko topa mundupa, Lipa Ora Sirimu bokumu torumula.

Ya ungu-pulumu pora nikimu.

### *Kolomongo-Awili 1*

## **Pulu Yemonga Ungumu Ye Au Lepa Yomboma Kinia Ombo Molorumu Semanemo**

*1:1-18*

### *Yesusi Karasi, Pulu Yemonga Ungumu, Mana-Ye Au Lierimu Semanemo*

<sup>1</sup> Paa koronga-u, ,mulu matolo kepe mélse naa liepili,, Ungumu molorumu. Aku Ungumu Pulu Yemo kinia moloringili. Aku Ungumu yu Pulu Yemo. <sup>2</sup> Paa koronga-u, mélse mana naa liepili, yu Pulu Yemo kinia moloringili. <sup>3</sup> Ungumu yuni yuyu mélema pali serimu. Mélse we pora naa purumu. Méle wendo orumuma pali yuni serimu-na wendo orumu. <sup>4</sup> Mololi ulu-pulumu yu-kinia mindi perimu. Kanu mololi ulu-pulumu yombomanga pa sendélimu. <sup>5</sup> Aku pa sélimuni simbulu tolemomo pa sendelemo. Simbulu tolemomone kelepa pa sélimu manda pipi sipa simbulu kelepa naa tomba.

<sup>6</sup> Ye se orumumu Pulu Yemone lipa mundorumu-na orumu, yunga imbimu Jono. ,Yu No Lindeli Jono kanumu., <sup>7</sup> Jonone pa sendélimunga pulumu nimba simba orumu. 'Yombomane "Nondopa ombá yemo yu sika aku pa sendélimu." ningu kuru

mondangi.' nimba, omba nimba sirimu. <sup>8</sup> Jono yu aku pa sendélimu mólo. Yu aku pa sendélimu ombá mele nimba simba orumu.

<sup>9</sup> Jonone yomboma ungu nimba sipa molopili paa sika pa sendélimuni yomboma pali pa sendelemo kanumu mana ombá orumu.

<sup>10</sup> Yu ma-koleana omba molorumu. Yuni yuyu ma-koleamo serimu-na-kolo makoleana yombomane yu kanokole 'Yu ma-kolea serimu Pulu Yemo.' ningu naa kanoko 'Yu we-mana-ye se.' ningu pilieringi. <sup>11</sup> Yu yunga koleana omba molorumu-na-kolo yunga yombomane "Nu olianga Ye-Awilimu okono kene olio ongo nokoko molou." ni naa niringi. <sup>12</sup> Aku-sipa na-kolo yundu "Nu sika 'Pulu Yemone lipa mundorumu-na orunu yemo kene, olio nokani pea molamili ou." ningu yunga ungumu kuru mondoko litingi yomboma yuni "Pulu Yemonga bolangoma molangi." nirimu. <sup>13</sup> Aku-na-kolo kanu yomboma Pulu Yemonga bolangoma au lieringi, aku ulumu kangimunga kongonomo mólo. Anupili lapalini "Pulu Yemonga bolangoma meamili." ni naa niringila. Pulu Yemone yuyu mindi onondo "Nanga bolangoma." nirimu.

<sup>14</sup> Ungumu 'Pulu Yemo pea moloringilimu, mania omba mana-ye au lepa olio-kinia pea wale kanga-kolte molorumu. Yu mana omba molorumu kinia neme-neme nimbu kanopole, yu ye paa peanga, imbi molemo ye tondolomo, kanopo pilierimulu. Kanu ye paa peanga tondolomo Malo selu molorumumu Lapa molorumuna yu pea molkole mana mania orumumunga yu ye paa peanga lepa imbi paa ola mololi ye tondolomo mindi kanopo pilierimulu. Yu we kondo kololi ulu-pulumu kinia sika nili ulu-pulumu kinia yunga konopuna pepa peke lierimu yemo.

<sup>15</sup> Jono yomboma no lindipa molopili Yesusi Pulu Yemonga Ungumu orumu kinia, Jono yuni yomboma kanu yemo lipa ora sipa yu molorumu mele nimba sirimu. Yuni ru nimba nimbale: "I yemo nane onondo u "Nondopa ombá." nimbu sirindu kanu yemo imu. Na naa molambo i yemo yu koronga-u Pulu Yemo kinia molorumu-kulu "Yu ye nokoli awilimu, na paa we koropa yemo." sirindu kanu yemo imu." nirimu.

<sup>16</sup> Yuni olio we kondo kololemo ulu-pulumu yu-kinia pelemomonga yuni olio alieli kondo kolopa mindi molopa olio 'Konopu peanga leangi.' nimba alieli-alieli sewi anjilimú. <sup>17</sup> Mosisini olio Pulu Yemonga ungu-mane sirimuma kála-sepo sepo molorumulu. Aku-na-kolo olio we kondo kololi ulu-pulumu kinia sika unguma kinia aku uluma Yesusi Karasi yu-kinia mindi pepili orumu. <sup>18</sup> Mana-yombo sene u kepe, kiniá kepe, Pulu Yemo naa kanolemele. Pulu Yemonga Malo selu mindi molemo, akumu Lapa kinia pea kopu seko molembele, akumuni mindi 'Pulu Yemo molemo mele kanangi.' nimba yu lipa ora sirimu.

**1:19-28**

### No Lindeli Jononga Semane Se

<sup>19</sup> Juda yomboma,nga ye awili, kolea-awili Jerusalleme moloringi 'kanu yemane, Pulu Yemo popo tondoringi ye pokore kinia, LLipai ye pokore kinia Jono no lindipa molorumuna liku mundukuli, "Jonondo "Nu nawe?" ningu mangilku piliangi paa." niringi. <sup>20</sup> Ono ongo yu mangilku pilieringi kinia yuni kolo naa topa sumbi sipa nimba nimbale: "Pulu Yemone 'Olio nokopa kondomba ye se lipu mundumbu.' nimba, nimba taltorumu ye nokoli Karasimu na mólo." nirimu.

<sup>21</sup> Onone "Nu aku yemo mólo liemu nu nawe? Nu Pulu Yemone ungu-umbu tondorumuma pilipa yomboma nimba sirimu ye se Illainja, 'yu konde molopili Pulu Yemone u olando lillimu akumu, nu kelko onuye?' ningu mangilku pilieringi.

Yuni "Na akumu mólo." nirimu.

Onone ninguli: "Aku liemu 'Pulu Yemone ungu-umbu tondorumuma pilipa yomboma nimba simba ye se pe ombá.' ,u niringi kanu yemo, nuye?" niringi.

Yuni "Mólo." nirimu.

<sup>22</sup> Kanu-kinia onone yundu ninguli: “Nu nawe? Olio liku mundongi yemane ‘Ongo ningu singí.’ ningu nokoko molemele kene nunga imbi leko si. Nunu nawe konopu lekenoye?” niringi.

<sup>23</sup> Jonone nimbale: “Pulu Yemone ungu-umbu tondorumuma pilipa yomboma nimba sirimu ye Aisayane koronga-u nimbale:

“Kolea ku lielina ye sene

“Ye-Awilimu ombá aulkamo sumbi sindei.”  
nikimu pilkiru.”

nirimu. Aisayane kanu u pilierimu ungumu nane kiniá nikiru.” nimba Jonone nirimu.

<sup>24</sup> „Kanjollomane, mundoringi ongo moloringi yemanga Parisi ye mare moloringila.

<sup>25</sup> Aku Parisi yemane yundu mangilku pilku ninguli: “Nu ye nokoli Karasimu móloola, Illainja móloola, ‘Pulu Yemone ungu-umbu tondombama pilipa yomboma nimba simba ye se pe ombá.’ u niringi yemo móloola. Pe kiniá nu nambi semu-na yomboma no lindilinuye?” niringi.

<sup>26</sup> Jonone onondo pundu topo nimbale: “Na sika no lindiliu-na-kolo nanga kongonomo maniandopa. Ye se olionga koleana sukundu molemo akumu ono kanokole ‘we-yere’ konopu leko, kanoko imbi naa silimili, <sup>27</sup> aku yemo na lombili akilepa okomo yemo. „Yombo awilimanga kongono kiri seli yombomane sika ononga yombo awilimanga kongono kiri sendengendo ononga kimbu-su ka pilka toko su wendo lindilimili-na-kolo, i ye na lombili akilepa okomomonga kimbu-su ka pilka topo su wendo lindimbu kongonomo kepe paa olandopa mele, nane manda naa sendembo. Na ye paa kiri mele; yu ye paa nokoli awilimu.” nirimu.

<sup>28</sup> I ulu wendo orumuma Betani taono, no Jodane nekendo lemó koleana, wendo orumu. Jonone akuna yomboma no linderimu.

**1:29-34**

### *Jonone Yesusindu “Pulu Yemonga Kongi Sipisipi Walomo” Nirimu Semanemo*

<sup>29</sup> Opalikundu „No Lindeli, Jono molorumuna Yesusi ombá orumu kanopale nirimumuni, yombomando nimbale: “Kaname! Pulu Yemonga Kongi Sipisipi Walomo okomo. Yu yombomanga pali ulu-pulu-kirima kulu tondolemo tondomba yemo okomo.” „nirimu.” <sup>30</sup> “U nane ye se nirindu kanumu andi okomo ye akumundi nirindu. U nane nimbili: “Ye na lombili ombá ye se na naa molambo yu koronga-u molorumu-kulu yu olandopa na maniandopa.” nirindu kanumu i yemo. <sup>31</sup> Na kepe yu naa kanorundu-na-kolo ‘Isirele yomboma yu kanokole piliangi lipu ora siembo.’ nimbu na ombo yomboma no lindiliu.” nirimu.

<sup>32</sup> Jonone yundu ungu se pea nimbale: “Yu no lindipu molopo kanondu kinia Mini „Kake Sélimu, kera waembono mele mulu-koleana maniendo ombo yu molomuna ombo molomu kanondu. <sup>33</sup> Nane yu kanopole yu imbi naa pilipu ‘Yu we-yere.’ konopu lelka-na-kolo nando “Yomboma no lindi-pou.” nimba lipa mundorumu yemone na nimba sipa nimbale: “Mini „Kake Sélimu, mania ombo ye senga kangi senga ola ombo molomba kanoni kinia aku yemone yomboma Mini „Kake Sélimu, lindimba yemo.” nirimu-kulu pilipuli yu kanopo imbi sipuli <sup>34</sup> onondo “Yu Pulu Yemonga Malo.” niliu.” nirimu.

**1:35-42**

### *I Bokumu Torumu Ye Jono Kinia Enderu Kinia Pita Kinia Yesusi Lombili Puringi Semanemo*

<sup>35</sup> Opalikundu „No Lindeli, Jono no Jodane kelo akuna kelepa gilipale nirimumuni, yu lombili andolimanga ye talo pea gilieringi. <sup>36</sup> Kanu-kinia Yesusi ombo purumu kinia yuni kanopa nimbale: “Kanale! Pulu Yemonga Kongi Sipisipi Walomo ombo pukumu.” nirimu.

<sup>37</sup> Yu lombili andolitolo yuni nirimu ungumu pilkuli Yesusi lombili puringili.

<sup>38</sup> Yesusi topele topa olo yu lombili oringili kanopale olondo nimbale: "Nambolka korokombeleye?" nirimu.

O lone yuntu "Rapai, nu sena pelenoye?" niringili. (Rapainga ungu-pulumu 'Ungu Mane Sílimu' .)

<sup>39</sup> Yuni olondo "Kanangili wale." nirimu. Olo yu perimuna pungu kanokole ipupini po killoko mele serimu-kulu kanu enamonga yu pea peringi.

<sup>40</sup> Ye talo Jonone nirimu ungumu pilkuli Yesusi lombili puringili yetolonga se Enderu, Saimono Pitanga genu. <sup>41</sup> Yu sumbi sipa pumba genu Saimono koropa kanopa lendepale yuntu nimbale: "Pulu Yemone "olio nokopa kondomba ye se lipu mundumbu." nimba, nimba taltoramu ye nokoli Mesayamo kanopo lendemulu." nirimu. ('Mesaya' akumu Juda yombomanga ungu se. Mesayamondo Giriki unguna 'Karasimu' nilimili.)

<sup>42</sup> Aku nimbale Enderuni genu Saimono Yesusi molorumuna memba purumu. Yesusini yu kanopa nimbale: "Nu Saimono, 'Jono' nili ye senga malo. Nunga imbi se 'Sipasi' ningi lenge." nirimu. (Sipasindu 'Pita' niringila. Juda yombomanga unguna 'Sipasi' ningi, Giriki unguna 'Pita' nilimili, aku ungutolonga pulumu 'kou-mulu' .)

**1:43-51**

### *Yesusini Pillipu Kinia Nataniele Kinia "Na Lombili Wale." Nirimu Semanemo*

<sup>43</sup> Opalikundu Yesusi 'Kolea Gallilli disiriki pambo.' konopu lepa pumbá purumu. Pumbale Pillipu aulkana gilierimu kanopale, "Na lombili ou." nirimu. <sup>44</sup> Pillipu kepe Besaida taono yemo, Enderu kinia Pitatolonga koleamo.

<sup>45</sup> Pillipuni Nataniele kanopa lendepale yuni yuntu nimbale: "Mosisini boku torumu bokumanga 'Ye se ombá.' nimba semane torumu kanu yemo kepe, Pulu Yemone ungu-umbu tondorumuma pilku yando ningi siringi yemane ononga bokumanga 'Ye se ombá.' ningi semane toringi kanu yemo kepe, kiniá olio kanopo lendemulu. Yu Nasarete taono ye Yesusi, Josepo malo." nirimu.

<sup>46</sup> Aku-na-kolo 'Aku kolea kangana ye-awili se manda wendo naa ombá.' nimba pilipale Natanielene Pillipundi nimbale: "Nasarete taonona ungu peanga se manda wendo ombáye?" nirimu.

Pillipuni Natanielendo nimbale: "Ongo kanou." nirimu.

<sup>47</sup> Kanu-kinia Nataniele ombá orumu kinia Yesusini kanopa, yuntu nimbale: "I ye okomomo paa sika Isirele yemo, yu kolo toli ungu se paa naa pelemo yemo." nirimu.

<sup>48</sup> Natanielene Yesusindu nimbale: "Nuni na nambi seko kanoko imbi sikuli aku nikinuye?" nirimu.

Yesusini pundu topa nimbale: "Mólo. Pillipuni nu u naa mangiliepili nu unju piki puluna molonu kinia nu kanopo imbi sindu." nirimu.

<sup>49</sup> Aku nirimu kinia Natanielene tondolo mundupa nimbale: "Rapai, nu Pulu Yemonga Malo, olio Isirele yombomanga ye nokoli kingimu lepomo." nirimu.

<sup>50</sup> Yesusini nimbale: "Nane 'Nu unju piki puluna molonu kinia kanondu.' nindu kanumunga nuni na 'Pulu Yemonga Malo molemo.' ningi kuru mondokonoye? Kiniá nane nundu nindu mele maniandopa. Pe ulu-tondolo paa olandopama wendo ombá kanoni." nirimu. <sup>51</sup> Aku nimbale Yesusini ungu se pea nimbale: "Nane onondo paa sika nimbu sikirumu: "Pe mulu-koleana anju yando pumba, Pulu Yemonga angelloma Mania Ombo Mana-Ye Au Lierimu Yemo molombana olando pungu maniando ongo senge kanonge." nikiru." nirimu.

**Kolomongo-Awili 2-4**

### **Yesusini 'Yu Molorumu Mele Kanangi Lipu Ora Siembo.' Nimba Ulu-Tondolo Mare Pulu Polopa Serimu Semanemo**

## 2

2:1-12

*Yesusini Ulu-Tondoloma Pulu Polopa Sembando Umbu-Nomo No-Waene Au Lender-imu Semanemo*

<sup>1</sup> Wale yopoko sipamonga Kena taono, kolea Gallilli disiriki sukundu lierimu, akuna ye se ambo limbando kere-langgi koyopa yomboma simba serimu, akuna Yesusi anumu pea maku toko moloringi. <sup>2</sup> Yesusi kinia yu lombili andolima kinia kanu ambo limba yemone “Ono kepe kere-langgi pea namili waa.” nirimu-kulu ono ongo kere-langgi pea noringi.

<sup>3</sup> Kere-langgi nongo molangi no-waene pora nirimu kinia Yesusi anumuni Yesusi yundu nimbale: “Ononga no-waene pora nimu-na mini-wale mundukumili.” nirimu.

<sup>4</sup> Jesusini yundu nimbale: “Ambomo, nane ungu sembóma nunga kongono se mólo. Nane ungu sembó walemo u wendo naa oli.” nirimu.

<sup>5</sup> Yunga anumuni ,ulka pulu yemonga, kendemande-yombomando nimbale: “Yuni onondo “Saa.” nimbá mele aku siku saa.” nirimu.

<sup>6</sup> Juda yombomane no lengendo no kolko mondoringi mingi awili talo-pakara akuna gilierimu. Mingimanga senga senga nimba no manda manjeli wane anderete llita molo wane anderete teti llita mele mandana molorumu.

<sup>7</sup> Jesusini ,ulka pulu yemonga, kendemande-yombomando nimbale: “Mingi kanga marenga no pungu kolkole, andi mingi awili lemomanga munduku peke siee.” nirimu. Kanu-kinia ono no kolko paa peke siringi.

<sup>8</sup> Yuni onondo kelepa nimbale: “Olama liku mundukuli kere-langgi nokoli yemo mengo pungu siee.” nirimu. Kanu-kinia mengo pungu yu siringi.

<sup>9</sup> Kanu kere-langgi nokoli yemone umbu-nomo no-waene au lierimu naa kanopale nomo we nomba pilierimu. Aku-sipa na-kolo kendemande-ye no koloringimane nomo kanoko imbi siringi. Kere-langgi nokoli yemone nomba pilipale ambo limba yemondo “Ou.” nimba <sup>10</sup> yundu nimbale: “Yemane pali alieli no-waene peangamo u sikuli, pe yombomane no awisili nongo pora siku kelko we walu nongo ‘songo sekemone naa sekemone’ ningu apuruku naa pilielemele kinia no kiri mele silimili. Aku-na-kolo nuni no-waene peangamo u we taltokole pe kiniá sakinumu, ,paa papu sakinu,.” nirimu.

<sup>11</sup> Kolea Gallilli disiriki sukundu lierimu kolea Kena taonona Yesusini serimu ulu akumu pe yu molopa kongono serimu mele lipa ora sirimu ulu-tonadoloma sembando i ulumu pulu-pulu serimu. Aku sipa yu we-ye se mólo, yu Pulu Yemonga tondolo peli yemo ‘ono kanangi.’ nimba lipa ora sirimu. Kanu-kinia yu lombili andolimane ‘Yu paa sika ,Pulu Yemone lipa mundorumu yemo.’ ningu kuru mondoringi.

<sup>12</sup> Ye ambo limbamonga kere-langgi nongo pora sikuli Yesusi kinia anumu kinia genupili keme lombili andolima keme Kapeniamie taonondo punguli, akuna wale pokore moloringi.

2:13-22

*Pulu Yemo Popo Toko Kaloringi Ulka-Tembelena Bisinisi Seko Moloringi Yema Yesusini Topa Makororumu Semanemo*

<sup>13</sup> Juda yombomane kalia-ingi senga senga kolea-awili Jerusalleme ongo akuna sukundu Pulu Yemone ononga anda-kolepalima Naa Topa We Omba Purumu mele pilieringi walema nondopa wendo ombá serimu kinia Yesusi Kapeniamie taono mundupa kelepa kolea-awili Jerusalleme olando purumu. <sup>14</sup> ,Pulu Yemo popo toko kaloringi, ulka-tembele akuna sukundu pumba kanorumu kinia kongi pirimu-kao kondema kinia kongi sipisipi kondema kinia kera waembono kondema kinia koumone liku bisinisi seringi yomboma kepe, kou-mone topele toringi yomboma kepe akuna sukundu aku seko moloringi kanorumu. <sup>15</sup> Kanopa kiri pilipale nirimumuni, ka mare lipa lakopale kanu ka-pultamone kongima pali ulka-tembelena topa makoropa

pena-pena sepa, kou topele toringi yombomanga kou-mone walena perimuma lipa ondopa ononga kou taltoringi poloma lipa topele topale,<sup>16</sup> kera mondoko bisinisi seringi yombomando nimbale: "I Tatanga ulkana bisinisi naa seko i mélema wendo liku mengo pame! I Tatanga ulkamo sitoamoye?" nirimu.

<sup>17</sup> Yuni aku serimumu yu lombili andolimane kanokole onone ungu se Pulu Yemonga bokuna sukundu nimba molemomo konopumane pilieringi. Aku ungumuni nimbale:

"Na paa kála sepole nunga ulkamo  
'Gilipa peanga liepili.' nimbu nokopo molio."  
nimba molemo kanu ungumu konopumane pilieringi.

<sup>18</sup> Kanu-kinia yuni serimumu Juda ,ye awili,mane kanokole yuntu ninguli: "Nu namba nambolka nambare likuli aku siku sekenoye? 'Lipu ora siembo.' ningu Pulu Yemone "Sei." nimu liemu Pulu Yemone selemo mele ulu-tondolo se olio kanamili sei." niringi.

<sup>19</sup> Yesusini onondo pundu topa nimbale: "Onone i ulka-tembelemo sikisingí kinia nane wale talo takopo, yopoko sipamonga takopo limbu." nirimu.

<sup>20</sup> Nirimu mele Juda ,ye awili,mane pilku ninguli: "I ulka-tembelemo kalia-ingi paono talo omnia pumba kelepa kalia-ingi talo-pakara omnia purumu kinia takoko littingi kanumu. Pe nuni "Wale talo takopo yopoko sipamonga takopo limbu." ninkinuye?" niringi. <sup>21</sup> Aku-sipa na-kolo yuni "ulka-tembelemo" nirimu akumu yunga kangimundu nirimu. <sup>22</sup> Kanu-kinia pe Yesusi kolopa wale talo óno-koleana pepa yopoko sipamonga lomboropa ola molorumu kinia yu lombili andolimane yuni u ulka-tembelemundo nirimu mele kelko pilieringi. Pilkuli Pulu Yemonga bokuna 'Yesusindu,' nimba molorumu ungumu kinia Yesusini nirimu ungumu 'Sika.' ningu kuru mondoringi.

2:23-25

### *Yesusini Yomboma Pali Seko Moloringi Mele Pilipa Kelierimu Semanemo*

<sup>23</sup> Pulu Yemone Juda yombomanga anda-kolepalima Naa Topa We Omnia Purumu mele pilieringi walemanga Yesusi Jerusalleme molopale yombomane yuni yu molopa kongono serimu mele lipa ora sirimu ulu-tondolo serimuma kanokole 'Yu sika Pulu Yemone 'Ono nokopa kondomba ye se lipu mundumbu.' nimba, nimba taltorumu yemo omnia molemo.' ningu kuru mondoringi. <sup>24-25</sup> Aku-na-kolo Yesusini yomboma pali seko moloringi mele pilipa kelepale uluma pali yombo sene yu lipa ora sipa naa nipili yu yuyu pilipa molorumu. Onone ningu pilieringi mele yuni konopumuni pilipale, 'We ningu pilielemele. Sika kiniá aku siku ningu pilielemele-na-kolo opali kepe talu kepe konopu topele tokole na 'Topo kondamili.' ningu pilingí.' nimba pilipale, 'Ono-kinia we walu sipu molambo.' ni naa nirimu.

## 3

3:1-21

### *Yesusi Kinia Nikodimasitolo Angelema Niringili Semanemo*

<sup>1</sup> Juda yombomanga ye mare Parisi moloringi. Aku, ye Parisimanga ye se, imbi 'Nikodimasí', yu Juda yomboma nokorumu kanjollo ye se, <sup>2</sup> yu Yesusi molorumuna ipulieli ombale nirimununi, yuntu nimbale: "Rapai, 'Nu Pulu Yemo kinia pea molkole ungu-mane sinindu orunu.' nimbu pilielemolo. Ye se 'Pulu Yemo kinia naa molkanje Pulu Yemone ulu-tondoloma selemo mele nuni selenoaku sipa yuni manda naa selka. Ulu selenomane Pulu Yemo kinia pea molembele mele lipa ora silimú.' nimbu pilielemolo." nirimu.

<sup>3</sup> Yesusini pundu topa yuntu nimbale: "Nane nundu paa sika nimbu sikiru: "Yombore kelko naa mengi liemu kanu yombomane Pulu Yemone ye nokoli kingimu

molopa yomboma nokolemo koleamo manda naa kanopa yunga talapena manda naa molomba.” nikiru.” nirimu.

<sup>4</sup> Nikodimasini yuntu nimbole: “Yombo se anda lepa molemo kinia yu nambi seko mengeye? Yu anumunga olona kelepa manda sukundu pumbá, anumuni yu manda membaye?” nirimu.

<sup>5</sup> Yesusini pundu topa nimbole: “Nane nu paa sika nimbu sikiru: “Yombo se nomone kepe Minimuni kepe mei naa mengili liemu kanu yombomo Pulu Yemonga bolango naa molopa Pulu Yemo ye nokoli kingimu molopa nokolemo koleana sukundu manda naa pumbá, mólo.” nikiru. <sup>6</sup> Méle kangimuni melemó méle akumu kangimu, yu mana molomba méleme mindi; méle Pulu Yemonga Minimuni melemó méle akumu minimu, aku méleme mindi Pulu Yemo molemona manda pumba molomba.

<sup>7</sup> “Akumunga nane nundu nimbuli: “‘Pulu Yemo ye nokoli kingimu molopa nokolemo koleana pamili.’ ningí yomboma pali u kelko meangi.” nikirumundi konopu awisili naa lieyo. <sup>8</sup> Poporomemo yuyu pilipa kolea lupa lupamanga tolemo kinia onone yunga ungu mu pilku, mélema lope-lope selemo kanolemele, aku-na-kolo yu naa kanoko yu wendo olemona kepe pulimúna kepe naa kanolemele. Pulu Yemonga Minimuaku sipala. Minimuni melemó yomboma mini konde pepili ono paa yombo lupa mele molemele yombomane kanolemele, aku-na-kolo ‘Pulu Yemonga, Minimuni kanu yomboma mini kondema silimú kanu Minimu naa kanolemele.’ nirimu.

<sup>9</sup> Nikodimasini yuntu nimbole: “I uluma nambi sepa wendo okomoye?” nirimu.

<sup>10</sup> Yesusini yuntu nimbole: “Nu Isirele yombomanga ungu-mane sili ye se na-kolo i nikiru mele naa pilkinu lepomo. <sup>11</sup> Nane nundu paa sika nimbu sikiru: “Olio pilielemolando nilimulu; kanolemolando nimbu silimulu. Aku-sipa na-kolo i ungu nilimulu unguma onone pali pilku limili yombo se mólo.” nikiru. <sup>12</sup> Ya makoleana uluma ono nimbu siliu kinia onone ‘Kólo tokomonje.’ ningi pilku kuru naa mondolemelemonga pe kiniá mulu-koleana uluma nimbu sindu liemu ‘Sika nikimu.’ ningi nambi seko manda kuru mondongeye? Manda kuru naa mondonge lémo. <sup>13</sup> Yombo selu kepe olando siku mulu-koleana sukundu naa puringi. Ye selumu mindi, mulu-koleana maniando sipa orumu yemo mindi u mulu-koleana molorumu. Yu Mania Ombo Mana-Ye Au Lierimu Yemo.

<sup>14</sup> “U Mosisini yombo naa peli kolea kuna kongi-ka-wambiyé kou-kapane sélimu lipa ola uku topa panjerimumu mele aku siku yombomane Mania Ombo Mana-Ye Au Lierimu Yemo liku ola uku toko panjingí. <sup>15</sup> Kanu-kinia, u yombo wambiyemane nongo kondoringi kolonge seringi yombomane Mosisini lipa ola uku topa panjerimu wambiyé kapane sélimu kanokole konde puringi kanu mele, pe kiniá aku siku ‘Yombomane yu-meles-meles ‘Mania Ombo Mana-Ye Au Lierimu Yemo yu uluma sepa molemo mele sika.’ ningi kuru mondonge yomboma pali molko kondoko mindi pangí.’ nimba Pulu Yemone ‘Yu unjuna, ola uku toko panjangi.’ nimba nirimu.” nimba Yesusini nirimu.

<sup>16</sup> “Pulu Yemone mana-yomboma konopu paa awili sepa mondopale yunga Malo selumu mindi molorumu-na-kolo yu ‘mana-yomboma,’ sirimu. ‘Yombomane yu-meles-meles ‘Yu sika ‘Pulu Yemone sipa mundorumu, olio lipa tapondopa nokopa kondoli yemo.’ ningi yu kuru mondoko molonge yomboma mindili nongo molko kinjingí koleana naa pungu, alieli molko kondoko mindi pangí.’ nimba yunga Malo sirimu.

<sup>17</sup> “Pulu Yemone Malondo “Nuni mana-yomboma kote pilku ono ka-ulkana liku mundani pu.” ni naa nirimu. ‘Nanga kangomo ono lipa tapondopa mindili nolemolá aulkana wendo lipa na-kinia molko kondonge aulkana lipa mondopili.’ nimba yuni Malondo “Ma-koleana mania pu.” nimba yu lipa mundorumu. <sup>18</sup> Yombo “Yu sika ‘Pulu Yemonga Malo, olionga nimba senderimu yemo.’” nimba kuru mondopa

molomba yombomanga kote naa pemba. Aku-na-kolo yombo sene 'Yu aku sipa naa molemo. Nanga nimba ungu se naa senderimu.' nimba kuru naa mondomba yombomo, yunga kotemo koronga we-yombomone Pulu Yemonga Malo selumu mindi molemo kanumundu 'Yu sika Pulu Yemonga Malo mólo.' ningu kuru naa mondorumu kanu yombomo kote pilielemo yemone lipa kote sendepa "Yu kolopili." nimba koronga-u senderimu.

<sup>19</sup> "Kotemonga ungu-pulumu i-sipa: Pa sélimu mana wendo orumu-na-kolo manayombomane ulu-pulu-kirima mindi sekole pa sélimu konopu naa mondoko simbulu tólimu mindi konopu mondolemente. <sup>20</sup> Yombo ulu-pulu-kirima selemelemane pa sélimu kanoko kiri pilkuli, 'Pa sélimuni nanga uluma mona lendemba.' ningu pa sélimunga wendo naa olemele. <sup>21</sup> Aku-sipa na-kolo yombo ulu sikama selemo yombomone 'Pulu Yemone na lipa tapondolemo-na i ulu-pulu sikama selio kene selio uluma yombomane kanangi.' nimba pa sélimunga yu wendo olemo." nirimu.

3:22-36

### *No Lindeli Jonone Yesusi Molorumu Mele Nimba Sirimu Semanemo*

<sup>22</sup> Pe Yesusi kinia yunga lombili andoli yema kinia kolea Judia disiriki lierimu kolea senga punguli niringimuni, akuna wale mare yu ono-kinia molkole, yuni yomboma no linderimu. <sup>23</sup> Jono yu yomboma no lindipa molorumula. Kolea Sellimi nondopa kolea Inono no awisili ombo purumu-kulu Jono yuni akuna yomboma no linderimu, yombo awisili yu molorumuna no lingí oringi. <sup>24</sup> (Jono yu 'ye nokoli kingi Eretene, ka u naa sipili aku sepa molorumu.)

<sup>25</sup> Walte 'No Lindeli, Jononga lombili andoli yema kinia Juda ye se kinia anju yando tondolo angelema ninguli, "Olio nambi sepo kimbu ki kangima kulumiye tomolo kinia Pulu Yemone olio kake sembá kanombaye?" ningu angelema niringi.

<sup>26</sup> Pe Jononga lombili andolima Jono yu molorumuna ongo ninguli: "Rapai, ye se no Jodane nekendo nu pea moloringili kinia nuni yu molemo mele ningu sirinu kanu yemone no lindipa molemona yombo awisili pukumili." niringi.

<sup>27</sup> Aku niringi pilipale Jonone pundu topa nimbale: "Mulu-koleana Pulu Yemone 'Ye se ungu se sepili.' ni naa nilkanje kanu yemone manda naa selka. <sup>28</sup> Nane ono u nimbu sirindu pilieringi mele i-sipa: Nane nimbili: "Pulu Yemone 'Olio nokopa kondomba ye se lipu mundumbu.' nimba, nimba talitorumu ye nokoli Karasimu na mólo. Pulu Yemone 'Ye nokoli Karasimu molomba yemo yu ombá.' nimba na u kumbi lepa lipa mundorumu." nirindu pilieringi kanumu. <sup>29</sup> Ye ambo limba ambomo yemo yunga mindi. Ye ambo limba yemone ungu nimbá mele yemo yunga pulu lemba yemone pilimbando komu sendepa molomba. Yunga ungumu pilipale paa konopu simba. Akumunga, yemo kinia pulu lemba yemo konopu simba mele na aku sipu kamu konopu siliu. Ambo limba yemo olandopa. Yunga pulu lemó yemo yu-kinia we kopu sepa molemo,aku yemo maniadopa. <sup>30</sup> Aku sipa mele ne no lindipa molemo yemo yunga imbimu sika paa olandopa pumbá. Nanga imbimu sika mania pumbá." nirimu.

<sup>31</sup> Ye wi ola molopale maniando orumu yemo yombomanga pali yu olandopamo. Olio mana-yombo molemoloma mana-mélemanga mindi molopo, mana-mélemanga mindi imbima nimbu sipu semane tolemolo. Olio maniadopa, mulu-koleana molopale mania orumu yemo yu yombomanga pali olandopa. <sup>32</sup> Yuní mulu-koleana kanopa pilierimu mele nimba silimú-na-kolo yombomane "Kolo tokomo." ningu, mokoli seko naa pilielemele. <sup>33</sup> Yombo sene yunga ungumu pilipa lipa "Sika nikimu." nimbá yombomone aku sipa "Pulu Yemone sika nilimú." nimbála. <sup>34</sup> I Pulu Yemone lipa mundorumu yemo Pulu Yemo yunga Minimu paa awili sepa silimú konopuna pepa manda selemo-kolo yuni Pulu Yemonga ungumu sumbi sipa nilimú. <sup>35</sup> Lapane Malo konopu mondopale 'Mélema pali Malo nokopili.' nimba sirimu. <sup>36</sup> Yombo se

‘Yu sika nikimu., Yu sika Pulu Yemonga Malo.’ nimba kuru mondomba yombomo aliei konde molopa mindi pumbá, aku-na-kolo yombo se Malo bulu sipa yunga ungumu lipa mokoli sepa naa pilimba yombomo konde mololi ulu-pulumu naa limba. Aku yombomo kiniá kepe pe kamu aliei-alieli kepe Pulu Yemone mindili lipa simba ulu-pulumu yu-kinia pelemo.

## 4

*4:1-43*

### *Yesusi Sameria Ambo Se Kinia Ungu Niringili Semanemo*

<sup>1</sup> Parisi yemane ungu se pilieringi mele i-sipa: “Yesusi molemona yombo awisili ‘No lindepili.’ ningi pulimili, ‘No Lindeli, Jono molemona yombo koltalo mele ‘No lindepili.’ ningi pulimili.’ niringi ungumu pilieringi. <sup>2</sup> (Aku-sipa na-kolo Yesusi yu lombili puringi yomboma yuni no naa linderimu, yu lombili andoli yemane yomboma no linderiringi.) <sup>3</sup> Yesusini yombo no linderimu, semane akumu Parisi yemane pilieringi mele pilipale Ye-Awilimuni kanu walemonga kolea Judia disiriki mundupa kelepa kolea Gallilli disirikindu kelepa pumbá purumu.

<sup>4</sup> Yu Gallilli purumu aulka akumu kolea Sameria awi-suku-singina lepa purumu. <sup>5</sup> Aulkamo aku sipa lierimu-na yu kolea Sameria lierimu taono senga orumu, aku taonomonga imbimu Saika. Aku taonomo Juda yombomanga anda-kolepa Jekopone yunga malo Josepo sirimu mamonga nondopa lierimu. <sup>6</sup> Jekopone ‘No molopili.’ nimba muru akuorumu aku no-murumu kanu mamonga lierimu. Yesusi aulka suluna orumumunga siye serimu-kulu aku no kelona ombo mania molopa mulu pilierimu. Kolea awi-tangoli mele akuna ombo molorumu.

<sup>7-8</sup> (Yesusi yu lombili andoli ye pea oringga yu mulu pilipa molopili ono kere-langgi topo toko lingíndu Saika taonona puringi.) Pe yu mulu pilipa molorumu kinia Sameria ambo se no kolombando orumu kinia Yesusini yundu nimbale: “No se nambo si.” nirimu.

<sup>9</sup> Sameria ambomone yundu nimbale: “Nu Juda yemo. Na Sameria ambomo. Pe nambi semu-na nando “No si.” nikinuye?” nirimu. (Aku nirimumunga ungu-pulumu i-sipa: Juda yombomane Sameria yomboma konopu kiri panjiku kere-langgi selumu moke seko naa nongo, ono kinia seluna kopu seko naa andoringimunga aku nirimu kanumu.)

<sup>10</sup> Yesusini pundu topa ambomondo nimbale: “Pulu Yemone mélemo we silimú mele pilku, i ye “No si.” nikimu yemo kanoko imbi silinanje yundu “No si.” nilina kinia yuni konde molopa mindi puli nomo nu silka.” nirimu.

<sup>11</sup> Ambomone pundu topa nimbale: “Ye-Awilimu, nu no koloni mingi se naa menu, no-murumu paa maniadopa lemó. Pe i no konde molopa mindi puli no nikinumu nu sena kolkole siniye? <sup>12</sup> Olianga anda-kolepa ye Jekopone i no-murumu sirimu kanu yemo yu kinia yunga bolangoma kinia kongima kinia i nomo noringi, ‘kanu yemo maniadopa nu olandopa.’ ningi nikinuye?” nirimu.

<sup>13</sup> Yesusini pundu topa nimbale: “I no-muruna no nonge yomboma kelepa no nonowale semba, <sup>14</sup> aku-na-kolo nane no simbú nonge yomboma pe ono no paa nonowale naa semba. Nane paa sika nikiru: “Nane no simbú akumu nonge yombomanga konopumanga no pilkipa mindi molopa, konde molko mindi pungí ulu-pulumu simba.” nikiru.” nirimu.

<sup>15</sup> Yesusini ungu-iku torumu mele naa pilipale nirimumuni, ambomone yundu nimbale: “Ye-Awilimu, na no kelepa nonowale naa sepili, ya kelepo aliei-alieli ombo no naa kolambo kene nuni no nikinumu nambo si.” nirimu.

<sup>16</sup> Yuni yundu nimbale: “Nunga yemo pea kelko wangili, pungu mangili-pou.” nirimu.

<sup>17</sup> Ambomone pundu topa nimbale: “Nanga ye se naa molemo.” nirimu.

Jesusini yundu nimbale: “ “Nunga ye se naa molemo.” nikinumu sika nikinu. <sup>18</sup> U nu ye se-pakara purunu. Pe kiniá nu ye se pea pelemebelemo nunga mena mólo. Nuni kiniá ungu nikinumu sika nikinu.” nirimu.

<sup>19</sup> Ambomone yundu nimbale: “Ye-Awilimu, na pilku nu Pulu Yemone ungu-umbu tondolemoma pilku yomboma ningu silinu ye se lepomo. <sup>20</sup> Olionga anda-kolepalimane i ma-pangina Pulu Yemo popo toko kape niringi-na-kolo ono Juda yombomane ninguli: “Pulu Yemo popo toko kape ningí koleamo paa Jerusalleme mindi.” nilimili.” nirimu.

<sup>21</sup> Jesusini tondolo mundupa nimbale: “Ambomo, nane ya nikirumu nu pilku lieni. Wale se wendo ombá kanu walemonga i ma-pangina kepe Jerusalleme kepe yombomane Lapa popo toko kape naa ningí.” nirimu. „Aku ungumunga pulumu: “Koleamanga pali Pulu Yemo popo toko kape ningí.” nimbándo nirimu kanumu. <sup>22</sup> “Ono Sameria yombomane popo toko kape nilimili yemo pilku sunduku we nilimili. Olio Juda yombomane popo topo kape nilimulu yemo molemo mele pilipu kondolemolo. Nambi semu-na, mana-yomboma Pulu Yemone lipa tapondopa, mindili nolemolá aulkana wendo lipa, yu kinia pea molko kondonge aulkana lipa mondolemo ulu-pulumu Juda yomboma kinia wendo ombá, onone koleamanga pali yomboma liku ora singíunga aku sipa. <sup>23</sup> Aku-sipa na-kolo Pulu Yemo sika popo toko kape ningí yombomane Tatanga ungumu ‘Sika ungumu.’ ningu pilku yunga Minimuni tondolo silimúmunga Pulu Yemo popo toko kape ningí wale wendo ombámo koronga wendo omu. Pulu Yemo aku siku popo toko kape ningí yomboma Tatane korolemomonga kanu walemo wendo omu. <sup>24</sup> Pulu Yemo yu minimu, akumunga yu popo toko kape ningí yombomane yunga Minimuni tondolo silimúmunga ‘Yunga ungumu sika ungumu.’ ningu sumbi siku aku senge.” nirimu.

<sup>25</sup> Ambomone nimbale: “Ye nokoli Mesayamo ombá. Yu ombale ungumanga puluma pali olio mimi sipa nimba simba mele na pilipu molio.” nirimu. (Ipuru unguna ‘Mesaya’ niringi akumu, Giriki unguna ‘Karasí’ niringi aku ungutolonga pulumu selumu. Ungutolonga pulumu i-sipa: Pulu Yemone “Olio nokopa kondomba ye se lipu mundumbu.” nimba, nimba taltorumu ye nokoli kanumu.)

<sup>26</sup> Kanu-kinia Yesusini tondolo mundupa nimbale: “Nu “Ye nokoli Mesayamo ombá.” nikinu akumu na. Na nu-kinia ungu nimbu molombokolo yemo kinia, nuni “Ye nokoli Mesaya” nikinu kanu yemo kinia, ye selumu.” nirimu.

<sup>27</sup> Yu aku nimba molopili yu lombili andoli yema kelko yando ongole niringimuni, yu ambo se kinia ungu ningu moloringili kanokole mini-wale munduku konopu awisili kimbu siringi. Aku-sipa na-kolo ononga ye sene “Nu nambolka mélse lini sekenoye?”, molo “Yu-kinia nambi semu-na ungu ningu molembeleye?” ningu sene kepe naa mangilieringi.

<sup>28</sup> Kanu-kinia ambo kanumu yunga no-mingimu mundupa kelepa yu kelepa kanu taonona yando pumba yombomando nimbale: <sup>29</sup> “Na ungu serinduma pali ye sene na nimba simu yemo ono ongo kaname! Pulu Yemone “Olio nokopa kondomba ye se lipu mundumbu.” nirimu ye nokoli Karasimu yunje.” nirimu. <sup>30</sup> Aku nirimu-kulu pilkuli yomboma taono munduku kelko Yesusi molorumuna onge oringi.

<sup>31</sup> Aku seko molangi yu lombili andolimane yu paa ta nengu ninguli: “Rapai, kere-langgi se nou.” niringi.

<sup>32</sup> Aku-na-kolo yuni onondo nimbale: “Na kere-langgi nombómo lemó, na-kolo akumu ono naa pilku naa kanolemele.” nirimu.

<sup>33</sup> Aku nirimu pilkuli yu lombili andolimane anju yando angelema nengu ninguli: “Yombo sene kere-langgi u memba ombo simunje?” niringi.

<sup>34</sup> Yesusini nimbale: “Nanga kere-langgi i-sipa: Na ‘kongono sani pu.’ nimba lipa mundorumu yemone konopu silimú uluma sepo, yunga kongonomo sepo pora simbú.

Akumu nanga kere-langimu. <sup>35</sup> Onone “Oli kise om̄ba pumbá kinia rasi-witi nou lemba, inia topo lipu taltomolo.” nilimili kanumu. Aku-sipa na-kolo nane onondo nimbuli: “Kaliama kaname! Kere-langı pali koronga nou liemu.” nikiru. <sup>36</sup> Kere-langı inia tondolemo yemo kere-langı inia tondolemomonga méle kaloli koronga lipa, ‘Lepa mindi pupili.’ nimba kere-langima inia tondopa molemo. Aku sendelemomonga kalia sepa kere-langı panjerimu yemo kinia kere-langı inia tondolemo yemo peatolo konopu singilí. <sup>37</sup> Akumunga ungu se pelemomo sika. ‘Ye sene kere-langı umbu tondolemo. Sene kere-langı inia tondolemo.’ nilimili ungumu sika. <sup>38</sup> Kere-langı onone umbu naa toringima nane “Ono inia to-paa.” nimbu lipu mundorundu. Yombo lupamane kalia kála seko seringi, aku-na-kolo yombo lupamane seringi kere-langima ono inia tolemele.” nirimu.

<sup>39</sup> Ambomone “Na ungu serinduma pali yuni na nimba simu.” nirimu-kulu pilkuli kanu taonona moloringi Sameria yombo awisili ‘Yu sika Pulu Yemone ‘Ono nokopa kondomba ye se lipu mundumbu.’ nimba u nimba taltorumu ye nokoli Karasimu.’ ningu kuru mondoringi. <sup>40</sup> Akumunga Sameria yomboma yu molorumuna ongo, “Nu paa ya pea molamili.” niringi, kanu-kinia wale talo yu ono-kinia molorumu. <sup>41</sup> Kanu-kinia yombo awisili pea yu yuyu ungu nirimumu pilkuli ‘Yu sika ,ye nokoli Karasimu om̄ba molemo. Yuni sika nikimu..’ ningu kuru mondoringila.

<sup>42</sup> Onone ambomondo ninguli: “Nuni u ungu ninumu pilipu ‘Yu sika ye nokoli Karasimu.’ nimbu kuru mondromulu-na-kolo kiniá olio oliolio yunga ungumu pilipuli ‘Sika i yemo olio mana-yomboma Lipa Tapondopa Mindili Nolemolá Aulkana Wendo Limú Yemo molemo.’ nimbu kuru mondokomolo.” niringi.

#### 4:43-45

*Yesusi Kolea Gallilli Disiriki Kelepa Pumbale,*  
4:46-54

*Ye Nokoli Kingimunga Kongono Sendeli Ye Awili Senga Malo Sepa Konde Liltimu Semanemo*

<sup>43</sup> Sameria yomboma kinia wale talo molopale Yesusi ono mundupa kelepa kolea Gallilli disiriki pumbá purumu.

<sup>44</sup> (Gallilli Yesusi yunga pulu koleamo. U walte Yesusi yuni nimbale: “Pulu Yemone ungu-umbu tondolemoma pilipa yomboma nimba silimú ye sene yunga pulu koleamonga yomboma ungu nimba silimú kinia pilkuli nilimilimuni, onone ‘Yu olionga we-yere. Yu imbi mololi ye se mólo.’ ningu yu nilimú unguma naa pilku limilí.” nirimu kanumu.) , ‘We-koleamanga yombomane kanu yemonga ungumu limili-na-kolo yunga pulu lemó yombomane naa pilku limili.’ nimba nirimu., <sup>45</sup> Yu Gallilli sukundu purumu kinia Gallilli yomboma yu orumu kanokole “Papu okono.” ningu konopu siringi. U Pulu Yemone Juda yombomanga anda-kolepalima Naa Topa We Om̄ba Purumu mele pilieringi walema wendo orumu kinia ono Jerusalleme pungu molangi yuni akuna ungu mare serimu kanoringimunga onone aku siku seringi.

<sup>46</sup> Yesusi kolea Gallilli disiriki pumbale kelepa Kena taonona sukundu orumu. Kanu taonomonga u yuni umbu-no koloringima no-waene au lenderimu. Kapeniame taono ye nokoli kingimunga kongono sendeli ye awili se kanu kolea Kena molorumu, kanumunga malo kuru awili se torumu. <sup>47</sup> ‘Yesusi kolea Judia disiriki mundupa kelepa kolea Gallilli disiriki sukundu orumu.’ pilipale nirimumuni, kanu yemo Yesusi molorumuna pumbale nirimumuni, yundu mawa sepa nimbale: “Nanga kangomo nondopa kolomba sekemo kene maniando ongo yu seko peanga si.” nirimu.

<sup>48</sup> Aku nirimu kinia pilipale Yesusini yundu nimbale: “ ‘Na sika ,Pulu Yemo kinia molopale mana maniando orumu.’ we ningu kuru naa mondonge lémo. Pulu

Yemone ulu-pondoloma selemo mele 'Yuni aku sipa mele sembá kinia kanopole 'Yu sika ,Pulu Yemo kinia molopale mana maniando orumu.' nimbu kuru mondolomo.' ningu nando alieli "Ulu-pondoloma ongo sei." ningu mawa selemele." nirimu.

<sup>49</sup> Kingimunga kongono sendeli ye awilimuni yundu nimbale: "Ye-Awilim, nanga kangomo mini u naa pupili nu welea maniando ou." nirimu.

<sup>50</sup> Yesusini yundu nimbale: "Marena konde pumu kene pu." nirimu.

Yemone Yesusini nirimu mele pilipale 'Sika nikimu.' nimba kuru mondopa yu purumu.

<sup>51</sup> Maniando pumbá purumu kinia yunga kendemande-yema aulkana ongo yu maniando orumu kanoko likuli onone yundu ninguli: "Marena konde pumu." niringi.

<sup>52</sup> Kanu-kinia yuni onondo nimbale: "Ena nambolkana kuru topa keliemu?" nimba mangilipa pilierimu.

Onone yundu ninguli: "Oleanga awi-tangoli wane killoko mele kangi nomba keliemu." niringi.

<sup>53</sup> Lapane pilipale Yesusini "Marena konde pumu." nirimu kanu enamonga 'Kangi nomba keliemu lepomo.' nimba pilipale, yu kinia yunga ulka peringi yomboma kinia onone 'Yesusi yu sika ,Pulu Yemo kinia molopale mana mania orumu lepomo.' ningu kuru mondoringi.

<sup>54</sup> Kolea Judia disiriki mundupa kelepa kolea Gallilli disiriki ombo molopale Yesusini kangomo sepa konde liltimu kanu ulumu aku koleana yu molorumu mele lipa ora sirimu ulu-pondolo talo sipa mele serimu. Se u walte aku koleana umbu-no koloringima no-waene au lenderimu kanumu.

*Kolomongo-Awili 5-10*

## **Yesusini Yunga Kongonomo Andopa Sepa, Juda Yomboma Koro Molko Pulu, Yemo Kinia Ulu Mare Seringi Wale Awili Marenga Yomboma Mane Sirimu Mele Semane Mare**

### 5

5:1-15

*Yesusini Sambate Wale Kinia Ye Se Kuru Torumumu Nomu Beteseda Sepa Peanga  
Sirimu Semanemo*

<sup>1</sup> Pe walte, Juda yombomane kalia-ingi senga senga ningu Jerusalleme pungu Pulu Yemo-kinia ungu se seringi wale se wendo orumu kinia Yesusi Jerusalleme olando purumu. <sup>2</sup> Jerusalleme sukundu, kongi sipisipimanga pala kerepuluna nondopa, nomu se molorumu, kanu nomumundu Ipuru unguna 'Beteseda' niringi, akuna ulka takaya se-pakara gilipa makapu serimu. <sup>3</sup> Akuna kuru torumu yombo awisili aniembo lieringi.

Mongo kiri lierimu yomboma kinia,  
kimbu pange sepa karaye sepa perimu yomboma kinia,  
kimbu kolopa kukorumu yomboma kinia,  
onone ( 'Nomo lope-lope sembá.' ningu nokoko moloringi. <sup>4</sup> Walte walte nimba Ye-Awilimunga angello se mania ombo nomo lope-lope senderimu kinia yombo se kumbi lepa nona suku purumu yombomo peanga lierimu.)

<sup>5</sup> Ye se akuna molorumu kalia-ingi wane paono tene et kuru torumu yu aniembo lierimu. <sup>6</sup> Yesusi ombo, yemo aniembo lierimu kanopa, yu koro-u lipa aniembo lierimu pilipale, yemo mangilipa nimbale: "Nu 'kuru peanga liepili.' konopu lekenoye?" nirimu.

<sup>7</sup> Aniembo lierimu yemone pundu topa nimbale: "Ye-Awilimu, no lope-lope selemo kinia yombo se na lipa tapondopa nona memba pumbá se naa molemo. Na nanu pumbú selio kinia yombo mare u kumbi leko nona pulimili." nirimu.

<sup>8</sup> Aku nirimu kinia Yesusini yundu nimbale: "Nu ola gilku nunga uru peleno kunungumu liku mengo ongo pu." nirimu. <sup>9</sup> Aku nirimu kinia waltikele yemonga kurumu pora nirimu kinia yu ola gilipa yunga kunungumu lipa memba purumu.

I ulu wendo orumu wale akumu ,koro moloringi, wale Sambate se, <sup>10</sup> akumunga Juda ye ,awili, marene kuru pora nirimu yemondo ninguli: "Kiniá ,koro mololi, wale Sambatemonga nambi semu-na nunga kunungumu mengo ongo pukunuye? 'Sambate wale kinia mélema naa memba andaa.' nimba ungu-mane pelemo kanumu." niringi.

<sup>11</sup> Aku-na-kolo yemone pundu topa nimbale: "Na sepa peanga simu yemone nimbale: 'Nunga kunungumu liku ambolko pu.' nimu." nirimu.

<sup>12</sup> Aku nirimumunga onone yu kelko mangilku ninguli: "Ye nawene 'Nunga kunungumu liku ambolko pu.' nimuye?" niringi.

<sup>13</sup> Aku-na-kolo ye kuru pora nirimu yemo u aniembo lierimu koleana yombo awisili moloringi-kulu Yesusi kiyongo nimba purumumunga yuni manda yunga imbimu mangilipa naa pilierimu.

<sup>14</sup> Pe Yesusi kanu yemo ,Pulu Yemo popo toko kaloringi, ulka-tembelena kanopa yundu nimbale: "Pilie. Kiniá nunga kuru pora nimu nu kelko peanga liepili moleno kene nu ulu-pulu-kirima manda seko, kelko naa sei! Kelko senu liemu nu ulu umbuna awili se wendo ombánje." nirimu. <sup>15</sup> Ye kanumuni anju pumba Juda ye awilimando nimbale: "Na sepa peanga simu ye kanumu Yesusi." nirimu.

*5:16-47 monga 5:16-18*

*Juda Ye Awilimane Yesusi Konopu Kiri Panjeringi Kinia 5:19-47 Yuni Pundu Topa Nirimu Semanemo (Ungu-pulumu 5:1-15)*

*5:16-30*

*Pulu Yemonga Malo Kongonoma Sembando Namba Liltimu Semanemo (Ungu-pulumu 5:1-15)*

<sup>16</sup> Yesusini ono koro moloringi wale Sambatemonga aku sipa uluma serimu-kulu Juda ye awilimane Yesusi yu pulu polko seko kinjiku umbuna siringi. <sup>17</sup> Yesusini onondo nimbale: "Tatane u yomboma walemanga pali lipa tapondorumu mele kiniá kepe aku sipa sepa molemo. Na aku sipa Sambate walemanga kongono seliola." nirimu. <sup>18</sup> Yuni aku nirimu-kulu pilku Juda ye awilimane 'Yesusi yu paa kamu topo kondomolo.' konopu leko aulka se koroko moloringi. U Sambate walemonga ungu-manemo pulua torumumunga pilku yu mumindili kolcole; pe "Pulu Yemo yunga lapa." nirimumunga yu 'Pulu Yemo kinia manda selu sipu molembolo.' nimba nirimumunga yu kamu mumindili kolko yu toko kondonge seringi.

<sup>19</sup> Yesusini onondo pundu topa nimbale: "Nane ono paa sika nimbu sikirumu: "Malone yuyu uluma manda naa selemo sembá. Yunga Lapane selemo mele kanopale manda manjipa selemo. Lapane selemo uluma mindi Malone selemo." nikiru.

<sup>20</sup> Nambi semu-na, Lapane Malo konopu mondopale yuni selemo mele pali Malo lipa ora silimú. Ye sepa peanga simu akumu maniadopa. Paa sika pe ono paa kanoko konopu awisili liku mundungí ulu-tondolo olandopama Lapane Malo lipa ora simba.

<sup>21</sup> Akumu nambi sepa wendo ombáye? Lapane yombo kololima topa makisindipale 'Konde molangi.' nilimú mele aku sipa Malone yombo kololima 'Konde pangí.' konopu lemó yomboma sepa konde limú. <sup>22-23</sup> Ungu se pea i-sipa: 'Yombomane Lapanga imbimu ambolko paka tondolemele mele Malonga imbimu aku siku ambolko

paka tondangi.' nimba Lapane kote pilipa yomboma naa apurupa kote pilieli kongono akumu Malo sirimu. Akumunga, yombomane Malonga imbimu ambolko paka naa tondolemele yombomane aku siku Malo yando lipa mundorumu Lapanga imbimu kepe ambolko paka naa tondolemelela.

5:24-29

*Pulu Yemonga Malone Konde Molopa Mindi Puli Ulu-Pulumu Silimú Semanemo*

<sup>24</sup> "Nane onondo paa sika nimbu sikirumu: "Nanga ungumu pilku, na lipa mundorumu-na orundu yemo 'Yu sika Pulu Yemo.' ningu kuru mondolemele yomboma konde molopa mindi puli ulu-pulumu ono-kinia pelemo. Pe kote walemo wendo ombá kinia ono kotena naa gilingila. Kanu yomboma kololi ulu-pulumu pelemo aulkamo munduku kelko konde molopa mindi puli aulkana pulimili." nikiru.

<sup>25</sup> Nane onondo paa sika nimbu sikirumu: "Wale wendo ombámo kiniá koronga wendo omu. Kanu walemonga Pulu Yemonga Malonga ungumu kololi yomboma pilingí. Kanu-kinia yunga ungumu 'Sika' ningu pilku liku molonge yomboma konde molonge." nikiru. <sup>26</sup> Mélema konde mololi ulu-pulumu Lapa-kinia pelemo mele aku sipa Lapane 'Mélema konde mololi ulu-pulumu Malo-kinia pepili.' nirimula.

<sup>27</sup> Malo yu Mania Ombo Mana-Ye Au Lierimu Yemo molemomonga Lapane 'Malo yombomanga kote piliepili.' nimba nambamo sirimu.

<sup>28</sup> "Aku-sipa na-kolo akumunga mindi ono konopu awisili liku naa mundangi. Nambi semu-na, wale se wendo ombá, kanu walemonga yombo óno selemele koleana pelemelemane Malonga ungumu pilkuli ningimuni, <sup>29</sup> óno-koleamo munduku kelko wendo onge. Kanu-kinia lomboroko ola molonge yombomanga u mana konde molkole seko kondoko moloringi yomboma konde molonge; u mana seko kinjiku moloringi yomboma pe kotena gilkuli pe mindili nonge.

<sup>30</sup> "Na nanu ulu se manda naa sembó. Tatane nilimú mele pilipuli yombomanga kotema apurupu pilielio. 'Na nanu konopu siembo.' nimbu uluma naa sepo, 'Na lipa mundorumu yemo konopu sipili.' nimbu uluma seliomonga kote sumbi sipu pilipu apurupu kondolio." „nirimu.”

5:31-47

*Yombo Marene Yesusi Molopa Serimu Kanoringi Mele Ningu Siringi Semanemo (5:16-30 pea kanani)*

<sup>31</sup> "Sika na molio mele na nanu nimbu sindu liemu 'Kolo tokomonje.' ningu piliengi liemu peanga. <sup>32</sup> Ye sene lupa na molio mele nimba silimú, akumu na pilkiru nando nilimú mele paa sika nilimú, 'Kolo tokomonje.' manda naa ningí.

<sup>33</sup> "Onone ye mare „No Lindeli, Jono molorumuna "Paa." ningu liku mundoringi kinia yuni na sika molio mele nimba sirimu. <sup>34</sup> Mana-yombo sene na molio mele yomboma nimba sipa "Sika nikimu. Sikaaku sipa molemo." nimu liemu na konopu awisili lipu naa mundupu, 'Unguri mólo.' konopu lelio, na-kolo 'Pulu Yemone ono lipa tapondopa mindili nolemolá aulkana wendo lipili.' nimbu Jonone nando nirimu mele ono nimbu sikiru. <sup>35</sup> Jonone kongono serimumunga yu kiya mele nomba yomboma pa senderimu. Kanu-kinia wallop-kolte ono konopu siku kanu pa senderimuna moloringi.

<sup>36</sup> "Aku-sipa na-kolo Jonone na lipa tapondopa na molio mele ono nimba sirimu mele maniadopa. Ulu se na molio mele lipa tapondopa lipa ora silimú mele olandopa. Tatane "Ulu-tondolo seko pora sieni." nimba na sirimu ulu-tondolo selio kanumane na lipa tapondopa, Tatane na "Pu." nimba lipa mundorumu mele ono lipa ora silimú. <sup>37</sup> Tatane na "Pu." nimba lipa mundorumu-na orundumuni kepe nanga nimba para sindélimu molopa na molio mele nimba sirimu. Onone yunga kerena ungu nirimuma waltikele kepe komumuni naa pilku, yunga kumbi-keremo mongomane naa kanoringi. <sup>38</sup> Unku se pea kepe. Tatane lipa mundorumu

yemonga ungu "Kolo tokomo." ningu pilku kuru naa mondolemelemonga yu lipa mundorumu Lapanga ungu ononga konopumanga naa pelemo. <sup>39-40</sup> 'Pulu Yemonga bokuna ungu molemomane olio alieli konde molopo mindi pumulú ulu-pulumu simba.' ningu mimi siku kanolemele. Aku mimi siku kanolemele bokumuni na molio mele nimba silimú-na-kolo 'Konde molopo mindi pumulú ulu-pulumu liemili.' naa ningu, na moliona 'naa omolo.' ningu karaye selemele.

<sup>41</sup> " 'Yombomane na kape ningu nanga imbi ambolko paka tondonge kinia na ye awilimu molambo.' nimbu aku naa selio. <sup>42</sup> Ono molemele mele nane pilielio. Pulu Yemo konopu mondoli ulu-pulumu ono-kinia naa pelemo pilielio. <sup>43</sup> Nanga Tatane na namba sipa yunga kongonomo 'sende-pou.' nimba na lipa mundorumu-na orunda-na-kolo nanga ungu ono naa pilku limili. Aku-sipa na-kolo yombo sene yuyu namba lipa ombo kongono selkanje aku yombomonga ungu pilku limola. <sup>44</sup> Ono onono anju yando 'imbi molopili.' ningu, Pulu Ye selumu mindi molemo akumuni ononga imbi 'ambolopa paka tondopili.' naa nilimili liemu na molio mele nimbu siliu ungu 'Sika nikimu.' ningu nambi seko kuru mondongeye?

<sup>45</sup> "Aku-sipa na-kolo ,na-kinia, seko kinjilimilimunga 'Pulu Yemonga kote walemo wendo ombá kinia Tatane kote pilipa molopili nane nanu kote sendemba.' ningu naa piliangi. 'Mosisini ono lipa tapondomba.' konopu lemele yemone ononga kote sendemba. <sup>46</sup> Mosisini na ombo molombo mele boku torumu-na onone 'Mosisini nirimu unguma sika nirimu.' ningu kuru mondolemolánje nanga ungu kepe 'Sika nikimu.' ningu kuru mondolemolá-la. <sup>47</sup> Aku-sipa na-kolo yuni nanga semane bokuna torumumu 'Sika nikimu.' ningu kuru naa mondolemelemonga nanga ungu nikirumu 'Sika nikimu.' ningu nambi seko kuru mondongeye?" nimba Yesusini nirimu.

## 6

6:1-15

*Kere-Langi Naa Lierimu Koleana Yesusini Ye Paip Tausini Kere-Langi Sirimu Semanemo*

<sup>1</sup> Pe walte Yesusi Gallilli Nomu nona andoli sipina molopa nekendo purumu. (Aku nomumunga imbi se 'Tapirias Nomu' niringi.) <sup>2</sup> Aku nomuna nekendo purumu kinia kuru torumu yomboma sepa peanga sirimu kanokole 'Pulu Yemone mindi ulu-tonadoloma selemo mele yuni aku sipa sekemo.' ningu kanokole yombo paa awisili yu purumuna akileko lombili puringi. <sup>3</sup> Yesusi ma-pangina ola pumba lombili andolima pea pungu mania moloringi.

<sup>4</sup> Juda yombomane ,kalia-ingi senga senga kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilingindu Pulu Yemo kinia ulu se seringi walema nondopa wendo ombá serimu.

<sup>5</sup> Yesusi ma-pangina ola molopa maniando sipa kanopale yombo paa awisili yu orumu aulkana lombili oringi kanorumu. Kanopale yuni yu lombili andoli ye Pillipunu nimbale: "I yomboma nonge kere-langima sena topo topo lindamili konopu lekenoye?" nirimu. <sup>6</sup> Yuni aku sipa Pillipunu we mangilipa pilierimu. Yesusi yuni sembá mele yuyu pilipa molorumu-na-kolo 'Pillipu yuni nambolka nimbánje? 'Nane ulu-tondolo se sepole manda kere-langí simbú.' konopu lemba, molo we mini-wale mundumbanje piliambo.' nimbale yuni aku sipa Pillipunu mangilipa pilierimu.

<sup>7</sup> Pillipuni yundu nimbale: "Kakopoi-ye sene oli engaki kongono sepale méle kalólimu limú kou-monemané kere-langí topo topo limolanje yombo mare mindi kanga-kolte liku nolemolá. Mare mólo tolka naa nolemolá." nirimu.

<sup>8</sup> Lombili andoli se, Saimono Pitanga genu Enderu, yuni nimbale: <sup>9</sup> “Ya kango se rasi-ballı pellawa kaloli kanga se-pakara kinia oma kaloli talo kinia taltopa molemo. Aku-na-kolo akumu koltalo, yombo paa awisili. Manda naa sembá lémo.” nirimu.

<sup>10</sup> Yesusini “Yomboma “Mania molangi.” niengi.” nirimu. Aku koleana era awisili orumu-na mania moloringi. Ye paip tausini mele akuna mania moloringi. <sup>11</sup> Kanukinia Yesusini balli-pellawa kalolima lipa ambolopale Pulu Yemondo “Ange.” nimba yombo moloringima moke sepa ono manda nonge mele sirimu. Omatolo aku sipala moke serimu. Nongo olo senderingi.

<sup>12</sup> Kanu kere-langı noringi olo serimu kinia yuni yu lombili andolimando nimbale: “Kere-langı kakena lemóma we mania pumba lemba manda naa sembá kene liku maku taa.” nirimu. <sup>13</sup> Kanu-kinia nongo pora siringi kinia kakena lierimuma lombili andolimane liku maku toko wale-basikete engaki rurepo lakilku toko peke siringi.

<sup>14</sup> Yesusini Pulu Yemone mindi ulu-tondolo manda selka mele akumu serimu kinia kanokole yombomane pulu polko ninguli: ““Pulu Yemone ungu-umbu tondolima pilipa yando nimba simba ye se ma-koleana ombo olio nokomba.” ningu panjeringimu paa sika i yemo yu lepomo.” nirangi. <sup>15</sup> Aku ningu pilkuli onone ‘Yu olionga ye nokoli kingimu molopili.’ ningu yu tondolo munduku ambolko liku ‘ononga kingimu molopili.’ ningi seringi. Aku senge seringi pilipale yu yuyu molombando ma-pangina ola kelepa pumba molorumu.

6:16-21

### *Yesusi Nomuna Ola Kimbu Anjipa Orumu Semanemo*

<sup>16</sup> Ena pumba kolea kala torumu kinia yu lombili andolima ma-pangina maniendo pungu nomu kelona maniendo pungu <sup>17</sup> akuna nona andoli sipi senga ola pungu nomuna yakondo ongo Kapeniame taono ongo pungí puringi. Aku-kinia simbulu torumu-na-kolo Yesusi naa orumu-kulu lombili andolima onono puringi.

<sup>18</sup> „Sipimunga ola molko pungí puringi kinia, poporome tondolo torumu kinia nomo ola pumba mania ombo serimu, sipimu topa ola-munda mania-munda sepa topele-mapele torumu.

<sup>19</sup> Sipimu kundoringi nomu awi-suku-singi melena purumu kinia Yesusi nomuna ola kimbu kulupa sipimu purumuna orumu kanokole ‘Kuru se okomo.’ konopu lekole paa mini-wale awili seko mundoringi. <sup>20</sup> Aku-sipa na-kolo yuni onondo nimbale: “Na mindi okoro, pipili naa kolaa.” nirimu. <sup>21</sup> Aku nirimu-kulu pilkuli “Ye-Awilimu okomo lepomo., Sipina pea molamili.” ningu onone konopu siku yu sipimunga sukundu litingi. Sukundu orumu kinia ono pungí puringi nomu kelona sipimu waltikele purumu.

6:22-24

### *Yombomane Yesusi Andoko Kororingi Semanemo*

6:22-59

### *Yesusini Ungu-Iku Topa “Na Mulu-Koleana Gamo Molio.” Nirimu Semanemo*

<sup>22</sup> Orili-u yomboma nomu kelo nekendo ipulieli moloringima konopu kimbu sikuli niringimuni, ‘Oleanga ipulieli nomuna andoli sipi selu mindi ya liemu, Yesusi akuna sukundu naa pumu, yu lombili andolima onono akuna sukundu pungu nomu kelo nekendo púngi.’ ningu pilieringi. <sup>23</sup> Kanu-kinia oleanga Ye-Awilimuni kere-langı kanga-kolte lipa ambolopa Pulu Yemondo “Ange.” nimba yomboma sirimu noringi koleana nondopa kolea-awili Tapirias yombomanga sipi mare nomu kelona oringi. <sup>24</sup> Yesusini kere-langı sirimu noringi koleana yombomane Yesusi yu korokole niringimuni, yu kinia yu lombili andolima kinia akuna naa moloringi kanokole sipi ono moloringina nomu kelona nondoko ongo lieringimanga sukundu pungu Kapeniame taonondo Yesusi koronge puringi.

<sup>25</sup> Nomu nekendo ongo Yesusi kanoko lendekole onone yu mangilku pilku ninguli: "Rapai, nu sewale yando onuye?" niringi.

<sup>26</sup> Aku-na-kolo yu orumu mele nimba para naa sipale pundu topa onondo nimbale: "Nane onondo paa sika nimbu sikirumu: "Nane ,Pulu Yemone na lipa tapondolemo mele, lipa ora silimú ulu-tondoloma seliomonga onone na naa korokomele. Nane ono kere-langi sindu nongo olo sendengi kanumunga mindi na korokomele lémo." nikiru. <sup>27</sup> Ono kere-langi nondopa purulimuma 'Lipu nomolo.' ningu kongono naa sayo. Kanu kere-langima nongole nilimilimuni, kolonge walema wendo olemo kinia kololemelela. Kere-langi, Mania Ombo Mana-Ye Au Lierimu Yemone silimú kere-langi, kanumu naa purulimú, kanumu nolemele kinia konde molko kondoko mindi pulimili kanu kere-langimu 'Lipu namili.' ningu mindi kongono sayo. 'Ye akumuni sika kanu kere-langimu yomboma simba.' ningu piliangi.' nimba Pulu Yemone ulu-tondoloma selemo mele 'Aku yemone ulu-tondoloma aku sipa sepili.' nimba Pulu Yemo yuni yu sirimu." nirimu.

<sup>28</sup> ( 'Sika kere-langimunu nikimu.' ningu pilku yuni nirimu ungumu pilku sundukuli niringimuni,) onone yundu mangilku pilku ninguli: "Konde molopo mindi pumulú kere-langi lipu namili kene olio nambi sepole Pulu Yemone kanopa peanga pilimba kongonoma semoloye?" niringi.

<sup>29</sup> Yuni pundu topa nimbale: "Pulu Yemonga kongonomo i-sipa: 'Pulu Yemone ma-koleana lipa mundorumu yemo yu sika Pulu Yemonga malo, ,yu sika olio molopo kondopo mindi pumulú ulu-pulumu simba yemo,.' ningu kuru mondoko mola." nirimu.

<sup>30</sup> Aku nirimu pilkuli onone yundu mangilku ninguli: "Nuni ' "Na sika Pulu Yemone lipa mundorumu. Nane nikiru unguma sika unguma." niliu akumu 'Sika.' ningu kuru mondangi.' ningu Pulu Yemone mindi ulu-tondolo manda selemo uluma mele nuni aku siku nambolka ulu-tondolo se liku ora seniye? Nambi seni kinia kanopole 'Nuni sika nikinu.' nimbu kuru mondolonje?" niringi. <sup>31</sup> "Olionga anda-kolepali u moloringima kolea ku lielina kere-langi mana norangi. Kere-langi mana orumu mele Pulu Yemonga bokuna semanemo molemo:

'Yuni 'Ono mulu-koleana yando

kere-langi nangi.' nimbale sirimu.'

ungu akumu molemo. 'Nuni oliongaaku siku sendeni molo nambi seniye?,' niringi.

<sup>32</sup> Yesusini onondo nimbale: "Nane onondo paa sika nimbu sikirumu: "Moloringi yomboma mulu-koleana yando kere-langi sirimu yemo Mosisi mólo. Tatane sirimu. Molko kondoko mindi puli ulu-pulu pelemo kere-langi nikiru kanu sika kere-langimu mulu-koleana yando silimú yemo Tata mindila." nikiru. <sup>33</sup> Mulu-koleana mania ombo mana-yomboma molko kondoko mindi pungí ulu-pulumu silimúmu yu Pulu Yemone silimú kere-langimu." nirimu.

<sup>34</sup> Yesusini nirimu mele pilku sundukuli, "Ye-Awilimu, aku kere-langimu kiniá kepe pe-pe kepe si." niringi.

<sup>35</sup> Kanu-kinia Yesusini onondo nimbale: "Molko kondoko mindi pungí kere-langimu na. Umbu kere-langi nongole gele naa kolko kangi tondolo pupili molemele mele aku sipa na molombona onge yomboma ononga minimu gele naa kolomba, konopu tondolo pupili molonge. Umbu-no nongole no nonowalene naa kolko manda molemele aku mele na niliu unguma kepe molio mele kepe manda sembó mele kepe 'Sika.' ningu kuru mondonge yomboma kelko alieli minimu no nonowale naa sepili molonge. <sup>36</sup> Aku senge yombomaaku siku molonge-na-kolo "Onone na ,Pulu Yemonga ulu-tondoloma selio mele, kanokole kanoko sunduku 'We selemo. Yu Pulu Yemone naa lipa mundorumu.' ningu kuru naa mondolemele." u nimbu sirindu kanu mele kiniá kepe aku siku we seko molemele. <sup>37</sup> Tatane 'Nanga yomboma molangi.' nimba, nimba taltondoemo yomboma pali na molombona onge. Kanu-kinia na lombili

andongendo na molombona onge yomboma selurindu kepe "Lombili naa ongo anju pu." paa naa nimbúmu.

<sup>38</sup> "Na nanu konopuna pilkiru mele sambo.' nimbu na mulu-koleana mundupu kelepo mana maniendo naa orundu, mólo. Na lipa mundorumu ,ye,mone konopuni pilielemo mele sembó orundu. <sup>39</sup> Na lipa mundorumu yemone konopuni pilierimu mele i-sipa: 'Nane ,Malo, simbú yomboma pali ,Malone, nokopa kondopa, selu kepe mundupa kelepale mindili nonge koleana paa naa pumbá, ma-kolea pora nimbá walemonga ono pali topa makisindipa olando lipili.' konopu lemó. <sup>40</sup> Na lipa mundorumu Tatane konopuni pilierimu mele i-sipa: 'Nanga malo 'olio lipa tapondopa, mindili nolemolá aulkamo wendo limba.' ningu kuru mondonge yomboma molko kondoko mindi pangí.' nimba konopuni pilielemo. Kanu-kinia aku senge yomboma ma-kolea pora nimbá walemonga kinia nane topo makisindipu olando limbu." nirimu.

<sup>41</sup> Yesusini "Na mulu-koleana maniendo orundu kere-langimu." nirimu pilku kiri pilkuli Juda ye awilimane yu mumindili kolko onono pulu polko kono-kono ningu <sup>42</sup> ninguli: "Aku ungu nikimu yemo Joseponga malo Yesusi mindi. Yunga anumu lapatolo kanolemolo kanumu. Pe yu "Mulu-koleana molopo mana maniendo orundu." nikimumu nambi sepa nikimuye?" niringi.

<sup>43</sup> Yesusini nimbale: "Ono anju yando kono-kono manda nieme! <sup>44</sup> Yombo seluri kepe na we manda naa lombili onge. Na lipa mundorumu Tatane konopuna kundulimú yomboma mindi na lombili olemele. Na moliona ongo na kuru mondolemele yomboma kolea pora nimbá walemonga nane topo makisindipu olando limbu. <sup>45</sup> Pulu Yemone ungu-umbu tondorumu-yema pilku yomboma ningu siringi yemanga bokuna molemo ungu se i-sipa:

"Pulu Yemone yomboma pali ungu-mane simba."

ningu toringi bokuna aku sipa molemo. Tatane nilimú mele pilkuli kanu ungumanga puluma pilku limili yomboma pali na moliona olemele. <sup>46</sup> Tatanga ungumu pilielemelé nikiru akumu paa sika yunga ungumu pilielemelé mondo nikiru-na-kolo yu mongomane naa kanolememele. Ma-koleana yombo selurini kepe Tata naa kanoringi naa kanolememele. Yombo selumuni mindi yu kanorumu. Tata kinia molopale mania orumu ,ye,mone mindi yu kanorumu.

<sup>47</sup> "Nane onondo paa sika nimbu sikirumu: "Niliu unguma 'Sika nilimú.' ningu kuru mondolemele yomboma molko kondoko mindi pungí ulu-pulumu ono-kinia pelemo." nikiru. <sup>48</sup> Mini pali molko kondoko mindi pungí gamo na. <sup>49</sup> Ononga koro-u moloringi yombomane kolea ku lielina kere-langí mana noringi-na-kolo molko mindi naa puringi. Ononga kolonge walema wendo orumu kinia koloringila.

<sup>50</sup> "Aku-sipa na-kolo i kiniá nikiru kere-langimu mulu-koleana maniendo okomo kere-langimu. Akumu nonge yomboma mini pali naa kolonge. <sup>51</sup> Pora naa nimba we lepa mindi puli kere-langimu, akuna sukundu molko kondoko mindi puli ulu-pulumu pelemo kere-langimu, akumu mulu-koleana maniendo orumu kere-langimu na. Aku kere-langimu nanga kangimu. 'Ma-koleana yomboma, mini pali molko kondoko mindi pangí.' nimbu nane nanga kangimu ononga kere-langí simbú." nirimu.

<sup>52</sup> Yesusini aku nirimu pilku sundukuli,, yombomane angelema ninguli, "I-yemo olío yunga kangimu "Nangi." nimba nambi sepa manda simbando nikimuye?" niringi.

<sup>53</sup> Yesusini onondo nimbale: "Nane onondo paa sika nimbu sikirumu: Onone Mania Om̄ba Mana-Ye Au Lierimu Yemonga kangimu naa nongo yunga mememo naa nongi liemu molko kondoko mindi puli ulu-pulumu ono-kinia manda naa pemba. <sup>54</sup> Nanga

kangimu kinia mememo-tolo nonge yomboma alieli molko kondoko mindi pungí ulupulumu ono-kinia pelemo. Kanu yomboma ma-kolea pora nimbá walemonga nane topo makisindipu olando limbu.

<sup>55</sup> “Nanga kangimu kere-langi sikamo; nanga mememo no sikamo. Umbu ga kinia notolo nongole, kolonge wale wendo olemo kinia kololemele. Aku-sipa na-ko lo nanga kangimu kinia mememo-tolo nolemele yomboma molko kondoko mindi pungí. <sup>56</sup> Nanga kangimu kinia mememo-tolo nolemele yomboma ono na-kinia kopu seko molemele, na ono-kinia kopu sepo molio. <sup>57</sup> Molopa mindi pulimú Tatane na lipa mundorumu, yuni na ‘Molko mindi pani.’ nirimu-na molopo mindi puliu, aku siku melela na nonge yomboma ‘Molko mindi pangí.’ nimbú, kanu-kinia ono mini pali molko mindi pungí. <sup>58</sup> Aku kere-langimu mulu-koleana maniendo orumu kere-langimu. Olionga u anda-kolepali moloringimane kere-langi mana nongole ,kolonge walema wendo orumu kinia, koloringi, na-ko lo pe kiniá orumu kere-langimu kinia u orumu kere-langi manamo kinia selu-sipa mólo. Pe kiniá orumu kere-langi imu nonge kinia alieli molko kondoko mindi pungí.” nirimu.

<sup>59</sup> Juda yomboma maku toko Pulu Yemonga ungu pilieringi ulka se, Kapeniamet aonona gilierimu, akuna sukundu Yesusini yomboma ungu-mane sipa aku ungu nirimu.

*6:60-71*

### *Yomboma Molko Kondongemonga Pulumu Yesusini Nirimu Kinia Pilkuli Yu Lombili Puringi Yombo Awisili Yu Munduku Kelko Puringi Semanemo*

<sup>60</sup> Yesusini ,yunga kangimu kinia mememo-tolo kere-langi kinia no kinia nongemonga, nirimu mele pilkuli Yesusi lombili andoringi yombo awisilini ninguli: “I ungu aroma topa nikimu. Nawene manda pilipa limbaye? Olio naa pilkimulu.” niringi.

<sup>61</sup> Yu lombili andoringi yomboma yuni nirimu ungu akumu pilku kiri pilku anju yando kono-kono ningu angelema niringi Yesusini pilipale nirimunumi, yuni onondo nimbale: “I ungu ono pilku kiri pilkimiliye? <sup>62</sup> Pe kiniá Mania Ombo Mana-Ye Au Lierimu Yemo u molorumuna kelepa olando pumu kanongi liemu nambi sengeye? Kamu mumindili kolongenje?

<sup>63</sup> “Minimuni konde molko puli ulu-pulumu silimú; kangimuni konde molko pungí ungu naa selemo. Nane onondo ungu nindu akuma konde molko mindi puli ulupulumu. Akuma ononga konopumanga sukundu pemba kinia ono mini pali konde molko mindi pungí. <sup>64</sup> Aku-sipa na-ko lo ono molemele yombo marene ‘yu kolo tokomo.’ ningu kuru naa mondokomele.” nirimu. Yuni pilipa ‘Yu kolo toli yemo.’ ningu kuru naa mondonge yomboma kinia ‘Yu sika ungu nili yemo.’ ningu kuru mondonge yomboma kinia koronga apurupa pilipa, Yesusi yu yunga opa-touma lipa simba yemo koronga pilipa molorumu-kulu “Ono marene na ‘Kolo tokomo.’ ningu kuru naa mondokomele.” nirimu.

<sup>65</sup> Yuni ungu se pea nimbale: “Ono marene na ‘Kolo tolemo.’ ningu pilku kuru naa mondolemelemonga ‘Tatane “Na moliona paa.” ni naa nilimú yomboma na moliona manda naa ongo, na manda kuru naa mondoko andonge.’ u nimbu sindu kanumu.” nirimu.

<sup>66</sup> Aku ungu nirimu enamonga kepe pe enamanga kepe yu lombili andoringi yombo awisili yuni nirimu mele pilku kiri pilkuli yu munduku kelko bulu siku kelko yu lombili naa puringi.

<sup>67</sup> Yu munduku kelieringi kinia yu lombili andoli rurepondo yuni mangilipa pilipa nimbale: “Ono kepe na ‘Mundupu kelepo anju pumulú.’ konopu lekemeleye?” nirimu.

<sup>68</sup> Saimono Pitane pundu topa nimbale: "Ye-Awili mu, nawe molemona pumulúye? Molopo kondopo mindi pumulú unguma nu-kinia pelemo. <sup>69</sup> Nu Pulu Yemone nimba taltopa 'Nanga Ye Kake Sélimu' nirimu yemo moleno olione pilipu pora sipu kuru mondolemolo." nirimu.

<sup>70</sup> Yesusini pundu topa nimbale: "Nane nanu ono rurepondo pali 'Nanga yema molangi.' nimbu, nimbu taltorundu-na-kolo ononga ye se 'kuru, depelemo mele molemo.' nirimu. <sup>71</sup> (Aku nirimumu Saimono Isikeriote malo Judasini sembamondo pilipale nirimu. Judasi Isikeriote yu ono ye rurepo akupokonga ye se na-kolo yuni pe Yesusi lipa yunga opa-touma sirimu-na toringi.)

## 7

7:1,9

*Yesusi Yu Molopa Nirimu Mele Yunga Kandi Genupilini Kuru Naa Mondoringi Semanemo*

<sup>1</sup> Kanu-kinia pe Yesusi kolea Gallilli disiriki andopa molorumu. Juda ye awili kolea Judia disiriki moloringimane yu toko kondongendo nokoko moloringimunga pilipale yu kelepa 'Judia naa pumbú.' nimba anju molorumu. <sup>2</sup> Aku-sipa na-kolo Juda yombomane u kolea ku lielina serele-ulka takoko peringi walema pilieringi wale kake selima nondopa wendo ombá serimu kinia <sup>3</sup> Yesusi yunga genupilini yundu ninguli: "Nuni 'ulu-tondoloma seleno mele nu lombili andolemele yomboma kanangi.' ningu nu ya munduku kelko Judiando pani.' konopu lekemolo." niringi. <sup>4</sup> "Yombo sene 'yu kongono sepa molemo mele pilku yu kanoko imbi siengi.' nimba uluma lopi sepa naa selemo. Akumunga nu aku uluma sika seleno liemu yombomane pali kanangi pungu se-pu." niringi. <sup>5</sup> Yesusinga genupilini kepe 'Yesusi yu Pulu Yemone lipa mundorumuna orumu yemo.' ningu kuru naa mondokole aku siku niringi.

<sup>6</sup> Aku niringimunga Yesusini onondo nimbale: "Nanga walemo u wendo naa oli. Kiniá alieli ulu senge walema ononga walema. <sup>7</sup> Ma-kolea yombomane ono-kinia konopu kiri naa panjilimili-na-kolo nane yombomando "Ulu selemelema seko kinjilimili." niliumunga na-kinia konopu kiri panjilimili. <sup>8</sup> Ono wale kake sélimu wendo ombá pili-pungí liemu pangí. Aku-na-kolo nanga walemo u naa wendo okomo-na na 'iseli-u, naa pumbú.' nirimu. <sup>9</sup> Aku nimbale yu Gallilli we molorumu.

7:10,53

*U Serele-Ulkamanga Peringi Mele Pilieringi Wale Kake Sélimu Wendo Orumu Kinia Pea Pilingíndu Yesusi Jerusalleme Purumu Semanemo*

<sup>10</sup> Aku-sipa na-kolo Yesusi yunga genupili 'Wale kake selima pea piliamili.' ningu u puringi kinia Yesusi kepe purumu. Aku-sipa na-kolo Yesusi yu 'naa kanoko imbi siengi.' nimba kiyongo nimba kolea Judia disiriki pumba kolea-awili Jerusalleme purumu. <sup>11</sup> Akuna Juda yombomanga wale kake selima pilieringi Juda ye awilimane 'Yesusi omunje.' ningu koroko molko onono ninguli: "Kanu yemo sena molemonje?" niringi.

<sup>12</sup> We-yombomanga awisilini yundu olo toko ningu andoko moloringi.

Marene ninguli: "Yu ye peangamo." niringi.

Aku-na-kolo marene ninguli: "Yu yandopa yomboma kolo topa silimú." niringi.

<sup>13</sup> Aku-sipa na-kolo ono Juda ye awilima pipili kolkole 'Olio nikimulu mele ono pilkuli olio seko kinjingí.' ningu ungu tondolo seko naa niringi.

<sup>14</sup> Kake seli walema u wendo orumu suku-singina Yesusi 'Pulu Yemo popo toko kaloringi, ulka-tembelena pumba yomboma mane sirimu. <sup>15</sup> Mane sirimu mele pilkuli Juda ye awilimane mini-wale munduku ninguli: "Nambi sepa i yemo pilipa kondoli pelemoye? Yu sukuli awili senga naa purumu." niringi.

<sup>16</sup> Yesusini pundu topa nimbale: "I ungu nimbu siliumu nanga ungu se mólo. Na lipa mundorumu-na orundu yemonga ungumu. <sup>17</sup> 'Pulu Yemone "Saa." nilimú uluma pilipu lipu sambo.' konopu lepa molemo yombomone nane ungu niliu ungumunga pulumu pilipale, 'Nane Pulu Yemonga ungumu nilimú.' molo 'Yuni yuyu konopumuni pilipa nilimú.' nimba pilimba. <sup>18</sup> Yombo sene yuyu konopumuni pilipale ungu nimba silimúmuni 'Nanga imbi ola molopili.' nimba selemo, aku-na-kolo yombo sene 'Lipa mundorumu yemonga imbimu ambolopo paka tondambo.' nimba kongono selemo yombomo yu sumbi nili yombo se molopa, sepa kinjipa kolo toli yombo se naa molemo. <sup>19</sup> U Mosisini ono Pulu Yemonga ungu-manema naa sinderimuye? Sirimuna-kolo ono molemele manga selurini kepe kanu ungu-manema pilku sengena panjiku naa selemene. Aku liemu 'Na kanu ungu-manema pulua tolemo.' ningu nambi semu-na toko kondonge sekemeleye?" nirimu.

<sup>20</sup> Yuni aku sipa nirimu pilkuli yombomane pundu toko ninguli: "Nawene nu topa kondomba sekemoye? Nunga konopuna kuru se molemomonga pilkuli aku siku nikinu lepomo." niringi.

<sup>21</sup> Yesusini onondo pundu topa nimbale: "Nane ulu-tondolo se serindu kinia ono konopu awisili liku mundoringi. <sup>22</sup> Mosisini 'Kangomanga kangi se makaye seko kopisangi.' nimba ungu-mane sipa panjerimumunga ono 'koro molemele, wale Sambatemo kinia kangomanga kangi se makaye seko kopisilimili. (Sika Mosisini u-pulu-pulu 'aku ulumu samili.' ni naa nirimu. U ononga anda-kolepalimane aku ulumu seringi, na-kolo pe Mosisini kanu ungu-manemo sipa panjerimumunga pilkuli selemene.) <sup>23</sup> Onone Mosisini ungu-mane sirimumu pilku likuli kango senga kangi se kopisingí walemo ono 'koro molemele, wale Sambatemo wendo olemo kinia kopisilimili liemu manda, na Sambate walemo kinia kuru torumu ye se sepo peanga sirindumunga na-kinia nambi semu-na mumindili kololemeleye? 'Sambate walemo-kinia kango senga kangi se kopisiku wendo likuli 'Papu sekemolo.' níngi liemu Sambate walemo-kinia nane ye senga kangi pali sepo peanga sirindu akumu papula serindu.) <sup>24</sup> Onone mongone kanolemele uluma kanokole sumbi siku 'Imu sika. Imu kolo.' ningu naa piliangi. Uluma mimi siku kanoko konopuni pilkuli sumbi siku apuruku kondangi." nirimu.

7:25-31(44)

*Yesusi Yu Sika Pulu Yemone 'Lipu Mundumbu.' Nirimu Ye Nokoli Karasimunje?"  
Niringi Semanemo*

<sup>25</sup> Yu aku sipa nimba molopili Jerusalleme moloringi yombo marene ono onono mangilku pilku ninguli: "I yemo 'Topo kondamili.' ningu molemele yemo naa molemoye? <sup>26</sup> Aku-na-kolo kaname. Yombo awisili molemelena yu mona om̄ba gilipa ungu-mane sikimu-na-kolo ye awilimane yu ungu se naa sekemele. Onone 'Yu sika Pulu Yemone 'Olio nokopa kondomba ye se lipu mundumbu.' nimba, nimba taltorumu ye nokoli Karasimu.' ningu pilkimilinje? <sup>27</sup> Aku-na-kolo olione i yemonga pulu koleamo kanolemolo. Pulu Yemone lipa mundumba ye nokoli Karasimu ombá kinia yombo sene yu molopa ombá koleamo naa kanopa imbi simba." niringi.

<sup>28-29</sup> Kanu-kinia Yesusi, u ulka-tembelena ungu-mane sipa molorumu mele we sipa molopale, ru nimba nimbale: "Sika onone na kanoko imbi siku, na molopo ondu koleamo kanolemeleye? Na nanu konopumuni pilipuli naa orundu. Na lipa mundorumu-na orundu yemo yu-kinia sika ulu-pulumu pelemo yemo. Kanu yemo ono naa pilielemele-na-kolo na yu pea molopole, yuni na lipa mundorumu-na orundu akumunga nane yu kanopo imbi siliu." nirimu.

<sup>30</sup> Aku nirimu-kulu pilkuli yu ambolko liku ka singí seringi-na-kolo yu toko kondonge walemo u wendo naa orumu-kulu yombo sene yu naa ambolorumu. <sup>31</sup> Yombo awisilini aku senge seringi-na-kolo yombo awisilini ninguli: "Pulu Yemone

'Lipu mundumbu.' nimba, nimba taltorumu ye nokoli Karasimu ombale nimbámone, i yemone yu molemo mele lipa ora silimú ulu-tondoloma selemo mele kanu yemone ulu-tondolo olandopama manda sembaye? 'Ye nokoli Karasimuni sembá.' nimbu pilielemolo uluma i yemone selemo." ninguli 'Yu sika kanu yemo.' ningu kuru mondoringi.

**7:32-36,45-52**

### *Juda Ye Awilimane Ele-Ye Mare "Yesusi Pungu Ka Si-Paa!" Ningu Liku Mundoringi Semanemo*

<sup>32</sup> Yombomane aku sipa Yesusi molorumu mele aku siku anju yando olo toko angelema niringi mele Juda ye awili Parisimane pilkuli niringimuni, ono kinia Pulu Yemo popo tondoringi ye awilima kinia onone ulka-tembele ele-ye mare "Yesusi pungu ka si-paa!" ningu liku mundoringi.

<sup>33</sup> Kanu-kinia Yesusini nimbale: "Laye-kolo mindi ono-kinia molopole, pe na lipa mundorumu yemo molemona kelepo pumbú. <sup>34</sup> Pe onone na koronge-na-kolo naa kanoko, molombona manda naa onge." nirimu.

<sup>35</sup> Juda ye awilimane onono anju yando angelema ninguli: "Yu sena pumbána olio manda yu naa pumbu kanomoloye? Aku liemu olionga Juda yombo mare u kolea lupamanga puringi molemele koleamanga pumba yombo talape lupama ungu-mane sipa molomba-na naa kanomolonje? <sup>36</sup> Yuni u nimbale: "Na koronge-na-kolo onone na naa kanonge. Na molombona ono manda naa onge." nimu kanumu ungu-pulumu nambolkanje?" nirungi.

**7:37-39**

### *Konde Molopa Mindi Puli Ulu-Pulumu Pelemo Nomonga Ungu Se*

<sup>37</sup> Pe, yomboma Jerusalleme ongo maku toko kake seli walemanga uluma seringi walema pora nimbándo wale awilimu wendo orumu kinia Yesusi ola gilipa tondolo mundupa nimbale: "Yombo se no nonowalene kolomu liemu na moliona ombo no nopili. <sup>38</sup> Na molio niliu mele "Sika." ningu kuru mondonge yomboma ononga konopumangaconde molopa mindi puli noma pilkipa wendo ombá. Pulu Yemonga bokuna ungu se aku sipa nimba molemo." nirimu. <sup>39</sup> Yuni ungu nirimumunga pulumu i-sipa: "Yu Pulu Yemone sika lipa mundorumu, olio lipa tapondomba yemo molemo." ningu kuru mondonge yomboma pe walte Pulu Yemonga Minimu ononga konopumanga ombo molomba lingimundu nirimu. Yesusi u kolopa lomboropa ola molopa mulu-koleana kelepa olando naa purumu-kulu Mini 'Kake Séli, mu u naa orumu.

**7:40-44**

### *Yomboma Yesusi Molorumu Mele Angelema Ningu Moloringi Semanemo*

<sup>40</sup> Yombomane Yesusini ungu nirimuma pilkuli, marene ninguli: "I yemo Mosisini 'Pulu Yemonga ungu-umbu tondombama pilipa yomboma nimba simba ye se ombá.' nirimu yemo i yemo lémo." nirungi.

<sup>41-42</sup> Marene ninguli: "Yu Pulu Yemone 'olio nokopa kondomba ye se lipu mundumbu.' nimba, nimba taltorumu ye nokoli Karasimu." nirungi.

Marene ninguli: "Pulu Yemone lipa mundumba ye nokoli Karasimu kolea Gallilli disiriki molopale ombáye? Yu Gallilli naa menge. Pulu Yemonga bokumuni nimbale: 'Pulu Yemone lipa mundumba ye nokoli Karasimu ye nokoli kingi Depitini kalopa limba. Depiti yu meringi Betellieme taono akuna ye nokoli Karasimu menge.' nilimú kanumunga yu Gallilli disiriki manda naa menge lémo." nirungi.

<sup>43</sup> Aku siku yomboma Yesusi molorumu mele angelema ningu konopu lupa lupa lieringi. <sup>44</sup> Yombo marene 'Yesusi ka siemili.' konopu leko moloringi-na-kolo sene yu pumba ambolopa naa liltimu.

**7:45-52**

*Juda Ye Awilimane 'Yesusi We-Yere.' Konopu Lieringi Semanemo (7:32, 36pea)*

<sup>45</sup> Ulka-tembele ele-yema Yesusi kinia yomboma kinia ningu moloringi mele pilku molkole, pe we kelko yando ongo Pulu Yemo popo tondoringi ye awilima kinia Parisi yema kinia moloringina puringi. Yesusi ka siku naa mengo oringi-kulu kanokole onone ele-yemando ninguli: "Yemo nambi semu-na ,ka siku, naa mengo ongiye?" niringi.

<sup>46</sup> Ele-yemane ninguli: "Mólo. Ye sene u ungu-mane silimili mele yuni aku sipa naa simu. Yuni ungu-mane paa olandopa simu." niringi.

<sup>47</sup> Parisimane pilku kiri pilku ninguli: "Yuni kolo topa ungu nimuma 'Sika nimu.' konopu leko ono we kelko yando ongiye? <sup>48</sup> Olionga ye awilima kinia Parisi yema kinia olionga ye sene "Yu molemo nilimú mele sika akumu molemo." nimba kuru mondomye? „Mólo, sene aku sipa naa nimba kuru mondomye kanumu.„ <sup>49</sup> Aku-sipa na-kolo we-yombo maku toko molongima Mosisini ungu-mane sirimu pelemoma paa naa pilielemene. Pulu Yemone ononga kotemo koronga pilipa, kolonge kinia 'Mindili nangi.' nimba panjerimu." niringi.

<sup>50</sup> Nikodimasi, yu u walte Yesusi molorumuna purumu ye kanumu, Parisi ye kanumanga se yu, yuni ono mangilipa nimbole: <sup>51</sup> "Olionga ungu-manemane 'Yombo se kote naa pilkuli we "Mongo likimu kene umbuna mepili." niee.' nilimúye? Yu u kotena ombale nilimú mele pilipuli pe ungu nilimúmanga puluma apurupu pilielemolo." nirimu.

<sup>52</sup> Parisi yemane yundu pundu toko ninguli: "Aku nu kepe kolea Gallilli ye seye? Pulu Yemonga bokuna sukundu mimi siku kanani. Mimi siku kanokole, 'Pulu Yemone ungu-umbu tondolima pilipa yando nimba simba ye se Gallilli wendo ombá.' nimba pelemo kanoniyeye?" niringi.

7:53—8:11

*Ambo Ye Puli Se Kinia Ye Se Kinia Wa Ulu-Kirinale Seringili Kinia Yesusini Ungu Se Serimu Semanemo*

<sup>53</sup> Yomboma pali ulkando bulu-balu ningu puringi,

## 8

<sup>1</sup> aku-na-kolo Yesusi ma-pangi se 'Ma-Pangi Unju-Ollipi Kalia' nili akuna olando purumu.

<sup>2</sup> Kanu-kinia kolea tangorumu kinia orili-u yu kelepa ,Pulu Yemo popo toko kaloringi, ulka-tembelena purumu kinia yomboma yu molorumuna ongo maku toko moloringi kinia ono ungu-mane simbando yu mania molorumu.

<sup>3</sup> Kanu-kinia Pulu Yemonga ungu-manemanga puluma pilku mane siringi yema kinia Parisi yema kinia onone ambo ye puli se ye se kinia wa ulu-kirinale seringilimu liku mengo ongo yomboma moloringi kumbi-kerena ongo anjikuli, <sup>4</sup> Yesusindu ninguli: "Ungu Mane Sili Yemo, i ambo ye púlimu ye se kinia wa ulu-kirinale seko molongili yombomane kanongi-na membo okomolo. <sup>5</sup> Mosisini ungu-mane se sipa panjipa nimbole: "Ambo aku sembambo kouni toko kondaa." nirimu kene nuni nambolka niniye?" niringi. <sup>6</sup> Aku-sipa na-kolo onone sika pilingindu naa niringi. 'Yuni nambolka nimbánje? Nimba kinjimba kinia kote sendemolo.' ningu aku siku mangilieringi.

Aku-sipa na-kolo Yesusi ma kanopa kimuni mana ,we, imbi topa molorumu.

<sup>7</sup> Kanu-kinia yu alieli mangili-pu-pu seringi-kulu olando sipa kanopa onondo nimbole: "Ononga ye se ulu-pulu-kiri se naa pelemo ye sene i ambomo kumbi lepa kouni topili." nirimu. <sup>8</sup> Aku nimbole yu kelepa ma kanopa mana we imbi topa molorumu.

<sup>9</sup> Aku nirimu-kulu pilkuli ye awilima ono se talo ningu pena-pena pungu Yesusi munduku kelko ono puringi. Ye awilimanga ye nokolima u kumbi leko puringi

kanu-kinia we ye awilima akileko puringi kinia ye awili se Yesusi-kinia naa molopa Yesusi yuyu molopa, ambomo Yesusi yu molorumuna we gilierimu. <sup>10</sup> Kanu-kinia Yesusi olando sipa kanopale ambomo mangilipa nimbale: "Ambomo, yema sena molemeleye? Ye sene nu 'Seko kinjenumunga kote sendambo.' naa nimuye?" nirimu.

<sup>11</sup> Ambomone nimbale: "Ye-Awili, ye sene na kote naa sendemba sekemo." nirimu.

Yesusini nimbale: "Nane kepe 'Nuni seko kinjenumunga mindili nani.' naa nikiru kene nu punguli ulu-pulu-kiri seleno mele munduku kelko, kelko naa sei!" nirimu.

8:12-20

*(I semanemonga imbi talo mele) Se: Yesusi Molorumu Mele Yuni Yuyu Witinese Molopa Yomboma Nimba Sirimu Semane Se Se: Yesusi Mana-Yombomanga Pa Sendélimunga Ungu Se*

<sup>12</sup> Yombo moloringimando Yesusini kelepa nimbale: "Na ma-koleamanga pali yombomanga pa sendélimu. Na andopo molombona lombili andoko molonge yomboma simbulu tolina naa andoko molonge. Konde mololi ulu-pulumu silimú pa sélimu kinia molonge." nirimu.

<sup>13</sup> Aku nirimu-kulu ye awili Parisimane pilkuli yu ta ningu ninguli: "Nu moleno mele nunu ningu silinu kene nuni ungu nikinuma pilipuli 'Sika nikimu.' nimbu pilielemolánje manda naa selka." niringi.

<sup>14</sup> Yesusini pundu topa nimbale: "Na u molopo orundu koleamo kinia kelepo pumbú sekero koleamo kinia pilipu moliomonga na molio mele sika nanu niliu-na-kolo nane i ungu nikirumu sika ungumu. Aku-sipa na-kolo na molopo orundu koleamo kepe pe pumbú sekero koleamo kepe ono naa pilkimili. <sup>15</sup> Mana-yombomane pilku apuruku selememe mele ono Parisi yemane aku siku pilkuli apurulimili, aku-na-kolo nane yombo se naa apuruliu. <sup>16</sup> Aku-sipa na-kolo nane sika pilipu apurulka-nje na nanu manjipu naa apurulkamonga sumbi sipu apurulka. Na lipa mundorumu ye Tata kinia pea kopu sepo molembolo-monga sumbi sipu pilipu apurulka. <sup>17</sup> Ononga ungu-mane se bokuna molemo kanumu i-sipa: 'Yombo talone ungu se ningu síngili liemu 'Aku ungumu sika.' niengi.' aku sipa nimba pelemo. <sup>18</sup> Akumunga na molio mele nanu nimbu siliu kepe; na lipa mundorumu ye Tatane na molio mele nimba silimúla." nirimu.

<sup>19</sup> Kanu-kinia onone mangilku ninguli: "Lanie sena molemoye?" niringi.

Yesusini pundu topa nimbale: "Onone na kepe nanga Lapamo kepe naa kanoko imbi silimili. Onone na kanoko imbi silimolánje Tata kepe kanoko imbi silimolá-la." nirimu. <sup>20</sup> Yesusi ulka-tembelena sukundu, Pulu Yemonga ningu yombomane kou-mone siringi unju-okoloma lierimu koleana molopa yomboma ungu-mane sipa molopale i unguma nirimu. Aku-sipa na-kolo yunga walemo wendo naa orumu-kulu yombo sene yu ambolko liku ka naa siringi.

8:21-30

*Yesusini Ye Awilimando "Na Pumbú Koleana Ono Manda Naa Pungí." Nirimu Semanemo*

<sup>21</sup> Yesusini kelepa Juda ye awilimando nimbale: "Na kiniá pumbú sekero, kanu-kinia onone na koroko kelkole ononga ulu-pulu-kirima konopumanga pepili kolonge. Na pumbú koleana ono manda naa onge." nirimu.

<sup>22</sup> Aku nirimu-kulu pilkuli Juda ye awilimane onono angelema ningu mangilku ninguli: "Aku nambi semu-na 'Na pumbú koleana ono manda naa onge.' nikimuye? Aku liemu yu yuyu topa kondomanje?" niringi.

<sup>23</sup> Yesusini kelepa nimbale: "Ono mania yomboma, na ola yemo. Ono ma-kolea pulu yomboma, na ma-kolea pulu ye se mólo. <sup>24</sup> Nane onondo u nimbili: "Ulu-pulu-kirima konopumanga we pepili kolonge." nindu kanumu. Akumu "Na kiniá molio,

u-pulu-pulu molorundu, pe molopo mindi pumbú yemo.” nimbu siliu mele onone ‘Sika akumu molemo.’ ningu kuru naa mondongi liemu pe ono kolonge kinia sika ononga ulu-pulu-kirima konopumanga we pepili kolonge.” nirimu.

<sup>25</sup> Parisi yemane yu mangilku ninguli: “Nu nawe?” niringi.

Yesusini pundu topa nimbale: “Na molio mele ono alieli nimbu siliu kanumu na mindi. <sup>26</sup> Nane ono molko ulu selemele mele pilipu apurupuli onone seko kinjilimili mele ungu awisili nimbu silka-na-kolo nanu konopumuni pilipuli unguma naa niliu. Na lipa mundorumu yemo, yu ulu sikama mindi sepa ungu sikama mindi nilimú ye, kanumuni nilimú mele mindi pilipuli mana-yomboma nimbu siliu.” nirimu.

<sup>27</sup> Yuni Lapando nirimu-na-kolo ono yuni nirimu mele pulumu naa pilieringi-kulu <sup>28</sup> Yesusini onondo nimbale: “Pe onone Mania Ombo Mana-Ye Au Lierimu Yemo ola uku toko panjikuli ningimuni onone pilkuli “Na kiniá molio, u-pulu-pulu molorundu, pe molopo mindi pumbú yemo.” nimbu siliu mele onone ‘Sika akumu molemo.’ ningu pilkuli kepe, “Na nanu konopumuni pilipuli naa selio. Tatane na mane silimú mele mindi pilipuli niliu.” alieli nimbu siliu ‘Akumu sika lémo.’ ningu pilingi.

<sup>29</sup> Na lipa mundorumu-na orundu yemo na kinia pea kopu sepo molembolo; alieli yu kanopa peanga pilielemo uluma mindi seliomonga yuni waltikele kepe na mundupa naa kelielemo.” nirimu. <sup>30</sup> Yuni aku sipa nimba molopili kepe yombo awisili ‘Yesusi yu Pulu Yemone sika lipa mundorumu.’ ningu kuru mondoringi.

8:31-36

*Ungu Sikamone Olio Ka Silimú Mélema Wendo Lindipa ‘We Molko Kondangi.’  
Nimbá Semanemo*

8:31-47

### *Eporayamone Kalopa Liltimu Yombomando Yesusini Nirimu Semanemo*

<sup>31</sup> ‘Yu sika.’ ningu kuru mondoringi Juda yombomando Yesusini nimbale: “Nane ungu-mane siliuma sika pilku liku sengena panjiku molongi liemu ono sika nanga lombili andolima molonge. <sup>32</sup> Aku sekole, onone sika ungumu pilingí kanu-kinia ono ka silimú mélema sika ungumuni wendo lindipa ‘ono we molko kondangi.’ nimbá.” nirimu.

<sup>33</sup> Onone pundu toko yundu ninguli: “Olio Eporayamone kalopa liltimu yomboma molopo, yombo senga ka-kongono se naa sendepo molorumulu. Aku liemu nuni ‘Ka silimú mélema wendo pumbá olio molko kondonge.’ nikinu kanumu nambi seko pilkuli nikinuye?” niringi.

<sup>34</sup> Yesusini pundu topa nimbale: “Nane ono paa sika nimbu sikirumu: “Yombo ulu-pulu-kiri selemelema ulu-pulu-kirimane ka silimú kinia aku ulu-pulu-kirimanga ka-kongono selemele. <sup>35</sup> Ka-kongono selemo kendemande-yombomo ulka pulu yomboma kinia pea kamu naa molemo,aku-na-kolo bolango se yunga ulka pulu yomboma kinia alieli seluna kopu seko molemele. <sup>36</sup> Akumunga „Ulka Pulu Yemonga, Malone ‘Ono ka silimú mélema mundupa keliepili, ono we molko kondangi.’ nimu liemu mélse sika ka naa simba, we paa sika molko kondonge.” nikiru.

<sup>37</sup> “‘Ono Eporayamone kalopa liltimu yomboma molemele.’ na pilipu molio-na-kolo ononga konopumanga nanga ungumu naa pelemomonga na toko kondonge sekemele.

<sup>38</sup> Nane Tata-kinia molopole kanorundu mele ono nimbu siliu. Onone ononga laniene nilimú mele pilkuli selemele.” nirimu.

8:39-47

### *Yesusini “Ononga Lanie Setene.” Nirimu Semanemo (8:31,38 pea)*

<sup>39</sup> Yesusini yombomando “Ono lanienga ungumu pilkuli selemele.” nirimu kinia pilkuli Juda yombomane pundu toko ninguli: “Olionga lapa kalopa liltimu yemo Eporayamo.” niringi.

Jesusini nimbale: "Mólo. Ono sika Eporayamone kalopa liltimu yomboma molemolánje Eporayamone serimu mele ono aku siku selemolá.<sup>40</sup> Aku-sipa na-kolo aku naa selemene. Pulu Yemone na nimba sirimu unguma na pilierindu ungu sikama ono nimbu siliu yemo toko kondonge sekemele. Eporayamone aku sipa naa serimu.<sup>41</sup> Ono ononga laniene selemo mele manda manjiku selemene." nirimu.

Onone tondolo ta ningu ninguli: "Olionga anumu ye se lupa kinia wapora topale olio naa merimu. Olionga lapa kanumu Pulu Yemo selu mindi." niringi.

8:42-47

*"Setenene Kalopa Liltimu Yomboma Molemele." Nimba Jesusini Nirimu Semanemo (8:31,41 pea)*

<sup>42</sup> Yesusini onondo nimbale: "Na Pulu Yemo kinia molopole orundu ya moliomonga Pulu Yemo yu sika ononga Lapa lelkanje onone na konopu mondolemolá. Na nanu konopumuni pilipuli naa orundu. Yuni na lipa mundorumu-na orundu.<sup>43</sup> Nane ungu niliumanga pulumu nambi semu-na sumbi siku naa pilielemeye? 'Ungu-pulumu naa pilimulú.' ningu, pilku naa limili akumunga nanga ungumu ono naa pilielemeye.<sup>44</sup> Ono 'kurumanga nokoli' depelemonga bolangoma, Setene ononga lapamo. Laniene kanopa peanga pilielemo mele 'samili.' ninguli yuni "Ono saa." nilimú mele 'Paa samili.' nilimili. U-pulu-pulu mulu matolo kokele wendo orumu kinia yu yombo topa kondoli yemo molorumu meleaku sílimu yandopa kiniá we molemo. Yu sika ungu-pulu se naa perimu-na sika ungu se waltikele kepe paa naa nirimu. Yu kolo tolemo yemo; yu sika kolo toli ungumunga pulu yemo molemomonga u yu kolo torumu mele yandopa kiniá kepe pe kepe kolo mindi tolemo tomba.<sup>45</sup> Aku-sipa na-kolo nane ungu sikama nimbu siliumunga ono naa pilku 'Kolo tolemo.' ningu kuru naa mondolemeye.

8:46-59

*Yesusi Kinia Isirele Ye Awili Mare Kinia Angelema Niringi Semanemo (8:31,45 pea)*

<sup>46</sup> "Nawene nanga konopuna ulu-pulu-kiri selu kepe pelemo manda lipa ora simbaye? Se naa pelemo-na-kolo nane ungu sikamo nindu liemu 'Sika nikimu.' ningu ono nambi semu-na kuru naa mondolemeye?<sup>47</sup> Pulu Yemonga bolangomane Pulu Yemone nilimú ungumu pilku limili. Ono Pulu Yemonga bolangoma naa moltkole yunga ungumu nane nimbu siliuma "Naa pilimulú." ningu naa pilku limili." nirimu.

8:48-59

*Yesusini "Eporayamo U Naa Molopili Na Molorundu." Nirimu Semanemo*

<sup>48</sup> Juda ye awilimane yundu pundu toko ninguli: "Nu Sameria ye se moleno, nunga konopuna kuru se molemo." nilimulu kanumu sika nilimulu." niringi. „Juda yombomane Sameria yomboma kinia konopu kiri panjeringi kanumunga yu iri toko ungu-taka tondoko "Yu ye kiri se." ningíndu "Nu Sameria ye se." niringi.„

<sup>49</sup> Niringi mele pilipale Yesusini pundu topa onondo nimbale: "Nanga konopuna kuru se naa molemo. Nane Tatanga imbimu ambolopo paka tondolio, aku-na-kolo onone nanga imbimu seko kinjindilimili.<sup>50</sup> Nanu 'Imbi ola molopili.' naa niliu, na-kolo ye se molemo akumuni 'Na imbi ola molopili.' nimba nanga imbi ambolopa paka tondolemo. Kanu yemone nane niliu mele kepe onone nilimili mele kepe mimi sipa pilipa apurupa sene 'Sika nikimu.' nimba pilipa molemo.<sup>51</sup> Nane onondo paa sika nimbu sikirumu: "Yombo se nanga ungumu pilipa lipa sepa molomba yombomo paa kamu naa kolopa, molopa mindi pumbá." nikiru." nirimu.

<sup>52</sup> Juda ye awilimane yundu ninguli: "Kiniá olio pilkimulu, kuru se paa sika nunga konopuna molemo lémo. Anda-kolepa Eporayamo kolorumu; Pulu Yemone ungu-umbu tondorumuma pilku yomboma ningu siringi yema koloringila. Aku-na-kolo nuni ninguli: "Nanga ungumu pilipa lipa molomba yombomo kamu naa kolomba." nikinu.<sup>53</sup> Eporayamonga imbimu mania mele molopa nunga imbimu ola molemoye?

Yunga imbimu paa ola, na-kolo yu kepe kolorumula. Pulu Yemone ungu-umbu tondorumuma pilku yomboma ningu siringi yomboma kepe imbi ola molorumu-na-kolo koloringila. Nunga imbimu ola ononga imbima maniaye? Paa mólo! Nu koropamo." niringi.

<sup>54</sup> Yesusini pundu topa nimbale: "Nane nanga imbimu nanu ambolopo paka tolkanje na imbi paa sika ola naa molka, na we mindi nilka. Aku-sipa na-kolo akumu mólo. Tata, yundu onone "Olionga Pulu Yemo." nilimili kanumuni nanga imbi ambolopa paka tondolemo. <sup>55</sup> Onone yu naa kanoko naa pillemele-na-kolo nane yu kanopo pilielio. Nane "Yu naa kanopo naa pilielio." nilkanje ono kolo toli yema molemele mele na aku sipu molka. Aku-sipa na-kolo nane yu paa sika kanopo pilipu, yunga ungumu pilipu lipu sepo molio. <sup>56</sup> Ononga anda-kolepa Eporayamone 'Na mana mania ombá walemo kanombo.' nimba pilipale konopu sipa molorumu. Kanu walemo kamu kanopale konopu sirimu." nirimu.

<sup>57</sup> Kanu-kinia Juda ye awilimane yundu ninguli: "Nunga kalia-ingi towapu talo u naa pora nili. Nu kango yemo mindi. Pe nu "Eporayamo kanoruntu." nikinuye? Nuni yu manda naa kanorunu. Kolo tokono." niringi.

<sup>58</sup> Yesusini onondo nimbale: "Nane onondo paa sika nimbu sikirumu: "Eporayamo sika paa koronga-u molopa kolorumu-na-kolo yu u naa molopili na moloruntu." nikiru." nirimu.

<sup>59</sup> Aku nirimu-kulu pilkuli „Pulu Yemo marake sepa 'Pulu Yemo molio.' nimba nirimu-kulu pilkuli, onone "Yu topo kondamili." ningu kou liku yu toko kondonge seringi. Aku-na-kolo Yesusi lopi sepale, ulka-tembelena kiyongo nimba ombo ultu purumu.

## 9

### Kolomongo-Awili 9

*Yesusini Mongo Kiri Lierimu Ye Se Sepa Peanga Sirimu Kinia Pe Parisi Yema-Kinia  
Ungu Se Wendo Orumu Semanetolo  
9:1-12*

### *Yesusini Mongo Kiri Lierimu Ye Se Sepa Peanga Sirimu Semanemo*

<sup>1</sup> Yesusi aulkana pumbá purumu kinia mongo kiri lierimu ye se molorumu kanorumu. Anumuni olona sukundu mongo kiri lielimu merimu. <sup>2</sup> Pe yu lombili andoli yemane yu mangilku ninguli: "Rapai, nawene ulu-pulu-kiri serimumunga i yemonga anumuni yu olona sukundu mongo kiri lielimu merimuye? Yemo yuyu serimu molo anumu lapatolone seringiliye?" niringi.

<sup>3</sup> Yesusini nimbale: "Yemo yuni kepe anumu lapatolone kepe ulu-pulu-kiri se seringimunga yu mongo kiri naa lierimu. 'Pulu Yemonga ulu-tondolo se i yemo-kinia mona wendo opili yomboma pali kanangi.' nimba i yemo mongo kiri lierimu. <sup>4</sup> I walemo pora naa nimba ena u naa pupili na lipa mundorumu yemonga kongonomo paa semolo. Ipu lemba kinia yombo sene manda kongono naa sembá. <sup>5</sup> Na i ma-koleana molopole, na ma-koleana yombomanga pa sendélimu molio." nirimu.

<sup>6</sup> Aku nimbale yu mana elcambe topa mamo kinia ambolopa topele-mapele topale yemonga mongotolonga kandopa nimbale: <sup>7</sup> "Nu nomu Silloamo pungu kumbikerena no le-pu." nirimu. (Silloamonga ungu-pulumu 'lipa mundoli' .) Yu akuna pumba kumbikerena no lierimu kinia mongotolo peanga lierimu, mélema kanolepa ulkando purumu.

<sup>8</sup> Kanu-kinia yunga kolea yomboma kinia "Yu kou-mone siee." nimba u aulkana mawa sepa molorumu kanoringi yomboma kinia yu aku sipa orumu kanokole onone onono anju yando angelema ningu mangilku ninguli: "I-yemo u "Kou-mone siee." nimba mawa sepa molorumu kanu yemonje?" niringi.

<sup>9</sup> Marene ninguli: "Sika, yu aku yemo mindi." niringi.

Marene ninguli: "Mólo. Olo kumbi-kere selu-sipa na-kolo i yemo lupa." niringi.

Aku-sipa na-kolo yemo yuyu tondolo mundupa nimbale: "Ye kanumu na mindi." nirimu.

<sup>10</sup> Onone pundu toko ninguli: "Nunga mongotolo nambi senu kinia peanga liemuye?" niringi kinia

<sup>11</sup> yuni pundu topa nimbale: "Ye se 'Yesusi' nilimili kanumuni olí lipa mongotolonga ape kandopa nimbale: "Silloamo nomu pungu kumbi-kerena no le-pu." nimu kinia pumbu kumbi-kerena no le-pundu kinia nanga mongotolo peanga liemu-na kolea kanondu." nirimu.

<sup>12</sup> "Aku yemo sena molemoye?" niringi kinia

"Na naa kanondu." nirimu.

*9:13-34*

*Parisi Yemane Mongo Kiri Lierimu Yemo Nambi Sepa Peanga Liemunje Piliamili.' Nirangi Semanemo (Kolomongo-Awili 9 pali semane selumu)*

<sup>13</sup> Ye u mongo kiri lierimumu yombomane Parisi yema moloringina mengo puringi.

<sup>14</sup> Kanu-kinia, Yesusini le-olí lipa yemonga mongotolonga ape kandopale yemonga mongotolo 'kelepa peanga liepili.' nirimu kanu walemo 'koro moloringi' wale Sambate kinia serimu, <sup>15</sup> akumunga Parisi yemane kepe yu mangilku ninguli: "Nunga mongotolo nambi sepa peanga liemuye?" niringi.

Yemone pundu topa nimbale: "Nanga mongotolonga olí ape kandomu kinia na kumbi-kerena no liendu, kiniá na mongotolone kanokoro." nirimu.

<sup>16</sup> Parisi ye marene ninguli: "I yemo Sambate walemo naa pilipa we andolemo, aku sipa ulu-pulu-kiri selemomonga Pulu Yemone yu naa lipa mundorumu lémo." niringi.

Aku-sipa na-kolo marene ninguli: "Pulu Yemone lipa tapondomba kinia mindi yombo sene i ulu-tonadoloma mele manda sembá aku sipa mele ye ulu-pulu-kiri selemo sene manda selkaye?" niringi.

Akumunga ono anju yando angelema ningu konopu seluna pupili naa moloringi.

<sup>17</sup> Akumunga mongo u kiri lierimu yemo kelko mangilku ninguli: "Kanu yemone nunga mongotolo sepa peanga sendemu akumunga yundu nu nambolka konopu lekenoye?" niringi.

Yemone pundu topa nimbale: "Yu Pulu Yemone ungu-umbu tondolemoma pilipa yomboma nimba silimú ye se." nirimu.

<sup>18</sup> Aku-sipa na-kolo Juda ye awilimane ninguli: "'I yemo u yunga mongotolo paa sika kiri lierimu, pe kiniá peanga liemu.' nimbu 'sika lémo.' nimbu we kuru naa mondromolo. Yu olione kanopo imbi naa silimulu kene anumu lapatolo mangilipu piliamili wale." niringi. <sup>19</sup> Kanu-kinia anumu lapatolo oringili kinia mangilku ninguli: "I yemo olonga marenaye? "Anumuni merimu kinia mongotolo kiri lierimu." nilimbilí kanu yemo imuye? Aku liemu kiniá nambi sepa mongotolone kanolemoye?" niringi.

<sup>20</sup> Anumu lapatolone pundu toko ninguli: "Yu sika oltonga malo, anumuni merimu kinia yunga mongotolo kiri lielimu merimu yemo olto kanokombolo. <sup>21</sup> Aku-na-kolo kiniá yunga mongotolo peanga liemumu nambi sepa semunje olto naa kanombulu. Yu nawene mongotolo sepa peanga sendemunje akumu olto naala kanombulu. Yu ye yumu molemo kene yu semu mele yuyu nimba sipili yu mangilku piliaa." niringili.

<sup>22</sup> Anumu lapatolo Juda ye awilima pipili kolikole aku siku niringili. Juda ye awilimane u ningu panjiku ninguli: "Yombo sene 'Yesusi yu sika Pulu Yemone lipa mundorumu ye nokoli Karasimu.' nimu liemu aku yombomo ulkana maku topo Pulu Yemonga ungumu pililemolo ulkamanga naa opili kamu makoromolo." niringimunga aku

siku niringili. <sup>23</sup> U ye awilimane aku siku ningu panjeringimu anumu lapatolo pilkuli “Yu ye yumu kene yuyu nipili mangilku piliaa.” niringili.

<sup>24</sup> Juda ye awilimane kelko talo siku u mongo kiri lierimu yemo “U.” ningu yundu ninguli: “Nuni ‘Pulu Yemo pilipa molemo.’ ningu kolo naa toko, nu semu mele sumbi siku olio piliamili ningu si! ,Olio Pulu Yemonga ungumu mimi sipu pilielemolo yemane pilkimulu,, ‘Nunga mongotolo sepa peanga sendemu.’ nikinu yemo yu ulu-pulu-kiri seli yemo.’ nimbu pilkimulu.” niringi.

<sup>25</sup> Yuni onondo pundu topa nimbale: “Nanga mongotolo sepa peanga sendemu yemo ulu-pulu-kiri seli yemo molo mólonje, na naa pilkiru. Aku-na-kolo ulu se na paa sika pilkiru. U nanga mongotolo paa sika kiri lierimu-na-kolo kiniá nanga mongotolo peanga liemu-na kolea kanokoro, akumu na paa pilkiru.” nirimu.

<sup>26</sup> Kanu-kinia onone yu mangilku pilku ninguli: “Yuni nu nambi semuye? Nambolka unguri semu kinia nunga mongotolo peanga liemuye?” niringi.

<sup>27</sup> Yuni pundu topa nimbale: “Nane ono u nimbu sindu-na-kolo naa pilingindu ungu nindumu pilku mokoli engi kanumu. Pe kiniá nambolkare pilingindu kelko ‘ni!’ nikimiliye? Ono kepe yu lombili pungíndu mangilkimilinje?” nirimu.

<sup>28</sup> Kanu-kinia onone yu-kinia mumindili kolkole iri toko ninguli: “Nu aku ye kirimunga lombili andoli yemo na-kolo olio Mosisinga lombili andoli yema. <sup>29</sup> ‘Pulu Yemone sika Mosisi-kinia ungu nirimu.’ nimbu pilipuli , ‘Mosisi Pulu Yemonga ye awilimu.’ nimbu pilipu molemolo,-na-kolo i ye kirimu yu serenga molopa orumunje, olio naa pilkimulu.” niringi.

<sup>30</sup> Yemone pundu topa nimbale: “I yemone nanga mongotolo sepa peanga sendemu-na-kolo yu sena molopa orumunje ono Pulu Yemonga ungumu mimi siku pilielemele yemane naa pilielemele akumu paa ulu se lupa. <sup>31</sup> Olio pilielemolo, ‘Ulu-pulu-kiri selemene yomboma Pulu Yemo mawa seko “Liku tapondou.” nilimili unguma Pulu Yemo yuni naa pilielemo. Yombo se ‘Pulu Yemonga imbimu olandopa molopili.’ nimba uluma sepa molopa, yuni “Sei.” nilimú mele pilipa selemene yombomo Pulu Yemo mawa sepa “Liku tapondou.” nilimú unguma yuni pilielemo.’ akumu olio pilielemolo. <sup>32</sup> U Pulu Yemone mulu matolo serimu kinia kepe yandopa kepe yombo se anumuni merimu kinia olona sukundu mongo kiri lierimu yombomonga mongomo yombo sene sepa peanga senderimu ningu semane selu kepe u sene naa toringi pilierimulu kanumu. <sup>33</sup> Pulu Yemone i yemo lipa naa mundulkanje yuni aku sipa ulu-tondolo se manda naa selka.” nirimu.

<sup>34</sup> Yuni aku nirimu-kulu pilkuli onone pundu toko ninguli: “Nu aminiene merimu kinia ulu-pulu-kiri awisili pepili merimu. Pe kiniá nuni ‘olio mane siembo.’ konopu lekole nikinuye?” niringi. Aku ninguli yu ,Pulu Yemonga ungumu pilieringiulkana kamu, makororingi.

**9:35-41**

*“Yombomanga Konopumanga Sukundu Mongoma Kiri Lemó, Yombo Naa Kanolemele.” Nirimu Semanemo (Kolomongo-Awili 9 pali semane selumu)*

<sup>35</sup> Juda ye awilimane Yesusini mongotolo sepa peanga senderimu yemo ,Pulu Yemonga ungumu pilieringiulkana, kamu makororingi kinia pilipale Yesusi yu pumba kanopa nimbale: “Nu Mania Ombo Mana-Ye Au Lierimu Yemo , ‘Yu sika Pulu Yemone lipa mundorumu.’ ningu kuru mondokono molo móloye?” nirimu.

<sup>36</sup> Yemone mangilipa nimbale: “Ye-Awilimu, i ye nikinumu yu nawe? Nane ‘yu sika aku yemo molemo.’ nimbu kuru mondumbo kene ningu si.” nirimu.

<sup>37</sup> Yesusini nimbale: “Kanu yemo nu kiniá kanoko moleno. Kiniá nu-kinia ungu ningu molkombele akumu.” nirimu.

<sup>38</sup> Kanu-kinia ye kanumuni nimbale: "Ye-Awili mu, kiniá 'Nu aku yemo sika lepomo.' nimbu kuru mondokoro." nimbale Yesusinga imbimu ambolopa paka tondopa yu kape nirimu.

<sup>39</sup> Yesusingi nimbale: "Na 'yomboma ulu-pulu-kiri seko molemele mele mona liepili piliangi.' nimbu ma-koleana orundu. 'Yombo mongo kiri lemóma mongone mélema kanoko, mongo peanga lemóma mongone mélema naa kanangi.' nimbu ma-koleana orundu." nirimu.

<sup>40</sup> Parisi ye yu pea moloringi marené yuni aku nirimu pilkuli 'Yu ungu-iku se topa oliondo nikimunje?' ningu yu mangilku ninguli: "Nu nambolka ningu ninkinuye? Olionga mongoma kiri lemólaye?" niringi.

<sup>41</sup> Yesusingi nimbale: "Ononga mongoma kiri lelkanje ononga 'konopumanga ulu-pulu-kirima pelemo.' ningu pilkuli, 'Pulu Yemondo,' 'Ulu-pulu-kirima mania pumba konopuma peanga liepili.' ni." nilimolá. Aku-sipa na-kolo "Mongomane mélema kanolemolo." nilimilimunga ononga ulu-pulu-kirima konopumanga we pepili molemele." ,nirimu.,

## 10

10:1-21

*Yesusingi Kongi Sipisipima Kinia Sipisipimanga Tapu-Yemo Kinia Akumando Nirimu Semanemo*  
10:1-6

*Kongi Sipisipi Palamonga Ungu-Ikumu*

<sup>1</sup> Yesusingi yombo moloringimando nimbale: "Nane onondo paa sika nimbu sikirumu: "Ye se kongi sipisipi pala kerepuluna sukundu naa pumba, we-senga topa takondopa pulimú yemo yu wa noli yemo. <sup>2</sup> Aku-sipa na-kolo ye se kerepuluna sukundu pulimú yemo yu sipisipi nokoli yemo." nikiru. <sup>3</sup> Kerepulu nokoli yemone yunga kuna lindilimú. Sipisipimane nokoli yemonga ungumu pilielemene, yunga sipisipimanga imbima lepa pala kerepuluna ultu memba pulimú. <sup>4</sup> Yunga sipisipima wendo lipale, yu kumbi lepa pulimú kinia yunga ungumu pilkuli ono lombili pulimili. <sup>5</sup> Ye lupa senga ungu nilimúmu naa pilkuli yu lombili naa pungu talopa leko pulimili." nirimu.

<sup>6</sup> Yesusingi aku ungu-ikumu topa sirimu-na-kolo ungu-pulumu naa pilieringi.

10:7-18

*Yesusi Yu "Kongi Sipisipimanga Tapu-Ye Peangamo Molio." Nirimu Semanemo (10:1-18 pali kanani.)*

<sup>7</sup> Yesusingi ,kongi sipisipimanga ungu-ikumu topale nirimumuni, ungu-pulumu naa pilieringi-kulu, kelepa ungu se pea nimbale: "Nane onondo paa sika nimbu sikirumu: Na sipisipimanga pala kerepulumu. <sup>8</sup> Ye lupa u na naa wambo oringi yema wa noli yema mindi, aku-na-kolo ononga unguma sipisipimane naa pilieringi. <sup>9</sup> Na kerepulumu. Yomboma 'Sukundu pamili.' ninguli na molombona ongema mindili nolemolá aulkana wendo ongo na-kinia manda molko sukundu pungu pena ongo era nongo sengemo. <sup>10</sup> Wa noli yemone wa nomba, topa kondopa, sepa kinjimbando mindi olemo. Aku-sipa na-kolo nane 'Ono konde molko paa molko kondangi.' nimbu orundu.

<sup>11</sup> "Na nanu kongi sipisipi tapu sepo kondolio yemo. Sipisipi tapu sepa kondoli yemone yunga sipisipima 'Mindili naa nongo, kolou naa kolangi.' nimbale ono lipa tapondopa ononga nimba kolali sepa kolondomba selemo. <sup>12</sup> Ye se yu sipisipi pulu yemo mólo, yu we kou-kongono mindi sepa sipisipima we nokondolemo, kanu we tapu sendeli yemo owá-palako se 'Sipisipi se topo nambo.' nimba olemo kinia

kanopale, yu sipisipima mundupa kelepa talopa lepa pulimú. Kanu-kinia owá-palakomone sipisipima topa bulu-balu silimú. <sup>13</sup> Yemo yu kou-kongono seli yemo mindi molopale, sipisipima kondo naa kolopa yu kowa mindi pulimú.

<sup>14-15</sup> “Na nanu sipisipi pulu yemo molopole ono tapu sepo kondolio. Tatane na kanopa pilielemo nane yu kanopo pilielio mele aku sipa melela, nane nanga sipisipima kanopo pilielio onone na kanoko pilielemelela. Nane sipisipima ono ‘Naa kolangi.’ nimbu ononga kolali sepo kolondombo. <sup>16</sup> Nanga sipisipi mare lupa molemelela, i ‘Juda,’ koleana sipisipima mindi mólo. Na kanu sipisipi wema kepe paa membo ombóla. Membo ombó kinia kanuma nanga unguma pilku lingí kinia pe sipisipima pali talape selumu mindi molonge, sipisipi pulu ye selu mindi molopa ono tapu sepa kondomba. Akumu na.

<sup>17</sup> “‘Na kolambo.’ nikirumunga Tatane na konopu mondolemo. Aku-sipa na-kolo ‘Kolopole ónomo óno-koleana kamu leambo.’ ni naa nimbu, ‘Lomboropo ola molambo.’ nimbu’ nimbu pilipuli ‘Na kolambo.’ nikiru. <sup>18</sup> Yombo sene na ‘Kolopili topo kondambo.’ ni naa nikimu; nanu konopumuni pilipuli ‘Kolambo.’ nikiru. ‘Na kolambo tangi.’ nikirumu nanu ‘Kolambo.’ manda nimbú. Kolopole nimbúmuni, ‘Na kelepo konde molambo.’ nimbúmu nanu manda nimbú. I sembomo Tatane “Aku siku sei.” nirimu mele sembó.” nirimu.

<sup>19</sup> Yesusini aku nirimu-kulu Juda yombomane pilkuli ono kelko konopu seluna naa pupili yu-mele-mele konopu liku mundoringi.

<sup>20</sup> Yombo awisilini ninguli: “Yunga konopuna kuru se molemomonga yu amu topa aku sipa ungumu nimba kinjilimú. Nambi semu-na yunga ungumu pilkimiliye?” nirungi.

<sup>21</sup> Aku-sipa na-kolo marene ninguli: “I ungu nikimuma kuru se konopuna molomba ye sene aku sipa mele manda naa nilka. Kuru sene nambi sepa yombo senga mongo kiri lielimu manda sepa peanga sendelkaye?” nirungi.

10:22-42

### *Juda Ye Awilimane “Yesusi Pulu Yemonga Malo Mólo.” Nirungi Semanemo*

<sup>22</sup> Kanu-kinia Juda yombomanga ulu se wendo orumu wale se wendo orumu. Koronga-u yombo marene Pulu Yemo popo toko kaloringi ulka-tembelena seko kake senderingi walemo kalia-ingi senga senga pilingindu Jerusalleme maku toringi aku walemo wendo orumu. Aku walemo kolea ali sepa kalopora torumu walemanga wendo orumu. <sup>23</sup> Kanu walemo wendo orumu kinia Yesusi ulka-tembele kerepuluna ‘Sollomononga’ ningu takoko anju litingina andopa molorumu <sup>24</sup> kanu-kinia yu molorumuna Juda ye awilima ongo maku toko gilku yundu ninguli: “Olio konopu talo sipu naa kimbu sipu molamili kene Pulu Yemone “Olio nokopa kondomba ye se lipu mundumbu.” nimba, nimba taltorumu ye nokoli Karasimu nu liemu olio mongo toko ningu si.” nirungi.

<sup>25</sup> Yesusini pundu topa nimbale: “Nane aku yemo molio u nimbu sirindu-na-kolo ‘Sika nikimu.’ ningu kuru naa mondolemele. Nanga Tatane na namba sipa yunga kongonomo “sende-pu.” nirimu-na ulu-tondolo seliomane na molio mele lipa ora silimú, <sup>26</sup> aku-na-kolo ono nanga kongi sipisipima naa molemelemonga molio mele niliu akumu ‘Kolo tokomo.’ ningu kuru naa mondolemele. <sup>27</sup> Nanga sipisipima nanga unguma pilielemele. Nane ono kanopo imbi siliu, ono na lombili olemele. <sup>28</sup> Nane ono ‘conde molko mindi pang.’ niliu. Ono mindili nongo molko kinjingí koleana naa pungí. Ono nane nokopa molambo yombo sene manda wendo naa limba. <sup>29</sup> Tata yuni kanu sipisipima na sirimu yemo yu mélemanga pali olandopamo, yuni kanuma nokopa molopili yombo sene manda wendo naa limba. <sup>30</sup> Na kinia Tata kinia olto selumu.” nirimu.

<sup>31</sup> Juda ye awilimane kelko kou-mulu liku Yesusi toko kondonge seringi, <sup>32</sup> akuna-kolo yuni onondo nimbale: "Nane Tatanga ulu-tondolo awisili peangama ono lipu ora sipu serindu, akupokonga semo kanoko kiri pilkuli na kouni toko kondonge sekemeleye?" nirimu.

<sup>33</sup> Juda ye awilimane pundu toko ninguli: "Ulu-tondolo serinumanga nu kouni topo kondomolo naa sekemolo. Nu we-mana-yemone Pulu Yemo liku ungu-taka tondoko nuni ninguli: "Na Pulu Yemo." nilinu, akumunga nu kouni topo kondomolo sekemolo." niringi.

<sup>34</sup> Yesusini pundu topa nimbale: "Pulu Yemonga boku taltolemelemonga Pulu Yemone ungu se nimbale:

"Nane ono u nimbuli:

'Ono pulu yema.' nirindu kanumu."

nirimu, nimba bokuna molemo. <sup>35</sup> Pulu Yemonga bokuna ungu molemomane kolo naa tolemo, ungu nilimúma pepa mindi pulimú kanumu. Pe Pulu Yemone yunga ungu pilieringi yombomando "pulu yema." nirimu liemu <sup>36</sup> Tatane nimba taltopa 'nanga yemo molopili.' nimba ma-koleana lipa mundorumu-na orumu yemone yu "Pulu Yemonga Malo." manda naa nimbáye? Pe nane "Na Pulu Yemonga Malo." niliumunga nando "Pulu Yemo liku ungu-taka tondokono." nambi semuna nikimiliye? <sup>37</sup> Tatane uluma selemo mele nane aku sipu uluma naa sendu liemu na 'sika yunga malo nikimu' ningu kuru naa mondangi. <sup>38</sup> Aku-sipa na-kolo Tatane uluma selemo mele nane sika aku sipu uluma sembó kinia 'Yu Pulu Yemonga Malo mólo. Kolo tokomo.' ningu kuru naa mondangi liemu aku manda, ulu-tondolo selioma kanokole 'Sika Pulu Yemonga ulu-tondoloma.' ningu kanangi. 'Tata na-kinia kopu sepa molemo, na Tata-kinia kopu sepo molio.' ningu kuru mondongendo aku siku nane selio uluma kanokole 'Sika Pulu Yemonga ulu-tondoloma.' ningu kanaa." nirimu.

<sup>39</sup> Yuni aku nirimumunga onone kelko yu ka singí seringi-na-kolo yu ono mundupa kelepa yu purumu.

<sup>40</sup> Aku sepale nirimumuni, Yesusi kelepa no Jodane kimbilipa nekendo pumba, Jono u yomboma no linderimu koleana pumba molorumu. <sup>41</sup> Kanu-kinia yombo awisili yu molorumuna oringi. Ongo ninguli: ",No Lindeli, Jonone sika ,Pulu Yemonga kongono senderimu mele, lipa ora sirimu ulu-tondolo selu kepe naa serimu, aku-na-kolo i yemone pe omba molopa sembá mele Jonone u nimba sirimu aku unguma paa sika nirimu." niringi. <sup>42</sup> Kanu-kinia aku koleana yombo awisilini 'Yesusi yu sika.' ningu kuru mondoringi.

*Kolomongo-Awili 11-12*

## **Yesusi Kolea Judia Disiriki Pumba Jerusalleme Purumu Kinia Juda Yombomanga Ye Awilimane "Yu Topo Kondamili." Ningu Waa Toringi Semanemo**

### 11

*Kolomongo-Awili 11 pali, 12:9-11*

*LLasirasi Kolorumu Óno Seringi Kinia Yesusini Topa Makisinderimu Semanemo  
11:1-16*

*LLasirasi Kolorumu Semanemo*

<sup>1</sup> Ye se kuru torumu, yunga imbi LLasirasi. Yunga kolea Betani, akuna yunga kemulu Maria kinia Matatolo pea moloringi. <sup>2</sup> Kanu ambo Mariane pe walte

Ye-Awilimunga kimbuna wambola ondopa ape kandondopale Maria yunga penge-indimuni Ye-Awilimu yunga kimbuna kulu tondorumu. Ambo akumunga kemulu LLasirasi kuru torumu.

<sup>3</sup> Yunga kemulutolone LLasirasi kuru torumu-kulu Yesusi molorumuna ungu se ningu munduku ninguli: "Ye-Awilimu, nuni konopu mondoleno yemo kuru tomu." niringili.

<sup>4</sup> Jesusini aku ungumu pilipale yu lombili andolimando nimbole: "LLasirasi kuru tokomomo manda naa kolomba, mólo. Pulu Yemonga tondolomo mona lepa yunga imbi ola molombamonga yu kuru tokomo. Yu kuru tokomomonga Pulu Yemonga Malonga tondolomo mona lepa imbi ola molombala." nirimu.

<sup>5-6</sup> Yesusini ambo Mata kinia genu Mariatolo olonga kemulu LLasirasi kinia ono paa konopu mendorumu-na-kolo LLasirasi kuru torumu pilipale yu molorumu koleana wale talo we molorumu.

<sup>7</sup> Wale talo molopale pe yu lombili andoli yemando nimbole: "Olio kolea Judia disirikindu kelepo yando pamili." nirimu.

<sup>8</sup> Aku-na-kolo onone ninguli: "Rapai, Juda ye awilimane nu u kouni toko kondonge seringi kanumu. Pe nu akuna kelko puni sekenoye?" niringi.

<sup>9</sup> Yesusini pundu topa ungu-iku topa nimbole: "Wale senga ekendo kolea simbulu topa, ekendo tangopa naa selemoye? Kolea tangolemo kinia yombo se ma-koleana pa sendelemona pumbale aulka sumbi sipa kanopa pumba manda a naa tolemo. <sup>10</sup> Aku-na-kolo yombo se ipulieli pulimúmu pa sendélimu yu-kinia naa pelemomonga yu a tolemo." nirimu.

<sup>11</sup> Aku nimbole pe yuni kelepa onondo ungu se pea nimbole: "Olionga pulu lemó ye LLasirasi uru pelemo. Aku-na-kolo nane pumbu yu topo makisindimbu." nirimu.

<sup>12</sup> Yunga lombili andolimane ninguli: "Ye-Awilimu, yu uru pemu liemu kelepa manda molombamo." niringi.

<sup>13</sup> Yesusini LLasirasi kolorumumundu nirimu-na-kolo yunga lombili andolimane 'Yu we uru pelemo.' konopu lieringi. <sup>14</sup> Aku siku konopu lieringi-kulu Yesusini ungu-ikumunga pulumu nimba para sipa nimbole: "LLasirasi kolopa pora simu." nirimu. <sup>15</sup> "Aku-na-kolo na yu-kinia naa molondumunga ulu-tondolo wendo ombá kene onone na molio niliu mele 'Sika.' ningu kuru mondongemonga yu-kinia naa molondumu papu sendu. Yu lemóna pamili waa." nirimu.

<sup>16</sup> Aku nirimu pilipale, Tomasi, yunga imbi se Didimasi, yuni lombili andoli marendo nimbole: "Olio Yesusi yu kinia pea kolamili pamolo." nirimu.

11:17-27

*Yombo Kololima Lombokoro Ola Molemelemonga Ulu-Pulumu Kepe Yombo Konde Molemelemonga Ulu-Pulumu Kepe Yesusi Yu Aku Pulutolo Molemo Ungumu*

11:17-37

*Yesusini LLasirasi Kemulutolo Kondo Kolopa Nimba Toyombo Tondorumu Semanemo (Inia yakondo 11:1 pulu polko kanani)*

<sup>17</sup> Yesusi kolea-kanga Betani ombe pilierimu kinia "LLasirasi yombo-óno-koleana wale kise pemu." niringi pilierimu. <sup>18</sup> Kolea-kanga Betani kinia kolea-awili Jerusalleme kinia paa nondopa mele lierimu, manda manjeli killomita yopoko mele. Nondopa lierimu-kulu <sup>19</sup> Juda yombo awisili LLasirasi kolorumu-kulu pilkuli Mata Mariatolo moloringilina ono kola-ulka oringi.

<sup>20</sup> Matane Yesusi orumu pilipale yuni 'Aulkana kanopo limbu.' nimba purumu, aku-na-kolo Maria yu ulka sukundu we molorumu. <sup>21</sup> Matane Yesusi kanopa lipa yundu nimbole: "Ye-Awilimu, nu ya pea molemolánje nanga kemulu naa kolka." nirimu. <sup>22</sup> "Aku-na-kolo na pilkiru, kiniá kepe nuni Pulu Yemo-kinia mawa sení kinia nu mawa sení mélemo yuni pilipale nu simba." nirimu.

<sup>23</sup> Yesusini yundu nimbale: "Kemilia kelepa lomboropa ola molomba." nirimu.

<sup>24</sup> Matane nimbale: "Sika, na pilielio. Mulu ma pora nimbá walemonga yomboma lomboroko ola molonge kinia LLasirasi kepe lomboropa ola molomba." nirimu.

<sup>25</sup> Yesusini yundu nimbale: "Yombo lomboroko ola molonge ulu-pulumu kinia konde mololi ulu-pulumu kinia aku ulutolonga pulumu na." nirimu. "Na molio i nikiru mele 'Sika.' nimba kuru mondolemo yombomo kolopale konde molomba.

<sup>26</sup> Yombo konde molopa 'Yu sika Pulu Yemone lipa mundorumu yemo.' nimba kuru mondolemo yombomo paa sika kolou naa kolopa alieli konde molopa mindi pumbá. Aku nikirumu 'Sika nikimu.' ningu kuru mondoko molkono molo móloye?" nirimu.

<sup>27</sup> Matane Yesusindu nimbale: "Sika, Ye-Awilimu. 'Pulu Yemone "Olio nokopa kondomba ye se lipu mundumbu." nimba, nimba taltorumu ye nokoli Karasimu kinia Pulu Yemonga Malomo kinia, aku yemo "Ya mana ombá." niringi ye akumu nu ongo moleno.' nimbu kuru mondopo molio." nirimu.

**11:28-37**

*Yesusi Kola Serimu Semanemo (Inia yakondo 11:1 pulu polko kanani)*

<sup>28</sup> Matane aku nimbale yu yando pumbale genu Maria kiyongo nimba mangilipa "Pea molambili ou." nimba yundu nimbale: "Ungu Mane Sili Yemo omba molopale, "Yu moliona ou." nikimu." nirimu kinia <sup>29</sup> Maria pilipale yu popenge sepa ola gilipa Yesusi molorumuna purumu. <sup>30</sup> Kola-ulka moloringina Yesusi u naa omba, Matane yu aulkana giliepili pumba kanopa orumu akuna yu we molorumu. <sup>31</sup> Kanu-kinia Juda yombo kola-ulka pea moloringimane Maria popenge sepa ola gilipa omba pena purumu kinia kanokole niringimuni, 'Yunga kemulu óno seringi koleana kola sembá pukumunje.' ningu lombili puringi.

<sup>32</sup> Maria Yesusi gilierimuna omba Yesusi kanopale yunga kumbi-kerena omba tamalu pepa nimbale: "Ye-Awilimu, nu ya pea molemolánje nanga kemulu naa kolka." nirimu.

<sup>33</sup> Maria kinia Juda yombo yu-kinia pea oringga kinia kola seringi-kulu kanopale yu ono paa kondo kolopa konopu umbuna awili sepa kolorumu. <sup>34</sup> Yuni mangilipa nimbale: "Yu óno sena seringiye?" nirimu.

Onone pundu toko ninguli: "Ye-Awilimu, nu ongo kanou." niringi.

<sup>35</sup> Yesusi kola serimu.

<sup>36</sup> Aku serimu-kulu kanokole Juda yombomane ninguli: "Kaname. Ye kolorumumu yu paa konopu mondolemo lepomo." niringi.

<sup>37</sup> Aku-na-kolo marene ninguli: "Ye senga mongo kiri lierimumu manda sepa peanga senderimu yemo yuni i kolorumu yemondo "Naa kolopili." manda naa nilkaye?" niringi.

**11:38-44**

*Yesusini LLasirasi Yombo-Óno-Koleana Topa Makisinderimu Semanemo (Inia yakondo 11:1 pulu polko kanani)*

<sup>38</sup> Yesusi yu kelepa kaméléna mindili serimu pilipale yombo-óno-koleana orumu. Aku óno-koleamo yu kou-kandemo. Yu óno seringi kou-kande kerepuluna kou awili sene pipi siku taltoringi lierimu. <sup>39</sup> Yesusini nimbale: "Koumu wendo lie." nirimu.

Aku-na-kolo kolorumu yemonga kemulu Matane nimbale: "Ye-Awilimu, yu óno-koleana pepili wale kise omba pumu lupendi paa tomba." nirimu.

<sup>40</sup> Yesusini yundu nimbale: "Nane nundu "Na molio mele nindu ungumu 'Sika nimu.' ningu kuru mondonu liemu nuni Pulu Yemonga tondolomo kanoni." nindu kanumu." nirimu.

<sup>41</sup> Aku nirimu kinia onone kou akumu wendo littingi.

Kanu-kinia Yesusini olando sipa kanopa nimbale: "Tata, nuni na pilienumunga nane nu "Ange. Paa senu." nikiru. <sup>42</sup> Nuni nanga ungumu alieli piliereno, nuni

pilieleno mele na pilielio-na-kolo 'Yombo ya i gilkimilimane 'Na nuni mundorunu yemo.' ningu kuru mondangi.' nimbu nane nundu "Na pilienumunga ange." nindu." nirimu.

<sup>43</sup> Aku nimbale nirimumuni, tondolo mangilipa nimbale: "LLasirasi, nu makiliku wendo ou." nirimu. <sup>44</sup> Kanu-kinia ye kolorumu kanumu makilipa wendo orumu. Yu wendo orumu kinia yunga kimbu kima banisini ka toko yunga kumbikeremo kepe maminiane okoko yu óno seringima wendo naa lipa we ombo gilierimu-kulu Yesusini onondo nimbale: "Yu okongi mulu-maminiamo wendo lieyo. Yu ombo pupili." nirimu.

**11:45-57**

*Yesusi Toko Kondongendo Langi Niringi Semanemo (Inia yakondo 11:1 pulu polko kanani)*

<sup>45</sup> LLasirasi kolorumu kinia Yesusini yu topa makisinderimu-kulu Juda yombo kola-ulka oringimanga awisilini yuni aku serimu ulumu kanokole 'Yu "molio." nilimú mele sika akumu molemo.' ningu kuru mondoringi. <sup>46</sup> Aku-na-kolo mare Parisi yema Jerusalleme moloringina pungu Yesusini serimu mele semane toko siringi.

<sup>47</sup> Aku ungumu pilkuli Parisima kinia Pulu Yemo popo tondoringi ye awilima kinia onone "Olio Juda yombomanga kanjolloma pali maku tamili waa." ningu ninguli: "Olione i yemo nambi semoloye? I yemone Pulu Yemo kinia kopu seko molembele mele lipa ora silimú ulu-tondolo awisili selemo." niringi. <sup>48</sup> "Olione yu aku sipa sepa molopili siye kolomulu liemu yombomane paa pali 'Yu "molio." nilimú mele sika akumu molemo.' ningu kuru mondokole 'yu lombili andonge' kinia Romogapomanomo olio-kinia 'Opa semolo.' konopu lekole ningimuni, ongo olionga Pulu Yemo popo topo kalolemolo ulka-tembelemo toko sikisiku olionga yomboma toko bulu-balu siku mundungí." niringi.

<sup>49</sup> Kanu-kinia ononga ye 'Kayapasi' nili ye se, yu aku kalia-ingimunga Pulu Yemo popo tondoringi ye awili olandopamo molorumu, yuni nimbale: "Ono amu toko, i ulu wendo okomomonga pulumu naa pilielemene. <sup>50</sup> Yombo se yombomanga pali kolali sepa kolondomu liemu peanga. Se kolali sepa naa kolondomba kinia yomboma pali kolongi liemu manda naa sembá." nirimu.

<sup>51</sup> Yuni aku nirimumu yuyu pilipa naa nirimu. Yu aku kalia-ingimunga Pulu Yemo popo tondoringi ye awili olandopamo molorumumunga Pulu Yemone yunga konopuna sukundu ungu-umbu se tondopa nimba panjerimu kinia pilipale aku sipa walu nirimu. 'Aku nirimu ungumunga sika pulumu naa pilierimu.' Yesusi yu sembá mele Kayapasini nirimumunga pulumu i-sipa: Yesusi Juda yombomanga pali nimba kolali sepa kolondomba. <sup>52</sup> Aku-sipa na-kolo Juda yombomanga manjipa mólo. Pulu Yemonga bolango koleamanga pali molemele akuma pea seluna lipa memba ombo maku tombamonga yu ononga pea nimba kolondombamondo Kayapasi yuni nirimu.

<sup>53</sup> Kanu-kinia Kayapasini kerena nirimu mele pilkuli kanjollomane Yesusi toko kondongendo pulu polko langi niringi.

<sup>54</sup> Kanu-kinia Juda ye awilimane yu toko kondongendo langi niringi pilipale Yesusi ono moloringina yu we mona naa andorumu. Yu ono mundupa kelepa kolea ku lielina nondopa lierimu kolea kanga Ipereme pumba, akuna yunga lombili andolima pea moloringi.

<sup>55</sup> 'Juda yombomane kalia-ingi senga senga kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilieringi walema nondopa wendo ombá serimu kinia Juda yombo awisili ononga pulu koleama munduku kelko pungu, Pulu Yemone ono kake sepili molonge kanomba uluma sengendo Jerusalleme olando puringi. <sup>56</sup> Akuna punguli Yesusi korokole, Pulu Yemo popo toko kaloringi ulka-tembelena maku toko gilkuli anju yando angelema

ningu ninguli: "Ono nambolka konopu lekemeleye? Pulu Yemone olionga anda-kolepalima Naa Topa We Ombo Purumu mele pilimulúndu Pulu Yemo-kinia ulu semoloma 'pea samili.' nimba naa ombáye?" niringi. <sup>57</sup> Aku-na-koło Pulu Yemo popo tondoringi ye awilima kinia Parisi yema kinia onone u ningu panjiku ninguli: "Yombo sene Yesusi senga molomba kanopale, ka siemili olio nimba sipili." niringi.

## 12

12:1-8

*LLasirasinga Kemulu Mariane Yesusinga Kimbutolonga Wambola Kandondorumu Semanemo*

<sup>1</sup> Juda yombomane kalia-ingi senga senga kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilieringi walema aku kalia-ingimu wendo ombándo wale se-pakara we pepili Yesusi LLasirasi molorumu kolea-kanga Betani purumu. Kanu yemo yu u kolorumu óno seringi kinia pe Yesusingi "Wendo ou." nirimu kinia yu lomboropa wendo orumu. <sup>2</sup> Betani kanuna ulka senga yomboma kere-langgi Yesusi pea nongendo seko mimi seringi. LLasirasi kemulu Matane kere-langima moke serimu. Yesusi pea kere-langgi nongo moloringi yombomanga se LLasirasi yu.

<sup>3</sup> Kanu-kinia LLasirasi kemulu Mariane wambola 'sipaienate' nili mingi se lipa Yesusi molorumuna memba orumu. Kanu wambolamo yunga mingi senga umbunamo apo llita mele, kanumu kou-mone paa awili sepa purumu. Lipa memba ombale nirimumuni, Yesusinga kimbutolonga ape kandondopale Maria yunga penge-lapisamo lipa kimbutolo kulu tondorumu. Ulkana sukundu wambolamo muna paa awili sepa torumu.

<sup>4</sup> Aku-na-koło Yesusi yunga lombili andoli ye se, Judasi Isikeriote, yuni Yesusi pe lipa Yesusi yunga opa-touma sirimu ye kanumu, yuni nimbale: <sup>5</sup> „Yuni i wambola muna paa toli mingi pali nambi semu-na we naa simuye? Silkanje, aku wambolamo kou-mone limolanje kou awisili, kou-mongo wane tausini mele, lipuli yombo koropama moke sepo silimolá." nirimu. <sup>6</sup> Aku-na-koło yuni yombo koropama kondo kolopale aku sipa naa nirimu. Yu wa limbando nirimu. Yu Yesusi lombili andoli yemanga kou-walemo nokopa mendepa, ononga kou-mone lakilieringima alieli yu wa liltimu.

<sup>7</sup> Judasi Isikeriote yuni aku nirimu kinia, Yesusingi pundu topa nimbale: "Ambomone semumunga unguri naa ni! Na kolombo kinia óno sengemonga kandon-dombando papu talitorumu. <sup>8</sup> Yombo koropama ono-kinia alieli molonge-na-koło na ono-kinia alieli naa molombo." nirimu.

12:9-11

*Pulu Yemo Popo Tondoringi Ye Awilimane "LLasirasi Kepe Topo Kondamili." Ningu Langi Niringi Semanemo (Inia yakondo 11:1 pulu polko kanani)*

<sup>9</sup> Yesusi kolea-kanga Betani ulka senga molorumu Juda yombo awisili pilkuli yu molorumuna oringi. Yesusi mindi kanongendo naa oringi. LLasirasi u kolorumu Yesusingi topa makisinderimu kanu yemo konde molorumu mele kanonge oringila.

<sup>10</sup> Aku seringi-na Pulu Yemo popo tondoringi ye awilimane pilkuli LLasirasi kepe toko kondongendo langi niringi. <sup>11</sup> LLasirasi kinia ulu-tondolo se wendo orumumunga Juda yombo awisili ononga Juda ye awilima munduku kelko Yesusi "molio." nirimu mele 'Sika.' ningu kuru mondoko yu lombili andoringi-kulu LLasirasi yu kepe "Topo kondamili." ningu langi niringi.

12:12-19

*Ye Nokoli Kingi Se Kolea Senga Sukundu Pulimú Kinia Selemele Mele Yesusi Jerusalleme Sukundu Pumbá Purumu Kinia Seringi Semanemo*

<sup>12</sup> „Pulu Yemone ononga anda-kolepalima Naa Topa We Ombo Purumu mele, pilingí uluma sengendo yombo awisili kolea-awili Jerusalleme sukundu sukundu ongo maku toko moloringi. Yesusi ,oleanga mele kolea-kanga Betani LLasirasinga ulkana molorumu., Pe orili-ukundu yu Jerusalleme ombá orumu mele kanu yombo maku toko moloringimane pilkuli niringimuni, <sup>13</sup> onone kipi gomo mare langoko mengo pungu, aulkana Yesusi lingí punguli tondolo munduku ninguli:

“Kiniá olio lipa tapondomba ye peangamo okomo.

Pulu Ye Yawene lipa mundorumu-na  
yunga kongonomo sendemba okomo yemo  
molopa kondopili.

„Olio, Isirele yombomanga ye nokoli kingimu  
molopa kondopili.”

niliku puringi.

<sup>14</sup> Yesusi kongi dongi se kanopa lipa, ola pumba bulu-mingina molopa ‘orumu. Aku serimu kinia Pulu Yemonga bokuna ungu se, pe wendo ombá koronga-u niringi mele, wendo orumu. Aku ungumu i-sipa:

<sup>15</sup> ‘Jerusalleme yomboma, pipili naa kolayo.

Ononga ye nokoli kingimu kongi dongi walo senga  
bulu-mingina molopa okomo kanaa.’

nirimu mele bokuna molemo. <sup>16</sup> U Yesusi naa toko kondangi ono-kinia molorumu kinia yu lombili andolimane kanu ulumanga awili seko naa pilieringi, pe mindi pilieringi. Pe Yesusi yu yombomane toko kondoringi, Pulu Yemone yu kelepa mulu-koleana olando lipa yu sepa kondorumu kinia ono kanu uluma, u yu mulu-koleana naa pupili wendo orumu, kelko pilkuli, Yesusi mana mania naa opili Pulu Yemonga ungu molemo bokumuni yundu pe wendo ombá mele u nimba sirimu molemo mele pe yombomane yu-kinia seringi mele kepe yuni serimu mele kepe pilieringi.

<sup>17</sup> Yombomane Yesusi aulkana we naa li-poringi. U kolea-kanga Betani LLasirasi kolopa óno-koleana perimu kinia Yesusini yu topa makisinderimu yombo maku toko moloringimane kanoringi. Kanu yombomane kanu ulu-tondolomo Yesusini serimu kanoringi mele semanemo andoko toringi. <sup>18</sup> Yombomane yu Pulu Yemone lipa mundorumu, yu-kinia kopu seko molembele mele lipa ora sirimu kanu ulu-tondolo serimumu pilkuli yu aulkana lingí puringi. <sup>19</sup> Kanu-kinia Parisi yemane aku seringi kanokole onone ononga ye awilimando ninguli: “Onone yu toko mania mundungí seringi selemele mele manda naa sekemo kanayo. We-yomboma pali pungu yu lombili pukumili kanaa.” niringi.

12:20-26

### *Giriki Yombo Marene “Olio Yesusi Kanamili.” Niringi Semanemo*

<sup>20</sup> „Pulu Yemone Juda yombomanga anda-kolepalima Naa Topa We Ombo Purumu mele, pilingí uluma senge walema wendo ombá serimu kinia yomboma ‘Pulu Yemo popo tondopo yunga imbi ambolopo paka tondamili.’ ningu Jerusalleme puringi kanu yombomanga mare Giriki yombo mare ono pea puringi. <sup>21</sup> Kanu Giriki yomboma kolea Gallilli disiriki lierimu kolea Besaida taono ye Pillipu molorumuna ongo mawa seko ninguli: “Ye-Awilimu, olio Yesusi kanamili.” niringi. <sup>22</sup> Niringi mele Pillipuni pilipale anju pumba Enderu nimba sirimu. Kanu-kinia Yesusi lombili andoli ye Pillipu kinia Enderutolo olo pungu Yesusi ningu siringili.

<sup>23</sup> Yesusini pundu topa yu nondopa sembá mele nimba sipa nimbole: “Mania Ombo Mana-Ye Au Lierimu Yemo kelepa pumba yunga kolea peangana molopa kondomba walemo wendo omu. <sup>24</sup> Nane onondo paa sika nimbu sikirumu: “Kere-langì mongo naa kolomu liemu yuyu selu mindi we lemba. Aku-sipa na-kolo yu kolopa mana

mania pemu liemu toko nimba wendo ombo mongo awisili tomba. „Aku sipala na naa kolondu liemu nanga yombo awisili naa molonge, nanu manjipu molombo.„

<sup>25</sup> “Yombo se ya mana ‘Na molopo kondopo, na nondopo naa kolambo.’ konopu lemó yombo se yu kolopale kolea kirina mindili nomba molopa mindi pumbá. Aku-sipa na-kolo yombo se na lombili andopa nanga kongono sendembando ‘Na ya mana mindili nombo molombo mandala, kolombo mandala.’ konopu lemó yombo se yu pe kamu alieli-alieli molopa kondopa mindi pumbá. <sup>26</sup> Nanga kongono sendelemo yombo se yu na lombili andopa na selio mele sepili. Na yomboma lipu tapondopo, Pulu Yemonga ungumu onondo nimbu simbundu mindili nombo molio molombo mele kanu yombomone aku sipa nanga kongonomo sendepili. Kanu-kinia na molombo koleana nanga kendemande-yombomo kepe pea kopu sepo molombolomo. Yombo se nanga kongonomo sendepa molomu liemu pe Tatane kanu yombomonga imbimu ambolopa paka tondomba.” nikiru.” „nirimu.„

12:27-36

### *Yesusi Kolombamonga Ungu Se Nirimu Semanemo*

<sup>27</sup> „Aku nimbale Yesusini ungu se pea nimbale:„

“Yombomane na toko kondongemonga kiniá na mini-wale pumbomo. Nambolka nimbúnje? Tatando “Tata, kiniá na ulu-pulu wendo ombá okomomo ‘Naa wendo opili.’ ni.” niembonje? Mólo. Na ‘I ulu-pulamu wendo opili.’ nimbu orundu-na aku sipu paa naa nimbú. <sup>28</sup> Tata, nunga imbi ‘Ola pupili.’ ni.” nirimu.

Kanu-kinia ungu se mulu-koleana wendo ombo nimbale: “Nu serinu selenomonga nanga imbimu koronga ola purumu. Pe kiniá senimunga kamu ola pumbá.” nirimu.

<sup>29</sup> Maku toko moloringi yombomane aku ungumu pilkuli niringimuni, “Mulu topomo.” niringi.

Marene ninguli: “Mulu-koleana angello sene yundu ungu se nimu.” niringi.

<sup>30</sup> Yesusini nimbale: “I ungu wendo omumu na ‘Lipu tapondambo.’ nimba i ungumu naa nimu. ‘Ulu-pulu wendo ombá okomomo wendo ombá kinia ono konopu enge nipili molangi.’ nimba i ungumu nimu. <sup>31</sup> Kiniá Pulu Yemone ma-koleana yomboma “Seko kinjilimilimunga pundu toko mindili nangi.” nimba walemo nondopa wendo ombá sekemo. Na kolombo kinia ma-koleamonga ye nokoli ‘Setene’nga tondolomo mania pumbá. <sup>32</sup> Aku-na-kolo na liku ola panjingí kinia na molombona yomboma pali “Waa.” nimbú.” nirimu. <sup>33</sup> (Yuni “Na liku uku toko ola panjingí.” nirimumunga ‘Yu kolopili.’ ningu unju-perana uku toko ola panjingí yunga lombili andolima piliangi.’ nimba yuni aku nirimu.)

<sup>34</sup> Yuni aku nirimumunga yombo maku toringimane ninguli: “Pulu Yemonga bokuna ‘Pulu Yemone olio “Nokopa kondomba ye se lipu mundumbu.” nimba, nimba taltorumu ye nokoli Karasimu ombale kolou naa kolopa alieli molopa mindi pumbá.’ nimba molemo kanumu pilipu molemolo. Akumunga nuni “Mania Ombo Mana-Ye Au Lierimu Yemo liku uku toko ola panjingí.” nikinu akumu nambi seko nikinuye? ‘Mania Ombo Mana-Ye Au Lierimu Ye’ nikinumu nawe?” niringi.

<sup>35</sup> Kanu-kinia Yesusini onondo nimbale: “Wale laye-kolo pa sélimu ono-kinia molomba. Akumunga kiniá pa sendélimu ono-kinia molemo kinia ono pang. Pe ono simbulumuni pipi naa sipili. Yombo simbulu tolina pulimú yombomo pulimú aulkamo kanopa imbi naa silimú. <sup>36</sup> Kiniá pa sélimu ono-kinia molemo kene ‘Olio pa sélimunga yomboma molamili.’ ningu ‘Pa sélimu sika.’ ningu kuru mondangi.” nirimu.

Unguma nimba pora sipale nirimumuni, ‘Na naa kanangi.’ nimba Yesusi yomboma mundupa kelepa senga pumba lopi se-porumu.

12:37-43

*Yesusini Ulu-Tondolo Awisili Serimu Kinia Juda Yombo Awisilini "Yu Pulu Yemone Lipa Mundorumu. Yu Pulu Yemonga Malo." Ningu Naala Kuru Mondoringi Semanemo*

<sup>37</sup> Yesusini 'Pulu Yemone yu 'kongono sendepili.' nimba lipa mundorumu, yu pea kopu seko moloringili mele, lipa ora sirimu ulu-tondolo awisili serimu yombomane kanoringi-na-kolo u kepe, kanoringi kinia kepe, "Yu sika Pulu Yemone lipa mundorumu yemo." ningu kuru naa mondoringi. <sup>38</sup> Pulu Yemone ungu-umbu tondorumuma pilipa yomboma nimba sirimu ye Aisayane u nirimu mele pe kamu wendo ombámonga onone aku siku ningu kuru naa mondoringi. Aisayane nimbale: "Ye-Awilimu, olione nimbu sirimulu unguma

nawene 'Sika nikimili.' nimba kuru mondomye?

Ye-Awilimuni yunga tondolomo

nawe lipa ora sirimuye?"

nirimu. <sup>39</sup> Aisayane aku nirimu akumunga ono Yesusi molemo nilimú mele 'Sika.' ningu kuru mondonge aulka se naa lierimu. Aku ningu kuru mondonge aulka se naa lierimumunga Aisayane ungu se pea nirimu, yuni bokuna torumu molemo, akumu i-sipa:

<sup>40</sup> "Pulu Yemone ononga mongoma pipi sindipa,  
ononga konopuma pipila sindilimú.

Pulu Yemone nimbale:

"Nane ono 'kuru tolemoma, sepo peanga naa simbu kene  
ono mongomane naa kanoko,  
konopumane mélse naa pilku,  
konopu topele toko na moliona naa wangi."

nimbale ononga mongo konoputolo aku sipa serimu."

nirimu. <sup>41</sup> Aisayane Yesusinga tondolomo kanopale yuni Yesusinga aku sipa ninderimu.

<sup>42</sup> Sika Juda ye awili awisilini Yesusi "molio." nirimu mele 'Kolo tokomo. Aku yemo naa molemo.' ningu kuru naa mondoringi-na-kolo ononga ye awisilini 'Yu aku yemo sika ombo molemo.' ningu kuru mondoringi. Aku-na-kolo ono Parisi yema pipili kolkole, 'Yu sika.' nimbu kuru mondolemolo mele nimbu para simulú kinia Parisi yemane Pulu Yemonga ungumu maku topo pilielemolo ulkamanga 'naa waa.' ningu kamu makoronge.' ningu pilkuli, ningu para naa siringi. <sup>43</sup> Ono 'Pulu Yemone kape nimbá kinia papu.' ningu naa pilku, 'Yombomane olio kape ningí kinia papu.' ningu aku siku we molko, yu 'Sika.' ningu kuru mondoringi mele ningu para naa siringi.

**12:44-50**

*Yesusinga Ungumu Pilku Mokoli Selemelema Pe Kote Wendo Ombá Kinia Yunga Ungumuni Kotemo Pilipale Ononga Ulu Selemelema Apurumba Semanemo*

<sup>44</sup> Kanu-kinia Yesusini tondolo ru nimba nimbale: "Yomboma 'Na molio niliu mele sika.' ningu kuru mondolemele yomboma na manjiku 'Sika' ningu kuru naa mondolemele. Na lipa mundorumu yemo kepe 'Sika' ningu kuru mondolemelela.

<sup>45</sup> Yombo 'Na sika.' ningu kuru mondolemele yombomane na kanolemele akumu na lipa mundorumu yemo kanolemelela. <sup>46</sup> 'Yombo sene 'Na molio niliu mele sika.' nimbu kuru mondomba yombo se simbulu tolina naa molopili.' nimbu na ma-koleamanga pali pa sendélimu ma-koleana orundu.

<sup>47</sup> "Aku-sipa na-kolo yombo se nanga ungumu pilipale sengena panjipa naa semu liemu nane yu kote naa sendembo. Nane mana-yombomanga kote pilipu 'mindili nongo molangi.' nimbu naa orundu kanumu. 'Ono lipu tapondopo mindili nolemolá aulkana wendo lipu, na-kinia molko kondonge aulkana lipu mondombo.' nimbu naa orundu. <sup>48-49</sup> Yombo se na bulu sipa nanga unguma 'Sika.' nimbu naa pilipa limba yombomo kotena pilipa apurumba mélemo pelemo. Mulu ma pora nimbá wale kinia

ungu nimbu siliu ungumane yu kote sendemba. Na nanu konopumuni pilipuli i unguma naa niliu. Tatane na lipa mundorumu-na orundu yemone "Ni." nilimú mele pilipuli niliumunga, niliu ungumane kanu yombomo kote sendemba. <sup>50</sup> Na pilkiru, "Tatane "Ni." nimu-na niliu ungumuni yomboma alieli molko kondoko mindi pungí ulu-pulumu silimú." nimbu pilieliononga yuni "Aku siku nengu si." nilimú mele nimbu siliu." nirimu.

*Kolomongo-Awili 13-17*

## **Yesusini Yu Lombili Andolimando "Ono Mundupu Kelepo Na Tata Molemona Kelepo Pumbú." Nirimu Semanemo**

### **13**

*13:1-20*

*Yesusini Yu Lombili Andolimanga Kimbuma Kulumiye Tondorumu Semanemo*

<sup>1</sup> Juda yombomane kalia-ingi senga senga kolea-awili Jerusalleme ongo akuna sukundu, Pulu Yemone ononga anda-kolepalima Naa Topa We Ombo Purumu mele pilingindu kongi sipisipi nonge walemo opali mele wendo ombá serimu. Yesusi yu nondopa ma-koleamo mundupa kelepa Lapa molorumuna pumbá yu kiniá mele pilierimu. Yuni yunga mana moloringi yomboma konopu mondopa molorumu mele pe kiniá kepe yu kolombando ono kamu paa konopu mondopa kolomba serimu.

<sup>2</sup> Yesusi yunga opa-tou yema Saimono Isikeriote malo Judasini lipa simba ungumu 'kurumanga nokoli, depelemone Judasi yunga konopuna koronga panjindepili molorumu, Yesusi kinia yu lombili andolima kinia ipupini kere-langi nongo moloringi.

<sup>3</sup> Yesusini pilipale, Lapane mélema pali yu "Nokou." nirimu, yu Pulu Yemo mundupa kelepa mania orumu, kelepa Pulu Yemo molombana olando kelepa pumbá serimu mele pilipa molorumu.

<sup>4</sup> Aku sipa pilipale, yu kere-langi nongo moloringimu mundupa kelepa ola gilipale yunga ola-wale-pakoli pakorumumu kulupa wendo lipa taltopa, kendemandeyombomane yombomanga kimbu kulumiye tondongendo seringi mele yuni aku sipa kangi kulu toli múlu se lipa panjipale nirimumuni, <sup>5</sup> pellete senga no ondopa mundupa yu lombili andolimanga kimbuma pulu polopa kulumiye tondopa kulu toli múlumu porona panjerimumuni kulu tondorumu.

<sup>6</sup> Kulumiye topa kulu tondolepa ombale Saimono Pita molorumuna orumu kinia Pitane yundu nimbale: "Ye-Awilimu, nuni nanga kimbutolo kulumiye tondoni sekenoye? Paa manda mólo!" nirimu.

<sup>7</sup> Yesusini pundu topa yundu nimbale: "I sekero mele nu kiniá naa pilkinu-na-kolo pe piliení." nirimu.

<sup>8</sup> Pitane yundu nimbale: "Nu nanga ye awilimu kene kiniá kepe pe kepe nuni nanga kimbutolo kulumiye paa naa tondoni, mólo." nirimu.

Yesusini nimbale: "Kulumiye naa tondondu liemu nu kinia na kinia pea kopu sepo naa molombolo." nirimu.

<sup>9</sup> Yesusiniaku nirimu-kulu pilipale Saimono Pitane, 'Kimbu ki kepe kangima pali kulumiye tondomba kinia paa kamu alieli-alieli pea kopu sepo andombolonje.' konopu lepa, nimbale: "Ye-Awilimu, aku sembá kene kimbu mindi mólo! Kimbu ki kepe kangima pali kulumiye tondou!" nirimu.

<sup>10</sup> Yesusini nimbale: "Yombo se yunga kangima pali kulumiye topale pe yu kolea senga pulimú kinia yunga kimbuma ma gilimuma kelepa kulumiye tolemo kinia yu kangima pali kelepa kake selemo. Kiniá ono kake sepili molemele, aku-na-kolo ono pali mólo." nirimu. <sup>11</sup> Yuni pilipale 'Ono molemelemanga ye sene na lipa nanga opatouma simba sekemo.' nimbapilipale 'Kanu yemo konopu kalaro molopili molemo.' nimbando ungu-iku topa "Ono pali kake sepili naa molemele." nirimu.

<sup>12</sup> Kanu-kinia yuni ononga kimbuma kulumiye topa pora sindipa, yunga olawale-pakolimu lipa pakopa kelepa mania molopale nirimumuni, ono mangilipa pilipa nimbale: "Nane kiniá ononga sendendumunga ulu-pulumu onone pilkimiliye?

<sup>13</sup> Onone na imbi lekole "Ungu Mane Sili Yemo" nilimilila, "Ye-Awilimu" nilimilila. Aku imbitolo papu lemele, na aku sipu moliomo. <sup>14</sup> Na ononga Ye-Awilimu molopo ononga Ungu Mane Sili Yemo molio-na-kolo pe kiniá kendemande-yombo koropamane selemele mele sepo ononga kimbuma kulumiye tondondu kene ono kepe 'Kendemande-yombo koropama mele molamili.' ningu anju yando onono kimbu kulumiye tondangila. <sup>15</sup> I ulu-pulumu nane 'Ono sangi.' nimbu lipu ora sindu kene onone aku siku pe pe kepe sangi. 'Kimbumundu mindi naa nikiru. 'Ono 'Yombo peangama molopole yomboma lipu naa tapondonmolo.' naa ningu, 'Kendemane-yomboma mele molamili.' ningu molangi.' nimbu i ulumu sendu..

<sup>16</sup> "Nane onondo paa sika nimbu sikirumu: "Kongono sendeli yombo sene yunga nokoli yemo 'Mania mele pupili.' yu 'Ola mele pambo.' manda naa nimbá. Yombo kongono pumba sendelemo yombo sene 'Yu kongono pumba sendepili.' nimba mundulimú yombomo 'Mania pulimú.' yu 'Olandopa mele molemo.' manda naa nimbá kene na ononga awilimu molopole ononga kongono kiri se sendendu aku mele ono yombo lupamanga aku siku kongono sendangila." nikiru. <sup>17</sup> Onone i unguma pilku kondokole nikiru mele senge kinia ono molko kondoko konopu singí." nirimu.

<sup>18</sup> "Nane "onondo" nikiru akumu onondo pali naa nikiru. Nane ononga konopuma kanopole 'Nanga yema molangi.' nimbu u nimbu taltorundu, aku-na-kolo 'Pulu Yemonga bokuna ungu se molemo mele aku sipa wendo opili.' nimbu nane ononga ye se nimbu taltorundu. Aku ungumu molemo mele i-sipa:

"Na-kinia pea ga nombo molemolo ye se  
na-kinia opa-tou molomba."

nilimú.

<sup>19</sup> "Aku ulumu wendo ombá kinia 'Na sika u molorumu, kiniá molopa mindi pulimú yemo.' ningu kuru mondangi.' nimbu aku ulumu u wendo naa opili nane aku ungumu ono nimbu sikiru. <sup>20</sup> Nane onondo paa sika nimbu sikirumu: "Yombo se "Nanga kongonomo sende-pu." nimbu lipu munduliu yombomo kolea senga pumba yombo se molemona pulimú kinia 'Papu okono. Pea molambili ou.' nilimú yombomone na kepe 'Pea molambili ou.' nilimúla. Kanu-kinia kanu yombo nando "Pea molambili ou." nilimú yombomone na lipa mundorumu ye Tata kepe "Pea molambili ou." nilimúla." nikiru." nirimu.

13:21-30

### *Judasini Yesusi Yunga Opa-Touma Lipa Simba Purumu Semanemo*

<sup>21</sup> Yesusini aku nimbale nirimumuni, yunga konopumu paa umbuna serimu-kulu yu lombili andoli yemando nimba sipa nimbale: "Nane ono paa sika nimbu sikirumu: Ono molkomele yemanga sene na lipa nanga opa-touma simba." nirimu.

<sup>22</sup> Yuni aku nirimu-kulu pilkuli lombili andolima onono anju yando kumbikerena neme-neme ningu kanokole 'Nawene aku sembamondo nikimunje?' konopu lieringi.

<sup>23</sup> Ononga ye se, kanumu Yesusini paa konopu mondorumu, aku yemo Yesusi molorumuna nondopa molorumu. <sup>24</sup> Akumunga, Saimono Pitane aku yemondo olo topa kiyongo nimba nimbale: "Yu nawendo nikimunje? Mangilku piliei." nirimu.

<sup>25</sup> Kanu-kinia lombili andoli kanumu Yesusi molorumuna nondopa pumba molopale yundu komuna olo topa nimbale: "Ye-Awilimu, nawendo ninuye?" nirimu.

<sup>26</sup> Yesusini pundu topa nimbale: "Nane kere-langi se lipu simbú ye akumundi nindu." nirimu. Aku nimbale kere-langi se lipa Saimono Isikeriote malo Judasi sirimu.

<sup>27</sup> Yesusini kere-langi sirimumu Judasi liltimu kinia yunga konopuna ,kurumanga nokoli, Setene sukundu purumu kinia Yesusini yundu nimbale: "Nuni ungu sení sekenomo welea pungu se-pu." nirimu, <sup>28</sup> aku-na-kolo kere-langi pea nongo moloringi yema Yesusini Judasindu ungu nirimumunga pulumu naa pilieringi. <sup>29</sup> Judasini ononga kou-walemo nokondolemomonga marene pilkuli, ' 'Pulu Yemone olionga anda-kolepalima Naa Topa We Omba Purumu mele pilimulúndu kere-langi nomolo mare pumba topo topa li-popili.' nimba nikimunje molo 'Yombo koropama lipa tapondopa kou se pumba si-popili.' nimba nikimunje.' konopu lieringi. <sup>30</sup> Judasi kere-langi sirimumu lipale waltikele ombo pena purumu. Ombo pena purumu kinia kolea simbulu topa pepili ombo pena purumu.

13:31-33,36-38

*Yesusini Pitando Yu Pe Mundupa Kelepa Bulu Simba Mele Nimba Para Sirimu Semanemo*

<sup>31</sup> Judasi Isikeriote pena purumu kinia Yesusini we lombili andoli ulkana pea moloringimando nimbale: "Kiniá Mania Ombo Mana-Ye Au Lierimu Yemonga imbimu paa olandopa molomba sekemo. Kanu-kinia yunga imbi paa olandopa molombamonga Pulu Yemonga imbimu kepe paa olandopa molomba. <sup>32</sup> Kanu-kinia Mania Ombo Mana-Ye Au Lierimu Yemonga imbi paa olandopa molombamonga Pulu Yemonga imbimu paa olandopa molomu liemu Pulu Yemone kanu yemonga imbimu kinia 'peatolo paa olandopa molopili.' nimbá. Aku nimbámo paa nondopa iseli mele nimbá.

<sup>33</sup> "Nanga bolangoma, na ono-kinia laye-kolo moltkoro. Pe onone na koroko kelenge. Juda ye awilima u aku sipu nindu mele kiniá onondo aku sipu nimbu sikiru. Na pumbú sekero kolea akuna ono manda naa onge." ,nirimu.,

13:34-35

*Ungu-Mane Konde Se*

<sup>34</sup> "Nane 'ono sangi.' nimbu ungu-mané kondengamo ono nimbu sikirumu: Ono anju yando konopu mondangi. Nane ono konopu mondondu mele ono anju yando aku siku konopu mondangila. <sup>35</sup> Ono anju yando konopu mondongi liemu aku siku senge kinia we-yombomane kanokole 'Ono nanga lombili andolima molemele.' ningu kanonge." nirimu.

13:36-38 (*Akumu yakondo 13:31-33 kanani.*)

<sup>36</sup> Saimono Pitane yu mangilipa nimbale: "Ye-Awilimu, nu sena puniye?" nirimu. Yesusini pundu topa nimbale: "Na pumbúna nu iseli-u manda naa oni. Aku-na-kolo pe nu sika lombili oni." nirimu.

<sup>37</sup> Pitane mangilipa nimbale: "Ye-Awilimu, nu puni aulkana na iseli-u nambi semuna manda lombili naa omboye? Na nu lipu tapondopo kolondu liemu mandala." nirimu.

<sup>38</sup> Yesusini pundu topa nimbale: "Nu sika na liku tapondoko koloniye? Nane nundu paa sika nimbu sikirumu: "Kera gulta u ko naa topili nuni ,pipili kolkole, wale yopoko nando kolo toko "Yu nawe? Na naa kanolio." nini." nikiru." nirimu.

## 14

14:1-14

*Yesusini "Lapa Molemona Yomboma Pungí Aulkamo Na Mindi." Nirimu Semanemo*

<sup>1</sup> Yesusini yunga lombili andolimando kelepa nimbale: "Ono konopumanga umbuna sepili mini-wale munduku naa molayo. Pulu Yemo ono 'Lipa tapondomba.' ningu kuru mondangi. Nane ono 'Lipa tapondomba.' ningu kuru mondangila. <sup>2</sup> Nanga Tatanga ulkana suluminia awisili lemó. Naa lelkanje nane onondo "Naa lemó." nimbu, nimbu silka. Aku-na-kolo sika lemómonga nane ononga molonge

koleamo pumbu sepo wamondo-pukuru. <sup>3</sup> We naala wamondombo. Ononga molonge koleamo pumbu sepo wamondopole nimbúmuni, pe na molombona ‘Ono pea molamili.’ nimbu ono limbu ombó. <sup>4</sup> Pumbú koleamonga aulkamo ono kanolemele.” nirimu.

<sup>5</sup> „Lombili andoli ye, Tomasini yundu nimbale: “Ye-Awilimu, nu puni koleamo olio naa kanolemolo. Pe kiniá olio aku koleamonga aulkamo nambi sepo kanolemoye?” nirimu.

<sup>6</sup> Yesusini yundu nimbale: “Na aulkamo, na sika ungumu, na konde molko mindi pungí ulu-pulumu. Yombo se Tata molemona pumbándo na molombona mindi manda ombá. Aulka se lupa mólo. <sup>7</sup> Onone na pilku kondoko molemolánje Tata pilielemolála. Aku-na-kolo kiniá nimbu sikiru kinia Tata yu pulu polko kanoko imbi sikimili.” nirimu.

<sup>8</sup> „Yu lombili andoli ye, Pillipuni yundu nimbale: “Ye-Awilimu, Lanie liku ora siyo. Kanopole olione “Manda.” nimulú.” nirimu.

<sup>9</sup> Yesusini yundu nimbale: “Pillipu, ono wale awisili na pea molemolo-na-kolo na Tata mele molio naa pilielemele lémo. Na kanolemele yombomane Tata kanolemele. Pe kiniá “Tata liku ora si.” nikinu akumu nambi semu-na nikinuye? <sup>10</sup> Na Tatanga konopuna sukundu molopo yu-kinia kopu sepo molio, yu nanga konopuna sukundu molopa na-kinia kopu sepa molemo, kanumu nane ‘Kolo topa niímú.’ ningú pilielemeye? Ungu onondo niliuma nanga nanu konopumuni pilipu naa niliu. Tata nanga konopuna sukundu molopale nane selio unguma yuni mindi selemo. <sup>11</sup> “Na Tatanga konopuna sukundu molio, yu nanga konopuna sukundu molemo.” nikiru akumu ‘Sika nikimu.’ ningú kuru mondayo. Molo ungumu mindi pilkuli ‘Sika nikimu.’ ningú we kuru naa mondongi liemu nane ulu selioma kanokole ‘Tatane manda selemo ulu-tondoloma mele mindi nane sika aku sipa selemo.’ ningú kanokole “Tata kinia na kinia ye selumu molembolo.” nikiru ‘Sika nikimu.’ ningú kuru mondaa.” nirimu.

**14:12-14**

*Yesusini “Nane Selio Mele Maniandopa, Onone Ulu-Tondolo Olandopama Senge.” Nirimu Semanemo*

<sup>12</sup> “Nane onondo paa sika nimbu sikirumu: “Nane molio mele kepe niliu mele kepe ‘Sika.’ ningú kuru mondonge yomboma nane ulu-tondoloma selio mele aku yombomane aku siku sengela. Aku-na-kolo nane ulu-tondolo serindumu koltalo mele serindu. Kiniá Tata molemona pumbúmunga onone ulu-tondolo awisili mele senge. <sup>13</sup> Nanga imbi leko, ‘nanga ningú senderinumunga nu molenona ombo mawa sekero.’ ningú, ulu se na mawa senge ulumu nane sembó. ‘Malone Lapanga imbi ambolopa paka tondopili.’ nimbu na aku siku mawa senge mele pilipuli sembó. <sup>14</sup> Nando ulu se molo méle se nanga imbi leko mawa sengi liemu nane mawa senge mele pali sembó.” nikiru.” nirimu.

**14:15-31**

*Yesusini “Pulu Yemonga Minimu Ombá.” Nirimu Semane Se*

<sup>15</sup> Yesusini ungu se pea nimbale: “Onone na konopu mondongi liemu nanga ungu-mane siliuma pilku liku senge. <sup>16-17</sup> Aku senge kinia nane Tata ononga nimbu mawa sendembo kinia yu Lipa Tapondopa Konopu Enge Sindeli se lupa ‘Ono-kinia kamu kopu sepa molopili.’ nimba akumu ono simba. Yu Ungu Sikama Lipa Ora Sili Minimu. We-yombomane yu naa kanoko yu naa pilielememonga kanu yombomane yu yando manda naa lingí. Aku-na-kolo na lombili andolima, yu ono-kinia kopu sepa molemo-na onone yu pilku imbi silimili. Pe yu ononga konopumanga molombala.

<sup>18</sup> “Ono mundupu kelepo pumbuli nimbúmuni, nane ‘Ono onono bolango kolomulu melema molangi.’ naa nimbú, mólo. Kelepo ono molongena ombó. <sup>19</sup> Pe nondoko we-yombomane na kamu naa kanonge. Aku-na-kolo onone na kanonge. Na konde

molopo mindi puliu-na ono kepe konde molko mindi pungí. <sup>20</sup> Aku enamonga onone pilkuli, 'Na Tatanga konopuna sukundu molio mele kepe, ono nanga konopuna sukundu molemele mele kepe, na ononga konopumanga sukundu molio mele kepe' pilingí. <sup>21</sup> Yombo se yu nane "Saa." niliu ungu-manema pilipa molemo yombomo yuni na konopu mondolemo. Yombo sene na konopu mondolemo yombomo Tatane kanu yombomo konopu mondomba. Nane kanu yombomo konopu mondopole 'Na pilipu molio mele piliepili.' nimbu yu molombana ombo seluna kopu sepo molopole molio mele lipu ora simbú." nirimu.

<sup>22</sup> Yesusini aku nirimu kinia ,yu lombili andoli ye, 'Judasi' nili se, Judasi Isikeriote mólo, Judasi se lupa, yuni Yesusi yundu nimbale: "Ye-Awilimu, nuni olio manjipu "lipu ora simbú." nikinu, we-yomboma nambi semu-na "Naa lipu ora simbú." nikinuye? Nambi sekole aku seniye?" nirimu.

<sup>23</sup> Kanu-kinia Yesusini pundu topa yu lombili andolimando nimbale: "Yombo sene na konopu mondoru liemu yuni nanga ungu-manema pilipa lipa sembá. Kanu-kinia kanu yombomo nanga Tatane konopu mondopale Tata kinia olto 'Yu pea seluna molamili.' nimbu yu molombana ombolo. <sup>24</sup> Na konopu naa mondolemo yombomone nanga ungu-manema pilipa lipa naa selemo. I nikiru pilkimili ungumu nanga mólo. Tatane na lipa mundorumu yemonga ungumu mindi." ,nirimu.,

14:25-31

### *Yesusini "Ono Konopu Pe Nipili Molangi." Nirimu Semanemo*

<sup>25</sup> "Na ono-kinia molopole i unguma pali niliu. <sup>26</sup> Aku-sipa na-kolo na nondopo sembomonga Tatane Ono Lipa Tapondólimu yando lipa mundumba. Akumu Mini Kake Sélimu. Mini Kake Sélimu yuni ono unguma pali mane sipa nimbá; nane onondo nirindu unguma pali se komu sindingí kinia aku ungumu kelepa nimba simba.

<sup>27</sup> "Na ,ono nondopo mundupu kelepo pumbúndu, "Ono konopu pe nipili molangi." nimbu iseli-u nikiru. "Na konopu peanga lepo molio mele ono konopu peanga leko molangi." nikiru. Nanga ungumu naa pilielemele yomboma konopu peanga lemele mele lupala; na konopu peanga lelio mele lupala. Nanga ungumu naa pilielemele yomboma walte konopu peanga leko walte mini-wale munduku selemene. Aku-sipa na-kolo ono na lombili andolima, "Na alieli konopu pe nipili molio mele ono alieli konopu pe nipili molangi." nikiru kene ono walte kepe konopu umbuna sepili naa molko mini-wale naa munduku konopu peanga leko mindi molangi.

<sup>28</sup> "Nane u nindumu ono piliengi. "Na ono mundupu kelepo pumbú. Pe kelepo ono molongena yando ombó." nindu piliengi kanumu. Tata yu olandopa na maniadopamonga onone na konopu mondolemolánje na Tata molemona pumbúmunga ono konopu silimolá. <sup>29</sup> Nane onondo "Pumbuli kelepo yando ombó." nikiru ungumu pe wendo ombá kinia ' 'Sika nirimu.' ningu kuru mondangi.' nimbili u naa pumbuli sembó mele onondo nimbu sikiru.

<sup>30</sup> "Ya ma-koleamo nokolemo ye nokoli ,Setene, okomo-na nane pe ono-kinia ungu awisili kelepo naa nimbú. ,Na mana molombo walemo pora nikimu. Yuni na 'Toko kondangi.' nimbá okomo,-na-kolo na naa nokolemo-na unguri we manda naa sembá. ,Nane 'Yuni na unguri sepili.' nindu liemu na manda sembá. We manda naa sembá.., <sup>31</sup> Aku-sipa na-kolo ' 'Mana-yombomane pali na Tata konopu mondolio.' ningu piliangi.' nimbu Tatane nando "Sei." nirimu ungu-manema pali pilipu lipu sembó." ,nimba Yesusini nirimu.,

,Aku nimbale, "Manda nikiru kene kiniá pamili waa." nirimu.

*Jesusini (1-8) "Na Unju-Waenemo, Ono Unju-Waene Kolama." Nimbale, (9-17) "Ono Onono Anju Yando Konopu Mondaa." Nirimu Semanemo*

<sup>1</sup> „Jesusiniyu lombili andolimando nimbale: „Na unju-waene sikamo. Tata yu unju-waene kalia nokolemo yemo. <sup>2</sup> Tatane nanga unju kola mongo naa tolemoma pali langopa wendo limú. Kola mongo tolemoma pali ‘Peanga sepa gilipa kamu mongo awisili topili.’ nimba yuni aku kolamanga méle kirima langopa wendo lipa sepa mimi selemo.

<sup>3</sup> “Na lombili andolima, ono ungu nimbu siliu kanumuni ,ononga konopumanga kalaro molorumuma kulumiye tondomu-na, ono „konopu,“ kake sepili molemele. <sup>4</sup> Unju kolama paka manda selemo kinia unjuna manda gilipa mongo tolemo, aku siku ono na-kinia kopu seko molko, na ono-kinia kopu sepo molombo kinia ono manda molko ulu-pulu peangama senge. Kola se kerepa mania ombo lemómo kelepa mongo naa tolemo. Kola unjuna ola paka sepa gilimúmu yu mongo tolemo. Aku siku ono na pea ‘Kopu sepo molamili.’ naa níngi liemu ono “Saa.” niliu mele manda naa seko nanga kongono manda naa sendenge.

<sup>5</sup> “Na unjumu, ono kolama. Kola paka sepale unjuna gilipa mongo tolemo mele ono na-kinia kopu seko molko na ono-kinia kopu sepo molopo aku semulu liemu nane “Saa.” niliu mele ono manda seko nanga kongonomo manda sendenge. Ono na munduku kelko ono na-kinia kopu seko naa molongi liemu nanga uluma ono manda naa senge. <sup>6</sup> Unju kola langoko wendo liku eltokole, kololemo kinia aku kolama liku maku toko sepena kalolemele kinia nolemo. Aku sipala, yombo se na-kinia kopu sepa naa molopale ulu peangama naa semu liemu unju kola kololima selemele mele yu aku siku senge.

<sup>7</sup> “Ono na-kinia kopu seko molko nanga unguma ononga konopumanga pepili pilku liku molongi liemu ulu se ‘Samboa!’ ningi, ungu se ‘Piliamboa!’ konopu leko, mélse mólo tombamo ‘Liemboa!’ ningi, aku siku pilkuli Tata-kinia ungu ningi mawa senge mele yuni sendembamo. <sup>8</sup> Ono nane “Saa.” niliu mele paa seko kondoko, nanga kongonomo paa seko kondonge kinia aku siku sengemone Tatanga imbi ambolko paka tondonge ola molombala. Senge mele yombomane kanokole ‘Ono paa sika Yesusinga lombili andolima molemele.’ konopu lengela.” „nirimu..”

<sup>9</sup> “Tatane na konopu mondolemo mele nane ono konopu mondolio. Nane ono ‘Kamu konopu mondambo.’ ningi molayo. <sup>10</sup> Tatane nando “Sei.” nilimú ungu-manema na sepo moliomonga yuni na kamu konopu mondolemo mele onone aku siku nane “Saa.” niliu ungu-manema pilku liku senji liemu aku siku sengemonga nane ono ‘Kamu konopu mondambo.’ ningi. <sup>11</sup> ‘Na konopu sipu molio mele ono aku siku konopu siku konopu manda pepili molangi.’ nimbu i unguma nimbu sikiru.

<sup>12</sup> “Nane “Saa.” niliu ungu-manemo i-sipa: ‘Nane ono konopu mondolio mele onone onono anju yando aku siku konopu mondangi.’ nimbu nikiru. <sup>13</sup> Yombo sene yunga pulu lemó yomboma konopu mondopale ononga nimba kolali sepa kolondomu liemu yuni konopu mondolemo mele olandopa, we-yombomane konopu mondolemele mele maniadopa.

<sup>14</sup> “Nane onondo “Saa.” niliu ungu-manema senji liemu ono nanga pulu lemó yomboma molonge. <sup>15</sup> Kiniá nane onondo kelepo “Nanga kendemande-yema.” naa nimbu, “Nanga pulu lemó yema.” niliu. Kendemande-yomboma ononga nokoli yemone uluma sepa konopu lepa andopa molemo mele ono naa nimba silimú naa kanoko naa pilielemonga kiniá onondo aku sipu “Nanga kendemande-yema.” ni naa niliu. „Ye senga pulu lemó yomboma mindi yemo yu andopa molemo mele nimba silimú pilielemele. Akumu pilipuli, nane onondo “Nanga kendemande-yema.” ni naa nimbu, Tatane nando nimba sirimu pilierinduma pali ono nimbu sirindu-kulu nane ono “Nanga pulu lemó yema.” niliu.

<sup>16</sup> “Ono onono na ‘Olionga Ye-Awili.’ ningu, ningu naa taltoringi. Nane nanu ono ‘Nanga yema molangi.’ nimbu, nimbu taltorundu. ‘Ono pungu, “Saa.” nimbú mele seko, nanga kongonomo sendangi. Aku ulu peanga sengema pora naa nimba we pepa mindi pupili.’ nimbu nane onondo “Nanga yema.” nimbu ono nimbu taltopo “Na lombili waa.” nirindu. Akumunga, Tata-kinia ungu ningu “Olio Ye-Awili Yesusinga yomboma molemolo.” ningu méle se mawa senge kinia yuni pilipale mawa senge mélema ono sipa ononga sendemba. <sup>17</sup> Nane ono ungu-mane sipuli “Onono anju yando konopu mondaa.” niliu mele nikiru.” nirimu.

**15:18—16:5**

*Yombomane Yesusinga Lombili Andolima Kinia Opa-Tou Molonge Semanemo*

<sup>18</sup> “We-mana-yombomane ono na lombili andolima kinia konopu kiri panjingí kanokole ‘U na-kinia konopu kiri panjeringi.’ konopu leko molangi. <sup>19</sup> Ono we-yomboma-kinia konopu seluna pupili molemolánje we-yombomane ‘ono olionga yomboma’ ningu konopu mondolemolá. Aku-sipa na-kolo ono we-yomboma-kinia ono manga-umbu selumu mólo. ‘Ono ma-koleana uluma munduku kelko nanga yomboma molangi.’ nimbu, nimbu taltorundumunga we-yombomane ono-kinia konopu kiri panjilimili.

<sup>20</sup> “Nane ono nimbu sirindu unguma konopumane pilku molangi. Nane u onondo nimbúndu: ‘Kongono sendeli yombo sene yunga nokoli yemo ‘Maniadopa molemo. Na yunga olandopamo molio.’ manda naa nimbá.” nirindu kanumu. Akumunga na mindili liku silimili mele ono kepe aku siku mindili liku singí. Nanga ungumu pilku liku sengena panjilimili yombomane ononga ungumu pilku liku sengena panjingíla.

<sup>21</sup> We-yombomane na lipa mundorumu yemo pilku imbi naa sikuli, ono nanga imbi leko kongono sendengemonga ono mindili liku singí. <sup>22</sup> Na ‘Pulu Yemone lipa mundorumu-na, yomboma molemelena ombo ungu se naa nilkanje ,na liku awi naa siku, bulu silimili mele naa selemolámonga, ulu-pulu-kiri selemelemonga mongo naa limolá. Aku-sipa na-kolo ,na sika orundu, ungu niliu mele pilielemelenga, “Ulu-pulu-kiri selemolo mele naa pilielemolo.” manda naa ningí. <sup>23</sup> Yombo se na-kinia konopu kiri panjilimú yombomone Tata-kinia kepe konopu kiri panjilimúla.

<sup>24</sup> Kongono lupa lupama, u yombo sene ulu-tondoloma naa serimu mele nane ononga suku-singina ombo naa selkanje onone na liku bulu siku ulu-pulu-kiri selemele mele naa selemolá. Aku-na-kolo ulu-tondolo serinduma kanokole kepe Tata olto-kinia konopu kiri panjilimili. <sup>25</sup> Aku-na-kolo ononga ungu-mane se Pulu Yemonga bokuna molemo mele wendo ombámonga aku sekemele. Bokuna ungu se molemo mele i-sipa:

“Ono na-kinia we konopu kiri panjilimili.”  
nimba bokuna molemo.” ,nirimu.,

**15:26—16:5**

*Pulu Yemonga Minimu Ombo Sembamonga Ungu Se*

<sup>26</sup> “Ono Lipa Tapondopa Konopu Enge Sindélimu Tata pea molembelena pumbuli lipu mundumbu akumu ombale nimbámone, nanga ulu selio mele ono nimba simba. Aku Lipa Tapondopa Konopu Enge Sindélimu yu Sika Unguma Lipa Ora Sili Minimu, yu Tata molemona molopale olemo Minimu. <sup>27</sup> Aku-sipa na-kolo Minimu yuni manjipa nanga mélemando naa nimba simba. Ono na pea u pulu polopo molorumulu mele kiniá yandopa molemolomonga ono kepe nanga ungu anju ningu sili yema molemelela.” ,nirimu.,

**16**

<sup>1</sup> “‘Onone na munduku kelko lo naa liengi.’ nimbu i unguma nikiru. <sup>2</sup> Yomboma maku toko Pulu Yemonga ungumu pilielemele ulkana yemane ono “Sukundu naa

waa!" ningu makoronge. Yombomane 'Pulu Yemonga kongonomo sendamili.' ningu ono nanga lombili andolima toko kondonge walemo sika wendo ombála. <sup>3</sup> Tata kinia olto piliei naa pilielememonga yombomane ono-kinia aku siku seko kinjingí.

<sup>4</sup> "Aku-na-kolo 'Aku uluma senge walemo wendo ombá kinia onone 'A, yombomane olio i-siku senge walemo Yesusini pe wendo ombá nimba liepi-liepi torumu walemo ya sika i wendo okomo lepomo.' ningu pilku molangi.' nimbuli pe ombá ono mindili nonge mele, kiniá u liepi-liepi topo nikiru. Na ono pea u molorumulu-kulu ono nimbu naa sirindu. <sup>5</sup> Aku-na-kolo na u mana lipa mundorumu yemo molemona pumbú sekeromonga kiniá u naa pumbuli onondo nimbu liepi-liepi topo sikiru.

**16:5-15**

#### *Jesusini Pulu Yemonga Minimuni Kongono Sembra Mele Nimba Sirimu Semanemo*

" "Na kiniá pumbú sekero." nikiru-na-kolo aku nikirumunga ononga ye sene "Nu sena pukunuye?" ningu naa mangilku pilkimili. <sup>6</sup> "Na pumbú sekero." nikirumunga ononga konopumanga sukundu meme kuluepe pemu-na pilkuli paa kondo kolkole aku naa mangilku pilkimili.' nimbu pilkiru. <sup>7</sup> Aku-na-kolo na pumbúmunga 'Yu pea kelepo kopu sepo naa molomolo lémo.' ninguli onone na kondo naa kolayo. Nane onondo paa sika nimbu sikirumu: "Na pumbúmunga ono lipu tapondombo. Na naa pundu liemu ono Lipa Tapondopa Konopu Enge Sindélimu naa ombá. Aku-na-kolo pundu liemu nane yando ono molongena yu lipu mundumbu pumbú." nikiru.

<sup>8</sup> "Yu yando ombale nimbámone, ulu-pulu-kirimanga perelemelemonga pulumu kinia konopuna ulu-pulu-kiri se naa pepa konopu sumbi silimunga pulumu kinia kotemonga pulumu kinia nimba sumbi sipa, yombomane kanumanga puluma ningu pilku sundulimili mele yuni lipa ora sipa nimbá. <sup>9</sup> Na Pulu Yemonga Malo molopo, yuni na lipa mundorumu-na mana mania orundu mele pilkuli yombomane na pilku mokoli seringi kanu ulumu yu ulu-pulu-kirimanga pali pulumu Minimuni nimba lipa ora sipa; <sup>10</sup> Pulu Yemo kanopa peanga pilielemo ulu-pulu peangama lipa ora simbando na Tata molemona pumbú kelko naa kanongemonga na ulu-pulu-kiri se naa sepo, se konopuna naa pepa konopu sumbi sipa pepili molorundu molio mele lipa ora sipa; <sup>11</sup> 'Kotemonga pulumu lipu ora siembo.' nimba ya ma-koleamo nokolemo ye nokoli 'Setene, mongo liltimumunga Pulu Yemone koronga 'Kote walemo wendo ombá kinia yu kamu mindili simbú.' nimba panjerimu mele lipa ora simbala. Lipu mundumbu Minimuni aku sipa uluma lipa ora simba.

<sup>12</sup> "Nane onondo ungu nimbú awisili we pelemo, aku-na-kolo kiniá nilkanje ono kála seko pilielemolá. <sup>13</sup> Aku-na-kolo Minimu, yu sika ungumanga pulumu, yu ombale nimbámone, yuni ungu sikama pali 'Pilku kondangi.' nimba akuma ono nimba simba. Yuni yuyu konopumuni pilimba mele naa nimba simba. Ungu-umbu tondolemoma komuni pilipale nimba simba. Ulu pe wendo ombá ungumanga u nimba simbala. <sup>14</sup> Na selio mele kepe molio mele kepe niliu mele kepe aku mélemanga yuni pilipale yando ono nimba simba kiniaaku sipa nanga imbiu ambolopa paka tondomba. <sup>15</sup> Tatanga mélema pali nangamonga-kolo pilipuli nane 'Minimuni nanga mélemanga pilipa yando ono nimba simba.' nikiru." ,nirimu."

**16:16-24**

#### *Jesusini Yu Lombili Andolima U Kamelena Mindili Sepili Molkole Pe Kelko Konopu Singimundu Nirimu Semanemo*

<sup>16</sup> "Nondoko onone na naa kanonge. Pe nondoko ,mele, kelko na kanonge." nirimu.

<sup>17</sup> Yu lombili andoli mare ono onono anju yando angelema ningu ninguli: "Oliondo nikimumu nambolka unguri nimbale nikimunje? "Nondoko onone na naa kanonge. Pe kelko nondoko ,mele, na kanonge." nimba, "Na Tata molemona pumbúmunga aku

sembá.” nikimu, nambolka unguri nimbale nikimunje? <sup>18</sup> Yu “nondoko” nikimumu nambolka nimbando “nondoko” nikimunje? Olio naa pilkimulu.” ningu moloringi.

<sup>19</sup> Onone yundu ‘Mangilipu piliamili kene.’ ningu konopu lieringi kinia Yesusi yuni pilipale nirimumuni, yuni onondo nimbale: “Ono anju yando angelema nikimili nane nindu mele ono na mangilku pilingindu nikimiliye? “Na nondoko onone na naa kanonge. Pe nondoko ‘mele’ kelko na kanonge.” nindu kanumundu nikimiliye? <sup>20</sup> Nane ono paa sika nimbu sikirumu: “Na sembomonga ono kola seko kondo kolonge. Aku-na-kolo we-yomboma konopu singí. Na lombili andolima ono u kameléna mindili sembá-na-kolo kelko na kanokole topele toko konopu singí.” nikiru.

<sup>21</sup> “Amboreyu bolango membá walemo nondopa wendo olemo kinia bolangomone yu peua tolemo kinia mindili nomba perelemo. Aku-na-kolo bolangomo kanopa lipale yu u umbuna sepili molemo mele komu sindipa yombo konde se mana molombando wendo olemo-na yu topele topa konopu silimú. <sup>22</sup> Ono aku sipala. Ambomane bolango mengendo mindili nolemele aku siku mele “Na ono mundupu kelepo pumbú.” nikirumunga ono kiniá kameléna mindili sepili molemele. Aku-na-kolo amborene bolango kamu membale kelepa konopu silimú mele nane ono kelepo kanombo kinia ono konopu singla. Kanu-kinia ono konopu siku molongemondo yomborene ono konopu naa siengi unguri manda naa senge.

<sup>23</sup> “Kanu-kinia na pumbúmunga Minimu ombá-na ungu nikirumanga pulumu pilkuli onone na unguri kelko mangiliei naa mangilingí. Nane onondo paa sika nimbu sikirumu: “Tatando mélse molo ungu se molo ulu se ‘Mawa samili.’ ninguli ningímunu, nane ononga nimbu sendembomonga ‘Nanga yomboma molemolo.’ ningu mawa senge kinia Tatane mawa seko mangilingí mélema ono simba.” nikiru.

<sup>24</sup> U onone nanga imbi mangilku mélse mawa naa seringi. Mawa same. Pe ono konopu paa manda singíndu lingí.” ‘nirimu..’

16:25-33

### *‘Yesusi Yu Pulu Yemo Pea Paa Sika Molkole Mana Mania Orumu.’ Ningukuru Mondoringi Semane Se*

<sup>25</sup> “Na lombili andolima, nane ono unguma nimbu simbundu alieli ungu-iku mindi tollo. Aku-na-kolo pe walte nane onondo aku sipu naa nimbú. Nanga Tatane ulu selemoma nane sumbi sipu nimbu simbú. <sup>26</sup> Aku walemonga nanga imbi leko mawa senge. Kanu-kinia ‘Nane Tata ononga nimbu mawa sendembo.’ ni naa nikiru, <sup>27</sup> mólo. Onone na konopu mondoko, na Pulu Yemo kinia molopole ya mana orundu onone ‘Sika aku serimu.’ ningu kuru mondolemele-na Tatane ono konopu mondolemomonga ono onono yu mawa senge mele yuyu pilimba. <sup>28</sup> U Tata molorumuna molopo mana mania orundu. Pe kiniá kelepo mana mundupu kelepo Tata molemona pumbú.” nirimu.

<sup>29</sup> Yu lombili andolimane ninguli: “A, kiniá ungu-iku naa toko sumbi siku mindi nikinumu olio pilipomolo. <sup>30</sup> Nu uluma pali pilku kondoleno. Mélse nu naa pilienomo yombo sene nu nimba simba mele manda mólo. Olio aku sipu pilipuli ‘Nu Pulu Yemo pea moltkole mana orunu.’ nimbu kuru mondolemolo.” niringi.

<sup>31</sup> Onone aku niringi kinia pilipale Yesusini onondo nimbale: “Na Pulu Yemo pea molopole mana orundu onone kiniá ‘Sika aku serimu.’ ningu kamu kuru mondokomelenje? <sup>32</sup> Piliame. Wale se wendo ombá, mólo, kanu walemo koronga wendo omu lémo, kanu walemonga yombo lupamane ono toko bulu-balú singí. Kanu-kinia ‘Na nanu molambo.’ ningu na munduku kelko onono yu-meles-meles onongaulkando pungímu. Aku-na-kolo Tata pea kopu sepo molembolo-na na nanu naa molio, mólo.

<sup>33</sup> “Ono ‘Na kuru mondokole konopu peanga leko molangi.’ nimbu kiniá ipulieli ono-kinia molopole i unguma nane onondo nimbu sikirumu. Ma-koleana ono

umbuna sepa mongo awisili ola olemo. Aku-na-kolo mana-yomboma enge nilimili akumu kanga-kolte pange sélimu, na paa ola, na paa enge niliu. Aku selio kene pilkuli ononga konopukundu tondolo pupili molangi.” nirimu.

## 17

*17:1—18:1*

*Yesusini Lapa Pulu Yemo Kinia Ungu Nimba Mawa Sembando (1-5) Yesusi Yu “Imbi Ola Molopili.” Nimba Mawa Sepale, (6-19) Yu Lombili Andolimanga Nimba Mawa Sendepa, (20-26) Yu Pe Kuru Mondonge Yombomanga Pulu Yemo Mawa Senderimu Semanemo*

<sup>1-2</sup> Yesusini yu lombili andolimando aku unguma nimba pora sipale nirimumuni, mulu-koleana olando-sipa kanopa nimbale:

“Tata, nane sembó ningu panjerinu walemo wendo okomo. Nuni yombo sirinu yomboma onondo pali nane ‘Konde molko mindi pangí.’ nipili.’ ningu, nane mana-yomboma pali ‘Nokopili.’ ningu, nunga Marena namba sirinu kene nunga imbi ‘Ola molopili.’ ningu nunga Marenanga imbi ambolko paka tondoyo.

<sup>3</sup> “Konde molko mindi pangí mele i-sipa: ‘Nu selumu mindi sika Pulu Yemo.’ ningu pilku, ‘Na nuni ‘yomboma nokopa kondomba ye se lipu mundumbu.’ ningu, ningu taltokole na liku mundorunu ye nokoli Karasimu.’ ningu pilku, olto pea kopu seko molemele molonge yomboma konde molko mindi pangí. <sup>4</sup> Nuni kongono na sirinu kanumu sepo pora sindumuni nunga imbi ambolopo paka tondondu. <sup>5</sup> Tata, ma-koleamo wendo naa opili nu pea molambili na imbi ola molopa tondolo pupili molorundu kanu mele ‘Kiniá na pea kelepo molambili.’ ningu u molorundu mele ‘Kelepo na aku sipa imbi ola molopa tondolo pupili pea molambili.’ ningu sei.” ‘nirimu.」

<sup>6</sup> “Mana-yombomanga nuni sirinu yema onondo nu tondolo pulinu mele kinia, paa olandopa moleno mele kinia, nimbu para sirindu. U ono nungama moloringi, pe na sirinu. Ono nunga unguma pilku liku seko moloringi mele molemele. <sup>7-8</sup> Nuni nando nirinu unguma nane onondo nimbu sirindu kinia, onone kanu unguma pilku likuli nu molorununa wendo orundu pilku kondokole ‘Nuni na sika mana liku mundorunu.’ ningu kuru mondokole aku siku seko moloringi-na kiniá mélema nuni na sirinu mélema pali nu molenona wendo olemo onone pilieemele.

<sup>9</sup> “Ononga nimbu nu-kinia ungu nimbu mawa sendekero. We-mana-yombomanga nu-kinia ungu naa nimbú, mólo. Nuni sirinu yema nunga yema molemele-na na ononga manjipu nu-kinia ungu nimbu mawa sendekero. <sup>10</sup> Nanga mélema pali nungamo, nunga mélema pali nangamo. Nuni sirinu yema ono molko kondolemelemone na imbi ola molemo. <sup>11</sup> Kiniá na nu molenona okoromonga na mana-yomboma kinia pea naa molemolo none sekemo. Aku-sipa na-kolo yema ono mana-yomboma kinia molemele mele molonge.

“Tata Kake Sélimu, na nu molonina ombó kinia na sirinu lombili andolima ono onono mana-yomboma pea molonge kinia ‘Olto yombo selumu mele molopo konopu seluna pupili molembolo kanu mele na sirinu lombili andolima ono aku siku yombo selumu mele molko konopu seluna pupili molangi.’ ningu nunga tondolo na sirinu akumuni ono nokoyo. <sup>12</sup> Na ono pea molorumulu kinia nunga tondolo na sirinu akumuni nane ono ‘ungu se naa sepili.’ nimbu nokorundu. Nane ono tapu serindu kinia se ultu pumba yomboma mindili nonge koleana pulimú aulkana naa purumu. Ye selumu mindi, nunga boku tondoringi ungu se wendo ombándo yomboma mindili nonge koleana pumbá selemo yemo mindi ultu molopa mindili nombá koleana pulimú.

<sup>13</sup> “Kiniá nu molenona okoromonga na konopu sipu kamelé akopo molio ‘Aku mele ono aku siku konopu peanga panjiku molangi.’ nimbu u na olando naa ombole ya ma-koleana molopo i unguma nikiru. <sup>14</sup> Nunga ungumu ono sipu pora sirindu. Na ya ma-koleamonga ye se mólo, aku siku ono ma-koleamonga yema mólolá. Oltonga yema molko oltonga ungu-manema pilku liku selemele-na mana-uluma manjiku pilku selemele yombomane ono konopu kiri panjiku ono-kinia opa-touma molemele. <sup>15</sup> ‘Ono ma-koleana wendo li.’ nimbu mawa naa sekero. Aku-na-kolo ‘‘Ya mana oltonga kongonomo sendeko molonge kinia, ulu-kirimanga pali ulu-pulumu pelemo „kuru,muni ono kondi topa sepa naa kinjepili.’ ningu nokou.’ nimbu i ononga nimbu mawa sendekero. <sup>16</sup> Na ma-koleamonga yemo naa molio mele ono ma-koleamonga yema naala molemele.

<sup>17</sup> “ ‘Ungu sikamone ono nunga manjiku molko ye kake selima molangi.’ ningu seyo. Nunga ungumu ungu sikamo. <sup>18</sup> Nuni na ma-koleana liku mundorunu mele nane ono ma-koleana lipu mundorundula. <sup>19</sup> ‘Ono konopu kake sepili molko nunga ningu manjiku molangi.’ nimbu na ‘konopu kake sepili nunga nimbu manjipu molambo.’ nimbu molio.” „nirimu..”

<sup>20-21</sup> “Tata, nane nanga lombili andolimanga manjipu mawa naa sendekero. Pe onone ungu ningu singíma ‘Na sika nunga malo ya mana liku mundorunu.’ ningu kuru mondunge yombomanga kepe mawa sendekero. ‘Nu nanga konopuna molenó, na nunga konopuna molio mele aku siku kanu yomboma pali yombo selumu mele konopu seluna pupili molangi.’ nimbu aku sipu ononga mawa sendekero. ‘Ma-koleamanga yombomane pali ‘Nuni na liku mundorunu-na orundu.’ ningu kuru mondangi.’ nimbu ‘kanu yomboma olto kinia yombo selumu mele konopu seluna pupili molamili.’ nimbu aku sipu mawa sendekero. <sup>22</sup> Nuni na ‘Imbi ola molopili.’ ningu sirinu ulumu nane ono sirindu. Akumu ‘Olto konopu seluna pupili molembolo mele ono aku siku konopu seluna pupili molangi.’ nimbu ono sirindu. <sup>23</sup> ‘Ono paa kamu konopu seluna pupili molangi.’ nimbuaku sipu “Nu nanga konopuna molenó mele na ononga konopumanga molambo.” nimbu mawa sendekero. Na konopu mondoleno mele nanga ungumu ‘Sika.’ ningu kuru mondolemele yomboma aku siku konopu mondoleno mele kepe ‘nuni na liku mundorunu mele kepe, ma-koleamanga pali yombomane piliangi.’ nimbu nane aku sipu nu mawa sepo ‘Ono paa kamu konopu seluna pupili molangi.’ nikiru.

<sup>24</sup> “Tata, ‘nuni na yombo sirinuma na molombona pea molopo, mamo u naa sambili na konopu mondokole ‘nanga imbimu ola molopa pa sepa tondolo pupili.’ ningu sirinu akumu kanangi.’ konopu lekero.

<sup>25</sup> “Tata Sumbi Nílimu, sika we-mana-yombomane nu naa kanolemele-na-kolo nane nu kanolio, yombo nanga ungumu pilku limilimane ‘Nuni na liku mundorunu-na orundu.’ ningu pilielemene. <sup>26</sup> Nane nu moleno mele ono nimbu sirindu. Pe nimbu sipu molombola. ‘Nuni na konopu mondoleno mele ono onono aku siku anju yando konopu mondangila. Na ononga konopumanga molambola.’ nimbuaku sipu nimbu sílie-sílie sepo molombo.” nimba Yesusini Pulu Yemo-kinia aku sipa nirimu.

## 18

<sup>1</sup> Yesusiaku sipa Pulu Yemo kinia nimba pora sipale nirimumuni, ipu liepili yu kinia yu lombili andolima kiniaaku koleamo munduku kelko no Kirone nekendo unju ollipi kalia lierimuna sukundupuringi.

18:2—19:42

## Yesusi Ka Siku, Kote Sendeko, Unju-Perana Ola Toko Kondoko, Óno Seringi Semanemo

**18:2-12**

### *Yesusi Ka Siringi Semanemo*

<sup>2</sup> „Ipulieli no Kirone nekendo unju ollipi kalia lierimuna puringi aku mele Yesusi alieli yu lombili andolima pea kanu kaliana puringi-kulu, Judasi Isikeriote ono aku kaliana alieli puringi mele pilierimu. Judasi yu Yesusi pe lipa Yesusi yunga opa-touma sirimu ye kanumu. <sup>3</sup> Kanu-kinia Judasini, ‘Yesusi akuna pea alieli pumbu molemolo-na yu akuna molomba.’ konopu lepale, akuna orumu. Yu ami-ye talape se kinia Pulu Yemo popo tondoringi ye awilima kinia Parisi yema kinia kanu yemane liku mundoringi ele-ye mare kinia akuna memba orumu. Ono kiya kandoko mengo, sepe-llamema kandoko mengo, opa seringi mélema mengo oringi.

<sup>4-5</sup> Yesusini yu nondoko senge mele pilipale, ono ‘Yesusi ka siengi.’ nirimu ye Judasi pea oringina Yesusi yu anju pumba ono mangilipa pilipa nimbale: “Ono nawe korokomeleye?” nirimu.

Onone pundu toko yundu ninguli: “Kolea Nasarete ye Yesusi korokomolo.” nirangi. Yesusini “Akumu na.” nirimu.

<sup>6</sup> Yesusini “Akumu na.” nirimu kinia ono anju bulu mini-mini punguli a toringi.

<sup>7</sup> Yuni kelepa ono mangilipa pilipa nimbale: “Ono nawe korokomeleye?” nirimu. Onone “Nasarete ye Yesusi korokomolo.” nirangi.

<sup>8</sup> Yesusini nimbale: ““Akumu na.” nindu kanumu. Onone na korongi liemu na pea molemolo yema ka naa siku ‘Yando pang.’ niee.” nirimu. <sup>9</sup> Yesusi pe sembá u nirimu mele ‘Paa sika aku sepili.’ nimba aku sipa opa-toumando “Nanga yema naa ambololi “Anju pang.” niee.” nirimu. Yuni u Pulu Yemondo nimbale: “Nuni na sirinu yemanga se ultu pumba mindili nonge aulkana naa pumu, ono pali nokopo kondorundu.” nirimu, kanu ungumunga pe sika se molopa naa kinjerimu.

<sup>10</sup> Kanu-kinia Saimono Pitane yunga lu-koyamo kulu topa wendo lipa Pulu Yemo popo tondoringi ye awili olandopamonga kendemande-ye se topa yunga komu se topa laka lenderimu, aku komumu wendo orumu. Kanu kendemande-yemonga imbimu Malkasi.

<sup>11</sup> Yesusini Pitando nimbale: “Nunga lu-koyamo kelko lakiliei! Na Tatane “Mindili nani.” nirimu mele naa nombóye?” nirimu.

<sup>12</sup> Kanu-kinia ami-yema kinia ami-yema nokoli yemo kinia Juda yombomanga ele-yema kinia onone Yesusi ka siku mengo puringi.

**18:13-14,19-24**

### *Anasi Molorumuna Yesusi Mengo Puringi Kinia Anasini Yu Mangilierimu Mele Semanemo*

<sup>13</sup> Yesusi ka tokole u-pulu-pulu Anasi molorumuna mengo puringi. Anasi yu Kayapasinga ambomonga lapa, yunga kolepa. Kayapasi yu kanu kalia-ingimunga Pulu Yemo popo tondoringi ye awili olandopamo molorumu. <sup>14</sup> Ye sene Juda ye awilimando u nimbale: “Ye se yombomanga pali kolali sepa kolondomba kinia papu.” nirimu kanumu Kayapasi yuni nirimu.

**18:15-18,25-27**

### *Pitane Wale Yopoko “Yesusi Naa Kanopo Naa Pilielio.” Nirimu Semanemo*

<sup>15-16</sup> Saimono Pita kinia Yesusi lombili andoli ye se kinia Yesusi lombili pungilí puringili. Kanu lombili andoli yemo Pulu Yemo popo tondoringi ye awili olandopamone kanopa imbi sirimu-na, kanu ye awili olandopamonga ulkana yombo maku toringi koleana sukundu Yesusi mengo puringina yu sumbi sipa purumu-na-kolo Pita we-yomboma maku toringi ulka kerepuluna ultu we nokopa gilierimu. Akumunga

Yesusi lombili andoli ye se molorumu kanumu kelepa yando omba kendemande-ambo ulka kerepulumu nokorumumundu "Pita sukundu opili." nimba mawa sepale Pita lipa memba sukundu purumu.

<sup>17</sup> Kerepulu nokorumu ambo kanumuni Pitando nimbale: "Nu ne yemonga lombili andoli ye seye?" nirimu.

Pitane "Mólo." nirimu.

<sup>18</sup> Iipulieli ali serimu-kulu kongono seli kendemande-yomboma kinia ele-yema kinia sepe kalkole kakapu seko pilku moloringi. Pita pea ono kinia sepe pilipa gilierimu.

**18:19-24**

*(Inia yakondo 18:13-14 kanani)*

<sup>19</sup> Pita kinia yomboma kinia aku siku ningu molangi Pulu Yemo popo tondoringi ye awili olandopamone Yesusi lombili andolima kinia yuni yomboma ungu-mane sirimu mele kinia Yesusi mangilipa pilierimu.

<sup>20</sup> Jesusini pundu topa nimbale: "Na mona molopo yomboma ungu-mane siliu. „Pulu Yemo popo toko kalolemele, ulka-tembelemo kinia, yomboma maku toko Pulu Yemonga ungumu pilielemele ulkama kinia aku ulka Juda yomboma pali maku tolemele ulkamanga ungu-mane siliu. Lopi sepo kiyongo nimbu ungu se naa niliu. <sup>21</sup> Aku selio-na nuni na ungu niliumu nambi semu-na mangilkinuye? Nanga ungu pilielemele yombomando mangilku piliayo. Niliu mele aku yomboma pilku molemele." nirimu.

<sup>22</sup> Jesusini aku nirimu kinia yu nokoringi ye se yu-kinia nondopa gilierimumuni yu kumbikerena laruwa topa nimbale: "Nu aku siku Pulu Yemo popo tondoli ye awili olandopamondo pundu toko nikinumu peangaye?" nirimu.

<sup>23</sup> Jesusini pundu topa nimbale: "Nane ungu nindumunga se nimbu kinjendu liemu ungu kiri nindu akumu ningu para siyo. Molo sika unguri nindu liemu nuni na nambi semu-na tokonoye?" nirimu.

<sup>24</sup> Kanu-kinia yu ka toringi akumu we pepili Anasini "Pulu Yemo popo tondoringi ye awili olandopa Kayapasi molemona mengo paa." nimba lipa mundorumu.

**18:25-27**

*(Inia yakondo 18:15-18 kanani)*

<sup>25</sup> Saimono Pita sepe pilipa gilierimu-na onone yundu ninguli: "Nu ne yemonga lombili andoli ye seye?" nirringi.

Yuni pundu topa „kolo topa, nimbale: "Na mólo." nirimu.

<sup>26</sup> Pulu Yemo popo tondoringi ye awili olandopamonga kendemande-ye se, kanu yemo kinia Pitane komu kari lierimu yemo kinia pulu lierimu kanumuni Pitando nimbale: "Nu ne yemo kinia unju ollipi kalia lemó koleana pea molongili kanondu kanumu sikaye?" nirimu.

<sup>27</sup> Pitane kelepa wale yopoko-sipa "Mólo." nirimu kinia kera-gulta ko pulu polopa torumu.

**18:28—19:16**

*'Romo Gapomano Ye Awili Sene Yesusi Kote Piliepili.' Ningu Paillate Molorumuna Mengo Pungu Kote Senderingi Semanemo*

<sup>28</sup> „Pulu Yemo popo tondoringi ye awili olandopa Kayapasi kinia Juda yombomanga kanjollo yema pali kinia onone Kayapasinga ulkana Yesusi kote sendeko pilku pora sikuli, „Juda yombomanga ye awilima Kayapasi munduku kelko ono nokorumu Romo gapomano yemonga ulkana Yesusi mengo puringi. Kolea tangomba muni lierimu kinia akuna mengo puringi. Mengo punguli ono Juda yombomanga ungu-mane se perimumu pilkuli 'Olio Romo yombo senga ulkana pumulú kinia kalaro mele molomba kene Pulu Yemone olionga anda-kolepalima Naa Topa We Omba Purumu

mele pilielemolo walemonga kongi sipisipi walo manda naa nomolo.' ningu pilkuli ono ulkana sukundu naa puringi.

<sup>29</sup> Ono pena ulka-kerepuluna gilieringi-kulu kanopale ono gilieringina Romo gapomano ye nokoli Paillate pena ombo onondo mangilipa nimbole: "Ono i yemo ulu nambi semu-na kote sendekemeleye?" nirimu.

<sup>30</sup> Onone pundu toko ninguli: "Yu mongo naa llikanje nu molonuna naa membo ombo silimolá." niringi.

<sup>31</sup> Paillatene nimbole: "Yu yando mengo punguli ono onono ononga ungu-mane pelemomane nilimú mele pilkuli yu kote sendeko umbuna singí mele onono pilku saa." nirimu.

Juda ,yombomanga awili,mane ninguli: "Aku samili mangali Romo gapomanomone olio ungu-mane sipa nimbole: "Ono we-yombomane yombo toko kondou naa kondaa." nilimú kanumu." niringi. <sup>32</sup> Aku niringimunga Yesusini yu kolomba mele u nimba sirimu aku sipa sika kolombando ono yuni nirimu mele naa pilkuli we onono pilkuli "Yu kolopili." ningu yu Paillate molorumuna mengo oringi. Yesusini " 'Na kolambo.' ningu unju-perana uku toko panjingí." u nirimu mele Romo gapomanomone mindi mongo liltingi yomboma aku sipa topa kondorumu, Juda yombomane aku siku manda naa seringi.

<sup>33</sup> Juda ye awilimane niringi mele pilipale, Paillate kelepa ulka awilimunga sukundu pumba Yesusindu "Ou." nimba yundu mangilipa nimbole: "Nu Juda yombomanga ye nokoli kingimu molenoye?" nirimu.

<sup>34</sup> Yesusini pundu topa mangilipa nimbole: "Nuni nunu pilkuli aku ungumu nikinunje molo nando yombo lupamane nu ningu singi-na pilkuli akumu nikinuye?" nirimu.

<sup>35</sup> Paillatene pundu topa nimbole: "Na 'Juda yere.' ningu pilkuli aku siku mangilkinuye? Nunga yomboma kinia nunga Pulu Yemo popo tondoli ye awilima kinia akumane nu na molonduna mengo ongi. Nu nambi senu-na liku mengo ongiye?" nirimu.

<sup>36</sup> Yesusini nimbole: "Na ya mana ye nokoli kingimu molopo mana-yomboma nokombo mele mólo. Sika mana ye nokoli kingimu molkanje nanga yombo talapemane na "Juda yombomane ka naa siengi." ningu opa selemolá. Aku-na-kolo na mana ye nokoli kingimu mólo." nirimu.

<sup>37</sup> Paillatene nimbole: "Aku liemu nu paa sika ye nokoli kingi se lepomo. Sika nikiruye?" nirimu.

Yesusini pundu topa nimbole: "Sika. Pulu Yemone 'Na kingimu molopili meaa.' nirimu-kulu meringila. 'Yomboma ungu sikama piliangi.' nimbu mana orundula. Yombo 'ungu sikama' yakala kolkole 'piliamili.' nilimili yombomane na pilielemele." nirimu.

<sup>38</sup> Paillatene ,ungu-taka tondopa, nimbole: "Ungu sika se pelemoye? Se naa pelemo." nirimu.

Aku nimbole yu kelepa Juda yema gilieringina penando pumba nimbole: "Yu mindili simbumunga mongo se límumu naa pilkiru. Yuni ungu se sepa naa kinjemu." nirimu.

**18:39—19:17**

*Romo Gapomano Ye Paillatene Yesusinga Kote Kamu Pilipale "Kolopili." Nirimu Semanemo (18:28 pulu polko kana)*

<sup>39</sup> Paillatene ,Yesusi unguri naa sepa kinjerimu konopu lepa 'Naa kolopili.' nimba pilipale, Juda yombomando nimbole: "Ono kinia na kinia selemolo ulu-pulu pelemomo pilipuli sambo. Kalia-ingi senga senga, ono Juda yombomane ononga anda-kolepali kolea Isipi moloringi kinia Pulu Yemone ono Naa Topa We Ombo

Purumu mele pilingindu kere-langi noringi walema wendo olemo kinia onone ka-ulkana perimu ye se imbi leko 'Wendo liku mundou.' ningu mawa selemele kinia nane kanu yemo wendo lipu ono siliu. Akumunga, kiniá kanu walemo wendo okomomonga 'Juda yombomanga ye nokoli kingimu wendo lipu ono siembo.' konopu lekemeleye?" nirimu.

<sup>40</sup> Aku-na-kolo onone anju tondolo munduku ninguli: "Aku yemo paa mólo. Barapasi wendo liku si!" niringi. (Barapasi yu Romo gapomano kinia opa serimumunga ka siringi yemo.)

## 19

<sup>1</sup> Aku niringi-kulu pilipale Paillatene Yesusi lipa Romo ami-yemando "Ka-pultane taa." nirimu. <sup>2</sup> Aku sekole onone yu ungu-taka tondoko, 'Yu "Ye nokoli kingimu molio." nimumunga yu ye nokoli kingi se none sepili.' ningu, mulu-maminia kondoli peanga se yunga pakondoko, unju-ka koko mololi se mulkowe seko 'Ye nokoli kingimunga waniemo.' ningu pengena mere mundunduku <sup>3</sup> yu gilierimuna pungu "Juda yombomanga kingimu, nu akuna gilinuye?" ni-pu-pu seko, yu kumbikerena laruwa toringi.

<sup>4</sup> Paillate kelepa penando omba Juda yombomando nimbale: "Kanayo! 'Yu mongo se línumunga pilipuli yu manda tombo mele mólo.' ningu piliangi.' nimbu ono molemelena yu membo okoro." nirimu. <sup>5</sup> Kanu-kinia Yesusi ka koko mololini seli wanie karaono none sélimu kinia wale-pakoli kondolimu pakopa wendo orumu kinia Paillatene onondo nimbale: "Yemo i okomo kanaa!" nirimu.

<sup>6</sup> Pulu Yemo popo tondoringi ye awilima kinia ononga kendemande ele-yema kinia onone Yesusi penando kokele orumu kanokole sumbi siku ninguli: "Kolopili, unju-perana ola uku toko panjeyo! Kolopili unju-perana ola uku toko panjei!" niringi.

Aku-na-kolo Paillatene nimbale: "Na mólo. Na yu mongo línumunga topo kondombo mele naa pilkiru kene onone yu mengo pungu unju-perana ola uku taa!" nirimu.

<sup>7</sup> Juda yombomanga awilimane ninguli: "Olianga ungu-mané se pelemomone nimbale:

'Yombo sene Pulu Yemonga imbi lepa

ungu-taka tondomba kinia,

kanu yombomo kolopili toko kondangi.' nilimú,

aku ungu-manemo pilipuli yuni "Pulu Yemonga Malo molio." nimumunga pilipuli 'Kolopili.' nimbu pilkimulu." niringi.

<sup>8</sup> Onone "Yu "Pulu Yemonga Malo molio." nirimu." niringi-kulu Paillatene pilipale yu paa kamu pipili kolopale, <sup>9</sup> kelepa ulka awilina sukundu pumba Yesusindu mangilipa nimbale: "Nu sena molko orunuye?" nirimu, aku-na-kolo Yesusini yundu pundu topa ungu se naa nirimu.

<sup>10</sup> Ungu se naa nirimu-kulu Paillatene yundu nimbale: "Nando 'Ungu se naa nimbú.' konopu lekenoye? Nanga tondolo pelemomone "Nu we pani." manda nimbúla; "Nu kolani unju-perana ola uku tangi." manda nimbúla. Aku nikiru ungumu naa pilkinuye?" nirimu.

<sup>11</sup> Yesusini pundu topa nimbale: "Nunga tondolo pelemomone na ungu se manda naa selena. Olandopa Molemo Yemone 'Nuni na-kinia sani.' nimbá mele mindi sení. Akumunga nuni na sení mele ulu-pulu-kiri kanga mele sení. Ye na 'Kolambo.' nimba memba omba nu simu yemonga ulu-pulu-kiri akumu awilimu." nirimu.

<sup>12</sup> Yesusini aku nirimu pilipale Paillatene Yesusi yu "We pupili." nimbá aulka se kororumu, aku-na-kolo Juda yombomane tondolo munduku ni-pu-pu seko ninguli: "'Na ye nokoli kingi se molio." nilimú ye se Romo Gapomano Ye Paa Awili Kumbina Sisa kinia opa-toumu molemo-na nuni aku "Kingi se molio." nilimú yemo "We

pupili." ninu liemu aku siku senimunga nu Romo Gapomano Ye Paa Awili Kumbina Sisamonga opa-tou se liku tapondonimunga nu kinia Sisa kinia pulu naa lemó." niringi.

<sup>13</sup> Aku niringi pilipale Paillatene Yesusi memba penando omba, kolea se akumundi 'kou-polomo' niringina pumba kote pilimba kongonomo mania molopa serimu polona pumba mania molorumu. (Kou-polomondo Juda yombomanga unguna 'Gapata' niringi.) <sup>14</sup> Aku kote senderingi walemo yu kiniá mele. Opali Pulu Yemone Juda yombomanga anda-kolepalima Naa Topa We Ombo Purumu mele pilku kongi sipisipi walomo nonge walemo wendo ombá. „Aku koro molonge walemo, wendo ombá pilkuli kiniá mele Juda yombomane kere-langi nongema liku undu-undu siringi walemo, kanu walemonga awi-tangoli mele, Paillate-kinia Yesusi kote senderingi. Paillate kote pilimba polona ombo mania molopale nirimumuni, Juda yombomando nimbole: "Ononga ye nokoli kingimu kanaa!" nirimu.

<sup>15</sup> Aku-na-kolo onone tondolo munduku ninguli: " "Kolopili." niyo! "Kolopili." niyo! Unju-perana ola uku toko panjei!" niringi.

Paillatene mangilipa nimbole: " 'Ononga ye nokoli kingimu kolopili.' nimbu unju-perana ola uku topo panjambo.' konopu lekole nikimiliye?" nirimu.

Pulu Yemo popo tondoringi ye awilimane pundu toko ninguli: "Olionga ye nokoli kingi se lupa naa molemo. Romo Gapomano Ye Paa Awili Kumbina Sisamo mindi." niringi.

<sup>16</sup> Kanu-kinia Paillatene kamu nimbole: "Manda, 'Unju-perana kolopili.' ningu mengo pungu unju-perana uku toko panji-paa." nirimu.

Paillatene aku sipa nirimu kinia Romo ami yemane yu ambolko liku mengo punguli <sup>17</sup> yu unju-pera se siringi, akumu yu yuyu memba Jerusalleme ultu purumu.

**19:17-27**

### *Yesusi Unju-Perana Ola Uku Toko Panjeringi Semanemo*

Yesusi unju-pera siringimu memba pupili ono Jerusalleme munduku kelko 'Kolea Penge Bele' nilina mengo puringi. ('Kolea Penge Bele' kanumundu Juda yombomanga unguna 'Golkota' niringi.) <sup>18</sup> Aku koleana Yesusi unju-perana ola uku toko panjeringi. Ye talo pea unju-pera talonga uku toko panjikuli, se ekendonga anjiku se ekendonga anjiku Yesusi suku-singina anjeringi.

<sup>19</sup> Paillatene "Yesusinga unju-perana ola imbi toko mondaa." nirimu mele toko mondoringila. Akumu i-sipa:

**KOLEA NASARETE YE YESUSI, JUDA YOMBOMANGA YE NOKOLI KINGIMU**  
ningu toko mondoringi. <sup>20</sup> Yesusi unju-perana ola uku toko panjeringi koleamo Jerusalleme nondopa lepa, imbi unju-perana ola toringima Juda yombomanga ungumu kinia, Romo yombomanga, LLatini ungumu kinia Giriki ungumu kinia, ungu lupa yopoko akupokonga nengu toko mondoringi molorumu-kulu aku imbima Juda yombo awisilini kanoringi. <sup>21</sup> Juda yombomanga Pulu Yemo popo tondoli ye awilimane kanu imbima kanoko kiri pilkuli Paillatendo pungu ninguli: "Nuni "Juda yombomanga ye nokoli kingimu" nengu "Akumu imbi taa." ninu kanumu manda naa sekemo. „Yu olionga kingimu mólo kene, 'Aku yemone "Na Juda yombomanga kingimu molio." yu yuyu nimu.' "Aku siku imbi taa." ni." niringi.

<sup>22</sup> Paillatene pundu topa nimbole: "Nane imbi "Toko mondaa." nindu aku ungumu papu tongi. Kelepo ungu se naa nimbú. U tongi aku ungumu molopili." nirimu.

<sup>23</sup> Ami-yemane Yesusi unju-perana ola uku toko panjiku pora sikuli, yunga mulu-maminia, kulku taltoringima, liku, ono ye kise lingí mele moke seko liltingi. Aku sekole wale selu mindi, sukundu pakorumumu, we lierimu. Akumu suku-singi senga mo sei naa seko we sulumu seringi-kulu <sup>24</sup> ami-yemane ninguli: "Imu olá naa tamili kene ye selu manjipa lipili kene u kou-kate samili." niringi. Aku seringi mele Pulu

Yemonga bokuna ungu se molemomone pe aku siku senge u nirimu mele wendo orumu. „Konane torumu yemone yu yuyu-kinia kepe seringi mele kanopale torumu mele, bokuna molemomone nimbale:

“Nanga mulu-maminama moke seko liku,

nanga mania pakolio walemo

“Ye selu mindi lipili.”

ningu kou-kate sengi.”

nirimu, aku mele seringi.

<sup>25</sup> Yesusi unju-perana ola perimu akuna nondopa yunga anumu keme, anumu-papamo keme, Killiopasinga ambo menu Maria keme, kolea Makatalla ambo Maria keme, aku amboma gilieringi. <sup>26</sup> Anumu kinia anumu nondopa gilierimu ye Yesusi konopu mondorumu yemo kinia Yesusini kanopale anumundu “Andi yemo nunga malo molopili.” nimba, <sup>27</sup> kanu lombili andoli yemondo “Andi ambomo nunga aminia molopili.” nirimu. Aku nirimu pilipale kanu lombili andolimuni Yesusi anumu lipa yunga ulkando memba pumba nokopa molorumu.

**19:28-42**

*(28-38) Yesusi Unju-Perana Kolopa Pora Sirimu Kinia (38-42) Yu Óno Seringi Semanemo*

<sup>28</sup> Pe Yesusini yunga kongonoma pali sepa pora sirimu pilipale, “Na no nonowale sekemo.” nirimu. Aku ungu nirimumu ungu se u niringi Pulu Yemonga bokuna molemomone ulu se pe wendo ombá mele pilipale ‘Wendo opili.’ nimba aku sipa nirimu. <sup>29</sup> No-waene kombili seli mingi se akuna lierimu kanokole ulú-pinja melse liku no-waene akuna suku mundukuli, pinja melemo no pepili unju isopo kola sene unju toko olando siku Yesusinga kerena kopondoringi.

<sup>30</sup> Yuní nomo nombale “Nanga kongonomo pora nikimu.” nirimu. Aku nimbale ma kanopa yunga pengemo maniendo sipa mundupa ‘Kiniá kolambo.’ nimba yunga minimu “Pu.” nimbale yu kolorumu.

<sup>31</sup> Yu kolorumu walemo akumu kiniá mele, opali mele ononga „koro molonge, wale Sambate olandopa se wendo ombá serimu. Sambate walemo wendo ombá kinia koro molongendo kiniá mele, mélema liku undu-undu siringi walemo. Akumu pilkuli Juda yombomanga ye awilimane ‘Opali Sambate walemo kinia yema unju-perana ola we penge manda naa sembá.’ ninguli onone Paillatendo pungu mawa seko ninguli: “Yema kiniá mania liemili kene, ‘Ono kiniá mindi waltikele kolangi.’ , ningu “Ononga kimbuma elke tondaa.” ni.” niringi.

<sup>32</sup> Kanu-kinia ami-yema ongole kumbi leko Yesusi kinia wikindunga perimu yemonga kimbutolo elke tondoko, pe merekendonga perimu yemonga kimbutolo elke tondoringi. <sup>33-34</sup> Aku-sipa na-kolo Yesusi perimuna ongo yu kanoringi kinia yu koronga kolorumu kanokole kelieringi. Yunga kimbutolo elke naa tondoringi-na-kolo ami-ye sene Yesusinga wanguna tolone torumu, akuna meme kinia no kinia wakamaka orumu.

<sup>35</sup> Ye aku seringi mele mongone kanorumu yemone seringi mele semanemo topa sirimu. Aku yemonga ungumu sika. Yu ‘Sika nikiru.’ nimba pilipale ‘Ono i semanemo pilingí yombomane pilkuli ‘Yesusi yu sika.’ ningu kuru mondangi.’ nimba i semanemo topa silimú. <sup>36</sup> Ulu pe wendo ombá Pulu Yemonga bokumuni u nirimu ulu pokore sika wendo ombá onone aku siku Yesusi-kinia seringi. Pulu Yemonga bokuna molemo ungu se i-sipa:

‘Yunga belemanga selu kepe elke naa tondonge.’

nimbale molemo. <sup>37</sup> Pulu Yemonga bokuna molemo ungu se pea i-sipa:

‘Tolone tonge yemo neme-neme ningu kanonge.’

nimbale molemo.

<sup>38</sup> Yesusi kolopa pora sirimu kinia pe kolea Arimatia ye Josepo pumba Paillatendo "Yesusinga ónomo na si." nirimu. Josepo yu Yesusinga ungumu pilipa lipa molorumu ye se, aku-na-kolo Juda ,ye awili lupa,ma pipili kolopale mona lombili naa andopa kiyongo nimba Yesusinga unguma pilipa molorumu.

"Ónomo si." nirimu kinia

Paillatene "Manda, li." nirimu kinia Josepo yu ombo ónomo mania liltimu. <sup>39</sup> Ye se, u walte ipulielikundu Yesusi molorumuna purumu pea ungu ningu moloringili ye se, yunga imbi Nikodimasi, kanu yemo yu Josepo pea oringili. Yu unju talonga unju to liku akumuni wambola muna toli se selemele akumu awisili, yunga umbuna teti paip killokaram mele, memba orumu.

<sup>40</sup> Olo pungu Yesusinga ónomo mania likuli niringilimuni, „Juda yombomane óno sengendo seringi mele pilkuli sengelendo, múlu se liku olo-mala toko, unju to-tolone seringi wambolamo ónomonga kandokole ónomo okoringili. <sup>41</sup> Yesusi unju-perana ola toringi koleana unju kalia se lepa, akuna kou-kande se lierimu. Kanu kou-kandena yombo-óno se u naa taltoringi, yu mindi pulu-pulu taltoringili. <sup>42</sup> Yesusi óno seringili walemo yu kiniá mele, opali mele „koro moloringi, wale Sambatemo nondopa wendo ombá serimu. Sambate walemo wendo ombá kinia koro molongendo kiniá mele, mélema liku undu-undu siringi walemo. Sambate walemo nondopa wendo ombá serimu pilkuli aku óno seringi kou-kandemo nondopa lierimu-kulu Yesusi akuna óno seringili.

*Kolomongo-Awili 20-21tolo*

## **Yesusi Lomboropa Ola Molorumu Kanoringi Mele Semanemo**

### 20

*20:1-10*

*Yesusinga Ónomo Taltoringi Kou-Kandena Ónomo Naa Lierimu Kanoringi Semanemo*

<sup>1</sup> „Koro moloringi, wale Sambatemo pora nimba, ononga pulu-pulu kongono walemo wendo orumu kinia kolea simbulu topa pepili paa muni-kinia-u kolea Makatalla ambo Maria Yesusinga ónomo taltoringi kou-kandena ombo kanorumu. Ombo kanopale kou-kande kerepulumu pipi siringi koumu perele-marele pumba ekendonga lepa kerepulumu we lierimu kanorumu. <sup>2</sup> Kanopale yu lisipa pumba Saimono Pita kinia Yesusi lombili andoli Yesusini u konopu mondorumu yemo kinia moloringilina pumba nimbale: "Yombomane olianga Ye-Awilimu óno-koleana wendo língi. Yu taltongi koleamo olio naa pilkimulu." nirimu.

<sup>3</sup> Aku nirimu kinia pilkuli Pita kinia Yesusi lombili andoli ye se akumu kinia óno seringi kou-kandena pungilí puringili. <sup>4</sup> Lisiku punguli, lombili andoli ye se akumuni Pita topa akilendepa yu kumbi lepa óno seringi kou-kandena purumu. <sup>5</sup> Pumba kou-kandena wake sepa kanopale Yesusi okoko óno seringi mulu-maminiamma we lierimu kanorumu, aku-na-kolo yu sukundu naa purumu.

<sup>6</sup> Kanu-kinia Saimono Pita akilepa ombo kou-kandena sukundu pumba kanopale, yu okoko óno seringi mulu-maminiamma óno seringi koleana we lepa, <sup>7</sup> yunga pengena ka toringi mulu-maminiammo yunga penge lierimu koleana ka toringi mele we lierimu kanorumu. <sup>8</sup> Kanu-kinia lombili andoli kumbi lepa orumumu yu kepe sukundu pumba kanopale, „Yu paa, sika „lomboropa wendo pumu lepomo.“ nimba kuru mondorumu. <sup>9</sup> (Pulu Yemonga bokumuni Yesusi lomboropa ola molomba u nimba sirimu-na-kolo Yesusi sika lomboropa ola molorumu u naa kanokole yu lombili andolimane kanu ungumu naa pilku kondoringi. Yu kolorumu kinia 'Kamu kolomu.' konopu leko, 'Lomboropa ola molomba.' konopu naa lieringi.)

<sup>10</sup> Kanoko pora sikuliyu lombili andoli yetolo kelko ulkando puringili.  
<sup>20:11-18</sup>

*Makatalla Ambo Mariane Yesusi Lomboropa Ola Molorumu Kanorumu Semanemo*

<sup>11</sup> Kolea Makatalla ambo Maria Yesusi lombili andoli yetolo kumbi leko puringili kinia akilepa ombale Yesusi óno seringi kou-kande kerepuluna kola sepa gilierimu. Kola sepa gilipale kou-kandena sukundu wake sepa kanorumu kinia <sup>12</sup> mulu-koleana angello talo wale-pakoli kake seli talo pakoko Yesusi óno u lierimuna moloringili kanorumu. Se yunga penge u lierimuna molopa, se yunga kimbu lierimuna molorumu.

<sup>13</sup> Olone yundu mangilkuli: "Ambomo, nambi semu-na kola sekenoye?" nirimili.

Yesusi lomboropa ola molorumu mele naa pilipa yuni nimbale: "Nanga Ye-Awili mu yu liku mengo pungu taltongi koleamo na naa pilkiru." nirimili. <sup>14</sup> Aku nimbale yu topele topa kanorumu kinia yunga bulkundu Yesusi gilierimu kanorumu. Aku-nakolo akumu Yesusi nimba kanopa imbi naa sirimu.

<sup>15</sup> Yuni nimbale: "Ambomo, nu nawe korokole kola sekenoye?" nirimili.

Yesusi yu 'kalia tapu-yemo' konopu lepale Makatalla ambo Maria yuni nimbale: "Yemo, nuni Yesusi mengo punu liemu taltonu koleamo na ningu siyo. Yu lipu membo pambo." nirimili.

<sup>16</sup> Yesusini yundu nimbale: "Maria." nirimili.

Yu gilierimuna ambomo kamu topele topa sumbi sipa kanopale Juda yombomanga Ipuru-ungu nimbale "Raponai." nirimili. (Akumunga pulumu 'Ungu Mane Sili Yemo'.)

<sup>17</sup> Yesusini nimbale: "Na Tata molemona kelepo olando u naa pundu kene na naa amboloyo. Nanga genupilima molemelena pungu onondo ningu siku ninguli: " "Na kinia ono kinia olionga Lapa Pulu Yemo molemona kelepo olando pukuru." nimu." ni." nirimili.

<sup>18</sup> Kanu-kinia Maria yu Yesusi lombili andolima moloringina pumba yu Ye-Awili mu kanorumu mele kinia Ye-Awili mu yuni nirimili mele kinia pumba semane topa sirimi.

<sup>20:19-23</sup>

*Yesusi Lomboropa Ola Molorumu Tomasi Pea Naa Molangi Lombili Andolimane Kanoringi Semanemo*

<sup>19</sup> Yesusi lomboropa ola molorumu kanu walemo Juda yombomanga pulu-pulu kongono wale lierimu kanumunga ipupini lepa kolea kalá torumu kinia lombili andolimane Juda ye awilima pipili kolikole niringimuni, ono moloringi ulkamo lloko toko molangi Yesusi ombo ono moloringina gilipa onondo nimbale: "Ono konopu pe nipili molaa." nirimili. <sup>20</sup> Aku nimbale, 'Na toringi uruma kanokole 'Na sika ononga Ye-Awili ombo gilkimu.' ningu piliangi.' nimba yunga kitolo kinia wanguna kinia lipa ora sirimi. Ye-Awili kanokole onone konopu paa awili seko siringi.

<sup>21</sup> Yesusini onondo kelepa nimbale: "Ono konopu pe nipili molaa. Tatane na lipa mundorumu mele ono nane lipu mundukurula." nirimili. <sup>22</sup> Aku nimbale yuni ono moloringina kere-múlumu popo topa ultu mundupa nimbale: "Mini Kake Sélimu ononga konopumanga molopili lieyo. <sup>23</sup> Onone yombo se ulu-pulu-kiri sembama 'Ombo mania pupili.' ningi liemu manda kanu ulu-pulu-kiri sembama ombo mania pumba pora simba. Molo yombo senga ulu-pulu-kirima 'We pepili.' ningi kinia manda kanu yombomanga ulu-pulu-kirima we pemba." nirimili.

<sup>20:24-29</sup>

*Yesusi Lombili Andolima Tomasi Pea Molkole, Yesusi Yu Kelepa Yando Orumu Kanoringi Semanemo*

<sup>24</sup> Yesusi lombili andolima moloringina Yesusi lomboropa ola molopale u orumu kinia ononga ye se naa molorumu. Kanu yemo Tomasi. (Yunga imbi se "Didimasi"

niringila.) Yu Yesusi lombili andoli ye rurepo akumanga sela. <sup>25</sup> Ye lupamane “Ye-Awilimu ya omu kanomulu.” niringi kinia

yu ‘Kolo tongi.’ konopu lepa nimbole: “Nanga mongomone yunga kína pirimuni toringi urumu naa kanopo, akuna nanga ki-sundumu sukundu naa mundupu, tolone wanguna toringina nanga kimu sukundu naa mundondu liemu ‘Yu lomboropa ola molomu.’ nimbu kuru naa mondombo, paa mólo.” nirimu.

<sup>26</sup> Pe wale engaki ombo purumu kinia Yesusi yunga lombili andolima kelko Tomasi pea ulkana sukundu moloringi. Ono ulka moloringimu kunama pali lloko toringi-na-kolo Yesusi ombo ono moloringina gilipale, “Ono konopu pe nipili molaa.” nirimu. <sup>27</sup> Nimbole yuni Tomasindu nimbole: “Nunga ki-sundumuni nanga kimu simbi tondoko kanuyo. Nanga wanguna nunga kimu siniu siku mundukuli kanuyo. Kanokole na ‘Lomboropa ola manda naa molomba.’ ningu pilkinu mele naa seko, ‘Sika lomboropa ola molomu.’ ningu kuru mondou.” nirimu.

<sup>28</sup> Tomasini yundu nimbole: “Nanga Ye-Awilimu, nanga Pulu Yemo.” nirimu.

<sup>29</sup> Kanu-kinia Yesusini yundu nimba sipa nimbole: “Na kanokole ‘Sika lomboropa ola molomu we molemo.’ ningu kuru mondokono. Na naa kanokole ‘Yu sika lomboropa ola molorumu kiniá we molemo.’ ningu kuru mondonge yomboma ono Pulu Yemone “Konopu peanga pepili molko kondangi.” nilimú aulkana molonge.” nirimu.

**20:30-31**

### *Jonone I Boku Torumumunga Pulumu Nimba Sirimu Semanemo*

<sup>30</sup> Yesusi lombili andolima kanoko molangi Yesusi yuni ,Pulu Yemone yu lipa mundorumu-na ombo molorumu, yu Pulu Yemo kinia kopu sepa molopa kongono senderimu mele, lipa ora sirimu ulu-tondolo awisili serimu, kanu uluma pali i bokuna naa torundu, pokore mindi torundu. <sup>31</sup> Aku-na-kolo ‘Yesusini ononga nimba senderimumunga ono alieli molko kondoko mindi pangí.’ nimbu ‘ ‘Pulu Yemone “Ono nokopa kondomba ye se lipu mundumbu.” nimba u nimba taltorumu yemo, pe Yesusi yu sika kanu ye nokoli Karasimu orumu.’ ningu kuru mondoko, ‘Yu sika Pulu Yemonga Malo.’ ningu kuru mondangi.’ nimbu i boku kanga-kolte torundu. Kanu-kinia ono sika aku siku ningu kuru mondonge kinia yuni ya ma-koleana ononga nimba senderimumunga ono alieli molko kondoko mindi pungí.

## 21

**21:1-14**

### *Yu Lombili Andoli Yopoko-Pakarando “Oma Lili Walena Oma Awisili Ombá Sukundi Pupili Liengi.” Nirimu Kinia Likuli ‘Yu Yesusi.’ Ningu Kanoko Imbi Siringi Semanemo*

<sup>1</sup> Pe Yesusi Tapirias Nomu ,aku nomumunga imbi se Gallilli kanumu, aku nomu kelona ‘Ono yu kelko kanangi.’ nimba lombili andolima moloringina orumu. Orumu kanoringi mele semanemo i-sipa:

<sup>2</sup> Saimono Pita kinia, Tomasi (yunga imbi se Didimasi) yu kinia, kolea Gallilli disiriki Kena taono ye Nataniele kinia, Seperi malo talo kinia, lombili andoli ye talo lupa kinia, ono seluna maku toko moloringi.

<sup>3</sup> Saimono Pitane Yesusi lombili andoli marendo nimbole: “Na oma li-pukuru.” nirimu kinia

pilkuli “Olio pea pamolo.” ninguli, nona andoli sipina ola pungu, nomu awi-suku-singina pungu oma lili walema ipulieli nona munduliku andoko kolea tangondoringi-na-kolo oma se naa liltingi.

<sup>4</sup> Kanu-kinia ena mundi wendo ombá serimu kinia Yesusi no kelona gilierimu-na-kolo lombili andolimane ‘Yu Yesusi.’ ningu kanoko imbi naa siringi.

<sup>5</sup> Jesusini ono mangilipa nimbole: “Nanga kangoma, oma mare língiye?” nirimu.

Onone pundu toko "Mólo." niringi.

<sup>6</sup> Yuni nimbale: "Sipi kumbikundu gilkuli oma lili walemo ki-lomekondo nona mania mundangi. Mare manda lingí." nirimu. Kanu-kinia yuni nirimu mele seringi kinia oma paa awisili walena ombo sukundu purumu-kulu sipina ola lingí pereringi.

<sup>7</sup> Aku serimu-kulu kanopale Yesusi yunga konopu mondorumu lombili andoli yemone Pitando nimbale: "Ne yemo Ye-Awilimu lepomo." nirimu. Yuni "Ne yemo Ye-Awilimu lepomo." nirimu-kulu pilipale Saimono Pita yunga wale-pakoli ola pakorumumu kongono sembando kulupa talorumumu kelepa lipa pakopa pukua topa nona mania pumba no lepa kelona ultu purumu. <sup>8</sup> We lombili andolima sipina oma peke lepa perimu walemo kunduku mengo Pita lombili akileko puringi. Ono no kelona nondoko pungí mele manda manjeli wane anderete mita mele lierimu-kulu manda puringi. <sup>9</sup> No kelona ultu pungu kanoringi kinia sepe se nomba perimuna oma mare kaloli perimu kanoko, pellawa kaloli mare lierimu kanoringi.

<sup>10</sup> Yesusini onondo nimbale: "Andi oma liku mengo okomelemanga mare mengo waa." nirimu.

<sup>11</sup> Kanu-kinia Saimono Pita sipina ola pumba oma perimu walemo kundupa memba no kelona ultu orumu. Oma walemo peke lierimu, oma walena sukundu wane anderete pipiti tere oma paa awilima perimu-na-ko wale sungu naa nirimu.

<sup>12</sup> Yesusini onondo nimbale: "Kere-langí ongo naa." nirimu. Lombili andolimane 'I yemo yu sika olionga Ye-Awilimu.' ningu pilkuli yu sika molorumu mele mangilku pilingíndu pipili koloringimunga ononga ye sene "Nu nawe?" nimba mangilipa naa pilierimu. <sup>13</sup> Yesusi ombo pellawa kalolima lipa ono moke sepa sipa, pe omama aku sipa lipa ono moke sepa sirimula.

<sup>14</sup> Yesusi kolopa lomboropa ola molopale, i sepa molorumu, u wale talo 'Yu lomboropo ola molorundu we molio mele kanangi.' nimba lipa ora sirimu mele imu wale yopoko-sipa serimu.

21:15-25

*Yesusini Pitando "Kelko Lombili Ou." Nirimu Semanemo*  
21:15-19

*Yesusini Pitando Nimbale: "Nanga Sipisipima Kere-Langi Sindéi." Nirimu Semanemo*

<sup>15</sup> Kere-langí nongo pora siringi kinia Yesusini Saimono Pitando nimbale: "Jono malo Saimono, i yemane na konopu mondoemele mele maniandopa, nuni na konopu mondoleno mele sika paa olandopaye?" nirimu.

Pitane pundu topa nimbale: "Ye-Awilimu, sika nane nu konopu mondolio kanoleno." nirimu.

Yesusini nimbale: "Aku liemu nuni nanga kongi sipisipima waloma kere-langí sindéi." nirimu.

<sup>16</sup> Yesusini kelepa wale talo-sipa nimbale: "Jono malo Saimono, sika nuni na konopu mondoleno molo móloye?" nirimu.

Pitane pundu topo nimbale: "Ye-Awilimu, sika nane nu konopu mondolio kanoleno." nirimu.

Yesusini nimbale: "Aku liemu nuni nanga kongi sipisipima tapu sendei." nirimu.

<sup>17</sup> Wale yopoko-sipa Yesusini Pitando nimbale: "Jono malo Saimono, na konopu mondolenoye?" nirimu.

Yesusini wale yopoko-sipa "Na konopu mondolenoye?" nimba mangilierimu mele pilipale Pita konopu kiri panjipa nimbale: "Ye-Awilimu, nu uluma pali kanoleno. Nane sika nu konopu mondolio nu kanoleno." nirimu.

Yesusini yundu nimbale: "Aku liemu nuni nanga kongi sipisipima kere-langí sindéi." nirimu.

<sup>18</sup> "Nane nundu paa sika nimbu sikirumu: "U nu kango-kinia moltokole nu nunu wambale panjiku, nu nunu senga punindu konopumuni pilkuli purunu, aku-na-ko

nu anda lekole nunga kitolo siniu sini kinia ye sene lupa nunga wambale panjindipa, nu 'naa pumbú.' nini koleana memba pumbá." nikiru." nirimu. <sup>19</sup> Yesusini 'i ungu-iku torumu akumu, Pulu Yemonga imbi ambolopa paka tondombando Pita toko kondonge kolomba mele nirimu. Aku nimbole yuni Pitando "Na lombili ou." nirimu.

*21:20-25*

*Yesusini Konopu Mondorumu Lombili Andolimunu Nirimu Mele Semanemo*

<sup>20</sup> Pitane topele topa Yesusini konopu mondorumu lombili andoli yemo kanorumu kinia akilepa olo lombili orumu. (Pitane kanorumu yemo yu u Yesusi pea kere-langi nongo moloringi kinia yu Yesusi molorumuna nondopa molopa nimbole: "Ye-Awilimu, olianga ye nawene nu opa-touma lipa simbaye?" nirimu kanu yemo.)

<sup>21</sup> Pitane kanu yemo kanopale Yesusi mangilipa nimbole: "Ye-Awilimu, ne yemo nambi sembaye?" nirimu.

<sup>22</sup> Yesusini pundu topa nimbole: " 'Na kelepo yando ombόndo yu u konde molopili.' nindu liemu nunga kongonomoye? Nu na lombili ou." nirimu.

<sup>23</sup> Yesusini aku nirimu-kulu pilkuli ungu se anju anju genupilima ningu siringi mele i-sipa: "I lombili andolimu kolou naa kolomba." niringi. Aku-na-kolo Yesusini "Yu naa kolomba." ni naa nirimu. " 'Na kelepo yando ombό kinia yu u we konde molopili.' nindu liemu nunga kongonomoye?" nirimu.

<sup>24</sup> Kanu lombili andolimu yuni aku ulu wendo orumuma pali kanorumu mele nimba sipa bokuna torumu. Kanu yemo olia pilielemolo 'Yuni kanorumu mele nimba silimúmu paa sika nilimú.' nimbu pilielemolo.

<sup>25</sup> Yesusini ungu awisili seriumma kepe. Ungu seriumma pali bokuna tolemolánje i ma-koleana si nilka, boku akuma manda naa taltolemolánje.

*'Aku pea.'*

## **LIPA MUNDORUMU YEMA**

### **Yesusini “Nanga Kongonomo Sende-Paa.” Nimba Lipa Mundorumu Yemanga Bokumu**

#### *I Bokumunga Ungu-Pulu Mare*

Ye kisene Yesusinga semanemo toringimanga se **Lluku**. Pe **Llukuni** Yesusinga semanemo topa pora sipale i bokumu torumu. Boku talo pea ye nokoli Tiopillas simbando torumu (LLuku 1:1-4, Lipa Mundorumu Yema inia 1:1-2). Inia 1:1 paa kanani. Akuna boku u torumu bokumunga “Yesusini pulu polopa serimu mele torundu.” nirimu (Mako 1:1 mele). Aku liemu i bokuna molemo semanema Yesusinga semanemala, Yesusinga ungumala. Aku-na-kolo Yesusi mana molopale serimu mele mólo. Yesusini yu lombili andoli yema yunga tondolomo ‘ono simbú kinia nanga ungumu nindiku, nanga kongonomo sendenge.’ nimba yunga Minimu ono sirimu (1:3-9, 2:1-3). Yesusinga Minimu ononga konopumanga molopa tondolo purumu kinia onone Jerusalleme sukundu Yesusinga ungumu pulu polko ningu sindikuli (2:1—8:1), pe kolea awisilinga anju anju ningu sindiliku puringi. Pe Pollo kepe “Nanga kongonomo sende-pu.” nimba lipa mundorumula. Kanu yema Yesusini “Nanga kongonomo sende-paa.” nimba lipa mundorumu yemane ulu mare awisili seringi. (Ononga imbimunga ungu-pulu se boku ambolkonomonga pealemekondo “1. aposel” molemo.) Pita kinia Pollotolonga semane awisili molemo. Pitanga semanema 1:15—5:11,29-32, 8:14-25, 9:32—11:18, 12:1-19 molopa, Pollonga semanema 7:58 pulu polopa nimba, 28:31 nimba pora silimú. Aku-na-kolo kamu koloringili mele naa nimba silimú.

U Juda yombomane mindi ungumu pilku Karasinga yomboma moloringi. Aku-na-kolo pe Juda yombo awisilini “Ungumu naa pilimulú.” niringi kinia Juda yombo naa molko yombo-lupa moloringima ningu siringi kinia ono awisili “Sika.” ningu kuru mondoko Karasinga yomboma moloringi. Yesusi Karasi yunga yombo talapemo wendo wendo oringi mele i bokuna molemo (1:15, 2:41,47, 8:1,4-8,26-40, pe awisilila).

Semanne mare LLukuni we pilipale boku torumunje. Aku-na-kolo wale mare yu yuyu Pollo-kinia andopa kanopale torumula. (Yu pea andoringi kinia “Olio i-sipu i-sipu serimulu.” nimba boku torumu mele 16:10-17, 20:5—21:18, 27:1—28:16 molemo. Pillimono 23-24, Kollosi 4:10-17 kananila.)

Ungu-pulu mare boku ambolkonomonga pealemekondo “8. bilip”, “2. arapela lain”, “14. Grik” mimi siku kanani.

Ya ungu-pulumu pora nikimu.

*1:1—8:3*

### **Yesusini “Nanga Kongonomo Sende-Paa.” Nimba Lipa Mundorumu Yemane Kolea-Awili Jerusalleme Yesusinga Ungumu Ningu Siku Moloringi Semanemo**

*1:1-3*

#### *LLukuni I Boku Talo-Sipamo Tombando Pulu Polopa Torumu Ungumu*

<sup>1</sup> Ye Awili Tiopillas, Yesusini pulu polopa uluma sepa yomboma ungu-mane sipa serimu mele u boku senga torundu kanumu. <sup>2</sup> U uluma pulu polopa selepa pumbale, pe yandopa ‘Kelepo mulu-koleana kelepo nondopo pumbú.’ nimba pilipale nirimumuni, “Nanga kongonomo sende-paa.” nimba, nimba taltopa lipa mundorumu yema, Mini Kake Sélimu yu kinia molopa lipa tapondorumu-na Yesusini onondo “Ono i-siku i-siku sangi.” nimba ungu-mane sirimu. <sup>3</sup> Yesusi yu mindili nomba kolopa

lomboropa ola molopale nirimumuni, yu 'Lombili andolima na paa sika lomboropo ola molondu mele kanangi.' nimba ono moloringina yu pumba ono kanoko molangi ulu mare serimu. Yu walte walte nimba ono molori-ngina ombo mona molopa, Pulu Yemo ye nokoli kingimu molopa kolea nokolemo nokomba mele ono nimba sirimu. Aku sipa sepa molopili wale paono talo ombo purumu.

**1:4-12**

*Yesusini "Mini Kake Sélimu Ombá Onone Lingí." Nimbales Yu Mulu-Koleana Olando Purumu Semanemo*

<sup>4</sup> Walte ono-kinia molopale Yesusi yuni nimbale: "Ono u kolea-awili Jerusalleme munduku naa keleangi. U Tatane "Simbu." nirimu Minimu 'U opili pe pamili.' ningu inia we nokoko molangi. Akumu nane ono u nimbu sirindu pilieringi kanumu. <sup>5</sup> Nane onondo u nimbili: "Jonone yomboma no linderimu littingi-na-kolo wale awisili ombo naa pupili ono nanga yomboma Pulu Yemone Mini Kake Sélimu simba lingí." nirindu kanumu." nirimu.

<sup>6</sup> Kanu-kinia Yesusi lombili andolima yu kinia maku toko moltkole niringimuni, onone Yesusindu ninguli: "Ye-Awilimu, kiniá walemonga nuni "Isirele yomboma kelko onono molangi, Romo gapomano mania pupili, onono gapomano liengi, na ononga ye nokoli kingimu molopo ono nokambo." nininje?" ningu mangilku pilieringi.

<sup>7</sup> Yuni onondo nimbale: "Tatane ulu lupa lupama "Sembó." nimba taltorumu walema kinia mélema íngi seli walema kinia ononga kongonomo mólo. Tatane uluma sembá walema Tata yuyu akuma pilipa molemo. <sup>8</sup> Aku-sipa na-kolo ono molongena Mini Kake Sélimu ombale 'Ono tondolo pupili molangi.' nimbá. Kanu-kinia pe ono tondolo pupili moltkole kolea-awili Jerusalleme kinia, kolea Judia disiriki lemó taonoma kinia kolea-kangama pali kinia, kolea Sameria disiriki lemó koleama pali kinia, kelko ma-koleama pali kinia yombomando onone na serindu mele kepe "Sembó." nirindu mele kepe kanoko pilieringi mele ningu siliku pungí." nirimu.

<sup>9</sup> Yuni aku sipa nimba molopale, ono kanoko molangi yu ma-koleamo mundupa kelepa muluna olando purumu kinia kupa se ombo yu pipi sirimu, pe kelko naa kanoringi. <sup>10</sup> Yu ola pumbá purumu kinia ono olando siku neme-neme ningu kanoko gilieringi kinia ono gilieringina ye talo mulu-maminia kake seli pakoko popenge seko ongo gilkuli niringilimuni, <sup>11</sup> olone onondo ninguli: "Kolea Gallilli yema, ono muluna olando siku nambi semu-na kanoko gilkimiliye? I Yesusi, Pulu Yemone kiniá mulukoleana olando likimu yemo, yu kiniá pukumu kanokomele mele pe walte aku sipa kelepa mania ombá." niringili.

<sup>12</sup> Kanu-kinia ono ma-pangi Unju Ollipi Kaliamo munduku kelko Jerusallemando kelko yando oringi. Aku ma-pangimu kinia kolea-awili Jerusalleme, kinia paa nondopa mele lierimu, aulka ponjilimu, 'koro moloringi, wale Sambatemonga Isirele yomboma aulka andoringi aku mele.

**1:13-26**

*'Judasi Isikeriotenga Ye Se Kolali Sepa Molopili.' Ningu, Ningu Taltoringi Semanemo*

<sup>13</sup> Yesusi mulu-koleana olando purumu kinia yu lombili andolima Jerusallemando yando ongo sukundu punguli niringimuni, ulkana pungu ulka olakondo peringina ola puringi. Akuna peringi yemanga imbima i-sipa: Pita, Jono, Jemisi, Enderu keme, Pillipu Tomasitolo kinia, Batollomiu Mateyutolo kinia, Allapiasi malo Jemisi keme "Olio Isirele yomboma oliolio gapomano molamili." ningu ta niringi talape 'Sellote' nili ye Saimono keme olo kinia, Jemisi malo Judasi yu kinia, aku ye rureponga yopoko aku ulkana peringi. <sup>14</sup> Kanuna ono pali liku maku toko, konopu seluna pupili Pulu Yemo kinia ungu ningu mindi moloringi. Ambo mare kinia Yesusinga anumu Maria kinia Yesusinga genupili kinia akuma pea pali Pulu Yemo kinia ungu ningu moloringi.

<sup>15</sup> Kanu walemanga Yesusinga lombili andoli yombo wane anderete tuwendi moloringi kinia Pitane ola gilipa onondo nimbale: <sup>16</sup> “Ango-keme, Mini Kake Sélimuni ‚ye nokoli kingi, Depitinga kere-punduna pe wendo ombá mele nirimu yuni bokuna torumu mele yu paa sika aku sipa wendo ombámondo nirimu. Akumu paa sika wendo orumu. Kanu ungumu Judasini Yesusi yu opa-touma lipa simba Depitini u nirimu kanu ungumunga pulumu talko wendo orumu. <sup>17</sup> Judasi olio kinia pea molopo kongono pea sepo molorumulu kanumu. Akumunga ye se yunga kolali sepa molopili” nirimu.

<sup>18</sup> (Aku ye Judasi yu sepa kinjerimumunga kou siringi kanumuni ma se topo topa lillimu kinia yu mana mania topa mundupa yunga olomo suku nimba yunga oloma pali wendo omba purumu. <sup>19</sup> Pe Jerusalleme moloringi yomboma pali Judasi aku serimu pilkuli ononga umbu-unguna kanu koleamo imbi leko ‘Akeltama’ niringi. ‘Akeltama’ akumunga pulumu ‘Meme Ondoli Mamo’.)

<sup>20</sup> “I ungu wendo ombá nirimu Depitini bokuna torumu ungumu Konane bokuna molemo mele i-sipa:

‘Yunga ulkamo we giliepili,

akuna yombo se naa peangi.’

nimba molemo kanumu. Konane sene i-sipa nikimula:

‘Yombo se yunga kongonomo kolali sepa sepili.’

nimba molemo kanumu.

<sup>21-22</sup> Manda, i ungutolonga se u kamu talko wendo orumu, kiniá se kamu wendo opili samili. U olio ye engaki rurepo molorumulu i nikirumanga se mania purumumunga kolali sepo se nimbu taltamili. I ye nimbu taltomolomo yu i-sipa ye se molopili: U Jonone pulu polopa yombo no linderimu mele kepe, pe kelepa yandopa yandopa Yesusingi uluma sepa unguma nimba molopale, yu olio mundupa kelepa mulu-koleana olando purumu mele kepe, aku uluma pali wendo orumu mele, olio kinia kopu sepa andopa kanorumu ye se nimbu taltamili. Kanu yemo yuni Yesusingi lomboropa ola molorumu mele kanorumumunga olio pea manda andopo nimbu simulú.” nirimu.

<sup>23</sup> Pitane aku nirimu kinia pilkuli onone ye talo ningu taltoringi. Ye senga imbimu Josepo, kanumundu ‘Basipasi’ niringila, (yunga imbi se ‘Jasitas’ niringila;) ye se Matayasi. <sup>24-25</sup> Aku yetolo ningu taltokole Pulu Yemo mangilku ninguli: “Ye-Awilimu, nu yombomanga pali konopumanga kanoleno kene Yesusingi “Nanga kongonomo sende-paa.” nimba lipa mundorumu ye rureponga kongonomo Judasi mundupa kelepa yunga koleando purumu, kanu kongonomo Judasi yu kolali sepa sembá ye se nuni i yetolonga se ningu taltonumu olio liku ora si.” niringi. <sup>26</sup> Kanu-kinia pepá gomo talonga yetolonga imbitolo toko mania mundukuli mingimu ambolko lope-lope sendekole wendo liltingi kinia Matayasinga imbimu wendo orumu, akumunga “Matayasi yu Yesusingi u lipa mundorumu ye rureponga yopoko kinia pea kongono kopu seko sangi.” niringi. Kanu-kinia kanu lipa mundorumu yema kelko engaki rurepo moloringi.

## 2

2:1-13

### Pulu Yemonga Mini Kake Sélimu Mania Orumu Semanemo

<sup>1</sup> Yesusingi kolorumu koro yopoko-pakara omba purumu kinia, Juda yomboma ningu taltoko Pulu Yemo kinia ungu se serigi wale ‘Pendikosi’ nílimu wendo orumu. Aku walemanga Yesusingi lombili andoli yomboma kolea seluna maku toko moloringi.

<sup>2</sup> Waltikele ungu se, poporome awili ungu nilimú mele, muluna ola mania orumu, kanu mélemo ulkana moloringi yombomane pali pilieringi. <sup>3</sup> Mélema, sepe alimbolo mele, wendo orumu kanoringi, aku mélema pumba yombomanga pali ‚pengena,

selu selu nimba pumba molorumu. <sup>4</sup> Kanu-kinia Mini Kake Sélimu Yesusi lombili andoli yombomanga konopumanga sukundu ombo molopa manda serimu. Kanu-kinia Minimuni ono yu-melete-melete ‘Umbu-ungu lupa lupa kerena niengi.’ nimba konopuma sumbi sirimu kinia ono umbu-ungu u naa niringi lupa lupama pulu polko ningí niringi.

<sup>5</sup> Juda yombo mare u ongo kolea-awili Jerusalleme maku toko moloringi kinia aku ulumu wendo orumu. Ono Pulu Yemonga ungu pilieyi yomboma. Ono ma-koleana yombo lupa lupama pea pali molkole kanu yomboma munduku kelko Jerusalleme sukundu oringi. <sup>6</sup> Kanu poporome awili mele ungumu pilkuli kanu yomboma maku tokole ononga umbu-ungu lupa lupama Yesusi lombili andolimane niringi pilkuli ono konopu awisili liku mundoringi. <sup>7</sup> Ono mini-wale munduku konopu awisili leko ninguli:

“A, i yomboma umbu-ungu lupa lupa nikimilima ono kolea Gallilli disiriki yomboma mindinje? „Gallilli yombomane ungu selumu mindi nilimili kanumu.,” <sup>8</sup> Pe kiniá olionga ya yu-melete-melete umbu-ungu lupa lupa nilimuluma nambi seko pilkuli nikimili-na olio pilkimuluye?

<sup>9-11</sup> Olio kolea Patia kinia, kolea Midia kinia, kolea Illame kinia, kolea Mesopotemia kinia, kolea Judia kinia, kolea Kapadosia kinia, kolea Pondasi kinia, kolea Esia kinia, kolea Pirisia kinia, kolea Pambillia kinia, kolea Isipi kinia, kolea LLipia sukundu Sairini nondopa lemó koleama kinia, kolea-awili Romo kinia, kolea Kiriti kinia, kolea Arezia kinia, aku kolea lupa lupamanga pali molopo omulu yomboma molemolo. Olio Juda yomboma kinia yombo-lupa molopo Juda yombomanga ulu-pulu topele topo selemolo yomboma kinia, olio yu-melete-melete olionga umbu-ungumane Pulu Yemone ulu-tondoloma selemolo ulumando nikimili pilkimulu.” niringi.

<sup>12</sup> Ono pungu-pungu ninguli ‘Pilipu sundukumulunje?’ ningu pilkuli, anju yando angelema ninguli “Imunga ulu-pulumu nambolkamoye?” niringi. <sup>13</sup> Aku-nakolo yombo marene ungu-taka tondoko ninguli: “I yema no-tondolo nongole amu tokomele.” niringi.

2:14-36

### Pitane Yomboma Ungu Nimba Sirimu Semanemo

<sup>14</sup> Kanu-kinia Pita, „Yesusini lipa mundorumu ye, rureponga yopoko wema kinia pea ola gilkuli yombomando tondolo mundupa nimbale: “Olionga Judia yomboma kinia, ono Jerusalleme molemele yomboma kinia, i wendo okomo sekemolo ulumunga pulumu ono nimbu siembo, mimi siku komu sendeko piliangi.” nirimu. <sup>15</sup> “‘Olio amu tokomolo.’ ningu pilkimili akumu mólo. Kiniá orili-u nani killoko mindi, aku-kinia yomboma no naa nolemele kanumu. <sup>16</sup> Kiniá wendo okomo ulumundu Pulu Yemone ungu-umbu tondorumuma pilipa yomboma nimba sirimu ye Joelene pe wendo ombá mele u nirimu. Yuni nirimu mele i-sipa:

<sup>17</sup> “Pulu Yemone nimbale:

“Kolea pora nimbá walema wendo ombá kinia  
nane nanga Minimu yomboma pali simbú.

Kanu-kinia ononga lemenali marenalini  
nanga ungu-umbu tondomboma pilku

yomboma ningu siku,

ononga ye-andamane uru-kaima seko,

ononga ye-kangomane

mongo-indi kaima mele seko kanonge.

<sup>18</sup> Nanga kendemande ambo yema kepe

nanga Minimu simbú kinia nanga ungu-umbu  
tondomboma pilku yomboma ningu singí.

<sup>19-20</sup> Ye-Awylimunga wale awilimu u wendo naa opili  
 nane mulúna olá kinia mana mania kinia  
 „walema pora nimbá, lipa ora simba ulu-ton doloma  
 ‘Ono kanangi.’ nimbú sembó.

‘Mana meme kinia sepe kinia ilia awili kinia,  
 aku ulu-ton doloma sepili.’ nimbú.

‘Muluna enamo simbulu topa  
 olimu meme sepili.’ nimbúla.

<sup>21</sup> Kanu-kinia Ye-Awylimunga wale awilimu  
 kamu wendo ombá kinia yombomane iseli-u  
 Ye-Awylimunga imbi leko mangilingí yomboma  
 nane lipu tapondopo  
 mindili nolemolá aulkana wendo lipu  
 na-kinia molko kondonge aulkana  
 lipu mondombo.” nimba

Pulu Yemone nimu.”  
 nimba Joelene nirimu.

<sup>22</sup> “Ono Isirele yomboma, ono i ungu nimbú sekeromo piliayo. ‘Kolea Nasarete ye Yesusi ‘Yu sika Pulu Yemone nimba taltopa lipa mundorumu.’ ningu kanangi.’ nimba Pulu Yemone yu lipa tapondoramu kinia ono moloringina yomboma lipa ora sirimu ulu-ton doloma serimu. Akumu ono kanoko pilieringi. <sup>23</sup> Onone kanu yemo kinia pe senge mele Pulu Yemone u pilipa molorumu. Pulu Yemone ‘I-sipa wendo opili.’ nimba pilipale i yemo ono Juda yomboma sirimu kinia ‘Seko kinjeringi yombomane olio liku tapondoko yu toko kondangi.’ ningu ono siringi, onone ‘Yu kolopili.’ ningu unju-perana pirimuni toko uku toko panjeringi kolorumu. <sup>24</sup> ‘Aku seringi,-na-kolo Pulu Yemone ‘Yu kamu mana mania naa pepili.’ nimba topa makisinderimu. Kololi ulu-pulumuni yu ka sipa kamu manda naa ambolombamonga mindili nongo kololemele mindilimanga pali Pulu Yemo yuni yu lipa tapondopa wendo linderimu.

<sup>25</sup> “Depiti yuni kepe yu i yemo pe sembá mele u ungu se nirimu mele i-sipa:  
 “Ye-Awylimu nanga kumbikerena  
 alieli molorumu kanorundu.

Yu na lipa tapondombando  
 nanga ki-lomekondo molemomonga  
 mélsene umbuna na manda naa simba.

<sup>26-27</sup> Akumunga na kamelé akopo molopo,  
 nanga kerena konopu sipu unguma niliu.  
 Nuni nanga minimu yombo kolko pulimili koleana  
 munduku naa kelko,  
 nunga Ye Kake Sélimunga ónomo  
 ‘We puropili.’ naa nini akumunga pilipuli,

‘Nanga kangimu kinia minimu kinia  
 na méle peangamo limbu.’ nimbú nokopo molio.

<sup>28</sup> Nuni naconde molopo mindi pumbú aulkamo  
 liku ora sirinu,  
 nu na-kinia kopu seko molonimunga  
 na konopu awisili simbú.”

nimbá Depitini aku sipa nirimu.

<sup>29</sup> “Ango-keme, i ungumu sika nikiru. Olionga anda-kolepa Depiti koronga-u kolorumu óno seringi, yunga óno-koleamo olionga koleana lierimu lemó. Aku liemu yuni ‘Nunga Ye Kake Sélimunga ónomo ‘We puropili.’ ni naa nini.’ nirimumu yu yuyundu naa nirimu lémo. <sup>30</sup> Aku-na-kolo yu Pulu Yemone ungu-umbu

tondorumuma pilipa yomboma nimba sirimu yemo molopale, Pulu Yemone "Nuni kalko lini ye se nu kolali sepa ye nokoli kingimu molomba." nimba "Paa sika aku sembó." nimba tondolo mundupa nirimu mele pilierimu. <sup>31</sup> Depiti iyu Pulu Yemone ungu-umbu tondorumuma pilipa yomboma nimba sirimu yemo molopa, pe wendo ombá mele u pilipa nimba:

'Pulu Yemone yunga minimu  
yombo kolko pulimili koleana

mundupa naa kelepa,  
yunga ónomo naa purumba.'

nirimu akumu Pulu Yemone nimba taltopa lipa mundorumu ye nokoli Karasimu kolopale kelepa lomboropa ola molombamondo nirimu. <sup>32</sup> Pulu Yemone i ye Yesusi sika topa makisinderimu, akumu olio kanorumulu mele nikimulu.

<sup>33</sup> "Topa makisindipale yunga ki-lomekondo lipa mondorumu. Akuna molopale Lapane u "Simbu." nirimu Mini Kake Sélimu yu sirimu, lipale, kiniá yando sikimu. Kiniá kanoko pilkimilimu yuni sikimumu kanoko pilkimili. <sup>34-35</sup> Depiti mulu-koleana olando naa purumu-na-colo yuni nimba:

"Ye-Awili ,Pulu Ye Yawene,  
nanga Ye-Awilimundu nimba:

" 'Nunga opa-touma nuni nokani.' nimbu,  
pe ono topo mania mundundumbu kene  
iseli-u nu ,na kinia pea kopu sepo  
ye nokolitolo molopo mélema nokambili,  
nanga ki-lomekondo ongo molani." nirimu."

nimba Depitini nirimu.

<sup>36</sup> "Akumunga Isirele yomboma ono pali i-siku piliangi: I ye Yesusi onone , "Kolopili." ningu, unju-perana uku toko panjeringimu Pulu Yemone "Yu Ye-Awilimú kinia, yu 'Yomboma nokopa kondomba ye se lipu mundumbu.' nimbu, nimbu talitorundu ye nokoli Karasimu molopili." nirimu yemo molemo." nimba Pitane nirimu.

**2:37-42**

### *Yombo Paa Awisili Konopu Topele Toko No Liltingi Semanemo*

<sup>37</sup> Pitane onone aku siku serigi mele nirimu ungumu pilkuli yomboma mini-wale mundukuli onone Pita kinia Yesusini "Nanga kongonomo sende-paa." nimba lipa mundorumu ye wema kinia onondo ninguli: "Ango-keme, kiniá olio nambi samiliye?" nirungi.

<sup>38</sup> Pitane onondo nimba: "Ono 'Pulu Yemone olionga ulu-pulu-kirima kanopa siye kolopili.' ningu seko kinjilimili mele pilku kiri pilku, konopu topele toko, 'Na Yesusi Karasinga yombomo molambo.' ningu no liengi. Aku senge kinia Pulu Yemone Mini Kake Sélimu ono we simba lingíla. <sup>39</sup> Pulu Yemone 'Mini Kake Sélimu simbú.' nirimu akumu ono kinia onone kalko lingí yomboma kinia yombo kolea sulumanga molemele molongema kinia onondo pali nirimu. Ye-Awilimú olionga Pulu Yemo yuni ' 'Nanga yomboma molangi waa.' nimbu yomboma pali Mini Kake Sélimu simbú.' nirimu." nimba Pitane nirimu.

<sup>40</sup> Pitane ungu lupa lupa awisili tondolo mundupa ono liepi-liepi topa nimba: "Ya mana-yombo molko kinjilimilimanga Pulu Yemone ono umbuna simba sekemo kene yuni 'Olio umbuna naa sipili.' ningu, pilku kondoko molaa." nirimu.

<sup>41</sup> Kanu-kinia Pitane nirimu ungumu pilku liltingi yomboma no liltingi. Kanu walemonga Yesusinga ungumu 'Sika.' ningu kuru mondoringi yombo talapemonga sukundu yombo tere tausini mele olandopa purumu. <sup>42</sup> Kanu-kinia ungumu pilku liku no liltingi yomboma Yesusini "Nanga kongonomo sende-paa." nimba lipa

mundorumu yemane ungu-mane siringima pilku, genupili kinia seluna konopu seluna pupili sere leko molko, pea kopu seko kere-langgi nongo, Pulu Yemo kinia ungu ningu moloringi.

**2:43-47**

*Karasina Yomboma Konopu Seluna Pupili Sere Leko Manda Moloringi Mele Semanemo*

<sup>43</sup> Yesusini "Nanga kongonomo sende-paa." nimba lipa mundorumu yema Pulu Yemone lipa tapondorumu-kulu lipa ora sirimu ulu-tondoloma seringimunga kanokole yomboma pali pipili koloringi. <sup>44</sup> 'Yesusi yu sika „Pulu Yemone "Yomboma lipa tapondopa nokopa kondomba." nimba mana lipa mundorumu ye nokoli Karasimu.' , ningu kuru mondoringi yomboma pali seluna molko, ononga mélema onono yu-meles-meles naa taltoko, 'Olionga pea' ningu taltoko selu siku moloringi. <sup>45</sup> Ononga ma kinia méle taltoringima makete seko kou liku, méle mólo torumu yomboma kou moke seko siringi. <sup>46</sup> Alieli „Pulu Yemo popo toko kaloringi, ulka-tembelena pungu maku toko, ononga ulkamanga pali pea andoko 'Kere-langgi pea namili.' ningu, konopu peanga pepili konopu siku kere-langgi nongo, <sup>47</sup> Pulu Yemo kape ningu imbi ambolko paka tondoko, moloringi. Yombomane pali ono kanoko peanga pilieringi. Ulu-pulu-kiri kanoko kiri pilku konopu topele toko Yesusindu "Mindili nolka aulkana naa pambo kene liku tapondou." niringi yomboma Ye-Awilimuni 'Yunga yomboma molangi.' nimba alieli sukundu sukundu liltimu.

### 3

**3:1-26, 4:5-14**

*Kimbu Kiri Lierimu Ye Senga Semanemo*

**3:1-10**

*Kimbu Kiri Lierimu Ye Se Pitane Sepa Peanga Sirimu Semanemo*

<sup>1</sup> Yomboma „Pulu Yemo popo toko kaloringi, ulka-tembelena ena tere killoko Pulu Yemo kinia alieli ungu niringi mele walte Pita kinia Jonotolo kanu enamonga Pulu Yemo kinia ungu ningilindu puringili. <sup>2</sup> Kimbu kiri lierimu ye se akuna molorumu. Anumuni merimu kinia kimbu kiri lielimu merimu. 'Yu yombo ongo ulka-tembelena sukundu pungíma mawa sepa "Kou-mone siee." nipili.' ningu alieli mengo ongo ulka-tembele kerepulu se 'Paa Peangamo' ningu imbi lieringina mondoringi. <sup>3</sup> Yu akuna molopili Pita Jonotolo ongo ulka-tembelena sukundu pungilí puringili kinia yuni olo mawa sepa "Kou mare siele." nirimu. <sup>4</sup> Pita kinia Jonotolone yu neme-neme ningu kanokole Pitane nimbale: "Nuni olto kanou." nirimu. <sup>5</sup> Kanu-kinia 'Kou singilindu nikimbili.' konopu lepale olo kanorumu.

<sup>6</sup> Kanu-kinia Pitane nimbale: "Na kou selu kepe paa naa mendu-na-ko lo mélse mekeromo nu siembo. Akumu kolea-kanga Nasarete Ye Yesusi Karasinga ton-dolomone 'Nu ola gilku andou.' nikiru." nirimu. <sup>7</sup> Aku nimbale yunga ki-lomekondo ambolopa lipa ola anjerimu kinia waltikele yunga kimbutolo enge nirimu. <sup>8</sup> Yu pukua topa ola pumba ola gilipa pulu polopa andopa molorumu. Aku sepale yetolo kinia pea kopu seko ulka-tembelena sukundu puringi. Yu kimbu kulupa pukua tolepa Pulu Yemo kape nilipa sukundu purumu.

<sup>9</sup> Yu kimbu kulupa Pulu Yemo kape nilipa orumu yombomane pali kanoringi.

<sup>10</sup> Onone kanokole, 'Yu alieli ulka-tembele kerepulu 'Paa Peangamo' nilina mania molopa kou mawa selemo ye kanumu okomo lémo.' ningu kanoko pungu-pungu ningu mini-wale mundoringi.

**3:11-26**

*Pitane Ulka-Tembelena Ungu-Mane Sirimu Semanemo (3:1 pulu polko kanou)*

<sup>11</sup> Kimbu kiri lierimu yemo ola gilipa Pita Jonotolo ambolorumu kinia kanokole yomboma pali mini-wale munduku lisiku ongo ulka-tembelena ‘Sollomononga’ ningu ulka kerepulu takoko yando luttingina Pita Jonotolo kinia kimbu kiri lierimu yemo kinia moloringina ono ongo maku toringi. <sup>12</sup> Aku serigi kinia Pitane kanopa onondo nimbale:

“Isirele yomboma, nambi semu-na i ulu wendo okomomo kanoko konopu awisili liku mundukumiliye? Nambi semu-na onone olto neme-neme ningu kanokomeleye? Oltone oltonga tondolo sene “I yemo ola gilipa pupili.” ningili konopu lekemeleye? Paa mólo. Molo oltone Pulu Yemone kanopa peanga pilielemo ulu-pulu selem-bolomone i yemo seko peanga síngili konopu lekemeleye? Paa mólo. <sup>13</sup> Eporayamo keme Aisake keme Jekopo keme olianga anda-kolepalimane “Olionga Pulu Yemo.” ningu popo toringi Pulu Yemo, yuni yunga kendemande-ye Yesusinga imbi ambolopa paka tondorumu. Aku yemo ono Isirele yombomane “Yu toko kondangi.” ningu yu Romo gapomano yema liku siringi. Kanu-kinia Romo ye nokoli Paillatene “Yu ulu se semu nimbu naa kanokoro. Yu pupili.” nirimu-na-koło onone “Yu toko kondangi.” ningu liku bulu siringi. <sup>14</sup> Ye Kake Sepa Sumbi Nílimu liku bulu siku, “Yu kolopili toko kondangi.” ningu, yomboma topa kondoli ye Barapasi ka-ulka “‘Kolali sepa wendo pupili.’ ni.” niringi. <sup>15</sup> Konde mololi ulumunga pulu yemo toko kondoringi-na-koło Pulu Yemone yombo-óno-koleana topa makisinderimu. Oltone aku serimu mele kanorumbulu. <sup>16</sup> ‘Yesusini manda lipa tapondomba.’ nimbu kuru mondombulumunga i ye ono kanoko imbi silimili yemo peanga lekemo. ‘Yesusikinia tondolo pelemo.’ nimbu pilipu yu imbi lepo mangilipu, yuni i yemo manda ‘Peanga liepili.’ nimbá.’ nimbu kuru mondumumunga i yemo peanga liemu mele onone kanokomele.

<sup>17</sup> “Sika, ango-keme, ono kinia ononga nokoli yema kinia pilku sundukuli Yesusi toko kondoringi. <sup>18</sup> Aku-na-koło talko wendo orumu mele u Pulu Yemone ‘Wendo opili.’ nirimu mele wendo orumu. Yuni pe wendo ombá mele yunga ungu-umbu tondorumuma pilku yomboma ningu siringi yemando nimbale: “Nane ono nokopa kondomba ye se nimbu taltopo lipu mundumbu ye nokoli Karasimu mindili nombá.” nirimu kanu mele ono nanga ungumu pilkimili yombomane paa sika talko yu toko kondoringimu wendo orumu.

<sup>19</sup> “Akumunga, kiniá seko kinjeringi mele pilku kiri pilku konopu topele toko, Pulu Yemo molemona wang. ‘Pulu Yemone olianga ulu-pulu-kirima kamu mundupa kelendepili.’ ningu aku sangi. Aku senge kinia Ye-Awilimuni ono konopu pe nimba enge nipili molonge walema sipa, <sup>20</sup> ono molongena yuni “Ono nokopa kondomba ye se lipu mundumbu.” nimba, nimba talitorumu ye nokoli Karasimu ono simba. Simba ye akumu Yesusi.

<sup>21</sup> “Pulu Yemone ‘Mélema pali peanga liepili.’ nimbá walemo wendo ombámonga kiniá iseli-u Yesusi yu mulu-koleana nokopa molemo. U Pulu Yemone aku sipa nimba panjerimu mele yunga ungu-umbu tondorumuma pilieringi ye kake selimane aku siku yando ningu siringi kanumu. <sup>22</sup> Akumunga Mosisini nimbale:

“Ye-Awilim uononga Pulu Yemone

ungu-umbu tondolemoma pilipu

ono nimbu siliu yemo molio mele

pe ononga ye se na mele

‘Pulu Yemone ungu-umbu tondombama

pilipa nimba simba ye se molopili.’ nimba,

nimba taltomba.

Aku ye ombámo yuni nimbá mele ono paa pilku liengi.

<sup>23</sup> Aku yemonga ungumu naa pilingí yomboma

Pulu Yemo yunga talapena ‘Naa molangi.’ nimba

Pulu Yemo yuni ono topa kondomba.”  
nimba Mosisini nirimu.

<sup>24</sup> “Kiniá wendo okomo akumu Pulu Yemone ungu-umbu tondorumuma pilku yomboma ningu siringi yemane pali ungu ningu siringi mele kiniá wendo okomo. Ye Samuele kinia, Pulu Yemone ungu-umbu tondorumuma pilipa yomboma nimba sirimu yandopa yandopa moloringi ye wemane pali aku siku niringi. <sup>25</sup> Pe kiniá Pulu Yemone ungu-umbu tondorumuma pilku yomboma ningu siringi yemane wendo ombá u niringi unguma kiniá wendo okomomo ‘Ononga.’ nimba wendo okomo. U ononga anda-kolepalima-kinia Pulu Yemone nimba panjipa mi lierimu ungumu kiniá ‘Ononga.’ nimba wendo okomo. Pulu Yemo yuni ononga u-pulu-pulu anda-kolepa Eporayamondo nimbale:

“Nuni kalko lini ye sene sembamonga  
mana-yomboma pali molko kondonge.”

nirimu. <sup>26</sup> Pulu Yemone yunga kendemande-yemo mana mania lipa mundumbando ‘Ono Juda yomboma lipa tapondopili.’ nimba ‘Ono Juda yomboma seko kinjilimili uluma kanoko kiri pilku munduku keleangi. Ono yu-melete-melete konopu topele tondopili.’ nimba ono molongina yunga kendemande-yemo yu u kumbi lepa lipa mundomu. ‘Kanu yemone ono aku sipa sewi anjepili.’ nimba Pulu Yemone aku serimu.” nimba Pitane nirimu.

## 4

4:1-23

*Juda Yombomanga Kanjollo Yemane Pita Jonotolo Kote Sendeko Ka Siringi Semanemo (4:5-14munga semanemo inia yakondo 3:1-26 molemo)*

<sup>1</sup> Pita Jonotolo yomboma ungu ningu siku molangili Pulu Yemo popo tondoringi yema kinia, ulka-tembele nokoringi ele-yemanga nokoli yemo kinia, Sadusi tapuyema kinia, kanu Juda yombomanga ye awilima olo ungu ningu siku moloringilina oringi. <sup>2</sup> Olone Yesusi óno-koleana lomboropa ola molorumu mele ningu siku yu aku serimu mele yomboma pali lomboroko ola molonge mele ningu siringili pilkuli ono mumindili koloringi. <sup>3</sup> Onone olo ka siku, ‘Kiniá ipu liemu kene opali kote sendamili.’ ningu olo liku ka-ulkana panjeringi. <sup>4</sup> Aku-na-kolo Ye Nokoli Karasi Yesusindu ungu ningu siringili pilieringi yombomanga awisili ‘Sika.’ ningu kuru mondoringi. Kanukinia u ‘Sika’ ningu kuru mondoringi yema kinia pe kuru mondoringi yema kinia lipa sere lepa paip tausini mele moloringi.

<sup>5</sup> Opalikundu ye awilima kinia tapu-yema kinia Pulu Yemonga ungu-manemanga puluma pilku mane siringi yema kinia kolea-awili Jerusalleme maku toringi. <sup>6</sup> Pulu Yemo popo tondoringi ye awili olandopa u molorumu ye Anasi kinia pe yunga kolali sepaaku sipa molorumu ye Kayapositolo, olo kinia, ‘Jono’ nili ye se kinia, Allekesanda kinia, Anasi yunga pulu lierimu ye mare kinia, ono pea maku toringi. <sup>7</sup> Maku tokole niringimuni Pita Jonotolo kote sendengendo ononga kumbikerena liku ola anjiku mangilkuli ninguli: “Olo-kinia nambolka engemo pelemo, molo nawenga imbimunga mangilkuli olone kanu ulu-tondolomo sengiliye?” ningu mangilieringi.

<sup>8</sup> Kanu-kinia Mini Kake Sélimu Pitanga konopuna pumba molopa manda serimu kinia Pitane onondo nimbale: “Ono Juda ye awilima kinia, tapu-yema kinia, <sup>9</sup> onone olto mangilkimilim, oltone ye kimbu kiri lielimu kondo kolopo lipu tapondombulumunga mangilkimili konopu lekero. Akumu nambi sepa peanga liemu konopu lekole mangilkimilinje? <sup>10</sup> Aku liemu ono kote pilkimili Isirele yema kinia ononga yomboma pali i ungumu piliaa! Kolea-kanga Nasarete ye Yesusi Karasi, onone ‘Yu kolopili.’ ningu unju-perana uku toko panjeringi, Pulu Yemone topa

makisinderimu, kanu ye Yesusinga engemone yunga imbi mangilipu „Peanga liepili.” nímbulu kinia, i yemo peanga lepa ononga kumbikerena gilkimu ono kanokomele. <sup>11</sup> Konane se tokole ungu-iku toko niringi mele i-sipa: ‘Ulka takoringi yemane

kanoko kiri pilkuli toko eltoringi kou-mulu kanumu  
kiniá kelepa ulka simu mele  
ulka enge sindeli kou awili peangamo.’

niringi kanu kou-mulumu Yesusi yu. Kanu kou-mulumu eltoringi yema ono Isirele yema. <sup>12</sup> Yombo sene lupa olio manda naa lipa tapondomba. Ma-koleamanga pali yombo sene lupa ‘Olio lipa tapondopa mindili nolemolá aulkana wendo lipa, molopo kondomolo aulkana lipa mondopili.’ nimbu imbi lepo mangilimulú yombo se lupa mólo. ‘Yesusi Karasi yuyu mindi..’ nirimu.

<sup>13</sup> Pita Jonotolo pipili naa kolko unguma sumbi siku niringili kanoko, olo sukuli naa seko we umbu-yetolo moloringili kanokole ono konopu awisili liku mundukuli, ‘I yetolo u Yesusi pea kopu seko andoringili yetolo lepomo.’ ningu pilieringi. <sup>14</sup> Aku-sipa na-kolo ye seko peanga siringili kanu yemo olo pea kopu seko gilieringi kanokole ono ungu se manda pundu toko naa niringi.

<sup>15</sup> Akumunga “Olo kanjollo ulkana pena pale.” niringi pena purringili kinia ono onono angelema ningu ninguli: <sup>16</sup> “I yetolo olio nambi samiliye? Olone Pulu Yemo kinia kopu seko molemele mele, lipa ora silimú ulu-tondolo paa peanga se sengili Jerusalleme molemele yombomane pali pilku kanongi ulumu olione “Naa sengili.” nimbu manda aki naa tomolo. <sup>17</sup> Aku-na-kolo i ungu nikimbilimu koleamanga pali niliku pungí pilingí kinia manda naa sembá kene “Kelko i ye ‘Yesusi’nga semanemo yomboma toko siku yunga ungumu koleamanga anju anju naa niengili! Níngili liemu olo aku siku mongo lingilímunga umbuna simulú.” nimbu “Mólo” niemili.” niringi.

<sup>18</sup> Aku siku ningu panjikuli, “Olo wale.” ningu olondo ninguli: “Paa ungu kangakolte kepe, Yesusinga semanemo toko yomboma paa ungu-mane naa siele! Mólo!” niringi.

<sup>19</sup> Aku-na-kolo Pita Jonotolo olone onondo pundu toko ninguli: “Pulu Yemone olto ‘Sale.’ nilimú mele mundupu kelepo, onone ‘Sale.’ nikimili mele pilipu sembulu liemu Pulu Yemone kanopa peanga pilimbanje? Ono onono piliame! <sup>20</sup> Aku-sipa na-kolo olto ulu kanorumbulu mele kepe pilierimbulu mele kepe oltonga keremo pipi manda naa simbulú.” niringili.

<sup>21</sup> Onone olo kelko tondolo munduku ningu pilipi kondokole “Olo pale.” niringi. Olone ulu-tondolo seringili mele yombomane pali kanokole, Pulu Yemo kape ningu imbi ambolko paka tondoringi-kulu ono kanokole olo ambolko umbuna singí aulka se koroko kelieringi. <sup>22</sup> Ulu se, lipa ora sirimu ulu-tondolomone seko peanga siringili ye kanumu yunga kalia-ingi paono talo omba purumu.

**4:23-31**

### *Karasinga Yomboma Pulu Yemo Kinia Unru Ninga Mawa Seringi Semanemo*

<sup>23</sup> Pita Jonotolo “Wendo pale.” niringi kinia olonga yomboma moloringina sumbi siku punguli, Pulu Yemo popo tondoringi ye awilima kinia, Juda yombomanga tapu-yema kinia kanu yemane olondo niringi mele olonga Yesusinga ungumu pilieli yomboma semane toko siringili.

<sup>24</sup> Niringili mele pilkuli ono liku sere leko molko Pulu Yemo kinia ungu ningu ninguli: “Ye Awili Tondolo Olandopamo, nuni mulumu kepe mamo kepe nomu-kusamo kepe méle lemóma pali serinu. <sup>25</sup> Nuni ungu se ninindu nunga Minimuni olianga andakolepa, nunga kendemande-ye Depiti nimba sirimu kinia yuni pilipa yando nimba sirimu mele i-sipa:

“Isirele yombo naa molko

yombo umbu lupa molemelema  
nambi semu-na mumindili kolkomeleye?

Yombomane pali uluri manda naa senge mele  
nambi semu-na "Samili." ningu, ningu panjikimiliye?

**26** Pulu Ye Awilimu kinia yuni

'Nanga yomboma nokopa kondomba ye se  
lipa mundumbu.' nimba, nimba taltorumu  
ye nokoli 'Karasi, mu kinia olo

koleamanga pali ye nokoli kingimane  
'Olo-kinia opa samili.' ningu molemele.

Yomboma nokoli yemane  
'Olo topo mania mundumulú.' ningu molemele.

Aku siku ulu manda naa senge mele  
nambi semu-na 'Samili.' ningu molemeleye?"

nimba Depitini nirimu. **27** Sika i kolea-awilina ye nokoli kingi Erote kinia Romo ye Pondiasi Paillatetolo Isirele yomboma kinia Isirele yomboma naa molko yombo umbu lupa mololi yomboma kinia ono maku toko, nunga kendemande-ye kake seli u ningu taltorunu ye Yesusi 'Topo kondamili.' ningu waa toringi. **28** U nunga tondolomone nunu konopumuni pilku "I-siku sangi." ningu panjerinu mele aku siku seringi. **29** Kanumunga Ye-Awilimu, kiniá olio-kinia onone "Semolo." ningu olio ningu pipili kondokomele mele nuni pilkuli, nunga kendemande-yema nunga ungumu ningíndu pipili naa kolko sumbi siku niengi kene liku tapondoyo. **30** Nunga kendemande-ye kake seli Yesusinga imbi mangilipu yu mangilimulú kinia kuru tomba yomboma 'Peanga liepili.' ningu ulu-tondoloma seko, nunga kongonomo sekemolo mele 'Yomboma "Sika akumu Pulu Yemonga kongonomo lepomo!" ningu kanangi.' ningu lipa ora simba ulu-tondoloma sei." niringi.

**31** Aku siku Pulu Yemo kinia ungu ningu pora siringi kinia ulka moloringimu jimi-jimi mele sepa, Mini Kake Sélimu ono-kinia molopa manda serimu-kulu pipili naa kolko Pulu Yemonga ungumu tondolo munduku yomboma andoko ningu siringi.

4:32-37

### *Ye Nokoli Karasi Yesusi Kuru Mondoringi Yomboma Konopu Seluna Pupili Manda Sere Leko Moloringi Semanemo*

**32** 'Ye Nokoli Karasi Yesusindu, 'Sika.' ningu kuru mondoringi yomboma manda selu siku molko ono konopu seluna pupili moloringi. Yombo se yunga mele taltorumuma 'nanga manjipa' naa nimba, 'olionga pea' ningu sere leko taltoringi. **33** Yesusini "Nanga kongonomo sende-paa." nimba lipa mundorumu yemane Ye-Awili Yesusi lomboropa ola molorumu kanoringi mele semane peangamo munduku naa kelko tondolo munduku toko siliku andoringi kinia Pulu Yemone ono we kondo kolopa paa sewi anjipa 'Molko kondangi.' nirimu. **34** Ono moloringina yombo se kere-langì kepe mélse mólo torumu yombo se naa molorumu. Wale marenga nimba yombo se ma lepa ulka awisili gilipa serimumane ma we lepa ulka we gilierimuma kou-mone liku mengo ongo, **35** Yesusini lipa mundorumu yema moloringina ongo siringi, onone yombo se mélé mólo torumu yomboma moke seko siringi.

**36** Aku siku seringi mele 'Josepo' nili ye sene aku sipa serimu. Kanu yemo Yesusini lipa mundorumu yemane yunga imbi se 'Banapas' niringi. Banapasinga ungu-pulumu 'Yomboma nimba toyombo tondoli yemo'. Yu LLipai yemo, yunga pulu-kolea Saiporas. **37** Yunga ma se lierimu kanumu kou-mone lipale memba ombo Yesusini "Nanga kongonomo sende-paa." nimba lipa mundorumu yema sirimu.

## 5

5:1-11

*Ananayas Kinia Menu Sapairatolonga Semanemo*

<sup>1</sup> Karasinga yomboma aku siku seko moloringi-na-kolo ulu serigi mele sumbi sipa naa serimu ye se molorumu, yunga imbimu Ananayas. Yunga menunga imbi Sapaira. Ananayasi yunga ma se kou-mone lipale nirimumuni, <sup>2</sup> menu kanopa molopili kou liltimumunga paki sipa, ekendo yuyu taltopa, ekendo Yesusini lipa mundorumu yema pumba sipa nimbale: "Nane ma se kou lipuli, aku kouma membo ombo i sikiru." nirimu.

<sup>3</sup> Kanu-kinia Pitane yundu nimbale: "Ananayas, nambi semu-na nunga konopuna 'Kurumanga nokoli, Setene ombo molopili.' ninguli, Mini Kake Sélimu kolo toko siku, mamonga kou linuma paki siku mare anju liku taltoko mare mengo ongo olio kolo toko sakinuye? <sup>4</sup> U kou naa linu kinia mamo nunga kanumu. Kou linuma nunu nokonu kanumu. 'Mamo kou-mone naa liembo.' nilinanje yombo sene unguri naa nilka. Mamo nungamo. Kou-mone likuli 'Ekendo nanu taltopo, ekendo yomboma siembo.' nilinanje unguri mólo. Mélemo nungamo. Akumunga nambolka konopu lekole kou-mone likuli ekendo mindi kolo toko sinuye? Nuni yema kolo toko naa sinu, mólo. Pulu Yemo kolo toko sinu." nirimu.

<sup>5-6</sup> Pitane aku sipa nirimu ungumu Ananayas pilipale, yu kolorumu kinia yunga ónomo topa mania mundorumu. Ye-kangoma ongo yunga ónomo liku muluwambalene okoko mengo pungu óno se-puringi. Aku sipa ulu serimu semanemo yomboma pilkuli paa mini-wale mundoringi.

<sup>7</sup> Ananayas menu yu i ulu wendo orumumu naa pilipale, pe ena mongo yopoko ombo purumu kinia yu orumu.

<sup>8</sup> Pitane yu mangilipa nimbale: "I kou-mone ombo simu ambolkoromo olo mamonga aku siku língili meleye? Na piliambo ningi si." nirimu.

Yuni nimbale: "Sika. Aku sипу limbulu." nirimu.

<sup>9</sup> Pitane yundu nimbale: "Nambi semu-na olone Ye-Awilimunga Minimu "Kolo topo siembili." ningiliye? Nunga emenanga ónomo mengo pungu óno se-pongi yema ongo kerepuluna gilimili akumane nunga ónomo liku mengo pungila." nirimu.

<sup>10</sup> Kanu-kinia waltikele ambomo Pitanga kumbikerena kolorumu kinia yunga ónomo topa mania mundorumu. Kolorumu kinia ye-kangoma ongo yunga ónomo kanoko likuli, menu óno seringina nondoko yu mengo pungu óno seringi. <sup>11</sup> Kanu-kinia Karasinga talapena yomboma kinia, i ulu wendo orumu pilieringima pali ono paa mini-wale mundoringi.

5:12-16

*Yesusini "Nanga Kongonomo Sende-Paa." Nimba Lipa Mundorumu Yemane Ulu-Tondolo Awisili Seringi Semanemo*

<sup>12</sup> Yomboma moloringina Yesusini "Nanga kongonomo sende-paa." nimba lipa mundorumu yema andoko 'ulu se wendo orumu, lipa ora sirimu ulu-tondolo lupa lupa awisili seringi. 'Sika.' ningi kuru mondoringi, yomboma pali 'ulka-tembelena, 'Sollomononga' ningi ulka kerepulu takoko yando liltingina u alieli maku toringi.

<sup>13</sup> Yombo lupamane ono kanoko peanga pilieringi-na-kolo pipili kolkole 'Karasinga yomboma kinia maku tamili.' ningi naa oringi. <sup>14</sup> Akumu sika na-kolo yombo awisilini Ye-Awili 'Yesusi,ndu 'Sika.' ningi kuru mondokole sukundu sukundu ongo yunga yomboma moloringi. <sup>15</sup> Yesusini lipa mundorumu yemane seringi mele kanokole yombomane yombo kuru torumuma mengo wendo ongo aulkana taltoko moloringi. 'Pita ombo pumbá kinia enana yunga minimu ono lemeleni ombo aki tomba kinia peanga lembanje.' ningi aku siku taltoko moloringi. <sup>16</sup> Kolea-awili Jerusalleme lierimuna nondopa lierimu koleamanga moloringi yombo awisili kuru

torumu yomboma kinia kuru konopumanga perimu yomboma kinia mengo oringi kinia ono pali peanga lierimu.

5:17-42

*Yesusini Lipa Mundorumu Yema Ka Siku Kote Pilkuli Niringi Kinia Kanu Yemane Seringi Mele Semanemo (5:12-16 kananila)*

5:17-26

*Yesusini "Nanga Kongonomo Sende-Paa" Nimba Lipa Mundorumu Yema Ka Siringi Kinia Ulu Se Wendo Orumu Semanemo*

<sup>17</sup> Kanu-kinia Pulu Yemo popo tondoringi ye awili olandopamo kinia Sadusi talapena sukundu ye mare yu pea kopu seko moloringi yema kinia ,we-yomboma ono munduku kelko Yesusini lipa mundorumu yema aku siku lombili puringi mele kanokole, ono paa konopu kiri panjeringi. ‘Aku yemane seringi mele naa sangi.’ ninguli <sup>18</sup> Yesusini “Nanga kongonomo sende-paa.” nimba lipa mundorumu yema ambolko liku, we-yomboma panjeringi ka-ulka awilina ka siku panjeringi. <sup>19</sup> Aku-na-kolo ipulieli Ye-Awilimunga angello se ombo ka-ulka ulka-kuna topa ono lipa memba pena ombo nimbale: <sup>20</sup> “Ono „Pulu Yemo popo toko kalolemele, ulka-tembelena pungu gilku yomboma konopu topele toko molko kondonge mele unguma pali ningu siee.” nirimu.

<sup>21</sup> Yuni nirimu mele pilku likuli kolea tangorumu kinia ulka-tembelena pungu yomboma ungu-mane siringi.

Kanu-kinia Pulu Yemo popo tondoringi ye awili olandopamo kinia, yu pea kopu seko moloringi yema ongo, kanjolloma kinia, Isirele yombomanga tapu-yema kinia “Maku tamili waa.” niringi. Ongo maku tokole ungu se ningu munduku ninguli: “Ka-ulkana panjemulu pelemele yema mengo waa.” niringi.

<sup>22</sup> Aku-na-kolo ononga ele-yemane pungu Yesusini lipa mundorumu yema lingíndu ka-ulkana puringi kinia kanu yema naa moloringi-kulu kanokole kelko yando ongo ninguli: <sup>23</sup> “Ka-ulka kunama pali ulka-kuna sili pemu, nokolemele yema kerepuluna nokoko giliengi kanomulu-na-kolo olio ulka-kuna topo ulka-sukundu kanomulu kinia ye selu kepe naa molomu.” niringi.

<sup>24</sup> Ulka-tembele nokoringi ele-yemanga ye awilimu kinia, Pulu Yemo popo tondoringi ye awilima kinia onone ongo niringi mele pilkuli, “I ulu wendo omu nambolka uluri wendo ombándo sekemonje?” ningu ono pilku sundoringi.

<sup>25</sup> Kanu-kinia ye se ombo onondo nimbale: “Piliame! Onone ka síngi ye kanuma ulka-tembelena yomboma ungu-mane siku molemele.” nirimu. <sup>26</sup> Aku nirimu pilkuli ulka-tembele ele-yema kinia ononga ye awilimu kinia Yesusini lipa mundorumu yema lingí puringi. Aku-na-kolo ‘Yombomane olio kouni toko kondonge.’ ninguli ono kopene naa toko taka leko mengo oringi.

5:27-33

*Yesusini "Nanga Kongonomo Sende-Paa." Nimba Lipa Mundorumu Yemane Kanjolloma Pipili Naa Kolko Ono-Kinia Ungu Sumbi Siku Niringi Semanemo (5:17-42 pali)*

<sup>27</sup> Ye-kanjolloma moloringina ele-yemane Yesusini lipa mundorumu yema liku mengo oringi kinia Pulu Yemo popo tondoringi yemanga ye awili olandopamone onondo nimbale: <sup>28</sup> ‘Onondo u nirimulu mele i-sipa: “Paa ungu kanga-kolte kepe naa ningu, i ye ,Yesusi,nga semanemo kelko toko yomboma ungu mane naa siee.” nirimulu kanumu. Pe kiniá onone Jerusalleme koleamanga pali ungu kanumu andoko ningu siku keliengi. ‘Yombomane ‘Olio Juda yombomanga tapu-yemane ye kanumu toko kondoringi.’ ningu piliangi.’ ningu onone i unguma mane silimilila.

<sup>29</sup> Pita kinia, Yesusini lipa mundorumu ye wema kinia, onone onondo pundu toko ninguli: “Yombomane ‘Saa.’ nilimili mele olio pilipu lipu manda naa semolo. Pulu

Yemone 'Saa.' nilimú mele mindi pilipu lipu sengena panjipu semolo. <sup>30</sup> Onone 'Yesusi kolopili.' ningu unjuna uku toko panjeringi kolorumu kanu yemo, olionga anda-kolepalimanga Pulu Yemone yu kelepa topa makisinderimu. <sup>31</sup> 'Yuni olio Isirele yomboma konopu topele tondopa olionga ulu-pulu-kirima siye kolopili.' nimba Pulu Yemone 'Yesusi yu Ye Nokolimu molopa, yomboma Lipa Tapondopa Mindili Nolemolá Aulkana Wendo Limú Yemo molopili.' nimba yunga ki-lomekondo lipa mondorum molemo. <sup>32</sup> Olio kinia Mini Kake Sélimu kinia yu aku sipa serimu mele andopo nimbu silimulu. 'Mini Kake Séli' nikimulumu Pulu Yemo yunga unguma pilku liku selemelé yomboma Mini Kake Sélimu silimú kanumundu nikimulu." niringi.

<sup>33</sup> Niringi mele pilkuli mumindili paa awisili kolko 'Ono topo kondamili.' niringi.  
5:34-39

*Gamellielen "Yesusini Lipa Mundorumu Yema Kinia Onone Ulu Se Naa Saa." Nirimu Semanemo (5:17-42 pali)*

<sup>34</sup> Aku-na-kolo Parisi ye kanjollo se, yunga imbi Gamelliele, yu Pulu Yemonga ungu-manema pilipa yomboma mane sirimu ye se, yu pilipa kondoli paa perimu-na yombomane kanokole yu kape niringi ye se, yu kanjolloma maku toringina ola gilipa ele-ymando nimbale: "Yema u kanga-kolte pena mengo paa." nirimu. <sup>35</sup> Kanu-kinia mengo pena puringi kinia yuni kanjollo yemando nimbale: "Ono Isirele yema, onone i yema senge mele u pilku kondayo. <sup>36</sup> U walte ye Tudasi omba yuni nimbale: "Na ye awili se, na enge pelemo." nirimu kinia ye po anderete yu lombili puringi. Aku-na-kolo gapomanomone yu toko kondoko, yu lombili puringi yema toko bulu-balu siringi. 'Samili.' niringi mele kamu mania purumu.

<sup>37</sup> "Pe aku sipa gapomanomone yombo imbi torumu walema kinia Gallilli ye Judasi kepe "Oliolio gapomano molamili." nirimu kinia ye mare yu lombili puringi kinia gapomanomo-kinia opa seringi-na-kolo yu toko kondoko yu lombili puringi yema toko bulu-balu siringila. <sup>38</sup> U aku serimu kene kiniá onone i yema-kinia senge mele niembo. Onone i yema-kinia ungu se naa seko, we pangí keleayo. I yema ono onono konopumane pilkuli 'Samolo.' ningu engi liemu unguri naa sepa we pora nimbá. <sup>39</sup> Molo sekemele mele Pulu Yemone "Saa." nimu-na engi liemu ono kanjollomane akumu manda "Mólo." naa ningí. Molo "Mólo." ningi liemu Pulu Yemo kinia opa mele senge manda naa sembá." nirimu.

5:40-42

*Yesusini Lipa Mundorumu Yema Yunga Yema Moloringi-Kulu Ono Mindili Siringi Kinia Konopu Siringi Semanemo (5:17-42 pali)*

<sup>40</sup> Aku nirimu kinia ono pilkuli 'Aku samili.' ninguli "Yema kelko ulkando waa." ningu, ono ka-pultane toko ninguli: "Yesusinga semanemo kelko yomboma ningu siliku naa andaa." ninguli "Ono paa." niringi.

<sup>41</sup> Yesusini lipa mundorumu yemane kanjolloma munduku kelko ultu puringi. Pulu Yemone onondo 'Ono Yesusinga yema molongemonga yombomane ono seko pipili kondongi liemu mandala.' nirimu-kulu pilkuli ono paa konopu siringi. <sup>42</sup> Walemanga pali ulka-tembelena kepe yombomanga ulkamanga pali pipili naa kolko andoko semane peangamo toko siringi. Koronga-u Pulu Yemone 'Ono lipa tapondomba ye se lipu mundumbu.' nimba, nimba taltorumu ye nokoli Karasimu Juda yombomane 'Opili.' ningu nokoko moloringi kanu ye nokoli Karasimu Yesusi yu kanu yemo ombo molopa ono lipa tapondorumu lipa tapondomba mele semanemo andoko toko siringi.

*Kolomongo-Awili 6-7tolo*

**Karasinga Yombomanga Kusikus Sitipenenga Semanemo**

## 6

6:1-7

*'Yesusini Lipa Mundorumu Yema Liku Tapondoko Ambo-Wayamanga Kere-Langi Moke Sendangi.' Ningu Ye Yopoko-Pakara Ningu Taltoringi Semanemo*

<sup>1</sup> Aku walemanga Yesusinga lombili andoli yombo kambu paa awisili olando purumu. Kanu-kinia Giriki ungu niringi Juda yombomane ulu se kanoko kiri pilkuli iri toko ninguli: "Ambo-wayama alieli kere-langi moke seko singíndu Ipuru ungu nilimili Juda yombomanga ambo-wayama mindi siku, olionga ambo-wayama naa silimili." niringi. <sup>2</sup> Akumunga, 'Yesusini "Nanga kongonomo sende-paa." nimba lipa mundorumu, ye rurepone Yesusinga lombili andoli yomboma pali liku maku toko onondo ninguli: "Olio Pulu Yemonga ungu nimbu silimulu kongonomo mundupu kelepo kere-langi kongono semolo kinia manda naa sembá. <sup>3</sup> Ango-keme, ononga ye yopoko-pakara, Mini Kake Sélimu kinia pilipa kondolimu kinia pepa, yombomane kanoko peanga pilielemene yema kanoko ningu taltangi. 'Kere-langi kongono olio selemolomo onone sendangi.' nimbu siye kolopo, <sup>4</sup> olio alieli Pulu Yemo kinia ungu nimbu, yomboma Pulu Yemonga ungumu 'Piliangi.' nimbu lipu tapondomolo." niringi.

<sup>5</sup> Aku niringi yomboma pali pilku peanga pilkuli, Sitipen ningu taltoringi. Yu Pulu Yemo 'Sika.' nimba paa tondolo mundupa kuru mondorumu yemo; yu Mini Kake Sélimu konopuna pepa manda serimu yemo. Ye pokore ningu taltoringimanga imbima i-sipa: se Pillipu, se Porokorasi, se Naikena, se Taimono, se Pamenasi, se Nikollasi. Nikollasi kolea-awili Andiyoko ye se, yu Juda ye se mólo. Yu ye-se-lupamo molopale, u Juda yombomanga ulu-pulu seringi mele topele topa serimu yemo. <sup>6</sup> Aku yema Yesusini lipa mundorumu yemanga kumbikerena liku ola anjeringi kinia onone yemanga 'penge,na ambolkole Pulu Yemo kinia ungu mare ningu mawa seringi.

<sup>7</sup> Aku seringi kinia yombo moloringi koleamanga pali Pulu Yemonga ungumu pumba manda serimu. Jerusalleme yombo awisili 'Yesusi yu sika Ye Nokoli Karasimu.' ningu, yu lombili pungu, Pulu Yemo popo tondoringi ye awisili pea 'Yesusini lipa mundorumu yemane ungu niringi mele, 'Sika' ningu kuru mondoko pilieringi.

6:8—8:2

*Juda Yombomane Kusikus Sitipen Ambolko Liku Kote Sendeko Kouni Toko Kondoringi Semanemo (6:1-7 kananila)*

6:8-15

*Juda Yombomane Sitipen Kote Senderingi Semanemo*

<sup>8</sup> Sitipen, yu Pulu Yemone yomboma we kondo kololi ulu-pulumu kinia Pulu Yemonga engemo kinia perimu-kulu yombo moloringimanga andopa 'ulu se, lipa ora sirimu ulu-tondolo awisili serimu. <sup>9-10</sup> Aku-na-kolo ye marene "Seko kinjikinu. Aku siku naa sei." ningu Sitipen kinia ungu awisili niringi. Kanu yema ono u kendemande-yomboma moltkole pe we ultu moloringi yomboma, ononga Pulu Yemonga ungumu pilieringi ulka se lupa gilierimu. Ono kolea Sairini kinia Allekesandia kinia Sillisia kinia Esia kinia moloringi yomboma moltko, Juda yomboma moloringi. Aku yema Sitipen kinia angelema niringi-na-kolo Mini Kake Sélimuni Sitipen paa pilipa kondolimu sirimu-na yuni nirrimu mele pilkuli yombo sene pangá akuku ungu se manda naa niringi.

<sup>11</sup> Ungu se ningíndu koroko kelkole onone ye marendo kiyongo ningu kondi toko ninguli: "Onone "Mosisi kinia Pulu Yemo-tolonga unguma Sitipenene ungu-taka tondomu piliemulu." niee." niringi.

<sup>12</sup> Onone aku siku kondi toringimunga yomboma kinia Juda yombomanga tapu-yema kinia Pulu Yemonga ungu-manemanga puluma pilku mane siringi yema kinia onone mumindili kolko Sitipen ambolko liku kanjollo yema maku toko moloringina mengo puringi. <sup>13</sup> Onone ye mare ungu-umbu tondokole “Kotena pungu Sitipen serimu mele kolo toko ‘I-sipa i-sipa semu.’ niee.” niringi kinia ono kotena pungu ninguli: “I yemone ‚Pulu Yemo popo topo kalolemolo, ulka-tembele, kakemo kinia, Pulu Yemonga ungu-manema kinia, alieli ungu-taka tondolemo. <sup>14</sup> Yuni nimu piliemulu mele i-sipa: “I kolea-kanga Nasarete ye Yesusini i ulka-tembelemo sikisimba.” nimba; Mosisini nimba panjerimu yandopa yandopa ningu siringi selemolo ulu-puluma “Pe kelko naa seko akuma munduku kelko Yesusini “Saa.” nirimu uluma saa.” nimula.” niringi.

<sup>15</sup> Kanjollo maku toko moloringimane pali Sitipen neme-neme ningu kanoringi kinia, yunga kumbikeremo angello senga kumbikere none serimu kanoringi.

## 7

7:1-53

*Sitipenene Kotena Juda Yombomanga Kanjollo Yemando Ungu Nimba Sirimu Semanemo (6:8-15 pea)*

<sup>1</sup> Kanu-kinia Pulu Yemo popo tondoringi ye awili olandopamone kote sendepale Sitipen mangilipa nimbale: “I ungu nikimilima sikaye?” nirimu.

<sup>2</sup> Sitipenene pundu topa nimbale: “Ango Tata keme, nanga ungumu piliame. Olionga pulu-pulu anda-kolepa Eporayamo i kolea u naa ombo kolea Arano u naa pumba kolea Mesepotemia u we molopili tondolo pumba olandopa molemo Pulu Yemo yu molorumuna ombo nimbale: <sup>3</sup> “Nunga ma-koleamo kinia pulu lemó yomboma kinia munduku kelko nane nu “Pu.” nimbu lipu ora simbú koleana pani.” nirimu.

<sup>4</sup> “Aku ungumu pilipale Eporayamo yunga pulu kolea Kaltia taono mundupa kelepa kolea-kanga Arano pumba molorumu. Kanu-kinia yunga lapa kolorumu kinia Pulu Yemone olio i molemolo kolea Kenane yando lipa mundorumu. <sup>5</sup> I koleana ma kanga-kolte kepe ‘Eporayamo yu kamu ambolopili.’ nimba naa sirimu. Aku-sipa na-kolo Pulu Yemone ungu se yundu nimbale: “Nu kinia nunga kalko lini yomboma kinia i koleamo lingí.” nirimu. Eporayamo yu bolango seluri kepe u naa mepili aku sipa nirimu. <sup>6</sup> Pulu Yemone yundu nirimu mele i-sipa: “Nunga kalko lini yomboma kolea senga lupa yombo ponenge mele molonge. Akuna molonge yombomane onondo “Olionga kendemande-yomboma.” ninguli seko kinjiku ka-kongono singí, mindili nongo seko molangi kalia-ingi po anderete ombo pumbá. <sup>7</sup> Kanu-kinia ono ka-kongono singí yomboma ‘Pundu tangi.’ nimbu umbuna simbu kinia pe ono kanu koleamo munduku kelko ultu ongo i koleana ongo na popo tonge.” nirimu. <sup>8</sup> Aku nimbale Pulu Yemone “Sembó.” nirimu unguma ‘Eporayamone ‘Na-kinia kamu pepili.’ nipili.’ nimba yu kinia yunga kalopa limba kangoma kinia “kangi se kopisiku wendo liku eltangi.” nirimu. Pulu Yemone “Aku siku saa.” nirimungu Eporayamone kango Aisake membale, yunga wale engaki ombo purumu kinia yunga kangi se kopisipa wendo liltimu. Kanu-kinia pe Aisakene Jekopo merimu. Pe Jekopone olio Isirele yombomanga talape rurepo molemolomanga anda-kolepama merimu.

<sup>9</sup> “Kanu-kinia olionga anda-kolepa Jekopone merimu yemane ononga genu Josepo-kinia konopu kiri panjikuli kolea Isipi pungí puringi ye mare kinia yu kou-mone lilingi. Josepo kou-mone likuli “Yu yombo senga kendemande-yemo molopili mengo paa.” niringi. Aku-sipa na-kolo Pulu Yemo yu-kinia molopale nirimunguni, <sup>10</sup> yu lipa tapondopa umbuna wendo orumumanga pali wendo liltimu. Yuni yu pilipa

kondolimu sipa, kolea Isipi ye nokoli kingimu ‘Yu kanopa peanga piliepili.’ nirimu kinia ye nokoli kingimuni ‘Josepo yu Isipi gapomano ye nokolimu molopa, yunga ulkamo kinia Isipi koleamanga méle lemóma pali nokopili.’ nirimu.

<sup>11</sup> “Pe kolea Isipi kinia ,i kolea molemolo, kolea Kenane kinia gele awili se lierimu, yomboma umbuna perimu. Olionga anda-kolepalima kere-langí lingí aulka se naa lierimu. <sup>12</sup> Jekopone “Kolea Isipi ga maku toko taltolemele.” niringi-na pilipale yunga malopili olionga anda-kolepalima pulu-pulu Isipi mundorumu. <sup>13</sup> Wale talo siku Isipi puringi kinia Josepone genupilindu “Na Josepo.” nimba yunga imbi lepa sirimu, pe ye nokoli kingimuni Joseponga yomboma kanopa imbi sirimu. <sup>14</sup> Kanu-kinia Josepone yunga lapa Jekopo kinia Jekopo yunga yomboma kinia “‘Yando wangi.’ niee.” nimba, onondo nimba mundorumu. Jekopo yunga yomboma lipa sere lepa sependi paip moloringi. <sup>15</sup> “Yando waa.” nirimu kinia pilipale Jekopo kolea Isipi purumu, kanuna yu kinia yunga malopili kinia anda leko koloringi. <sup>16</sup> Ononga ónoma kelko kolea Kenane mengo ongo kolea-kanga Sekemo mengo ongo, u Eporayamone kolea-kanga Sekemo ye Emonga malopilinga ma se topo topa lipa u yunga ambomo óno serimu kanuna mengo pungu ono óno seringi.

<sup>17</sup> “Pulu Yemone u Eporayamondo “Sembó.” nirimu kanu walemo nondopa wendo ombá serimu kinia olionga yombo kolea Isipi moloringi mele anjupa anjupa awisili kalko liku moloringi. <sup>18</sup> Aku sipa selepa pumba pumbale, kalia-ingi awisili ombo pumba Isipi ye nokoli kingi se kolali sepa molorumu kanumuni Josepo yunga semanemo mimi sipa naa pilierimu. <sup>19</sup> Yuni olionga yomboma kolo topa sipa sepa kinjipa, anda-kolepalima mindili lipa sipa, “Bolango mengema ‘Kolangi.’” ningulamanga pea naa molko pena toko eltaa.” nirimu.

<sup>20</sup> “Aku siku seko molangi Mosisi meringi. Yu we-kango se naa meringi. Pulu Yemone kanopa peanga pilierimu kangomo meringi. Oli yopoko yunga lapanga ulkana taltoko moloringi. <sup>21</sup> Kanu-kinia pe pena taltoringi kinia ye nokoli kingimunga lemenu kanopa lipa “Nanga kangomo.” nimba yunga ulkana memba pumba nokorumu. <sup>22</sup> Isipi yombomanga pilipa kondoli perimu mele pali Mosisi mane siringi kinia yu pilipa kondoli pepa unguma sumbi sipa nimba uluma enge nimba sepa molorumu. <sup>23</sup> Mosisinga kalia-ingi paono talo pora nirimu kinia yunga Isirele yomboma ‘pumbu kano-pambo.’ konopu lierimu. <sup>24</sup> Pumba kano-porumu kinia Isipi ye sene Isirele ye se sepa kinjerimu. Kanopale yuni Isirele yemo lipa tapondopa Isipi yemo topa kondorumu.

<sup>25</sup> “(Mosisini pilipale, ‘Yunga yomboma ‘Pulu Yemone ‘Ono liku tapondani pu.’ nirimu.’ ningulamanga pea naa pilieringi.)

<sup>26</sup> “Opalikundu Isirele ye talo opa seringili kinia Mosisi pumba kanopale, yu pumba opa seringili yetolo ambolopa olondo nimbale: “Genungulutolo, nambi semu-na opa sekembeleye? Genungulu opa sekembele manda naa sekemo.” nirimu.

<sup>27</sup> “Kanu-kinia sepa kinjerimu ye kanumuni Mosisi paka topa anju mundupa nimbale: “Nawene nu ‘Olio nokani.’ nimba, nimba taltorumuye? <sup>28</sup> Oleanga nu Isipi yemo toko kondonu mele kiniá na ‘Topo kondambo.’ ningulamanga pea naa pilieringi.” nirimu. <sup>29</sup> Aku nirimu kinia Mosisi pilipale ‘Kingimuni na tomba.’ nimba kowa pumbale kolea Midiane pumba molorumu. Yu akuna molopale kango talo merimu.

<sup>30</sup> “Kanu-kinia Mosisi kolea Midiane molopili kalia-ingi paono talo ombo purumu kinia walte yu kolea ku lielina andopa mulu Sainai lierimuna nondopa molorumu kinia Pulu Yemonga angello se yu molorumuna ombo unju senga sepe nomba perimuna ombo molorumu. <sup>31</sup> Mosisini akumu kanopale yu konopu awisili lipa mundupa, serimu mele mimi sipa kanombando nondopa purumu kinia Ye-Awilimunga ungu se unjuna wendo orumu pilierimu mele i-sipa: <sup>32</sup> “Na nunga kolenalini popo toringi yemanga Pulu Yemo molio. Eporayamo keme Aisake keme

Jekopo keme akumanga Pulu Yemo molio." nirimu. Kanu-kinia Mosisi pungu-pungu nimba pipili kolopale lipa wekendo kanopa sepemo naa kanorumu. <sup>33</sup> Kanu-kinia Ye-Awilimuni yuntu nimbale: "Nu i ma gilkinumu nanga kene nunga kimbu-su kulku wendo lie! <sup>34</sup> Nanga yombo Isipi molemelema mindili nolemeleme mele kanopo pora sipu molio. Ono kola selemele mele pilipuli kiniá ono lipu tapondombondo mania ondu kene 'Nu kolea Isipindu kelko pani.' nimbu lipu mundumbu sekero." nirimu.

<sup>35</sup> "I ye Mosisi yu u Isipi molorumu kinia Isirele yombomane ninguli: "Nawene 'Nu olio nokani.' nimba, nimba taltorumuye?" ningu yunga ungumu pilku mokoli seringi kanu ye Mosisi Pulu Yemone yu yuyu nimba taltopa 'Nanga yomboma nokoko, ono liku tapondoko mindili nolemelema wendo lieni.' nimba unjuna sepe nomba perimumunga angello senga keremone 'Mosisi nimba sipili.' nirimu. <sup>36</sup> Kanu ye Mosisi yuni yomboma kolea Isipi memba ultu orumu. Ono kolea Isipi sukundu moloringi kinia kepe, Nomu Kondolina oringi kinia kepe, kolea ku lielina kalia-ingi paono talo andoko moloringi kinia kepe, yuni 'yu yuyu molorumu mele, lipa ora sirimu ulu-tondolo mare awisili serimu. <sup>37</sup> Ye sene Isirele yombomando nimbale:

"Pulu Yemone ungu-umbu tondolemoma  
pilipu ono nimbu siliu yemo molio mele  
pe ononga ye se na-meles  
'Pulu Yemone ungu-umbu tondombama  
pilipa nimba simba ye se molopili.' nimba  
Pulu Yemone lipa mundumba."

nirimu ye kanumu i Mosisi selumu mindi. <sup>38</sup> Isirele yomboma kolea ku lielina moloringi kinia kanu ye Mosisi ono pea moloringi. Yu olionga kolepalima kinia mulu Sainai molopa ungu nimba sirimu angellomo kinia pea moloringi. Pulu Yemone we pepa mindi pumba naa pora nimbá unguma Mosisini 'Olio nimba sipili.' nimba Mosisi ungu-umbu tondorumu kanu unguma yuni pilipale yando olio nimba sirimu.

<sup>39</sup> "Aku sipa serimu-na-kolo olionga anda-kolepalimane, Pulu Yemone yuntu "Ono nokou." nimba, nimba taltorumu ye Mosisinga, ungumu 'sengena panjipu naa pilimulú.' ningu yu bulu siku, ono 'Kolea Isipindu kelepo pamola!' ningu Isipi yakala kolko moloringi. <sup>40</sup> Mosisi mulu Sainaina ola pumba welea maniendo naa orumu kinia Isirele yombomane ononga ningu Pulu Yemo popo tondoringi yemanga pulupulu ye awili olandopa, Eronondo onone ninguli: "Olio mengo pungu nokonge pulu ye popo tomolo pokore nuni unjuni molo kouni seko wamondoyo. Olio kolea Isipi yando lipa memba orumu ye Mosisi welea naa okomo kene nambi semunje?" niringi. <sup>41</sup> Kanu walemonga onone kongi pirimu-kao walo none seli se seko wamokingi mele pilkuli konopu siku kongi kaloringima kinia kere-langí nongo moloringi. <sup>42</sup> Aku seringimunga Pulu Yemo ono lipa bulu sipa, oli kinia ena kinia kombokandi kinia muluna gilimuma onone 'Olio nokolemele pulu yomboma.' ningu popo toko mélema kalko singí seringi kinia kanopale 'Manda, ononga aku siku sangi.' nimba siye kolorumu. Aku seringi mele Pulu Yemone ungu-umbu tondorummuma pilku yomboma ningu siringi ye sene ungumu bokuna torumu mele manda selemo. Akumu i-sipa:

'Pulu Yemone nimbale: "O Isirele yomboma,  
u kalia-ingi paono talo  
yombo naa peli kolea ku lielina  
ono kongi pirimu-kao kinia sipisipi kinia  
meme kinia popo toko kaloringima  
popo toko kalko na siringiye?"

<sup>43</sup> 'Mólo.,' Ono serele-ulka mengo puringimu  
'Pulu ye Mollokonga tamandu ulkamo.' ningu

mengo pungu,  
 'Repane olionga pulu ye se.' ningu  
 yunga kombokandi none seli se seko anjiku,  
 kanu mélema  
 'Olio nokolemele pulu yomboma.' ningu  
 kape ningu popo toringi.

Aku seringimunga nane ono mindili lipu simbundu  
 'Ono kolea sirinduna naa molangi.' nimbu makoropo,  
 ono kolea-awili Bapillono nekendo  
 kolea anjupa senga lipu mundumbu." nirimu.'

nimba bokuna torumu. Aku sipa nimba bokuna torumu mele ono sika aku siku seringi.

<sup>44</sup> "Kolea ku lielina olionga anda-kolepalimane Pulu Yemo ono-kinia molorumu serele-ulka kanumu kanoko 'Pulu Yemo olio-kinia molemo.' ningu onone yu popo toko mélema kaloringi serele-ulkamo takoko anjeringi. Pulu Yemone Mosisindu "I-siku i-siku takangi." nimba ulkamo gilimba mele lipa ora sirimu aku siku onone takoko anjeringi. <sup>45</sup> Pe yandopa Josuane olionga anda-kolepalima nokorumu kinia ono kanu serele-ulkamo sikisiku, Pulu Yemone sirimu koleana mengo ongo anjeringi. Pulu Yemone kanu koleana yombo talape lupa peringima olionga anda-kolepalima "Kolali seko molangi, aku mamo liengi, kanuna pelemele yomboma kamu pang." nirimu kinia kanu koleana u peringi yombo talapema onone toko munduku, serele-ulkamo mengo ongo kanuna takoringi, yandopa ye nokoli kingi Depiti molorumu kinia we gilierimu.

<sup>46</sup> "Pulu Yemone Depiti yu kanopa peanga pilipa konopu mondorumu-kulu yuni Pulu Yemondo mangilipa nimbale: "Na kalopa liltimu ye Jekopo popo torumu Pulu Yemo molomba ulka se, u serele-ulkamo gilierimu mele, manda manjipu takondamboye?" nirimu. <sup>47</sup> Aku-na-kolo Pulu Yemone "Mólo." nirimu kinia Depitinga malo Sollomono, yu Depiti kolali sepa ye nokoli kingimu molopale, Pulu Yemonga ulka-tembelemo takondorumu.

<sup>48</sup> "Aku-sipa na-kolo Imbi Paa Olandopa Mololi Pulu Yemo yombomane takolemele ulkamanga naa molemo. Pulu Yemone ungu-umbu tondorumuma pilipa yomboma nimba sirimu ye sene aku sipa nirimu kanumu. Kanu yemone nimbale:

<sup>49</sup> "Pulu Ye Awilimuni nimbale:  
 "Mulu-koleamo nanga mania molopo  
 koleama nokolio polomo,  
 ma-koleamo nanga kimbu munduliu koleamo.

Pe onone nanga nambolka ulkamo takondongeye?  
 Molo na sena manda koro molomboye?

<sup>50</sup> Nanga kimuni i mélema pali naa serinduye?" nirimu."  
 nimba 'Aisayane, aku sipa nirimu kanumu." nimba Sitipenene nirimu.,

<sup>51</sup> "Ono kála seli yomboma, onone nando "Pulu Yemo seko kinjiku yu ungu-taka tondokono." nikimili-na-kolo akumu mólo. Ono 'Pulu Yemonga yomboma molamili.' ningu kangi se kopisiku wendo limili-na-kolo yombo Pulu Yemonga ungu naa pilieli yomboma mele molko ononga komuma pipi siku konopuma pipi siku molemele. Ono ononga anda-kolepalima seringi mele seko, onone Mini Kake Sélimunga ungumu liku bulu siku "Naa pilimulú." niringi mele ono aku siku nilimili. <sup>52</sup> Pulu Yemone ungu-umbu tondorumuma pilku yomboma ningu siringi ye se ononga anda-kolepalimane mindili liku naa siringi ye se molorumuye? Se naa molorumu kanumu. Kanu yema pali umbuna siringi. Kanu yemanga ye marene Pulu Yemonga Ye Sumbi Nílimu ombá mele ungumu pilku yomboma ningu siringi yema kepe ononga anda-kolepalimane toko kondoringila. Kanu-kinia Pulu Yemonga unguma ningu siringi yemane "Ombá."

niringi Ye Sumbi Nili kanumu kamu orumu kinia ono nanga ungumu pilku molemele yemane 'Yu toko kondangi.' ningu ononga opa-touma liku siringi kinia yu toko kondoringi.<sup>53</sup> Ono Isirele yomboma, ono angellomane Pulu Yemonga ungu-manema siringi yando likuli sengena panjiku naa seringi yomboma, onone Pulu Yemonga Ye Kake Seli Yesusi aku siku toko kondoringi." nimba Sitipenene nirimu.

**7:54—8:2**

*Sitipen Kouni Toko Kondoringi Semanemo (6:8-15, 7:1-53 pea)*

<sup>54</sup> Yuni onondo aku sipa nirimu pilkuli, yu-kinia paa mumindili kolko ononga kerema kongilku pulua toringi.<sup>55</sup> Aku-na-kolo Mini Kake Sélimu Sitipen yunga konopuna ombo molopa manda serimu-na yuni olando sipa kanopa mulu-koleana sukundu kanorumu kinia Pulu Yemonga tondolo pa sélimu kinia yunga tondolomo kinia akuma kanopa, Yesusi Pulu Yemonga ki-lomekondo ola gilierimu kanorumu.<sup>56</sup> Aku sipa kanopa nimbale: "Mulu-koleamo kuna lipa anju yando pukumu kanokoro kinia Mania Ombo Mana-Ye Au Lierimu Yemo Pulu Yemonga ki-lomekondo ola gilkimu kanokoro." nirimu.

<sup>57</sup> Yuni aku sipa Pulu Yemo kinia Yesusi kinia manda selu siku moloringili, mele nirimu pilkuli, "Pulu Yemo-kinia ungu-taka tondokomo lepomo." ningu, 'Yunga ungu nikimumu naa piliamili.' ningu komu pipi siku ono ungu lupa mare tondolo munduku niliku yu molorumuna lisiku ongo<sup>58</sup> yu ambolko kunduku kanu kolea-awilimunga palana ultu munduku, 'Yu kolopili.' ningu kouni tonge toringi.

U kotena "I-sipa i-sipa semu kanomulu." ningu kondi toringi yemane yu kouni tongendo ononga wale pakolima kulkuli, ye-kango se kanopa gilierimuna 'Nokopili.' ningu talteringi. Kanu yemonga imbimu Sollo.

<sup>59</sup> Onone yu kouni toko kondonge toringi kinia Sitipenene Yesusi-kinia ungu nimbale: "Ye-Awili Yesusi, na mini pukuru. Nu molenona wambo ni." nirimu.<sup>60</sup> Kanu-kinia yu kouni toko mania mundoringi kinia komorongo langopa ru nimba nimbale: "Ye-Awilimu, i seko kinjikimili ulumu pundu naa toko munduku keliei." nimbale yu kolorumu.

## 8

**8:1-3**

*Pollone Karasinga Yomboma Mindili Sirimu Semanemo (7:58 ekendo pea pali kanani)*

<sup>1</sup> Sollone Sitipen toko kondoringi kanopale 'Papu tokomele.' nimba yu konopu peanga lierimu.

Sitipen kouni toko kondoringi kanu walemonga Karasinga yombo talape kolea-awili Jerusalleme moloringima ononga opa-toumane pulu polko seko kinjiku paa mindili awili seko siringi kinia ono pali bulu-balu ningu pungu, mare kolea Judia disirikindu pungu molko, mare kolea Sameria disirikindu pungu moloringi. Yesusini "Nanga kongonomo sende-paa." nimba lipa mundorumu yema mindi Jerusalleme we moloringi.<sup>2</sup> Pulu Yemonga ungumu pilku moloringi ye marene Sitipen óno seko kola awisili seringi.

<sup>3</sup> Aku-na-kolo Sollone 'Karasinga yombo talapemo kamu mania pang.' nimba pulu polopa yombomanga ulkamanga pumba, yombo moloringima ki kundupa lipa memba pumba ka sirimu.

**8:4—12:25**

**Yesusini "Nanga Kongonomo Sende-Paa." Nimba Lipa Mundorumu Yema Kolea Judia Disiriki Kinia Sameria**

## Disirikitolo Andoko Yesusinga Ungumu Ningu Siringi Semanemo

8:4-25

*Kolea Sameria Disiriki Lierimu Taonomanga Pillipuni Semane Peangamo Topa Sirimu Semanemo*

<sup>4</sup> Karasinga yombo bulu-balu ningu puringimane Yesusinga semanemo kolea lupa lupamanga pali toko siliku puringi. <sup>5</sup> Karasinga yombomanga lipa tapondoli kusikus ye Pillipu Sameria disiriki lierimu taono senga maniando pumbale nirimumuni, Pulu Yemone “Ono nokopa kondomba ye se lipu mundumbu.” u nimba taltorumu ye nokoli Karasimunga semanemo topa sirimu. <sup>6</sup> Pillipu yuni ungu nirimu mele pilku, „Pulu Yemo kinia kopu seko moloringili, lipa ora sirimu ulu-tondoloma serimu kanokole, yomboma pali komu sendeko pilku moloringi. <sup>7</sup> Yombo awisili kuru konopumanga moloringima Pillipuni “Ongo ultu paa!” nirimu kinia ru ningu wendo ongo puringi. Kimbu kolopa pora sirimu yomboma kinia, kimbu pange sepa karaye sepa perimu yomboma kinia sepa peanga sirimu. <sup>8</sup> Pillipuni aku sipa ulu-tondoloma serimu-kulu aku taonona moloringi yomboma konopu awili seko siringi.

<sup>9</sup> Kanu taonona ye se molorumu, yemonga imbimu Saimono. Pillipu u naa opili kurumane Saimono yu liku tapondoringi kinia yuni “Na ye awilimu. Na imbi molemo.” nimba ulu-tondoloma serimu. Kolea Sameria yombomane pali ulu-tondoloma serimu mele kanokole konopu awisili liku mundoringi. <sup>10</sup> Yombo kamakoma kinia koropama kinia yunga ungumu komu sendeko pilku ninguli: “I yemo Pulu Yemo tondolo pelemo mele yu tondolo aku sipa pelemo yemo. Yu Tondolo Pelemo Pulu Yemo molemo.” niringi. <sup>11</sup> Saimono alieli ulu-tondolo awisili serimukulu kanoko konopu awisili liku mundukuli yunga ungumu pilku yu lombili puringi. <sup>12</sup> Aku-na-kolo Pillipuni Pulu Yemo ye nokoli kingimu molopa mélema nokolemo nokomba mele semane peangamo topa sipa, Yesusi yu yomboma lipa tapondopa kolali sepa mindili nondorumu yemo molopa, yu Pulu Yemone ‘Ono nokopa kondomba ye se lipu mundumbu.’ nimba taltorumu ye nokoli Karasimu molorumu mele nimba sirimu kinia yombo awisilini ‘Sika nikimu.’ ningu kuru mondokole „Saimono munduku kelko konopu topele toko, no litingi. <sup>13</sup> Saimono kepe Pillipuni nirimu mele ‘Sika nikimu.’ nimba kuru mondopale no liitmu. Lipale Pillipu molorumuna lombili pumba, Pillipuni „Pulu Yemo kinia kopu seko moloringili, lipa ora sirimu ulu-tondolo awisili serimu mele kanopale konopu awisili lipa mundorumu.

<sup>14</sup> Kanu-kinia kolea Sameria disiriki yombomane Pulu Yemonga ungumu konopu siku pilku litingi mele Yesusini “Nanga kongonomo sende-paa.” nimba lipa mundorumu ye kolea-awili Jerusalleme moloringi yemane pilkuli niringimuni, ononga ye Pita kinia Jonotolondo “Sameria yomboma liku tapondangili pale.” ningu olo liku mundoringi. <sup>15-16</sup> Akuna punguli niringilimuni, Sameria yomboma moloringina Mini Kake Sélimu u naa orumu-na kanu liku mundoringi yetolone ‘Ono Mini Kake Sélimu liengi.’ ninguli, ‘ononga’ ningu Pulu Yemo mawa senderingili. U Ye-Awili Yesusinga imbi leko no mindi litingi. <sup>17</sup> Kanu-kinia pe Pita kinia Jonotolo pungu ononga „penge,na amboloringili kinia ono Mini Kake Sélimu litingila.

<sup>18</sup> Kanu-kinia olone yombomanga „penge,na amboloringili kinia ono Mini Kake Sélimu litingi mele Saimonone kanopale yu olo moloringilina kou-mone memba ombo olondo nimbale: <sup>19</sup> “‘Nane yombo senga „penge,na ambolombo kinia Mini Kake Sélimu lipili.’ ningu olone i sekembele tondolomo ‘na siengili.’ nimbu kou-mone membo okoro.” nirimu.

<sup>20</sup> Aku-sipa na-kolo Pitane pundu topa nimbale: “Nuni ‘Pulu Yemone we silimú mélse kou-monene manda topo toko limili.’ konopu lekenomonga nunga kou-monema mengo kolea kirina pani. <sup>21</sup> Pulu Yemone kanopa peanga pilielemo mele

nu aku sipa mólo, akumunga i kongono selembolo mele nunga kongono se paa mólo. <sup>22-23</sup> Nuni olto selembolo mele kanoko yama panjilinumunga nu molko kinjiku, ulupulu-kirimane nu ka silimú kene ‘I konopu lekero mele Ye-Awilimuni ‘Mania pupili.’ nimba siye kolombanje.’ ningu, kiniá aku seko kinjilinu ulu-puluma kanoko kiri pilku konopu topele toko, yu-kinia ungu ningu mawa sani.” nirimu.

<sup>24</sup> Aku nirimu pilipale Saimonone pundu topa nimbale: “Na-kinia wendo ombá nikimbili uluma wendo naa opili kene alone na liku tapondoko Ye-Awilimun kinia ungu ningu mawa sendangili.” nirimu.

<sup>25</sup> Pita kinia Jonotolone Yesusi-kinia molko kanoringili mele ningu siku, Ye-Awilimunga ungumu ningu sikuli, olo kelko Jerusalleme puringili. Pungilí punguli kolea Sameria disiriki sukundu taono lierimumanga semane peangamo toko siliku puringili.

*8:26-40*

### *Pillipuni Semane Peangamo Kolea Apirika Itiopia Yemo Topa Sirimu Semanemo*

<sup>26</sup> Walte Pulu Ye Awilimunga angello sene Pillipundi nimbale: “Jerusalleme munduku kelko Gasa taono pungí pulimili aulka akuna kolea ku lielina pani pu.” nirimu. <sup>27</sup> Kanu kinia Pillipu akuna purumu. Pumba kanorumu kinia Itiopia ye se aulkana ombo purumu kanorumu. Kanu yemo yu ambo Kandasi, kolea Itiopia yombomanga ambo nokoli kuwinimunga kou-mone nokondorumu ye awilimu. Pillipuni yu aulkana u naa kanopa lipili yu Pulu Yemo popo topa imbi ambolopa paka tondombando u Jerusalleme purumu. <sup>28</sup> Pe kelepa ulkando pumbándo kongi osene kundorumu karona ola molopa Pulu Yemone ungu-umbu tondorumuma pilipa yomboma nimba sirimu ye Aisayane torumu bokumu kanolepa ulkando pumbá purumu. <sup>29</sup> Kanu-kinia Mini Kake Sélimuni Pillipundi nimbale: “Nu pungu kongi osene karo kundupa memba ombo pukumumu lombili pu.” nirimu.

<sup>30</sup> Kanu-kinia Pillipu karo ombo purumuna lisipa pumba pilierimu kinia ye karona molorumu kanumu yu Pulu Yemone ungu-umbu tondorumuma pilipa yomboma nimba sirimu ye Aisayane torumu bokumu kanopa nilipa purumu pilipale, mangilipa nimbale: “Nu bokuna ungu kanoko ninkumunga ungu-pulamu pilkinu molo móloye?” nirimu.

<sup>31</sup> Ye kanumuni pundu topa nimbale: “Yombo sene na nimba naa simba kinia na nanu nambi sepo pilimbuye?” nirimu.

Aku nimba Pillipundi nimbale: “Nu karona kopu sepo molambili ou.” nirimu.

<sup>32</sup> Pulu Yemonga ungumu yemone kanorumu mele i-sipa:

“Kongi sipisipi waloma mengo pungu tolemele mele

yu aku siku mengo pungu toringi. Aku-kinia  
kongi sipisipi indi porongendo ambololemele kinia  
ungu naa nimba we sendepa lemó mele

yu toko kondonge seringi kinia  
aku sipa ungu naa nimba  
we sendepa lieli molorumu.

<sup>33</sup> Yu ungu se sepa naa kinjerimu-na-kolo

kote we sendeko ka sikuli toko kondoringi.

Yu bolango se naa mepili yu toringimunga

yunga kalopa liltimu yombo talape se naa molemo.”

nimba, bokuna aku sipa molorumu ungumu kanorumu.

<sup>34</sup> Itiopia yemone Pillipu mangilipa nimbale: “I bokumu torumu yemone nawendo i ungumu nirimuye? Yu yuyundu nirimu molo yombo se lupando nirimuye?” nimba mangilierimu. <sup>35</sup> Kanu-kinia Pillipuni kanu yemondo unguma nimbale yemone

kanorumu ungumanga pulumu pulu polopa nimba sipa Yesusinga semane peangamo topa sirimu.

<sup>36</sup> Aulkana pungilí pungu no kelo senga puringili kinia Itiopia yemone Pillipundi nimbale: “I no ombo pukumumu kana. Mélse na no limbu aulkamo manda pipi simba molo no manda limbuye?” nirimu.

<sup>37</sup> (Pillipuni pundu topa nimbale: “Yesusinga ungu nimbu sikirumu ‘Akumu sika lémo.’ ningu kuru mondronu liemu no manda lini.” nirimu.)

Itiopia yemone pundu topa nimbale: “‘Yesusi Karasi yu sika Pulu Yemonga Malo.’ nimbu pilipu kuru mondokoro.” nirimu.)  
<sup>38</sup> Kanu-kinia karo kanumu ‘Liepili.’ nimba Pillipu kinia olo pukua toko nona mania punguli Pillipuni Itiopia ye kanumu no linderimu. <sup>39</sup> Nomo munduku kelko wendo oringili kinia Ye-Awilimunga Minimuni Pillipu waltikele lipa memba purumu kinia nema serimu-kulu Itiopia yemone yu kelepa naa kanopa, konopu silipa yunga ulkando purumu.

<sup>40</sup> Minimuni Pillipu memba pumba Asitote taonona mondorumu kinia yu akuna molopale koleamanga pali semane peangamo topa silipa andopa kolea-awili Sisaria wendo purumu.

## 9

9:1-25

*Pollo Damasikas Pumba Serimu Semanemo*  
9:1-19

*Pollo Konopu Topele Topa ‘Yesusi Yu Sika Ye Nokoli Karasimu.’ Nimba Yunga Yemo Molorumu Semanemo (9:1-25 pali)*

<sup>1</sup> Sollo u pulu polopa Ye-Awilimunga lombili andoli yomboma mindili lipa sirimu mele mundupa naa kelepa, ‘Ono kolangi.’ nimba we mindili lipa sipa molorumu. Aku sipa sepa molombando Pulu Yemo popo tondoringi ye awili olandopamo molorumuna pumba <sup>2</sup> mawa sepa mangilierimu kinia ye nokolimuni pepá se topa sipa nimbale: “I ye Sollo kolea-awili Damasikas pumba, Juda yomboma maku toko Pulu Yemonga ungumu pilielemele ulkamanga pumba, Yesusini serimu mele pilku molemele yomboma kanopa ka sipa, Jerusalleme yando memba opili.” nirimu.

<sup>3</sup> Kanu-kinia Sollo yu kolea-awili Damasikas nondopa pumbá purumu kinia waltikele mulú-koleana pa seli se mania ombo yu molorumuna pa awili-sepa serimu.

<sup>4</sup> Yu topa mania mundorumu lepa pilierimu kinia ungu se yundu nimbale: “Sollo, Sollo, nambi semu-na nuni na mindili liku silinuye?” nirimu.

<sup>5</sup> Sollone nimbale: “Ye-Awilimu, nu nawe?” nirimu.

Yuni pundu topa nimbale: “Na Yesusi, nuni mindili liku silinu yemo. (Kongi kao se kongono selemo kinia ‘Pupili.’ ningu kimbuna tolo se munduku pololemele kinia kaomone ‘Mólo.’ nimba kimbu elkapi tolemo kinia tolomo kamu kaomone yuyu tolomo polopa olandopa mindili nolemo-na-kolo naa pilipa karaye sepa, selemo mele we sepa mindi pumba naa kelielemo aku sipa mele nuni seleno.) <sup>6</sup> Kiniá ola molko ne kolea-awilina sukundu pani. Akuna puni kinia nu sení mele ye sene nimba simba.” nirimu.

<sup>7</sup> Sollo pea puringi yema poporome ungu mele pilku yombo se naa kanokole, ono ungu naa ningu we gilieringi. <sup>8</sup> Sollo mongo makilipa ola molorumu-na-kolo mongomone mélse naa kanorumu. Akumunga, yu pea puringi yemane yu ki ambolko mengo kolea-awili Damasikas sukundu puringi. <sup>9</sup> Wale yopoko yu mongomone mélse naa kanopa kere-langí kepe no kepe naa nomba we molorumu.

<sup>10</sup> Kolea-awili Damasikas sukundu Yesusinga lombili andoli ye se molorumu, yunga imbimu Ananayas. Ye-Awilimuni Ananayas molorumuna ombo kaima mele sipale "Ananayas." nimba mangilierimu.

Yuni pundu topa nimbale: "Ye-Awilimuni, na ya molio." nirimu.

<sup>11</sup> Ye-Awilimuni yuntu nimbale: "Aulka imbi leko 'Aulka Sumbi Nílimu' nilimili kanuna nu punguli ninimuni, Judasinga ulkana pungu mangilku, kolea-awili Tasisi ye se, yemonga imbi Sollo, yu akuna na-kinia ungu nimba molemo kene pungu kanani. <sup>12</sup> Sollo yu mongo-indi kaima mele sepa kanomu kinia ye se, yemonga imbimu Ananayas, yu ombo yunga kimuni mongona ambolomu kinia yunga mongotolo peanga liemu kanomu." nimba Ye-Awilimuni nirimu.

<sup>13</sup> Ananayasini pundu topa nimbale: "Ye-Awilimuni, ye kanumuni nunga yombo kake seli Jerusalleme moloringima sepa kinjipa mindili lipa sirimu mele yombo awisilini semane toko nilimili pilielio. <sup>14</sup> Pulu Yemo popo tondoringi ye awilimane yu pepá toko siringi lipa ya memba ombale, nunga imbi leko nu-kinia ungu nilimili yomboma ka simbando orumu." nirimu.

<sup>15</sup> Aku sipa nirimu-na-kolo Ye-Awilimuni yuntu nimbale: "Mólo. Ye nikiru akumu 'Yu nanga kongonomo sendepili.' nimbu, nimbu taltorundu yemo. Yu Isirele yomboma naa molko umbu lupa mololi yomboma kinia ononga ye nokoli kingima kinia molongemanga kepe Isirele yombo molongemanga kepe pumba nanga ungumu nimba simba kene nikiru mele se-pani. <sup>16</sup> Yuni nanga ungumu andopa nimba sipale umbuna memba mindili nombá mele nane lipu ora simbú." nirimu.

<sup>17</sup> Kanu-kinia Ananayas ulka nirimu kanuna sukundu pumba Sollo ambolopa nimbale: "Ano Sollo, nu aulkana oni orunu kinia Ye-Awilimuni nuni kanorunu, kanu ye Yesusingi 'Nu mongone kelko kanoko Mini Kake Sélimu nunga konopuna ombo molopa manda sepili.' nimba na "Pu." nimu-na okoro." nirimu. <sup>18</sup> Kanu-kinia popenge sepa yunga mongotolonga mélse pipi sirimu kanumu ombo wendo purumu kinia yu kelepa mongone mélema manda kanopale nirimumuni, yu ola molopa 'Karasinga yemo kamu molambo.' nimba no liltimu. <sup>19</sup> Aku sepale, kere-langi pokore norumu kinia yu kelepa enge perimu.

9:19-22

### *Pollone Semane Peangamo Damasikas Yomboma Topa Sirimu Semanemo (9:1-25 pali)*

Sollo yu wale mare kolea-awili Damasikas molopa Yesusinga lombili andoli yomboma kinia molorumu. <sup>20</sup> Yu sumbi sipa pumba Juda yomboma maku toko Pulu Yemonga ungumu pilieringi ulkamanga pumba Yesusi molorumu mele nimba sipa nimbale: "I yemo yu Pulu Yemonga Malo." nirimu.

<sup>21</sup> Yunga ungu pilieringi yombomane mini-wale mundukuli mangilku pilku ninguli: "Ne aku nikimu yemo, Yesusinga imbimu leko Pulu Yemo kinia ungu niringi yombo Jerusalleme moloringima sepa kinjipa topa bulu-balu sipa mundupa mindili lipa sirimu ye kanumu móloye? Pe kiniá ya ombo aku siku seko molemele yomboma ka sipa Pulu Yemo popo tondoringi ye awilima molemelena memba pumbá yemo imu lepomo." niringi.

<sup>22</sup> Aku-na-kolo Sollo yunga engemo paa olandopa perimu, Pulu Yemone 'Ono nokopa kondomba ye se lipu mundumbu.' nimba, nimba taltorumu ye nokoli Karasimu Yesusi yu kanu yemo molorumu mele tondolo mundupa nimba sirimu-kulu Juda yombomane yuntu ungu se pundu toko manda naa niringi.

9:23-25

### *Juda Yombomane Pollo-Kinia Opa-Tou Moloringi-Kulu Kolea-Awili Damasikas Mundupa Kelepa Kowa Purumu Semanemo (9:1-25 pali)*

<sup>23</sup> Wale awisili omba purumu kinia Juda yombomane Sollo toko kondongendo langi niringi, <sup>24</sup> aku-na-kolo yu pilierimu. Yu toko kondongendo tangoli kepe ipulieli kepe kolea-pala kere-pingiyamanga nokondoko moloringi. <sup>25</sup> Aku-na-kolo walte ipulieli yu lombili puringi yombomane 'Yu naa toko kondangi.' ningu mengo pungu, kou-palana ola mengo pungu wale basiketena lakilku ka moko toko 'kolea-awili Damasikas, ultu mundoringi.

9:26-31

### *Pollo Jerusalleme Pumba Serimu Mele Semanemo*

<sup>26</sup> Sollo 'Damasikas mundupa kelepa pumba, kolea-awili Jerusalleme ombale nirimumuni, Yesusinga lombili andoli yomboma kinia pea molomba serimu-na-kolo onone pilkuli 'Yuni ono peke tondopale we nikimu. Yu paa sika Yesusinga ungumu pilieli ye se mólo.' ningu pilkuli yu pipili koloringi. <sup>27</sup> Aku-sipa na-kolo Yesusini "Nanga kongonomo sende-paa." nimba lipa mundorumu yema moloringina Banapasini Pollo yu lipa memba pumba onondo nimba: "I yemo aulkana pumba Ye-Awilimu kanorumu, Ye-Awilimuni yundu ungu se nirimu kinia yu kolea-awili Damasikas pumba "Yesusinga ungumu nikiru." nimba pipili naa kolopa nimba sirimu." nimba aku sipa mele nirimu. <sup>28</sup> Aku nirimumunga Sollo yu ono kinia pea molopa, Jerusalleme we andopa molopa, "Ye-Awilimunga ungumu nikiru." nimba pipili naa kolopa andopa nimba sirimu. <sup>29</sup> Yu kinia Giriki-ungu niringi Juda yomboma kinia angelema niringi-na-kolo onone yu toko kondonge seringi. <sup>30</sup> Toko kondonge seringi mele 'Yesusi pilku moloringi, genupilimane pilkuli, yu kolea-awili Sisaria maniando mengo pungu "Kolea-awili Tasisi pu." ningu mundoringi.

<sup>31</sup> Kanu-kinia Sollone yomboma sepa kinjerimu mele mundupa kelierimu kinia Judia kinia Gallilli kinia Sameria kinia kanu disirikimanga Karasinga yombo talapemo-kinia umbuna se wendo naa orumu, molko kondoringi. Ye-Awilimu pipili kolko 'Yunga ungumu pilipu lipu samili.' ningu moloringi-kulu Mini Kake Sélimuni ono lipa tapondorumu kinia Ye-Awilimu yunga talapemo enge nimba yombo awisili yunga talapena sukundu sukundu puringi.

9:32-35

### *Pitane Kolea LLida Ye Inias Aniembo Lierimu Sepa Peanga Sirimu Semanemo*

<sup>32</sup> Pita koleamanga pali andopale, walte LLida taono 'Pulu Yemonga, yombo kake seli moloringima pumba kano-porumu. <sup>33</sup> Akuna ye se molorumumunga imbimu Inias, yu kimbu ki kolopa pora sirimu-kulu kalia-ingi engaki aniembo lierimu. <sup>34</sup> Pitane yundu nimba: "Inias, Yesusi Karasini 'Nu peanga liepili.' nikimu kene nu ola molko nunga aniembo leno kunungumu kimbou." nirimu. Aku nirimu kinia popenge sepa yu ola molorumu. <sup>35</sup> LLida taono yomboma kinia Sarone taono yomboma kinia pali yu kanokole konopu topele toko Ye-Awilimunga ungumu pilku moloringi.

9:36-43

### *Kolea Jopa Ambo Tapita Dokas Kolorumu Kinia Pitane Pumba "Nu Ola Molou." Nirimu Semanemo*

<sup>36</sup> Jopa taono Ye-Awilimunga lombili andoli ambo se molorumu, yunga imbimu Tapita, (Giriki-unguna "Dokas" niringi). Yu alieli siye naa kolopa, umbuna perimu yomboma kondo kolopa koropama lipa tapondorumu. <sup>37</sup> Pita LLida taono molorumu kanu walemanga kanu ambomo kuru torumu kinia yu kolorumu, yunga ónomo no lendeko suluminia senga taltoringi. <sup>38</sup> LLida taono lierimuna Jopa taono nondopa lierimu. Akumunga, Ye-Awilimunga lombili andoli yombomane Pita LLida taonona molorumu pilkuli onone ye talo yu molorumuna liku mundoringi kinia olo ongo yu paa mawa seko ninguli: "Nu 'Pea pamili.' nimbu, limbulú okombolo." niringili.

<sup>39</sup> Pita olo kinia pea pumba yu ulkana purumu kinia onone yu ulka suluminiana mengo puringi. Ambo-wayama Pita gilierimuna nondoko ongo liku kakapu seko gilku kola sekole, Dokas yuni konde molopale ononga mulu-maminia senderimuma ongo liku ora siringi.

<sup>40</sup> Pitane "Ono suluminiana naa molko, ultu paa." nimbale, komorongo langopa mania molopa Pulu Yemo kinia ungu nirimu. Aku sepale ambo ónomo lierimuna topele topa kanopa nimbale: "Tapita, nu ola molou." nirimu. Kanu-kinia mongo makilipale Pita kanopa imbi sipale ola molorumu. <sup>41</sup> Pitane yu ki ambolopa lipa ola anjipale, „Pulu Yemonga, yombo kake selima kinia ambo-wayama pea mangilipale "Dokas konde pumu kene ongo liee." nirimu. <sup>42</sup> I ungu wendo orumumu Jopa taono yomboma pali pilkuli, yombo awisilini 'Ye-Awili, Yesusi, yu sika, 'Pulu Yemone "Ono nokopa kondomba ye se lipu mundumbu." nimba, nimba taltorumu ye nokoli Karasimu.' ningu kuru mondoringi. <sup>43</sup> Pita wale awisili Jopa ye se kinia molorumu. Yemonga imbimu Saimono, yu kongi kao kangi sepa wamopa kou liltimu yemo.

## 10

10:1—11:18

*Pita Kinia Romo Ye Konilliasitolonga Semanemo  
10:1-8*

*Mulu-Koleana Angello Se Omiba Ye Konillias Ungu Nimba Sirimu Semanemo*

<sup>1</sup> Romo ye se kolea-awili Sisaria molorumumunga imbimu Konillias. Yu Romo ami-ye wane anderete nokorumu yemo. Aku ami-yemanga talapemonga imbimu Italli Ami Ye Talapemo. <sup>2</sup> Yu kinia yunga pulu lemó yomboma kinia ono Juda yomboma mólo. Yombo-lupama molkole Pulu Yemo pipili kolko liku awi siku yunga ungumu pilieringi yomboma moloringi. Yuni méle mólo torumu yomboma lipa tapondopa kou-mone sipa, alieci Pulu Yemo kinia ungu nirimu.

<sup>3</sup> Walte ipupini ena tere killoko mele Konillias yu Pulu Yemo kinia ungu nimba molopale mongo-indi kaima mele sepa kanorumu. Pulu Yemonga angello se omiba yu molorumuna orumu sumbi sipa kanorumu. Angellomone yundu nimbale: "Konillias." nirimu.

<sup>4</sup> Konillias pungu-pungu nimba yu neme-neme nimba kanopa mangilipa nimbale: "Ye-Awilimu, nambi semuye?" nirimu.

Angellomone pundu topa nimbale: "Nuni Pulu Yemo kinia ungu ningu, yombo koropama liku tapondoko, selenomonga Pulu Yemone kanopa peanga pilielemo.

<sup>5</sup> Kiniá nuni ye mare Jopa taonondo pangí liku mundukuli, akuna ye se molemomonga imbimu Saimono, yunga imbi se Pita, "Yu opili." niengi. <sup>6</sup> Saimono Pita yu pelemo ulka pulu yemonga imbimu Saimonola nilimili. Yu kongi kao kangima sepa wamopa kou-mone limú yemo, yunga ulkamo nomu-kusa kelona gilimú." nirimu.

<sup>7</sup> Angello kanumuni aku sipa nimbale yu purumu. Kanu-kinia Konilliasini yunga kendemande-ye talo kinia, yu lipa tapondorumu ami-ye se kinia "Ono waa." nirimu. Kanu ami-yemo yu Pulu Yemonga ungumu pilierimu yemola. <sup>8</sup> Konilliasini onondo ulu wendo orumu mele pali nimba sipale, "Ono Pita liku mengo wangí Jopa taonondo paa." nimba lipa mundorumu.

10:9-23

*Pita We Molopa Mongo-Indi Kaima Mele Sepa Kanorumu Semanemo (10:1—11:18  
pali lipa sere lepa semane paa selumu.)*

<sup>9</sup> Ono pungu aulkana pekole, opalikundu anjupa pungu awi-tangoli Jopa taono nondoko pungí puringi. Awitangoli Pita Pulu Yemo kinia ungu nimbando ulka imuna ola purumu. <sup>10</sup> Kanu-kinia Pita gelene kolopa 'Kere-langí se namboa!' nimba

pilierimu. Yomboma kere-langi kokele kaloringi-kulu nokopa molopale, yu mongo-indi kaima mele sepa kanorumu kinia,<sup>11</sup> mulúna anju yando pumba, mulu-maminia paa awili se, ekendo ekendo pundu kisenga ambolopale taka lepa mana mania mundorumu.<sup>12</sup> Aku maminiana sukundu kongi lopa kera wambiye méle-takarama pali moloringi.

<sup>13</sup> Kanu-kinia ungu se omba yuntu nimbale: "Pita, ola molko i méle molemele-manga se toko nou." nirimu.

<sup>14</sup> Pitane pundu topa nimbale: "Ye-Awili, paa naa nombo! Nuni kanoko kiri pilieno mélema kinia, "Kalaro molemo." nilinu mélema kinia, olio Juda yombomando "Naa nangi." ningu ungu-mane sirinu mélema na naa nolio naa nombó, mólo!" nirimu.

<sup>15</sup> Wale talo-sipa kanu ungumu kelepa wendo omba yuntu nimbale: "Pulu Yemone kake sendelemo mélemando nuni "Kalaro molemo." ni naa ni." nirimu.

<sup>16</sup> Olo aku siku wale yopoko angelema niringili kinia waltikele mulu-maminiamo kelepa mulúna olando purumu.

<sup>17</sup> Pita konopu kimbu sipale 'I kaima mele sepo kanokromonga pulumu nambolkarenje?' nimba pilipa molopili Konilliasini lipa mundorumu ye kanuma ongo yombo marendo 'Saimononga ulkamo semoye?' ningu mangiliku ongole, yunga ulka kerepuluna ongo gilieringi.<sup>18</sup> Akuna gilku mangilku, "Saimono Pita andi molemoye?" niringi.

<sup>19</sup> Pita yu mongo-indi kaima mele serimumunga 'Pulumu nambolkarenje?' nimba konopu kimbu sipa molorumu kinia Minimuni yuntu nimbale: "Ye yopoko nu koroleko okomele.<sup>20</sup> Akumunga nu ola molko maniendo pungu, konopu awisili liku naa munduku ono kinia pangipuyo. Nane yema lipu mundondu-na okomele." nirimu.

<sup>21</sup> Pita maniendo pumba yemando nimbale: "Ono korokomele yemo na. Ono nambi semu-na ongiye?" nirimu.

<sup>22</sup> Yemane pundu toko ninguli: "Romo ami-ye wane anderete nokolemo ye Konilliasini olio lipa mundomu-na omulu. Konillias yu ye sumbi nílimu, yu Pulu Yemo pipili kololemo yemo. Juda yombomane pali "Yu ye peangamo." nilimili. Pulu Yemonga angello sene yuntu nimbale: "Saimono Pita ungu se nipili nu piliani kene 'Yu opili.' ni." nirimu." niringi.

<sup>23</sup> Pitane nimbale: "Ono pea peamili, ulkando waa." nirimu.

10:23-33

### *Pita Konilliasinga Ulkana Purumu Semanemo (10:1—11:18 pali lipa sere lepa semane paa selumu)*

Pekole niringimuni, orili-u yu ono-kinia purumu kinia Yesusi pilku moloringi, Jopa taono Juda ye mare yu kinia pea kopu seko puringi.<sup>24</sup> Ono pungu aulkana pekole, orili-u kolea-awili Sisaria sukundu puringi. Konilliasini 'Kiniá onge.' nimba yunga genupili lapali kinia pulu lierimu yomboma kinia "Sukundu-sukundu waa." nirimu, ono liku maku toko nokoko moloringi.<sup>25</sup> Pita ulkana sukundu pumbá purumu kinia Konillias ombo yunga kimbuna tamalu pepa yunga imbi ambolopa paka tondopa kape nirimu.<sup>26</sup> Aku-na-kolo Pitane yuntu nimbale: "Na Pulu Yemo mólo. Na we-yemo. Nu ola molou." nirimu.

<sup>27</sup> Ungu niliku ulka sukundu puringili kinia yombo awisili maku toko moloringi kanorumu.<sup>28</sup> Yuni onondo nimbale: "Juda yomboma kinia yombo lupama kinia seluna naa molangi." nilimili ungu-manemo ono pilkimili. Na Juda yemo molopo i ungu-manemo pilieliomonga ono yombo lupa molemelena na naa olka, aku-na-kolo Pulu Yemone na lipa ora simu mele i-sipa: Yuni nando nimbale: "Yomboma apuruku 'Se kiri, kalaro mololimu.' ningu seluna naa moloni kinia manda naa sembá." nimu.

<sup>29</sup> Akumunga, na ‘Ou.’ ningu mangiliengi kinia ononga ungumu pilipu mokoli naa sepo ondu. Nambi semu-na nando “Ou.” níngiye?” nirimu.

<sup>30</sup> Konilliasini pundu topa nimbale: “Wale kise ombo pukumu, kiniá ena tere killoko sekemo mele, u aku sipa ipupini tere killokona i nanga ulkana na Pulu Yemo kinia ungu nimbu molorundu kinia waltikele nanga kumbikerena yombo se mulu-maminia tondolo pa sélimu pakopa ombo gilipa <sup>31</sup> nimbale: “Konillias, nuni Pulu Yemo kinia ungu nilinu mele yuni pilipa lipa, yombo koropama liku tapondoleno mele kanopa peanga pilielemo. <sup>32</sup> Kiniá nuni ye mare Jopa taonondo pangiliku mundukuli, akuna ye se molemo, yemonga imbimu Saimono, yunga imbi se Pita, “Yu opili.” niengi. Pita yu kongi kao kangima sepa wamopa kou-mone limú ye Saimononga ulkana molemo, yunga ulkamo nomu-kusa kelona gilimú.” nirimu. <sup>33</sup> Aku nirimu pilipuli nane sumbi sipu nu molorununa ye marendo nu “Pungu li-paa.” nirindumunga nu ongo língi, nu papu onu. Kiniá olio Pulu Yemo kinia pea ombo molemolo yomboma ‘Pulu Yemone nu ungu nimba simuma olio ningu sieni.’ nimbu, pilimulúndu ombo molemolo.” nirimu.

10:34-48

### Pita Konilliasinga Ulkana Purumu Kinia Semanemo

10:34-43

*Pita Konilliasinga Ulkana Moloringi Yomboma Yesusini U Serimu Pe Sembal Mele Semane Topa Sirimu Kinia (10:44-48 pea)*

<sup>34-35</sup> Konilliasini aku sipa nirimu kinia Pitane pilipale nirimumuni, Konilliasinga ulkana moloringi yombomando pulu polopa nimbale: “U na pilipuli, ‘Pulu Yemone Isirele yomboma manjipa konopu mondolemo.’ konopu lierindu. Aku-na-koło kiniá pilkiru, yuni yombo talapemanga pali yombo selu selu ningu yu pipili kolko liku awi siku ulu-pulu peangama sumbi siku selemele yomboma kanopa peanga pilipa ‘Nanga kumbikerena manda ongo molangi.’ nilimú lepomo, akumu kiniá piliporo.

<sup>36</sup> “Pulu Yemone koro-u Isirele yombomando “Ono nokopa kondomba ye se lipu mundumbu.” nimba, nimba talitorumu yemo talko orumu ye nokoli Karasi Yesusi yu yombomanga pali Ye-Awilimu, akumuni olio Pulu Yemo kinia konopu seluna pupili manda selu siku molomolo aulkamo akisinderimu semane peangamo Isirele yomboma moloringina Pulu Yemone nimba mundorumu. <sup>37</sup> U kolea Judia disiriki koleamanga pali ulu wendo orumuma ono nanga ungu nikirumu pilkimili yombomane u pilku pora silimili. U Jonone yombomando “Konopu topele tokole no liengi.” nimba aku unguma nimba sirimu. Pe Yesusi kolea Gallilli disiriki yunga uluma pulu polopa serimu. <sup>38</sup> Wambola se pengena ondoko pakondoringi mele Pulu Yemo yunga kongonomo sembando Pulu Yemone kolea Nasarete ye Yesusi Mini Kake Sélimu sipa Yesusi ‘Tondolo pupili.’ nirimu. Kanu-kinia Pulu Yemo Yesusi kinia molorumu-kulu Yesusi koleamanga andopa ulu peangama sepa, ‘kurumanga nokoli, depelemone ambolorumu yomboma “Peanga liepili.” nirimu. ‘Akumu ono pilku pora silimili.’

<sup>39</sup> “Juda yombomanga koleama pali kinia ononga kolea-awili Jerusalleme kinia yuni ulu serimuma pali olio yu lombili andorumulume mongone kanopo molorumulu. Onone ‘Yu kolopili.’ ningu unjuna uku toko panjeringi kolorumu. <sup>40</sup> Aku-na-koło yu wale talo yombo-óno-koleana perimu yopoko-sipamonga Pulu Yemone topa makisindipale “Yombomane nu kanangi mona molou.” nirimu. <sup>41</sup> Yomboma pali yu lomboropa ola molorumu naa kanoringi. U Pulu Yemone ‘Kanangi.’ nimba, nimba talitorumu yombomane mindi kanoringi; olio Yesusi lomboropa ola molorumu kinia yu pea kere-langí nombo molorumulu yombomane mindi yu kanorumulu.

<sup>42</sup> “Yuni oliondo nimbale: “Onone yomboma semane peangamo toko siku, ‘Pulu Yemone na ‘Yombo konde molemelema kinia kololemelema kinia ononga pali kote

sendepa pilimba yemo molopili.' nirimu.' ningu yomboma ningu sie." nirimu.  
<sup>43</sup> Pulu Yemone ungu-umbu tondorumuma yomboma ningu siringi yemane pali u yu ma-koleana naa opili yunga ungumu ningu siku ninguli: "Yesusi yu sika 'Pulu Yemonga Malo molopa, sika yu mana mania ombo nanga nimba kolali sepa kolondorumu, na nokopa kondomba.' ningu kuru mondonge yomboma Pulu Yemone Yesusinga imbi pilipa Yesusi yuni yombomanga nimba senderimumunga pilipale kanu yombomanga ulu-pulu-kiri seringima 'We mania pupili.' nimba siye kolomba." niringi." nimba Pitane nirimu.

*10:44-48*

*Ono Juda Yombomanga Ultu Yomboma Moloringina Pulu Yemonga Minimu Orumu Liltangi Semanemo (10:34-43 pea) (10:1—11:18 pali lipa sere lepa semane paa selumu)*

<sup>44</sup> Pitane aku sipa nimba molopili Mini Kake Sélimu ombo Pitane ungu nirimu pilku moloringi yombomanga konopumanga sukundu purumu. <sup>45</sup> Pulu Yemone Mini Kake Sélimu u Juda yombo Ye Nokoli Karasimu pilie lima sirimu mele pe aku sipa kanu yombo talape lupa moloringima sirimu-kulu kanokole Karasi pilieli Juda ye Pita pea kopu seko oringimane paa pungu-pungu niringi. <sup>46</sup> Kanu yombo-lupama Mini Kake Sélimu lilttingimane umbu-ungu lupa lupama ningu Pulu Yemo kape niringi-kulu pilkuli kanu yemane 'Mini Kake Sélimu ombo ononga konopumanga pumu lepomo.' ningu pilieringi. U Ye Nokoli Karasimu pilieli Juda yombomanga konopumanga mindi Mini Kake Sélimu purumu kanumu.

Kanu-kinia Pitane nimbale: <sup>47</sup> "Olio Ye Nokoli Karasimu pilieli Juda yomboma Mini Kake Sélimu liltimulu mele kiniá i yombo talape lupama kepe Mini Kake Sélimu likimili kene nawene "Ono no naa liengi." nimba manda "Mólo." nimbáye?" nirimu. <sup>48</sup> Aku nimba yuni nimbale: "Ono Yesusi Karasi yunga imbirunga no lie." nirimu. No liku pora sikuli onone Pitando ninguli: "Nu iseli-u naa pani. Wale pokore nu olio kinia pea molkole pe pani." niringi-kulu yu ono-kinia wale pokore we molorumu.

## 11

*11:1-18*

*Pita Jerusalleme Pumba Karasinga Juda Yomboma Yuni Konillias Kinia Ulu Seriumma Nimba Sirimu Semanemo (10:1—11:18 pali lipa sere lepa semane paa selumu)*

<sup>1</sup> Yesusini "Nanga kongonomo sende-paa." nimba lipa mundorumu yema kinia 'Yesusi pilku moloringi, genupili kolea Judia disiriki pali moloringima kinia onone Juda yombomanga ultukundu moloringi yomboma Pulu Yemonga ungumu pilku liltangi mele pilieringi. <sup>2</sup> Akumunga Pita Jerusalleme olando purumu kinia kango-manga kangi se kopisiku eltoringi ungu-manemo 'Paa samili.' ningu seringi Karasi pilieli yemane Pita Romo ye Konilliasinga ulkana purumu-kulu yu iri toko <sup>3</sup> ninguli: "Nu Juda yemo molko yombo kangi naa kopisilimilimanga ulkana pungu, ono kinia pea molko kere-lang'i noringimu, paa seko kinjerinu." niringi.

<sup>4</sup> Aku-sipa na-kolo Pitane ulu pali wendo orumuma ono semane topa sirimu. Yuni nimbale:

<sup>5</sup> "Sena. Na Jopa taonona molorundu kinia na Pulu Yemo kinia ungu nimbu molopole nirindumuni, kaima mele sepo kanorundu kinia mulúmu anju yando pumba, mulu-maminia paa awili se, ekendo ekendo pundu kisenga ambolopale takala lepa mana mania mundorumu, na molorunduna ombo lierimu. <sup>6</sup> Akuna sukundu kanorundu kinia kongi lopa kera wambiyé méle-takarama pali akuna sukundu moloringi. <sup>7</sup> Kanu-kinia ungu se ombo nirimu pilierindu. Yuni nando nimbale: "Pita, ola molko i méle-takara se toko nou." nirimu.

<sup>8</sup> "Nane pundu topo nimbuli: "Ye-Awilimu, paa naa nombó. Nuni kanoko kiri pilieleno mélema kinia, "Kalaro molemo." nilinu mélema kinia, olio Juda

yombomando 'Naa nangi.' ningu ungu-mane sirinu mélema u walte kepe se paa naa norundu." nirimu.

<sup>9</sup> "Wale talo-sipa kanu ungumu kelepa muluna wendo omba nando nimbale: "Pulu Yemone kake sendelemo mélemando nuni "Kalaro molemo." ni naa ni." nirimu.

<sup>10</sup> "Olto aku sipu wale yopoko angelema nirimbulu kinia waltikele mulúmu kelepa müluna olando purumu.

<sup>11</sup> "Mulúmu kelepa olando purumu kanu-wele kolea-awili Sisaria ye sene "Paa." nimba lipa mundorumu ye yopoko na molorundu ulkana oringi. <sup>12</sup> Minimuni nando nimbale: "Konopu awisili liku naa munduku i yema kinia pangí pu." nirimu. I Karasinga ye talo-pakara ono na kinia pea kopu sepo pumbu, kanu Sisaria yemonga ulkana sukundu purumulu.

<sup>13</sup> "Ulkana sukundu purumulu kinia kanu yemone oliondo nimbale: "Pulu Yemonga, angello se nanga ulkana omba nimbale: "Nuni ye mare Jopa taonondo pangí liku mundukuli, akuna ye se molemo, yemonga imbi Saimono, yunga imbi se Pita, "Yu opili." niengi. <sup>14</sup> Nu kinia nunga ulkana pelemele yomboma kinia Pulu Yemone 'Ono mindili nolemolá aulkana wendo ongo yu-kinia pea molko kondonge aulkana pangí.' nimba lipa tapondomba." nimba angellomone nando aku sipa nirimu." nimba kanu yemone nirimu.

<sup>15</sup> "Kanu-kinia nane pulu polopo ungu nimbú nirindu kinia u olio ya Jerusalleme molorumuluna Mini Kake Sélimu mania orumu mele aku sipa ono ne Sisaria yemonga ulkana moloringina orumu. <sup>16</sup> Aku serimu kinia nane Ye-Awilimuni ungu se u nirimu mele kelepo pilierindu. Yuni nimbale:

"Jonone yombo no mindi linderimu-na-kolo

Pulu Yemone ono Mini Kake Sélimu lindimba." nirimu mele kelepo pilierindu. <sup>17</sup> Aku liemu olio Ye-Awili Yesusi Karasi ,molopa serimu selemo mele, 'Sika.' nimbu kuru mondorumulu kinia Pulu Yemone olio u Mini Kake Sélimu sirimu mele pe aku sipa aku yombo-lupama sirimu liemu na nawe molopole nane Pulu Yemondo "Mólo." nilkaye?" nimba Pitane nirimu.

<sup>18</sup> Pitane aku sipa nirimu mele pilkuli onone u yundu niringi mele kamu munduku kelkole, Pulu Yemo kape ningu ninguli: "Akumunga Pulu Yemone 'Yombo-lupama konopu topele tokole manda molopa mindi puli ulu-pulumu liengi.' nimba panjerimu lepomo." niringi.

**11:19-30**

### *Kolea Andiyoko Yomboma Ye Nokoli Karasimunga Semanemo Pulu Polko Pilku Liltigi Mele Semanemo*

<sup>19</sup> U Sitipen toko kondokole pe Karasinga yomboma mindili liku siringi kinia ono bulu-balu ningu puringi kinia mare kolea Pinisia pungu, mare kolea Saiporas pungu, mare kolea-awili Andiyoko punguli niringimuni, Juda yomboma mindi semane peangamo toko siringi. <sup>20</sup> Aku-na-kolo ye mare, ononga pulu-kolea Saiporas kinia Sairini kinia, ono kolea-awili Andiyoko punguli pulu polko Ye-Awili Yesusinga semane peangamo yombo lupama toko siringila. <sup>21</sup> Pulu Yemone ono lipa tapondorumukulu yombo awisili "I ungu sika." ningu kuru mondokole konopu topele toko 'Ye-Awilimunga yomboma molamili.' ningu moloringi.

<sup>22</sup> Aku serigi semanemo Karasinga yombo talape Jerusalleme moloringimane pilkuli onone Banapasindu "Kolea-awili Andiyoko pu." niringi. <sup>23-24</sup> Banapas yu ye peangamo, Pulu Yemo 'Sika.' nimba paa kuru mondorumu yemo; Mini Kake Sélimu konopuna molopa manda serimu yemo. Yu kolea-awili Andiyoko pumba kanorumu kinia Pulu Yemo yombo awisili we kondo kolopa senderimu mele kanopale yu paa konopu sipa, ono 'Ye-Awilimunga mindi kuru mondoko, méle se lupa topele toko konopu naa mondangi.' nimba ungu mare nimba sirimu. Yombo-awisili Ye-Awilimunga talapena sukundu ongo moloringi.

<sup>25</sup> Kanu-kinia Banapas yu kolea-awili Andiyoko mundupa kelepa, Sollo korombando Tasisi taono purumu. <sup>26</sup> Pumba yu kanopa lipale kolea-awili Andiyoko yando memba orumu. Kanu-kinia olo kolea-awili Andiyoko Karasinga yombo talapemo-kinia pea molko yombo paa awisili ungu-mané siku molangili kalia-ingi selu ombo purumu. Kolea-awili Andiyokona, Yesusinga lombili andoli yombomando we-yombomane imbi leko pulu polko 'Karasinga Yomboma' niringi.

<sup>27</sup> Kanu walemanga Pulu Yemone ungu-umbu tondorumuma pilku yomboma ningi siringi ye mare kolea-awili Jerusalleme molkole kolea-awili Andiyoko maniendo oringi. <sup>28</sup> Kanu ye oringimanga ye se, yunga imbimu Akapas, yu ola gilipale, Minimuni yu pe wendo ombá mele nimba sirimu pilipa nimbale: "Romo gapomanone nokolemo koleamanga pali gele pe lemba." nirimu. (Aku nirimu mele pe ye Lodiasi, Romo koleamanga pali nokorumu ye paa awili kumbinamo molorumu kinia, sika aku gelemo wendo orumu.) <sup>29</sup> Ye Akapasini aku nirimu kinia pilkuli u wendo naa opili Ye-Awilimunga lombili andoli yombomane 'Olionga genupili Judia disiriki molemelema lipu tapondopo kou-mone i-sipu nimbu taltopo siemili.' ningi panjeringi. <sup>30</sup> Kanu-kinia kou-mone sere leko taltokole Banapas kinia Sollotolo "Kou-mone Jerusalleme mengo pungu Ye-Awili Yesusinga yombo nokolemele yema pungu si-pale." niringi kinia mengo pungu si-poringili.

## 12

12:1-5

*Ye Nokoli Kingi Eretene Jemisi Topa Kondopale, 'Pita Topo Kondambola!' Nirimu Kinia (12:6-19 pea)*

<sup>1</sup> Ye Nokoli Kingi Eretene ,kolea-awili Jerusalleme molopa, Karasinga yombo talapemonga yombo mare mindili lipa sipa tombando yunga ami-yemando "Mare pungu ka si-paa." nirimu kinia ka siringi. <sup>2</sup> Jononga genu Jemisi "Toko kondaa!" nirimu-kulu pilkuli opa seli lu-pultane yu toko kondoringi. <sup>3</sup> Aku seringi kinia Juda yomboma pilku peanga pilieringi-kulu kanopale nirimumuni, pe "Pita pungu ka si-paa." nirimu kinia yu pungu ka siringila. Juda yombomane kalia-ingi senga senga kolea-awili Jerusalleme ongo akuna sukundu Pulu Yemone ononga anda-kolepalima Naa Topa We Ombo Purumu mele pilieringi wale akumu imbi leko, 'Pellawa Akoli Méle Isimu Naa Munduku Pellawa We Kalko Noringi Walema' niringila, aku walemanga yuni aku serimu. <sup>4</sup> Pita ka siku ka-ulvana panjeringi kinia ami-ye talape kise, talapena sukundu ye kise-kise ningi moloringi ono pali lipa sere lepa malapu kanumu, "Ono yu nokoko molaa." nimbale nirimumuni, "Pulu Yemone ononga anda-kolepalima Naa Topa We Ombo Purumu mele pilieringi wale akumu ombo pumbá kinia 'Yomboma kanangi.' nimbu ono molongena membo pumbu kote sendepo pilipu ami-yemando "Toko kondaa." nimbú." nirimu.

<sup>5</sup> "Mimi siku nokaa!" nirimu-kulu kanu ami-yemane Pita ka-ulvana pepili nokoko moloringi. Aku-na-kolo Karasinga yombomane Pulu Yemo kinia Pitanga ungu tondolo munduku mawa sendeko ningu moloringi.

12:6-19

*Mulu-Koleana Angello Sene Ombo Pita Ka-Ulkana Wendo Lillimu Semanemo (12:1-5 pea)*

<sup>6</sup> Ipulieli-ukundu Eretene Pita wendo lipa kote sendemba serimu kinia ipulieli mele Pitanga kitolo ami-ye talo kinia ka-sénene ka toringi, Pita awi-suku-singina we uru perimu. Ka-ulvana peringi yomboma nokoli ye mare kerepuluna gilku ka-ulka pali nokoko gilieringila. <sup>7</sup> Kanu-kinia Ye-Awilimunga angello se Pita uru perimuna orumu kinia kanuna pa serimu. Yuni Pitanga wanguna topa makisindipale, "Welea ola molou." nirimu. Kanu-kinia ka-sénetolo yuyu moki lepa mania purumu.

<sup>8</sup> Angellomone Pitando nimbale: "Nunga kako toko kimbu-su mondou." nirimu kinia aku serimu. Kanu-kinia yuni "Kiniá ola-ali-walemo pakoko na lombili ou." nirimu. <sup>9</sup> Pita molorumu suluminiamo mundupa kelepa yu lombili pumbale nirimumuni, angellomone serimu mele yu naa pilipale 'Kaima sepo kanokoro.' konopu lierimu. <sup>10</sup> Punguli niringilimuni, ka-ulcana peringi yomboma nokoli ye selu gilierimuna ongo pungu, nokoli ye talo-sipa gilierimuna ongo punguli, koleawilina wendo pungilíndu ka-ulka pala kuna kapane selina puringili kinia kunamo yuyu liltimu kinia ultu ongo pungu, tapu-awilina wendo pungu tapu paka-maliena oringili kinia angellomo Pita popenge sepa mundupa kelepa yu purumu.

<sup>11</sup> Kanu-kinia Pita, u yu 'Kaima sendu.' konopu lierimu-na-kolo pe kiniá yunga umbu-konopu ombo perimu kinia yuni pilipale, "A, kiniá na piliporo. Kingi Erotene nando 'Sambo.' nirimu mele kepe Juda yombomane nando 'Samili.' ningi pilieringi mele kepe 'Aku siku naa sangi.' nimba Ye-Awilimuni yunga angellomo na "Ka-ulcana wendo li-pou." nimba mundomu lepomo, kiniá na piliporo." nirimu. <sup>12</sup> Aku sipa pilipale nirimumuni, Jono, yunga imbi se 'Mako' niringi, kanumunga anumu Marianga ulcana Pita yu purumu. Kanuna yombo awisili maku toko Pulu Yemo kinia ungu ningi mawa seko moloringi.

<sup>13</sup> Pita aku ulcana pumbale nirimumuni kuna topa kilu-kilu sirimu kinia kongono seli ambo-wenepo se, yunga imbimu Roda, kuna limbando ombale nirimumuni, <sup>14</sup> Pitanga ungumu pilipa imbi sipale, 'Yu okomo lepomo.' nimba pilipa konopu sipale kuna naa lipa yu kelepa lisipa anju pumba yombomando "Pita ombo kerepuluna gilimú." nirimu. <sup>15</sup> Nirimu kinia pilkuli niringimuni, 'Pita ka-ulcana pelemo.' konopu lekole ambomo yundu "Nu amu tokole nikinuye?" niringi. Aku-na-kolo yuni ta nimbale, "Mólo. Sika Pita ombo kerepuluna gilimú." nirimu.

Kanu-kinia onone ninguli: "Pita nokolemo angellomo ombo kerepuluna gilimú lepomo. Paa sika Pita mólo." niringi.

<sup>16</sup> Aku siku angelema ningí niringi kinia Pitane kuna topa kilu-kilu sipa gilierimu kinia kuna wendo liku kanoringi kinia sika Pita kerepuluna gilierimu kanokole pungu-pungu ningi mini-wale mundoringi. <sup>17</sup> Aku-na-kolo yuni onondo "Ungu naa niee." nimba kimuni pipi sipale nirimumuni, Ye-Awilimuni yu ka-ulcana wendo liltimu mele semane topa sirimu. Topa pora sipale yuni onondo nimbale: "I nikiru mele Jemisi keme, olionga genupilima kinia, ono pungu ningi si-paa." nimbale yu ono mundupa kelepa kolea senga lupa purumu.

<sup>18</sup> Kolea tangorumu kinia opa seli ami-yema ola molkole, 'A, Pita sena pumunje?' ningi pilku mini-wale paa awili seko mundoringi. <sup>19</sup> Erotene Pita koropa naa kanopa lipale nirimumuni, Pita nokoringi ami-yemanga kote sendepa pilipale, ami-ye lupa marendo nimbale: "Pita nokoko kinjengi ami-yema ono kolangi mengo pungu toko kondo-paa." nirimu.

**12:19-23**

### *Ye Nokoli Kingi Erote Kolorumu Semanemo*

Kanu-kinia kingi Erote kolea Judia disiriki mundupa kelepa kolea-awili Sisaria maniando pumba wale mare kanuna molorumu.

<sup>20</sup> Kolea-awili Taya kinia Saidonotolonga yomboma Kingi Erotene mumindili kolopa molorumu-kulu ono maku tokole yu molorumuna oringi. Kanu yomboma Kingi Erote nokorumu-koleana kere-langì pungu topo toko liku no-pu-pu seringimunga yu kinia 'Taka lepo molamili.' ningíndu oringi. Erotenga ulka kinia mélema pali nokorumu ye Billasitas 'Olio lipa tapondopa Erotendo nimba sipili.' ningi u yu molorumuna pungu yu-kinia ungu niringi. Aku sekole Erote molorumuna pungu "Kiniá olio kinia taka lepo molamili." ningi pungu mawa seringi.

<sup>21</sup> Kanu-kinia “Erote-kinia ‘Taka lepo molamili.’ nimbu, pumbu ni-pumulú.” ningu panjeringi walemonga Erote yunga ye nokoli kingi wale-pakoli peangama lipa pakopa yunga kingi kongono sembando molorumu polona molopale ungu awisili yomboma nimba sirimu. <sup>22</sup> Kanu-kinia yombomane yu kape ningu ru ningu ninguli: “I ungu nikimu mele mana-yombo sene nilimú mele naa nikimu. Pulu ye sene nilimú mele nikimu.” niringi. <sup>23</sup> Kanu-kinia onone “Yu pulu ye se mele molemo.” niringi mele Erotene pilipa peanga pilipa Pulu Ye ,sika,mo kape naa nirimu-na ,Pulu, Ye Awilimunga angello sene yu topa taltorumu, korowane yu norumu kinia yu kolorumu.

12:24

*Pulu Yemonga Ungumu Para-Nanga Lierimu Mele Semanemo*

<sup>24</sup> Aku-na-kolo Pulu Yemonga ungumu koleamanga pali pumba para-nanga lierimu, yombo awisilini pilku liltingi.

12:25

*Banapas, Pollo, Jono Mako, Ononga Semane Se*

<sup>25</sup> Banapas kinia Sollotolo kolea-awili Andiyoko munduku kelko kolea-awili Jerusalleme kou-mone mengo puringilima yomboma siku pora sikuli niringilimuni, Jerusalleme munduku kelko Andiyokondo yando Jono liku mengo oringili. (Jononga imbi se ‘Mako’ niringi.)

13:1—21:14

**Pollone Yesusinga Ungumu Kolea Awisili Andopa Nimba Sirimu Semanema****13***Kolomongo-Awili 13-14tolo**Pollo Pulu Polopa Ye-Awili Yesusinga Ungumu Nimba Silipa Andorumu Semanemo*  
13:1-3

*Banapas Kinia Pollotolo Pulu Yemone “Sale.” Nirimu Mele Kolea Andiyoko Yombomane “Sangili Pale.” Niringi Semanemo (13:pali kanani)*

<sup>1</sup> Karasinga yombo talapemo kolea-awili Andiyoko moloringimanga mare Ye-Awilimuni ungu-umbu tondorumuma pilku yomboma ningu siringi yema molko, mare yomboma ungu-mane siringi yema moloringi. Ononga imbima i-sipa: Banapas keme, ‘Ye Pombora’ niringi ye Simiono keme, kolea Sairini ye LLusiasi keme, (poropinji se nokorumu ye nokoli kingi Erotenga ulkana awi lierimu) ye Maneyene keme, Sollo keme. <sup>2</sup> Karasi pilieli yomboma Ye-Awilimun kape ningu imbi ambolko paka tondoko kere-langit naa nongo mi toko moloringi kinia Mini Kake Sélimuni nimbole: “Nane ‘Banapas kinia Sollotolo sangili.’ nindu kongonomo sangili ningu taltangi.” nirimu.

<sup>3</sup> Aku nirimu-kulu pilkuli kere-langit naa nongo mi toko Pulu Yemo kinia ungu ninguli, olo ki ola munduku ambolkole “Pale.” ningu mundoringi.

13:4-12

*Kolea Saiporas Punguli Seringili Semanemo*

<sup>4</sup> Mini Kake Sélimuni “Olo pale.” nimba lipa mundorumu kinia Sellusia taono maniando pungu, nomuna sipi lierimuna sukundu pungu kolea Saiporas puringili.

<sup>5</sup> Sallamas taono ongo sipina mania punguli, Juda yomboma makutoko Pulu Yemonga ungumu pilieringi ulkamanga andoko Pulu Yemonga ungu ningu siringili. Jono Mako olo lipa tapondopa pea kopu seko andoringi.

<sup>6</sup> Kolea Saiporas nomu-kusa suku-singina lierimu kolea se. Akuna kimbu-kongono seko kolea-kangamanga ungu ningu siliku punguli, Pepos taono nomu kelona

lierimuna wendo puringili. Kanuna Juda ye se molorumu kanoringili. Kanu yemo kurumanga nokoli Setenene lipa tapondorumu-na ulu-tondoloma sepa, yu kolo topa "Pulu Yemone ungu-umbu tondolemoma pilipu ono nimbu sikiru." nimba yomboma kolo topa sirimu yemo. Yemonga imbi Josua Malo. Imbi se Ellimas niringila.<sup>7</sup> Ellimas yu Saiporas poropinji nokorumu Romo gapomano ye Sesiasi Pollasi kinia kopu seko moloringili yemo. Sesiasi Pollasi yu pilipa kondoli paa perimu yemo. Yuni 'Pulu Yemonga ungumu piliambo.' nimba yuni Banapas kinia Sollotolo "Wale." nirimu.<sup>8</sup> Aku-na-kolo kurumanga nokoli Setenene lipa tapondorumu kinia ulu-tondoloma serimu ye kanumu, yunga imbi se Ellimas niringi, kanumuni "Naa wangili." nimba pipi simba sepa, gapomano ye endisimuni 'Olonga ungumu pilipale 'Sika.' nimba konopu topele naa topili.' nimba, endisimu pilimba aulkamo pipi simba serimu. (Imbi Ellimas kanumu Giriki-ungu se, kanumunga pulumu kurumanga nokoli Setenenga ulu-tondoloma sendeli yemo.)

<sup>9</sup> Kanu-kinia Sollo, yunga imbi se Pollo niringila, yu Mini Kake Sélimu konopuna molopa manda serimu kinia yuni Ellimas neme-neme nimba kanopa nimbale:<sup>10</sup> "Nu 'kurumanga nokoli, depelemonga malo se, nu méle sumbi silimanga opa-tou se moleno. Kiyongo nimba andopa wa nomba kolo topa sepa kinjeli ulumanga pali puluma nu-kinia pelemo. Ye-Awilimuni yomboma lipa tapondolemo aulkamo pipi siku, 'Yomboma aulka senga lupa pamili.' ninga kolo tolono uluma manda munduku naa kelieniye?"<sup>11</sup> Aku manda, Ye-Awilimuni nu-kinia 'Opa-tou molambili.' nikimu. Nunga mongotolo pipi simba kinia nu kolea pa sembá mele naa kanoko, wale mare simbulu tolina moloni." nirimu.

Pollone aku nirimu kinia popenge seko kupa mele sene Ellimasinga kumbikeremo pipi sipa simbulu torumu-kulu yu andopa pererimu. Yombo sene yu 'ki ambolopa aulka lipa ora sipa memba pupili.' nimba kororumu.<sup>12</sup> Gapomano ye endisimuni ulu wendo orumu kanumu kanopale, Ye-Awili Yesusi molopa serimu mele Pollo Banapositolone mane siringili kanumu pilipa mini-wale mundupa "I nikimbili mele sika nikimbili lémo." nimba kuru mondorumu.

**13:13-52**

### *Pollo Yu Kolea Pisidia Sukundu Lierimu Kolea Andiyoko Pumba Yesusi Olio Lipa Tapondomba Orumu Mele Nimba Sirimu Semanemo*

<sup>13</sup> Pollo kinia kopu seko puringi yema kinia Pepos taono munduku kelko nomuna sipi senga Peka taono puringi. Peka akumu Pambilia poropinji lierimu taono se. Kanuna Jono Mako olo mundupa kelepa Jerusallemendo kelepa purumu.

<sup>14</sup> Kanu-kinia Pollo kinia Banapositolo Peka taono munduku kelko kolea Pisidia poropinji Andiyoko taono puringili. Punguli Juda yomboma koro moloringi, wale Sambate kinia Juda yomboma maku toko Pulu Yemonga ungumu pilieringi ulkana pungu moloringili.<sup>15</sup> Yombo maku toringima nokoringi tapu-yemane 'boku lipa, Mosisini Pulu Yemonga ungu-manema pilipale boku torumu ungu se kinia, Pulu Yemone ungu-umbu tondorumuma pilku yomboma ninga siringi yemane boku toringi ungu se kinia kambu toko pora sikuli, olo mangilku ninguli: "Genungulutolo, 'Yomboma ungu-mane se simbulú.' konopu liengili liemu piliamili ongo ningu siele." niringi.

<sup>16</sup> Kanu-kinia Pollo ola gilipa nimbale:

"Ono Isirele yomboma kinia Pulu Yemonga imbi ambolko paka tondoli yombo-lupama kinia ungu se niembo piliaa." nimba yuni nimbale:

<sup>17</sup> "Olio Isirele yombomanga Pulu Yemone olionga anda-kolepali nimba taltopa "Ono kinia onone pe pe kepe kalko lingíma kinia na nokopo molombo." nirimu. Kanu-kinia ono kolea Isipi moloringi kinia 'Ono yombo talape paa awisili molangi.' nirimu. Kolea Isipi ono yombo talape paa awisili moloringi kinia yuni yunga

tondolomone ono aku koleamonga ultu memba ombo,<sup>18</sup> kolea ku lepa kere-lang  
naa lieli koleana memba pumbale, ono kalia-ingi paono talo ombo pupili kolea ku  
lieli akuna seko kinjiku moloringi mele yuni kanopale, yunga konopuna umbuna  
sepili kanopa molorumu.<sup>19</sup> Yunga yomboma ‘Kolea Kenane kamu molangi.’ nimbale  
yombo talape yopoko-pakara akuna u moloringima topa mundupa mamo yunga  
yomboma lipa sirimu.<sup>20</sup> Ono kolea Isipi pungu molko, kelko yando ongo molko,  
kolea pulu yomboma toko mundangi kalia-ingi po anderete pipiti ombo purumu.

“Kanu-kinia Pulu Yemone ‘Nanga yomboma nokaa.’ nimbale walte yombo sela  
lipa mondopa, walte yombo sela lipa mondolepa pumbale nirimumuni, pe yuni  
ungu-umbu tondorumuma pilipa yando nimba sirimu ye Samuelene ‘Ono nokopili.’  
nirimu.<sup>21</sup> Kanu ye Samuelene ono nokopa molopili ono we tapu-yombomane  
nokoringimunga siye serimu-kulu “Ye nokoli kingi sene olio nokopili ningu taltou.”  
niringi. Kanu-kinia Benjaminini kalopa liltimu ye se, Kisi malo Sollo, Pulu Yemone  
nimba taltorumu, yu ononga pulu-pulu ye nokoli kingimu molopili kalia-ingi paono  
talo ombo purumu.

<sup>22</sup> “Pulu Yemone Sollo makoropale “Depiti ononga ye nokoli kingimu kolali sepa  
molopili.” nirimu. Yuni Depitindu nimbale: “Jesi malo Depiti nanga uluma pali pilipa  
lipa sembá lémo-na nane kanopole yu kanopo peanga pilielio.” nirimu.<sup>23</sup> Kanu-kinia  
Pulu Yemone Isirele yombomando “Ono lipa tapondomba ye se simbú.” u nirimu  
yemo ‘Kamu siembo.’ nimbale yuni kanu ye Depitini yandopa kalopa liltimu yombo  
sene ‘Yomboma Lipa Tapondopa Mindili Nolemolá Aulkana Wendo Limba Ye Yesusi  
mepili.’ nirimu.<sup>24</sup> Yesusi u naa opili No Lindeli Jonone Isirele yombomando pali  
ungu-mane sipa nimbale: “Ulu-pulu-kirima munduku kelko konopu topele toko no  
liee.” nirimu.<sup>25</sup> Jono yu aku kongonomo nondopa sepa pora sipa yuni onondo  
nimba: “Na nawe konopu lemeleye?” nirimu. “Pulu Yemone “Ono nokopa  
kondomba ye se lipu mundumbu.” nirimu ye nokoli Karasimu ‘Ombá.’ ningu nokoko  
molemele ‘Akumu na.’ konopu lekemeleye? Naaku yemo mólo. Ombá yemo paa  
peangamo na paa kiri, yunga we-kongonomo kepe manda naa sepo yunga kimbu-su  
ka pilka manda naa tondolka.” nirimu.

<sup>26</sup> “Ango-keme, ono Eporayamone kalopa liltimu yomboma kinia, ono Pulu Yemo  
pipili kolko liku awi silimili yombo-lupama kinia, i semane peangamo, Pulu Yemone  
olio lipa tapondopa, mindili nolemolá aulkana wendo lipa, yu kinia pea molopo  
kondomolo aulkana lipa mondorumu semane peangamo olionga.

<sup>27</sup> “Jerusalleme moloringi yomboma kinia ononga ye awilima kinia onone Yesusi  
kanoko imbi naa siku, ‘Pulu Yemone “Ono nokopa kondomba ye se mundumbu.”  
nimba, nimba taltorumu ye nokoli Karasimu yu.’ konopu naa leko, yunga imbi  
we leko ‘Yu we-yere.’ konopu lieringi. Aku-na-kolo olionga ye nokoli kanumane  
“Yesusi toko kondangi.” niringimunga Pulu Yemone ungu-umbu tondorumuma pilku  
yomboma ningu siringi yemane “I-siku i-siku senge.” koronga-u niringi aku mele  
wendo orumu. Kanu unguma kanu yemane bokuna toringi molemo unguma “Yesusi  
toko kondangi.” niringi yombomane ‘ono koro molemele’ wale Sambatemanga  
pali boku kanoko pilieringi-na-kolo kanu ungu alieli bokuna kanoko pilieringimanga  
pulumu naa pilieringi.<sup>28</sup> Yu ulu se sepa kinjerimumu kanokole ‘Yu kolopili.’ ni naa  
niringi-na-kolo Romo ye nokoli Paillatendo we mawa sekole “Kolopili, ‘unjuna ola  
uku toko panjei.’” niringi.

<sup>29</sup> “U-yombomane ono pe senge mele ningu boku toringi uluma pali Jerusalleme  
yombomane Yesusi-kinia seko pora siringi yu kolorumu kinia yombo marene yu  
ongo unjuna mania liku yombo-óno-seli kou-kande senga mengo pungu taltoringi.  
<sup>30</sup> Aku-na-kolo Pulu Yemone “Yu yombo-óno-koleana kelepa lomboropa ola molopili.”  
nirimu.<sup>31</sup> Kanu-kinia yu lomboropa ola molorumu kinia u yu naa toko kondangi

yomboma yu-kinia kolea Gallilli disiriki munduku kelko kolea-awili Jerusallemendo olando puringi kanu yombomane enamanga alieli yu kanoringi. Kiniá kanu yombomane kanoringi mele olionga Isirele yomboma ningu siliku andolemele.

<sup>32-33</sup> Pulu Yemone pe wendo ombá mele olionga anda-kolepalimando nirimu kanu ulumu olio kalko liltingi yomboma molamili kamu wendo omu, kanumu Banapas oltone kiniá ono semane peangamo topo sikimbulu. Pulu Yemone Yesusinga ónomo topa makisinderimu kanu ulumuni u yuni "Sembó." nirimu mele wendo omu. Kanumundu Pulu Yemone yunga konane talo-sipamonga ungu se nirimu nimba molemo mele i-sipa:

"Nu nanga malo; kiniá na nunga lanie."

nirimu. <sup>34-35</sup> Pulu Yemone 'Yu paa pe kepe naa puropili.' nimba yu topa makisinderimu kanumu u naa sepili ungu talo pea u nirimula. Kanu ungutolonga se i-sipa:

"Depitindu sepo kondopo ulu peanga paa sikama  
simbú nirindu mele nu simbú."

nirimula. Se Depitini i-sipa nirimu:

"Pulu Yemo, nunga Ye Kake Sélimu kolomba kinia  
nuni 'We puropili.' naa nini."

nirimu. <sup>36</sup> Depitini Pulu Yemondo aku nirimu Depiti yuyu sembá mele naa nirimu. Pulu Yemone yundu "Sei." nirimu kongonoma pali sepa lipale yu kolorumu, óno seringi kinia purorumu. <sup>37</sup> Aku-na-kolo ye kolorumu óno seringi kinia Pulu Yemone topa makisindipa "Lomboroko ola molou." nirimu kanu yemo yu purou naa purorumu. Aku yemo Yesusi.

<sup>38</sup> "Ango-keme, aku serimu-na 'Ono piliangi.' nimbu nimbú sekero mele i-sipa: Yesusini serimumunga yuni olionga ulu-pulu-kirima pali 'Kamu mania pupili.' nimba akuma siye kolomba. <sup>39</sup> Mosisini ungu-mane u sirimumane 'Yombomanga ulu-pulu-kirima kamu ombo mania pumbá, ono konopu sumbi nimba peli yomboma molonge.' manda naa nirimu-na-kolo kiniá Yesusi olionga nimba senderimu uluma "Sika aku serimu." ningu kuru mondonge yomboma Pulu Yemone ono kanopale, ononga ulu-pulu-kirima siye kolopa, ono 'konopu sumbi nimba peli yomboma.' nimba kanomba.

<sup>40</sup> "Akumunga u Pulu Yemone ungu-umbu tondorumuma pilku yomboma ningu siringi yemane ulu wendo ombá niringi mele 'Olio-kinia wendo naa opili.' ningu, pilku kondoko molangi. <sup>41</sup> Kanu yemanga sene nimbale:

"Ono ungu-taka tondolemele yomboma piliame.

Konopu awisili liku mundukuli kolangi.  
Ono molemele walemanga nane ulu se sembó,

kiniá yombo sene akumu kanopa  
"I-sipa i-sipa wendo omu kanondu." nimba

ono semane topa simba kinia  
'Ulu se aku sipa manda wendo naa ombá.' ningu pilku

"Kolo tokono." ningu, naa pilingí kene  
ono ungu-taka tondolemele yomboma piliame.

Konopu awisili liku mundukuli kolangi."

nirimu." nimba Pollone nirimu.

<sup>42</sup> Pollo Banapositolo Pulu Yemonga ungumu pilieringi ulkamo munduku kelko pungilí seringili kinia yombomane olo mawa seko ninguli: "I ungu ningu sikimbilimu pe 'koro molomolo, wale Sambatemo kinia kelko ongo ningu siele." niringi. <sup>43</sup> Bulubalu ningu pena puringi kinia Juda yomboma kinia yombo-lupa Pulu Yemonga ungu pilieringima kinia ononga yombo awisili Pollo Banapositolo lombili puringi. Olone ono ungu ningu siku, "Ono 'Pulu Yemone we kondo kolopa sepa kondolemo ulu-pulumu olio-kinia pelemo mele pepa mindi pupili.' ningu molangi." niringili.

<sup>44</sup> Pe Sambate walemo wendo orumu kinia aku taonona yombo paa awisili Pulu Yemonga ungumu pilingindu maku toringi. <sup>45</sup> Aku-na-kolo yombo awisili Pollonga ungumu pilingindu maku toringi-kulu Juda yombomane kanokole konopu kiri panjiku Pollone ungu nirimuma ungu-taka tondoko "Nimba kinjikimu." niringi.

<sup>46</sup> Kanu-kinia Pollo Banapositolone onondo tondolo munduku ninguli: "Pulu Yemone 'Ono Juda yomboma yunga ungumu u piliangi.' u nirimu-kulu ono kumbi lepo ombo nimbu sirimbulu. Aku-na-kolo onone 'Olio molopo naa kondole-molomonga alieliconde molopa kondopa mindi puli ulu-pulumu manda naa limulú.' ningu ungu nimbu sikimbulumu liku bulu siku naa pilielemelomonga oltone ono Juda yomboma mundupu kelepo yombo-lupama molemelena pumbulú. <sup>47</sup> Ye-Awylimuni oltondo "Aku sale." nirimu kanumu. Yuni nimbale:

"'Koleamanga pali yomboma

mindili nolemolá aulkana manda wendo ongo

Pulu Yemo-kinia molko kondonge mele

ningu sieni.' nimbu

'Nu Isirele yombomanga ultu molemele yombomanga

pa sendélimu molani.' nikiru.

nirimu." niringili.

<sup>48</sup> Juda yombo naa moloringi yombomane aku niringili pilkuli konopu siku "Ye-Awylimunga ungumu peanga." niringi. Pulu Yemone 'Alieliconde molko kondoko mindi pang.' nimba, nimba taltorumu yombomane 'Ungu nikimbili mele sika.' ningu kuru mondoko litingi.

<sup>49</sup> Olo moloringili koleamanga pali Ye-Awylimunga ungumu pumba para-nanga lierimu. <sup>50</sup> Aku-na-kolo Juda yombomane Pulu Yemo pipili kolko pilieringi ambo nokolima kinia kanu koleana ye awilima kinia seko mumindili kondoringi, kiniá onone yomboma pali seko mumindili kondoko, Pollo Banapositolo 'Ononga koleana naa molangili.' ningu toko makoroko ultu mundoringi.

<sup>51</sup> Aku seringimunga 'Seko kinjikimili kanangi.' ningu olonga kimbuna ma kulu toko Akoniamo taono puringili. <sup>52</sup> Andiyoko taonona moloringi Yesusinga lombili andoli yomboma paa konopu awisili siku, Mini Kake Sélimu ono-kinia molopa manda sepili moloringi.

## 14

14:1-7 (14:1-5)

*Pollo Banapositolo Akoniamo Taono Andoko Ungu Ningu Siringili Kinia (14:5-7) 'Kouni Topo Kondomolo.' Niringi Pilku Kowa Pungu Kolea LLikonia Poropinji Puringili Semanemo*

<sup>1</sup> Pollo Banapositolo Akoniamo taono punguli niringilimuni, alieli taono senga sukundu punguli seringili mele aku siku Akoniamo kepe Juda yomboma maku toko Pulu Yemonga ungumu pilieringi ulkana sukundu pungu ungu-mane siringili. Ningu kondoringili-kulu pilkuli Juda yomboma kinia yombo-lupama kinia ononga yombo awisili 'Yesusi molopa serimu mele nikimbili ungumu paa sika.' ningu kuru mondoringi. <sup>2</sup> Aku-na-kolo 'Kolo tokombele.' ningu ungu naa pilieringi Juda yombomane yombo-lupama seko mumindili kondoko kondi toringi kinia yombo-lupamane Pollo kinia Banapositolo konopu kiri panjeringi. <sup>3</sup> Pollo Banapositolo wale awisili Akoniamo taono molko Ye-Awylimunga ungumu nindingilíndu yomboma pipili naa kolko ungumu tondolo munduku nindingili kinia, Pulu Yemone 'Nane yombo we kondo kololi ungu nindikimbilimyombomane 'Paa sika nikimbili.' ningu, pilku liengi!' nimba 'Olone ,aku sipa mele, lipa ora simba ulu-tondolo awisili sangili.' nimba lipa tapondorumu kinia ulu-tondolo awisili seringili. 'Olone ulu-tondoloma

sengele kinia yombomane kanokole, ‘Paa sika Pulu Yemonga ungumu nikimbili lepomo.’ ningu piliangi.’ nimba Pulu Yemone ‘Aku siku ulu-tondoloma sangili.’ nirimu.

<sup>4</sup> Kanu-kinia aku taonona yomboma konopu talo seko panjiku moloringi. Marene “Juda yombomane nikimilimu sika nikimili.” niringi, marene “Pollo Banapasitolone nikimbilimu sika nikimbili.” niringi. <sup>5</sup> Juda yomboma kinia yombo-lupama kinia onone ‘Pollo Banapasitolo sepo kinjipu kouni topo kondamili.’ ningu langi niringi <sup>6</sup> aku-na-kolo langi niringi mele pilkuli olo kowa pungu kolea LLikonia poropinji pungu kanuna LLisira taono kinia Depi taono kinia kolea nondopa lierimu koleamanga pali andoko <sup>7</sup> semane peangamo we toko siliku andoringili.

14:8-20, (14:8-18)

### *LLisira Taono Pungu Ungu Ningu Siringili Kinia (14:19-20) Pollo ‘Kolopili’ Ningu Kouni Toringi Semanemo*

<sup>8</sup> LLisira taonona kimbu kinginewe tambulorumu ye se molorumu. Anumuni merimu kinia kimbu kinginewe tambulolimu merimu, waltikele kepe aulka naa andorumu. <sup>9</sup> Pollone ungu nirimu mele pilipa molorumu. Pollone yu nemene-neme nimba kanopale, ‘Pulu Yemone na manda sepa peanga simba.’ nimba pilipa molorumu kanopale, <sup>10</sup> tondolo mundupa yundu nimbale: “Nu kimbu kulkula ola gilie!” nirimu. Kanu-kinia ye kanumu waltikele kimbu kulupa ola gilipa purumu.

<sup>11</sup> Pollone ye kimbu kinginewe tambulorumumu sepa peanga sirimu kanokole yombo maku toko moloringimane ononga LLikonia ungu leko ninguli: “Olio popo tolemolo pulu yemanga ye talo mania ongo mana-ye au leko olio molemolona okombele lepomo.” niringi. <sup>12</sup> Pollo ungu awisili nirimu-kulu kanokole ‘Yu pulu ye Emis.’ niringi. Banapas Pollo kinia kopu seko oringili-kulu kanokole ‘Yu pulu ye Susi.’ niringi. <sup>13</sup> Kolo toli pulu ye Susi kanumunga tamandu ulkamo kanu taonona ultukundu gilierimu, yunga ala yemo kongi kao pelea pokore kinia pellawa sindi mulkowe pokore kinia lipa ‘Olo au sipu popo topo kongima kalopo siemili.’ nimba taono pala kerepuluna memba orumu.

<sup>14</sup> Aku-na-kolo Yesusini “Nanga kongonomo sende-pale.” nimba lipa mundorumu ye Banapas kinia Pollotolone senge seringi mele pilku kiri pilkuli olonga wale pakolima liku sungu siku, yomboma maku toringina lisiku ru niliku pungu ninguli: <sup>15</sup> “Yema, aku ulumu nambi semu-na sekemeleye? Olto ono mele, mana-yetolo mindi. Semane peangamo ono topo simbulú ombulu. Ono pulu ye kolo toli koropama munduku kelko, kanu méle koropama bulu siku, mulu kinia ma kinia nomu-kusa kinia mélema pali sepa, yu yuyu konde molemo Pulu Yemonga ungumu ‘Pilku liengi!’ nimbili, nimbu simbulú ombulu kanumu. <sup>16</sup> U sika yombo lupa lupama ononga konopumane pilku ulu seringima Pulu Yemone kanopa we siye kolopa, seko molonge kinia yu kanopa peanga pilimba mele kamu naa nimba para sirimu. <sup>17</sup> Aku-na-kolo u Pulu Yemone ‘Na molio mele naa piliangi.’ nimba mélema pali lopi naa serimu. ‘Nane ono kondo kolopo sepo kondolio mele kanangi.’ nimba ‘Lo mania ombo kere-langlang peangama wendo opili, ono nongo manda sendeko konopu siku molangi.’ nimba aku sipa serimu.” nirimu. <sup>18</sup> Olone aku niringili-na-kolo yombomane ‘Olo pulu yetolo.’ ningu popo toko kongima kalonge seringi uluma ‘Munduku keleangi.’ ningu tondolo munduku ta ningu “Mólo!” niringili kinia munduku kelieringi.

<sup>19</sup> Kanu-kinia Akoniamo taono kinia kolea Pisidia poropinji lierimu Andiyoko taono kinia moloringi Juda yombo mare LLisira taono ongole ono kondi toringi kinia onone Pollo ‘Kolopili.’ ningu kouni tokole, ‘Kolomu.’ konopu leko yunga ónomo kunduku liku mengo pungu taonona ultukundu toko eltoringi. <sup>20</sup> Aku-na-kolo Yesusinga lombili

andoli yomboma yu lierimuna ongo kakapu seringi kinia yu ola gilipa kelepa taonona sukundu purumu.

**14:20-21**

*Depi Taono Kamu Puringili Semanemo*

Opalikundu Banapas kinia Depi taono puringili. <sup>21</sup> Akuna semane peangamo toko siringili kinia yombo awisili Yesusinga ungumu pilku liltingi.

**14:21-28**

*Depi Taono Munduku Kelko, Siria Poropinji Kolea-Awili Andiyoko Kelko Yando Oringili Semanemo*

Pe olo kelko LLisira taono yando ongo, Akoniamo taono ongo kolea Pisidia poropinji lierimu Andiyoko taono oringili. <sup>22</sup> Kanu taonomanga Yesusinga lombili andoli yomboma "Pulu Yemo ye nokoli kingimu molopa nokolemo koleana u naa pumbu ya mana molopole Karasinga yomboma molemolomonga mindili nombo umbunama memolo-na-kolo 'Paa sika Pulu Yemo nokopa molemo koleana pambo.' ningu yunga ungumu munduku naa kelko, kuru mondoko molaa." ningu siliku oringili. <sup>23</sup> Pollo Banapositolone taonomanga pali Karasinga yombo talapemanga tapu-yema ningu taltoko, Pulu Yemo kinia ungu ningu mawa sengelendo kere-lang'i mi toko naa nongo ninguli: "'Ye-Awili Yesusi Pulu Yemone 'Ono nokopa kondomba ye se lipu mundumbu.' nimba, nimba taltorumu ye nokoli Karasimu ombo sika lipa tapondopa mindili nolemolá aulkana wendo liltimu., Yu sika.' ningu kuru mondolemele yemo ono nokopa kondopili." niringili.

<sup>24</sup> Kolea Pisidia poropinji ongole, pe kolea Pambillia poropinji sukundu ongo, <sup>25</sup> kanuna Peka taono ongo yomboma ungumu ningu siliku, Atelliya taono oringili.

<sup>26</sup> Atelliya taono munduku kelko, nomuna sipina kelko kolea Siria poropinji lierimu kolea-awili Andiyoko kamu oringili. I kongono seko liltingili kongonomo u pulu polko sengele mele yombomane "Pulu Yemone i kongonomo sikimu yuni olo kondo kolopa lipa tapondopili i kongonomo se-pale." ningu liku mundoringi kolea-awili kanuna kongono seko pora sikuli kelko sukundu oringili kanumu. <sup>27</sup> Kanuna ongo molkole, Karasinga yombo talapemo liku maku toko, Pulu Yemone olo lipa tapondorumu kinia seringili mele kepe, Pulu Yemone Juda yombomanga ultukundu molemele yombo-lupamane yunga ungumu pilku liku yunga koleana manda pungí aulkamo akisinderimu mele kepe, semane toko siringili. <sup>28</sup> Kanu-kinia olo akuna Yesusinga lombili andoli yomboma kinia wale awisili pea moloringi.

## 15

**15:1-35**

*(15:1-21) Juda Yombo Karasi Kuru Mondoringi Yombomanga Ye Awilima Jerusalleme Maku Tokole, (15:22-29) Juda Yombo Naa Moloringi Yombo-Lupa Karasi Kuru Mondoringi Yomboma Seko Molonge Mele Ningu Panjiku Pepá Toko Mundoringi Kinia (15:30-35) Ononga Jerusalleme Maku Ye Awili Pokore Pepámo Kolea-Awili Andiyoko Mengo Pungu Kambu Toringi Semanemo*

<sup>1</sup> Juda ye mare kolea Judia disiriki molko kolea-awili Andiyoko maniendo ongole Karasi pilku moloringi yombo-lupama ungu-mané siku moloringi. Onone ninguli: "Karasinga ungumu manjiku pilieemele manda naa sembá. Onone Mosisinga ungu-manemo pilku yemanga kangi se kopisiku makaye seko wendo naa língi liemu mindili nolemolá aulkana wendo ongo molko kondonge pungí aulkamo Pulu Yemone naa lipa tapondomba." niringi. <sup>2</sup> Aku niringimunga Pollo Banapositolone ono-kinia angelema ningu irinale seringi. Akumunga Karasinga yombomane Pollo Banapositolo kinia Karasinga ye mare kinia "Ono kolea-awili Jerusalleme pungu Yesusingi "Nanga

kongonomo sende-paa.” nimba lipa mundorumu yema kinia „Karasinga yombo talape moloringimanga, tapu-yema kinia pungu kanoko, i irinale sekemolomonga ningu sumbi sindangi pungu mangili-paa.” ningu liku mundoringi.

<sup>3</sup> Karasinga yombo talape Andiyoko taonona moloringimane “Ono paa.” ningu mundoringi kinia Jerusalleme pungíndu kolea Ponisia poropinji kinia kolea Sameria poropinji kinia pungu, u kolea lupa lupama semane peangamo toko siliku andoringili kinia Juda yombo naa molko yombo-lupa moloringi yomboma konopu topele toko Pulu Yemonga ungumu pilku littingi mele semanemo toko siliku puringi. Karasinga yombo semanemo pilieringimane paa konopu siringi. <sup>4</sup> Jerusalleme kamu sukundu puringi kinia Karasinga yomboma kinia, ononga tapu-yema kinia, Yesusini lipa mundorumu yema kinia onone “Papu okomele.” niringi. Kanu-kinia Pollo Banapasitolone Pulu Yemone olo lipa tapondorumu kinia seringili mele pali semane toko siringili.

<sup>5</sup> Kanu-kinia Parisi ye Karasinga ungumu pilku kuru mondoringi yema ola gilkuli ninguli: “Juda yombo naa molemele yombo-lupamane ‘Yesusi Karasinga yomboma molamili.’ ningu yemanga kangi se kopisiku liku makapu seko, Mosisinga ungu-manema pali pilku liku sengena panjiku sangi.” niringi.

<sup>6</sup> Kanu-kinia Yesusini lipa mundorumu yema kinia tapu-yema kinia ‘I ungu wendo okomomo lipu sumbi siemili.’ ningu maku toringi. <sup>7</sup> Ono ungu awisili angelema ningu moloringi kinia Pita ola gilipa onondo nimbale: “Ango-keme, ono u ulu se wendo orumu mele pilku molemele. Pulu Yemone ono molemelemanga na nimba taltopa, “Karasinga semane peangamo Juda yombo naa molemele yombo-lupama pilku kuru mondoringi nu pungu toko si-pu.” nirimu. <sup>8</sup> Pulu Yemone yombomanga konopuma pali kanolemo Pulu Yemone kanu yombo-lupama konopu topele toko yunga ungumu pilku kuru mondoringi kinia kanopale ‘Aku sekemelemonga na konopu peanga pekemo mele Juda yomboma kanangi.’ nimba Mini Kake Sélimu, u olio Juda yomboma sirimu mele, kiniá ono yombo-lupama aku sipa sirimu. <sup>9</sup> Yuni ono yombo-lupama ulu se lupa sepa, olio Juda yomboma ulu se lupa sepa, naa serimu. Ono ‘Yunga ungumu sika ungumu.’ ningu kuru mondoringi kinia ‘Ononga konopuma kake sepili.’ nirimu.

<sup>10</sup> “Akumunga kiniá ono nanga ungumu pilku molemele Juda yema, onone “Yombo-lupama aku siku sangi.” nikimili mu nambi semu-na ‘Pulu Yemo olio kinia mumindili kolomba molo mólonje.’ ningu aku siku nikimiliye? U olianga anda-kolepalima kinia olio umbuna manda naa merimulu umbunamo kinia onone i yombo-lupa Yesusinga lombili andoli yombo molemelema nambi semu-na ‘meangi.’ nikimiliye? Pulu Yemone olio Juda yombomane “Samili.” nimba ungu-manene sirimuma Mosisini pilipa yando nimba sirimu ungu-manema semolondo perelemolo aku unguma “Yombo-lupamane sangi.” nikimili mu paa manda naa sekemo. <sup>11</sup> Aku siku paa naa niengi, mólo! Olio pilielemolo mele i-sipa: Ye-Awili Yesusini kanu yombo-lupama we kondo kolopa lipa tapondopa mindili nolemolá aulkana wendo lipa yu-kinia pea molko kondonge aulkana lipa mondomba mele olio Juda yomboma kepe aku sipala we kondo kolopa lipa tapondolemo. „Pulu Yemo kinia konopu seluna pupili manda selu sipu molomolo aulka se lupa paa mólo..” nimba Pitane aku sipa nirimu.

<sup>12</sup> Kanu-kinia Banapas kinia Pollotolone Pulu Yemone olo lipa tapondorumu kinia kolea lupamanga andoko „Pulu Yemo kinia kopu seko moloringili, lipa ora sirimu ulu-tondoloma seringili mele semane toko siringili kinia maku toringi yomboma pali ungu naa ningu we pilku moloringi. <sup>13</sup> Olone semane toko pora siringili kinia Jemisini nimbale: “Ango-keme, na ungu se niembo piliaa. <sup>14</sup> Pulu Yemone yombo-lupamanga ‘Mare nanga yomboma molangi kene lipu tapondambo.’ nimba molemo mele u kumbi lepa lipa ora sirimu mele Saimono Pitane ono nimba simu. <sup>15</sup> Nimba

simu kanu mele kinia, Pulu Yemone ungu-umbu tondorumuma pilku yomboma ningu siringi yemane u ungu ningu bokuna toringi mele kinia, selu-sipa. Aku bokuna toringi molemo mele i-sipa:

<sup>16</sup> 'Pulu Ye Awilimuni ungu-iku se topa nimbale:

"Na pe kelepo yando ombole,

ye nokoli kingi Depitinga ulka toko sikisindingimu  
kelepo ombo takombo.

Ulka mélema kiri lierimuma kondenga lipu  
u gilierimu mele kelepo takombo.

<sup>17</sup> Akumunga, yombo-lupama pali

Pulu Ye Awilimu andoko koronge.

'Nanga yomboma.' nimbu, nimbu taltorunu yomboma  
na andoko koronge."

<sup>18</sup> nimba koronga-u i unguma

nimba para sirimu Pulu Ye Awilimu yuni  
aku sipa nikimu.'

nimba bokuna aku sipa nimba molemo.

<sup>19</sup> "Akumunga, nanga konopumuni pilkiru mele i-sipa: 'Yombo-lupa konopu topele toko 'Pulu Yemo pilipu molamili.' ningi yomboma mindili lipu simulú kinia manda naa sembá.' konopu lekero. <sup>20</sup> Aku ulumu mundupu kelepo ulu se lupa samili konopu lekero mele i-sipa: 'Pepá se topo mundupuli i-sipu niemili:

'Mélema liku ola anjiku, "Olionga pulu yema." ninguli  
popo toko kere-langi kalko silimili kere-langima

'Kalaro mololi kere-langima.' ningu naa nongo,

wa ulu-kirinale naa seko,

kongi kepe mélema 'Meme naa omba pupili.' ningu

nomi kolomongo naa sengema naa nongo,

mélemanga meme naa nangi.'

nimbu pepá tamili.' konopu lekero. <sup>21</sup> 'Mosisini Pulu Yemone sirimu ungu-manema nimba sirimuma koleamanga pali paa koronga-u ningu siringi mele yandopa yandopa kiniá kepe ningu silimili, alieli Juda yombomane Sambate walemanga pali koro molko Pulu Yemonga ungumu maku toko pilielemene ulkamanga kanu unguma Mosisini torumu bokumanga kambu tolemele pilielemene kinia i yombo-lupa Karasinga yombo molemelemane 'naa sangi.' nikiru mele pea maku toko pilkuli naa senge, kene aku siku 'naa sangi.' nimbu pepá topo siemili.' konopu lekero." nirimu.

Aku nirimu kinia onone "E." niringi.

*15:22,29,30-35*

#### *(Imbimu inia yakondo 15:1-35 molemo)*

<sup>22</sup> Kanu-kinia Yesusini lipa mundorumu yema kinia ,Karasinga yomboma noko-ringi, tapu-yema kinia Karasinga yomboma pea pali onone ninguli: "Pollo Banapositolo kinia olianga ye mare kolea-awili Andiyoko pea kopu seko pangilipu mundamili." niringi. Aku ninguli, Judasi, yunga imbi se Basipas, yu kinia, Saillas kinia ningu taltoringi. Kanu yetolo yombomanga pali kumbina moloringili yetolo.

<sup>23</sup> Kanu yetolo ningu taltokole, 'Olo mengo pangili.' ningu pepá se i-siku toringi:  
'Olio, Yesusini lipa mundorumu yema kinia,

tapu-yema kinia,

olio ononga genalini i pepámo topo,

ono kolea-awili Andiyoko molemele yombo-lupama kepe

kolea Siria poropinji molemele yombo-lupama kepe

kolea Sillisia poropinji molemele yombo-lupama kepe

kolea lupa lupamanga molemele yombo-lupama kepe  
ono pali pepá topo

'Ango-keme, ono manda molemeleye?' nikimulu. <sup>24</sup> Olio pilierimulu, olio Juda ye Karasi pilieli yemanga ye mare olio molorumuluna munduku kelko pungu, olione "Saa." naa nimbu sirimulu mele seringi. Kanu yemane niringi ungumuni ononga konopu toko bulu-balu sindiku ono ningu sembambu siringi. <sup>25</sup> Kanumunga "Olione olionga pulu lemó ye peanga Banapas Pollotolo kinia ye mare nimbu taltopo, ono olo kinia pea kopu seko pangí mundamili." nimbu panjerimulu. <sup>26</sup> Banapas Pollotolone 'Olto toko kondonge kinia kolombulu liemu unguri mólo.' ningu pipili naa kolko olionga Ye-Awili Yesusi Karasinga kongonoma sendeko yunga imbi ambolko paka tondoringili. <sup>27</sup> 'Aku sipu nimbu panjerimulu, akumunga, olione Judasi Saillasitolo nimbu taltopo, 'Pepá tokomolomo ono kanoko pilingí kinia i yetolone ungu ningu singilí kinia 'Onone aku siku paa sika ningu panjeringi lepomo.' ningu piliangi.' nimbu olo nimbu taltopo lipu mundukumulu. <sup>28</sup> Mini Kake Sélimuni olio lipa tapondorumu kinia olio pilipuli nimbu panjerimulu mele i-sipa: Olione umbuna lupa awisili ono simulú manda naa sembá. I-siku mindi pilku sangi: <sup>29</sup> Mélema liku ola anjiku, "Olionga pulu yema."

ninguli popo toko kalko silimili kere-langima 'Kalaro mololi kere-langima.' ningu naa nongo,

mélemanga meme naa nongo,  
kongi kepe mélema 'Meme naa ombo pupili.' ningu  
nomi kolomongo naa sengema naa nongo,  
wa ulu-kirinale naa sangi.  
Aku uluma naa senge kinia akumu peanga.  
Aku pea.

Manda, ono molko kondayo.'  
,ninguaku siku pepá se toringi.,

<sup>30</sup> Pepá toko pora sikuli, "Mengo pungu kolea-awili Andiyoko maniando paa." niringi kinia yema akuna pungu Karasinga yomboma liku maku toko pepá kanumu siringi. <sup>31</sup> Pepá toko ungu niringi mele yombomane kanokole 'Ungu paa peanga.' ningu kanoko konopu siringi. <sup>32</sup> Judasi kinia Saillasitolo olo Pulu Yemonga ungu-umbu tondorumuma pilku yomboma ningu siringili yetolo moloringilimunga Karasinga yomboma 'Molko kondangi.' ningu ungu peanga awisili ningu siringili. <sup>33</sup> Kanu yetolo wale awisili mele Andiyoko moloringili kinia pe Karasinga yombomane "Olo yando 'pale.' ningu liku mundoringi yomboma molemelena olo kelko konopu pe nipili pale." niringi. <sup>34</sup> (Aku-na-kolo Saillas yu 'Andiyoko we molambo.' nimba naa purumu.) <sup>35</sup> Pollo kinia Banapasitolo kolea-awili Andiyoko molko, ye mare lupa awisili pea Ye-Awilimunga ungumu yomboma mane siku semane peangamo toko siringi.

15:36—18:22

*Pollo Wale Talo-Sipa Yesusinga Ungumu Nimba Silipa Andorumu Semanemo*  
15:36-39

*Pollo Banapasitolo Irinale Sekole Kongono Sere Leko Andoko Naa Seringili Semanemo*

<sup>36</sup> Pe wale awisili ombo purumu kinia Pollone Banapasindu nimbale: "Olto kelepo u Ye-Awilimunga ungumu nimbu silipu andorumbulu koleamanga kelepo pumbu, Karasinga yomboma manda molemelenje, nambi selemelenje, kano-pambolo." nirimu.

<sup>37</sup> Banapasini nimbale: "Jono Mako pea kopu sepo pamili." nirimu.

<sup>38</sup> Pollone nimbale: "Mólo. U pea kopu sepo kolea Pambillia purumulu kinia olto mundupa kelepa kongono naa sepa yu purumu kanumu. Kiniá pea naa pumulú." nirimu.

<sup>39</sup> Aku nirimu kinia angelema ningu kongono sere leko naa se-puringili. Banapasini Makondo "Pea kopu sepo pambilou." nimba memba pumba, sipi senga kolea Saiporas puringili.

**15:40—16:5**

*Pollo Wale Talo-Sipa Pulu Polopa Yesusinga Semane-Peangamo Topa Simbando Purumu Semanemo*

**15:40-41**

*Pollo Wale Talo-Sipa Karasinga Kongonomo Andopa Se-Pumbando 'Saillasi Pea Kopu Sepo Pambil.' Nirimu Semanemo*

<sup>40</sup> Pollone Saillasindu "Pea kopu sepo pambil." nirimu. Pungilí seringili kinia Karasinga yombomane ninguli: "Pulu Ye Awilimuni olo we kondo kolopa nokopa kondopili pangili." niringi kinia olo kolea-awili Andiyoko munduku kelko puringili.

<sup>41</sup> Olo kolea Siria poropinji kinia kolea Sillisia poropinji kinia Karasinga yombo talapema taonomanga lupa lupa moloringi yomboma 'Ono molko kondoko Pulu Yemonga ungu-munu kuru mondoko molangi.' ningu ungu-mane siliku andoringili.

## 16

**16:1-5**

*Pollo Saillasitolo LLisira Puringili Kinia Timoti Olo Lombili Purumu Semanemo*

<sup>1</sup> Pollo Saillasitolo kolea Depi taono pungu LLisira taono puringili kinia kanuna Yesusinga lombili andoli ye se molorumu, yemonga imbimu Timoti. Yu Juda ambo senga malo. Anumu Karasi pilieli ambomo molorumula, aku-na-kolo lapa Juda ye se mólo, yu ye se lupa. <sup>2</sup> LLisira kinia Akoniamo taonotolonga 'Karasi pilku moloringi, genupilimane ninguli: "Timoti yu ulu peangama sepa, yu paa molopa kondolemo yemo." niringi. <sup>3</sup> Pollone 'Timoti pea pamili.' konopu lepale yunga kangi se kopisipa wendo linderimu. Juda yombo aku koleana peringimane 'Timoti lapa yu Juda ye se mólo. Yu ye se lupa.' ningu 'Timoti kepe ye lupamo.' ningu yunga ungu nimbáma pilku mokoli senge.' nimbale Pollone Timotinga kangi se kopisinderimu. <sup>4</sup> Kanu-kinia ono koleamanga pungu, Yesusinga "Nanga kongonomo sende-paa." nimba lipa mundorumu yema kinia Karasinga yombomanga tapuyema kinia onone u Jerusalleme maku toko Karasi pilieli yombo-lupamane senge mele, ungu-mane siku ningu panjeringi ungu akumu, koleamanga pali ningu siliku andoringi. <sup>5</sup> Aku seringimunga Karasi yombo talapemanga yombomane 'Sika.' ningu kuru mondoringi mele tondolo pumba, ononga yombo talapemanga yombo awisili alieli sukundu sukundu oringi, yombo kambumu olandopa purumu.

**16:6-10**

*Pollo Ipulielie Kaima Mele Sepa Kolea Masedonia Poropinji Ye Se Kanopale Pollo Kinia Saillasitolo Kolea-Awili Pillipai Puringili Semanemo*

<sup>6</sup> Pollo yu kinia pea kopu seko puringili yetolo kinia ono Mini Kake Sélimuni 'Kolea Esia poropinji ungu naa ningu si-paa.' nirimu-kulu ono kolea Pirisia poropinji kinia kolea Gallesia poropinji kinia suku-singi ówana koleamanga pungu 'yomboma ungu ningu siringi.' <sup>7</sup> Ningi siliku pungu kolea Misia poropinji kinia kolea Bitinia poropinji kinia ówana punguli 'Kolea Bitinia poropinji pamolo.' niringi-na-kolo Yesusinga Minimuni 'Mólo.' nimba aulkamo pipi sirimu. <sup>8</sup> Yuni "Mólo." nirimu pilkuli kolea Misia munduku kelko ongo pungu nomu-kusa kelona Toroas taono puringi.

<sup>9</sup> Kanu-kinia akuna moloringi kinia ipulielie Pollo mongo-indi kaima mele sepa kanorumu kinia kolea Masedonia poropinji ye se ombo ola gilipa Pollondo mawa sepa

nimbale: "Nu nomu-kusa pulua toko yakondo ongo olio kolea Masedonia yomboma liku tapondani ou." nirimu. <sup>10</sup> Pollone aku sipa kanorumu kinia olione nimbili: "Manda, kolea Masedonia poropinji pamolo." nirimulu. 'Pulu Yemone olio mangilipa 'Akuna nanga semane peangamo yomboma toko siee.' nikimu lepomo kene' nimbu pilipuli "Sumbi sipu pamolo." nimbu pumulú serimulu.

**16:11-15**

*Ambo LLidia Konopu Topele Topa Karasinga Ungumu Pilipa Liltimu Semanemo*

<sup>11</sup> Olio sipina pumbu Toroas taono mundupu kelepo sumbi sipu kolea Samoteres purumulu. Kanuna pepole opalikundu Niapolis taono pumbu sipina wendo purumulu. <sup>12</sup> Niapolis taono mundupu kelepo kolea-awili Pillipai purumulu. Pillipai Romo yombo awisili moloringi taono awili se; yu kolea Masedonia poropinji sukundu taono awili se. Akuna wale mare molorumulu. <sup>13</sup> Kanu-kinia Juda yombomanga koro moloringi, wale Sambatemonga kolea-awili Pillipai pala kerepuluna ultu pumbu no kelona purumulu. Olio konopumane pilipuli 'Akuna Juda yomboma pungu maku toko, Pulu Yemo popo toko yu-kinia ungu ningí kolea se lemónje.' konopu lepo purumulu. Akuna pumbu kanorumulu kinia ambo mare maku toko moloringi kanopole mania molopo kanu amboma ungu nimbu sirimulu. <sup>14</sup> Unku pilku moloringi ambomanga se, ambomonga imbimu 'LLidia' niringi, kanu ambomonga kolea Tayataira taono; yu mulu-maminia kondolimane bisinisi serimu; yu Juda ambo se mólo, aku-na-kolo yu Pulu Yemonga ungumu pilipa popo topa molorumu ambomo. Kanu ambomo Ye-Awilimuni 'Pollo ungu nimbáma pilipa lipili.' nimba ambomo yunga konopuna ungu pilimba aulkamo sumbi sinderimu-kulu ungumu pilipa liltimu. <sup>15</sup> Kanu-kinia ambo LLidia kinia yunga ulkana moloringi yomboma kinia ono no litingi. No lipa pora sipale yuni oliondo nimbole: "'Yu Ye-Awilimuni sika.' nimba kuru mondolemo.' konopu liengi liemu nanga ulkana molamili wangi." nirimu. "Yuni olio ta nimba mangilimu kene olio yunga ungumu sengena panjipu pamolo." nimbu purumulu.

**16:16-40**

*Pollo Kinia Saillasitolo Kolea-Awili Pillipai Moloringili Kinia Ka Siringi Semanemo*

<sup>16</sup> Walte olio Juda yomboma pungu maku toko, Pulu Yemo popo toko yu-kinia ungu niringi koleana pumulú purumulu kinia ye marenga kongono kendemande senderimu ambo-wenepo se aulkana kanorumulu. Yunga konopuna kuru se molorumumuni yu yomboma-kinia pe ulu mare wendo ombá mele nimba sirimu mele pilipa yomboma nimba sirimu kinia yu nokoringi yemane kou-mone awisili litingi. <sup>17</sup> Pollo keme olio purumulu kinia kanu ambo-wenepomo olio lombili ombo tondolo ru nimba nimbole: "I yema Paa Olandopa Pulu Ye Awilimunga kendemande-yema. Pulu Yemone yomboma lipa tapondopa mindili naa nongo molko kondonge aulkamo liku ora singí okomele." nirimu. <sup>18</sup> Alieli kanu ambo-wenepomo aku sipa mindi nirimu kinia Pollone pilipa kiri pilipale, topele topa, ambo-wenepomonga konopuna kuru molorumu kanu kurumundu nimbole: "Nane Yesusi Karasi mangilipu yunga tondolomone nundu nikiru: 'Nu i ambo-wenepomo munduku kelko ongo wendo pu.' nikiru." nirimu. Kanu-kinia kurumu ambo-wenepo kanumu waltikele mundupa kelepa ombo wendo purumu.

<sup>19</sup> Ambo-wenepomo nokoringi yemane kanokole, ononga kou-mone litingi aulka kanumu pipi sinderengili kanokole niringimuni, Pollo kinia Saillasitolo ongo ambolko liku, 'Ye awilimane kote piliangi sendamili.' ninguli, ki kunduku yomboma alieli maku toko moloringi koleana mengo puringi. <sup>20</sup> Olo kote pilieli yema moloringina mengo pungu ninguli: "I yetolo Juda yetolo. Olone olionga yomboma seko mini-wale mundundongili-na membo okomolo. <sup>21</sup> 'Olio Romo yomboma manda naa pilipu, manda naa semolo.' nilimulu ulu mare "Sangi." níngili." niringi.

<sup>22</sup> Yombo moloringimane ‘Paa seko kinjiku mongo língili.’ ningu “Olo paa sika aku siku sengili.” niringi. Kanu-kinia kote pilieringi yemane ninguli: “Olonga wale-pakolima wendo lindiku, ka-pultane olo taa.” niringi. <sup>23</sup> Kanu-kinia onone ka-pultane olo lakoko toko toko ka sikuli, ka-ulka nokorumu yemondo ninguli: “I yetolo mimi siku nokou.” niringi. <sup>24</sup> Ka-ulka nokorumu yemo onone aku siku ungu tondolo munduku niringi pilipale, olo lipa memba paa suluminiana sukundu pumba olonga kimbutolo unju-pellangone talapu lipa lloko torumu.

<sup>25</sup> Kanu-kinia awi-amburumi Pollo kinia Saillasitolo Pulu Yemo kinia ungu ningu ‘Pulu Yemonga imbi ambolopo paka tondambil.’ ningu konane niringili kinia ka-ulkana pea peringi yombomane pilku moloringi. <sup>26</sup> Kanu-kinia waltikele ma jimi-jimi awili se sepale, ka-ulka kanumu kolkalu sipa ulka-kuna kanuma topa bultupa bulu-balu serimu. Ka-ulkana peringi yomboma ka-sénene ka toringima pali wendo orumu, ka-yomboma we moloringi. <sup>27</sup> Kanu-kinia ka-ulka nokorumu yemo makilipa ola molopa kanorumu kinia ulka-kuna kanuma pali bultupa lierimu kanopale ‘Ka-yomboma ongo púngi lepomo.’ konopu lepale, yunga opa seli lu-pulta kanumu kulu topa wendo lipa yu yuyu ‘Kolambo.’ nimba nomi kari lemba serimu. <sup>28</sup> Aku-na-kolo Pollone yundu ru nimba nimbale: “Nu nunu unguri naa sei! Olio pali ya we molemolo.” nirimu.

<sup>29</sup> Kanu-kinia ono nokorumu yemone ru nimba “Kiya kandoko mengo waa!” nimba, yu ombo Pollo kinia Saillasitolo moloringilina lisipa sukundu ombo, yu pungu-pungu nimba mini-wale mundupale, olonga kumbikerena tamalu perimu. <sup>30</sup> Kanu-kinia olo lipa memba pena pumbale, mangilipa nimbale: “Yetolo, na nambi sembó kinia manda we molopo umbuna naa memboyé?” nirimu.

<sup>31</sup> Olone yundu ninguli: “Nu Ye-Awili Yesusi ‘Yu sika Pulu Yemonga Malo molopa na manda lipa tapondomba.’ ningu kuru mondona kinia yuni nu lipa tapondopa mindili nolena aulkana wendo lipa yu-kinia molko kondoni aulkana lipa mondomba. Nu kinia nunga yomboma kinia ono aku sipa lipa tapondomba, molko kondonge.” niringili. <sup>32</sup> Kanu-kinia olone yu kinia yunga yomboma kinia onondo Ye-Awilimunga ungumu ningu siringili. <sup>33</sup> Sika awi-amburumi aku siku seko moloringi-na-kolo yuni olo lipa memba pumba olo toringi erili kanuma kulumiye tondorumu. Kanu enamonga yu kinia yunga yomboma kinia no liltingi. <sup>34</sup> Kanu-kinia pe yuni olo lipa memba yunga ulkana pumba olo kere-langi sirimu. Yunga yomboma kinia ono ikonopu topele toko, Pulu Yemo ‘Yu selumu mindi sika molemo.’ ningu kuru mondoko konopu siringi.

<sup>35</sup> Kolea tangorumu kinia kote pilieringi yemane ononga ele-yema ka-ulkana liku munduku ninguli: “Yetolo wendo liku munduku ‘Pangili.’ niee.” niringi. <sup>36</sup> I ungu niringima ka-ulka nokorumu yemone Pollo nimba sipa nimbale: “Kote pilielemele yemane ‘Olo pangili.’ ningu mundongi kene pangili. Olo konopu pe nipili pangili.” nirimu.

<sup>37</sup> Aku-na-kolo Pollone ele-yemando nimbale: “Olto Romo yetolo na-kolo kote naa pilkuli yombo awisilini kanoko molangi olto we ka-pultane toko ka síngi kanumu. Pe kiniá ‘Yomboma naa kanangi kiyongo nimbu lipu mundumulú.’ ningu nikimiliye? Paa manda mólo. Olto ka síngi yema onono ongo olto ‘Pale.’ niengi.” nirimu.

<sup>38</sup> Kanu-kinia ele-yema Pollone aku nirimu pilkuli kelko anju pungu kote pilieringi yema ningu siringi. Kanu-kinia kote pilieringi yemane ungu niringilimu pilkuli ‘Olo Romo yetolo lepomo.’ ningu mini-wale mundukuli niringimuni, <sup>39</sup> olo moloringilina ongo “Sepo kinjemulu lepomo.” ningu ka-ulkana wendo liku mengo ultu ongo ninguli: “I kolea-awilimu munduku kelko pangili.” niringi. <sup>40</sup> Kanu-kinia Pollo kinia Saillasitolo ka-ulkamo munduku kelko punguli niringilimuni, ambo LLidianga ulkana pungu Yesusinga yombo talape akuna maku toringimando ninguli: “Ungu

nimbuluma munduku naa kelko tondolo munduku kuru mondoko pilku molangi.” ningu, ungu mare ningu sikuli olo puringili.

## 17

*17:1-10*

*Pollo Saillasitolo Tesallonaika Taono Puringili Kinia Olo Tonge Seringi Semanemo*

<sup>1</sup> Pollo Saillasitolo Pillipai taono munduku kelko pungu, kolea Ambipollis kinia Apollonia kinia kanu taonotolo ongo munduku kelko anju pungu, Tesallonaika taono puringili. Juda yomboma maku toko Pulu Yemonga ungumu pilieringi ulka se akuna gilierimu. <sup>2</sup> Kanu-kinia Pollo yu u alieli serimu mele sembando Juda yomboma maku toko Pulu Yemonga ungumu pilieringi ulkana purumu. Kanuna yombo koro moloringi wale Sambate yopoko Pulu Yemonga bokuna ungu u toringi molorumuma ‘Ono piliangi.’ nimba paa mimi sipa nimba sipa, <sup>3</sup> Pulu Yemone “Ono nokopa kondomba ye se lipu mundumbu.” nimba, nimba taltorumu ye nokoli Karasimu mindili nomba kolopale kelepa lomboropa ola molomba mele, bokuna aku sipa wendo ombá mele u toringi molorumu mele pilipale, ono nimba sirimu. Pe yuni nimbale: “I ye Yesusi semane topo sikiru aku yemo kinia Pulu Yemone “Ono nokopa kondomba ye se lipu mundumbu.” nimba, nimba taltorumu ye nokoli Karasimu kinia akumu ye selumundu nikiru.” nirimu. <sup>4</sup> Juda yombo mare yuni nirimu ungumu pilkuli, ‘Yu paa sika nikimu.’ ningu Pollo Saillasitolo lombili puringili. Juda yomboma pea Pulu Yemonga ungu pilieringi yombo-lupa awisili lombili puringila. Ye awilimanga menupili awisili aku siku lombili puringila.

<sup>5</sup> Aku-sipa na-kolo yombo awisili Juda ye awilima munduku kelko Pollo Saillasitolo lombili puringi-kulu kanokole Juda yema ono olo-kinia konopu kiri panjeringi. Konopu kiri panjikuli yomboma maku to-pu-pu seringi koleana mongo kondoringi ye mare moloringima liku maku toko, yomboma pali seko mumindili kondoko “Andoko ru niengi.” niringi kinia, lisiku pungu Jesononga ulkana ‘Olo molongele.’ ningu koroko, yomboma liku singíndu kororingi. <sup>6</sup> Pollo Saillasitolo naa moloringili-kulu koroko kelkole, Jesono kinia Karasinga ye mare kinia liku mengo kanu koleamanga tapu-yema moloringina mengo ru niliku pungu ninguli: “Koleamanga pali seko kinjeringili yetolo kiniá ya olionga taonona ongili. <sup>7</sup> Ongili kinia Jesonone “Olo pea molamili wale.” nimba yunga ulkana memba pumula. Onone “Olionga Romo koleamanga pali nokolemo Ye Paa Awili Kumbina Sisamonga ungu-manema kamu mania pupili, ye se, imbi Yesusi, kolali sepa ye nokoli kingimu molemo.” nilimili.” niringi. <sup>8</sup> Aku niringi pilkuli yombo maku toringima kinia ‘Tesallonaika taono, tapu-yema kinia paa mini-wale munduku ‘Nambi semolonje?’ ningu, pilku sundoringi. <sup>9</sup> Kanu-kinia Jesono kinia ye liku mengo oringima kinia, ye kanuma “Pame-kote seko ono paa.” niringi.

<sup>10</sup> ‘Pollo kinia Saillasitolo kamu liku ka naa siengi.’ ningu ipu lierimu kinia Karasinga yombomane popenge seko olo “Kolea Beriando pale.” ningu liku mundoringi.

*17:10-15*

*Pollo Saillasitolo Beria Taono Pungu Kongono Andoko Seringili Semanemo*

Pollo Saillasitolo Beria taono sukundu punguli, Juda yomboma maku toko Pulu Yemonga ungumu pilieringi ulkana puringili. <sup>11</sup> Olone Beria taono yomboma semanemo toko siringili kinia u Tesallonaika taono yombomane seko kinjeringi mele Beria yombomane aku naa seringi. Unku niringili mele paa pilku peanga pilku, ‘Sika nikimbilinje, molo kolo tokombelenje, kanamili.’ ningu alieli Pulu Yemonga boku taltingimanga mimi siku kanoko moloringi. <sup>12</sup> ‘Kanoko pilkuli, Juda yombo awisilini ‘Yesusi yu sika Pulu Yemone ‘ono nokopa kondomba ye se lipu mundumbu.’

nimba, nimba taltorumu ye nokoli Karasimu,’ ningu kuru mondoringi. Yombo-lupa awisilini aku sikula ‘Sika.’ ningu kuru mondoringi. Yombo-lupamanga ambo imbi molorumu ambo awisili kinia kanu ambomanga ye awisili kinia aku seringi.

<sup>13</sup> Juda yombo Tesallonaika taonona moloringimane Pollone Beria taonona moloringi yomboma Pulu Yemonga ungumu nimba sirimu pilkuli, Beria taonondo yando ongo Beria yombomanga konopuma toko bulu-balu sindiku ‘Pollone nirimu ungumu pilku liltingi yomboma kinia Pollo yu kinia we-yombomane ono mumindili kolangi.’ ningu kondi toringi. <sup>14</sup> Aku seringi kinia Karasinga yombomane Pollo liku nomu-kusa kelona maniendo mengo pungu mundu-puringi, aku-na-koło Saillas kinia Timotitolo Beria taonona we moloringili.

17:15—18:1

### *Pollo Atene Taono Pumba Yomboma Ungu-Mane Sirimu Semanemo*

<sup>15</sup> Pollo mundu-puringi yema Atene taono mengo pungu mundukuli niringimuni, kelko yando onge seringi kinia Pollone ungu se onondo nimba mundupa nimbale: “Saillas kinia Timotitolo na moliona welea yando wangili niee.” nirimu kinia Beria yema yando oringi.

<sup>16</sup> Pollo Atene taono pumba Saillas kinia Timotitolo nokopa molopale nirimumuni, kanorumu kinia kolea akuna unju kinia kou kinia akumane pulu ye kolo toli none selima seko anjeringi kanopale yu paa konopu kiri panjerimu. <sup>17</sup> Aku siku seringi kanopale yuni ‘Ungu mare nimbú.’ konopu lepa, Juda yomboma maku toko Pulu Yemonga ungumu pilieringi ulkana pumba, Juda yomboma kinia, Pulu Yemonga ungu pilieringi yombo-lupama kinia anju yando ungu mare niringi.

Atene yomboma maku toringi koleana yu alieli pumbale yombo akuna ongo moloringima-kinia ungu mare pea niringila. <sup>18</sup> Epikuriya yomboma kinia Sitoke yomboma kinia akumane ‘Yomboma molko konopu lemelemanga pulumu piliele-molo.’ ningu mane siringi, kanu yombo talapetolonga ye mare kinia ono Pollo kinia angelema niringi. Pollone Yesusinga semane peangamo topa sipale Yesusi óno-koleana lomboropa ola molorumu mele nimba sirimumunga pilkuli ononga ye marene ninguli: “I ye ungu awisili nikimumuni nambolka ungu mare nimbando nikimunje?” niringi. Marene ninguli: “Olio pulu ye naa pilipu imbi silimulu pulu yemando nikimunje?” niringi. <sup>19</sup> Kanu-kinia onone Pollo liku Ariopakas kanjollo yema maku toko moloringina mengo purungi. Akuna mengo purungi kinia onone yundu ninguli: “Nuni ungu konde se yomboma mane sinu akumu nambolka unguri ninuye? Olio piliamili ni.” niringi. <sup>20</sup> “Nuni ungu nikinumu olio pilipu sundukumulu. I ungumu paa konde toko nikinumu. Olio ungu-pulamu piliamili ningu si.” niringi. <sup>21</sup> (Atene yomboma kinia yombo ponenge ongo Atene moloringima kinia ono pali kongono se lupa naa seko enamanga pali ungu konde wendo orumuma mindi pilku anju yando angelema ningu moloringi. Pollo kanjolloma moloringina mengo purungi yemane i ungu wendo orumumu pilingindu mengo purungi.)

<sup>22</sup> Ariopakas kanjolloma maku toko moloringi penana ongole Pollondo “I ungu nikinumunga pulumu piliamili ningu si.” niringi kinia yu ola gilipa nimbale:

“Atene yomboma, ‘Ono ‘nokolemele’ ningu pulu ye lupa-lupamanga unguma kuru mondolemele yomboma molemele.’ nimbu kanokoro. <sup>23</sup> U ombó orundu kinia Atene yomboma ononga popo tolemele mélema andopo kanorundu. Mimi sipu kanorundu kinia ononga popo tolemele polo senga ungu mare toko mondoringi kanorundu mele i-sipa:

PULU YE NAA PILIPU IMBI SILIMULÚMUNGA POLOMO

aku sipa ungu nimba molorumu kanorundu. Kanu pulu yemo, ono naa pilku we popo tolemele akumunga ungu-pulamu nane nimbu simbú sekero.

<sup>24</sup> “Ma kinia mélema pali serimu Pulu Yemo yu mulumu kinia mamo kinia mélema pali nokolemo Ye Nokoli Awilimu. Yombomane ‘Olio ku naa pepo, manda molamili.’ nimbu ulka takopo pelemolo mele yu aku sipa mólo. ‘Pulu Yemo olio-kinia molopili.’ ningu takondonge ulka akuna manjipa yu manda naa molomba. <sup>25</sup> Yu mélse manda mólo naa tolemo, yu yombo sene manda lipa naa tapondomba, mólo. Yuni yu yuyu konde mololi ulu-pulumu yomboma sipa, múlu limili múlumu sipa, mélema pali yomboma silimú. Akumunga yombomane yu nambi seko manda liku tapondongeye? Manda mólo. <sup>26</sup> Pulu Yemone olionga anda-kolepa selu mindi serimu kanumuni olio mana-yomboma pali kalopa liltimu. Olio ‘koleamanga pali molangi.’ nimba aku serimu. Yu yuyu yombomanga walema nimba panjipa, yombo talape lupa lupa molonge mama nimba taltorumu. <sup>27</sup> ‘Mana-yomboma yu yakala kolongema yu kanoko lingí uluma sangi.’ nimba Pulu Yemone aku serimu. Yu koroko lingí uluma pali selko pungí kinia manda semu liemu ono yu manda lingí. Aku-na-kolo yu olio-kinia sulu sepa naa molemo. Olio yomboma kinia selu selu nimba nondopa molemo. <sup>28</sup> Akumunga ononga ye konopumane pilku konane toringi yemanga ye sene torumu konanemonga sukundu nimba molemo mele i-sipa:

‘Yu olio-kinia molemomonga molemolo mele molemolo.

Olio konde molemolo ulu-pulumu yuni mindi sipa,  
aulka andopo kangini uluma selemolo tondolomo

yuni mindi sipa,  
konopumane uluma selemolo tondolomo  
yuni mindi silimú.’

nimba molemo kanumu. Ye sene konane se torumu, kanu konanemonga ungu se nimba molemo mele i-sipa:

“Olio kepe yunga kalopa liltimuma molemolo.”

nimba molemo. ‘Ononga yemane u konane pilku niringi mele kinia, nane kiniá nikiru mele kinia, selu sipa.‘

<sup>29</sup> “Sika olio Pulu Yemonga kalopa liltimu yomboma molemolo kene ‘Yu kou-gollo kinia kou-sillipa kinia umbu-kou kinia yu aku sipa mele.’ konopu naa leamili. Pilipa kondoli pelemo yombo sene konopumane pilkuli mélse kini selemene mele Pulu Yemo yu aku sipa mólo. <sup>30</sup> U yombomane Pulu Yemo yunga imbi naa pilku walu molko we-mélema popo toringi kinia Pulu Yemo yu ono aku siku ulu seko kinjeringima pundu topa ‘Mongo likimili kene mindili nangi.’ naa nirimu, kanopa siye kolopa molorumu. Aku-sipa na-kolo kiniá “Yomboma pali konopu topele toko, molemele mele munduku kelko, molko kondangi.” nikimu. <sup>31</sup> Yuni mana-yomboma pali kote sendepa apurumba wale se nimba taltorumumu wendo ombá kene “Kiniá ono konopu topele taa.” nikimu. Yuni nimba taltorumu ye kanumuni kanu kotemo sumbi sipa sendemba. ‘Yombomane I walemo sika wendo ombá.’ ningu piliangi.’ nimba yuni kanu yemo óno-koleana topa makisinderimu.” nimba Pollone nirimu.

<sup>32</sup> “Yombo se kolkole lomboroko ola molonge.” nirimu kinia ono pilkuli, marene “Kolo tokomo.” ningu ungu-taka tondoringi. Aku-na-kolo marene ninguli: “I ungu sembá nikimu mele walte kelepo piliamili nipili.” niringi. <sup>33</sup> Aku niringi kinia Pollo ono mundupa kelepa yu purumu. <sup>34</sup> Yombo pokore yuni nirimu unguma ‘Sika unguma.’ ningu kuru mondokole Pollo lombili puringi. Se Diyonas, yu Ariopakas kanjollo se; se ambo se, ambomonga imbimu Damaris; yombo mare pea yu lombili puringi.

## 18

18:1-17

*Pollo Kolea-Awili Korini Pumba Serimu Semanemo*

<sup>1</sup> Pe Pollo Atene taono mundupa kelepa kolea-awili Korini purumu.

<sup>2</sup> Korini akuna Juda ye se molorumu, yemonga imbimu Akuwillia. Yunga pulu kolea Pondasi. Yu kinia yunga menu Pirisilla kinia olo kolea Italli poropinji molcole nondoko mele kolea-awili Korini yando ongo molangili Pollo yu pe orumu. Romo koleamanga pali nokorumu ye nokoli kingimuni u nimbale: "Juda yomboma pali kolea-awili Romo munduku kelko pang." nimba panjerimu-kulu oringili. Pollo olo moloringilina pumbale nirimumuni, <sup>3</sup> olo serele-ulka seko mo seringili mele yu aku sipa u sepa mo serimumunga yu olo kinia kopu seko molko kou-mone lingí kongono seringi. <sup>4</sup> 'Juda yomboma kinia Pulu Yemonga ungu pilieringi yombo-lupama kinia onone ,Yesusi yu Pulu Yemone "Ono nokopa kondomba ye se lipu mundumbu." nimba, nimba taltorumu ye nokoli Karasimu molopa, olionga nimba kolondopa, lomboropa ola molorumu mele, 'Paa sika.' ningu pilku kuru mondangi.' nimba Pollo yu ,Juda yombomanga koro moloringi, wale Sambatemanga pali ono maku toko Pulu Yemonga ungumu pilieringi ulkana pumba ono-kinia angelema nimba tondolo mundupa ta nimba nimba sirimu.

<sup>5</sup> Aku-na-koło Saillas kinia Timotitolo kolea Masedonia poropinji munduku kelko kolea-awili Korini oringili kinia Pollo ,serele-ulka kongono serimumu mundupa kelepa,, walemanga pali Juda yomboma ungu nimba sipa tondolo mundupa nimbale: "Yesusi yu Pulu Yemone 'Ono nokopa kondomba ye se lipu mundumbu.' nimba, nimba taltorumu ye nokoli Karasimu." nimba molorumu. <sup>6</sup> Aku-na-koło yuni nirimu mele Juda yombomane pilku naa liku, ungu-taka tondoringi kinia 'Seko kinjikimilimanga nane ono mundupu kelkeru mele kanangi.' nimba yuni yunga wale-pakolina norupulu lierimuna tanda sipa eltopa onondo nimbale: "Ono seko kinjikimilimunga Pulu Yemone ono mindili simu liemu méle onongamo. Nanga ungu se mólo. Onone ungumu pilku mokoli seko "Mólo." nikimilimunga umbuna menge kinia ulu onongamo. 'Ye nokoli Karasimunga ungumu naa pilimulú.' nikimili-na kiniá na ono Juda yomboma mundupu kelepo yombo-lupama molemelena pukuru." nirimu.

<sup>7</sup> Kanu-kinia Pollo Juda yomboma maku toko Pulu Yemonga ungumu pilieringi ulkamo mundupa kelepa ulka se nondopa gilierimuna purumu, kanu ulka pulu yemo, yemonga imbimu Tisias Jasitas, yu Pulu Yemonga imbi ambolopa paka tondorumu yemo. <sup>8</sup> Juda yomboma maku toko Pulu Yemonga ungumu pilieringi ulkamo nokorumu ye nokolimu, yemonga imbimu Kirisipas, yu kinia yunga ulka moloringi yomboma pali Pollone nirimu Ye-Awili ,Yesusi, 'Yu sika ,Pulu Yemone 'Ono nokopa kondomba ye se lipu mundumbu.' nimba u nimba taltorumu ye nokoli Karasimu.,' ningu pilku kuru mondoringi. Korini yomboma Pollone ungu nirimumu pilieringi yombo awisili 'Sika nikimu.' ningu ,konopu topele toko, no liltingi.

<sup>9-10</sup> Walte ipulieli Pollo mongo-indi kaima mele sepa kanorumu kinia Ye-Awilimuni yundu nimbale: "Nu kere pipi siku pipili naa kolou." nirimu. "Nanga yombo molongema awisili i kolea-awilimunga molemelemonga na alieli nu-kinia molombo, yombo sene nu sepa kinjipa mindili manda naa simba. Akumunga nuni alieli nanga ungumu yomboma ningu sieni." nirimu. <sup>11</sup> Akumunga Pollo Korini yomboma Pulu Yemonga ungumu mane sipa molopili kalia-ingi selu oli talo-pakara ombo purumu.

<sup>12</sup> Ye Gallio yu kolea Akaya poropinji Romo gapomano endisi molorumu kinia Juda yomboma Pollo-kinia mumindili kolko maku toko ongo yu ambolko likuli, Gallio molorumuna mengo pungu kote sendeko ninguli: <sup>13</sup> "I yemone olio ,Juda yombomane, ungu-mané pilipu selemolo mele naa nimba, Pulu Yemonga ungu-mané sipa, Pulu Yemo kape nimbu imbi manda ambolopo paka tondomolo mele nilimúmu manda naa selemo." niringi.

<sup>14</sup> Pollone pundu topa ungu se nimbá serimu kinia Gallione Juda yemando nimbale: "I yemone Romo gapomano ungu-mane se pulua tolka molo yombo se sepa kinjilkanje ono Juda yemane kote papu sendelemolá, nane ononga ungumu pilka." <sup>15</sup> Aku-na-kolo onone ononga unguma kinia imbima kinia ungu-manema kinia nilimili puluma akumanga ongo yu kote sendekemelemo manda naa sekemo. Ono onono anju pungu piliangi. Nane i kotemo naa pilimbu." nirimu. <sup>16</sup> Aku nimbale, yuni ono kotena makoropa pena mundorumu. <sup>17</sup> Akumunga, Juda yombo lupamane pali Juda yomboma maku toko Pulu Yemonga ungumu pilieringi ulkamo nokorumu ye nokoli Sotenis ambolko liku, Gallio kanopa molopili yu toringi. Aku-na-kolo Gallio yu aku seringi mele kanopale siye kolorumu.

18:18-22

*Siria Poropinji Sukundu Kolea Andiyoko Kelepa Yando Ombándo (18:18-21) Pollo Kinia Ye Akuwillia Kinia Ambo Pirisilla-tolo Pea Kolea Epesasi Puringi, (18:22) Olo Kolea Epesasi Molangili Pollo Yuyu Kamu Andiyoko Purumu Semanemo*

<sup>18</sup> Pollo wale awisili kolea-awili Korini we molopale nirimumuni, pe Karasinga yombomando nimbale: "Na pukuru. Ono konopu pe nipili molko kondaa." nimbale yu pumba, Sengiria taono nomu kelona pumba, sipina kolea Siria poropinji purumu. Akuwillia kinia Pirisilla-tolo Pollo pea kopu seko puringi. Sipina u naa pumba Sengiria taono we molopale yuni Pulu Yemo kinia "Ulu se paa sika sembó." nimba mi lepale yunga penge-indi ye sendo "Porondou." nirimu. <sup>19-21</sup> Ono Epesasi taono puringi kinia Pollo Juda yomboma maku toko Pulu Yemonga ungumu pilieringi ulkana pumba Juda yomboma kinia ungu awisili angelema niringi. Onone yundu "Wale pokore pea molamili." niringi-na-kolo ono niringi mele naa pilierimu. Aku-na-kolo pumbá sepa onondo nimbale: "Pulu Yemone "Pu." nimu liemu walte kelepo yando ombó." nimba "Ono molaa." nimbale nirimumuni, Akuwillia kinia Pirisilla-tolo Epesasi taonona molangili mundupa kelepa sipina yu purumu.

<sup>22</sup> Sipimu pumba kolea-awili Sisaria lierimu kinia Pollo mania pumbale, Karasinga yombo talape „kolea-awili Jerusalleme, moloringina olando pumba "Ono manda molemeleye?" nimbale, kelepa „kolea-awili Sisaria maniendo ombo sipi senga, kolea-awili Andiyokondo kamu purumu.

18:23—21:17

## **Pollo Wale Yopoko-Sipa Yesusinga Ungumu Nimba Silipa Andorumu Semanemo**

18:23

*Pollo Wale Yopoko-Sipa Pulu Polopa Ye-Awilimunga Ungumu Nimba Silipa Andombando Kelepa Purumu Semanemo*

<sup>23</sup> Kolea-awili Andiyoko molopili wale awisili ombo purumu kinia pe yu kelepa kolea-awili Andiyoko mundupa kelepa, kolea Gallesia poropinji kinia Pirisia poropin-jitolonga pumba aku koleatolonga lierimu koleamanga pali andopa "Yesusinga lombili andoli yomboma yunga ungumu komu naa sindiku, siye naa kolko mimi siku pilku molaa." nimba, nimba silipa purumu.

18:24—19:1

### *Ye Apollosinga Semanemo*

<sup>24</sup> Juda ye senga imbi Apollos, kanu yemonga pulu kolea Allekesandia, yu Epesasi taono orumu. Yu ungu paa nimba kondopa, Pulu Yemonga bokuna molemo unguma pali pilierimu yemo. <sup>25</sup> Ye-Awilimuni yomboma molko kondongendo senge aulkamo akisinderimu mele u yu mane siringi pilipale, Yesusinga semanemo yomboma sumbi sipa topa sipa, paa tondolo mundupa nirimu, aku-na-kolo yu No Lindeli Jonone yomboma no lindimbando mane sirimu mele mindi pilipale mane sirimu. <sup>26</sup> Apollos

yu Epesasi taono ombale, Juda yomboma maku toko Pulu Yemonga ungumu pilieringiulkana pulu polopa ungumu nimba simbando pipili naa kolopa tondolo mundupa nirimu. Akuwillia kinia Pirisilla-tolo yu ungu nirimu mele pilkuli olonga ulkana mengo pungu, Pulu Yemone yomboma lipa tapondopa paa mindili naa nongo molko kondonge aulkamo akisinderimu mele pali kamu mimi siku ningu siringili.

<sup>27</sup> Pe Apollos “Na kolea Akaya poropinji pambo.” nirimu kinia Karasinga yombo Epesasi taonona moloringimane yundu ninguli: “Papu nikinu. Nu Karasinga kongono kolea Akaya poropinji pungu se-pani.” ningu, ‘Yesusinga lombili andoli yombo kolea Akaya moloringimane yu kanoko imbi sikuli ‘Pea molamili.’ niengi.’ ningu pepá toko siringi. Yu pepámo memba kolea Akaya poropinji pumbale nirimumuni, Pulu Yemone we kondo kolorumumunga Ye-Awili Yesusinga ungumu ‘Sika.’ ningu kuru mondoko Karasinga yomboma moloringima Apollosini ono paa lipa tapondoramu. <sup>28</sup> Yomboma kanoko molangi Apollos tondolo mundupa, Juda yombo “Yesusinga ungumu nikimili akumu kolo tokomele.” niringima kinia yu-kinia angelema niringi, Yesusi yu sika Pulu Yemone “Ono nokopa kondomba ye se lipu mundumbu.” nimba, nimba taltorumu ye nokoli Karasimu molorumu Pulu Yemonga bokuna nimba molorumu mele mimi sipa lipa ora sipa mane sirimu.

## 19

19:1—20:1

*Pollo Epesasi Taono Pumba Serimu Semanemo*  
19:1-7

*No Lindeli Jononga Ungumu Pilku No Lilttingi Ye Epesasi Taonona Moloringima-Kinia Pollone Serimu Mele Semanemo*

<sup>1</sup> Ye Apollos kolea Akaya poropinji pumba akumunga kolea-awili Korini molopili, Pollo ma-pangi aulkana pumba Epesasi taono maniando purumu. Akuna pumbale Yesusinga lombili andoli yombo mare kanorumu. <sup>2</sup> Kanopale nirimumuni, ono mangilipa nimbale: “Onone ungumu pilieringi mele ‘Sika.’ ningu kuru mondokole Mini Kake Sélimu lilttingi molo móloye?” nirimu.

Onone pundu toko ninguli: “Mólo, Mini Kake Séli se molemo mele olio naa pilielemolo.” niringi.

<sup>3</sup> Aku niringi-kulu pilipale Pollone onondo nimbale: “Aku liemu ono no nambi seko lilttingiye?” nirimu.

Onone ninguli: “Jonone nirimu unguma pilipuli no liltimulu.” niringi.

<sup>4</sup> Pollone nimbale: “Jonone yombomando nimbale: “Ulu-pulu-kirima munduku kelko konopu topele toko no liee.” nirimu-na-kolo i ungumu mindi naa nirimu. Ungu se pea nimbale: “Akilepa ombá ye Yesusi ‘Yu sika „Pulu Yemone ono lipa tapondopa nokopa kondomba ye lipa mundorumu yemo..’ ningu kuru mondangi.” nirimu.” nimba Pollone nirimu. <sup>5</sup> Aku sipa nirimu mele pilkuli, ono “Ye-Awili Yesusinga yomboma molomolo.” ningu Yesusinga imbi leko mangilku no lilttingi. <sup>6</sup> Kanu-kinia Pollone ononga „penge„na ambolorumu kinia ono moloringina Mini Kake Sélimu orumu kinia onone umbu-ungu lupa lupa naa pilieringima leko, Ye-Awilimuni ungu-umbu tondorumuma pilku yomboma ningu siringi. <sup>7</sup> Aku seringi ye rurepo mele moloringi.

19:8-10

*Pollone Epesasi Yombomando Ye-Awili Yesusinga Ungumu Nimba, Ono-Kinia Angelema Niringi Semanemo*

<sup>8</sup> Pollo Epesasi molopale nirimumuni, Juda yomboma maku toko Pulu Yemonga ungumu pilieringi ulkana pumba, Pulu Yemo ye nokoli kingimu molopa mélema pali nokomba mele pipili naa kolopa tondolo mundupa nimba sirimu. ‘Ono paa

pilku ‘Sika.’ niengi.’ nimba oli yopoko aku sipa nimba sipa molorumu. <sup>9</sup> Aku-nakolo Juda yombo mare karaye seko ungu pilku mokoli seko, “Ungu imu kolo tokomo naa pilimulú.” ningu, yomboma pilku molangi “I Pollone ungu nikimuma nimba kinjikimu.” ningu ungu-taka tondoringi. Aku seringi-kulu Pollone ono mundupa kelepa purumu. Yesusinga lombili andoli yomboma lipa memba pumba, Tiranasini ungu ningu si-pu-pu seringi ulka nokorumu kanuna memba purumu, akuna alieli angelema ningu moloringi. <sup>10</sup> Aku seko molangi kalia-ingi talo omba purumu kinia Juda yomboma kepe yombo-lupa kolea Esia poropinji moloringima pali Ye-Awilimunga ungumu pilieringi.

**19:11-12**

*Pulu Yemone Pollo Lipa Tapondoru Kinia Pollone Ulu-Tondoloma Serimu Semanemo*

<sup>11</sup> Pulu Yemone Pollo lipa tapondoru kinia ulu-tondolo paa lupa mele mare serimu. <sup>12</sup> Pollo kongono sembando mulu-maminia panjerimuma yomboma sirimu kinia liku mengo pungu kuru torumu yomboma simbi tondoringi kinia ononga kuru torumuma pora nimba, ononga konopumanga kuru moloringima ongo wendo puringi.

**19:13-20**

*Sipa Malopili-Kinia Ungu Se Wendo Orumu Kanokole Kuru Ala Toringi Yemane Seringi Semanemo*

<sup>13</sup> Juda ye mare andoko yombomanga konopumanga kuruma toko makoroko “Wendo paa.” ningu kou-kongono andoko seringi. Ono mare Ye-Awili Yesusinga imbi leko mangilku kuruma ‘Ongo wendo paa.’ ningíndu i-siku niringi: “Pollone ungu-mane silimú ye Yesusinga imbi lepo mangilipuli ‘Ono ongo wendo paa.’ nikimulu.” niringi. <sup>14</sup> Ye Sipa yunga malopili yopoko-pakara aku siku seringi. Sipa yu Pulu Yemo popo tondoringi yemanga ye awili se. Aku yemonga malopilini aku siku Yesusinga imbi leko mangilku kurumando “Ongo wendo paa!” niringi kinia <sup>15-16</sup> kurumane pundu toko ninguli: “Olio Yesusi kanopo imbi silimulu. Pollo kanolemolo. Aku-nakolo ono namele?” niringi kinia kuru konopuna molorumu yemone ono moloringina pukua topa pumba ononga mulu-maminiam ambolopa sungu-mangu sindipa ono paa torumu-na kanu ulkamo munduku kelko mulu-maminia se naa pakoko meme pakoko we-we kowa puringi.

<sup>17</sup> Pe Epesasi taonona moloringi Juda yomboma kinia yombo-lupama kinia aku ulu wendo orumumu pilkuli ono mini-wale munduku, Ye-Awili Yesusinga imbimu ambolko paka tondoko yu kape niringi. <sup>18</sup> Akumunga, yombo awisili u Yesusi ‘Yu sika.’ ningu kuru mondoringima kanu ulumu wendo orumu kinia ongo u ulu-kiri seringima ningu para siringi. <sup>19</sup> Aku siku seringimanga yombo mare u kuru-ala toko seko kinjeringi kanu yombomane yomboma kanoko molangi ononga ala toringi bokuma pali sepena kaloringi. Boku kaloringimanga kou-mone purumu mele kou-sillipa pipiti tausini mele purumu. <sup>20</sup> Aku sipa mele Ye-Awilimunga ungumunga tondolomone kanu ulu-kirima topa mania mundorumu-kulu ungumu enge nimba koleamanga pali para-nanga lepa pumba manda serimu.

**19:21—20:1**

*(19:21-22) Pollone “Jerusalleme Pambo.” Konopu Lepale U Epesasi We Molorumu Kinia (19:23—20:1) Kolo Toli Pulu Ambo Atemis Popo Toringi Yombomane Epesasi Taono Maku Toko Seko Kinjeringi Mele Semanemo*

<sup>21</sup> Kanu uluma pali u seringi kinia pe Pollo konopumuni pilipale ‘Kolea Masedonia poropinji pumbu kolea Akaya poropinji pumbuli, kolea-awili Jerusalleme pumbú. Jerusalleme pumbuli, pe kolea-awili Romo pumbú.’ konopu lierimu. <sup>22</sup> Pollo yu liku

tapondoringi yemanga Timoti kinia Erasitasitolo “Kolea Masedonia pale.” nimba lipa mundupale yu wale mare kolea Esia poropinji we molorumu.

<sup>23</sup> Aku walemanga Epesasi taono kanuna Ye-Awilimunga semane peangamo toko siringimunga umbuna awili se wendo orumu. Wendo orumu mele i-sipa: <sup>24</sup> Ye se, yunga imbi Demitias, yuni topo-ropo tombando yomboma popo toringi pulu ambo kolo toli Atemis none seli mélema kou-sillipane sepa wamopa talorumu. Yomboma kanu none selima ononga ulkamanga anjiku popo tongendo kou-mone siku liltingimunga Demitias kou-mone awisili lipa yunga kongono senderengi yema méle awisili kalorumu. <sup>25</sup> Kanu yemone yunga kongono senderengi yema kinia Atemisinga kongono lupama senderengi yema kinia “Ono waa.” nimba, lipa maku topa nimbale: “Yema, topo-ropo tomolondo pulu ambo Atemisinga kongono sendelemolomonga kou-mone paa olandopa limulú. <sup>26</sup> Aku ye Pollone ungu nilimúmuni yombo awisili kondi topa anju limú mele ono pilku kanolemele. Yuni nimbale: “I kini selemele pulu yomboma kolo toko selemele.” nilimú ungumu Epesasi taono yomboma kinia kolea Esia poropinji pali kepe yomboma pilku liku yu lombili pulimili. <sup>27</sup> Yuni nilimú ungumuni olianga kou-mone topo-ropo toli kongonomo mindi topa mania naa mundumba. Pulu ambo Atemis molemo popo tolemolo tamandu ulkamo kepe yombomane “Akumu unguri mólo.” ningi kanoko kiri pilingí. Atemis yu kepe yunga imbi paa ola molemomo topa mania mundundumba sekemo. Pollone kanu semanemo we topa molomu liemu kolea Esia poropinji kepe we-koleamanga pali kepe i pulu ambomo popo toko imbi ambolko paka tondolemele mele munduku kelenge lémo.” nirimu.

<sup>28</sup> Onone kanu ungumu pilkuli paa mumindili kolkole ru ningi ninguli: “Olio Epesasi yombomanga pulu ambo Atemis paa awili olandopamo molemo.” nirangi. <sup>29</sup> Aku nirangi kinia yomboma pali ru ningi kalkarukumba leko sukundu sukundu lisiku ongo maku tokole, Gayasi kinia Arisitakasitolo ambolko liku mengo pungu, ononga maku toringi koleana purringi. Kanu yetolo olo kolea Masedonia poropinji yetolo, Pollo kinia pea kopu seko andoringi. <sup>30</sup> Pollo ono maku toringina ungu nimbá pumbá serimu-na-koło Yesusinga lombili andoli yombomane “Mólo.” nirangi. <sup>31</sup> Kolea Esia poropinji ye nokoli mare Pollo kinia koni lieringimane kepe ningi munduku ninguli: “Pollo nu maku tokomelena paa naa pu.” nirangi.

<sup>32</sup> Maku toringi yomboma konopu naa pepa bulu-balú nirimu. Onone ru ningi, ungu lupa lupa nirangi. Yombo awisilini ono maku toringimunga pulumu naa pilieringi. <sup>33</sup> Juda yombomane ononga ye nokoli Allekesanda yombo moloringina suku-singina liku mundoringi. Kanu-kinia yu “Ungu se niembo.” nimba ki ola mundupa, ungu se nimbá serimu. <sup>34</sup> Aku-na-koło onone yu, Atemis popo naa torumu, Juda ye se ningi kanokole ono ru ningi ninguli: “Atemis yu olio Epesasi yomboma nokolemo pulu ambo awilimu.” ningi molangi ena mongo talo ombo purumu.

<sup>35</sup> Kanu-kinia Epesasi taono kusikus yemo ola gilipa “Ungu naa niee!” nirimu. Yomboma taka leko moloringi kinia yuni nimbale: “Epesasi ye nameleye, olio kolea Epesasi yombomane pulu ambo awili Atemis molemo tamandu ulka olianga taonona gilimúmu kinia akuna yu none seli kou-muluna mania orumu kou akuna gilimutolo olione nokolemolo, yombo nawene naa kanolemoye? <sup>36</sup> Akumunga, yombo sene “Kolo tokomele.” manda naa ningí kene ono taka leko molko ulu se popenge seko naa sangi. <sup>37</sup> Andi ye mengo ongitolone ulu se seko naa kinjiku, olianga pulu ambomo ungu-taka tondoko yunga tamandu ulkamonga mélse wa naa língili-na-koło we mengo ongi. <sup>38</sup> Demitias kinia yunga kongono yema kinia ono yombo se kinia ungu se pemu liemu manda, kote wale se wendo ombá kinia kote sendangi, gapomano ye awili endisimane kotena manda liku sumbi sindingí. <sup>39</sup> Ungu se lupa ningí liemu yombo maku tongue wale senga ningi sumbi siengi. <sup>40</sup> Kiniá we maku toko opa

seko ungu awisili angelema ningu ru nikimilimunga olio mongo pemba. Endisimane olio kiniá ulu sekemolomonga kote sendelemolánje olio kotena ungu se pundu topo nimulú aulka se naa lelka. Sekemolomonga pulu se naa pekemo.” nirimu. <sup>41</sup> Aku nimbale, taono kusikusimuni yombomando “Yu-mele-mele paa.” nirimu kinia pilku liku puringi.

## 20

20:1-6

*Pollo Kolea Masedonia Kinia Akaya Poropinjitolonga Andopale Kolea Esia Poropinji Kelepa Yando Orumu Semanemo*

<sup>1</sup> Epesasi taono yomboma ungu awisili ningu Pollo-kinia mumindili koloringi mele pora nirimu kinia Pollone Yesusinga lombili andoli yomboma “Waa.” nimba, ono nimba mundupale nirimunumi, ‘Ono ononga konopu enge nipili molko kondangi.’ nimba ungu mare nimba sipale, “Ono molaa.” nimba yu Epesasi taono mundupa kelepa kolea Masedonia poropinji pumbá purumu.

<sup>2</sup> Kanu koleana andopa ‘Konopu enge nipili molko kondangi.’ nimba yomboma ungu nimba silipa pumbale, kolea Akaya poropinji sukundu pumba, <sup>3</sup> akuna oli yopoko molorumu. Yu kelepa kolea-awili Andiyoko taono yando ombándo ‘Kolea Siria pambo.’ nimba sipina pumbá serimu-na-colo Juda yombomane “Yu topo kondamili.” ningu langi niringi pilipale, yu ‘Kolea Masedonia poropinji kelepo yando pambo.’ nirimu. <sup>4</sup> Yu pea kopu seko puringi yemanga imbima i-sipa: Beria taono molorumu ye Pirasi malo Sopata kinia, Tesallonaika taono molorumu ye Arisitakas Sekandasitolo kinia, Depi taono molorumu ye Gayasi kinia, akuma pea pungu, Timoti kinia kepe, kolea Esia poropinji ye Tikikas Toropimasitolo kepe, aku yema Pollo kinia pea kopu seko puringi. <sup>5</sup> Olio Pillipai taono molamili ono kumbi leko pungu Toroas taono punguli olio nokoko moloringi. <sup>6</sup> Juda yombomane kalia-ingi senga senga kolea-awili Jerusalleme pungu akuna sukundu Pulu Yemone ononga anda-kolepalima Naa Topa We Ombo Purumu mele pilieringi walema, akumu imbi leko, ‘Pellawa Akoli Méle Isimu Naa Munduku Pellawa We Kalko Noringi Walema’ niringila, aku walema ombo purumu kinia olio kolea-awili Pillipai mundupu kelepo sipina pumbu molamili wale se-pakara ombo purumu kinia Toroas wendo pumbu, ye u kumbi leko puringima akuna kanopo lipu koro se ono kinia pea kopu sepo Toroas molorumulu.

20:7-12

*Pollone Kolea Toroas Taono Kango-Ye Yutikas Kolorumu Topa Makisinderimu Semanemo*

<sup>7</sup> „Sambate walemo ombo pumba,“ koro konde senga pulu-pulu kongono-walemo wendo orumu kinia, olio Yesusinga lombili andoli yomboma pea kere-langí nombo Yesusingi “Pilku nangi.” nirimu mele pilipu nombo kopu sepo molomolondo maku torumulu. Pollone yomboma ungu-mane sirimu. Yu ‘Opali pumbú.’ nimba yomboma ungu-mane sipa molopili kolea awi-amburumi lierimu. <sup>8-9</sup> Olio ulka olakondo polo yopoko-sipamonga suluminiana maku torumuluna sepe-llame awisili kandopo taltopo molorumulu. Akuna kango-ye se molorumu, yunga imbi Yutikas. Yu ‘Ulka pa sepili.’ ningu suru toringina ola molorumu. Pollo we ungu nimba mindi molorumu kinia Yutikas yu uruni sumbili-tambili nirimu-kulu yu kamu uru perimu kinia topa ulka sumbiliana mania mundorumu. Yu lingí pungu kanoringi kinia yu u kolopa pora sirimu. <sup>10</sup> Pollo mania pumba kango-ónomo lierimuna pumba tamalu pepa kangulupa onondo nimbale: “Ono mini-wale naa munda. Yu we konde molemo.” nirimu.

<sup>11</sup> Aku sepale kelepa kisipina olando pumba, ono kinia kere-langí liku nongole, kelko ungu ningu molangi kolea tangorumu kinia yu purumu. <sup>12</sup> Ye-kango kolorumu

kanumu yu kelepaconde molorumu-kulu ono paa konopu peanga pepili yu konopu siku mengo puringi.

*20:13-17*

*Pollo Kolea Mallitasi Taono Purumu Semanemo*

<sup>13</sup> Pollo Toroas taonona we molopili olio sipina Asosi taono kumbi lepo purumulu. Pollone “Na kolea Asosi nendo mania-aulka ombó.” nirimu-kulu olio kumbi lepo pumbuli ‘Yu kolea Asosi ombá kinia sipina pea pamili.’ nimbu nokopo molorumulu. <sup>14</sup> Pe Pollo kolea Asosi orumu kinia kanopo lipu yu pea sipina pumbu Mitillini taono pumbu pepo, <sup>15</sup> orili-u anju pumbu, kolea Kiosi purumulu kinia ipu lierimu. Pumbu molamili kolea tangorumu. Kelepo kolea Semosi purumulu kinia kelepa ipu lierimu. Pumbu molamili kolea tangorumu kinia pumbu Maillitas taono purumulu. <sup>16</sup> Pollo ‘Sumbi sipu kolea-awili Jerusalleme pumbu, Pendikosi walemo u wendo naa opili na akuna sukundu pumbú.’ konopu lepale, ‘Kolea Esia poropinji pumbú kinia walema we pora nimbá kinia manda naa pumbú.’ konopu lepa ‘Epesasi taono mundupu kelepo Jerusalleme sumbi sipu pumbú.’ konopu lierimu.

*20:17—21:1*

*Pollone Epesasi Karasinga Yombomanga Tapu-Yemando “Na Kamu Pukuru. Ono Molaa.” Nirimu Semanemo*

<sup>17</sup> Pollone ‘Epesasi naa pumbú.’ konopu lepale nirimumuni, kolea Maillitas molorumulu kinia Pollone Epesasi taono Karasinga yombo talape moloringimanga tapu-yemando nimba mundupale “Na moliona waa.” nirimu. <sup>18</sup> Kanu-kinia ono yu molorumuna oringi kinia yuni onondo nimbale:

“Na kolea Esia poropinji u-pulu-pulu ombo, akuna sukundu koleamanga pali andopole kongono sepo ulu serindu mele ono kanoko pilku, kiniá selio mele pilielemene. <sup>19</sup> Kolea Esia poropinji sukundu lemó koleamanga semane peangamo topo silipu andoruntu kinia Juda yombomane nanga kongonomo alieli seko kinjindiku pipi singí seringi akumunga na umbuna awisili membo mindili norundu-na-koło nanga imbimu ambolopo paka naa topo, Ye-Awlimunga kongonomo taka lepo sendepole ‘Ungumu paa piliangi.’ nimbu kolama om̄ba mania-mania pupili aku kongonomo sepo molorundu. <sup>20</sup> ‘Ono semane peangamo topo simbundu mundupu naa keleambo.’ nimbu, ‘Ono lipu tapondambo.’ nimbu semane peangamo pipili naa kolopo topo silipu andopo, maku toringimanga kepe ononga ūlkamanga kepe ono unguma pali mane sirindu kanumu ono kanoko pilielemene. <sup>21</sup> Juda yomboma kinia yombo-lupama kinia tondolo mundupu nimbili: “Ulu-pulu-kirima munduku kelko, konopu topele toko Pulu Yemo molemona pungu, olionga Ye-Awili Yesusi molopa senderimu molemo mele ‘Yu sika.’ ningu kuru mondoko molangi.” nimbu alieli ono nimbu silipu andoruntu kanumu.

<sup>22</sup> “Akumunga kiniá Minimuni ka mele sipa lipa mundukumu-na na Jerusallemando pukuru. Na Jerusalleme pumbú kinia nambolka uluri kamu wendo ombánje naa pilkiru, <sup>23</sup> aku-na-koło koleamanga pali andolio kinia Mini Kake Sélimuni unguma tondolo mundupa na nimba silimú mele i-sipa: “Nu ka-ulkana peko mindili noni.” nilimú akumu mindi pilielio. <sup>24</sup> Aku-sipa na-koło ‘na molopo kondopo, mindili naa nombo, na naa kolambo.’ nimbu kele topo ulu se manda naa selio. ‘Ye-Awili Yesusini na kongono sirimu kongonomo sepo lipuli mindi na konopu simbú.’ nimbu pilipu molio. Kanu kongonomo i-sipa: Pulu Yemone olio mana-yomboma we kondo kololemo mele semane peangamo topo siliu kanumu.

<sup>25</sup> “Manda, na kelepo ungu se nimbú sekero. Nane u ononga koleamanga andopole Pulu Yemo ye nokoli kingimu molopa mélema nokolemo nokomba mele ono nimbu sirindu pilieringi yombomanga selurini kepe na kelko naa kanonge. <sup>26</sup> Aku sembamonga nane kiniá ono sika i nimbu sikiru: “Yombomanga se molopa kinjipa

kolea-kirina pumu liemu nanga ulu se mólo, yu ungu pilipa mokoli sembamonga pumbá.” nikiru. <sup>27</sup> Nane ono pilku molangi Pulu Yemone “Sembó.” nimba panjerimu mele uluma pali ‘Mundupu naa keleambo.’ nimbu pipili naa kolopo sumbi sipu ono nimbu sirindu kanumu. <sup>28</sup> Mini Kake Sélimuni ono tapu-yema nimba taltopa ‘Kongi sipisipi nokangi.’ nirimu sipisipima nokoko kondoko, ono onono nokoko kondangi. Pulu Yemone yunga meme ondondorumumuni ono liltimu Pulu Yemo yunga yombo talape molemelemanga tapu-ye peangama molangi.

<sup>29</sup> “Na pilkirumu ono mundupu kelepo pumbú kinia ono molongena owá-palako paa kirima ongo Yesusinga kongi sipisipima toko bulu-balu singí lémo. <sup>30</sup> Ononga yombo mare kepe pe unguma topele toko kolo toko, Yesusinga lombili andoli yombo mare kondi toko ‘Olio lombili waa.’ ningu aku senge. <sup>31</sup> Aku sipa uluma wendo ombá kene ono alieli nokoko kondoko molayo. Ono pilku molonge mele i-sipa: Nane ‘I unguma piliangi.’ nimbu ipuliel tangoli enamanga pali kolama ombo mania-mania pupili tondolo mundupu ono lipu tapondopo liepi-liepi topo nimbu sipu, walte kepe siye naa kolopo, we nimbu molambo kalia-ingi yopoko pora nikimu. Aku sipu serindu mele pilku komu naa siku, nimbu sirindu unguma paa pilku molangi.

<sup>32</sup> “Kiniá ono Pulu Yemonga kína lipu mondopo, ‘Pulu Yemone we kondo kololi ungu ,ono nimbu sirindu, akumane ono enge sipa, Pulu Yemone ‘nanga yombo manjiku molko, yombo kake selima molangi’ nilimú yomboma yu méle peangama simba kinia ono aku sipa simba lingí, aku we kondo kololi ungumu ono-kinia pepili.’ nimbu nikiru.

<sup>33</sup> “Na yombomanga kou-mone gollo sillipama kinia mulu-maminia mélemanga se kanopo yama naa panjerindu. <sup>34</sup> Na kinia, na pea kopu sepo andorumulu yomboma kinia, olio mélema mólo torumu kinia nanga kitolone enge nimbu kongono sepo mélema lipuli lipu tapondorundu. <sup>35</sup> ‘Nanga kongonoma pali ono aku siku sangi.’ nimbu, lipu ora sirindu. Olione aku sipu sepole pange seli yomboma lipu tapondopo tondolo mundupu samili. Ye-Awili Yesusingi nirimu mele pilku molangi. Yesusi yuni nimbale: “Yombo sene yombo se lipa tapondopa mélema sipale konopu silimú mele olandopa; yu yuyu mélema lipale konopu silimú mele maniadopa.” nirimu.” nimba Pollone nirimu.

<sup>36</sup> Aku unguma nimba pora sipale nirimumuni, yu Epesasi tapu-yema kinia komorongo langopa ononga nimba Pulu Yemo-kinia ungu nimba mawa senderimu. <sup>37</sup> Kanu-kinia ono pali kola seko Pollo kangulku kondo koloringi. <sup>38</sup> Ono kameléna mindili awili sepa sepili moloringi. Pollone “Na kelko naa kanonge.” u nirimu akumu pilkuli ono aku siku mindili koloringi. Kanu-kinia yu liku mengo sipina pungu mundu-puringi.

## 21

<sup>1</sup> Epesasi taono tapu-yemando “Olio pukumulu kene ono molaa.” nimbili kameléna mindili sepa pepili ono mundupu kelepo sipina purumulu.

21:1-17

### *Pollo Jerusalleme Kamu Purumu Semanemo*

Sipina pumbuli, kolea Maillitas mundupu kelepo wale senga sumbi sipu purumulu. Kolea Kosi pumbu, orili-u Kosi mundupu kelepo kolea Rosi pumbu, orili-u Rosi mundupu kelepo kolea Patarando purumulu.

<sup>2</sup> Patarando pumbuli nirimulumuni, sipi se kolea Pinisia poropinji lemó kolea-awili Taya pumbá serimu-na kanopole akuna ola purumulu. <sup>3</sup> Nomuna purumulu kinia kolea Saiporas ki-tarokondo lierimu kanopo mundupu kelepo ombo pumbu, kolea Siria poropinji pumbu, kolea-awili Taya purumulu kinia ‘Sipina meringi mélema mania liengi.’ nimbu olio we nokopo molorumulu.

<sup>4</sup> Akuna Yesusinga lombili andoli yombo mare moloringi kanopole ono pea koro selu molorumulu. Mini Kake Sélimuni ono tondolo sirimumuni onone Pollondo "Jerusalleme kelko paa naa pu." ningu ta niringi. <sup>5</sup> Aku niringi-na-kolo walema pora nirimu kinia "Olio pukumulu." nimbu pumulú serimulu. Karasinga yema kinia ononga ambo bolangoma kinia kopu sepo ombo taonona ultu pumbu nomu kelona mundu-puringi kinia no kelona komorongo langopo mania molopo Pulu Yemo kinia ungu nirimulu. <sup>6</sup> Kanu-kinia oliondo "Paa." niringi kinia olione "Ono molaa." nimbu sipina ombo sukundu purumulu kinia ono kelko ulkando puringi.

21:7-14

### *Pollo Jerusalleme Pumbando Sipina Sisaria Purumu Kinia Ye Akapasini Yundu Ungu Se Nirimu Semanemo*

<sup>7</sup> Sipina kolea-awili Taya mundupu kelepo Tollemesi taono purumulu. Akuna Karasinga yomboma moloringina pumbuli, kangulupu "Ono molongi lémo." nimbu wale se ono kinia molorumulu. <sup>8</sup> Orili-ukundu Tollemesi taono mundupu kelepo kolea-awili Sisaria pumbu sipina kamu mania pumbuli, semane peangamo andopa topa sili ye Pillipunga ulkana pumbu molorumulu. U Jerusalleme liku tapondoli, ye yopoko-pakara, ningu taltoringi, yemanga se yu. <sup>9</sup> Pillipu lemenupili ambo-wenepo kise moloringi, kanu ambo-wenepoma Ye-Awilimuni ungu-umbu tondorumuma pilku yomboma ningu sili ambo-wenepoma moloringi.

<sup>10</sup> Olio kolea-awili Sisaria wale mare molorumulu kinia Ye-Awilimuni ungu-umbu tondorumuma pilipa yando nimba sirimu ye se, yemonga imbi Akapas, yu kolea Judia disiriki molopale Sisaria maniendo orumu. <sup>11</sup> Olio molorumuluna omba Pollonga kako torumumu posipa lipa yunga kimbu kima yuyu ka topa nimbale: "Mini Kake Sélimuni nimbale: "Jerusalleme molemele Juda yombomane i kako pulu yemo ambolko liku i-siku ka toko mengo pungu Juda yombo naa molemele yombo-lupama singí." nikimu." nirimu.

<sup>12</sup> Aku sipa nirimu-kulu olio pilipuli olio kinia akuna moloringi yomboma kinia olione Pollondo paa tondolo mundupu nimbili: "Nu Jerusalleme olando paa naa pu." nirimulu.

<sup>13</sup> Aku-na-kolo Pollone pundu topa nimbale: "Ono nambi semu-na nanga konopu toko sembambu sindiku kola sekemeleye? Na Jerusalleme pumbú kinia ka síngi liemu unguri mólo. Molo Ye-Awili Yesusinga imbimu ambolopo paka tondoliomonga kamu toko kondongi liemu unguri mólolá. Kowa naa pumbú." nirimu. <sup>14</sup> Ta nimbu "Paa mólo. Naa pu." nimbu molorumulu-na-kolo olionga ungu nirimulumá karaye sepa naa pilierimu-kulu kanopole olione nimbili: "Aku manda. Ye-Awilimuni pilipale 'Wendo opili.' nimbá mele wendo opili." nimbu siye kolorumulu.

21:15—26:32

### **Kolea Judia Disirikina Jerusalleme Kinia Sisaria Kinia Pollo Ka-Ulkana Perimu Kinia Wale Mare Kote Pilieringi Semanema**

21:15—23:33

#### *Pollo Jerusalleme Purumu Yu Ka Siringi Kinia Ulu Mare Wendo Orumu Semanemo*

<sup>15</sup> Wale pokore Sisaria molopole nirimulumuni, olionga mélema lipu undu-undu sipu molopole, pe Jerusalleme olando purumulu. <sup>16</sup> Jerusalleme pumulú purumulu kinia, Yesusinga lombili andoli Sisaria yombo mare pea kopu sepo pumbu, Nesononga ulkana olio pungu mundu-puringi. Nesono yu kolea Saiporas ye se, yu koronga-u Yesusinga lombili andoli yemo molorumu. U ningu panjiku 'Yunga ulkana pemolo.' niringi.

21:17-26

*Pollo Jerusalleme Kamu Pumbale Karasinga Yombomanga Tapu-Yema Yu Serimu Mele Nimba Sirimu Semanemo*

<sup>17</sup> Jerusalleme kamu sukundu purumulu kinia Karasinga yombomane konopu siku "Papu okomele." niringi.

<sup>18</sup> Orili-ukundu Pollo keme olio Jemisi kanomolo purumulu kinia tapu-yema pali yu-kinia moloringi. <sup>19</sup> Pollone "Ono molongiye?" nimbale Pollo yu Juda yomboma mundupa kelepa yombo-lupama moloringina andopa kongono serimu kinia Pulu Yemone yu lipa tapondopa serimu uluma pali ono semane topa sirimu.

<sup>20</sup> Yuni aku sipa nirimu pilkuli ono Pulu Yemo kape niringi. Aku sekole Pollondo ninguli: "Ango, Juda yombo tausini awisili 'Yesusi yu sika ,olio nokopa kondomba ye nokoli Karasimu.' ningu kuru mondoko ,yunga yomboma molemele, nu kanoleno. Mosisini ungu-mané sirimuna 'Paa pilipu samili.' ningu molemele mele nu kanolenola. <sup>21</sup> Aku-na-kolo Juda ye marene ongole nu seleno mele olionga Juda yombo Karasi pilieli yombomando ningu siringi ono pilku kiri pilku molemele. Nuni seleno mele ongo niringi mele i-sipa: "Juda yomboma yombo-lupama kinia molemele yombomane Mosisini ungu-mané sirimuna naa pilku munduku kelko, ononga kangomanga kangi se kopisiku makaye seko naa eltondoko, olio Juda yombomanga ulu-puluma naa sangi." ningu nuni aku siku nilinu nilimili. <sup>22</sup> Ono pilku kiri pilku molemele akumunga olio nambi samiliye? Nu yando onu mele ono sika pilingí. Nu kanoko kiri pilingí kene <sup>23</sup> olione "Nu sei." nimulú mele sani. Olio-kinia ye kise molemele akumane 'Pulu Yemo kinia wale marenga ulu mare semolo.' ningu mi leko ningu panjeringi. <sup>24</sup> Aku yema nu kinia pea kopu seko punguli, ononga mi lieringi walema pora nimbando nu kinia pea Pulu Yemone ono kake sepili molonge kanomba uluma seko, ononga penge porondonge kinia nuni koumone sindani. Aku sení kinia yombomane kanokole, 'Nu kepe Mosinga ungu-manema pilku seko moleno, nuni ulu mare seko kinjilinu niringi semanemo kolo toko bulkundu nindingi lémo.' ningu kanonge. <sup>25</sup> Aku-sipa na-kolo Juda yombomanga ultukundu yomboma 'Yesusi yu sika ,ye nokoli Karasimu.' ningu kuru mondoko ,yunga yomboma molemele,mane senge mele pepá se u topo sirimulu kanumu. Aku pepána "Saa." nirimulu mele i-sipa: "Unju kou mélema liku anjiku "Olionga pulu yomboma." ninguli popo toko kere-langi kalko silimili kere-langima 'Kalaro mololi kere-langima.' ningu naa nongo, mélemanga memema naa nongo, kongi kepe mélema 'Meme naa omba pupili.' ningu nomi kolomongo naa sengema naa nongo, wa ulu-kirinale naa sangi. Ulu akuma naa senge kinia aku papu." nimbu aku sipu pepá torumulu kanumu." niringi.

<sup>26</sup> Kanu-kinia orili-ukundu tapu-yemane "Sei." niringi mele sembando Pollone ye kise kanuma lipa memba pumbale, ono pea Pulu Yemone kake sepili molonge kanomba uluma seringi. Yu aku sepale, 'Pulu Yemo popo toko kaloringi, ulka-tembelena sukundu pumbale 'Olio kake sepili molomolo uluma sepo molomolo walema pora nimbá mele nimbu sipu Pulu Yemo popo topo kalomolo mélema nane simbú walemo nimbu siembo.' nimba ulka-tembelena purumu.

21:27-30

*Juda Yombomane Pollo-Kinia Mumindili Kolkole Ulka-Tembelena Yu Ambolko Toko Kondonge Seringi Kinia (21:31-36 pea)*

<sup>27</sup> Pollo kinia ye kise kanuma Pulu Yemone ono kake sepili molonge kanomba uluma seko moloringi wale yopoko-pakara pora nimbá serimu kinia kolea Esia poropinji Juda yombo marene Pollo ulka-tembelena molorumu kanokole, ulka-tembelena maku toko moloringi yomboma seko mumindili kondoko Pollo ambolko liku, <sup>28</sup> ru ningu ninguli: "Isirele yema, olio ongo liku tapondayo. I yemone koleamanga pali andopa

yomboma semane topa silimú mele i-sipa: "Olionga yomboma kinia, olionga ungu-manema kinia, i ulkamo kinia, kanoko kiri pilku, olio Juda yomboma selemolo mele naa saa." nimba mane silimú yemo imu. Aku uluma mindi naa selemo. Ulu se kiniá ya sekemola. I ulka kake sélimunga Juda yombomanga ultu yombo-lupa mare memba omu akumunga i ulkamo sepa kinjemu." niringi. <sup>29</sup> (Onone Epesasi taono ye Toropimas Pollo-kinia Jerusalleme sukundu kopu seko andoringili kanokole, 'Olio Juda yomboma Pulu Yemo popo topo kalolemolo, ulka-tembelena sukundu pea pungili.' konopu lekole aku siku niringi.)

<sup>30</sup> Kanu-kinia Jerusalleme moloringi yomboma pali mumindili kolko lisiku sukundu sukundu ongo Pollo ambolko liku ulka-tembelena ultu kunduku mengo punguli popenge seko ulka kunama pipi siringi.

21:31-36

*Romo Ami Yemane Pollo Jerusalleme Ka Siringi Semanemo (21:27-30 pea)*

<sup>31</sup> Yu toko kondonge seko moloringi kinia Romo ami yema nokorumu ye nokolimu Jerusalleme yomboma pali seko kinjiku moloringi mele semanemo pilierimu.

<sup>32</sup> Pilipale yu ami-ye mare kinia kanu yemanga nokoli yema kinia popenge sepa lipa memba yombo maku toko moloringina lisipa memba purumu. Ami-yema kinia ononga ye nokolimu kinia oringi kanokole seko kinjiku moloringi yombomane Pollo kelko kopene naa toko we siye koloringi.

<sup>33</sup> Ami-ye nokolimu Pollo molorumuna omba yu ka sipa ami-yemando nimbale: "Yu ka-séne talone ka taa." nirimu. Aku nimbale yuni yomboma mangilipa nimbale: "I yemo nawe? Yu nambi semuye?" nirimu.

<sup>34</sup> Maku toringi yombomanga ye marene "I-sipa i-sipa semu." ningu yu-mele-mele ungu awisili niringi-kulu ami-ye nokolimu ulumunga pulumu naa pilipa imbi sipale, yuni nimbale: "Yu ami-yemanga ulkana mengo paa." nirimu. <sup>35</sup> Mengo puringi kinia Pollo ulkana ola puringi polona nondopa purumu kinia yomboma nondoko nondoko ongo yu tonge seringimunga ami-yemane yu taropola seko mengo puringi. <sup>36</sup> Yombo lombili puringimane ru ningu "Kolopili toko kondaa." niliku lombili puringi.

21:37—22:21

*Pollone Pilipa Serimumunga Pulumu Juda Yombo Moloringimando Nimba Sirimu Semanemo (21:31-36 pea)*

<sup>37</sup> Ami-yemane Pollo ononga ulkana sukundu mengo pungí seringi kinia Pollone ami-ye nokolimu mawa sepale "Nane nu ungu se niembo." nirimu.

Ye nokolimuni pundu topa nimbale: "Nu Giriki-ungu pilieno lepomo. <sup>38</sup> Aku liemu u kolea Isipi ye sene "Romo gapomano tamili." nimba yomboma toko kondoli ye po tausini lipa kolea ku lielina memba purumu kanu yemo nu mólo lepomo." nirimu.

<sup>39</sup> Pollone pundu topa nimbale: "Na Juda yemo, kolea Sillisia poropinji lemó koleawili Tasisi nanga koleamo. Nanga koleamo we se mólo. Imbi molemo kolea-awilim. 'Nane yomboma ungu nimbu siembo.' nimbili nu mawa sekero." nirimu.

<sup>40</sup> Ami-ye nokolimuni "Manda, ni." nirimu kinia Pollo polona ola gilipale "Na ungu se niembo, ono taka leko molaa." nimba ki ola mundorumu.

Ono taka leko moloringi kinia yuni Ipuru ungu lepa onondo nimbale:

## 22

<sup>1</sup> "Ango tata keme, kiniá ononga ungumu pundu tambo piliaa." nirimu.

<sup>2</sup> Yuni Juda yomboma ononga Ipuru ungu lepale nirimu-kulu pilkuli niringimuni, paa ungu naa nili taka leko moloringi.

Kanu-kinia Pollone nimbale:

22:3-16

*Pollo Yu Konopu Topele Topa Ye Awili Yesusi Karasimunga Yemo Molorumu Mele Nimba Sirimu Semanemo (21:37—22:21 pali liku sere leko kanani)*

<sup>3</sup> “Na Juda yemo. Amane na kolea Sillisia poropinji lemó kolea-awili Tasisi merimu. Aku-na-kolo na i kolea-awili Jerusalleme molopo akorundu. Akopole Gamelliene yema sukuli senderimu kinia na pea sukuli serimulu. Yu paa pilipa kondoli perimu yemo molopale olionga anda-kolepalimanga ungu-manema pali olio mimi sipa mane sirimu. Akumunga onone kiniá Pulu Yemo tondolo munduku pilkuli ‘Yombomane Pulu Yemo paa seko naa kinjangi!’ nilimili mele na aku sipu tondolo mundupu pilipu ‘Yombo sene Pulu Yemo sepa naa kinjepili.’ nimbu molorundula.

<sup>4</sup> “Aku nimbu molopole nirindumuni, i ulu konde wendo orumumu pilku liku sengena panjiku seringi yomboma nane pilipu, ‘Pulu Yemo seko kinjikimili.’ nimbu, ono mindili lipu sipu “Kolangi.” nimbu, ambo yema ka sipu panjerindu. <sup>5</sup> Pulu Yemo popo tondoli ye awili olandopamo kinia kanjolloma kinia aku serindu kanoringi mele, kiniá nanga kote sendekemele yema ono kanu yemane manda ningu silimolá. Kanu yemane pepá toko siringi na lipu ononga genupili ‘kolea Siria poropinji, kolea-awili Damasikas moloringina membo purundu. ‘Akuna kanu ulu konde se wendo orumumu pilku seringi yomboma ka sipu, onone aku siku seko kinjilimilimunga mindili nangi.’ nimbu Jerusalleme yando membo ombónedo pepámo lipu membo purundu.

<sup>6</sup> “Kanu-kinia kolea-awili Damasikas nondopo pumbú purundu kinia awi-tangoli waltikele mulu-koleana pa seli se mania ombo na molorunduna pa awili sepa serimu.

<sup>7</sup> Na topa mania mundorumu lepo pilierindu kinia ungu se ombo nando nimbale: “Sollo, Sollo, nambi semu-na nuni na mindili liku silinuye?” nirimu.

<sup>8</sup> “Nane mangilipu nimbili: “Ye-Awilim, nu nawe?” nirindu.

“Yuni pundu topa nimbale: “Na Nasarete taono ye Yesusi, na nuni mindili liku silinu yemo.” nirimu. <sup>9</sup> Na kinia pea kopu sepo purumulu yema pa serimumu kanoko, ye sene nando ungu nirimumu pilieringi-na-kolo ungumu pilku imbi naa siringi.

<sup>10</sup> “Nane mangilipu nimbili: “Ye-Awilim, na nambi semboye?” nirindu.

“Ye-Awilimuni nimbale: “Ola molko kolea-awili Damasikas sukundu pani. Akuna puni kinia nu ‘Sani.’ nimbu u nimbu panjerindu mele ye sene nu nimba simba.” nirimu. <sup>11</sup> Tondolo pa sélimuni nanga mongomo simbulu tondorumu-na mélse naa kanorundu. Akumunga na pea kopu sepo purumulu yemane na ki ambolko mengo, Damasikas sukundu puringi.

<sup>12</sup> “Kanu-kinia ye se, yemonga imbimu Ananayas, na molorundu ulkana na kanombando orumu. Pulu Yemonga ungu-mane Mosisini yando nimba sirimuma yu paa pilipa lipa serimu yemo; Damasikas moloringi Juda yombomane ‘Yu ye peangamo.’ ningu kanoringi. <sup>13</sup> Yu na molorunduna ombo gilipa nimbale: “Ango Sollo, nu mongone kelko kanou.” nirimu. Kanu-kinia waltikele na mongo makilipu yu kanorundu.

<sup>14</sup> “Kanu-kinia yuni nimbale: “Olionga anda-kolepalimane pilku popo toringi Pulu Yemone ‘Nu pilku sani.’ nimba nu u nimba talitorumu mele i-sipa: ‘Yuni nu ‘Sani.’ konopu lemó mele pilku, Ye Sumbi Nílimu ningu kanoko, kanu yemo yunga ungumu piliani.’ nimba nu nimba talitorumu. <sup>15</sup> Nuni mélema kanoko unguma pilierinu mele yomboma pali ningu sini akumunga nu yunga unguma ningu sindeli yemo moloni. <sup>16</sup> Manda, nu kiniá we naa moloyo. Nunga ulu-pulu-kirima ‘yuni kulumiye tondopili.’ ningu yunga imbi leko mangilkuli, no li.” nirimu.

*22:17-22 (22:17-21) Pulu Yemone Pollo Yu Juda Yombo Naa Moloringi Yombo-Lupama Moloringina Lipa Mundorumu Mele Nimba Sirimu Kinia (22:3-16 pea) (22:22) “Pollo Kolopili Toko Kondangi.” Niringi Semanemo*

<sup>17</sup> "Kanu-kinia na pe Jerusalleme yando kelepo ombo „Pulu Yemo popo topo kalolemolo, ulka-tembelena Pulu Yemo kinia ungu nimbu molopole mongo-indi kaima mele sepo <sup>18</sup> Ye-Awilimu kanorundu kinia yuni nando nimbole: "Pílie. Nuni nanga ungumu ya Jerusalleme ningu sini kinia molemele yombomane naa pilku lingí kene nu Jerusalleme iseli welea munduku kelko pu." nirimu.

<sup>19</sup> "Nane pundu topo nimbili: "Ye-Awilimu, u nane Juda yomboma maku toko nunga ungumu pilieringi ulkamanga andopo, yombomane nu 'Sika olionga Ye-Awilimu.' niringi yomboma ka sipu ka-pultane torundu kanumu ya molemele yombomane pilku molemele. <sup>20</sup> Ulu se lupa serindula. U Sitipenene nunga ungu nimba sirimumunga yu toko kondoringi kinia nane kanopole 'Papu tokomele.' nimbu na konopu peanga panjipu, yu toringi yemanga wale-pakolima nokondopo, gilierindu. Aku serindu uluma ono kanoko konopu siringi kanumu. „Pe kiniá nambi semu-na nane ungu nimbúma 'naa pilingí.' konopu lekole "welea pu." ninkuyue?," nirindu.

<sup>21</sup> "Aku-na-kolo yuni nando nimbole: "Pu." nirimu. "Nane 'Juda yombomanga ultu molemele yombo-lupama nanga ungumu piliangi.' nimbu ono molemele kolea sulumanga "Nu pani." nimbu lipu mundumbu sekero." nirimu." nimba Pollone nirimu.

22:22-29

*Romo Ami Ye Nokolimuni Pollo Nokorumu Kinia Pollo Yu "Romo Yemo Molio."  
Nimba Romo Ami Ye Nokolimu Nimba Sirimu Semanemo (22:3-21 pea)*

<sup>22</sup> Juda yombo maku toringima Pollone ungu nirimuma u we pilku gilieringi-na-kolo yuni "Ye-Awilimuni na Juda yombomanga ultu molemele yombo-lupama molemelena "Lipu mundumbu." nirimu." nimba Pollone nirimu kinia pilkuli niringimuni, pilku kiri pilkuli tondolo ru ningu ninguli: "Ya ma-koleana yu we konde molomba kinia manda naa sembá. Yu kolopili toko kondaa." niringi. <sup>23</sup> Ono tondolo ru ningu, ononga wale-pakolima kulku liku ambolko wako-wako kulku, ma norupulu ambolko liku toko ola mundoringi. „'Yu-kinia mumindili kolkomolo mele Romo ami yemane paa piliangi.' ningu aku seringi.„

<sup>24</sup> Aku seringi kinia ami-yemanga ye nokolimuni nimbole: "Yemo ononga ulkana liku mengo paa." nirimu kinia mengo sukundu puringi. Kanu-kinia ye nokolimuni ami-yemando nimbole: "Yombomane nambi semu-na yu-kinia mumindili kolko aku siku ru nikimilinje piliamili nimba para sipili kene yu ka-pultane toko mangilku piliaa." nirimu. <sup>25</sup> Aku-na-kolo onone Pollo ka-pultane tongendo yu unjuna ka toko panjeringi kinia ami-ye wane anderete nokorumu yemo, nondopa kanopa gilierimu, kanumundu Pollone nimbole: "Kote naa pilkuli Romo ye se ka-pultane we tonge kinia Romo gapomanomone "Saa." nimba mane silimú ungu-manse se pulua tongenje konopu lekero. Sikaye?" nirimu.

<sup>26</sup> Yuni aku nirimu-kulu ami-ye wane anderete nokorumu yemone pilipale, yu pumba ami ye nokolimundu nimbole: "I yemo Romo ye se lepomo. Pe kiniá nambi seniye?" nirimu.

<sup>27</sup> Kanu-kinia ami ye nokolimu Pollo molorumuna ombo mangilipa nimbole: "Nu sika Romo yemoye? Na ningu si." nirimu.

Pollone pundu topa nimbole: "Na sika Romo yemo." nirimu.

<sup>28</sup> Ami ye nokolimuni nimbole: " 'Na Romo yemo molambo.' nimbili kou-mone paa awisili sipu pepá liltindu." nirimu.

Pollone nimbole: "Aku sika lepomo-na-kolo na amane merimu kinia Romo yemo molorundu." nirimu.

<sup>29</sup> Ami-yemane Pollo ka-pultane toko mangilingí seringi yema yuni "Romo yemo molio." nirimu-kulu pilkuli mini-wale munduku anju puringi. Ami ye nokolimuni

kepe ‘Nane Romo ye se “Ka sene toko panjiku ka-pultane taa.” nindumunga na mongo limbunje.’ konopu lepa mini-wale mundorumu.

**22:30—23:11**

(22:30) *Romo Ami Ye Nokolimuni Juda-Kanjolloma Lipa Maku Torumu Kinia (23:1-11) Pollone Onondo Yuni Serimumunga Pulumu Nimba Para Sirimu Kinia Seringi Semanemo (21:37 pulu polko kanoko yakondo pali liku sere leko kanani)*

<sup>30</sup> Romo ami ye nokolimuni ‘Pollo nambolka uluri sepa kinjemua-na Juda yemane yu toko kondonge sekemelenje piliambo.’ nimba nirimunumi, orili-u ‘Pollo ka-ulikana wendo pupili.’ nimba, “Pulu Yemo popo tondoli ye awilima kinia Juda kanjollo wema kinia ono maku tamili waa.” nimba, kanjolloma maku toringi kinia Pollo lipa memba ombo ononga kumbi-kerena anjerimu.

## 23

<sup>1</sup> Kanu-kinia Pollone kanjolloma neme-neme nimba kanopa nimbale: “Ango-keme, na Pulu Yemo kanopa molopili yuni “Sei.” nilimú mele andopo selio kinia ‘Na konopumuni pilipuli Pulu Yemone kanopa kiri pilielemo ulu se sepo kinjikiru lémo.’ nimbu naa pilierindu.” nirimu.

<sup>2</sup> Aku nirimu kinia Pulu Yemo popo tondoringi ye awili olandopa Ananayasini Pollo kinia nondoko gilieringi yemando nimbale: “Yu kerena laruwa taa.” nirimu.

<sup>3</sup> Ananayasini aku nirimu kinia Pollone yundu ungu-iku topa, nimbale: “Ulka kengelena wape kake seli kandongimu, nu Pulu Yemone laruwa tomba. ‘Pulu Yemone “Saa.” nimba mane silimú mele pilkuli na kote sendambo.’ konopu lekeno-na-koło “Na laruwa taa.” nikinumunga nu nunu Pulu Yemonga ungu-manema pulua tokono lémo.” nirimu.

<sup>4</sup> Pollo kinia nondoko gilieringi yemane ninguli: “Nu Pulu Yemo popo tondoli ye awili olandopa kake sélimu pipili naa sekemo-na ungu-taka tondokonoye?” niringi.

<sup>5</sup> Pollone nimbale: “Ango-keme, yu kanu ye nokolimu kanopo imbi naa sipuli aku sipu nindu. Unku se Pulu Yemonga bokuna molemo mele i-sipa: ‘Ononga ye nokolimu ungu-taka naa tondangi.’ nimba molemo, akumu na pilielio. ‘Yu aku ye nokolimu molemo.’ nimbu kanopo imbi silkanje yu ungu-taka naa tondolka.” nirimu.

<sup>6</sup> Pollone aku nimbale nirimunumi, yu yuyu konopu kimbu sipale ‘I kanjollo ye mare Sadusi yema, mare Parisi yema lémo.’ konopu lepale, yuni nimbale: “Ango-keme, na Parisi yemo moliola. Tata Parisi yemo molorumula. ‘Yomboma kolkole lomboroko ola molonge.’ nimbu pilielio. Na aku sipu konopu leliomonga na kote sendekemele.” nirimu. <sup>7</sup> Yuni aku nirimu pilkuli, Parisi yema kinia Sadusi yema kinia angelema ninguli, kanjollo yema talape talo mele moloringi. <sup>8</sup> (Angelema niringimunga pulumu i-sipa: Sadusi yemane ninguli: “Yombo se kolopale lomboropa ola naa molomba. Angelloma kinia minima kinia kuruma kinia naa molemele.” niringi-na-koło Parisi yemane ninguli: “Yomboma lomboroko ola molonge. Angelloma kinia minima kinia kuruma kinia paa sika molemele.” niringi.)

<sup>9</sup> Aku ningu pilieringi mele Pollone pilipale ungu nirimu pilkuli kanjolloma mumindili kolko tondolo angelema ningu anju yando ungu panjeringi. Pulu Yemonga ungu-manemanga puluma pilku mane siringi ye mare, ono Parisi yema moloringi, kanumane ola gilkul tondolo munduku ninguli: “I yemo ‘Unku se sepa naa kinjemua.’ nimbu pilkimulu. Yu mini sene molo angello sene ungu se nimba simunje?” niringi.

<sup>10</sup> Ono tondolo irinale seko paa mumindili koloringi-kulu Romo ami ye nokolimuni mini-wale mundupale, ‘Pollo anju yando kundukuli yu toko kondonge.’ konopu lepale, ami-yemando nimbale: “Ono maniando pungu, yu tondolo munduku liku mengo ulkando waa.” nirimu.

<sup>11</sup> Opalikundu ipulieli Ye-Awilimu Pollo molorumuna nondopa ombo nimbale: "Nu pipili naa kolko toyombo toko molou. Kiniá ya kolea-awili Jerusalleme nanga ungumu ningu sinu, aku siku mele nuni kolea-awili Romo ungumu ningu sini lémo." nirimu.

**23:12-22**

### *Juda Ye Awilimane Pollo Toko Kondongendo Langi Niringi Semanemo*

<sup>12</sup> Orili-u Juda ye awilimane ungu se ningu panjiku ninguli: "Pollo topo kondamili. U naa topo kondopole, no kinia kere-langi naa nomolo." ningu mi lieringi. <sup>13</sup> Pollo toko kondongendo langi niringi ye paono talo mele moloringi. <sup>14</sup> Aku siku ningu panjikuli, ono Pulu Yemo popo tondoringi ye awilima kinia Juda yombomanga tapuyema kinia moloringina pungu ninguli: "Olio ungu se nimbu panjipu mi liemulu mele i-sipa: "Pollo u naa topo kondopole nimulúmuni, kere-langi kanga-kolte kepe paa naa nomolo." nímulu. <sup>15</sup> Aku semulu kene kanjolloma kinia onone ami ye nokolimu molemona ningu mundukuli kolo toko yuntu "Pollo ungu mare kelepa ombo nimba sipili. Puluma paa mimi sipu piliamili, memba maniando opili." niee." niringi. "Pe yu mengo onge kinia ono molongena u naa opili aulkana nokopo molopo yu topo kondomolo." niringi.

<sup>16</sup> Aku-na-kolo Pollo kemulunga malone, onone yunga kepa toko kondongendo langi niringi mele pilipale, yu ami-yema peringi ulkana Pollo molorumuna pumba nimba sirimu.

<sup>17</sup> Kanu-kinia Pollone ami-ye wane anderete nokoramu ye se "Ou." nimba yuntu nimba: "I kango-yemo ononga ye nokolimu ungu se pelemomo nimba sipili, yu molemona mengo pani." nirimu. <sup>18</sup> Pollone aku nirimu pilipale kanu yemo yunga ye nokolimu molorumuna kango-yemo memba purumu.

Memba pumbale ami ye nokolimunu nimba: "Ya ka-ulka pelemo ye 'Pollo' nili kanumuni nando "Ou." nimba nimba: "I kango-yemo nunga ye awilimunu ungu se nimbá kene yu molemona mengo pu." nimu-na membo okoro." nirimu.

<sup>19</sup> Ye nokoli kanumuni kangomo ki ambolopa memba senga lupa pumba ololo molkole yu mangilipa nimba: "Nuni nambolka unguri ninindu onuye?" nirimu.

<sup>20</sup> Kangomone yuntu nimba: "Juda ye awilimane 'Opali nu mangilku, "Ono Pollo ungu mare kelepa ombo nimba sipili, puluma paa mimi sipu piliamili, nuni olio kanjolloma molomolona mengo maniando wani." kolo topo aku sipu niemili.' ningu u ningu panjengi. <sup>21</sup> Aku-sipa na-kolo ononga ungu ningí mele naa piliani. Ononga ye paono talo mele "Olio u Pollo topo naa kondopole kere-langi kepe no kepe naa nomolo." ningu mi liengi. Nuni "E." ningu mengo oni kinia toko kondongendo aulkana nokoko molonge." nirimu.

<sup>22</sup> Ami ye nokolimuni kango-yemondo nimba: "Kiniá na ningu sakinu mele anju yombo sendo lupa paa naa ningu sikuli we pu." nirimu.

**23:23-35**

### *Ami-Yemane Pollo Kolea-Awili Sisaria Gapomano Ye Awilimu Molorumuna Mengo Pungu Mundu-Puringi Semanemo (23:12-22 pea)*

<sup>23</sup> Kangomo purumu kinia ami ye nokolimuni ami-ye wane anderete wane anderete ningu nokoringili yetolo "Wale." nimba nimba: "Olo ami-ye anderete talo kinia kongi osena andolemele ami-ye tere paono tene kinia toló mengo andolemele ami-ye anderete talo kinia liku maku tokole, kiniá ipulieli ena nani killoko Pollo mengo kolea-awili Sisaria pang. <sup>24</sup> Pollo aulkana toko kondonge kene yu kongi osena molopili kolea Pellisitane disiriki Romo gapomano ye Pillikis kolea-awili Sisaria molemona mengo pang. Yu aulkana ulu se wendo naa opili nokoko kondoko mengo pang." nirimu.

<sup>25</sup> Aku nimba ye nokolimuni 'Pillikis pungu siengi.' nimba pepá se topa nimba:

<sup>26</sup> 'Na Lodiasi LLisiasini i pepámo

nu gapomano ye paa awili Pillikis topo sikiru.  
“Nu molko kondokonoye?” nikiru.

<sup>27</sup> I ye mengo okomelemo Juda yombomane ambolko liku toko kondonge sengi-na-kolo na kinia nanga ami-yema kinia ombole ‘Yu Romo yemo.’ nimbu pilipuli na kinia ami-yema olione yu wendo lipu membo pumulu. <sup>28</sup> “Yu sepa kinjemu.” ningu toko kondonge sengimunga pulumu pilimbundu ononga kanjollo yema molongina membo pundu. <sup>29</sup> Membo pumbuli piliendu kinia ononga ungu-manema pulua tomu-na aku siku níngi piliendu. Yu kote sendekole “Kolopili.” ningí molo “Ka siemili.” ningí aulka se naa liemu. <sup>30</sup> Kanu-kinia pe yu toko kondongendo langi níngi mele yombo sene na nimba simu pilipuli, popenge sepo ami-yemando “Nu molenona mengo paa.” nindu. “Yu kote sendamili.” níngi yemando “Yu sepa kinjemu kene kolopili.” ningimunga pulumu ‘Nu piliani.’ nimbu “Si-paa.” nindu.’ nimba yuni pepá se topaaku sipa nirimu.

<sup>31</sup> Kanu-kinia ami ye nokolimuni “Saa.” nirimu mele sengendo ipulieli Pollo liku mengo Andipatiris taonona pungu pekole niringimuni, <sup>32</sup> orili-u ‘Kongi osena andoli ami-yema Pollo lisiku mengo pang.’ ningu ami-ye wema kelko yando oringi. <sup>33</sup> Osena andoli ami-yema Pollo mengo kolea-awili Sisaria sukundu ongole, gapomano ye awilimu molorumuna Pollo mengo punguli pepámo siringi.

<sup>34</sup> Gapomano ye awilimuni pepámo lipa kanopale, Pollo mangilipa nimbale: “Nunga poropinji senaye?” nirimu.

Pollone nimbale: “Na kolea Sillisia poropinji yemo.” nirimu kinia pilipale nirimunumi,

<sup>35</sup> yuni nimbale: “Nu ‘kote sendamili.’ nikimili yema onge kinia nunga kotemo piliambo.” nirimu. Aku nimba yuni nimbale: “Pollo ye nokoli kingi Ertene u takopa perimu gapomano ulkana pepili mengo pungu nokaa.” nirimu.

## 24

24:1-27

*Gapomano Ye Awili Pillikisini Pollonga Kote Pilierimu Semanemo*  
24:1-9

*Juda Yombomanga Ye Awilimane Pollo Kote Senderingi Semanemo*

<sup>1</sup> Pollo kolea-awili Sisaria mengo puringi pe wale se-pakara omba purumu kinia Pulu Yemo popo tondoringi ye awili olandopa Ananayas kinia Juda yombomanga tapu-ye mare kinia Juda yombomanga ungu-manema pilierimu ye Tetallas kinia kolea-awili Sisaria maniendo ongole niringimuni, gapomano ye awili Pillikisindu Pollo kote sendenge mele ningu siringi.

<sup>2-3</sup> Kanu-kinia yuni Pollondo “Ou.” nirimu, orumu kinia Juda ye awilimanga lipa tapondopa kote sendeli ye Tetallasini Pollo kote sendepa Pillikisindu nimbale:

“Ye Paa Awili Pillikis, nuni olio nokoleno kinia opa se wendo naa opili molopo kondolemolo. U olio molopo kinjerimulu-na-kolo nuni olio nokoko “I-sipa i-sipa wendo opili.” nilinumunga kiniá olio molopo kondolemolo. Akumunga kiniá olio konopu peanga pekemo-na nu-kinia “Paa ange.” nikimulu. Paa papu seleno. <sup>4</sup> Aku-na-kolo olione we ungu awisili nimulú kinia nu siye koloni kene ponjipu niemili pilku molani.

<sup>5</sup> “I yemo ‘Yomboma mongo liku molko kinjangi.’ nimba, Juda yomboma molemele koleamanga pali andopa ‘Ono anju yando konopu kiri panjiku irinale seko molko kinjangi.’ nilimú yemo. Yu olio Juda yombomanga ungu-manema munduku kelko ‘Nasarete yemonga yomboma’ nilimilimanga ye nokoli se. <sup>6</sup> Yu aku sipa mindi

sepa naa kinjilimú. „Olio Juda yomboma Pulu Yemo popo topo kalolemolo, ulka-tembelemo sepa kinjimba serimula. Aku sipa sepa molorumu kinia yu pumbu ambolorumulu. Ambolopole ‘Olionga ungu-manema pilipu yu kote sendamili.’ nirimulu,<sup>7</sup> aku-na-kolo Jerusalleme nokoringi Romo ami yemanga ye nokoli LLisiasini omba tondolo mundupa wendo lipa memba pumba<sup>8</sup> nimbale: “Yu kote sendenge yema Pillikis molombana pungu kote sendangi.” nirimu. Kiniá nuni yu sumbi siku mangiliení kinia, olione kote sendelemolo mele yuni nimbá pilkuli nuni ungu-pulumu sumbi siku piliení.” nirimu.

<sup>9</sup> Tetallas pea gilieringi Juda yemane “Pollo sika aku sipa semu mele nikimu.” nirungi.

24:10-21

*Pollo Kote Senderingi Kinia Pundu Topa Kote Pilierimu-Ye Pillikis Nimba Sirimu Semanemo (24:1-27 pali)*

<sup>10</sup> Kanu-kinia gapomano ye awilimuni Pollondo “Sika aku siku serinuye?” nirimu kinia Pollone pundu topa nimbale:

“Nu kalia-ingi awisili olio Juda yombomanga kote awilima pilieleno yemo molenomonga nanga kote, kiniá pilienímunga na konopu pe nipili kote sembó.

<sup>11</sup> “Na Pulu Yemo popo topo kape nimbúndu Jerusalleme olando purundu, pe kiniá koro talo mele mindi omba pukumu. Nuni yomboma mangilku pilienu liemu ‘Sika aku sipa serimu.’ ningí. <sup>12</sup> Na ulka-tembelena sukundu yombo se kinia irinale sepo, ono maku toko Pulu Yemonga ungumu pilielemene ulka senga pumbu yomboma sepo mumindili kondopo, kolea-awili Jerusalleme, sukundu ulu se sepo kinjerindu mele na kote sendekemele yemane se paa naa kanoringi, mólo. <sup>13</sup> I na kote sendekemele yemane na ulu semu nikimili mele ‘Ye se omba “I uluma paa sika semu, na mongone kanondu.” nipili.’ ningu se paa manda naa liku mengo ongela.

<sup>14</sup> “Aku-sipa na-kolo nane nundu ungu se paa sika nimbu para simbú. Akumu i-sipa: Na olio Juda yombomanga anda-kolepalimane popo toringi Pulu Yemo popo topo imbi ambolopo paka tondombondo, Yesusi-kinia, uluconde wendo orumu akumu na sika pilipu sepo molio. Kanumu Juda ye awilimane ‘Olionga ungu-puluma lawa seko talape talo sepo molamili.’ nilimili kanu ulumu na sika pilipu sepo molio. Mosisini boku torumuma kinia, Pulu Yemone ungu-umbu tondorumuma pilku yomboma ningu siringi yemane boku toringima kinia, kanu bokumanga molemo unguma pali nane ‘Sika unguma.’ nimbu kuru mondopo molio. <sup>15</sup> I nanga kote sendekemele yemane ‘Pulu Yemone “Sembó.”’ nirimu mele sika sembá.’ ningu konopu siku nokoko molemele ulumu kinia, nane ‘Pulu Yemone “Sembó.”’ nirimu mele sika sembá.’ nimbu konopu sipu nokopo molio ulumu kinia, selumu. Akumu i-sipa: ‘Olio mana-yomboma kolopole, sepo peanga sepo molemoloma kinia, sepo kinjipu molemoloma kinia, pali lomboropo ola molomolo.’ nimbu kuru mondolemolo. <sup>16</sup> ‘Aku sipu semolo.’ nimbu pilipu moliomonga Pulu Yemone kepe mana-yombomane kepe nane ulu selioma kanokole ‘‘Sepo kinjikiru.’’ ningu naa kanangi.’ nimbu konopumuni pilipu molio.

<sup>17</sup> “Na kalia-ingi pokorenga kolea lupamanga molopole nirindumuni, pe kelepo nanga yomboma molemelena Jerusalleme yando talko orundu. Kolea lupa yombomane Jerusalleme yombo koropama kondo kolko liku maku toringi kou-monema ono simbundu membo ombo, Pulu Yemo popo topo mélema kalombondo orundu. <sup>18</sup> Olio Juda yomboma ‘Pulu Yemone olio kake sepili molomolo kanopili.’ nimbu selemolo mele sepo ulka-tembelena kake sepili molorundu kinia na ongo kanoringi. Ongo kanoringi kinia na-kinia yombo awisili maku naa topo, na yomboma-kinia ungu awisili naa nirimulula.

<sup>19</sup> "Aku-na-kolo Esia poropinji Juda ye mare ongo yomboma seko mumindili kondoko na amboloringi kanu yemane ya kotena ongo na-kinia ungu se pelemomo kote sendelemolánje papu. <sup>20</sup> Na Juda yombomanga kanjollo maku toringina gilierindu kinia na-kinia mongo perimu pilieringi mele i ongo gilkimili yemane ningu para silimolánje peangala. <sup>21</sup> Molo kanjolloma moloringina molopole ungu se tondolo mundupu nirindu kanumunga ya kiniá kote sendekemelenje? nirindu mele i-sipa: "Yomboma kolcole lomboroko ola molonge." nirindu akumunga kiniá onone na kote sendekemelenje?" nimba Pollone aku sipa nirimu.

24:22-27

### *Pillikisini Kote Pilipale Pollo Kalia-Ingi Talo Ka Sirimu Semanemo (24:1-27 pali)*

<sup>22</sup> Pillikis yu Juda yomboma kinia ulu se lupa wendo orumu ononga yombo marene pilku sengena panjiku moloringi mele u pilierimu. Pollone ungu nimba pora sirimu kinia yuni nimbale: "Romo ami ye Jerusalleme moloringimanga ye nokoli LLisiiasi ombá kinia ono ungu nikimili mele kamu pilipu pora simbú kene iseli-u we nokoko molo-paa." nirimu. <sup>23</sup> Aku nimbale nirimumuni, ami-ye wane anderete nokorumu yemondo nimbale: "Pollo mengo pungu ka-ulcana panji-pani. Aku-na-kolo yu tondolo ingi siku ka naa toko, yunga pulu lemó yombomane 'Yu nokamili. Mólo tomba mélema pilipu yu lipu tapondamili.' ningu onge kinia onone "mólo." naa niee." nirimu.

<sup>24</sup> Wale mare omba purumu kinia Pillikis kinia yunga menu Derusillatolo oringili. Derusilla yu Juda ambomo. Oringili kinia Pillikisini "Pollo opili." nimba, ungu nimba mundorumu kinia Pollo omba yombomane 'Yesusi yu sika Pulu Yemone "Ono nokopa kondomba ye se lipu mundumbu." nimba, nimba taltorumu ye nokoli Karasimu. Yu-mambele yomboma Pulu Yemo kinia manda molko kondonge.' ningu manda kuru mondangi mele nimba sirimu kinia pilipa molorumu. <sup>25</sup> Kanu-kinia Pollone yomboma sumbi nilima molonge mele kinia, yomboma ono onono nokoko kondonge mele kinia, 'Pulu Yemone' yomboma kote sendemba walemo wendo ombá mele kinia, kanu unguma nimba molorumu kinia Pillikis mini-wale mundupa nimbale: "Manda ningu, pani. Pe ena se we lemba kinia nu kelko 'Ou.' nimbú kene pu." nirimu. <sup>26</sup> Kanu-kinia Pillikisini 'Pollo yu 'Lipa tapondopili.' nimba kou sipili.' nimba alieli Pollondo "Ou." nirimu kinia Pollo yu Pillikis molorumuna alieli orumu, yu-kinia ungu ningu moloringili.

<sup>27</sup> Pollo kolea Sisaria taono ka-ulcana pepili kalia-ingi talo omba purumu kinia Posiasi Pesitasi omba Pillikis kolali sepa molorumu kinia Pillikisini 'Juda yema na-kinia konopu peanga panjangi.' nimba Pollo ka-ulcana we pepili yu purumu.

## 25

25:1-12

### *Pesitasini Pollonga Kote Pilierimu Kinia Pollone "Romo Nokolemo Koleamanga Pali Ye Nokolimuni Nanga Kote Piliepili, Kolea-Awili Romo Pambo." Nirimu Semanemo*

<sup>1</sup> Pesitasi kolea Judia disiriki gapomano awilimu omba kolali sepa kolea-awili Sisaria molopale nirimumuni, wale yopoko omba purumu kinia Jerusallemendo olando purumu. Pollo kolea-awili Sisaria ka-ulcana pepili yu Jerusallemendo olando purumu. <sup>2</sup> Akuna purumu kinia Pulu Yemo popo tondoringi ye awilima kinia Juda yombomanga ye awilima kinia Pesitasi molorumuna ongo, Pollo-kinia ungu se perimu kote sendenge seringi mele ningu siringi. <sup>3</sup> Onone yu tondolo munduku mawa seko ninguli: "Nuni olio konopu siemili liku tapondoko, 'Pollo ya ka-ulcana pepili Jerusalleme yando liku mundangi.' ni." niringi. Onone Pollo aulkana nokoko molko toko kondongendo aku siku niringi.

<sup>4</sup> Pesitasini onondo pundu topa nimbale: "Pollo kolea-awili Sisaria ka-ulcana pelemo, na nondopo Sisariando maniendo pumbú kene <sup>5</sup> na pumbú kinia ononga ye awili mare pea pamili. Kanu yemo ulu mare sepa kinjerimu liemu Sisaria pumulú kinia yu kote sendangi." nirimu.

<sup>6</sup> Kanu-kinia Pesitasi koro selu molo koro talo mele Jerusalleme molopale nirimumuni, Sisaria maniendo ombale orili-u "Kote samili Pollo liku mengo waa." nirimu.

<sup>7</sup> Pollo yu kotena orumu kinia Jerusalleme molko Pesitasi kinia pea maniendo oringi Juda yema yu gilierimuna nondoko ongo gilkuli, yuni ulu se sepa kinjerimu mele naa kanoringi-na-kolo kolo toko ninguli: "Yuni ulu awisili paa sepa kinjerimu." niringi.

<sup>8</sup> Pollone 'Yu sika serimu mele piliangi.' nimba nimbale: "Juda yombomanga ungu-manema kepe, ono Pulu Yemo popo toko kalolemele ulka-tembelemo kepe, Romo Gapomano Ye Paa Awili Kumbina Sisamonga ungu-manema kepe, ungu-taka tondopo sepo naa kinjerindu lémo." nirimu.

<sup>9</sup> Aku-na-kolo Pesitasini 'Juda yomboma na-kinia konopu peanga panjangi.' nimba Pollondo nimbale: "Nunga kote Jerusalleme piliambo, olando pambiliye?" nirimu.

<sup>10</sup> Pollone yundu pundu topa nimbale: "I kote sepo molemolomo Romo Gapomano Ye Paa Awili Kumbina Sisamonga kotemo. Nane Juda yomboma kinia ulu se sepo naa kinjerindu mele nu pilku moleno. Akumunga Juda yombomanga kotena na nambi semu-na pamboye? Ya Romo gapomanomone kote pilkimumu manda. <sup>11</sup> 'Na kolambo.' nimbu ulu se sepo kinjerindu liemu aku manda, toko kondangi. Na ungu se naa nimbú. Aku-na-kolo kolo toko na kote sendengi liemu yombo sene na lipa ono simba se naa molemo. Kolea-awili Romo molopa koleamanga pali nokolemo Romo Gapomano Ye Paa Awili Kumbina Sisamone nanga kote piliepili, na akuna pambo liku mundou." nirimu.

<sup>12</sup> Kanu-kinia Pesitasini yu kinia kopu seko molko liku tapondoringi yema kinia anju yando angelema ninguli, pe yuni pilipa nimbale: "Nuni 'Romo Gapomano Ye Paa Awili Kumbina Sisamone nanga kote pilindepili, yu molemona pambó.' nikinumunga akuna sika puni lémo." nirimu.

25:13—26:32

*Pollo Kinia Ye Nokoli Kingi Akiripatolonga Semanemo*

25:13-22

*Ye Nokoli Kingi Akiripa Orumu Kinia Pesitasini Yu Mangilipale "Pollo Nambi Sembonje?" Nirimu Semanemo*

<sup>13</sup> Wale mare ombo purumu kinia ye nokoli kingi Akiripa kinia yunga kemulu Benasitolo 'Pesitasi gapomano ye awili molomba omu kene kanambil pambolo.' ningu kolea-awili Sisaria oringili. <sup>14</sup> Olo "Wale awisili Sisaria molombolo." niringili pilipale Pesitasini ye nokoli kingimundu nimbale:

"Pillikisini ye se ka-ulcana pepili purumu kanu yemo ya ka-ulcana we pelemo. <sup>15</sup> Na talko Jerusalleme olando purundu kinia Pulu Yemo popo tondoli ye awilima kinia, Juda yombomanga tapu-yema kinia, onone na molorunduna ongo ninguli: "Yu i-sipa i-sipa sepa kinjemu kene yu pundu topale kolopili ni." niringi.

<sup>16</sup> "Nane onondo pundu topo nimbili: "Olio Romo gapomano yemane yombo se we umbuna se naa silimulu. Kote pilipu, kote sendelemele yombomanga unguma pilipuli, kote sendelemele yombomo yuni yando ungu se pundu topa nilimú kinia pilipuli, yombomo mongo se pelemo kinia pilipuli umbuna silimulu. We naa silimulu." nirindu. <sup>17</sup> Kanu-kinia ono na kinia pea Jerusalleme mundupu kelepo maniendo orumulu kinia nane orili-ukundu sumbi sipu 'Yu kotena opili.' nirindu.

<sup>18</sup> Yu kote senderingi yema ongo gilku yu kote senderingi kinia 'Yu umbuna simbu ungu se ningí.' konopu lierindu-na-kolo se naa niringi. <sup>19</sup> Yu-kinia mumindili koloringimunga ungu-pulu talo pelemo. Ononga Pulu Yemonga ungu-pulumu lupa

lupa ningu pilku, ye u kolorumu, yunga imbi Yesusi niringi, kanu yemo Pollone "Konde molemo." nirimu kinia "Kolo tokomo." ninguli, angelema niringi.

<sup>20</sup> "Aku siku niringimunga ungu-pulumu pilimbundu pilipu sundupu yu mangilipu nimbili: "I kotemo Jerusalleme samili olando pambiliye?" nirindu. <sup>21</sup> Aku-na-kolo Pollone nimbale: "Mólo. Nanga kotemo Romo Gapomano Ye Paa Awili Kumbina Sisamone piliepili." nirimu kinia pilipuli nane nimbili: "Manda, Romo puni aulka se korondambo kene u ka-ulkana we pei." nirindu." nirimu.

<sup>22</sup> Kanu-kinia Pesitasini nirimu mele ye nokoli kingi Akiripane pilipa yuni yundu nimbale: "Nane i yemonga ungumu piliambo konopu lekero." nirimu.

Pesitasini nimbale: "Manda, opali piliani." nirimu.

25:23—26:32

*Pollo Kotena Mengo Oringi Kinia Akiripane Pollo Kote Senderingi Mele Mangilipa Pilierimu Semanemo (25:13 pulu polko kanani)*

<sup>23</sup> Orili-ukundu Kingi Akiripa kinia kemulu Benasitolo au ningu kondoko, yombo maku toko moloringi ulkana yomboma kanokole kolape-mingi langoko imbi ambolko paka toko, taka leko molangi olo ulkana sukundu oringili. Ami ye awilima kinia kolea-awili Sisaria nokoringi ye awilima oringi kinia pea maku toringi. Kanu-kinia Pesitasini "Pollo mengo waa." nirimu kinia yu mengo oringi. <sup>24</sup> Omba gilierimu kinia Pesitasini nimbale:

"Ye Nokoli Kingi Akiripa kinia ono pea ya molemolo yomboma pali, onone i yemo kanayo. Juda yombo Jerusalleme molemelema kinia ya molemelema kinia onone pali na kanopo molambo i yemo kote sendekole tondolo munduku ninguli: "Yu konde molomba kinia manda naa sembá. Kolopili." niringi. <sup>25</sup> Aku-na-kolo yu kolomba ulupulu se naa pilierindu. Se naa pilierindu-na-kolo yuni nimbale: "Romo Gapomano Ye Paa Awili Kumbina Sisamone nanga kotemo piliepili." nirimu-na "Manda, kolea-awili Romondo pani." nirindu. <sup>26</sup> Aku-na-kolo Romo Ye Awilimuni yu kote pilimba mele pepá topo simbú ungu-pulu se naa pilkiru. Akumunga, Kingi Akiripa kinia ono ya molemele yomboma pali 'Pollone nimbá mele onone pilkuli pepá tombo mele ningu siengi.' nimbu membo okoro. <sup>27</sup> 'Ka-ye se Romo ye awilimu molemona we lipu mundumbu kinia manda naa sembá.' konopu lekero. Yunga kote pelemomonga pulumu pepá topo nimbu para sipuli yu lipu mundumbu kinia peanga." nirimu.

## 26

26:1-23

*Polrone Kotena Gilipa Kingi Akiripa Unzu Mare Nimba Simbando*

26:1-11

*Pollo Yu U Molorumu Mele Akiripa Nimba Sipale, (26:12-23 pea)*

<sup>1</sup> Pesitasini aku sipa nirimu kinia Akiripane Pollondo nimbale: "Nu ungu se pemba na ningu si." nirimu.

Kanu-kinia 'Juda ye nokólimane kolo tokole yu kote senderingi mele piliepili.' nimba, Pollone pundu topa nimbale:

<sup>2</sup> "Ye Nokoli Kingi Akiripa, Juda yemane na kote sendeko, "Sepa kinjerimu." nikimili, kolo toko nikimili mele nu piliani nimbu simbumunga na konopu sikiru.

<sup>3</sup> Juda yombomanga ulu-puluma kiniá ono onono konopumane pilku angelema nilimili mele nu paa pilku kondolenomonga na konopu paa peanga pepili nu nimbu simbú. Akumunga 'Nane ungu nimbúmu toko pulua toko mumindili naa kolko, we mimi siku pilku molani.' nimbu mawa sekero.

<sup>4</sup> "Na u kango-kinia nanga pulu koleana molopole serindu mele kinia, pe akopo Jerusalleme pumbu molopo serindu mele kinia, Juda yombomane pali pilku kanolemele. <sup>5</sup> Nane serindu mele kalia-ingi awisili pilku kanokole, nane sepo

molorundu mele ‘Piliangi nimbu siemili.’ nilimolánje nane u Parisi molopole serindu mele ningu silimolá. Parisi yema olio Juda yombomanga ungu-manema paa kála seko pilku selemele. Juda yombomanga ungu-manema Parisi yemane pilku selemele mele olandopa; we-yombomane olionga ungu-manema pilku selemele mele maniandopa. <sup>6</sup> Na kote sendekemele yema kinia olio, Pulu Yemone olionga anda-kolepalimando “Sembó.” nirimu mele nane pilipuli ‘Paa aku sipa sembá sekemo.’ konopu leliomonga na kiniá kote sendekemele. <sup>7</sup> Nane ‘Wendo ombá.’ konopu lepo nokopo molio mele olio Juda yombomanga talape rurepo molemolo yombomane pali ‘I ulumu wendo opili.’ ningu, ipulieli tangoli Pulu Yemonga ungu pilku yunga imbi ambolko paka tondoko nokoko molemelela. Ye Nokolimu, aku ulu selumu mindi olio Juda yomboma nokopo molemolo-na-colo na aku sipu pilipu nokopo moliomonga Juda yombomane onono na kote sendekemele. <sup>8</sup> Ono yombo marene nambi semuna ‘Pulu Yemone yombo kololemelema manda naa topa makisindimba.’ konopu lemeleye?

<sup>9</sup> “U nane kepe ‘‘Yomboma kolea Nasarete ye Yesusi paa naa piliangi.’ nimbu ulu umbuna awisili siembo.’ nimbu molorundu. <sup>10</sup> Jerusalleme nane aku sipu serindu. Pulu Yemo popo tondoli ye awilimane “Aku siku sei.” ningu namba siringi kinia ‘Pulu Yemonga, kake seli yombo awisili ka sirindu. “Kolangi.” niringi kinia nane “E.” nirindula. <sup>11</sup> Juda yomboma maku toko Pulu Yemonga ungumu pilieringi ulkamanga pumbu Yesusi pilieringi yomboma kanopo lipu “Mindili nangi.” nimbu, ““Yesusi yu Pulu Yemone “Ono nokopa kondomba ye se lipu mundumbu.” nimba, nimba taltorumu ye nokoli Karasimu mólo.” ningu, yu ungu-taka tondaa.” nirindu. Yu pilku moloringi yomboma mumindili paa kolopole, kolea lupamanga moloringima lipu, mindili lipu sipu ka simbundu lombili purundu.

26:12-18

### *Konopu Topele Topa Ye Awili Yesusinga Yemo Molorumu Mele Nimba Sipale, (26:1-11,19-23 pea)*

<sup>12</sup> “Aku sipu selepo andopole, Juda yombomanga Pulu Yemo popo tondoli ye awilimane ‘Aku siku se-pu.’ ningu pepá se toko na siringi kinia lipu membo kolea-awili Damasikas purundu. <sup>13</sup> Ye Awili Akiripa, na kolea-awili Damasikas pumbú purundu kinia, awi-tangoli aulkana purundu kinia muluna pa serimu kanorundu. Akumu ena tolemo mele maniandopa. Yu tondolo pa serimu kinia na-kinia kopu sepo purumulu yema kinia olio molorumuluna tondolo pa serimu. <sup>14</sup> Aku serimu kinia olio pali topa mania mundorumu kinia na mania lepo pilierindu kinia ungu se omba Ipuru unguna nimbale: “Sollo, Sollo, na nambi semu-na mindili liku silinuye? Kongi kao se kongono selemo kinia ‘Pupili.’ ningu kimbuna tolo se munduku pololemele kinia kaomone ‘Mólo.’ nimba kimbu elkapi tolemo kinia tolomo kamu kaomone yuyu tolomo polopa olandopa mindili nolemo-na-colo naa pilipa karaye sepa, selemo mele we sepa mindi pumba naa kelielemo aku sipa mele nuni seleno.” nirimu.

<sup>15</sup> “Kanu-kinia nane mangilipu nimbúndu: “Ye-Awilimu, nu nawe?” nirindu.

“Ye-Awilimuni pundu topa nimbale: “Na Yesusi, nuni alieli mindili liku silinu yemo. <sup>16</sup> Kiniá ola giliei. ‘Nu nanga kendemande-yemo molko, na kanonu mele kepe, nane pe lipu ora simbú mele kepe, pilku kanokole yomboma anju ningu sieni.’ nimbu nu ongo puni pununa ombo mona gilipu, na molio mele nu lipu ora sikiru.

<sup>17-18</sup> Nunga Juda yomboma kinia yombo-lupama kinia onone ‘Nu tamili.’ ningí kinia ‘Nu naa tangi.’ nimbu lipu tapondombo. ‘Na sika molopa ono lipa tapondombo.’ nilimili yomboma Pulu Yemone ononga ulu-pulu-kirima ‘Mania pupili.’ nimba siye kolopa, yuni ‘Nanga yomboma manjiku molko, yombo kake selima molangi.’ nirimu yomboma ‘Sika yunga yomboma molangi.’ nimbu, nu ono molemelena “Pu.” nimbu lipu mundukuru. Ononga mongo kumbulku molemelema yomboma ‘Makiliangi.’

ningu, simbulu tolina molemele yomboma ‘Munduku kelko pa selina molangi.’ ningu, ‘kurumanga nokoli, Setenenga tondolomone yomboma ambololemomo ‘Naa ambolopili. Munduku kelko Pulu Yemo molemona wangi.’ nieni. Ono-kinia aku siku sení kinia sika aku siku senge yomboma ono sika Pulu Yemonga yomboma molongena ‘Aku sani.’ nimbu ono molemelena nu lipu mundukuru.” nimba yuni nando aku sipa nirimu.

**26:19-23**

*Pulu Yemonga Kongono Senderimu Mele Nimba Sirimu Semanemo (25:13 pulu polko kanani.)*

<sup>19</sup> “Ye Nokoli Kingi Akiripa, na muluna wendo omba ungu nirimu mele pilipuli, pilipu mokoli sepo mundupu naa kelierindu. <sup>20</sup> “Sei.” nirimu mele sembondo upulu-pulu kolea-awili Damasikas pumbu ungu nimbu sipu, pe kolea-awili Jerusalleme ombo nimbu sipu, Judia disiriki sukundu lierimu koleamanga pali andopo nimbu sipuli, pe yombo-lupa moloringi koleamanga andopo nimbu sirindula. Nane ono nimbu sipu nimbili: “Ononga ulu-pulu-kirima kanoko kiri pilku konopu topele toko, Pulu Yemo molemona ongole, ‘Sika konopu topele tondu lepomo.’ ningu Pulu Yemone kanopa peanga pilielemo uluma sangi.” nirindu. <sup>21</sup> Nane aku sipu andopo nimbu sirindumunga Juda yomboma Pulu Yemo popo toko kalolemele, ulka-tembelena molorundu kinia Juda yombomane na ambolko liku toko kondonge seringi.

<sup>22</sup> “Aku-sipa na-kolo Pulu Yemone na lipa tapondorumu mele kiniá kepe aku sipa lipa tapondolemo, akumunga na ya gilipu, ono we-yomboma kinia yombo awilima kinia pilipu lipu serindu mele seliomo ono nimbu siliu. Mosisi kinia, Pulu Yemone ungu-umbu tondorumuma pilku yomboma ningu siringi yema kinia, onone “Wendo ombá.” niringi mele mindi ono semane topo sikiru. Se lupa naa nikiru. Akumu i-sipa: <sup>23</sup> “Pulu Yemone ‘Olio nokopa kondomba ye se lipu mundumbu.’ nimba, nimba talitorumu ye nokoli Karasimu mana omba mindili nombale, yombo kololemelemanga pali yu kumbi lepa yombo-óno-koleana lomboropa ola molomba. Aku sembamonga yunga Isirele yomboma kinia yombo-lupama kinia ono lipa tapondopa pa sendemba.” niringi mele kamu aku sipa wendo orumu. ‘Kanu ye nokoli Karasimuni sika yomboma lipa tapondomba.’ nimbu ono semanemo topo siliu.” nirimu.

**26:24-32**

*Pollone Akiripando “I UNGU NU NIMBU SIKIRUMU “Sika Ungumu.” Nieni.” Nirimu Semanemo (25:13 pulu polko kanani.)*

<sup>24</sup> Pollone kokele aku sipa nimbá nirimu kinia Pesitasini yunga ungumu topa pulua topa ru nimba nimbale: “Pollo, nu amu topono. Nu sukuli awisili serinu akumuni nu lipa amu tondokomo.” nirimu.

<sup>25</sup> Pollone pundu topa nimbale: “Ye Awili Pesitasi, na amu naa tokoro. Nikiru ungumu sika nikiru, umbu-konopu pepili nikiru. <sup>26</sup> I nikiru mele ya ye nokoli kingi Akiripa u pilielemomonga na pipili naa kolopo yundu manda sumbi sipu nimbú. I ulu wendo orumuma yomboma naa kanoko molangi lopi sepa wendo naa orumu-na yu kepe kanorumula. <sup>27</sup> Ye Nokoli Kingi Akiripa, Pulu Yemone ungu-umbu tondorumuma pilku yomboma ningu siringi yemane wendo ombá niringi mele “Sika aku sipa wendo ombá.” ningu kuru mondokonoye? ‘Nuni sika aku siku ningu kuru mondokono.’ nimbu pilkiru.” nirimu.

<sup>28</sup> Kanu-kinia Akiripane Pollondo nimbale: “Na kiniá waltikele nuni ungu ninimu pilipuli ‘Karasinga yemo molambo.’ nimbú konopu lekenoye?” nirimu.

<sup>29</sup> Pollone pundu topa nimbale: “Kiniá waltikele kepe mandala, molo pe walte mandala. Nane Pulu Yemo kinia ungu nimbu mawa sepo nimbili: “Nu kepe, ungu nikiru pilkimili yomboma kepe, ono pali na molio mele molangi.” nimbu nikiru. Aku-na-kolo na ka-sénene ka tongi gilkiru akumundu naa nikiru. ‘Karasinga yomboma

molko Pulu Yemo kinia manda selu siku molonge kinia peanga.' nimbu nikiru." nirimu.

<sup>30</sup> Kanu-kinia kingimu ola gilierimu kinia gapomano ye awilimu kinia kingimunga kemulu Benasi kinia ono pea moloringi yomboma pali ola gilkuli niringimuni, <sup>31</sup> pena punguli, anju yando onono ninguli: "I yemo 'Ka-ulkana pepili.' nimulú aulka se kepe 'Kolopili.' nimulú aulka se kepe paa naa lemó. Yuni ulu se sepa naa kinjemu lémo." niringi.

<sup>32</sup> Akiripane Pesitasindu nimbale: "Yuni 'Romo Gapomano Ye Paa Awili Kumbina Sisamone nanga kotemo piliepili.' naa nilkanje yu 'We pu.' manda nilina." nirimu.

## 27

*Kolomongo-Awili 27-28tolo*

### **Pollo Sipina Kolea-Awili Romo Pumba Molorumu Semanemo**

27:1-12

*Pollo Sipina Romo Pumbá Purumu Semanemo*

<sup>1</sup> 'Olio sipina kolea Italli poropinji pamili.' ninguli niringimuni, Pollo kinia kayombo lupa mare kinia ami-ye wane anderete nokorumu ye Julliasi "Nokou." ningu siringi. Julliasi yu Romo Gapomano Ye Paa Awili Kumbina Sisamonga ami-ye se.

<sup>2</sup> Kolea Aramitiamo sipi se, kolea Esia poropinji nomu kelona taono lemomanga pumbá serimu, aku sipimunga olio ola pumbu, nomuna pumulú purumulu. Kolea Tesallonaika ye Arisitakas pea purumulu. ,Kolea Tesallonaika Masedonia poropinjina lierimu taono se.,

<sup>3</sup> Ipulieli-ukundu kolea-awili Saidono purumulu. Akuna Julliasini Pollo kondo kolopa, 'Yunga pulu lemó yombo ya molemelemane yu nokoko, yu mólo tolemo mélema liku tapondoko siengi kene,' nimba "Ono kano-pu." nirimu. <sup>4</sup> Kolea-awili Saidono mundupu kelepo sipimunga kelepo pumbuli, poporamene sipi kumbikundu topa memba yando orumu-kulu kelepo makaye sepo kolea Saiporas anjukundu purumulu. <sup>5</sup> Nomu-kusana we pumbuli, kolea Sillisia poropinji kinia Pambillia poropinjitolu mundupu kelepo pumbu, kolea LLisia poropinji lierimu Maira taono purumulu. <sup>6</sup> Akuna kanu sipimu mundupu kelierimulu, ami-ye awilimuni Allekesania sipi se kolea Italli poropinji pumbá serimu kanopale sipi akuna oliondo "Pamili waa." nimba lipa memba purumu.

<sup>7</sup> Wale awisili perelepo pumbuli, Naidasi taono nondopo pumbu, poporamene sipimu pipi sirimu-kulu perepole, kolea Kiriti anjukundu makapu sepo pumbu, akuna lierimu taono Sallamoni mundupu kelepo, <sup>8</sup> nomu kelona perelepo ombo pumbu, LLasia taono nondopa lierimu kolea se, aku koleamo imbi leko 'Sipi Manda Lemó Kolea' niringi, akuna purumulu.

<sup>9</sup> Wale awisili we ombo pumba, Juda yomboma kere-langí naa nongo mi toringi walema kepe ombo purumu-kulu kanu kalia-ingina sipima andorumu walema pora nirimu. ,Kalia-ingimanga pali poporome awili sepa torumu walema wendo ombá orumu kinia sipima pali naa andoringi kanumu., No paa awili sepa topa nondopa naa kelemba serimu-kulu Pollone ono liepi-liepi topa nimbale: <sup>10</sup> "Yema, 'Kiniá púmulu liemu sipimu topa mélema pali ondopa, olio kepe nona wangopo kolomolonje.' konopu lekero." nirimu. <sup>11</sup> Aku-na-kolo ami-ye awilimuni Pollo ungu nirimumu pilipa, lipa mokoli sepa, sipi pulu yemo kinia sipi kongono serimu yemo kinia olone niringili mele pilipale "Pamolo." nirimu. <sup>12</sup> "I koleana poporome tolemo kinia sipimu manda naa lemó lemba." niringili kinia sipina moloringi yombo awisilini ninguli: "Manda, poporome awili u naa tokomo kinia Pinikisindu pamolo. Akuna pumulú kinia poporome awili sepa tomba walemanga sipimu manda akuna taltomolo."

niringi. Kolea Pinikis ,nomu suku-singina lierimu ma-kolea, Kiritina lierimu taono se.

*27:13-26*

*Pollo Kinia Pea Sipina Puringi Kinia Poporome Awili Se Topa Nomu-Kusa Topa Orumu Kinia (27:27-44 pea)*

<sup>13</sup> Pe poporome kanga sepa topa, sipimu manda taka lepa memba pumbá mele ningu kanokole "Manda pumulú." ningu sipimu mengo puringi, kolea Kiriti nomu kelona purumulu. <sup>14</sup> Aku-na-kolo wale talo mele ombo purumu kinia poporome paa awili se topa, sipimu nomuna kelepa topa memba sukundu purumu. Kanu poporomemonga imbi ,Giriki unguna, "Yurakillo." niringi. Walte walte nimba yunga walemo wendo orumu kinia torumu. <sup>15</sup> Poporome yando sipa topa enge nirimukulu pumulú purumulu mele manda naa serimu-kulu 'Manda, olio we senga memba pupili.' nimbu sipina ola we molorumulu.

<sup>16</sup> Nomuna sukundu kolea kanga se lierimu, aku koleamonga imbimu Koda, akuna anju sipina pumbuli, sipi purumulumuni sipi kanga kundupa merimumu nondopo lipu ka sepo panjimulundu pererimulu. <sup>17</sup> Yemane sipi kanga kanumu sipi awilina kamu ola liku taltokole, sipi awilina purumulumu "Bultumba." ningu ka marene sipimu makapu seko ka toko ingi siringi. 'Poporomene sipimu kolea Apirika memba pumbá kinia olio tombanje.' ningu mulu-serele wendo liku taltoko, 'We pamili.' niringi. <sup>18</sup> Sipimu poporomemone paa torumu-kulu opalikundu 'Kamu kiri lembanje.' ninguli méle-wale merimuluma liku nona mania-mania seringi.

<sup>19</sup> Opalikundu sipi kongono seringi mélema sipi pulu yema onono liku mania-mania seringi. <sup>20</sup> Wale awisili ena kepe kombokandi kepe mélse naa kanopo, poporome mindi paa awili sepa torumu kinia 'Yombo se ombo olio lipa tapondopa wendo naa limba. Olio sika kolomolo lémo.' nimbu ulu se kelepo naa sepo we molorumulu.

<sup>21</sup> Wale awisili yema kere-langi se naa nongo moloringi kinia ono moloringina Pollo ola gilipa nimbale: "Yema, "Olio kolea Kiriti anju molamolo." nirindu mele pilipu lipu anju we molemolánje kiniá mindili nokomolo mele naa nombo, mélema naa topo eltolemolá. <sup>22</sup> Aku-na-kolo kiniá olio yombo se naa kolomolo kene konopu peanga leko molangi. Sipimu mindi kiri lemba. <sup>23</sup> Nane nikirumunga pulumu niembo piliay. Na Pulu Yemonga kendemande-yemo molopo alieli yunga kongonomo sendelio, kanu Pulu Yemonga angello se kiniá ipulieli na molonduna ombo gilipa <sup>24</sup> nimbale: "Pollo, mini-wale naa mundoyo. Romo Gapomano Ye Paa Awili Kumbina Sisamone nunga kotemo sika pilimbamonga nu nona naa puni. Nu kinia pea sipina pukumili yomboma kepe Pulu Yemone kondo kolopa 'Nu pea konde molonge.' nimu." nimba angellomone nimu. <sup>25</sup> Yema, Pulu Yemone nilimú mele nane pilipuli 'Paa sika nilimú.' nimbu kuru mondolio mele pilipuli, yuni kiniá nando nimu mele paa sika aku sipa sembá kene ono mini-wale naa munduku konopu peanga leko molai. <sup>26</sup> Aku-sipa na-kolo sipimu nomuna sukundu lemó kolea senga kelona sika pumba tomba lémo." nimba Pollone nirimu.

*27:27-44*

*Sipimu Pumba Nomu Kelona Topa Bultorumu Semanemo (27:1 pulu polko kanani.)*

<sup>27</sup> Olio sipina purumulu kinia poporome topa molopili koro talo ombo purumu kanu walemanga pali poporomemone mindi olio topa memba purumu kinia sipimu ye sene kongono naa sepili 'Nomu-Kusa Eria' niringina poporomemone manjipa topa memba purumu. Aku sipu purumulu kinia walte awi-amburumi sipimu mengo puringi yemane pilkuli, 'Kiniá nondopo kolea senga pumulú ombamolo.' ningu pilieringi. <sup>28</sup> Aku siku ningu pilkuli niringimuni, manda manjeli kamo nona mania munduku kanoringi kinia teti sikis mita perimu kanoringi. Kanga-kolte purumulu kinia kelko manda manjeli kamo munduku kanoringi kinia tuwendi sepen mita

perimu kanoringi.<sup>29</sup> Akumu kanokole, ‘Olio kou lieli senga sipimuni memba pumbá kinia olio tombanje.’ ningu mini-wale mundukuli, ‘Sipimu we naa pupili.’ ningu méle umbuna seli kise kane moko toko sipi bulkundu nona mania mundukuli, ‘Ipulieli olio sipina naa topili, kolea welea tangopili.’ niringi.

<sup>30</sup> Sipi kongono seli yemane ‘Olio naa topili, sipimu mundupu kelepo pamili.’ ningu sipi kanga membo purumulumu liku nomuna mania mundoringi. Onone yombomando ninguli: “Sipimu naa pumba we liepili méle umbuna seli mare sipimunga kumbikundu moko topo nona mania mundamili.” ningu aku seringi-na-kolo kolo toko ono onono kiyongo ningu kowa pungíndu aku siku seringi.<sup>31</sup> Kanukinia Pollone ami-yema nokorumu yemo kinia ami-yema kinia onondo nimbale: “Sipi kongono seli yema pea sipina we naa molomulu liemu ono kinia sipina molemele yomboma pali kolonge lémo.” nirimu.<sup>32</sup> Aku nirimu-kulu pilkuli ami-yemane sipi kangamo moko toringi kama luni kari leko nona mania mundoringi.

<sup>33</sup> Kolea nondopa tangomba serimu, muni-kinia-u Pollone ‘Ono kere-lang i nangi.’ nimba yombomando pali tondolo mundupa nimbale: “Koro talo ono kere-lang i se mimi siku naa nongo mini-wale mindi munduku we moloringi.<sup>34</sup> Aku manda naa sekemo kene akumunga nane ono tondolo mundupu nikiru: ‘Ono kere-lang i nongo enge ningu molangi.’ nimbu nikiru. Ono selu kepe paa naa kolonge. Sipimu tomba kinia ononga kimbu ki penge-indi mélema kepe ungu se naa sembá.’ nirimu.<sup>35</sup> Aku nimbale nirimumuni, ‘Ono mini-wale naa munduku, konopu peanga leko kere-lang i nangi.’ nimbale, kanoko molangi yu berete se lipa pike lepa Pulu Yemondo “Ange.” nimbale norumu.<sup>36</sup> Aku serimu kinia yombomane kanokole ono konopu peanga leko kere-lang i liku noringi.<sup>37</sup> (Olio sipina molorumulu mele yombo tu anderete sependi sikis.)<sup>38</sup> Ono kere-lang i noringi olo serimu kinia rasi-witi wale we lierimuna ‘Sipimu umbuna naa sepili.’ ningu nona toko eltoringi.

<sup>39</sup> Kolea tangorumu kinia ono kolea se kanoringi-na-kolo kanoko imbi naa siringi. Ono no kelona kanoringi kinia sipimu manda pumba lemba kolea se kanoringi. Kanokole ‘Sipimu akuna manda pumba lembanje.’ ningu pilkuli niringimuni,<sup>40</sup> ye marene ‘Sipimu naa pumba we liepili.’ ningu méle umbuna selima moko toko nona mania mundoringi kanu mélema ka kari leko mélema nona liepili siye kolko, marene sipimunga mulkowemo liku toko mondoko ‘Sipimu kongono sepo nomu kelona membo pamili.’ niringi. Marene ‘Poporomene sipimu nomu kelona memba pupili.’ ningu sipi kumbina mulu-serele se ola anjeringi kinia no kelona pumulú purumulu.<sup>41</sup> Aku-na-kolo mengo puringi kinia ma se nomuna sukundu lierimuna sipimu pumba topa ingi sirimu. Sipi kumbimu mana topa ingi sipale wendo pumbá pererimu-kulu no topa ombo sipi bulkundu topa bultorumu.

<sup>42-43</sup> Sipimu u elke naa topili ami-yemane ninguli: “Ka-yomboma no leko kowa pungí kene topo kondamili.” niringi-na-kolo ononga ye awilimu ‘Pollo naa tangi.’ konopu lepa nimbale: “Mólo, ka-yomboma naa taa. No lemele yombomane u sipimu munduku kelko no leko no kelona pame.<sup>44</sup> We molonge yomboma unju pallango sipina elke-malke tombama liku ambolko no leko no kelona paa.” nirimu. Aku sekole yomboma pali no kelona ultu puringi. Se nona paa naa wangoringi.

## 28

28:1-10

### *Pollo Kolea Molta Molopale Serimu Semanemo*

<sup>1</sup> No lepo no kelona pumbu pilierimulu kinia “I kolea kanga nomu suku-singina lemó koleamonga imbimu Molta.” niringi. <sup>2</sup> Aku kolea pulu yombomane olio paa kondo kolko liku tapondoko, lo ombo ali paa serimu-na unju sulku sepe kalondokole, sepe keku puluna nondoko mengo pungu mondokole “Pea molamili.” niringi.

<sup>3</sup> Pollone unju kola mare lipa maku topale memba ombo sepena kalorumu kinia kongi-ka-wambiye se sepene norumu pilipale wendo ombo Pollonga kína kongilipa molorumu. <sup>4</sup> Kolea pulu yombomane wambiyemo Pollonga kimu norumu kanokole ono onono ko liku ninguli: "I-yemo yombo se topa kondorumu lémo. Yu nona naa wangomu-na-kolo Sumbi Nili Pelemo Yemone "Yuni aku serimumunga we konde naa molopili. Sika kolopili." nikimu lémo." niringi. <sup>5</sup> Aku-na-kolo Pollone 'Wambiyemo pupili.' nimba kimu tanda sirimu kinia wambiyemo sepena sukundu purumu, Pollo kolou naa kolopa we konde molorumu. <sup>6</sup> Kolea pulu yombo kanumane , 'Wambiyeye sene yombo se kongilimú kinia tomo memena sukundu pulimú kinia yombo kanumu kololemo.' ningu pilku, 'Pollonga kimu akombanje, molo yu topa mundumba kinia kolombanje?' ningu ena awisili ombo purumu kanoko moloringi-na-kolo yu aku sipa ungu se naa sepa we manda molorumu kanokole, ono kelko konopu topele toko ninguli: "I yemo yomboma nokolemo pulu ye se lepomo." niringi.

<sup>7</sup> Aku koleamo nokorumu ye nokolimu yunga ulka paa awilimu nondopa gilierimu. Yemo yunga imbi Papillasi. 'Ono nanga ulkana molamili waa.' nirimu kinia purumulu, wale yopoko yuni olio kere-lang'i sipa nokopa kondorumu. <sup>8</sup> Yunga lapa kangi nomba olo ombo pumba kuru torumu-na we aniembo lierimu. Yu aniembo lierimuna Pollo pumba, Pulu Yemo mawa sepa yu ambolopa sepa peanga sirimu. <sup>9</sup> Aku sipa serimu kinia yu peanga lierimu-kulu kanokole, aku koleana kuru torumu yomboma pali Pollo molorumuna oringi, yuni ono sepa peanga sirimula. <sup>10</sup> Pollone aku serimu-na kanokole olio nokoko kondoko méle awisili siringi. Pe olio sipina pumulú serimulu kinia olio méle mare mólo torumuma onone sipina mengo pungu taltondoringila.

28:11-16

#### *Pollo Kamu Kolea-Awili Romo Purumu Semanemo*

<sup>11</sup> Aku koleana oli yopoko molorumulu kinia sipi se, poporome torumu walema wendo orumu kinia aku koleana ombo nokopa lierimu, kanu sipimunga purumulu. Kanu sipimu Allekesandia taono sipimu. Sipimunga kumbina pulu ye kolo toli 'Susini kango talo olo-pakilia merimu' ningu popo toringi pulu yetolonga none seli méletolo seko sipi kumbina mondoringi. <sup>12</sup> Olio sipina pumbu kolea Molta mundupu kelepo kolea Sairakus taonona pumbu wale yopoko molorumulu. <sup>13</sup> Sairakus taono mundupu kelepo pumbu Risiame taonona purumulu. Opalikundu poporome peanga se topale sipimu paka topa melepa purumu-na olio wale se we pumbu wale talo-sipamonga Putolli taonona pumbu sipimu kamu mundupu kelierimulu.

<sup>14</sup> Aku taonona Karasinga yombo mare moloringi, kanopo liltimulu kinia onone oliondo ninguli: "Ono ya molamili." niringi-kulu koro selu ono-kinia molopole, kolea-awili Romo kamu mania-aulka pumulú purumulu. <sup>15</sup> Karasinga yombo kolea-awili Romo moloringima 'Yema okomele.' niringi pilkuli niringimuni, ono kolea-awili Romo munduku kelko, mare 'Apiasi Makete' niringi koleana ongo olio kanoko liku, mare 'Yombo Ongo Pe-Pu-Pu Seringi Ulka Yopoko Gilierimu Koleamo' niringi koleana ongo olio kanoko liltingi. Pollone kanu Karasinga Romo yomboma oringi kanopale Pulu Yemondo "Ange." nimba konopu peanga lierimu.

<sup>16</sup> Olio kolea-awili Romo kamu sukundu purumulu kinia Romo gapomanomone "Pollo yuyu ulka senga pepili, akuna ami-ye sene nokopili." nirimu.

28:17-31

#### *Pollo Romo Ka-Ulkana Pepale We-Yombo Yu Kano-Pu-Pu Seringima Ungu Nimba Sirimu Semanemo*

<sup>17</sup> Pollo wale yopoko Romo molopale Romo moloringi Juda ye awilima "Waa." nirimu. Ongo maku toringi kinia onondo nimbale: "Nanga ango-keme, nane olionga Juda yomboma kinia olionga anda-kolepalimanga ungu-manema kinia pilipu mokoli

sepo ungu se naa serindu-na-kolo na Jerusalleme molorundu kinia Juda yombomane na ka siku Romo ami-yema siringi. <sup>18</sup> Onone nanga kote senderingi mele Romo gapomano yemone pilipale, "Yu toko kondangi." nimbu ungu se naa pilkiru. Yu we pupili." nirimu. <sup>19</sup> Juda ye awilimane "Mólo." ningu ta niringi kinia nane nimbuli: "Manda, Romo Gapomano Ye Paa Awili Kumbina Sisamone nanga kotemo piliepili. Romo pambo." nirindu. Aku-na-kolo nane nanga Juda yombomanga kote sendembondo ungu se aku sipu naa nirindu. Ono ta ningu na toko kondonge seringikulu aku sipu nirindu. <sup>20</sup> 'Na Romo yando ondumunga pulumu ono nimbu siembo piliangi.' nimbu "Ono waa." nimbu mangiliendu. Olio Isirele yomboma Pulu Yemone "Sembó." nirimu mele 'Sepili.' nimbu nokopo molemolomonga ka-sénene nanga kína ka tongi-na moltkoro." nirimu.

<sup>21</sup> Romo moloringi Juda ye awilimane pundu toko Pollondo ninguli: "Judia molemele Juda yemane nu serinu mele olio piliamili pepá se toko yando naa siringi. Yando oringi yemane nuni ulu se seko kinjerinu mele ungu se naa ningu siringila. <sup>22</sup> Aku-na-kolo olio Juda yombomane ungu-manema pilipu selemolo mele Juda yombo marene munduku kelko ulu konde se wendo orumu mele pilku selememe akumu koleamanga pali yombo awisilini "Seko kinjikimili." nilimili kene kanu ulumundu nu konopumuni pilieleno mele olio piliamili ningu sieni." niringi.

<sup>23</sup> Onone aku ninguli Pollo-kinia maku tongue wale se ningu taltoringi. Kanu walemo wendo orumu kinia „Juda, yombo paa awisili Pollo perimu ulkana sukundu sukundu ongo maku toringi kinia yuni orili-u pulu polopa ungu nimba molopili ipupini lierimu. Yuni Pulu Yemo yomboma nokopa kingimu molomba mele nimba sipa, Mosisini torumu bokuma kinia, Pulu Yemone ungu-umbu tondorumuma pilku yomboma ningu siringi yemane toringi bokuma kinia, aku bokumanga ye se ombe sembá mele niringi, kanumu Juda yomboma pilku 'Wendo ombá.' ningu nokoko moloringi mele we nokoko molemele, 'Kanu yemo Yesusindu niringi.' nimba 'Onone "Sika lepomo." ningu kuru mondangi.' nimba tondolo mundupa ono nimba sirimu. <sup>24</sup> Kanu-kinia maku toko moloringi yombo marene "Sika nikimu." ningu kuru mondoringi, aku-na-kolo marene "Kolo tokomo." ningu kuru naa mondoringi.

<sup>25-29</sup> Pollone ono ungu se 'Paa piliangi.' nimba onondo ungu se kamu nimbale: " 'Ononga anda-kolepalima piliangi.' nimba Mini Kake Sélimuni ye Aisayando ungu-umbu tondopa nimba sirimu ungumu pilipa ono yando nimba sirimumu sika nirimu. „Mini Kake Sélimuni Aisayando nirimu mele i-sipa: „

"Nu i yombo molemelena pungu i-siku ni-pani:

"Pulu Yemone nimbale:

"Ono komu sendeko unguma pilingí-na-kolo

      ungu-pulumu naa pilingí;

mélse neme-neme ningu kanonge-na-kolo

      mélemo kanoko imbi naa singí.

Ononga konopuma kamu pipi silimili;

komumane pilingindu siye kololemele;

'Mélse mongomane naa kanomolo.' ningu

      mongo kumbulimilimunga aku siku senge.

Aku naa selemolánje

      mongomane sika kanoko,

      komumane sika pilku,

      konopumane sika ungu-pulumu pilkuli,

konopu topele toko na moliona olemolá

      nane ono „kuru torumuma, sepo peanga silka.”

nikimu." ni."

nirimu-na „pilipale Aisayane aku sipa nirimu“. Mini Kake Sélimuni Aisayanga kerena nirimu mele ono Juda yombomanga anda-kolepalimane u aku siku seringi mele ono sika kiniá aku siku selemelémonga ono i ungumu piliangi: Pulu Yemone yomboma lipa tapondopa, ono mindili nolemolá aulkana wendo lipa, yu-kinia pea molko kondonge aulkana lipa mondomba mele ‘Juda yombo ultu molemele yombo-lupama piliangi.’ nimba Pulu Yemone olio „Juda, ye mare „yombo-lupama, moloringina lipa mundorumu. Kanu yombomane kanu ungumu sika pilku lingí.“ nirimu.

Pollone aku sipa nirimu kinia Juda yomboma onono angelema niliku konopu awisili liku munduliku puringi.

<sup>30</sup> Pollo kalia-ingi talo pali Romo ulka senga yuyu perimu. Yomboma alieli yu molorumuna oringi kinia “Molamili waa.” nirimu. <sup>31</sup> Yombo sene Pollone ungu nimbá aulkamo pipi naa siengi yuni Pulu Yemo mélema pali nokopa ye nokoli kingimu molemo molomba mele kinia, Ye-Awili Yesusinga semanemo kinia, Yesusi Pulu Yemone ‘Lipu mundumbu.’ nimba, nimba taltorumu ye nokoli Karasimu molorumu mele kinia, yomboma pipili naa kolopa tondolo mundupa nimba sirimu.

„Aku pea.„

## POLLONE PEPÁ TOPA MUNDORUMUMA

(Romo, U-Korini, Pe-Korini, Gallesia, Epesasi, Pillipai, Kollosi, U-Tesallonaika, Pe-Tesallonaika, U-Timoti, Pe-Timoti, Taitasi, Pillimono)

*Pollone Pepá Topa Mundorumumanga Ungu-Pulu Se*

'Pollo molopa serimu mele pilambo.' ninguli Pillipai 3:3-11, Pe-Korini 11:22-29, 12:1-10, Gallesia 1:13-24, U-Timoti 1:12-16, Lipa Mundorumu Yema 22:1-21, 26:1-23 kanani. Yuni 'Pulu Yemonga kongonomo sambo.' nimba Karasinga yomboma u mindili silipa andorumu (Lipa Mundorumu Yema 7:58, 8:1,3, 9:1-2,13-14). Pe konopu topele topa Yesusi omba molorumu mele kepe, olionga nimba senderimu mele kepe, kiniá olio nokolemo mele kepe "Sika." nimba kuru mondopa Karasinga yemo molopa, yunga kongonomo andopa serimu semanemo Lipa Mundorumu Yema 9:1 pulu polopa molemo. Pe yu Yesusinga ungumu andopa nimba, "Yesusi yu sika Pulu Yemonga Malo, yu ye nokoli Karasimu. Yu-mambele Pulu Yemone olio kanopa peanga pilimba aulkamo. Mosisini sirumu ungu-manemane unguri naa sembá." nirimu kinia yu mindili siringila (akumunga ungu mare Lipa Mundorumu Yema 9:16,22-25,28-30, 14:19-20).

Yesusini lipa mundorumu ye wemane Karasinga Juda yomboma mindi nokoko unguma ningu siringi-na-kolo Pollo koleamanga pali andopa Karasinga ungumu Juda yombo naa molko yombo-lupa moloringi yomboma nimba sirumu (Lipa Mundorumu Yema 9:13-14, 18:6, 22:21, Gallesia 1:15-17, 2:2,8). Aku serimumunga Juda ye marene yu-kinia mumindili kolokole toko kondonge seringi kinia Romo ami-yemane yu Jerusalleme ka siku panjikuli, pe Sisaria mengo pungu panjiku, pe kamu Romo mengo pungu ka siringi (Lipa Mundorumu Yema 21:27—28:16,30). 'Kolea-awili Romo kalia-ingi talo molopale, kelepa ka-ulcana ultu pumba Romo mundupa kelepa kolea marenga kalia-ingi mare kelepa andopa semane peangamo topa sirimula (Kiriti kepe, Girisi kepe, Sipéne kepe purumu.' ningu pilielemene; Taitasi 1:5, 3:12, Romo 15:24,28).

U pumba ungumu nimba sirumu kinia konopu topele toko Karasinga yomboma moloringima pe walte walte pepá topa mundorumu. Pepá topa sirumu mare mania purumunje, kiniá naa lemó. Mare maria naa purumuma i boku UNGU-KONDEMOnga sukundu molemo. Pepá se topa simbando alieli u kumbi lepa yunga imbi topa yombo talapemanga imbi torumu, bokumanga yu-melete-melete kolomongo-awili wane, kolomongo-kanga wane (1:1) kanani. Bokumanga yu-melete-melete pulu polopa torumumanga kumbi lepa ungu-pulumu torumulu molemo, akuma kananila.

Pollone pepáma torumumanga ungu-pulu mare ya pora nikimu.

### ROMO

## Pollone ROMO Yomboma Pepá Topa Mundorumu Bokumu

*I Pepá Topa Mundorumumanga Ungu-Pulu Mare*

Pollo yuyu kinia yuni pepá topa sirimumanga ungu-pulu mare inia yakondo nondopa gomo 676 molemo. Pollo yuni i bokumu pepá topa Romo yomboma sipa mundorumu akumu Romo 1:1,7 nimba silimú.

**Romo** akumu **kolea** Italli kolea-awilim, ya Papua Nu Gini sukundu kolea-awili Mosipi mele. Romo yemane andoko yombo talape lupa lupamanga kolea awisili toko kalkole koleama kinia yomboma kinia tondolo munduku nokoringi. Pe Yesusi kinia Pollotolo moloringili kinia Romo-gapomanomone aku-sipa Mediterenia Nomu winju mendo anju yando koleama pali nokorumu. Kanu walemanga kolea-awili Romo kanu koleamanga pali kolea-awilim.

Pollone pepámo torumumunga **ungu-pulu se i-sipa:** Yu u Romo naa pupili yuni 'Romo paa pambo.' nimba molopale i pepámo topa sirimu (Romo 1:8-15, 15:22-29).

**Ungu-pulu se:** Yesusini "Nanga kongonomo sende-paa." nimba lipa mundorumu ye se u Romo pumba Karasinga yomboma Karasi yunga ungu-manga pulumu u naa ningu siringimunga Pollone pepá topa nimba sirimu, akumunga i bokuna sukundu olio Karasinga yomboma sumbi sipu molomolo mele ungu tondolo peangama molemo.

**Ungu-pulu se:** Juda yomboma kinia kepe, Juda yomboma naa moloringi yomboma kinia kepe, Pulu Yemone 'Yomboma nokomba ye se lipu mundumbu.' nimba, nimba taltorumu ye nokoli Karasi akumu Juda yombomanga mindi nimba naa lipa tapondorumu. Ultukundu yombomanga mindi nimba naala lipa tapondorumu. Juda yombomane u pilku seringi mele manda naa lipa tapondorumu. Ono pali ulu-pulu-kiri konopuna peli yomboma. Yesusi Karasi yu-mambele ononga pali Pulu Yemone yomboma sumbi siku molonge kanomba aulkamo (Romo inia 1:14-17, 3:21-24,27-30, 6:23, 14:1-8,17-18). Pulu Yemone yomboma aku-sipa lipa tapondorumumunga ono seko molonge mele nimba sirimula (12:1—15:13).

**Ungu-pulu mare** boku ambolkonomonga pealemekondo i-siku kanani: "8. bilip", "45. stretpela man", "18. katim skin", "2. arapela lain".

Ya ungu-pulumu pora nikimu.

*Kolomongo-Awili 1-4*

### **Pulu Yemo Kinia Malotolo "Sika" Nimbu Kuru Mondolemolo Aku Ulumuni Mindi Pulu Yemone Olio Kanopa 'Yombo Sumbi Nilima' Nimba Kanolemo Aulkamo Akisindilimú Ungu Se**

1:1-7

*Yesusini "Kongono Sende-Paa." Nimba Lipa Mundorumumunga Pollone Aku Kongonomo Serimu Mele Nimba Sirimu Ungu Se*

<sup>1</sup> Na Pollo, Karasi Yesusinga kongonomo sendeli kendemande-yemo, yuni 'Nanga kongonomo sende-pu.' nimba na lipa mundupa, 'Pulu Yemonga semane peangamo ningu siliku andou.' nimba taltorumu yemo molopole ,ono Romo yomboma, i pepámo topo sikiru, <sup>2</sup> kanu semane peangamo koronga-u ,Yesusi mana naa opili, Pulu Yemone 'wendo ombá' nimba, nimba panjipa, yunga ungu-umbu tondorumuma pilku yomboma ningu siringi yemane 'bokuna molopili tangi.' nirimu kinia yunga boku kake sélimu toringi molemo semane peangamo. <sup>3</sup> Kanu semane peangamo Pulu Yemo yunga Malo, olionga Ye-Awili Yesusi Karasimunga semanemo. Yu ye nokoli kingi Depitini kalopa lillimu yombomane meringi yemo. <sup>4</sup> 'Yu Pulu Yemonga ye kake sélimu.' ningu kanangi.' nimba yu toringi kolorumu kinia Pulu Yemo yunga tondolomone yu yombo-óno-koleana topa makisinderimu-na lomboropa ola molorumu aku tondolomone yu Pulu Yemonga Malo molorumu mele 'kanangi.' nimba Pulu Yemone lipa ora sirimula. <sup>5</sup> Yesusi Karasini serimumunga Pulu Yemone 'Yesusinga imbi ola molopili.' nimba olio we kondo kolopa olio 'yunga kongonomo sende-paa.' nimba lipa mundorumu kongonomo semolo tondolomo sirimu. Aku kongonomo i-sipa: Koleamanga pali yombomane , 'Yesusi sika Pulu Yemonga Malo. Sika olio lipa tapondomba.' ningu, kuru mondokole yuni "Saa." nilimú unguma pilku liku senge kongonomo andopo semolo. <sup>6</sup> 'Koleamanga pali yomboma' nikiru akumu ,ono Romo yomboma i pepámo topo sikirumu, onondo pea nikiru. Ono pea Pulu Yemone nimba taltopa 'Yesusi Karasinga yomboma molangi waa.' nirimu yomboma.

<sup>7</sup> Ono Romo yomboma Pulu Yemone konopu mondopa, ono nimba taltopa 'Yunga yombo kake selima molangi waa.' nirimu yomboma nane i pepámo ono topo sikiru.

Olionga Lapa Pulu Yemo kinia Ye-Awili Yesusi Karasitolone ono we kondo kolko, 'Ono konopu pe nipili taka leko molangi.' niengili.

**1:8-15**

*Pollone 'Romo Yomboma Kano-Pamboa!' Nirimu Ungumu*

**8** U nane onondo nikiru: Ono Yesusi Karasi 'Sika.' ningu kuru mondolemele mele ma-kolea pali yombomane semane toko silimilimunga nane Yesusi Karasinga imbi mangilipu nanga Pulu Yemo kinia "Ange." nikiru. **9-10** Nane Pulu Yemo kinia ungu niliu kinia alieli nane ono nimbu pilipuli ono kepe , 'tondolo pupili molangi.' nimbu, Pulu Yemo mawa sepo nimbu molio mele nanga tondolomane pali yunga kongonomo mindi tondolo mundupu sepo yunga Malonga semane peangamo andopo topo siliu aku Pulu Yemo mangikuli "Sika Pollone nu-kinia olionga nimba mawa sendelemonje?" ningu mangilielemolánje yuni "Sika aku sendelemo." nilka. 'Na ono molemelena wambo.' nimbu 'Pulu Yemone aulka se lipa sipili.' nimbu alieli tondolo mundupu yu mawa sepo moliola.

**11** 'Ono , 'Karasi sika.' ningu pilielemele yomboma, kamu kuru mondoko konopu tondolo pupili molangi kene Mini Kake Sélimuni ono sewi anjipa molko kondonge ulu-pulu mare sipili kene ono lipu tapondambo pea molamili wamboa!' nimbu aku sipu mawa sepo molio. **12** 'Nane kuru mondolio ulumuni ono lipu tapondambo. Onone kuru mondolemele ulumuni na liku tapondangi. Aku semolo kinia na kepe ono kepe olio pea kuru mondolemolo mele paa tondolo pupili.' nimbu pilipuli 'Paa wamboa!' nimbu molio. **13** Ango-keme, nane wale awisili 'ono molemelena kanambo wamboa!' konopu lelio-na-koło u aulka se naa lepa ulu wendo olemomane na pipi silimú, aku konopu lepo molio mele 'kiniá paa piliangi.' nimbu ono nimbu sikiru. Na kolea lupamanga andopo yomboma 'Pulu Yemonga bolangoma molangi.' nimbu lipu tapondolio mele 'aku sipu ono kepe molemele mele tondolo pupili lipu tapondambo.' nimbu 'paa wamboa!' nimbu molio.

**14** Giriki yomboma kinia we-yombo-lupama kepe, pilipa kondoli pelemo yomboma kinia we-umbu-konopu pelemo yomboma kepe, akupokonga pali kongono sendeli kendemande-yemo Pulu Yemone 'molani.' nirimu-na naa sembó kinia manda naa sembá. **15** Akumunga ono Romo yomboma kepe 'semane peangamo topo siembo.' nimbu tondolo mundupu pilipu molio.

**1:16-17**

*Semane Peangamo Pulu Yemone Yomboma Lipa Tapondolemo Tondolomonga Ungu Se*

**16** Aku semane peangamonga Pulu Yemone yomboma lipa tapondopa mindili nolemolá aulkana wendo lipa yu-kinia pea molko kondonge aulkana lipa mondolemo tondolomo pelemomonga na semane peangamo topo simbundu pipili naa kololio. Juda yomboma kumbi lepa, we-yombo-lupama kinia pea, akumanga yomboma , 'semane peangamo sika' ningu, kuru mondolemele yomboma pali i semane peangamone lipa tapondolemo. **17** Pulu Yemone yomboma kanopa 'Yombo sumbi nilima.' nimba kanolemo mele aku semane peangamone lipa ora silimú kanumu. Olio alieli 'Sika.' nimbu kuru mondolemolo kanu ulumuni mindi Pulu Yemone olio 'yombo sumbi nilima' nimba kanolemo. Pulu Yemonga bokuna ungu se molemo akumuni aku sipa nilimúla. Akumu i-sipa:

'Yombo sene 'sika' nimba  
          kuru mondomba yombomo  
Pulu Yemone kanopa 'yombo sumbi nílimu'  
          nimba kanomba yombomo mindi  
          konde molopa kondopa mindi pumbá.'

nilimú.

**1:18-32**

*Pulu Yemone Yomboma Kinia Pali Mumindili Kololemomonga Ungu Se  
1:18-23*

*Yombomane Pali Pulu Yemo Bulu Siringimunga Ungu Se*

**18-19** Pulu Yemo yu molemo mele yuyu ono lipa ora silimú-na yombomane manda mona kanonge akumunga yuni mulu-koleana kanopa molopale yu bulu siku ulu-pulu-kiri selemene yomboma aku selemelena ono kanopa kiri pilipa ono umbuna simba selemene mele lipa ora silimú. Aku selemelena onone ungu-sikamo toko mania mundulimili. **20** Pulu Yemone mulu matolo serimu kinia kepe yandopa yandopa méle seriumma pali yombomane kanolemele akumunga yunga alieli pepa mindi pulimú tondolomo kinia yu yuyu ulu-pulumu pelemo mele kinia mongomane naa kanolemele uluma kanokole pilieemele. Yuni serimu mélemane lipa ora silimú kanolemele akumunga yuni ‘ono mongo littingi kene mindili nangi.’ nimbá kinia onone ‘naa pilierimulu.’ manda naa ningí.

**21** ‘Pulu Yemo sika molemo.’ sika niringi-na-colo ‘Yu Pulu Yemo’ ningu yunga imbi ambolko paka tondoko kape ningu yu-kinia “Ange.” naa niringi, ono konopu naa pepa amu mele toko konopuma simbulu topili moloringi. **22** ‘Olio pilipa kondoli paa pelemo.’ sika nilimili-na-colo ono konopu naa peli yomboma molko, **23** Pulu Ye alieli molopa mindi púlimu popo naa toko, munduku kelko, kolali seko mana-yomboma kinia kera kinia wambiye kinia we-méle-takara mélemanga pali none selima manda manjiku seko anjiku ‘Olio nokolemele pulu yema’ ningu popo toko kape niringi.

**1:24-32**

*Yombomane Ulu-Pulu-Kiri Lupa Lupa Awisili Seringimunga Ungu Se (1:18-32 pali)*

**24** Aku siku Pulu Yemo kinia seko kinjeringimunga yuni nimbale: “Manda, ono konopu kirimane kundupa memba purumu kinia ulu-pulu-kiri awisili seko wa ulu-kirinale kinia ononga kangima onono seko kinjiku, aku selemene mele we yakala kolko seko molangi.” nimba siye kolorumu. **25** Pulu Yemonga ungu-sikamo munduku kelko kolali seko kolo toli ungumu konopu mondoko ‘piliamili.’ ningu, Pulu Yemone serimu mélema liku anjiku ‘aku mélemane olio nokolemele pulu yema’ kolo toko ningu popo toko kape ningu, mélema pali serimu Pulu Ye sikamo, yunga imbi alieli ambolko paka tondolemolánje papu, aku Pulu Yemo munduku kelieringi. Mélema pali serimu Pulu Yemonga imbi paa sika ‘alieli ola mindi molopili.’ nimbu ambolopo paka tondamili.

**26** Aku seringimunga Pulu Yemone ‘ono ulu kirima we yakala kolko seko molangi.’ nimba ono siye kolorumu. „Akumunga, ambomane yema-kinia selemolá mele naa seko ambomane amboma-kinia onono seringi. **27** Aku sipa mele yemane kepe amboma-kinia konopu mondoko selemolá mele munduku kelko, yema-kinia onono konopu mondoko seringi. Yemane yema-kinia pipili seli ulu kirima seringimunga ononga ulu seko kinjeringimanga méle kalolima lingí.

**28** Ulu seringimunga ungu se pelemóla, akumu niembo: ‘Pulu Yemo sika molemo mele naa pilipu molomolo kinia unguri mólo.’ niringi akumunga Pulu Yemone ‘Ulu paa kirima konopuni pilingí konopuma mindi pepili yombomane manda naa pilku selemolá mele we seko molangi.’ nimba siye kolorumu.

**29** Ononga konopumanga ulu-pulu-kiri lupa-lupa awisili perimumunga onone ulu kirima seko, méle awisili taltolemelema kanoko yakala kolko ‘Liemboa!’ konopu leko, yombo mare-kinia wa ulu-kirinale seko,

aku uluma mindi seko molemele.  
 Yombo se méle awisili taltolemomo kanoko kiri pilku,  
 yomboma toko kondoko,  
 'Yomboma-kinia taka lepo molamili.' naa ningu irinale seko,  
 kolo toli uluma seko,  
 yomboma-kinia konopu kiri panjiku seko kinjiku,  
 aku uluma sengendo mindi konopu kimbu siku molemele.  
 Onone yombomanga ungu-bulkundu nindiku,  
<sup>30</sup> "Yombo sene ungu se i-sipa nimu." ningu kolo toko,  
 Pulu Yemo kinia konopu kiri panjiku,  
 yombomando ungu kiri awisili ningu,  
 mongo kondoko,  
 ononga imbima ambolko paka toko, kála seko,  
 ulu-pulu-kiri mare konde toko sengendo  
 konopumane pilku 'i-sipu samili.' ningu seko,  
 anupili lapalini ungu nilimilima naa pilku liku seko  
 ononga unguma pilku mokoli seko,  
<sup>31</sup> ononga konopu peanga se naa pepili molko,  
 ulu se 'aku sipu samili.' ningu panjikuli naa seko,  
 ononga genupili lapali yomboma konopu naa mondoko,  
 we-yomboma kondo naa kolko seko kinjiku,  
 aku selemele. <sup>32</sup> Pulu Yemonga ungu-mane sumbi nílimuni 'Yombomane aku uluma  
 selemelema paa kolonge.' nimba molemo ungu-manemo sika pilielemene-na-kolo  
 onone ta ningu ulu-pulu-kiri akuma we seko molemele. Akumu mindi mólo. Yombo  
 aku ulu-pulu-kirima seko molemele yombomanga imbima ambolko paka tondoko  
 kape nilimilila.

## 2

2:1-16

*Pulu Yemone Kote Sumbi Sipa Pilipa Apurulimú Ungu Se*

<sup>1</sup> Akumunga, yombomane ulu selemelema onone kanokole 'I yombomane seko kinjikimili.' ningu apuruku "Aku sekemelemonga Pulu Yemone papu ono "Mindili nangi." nipili." nilimilimu manda naa selemo. Ono 'ulu se naa sepo kinjilimulu.' konopu lekole yombo lupamando 'Seko kinjilimili.' nilimili kinia aku siku ono onono 'Sepo kinjilimulu.' nilimilila. Yombomane ulu kirima selemele mele ono onono aku siku ulu kirima selemelemonga yombo lupamaaku siku manda naa apurungí. <sup>2</sup> Kiniá olio pilkimulu: Yombo aku ulu-pulu-kirima selemelema Pulu Yemone kanopa apurupale 'Seko kinjikimili.' nilimú akumu sumbi sipa pilipa nilimú. <sup>3</sup> Akumunga onone yombo lupama kanoko apuruku 'Seko kinjikimili.' nilimili-na-kolo ono onono aku sikula seko kinjilimili akumu Pulu Yemone yomboma apurupa 'Seko kinjeringimunga mindili nangi.' nimbá kinia 'ono mundupa kelepa aku sipa ononga uluma apurupa naa nimbá.' konopu lemeleye? <sup>4</sup> Molo Pulu Yemone ono sepa kondolemo mele 'Unguri mólo.' ningu bulu siku molemeleye? Pulu Yemone ono-kinia ulu awisili sepa kondopa, ono-kinia popenge sepa mumindili naa kolopa, 'ononga ulu kirimanga iseli-u pundu naa tambo.' nimba molemo. Pulu Yemone aku sipa ono-kinia sepa kondolemo ulumuni ono ononga ulu-pulu-kirima kanoko kiri pilku konopu topele tongue aulkana pungí mele lipa ora silimú mele naa pilkimiliye?

<sup>5</sup> Aku-sipa na-kolo ono konopu tondolo munduku konopu topele naa tolemelemonga Pulu Yemone mumindili kolopa kote sumbi sipa pilimba walemo mona lemba kanonge kinia Pulu Yemone ono-kinia mumindili paa olandopa kolopa méle kalopa

mindili simba. <sup>6</sup> Yombomane pali yu-melete-mele selemele uluma apurupale Pulu Yemone ono yu-melete-mélé kalomba.

<sup>7</sup> Yombo marene ‘Pulu Yemo kinia yunga pa sélimu kinia molopo kondopo, Pulu Yemone ‘nu seko kondorunu.’ nimbámonga nanga imbi ola molopili molopo, alieli molopa mindi pumba pora naa nili ulu-pulumu paa liemboa!’ ningú kála seko ulu peangama selemele yomboma Pulu Yemone alieli molopa kondopa mindi puli ulu-pulumu simba. <sup>8</sup> Aku-sipa na-kolo yombo marene ‘Yombo lupama unguri mólo. Pulu Yemo unguri mólolá.’ ningú ono onono pilku seko ungu sikamo munduku kelko bulu siku, ulu kirima mindi pilku selemele yomboma Pulu Yemone ono paa mumindili kolopa ‘Méle kalambo.’ nimba mindili nongo molonge ulu-pulumu simba.

<sup>9</sup> Seko kinjilimili yomboma pali ulu umbuna awilima kinia mindili noli awilima kinia ono-kinia yu-melete-mele wendo ombá. Juda yomboma kinia kepe paa sika wendo ombá; yombo-lupama kinia wendo ombála. <sup>10</sup> Aku-na-kolo yombo marene seko peanga silimili yombomando yu-melete-mele Pulu Yemone nimbale: “Ono na kinia nanga pa sélimu kinia pea kopu sepo molopo kondopo, ‘Seko kondoringi.’ nimba imbi ola molopa konopu pe nipili molangi.” nimbá. Juda yombomando kepe paa sika aku sipa nimbá; yombo-lupamando kepe nimbála. <sup>11</sup> Pulu Yemone yombo talapema lupa lupa naa apurupa, yomboma pali sere lepa apurumba akumunga ‘Juda yomboma lupa, we-yomboma lupa.’ nimba yombomanga uluma naa apurumba. „Manda selu sipa apurumba.»

<sup>12</sup> We-yombomane Mosisini Pulu Yemonga ungu-mane nimba sirimuma naa pelemo-na naa pilkuli ulu-pulu-kirima selemele yomboma sika Pulu Yemone ononga kote pilipa “Mindili nangi.” nimbá-na-kolo ‘Nanga ungu-manema pulua toringi.’ naa nimbá. Juda yombomane Pulu Yemonga ungu-manema ono-kinia pelemo akuma pilkuli, ulu-pulu-kirima selemelemonga Pulu Yemone ononga kote pilipale ‘Ono nanga ungu-manema pulua toringi.’ nimba ono “Mindili nangi.” nimbála.

<sup>13</sup> Yombomane Mosisini Pulu Yemonga ungu-mane sirimuma komumane mindi pilielememonga Pulu Yemone kanopa ‘yombo sumbi nilima’ nimba naa kanolemo, mólo. Ungo-manemane ‘Saa.’ nilimú mele pilku sengena panjiku selemele yomboma Pulu Yemone kanopa ‘yombo sumbi nilima.’ nimba kanolemo akumunga „Pulu Yemone aku sipa yomboma pali sumbi sipa apurupa “Mindili nangi.” nimbá.»

<sup>14</sup> (Juda yombo naa molemele yomboma sika Pulu Yemonga Mosisini ungu-mane nimba sirimuma naa pelemo-na naa pilku molemele-na-kolo we konopumuni pilkuli ‘I-sipu sembó kinia peanga.’ ningú pilkuli Pulu Yemonga ungu-manemane ‘Saa.’ nilimú mele aku siku selemele. Sika ono onono Pulu Yemonga ungu-manema naa pelemo-na-kolo aku siku selemele kinia Pulu Yemone ungu-manemane nimba molemo ono onono we pilielemene mele mona lemó. <sup>15</sup> Kanu yombomane selemele ulumane Pulu Yemonga ungu-manema ononga konopumanga pelemo mele lipa ora silimú. Onone uluma selemele kinia ononga konopumane apurupale ‘I-siku sekemele seko kinjikimili. I-siku sekemele seko kondokomele.’ nilimú mele konopumane pilielemene aku sipa Pulu Yemonga ungu-manema sika ononga konopumanga pelemo mele ononga konopumane lipa ora silimúla.) <sup>16</sup> Akumunga, Pulu Yemonga kote walemo wendo ombá kinia Yesusi Karasi kote pilieli yemo molopa Pulu Yemonga kote pilindipale yombomanga konopumanga lopi sepa pelemo uluma kepe apurumbando yomboma pali aku sipa pilipa apurupa kote pilimba. Semane peangamo topo siliumuniaku sipa nimba silimú.

2:17-29

*Juda Yombomane ‘Ungu-Manemane Olio Manda Lipa Tapondomba.’ Konopu Lieringi Ungo Se*

<sup>17</sup> Pe kiniá, ono 'Juda yomboma molemolo' nilimili yomboma; 'Pulu Yemonga ungu-mané Mosisini nimba sirimuna pilipu sepole manda molemolo.' ningú, 'Olio Juda yomboma mindi Pulu Yemone nimba taltopa 'Nanga yomboma.' nirimu yomboma molemolo, ono we-yombomanga Pulu Yemo mólo.' ningú kála seko ononga imbima ambolko paka toko, <sup>18</sup> Pulu Yemone 'ono sangi.' nimba konopu mondolemo mele pilku, Pulu Yemonga ungu-manema ono mane siringi mele pilkuli ulu peanga sumbi nilima apuruku pilku 'ima peanga' ningú, <sup>19-20</sup> ono pilkuli 'Pulu Yemonga ungu-manema sika olio-kinia pepa ungu-puluma kinia ungu-sikama kinia akuma paliaku ungu-manema kinia sika pelemo akumunga olione mongo kiri lepa aulka naa kanolemele yomboma sika lipu tapondopo membo andopo, simbulu tolina molemele yombomanga olio sika pa sendelima molopo, yombo konopu naa pelemoma kinia bolango kangama kinia sika mane silimulu.' nilimili.

<sup>21</sup> Aku siku sika nilimili liemu onone yombo lupama mane silimili mele ono onono nambi semu-na mane naa silimiliye? Onone yomboma mane sikuli "Wa naa liengi." nilimili liemu pe ono onono nambi semu-na wa limilíye? <sup>22</sup> Onone yombomando "Ambo ye pulima ye lupama kinia wa ulu-kirinale naa seko, ye ambo lilima ambo lupama kinia wa ulu-kirinale naa sangi." nilimili liemu pe ono onono nambi semu-na aku siku selemeleye? Yombomane we-mélema anjiku 'olionga nokolemele pulu yema' ningú popo tolemele mélema kanoko kiri pilielemene liemu pe Juda yombo naa molko we-yombo molemelemane ulkama takoko akuna sukundu pungu kanu mélema anjiku popo tolemele ulkamanga sukundu pungu mélema nambi semu-na kanoko peanga pilku wa limilíye? <sup>23</sup> Onone 'Pulu Yemonga ungu-manema olio-kinia mindi pelemo akumunga olio yombo peanga olandopama.' ningú ononga imbima ambolko paka tolemele liemu nambi semu-na Pulu Yemonga ungu-manema pulua tolemelemane Pulu Yemonga imbimu seko kinjilimiliye? <sup>24</sup> Onone aku siku selemelemonga ungu se Pulu Yemonga bokuna molemo akumu i-sipa:

'Ono Juda yombomane selemelemonga

Juda yombo naa molemele yombomane  
Pulu Yemo marake seko  
yunga imbibmu ungu-taka tondolemele.'

nimba molemo.

2:25-29

### *Juda Yombomane Kangomanga Kangi Se Kopisiku Wendo Litingimunga Sika Ungu-Pulumunga Ungu Se*

<sup>25</sup> Ono Juda yombomane ungu-manema pilku sengena panjiku engi liemu kangomanga kangi se kopisiku wendo limili ulumuni ono lipa tapondolemo, aku-nakolo ungu-manema pulua tongi liemu kangomanga kangi se kopisilimilimuni ungu se naa selemo. Aku siku selemelemonga yombo kangi se naa kopiseli yomboma mele molemele. <sup>26</sup> We-yombomane kangi se naa kopisikuli Pulu Yemonga ungu-manemane 'Saa.' nilimú mele pilku engi liemu Pulu Yemone ono kanopa 'yombo kangi se kopiseli 'Juda, yomboma mele molemele.' nimba naa kanombaye? <sup>27</sup> Kangi se naa kopisiku ungu-manema sengena panjiku selemele yombomane ono Juda yombo kangi se kopisiku ono-kinia ungu-mané pelemoma pulua tolemele yomboma onondo ninguli: "Pulu Yemonga ungu-manema pulua tolemelemonga aku siku seko kinjilimili kene ono papu mindili nangi." ningí.

<sup>28</sup> Yombo se yunga kangi kopiselimi mindi kanopale 'yu Juda yombomo' nimbámo yu sika Juda yombomo mólo. Kangi se kopisiku wendo liku eltolemele akumu 'Kangikundu mindi unguri sepili.' ninguli selemele kinia unguri naa selemo.

<sup>29</sup> Yombo se konopuna sukundu ungu se selemo akumu mindi sika Juda yombomo molemo. Kangi se kopisiku wendo limili akumunga pulumu konopuna sukundu Pulu

Yemonga yombomo nimba mako pelemo. ‘Kangi se i-siku kopisiku wendo liengi.’ nilimú ungu-manemone yuyu unguri naa selemo. Pulu Yemonga Minimuni konopuna sukundu selemo akumuni kanu yombomo lipa tapondolemo. Aku yombomo, we-yombomane kanoko peanga pilku kape ningu imbi ambolko paka naa tondolemele, Pulu Yemone yu kanopa peanga pilipa kape nimba yunga imbimu ambolopa paka tondolemo.

### 3

3:1-8

*Pulu Yemone ‘Sembó.’ Nimba Panjilimú Mele Paa Sika Selemo Ungu Se*

<sup>1</sup> Juda yombomane kangi se kopisilimili aku ulu-pulumuni naa lipa tapondomu, liemu Juda yomboma we-yombo-lupamanga nambi seko olandopa molongeye? Molo kangi se kopisilimili ulu-pulumunga nambolka ulu peanga se wendo ole moye? <sup>2</sup> Ama, Pulu Yemone Juda yomboma olandopa naa lipa tapondolemoye? Paa sika olandopa lipa tapondolemo. Ungu kumbinamo i-sipa: Pulu Yemone yunga unguma ‘Juda yombomane nokangi.’ nimba sirimu.

<sup>3</sup> Sika Juda yombo marene ‘Aku unguma sika.’ ningu kuru naa mondolemele-na-kolo aku siku Pulu Yemonga unguma pilku naa limilimunga Pulu Yemone “Sembó.” nimba panjerimu mele “Naa sembó.” nimbáye? <sup>4</sup> Paa mólo! Yombomane pali sika kolo tolemele-na-kolo Pulu Yemone mindi alieli ungu sikama mindi nilimú. Aku sipa mele yunga bokuna ungu se nilimú, akumu i-sipa:

“Pulu Yemo,”

nuni ungu se nilinu kinia yombo sene  
“Kolo tolono.” paa manda naa nimbá.  
Yombo sene nu kote sendepale  
“I yemone kolo tolemo.” nilkanje  
nuni sumbi siku nilina kinia,  
yuni nu kotena ambolou naa ambolka.  
Kote we mania pulka.”

nimba molemo.

<sup>5</sup> Manda, olio ‘Juda’ yombomanga ulu-kiri selemolo ulumane Pulu Yemonga ulu sumbi nili selemoma sepa mona lendelemo liemu olione nambolka ungu se manda nimulúye? “Pulu Yemone olio ulu-pulu-kiri selemolomanga pundu topa mindili silimú kinia sepa kinjilimú.” manda nimulúye? (I nikiru akumu we-yombo sene konopumuni pilipa ta nimba nilka mele nikiru.) <sup>6</sup> Aku sipu paa manda naa nimulú. Pulu Yemone ungu sumbi nilima mindi naa selkanje mana-yombomanga ulu-puluma nambi sepa sumbi sipa pilipa apurulkanje? Manda sumbi sipa naa pilipa apurulka. <sup>7</sup> Aku-sipa na-kolo yombo sene konopumuni pilipa nimbale: “Nane kolo tollo ulumane Pulu Yemonga imbimu paa olandopa molombando yunga ungu sikama sepa mona lendemu liemu yuni nando “Seko kinjilinumunga mindili nani.” nambi semu-na nilimúye?” nilka. <sup>8</sup> Yombo sene aku nilkanje i ungu kiri mele nilimolánje peanganje: “‘Ulu peangama wendo opili.’ nimbu ulu kirima samili.” nambi semu-na manda naa nilimoláye? I ungu kirimu mele yombo marene kolo toko nando “Aku nilinu.” nilimili. Aku nilimilimunga mindili nonge kinia papu.

3:9-20

*Yombo Selurini Kepe Ulu Sumbi Nilima Selemo Yombo Se Naa Molemomonga Ungu Se*

<sup>9</sup> Aku liemu i ungumunga pulumu nambolkare nimbu manda pilimulúye? Pulu Yemone olio Juda yomboma kanopa peanga pilipa yombo-lupama kanopa kiri pilielemoye? Paa mólo! Nane u akumundu ungu se nindu kanumu. “Olione ulu-pulu-kirima selemolo.” nindu kanu ungumuni olio Juda yomboma kinia we-yomboma

kinia pali aki tolemo. <sup>10</sup> Pulu Yemonga bokuna aku sipa ungu mare molemo. Akumuni nimbale:

“Pulu Yemone yombo seluri kepe  
‘yombo sumbi nili se’ nimba naa kanolemo.

<sup>11</sup> Yombo se Pulu Yemone kanopa  
‘ulu sumbi nilima’ nimba pilielemo uluma  
pilielemo yombo se naa molemo.

‘Pulu Yemo kinia kopu sepo molambili.’  
nilimú yombo se naa molemo.

<sup>12</sup> Yomboma pea pali  
Pulu Yemonga aulkamo munduku kelielemele.

Ono pali seko kinjiku  
Pulu Yemone ono-kinia ulu mare  
kopu sepa sembá ulu se naa liepili molemele.

Yombomanga se ulu peangama  
sepa molemo yombo seluri kepe naa molemo.  
Se paa mólo.”

<sup>13</sup> “Ononga kerema yombo-óno-kolea  
muruakuoli we lemó mele gilimú;  
keremane ungu awisili  
kolo toko mindi nilimili.”  
“Wambiyemanga kerena tomo pelemo mele  
ononga keremanga aku sipa  
yomboma seko kinjilimili unguma pelemo.”

<sup>14</sup> “Alieli onone yomboma kinia  
mumindili kolko ‘paa molko kinjangi!’ ningu  
keremane umbuna awisili silimili.”

<sup>15</sup> “Alieli yomboma toko kondongendo  
konopu siku toko kondoko,

<sup>16</sup> ‘yomboma mindili nongo molangi.’ ningu  
seko kinjiku umbuna siku,

<sup>17</sup> yomboma kinia konopu seluna pupili  
molonge aulkamo kanoko imbi naa silimili.”

<sup>18</sup> “Ono ‘Pulu Yemo ye paa awilimu.’ ningu  
yu-kinia kanga-kolte kepe pipili naa kololemele.”

nimba molemo mele aku sipu molemolo.

<sup>19</sup> Sika olio pilielemolo, ‘Yombo selurini kepe “Na molopo kondolio. Na yombo sumbi nili se.” naa nipili. Koleamanga pali molemele yomboma Pulu Yemone kanopa ‘Uluma seko kinjilimili.’ nimba kanopili.’ nimba Pulu Yemonga ungu-manemane nilimú akumu ungu-manemane nokolemo ‘Juda, yombomando nilimú. Akumunga Juda yombomane kepe ‘Pulu Yemone olio ‘molko kondolemele.’ nimba kanolemo.’ ningu manda naala ningí.

<sup>20</sup> Akumunga, Mosisini Pulu Yemonga ungu-mane sirimuma yombomane mimi siku pilku liku selemelemonga Pulu Yemone ono kanopale ononga ulu-pulu-kirima siye naa kolopa, ‘konopu sumbi nimba peli yomboma.’ nimba naa kanomba. Ungu-manemanga pulumu i-sipa: Ungu-manemane olio ulu-pulu-kiri sepo molemoloma lipa ora silimú akumu pilipuli ‘Pulu Yemone kanopa kiri pilielemo ulu-puluma selemolo.’ nimbu pilielemolo.

3:21-31

*Pulu Yemone Olio ‘Konopu Sumbi Nimba Peli-Yomboma’ Nimba Kanomba Aulka-monga Ungu Se*

<sup>21</sup> Pulu Yemonga ungu-manemane Pulu Yemone olio ‘yombo sumbi nilima’ nimba kanomba aulka se naa sirimu, aku-na-kolo kiniá Pulu Yemone olio ‘yombo sumbi nilima’ nimba kanomba ulu-pulumu mona wendo omba lemó. Aku ulu-pulumu lupala; Pulu Yemonga ungu-mane Mosisini yando sirimumanga ulu-pulumu lupala. Mosisini ‚torumu bokuma, kinia, Pulu Yemone ungu-umbu tondorumuma pilku yomboma ningu siringi yemane ‚toringi bokuma, kinia, ‚aku bokumanga, onone Pulu Yemone olio ‘yombo sumbi nilima’ nimba kanomba ulu-pulu pe wendo ombámondo bokumanga ningu siku toringi molemóna. Aku ulu-pulumu kiniá mona lemó.

<sup>22</sup> Pulu Yemone ‘yombo sumbi nilima’ nimba kanolemo ‚mele, i-sipa: Yesusi Karasini olionga nimba senderimu kanu ulumu ‘Sika.’ ningu kuru mondolemele yomboma Pulu Yemone kanopa ‘ono yombo sumbi nilima.’ nimba kanolemo. Pulu Yemone mana-yomboma kanopa apurumbando yunga Juda yomboma lupa kanopa apurupa yombo talape lupama lupa kanopa apurupa naa selemo. Juda yomboma kepe, we-yomboma kepe, yomboma pea pali kanopa apurulimú aulka akumu selu mindi. <sup>23</sup> Yombomane pali ulu-pulu-kirima seringi, selemene. Yombomane pali Pulu Yemone kanopa peanga pilielemo uluma naa selemelémonga molko kondonge mele nimba panjerimumu manda naa lingí.

<sup>24</sup> Yombomane pali ‚aku siku Pulu Yemone “Saa.” nimba panjerimu ungu-manema pilku liku naa seko bulu siku seko kinjiku moloringi,-na-kolo yuni mana-yomboma pali we kondo kolopa olio kanopale, ‘ononga ulu-pulu-kirima siye kolopo ono konopu sumbi nimba peli yomboma molemele nimbu kanombo.’ nirimu. Olionga nimba kolali sepa kolondorumumuni Yesusi Karasini olio kolea kirina naa pumbu, Pulu Yemo pea kelepo seluna molomolo aulkamo akisinderimumunga Pulu Yemone olio aku sipa nimba kanolemo. <sup>25</sup> ‘Ononga ulu-pulu-kiri selemelémanga kolangi tambo.’ naa niembo.’ nimba ‘Yu ononga nimba kolali sepa kolondopili.’ nimba Pulu Yemone Yesusi Karasi yando sirimu. Pe kiniá yombo yu-melete-melete “Yu sika nanga nimba kolali sepa kolondorumi. Yunga meme ondondorumumuni nanga ulu-pulu-kiri selio konopuna pelemoma manda kulu tondomba kene sika omba kulu tondopili.” ningu kuru mondonge yomboma paa sika konopu kake sepili molonge Pulu Yemone kanomba. ‘Na konopu sumbi nimba pepili molopo ulu-pulu sumbi nilima mindi kanopo peanga pilipu, ulu-pulu-kirima kanopo kiri pilielio mele piliangi.’ nimba Pulu Yemone Yesusi Karasi yando sirimu. U sika yuni anda-kolepa yomboma we kondo kolopa ononga ulu-pulu-kiri seringima kanopale we siye kolopo ono ‘Mongo likimili kene mindili nangi.’ naa nirimu. <sup>26</sup> ‘Aku-na-kolo kiniá molemele yombomane ‘Na konopu sumbi nimba pepili molopo ulu-pulu-kirima we siye naa kolopo ulu-pulu sumbi nilima mindi kanopo peanga pilielio.’ ningu piliangi.’ nimba Pulu Yemone ‘Yesusi olionga ulu-pulu-kirimanga kolali sepa kolondopili.’ nimba yando sirimu. ‘Yesusini olionga nimba senderimu ulumu manda.’ ningu kuru mondolemele yomboma Pulu Yemone kanopa ononga ulu-pulu-kirima siye kolopa, ‘konopu sumbi nimba peli yomboma.’ nimba kanolemo.

<sup>27</sup> Pe kiniá yombo sene yunga imbibimu yuyu ambolopa paka tomba aulka se sena le moye? Yombo sene yunga tondolomone ungu-manema yuni yuyu pilipa lipa selemo uluma manda naala selemo. Olio yu-melete-melete ‘Yesusini olionga nimba senderimu ulumu manda.’ nimbu kuru mondopo limulú akumu mindi manda selemo. Aulka se lupa mólo. Aulka selumu mindi. ‘Sika.’ nimbu kuru mondolemolo ulumu-mambale Pulu Yemone olionga ulu-pulu-kirima siye kolopa olio yombo sumbi nilima nimba kanolemo. <sup>28</sup> Olione pilipuli, ‘ ‚Yesusini olionga nimba senderimu ulumu mindi manda.’ ningu kuru mondolemele yomboma aku siku selemelémonga Pulu Yemone ono kanopale ononga ulu-pulu-kirima siye kolopa, ‘Konopu sumbi nimba peli yomboma.’ nimba pilielemolo. Mosisini Pulu Yemonga ungu-

mane sirimuna pilipu semolo kinia manda naa sembá. Akumunga „yombo sene yunga imbimu yuyu ambolopa paka tomba aulka se naa lemó.„

<sup>29</sup> „Yombo sene yunga imbimu yuyu ambolopa paka tomba aulka se naa lemó ungu se molemóna. Akumu i-sipa: „Pulu Yemo Juda yombomanga manjipa Pulu Yemo molemoye? We-yombo-lupamanga Pulu Yemo móloye? Mólo. Pulu Yemo we-yombo-lupamanga kepe pali Pulu Yemo. <sup>30</sup> Pulu Ye selumu mindi molemo, akumuni yombo kangi se kopisiku wendo limilimane, ‘Ye Nokoli Karasimu yu mindi sika lipa tapondólimu. Karasi Yesusini olionga nimba senderimu ulumu, sika manda.’ ningu kuru mondolemelema kanopa ononga ulu-pulu-kirima siye kolopa, ‘Yombo konopu sumbi nimba pelima.’ nimba kanopa, yombo kangi se naa kopisilimilimane aku sikula “Sika.” ningu kuru mondolemelema kanopa ononga ulu-pulu-kirima siye kolopa, ‘Yombo konopu sumbi nimba pelima.’ nimba kanombala. „Pulu Yemone aku sipa nimbá aulka selumu mindi,“ akumunga „yu sika we-yombo-lupamanga kepe pali Pulu Yemo.„ <sup>31</sup> Akumunga, olio ‘Akumu sika.’ nimbu kuru mondolemolo ulumuni ungu-manema ‘unguri mólo’ nilimuluye? Paa mólo. ‘Sika.’ nimbu kuru mondolemolo ulumuni ‘Ungu-manema enge nipili.’ nilimulu.

## 4

4:1-25

*U Pulu Yemone Eporayamo-Kinia Serimu Ulumuni Kiniá Pulu Yemone Olio ‘Yombo Sumbi Nilima’ Nimba Kanolemo Mele Lipa Ora Silimú Ungu Se*

4:1-12

*Pulu Yemone Eporayamo ‘Ye Sumbi Nilimu.’ Nirimumunga Ungu-Pulumu*

<sup>1</sup> „Sika.” ningu kuru mondolemele yomboma Pulu Yemone kanopa ‘Yombo konopu sumbi nimba pelima.’ nimba kanolemo akumunga ungu nikiru, akumunga olio Juda yombomanga mana pulu-pulu anda-kolepa Eporayamo-kinia ulu wendo orumumunga olione nambolka ungu se nimuluye? <sup>2</sup> Eporayamone yu yuyu ulu serimumanga sika Pulu Yemone yu kanopa yunga ulu-pulu-kirimu siye kolopa ‘ye sumbi nilimu’ nimba kanorumu liemu yu yuyu yunga imbimu ambolopa paka tolkanje papu. Aku-sipa na-kolo Pulu Yemonga kumbi-kerena gilipa yunga imbimu ambolopa paka topa ‘Nanga tondolomone na ulu i-sipu i-sipu sendumunga na ye sumbi nilimu molio.’ manda naa nilka. „Pulu Yemone ‘Aku sipa mólo.’ nilka.„ <sup>3</sup> Aku ungumundu Pulu Yemonga bokumuni nambolka nilimúye? Akumuni nimbale: “Pulu Yemone yu-kinia “Sembó.”

nirimu mele Eporayamone ‘Sika sembá.’

nimba kuru mondorumumunga

kanopale Pulu Yemone

‘Yu ye sumbi nilimu.’ nimba kanorumu.”

nimba molemo.

<sup>4</sup> Yombo sene yombo senga kongonomo sendelemo kinia méle kalolemo limú akumu ‘We sikimu-na na naa likiru. Na yunga kongonomo sendeliomonga sikimu-na likiru.’ konopu lemó. <sup>5</sup> Aku sika na-kolo yombo sene, ‘Pulu Yemone na ‘yombo sumbi nilimu’ nimba kanopili.’ nimba, we-ulu mare kála sepa selemo kinia uluri naa selemo. ‘Pulu Yemo kinia sepa kinjilimú yombo sene, konopu topele topa Yesusini yunga nimba senderimumunga, Pulu Yemone yu kanopale yunga ulu-pulu-kirima siye kolopa ‘yu yombo sumbi nilimu’ sika manda nimba kanomba.’ nimba kuru mondolemolo yombomo sika Pulu Yemone kanu yombomo aku selemomonga ‘yu yombo sumbi nilimu.’ nimba kanolemo.

<sup>6</sup> Depitini aku ungumunga ungu selu-sipala nirimu. ‘ ‘Yombo sene ulu ‘peanga’, mare kála sepa naa selemo-na-kolo Pulu Yemone yu kanopa ‘Yombo sumbi nilimu.’

nimba kanolemo yombomo yu "Konopu peanga pepili molko kondangi." nilimú aulkana molemo.' ningu piliangi.' nimba nimbale:

<sup>7</sup> "Yombomanga ulu seko kinjilimilima

Pulu Yemone 'Mania pupili.' nimba siye kolopa,  
ononga ulu-pulu-kirima  
konopumanga kamu kulu tondolemo yomboma  
ono "Konopu peanga pepili molko kondangi."  
nilimú aulkana molemele.

<sup>8</sup> Yombo senga ulu-pulu-kirimanga

Ye-Awilimuni kelepa naa pilipa,  
"Seko kinjerinumunga pundu toko  
mindili nani." naa nimbá yombomo  
yu "Konopu peanga pepili molko kondangi."  
nilimú aulkana molemo."

nirimu.

<sup>9</sup> I konopu peanga pepili molko kondonge mele 'Depitini, nirimu ulumu yombo kangi se kopisilimili yombo akumanga mindiye? Molo kanu ulu-pulumu yombo kangi se naa kopisilimili yombo akumanga peaye? Aku ungumu u niliu kanumu. 'Eporayamone Pulu Yemone nirimu mele 'Sika.' nimba kuru mondorumumunga Pulu Yemone yu 'ye sumbi nílimu' nimba kanorumu.' u niliu kanumu. <sup>10</sup> Eporayamo nambi sepa molorumu kinia Pulu Yemone kanopale 'ye sumbi nílimu' nimba kanorumuye? Yu kangi se kopiserimu kinia Pulu Yemone yu 'ye sumbi nílimu' nirimu molo u kangi se naa kopisepili aku sipa nirimuye? Yu kangi se u naa kopisepili Pulu Yemone yu 'ye sumbi nílimu' nirimu kanumu. 'Akumunga pilipuli 'Kangi se kopiserimu ulumuni Pulu Yemone yu 'ye sumbi nílimu.' nimba kanomba uluri naa serimu.' nimbu pilielemolo.. <sup>11</sup> Yu u kangi se naa kopisipale Pulu Yemone nirimu mele ' 'Sika.' nimba kuru mondorumumunga Pulu Yemone yu 'ye sumbi nílimu' nimba kanorumu. 'I yemo Pulu Yemone 'ye sumbi nílimu' nimba kanolemo.' ningu kanangi.' nimba 'Kangi se i-siku kopisani.' nimba mane sirimu kanumu paa pe mane sirimu. Akumunga yombo kangi se naa kopisiku Pulu Yemone nilimú mele 'Sika.' ningu kuru mondolemelemonga Pulu Yemone kanu yomboma 'yombo sumbi nilima' nimba kanolemo yombomanga pali Eporayamo yu aku yombomanga anda-kolepamo. <sup>12</sup> Kangi se kopisilimili yombo talape akuna sukundu yombo mare kangi se we naa kopisilimili. U Eporayamo kangi se naa kopisipale Pulu Yemone nirimu mele 'Sika.' nimba kuru mondorumu mele onone aku siku u Pulu Yemone nilimú mele 'Sika.' ningu kuru mondokole pe kangi se kopisilimili aku 'Juda' yomboma Eporayamo yu ononga anda-kolepamola. 'Kangi se naa kopiseli yombo 'Sika.' ningu kuru mondolemele yomboma kinia, kangi se kopiseli yomboma kepe, Eporayamo yu ononga pali anda-kolepamo..

**4:13-25**

*Pulu Yemone Eporayamo-Kinia Nimba Panjerimu Ungumu ' "Yesusi Lomboroko Ola Molou." Nirimu Pulu Yemo Sika.' Ningu Kuru Mondolemele Yombomanga Pali Ungu Se (4:1-25 pali)*

<sup>13</sup> Pulu Yemone mana méle seriumma pali "Eporayamo kinia yuni kalopa limba yomboma kinia ono monge-méle simbú." nimba panjerimu akumu Eporayamone ungu-mane mare pilipa sengena panjipa seriumbunga naa nirimu. Eporayamone Pulu Yemone nirimu mele 'Sika.' nimba kuru mondorumumunga Pulu Yemone 'Eporayamo yu ye sumbi nílimu.' nimba kanopale "Mélema pali simbú." nimba, nimba panjerimu. <sup>14-15</sup> 'Ungu-manema pelemo kinia yombomane akuma pulua tolemelemonga, ungu-manemane Pulu Yemone yomboma kanopa kiri pilipa ono umbuna simba selemo aulkamo akisindilimú,-na-koło, ungu-manema naa lemó kinia

yombomane ungu-manema pulua tonge aulkamo naa lemóla, akumunga ungu-manema pilku sengena panjiku sengemonga Pulu Yemone "mélema simbú." nimba panjilkanje, 'Yuni nikimu mele sika aku sembá.' ningu, kuru mondoli ulumuni uluri naa selka, Pulu Yemone "Mélema simbú." nimba panjerimu ungumu kamu mania pulkala.

<sup>16</sup> Akumunga Pulu Yemone 'Eporayamondo "Simbu." nimbu, nimbu panjikiru ungumu nane yomboma we kondo kololiomonga mindi wendo ombá. 'Aku ungumu Eporayamo kinia yuni kalopa limba yomboma kinia ononga pali ungumu pepili.' 'nimba' 'Pulu Yemone "Sembó." nimba panjerimu mele sika sembá.' ningu, kuru mondongemonga manjipa i ungumu kamu wendo opili. 'Aulka se lupa mólo.' nirimu. Yombomane ungu-manema pilku sengena panjiku selemele aku yombomando manjipa naa nirimu. Eporayamone Pulu Yemone nirimu mele 'Sika.' nimba kuru mondorumu mele aku siku ningu kuru mondonge yomboma onondo kepe pea nirimu. Eporayamo yu olianga pali anda-kolepamo. <sup>17</sup> 'Eporayamo olio Pulu Yemone nilimú mele 'Sika.' nimba kuru mondolemolo yombomanga pali anda-kolepamo, akumunga ungu se Pulu Yemonga bokuna molemo. Akumu i-sipa:

'Pulu Yemone Eporayamo-kinia  
nimba panjipa nimba':

" 'Nu yombo talape awisilinga  
anda-kolepamo molani.' nirindu." nirimu.'

kanumu. Akumundu Eporayamone 'Sika.' nimba kuru mondorumu Pulu Yemone 'Eporayamo yu olianga pali anda-kolepamo molemo.' nimba kanorumu. Pulu Yemone kololemele yomboma konde molonge ulu-pulumu sipa, méle naa lemóma 'wendo opili.' nilimú kinia sika aku sipa wendo olemo aku Pulu Yemo 'Eporayamone 'Sika nilimú.' nimba kuru mondorumu. ,

<sup>18</sup> Pulu Yemone anda-kolepa Eporayamondo "Nu yombo talape awisili kalko lini." nimba panjerimu ungumu Eporayamo yuni kuru mondopa liltimu. Kanu-kinia 'Anda lekembolomonga, ungu nimba panjerimu ungumu we manda wendo naa ombá-na-kolo yuni kamu sembá.' nimba Eporayamo yu nokopa molopale u naa kanorumu-na-kolo Pulu Yemone nirimu mele yuni 'Pulu Yemone kolo naa tolemona sika walte sembá.' nimba pilipa siye naa kolopale 'Sembá.' nimba we nokopa molorumu. 'Pulu Yemo yuni ungu nimba panjerimu ungumu yu i-sipa: Yuni Eporayamondo nimba: "Nuni kalko lini yomboma paa awisili molonge." nirimu., Aku nirimu kinia Eporayamone pilipa 'Sika sembá.' nimba kuru mondopale nokopa molopale pe yu yombo talape awisilinga anda-kolepamo molorumu.

<sup>19</sup> Yuni kuru mondorumu mele paa kanga-kolte kepe siye naa kolorumu. Yu molopili kalia-ingima pali wane anderete mele omba purumu yu anda lepa pora sipale ambomo-kinia pepa bolango membá tondolomo naa perimu, yunga ambo Sera ambu lierimu, aku siku sika moloringili-na-kolo, 'Aku sipu molopole bolango nambi sepo membolonje? Manda naa membolo.' nimba naa pilipale,, <sup>20-21</sup> Pulu Yemone "Nu kango meni." nimba panjerimumu pilipa mindi molopale konopu talo sepa naa pilipa 'Paa sika sembá.' nimba kuru mondopa molopale nirimumuni, 'Pulu Yemone ungu nimba panjerimumu paa sika manda sembá.' nimba pilipa molopale yuni Pulu Yemonga imbi ambolopa paka tondopa mindi molopale yunga kuru mondorumu ulumu olando olando purumu. <sup>22</sup> Yuaku sipa kuru mondorumumunga Pulu Yemone yu 'ye sumbi nilimu molemo.' nimba kanorumu.

<sup>23</sup> 'Pulu Yemone yu 'ye sumbi nili se' nimba kanorumu.' kanu ungumu 'Eporayamo yunga mindi.' ningu kanu ungumu bokuna naa tondoringi. <sup>24</sup> Olio yandopa yandopa 'piliangila.' ningu kanu ungumu bokuna tondoringi. Pe olio kiniá pilipuli 'Yesusi olianga Ye-Awilimu kolorumu kinia 'Yu lomboropa ola molopili.' nimba serimu

Pulu Yemo.' nimbu pilipu 'Yu nilimú mele kolo naa topa sika selemo sembá.' nimbu kuru mondopo ambolopo molomolo yomboma yuni Eporayamo kanorumu mele olio aku sipa 'yombo sumbi nilima.' nimba kanolemola. <sup>25</sup> 'Yesusi yu olionga ulu-pulu-kiri selemolomanga pundu tondombando kolali sepa kolondopili.' nimba Pulu Yemone yu mana maniando olio sipale nirimumuni, pe yuni olio kanopa olionga ulu-pulu-kirima siye kolopa, 'olio 'konopu sumbi nimba peli yomboma molemele' nimbu kanambo.' nimba Yesusi yu 'Kelepa lomboropa ola molopili.' nirimu.

*Kolomongo-Awili 5-8*

## **Olio Karasi-Kinia Pea Kolopole Yu-Kinia Pea Lomboropo Ola Molopo Konde Molemolomonga Ungu Se**

### 5

5:1-11

*Karasini Serimumuni Olio Kinia Pulu Yemo Kinia Seluna Kelepa Lipa Sere Lenderimumunga Ungu Se*

<sup>1</sup> Akumunga, <sup>1</sup> 'Pulu Yemone nirimu ungu akumu sika.' nimbu, kuru mondolemolomanga Pulu Yemone olionga ulu-pulu-kirima siye kolopa 'konopu sumbi nimba peli yomboma molemele.' nimba kanolemo akumunga olionga Ye-Awili Yesusi Karasini senderimumuni olio Pulu Yemo kinia seluna konopu selu pepili molomolo aulkamo akisinderimumunga yu-kinia konopu seluna pupili kopu sepo molemolo. Yesusi Karasi-mambele Pulu Yemo-kinia konopu seluna pupili kopu sepo molemolo. <sup>2</sup> Olio 'Sika' nimbu kuru mondolemolo yomboma, aku yemone olionga nimba senderimumuni Pulu Yemone olio we kondo kololemo ulu-pulumunga sukundu molemolo aulkamo akisinderimu. 'Pulu Yemo kinia pea pumbu mulukoleana kopu sepo molomolo.' nimbu pilipuli olio konopu sipu nokopo molemolola. <sup>3</sup> Akumunga mindi konopu naa silimulu. 'Olio-kinia umbuna wendo olemomane olio kuru mondolemolo ulumu sepa tondolo mundulimú.' nimbu pilipuli aku umbunama wendo olemo kinia olio konopu silimulula. <sup>4</sup> Pe olio kuru mondolemolo ulumu sepa tondolo mundulimú ulumuni 'Ono nambi sengenje?' nimba manda manjilimú kinia Pulu Yemone 'ono konopu tondolo pupili molemele nimba kanolemo ulumu' olio-kinia 'wendo opili.' nilimú. Pe manda manjeli ulumuni 'olio Pulu Yemone lipa tapondopa, "Yu-kinia pea molamili waa." nimbá.' nimbu pilielemolo mele 'tondolo pupili. Siye naa kolko nokoko molangi.' nilimú. <sup>5</sup> Pe 'Pulu Yemone olio lipa tapondomba.' nimbu pilielemolo ulumu olio oliolio 'Sika wendo ombá.' nimbu we nokopo naa molemolo. Pulu Yemone Mini Kake Séli u olio sirimu akumuni olionga konopuna Pulu Yemo olio konopu mondolemo ulu akumu ondondorumu akumunga 'Sika wendo ombá.' nimbu konopu sipu nokopo molemolo ulumu 'Ombánje naa ombánje.' nimbu konopu awisili lipu naa mundulimulu. Paa sika wendo ombá.

<sup>6</sup> Olionga ulu-pulu-kiri selemoloma olio oliolione siye kolopo topo mania mundumulú enge se naa perimu kinia Pulu Yemone 'Sendembo.' nimba, nimba panjerimu mele kamu sembá wale kanumunga olio Pulu Yemo bulu sipu sepa kinjeli yombomanga nimba Karasi kolondorumu. <sup>7</sup> Pulu Yemonga ungu-manema pilipa lipa sepa kondolemo yombo konopu sumbi nimba peli se toko kondonge senge kinia olionga yombo sene yu kondo kolopa "Mólo." nimba 'Na yunga kolali sepo toko kondangi kolondambo.' nimbáne naa nimbánje. Wale awisili yombo sene aku siku naa nilimili kanumu. Molo yomboma kondo kolopa lipa tapondolemo yombo peanga se toko kondonge senge kinia yombo sene yu kondo kolopa "Mólo." nimba 'Na yunga kolali sepo toko kondangi kolondambo.' nimbánje. Wale marenga sika aku siku nilimolánje. <sup>8</sup> 'Akumu sika,' na-ku Pulu Yemone olio 'Konopu mondolio ulu imu

ono kanangi.' nimba olio ulu-pulu-kiri seli yomboma mindi molamili, 'Pulu Yemone olio naa topili.' nimba Pulu Yemo, yunga Malo Karasi olionga nimba kolali sepa kolondorumu, 'aku sipa Pulu Yemo olio paa sika konopu mondolemo mele Pulu Yemo yuni olio lipa ora sirimu.'

<sup>9</sup> Pe Karasi olionga nimba kolondombando yunga meme ondopa ombo wendo purumu akumuni Pulu Yemone olionga ulu-pulu-kirima siye kolopa, olio 'konopu sumbi nimba peli yomboma.' nimba kanolemo liemu akumunga olando sipa Karasi olionga nimba senderimu kanumuni Pulu Yemo mumindili kolomba walemo wendo ombá kinia olionga unguri naa pemba. <sup>10</sup> Olio yu-kinia opa-touma molorumulu kinia yunga Malo olionga nimba kolondorumu kanu ulumuni olio 'Pulu Yemo kinia kelko konopu seluna pupili sere leko molangi.' nimba olio lipa Pulu Yemo kinia sere lenderimu. Aku sipu kiniá yu-kinia paa sika seluna molemolo liemu Karasi kelepa lomboropa ola molorumu konde molemo aku ulumuni Pulu Yemone olio paa sika lipa tapondopa, mindili nolemolá aulkana wendo limba. <sup>11</sup> Aku sipa mindi mólo. Ulu se pea i-sipa: Olionga Awili Yesusi Karasini olio Pulu Yemo kinia lipa seluna kelepa sere lenderimumunga yu-kinia kelepo konopu sere lepo molemolo-na Karasi yuni aku serimumuni kiniá olio Pulu Yemo-kinia paa konopu sipula molemolo.

5:12-21

*Pulu-Pulu Mana-Ye Atamene Serimu Ungumuni Kololi Aulkamo Lipa Taltorumu, Kelepa Karasini Serimu Ungumuni Konde Molko Mindi Puli Aulkamo Lipa Taltorumu Unyu Se*

<sup>12</sup> 'Olio Pulu Yemo-kinia opa-touma molopole pe yu-kinia kelepo konopu seluna pupili molemolo nikiru akumunga ungu se piliangi niembo:, U-pulu-pulu ma-koleana Atamene ulu-pulu-kiri se serimu kinia ulu-pulu-kirimu kamu mana perimu we pelemo. Atamene serimu aku ulu-pulu-kirimuni kololi ulu-pulumu wendo orumu. Akumunga kiniá yandopa yandopa olio yombomane pali ulu-pulu-kirima selemolona olio-kinia pali kololi ulu-pulumu wendo olemóla. <sup>13</sup> Pulu Yemone Mosisindu "Yomboma i-siku i-siku sangi." ni." nimba ungu-umbu tondopa ungu-manema u naa nimba sipili ma-koleana ulu-pulu-kirima u sika we perimu. Aku-na-kolo Mosisini Pulu Yemonga ungu-manema yomboma u naa nimba sipili u ulu-pulu-kirima seringi kinia Pulu Yemo yuni kanopale boku senga naa topa akumanga "Pundu taa." ni naa nirimu. <sup>14</sup> Akumu sika na-kolo kololi ulu-pulumu Atame molorumu kinia lierimu, pe yandopa Mosisi molorumu kinia we lierimula. Atamene Pulu Yemonga ungu se pilipa mokoli sepale kolorumu aku siku yomboma pali Pulu Yemonga ungu selu sipa mele pilku mokoli naa seringi-na-kolo we koloringila.

Kanu ye Atamene serimu ulumu kinia pe orumu yemone serimu ulumu kinia selu-sipa mele akumu i-sipa: Atamene serimumunga ulu-pulu se wendo orumula; pe orumu yemone serimumunga ulu-pulu se wendo orumula. <sup>15</sup> Aku-sipa na-kolo seringilimunga ulu-pulu lupa-lupa wendo orumu. Pulu Yemone olio we kondo kolopale yuni serimu ulu akumu paa lupala; Atamene serimu ulu-pulu-kiri aku ulumu yu paa lupala. I ulutolo selu-sipa mólo, ulu lupa lupatolo. Ye selumuni ulu-pulu-kiri serimu aku ulumuni yombo awisili kololemele-na-kolo Pulu Yemo olio yomboma we kondo kololi ulumuni méle paa peangamo we simbando Yesusi Karasi we sirimu, aku yemone manjipa yomboma we kondo kolopa yombo awisili konde molko kondoko mindi pungí aulkamo akisinderimu.

<sup>16</sup> Akumunga ungu se pelemóla. Pulu Yemone we sirimumu kinia, kanu ye selu ulu-pulu-kiri serimumunga wendo orumu ulumu kinia, lupa lupa. Ye selumuni ulu-pulu-kiri serimu akumuni yomboma pali Pulu Yemone kote sendepale "Ono pali seko kinjilimilimunga mindili nongo molko mindi pangí." nimba aulkamo akisinderimu-na-kolo Pulu Yemone we sirimu mele i-sipa: Yombomane ulu-pulu-kiri awisili seringi

kinia Pulu Yemone "Mindili nangi." nilka-na-kolo we kondo kolopa yombomando aku naa nimbá. Ono kanopale, ononga ulu-pulu-kirima siye kolopa ono 'konopu sumbi nimba peli yomboma molemele.' nimba kanolemo. <sup>17</sup> Ye selumuni 'Pulu Yemonga, ungumu pilipa mokoli serimu akumunga kanu yemone ulu-pulu-kiri serimumunga kololi ulu-pulumu ye nokoli kingi mele molopa yomboma pali tondolo mundupa nokolemo. Akumu sika liemu Pulu Yemone yomboma we kondo kololi ulumu kinia yuni olio we sirimu ulumu-tolonga tondolomo olandopamo. Pulu Yemone yomboma we kondo awili sepa kololi ulu-pulumu kinia Pulu Yemone 'yombo sumbi nilima' nimba kanomba ulu-pulumu kinia lingí yomboma ono ye selu Yesusi Karasini serimumunga ye nokoli kingima molko mélema nokokoconde molko mindi pungí.

<sup>18</sup> Aku liemu ye selumuni ungumu pilipa mokoli serimumunga Pulu Yemone yomboma pali kote sendepa 'Mindili nangi.' nimbá ulumu wendo orumu, aku sipala ye selumuni ulu sumbi nílimu serimumunga Pulu Yemone yomboma pali kanopa, ononga ulu-pulu-kirima siye kolopa, 'yombo konopu sumbi nimba pepili molemele.' nimba kanolemomonga yombomaconde molko mindi pungí ulu-pulumu wendo orumu. <sup>19</sup> Ye selumuni ungumu mokoli serimu akumunga yombo awisilini ulu-pulu-kiri seringi yomboma moloringi, aku sipa ye selumuni ungumu pilipa sengena panjipa serimumunga yombo awisili yombo sumbi nilima molonge.

<sup>20</sup> Yomboma seko kinjiku molangi Pulu Yemone 'Ungu mokoli selemele mele olandopa seko mokoli sangi.' nimba 'Mosisi, ungu-manema sirimu. Aku-sipa na-kolo 'Pulu Yemone ungu-manema sirimumunga, yombomane ulu-pulu-kiri olandopa olandopa seringi kinia Pulu Yemone yomboma we kondo kololi ulumu olandopa purumula. <sup>21</sup> Aku liemu ulu-pulu-kirima kololi ulu-pulumunga ye nokoli kingi mélemo molopa kololi ulu-pulumu nokorumuaku sipala Pulu Yemone yomboma we kondo kololi ulu-pulumu ye nokoli kingi mélemo molopa olio nokopa olionga Ye-Awili Yesusi Karasimuni senderimumunga Pulu Yemone olio 'yombo sumbi nilima.' nimba kanolemomonga alieliconde molopo mindi pulimulu ulu-pulumu 'Pulu Yemonga, we kondo kololi ulumuni silimú.

## 6

6:1-14

### *Olio Karasi-Kinia Pea Kolopole Yu Pea Konde Molopo, U-We-Konopu-Kirima Kolopa Pora Sipili Molemolomonga Ungo Se*

<sup>1</sup> 'U yombomane ulu-pulu-kiri awisili seringi kinia Pulu Yemone ono paa kondo kolorumumunga, pe kiniá nambolka nimulúnje? "Pulu Yemone olio paa kamu we kondo kolopili kene ulu-pulu-kirima kamu sepo molamili." niemiliye? <sup>2</sup> Aku paa naa niemili. Olio 'kiniá Karasinga yombo molemoloma, konopu-kiri akumane olio u ulu-pulu-kirima konopu mondopole serimuluaku konopu-kiri perimuma kolopa pora sirimu. Aku konopuma kolorumumungaaku sипу ulu-pulu-kirima mundupukelierimulu kanumu. Pe kiniá kelepo nambi sepo manda ulu-pulu-kirima sepo molomoloye? 'Kelepo semolo aulka se naa pelemo.,' <sup>3</sup> Olio no liltimulu kanu ulumuni Karasi Yesusi kinia olio kinia yombo selumu mele molorumulu. Pe Karasi-kinia yombo selumu mele molorumulu-kulu yu kolorumu kinia 'olionga u-konopu-kiri perimuma, yu pea kolorumulu. Imu naa pilielemeleye? <sup>4</sup> Pe no liltimulu akumuni 'olionga konopu-kiri uma pepili, yu-kinia pea kolopole, yu pea óno seringi óno-koleana perimulu. Yu pea óno-koleana peringi kinia Lapane "Yu lomboropa ola molopili." nirimu kanu ulu tondolomone olio 'u-konopu-kiri pepili, molopo kinjerimulu mele siye kolopo, kiniá u-konopu-kirima kolorumu, kiniá konopuconde peangama pepili molemolo.

<sup>5</sup> Karasi kolorumu kinia olio yu-kinia pea kopu sepo kolorumulu, aku liemu pe yu lomboropa ola molorumu kinia paa sika aku sipu olio yu-kinia pea kopu sepo lomboropo ola molopo yu molemo mele pea molomolola. <sup>6</sup> Olio pilielemolo, 'Karasi unju-perana ola uku toko panjeringi kolorumu kinia Pulu Yemone olionga u perimu konopu kirima 'Yu pea unju-perana kolangi.' nirimu. 'Ulu-pulu-kiri selemolomanga ulu-pulumu tondolo naa pupili, olio naa ambolopili, kelko pilku naa sangi kene Karasi pea kolangili.' nirimu, pea toko kondoringi.' nimbu pilielemolo. <sup>7</sup> Yombo se kololemo kinia ulu-pulu-kirimane yu kelepa lipa manda naa ambolomba akumunga ,ulu-pulu-kirima kelepo pilipu semolo aulka se mólo.,

<sup>8</sup> 'U Karasi pea kolorumulungu yu pea molomolo.' nimbu kuru mondolemolo. <sup>9</sup> Olio pilielemolo, 'Karasi lomboropa ola molorumu akumunga kelepa manda naa kolomba. Kololi ulu-pulumuni kelepa yu manda naa ambolomba.' nimbu pilielemolo. <sup>10</sup> Karasi kolorumu kanu ulumuni 'Ulu-pulu-kirimane yu kamu kelepa kondi naa topili.' nimba waltikele mindi kolorumu. Aku-na-kolo kiniá yu we molemo kanu ulumuni Pulu Yemone 'Pilipu molopo pea kopu sepo molambili.' nimba pea molembele. <sup>11</sup> Aku siku ono Karasi Yesusi pea kopu seko molemele kene, kiniá 'Olio kolorumulu kinia ulu-pulu-kirima mania purumu. Pe kiniá ulu-pulu-kirima kinia olio kinia seluna naa molemolo. Pulu Yemo pea kopu sepo molemolo.' ningus pilku molayo.

<sup>12</sup> Akumunga ononga u-we-konopuma kolopa konopu-konde pepili molemele kene kiniá 'Ulu-pulu-kirimane olionga kangima naa nokopili, kangi akumane olio 'Ulu-pulu-kirima yakala kolkole sangi.' nimba olio kondi tomba kinia aku naa semolo.' ningus tondolo munduku molayo. <sup>13</sup> 'Olionga kangimanga kimbu ki gilimuma kinia we-méle gilimuma kinia akumane sepo kinjipu ulu-pulu-kirima samili.' naa niengi. 'Aku uluma naa sepo ulu olandopamo samili.' ningus 'Olio Karasi kinia pea kolorumulu, kiniá kelepo konde molemolo kene olionga kimbu ki kangima pali Pulu Yemo siemili. Olionga kangima pali Pulu Yemone nokopili. Akumane ulu sumbi nilima manjipu sepo molamili.' ningus sayo. <sup>14</sup> Pulu Yemone u Mosisi nimba sirimu ungu-manemane ono naa nokopa, Pulu Yemone ono we kondo kolopale Malo Yesusini ononga nimba senderimumunga ono Pulu Yemonga yomboma molemelemonga ulu-pulu-kirimuni 'Na ononga awilimu.' nimba naa nokopa molomba, akumunga ,onone aku siku 'olionga kangima Pulu Yemonga mindi.' ningus 'ulu sumbi nilima mindi samili.' niengi.,

6:15-23

### *Ulu-Pulu Kirimunga Kendemande-Yomboma Molemolone Molo Ulu-Pulu Sumbi Nílimunga Kendemande-Yomboma Molemolonje Akutolonga Ungu Se*

<sup>15</sup> Kiniá 'Pulu Yemonga' ungu-manemane olio naa nokolemomonga olio nambi semoloye? Kiniá Pulu Yemonga we kondo kololimuni olio nokolemo akumunga ulu-pulu-kirima samiliye? Paa mólo! <sup>16</sup> 'Yombo sene 'yombo senga kendemande-yombomo molambo.' nimba yu sika kanu yombomonga unguma mindi pilipa lipa yunga kongonoma manjipa kála sepa sendelemo.' akumu ono naa pilielemeye? Aku sipa melela ono ulu-pulu-kirimunga kendemande sendeko molongi liemu aku sengemonga kolonge. Molo Pulu Yemonga kendemande sendeko yunga unguma pilku sengena panjiku molongi liemu aku sengemonga Pulu Yemone 'Ono yombo sumbi nilima.' nimba kanomba. Aku ningus naa pilielemeye? <sup>17</sup> Ono sika u ulu-pulu-kirimunga kendemande-yomboma moloringi-na-kolo kiniá Pulu Yemonga unguma , 'pilku liengi.' ningus, ono mane siringi kiniaaku unguma paa kuru mondoko litingi, aku siku seringimunga kiniá olione Pulu Yemo kinia 'Paa ange.' niemili. <sup>18</sup> U ulu-pulu-kirimuni ono tondolo mundupa ka sipa 'yunga kendemande-yomboma molangi.'

nirimu-na-kolo pe Pulu Yemone ono lipa tapondopa wendo liltimu kinia ono ulu-pulu sumbi nilimunga kendemande-yomboma molemele.

<sup>19</sup> 'Nane ungu-mane we simbú kinia sumbi siku naa pilingínje.' nimbu ononga umbu-konopumane we-mana-unguma semane toko nilimili mele nikiru. U 'ulu-pulu-kirima ononga kímbu ki kangimanga pali ye nokoli mele molopili.' niringi kinia tondolo mundupa nokorumu kinia kímbu ki kangimanga mélemane ulu-pulu peanga se naa seko, ungu-manema pulua topa kalaro molemo ulu-pulu-kirima mindi olandopa olandopa ka-kongono mele manjiku seko moloringi, aku siku mele kiniá topele toko 'kímbu ki kangimanga pali ulu sumbi nilimanga kendemande mele molamili.' ningu Pulu Yemo kanopa peanga pilielemo ulu-pulu peangama kinia ulu-pulu sumbi nilima kinia akuma mindi seko molayo. 'Pulu Yemonga yombo kake selima molamili.' ningu aku sangi.

<sup>20</sup> Ulu-pulu-kirimane ono ambolorumu kinia yunga kongono kendemande senderingi. Ulu-pulu sumbi nilimuni ono manda ambolomba aulka se naa lierimu.

<sup>21</sup> U seko moloringi uluma kiniá pilkuli olie pololemele kanu ulumanga u méle peanga nambolkama liltingiye? 'Méle peangare naa liltingi kanumu.' Ulu-pulu-kiri seringimanga ono kololi ulu-pulumu mindi liku, 'mini pali kolea kirina molko kinjiku mindi pungí aulkana puringi.' <sup>22</sup> Aku-sipa na-kolo ulu-pulu-kirimane ono u ka mele sipa ambolopili moloringi kinia Pulu Yemone 'Naa ambolopili.' nimba ono wendo liltimu, kiniá ono yunga kendemande-yomboma molemele. Aku siku molemelemonga yuni ono méle kalombando ono konopu kake selima silimú limili. Kanu-kinia konopu kake seli pelemo yombomando "Kamu konde molko kondolko mindi pang." nimbá. <sup>23</sup> Ulu-pulu-kirimuni yunga kongonomo sendelemele yomboma méle kalolemo. Méle kalolemo akumu ono kolkole molko kinjiku mindi pungí aulkamo silimú. Aku-sipa na-kolo olia Karasi Yesusi olionga Ye-Awiliyu yu pea seluna konopu seluna pupili molemolo kinia Pulu Yemone olia mélse we silimú. Karasi Yesusi-mambele Pulu Yemone méle we silimú akumu olia kamu konde peanga sepo molopo mindi pumulú aulkamo silimú.

## 7

7:1-25

*Mosisini Sirimu Ungu-Manemane Olio Karasinga Yomboma Naa Nokolemomonga Ungu Se (Kolomongo-Awili 6-8 pali)*

7:1-6

*Mosisini Sirimu Ungu-Manema Yomboma-Kinia U Ambo Ye Mele Moloringi Ungu Se (6:1-23 pea)*

<sup>1</sup> Ango-keme, Mosisini Pulu Yemonga ungu-mane u sirimuma ono pilielemene yombomando nikiru, 'Yombo konde molemelema ungu-manemane nokolemo-na-kolo kololemele kinia naa nokolemo.' akumu ono naa pilielemeye? <sup>2</sup> Akumu i-sipa mele: Ambo se ye pulimúmu yunga yemo we konde molemo kinia ungu-mane sene olo nokolemomonga ambomo ultu pumbá aulka se naa lemó. Aku-sipa na-kolo yunga yemo kololemo kinia ungu-manemone yu naa nokolemo. <sup>3</sup> Akumunga, yunga yemo we konde molopili yu ye se kinia ulu-kirinale semu liemu 'yu wa ulu-kirinale seli ambomo' nilimili. Aku-sipa na-kolo yunga yemo kololemo kinia ungu-manemone yu naa nokolemomonga ye se lupa pulimú kinia unguri mólo. Aku selemo kinia 'Yu wa ulu-kirinale seli ambomo.' naa nilimili.

<sup>4</sup> Nanga ango-keme, ono aku siku seringi. Karasi kolorumu kinia ono pea seluna molko koloringimunga kiniá Mosisini ungu-mane sirimumane ono naa nokolemo; ono ye se lupanga 'ambomo mele, molemele, aku yemo yombo-óno-koleana lomboropa ola molorumu ye nokoli Karasimu. Olio 'Pulu Yemone kanopa peanga

pilielemo uluma sangi.' nimba aku serimu. <sup>5</sup> U olionga u-we-konopumane olio nokorumu kinia ungu-manemane "Sangi." molo "Naa sangi." nirimu mele pilipu olionga kangimane pali 'ulu-pulu-kirima mindi samili.' konopu lepo serimulu. Aku ulu serimuluma kolomolo ulumu mindi serimulu. <sup>6</sup> Aku-sipa na-kolo kiniá olio ,Karasi pea, kolorumulu akumuni olio u ka sipa ambolorumu ulumu mania purumu. Kiniá Mosisini ungu-mané sirimumane olio naa nokolemo. Akumunga, ungu-mané sipa bokuna torumumanga kendemande-yomboma naa molemolo. Mini ,Kake Séli,muni "Saa." nilimú ulu kondemanga kendemande-yomboma molemolo.

7:7-25

*Ulu-Pulu-Kirimuni Olio Tondolo Mundupa Nokolemomonga Ulu-Pulu Peangama Semolondo Kála Sepo Semolo Ungu Se (7:1-6 pea kanou)*

7:7-13

*Ulu-Pulu-Kirimuni Olio Sepa Kinjilimú Ungu Se*

<sup>7</sup> , 'Ungu-manemane olionga konopukundu ulu-pulu-kirima konopu kimbu siengi.' nilimú, liemu, nambolka nimulúye? 'Mosisini ungu-mané sirimuma ulu-pulu-kirimu.' niemiliye? Aku paa mólo! Unzu-manemane na naa lipa ora silkanje ulu-pulu-kirima na apurupu naa pilka. Unzu-manemane sene 'Yombo senga mélema kanoko yama naa mei!' ni naa nilkanje yombo senga mélema yama meli ulumu 'ulu kiri' nimbu naa pilka. <sup>8</sup> ,Aku sika, na-kolo ulu-pulu-kirimuni na méle lupa lupama yama membo aulkamo kororumu kinia aku ungu-manemone aku sembó aulkamo akiserimu. Unzu-manemane naa pelkanje ulu-pulu-kirimu yombo kololi mele pelka. ,Akumuni olio ulu se sembá tondolo se naa pelka., <sup>9</sup> Na u ungu-manemane naa pilipu walu molorundu-na-kolo pe Pulu Yemone "Saa." nirimu unguma na molorunduna wendo orumu kinia ulu-pulu-kirimu wendo ombo tondolo purumu kinia nanga konopuna yombo kololi none sélimu molorundu. <sup>10</sup> Kanu-kinia 'Pulu Yemone "Saa." nirimu ungu-manemane 'pilku liku senge yomboma konde molopa mindi puli ulu-pulumu lingí.' nimba sirimu kanu ungu-manemane na kololi ulu-pulumu sirimu.' nimbu kanorundu. <sup>11</sup> Akumu nambi sepa serimuye? Aku "Saa." nirimu ungu-manemane na nokorumu kanopale ulu-pulu-kirimuni kanu ungu-manemane lipa, akumane na kolo topa kondi topale topa kondorumu.

<sup>12</sup> Pe kiniá ,ungu-manemando nambolka nimulúye?, Mosisini Pulu Yemonga ungu-manemane sirimuma Pulu Yemonga méle kake sélimu. Unzu-manemanga sukundu Pulu Yemone 'Saa.' nirimu ungu pelemoma pali Pulu Yemonga méle kake sepa, sumbi nili paa peangamo.

<sup>13</sup> Aku liemu aku méle peangamone na kololi ulu-pulumu sirimuye? Aku paa mólo! Ulu-pulu-kirimuni kololi ulu-pulumu sirimu. Pe nane ulu-pulu-kirima yakala kolopole serindumunga kololi ulu-pulumu na-kinia ombo perimu. Ulu-pulu-kirimuni 'Aku méle peangamonga kololi ulu-pulumu wendo opili.' nirimu. Pulu Yemone 'Ulu-pulu-kirimu mona lemba kinia yombomane akumu sika ulu-pulu-kirimu ningu kanangi.' nimba 'Sepili.' nimba siye kolorumu. Akumunga, Pulu Yemone ' "Saa." nimbu ungu-mané sirindumane 'ulu-pulu-kirimu paa méle kiri lupendi tolimu yombomane kanangi.' nimba sepa mona lendepili.' nirimu, ,akumunga ungu-manemane aku serimu.,

7:14-25

*Ulu-Pulu-Kirimuni Olio Nokolemo Ungu Se (7:7-25 pali kanani)*

<sup>14</sup> Olio pilielemolo: Mosisini Pulu Yemonga ungu-mané sirimu akuma ungu-mané peangama na-kolo nanga we-konopu-umu perimu we pelemomo Pulu Yemonga ulu se mólo, akumunga na Pulu Yemonga unguma pilipu limbu aulka se naa pelemo. Ulu-pulu-kirimuni na ka silimú-na na yunga we-kongono kendemande sendeli yemo molio. <sup>15</sup> Ulu selioma nambolka puluringa ulu akuma selionje, naa pilielio. Na konopu

mondopo ‘Samboa!’ konopu lelio mele naa sepo, ‘Naa sambo!’ konopu lepo konopu naa mondolio uluma selio. <sup>16</sup> Na konopu naa mondopo ‘Naa sambo.’ niliu uluma seliomonga ‘Pulu Yemonga ungu-manema sika peangama.’ niliu. <sup>17</sup> Akumunga aku ulu-kirima na nanu ‘Sambo.’ nimbu naa selio. Ulu-pulu-kirimu nanga konopuna molopale yuyu selemo. <sup>18</sup> Na pilielio, nanga konopuna sukundu ulu peanga se sembó ulu-pulumu naa pelemo. Aku konopumu nanga we-konopu u perimumundu nikiru. Sika ‘na ulu peangama samboa!’ konopu lelio-na-koło manda naa selio. <sup>19</sup> Ulu peanga ‘sambo.’ konopu lelio akuma naa selio. Ulu-kiri ‘naa sambo.’ konopu lelio akuma sepo mindi molio. <sup>20</sup> Ulu-kiri ‘naa sambo.’ konopu lelio aku ulu-kirima selio akumu nanu ‘Sambo.’ nimbu naa selio. Nanga konopuna sukundu ulu-pulu-kiri pelemomone mindi aku uluma selemo.

<sup>21</sup> Akumunga, ‘ungu-mane sene na nokolemo’ nimbu kanolio akumu i-sipa: ‘Ulu peangama sambo.’ niliu kinia ulu kirimanga aulkamo mindi na moliona wendo olemo. <sup>22-23</sup> Sika nanga konopuna sukundu Pulu Yemonga ungu-manema kanopo peanga pilipu ‘paa samboa!’ konopu lelio, na-koło na ‘Sei.’ nilimú ungu-mane se lupa nanga kangimunga sukundu pali pelemo nimbu kanolio. Akumuni ‘Na ungu-mane sambo.’ konopumuni nimbu pilielio ungu-manemo-kinia opa selemo. Aku ungu-mane lupamo ulu-pulu-kirimu, akumuni nanga kangina sukundu pali pepale ka sipa nokolemo. <sup>24</sup> Aku ulumuni na konopu topa bulu-balú sipa umbuna silimúmu nawene na lipa tapondomba-na kololi ulu-pulumu pelemo kangimu mundupu kelemboye? <sup>25</sup> Yesusi Karasi olionga Ye-Awilimuni nanga nimba senderimumunga Pulu Yemone na lipa tapondolemomonga Pulu Yemo yu-kinia “Ange.” nikiru. Yesusi Karasi-mambele Pulu Yemone na lipa tapondolemo.

Akumunga, na nanu kinia, nanga konopu leliomo kinia pali Pulu Yemonga ungu-manemane nokolemo, akumanga kendemande-yemo molio, na-koło we-konopu-kirimu ulu-pulu-kirimunga ungu-manemone nokolemo.

## 8

8:1-27

*Pulu Yemonga Minimu Olio-Kinia Molemo Kinia Selemolo Ungu Se (Kolomongo-Awili 6-7tolo pea kanou)*

8:1-17

(1-4) Yesusini Olionga Ulu-Pulu-Kirima ‘Mania Pupili.’ Nimba Yu Kolondorumunga (4-13) Pulu Yemonga Minimu Olionga Konopumanga Molopale Nilimú Mele Manjipu Selemolo Mele Ungu Se Kinia (8:14-17 pea)

<sup>1</sup> Akumunga, Karasi Yesusi kinia pea kopu sepo molemolo yomboma yombo sene olionga kote pilipa “Seko kinjilimilimunga pundu toko mindili nangi.” manda naa nimbá. „Olionga kote sendenge ungu se naa pelemo..” <sup>2</sup> Olio Karasi Yesusi kinia pea kopu sepo molemolomonga yu-mambele konde mololi ulu-pulumu pelemo Mini Kake Sélimuni olio nokopa, ‘Ulu-pulu-kirimu kinia kololi ulu-pulumu kinia olio nokoringilitolone olio naa nokangili. Molko kondangi.’ nilimú akumunga „yombo sene olio-kinia aku siku ulu se manda naa sepa nimbá..” <sup>3</sup> Olionga u-we-konopu-kirima enge naa perimumunga Mosisini Pulu Yemonga ungu-mane sirimumane tondolo naa pumbale olio-kinia sembá serimu mele manda naa serimu-na-koło manda naa serimu mele Pulu Yemone manda serimu. Yunga Malo ‘mania-yombomanga ulu-pulu-kirimanga kolali sepa kolondopili.’ nimba mana lipa mundorumu, aku yemo omba olio mana-yombo ulu-pulu-kiri seli yomboma mele au lierimu. Aku sipa Pulu Yemone ‘Yesusi-kinia ulu-pulu-kirimu kamu olionga pundu tondopa mania pupili.’ nirimu. <sup>4</sup> ‘Olio ungu-manemane ‘I-siku i-siku sumbi siku sangi.’ nilimú mele olione aku siku kamu sangi.’ nimba Pulu Yemone „yunga, Malo Yesusi mana mania lipa

mundorumu. Olio kiniá u-we-konopu-kirimuni ‘Saa.’ nilimú mele naa pilipu sepo Mini Kake Sélimuni ‘Saa.’ nilimú mele pilipu selemolo yombomando Pulu Yemone nirimu.

<sup>5</sup> U-we-konopu-kirimuni ‘Saa.’ nilimú mele pilku seko molemele yomboma aku konopumuni konopu mondolemo mele mindi konopu kíbu siku molemele, akuna-kolo Mini Kake Sélimuni ‘Saa.’ nilimú mele pilku seko molemele yombomane Mini Kake Sélimuni konopu mondolemo mele mindi konopu kíbu siku molemele.

<sup>6</sup> U-we-konopu-kiri pelemomo konopu kíbu sipa molemo yombomo kolomba, akuna-kolo yombo se Mini Kake Sélimuni yunga konopumu nokolemo-na pilipa molemo yombomo konde molopa konopu pe nipili molomba. <sup>7</sup> Yombo se u-we-konopu-kirimu konopu kíbu sipa molemo yombomane Pulu Yemonga ungu-manema naa pilipa lipa selemomonga yu Pulu Yemo kinia opa-toumu molemo. Kanu yombomo Pulu Yemonga ungu-manema manda pilipa lipa sembá aulkamo paa naa lemóla. <sup>8</sup> U-we-konopu-kirimane ambololemo yomboma Pulu Yemone kanopa peanga pilielemo ulu selu kepe naa selemene.

<sup>9</sup> Aku-sipa na-kolo ,i bokuna tokoromo kanonge yomboma, ono Pulu Yemonga Minimu paa sika konopumanga molomu liemu Minimuni ono ambololemo-na u-we-konopu-kirimane ono naa ambololemo. Karasinga Minimu konopumanga naa molemo yomboma yunga yomboma naa molemele. <sup>10</sup> Sika ononga ulu-pulu-kiri seringima perimumunga ononga kangima kolonge-na-kolo Karasi ononga konopumanga molomu liemu kiniá ono ulu-pulu sumbi nílimu pelemomonga ononga minima konde molonge. <sup>11</sup> Pe Yesusi kolorumu kinia “Yu lomboropa ola molopili.” nirimumunga Minimu ononga konopumanga molomu liemu yu ungu aku sipa nirimumuni Karasi Yesusi topa makisinderimu kanu Pulu Yemone pe ononga kangima kololi ulu-pulumu pelemo kangima “Konde pangí.” nimbála. Yunga Minimu ononga konopumanga molemomonga yuni aku sembá.

<sup>12</sup> Akumunga, ango-keme, ,olio Pulu Yemonga Minimunga yomboma molemolo akumunga,, olio-kinia pundu sika gilimú-na-kolo olionga u-we-konopu-kirimanga pundu paa naa gilimú. Olionga u-we-konopu kirima ungumu pilipu semolo aulka se naa pelemo. <sup>13</sup> Ono u-we-konopu-kiri pelemomonga pilku seko molongi liemu Pulu Yemone ‘Ono mini pali kolangi.’ nilimú. Aku-sipa na-kolo ‘Minimuni olio lipa tapondomba kinia yunga tondolomone olio u-we-konopu-kirimanga uluma kolopili.’ ningi toko kondongi liemu kolkole ono konde molko kondoko mindi pungí.

8:14-17

### *Pulu Yemonga Minimuni Nokolemo Yomboma Pulu Yemonga Bolangoma Molemele Ungu Se (8:1-13 pea)*

<sup>14</sup> Pulu Yemonga Minimuni memba andolemo kinia yuni nilimú mele pilku molemele yomboma Pulu Yemonga bolangoma molemelemonga ,aku siku konde molonge,. <sup>15</sup> ‘Ono ,kelko, ‘Pulu Yemo mini-wale mundupu molamili.’ ningi kelko piliangi.’ nimba ka-kongono silimú mini se naa liltingi, mólo. ‘Pulu Yemonga bolangoma molangi.’ nilimú Minimu liltingi. Kanu Minimuni olio lipa tapondolemomonga olione Pulu Yemondo “Tata.” nimbu mangilielemolo. <sup>16</sup> We oliolio pilipu “Tata.” naa nilimulu. Yunga Minimuni olionga minimando “Ono Pulu Yemonga bolangoma molemele kene yundu “Tata.” niee.” nilimú kinia aku sipu nilimulu. <sup>17</sup> Olio yunga bolangoma molomulu liemu pe yuni yunga yomboma sepa kondolemo monge-mélema “Moke sepo siembo.” nimbale olio simbala, Karasi-kinia pea limulú. Aku-sipa na-kolo we naa simba. Olio ‘Pe yu pea yunga kolea-peangana kopu sepo molopo kondamili.’ nimbu kiniá Karasi pea kopu sepo mindili nombo

molomulu liemu „Pulu Yemone yunga sepa kondolemo monge-mélema Karasi simba limba kinia olio pea simba limulúla.“

8:18-25

### *Ulu Peangama Ombo Mona Lemba Ungu Se*

<sup>18</sup> Na pilieilio, ‘Pulu Yemonga pa sélimu-kinia molopo kondomolo ulu peangama mona lendemba kanu uluma paa olandopa mele; kiniá walemanga olio Karasinga yomboma mindili nombo molemolo uluma paa maniadopa mele.’ nimbu pilieilio.

<sup>19</sup> ‘Pulu Yemone ‘Nanga bolangoma kangi peanga liepili na-kinia kamu kopu sepo molamili.’ nimbá ulumu kanamili.’ ningui kanongendo Pulu Yemone serimu mélema pali nokoko molemele. <sup>20</sup> Sika Pulu Yemone serimu mélema pali molko kinjilimili, aku-na-kolo mélema onono ‘Molopo kinjamili.’ ninguli molko naa kinjilimili, mólo. ‘Ulu pe wendo ombá uluma kanangi nokoko molangi.’ nimbale Pulu Yemone yuyu ‘mélema sepa kinjepili.’ nimba serimu. <sup>21</sup> Pe wendo ombá ulu peangamo kanongendo ‘yuni serimu mélema pali, nokoko molemele akumu i-sipa: Pulu Yemone olio ‘Sepo kinjambo.’ nimbale ‘Olio-kinia mélema pali kolko purangi.’ nirimu, aku sipa yu olio kepe mélema pali ka-mele sirimumunga olio-kinia mélema pali wendo limba kinia yunga bolangoma ulu peangamo liku, molko kondonge mele yuni serimu mélema palila kanu ulumu liku molko kondongela.

<sup>22</sup> Olio pilielemolo, ‘Amboma bolang kanoko lingíndu mindili nongo perelemele mele Pulu Yemone serimu mélema pali aku siku mele mindili noringi, yandopa kiniá kepe mindili nongo perekolemele. <sup>23</sup> Mélema mindi mólolá, olio Pulu Yemone Minimu u kumbi lepa sipa pe mélema pali simba lipu taltomolo yomboma pea. I kangi sukundu mindili nombo perepo molopole ulu-pulu-kirimane olio kundupa kamemele silimú aku kangimunga olio wendo lipa kangi se lupa, Karasinga kangimu mele, sipa olio kamu alieli-alieli yunga bolangoma sepa limbamonga nokopo molemolo.’ nimbu pilielemolo.

<sup>24-25</sup> ‘Sika kiniá umbu kangina sukundu molopole molopo kinjilimulu. Pe walte kangi se lupa lipu Pulu Yemonga bolangoma kamu alieli-alieli molamili.’ nirimulumunga Pulu Yemone olio lipa tapondopa mindili nolemolá aulkana wendo liltimu. Aku-na-kolo ‘I-sipu kanomolo. I-sipu molomolo.’ nimbu pilielemolo mele u kanolemolánje molo u limolanje ‘I-sipu limulú, molo i-sipa wendo ombá.’ nimbu pilipu nokopo molemolá aulka se lelka. Yombo nawene mélse u lipa taltopale ‘Limbu.’ nimba pilipa nokopa molemoye? Aku naa selemolo-na-kolo kiniá ‘aku sipu limulú, aku sipu molomolo.’ nimbu pilipu ‘Aku walemo wendo ombá.’ nimbu taká lepo nokopo molemolo.

8:26-27

### *Minimuni Pulu Yemo Olionga Mawa Sendelemo Ungu Se*

<sup>26</sup> Akumunga ungu se pea pelemo: Olio konopukundu enge naa pelemo kinia Minimuni olio lipa tapondolemóla. Olio Pulu Yemo-kinia ungu nimulúndu mélema kinia, uluma kinia mawa semolo mele naa pilielemolola; ‘Yu-kinia nambi sepo ungu nimulúnje?’ nimbu, pilipu sundulimulula kanumu. Olio ‘aku sipu, pilipu sundupu molemolo kinia Minimuni pilipale kerena nimulúndu kála sepo manda naa nilimulu unguma yuni lipa sumbi sipa pilipale Pulu Yemo kinia olionga nimba pumba mawa sepa nindilimú. <sup>27</sup> Yombo konopumanga sukundu kanolemo Pulu Yemo Minimuni nimbá selemo ungumanga pulumu yuni pilielemo. Pulu Yemone ‘Uluma wendo opili.’ nimba pilielemo mele Minimuni pilipale olio lipa tapondopa olionga mawa sepa popo tondolemomonga Minimuni olionga mawa sendelemo ungumanga puluma Pulu Yemone pilielemóla.

8:28-30

*Yunga Yombo Molongema Pulu Yemone Koronga-U Nimba Taltorumu Ungu Se*

<sup>28</sup> Olio pilielemolo, olio Pulu Yemo konopu mondolemolo yomboma yuni 'ono-kinia konopu lelio uluma sambo.' nimba taltopa 'Pea molamili waa.' nimba limú yomboma minimuni olio 'Ulu se we wendo opili.' ni naa nilimú; 'Olio lipa tapondopa sepa kondomba uluma mindi wendo opili.' nilimú, akumu olio pilielemolo. <sup>29</sup> Paa koronga-u Pulu Yemone yunga yombo molongema kanopale 'Nanga malo komolayemo yuyu naa molopili, genupili kinia pea molangi kene' nimba 'Nanga yombo molonge.' nimba kanopa nimba taltorumu yomboma 'Nanga kangomo mele molangi.' nimba panjerimu. <sup>30</sup> Kanu-kinia yuni aku sipa nimba panjipa nimba taltorumu yomboma 'Nanga yomboma molangi waa.' nirimu; 'Nanga yomboma molangi waa.' nirimu yomboma kanopale ononga ulu-pulu-kirima siye kolopa, 'konopu sumbi nimba pepili molemele.' nimba kanorumu. 'Konopu sumbi nimba pepili molemele.' nimba kanorumu yomboma 'Nanga kolea peangana pea kopu sepo molopo méle peanga taltolioma pea taltamili wangi.' nirimu.

8:31-39

*Pulu Yemone 'Nanga Yomboma' Nimba, Nimba Taltorumu Yomboma Yuni Ono Konopu Mondolemo Aulkamo Kamu Mania Naa Pumbá Ungu Se*

<sup>31</sup> Akumunga, Pulu Yemone olio-kinia selemo i nikiru mele pilipuli olione nambolka nimulúye? Pulu Yemo aku sipa olionga opa-gerame molemomonga nawene olio-kinia opa-tou molopa manda topa mania mundumbaye? Sene manda mólo. <sup>32</sup> Yuni yunga malo kepe olio 'naa simbú.' naa nimba, olionga pali 'Lipa tapondopa kolali sepa kolondopili.' nimba pilipa lipa popenge sepa sirimu. Pe yunga malo selumu olionga nimba sirimu liemu aku sipa pe we mélema pea pali konopu kimbu naa sipa olio pilipa lipa popenge sepa naa simbaya? Pilipa lipa popenge sepa simbala.

<sup>33</sup> Pulu Yemone 'Nanga yomboma molangi.' nimba, nimba taltorumu yomboma nawene kote sendembaye? Pulu Yemone yuyu mindi ono kanopale ononga ulu-pulu-kirimu siye kolopa, 'konopu sumbi peli yomboma molemele.' nimba kanolemomonga yunga yomboma kote manda sendemba yombo se mólo. <sup>34</sup> Pe kiniá olio kote sendepale 'Nuni seko kinjenu kene pundu toko mindili nani.' nawene nimbáye? Se mólo. „Karasi Yesusini kepe aku naa nimbá.. Yu olionga nimba kolondorumu kanumu. Kolopale pe yu Pulu Yemone topa makisinderimu yu lomboropa ola molopa „imbi ola molopili Pulu Yemo-kinia mélema nokombando, Pulu Yemonga ki-lomekondo purumu akuna molopa, yuni Pulu Yemo olionga mawa sendelemo.

<sup>35</sup> Karasini olio konopu mondolemo aulkamo nawene manda pipi simbaya? Umbuna sembá mélsene manda pipi simbaya? Molo kamelé mindili sembá mélsene manda pipi simbaya? Molo yombomane olio seko kinjingí ulu sene, molo gelene kolomolo kanumuni, molo gele wambale mélema mólo tomba kanumuni, molo mélsene molo ulu sene olio topa kondomba sembá kanumuni, molo opa se wendo ombá kanumuni, kanu ungumanga pali sene Karasini olio konopu mondolemo aulkamo manda pipi simbaya? <sup>36-37</sup> Sene manda pipi naa simba, paa mólo.

Sika Pulu Yemonga bokumuni umbuna aku sipama olio-kinia wendo ombá mele nilimú, akumu i-sipa:

'Olio nunga yomboma molemolo-na

    alieli onone olio toko kondonge selemele.

Kongi konopu naa leko we tolemele aku mele

    olio aku siku 'tamili.' ningu molemelela.'

aku sipa bokumuni sika nilimú-na-kolo Karasi yuni olio konopu mondolemo-na olio 'Enge niengi.' nimba selemo kanu-kinia olio mindili silimú ulu akuma olione topo mania mundulimulu, aku ulumane olio unguri naa selemo naa sembá.

<sup>38-39</sup> Na pilielio, 'kololi ulu-pulumuni, molo mololi ulu-pulumuni, molo Pulu Yemonga mulu-koleana angellomane, molo Setenenga kurumane, molo kiniá pelemo ulumane, molo pe pemba ulumane, molo méle tondolomane, molo muluna paa ola mélemane, molo mana mania pelemomane, molo méle lupa lupamane pali kepe, Pulu Yemone olio konopu mondolemo aulkamo aku ulumanga pali sene manda pipi naa simba, paa mólo.' nimbu akumu na tondolo mundupu kuru mondolio. Pulu Yemone olio konopu mondolemo aulkamo Karasi Yesusi olionga Ye-Awilimuni kamu akisinderimu.

*Kolomongo-Awili 9-11*

## **Pulu Yemone Isirele Yomboma-Kinia Serimu Mele Pollone Nimba Sirimu Ungu Se**

### 9

*9:1-29*

*Pulu Yemone Yuyu Pilipa 'Sambo.' Nilimú Mele Selemo Ungu Se  
9:1-5*

*Pollone Isirele Yomboma Kamelé Umbuna Kolopa Kondo Kolorumu Ungu Se*

<sup>1</sup> Na Karasinga yombo se moliomonga ungu-sikamo nikiru. Kolo naa tokoro. Konopuni pilipuli, Mini Kake Sélimuni nanga konopuna 'Sika nikinu.' nikimu na pilkirula. <sup>2-3</sup> Nanga ango-keme, anda-kolepalimane na pea kalko litingi Isirele yombo akuma, 'onone selemelemonga Pulu Yemone ono sepa kinjimba, kolea kirina molko kinjiku mindi pungí-na pilipuli niliumuni,' 'Nanga konopuna paa kondo kolopo alieli kamelé umbuna kolopo mindili paa nombo molio.' 'akumu sika nikiru'. Akumunga 'Wendo liembo.' nimbu nane 'Nanga Isirele yomboma lipu tapondambo.' nimbu Pulu Yemone 'Ono molko kinjingí aulkana naa pang.' nimba na Pollo 'Karasí kinia pea molombolo aulka puliuna naa pambo.' nimba pipi sipa, 'Ononga kolali sepo molopo kinjimbu aulkana pambo, ono nanga kolali seko molko kondonge aulkana pang.' nimbá aulka se lelkanje nane Pulu Yemondo "Aku siku ni." nilka, aku-na-kolo aku sipa nimbá aulka se naa lemó.

<sup>4</sup> U Pulu Yemone Isirele yomboma nimba taltopa 'nanga bolangoma molangi.' nimba sepa liltimu ulumu kinia Pulu Yemonga pa sélimu kinia, ungu anju yando nimba panjipa mi lierimu unguma kinia, Mosisini ungu-mané sirimu ungu-manema kinia, Pulu Yemo popo toko kape ningí aulkamo kinia, 'Ono-kinia i-sipu i-sipu sembó.' nimba panjerimu unguma kinia, ima pali ononga. <sup>5</sup> Pulu-pulu anda-kolepa ye awilima Isirele yomboma onongala. Pulu Yemone 'Yomboma nokopa kondomba ye se lipu mundumbu.' nimba taltorumu ye nokoli Karasimu mana-ye molombando anda-kolepalimane yandopa kalko litingi yombo sene ye nokoli Karasimu yu merimu-na yu ononga talapena suku molorumula. Yu mélema pali nokopa molemo Pulu Yemo. Yu alieli-alieli kape nimbu siye naa kolopo imbi ambolopo paka tondamili. Aku sipa sepili.

<sup>6</sup> 'Anda-kolepa, Isirelene kalopa liltimu yombo nanga genupili mare awisili Pulu Yemo bulu silimilimunga sika Isirele yomboma naa molemelemonga ,na ono kanopo kondo selemo-na-kolo, aku sipu nikirumu 'Pulu Yemone Isirele yomboma-kinia "Sembó." nimba panjerimu ungumu kamu mania pumu.' nimbu naa nikiru. 'Pulu Yemone "Sembó." nimba panjerimu ungu akumu Isirele yombo sikamanga ungumu, akumunga yunga ungumu sika kamu mania naa pumu. We pelemo. <sup>7</sup> "Eporayamone kalopa liltimu yomboma pali Pulu Yemonga bolangoma molemele." manda naala nimulú. U Pulu Yemone Eporayamondo aku sipa nimba nimbale:

"Aisakene kalopa limba yomboma mindi imbi leko  
'Eporayamone kalopa liltimu yomboma.' ningí."

nirimu. <sup>8</sup> Aku ungumunga pulumu i-sipa: "Olio Eporayamone kalopa liltimumunga Pulu Yemonga bolangoma molemolo." manda naa ningí. Pulu Yemone Eporayamondo 'Yomboma-kinia sembó.' nimba panjerimu ungumu , 'Sika.' ningu kuru mondolemele yomboma mindi, Pulu Yemone 'Eporayamonga bolangoma.' nimba kanolemo. <sup>9</sup> Pulu Yemone "Sembó." nimba panjerimu ungumu i-sipa: "Wale 'wendo ombá.' nikirumu wendo ombá kinia kelepo yando ombó kinia ,nunga mena, Serane kango se membá." nirimu.

<sup>10</sup> Akumu mindi mólo. Ulu se peala i-sipa: „Eporayamonga malo Aisakenga menu, Repekane merimu kangotolonga lapa selumu mindi, akumu olionga anda-kolepa Aisake kanumu. <sup>11-12</sup> Akumu sika na-kolo olo-pakilia kangotolo u naa mepili, u ulu kiri peangama naa pilku sangili kepe Pulu Yemone Repekando nimbale: "Kango komomone kango akiliumunga kongono kendemande sendemba." nirimu. Pulu Yemone yuyu alieli pilipa 'wendo opili.' nimba taltolemo mele pilipale aku nirimu. Kangotolone ulu seringili mele kanopa naa apurupa, yu yunga konopumuni mindi pilipa nimba taltopale aku sipa nirimu. <sup>13</sup> Aku sipa Pulu Yemonga bokuna ungu se molemo, akumu i-sipa:

„Pulu Yemone nimbale:  
"Jekopo konopu mondopo

‘Nanga yemo molopili.’ niliu,  
aku-na-kolo Iso kanopo kiri pilipu  
‘Seluna naa molambili.’ , niliu.” nirimu.  
nimba bokuna molemo.

<sup>14</sup> Pulu Yemone aku sipa serimu ulumunga olione nambolka nimulúye? “Pulu Yemone aku sipa serimu mele lawa sepa, sepa kinjerimu.” nimulúye? Akumu paa manda mólo. Yuni sepa naa kinjerimu. <sup>15</sup> Aku ulumunga Pulu Yemone Mosisindu nimbale:

“Nane nanu yombo se  
‘sepa kinjimba kinia kanopole,  
‘Kondo kolopo ‘Mindili naa nopili.’ nimbú.’  
konopu lembo yombomo  
kondo kolopo ‘Mindili naa nopili.’ nimbú.

Nane nanu yombo se  
‘umbuna pemba kinia kanopole,  
‘Kondo kolopo lipu tapondombo.’  
konopu lembo yombomo  
kondo kolopo lipu tapondombo.”

nirimu. <sup>16</sup> Akumunga, yombo sene 'Pulu Yemone na 'yunga yombomo' nimba taltopili.' konopu lemónonga Pulu Yemone 'yunga' nimba naa taltolemo. Molo yombo sene 'Na nimba taltopili.' nimbale kála sepa ungu selemo akuma kanopa nimba naala taltolemo. Pulu Yemone yuyu, yunga kondo kololemo akumuni mindi aku selemo.

<sup>17</sup> Aku ulumunga Pulu Yemone „Mosinga kerena, Isipi ye nokoli kingimundu nirimu ungumu Pulu Yemonga bokuna molemo akumu i-sipa:

“ ‘Nu-kinia sembó mele yomboma kanoko  
nanga tondolomo kanangi.

Nanga imbimu ola molopili semanemo  
ma-koleamanga pali toko molangi.’ nimbu  
‘Nu Isipi yombomanga  
ye nokoli kingimu molani.’ nirindu.”

nirimu. <sup>18</sup> Akumunga, „kiniá olio pilielemolo: „Pulu Yemone ‘Yombo se kondo kolombo.’ konopu lemó yombomo sika kondo kololemo. ‘Nanga ungumu naa pilipa

kála sepa molopili.' nimbú.' konopu lemó yombomo sika aku sipa molemo.' „nimbu pilielemolo.„

<sup>19</sup> Akumunga, kiniá ono yombomanga sene na mangilipa pilipa nimba: „Pulu Yemone aku selemo, liemu olio ulu-kirima selemolo mele kanopale olio nambi semu-na ‘Seko kinjilimili.’ nilimúye? Pulu Yemone konopumuni pilipa ‘Sembó.’ konopu lemó mele nawene manda ‘Mólo.’ nimbáye?” nilka. <sup>20</sup> „Aku nilkala,-na-koło manayombo nawene Pulu Yemone ulu selemomanga “Seko kinjikinu.” nimba iri tombaye? Yombo sene mélse sepa wamombá kinia kanu mélemone yombomondo “Na nambi semu-na aku siku seko wamokonoye?” nimbá kinia papuye? <sup>21</sup> Mamone mingi sepa wamolemo ye sene mingi talo sepa wamopale ulu awili se wendo ombá kinia kongono simbando mingi peanga se sepa wamopa, we-walemanga kongono mingi se sepa, aku selemomo peanga naa selemoye? „Akumu yunga konopumuni pilipa selemo..„

<sup>22</sup> Aku liemu Pulu Yemone aku sipa manda naa sembaye? Pulu Yemone ‘Nanga mumindili kololio mele mona wendo opili. Nanga tondolomo kanangi.’ nimba, méle ‘Sepo kinjimbu.’ konopu lemó mélema sepa kinjimba walemo wendo ombá kinia sembando wale awisili we liepili siye kololemo akumu manda móloye? <sup>23</sup> „Aku sembá nikirumu, ‘Yunga pa sélimu kinia tondolomo-tolo kanoko, yunga molopa kondoli ulumu kanangi.’ nimba mélema pe lepa kondopa yunga pa sélima lembama korongau sepa wamopa taltendorumu aku mélema yu kondo kolomba mélema sembá kinia manda móloye? <sup>24</sup> ‘Mélema kondo kolombando sembá mélema.’ nikiru akuma olio mana-yombo Pulu Yemone nimba talitorumu yomboma. Olio Juda yombomanga mare manjipa mólo. We-yombo-lupamanga mare pea. <sup>25</sup> Akumundu Pulu Yemone u nirimu mele Osiane bokuna torumu molemo akumu i-sipa:

“Nanga yombo naa moloringima

‘Ono nanga yomboma.’ nimbú.

Yombo na konopu naa mondorunduma

‘Na konopu mondolio yomboma.’ nimbú.”

nirimu.

<sup>26</sup> “Kolea senga ‘Ono nanga yomboma mólo.’

nirindu aku koleana

‘Konde molopa mindi puli ulu-pulumu

pelemo Pulu Yemonga bolangoma.’ nimbú.”

nirimula. <sup>27</sup> Aisayane Isirele yomboma moloringi mele pilipa nimba:

‘Isirele yomboma „sika awisili molemele-na-koło,

nomú-kusa kelona okiya mele manda molemolánje

‘kepe wema pali kolonge kinia,’

Pulu Yemone paa koltalo mindi

lipa tapondomba kinia

ononga koleana kelko pungu „manda, molonge.

<sup>28</sup> Yawene mana-yombomanga kote

popenge sepa pilipale

ononga ulu selemelemanga sumbi sipa

kamu pundu topa mindili simba „akumunga,

aku sipa Isirele yomboma koltalo mindi

lipa tapondomba.’

nirimu. <sup>29</sup> U Aisayane nirimu mele aku sipa wendo orumu kanumu:

‘Pulu Ye, Paa Engema Pali Pelemo Ye-Awilimuni

olio pali topa kondopa

olionga yombo mare ‘we konde molko

yandopa yomboma kalko liengi.’ naa nilkanje

kolea-awili Sodomo kinia Gomoratolonga

yomboma torumu pali koloringi  
 seconde naa moloringi mele  
 olio aku sipu seconde paa naa molemolá.'  
 nirimu.

9:30—10:21

*Isirele Yombomane 'Yesusi Olio Lipa Tapondomba Orumu.' Ningu Kuru Naa Mondoringi Ungu Se*  
 9:30-33

*Isirele Yombomane 'Pulu Yemone Olio We Lipa Tapondomba.' Ningu Kuru Naa Mondoringimunga Pulu Yemone Ono 'Yombo Sumbi Nilima' Nimba Naa Kanorumu Ungu Se*

<sup>30</sup> Aku liemu kiniá olione nambolka nimulúye? „I-sipu nimulú:„ Isirele yombo naa molemele yombo-lupamane ‘yombo sumbi nilima molamili.’ ningukála seko uluma naa seko moloringi aku yomboma Pulu Yemone ‘yombo sumbi nilima’ nimba kanorumu. Pulu Yemonga ungumu ‘Sika.’ ningukuru mondoringimunga mindi Pulu Yemone ‘ono yombo sumbi nilima.’ nimba kanorumu. <sup>31</sup> Aku-sipa na-kolo ‘Pulu Yemone ‘nanga’ nimba, nimba taltorumu, Isirele yombomane ‘Olio Pulu Yemone ‘yombo sumbi nilima’ nimba kanomba ungu-mane se kanopo samili.’ ningumolkole ‘se naa lierimu-na’ koroko kelieringi. <sup>32</sup> Nambi semu-na yombo sumbi nilima naa moloringiye? Ono Pulu Yemonga unguma ‘Sika.’ ningukuru naa mondoringi akumunga ono yombo sumbi nilima naa moloringi. Ono onono ‘Kála seko ulu peangama senge kinia ono ‘yombo sumbi nilima’ nimba kanomba.’ konopu lieringimunga ‘Pulu Yemone ‘ono yombo sumbi nilima’ nimba naa kanorumu.’ ‘Yombo sele-male tondolemo kou’ akumuni ono topa mania mundorumu. <sup>33</sup> ‘Aku koumunda, Pulu Yemonga bokuna ‘Aisayane torumu, ungu se molemo, akumu isipa:

‘Piliayo! Yomboma sele-male tondolemo kou se,  
 yomboma topa mania mundumba kou se,  
 nane Mulu Sayono ola liepili taltorundu.

Kanu koumu molemo yemo ‘Yu sika  
 ‘Pulu Yemone ‘Olio nokopa kondopili.’ nimba  
 lipa mundorumu ye nokoli Karasimu.’ ningukuru mondonge yombomane  
 ‘yuni sika lipa tapondombamonga,  
 pe ‘Yu kolo tokomo.’ ningukonopu kiri panjingí aulka se naa lemba.’  
 nimba bokuna molemo.

## 10

10:1-15

*Pulu Yemone Ulu Serimumanga Pulumu Isirele Yombomane Naa Pilieringi Ungu Se*  
 (9:30—10:21 pali)

<sup>1</sup> Ango-keme, ‘Nanga pulu lemó Isirele yomboma mindili nolemolá aulkana wendoongo, yu kinia pea molko kondonge aulkana pang.’ konopu lepo ‘na Pollone, Pulu Yemo alieli mawa sepo molio. <sup>2</sup> Onone Pulu Yemone “Saa.” nilimú uluma ‘Tondolo mundupu samili.’ ninguselemele mele na kanopo manda nimbu simbú-na-kolo Pulu Yemone kanopa peanga pilielemo uluma naa pilku kondolemele akumungaaku sipu mawa sepo molio. <sup>3</sup> Pulu Yemone ‘yombo sumbi nilima.’ nimba kanolemo mele naa pilku, ono onono pilku ‘I-sipu semolo kinia yombo sumbi nilima molomolo.’ ningupilku seringi. Akumunga ‘Pulu Yemone ono ‘yombo sumbi nilima’ nimba kanolemo

ungumu samili.' naa niringi. <sup>4</sup> Karasini 'Yomboma , 'Na sika lipa tapondopa, mindili nolemolá aulkana wendo limú.' ningu, kuru mondolemele yomboma pali Pulu Yemone 'yombo sumbi nilima' nimba kanopili.' nimba 'Mosisini Pulu Yemonga, ungu-manema ,sirimuma,nga tondolomo Karasini 'mania pupili.' nirimu kanumu.

<sup>5</sup> Mosisini sirimu ungu-manema pilku liku senge yomboma Pulu Yemone 'yombo sumbi nilima' nimba kanomba mele Mosisini boku topa nimbale:

"Ungu-manema ,pali, pilku kondokole

sumbi siku senge yomboma

aku sengemonga molko kondoko mindi pungí."

nirimu. <sup>6</sup> Aku-na-kolo 'Yesusi Karasi, sika ,nanga nimba senderimu,' ningu kuru mondolemeleonga Pulu Yemone 'yombo sumbi nilima.' nimba kanombamonga ungu se i-sipa molemo:

"Ono onono konopumane pilkuli,

'Nawene ( 'Karasi mana mania lipu membo wambo.'

nimba) mulu-koleana ola pumbaye?'

ni naa niengi."

ungu se aku sipa molemo. <sup>7</sup> Molo i-siku ningí:

" 'Nawene (Karasi kelepa kololi koleana  
wendo lipa memba ombándo)

yombo kololima pulimili koleana

mania pumbaye?' ni naa niengi."

nimba molemo.

<sup>8</sup> 'Aku sipa ungumu manda mólo. Pulu Yemone yombo sumbi nilima nimba kanolemomonga, ungumu nambolka nimba molemoye? I-sipa nilimú:

"Ungumu ono-kinia nondopa molemo.

Ononga keremanga molopa konopumanga pelemo."

nilimú. Aku ungu nirimumu 'Ye Nokoli Karasimu, sika ,olionga lipa tapondólimu,' nimbu kuru mondolemololo ungumu olione andopo nimbu silimuļu ungu kanumu.

Akumu i-sipa: <sup>9</sup> Onone sumbi siku "Yesusi yu ,nanga, Ye-Awilimu." ningu siku, ononga konopumanga 'Yu kolorumu kinia Pulu Yemone yu óno-koleana topa mak-isinderimu.' ningu kuru mondonge kinia Pulu Yemone lipa tapondopa ono mindili nolemolá aulkana wendo lipa, yu-kinia pea molko kondonge aulkana lipa mondomba.

<sup>10</sup> Konopumane , 'Yesusi sika nanga nimba kolondorumu kinia Pulu Yemone sika yu topa makisinderimu. Yu nanga Ye-Awilimu.' ningu, kuru mondolemele yomboma aku siku kuru mondolemeleonga Pulu Yemone ono kanopale, ononga ulu-pulu-kirima siye kolopa ono 'yombo sumbi nilima.' nimba we kanolemo. Konopumane ningu pilku kuru mondolemele mele 'Yomboma piliangi.' ningu keremeane ningu silimilimunga Pulu Yemone ono lipa tapondopa mindili nolemolá aulkana wendo lipa yu-kinia molko kondonge aulkana lipa mondolemo. <sup>11</sup> Akumu Pulu Yemonga bokuna ungu se molemo mele i-sipa:

'Yu sika ,lipa tapondomba.

Yu-mambele molopo kondombo.' ningu

kuru mondolemele yombomane

,yuni sika lipa tapondombamonga,

pe 'Yu kolo tokomo.' ningu

konopu kiri panjingí aulka se naa lemba.'

nilimú. <sup>12</sup> Bokuna 'kuru mondolemele yomboma' nilimú akumu Juda yombomando mindi naa nilimú. Juda yomboma naa molemele yombomando kepe pali nilimú. Ye

awili selumu olionga pali Ye-Awilimu akumunga olio pali selu sipa nokolemo. Ye-Awilimu yu mangilku 'Na liku tapondou.' ningu mawa selemele yomboma pali awili-sepa sepa kondolemo.

**13** "Ye-Awilimu imbi leko mangilku

‘Liku tapondou.’ ningu, mawa selemele  
yomboma pali yu sika lipa tapondopa  
mindili nolemolá aulkana wendo lipa  
yu-kinia pea molko kondonge aulkana  
lipa mondomba.”

akumunga olio pali selu sipa nokolemo.

**14** Aku liemu ‘Yu sika. „Yuni sika lipa tapondopa mindili nolemolá aulkana wendo limba.,’ ningu kuru naa mondokole “Liku tapondou.” ningu nambi seko yu mangilingíye? Yuni ononga nimba senderimu, yu molemo mele semanemo naa pilkuli ‘Yuni lipa tapondomba.’ ningu nambi seko kuru mondongeye? Yombo sene yuni ononga nimba senderimu, yu molemo mele nimba naa simba kinia ono nambi seko pilingíye? **15** “Ungumu ningu si-paa!” nimba lipa naa mundumbaba kinia ono nambi seko ungumu pungu ningu singíye? Aku sipa Pulu Yemonga bokuna ungu se molemo, akumu i-sipa:

“Yomboma ungu peangamo ningu singíndu  
kimbu kongono seko olemele akuma  
yombo paa peangama.”

nilimú.

**10:16-21**

*Isirele Yombomane Pulu Yemonga Semane Peangamo Pilku Naa Liltingi Ungu Se (9:30—10:21 pali)*

**16** Aku-sipa na-kolo Isirele yombo mare semane peangamo pilku naa liltingi. Akumunga Aisayane nimba:

“Ye-Awilimu, nunga ungu andopo nimbu sirimulumu  
namelene ‘Sika.’ ningu kuru mondoringiye?”

nirimu. **17** Akumunga, Pulu Yemonga ungu ningu silimili pilielemene aku ulumuni yombomane ‘Karasi, sika. „Yuni sika na lipa tapondopa mindili nolka aulkana wendo limba.,’ ningu kuru mondolemele aulkamo akisindilimú. Unku ungu silimili pilielemene akumu Karasinga ungumu.

**18** Aku-sipa na-kolo nane mangilipuli: ‘Isirele yomboma ono i ungumu, naa pilieringiye?’ nimbu mangilkiru. Mólo, ‘aku naa nikiru,. Ono paa sika pilieringi. ‘Akumu Pulu Yemonga bokuna ungu se molemo:’

“Keremanga niringi unguma yombo moloringi  
ma-koleamanga pali wendo ombo purumu.

Ononga unguma koleamanga pali pilieringi.”

‘ungu se aku sipa molemo.,’ **19** Kelepo ungu se mangilipuli: ‘Isirele yomboma i ungumunga pulumu naa pilieringiye?’ nimbu mangilkiru. Mólo. Paa sika pilieringi. Mosisini ‘Isirele yombomando Pulu Yemonga, ungu se nirimumu u niembo:

‘Pulu Yemone onondo nimba:

‘Yombo talape imbi naa mololima.’

‘ningu kanolemele, yomboma  
sepo kondombo kinia,

molko kondongemonga kanokole

ono Isirele yombomane

kanu yomboma-kinia konopu kiri panjiku

‘Ono maloya. Olioaku sipa sepa kondopili kene

Pulu Yemonga ungumu pilipu  
 yu bulu naa siemili.' niengi.' , nimbú.  
 ,Ono Isirele yombomane,  
 'Yombo talape konopu naa peli  
 molko kinjilimili yomboma.'  
 ,ningu kanolemele, yomboma  
 na Pulu Yemone ,lipu tapondombo kinia,  
 molko kondongemonga kanokole  
 nane 'ono Isirele yombomane akuma kanoko  
 mumindili kolko,  
 , 'Olio aku sipa sendepili  
 yu molemona pamili.' niengi.' nimbú."  
 nirimu. <sup>20</sup> ,Sika Isirele yombomane 'Olio manjipu Pulu Yemonga yomboma  
 molemolo.' ningu pilieringi-na-kolo, Aisayane kepe aku sipa ,Isirele yomboma, pipili  
 naa kolopa ,Pulu Yemonga, ungu se ,Isirele yombo talape ultukundu yombomando,  
 sumbi sipa nimbale:  
 "Na 'koropo kanamili.' naa niringi yombomane  
 na kanoko lenderingi.  
 Na ungu se mangilku naa pilieringi yomboma  
 'Na kanangi.' nimbu ono moloringina  
 ombo mona molorundu."  
 nirimu. <sup>21</sup> Isirele yombomando Aisayane ,Pulu Yemonga, ungu se pea nimbale:  
 "Nanga ungumu naa pilku liku,  
 kara pulimili yombomando  
 nane alieli "Wangi." nimbu  
 koronga-u kepe kiniá yandopa kepe  
 kangulupu limbu sepo giliu."  
 nirimu.

## 11

*11:1-10*

*Pulu Yemone Isirele Yombo Koltalo We Moloringima Kondo Kolorumu Ungu Se*

<sup>1</sup> Akumunga nane ,ono, mangilkiru: Pulu Yemone yunga Isirele yomboma bulu  
 sipa mundupa kelierimuye? Paa mólo! Na ,Pollo, Isirele ye sela, Eporayamone kalopa  
 liltimu ye se, na Benjamininga yombo talapemonga ye se. ,Na bulu sipa mundupa naa  
 kelierimu kanumu. <sup>2</sup> Pulu Yemone yunga yombo pe molonge mele u pilierimu kanu  
 yomboma mundupa naa kelierimu. ,Pulu Yemone ungu-umbu tondorumuma pilipa  
 yomboma nimba sirimu ye, Illainjane serimu mele semane Pulu Yemonga bokuna  
 molemomo ono naa pilielemeye? Illainjane Isirele yombomane seko kinjeringi mele  
 Pulu Yemondo tondolo mundupa nimba sipa nimbale:

<sup>3</sup> "Ye-Awilimu, nunga ungu-umbu tondolenoma  
 pilku andoko ningu silimili yema toko kondoko,  
 nu popo toko kalolemele poloma  
 toko bultuku seko kinjeringi.  
 Kiniá na selumu mindi ,nunga ye, moliomo  
 toko kondonge sekemelela."

nirimu kanumu. <sup>4</sup> Aku-sipa na-kolo Pulu Yemone yundu pundu topa nambolka  
 nirimuye? Yuni nimbale:

"Yombo sepen tausini molemele akuma  
 nane nokoliomonga onone 'olio nokolemo  
 pulu yemo' ningu kolo toli Ballenga

kumbikerena tamalu peko popo naa tolemele.”  
 nirimu. <sup>5</sup> Aku sipala kiniá kepe Pulu Yemone „Isirele, yombo mare koltalo we kondo kolopa ‘nanga yomboma molangi.’ nimba, nimba taltorumu-na molemele.  
<sup>6</sup> Pe yuni yuyu ono we kondo kolopale ‘Yunga yomboma molangi.’ nimu liemu ononga kongonomo selemolámonga unguri naa selka. Ono kongono sengemonga yuni kanopale ‘Nanga yomboma molangi.’ nimu liemu yuni yomboma we kondo kolopale, ‘Nanga yomboma molangi.’ nilimú aku we kondo kololi ulumu sika we kondo kololi ulumu mólo.

<sup>7</sup> Aku liemu kiniá olione nambolka nimulúye? Isirele yombomane „Pulu Yemo kinia konopu seluna pupili molko yuni ono ‘yombo sumbi nilima.’ nimba kanomba ulumu, ‘Paa liemiliya!’ ningu kongono kála seko seringi-na-kolo naa liltingi akumu „Pulu Yemone yuyu konopumuni pilipa, nimba taltorumu yomboma liltingi. We-‘Isirele’-yomboma konopu pipi sirimumunga Pulu Yemonga ungumu pilingí aulka se naa lierimu. <sup>8</sup> Akumunga ungu se „Pulu Yemonga, bokuna toringi molemo, akumu i-sipa:

“Pulu Yemone ono  
 ‘konopu naa peli yomboma mele molko,  
 mongone mélema naa kanoko,  
 komuni unguma naa piliangi.’ nirimu akumu  
 pe kiniá kepe yandopa yandopa aku siku molemele.”  
 nimba molemo. <sup>9</sup> „Kanu yomboma Depitini ‘Yunga opa-touma molangi.’ nirimu mele molonge..” Depitini „yunga opa-touma molonge mele, ungu se i-sipa nimbale:  
 “Ononga kere-langi nongo molonge koleamo  
 kera mamuli anjeli koleamo mele lepa,  
 yombo sepa a tondolemo mélse mele lepa,  
 onone seko kinjilimilimunga  
 pundu topa umbuna simba mele se liepili.

<sup>10</sup> Ononga mongomane ‘mélema naa kanangi.’  
 nimba pipi sipa, simbulu topa,  
 alieli ono umbuna awili seko mengemonga  
 ononga buluma langopa olkondo sukundu opili  
 molko mindi pang.”

nirimu.

**11:11-24**

### *Pulu Yemone Yombo Talape Lupama ‘Nanga Yomboma Molangi.’ Nirimu Ungu Se*

<sup>11</sup> Akumunga na ungu se pea mangilikirula: „Isirele yomboma, molko kinjeringi kinia kamu molko kinjeringiyé? Paa mólo! Isirele yomboma Pulu Yemo kinia seko kinjiku bulu siringimunga Pulu Yemone yombo-lupamando lipa tapondopa ‘Mindili nolemolá aulkana wendo ongo, na-kinia pea molko kondonge aulkana pang.’ nimba lipa mondorumu. ‘Na yombo-lupama lipu tapondombo kinia Isirele yomboma kanokole konopu kiri panjiku ‘olio yu-kinia seluna konopu seluna pupili molemolánje peanga.’ niengi.’ nimba aku serimu. <sup>12</sup> Aku-sipa na-kolo Isirele yombomane Pulu Yemo kinia seko kinjiku bulu siringimunga Pulu Yemone ma-koleana pali yomboma paa sepa kondorumu, Isirele yombomane Pulu Yemonga ulu peangama munduku kelieringimunga yombo-lupama-kinia ulu peangama serimu. Aku liemu Isirele yomboma Pulu Yemo molemona kelko ongo yunga talapena sukundu molonge kinia yomboma-kinia pali ulu peanga awisili olandopa olandopa sembá.

<sup>13-14</sup> Ono Isirele yomboma naa molko yombo-lupa molemelema, nane kiniá onondo nikiru. Na yombo-lupamanga nimba Karasini lipa mundorumu yemo moliomonga yombo-lupama ‘ungu peangamo, nimbu silipu andolio mele ‘Nanga

Isirele yombomane kanokole "Ono malo." ningu yama mengole mindili nolemolá aulkana wendo ongo Pulu Yemo kinia pea molko kondonge aulkana pangí.' nimbu Yesusini na 'yombo-lupamanga' nimba lipa mundundorumu yemo molio mele yomboma pali nimbu silipu andolio. <sup>15</sup> Pulu Yemone Isirele yombomando "Naa ongo anju paa." nirimu-kulu mana-yomboma pali yu molemona sukundu pungu molko kondoko mindi pungí aulkamo wendo orumu. Aku sipa Isirele yomboma molko kondonge aulkamo mania purumumunga yombo-lupama molko kondonge aulkamo wendo orumu-kulu nanga Isirele yomboma ono Pulu Yemone kelepa sukundu límu liemu kololi ulu-pulumu mania pumbale molopa mindi puli ulu-pulumu paa kamu wendo ombá. <sup>16</sup> Pellawa kalongendo pellawa topele tolemelemonga mare u wendo liku Pulu Yemo popo toko silimili akumu Pulu Yemonga pellawa kake sélimu lemó liemu pellawa we lemóma pali kepe Pulu Yemonga pellawa kake selima lemóla. Unju senga pulkonioma Pulu Yemonga kake selima liemu unjumu pali Pulu Yemonga unju kake sélimula.

<sup>17-18</sup> Unju ollipi peanga kaliana gilimúmunga kola mare Pulu Yemone langopa eltopale, ono yombo-lupama kondena unju ollipi kiri gilimúmunga kolama mele moloringimunga kola mare langopa unju ollipi peangamonga lipa waka-maka suku panjerimumunga onone 'Unju peangamonga kola maniandopa, olio olandopa molemolo.' ningu konopumane naa piliangi. Kola peangama kinia unju peangamonga kere-langi norumu kere-langima ono-kinia pea nolemelemonga onone 'Unju peangamonga kola maniandopa, olio olandopa molemolo.' ningu konopumane naa piliangi. Aku siku konopu lieringi liemu i-siku piliangi: 'Ono unju kolamane unjumunga pulkonioma kere-langi naa silimili. Unjumunga pulkoniomane ono kolama kere-langi silimú.' konopu leayo. <sup>19</sup> Aku-sipa na-kolo pe ono 'Isirele yombo naa molemelemane, ninguli: "Pulu Yemone 'Olio kola kirima lipu unju peangamonga panjambo.' nimba unju peangamonga kola mare langopa eltorumu." ningí. <sup>20</sup> Akumu sikala. Na-kolo unju peangamonga kola langopa eltorumu akumane 'Pulu Yemone 'Ono nokopa kondopili.' nimba, nimba taltorumu ye nokoli Karasimu 'Yu sika orumu.' ningu, kuru naa mondoringimunga Pulu Yemo yuni ono langopa eltorumu; ono unju kirimunga kolama onone 'Yu sika orumu.' ningu, kuru mondolemelemonga aku siku gilku kondolemele. Akumu sika na-kolo 'Olio peanga.' ningu ononga imbima ambolko paka naa toko kála seko naa molangi. Pipili kolko pilku kondoko molayo. <sup>21</sup> Pulu Yemone unju peangamonga kolama 'kondo naa kolopa, we giliepili siye naa kolopa, langopa eltorumumunga ono kepe aku sipa we giliepili siye naa kolomba kene kála seko naa molayo.

<sup>22</sup> Imu konopumane pilku molayo: Pulu Yemone yomboma-kinia ulu peangama sepa, mindili silimú uluma sepa, peatolo selemo. Yu munduku kelieringi yomboma mindili sirimu, aku-na-kolo onone yu kanopa peanga pilipale ono sepa kondomba uluma seko molongi liemu yuni ono-kinia ulu peangama serimu mele sika aku sipa sembá. Aku naa engi liemu ono langopa eltombala. <sup>23</sup> Pe unju kola u langopa eltorumuma konopu topele toko kelko 'Ye nokoli Karasimu yu sika orumu.' ningu, kuru mondongi liemu unju langorumuna kelepa topa mondomba. Pulu Yemone kanu kolama aku sipa manda sembá. <sup>24</sup> Ono pilielemele, ono kondena unju ollipi kirimunga kolama Pulu Yemone langopa unju ollipi peanga kaliana umbu topa nokorumu, kanumu ononga unjumu mólo, aku unjumunga ono mondorumu. 'Aku sipa mele manda naa sembá.' ningu naa selemele kanumu. Aku serimu kinia manda orumu liemu unju peangamo yunga kolama kelepa lipa topa mondomba kinia paa manda naa gilimbaye?

11:25-32

*Pulu Yemone Yunga Kondo Kololi Ulu-Pulumu 'Yomboma Pali Kanangi.'* Nimba

*Serimu Ungu Se Kinia Pulu Yemone Isirele Yomboma Pali ‘Mindili Naa Nangi.’ Nimba Lipa Tapondomba Ungu Se Kinia*

<sup>25</sup> Ango-keme, Pulu Yemonga ungu-pulu se u lopi sepa perimumu ono naa pilingí kinia manda naa sembá. ‘Onone ‘Olio pilipa kondoli yomboma molopo unguma pali pilielemolo.’ ningu naa piliangi.’ nimbu kanu ungu-pulu lopi sepa perimumu piliangi nimbu siembo. Akumu i-sipa: Isirele yombomane pali Pulu Yemonga ungumu ‘Sika.’ ningu kuru mondoko lingí aulkamo kamu pipi naa silimú. Pulu Yemone yombo-lupa nimba taltorumu yomboma pali yunga talapena sukundu sukundu olemele kinia mindi Isirele yombomanga konopuma iseli-u pipi silimú. <sup>26</sup> Yombo-lupama Pulu Yemonga talapena sukundu ongo pora singí kinia Pulu Yemone yunga Isirele yomboma pali lipa tapondopa mindili nolemolá aulkana wendo lipa yu-kinia pea molko kondonge aulkana lipa mondomba. ‘Pulu Yemonga, bokuna ungu se aku sipa nimba molemo, akumu i-sipa:

‘Pulu Ye Yawene nimbale:’

“‘Isirele yomboma kamu molko naa kinjangi.’ nimba  
lipa tapondomba yemo Jerusalleme molopale ombá.

Kanu yemone

Jekopone kalopa liltimu yombo talapemo  
Pulu Yemonga ungumu naa pilku  
bulu siku molemele mele ‘munduku kelko  
konopu topele tangi.’ nimba lipa tapondomba.

<sup>27</sup> Nane ‘ononga ulu-pulu-kirima mania pupili.’

nimbú walemonga  
aku sipu aku ungumu nimbu panjipu mi lembo.”

‘nirimu,’  
nimba molemo.

<sup>28-29</sup> Pulu Yemone yombo sendo “Yu nanga yombomo molopili.” nimba, nimba taltopale kelepa konopu topele naa tolemo. “Yu sepo kondombo.” nimba panjilimú unguma konopu topele naa topa siye naa kololemo akumunga Isirele yombomane ‘Yesusinga,’ semane peangamo naa pilku liku bulu siringimunga Pulu Yemo Isirele yomboma-kinia opa-tou molemele akumunga ono yombo-lupama lipa tapondopa Pulu Yemonga yomboma molonge aulkamo akisinderimu. Aku-sipa na-kolo Pulu Yemone Isirele yombomanga pulu-pulu anda-kolepalima konopu mondopa ‘Onone kalko lingí yomboma ‘nanga yomboma molangi.’ nimbu.’ nimba, nimba taltorumu mele pilipale kiniá Isirele yomboma konopu mondopa molemo. <sup>30</sup> Ono yombo-lupamane u Pulu Yemone “Saa.” nirimu mele pilku liku naa seko mokoli seringi-na-kolo Isirele yombomane Pulu Yemone “Saa.” nirimu mele mokoli seringimunga Pulu Yemone ono yombo-lupama we kondo kololemo. <sup>31</sup> Aku sipala Pulu Yemo ono yombo-lupama we kondo kololemomonga Isirele yombomane Pulu Yemonga ungu naa pilku mokoli selemele. Aku-sipa na-kolo we mólo. Pulu Yemo yuni Isirele yomboma we kondo kolombala. Ono yombo-lupama Pulu Yemone we kondo kololemo mele aku sipa yuni Isirele yomboma kepe we kondo kolombando Isirele yomboma ono yunga ungumu pilku mokoli selemelela. <sup>32</sup> Yomboma pali Pulu Yemone ‘We kondo kolambo.’ nimbale ‘Ono pali u ungumu naa pilku bulu siengi.’ nirimu.

11:33-36

*Pollone Pulu Yemo Kape Nimba Imbi Ambolopa Paka Tondorumu Unsu Se*

<sup>33</sup> Olionga Pulu Yemo paa molopa kondolemo.

Yu molemo mele olione pilipu sundulimulu.

Mulúmu paa olandopa lemó olione

yu manda naa manda manjimulú mele aku sipala  
Pulu Yemo yunga ulu peanga selemoma kinia

yunga konopumu kinia  
yunga pilipa kondolimu kinia  
paa awisili pelemo,  
olione manda pilipu naa limulú.  
Yu konopumuni pilipa nilimúmanga puluma  
olionga yombo sene paa manda naa pilipu nilimulu;  
yu aulka pulimúma  
paa manda naa kanopo lendelemolo.

<sup>34</sup> “Nawene Ye-Awilimu konopu lemó mele pilielemoye?  
Molo nawene unguma kinia, uluma kinia,  
Ye-Awilimu lipa ora simbaye?”

<sup>35</sup> “Molo nawene ‘Yuni na méle pundu topili kene  
nane yu-kinia elou sambili.’ nimba  
yu mélse we sirimuye? ‘Yombo se mólo.’”

<sup>36</sup> Yu mélema pali serimu Pulu Yemo;  
yu mélema pali enge sipa nokopa molemo;  
mélema pali yunga mindi.

Kiniá kepe pe alieli kepe olione  
‘Yu paa olandopa yemo. Yunga imbimu  
mélemanga pali paa olandopa molemo.’ nimbu  
yu kape nimbu  
imbi ambolopo paka tondolepo mindi pamili.  
Sika aku sipa sepili.

12:1-15:13

## Ye Nokoli Karasimu ‘Sika’ Ningu Kuru Mondolemele Yombomane Ulu Senge Mele Pollone Nimba Sirimu Unguma

### 12

12:1-2

Pollone “‘Pulu Yemo Popo Tamili.’ Ningu Onone Onono Konde Molangi Kangi Pali  
Yu Siee.” Nirimu Ungu Se

<sup>1</sup> Akumunga, ango-keme, nane onondo tondolo mundupu nikiru: “Pulu Yemone  
olio kondo kolopa ‘Naa tambo.’ nilimú kene ‘yombomane kongi kinia kera kinia paa  
kake selima Pulu Yemo popo toko kalko siringi yuni kanopa peanga pilipa liltimu  
mele, onone ‘Pulu Yemo popo tamili.’ ningu ono onono konde molangi kangi pali  
ulu-pulu-kiri se naa pepa kake sepili yu siengi.” nimbu mawa sekero. ‘Pulu Yemo  
cape nimbu yunga imbi ambolopo paka tondamili.’ ningu aku siku sangi. <sup>2</sup> Aku  
sekole ononga kangimane kelko we-mana-yombomanga konopu leko uluma selemene  
mele manda manjiku naa sayo. ‘Pulu Yemone olio konopu kondema sipili.’ ningu  
topele toko konopu lupa leko ulu lupa seko molayo. Aku siku sengi liemu onone Pulu  
Yemone ‘Ulu sangi.’ konopu lemó uluma manda pilingí. Ulu peangama kinia ulu yu  
kanopa konopu silimúma kinia ulu sumbi nilima kinia manda pilingí.

12:3-8

Pulu Yemone Olio Yu-Mele-Mele Tondolo Apurupa Silimúmane Yunga Kongonomo  
Samili Ungu Se

<sup>3</sup> Pulu Yemone na we kondo kolopale nando “Andoko yomboma nanga ungumu  
ningu si.” nirimu-na nane onondo nimbili: “Ono yu-meles mele molemele mele  
konopu siku imbi mania mele molopili moltkole ‘Olio imbi ola mele molopili

molemolo.' konopu naa leaa." nikiru. Pulu Yemone ono kongono lupa lupamanga pilipa kondoli lupa lupa sirimu akumane konopu leko kondoko ono yu-mele-mele selememele senge mele apurayo. <sup>4</sup> Olionga kangina kimbu-ki mele gilimúmane pali kongono lupa lupa selememele. Kini kongono lupa sepa, mongone lupa sepa, komuni lupa sepa, kangimunga mélemane aku siku kongono lupa lupa selememele mele <sup>5</sup> aku sipu olio yombo awisili molemolo-na-kolo olio Karasinga yomboma molemolomanga olio kangi selumu mele molopo kangi selumunga kimbu-ki mélema mele molemolo.

<sup>6</sup> Pulu Yemone yuyu 'Olio yu-mele-mele kongono lupa lupa samili.' nimba, pilipa kondolima lupa lupa moke sepa silimú kanu kongonoma samili.

Ungu nimba silimunga pilipa kondolimu simu liemu Pulu Yemone ungu-umbu tondolemoma pilielemolo mele yomboma unguma nimbu siemili. Kanu yombomanga se Pulu Yemo , 'Sika lipa tapondolemo.' nimba, awili sepa kuru mondolemo yombomone ungu awisili tondolo mundupa nimba sipili. Molo yombo se Pulu Yemo kanga sepa mele mindi kuru mondolemomone kanga sepa nimba sipili.

<sup>7</sup> Yombo lipa tapondoli pilipa kondolimu silimú liemu yomboma lipa tapondopili. Ungu-mané sili pilipa kondolimu silimú liemu akumu limú yombomone ungu-mané sipili.

<sup>8</sup> 'Umbunamane yomboma topa mania naa mundopili. Konopu tondolo pupili molangi.' nilimú pilipa kondolimu pelemo yombomone aku sipa nipili.

Yombo lupama lipa tapondombando kou-mone silimú yombomone konopu talo sepa naa lepa pilipa lipa popenge sepa kou-mone sipili.

Yombo-lupamanga kongono nokolemo yombomone nokopa kondopili.

Yombo mindili nolemelema kondo kolopa lipa tapondolemo yombomone konopu sipa lipa tapondopili.

*12:9-21*

### *Ononga Genupilima Konopu Mondonge Ungu Se*

<sup>9</sup> 'Yombo lupama, paa sika konopu mondoko kondayo.

Ulu-pulu kirima kanoko kiri pilku munduku kelko, ulu-pulu peangama mindi yakala kolko tondolo munduku seko molangi.

<sup>10</sup> Ononga genali konopu mondolemele mele Karasinga yomboma anju yando konopu mondayo.

Ononga yombo mare molko kondonge ono molko kinjingí kinia konopu awisili naa leko konopu peanga pepili yombo lupama kape ningu molayo.

<sup>11</sup> Ulu peangama sengendo siye naa kolko enge ningu seko, 'Yombomane olio Pulu Yemonga Minimu pea molemoloma ningu kanangi.' ningu 'Yu olio ambolopa molopili.' ningu molayo. Ye-Awilimunga kongonomo tondolo munduku sendayo.

<sup>12</sup> 'Pe molopo kondomolo.' ningu kuru mondoko konopu sieyo. Mindili singí kinia mumindili naa kolko taka leko molayo. Alieli Pulu Yemo kinia ungu ningu molayo.

<sup>13</sup> Pulu Yemonga yombo mare méle mólo tolemoma liku tapondoko méle mare siengi.

Yombo kolea suluna yombo mare ponenge onge kinia liku tapondoko "Pea peamili waa." niengi.

<sup>14</sup> Yombo marene ono seko kinjingima 'Pulu Yemone ono sepa kondopa lipa tapondopili.' ningu yu mawa sangi. Sika Pulu Yemo mawa sendekole 'Kanu yomboma sepa kondopa lipa tapondopili' niengi. 'Ono „pundu topa, sepa kinjepili.' ningu mawa naa sangi.

<sup>15</sup> Yombo konopu singíma-kinia ono konopu siku molangi. Yombo kola sengema-kinia kola seko molangi.

<sup>16</sup> Yomboma-kinia konopu seluna pupili uluma selu-siku seko molangi. Ono kakara naa ningu ‘Yombo awilima molemolo, we-yomboma-kinia naa andopo molomolo.’ naa ningu, yombo imbi naa mololima-kinia konopu siku seluna kopu seko molangi.

‘Na imbi paa ola molemo. Na paa pilipa kondoli pelemo yombomo molio.’ naa niengi.

<sup>17</sup> Yombo marene ono seko kinjingí kinia onone anju seko naa kinjangi.

Yombomane pali kanoko peanga pilielemele uluma mindi pilku seko molangi.

<sup>18</sup> Opa seko mumindili kololi ulu akuma konopu liku munduku naa piliangi. Alieli ‘yomboma-kinia pali taka lepo molamili.’ ningu konopu kimbu siku pilku molangi.

<sup>19</sup> Nanga pulu lemó yomboma yombo marene ono seko kinjingí kinia ono pundu naa tangi. ‘Pulu Yemone ono-kinia mumindili kolomba.’ ningu siye kolangi. Aku sipa mele ‘Pulu Yemonga, bokuna ungu se molemo, akumu i-sipa:

‘Ye-Awilimuni nimbale:

“Seko kinjilimilimunga pundu toli kongonomo  
nanga kongonomo mindi. Seko kinjilimilimunga

nane nanu pundu topo mindili simbú.” nilimú.’

aku sipa molemo kene ‘ono onono naa sangi..’

<sup>20</sup> Aku siku paa naa sekole ‘Pulu Yemonga bokuna nilimú mele sangi. Akumuni nimbale:’

“Nunga opa-toumu gelene kolomba kinia ga sieni.

‘No nonowale sekemo.’ nimbá kinia no kolko sieni.

Aku sení kinia

nu-kinia sepa kinjimba ulu kanuma pilipale  
pipili kolomba.”

‘nilimú mele sangi..’

<sup>21</sup> Ulu-pulu kirimane ono topa mania naa mundopili. ‘Ulu-pulu kirima topo mania mundamili.’ ninguli ulu-pulu peangama sangi.

## 13

13:1-7

*Pollone “Yomboma Gapomanone Ungu-Mane Sipa Panjilimúma Pilku Liku Seko Molaa.” Nirimu Ungu Se*

<sup>1</sup> Yomboma pali gapomanone nilimú mele pilku liku molangi. Gapomano we naa molemo. Pulu Yemone ‘Kolea nokopili.’ nimba talitorumu-na molemomonga aku siku seko molangi. Koleamanga pali gapomano molemelema Pulu Yemone nimba taltopa ‘molangi.’ nilimú-na molemelemonga aku siku onone nilimili mele pilku liku molangi. <sup>2</sup> Akumunga, “Gapomanonga ungu naa pilielemolo.” nilimili yombomane aku siku “Pulu Yemone ‘sangi.’ nimba mondolemo yombomanga unguma naa pilielemolo.” nilimili. Aku selemelemonga ononga kotemo wendo ombá.

<sup>3</sup> Molko kondolemele yomboma nokoli yombomane seko naa kinjilimili. Seko kinjiku molemele yomboma mindi pipili kolangi. Gapomanone ono mindi sepa kinjimba. ‘Nokoli yomboma olione pipili naa kolamili. Onone olio seko naa kinjangi.’ ninguli ulu peangama seko molayo. Aku senge kinia gapomanone onone seko molemele mele kanopa kape nimbá. <sup>4</sup> ‘Yomboma molko kondangi.’ nimba Pulu Yemone ‘Nanga kongono sendélimu molopili.’ nimba gapomano lipa mondolemo-na gapomanone aku sipa sembá. Aku-na-kolo gapomano we tondolo naa pelemo. Gapomanomone yombo kirima konopu kiri panjipa “Mongo likimili kene mindili nangi.” nimbándo tondolomo pelemo kene onone seko kinjengi liemu yu pipili kolayo. ‘Seko kinjingí yombomanga kote wendo ombá kinia nanga kote pilindepili.’

nimba Pulu Yemone gapomano mondolemo. <sup>5</sup> Akumunga ‘Yuni olio sepa kinjimba kene yuni nimbá mele sepo molamili.’ akumu manjiku ningu naa molangi. ‘Olio konopu kiri naa pepili, konopu peanga lepo molamili.’ ningu yuni nimbá mele seko molangila.

<sup>6</sup> Onone aku siku ningu pilkuli, nokoli yombomane Pulu Yemonga kongono manjiku seko molemele kene kou-takisi tangila. <sup>7</sup> Gapomanone ungu-mane sipale “Méle sie.” nilimú mélema siengi. Kou-takisi limili yomboma kou-takisi toko siengi. Méle limilimanga kou-takisi pulimú mele toko siengila. Ono nokolemele yomboma-kinia mokoli naa seko, ungu ningíma taka leko pilku awi siku molangi. Yombo se imbi ola molemomonga imbi ambolko paka tondangila.

**13:8-10**

*Ungu-Manema Pali Pilipu Lipu Semolondo Yomboma Konopu Mondamili Ungu Se*

<sup>8</sup> Ono anju-yando yomboma-kinia pundu anjikuli ‘We pepa mindi naa pumba aku punduma welea pora nipili.’ ningu nondoko pundu tangi. Ulu selu mindi sekole “Pora naa nipili.” niengi. Akumu i-sipa: Anju-yando yombo ono onono-kinia konopu mondoko kondo kolko mololko pang. Aku senge yomboma aku siku Pulu Yemonga ungu-manema pali paa pilku liku sengemonga yomboma konopu mondoko siye naa kololko pungí kinia paa papu. <sup>9</sup> Pulu Yemonga ungu-mane Mosisini yando nimba sirimu pelemo, ungu-manema i-sipa:

“Ambo yema wa ulu-kirinale naa sangi.

Yomboma toko naa kondangi.

Mélema wa naa liengi.

Yombo lupamanga mélema kanoko yama naa meangi.”

kanumu. Aku ungu-manema kinia ungu-mane lupama pali kinia lipu sere lendepo nimulúndu

“Ono onono yu-melete-melete konopu mondoko  
kondo kolko nokolemele mele aku sikula  
yomboma konopu mondoko nokoko molangi.”

aku ungu-mane pelemomo nilimulu. <sup>10</sup> Onone konopu mondolemele yomboma kondo kolcole manda naa seko kinjingí. Kanu-kinia ,Pulu Yemonga, ungu-manema pali pilku liku sengendo yomboma konopu mondoko kondo kolonge kinia aku siku paa sika ungu-manema pali pilku liku senge.

**13:11-14**

*Pollone Yesusi Yunga Yomboma Om̄ba Limba Walemo Wendo Ombámonga Olio Kiniá Molomolo Mele Nirimu Ungu Se*

<sup>11</sup> ‘Aku sipu uluma samili.’ nambi semu-na nikiruye? Wale se om̄ba pelemomonga aku sipu nikiru. Kanu walemo ono pilielemele, akumu i-sipa: Kiniá ono uru pelemele makilku ola molonge wale kanumu. ‘Karasini olionga nimba senderimumu u ‘Sika.’ nimbu, kuru mondorumulu kinia yuni yu molombana olio ‘yu pea molamili.’ nimba kamu sukundu limba walemo nondopa naa ombá serimu, nako kanu walemo kiniá nondopa wendo ombá sekemo kene ono uru pelemele makilku ola molonge walemo koronga wendo omu. <sup>12</sup> Ipulieli pora nimbá sepa, kolea tangomba sekemo kene simbulu tolemo kinia selemele ulu-puluma mundupu kelepo, pa selina opa selemele mélema lipu panjamili. <sup>13</sup> Ulu kake selima kolea pa selemo kinia yomboma kanangi pipili naa sembá uluma semolondo tondolo mundupu samili. Maku topo no-tondolo nombo kála sepo amu naa tamili. Wa ulu-kirinale naa sepo, kanu uluma semolondo konopu kimbu sipu naa andamili. Irinale naa sepo, yombo lupamanga mélema kinia kangina gilimú mélema kinia ulu mare lupa lupa yombo marene selemele kinia kanopole, yama naa membo ‘Nanga aku sipa liepiliya!’ molo ‘Na aku sipu samboa!’ nimbu pilipu konopu kiri naa panjamili. <sup>14</sup> Aku siku

naa sangi-na-kolo „mulu-maminia pakolemele mele ono aku siku, ‘Ye-Awili Yesusi Karasi „konopu lemó mele aku sipu konopu leamili.’ ningu yu, liku pakokole, u-we-konopumane ulu-kirima pilku yakala kololemele mele ‘Yakala naa kolamili’ ningu ‘Konopumane pilipu yakala kololemolo uluma samili.’ naa nieyo.

## 14

*14:1-15:13*

*Karasinga Yombo Konopu Tondolo Pupili Molemele Yomboma Kinia, Konopu Tondolo Naa Pupili Molemele Yomboma Kinia, Akumanga Ungu Se*

*14:1-12*

*Karasinga Yombomanga Uluma Kanopo Apurupu ‘Seko Kinjikinu.’ Naa Niemili Ungu Se*

<sup>1</sup> Yombo se ‘Sika’ nimba kuru mondolemo-na-kolo tondolo mundupa kuru naa mondolemo yombo akumundu “Pea molamili ou.” ningu, yuni pilipa ulu selemoma naa pilku apuruku yu-kinia ungu awisili angelema naa niengi. <sup>2</sup> Karasinga yombo se ‘kere-langima pali nombó kinia unguri naa sembá.’ nimba kuru mondolemo-na-kolo Karasinga yombo se konopu tondolo naa pupili molopale kongima pea pali mi lepa naa nomba, kaliana olemo kere-langima mindi nolemo. <sup>3</sup> Yombo se kere-langima pali nolemo yombomone yombo kongima mi lepa naa nolemo yombomo ‘Yu kiri, na peanga.’ konopu naa liepili. Yombo se kongima mi lepa naa nolemo yombomone yombo kere-langima pali nolemo yombomo kanopa apurupale ‘Sepa kinjikimu.’ naa nipili. Yombo kere-langima pali nolemo kanu yombomo Pulu Yemone kanopa peanga pilipa ‘nanga yombomo molemo.’ nirimu kene aku naa sangi. <sup>4</sup> Nu nawe konopu lekole yombo senga kendemande-yombomone ulu sembama kanoko ‘Imu seko kondokono. Imu seko kinjikinu.’ ningu apurulinuye? Yunga ye awili nokólimuni mindi yunga kongono selemoma kanopa ‘Imu seko kinjikinu. Imu seko kondokono.’ nimba apurumba. Aku-sipa na-kolo Ye-Awilimuni kanu yombomo ‘Konopu tondolo pupili molopili.’ nimba lipa tapondombamonga yu sika konopu tondolo pupili molomba.

<sup>5</sup> Karasinga yombo sene ‘I walema we walema. I walemo Pulu Yemonga wale kakemo.’ konopu lemó. Aku-sipa na-kolo Karasinga yombo sene walema apurou naa apurupa ‘walema selu-sipa’ konopu lemó. Yombomane pali yu-melete-melete konopu lemele mele konopuni pilkuli ‘Na aku sipu konopu lelio peanga sepo konopu lelio.’ ningu tondolo munduku piliangi. <sup>6</sup> Yombo sene ‘I walemo peanga olandopa.’ nimba pilielemo yombomone ‘Ye-Awilimuni kanopa peanga pilielemo mele sambo.’ nimba aku sipa nimba pilielemo. Yombo se kere-langima naa apurupa walu nolemo yombomo ‘Ye-Awilimuni kanopa peanga pilielemo mele sambo.’ nimba Pulu Yemondo “Ange.” nimbale kere-langima nolemo. Yombo se kere-langima mi lepa naa nolemo yombomo ‘Ye-Awilimuni kanopa peanga pilielemo mele sambo.’ nimba aku sipa sepa Pulu Yemondo “Ange.” nilimú.

<sup>7</sup> Olio Karasinga yombomanga sene konopuni pilipa ‘Na nanu pilipuli i-sipu sepo molambo.’ manda pilipa naa nimbá. Yuyu pilipale ‘I-sipu kolambo.’ manda naa nimbála. <sup>8</sup> Olio konde molopole Ye-Awilimuni kanopa peanga kanolemo uluma mindi sepo molamili. Molo kolomulu liemu ‘Ye-Awilimuni ‘Kolani.’ nikimu walemo wendo okomo-na yunga imbi ola molopili kolambo.’ niemili. We konde molomolo kinia kepe kolomolo kinia kepe olio Ye-Awilimunga yomboma molomolo. <sup>9</sup> Aku ungumunga ulu-pulumu i-sipa: Yu ‘Yombo kololimanga kepe konde molemelemanga kepe Ye-Awilimu molambo.’ nimba Karasi yu kolopale kelepa konde molorumu.

<sup>10</sup> Akumunga nuni nambi semu-na nunga genane ulu selemoma ‘Imu seko kinjikinu. Imu seko kondokono.’ ningu apurulinuye? Nunga gena nambi semu-na

kanoko kiri pilku 'Yu yombo kirimu.' nilinuye? Pe olio pali Pulu Yemonga kotena gilimulúmunga kiniá aku seleno manda naa selemo. <sup>11</sup> Akumunga ungu se Pulu Yemonga bokuna molemo, akumu i-sipa:

'Ye-Awylimuni nimbale:

"I konde molopo mindi puliu akumu paa sika mele  
yomboma pali onto nanga kumbikerena  
komorongo toko pondoko tamalu peko,

"Pulu Yemo yu sika molemo." kerena ningí  
akumu paa sikala." nikimu.'

nimba molemo. <sup>12</sup> Akumunga, olio yu-mele-mele olionga ulu selemolomanga puluma pali sika Pulu Yemo nimbu simulú.

**14:13-23**

*'Karasinga Yomboma Seko Kinjangi.' Ningu Ulu Mare Naa Sangi Unru Se (14:1-15:13 pali)*

<sup>13</sup> Akumunga, olione anju yando yombomane ulu selemelema apurupu kanopo kiri pilielemolo mele mundupu keleamili. Ulu se lupa i-sipu samili: Nunga gena 'mania pumbá molo ulu-pulu-kirima sembá ulu se paa naa sambo.' ningu pilku molangi.

<sup>14</sup> Na 'Pollo,, Ye-Awili Yesusi pea konopu seluna pupili molembolo yemo molopole ' 'Mélemanga pali mélse yuyu Pulu Yemone kanopa kalaro molemo' nimba naa kanolemo.' nimbu tondolo mundupu kuru mondokoro. 'Aku-sipa na-ko lo yombo sene mélse 'kalaro molemo' konopu lemó liemu sika kanu mélemo kanu yombomone aku sipa konopu lemómonga aku mélemo kanopa ulu se sembá kinia sepa kinjimba.' nimbu pilkiru. <sup>15</sup> Nuni kere-langí se noleno kinia genane kanopale yunga konopuna umbuna pelemo liemu nuni yu konopu naa mondokole aku siku seleno. Karasi yunga nimba kolali sepa kolondorumu gena akumu nu kere-langí noleno-na kanopale Karasi mundupa kelepa kamu ultu pumba molopa kinjimba liemu aku kere-langimu naa nou. <sup>16</sup> Nuni ulu pilku peanga pilku selenomo yombomane kanokole nunga bulkundu nindiku 'Sepa kinjikimu.' ningí kinia manda naa sembá kene nuni sení uluma mimi siku pilku seko molani. <sup>17</sup> Pulu Yemo ye nokoli kingimu molopa 'Karasinga yomboma, nokopale kere-langí kinia no kinia nolemele aku mélemanga yu kanopale ungu se naa nilimú. Yu ye nokoli kingimu molopa nokopale ulu sumbi nilima kinia, taká lepa mololi uluma kinia, konopu sili uluma kinia, Mini Kake Sélimuni silimú aku uluma mindi 'senge kinia kanopo peanga pilimbu.' nimba pilipa molemo. <sup>18</sup> Yombomane Karasinga kongonomo pilku sendengendo aku uluma selemele yomboma Pulu Yemone kanopa peanga pilielemo, we-yombomane kanoko 'seko kondokomele' ningu pilielemele.

<sup>19</sup> Akumunga, olione yomboma taka leko konopu seluna mindi pupili molonge uluma kinia, olionga genupilima Karasinga unguma pilku liku seko molongendo konopu olandopa tondolo pupili molonge uluma kinia, paa tondolo mundupu samili.

<sup>20</sup> Kere-langí se nonimunga Pulu Yemonga kongonomo kamu toko mania mundoni kinia paa manda naa sembá kene aku paa naa sani. Sika kere-langima pali kalaro se naa molopa unguri naa selemo-na-ko lo kere-langí se noni kinia yombo sene kanopale yu konopu talo pembamonga Karasinga yombo molopa sembá mele pilipa sundupa sepa kinjimba liemu aku senímu manda naa sembá. <sup>21</sup> Nuni kongi se molo no-waene se noni molo ulu se lupa sení kinia genane kanopale yu konopu talo pembamonga Karasinga yombo molopa sembá mele pilipa sundupa sepa kinjimba liemu kelko aku siku naa sení kinia peanga.

<sup>22</sup> Nunu aku mélema kanoko konopumuni pilielemo mele akumu nu kinia Pulu Yemo kinia olonga kongonomo. Yombo sene mélse kanopa 'I mélemo peanga.' konopu lepale yunga konopumuni pilipa 'Sepo kinjikiru.' nimba ungu se naa pilielemu

liemu yu konopu sipili. <sup>23</sup> Aku-sipa na-kolo yombo sene kere-langi se kanopa ‘I kere-langimu kalaro molemonje. Nombó kinia manda naa sembanje.’ nimba kuru mondopale nomu liemu sepa kinjilimú. ‘Pulu Yemone kanopa peanga pilielemo ulu se sekero.’ nimba kuru naa mondopale nomu liemu sika sepa kinjilimú. Olione ‘Pulu Yemone kanopa peanga pilielemo uluma selemolo.’ nimbu kuru naa mondopole uluma selemolo kinia aku sipu ulu-pulu-kirima selemolo.

## 15

**15:1-6**

*‘Karasini Pilipa Selemo Mele Olione Aku Sipu Pilipu Samili.’ Nirimu Ungu Se (14:1-15:13 pali)*

<sup>1</sup> Olio „Sika’ nimbu, kuru mondopo siye naa kololemolo yombomane konopu tondolo naa pulimú yomboma ‘Yesusi ambolko kondangi.’ nimbu ononga umbunama pea mendepo, olio oliolio konopu sipu molomolo uluma mindi naa samili. <sup>2</sup> Olio yu-mele-mele ‘Karasinga yomboma ‘Karasi yu sika.’ ningu kuru mondolemele mele siye naa kolko yu tondolo munduku ambolangi.’ nimbu ono lipu tapondomolondo kanoko peanga pilielemele uluma samili. <sup>3</sup> Olio pilielemolo, ‘Pulu Yemone mana lipa mundorumu ye nokoli, Karasi kepe yu yuyu ‘konopu sipu molombo uluma sambo.’ naa nirimu kanumu. Yuni pilipa serimu mele Pulu Yemonga bokuna molemo mele i-sipa: ‘Konane se torumu ye nokoli kingi Depitinga opa-toumane Depiti yu-kinia seringi mele Depitini Pulu Yemondo nirimu mele pe Karasi-kinia wendo ombá mele walu lipa sere lendepa nirimu. Depitini konane nimba Pulu Yemondo nimbale: „Yombomane nu ungu-taka tondoko marake selememele akumu na pea selememele.”

„nirimu.” <sup>4</sup> U ‘Pulu Yemonga, bokuna imbi toringi aku ungumane pali olio mane simbando molemo. ‘Olionga konopu tondolo pupili siye naa kolopo Karasi ambolopole ‘Pulu Yemone olio lipa tapondomba walemo sika ombá.’ nimbu kuru mondopo nokopo molamili.’ nimbu Pulu Yemone ‘Aku unguma piliangi kene bokuna tangi.’ nirimu-na toringi molemo.

<sup>5</sup> ‘Konopu tondolo pupili siye naa kolko Karasi ambolangi.’ nilimú Pulu Yemone ‘Ono Karasi Yesusi sepa molemo mele manda manjiku seko molemele yomboma anju yando konopu seluna pupili manda molangi.’ nipili. <sup>6</sup> ‘Ono pali konopu seluna pupili molkole olionga Ye-Awili Yesusi Karasinga Lapa Pulu Yemonga imbimu ambolko paka tondangi.’ nimbu ‘aku siku molangi.’ nirimu.

**15:7-13**

*Talape Lupa Yomboma Kinia Juda Yomboma Kinia Karasi Ononga Pali Lipa Tapondólimunga Ungu Se (14:1-15:13 pali)*

<sup>7</sup> Pe kiniá ono Karasinga yomboma molemele kene ‘Pulu Yemonga imbimu ola molopili.’ ningu Karasini onondo “Pea kopu sepo molamili waa.” nirimu mele aku siku onone ononga yomboma anju yando “Pea kopu sepo molamili waa.” nieyo. <sup>8-9</sup> Nane ono ‘Romo yomboma,’ nimbu sikiru: Karasini ‘Pulu Yemone ‘sika nilimú’ ningu piliangi.’ nimba, ‘Pulu Yemone anda-kolepalindu wendo ombá mele nimba panjerimu mele paa sika wendo okomo piliangi.’ nimba, ‘Juda yombo naa molemele yombomane Pulu Yemo kondo kolopa lipa tapondólimunga Pulu Yemo yunga imbimu ambolko paka tondangi.’ nimba, Karasi yu Juda yombomanga kendemande-yemo ombo molorumu. Juda yombo molemele yombomando ungu se aku sipa mele Pulu Yemonga bokuna toringi molemo kanumu. Akumu i-sipa:

‘Isirele yombomanga talapena

naa molemele yomboma molongena  
nane nu kape nimbu, konane nimbu

nunga imbi ambolopo paka tondombo.' nimba molemo kanumu. <sup>10</sup> Ungo se lupa nimba molemola. Akumu i-sipa: 'Isirele yombomanga talapena naa molemele yomboma, ono Pulu Yemonga, Isirele, yomboma-kinia pea konopu siku molangi.' nimba molemo. <sup>11</sup> Ungo se lupa i-sipala: 'Isirele yombo naa mololi yomboma, Ye-Awilimu kape niengi. Yombomane pali yu kape ningu konane nieyo.' nimba molemo. <sup>12</sup> Pulu Yemone ungu-umbu tondorumuma pilipa yomboma nimba sirimu ye Aisayane ungu se pea nimbale: "Jesini kalopa limba yemo ombá. Yu omba Isirele talapena naa molemele yombomanga ye nokoli kingimu molopa ono nokomba. Onone 'Yu olio lipa tapondomba.' ningu pilku nokoko molonge." nirimu. <sup>13</sup> Mini Kake Sélimunga tondolomone ono Pulu Yemo "Sembó." nimba panjerimu mele 'Sika aku sembá.' ningu kuru mondolemele mele 'Pe siye naa kolko 'Sika.' ningu kuru paa mondoko mololko mindi pangí.' nimba, ono 'Sika.' ningu kuru mondolemele monga pulumu Pulu Yemo yuni ono 'Sika.' ningu kuru mondolemele kanu ulumuni 'Ono konopu awili seko siku konopu pe nipili molangi.' nipili.

**15:14—16:27**

*Pollone Yu Kongono Serimu Mele Nimba Sipale Romo Yombomando "Ono Molaa."*  
*Nirimu Ungumu*

**15:14-22**

*Pollone Yombo-Lupama-Kinia Kongono Konopu Sipa Serimumunga Ungo Se*  
<sup>14</sup> Nanga ango-keme, 'Ono sika ulu peangama mindi alieli seko molko, unguma pali sika pilku kondoko, anju yando manda mane singí tondolomo sika ono-kinia pelemo.' nimbu tondolo mundupu kuru mondolio. <sup>15</sup> Ungo mare 'Ono kelko piliangi.' nimbu na pipili naa kolopo tondolo mundupu pepá tondu. 'Na kongono paa peanga se siembo.' nimba Pulu Yemone <sup>16</sup> na nimba taltopa 'Karasi Yesusinga kongonomo sendambo.' ningu Juda yombo naa molemele yomboma liku tapondani.' nirimumunga aku sendu. 'Yombo-lupamane Pulu Yemo popo toko kalko silimilima kanopa peanga pilielemo mélema mele molko, Mini Kake Sélimuni 'Ono Pulu Yemonga yombo manjiku molko, yombo kake selima molangi.' nipili.' nimba Pulu Yemone na 'Yombomanga popo tondoli yemo molko yomboma semane peangamo toko siliku andani.' nimba na nimba taltorumumunga aku sipu ono ungu mare tondolo mundupu nimbu sipu pepá tondu.

<sup>17</sup> Akumunga, na Karasi Yesusi-kinia pea kopu sepo kongono selembolomonga Pulu Yemonga kongonomo sendeliomonga na 'Papu selio.' nimbu pilipu konopu siliu.

<sup>18</sup> Nane ungu se lupa paa naa nimbu simbú. Karasini na lipa tapondolemo-na nane ungumu nimbu sipu ulu-tondolo, mare seliomonga yombo-lupama Pulu Yemonga unguma pilku liku selemele aulkamo akisindendu ulu akuma mindi nimbu simbú.

<sup>19</sup> Mini Kake Sélimuni na tondolo sirimumunga nane ulu-tondolo mare serindu-na kanokole yombo-lupama aku seringi. Aku kongonomo sembondo Karasinga semane peangamo pali kolea-awili Jerusalleme pulu polopo topo sipuli koleamanga pali topo silipu pumbu kolea Illirikame poropinji topo sipu pora sirindu. <sup>20</sup> U kepe kiniá yandopa yandopa kepe, 'Karasinga imbimu naa pilielemele koleamanga yunga

semane peangamo ‘paa piliangi.’ nimbu andopo topo siembo.’ nimbu pilielio. ‘Ye sene ulka ponga u polorumuna ola ulka naa takambo.’ nimbu aku sipu sambo.’ nimbu pilielio. <sup>21</sup> „Nane ‘Sambo.’ konopu lelio mele, bokuna ungu se molemo, akumu i-sipa:

‘Yombo u yunga semanemo

naa toko siringi yombomane yu kanonge.

Ungumu naa pilieringi yombomane

aku ungumunga ungu-pulumu pilingí.’

nimba molemo. „Aku sipa mele nane ‘ungu naa pilieringi yomboma nimbu siembo.’ konopu lelio.,

*15:22-33*

### *Pollone Romo Yombomando “Ombo Kanambo.” Nirimu Ungumu*

<sup>22</sup> Aku nimbu pilipu aku kongonomo u ya sepo molio kongonomone ono Romo yomboma ombo kanombo aulkamo wale awisili pipi silimú.

<sup>23</sup> Aku-sipa na-kolo kiniá i koleamanga na kongono sembó mare naa lemó, nane kalia-ingi awisili ‘Ono ombo kanamboa!’ konopu lepo molorundu, akumunga <sup>24</sup> ‘na kolea Sipéne pumbúndu u ono ombo kanopole pumbú.’ konopu lekero. ‘Na ono-kinia konopu sipu pea kopu sepo molomolo kinia pe na liku tapondoko kolea Sipéne mundu-pangi.’ nimbili ‘Aku sipu sembó.’ konopu lepo molio. <sup>25</sup> Kiniá aku selkana-kolo iseli-u Pulu Yemonga yombo Jerusalleme molemelema pumbu lipu tapondopukuru. <sup>26</sup> „Karasinga yombo,“ kolea Masedonia kinia Akaya poropinjitolonga moloringi yombomane Pulu Yemonga yombo Jerusalleme moloringimanga yombo koropama liku tapondongendo kou-mone pilku liku popenge seko liku maku toringi ‘kou-monema simbú pukuru.’ <sup>27</sup> Onono pilkuli ‘Aku samili.’ ningu pilku liku popenge seko siringi-na-kolo pundu mele toringila. Yombomanga minima lipa tapondolemo mélema u Juda yomboma-kinia perimu aku Pulu Yemonga méle peangama yombo-lupama-kinia naa perimu akuma siringi akumunga yombo-lupamane pundu mele tongendo kangikundu lipa tapondomba mélema Juda yomboma sikimili akumu papu sekemele. <sup>28</sup> Akumunga na i kongonomo sepo pora simbundu u Jerusalleme pumbu ‘kolea Akaya kinia Masedonia poropinjitoloko yombomane liku maku toko na siringi, kou-monema yomboma sindi-pumbuli nimbúmuni, pe kolea Sipéne pumbúndu u kolea-awili Romo ombo ono kanombo. <sup>29</sup> Na pilkiru, ombó kinia Karasini ono sepa kondomba ulu paa awisili na membo ombó.

<sup>30</sup> Ango-keme, nane onondo tondolo mundupu nimbili: “Na ‘Lipu tapondamili.’ ningu na-kinia kála seko Pulu Yemo nanga ningu mawa sendeko molangi.” nikiru. ‘Ye-Awili Yesusi Karasi sika.’ nimbu kuru mondolemolumonga kepe, Mini Kake Sélimuni olia anju yando konopu mondolemolo ulumu silimúmunga kepe, akutolonga ‘aku sendangi.’ nimbu mawa sekero. <sup>31</sup> Pulu Yemondo nanga ningu mawa sendekole, ‘Kolea Judia disiriki Karasinga semanemo naa pilku liltingi yombomane na seko kinjiku mindili naa siengi. Nane Pulu Yemonga yombo Jerusalleme molemelema lipu tapondombo kinia kanoko peanga piliangi.’ nieyo. <sup>32</sup> ‘Na Pulu Yemone ‘Manda, pu.’ nimu liemu ono molemelena na konopu silipu ombo ono-kinia pea wale mare kopu sepo molomolomonga kelepa konopu enge nipili.’ ninguaku siku Pulu Yemo mawa sendayo. <sup>33</sup> ‘Yomboma konopu pe nipili tako leko molangi.’ nilimú Pulu Yemo ono-kinia pali molopili. Sika aku sepili.

## 16

### *Kolomongo-Awili 16*

### *Pollone Yombo Lupa Lupama “Molaa.” Nirimu Ungumu*

<sup>1</sup> Olionga kemulu ambo kolea Pimbi, yu kolea Sengiria taono Karasinga yombo talapemo lipa tapondoli kongono se sendelemo ambomo, yu ombá kinia kanoko peanga pilku <sup>2</sup> 'yu Ye-Awilimunga ambo se kene' ningu "Molamili ou." nindangi. 'Ono Pulu Yemonga yomboma molkole aku siku seko, yuni 'Pulu Yemonga, yombo awisili tondolo mundupa lipa tapondopa, na kepe lipa tapondorumu kene yu umbuna se pemu liemu liku tapondangi.' nimbu mawa sekero.

<sup>3</sup> Na kinia pea Karasi Yesusinga kongonomo serimulu ambo Pirisilla kinia ye Akuwillia kinia "Manda molembeleye?" nindangi. <sup>4</sup> 'Olo toko kondonge kinia unguri mólo.' ningu na liku tapondoringili. Na liku tapondoringilimunga nanu mindi "Ange." naa nikiru; Juda yomboma naa molemele yombo-lupa kolea lupa lupa Karasinga yombo talapemanga yombomane kepe "Ange." nilimili.

<sup>5</sup> Karasinga yombo mare olonga ulkana maku tolemele yomboma "Manda molemeyeye?" nindangila.

Nanga paa konopu mondolio pulu lemó ye Epainetas, yu kolea Esia poropinji sukundu koleamanga pali pulu-pulu Karasinga yemo molorumu yemo, yu "Manda molenoye?" nindangi.

<sup>6</sup> Ononga kongonomo tondolo mundupa senderimu ambo Maria "Manda molenoye?" nindangi.

<sup>7</sup> Nanga 'Juda, ye Andoronikas kinia Juniasitolo, na kinia pea ka-ulana perimulu, aku yetolo "Manda molembeleye?" nindangi. Yesusini "Nanga kongonomo sendepaa." nimba lipa mundorumu yemane pali aku yetolo 'Seko kondolembe ye peangatolo.' nilimili. Na Karasinga yemo u naa molambo olo Karasinga yetolo moloringili.

<sup>8</sup> Yu Ye-Awilimunga yemo molemomonga yu konopu mondolio ye Ambilliatas "Manda molenoye?" nindangi.

<sup>9</sup> Olio Karasinga kongonomo pea selemolo ye Upanas kinia nanga pulu lemó konopu mondolio ye Sitakis kinia "Manda molembeleye?" nindangi.

<sup>10</sup> Apelles, Karasinga yemo molorumumunga mindili norumu-na-kolo Karasi mundupa naa kelepa tondolo mundupa ambolorumumunga yu kanoko kape nilimili, aku yemo "Manda molenoye?" nindangi.

Aritopullasinga ulkana pelemele yomboma "Manda molemeleye?" nindangi.

<sup>11</sup> Nanga 'Juda, ye Erotiane "Manda molenoye?" nindangi.

Nasisasinga ulkana pelemele yombomanga mare Ye-Awilimunga yombo molemelema "Manda molemeleye?" nindangi.

<sup>12</sup> Ye-Awilimunga kongonomo tondolo munduku senderingili ambo Tiripina kinia Tiriposatolo "Manda molembeleye?" nindangi.

Nanga konopu mondolio pulu lemó ambo Pesisi, Ye-Awilimunga kongonomo tondolo mundupa sendelemo ambo sela, akumu "Manda molenoye?" nindangi.

<sup>13</sup> Ye-Awilimuni 'Nanga yemo molopili.' nimba taltorumu ye Rupasi kinia yunga anumu kinia "Manda molembeleye?" nindangi. Kanu ambomone nanga anumu mele molopa na nokolemóla.

<sup>14</sup> Asinikiritas, Pellekono, Emis, Patoropas, Emas keme, onong genupili ono kinia pea molemele yema kinia "Ono manda molemeleye?" nindangi.

<sup>15</sup> Pillollokas keme Jullia keme Nerusi keme yunga kemulu keme Ollimipas keme Pulu Yemonga yombo ono kinia pea molemele yomboma pali "Manda molemeleye?" nindangi.

<sup>16</sup> 'Olio pali Karasinga yomboma' ningu anju yando yomboma kangulku "Manda molemeleye?" niengi.

Karasinga yombo talapemane pali "Ono manda molemeleye?" ningu mundukumili.

### *Yombo Marene Karasinga Yombo Talapemo Sungu Siringimanga Ungumu*

<sup>17</sup> „Ungu se kamu niembo..“ Ango-keme, nane ono tondolo mundupu nimbili: Yombo marene Karasinga yombo talapemo sungu siku, u mane siringi pilku liltingi unguma ‘naa piliangi.’ ningu ungu lupa lupama ningu silimilimunga Karasinga yomboma pilkuli, Karasinga ungumu u pilielemene mele kelko pilku sunduku seko kinjingí kene kanu yomboma kanoko kondoko molaa. Aku yomboma-kinia nondoko seluna kopu seko naa molangi. <sup>18</sup> Kanu yombomane olionga Ye-Awili Karasinga kongonomo naa sendelemele kene ono-kinia seluna naa molangi. Ononga kangikundu uluma mindi konopu mondoko selemele. Yombomane ‘‘Ono sika nikimili.’ ningu piliangi.’ ningu kolo toko ‘ungu peanga mare nikimulu’ ningu kondi tolemele aku unguma Karasinga yombo marene ‘I ungumu sika ungumu. I ungumu kolo.’ ningu naa apuruku kondoko we walu pilku limili yomboma ningu sembambu silimili. <sup>19</sup> Onone ‘Ye-Awili Karasinga, unguma pilku liku ambolko kondolemele mele yombomane pali pilielememonga na ono-kinia awili sepo konopu sipu molio, na-kolo ‘Ono ulu peangama paa pilku kondangi. Ulu kirima pilku senge aulka se paa naa liepili.’ konopu lekero.

<sup>20</sup> ‘Nanga yomboma konopu pe nipili taka leko molangi.’ nilimú Pulu Yemone nondopa mele ‘‘Ono Romo Karasinga yombomane kurumanga nokoli, Setene kimbuni kulangi.’ nimbá.

Olionga Ye-Awili Yesusini ono we kondo kolopa molopili molangi.

**16:21-24**

### *Yombo Marene Romo Yombomando “Manda Molemeleye?” Niringi Unguma*

<sup>21</sup> Na pea kongono kopu sepo selembolo ye Timotini “Ono manda molemeleye?” nimba, nimba mundukumu. Nanga ‘Juda, ye LLusiasi keme Jesono keme Sosipate keme akumane kepe “Ono manda molemeleye?” ningu, ningu mundukumilila.

<sup>22</sup> (Na Tetiasi, Pollone nikimu mele pilipu i pepámo tondokoro yemone Ye-Awiliunguma yemola molopole “Ono manda molemeleye?” nimbu, nimbu mundukuru.)

<sup>23</sup> Na Pollo kinia Karasinga yombo talape ya molemelema kinia yungaulkana ‘pea peamili waa.’ nimba nokolemo ye Gayasini “Ono manda molemeleye?” nimba, nimba mundukumu.

Ya kolea-awili Korini kou-mone kinia koleamonga kongonoma kinia nokolemo ye Erasitas kinia olionga genu Kutasi kinia olone “Ono manda molemeleye?” ningu, ningu mundukumbili.

<sup>24</sup> (Olionga Ye-Awili Yesusi Karasini ono pali we kondo kolopa molopili molangi. Sika aku sipa sepili.)

**16:25-27**

### *Pulu Yemonga Imbi Ambolopa Paka Tondoli Unku Se*

<sup>25-27</sup> „Kiniá olione Pulu Yemonga imbi alieli ambolopo paka tondamili..“ Na semane peangamo topo siliumuni kinia, Yesusi Karasindu nimbu silimulumuni kinia, Pulu Yemone ono konopu manda tondolo mundundumba. I semane peangamo u lopi sepa perimu ungumu. Yu kalia-ingi paa awisili Pulu Yemone u nimba para naa sirimu-nakolo pe kiniá-mele ‘Mona liepili ‘yomboma, piliangi.’ nimba nimba para sikimu. Molopa Mindi Puli Pulu Yemone ‘Ma-koleana yombo talapemane pali ‘I semanemo yu sika ungumu.’ ningu kuru mondoko kanu ungumu pilku liku sengena panjiku sangi.’ nimba yuni ungu-umbu tondorumuma pilku yomboma ningu siringi yemando “Mona liepili ningu para siee.” nirimu. Kanu-kinia kanu ungu ningu siringi yemane ‘Yomboma paa piliangi.’ ningu ononga bokumanga sukundu kanu semane peangamo wendo ombá mele ningu siku boku toringi nimba pelemo. Yesusi Karasini olionga

nimba senderimumunga Pulu Ye yu manjipa pilipa kondoli pelemo yemo, yunga imbi kamu ola molopa mindi pupili. Sika aku sipa sepili.

„Aku pea nikiru.“

## U-KORINI Pollone KORINI Yomboma Pepá U Topa Sirimu Bokumu

*Pollone I Pepá Topa Sirimumunga Ungu-Pulu Mare*

Pollo kinia yuni pepá topa sirimumanga ungu-pulu mare inia yakondo gomo 676 molemo.

**Kolea Korini** akumu Akaya poropinjinga kolea-awilimu. Akumu Giriki yomboma moloringi kolea se. Pollo wale talo-sipa koleamanga andopa Yesusinga ungumu nimba silipa andopale **Korini** kepe purumula (Lipa Mundorumu Yema 18:1-17). Yu akuna molopili Karasinga yombo talape se akuna pulu polko moloringi, aku yombo talapemo lipa tapondopa molorumu. Aku-sipa na-kolo Pollo yu aku koleamo mundupa kelepa kolea-awili Epesasi pumba molorumu kinia walte Karasinga **Korini yombo talape** moloringina umbuna mare wendo orumu pilipale ‘Ono lipu tapondambo.’ nimba i pepámo ono topa sirimu. ‘Unguma mimi siku pilku, molko kondangi.’ nimba pepámo topa sirimu (**U-Korini** 16:7-9, Lipa Mundorumu Yema 20:31).

‘Onone ‘Sika.’ ningu kuru mondolemele mele siye kolongenje.’ konopu lepale Pollone mini-wale mundupa konopu awisili kimbu sipa molorumu mele nimba sipa, ono konopu selumu naa panjiku manda naa moloringimunga ungu mare nimba, amboma kinia yema kinia ulu mare seko kinjeringimunga ungu mare nimba, anju yando kote senderingimunga ungu mare nimba, ultu-yombomane kuru popo toko kaloringi kere-langimanga ungu mare nimba, ambo ye pulima kinia ye ambo lilima kinia molko kondonge mele nimba sipa, Pulu Yemonga Minimuni yomboma ‘Saa.’ nilimú mele pilku liku naa selemele kinia umbunama wendo olemo mele nimba sirimula. Maku toko mimi siku Pulu Yemo popo toko yunga imbi ambolko paka tondonge mele nimba sipa, Mini Kake Sélimuni Karasinga yomboma tondolo lupa lupama we silimúmunga ungu mare nimba sipa, konopu mondonge ulumu paa olandopa mele nimba sipa, yombo kololima lomboroko ola molonge mele ungu mare nimba sirimula. Aku ulumane **Korini yomboma** umbuna sirimumunga aku ulumanga Pulu Yemone kanopa peanga pilielemo mele Pollone ono lipa tapondopa ungu peangama nimba sirimu.

1:10—6:20munga ungu-pulumu inia anjukundu 1:10 molopa, 7:1—16:12 **Korini yombomane** ungu mare mangilieringimanga ungu-pulumu inia anjukundu 7:1 molemo.

Ya ungu-pulumu pora nikimu.

*Kolomongo-Awili 1-4*

**Karasinga Yomboma Angelema Naa Ning, Ono Onono  
Ononga Imbi Ambolko Paka Naa Tangi Ungu Mare**

1:1-3

*Pollone Pepámo Tombando Pulu Polopa Torumu Unguma*

<sup>1</sup> Na Pollo, Pulu Yemone na mangilipa nimba taltorumu-na Karasi Yesusini “Nanga kongonomo sende-pu.” nimba lipa mundorumu yemo, na kinia olionga ‚Karasinga ungumu pilieli, genu Sotenis pea molopole i pepámo topo sikiru.

<sup>2</sup> Pulu Yemonga yombo talape kolea-awili Korini molemelema, Karasi Yesusi kinia kopu seko molemele-na Pulu Yemone “Nanga yombo manjiku molko yombo kake sepili molangi waa.” nirimu yomboma, ono kinia koleamanga pali olionga Ye-Awili

Yesusi Karasinga imbimu ambolko paka tondoko popo tolemele yomboma kinia, ono pali ,i pepámo topo sikiru,. Ye-Awili mu olionga kepe ononga kepe pali Ye-Awili mu.

<sup>3</sup> Olionga Lapa Pulu Yemo kinia Ye-Awili Yesusi Karasitolone ono we kondo kolko, ‘Ono konopu pe nipili taka leko molangi.’ niengili.

1:4-9

*Karasinga Korini Yomboma Moloringimunga Pollone Pulu Yemondo “Ange.” Nirimu Semanemo*

<sup>4</sup> Ono Korini yomboma Karasi Yesusinga yomboma molemele-na Pulu Yemone ono we kondo kolopa sepa kondorumumunga nane Pulu Yemondo alieli “Ange.” nimbu molio. <sup>5-6</sup> Nane onondo Karasi manda selemo sembá mele semane peangamo topo sirindu unguma ‘Sika.’ ningu kuru mondoko liltangi-kulu ono-kinia ulu peangama wendo orumu. Karasini ononga nimba senderimumunga Pulu Yemone yunga unguma onone ningu kondonge tondolomo kinia, yunga ungumanga puluma pilku kondonge tondolomo kinia, sirimu-na kanu tondolotolo kinia we-tonadoloma pali ono-kinia pepili molemele. <sup>7</sup> Aku siku molemele-na ono Ye-Awili Yesusi Karasi omba mona gilimbamonga konopu siku nokoko molemele kinia Mini Kake Sélimunga tondoloma pali yuni sirimu ono-kinia pelemo. <sup>8</sup> Olionga Ye-Awili Yesusi Karasi ombá walemo wendo ombá kinia ‘Pulu Yemone,’ “Seko kinjeringimunga mongo liltangi.” nimba ulu se ono-kinia naa pepili.’ nimba yuni ‘Ono alieli enge ningu molangi.’ nilimú mele pe kepe nimbá. <sup>9</sup> Onondo yunga Malo olionga Ye-Awili Yesusi Karasi pea “Kopu seko molangi waa.” nirimu Pulu Yemone ulu “Sembó.” nilimúma paa sika selemo. ‘Ono-kinia aku sipa ulu peangama wendo, orumumunga pilipuli ,Pulu Yemo kinia alieli “Ange.” niliu.‘

1:10-17

*Karasinga Korini Yombo Talapemo Konopu Lupa Lupa Pepili Moloringimunga Ungu Se*

<sup>10</sup> Ango-keme, olionga Ye-Awili Yesusi Karasinga imbi lepo ,umbuna se ono kinia pelemomonga, ungu se mawa sekero: ‘Ono konopu paa seluna mindi pupili, ungu selumu mindi ningu, konopu seluna pupili sere leko molangi. Lupa lupa naa molangi. Ono yombo talape selumu mindi molko konopu selumu pepili molangi.’ nimbu mawa sekero. <sup>11</sup> Nanga ango-keme, angelema ningu irinale seko molemele mele ,ambo, Killoinga yombo marene ,ongo, na ningu siringi. <sup>12</sup> Onone selemele nikiru mele niembo:

Ono marene ninguli: “Olio Pollo lombili pulimulu.” nilimili.

Marene “Olio Apollos lombili pulimulu.” nilimili.

Marene “Olio Pita lombili pulimulu.” nilimili.

Marene “Olio Karasi lombili pulimulu.” nilimili.

<sup>13</sup> „Nambi semu-na aku siku nilimiliye?‘ Karasi yu awisiliye? ‘Na, Pollone ‘Ono lipu tapondambo.’ nimbu unju-perana kolondorunduye? Ono no lindingindu “Pollonga ,yomboma molko yu-kinia konopu seluna kopu seko molangi.” ningu yunga, imbimu mangilku ono no linderindu? <sup>14-15</sup> Nane ono Korini yombo mare no naa linderindumunga yombomane “Olio Pollonga ,yomboma molamili.” nimbu, yunga imbimu mangilipu no liltimulu.” manda naa ningimunga ono papu no naa linderindu. Nane Kiripas kinia Gayasitolo sika no linderindu-na-kolo yombo mare pea mólo. <sup>16</sup> (Sika, mare pea no linderindula. Sitepanas kinia yunga ulkana peringi yomboma kinia no linderindu lémo. ‘Akuma mindi no linderindu.’ konopu lekero. ‘Mare pea mólonje.’ nimbu pilkiru.) <sup>17</sup> Karasini na “No lindi-pou.” nimba lipa naa mundorumu. Yunga semane peangamo “Toko sindi-pu.” nimba lipa mundorumumunga ,na yomboma no lindilipu naa andolio,. Karasinga semane peangamo andopo topo simbundu yombo pilipa kondoli pelemomane semane lupa

lupa tolemele mele na aku sipu naa tollo. ‘Aku sipu sembó kinia Karasi „kolorumu, unju-peramo yunga engemo naa peli none sendepo, aku unju-peramonga tondolomo topo mania mundumbu.’ nimbu aku naa selio.

**1:18—2:5**

*Karasi Yu Pulu Yemonga Pilipa Kondolimu Kinia Tondolomo-Tolo Molemomonga  
Ungu Se*

**18** Sika Karasi kolorumu unju-peramonga ungu nilimulumu mindili nongo molko kinjingí aulkana pulimili yombomane ninguli: ‘Unguri mólo. Akumunga lipa tapondomba tondolo se naa pelemo.’ nilimili. Aku-sipa na-kolo olio lipa tapondopa mindili nolemolá aulkana wendo lipa yu-kinia pea molopo kondomolo aulkana lipa mondomu yomboma olione ‘Unju-peramonga ungumu Pulu Yemonga tondolo pelemo ungumu.’ nimbu pilielemolo. **19** ‘Aku siku ningu pilielememonga, ungu se Pulu Yemonga bokuna molemo, akumu i-sipa:

“Pilipa kondoli pelemo yombomanga pilipa kondolimu  
nane topo mania mundumbu.

Yombomane ‘Sumbi sipu pilielemolo.’

nilimili yombomanga  
konopuma sepo sembambu simbú.”

nirimu kanumu.

**20** ‘Pulu Yemone aku sipa pilieli yomboma topa mania mundumba, liemu kiniá yombo mare pilipa kondoli pelemo yomboma kinia, Mosisini sirimu ungu-manema pilku kondoko yomboma mane silimili yomboma kinia, uluma pali pilkuli angelema nilimili yomboma kinia, kanu yombomando nambolka nimulúye? Ya ma-koleana konopumane tondolo munduku pilielemene uluma pali Pulu Yemone aku uluma tondolo se naa pelemo mele naa lipa ora sirimuye? ’Aku uluma tondolo se naa pelemo mele lipa ora sirimu kanumu.,

**21** ‘Akumu nambi sepo pilipuli nikiruye?,’ Pulu Yemo pilipa kondoli pepili molemomonga ma-koleana pilipa kondoli pelemo yombomane yu molopa pilielemo mele manda naa pilingí akumunga olione Yesusi kolorumu ungumu nimbu silimulu kanu ungumundu pilipa kondoli yombomane “Aroma toko, ningu kinjikimili.” nilimili ungu akumuni ‘Aku ungumu sika.’ ningu kuru mondolemele yomboma Pulu Yemone lipa tapondopa mindili nolemolá aulkana wendo lipa yu-kinia molko kondonge aulkana lipa mondolemo. **22** Juda yombomane “Pulu Yemone ulu-tondoloma selemo mele ulu mare kanamili.” nilimili; Giriki yombomane ‘Olio pilipa kondoli peangama pepili. Olio ulumanga puluma paa pilipu kondamili.’ ningu kála seko kongono selemele. **23-24** Aku-na-kolo olione Yesusi unju-perana ola uku toko panjeringi kolorumumunga semanemo mindi andopo topo silimulu. Aku ungumu Juda yombomane ‘ungumu we pilku ulu-tondolo mare naa kanokole “Aku ungumu, ungu kirimu. Paa manda mólo.”’ nilimili; Giriki yombomane ‘ungumu we pilku ungumunga pulumu naa pilkuli, “I ungumu aroma ungumu.”’ nilimili; aku-sipa na-kolo Pulu Yemone Juda yombo mare kinia, Giriki yombo mare kinia ‘Nanga yomboma molangi waa.’ nirimu ‘pilierimulu, yombomane kanu ungumu pilipuli, ‘Aku ungumuni Pulu Yemone lipa mundupa olio sirimu ye nokoli, Karasimu molopa selemo mele nimba silimú ungumu. Yu Pulu Yemonga tondolomo; yu Pulu Yemonga pilipa kondolimu.’ nilimulu. **25** Ma-koleana yombo marene ‘Pulu Yemone konopumuni pilielemo ungu mare aroma topa pilielemo.’ nilimili-na-kolo yuni konopumuni aroma topa pilielemo mele kepe paa olandopa; yombomane ‘Paa pilipu kondolemolo.’ nilimili mele maniandopa. Pulu Yemone ulu mare selemo kinia yombomane kanokole, ‘Aku uluma enge se naa pelemo.’ ningu kanolemele-na-kolo

'enge se naa pelemo' nilimili ulumanga tondoloma kepe paa olandopa, yombomane 'Ulu-pondoloma sekemolo.' nilimili tondoloma paa maniandopa.

<sup>26</sup> Ango-keme, u Pulu Yemone 'Nanga yomboma molangi waa.' naa nipili moloringi mele kiniá kelko mimi siku pilangi. Yombomane ono kanokole 'Ono awisili pilipa kondoli yomboma moloringi.' naa niringi. 'Ono yombo awisili yomboma nokoli engemo pelemo.' naa niringila. 'Ono awisili ononga anda-kolepama imbi molorumu.' naa niringila. <sup>27</sup> Aku-sipa na-kolo ma-koleana yombomane yombo mare kanokole, 'Yombo konopu naa peli yombo aroma tolima.' nilimili yomboma Pulu Yemone nimba taltopa 'Nanga yomboma molangi.' nilimú; 'Yombo enge naa peli yomboma.' ningu kanolemelema nimba taltopa 'Nanga yomboma molangi.' nilimú. 'Nanga yombomando aku siku ningu pilielemene yombo pilipa kondoli pelemo yomboma kinia, 'Olio enge pelemo.' ningu pilielemene yomboma kinia, pipili kolangi.' nimba Pulu Yemone kanu we-yomboma nimba taltopa 'Nanga yomboma molangi waa.' nilimú. <sup>28</sup> Ya ma-koleana imbi naa molemo yomboma kinia, yombomane kanoko kiri pilielemene yomboma kinia, yombomane 'yombo koropama' ningu kanolemele yomboma kinia, akuma Pulu Yemone nimba taltopa 'Nanga yomboma molangi.' nirimu. 'Yombo imbi molemoma kinia, tondolo pelemo yomboma kinia, aku yomboma we-yombo koropama molangi.' nimba, kanu we-yomboma 'Nanga yomboma molangi.' nimba, nimba talitorumu. <sup>29</sup> 'Yombo sene nanga kumbi-kerena yuyu kape nimba yunga imbi ambolopa paka manda naa tomba.' nimbale Pulu Yemone kanu sili yomboma nimba talitorumu. <sup>30</sup> Pulu Yemone yuyu ono 'Karasí Yesusi kinia pea kopu seko molangi.' nimba lipa mundorumuna yu kinia pea molemele kanumu. Pe kiniá Pulu Yemone olio pilipa kondolimu kinia konopuni mimi sipa pilieli ulumu kinia silimú akumunga pulumu Karasi yu. Karasini ,olionga nimba senderimu ulu akumuni, Pulu Yemone olio 'yombo sumbi nilima molko, nanga yomboma manjiku molko yombo kake selima molangi.' nilimú. Karasini senderimu ulumuni 'Ono seko kinjeringimunga molko kinjiku mindi pungí aulkana wendo wangi, ulu-pulu-kirimane ono kelepa naa ambolopili.' nilimú. <sup>31</sup> Akumunga, Pulu Yemonga bokuna ungu se nilimú mele mindi samili. Aku ungumu i-sipa:

"Yombo sene 'Konopu sipu kape niembo.' nimu liemu

Ye-Awilimuni yunga senderimumunga pilipale

Ye-Awilimu mindi konopu sipa kape nimba

imbi ambolopa paka tondopili."

nilimú kanumu mele samili.

## 2

2:1-5

*Pollone Karasinga Unju-Peramonga Ungumu Mindi Nimba Sipa Andorumu Unju Se (1:18—2:5 pali)*

<sup>1</sup> Ango-keme, 'akumunga nanga nanu pilipa kondolimu kinia tondolomo kinia naa pepili serindu mele niembo:, Na ono moloringina ombole Pulu Yemonga ungumu ono nimbu simbundu pilipa kondoli olandopa pelemo yombomane unguma sulu seko ningu kondolemele mele naa nirindu. <sup>2</sup> Na ono-kinia molopole 'Yesusi ye nokoli Karasimu yu mindi konopu kimbu sipu molopole, yu unju-perana ola uku toko panjeringi kolorumu mele mindi paa konopu kimbu sipu molopo, ono akumu mindi pilangi nimbu simbú.' nimbu molopole ,pilipa kondoli pelemo yombomane nilimili mele naa nirindu,. Unju lupa se konopu kimbu sipu mane naa siembo.' nimbu u pilierindu. <sup>3</sup> Na ombo ono-kinia molopo ,unguma nimbu sirindu, kinia na enge se naa perimu. Pipili kolopo alieli mini-wale mundupu molorundu. <sup>4</sup> 'Semane peangamo,

ono topo simbundu pilipa kondoli pelemo yombomane nilimili mele unguma naa nimbu sirindu. 'Nanga pilipa kondoli olandopa pelemomone ono konopu topele tangi.' nimbu ono unguma tondolo mundupu naa nimbu sirindu. 'Mini Kake Sélimunga tondolomone na lipa tapondolemo kinia kanokole nimbu sikiru mele pilku liengi.' nimbu yunga tondolomone unguma ono nimbu sirindu. <sup>5</sup> 'We-yombomane pilipa kondoli pepili unguma ningu kondolemelenje pilkuli "Sika nikimili." ningu kuru mondolemólje manda naa selka. Pulu Yemonga tondolomo mindi kanokole "Yunga ungumu sika." ningu kuru mondangi.' nimbu unguma aku sipu we nimbu sirindu.

**2:6-16**

### *Pulu Yemonga Minimuni Olio Pilipu Kondomolo Ulu-Pulumu Silimú Ungu Se*

<sup>6</sup> 'We-yombomando pilipa kondoli yombomane ningu silimili mele sika nimbu naa siliu,-na-kolo Pulu Yemonga ungumu kamu pilku kondolemélé yombomando unguma nimbu simbundu pilipa kondoli pelemo unguma nimbu siliu. Aku-sipa na-kolo aku pilipa kondolimu ya mana-yombomane pilku kondoko ningu silimili mele paa mólo. Ya ma-koleana nokoko kamako molemele yombomane ungu-mané silimili mele ungu-mané naa siliu. 'Mulu ma pora nimbá kinia, ononga engemo pora nimbá. <sup>7</sup> 'Nane niliu mele lupa.' Nane Pulu Yemonga konopu peanga pepa pilipa kondoli unguma mindi nimbu siliu, aku ungumu Pulu Yemone mulu matolo u naa sepale olio sepa kondopa 'Yu kinia pea molangi.' nimba, nimba panjerimu-na-kolo aku ungumu u lopi sepa perimumu kiniá mindi kamu mona lemó, aku ungumu mindi nimbu siliu. <sup>8</sup> 'Nane pilipa kondoli nikiru, akumu ya ma-koleana nokolemélé ye kamakoma naa pilielemélé. Pilielemólje tondolo pa seli pelemo Ye-Awilimu 'unju-perana kolopili.' ningu akuna ola uku toko naa panjilimolá. <sup>9</sup> Aku-sipa na-kolo 'aku ungumunga, ungu se 'Pulu Yemonga bokuna, toringi molemo, akumu i-sipa:

'Pulu Yemo konopu mondolemélé yomboma

yuni sepa kondopa mélema taltondolemo mele  
yombo selumuni kepe mongomane naa kanoko,

ungu se naa pilku, konopumane naa pilieringi.'  
nimba molemo kanumu, <sup>10</sup> Aku-na-kolo Pulu Yemone 'Yunga Minimuni sei.' nirimu kinia Minimuni olio kanu lopi serimu ulumu lipa ora sirimu.

Yunga Minimuni mélema pali mimi sipa kanopa, Pulu Yemonga konopuna ulu-tondo pelemoma kepe kanolemo. <sup>11</sup> Yombo sene yombo se konopumuni pilielemo mele naa kanolemo. Yombo senga minimuni mindi yuyu konopu lemó mele kanopa pilielemo. Aku sipala Pulu Yemo yuni konopumuni pilielemo mele yombo sene naa kanolemo, Pulu Yemo yunga Minimuni mindi kanolemo. <sup>12</sup> Pe Pulu Yemone yunga Minimu olio sirimu-na Pulu Yemone olio sepa kondopa we silimú mele pilielemolo. 'Olio ya ma-koleamonga tondolo se liltimulu.' nimbu naa pilielemolo. <sup>13</sup> Akumunga nane ungu nimbu siliuma ma-koleana pilipa kondoli sene naa nimbu siliu. 'Pulu Yemonga, Minimuni na mane sipa 'Ningu si.' nimba ungu-umbu tondolembo unguma Pulu Yemonga Minimu konopuna molemo yomboma nimbu siliu.

<sup>14</sup> Pulu Yemonga Minimu konopuna naa molemo yombomane Pulu Yemonga Minimuni nimba silimú mele naa pilku limili. Pulu Yemonga Minimu konopuna molemo yombomane mindi Pulu Yemonga mélema liku mimi siku pilielemélé akumunga Pulu Yemonga Minimu konopuna naa molemo yombomane 'Aku mélema unguri mólo.' ningu pilku sundulimili. <sup>15</sup> 'Aku-sipa na-kolo' Pulu Yemonga Minimuni ambololemo yombomane mélema pali puluma mimi siku pilku apuruku kondolemélé. Aku-sipa na-kolo we-yombomane Pulu Yemonga Minimu konopuna molemo yomboma manda kanoko naa apuruku, 'Seko kondokomele.' molo 'Seko kinjikimili.' ningu manda naa pilku nilimili. <sup>16</sup> 'Pulu Yemone konopumuni pilielemo

mele manda naa pilielememonga ungu-pulu se Pulu Yemonga bokuna molemo, akumu i-sipa: „

‘Nawene Ye-Awilimu konopumuni pilielemo mele  
mande kanopa pilipa,

Ye-Awilimu manda mane simbaye?’

nimba molemo kanumu. „Akumu sika, na-kolo olio, Pulu Yemonga Minimu konopuna molemo yombomane, Karasi konopumuni pilielemo mele aku sipu pilielemolo, akumunga Ye-Awilimuni pilielemo mele manda pilielemolo.„

### 3

3:1—4:1

*Karasinga Korini Yomboma Lupa Lupa Moloringimunga Ungu Se*  
3:1-9

*Karasinga Yombomanga Kongono Sendeli Yomboma Pulu Yemonga Kongono Sendeli Yomboma Molemele Ungu Se*

<sup>1</sup> Ango-keme, „aku nikirumunga, na ono-kinia molopole, yomboma Pulu Yemonga Minimuni nilimú mele pilku liku selemele yomboma mane siliu mele ono aku sipu manda mane naa sirindu. We-mana-yombo, umbu-konopumane mindi pilielemel yomboma, mane siliu mele ono aku sipu mane sirindu. Karasinga bolango pamema mindi moloringimunga <sup>2</sup> nane ono ame mindi sirindu. ‘Ono kere-langì enge nilima manda naa nonge.’ nimbu kanopole kere-langì enge nilima naa sirindu. Kiniá kepe kere-langì enge nilima manda naa nonge. <sup>3</sup> Ononga u-konopu-wemane ono ambolopili molemelemonga we-mana-yombomane selemele mele selemele. Ono yombo talape lupa lupa molko “Olio lombili pulimulu yemo olandopa, ono lombili pulimili yemo maniandopamo”. Molo “Olio kuru mondolemolo mele sumbi nilimu; ono kuru mondolememele mele manda naa sekemo. Olionga talapena ongo molemolánje papu.” ningu anju yando yomboma-kinia konopu kiri panjiku irinale seko, aku uluma selemele, akumu konopu-uma pepili molemelemonga selemele. „Aku ulu selemelemane ono Mini Kake Sélimuni kamu ambololemo yomboma naa molko, yunga ungumu naa pilku, we-mana-yomboma mindi molemele mele lipa ora silimú.„ <sup>4</sup> „Onone i-siku mele selemele:” Yombo sene nimbale: “Na Pollonga yombomo.” nilimú. Sene nimbale: “Na Apollosinga yombomo.” nilimú. Ono aku siku nilimili yomboma we-mana-yomboma mindi molkole aku siku pilku nilimili.

<sup>5</sup> „Apollos kinia Pollotolo nambi semu-na aranale seko angelema nilimiliye?”, Apollos nawe? Pollo nawe? Apollos olto Ye-Awilimunga kendemande-yetolo mindi. Ye-Awilimuni kongono lupa lupa sirimu yetolo molopole, aku kongonomo serimbulu-munga ono “Karasi sika.” ningu kuru mondoringi aulkamo akisinderimbulu yetolo mindi molembolo. <sup>6</sup> Nane kere-langì umbu torundu; pe kere-langì umbu tondorundu koleana Apollosini andopa no mundorumu; aku-sipa na-kolo Pulu Yemone ‘Kere-langima toko-raka nimba opili.’ nirimu. <sup>7</sup> Akumunga, yombo kere-langì umbu tondolemomo imbi naa molemo; yombo kaliana andopa no silimú yombomo kepe imbi naala molemo; Pulu Yemone ‘Kere-langima wendo opili.’ nilimú aku yemo mindi imbi molemo. <sup>8</sup> Yombo kere-langì umbu tolemo yombomo kinia kaliana andopa no silimú yombomo kinia aku yombotolongga kongono se olandopa se maniandopamo mólo. Aku yombotolone „Pulu Yemonga, kongono mindi sengelelemonga selembele mele mimi sipa kanopa apurupa yu-mele-mele méle kalomba. <sup>9</sup> Apollos olto kinia Pulu Yemo kinia kopu sepo kongono selemolo yema; ono Pulu Yemonga kalia mele, akumunga yu mindi olandopamo.”

3:9-15

*Karasinga Yombomanga Kongono Sendeli Yomboma Ulka Takoli Yomboma Mele Molemele Ungu Se (3:1—4:1 pali)*

Ono Pulu Yemone ulkamo takopa molemo mele molemelela. <sup>10</sup> „Na ono moloringina ombo pulu polopo unguma mane sirindu kinia, Pulu Yemone we kondo kolopale ‘Na ulka takoli kongonomonga pilipa kondoli pelemo yemo molopili.’ nimba tondolo se we sirimu. ‘Ono yunga ulkamo giliepili.’ nimba na aku tondolomo sipale lipa mundorumu-na ono moloringina ombo, ‘Ulka gilimbamonga ponga polangi.’ nimbu mana-kouma talape topo taltorundu, aku koumanga ola yombo sene ulkamo takopa molemo. Aku-sipa na-koło ulka takolemele yombomane mimi siku pilku kondoko ulka takangi. <sup>11</sup> Ulkamo ola takonge kouma nane talape topo taltorundu akuma Yesusi Karasi yu. Yombo sene topele topa kou lupa mare manda naa taltomba. <sup>12</sup> Yombo marene „Pulu Yemonga ulkamo, kanu koumanga ola takongendo kou-gollo kinia, kou-sillipa kinia, kou-mone oladopa pulimú kouma kinia, aku méle peangamane takoko, marene unju kinia angi kinia rasi-witi unju aku méle kirimane takoko, selemele. <sup>13</sup> Pe Pulu Yemone yomboma kote sendepa pilimba walemo wendo ombá kinia ulkamo takolemele mele mona lemba. Kanu walemo kinia sepe sene ‘Yombomane kongono seringima seko kondoringinje molo seko kinjeringinje?’ nimba manda manjimba. <sup>14</sup> „Manda manjimba kinia, yombo sene mania talape topa lemó koumanga ola ulka takombamo sepene naa nomba pora simu liemu yu méle kalólimu limba. <sup>15</sup> Molo yombo sene ulka takombamo sepene nomba pora simu liemu aku kongono sembamonga méle kalólimu naa limba. Kanu yombomo yuyu „Pulu Yemone, lipa tapondopa ‘Mindili naa nopili.’ nimba yu-kinia molopa kondomba ulupulumu simba-na-koło yu, sepene yombo se nombá selemo kinia yombomane liku tapondoko yu wendo limili kinia sepene kamu naa nolemo yombomo mele molomba.

**3:16-17**

*Karasinga Yomboma Pulu Yemonga Ulkamo Molemelemonga Ungu Se (3:1—4:1 pali)*

<sup>16</sup> Ono Pulu Yemo molemo ulka suluminia paa kake sélimu molemele; Pulu Yemonga Minimu ononga konopumanga sukundu molemo; akumu ono naa pilielemeleye? <sup>17</sup> Akumunga, yombo sene Pulu Yemonga ulka suluminia paa kake sélimu sepa kinjemli liemu Pulu Yemone kanu yombomo sepa kinjimbala. Pulu Yemonga suluminiamo ‘Yunga suluminia kake sélimu.’ nilimú, aku suluminiamo ono onono, akumunga aku sipa sepa kinjimba yombomo yuni yu kepe sepa kinjimba.

**3:18-23**

*Olianga Yemanga Imbima Ambolopo Paka Tondopo Kape Naa Nindamili Ungu Se (3:1—4:1 pali)*

<sup>18</sup> Ono onono konopumane kolo toko naa piliangi. Ononga yombo sene yuyu pilipale, ma-koleana-yombomane ‘Olio pilipa kondoli pelemo yomboma molemolo.’ ningi pilielemele mele yuniaku sipa ‘Pilipa kondoli yombomo molio.’ nimba piliemli liemu ‘Aku sipu nimbu naa piliambo.’ nipili. ‘Mana-yombomane na kanokole ‘Aroma toli yombomo.’ ningi kanangi.’ nipili. Aku sipa nimbá kinia sika pilipa kondoli yombomo molomba. <sup>19</sup> Mana-yombomane pilkuli ‘Akumu pilipa kondolim.’ ningi pilielemele mele Pulu Yemone kanopale ‘Keklepa toli ulumu.’ nimba kanolemo. Akumunga ungu se yunga bokuna molemo, akumu i-sipa:

‘Yombo marene yomboma seko kinjingindu

ononga konopumanga pilipa kondoli pelemomone  
uluma selemele-na-koło

Pulu Yemone aku selemele uluma kanopale

‘Aku pilkuli sekemelemonga ono onono melu leko  
nomimu suku mundukumili.’ nimba kanolemo.  
nimba molemo kanumu. <sup>20</sup> Akumunga ungu se pea molemola, akumu i-sipa:

'Ye-Awilimuni pilipale,  
 konopumanga pilipa kondoli pelemo yomboma  
 konopumane pilielemele mele  
 ono naa lipa tapondomba.

'Pilielemele mele unguri mólo.' nimba pilielemo.'

nimba aku sipa molemo. <sup>21</sup> Akumunga, kelko yemanga imbima kape ningu ambolko paka naa tondangi. Mélema pali ononga. <sup>22</sup> Na, Pollo kepe Apollos kepe Pita kepe, ma-koleamo kepe konde mololi ulumu kepe kololi ulumu kepe, kiniá lemó mélema kepe pe lemba mélema kepe, akuma pali ononga; ono liku tapondongendo aku tapu-yema kinia mélema kinia pelemele; <sup>23</sup> ono Karasinga yomboma, Karasi Pulu Yemonga yemola, 'akumunga olo kinia olio kinia mélema pali ononga kene anju anju talape yu-mele-mele manda molame!'

## 4

### *Kolomongo-Awili 4*

*Karasini "Nanga Kongonomo Sende-Paa." Nimba Lipa Mundorumu Yemanga Ungu Se*  
*4:1-5*

*Ye-Awilimuni Yunga Kongonomo Sendeli Yema Selemene Mele Apurupa Pilielemo UNGU SE*

<sup>1</sup> Akumunga, Apollos olto molembolo mele yombomane pilku kanonge mele i-sipa: Olto Karasinga kongonomo sendeli kendemande-yetolo molopo, ungu u lopi sepa perimuma Pulu Yemone u nimba pára naa sirimu unguma nokopo yomboma nimbu silimbulu yetolo molembolo. 'Aku siku yetolo molembele.' ningu piliengi liemu papu.

<sup>2</sup> Akumunga ungu se pelemóla: Yombo sene yombo senga kongonomo sendelemo yombomone yunga ye awilimuni 'Sei.' nilimú mele paa mimi sipa pilipa sepili. Mimi sipa pilipa naa semu liemu manda mólo, ono pilielemele. <sup>3</sup> 'Nane kongono selio mele, onone molo kote sendelemo ye sene kanoko apuruku, 'Mimi sipa sepa kondolemonje.' ningu, kanongi liemu unguri mólo.' nimbu konopu kimbu sипу naa molio. Nanu kepe selio mele naa apuruliu. <sup>4</sup> Nane nanga konopumuni pilipuli 'Pulu Yemone "Sei." nilimú kongonomo sepole, sika ungu se sepo naa kinjiliu.' nimbu pilielio-na-kolo 'Nane sika sepo naa kinjiliu. Na ye sumbi nili se molio.' nanu manda naa nimbú. Nane kongono selio mele Ye-Awilimuni yuyu pilipa apurulimú.

<sup>5</sup> Akumunga, 'Ye-Awilimuni ombo kote piliepili.' ningu nokoko molkole iseli-u yombomane uluma selemene mele onone naa apurangi. Yu ombale simbuluna pelemo uluma 'Pa selina mona liepili.' nimba, yombomane uluma sengendo konopumane pilielemele mele mona nimba pára simba. Aku sembá walemonga Pulu Yemone olione selemolo mele pilipa apurupale 'sepo kondolemolo ulumanga, olio kape nimbá.'

*4:6-13*

*Korini Karasinga Yomboma Onono Ononga Imbima Ambolko Paka Toringi UNGU SE*  
*(4:1-21 pali)*

<sup>6</sup> Ango-keme, 'nane 'Nokoli yombomanga unguma mimi siku pilku kongono seko kondangi.' nikiru mele 'Ono lipu tapondambo.' nimbu 'Apollos oltone selembole mele kanangi.' nikiru. 'Semboló mele pe kanokole ungu se pelemomonga pulumu ono manda sumbi siku piliangi.' nimbu molio. Kanu ungumu i-sipa:

'Pulu Yemonga bokuna "Sangi." nilimú mele

mindi mimi siku pilku sangi.

Onone ulu se lupa naa sangi.'

nimba molemo mele pilkuli yombo senga imbimu ambolko paka tondoko yombo senga imbimu toko mania mundunduku naa sangi. <sup>7</sup> „Ono ‘Yombo awilima molemolo.’ nilimili ango-keme, ‘Olio imbi molopili. Yombo lupama imbi naa molopili.’ nawene nilimúye? Ono méle peanga liltingima ‘Pulu Yemone, naa sirimuye? Pe tondolo liltingima Pulu Yemone simu liemu nambi semu-na ononga imbima onono ambolko paka toko kape nilimiliye?

<sup>8</sup> ‘Méle awisili koronga manda liltimulu. ‘Minimunga, méle awisili taltopo manda molemolo.’ ningu pilielemeye? ‘Koronga ‘Karasí kinia pea, kamako kingima molopo yomboma nokolemolo.’ ningu pilielemeye? Aku liemu olto pea aku sипу naa molemolo akumu kiri. Aku-sipa na-kolo ‘Ono aku siku naa molemele.’ konopu lekero. ‘Ono paa sika ye nokoli kingima molemolánje papu. Aku lelkanje olto ono pea kingima molemolá. Aku lelkanje papu.’ konopu lekero. ‘Aku-sipa na-kolo olio iseli-u kingima naa molemolo.’ <sup>9</sup> ‘Olio molemolo, mele nane pilkirumu niembo: ‘Olio Karasini “Nanga kongonomo sende-paa.” nimba lipa mundorumu yema olio paa maniadopa.’ konopu lekero. Kote sendeko “Toko kondangi.” nilimili yomboma mele molemolo. ‘Yomboma konopu siku kanoko molangi toko kondangi.’ ningu penana sukundu mundulimili yomboma mele molemolo. Mana-yomboma kinia angelloma kinia yombomane pali olio neme-neme ningu kanoko molemele. <sup>10</sup> Karasinga semanemo andopo nimbu silimulumunga yombomane olio ‘Ye aromama.’ nilimili-na-kolo ono ‘Korini Karasinga yomboma’ne ‘Karasinga yomboma molemolomonga olio pilipa kondoli pelemo yomboma molemolo.’ nilimili. Olio ‘Karasini kongono sirimu yema,ndo ‘Ono enge se naa pelemo.’ nilimili; onone onono ‘Olio enge paa pelemo.’ nilimili. Oliondo ‘Ono imbi naa molemo.’ nilimili-na-kolo onone onono ‘Imbi paa molemo.’ nilimili.

<sup>11</sup> Olio ‘Karasini ‘kongonomo sende-paa.’ nimba lipa mundorumu yema, sika u molorumulu mele kiniá kepe we molemolo. Olio paa gelene kolopo, no nonowalene kolopo, mulu-maminia sungu-mangu nilima panjilimulula. Olio ‘paa mindili nongo, kolangi.’ ningu wale awisili kopene tolemele. Olio senga taka lepo molomolo ulka se naa gilimú. <sup>12</sup> ‘Kou-mone lipu kere-langí kinia mélema limulúndu, oliolio kála sepo kongono selemolo. Yombomane olio iri toko “Molko kinjangi!” nilimili kinia olione pundu topo “Pulu Yemone ono sepa kondopili.” nilimulu; ‘Pulu Yemonga kongonomo selemolomonga, yombomane olio mindili silimili kinia pundu topo ungu se naa nimbu umbunama we melemolo; <sup>13</sup> yombomane olio ungu-taka tondoko ningu kinjilimili kinia olione ono pundu topo ungu peangama nilimulu. U kepe, pe yandopa kiniá kepe, yombomane ‘Olio yombo paa koropa, kere-langí norupulu toko eltolemelemele mele molemolo.’ ningu pilielemeye.

4:14-21

#### *Pollone Korini Karasinga Yomboma Liepi-Liepi Topa Nirimu Ungu Se (4:1-21 pali)*

<sup>14</sup> ‘Ono pipili kolangi.’ nimbu nane i ungumu pepána naa tokoro. ‘Ono nanga paa konopu mondolio bolangoma.’ nimbu ungu se liepi-liepi topo i pepámo tokoro. <sup>15</sup> ‘Ono Karasinga ungumu mimi siku piliangi.’ ningu nokolemolá tapu-ye paa awisili, tene tausini mele, molemolánje ononga lapa awisili naa molemolá. Nane Karasi Yesusinga ungumu u-pulu-pulu ono nimbu sirindu kinia ‘Semane peanga akumu sika.’ ningu kuru mondoringimunga na ononga lapamo molorundu, ‘ono nanga bolangoma moloringi mele molemele.’ <sup>16</sup> ‘Na ononga lapamo molio, ono nanga bolangoma molemele, kene nane ono tondolo mundupu mawa sepo nimbili: ‘Ulu selioma kanokole mimi siku manda manjiku sangi.’ nikiru. <sup>17</sup> ‘Aku sangi.’ nimbu ‘Ono molemelena Timoti opili.’ nimbu lipu mundukuru. ‘Yu Karasinga yemo molopa yu-kinia olto Karasinga kongonomo pea andopo selembolomonga, yu nanga konopu mondolio kangomo. Yuni Ye-Awilimunga kongonomo mimi sipa nokolemo. Nane

Karasi Yesusinga unguma pilipuli sepo molio mele kelko piliangi nimba simba. Na Karasi-kinia molopole sepo molio mele kinia, Karasinga yombo talapemanga andopo ‘Sangi.’ nimbu mane siliu mele kinia, selu-sipa. ‚Aku sipa mele Timotini ono kelko piliangi nimba simba.‘

<sup>18</sup> Ononga yombo marene ‘Pollo naa ombá.’ konopu leko kara pungu mongo kondolemele. <sup>19</sup> Aku-sipa na-kolo Ye-Awilimuni na “Pu.” nimu liemu na paa sika ono molemelena nondopo ombó. Ombole kara pungu mongo kondolemele yombomane ungu nilimili mele mindi pilimbundu naa ombó. ‘Ono sika tondolo se pelemonje „molo Pulu Yemonga kongonomo naa seko unguma we nilimilinje.’ nimbu kanombo ombó. <sup>20</sup> Pulu Yemo ye nokoli kingimu molopa nokolemo yomboma ungu mindi naa nilimili. Yunga tondolomone yunga kongonomo seko yunga yomboma sumbi siku molemele akumunga ‚ne kara puli yomboma sika tondolo pelemonje.’ nimbu kanombo. <sup>21</sup> Nane ono nambolka unguri sembó kinia ‘Peanga.’ konopu lengeye? ‘Na ka-pulta membo ombo ono ka-pultane topo mane simbú kinia peanga.’ konopu lekemeleye? Molo nane ono molongena ombo konopu mondopo taka lepo mane sipu kondo kolombo kinia ‘Peanga.’ konopu lekemeleye? Ono piliaa.

*Kolomongo-Awili 5-6*

## **Pollone “Karasinga Korini Yomboma Kinia Ulu-Kirima Wendo Orumuma Munduku Kelko “Kamu Mania Pupili.” Niengi.” Nirimu Ungu Se**

### 5

*Kolomongo-Awili 5*

*Pollone “Ononga Genu Sene Ambo Se Kinia Wa Ulu-Kirinale Selemo Yemo Makorangi.” Nirimu Ungumu*

5:1-5

*Wa Ulu-Kirinale Seli Ulu Se Karasinga Korini Yomboma Kinia Perimu Ungu Se*

<sup>1</sup> Ono-kinia wa ulu-kirinale seli ulu se wendo olemo mele semane toko silimili akumu na pilkiru. Kanu ulumu ultu molemele yombomane seko kinjilimili mele maniadopa, i ulumu olandopa. Ononga ye sene lapanga ambomo yu lipa memba andolemo. <sup>2</sup> ‚Ononga genu ye sene aku sipa selemomonga, onone ‘Olio yombo peangama molemolo.’ ningu onono nambi semu-na kape nilimiliye? ‚Ononga imbima ambolko paka toko uluma selemele mele munduku kelkole,‘ konopu kiri panjiku kola seko, sepa kinjilimú ye kanumu ‘Ono kinia kopu sepa naa molopili.’ ningu toko makoroko ultu mundulimolánje papu. <sup>3</sup> Sika nanga kangimu ono-kinia naa molemo-na-kolo nanga konopumuni ‘Ono-kinia molemo.’ konopu lepole, na pea molemolánje yunga kotemo pilipuli “Yu sepili.” nilka mele u na pilipu molio. <sup>4</sup> ‚Onone senge mele pilkirumu niembo:‘ Olionga Ye-Awili Yesusi kinia maku toko molonge kinia na konopumuni ononga maku tongemo nokombo none sembá, olionga Ye-Awili Yesusinga engemo ono-kinia molombala. <sup>5</sup> ‚Aku sipu maku topo molomolo, kinia ne sepa kinjilimú yemo ‘Kurumanga nokoli, Setenene yu nokopili.’ ningu yu Setene liku siengi. ‚Ya mana, Setenene ne yemo yunga kangimu sepa kinjimba mindili nombá kinia ‚yu konopu topele tombanje. Pe, Ye-Awilimu ombo yombomanga kote pilimba walemonga ‘Yemonga minimu kolea kirina naa pumba mindili nomba, yu-kinia pea molopa kondomba.’ ningu yemo yu-kinia aku siku sangi.

5:6-13

*Pollone Karasinga Korini Yombomando “Wa Ulu-Kirinale Selemo Yemo Toko Makorangi.” Nirimu Ungumu (5:1 pulu polko kanani)*

<sup>6</sup> „Ono-kinia ye se molemomone ambo se-kinia sepa kinjipa molopili, onone onono kape nilimili akumu paa manda naa selemo. Paa seko kinjilimili. Pellawa akoli mele isimu pellawana mundukuli pellawamo seko mimi selemele kinia isi paa wallo-kolone pellawa awisili akolemo mele ono naa pilielemeye? <sup>7</sup> Akumunga, „Juda yombomane u seringi mele pilkuli, isi uma toko eltokole, isi naa peli pellawa kondemo molangi. ‘Pulu Yemonga angellomone olio naa topa we ombo pupili.’ ningu Juda yombomane sipisipi walomo toringi mele Karasini ‘ononga sipisipi walomo mele molambo tangi.’ nimba kolali sepa kolondorumumunga ono sika pellawa konde mele molemele. „Aku kene ne yemo ‘isi mele molemo.’ ningu yu makorangi.“ <sup>8</sup> Aku kene „Pulu Yemonga angellomone we ombo pumba Juda yomboma naa torumu mele konopu siku pilingindu Juda yombomane isima pali liku eltoringi mele, Karasi olionga nimba kolondoru mele konopu sipu pilimulúndu ulu-pulu-kirima kinia sepo kinjilimulu uluma pali ‘isi uma mele’ nimbu mundupu kelepo, yu kape nimulúndu Pulu Yemone ‘ulu kake selima’ nimba kanolemo uluma sepo, ungu sikama mindi nimbu molamili. „Aku uluma pellawa isi naa pélimu mele.“

<sup>9</sup> Nane u pepá se topo sirindu akumu i-sipu nimbu topo sirindu: ‘Wapora toli yomboma kinia ono seluna kopu seko naa molangi.’ nirindu kanumu. <sup>10</sup> „Aku-na-kolo aku nirindumu,“ ultukundu molemele yombomane wapora toko, yombomanga mélema kanoko yama mengo, yombomanga mélema kolo toko wa liku, we-mélema ‘Olionga pulu yema.’ ningu liku anjiku popo toko mélema kalko silimili yombomando naa nirindu. ‘Kanu yomboma kinia kopu sepo naa molopo mundupu keleamili.’ nilimolánje ya ma-koleamo kamu munduku kelielemolá, „akumu manda mólo.“ <sup>11</sup> Nane pepá topo sirindumunga pulumu i-sipa: ‘Yombo sene “Na Karasinga yombomo.” nimbole wa ulu-kirinale sepa, yombomanga mélema kanopa yama memba, we-mélema lipa anjipa ‘Nanga pulu yema.’ nimba popo topa mélema kalopa sipa, yombomanga ungu-bulkundu nindipa, no nombaamu topa, yombomanga mélema kolo topa wa lipa, sembá yombo se kinia paa seluna kopu seko naa molangi. Yombo sene ‘Na Karasinga yombomo molio.’ nimbaaku sipa sembá yombomo kinia seluna kere-langí paa naa nangila.’ „nimbu pepá toruntu kanumu.“ <sup>12</sup> Karasinga yombo naa molko ultu molemele yomboma selemele mele manda apurumbuye? „Akumu nanga kongono se paa mólo.“ Aku-sipa na-kolo Karasinga yombo ono-kinia molemelema kanoko apurungí kinia peanga. Akumu paa sika ononga kongonomo. <sup>13</sup> „Karasinga yombo talapena, ultukundu molemele yomboma Pulu Yemone yuyu kanopa apurumba. „Aku-na-kolo ono Pulu Yemonga bokuna ungu se molemo mele piliangi niembo. Kanu ungumu i-sipa:“

‘Ono-kinia seluna kopu sepa molemo yombo sene  
uluma sepa kinjipa mindi sepa molomu liemu  
kanu yombo kirimu toko makoroko  
ultu mundangi.’  
nilimú, „aku mele pilku sangi.“

## 6

6:1-11

*Pollone Karasinga Yombomane Karasinga Yomboma Kote Naa Sendangi Nirimu Ungu Se*

<sup>1</sup> „Ono-kinia umbuna se pea pelemomonga kiniá ungu se niembo:“ Ono Karasinga yombomanga sene Karasinga yombo se-kinia umbuna se pelemo kinia nambi semu-na ‘Pulu Yemonga yombo kake selima pilku apurangi.’ naa nimba, ono mundupa kelepa ultukundu pumba „willisi-, kotena pumba kote sendele moye? Akumu pipili naa selemo-na aku sipa selemoye? <sup>2</sup> Molo „pe kote walemo wendo

ombá kinia, olio Pulu Yemonga yombo kake selimane ma-koleana yombomanga pali kote pilipu ulu selemelema apurumulúmu naa pilielememelemonga ,ultukundu pungu kote sendelemeleye? Sika olione pe aku sipu ma-koleana yombomanga kote pilimulú liemu kiniá nambi semu-na ononga kote kangama ono onono manda naa pilielememeleye? <sup>3</sup> Pe mulu-koleana angellomanga kotema olio pilimulú mele ono naa pilielememeleye? Sika pe angellomanga kotema pilimulú liemu ya ma-koleamanga ulu kangama manda sumbi sipu apurupu pilielemolo. <sup>4</sup> Pe ultukundu yombomanga kote pilingí liemu ono Karasinga yombomanga umbuna se wendo olemo kinia onone nambi semu-na 'Yombo koropa imbi naa molemoma.' ,konopu lemele yombo ultukundu molemele, yombomane 'kote pilindangi.' nilimiliye? <sup>5</sup> Nane 'Ono pipili kolangi.' nimbu aku nikiru. Ono 'Karasinga ungumu, sika.' ningu kuru mondolemele yombomanga ye sene ononga kotema apurupa pilimba ye pilipa kondoli peli ye se naa molemoye? <sup>6</sup> Ononga genu sene genu se ,willisi-,kotena memba pumba Karasi kuru naa mondolemele yombo ultukundu molemelena memba pumba nambi semu-na kote sendelemoye?

<sup>7</sup> Onone ononga yomboma kote sendelemele aku ulumuni ono Karasinga yomboma selemele mele naa seko molemelemo lipa ora silimú. Ononga yombo sene ononga yombo se ulu se sepa kinjilimú kinia kanu yombomo nambi semu-na we siye naa kololemeleye? Yombo sene yombo senga mélse kolo topa limú kinia nambi semu-na kanu yombomo we siye naa kololemoye? ,Ono seko kinjilimili mele we siye kololemolánje papu., <sup>8</sup> Aku-sipa na-kolo ono ,kote sendelemele yomboma, onono kolo toko mélema limili. Onono kepe genalima seko kinjilimili.

### 6:9-11

#### *Ulu Mare Seko Kinjilimili Yomboma Mulu-Koleana Naa Pungí Ungu Se (6:1-11 pali)*

9-10 Seko kinjilimili yomboma Pulu Yemo ye nokoli kingimu molopa nokolemo koleana sukundu manda naa pungí akumu ono naa pilielememeleye? I ungu nikirumu mimi siku piliaa. Paa kolo naa tokoro:

Wapora andoko tolemele yomboma kinia,  
we-mélema anjiku 'Olio nokolemele pulu yema.' ningu  
popo toko mélema kalko silimili yomboma kinia,  
ye senga ambomo molo ambo senga yemo kinia  
wa ulu-kirinale selemele yomboma kinia,  
yema onono ulu-kirinale seko, amboma onono  
ulu-kirinale seko, selemele yomboma kinia,  
wa noli yomboma kinia,  
yombomanga mélema kanoko yama meli yomboma kinia,  
no nongo amu toli yomboma kinia,  
yombomanga ungu-bulkundu nindeli yomboma kinia,  
kolo toko yombomanga mélema limili yomboma kinia,  
aku selemele yomboma Pulu Yemone ye nokoli kingimu molopa nokolemo koleana manda sukundu pungu naa molonge. Kanu ungumu 'kolo tokomo. Kanu uluma semolo kinia unguri naa sembá.' ningu naa piliangi. <sup>11</sup> U ononga yombo mare aku siku seko moloringi-na-kolo kiniá ,Pulu Yemone ononga ulu-pulu-kirima, kulumiye tondopa, 'Ono yunga yomboma manjiku kene kake selima molangi.' nirimu. 'Ye-Awili Yesusi Karasini sika olionga nimba kolali sepa kolondorumu.' ningu kuru mondoringimunga olionga Pulu Yemonga Minimuni ono kanopale ononga ulu-pulu-kirima siye kolopa, 'konopu sumbi nimba peli yomboma.' nimba kanolemo.

### 6:12-20

#### *Olionga Kangimu Mini Kake Sélimunga Ulkamo Kene Kangimuni Ulu Se Sepo Naa Kinjamili Ungu Se*

<sup>12</sup> „Ononga umbuna se pea pelemo akumunga ungu se niembo: Yombo marene ninguli: „‘Nane ulu se sambo.’ konopu liendu liemu manda sembó.” „nilimili. Akumu sika ungu-manemane pali ono naa nokolemo,-na-kolo ‘Ulu selemelemane pali ono naa lipa tapondolemo.’ nikiru. “Uluma pali sika manda sembó. Unku sene na manda pipi naa simba.” sika aku siku papu nilimili-na-kolo ‘Na mélsene tondolo mundupa nokopili. Na mélsenga kendemande-yemo molombo.’ naa nimbú.

<sup>13</sup> Yombo marene ninguli: “Kere-langima olomonga mindi. Olomo kere-langimanga mindi.” nilimili, akumu sika nilimili-na-kolo pe walte Pulu Yemone “Akuma pali mania pupili.” nimbá. „Onone kangimuni yakala kololemo uluma pali, wa ulu-pulu-kirinale uluma kepe we sengendo mindi aku siku nilimili-na-kolo, Pulu Yemone kangimu sepale “Kangimuni andoko wapora tangi.” ni naa nirimu. Kangimu Ye-Awilimunga; kangimu Ye-Awilimuni nokolemo. <sup>14</sup> Pulu Yemo yunga tondolomone Ye-Awilimu,nga kangi kololimu, topa makisinderimu, aku sipa mele olio,nga kangima, kepe pe topa makisindimbala. <sup>15</sup> Ononga kangima kinia Karasinga kangimu kinia ‘kangi selumu.’ ningu naa pilielemeye? Aku liemu na ,ono, Karasinga kangimu kinia ambo wapora tolimunga kangimu kinia lipu sere lendembo kinia mandaye? Paa manda mólo! <sup>16</sup> ‘Ye se ambo wapora tolimu kinia seluna pelembéle kinia olo kangi selumu.’ ningu naa pilielemeye? „Pulu Yemonga bokuna, aku sipa ungu se molemo kanumu. „Pulu Yemone nimbale: „Aku ambo yetolo „seluna pengelemonga, olo yombo kangi selumu molongele.”

nirimu kanumu. <sup>17</sup> Aku-na-kolo Ye-Awilim-kinia konopu senge sipa molomba yombomo yu-kinia mini selumu mele molomba.

<sup>18</sup> Wa ulu-kirinale seli ulumu kinia nondoko pungu naa molangi. Yombo sene we-ulul-pulu-kiri selemo akumane kangimu ungu se naa selemo, na-kolo yombo sene wa ulu-kirinale selemo kinia yunga kangimu yuyu sepa kinjilimú. <sup>19</sup> ‘Ononga kangima Mini Kake Sélimunga ulka suluminia kake sélimu. Pulu Yemone kanu Minimu ono sirimu litingi, ononga konopumanga molemo.’ ningu naa pilielemeye? Akumunga ono onono naa nokolemele; <sup>20</sup> „Pulu Yemone, méle paa awili sene ono topo topa lilitmu. Aku serimu kene ononga kangimane ,ulu selemelema, Pulu Yemonga imbimu ambolko paka tondoko kape niengi.

#### Kolomongo-Awili 7

### Pollone Yema Ambo Liku Amboma Ye Pulimilimunga Ungu Se Mane Sirimu Ungumu

#### 7

7:1-16

*Yema Ambo Liku Amboma Ye Pulimilimunga Ungu Se Pollone Nirimu Ungu Se*

<sup>1</sup> Kiniá onone na pepá toko sikuli mangilku pilieringi ungumanga pundu topo niembo:

„Ungu se mangilieringimunga i nikiru: „

Ye se ambo naa limú akumu peanga. <sup>2</sup> Aku-sipa na-kolo „ye ambo naa lili marene, amboma kinia wapora toko andolemele kene yema yu-melete-melete ambo liku, amboma yu-melete-melete ye pang. <sup>3-4</sup> Ambo sene yunga yemondo “Pea peambili.” nimbá kinia yemone “Manda. Pea peambili.” nipili. Aku sipala, ye sene yunga ambomondo “Pea peambili.” nimbá kinia ambomone “Manda. Pea peambili.” nipili. Akumu ambo yetolonga ulu-pulu se kanumu. Ye puli ambomone yunga kangimu yuyu mindi naa nokolemo; yunga kangimu menu yemongala. Aku sipala ambo lili yemone yunga kangimu yuyu mindi naa nokolemo; yunga kangimu menu ambomongala. „Akumunga, ambomone molo yemone “Pea peambili.” nimbá kinia sene “Mólo.”

nimbá aulka se naa lemó..<sup>5</sup> Ambo yetolo we molembele kinia yemone molo ambomone menundu "Seluna peambili." nimbá kinia menuni "Mólo." nimbá manda naa sembá-na-kolo olone konopu seluna pupili molkole "Wale mare seluna naa pepo, kanu walemanga Pulu Yemo kinia ungu nimbu mawa sepo molambili." ningu, ningu panjikuli kanu walemanga seluna naa pengele kinia unguri mólo. Pe "Seluna naa peambili." ningu, ningu panjingilí walema pora nimbá kinia 'Wale awisili "Mólo." nimbu seluna naa pembolo kinia ,kurumanga nokoli, Setenene olto omba kondi tomba kinia kangimu nokopo naa kondombolonje.' ningu kelko seluna peangili.<sup>6</sup> Nane aku nikirumu 'Ono lipu tapondambo.' nimbu nikiru. 'Onone ,ye pungu ambo liku, sangi.' nimba ungu-mane aku sipa se naa pelemo. <sup>7</sup> Aku-sipa na-kolo nane 'Peanga.' konopu lekero mele i-sipa: 'Na ,ambo naa lipu, we giliu mele yomboma aku siku yema ambo naa liku, amboma ye naa pungu, selemolánje peanga.' konopu lekero. Aku-sipa na-kolo Pulu Yemone ,yuyu konopumuni pilipale, yomboma tondoloma yu-melete-moke sepa silimú. 'Yombo se ulu se sepili.' nimba tondolo se sipa, 'Yombo se ulu se sepili.' nimba tondolo se sipa, aku sipa tondoloma yu-melete-moke sepa silimú limili.

<sup>8</sup> Ambo ye naa pulima kinia, ye ambo naa lilima kinia, ambo-wayama kinia, nane onondo i-sipu nikiru: 'Na ambo naa lipu we giliu mele ono aku siku we giliengi liemu peanga. <sup>9</sup> Aku-sipa na-kolo ye mare 'Ambo se pea pelembolánje paa peanga.' konopu lemele yema ambo língi liemu manda. Ambo mare 'Ye se pea pelembolánje paa peanga.' konopu lemele amboma ye púngi liemu manda. Kangimuni aku siku yakala kolko aku siku sengendo mindi konopu kímbu siku molonge kinia paa manda mólo. Aku senge yomboma yema ambo liku amboma ye pungu senge kinia peanga.' nikiru.

<sup>10</sup> Ambo yemando nane 'Ulu se sangi.' nimbu ungu-mane se sikiru. Akumu sika na nanu naa nimbu sikiru. Nimbu sekero akumu Ye-Awylimunga ungu-mane se. 'Akumu i-sipa:,' 'Ambomane ononga yema munduku naa keleangi. <sup>11</sup> Molo ambo se yunga menu yemo sika mundupa keliemu liemu ye se naa pumba kamu we molopili. Molo 'Kelepo ye pambo.' konopu liemu liemu yunga yemo molombana kelepa pupili, konopu seluna pupili molangili. Yema ononga amboma "Paa." ningu naa makorangi.' nikiru.

<sup>12-13</sup> Ambo ye maredo nane i-sipu pilipuli nikiru: 'Karasinga ye se yunga ambo limímu 'Karasinga ungumu sika.' nimba kuru naa mondolemo ambomo molemo-na-kolo 'Seluna molambili.' nilimú liemu kanu yemone yunga ambomondo "Pu." nimba naa makoropili. Karasinga ambo se ye pulimú yemo 'Karasinga ungumu sika.' nimba kuru naa mondolemo yemo molemo-na-kolo 'Ambomo-kinia kopu sepo molombolo kinia peanga.' konopu lemó liemu ambomo yunga yemo mundupa kelepa naa pupili.' nikiru. (Aku nikirumu nanu konopumuni pilipuli nikiru. Ye-Awylimuni ungu se nimu-na pilipuli naa nikiru.) <sup>14</sup> 'Nane aku nikirumunga pulumu i-sipa:,' 'Karasinga, ambo senga yemo 'Karasi sika.' nimba kuru naa mondolemo yemo Pulu Yemone kanopale ambomo-kinia seluna molembelemonga yemo kepe kanopa sewi anjimbala. 'Karasinga, ye senga ambomo 'Karasi sika.' nimba kuru naa mondolemo ambomo Pulu Yemone kanopale yemo-kinia seluna molembelemonga ambomo kepe kanopa sewi anjimbala. Aku sipa naa kanolkanje olonga bolangoma kepe kanopale 'Ono kalaro mololi bolangoma. Nanga mólo.' nimba kanolka. Aku-sipa na-kolo 'Karasinga ambomanga yema kinia Karasinga yemanga amboma kinia kanopa 'Nanga yombo kake selima.' nimba kanolemomonga, ononga bolangoma kepe kanopale 'Nanga bolango kake selima.' nimba kanolemóla.

<sup>15</sup> Aku-sipa na-kolo Karasi kuru naa mondolemele amboma kinia yema kinia yumele-melete konopumane pilkuli "Pu." ningu makoronge kinia molo onono ultu pulimili liemu pipi siku "Mólo." naa niengi. Aku senyi liemu Karasi kuru

mondoemele yema kinia amboma kinia ononga menupili kinia 'ka-ulkana mele peangi.' nimba ungu-mane se naa pelemo kene pang'i we siye kolangi. Pulu Yemone "Taka leko molangi." nilimúmunga , "Seluna naa molamili." níngi liemu ta ningu "Seluna kopu sepo molamili." naa niengi., <sup>16</sup> Karasinga ambo sene 'Nanga yemo konopu topele topa Karasinga yemo molombanje.' nimba yemo-kinia taka lepa molopili. Karasinga ye sene 'Nanga ambomo konopu topele topa Karasinga ambomo molombanje.' nimba ambomo-kinia taka lepa molopili. 'Taka leko molonge kinia ulu se wendo ombá mele ono naa pilieemele kene ungu se naa ningu taka leko molangi.,

*7:17-24*

*Olio Pulu Yemone "Molaa." Nirimu Mele Aku Sipu Molamili Ungu Se (7:1-40 pali)*

<sup>17</sup> „Ungu-pulu se pilipuli nikiru akumu i-sipa: „ Pulu Yemonga yomboma naa moloringi kinia u Ye-Awilimuni nimba taltopa 'Aku siku molangi.' nirimu-na onone yu-melete-melete aku siku molangi Pulu Yemone 'Ono nanga yomboma molangi waa.' nirimu mele kiniá kepe Pulu Yemonga yomboma molkole aku sikula molangi. Aku ungu-manemo Karasinga yombo talapema pali nimbu siliu.

<sup>18</sup> „I-sipu mele nikiru: „Pulu Yemone, 'Nanga yemo molani ou.' u naa nipili kanu yemo 'Juda yemo molemomonga yu, kangi se kopiseli ye se molomu liemu manda Pulu Yemone 'Nanga yemo molani ou.' nimbá kinia yuni 'Kangi kopiseli yemo molio mele naa molambo kene kangi kopiselmu kelepo sepo wamambo.' naa nipili. Molo ye se kangi se naa kopiseli ye se molopili Pulu Yemone 'Nanga yemo molani ou.' nimu liemu yu kelepa 'Kangi kopiseli ye se molambo kene kangi se kopisambo.' naa nipili. <sup>19</sup> Kangi kopisilimili ulumuni uluri naa selemo; kangi naa kopisilimili ulumuni uluri naala selemo. Pulu Yemone "Saa." nilimú unguma pilku liku selemene aku ulumu mindi tondolo se pelemo. Akumu mindi Pulu Yemone kanopa yomboma apurulimú.

<sup>20</sup> Aku kene Pulu Yemone 'Ono nanga yomboma molangi waa.' u naa nipili moloringi mele kiniá yunga yomboma molkole aku siku molangi.

<sup>21</sup> „Aku sipu nikirumunga ungu-pulumu i-sipa: „ Nu kongono we sendeli kendemande-yombo se molani Ye-Awilimuni 'Nanga yombomo molani ou.' nirimuye? Aku siku molorunumunga nunga konopuna umbuna se naa pepili. „Aku siku we seko molonu liemu unguri mólo.. „ Molo nu kendemande kongono naa seko we moloni aulka se wendo omu liemu manda nu aku siku wendo pungu we molani. <sup>22</sup> Yombo se kongono we sendeli kendemande-yombo se molopili Ye-Awilimuni 'Nanga yombomo molani ou.' nimu liemu kiniá yu Ye-Awilimunga we mololi yombomo molemo; kendemande kongonomo naa sendepa we molopili Pulu Yemone mangilierimu yombomo kiniá yu Karasinga kendemande kongono sendeli yombomo molemo kene „kendemande molemele yomboma konopumanga umbuna se naa pepili molangi.. <sup>23</sup> Pulu Yemone ono „pali, méle paa awili sene topo topa liltimu kene ono yombo senga kendemande kongonomo naa sendangi. <sup>24</sup> Ango-keme, Pulu Yemone u olio naa mangiliepili molorumulu mele kiniá aku sipu Pulu Yemone olio lipa tapondopa nokopili aku sipu molamilila.

*7:25-40*

*Ambo Ye Naa Pulima Kinia Ye Ambo Naa Lilima Kinia Kanu Yombomando Pollone Ungu Se Nirimu Ungumu (7:1-40 pali)*

<sup>25</sup> „Ono pepá toko na sikuli, ambo ye naa pulimilima kinia ye ambo naa limilima kinia senge mele mangilku pilieringi mele kiniá ungu se niembo: „ Aku mangilkimilimunga ungu se Ye-Awilimuni olio mane naa sirimu. Aku-na-kolo nanu konopumuni pilipuli 'Sangi.' konopu lekero mele niembo. Nimbú kinia Pulu Yemone na kondo kolopale 'Ungu sikama mindi andoko mane si.' nimba na tondolo sirimumunga kiniá nimbú mele pilkuli 'Sika nikimu.' ningu piliengi liemu manda. <sup>26</sup> „Na konopu lekero mele kanu yomboma onondo niembo: „ 'Kiniá walemonga

umbuna awisili wendo olemomonga ‚ambo ye naa pungu ye ambo naa lili, yomboma u molemele mele pe aku siku we molongi liemu papu.’ konopu lekero. <sup>27</sup> Nu ambo liltinu liemu ‘Ambomo pupili.’ nini aulka se naa koroyo. Molo nu ambo naa lili ye se molonu liemu ‘Ambo se liembo.’ ningu konopu kimbu naa sieni. <sup>28</sup> Molo nu ambo linu liemu ulu-pulu-kiri se naa seleno. Ambo wenepoma ye púngi liemu akumu ulu-pulu-kiri se naala selemele. Aku-sipa na-kolo ‘Amboma ye pungu yema ambo lingí kinia ono-kinia umbuna awisili wendo ombá.’ nimbu pilipuli ‘Aku ulu umbunama ono-kinia wendo naa opili kene aku siku naa sengi liemu papu.’ nimbu nikiru.

<sup>29</sup> Ango-keme, nane nikiru mele i-sipa:

Walema nondopa pora nimbá sekemo kene wale kanga-koltalo  
pekemoaku walemanga

ye ambo lilitane ambo naa lili yema mele molangi.

<sup>30</sup> Yombo kola selemelema

kola naa seli yomboma mele molko,  
konopu siku molemele yomboma  
konopu naa siku molemele yomboma mele molko,  
mélema topo toko limili yomboma yombo  
mélema naa taltoko we molemele yomboma mele molko,

<sup>31</sup> ma-koleana mélemane uluma selemele yomboma  
aku mélema konopu kimbu siku naa molangi.

Ya ma-koleamo kinia mélema kinia, kiniá lemó kanolemolo mélema, pora nimbá sekemo, ‚kelepaconde se wendo ombá sekemo kene aku sili yomboma mele molangi.‘

<sup>32</sup> ‘Méle awisilini ononga konopuma kundupa memba naa andopili.’ konopu lepole ‚aku sipu nikiru.‘ Ye ambo naa limúmuni Ye-Awilimuni kanopa peanga pilielemo uluma mindi sembando konopu kimbu silimú. ‘Ye-Awilimuni konopu sipili.’ nimba leku uluma mindi sepa molemo. <sup>33</sup> Aku-sipa na-kolo ambo limú yemone ya ma-koleamonga mélema konopu kimbu sipa, ‘Ambomo konopu sipili.’ nimba yu kanopa peanga pilimba uluma pilipa sepa molemo. <sup>34</sup> Aku selemomonga yu konopu talo sepa lipa mundulimú. Ambo ye naa puli molemelema kinia ambo-wenepoma kinia onone Ye-Awilimunga uluma mindi konopu kimbu siku molemele. Ononga kangikundu kepe minikundu kepe ‘Ye-Awilimunga méle kake sélimu liepili.’ ningu molemele. Aku-sipa na-kolo ambo ye pulimane ya ma-koleamonga mélema konopu kimbu siku, ‘Yema konopu siengi.’ ningu ononga yema kanoko peanga pilingí uluma seko molemele. <sup>35</sup> Nane ‘Ono molko kondoko, umbuna se naa pepili molangi lipu tapondambo.’ nimbu “Aku siku sangi.” nimbu nikiru. Ononga ulu senge aulkamo pipi simbundu naa nikiru. ‘Alieli Ye-Awilimunga uluma mindi konopu kimbu siku seko, ulu sumbi nilima mindi sangi.’ nimbu aku sipu nikiru.

<sup>36</sup> ‘Aku-sipa na-kolo, ye se ambo-wenepo se kanopale ‘Aku ambo-wenepomo limbu.’ nimba u nimba panjipale pe ‚Karasina yemo molopale, konopu topele topale ‘Naa liembo mangali naa limbu kinia ambomo sepo kinjimbunjé.’ nimba pilipale ambomo límu liemu unguri mólo. Molo yunga konopumuni ‘Ambomo paa lilka.’ konopu liemu liemu yu ambomo paa kamu lipili. Ambo kanumu kamu límu liemu aku sembamalu se sepaa naa kinjimba. <sup>37</sup> Molo ye sene ‘Ambo-wenepomo paa naa limbu.’ nimba yunga konopumuni tondolo mundupa pilimeliemu, ‘Ambomo paa lipili.’ ningí aulka se naa liemu liemu, yuni yunga kangimuni yakala kolombamo yuyu manda mimi sipa nokomu liemu, manda, yuni ambomo naa limba kinia yu kepe ulu akumu sepa kondombala. <sup>38</sup> Aku liemu ye sene ‘Ambo-wenepo se lipili.’ ningu u ningu panjingímu kamu límu liemu akumu sepa kondolemóna. Aku-sipa na-kolo ye sene ‘Ambo-wenepo se lipili.’ ningu u ningu panjingímu naa límu liemu ‚Ye-Awilimunga manjipa pilipa lipa molombamonga, akumu paa ulu olandopa peangamo.

<sup>39</sup> „Ungu-mane se i-sipa mele pelemo: „Ambo senga yemo u naa kolomba kinia yu yemonga menu molemo, pe ye se lupa manda naa pumbá. Aku-na-kolo menu yemo kolomba kinia ‘Ye se lupa pambo.’ konopu liemu liemu yu manda pumbá. ‘Ye se lupa naa pupili.’ ningu pipi singí aulka se mólo, na-kolo yu ye pumbámo Ye-Awilimu kuru mondomba ye se pupili. <sup>40</sup> Aku-sipa na-kolo na nanu i-sipu pilkiri: ‘Yu kelepa ye se naa pumu liemu yu paa awili sepa konopu sipa molomba.’ konopu lekero. Aku nikirumu ‘Pulu Yemonga Minimuni na “aku siku ni.” nikimu-na pilipuli i ungumu ono nimbu sikiru.’ konopu lekero.

*8:1—11:1*

## **Yombomane We-Mélema “Olio Nokolemele Pulu Yomboma” Ningü Anjiku Popo Toko Kere-Langima Kalko Silimili Kere-Langima Karasinga Yomboma Nonge Kinia Manda Molo Mólonje, Akumunga Ungu Se**

### 8

*Kolomongo-Awili 8*

#### *Pulu Yombo Kolo Tolima Mélema Popo Toko Kalko Siringimunga Ungu Se*

<sup>1</sup> Kiniá ultu molemele yombomane we-mélema anjiku “Olio nokolemele pulu yomboma.” ningu kere-langi popo toko kalko silimili kere-langimanga „ungu se ono Korini yombomane pepá toko na siku mangilieringimunga ungu se niembo: Ono marene, „Aku ulumu semolo mele, olio pilipa kondoli pelemo.” „nilimili.“ Akumu sikanje-na-kolo, ‘Pilipa kondoli’ aku ulumuni ‘Olio kála samili.’ nilimú; yomboma konopu mondoli ulumuni yomboma ‘Karasi sika.’ ningu kuru mondolemele ulumu sepa tondolo mundundulimú. <sup>2</sup> Ye sene ‘Na akumu paa pilipu kondolio.’ konopu lemó yemo yunga pilipa kondolimu mimi sipa u naa pelemo. <sup>3</sup> Aku-na-kolo ye sene Pulu Yemo konopu mondolemo kanu yemo Pulu Yemone yu paa kanopa imbi silimú. <sup>4</sup> Aku kene we-mélema anjiku “Olio nokolemele pulu yomboma.” ningu kere-langi popo toko kalko silimili kere-langima ‘Karasinga yomboma, nongemonga ungu se niembo: Ono-kinia olio pilielemolo, ‘Mélema anjikuli “Olio nokolemele pulu yomboma.” nilimili aku mélema sika mélse mólo; we kolo toko anjilimili. Pulu yombo awisili naa molemele; selu mindi molemo.’ akumu olio pilielemolo. <sup>5</sup> Molo yombomane “Pulu yomboma” ningu, “Yombo awilima.” ningu popo tolemele pulu yombo awisili na-kolo sika mulu-koleana molo ma-koleana sika molemolánje kepe <sup>6</sup> olio ‘Karasinga yombomane, pilkimulu, ‘Pulu Ye selumu mindi molemo. Yu olionga Lapa. Yu mindi mélemanga pali Pulu Yemo. Olio ‘yunga yomboma mindi molangi.’ nirimu-na yunga yomboma molemolo. Ye-Awili selumu mindi molemo, akumu Yesusi Karasi. Yuni mélema pali serimu; konde mololi ulu-pulumu yuni olio ‘mana-yomboma, silimú.’ nimbu pilielemolo.

<sup>7</sup> Akumu ‘olio mare pilielemolo,-na-kolo ‘Karasinga, yombo mare akumu naa pilielemele. ‘Karasinga, yombo marene kanu pulu yombo kolo tolima ‘Olio nokolemele pulu yombo sikama.’ ningu pilieringi mele kiniá kepe aku siku pilkuli, ultukundu yombomane we-mélema popo toko kere-langi kalko silimili kere-langi kanuma nongole, ‘Imu pulu yombo sikama popo toko kalongi.’ ningu pilkuli nolemele kinia ono mimi sipa konopu naa pelemo. Ono mimi sipa konopu naa pelemomonga ‘Sepo kondokoro molo sepo kinjikirunje.’ ningu konopu awisili kimbu sikuli ‘Kanu kere-langima nolemolomonga olionga konopukundu sepo kalaro mondolemolo.’ ningu pilielemele. <sup>8</sup> Aku-sipa na-kolo kere-langi nolemolo akumane olio Pulu Yemo molemona nondopa naa memba pulimú. Kere-langi naa nolemolo ulumuni Pulu Yemone olio kanopale ‘Ulu se seko kinjikimili.’ nimba kanomba ulu se naa selemo.

Molo kere-langi nomulu liemu Pulu Yemone olio kanopale 'Ulu se seko kondokomele.' nimba naala kanomba. 'Kere-langimane Pulu Yemone 'olio molko kondokomele molo molko kinjikimili.' nimba kanomba ulu se naa selemo..'

<sup>9</sup> Aku-sipa na-koło mimi siku kanaa! ‘Kere-langi se manda nomolo.’ konopu lekole nonge kinia unguri naa sembá-na-koło onone ‘Aku sipu semolo kinia Karasinga yombo se konopu tondolo naa pulimú yombo sene kanopale ‘Aku kere-langima nombó kinia sepo kinjimbu.’ konopu lemba kere-langima nombánje.’ ningu pilkuli ‘mimi siku pilku nangi.. <sup>10</sup> Ononga ,pilipa kondolemo yombo se, mélse ulka senga anjiku “Nanga pulu yombomo.” ningu popo tolemele mélemonga ulkana pumba pulu yombo kolo tolimu popo toko kere-langi kalko singí kere-langima nombá kinia ‘Karasinga, yombo se konopu tondolo naa pumba mimi sipa naa pilielemo yombo sene kanopale ‘Yu kere-langi akuma pumba nokomo mele na akumu nombó kinia unguri naa sembá.’ nimba pilipale yu kepe sukundu om̄ba kanu kere-langi pulu yombo kolo tolimu popo toko kalonge kere-langi mare nombála. <sup>11</sup> Ononga yombo se ‘Pulu yombo kolo tolima unguri mólo. Kere-langi popo toko aku mélemo silimili kere-langima unguri mólolá.’ nimba kere-langima nombámonga Karasinga yombo konopu tondolo naa pulimú yombomo, yunga genu, Karasi yunga nimba kolali sepa kolondorumu kanu yombomo, ‘Kamu ulu-pulu-kirima sepa, kamu mindili nomba molopa kinjimba.’ nimba kere-langima nombámonga Karasinga yombo konopu tondolo naa pulimú yombomo sekó kinjiku, yunga konopumu sekó sembambu silimili kinia Karasi sekó kinjilimilila. <sup>13</sup> Akumunga, kere-langi noliomane nanga genumu ‘molopa kinjepili.’ niliu liemu manda na aku kere-langima kelepo paa naa nombó. Nane ulu se sembomonga yu ulu-pulu-kirima sembá liemu na ulu akumu paa kamu naa nombó.

9

*Kolomongo-Awili 9*

*Yesusini "Nanga Kongonomo Sende-Paa." Nimba Lipa Mundorumu Yemane Manda  
Senge Mele Unku Se*  
*9:1-18*

*Yesusini Pollo "Kongono Sende-Pu." Nimba Lipa Mundorumu Yemo Molopa Kongono Serimumunga Méle Kaloli Se Naa Liltimumunga "Papu Naa Likiru." Nirimu Ungu Se*

<sup>1</sup> „Ono marene ‘Pollo Yesusini ‘Nanga kongonomo sende-pu.’ nimba lipa mundorumu ye se mólo.’ nilimilimunga ungu se niembo: Na molio mele ono kanolemele.‘ Ungu-mane sene molo ulu sene na manda nokopale sembó mele pipi simbaye? Na Yesusini ‘Nanga kongonomo sende-pu.’ nimba lipa mundorumu ye se naa molioye? <sup>1</sup> ‘Yesusini ye mare ‘Nanga kongonomo sende-paa.’ nimba lipa mundorumu yemane yu kanoringi.’ nikimili akumu, na olionga Ye-Awili Yesusi na naa kanorunduye? Nane Ye-Awilimunga kongonomo andopo senderindumunga ono Karasinga yomboma naa molemeleye? <sup>1</sup> Andopo naa sendelkanje yunga yomboma molemoláye? <sup>2</sup> Yombo marene ‘Na Yesusini ‘Nanga kongonomo sende-pu.’ nimba lipa mundorumu ye se mólo.’ konopu lemele-na-koło ‘onone aku siku ningú naa pilielemele.’ konopu lekero. Ono Ye-Awilimunga yomboma molemele ulumuni na Yesusini ‘Nanga kongonomo sende-pu.’ nimba lipa mundorumu yemo molio mele lipa ora silimúmunga <sup>1</sup> ‘Aku sipa yemo naa molemo.’ ningú pilingí aulka se mólo.,

<sup>3</sup> Nane ulu sepo molioma apurukuli, 'Aku sili ye se naa molemo.' ningu pilielemele, yombomando nane aku sipu pundu topo niembo: <sup>4</sup> "Olio Yesusini "Nanga kongonomo sende-paa." nimba lipa mundorumu yemane kongono sendelemolomonga, méle kalonge mele, no kinia kere-lang'i kinia namili siengi." nilimolánje 'Manda

mólo.' konopu lemeleye? <sup>5</sup> Yesusini "Nanga kongonomo sende-paa." nimba lipa mundorumu ye wema kinia, Ye-Awilimunga genupili kinia Pita kinia pea seringi mele na aku sipu Karasinga talapena ambo lipu pea andolkanje manda móloye? <sup>6</sup> Molo Banapas oltone mindi Ye-Awilimunga kongonomo andopo sendelembolomonga méle kalólimu naa lipu, Ye-Awilimunga kongonomo kinia kou-kongonomo kinia sere lepo sepo molembolomo 'Manda.' konopu lekemeleye? Yesusini lipa mundorumu ye wemane mindi Pulu Yemonga kongonomo selemelemonga méle kalolima limili mele Banapas olto aku sipu manda naa limbulúye?

<sup>7</sup> Ami-ye nawene ami-kongono sepale yuyu kere-langi korolemoye? No-waene kalia ye nawene sepale yunga waene-mongoma yuyu kepe naa nolemoye? Ye nawene kongi sipisipi ari sepale sipisipi ame naa nolemoye?

<sup>8</sup> Yombomane konopu lemele mele mindi pilipuli aku sipu nikiru mele sikala. Aku-sipa na-kolo aku nikiru mele ungu-mané se molemóla. <sup>9</sup> Ungu-mané se Mosisini ungu-manema sirimu bokuna torumu mele i-sipa:

'Rasi-witi mongoma wendo pupili.' ningu  
 kongi kaoma witi-unjuma  
 andoko kulungí kinia  
 'Ono witi mare naa nangi.' ningu  
 kerema pipi singí kinia  
 manda naa sembá kene pipi naa siengi.

'Kongi kaoma witi nonge senge kinia  
 'Ononga méle kalólimu papu nokomele.'  
 ningu siye kolangi.'

nirimu. Pulu Yemone aku sipa ungu-mané sirimumu kongima nokoko kondonge mele konopumuni pilipale aku sipa nirimuye? <sup>10</sup> Olio ,yunga kongonomo sendelelemolo yema, konopumuni pilipale kanu ungumu olionga ,pea, naa ninderimuye? Yombo sene kalia sembando ma akulimú yombomo kinia, ,rasi-witi kanu kaliana wendo ombo tolemo kinia, yombo sene ,lipa maku topa, rasi-witi kilu tolemo yombomo kinia, peatolo 'Semboló kinia kaliana kere-langima nombolo.' ningu kongono selembélé mele Mosisini olionga nimba bokuna aku sipa tondorumu. <sup>11</sup> Olione ononga minimanga kere-langi peangama andopo panjindilimulu kene onone olionga kangikundu kere-langima singí kinia manda móloye? ,Ononga minimanga kere-langi umbu tondorumulumunga olio liku tapondoko kere-langi silimolánje manda.., <sup>12</sup> ,We-ye marene ono ,Karasinga ungumu mane sikuli, "Méle kalaa." ningí kinia méle kalongi liemu onondo olione "Méle kalaa." nilimolánje onone olio paa méle manda naa kalolemoláye?

Sika "Méle kalaa." nilimolá kinia silimolá-na-kolo mundupu kelierimulu. 'Karasinga semane peangamo andopo topo simulú aulkamo pipi simba.' nimbu "Méle kalaa." naa nilimulu. 'Naa singí kinia ,kongono andopo semolomonga, we umbuna memolo kinia mandala.' nimbu siye kolorumulu. <sup>13</sup> ,Pulu Yemo popo toko kalolemele, ulka-tembele ,Jerusalleme gilimú, akuna kongono selemele yema ,Juda yombomane, Pulu Yemo kongi mélema silimili ulka-tembelena lemó kongi mélemanga mare liku nolemele mele naa pilielemeye? Pulu Yemo popo toko mélema kalolemele polona kongono selemele yema akuna kere-langi kalolemelemanga mare liku nolemele mele onone naa pilielemeye? <sup>14</sup> Aku sipa, Ye-Awilimuni ungu-mané sipa nimbale: "Semane peangamo andoko toko silimili yema aku selemelemonga semane peangamo pilku limili yombomane ononga kangikundu lipa tapondomba mélema siengi liengi." nirimu kanumu.

<sup>15</sup> Aku-sipa na-kolo ,Ye-Awilimuni, olio yunga kongonomo sendelelemolo yemane "Mélema siee." manda nimulú nirimu mele na ,aku sipu "Mélema siee." naa nimbu,

siye kololio. ‘Onone na sika liku tapondangi.’ nimbu i unguma i pepána naa tokoro. Onone na kongono seliomonga méle kaloli se naa silimili aulkamo pipi siku, méle sika kalolemolánje ‚Karasinga kongonomo we sendepo, méle kalólimu naa liumunga, nanga imbi ambolopo paka topo kape niliu aulkamo kepe pipi sindilimolá, akumu kiri. Na ‚mélema naa silimilimunga, kolondu liemu peanga. <sup>16</sup> Aku-sipa na-kolo ‚Ye-Awilimuni, na kongono sipale “Paa aku siku sei.” nimba na lipa mundorumumunga nane yomboma semane peangamo andopo topo siliumunga nanga imbi ambolopo paka topo nanu manda kape nimbu konopu simbú aulka se mólo. Semane peangamo andopo topo naa silkanje na paa molopo kinjilka. Pulu Yemone na umbuna lipa silka. <sup>17</sup> Nanu konopumuni pilipuli ‘Semane peangamo andopo topo siembo.’ nilkanje aku selkamonga yombomane na méle kalolemolá lillianje peanga. Aku-sipa na-kolo nanu konopumuni pilipuli i kongonomo naa selio. ‚Ye-Awilimuni, i kongonomo ‘Na sambo.’ nimba sirimu-na sepo kondoliomonga ‚ “Onone na méle kalaa.” nilkanje manda mólo. <sup>18</sup> Aku liemu na méle kaloli nambolkare limbuye? Nanga méle kaloli limbumu i-sipa: Semane peanga andopo topo siliumunga méle kalólimu naa lipu we andopo topo siliu akumu nanga méle kalólimu. Na Yesusini “Nanga kongonomo sende-pu.” nimba lipa mundorumu ye se moliomonga “Na méle kalaa.” nilka mele naa niliu akumu peanga; kongonomo we andopo sendeliomonga na konopu siliu ulumu nanga méle kalólimu.

**9:19-23**

*Pollo Yombomanga Pali Kongono Kendemande Sendeli Yemo Mele Molorumumunga  
Ungu Se (9:1-27 pali)*

<sup>19</sup> ‚Aku nikirumunga ungu se pea niembo:’ Na méle kalolima limbundu kongono naa selio. Na kongono seliomonga yombo sene molo ulu sene na naa nokolemo; na yombo senga kendemande sendeli ye se mólo. Sika aku sipu molio-na-kolo na konopumuni pilipuli yombo awisili ‚Karasinga talape molemelena, membo pumbúndu ‘Yombomanga kendemande sendeli yemo mele molambo.’ nimbu molio. <sup>20</sup> Juda yomboma kinia molopole ‘Ono ‚Karasinga talapena, lipu membo sukundu pambo.’ nimbili Juda yomboma molemele mele na aku sipu molio. Mosisini ungu-mane sirimumane ‚sika kiniá na naa nokolemo,-na-kolo ‘Ungu-manemane nokolemo yomboma lipu membo pambo.’ nimbili na kanu yomboma kinia molopole ono molemele mele molio. <sup>21</sup> Mosisini sirimu ungu-manemane naa nokolemo yomboma kinia molopole, ‘Ono ‚Karasinga talapena, lipu membo sukundu pambo.’ nimbili kanu yombo ungu-manemane naa nokolemo yomboma mele molio. Aku-sipa na-kolo ‘Pulu Yemonga ungu-manemane kiniá na naa nokolemo.’ nimbu naa nikiru. ‚Karasinga ungu-manemane na nokopili.’ nimbu, pilipu lipu selio ‚akumunga Pulu Yemonga ungu-manemane sika na nokolemola.’ <sup>22</sup> Konopu tondolo naa pulimú yomboma kinia molopole ‘Ono lipu membo pambo.’ nimbili na konopu tondolo naa puli ye se mele molopo ‚ononga konopuma sepo sembambu sipu ulu mare naa selio.’ ‘Yombo mare ‚Karasinga talape molemelena, lipu membo pambo.’ nimbili na yombo lupa-lupama pali molemele mele na aku sipu molopole ulu lupa-lupama selio. <sup>23</sup> Nane selio uluma pali, ‚Karasinga, semane peangamo tondolo pupili.’ nimbili aku sipu selio. Semane peangamone “Pulu Yemone olio sepa kondopa méle peanga taltondolemoma simba.” nilimú mélema na pea sepa kondopa sipili limbundu uluma selio mele selio.

**9:24-27**

*‘We Simba Mélemo Liemili.’ Nimbili Tondolo Mundupu Lisipu Pamilimunga Ungu Se (9:1-27 pali)*

<sup>24</sup> ‚Aku seliomonga ungu se niembo:’ Méle peanga se taltolemelemo lingíndu ‚ówa toko panjilimilina, yombo awisili keru-kuru liku aulka lisiku pulimili-na-kolo

yombo selu kumbi lepa pulimúmuni mindi kanu mélemo pumba limú akumu ono naa pilielemeye? Aku kene ono aku siku ‘Pulu Yemone, méle simbama liemili.’ ningu keru-kuru liku tondolo munduku lisangi. <sup>25</sup> ‘Méle kaloli singímu limulú.’ konopu lemele yombomane ono keru-kuru liku lisiku kondongendo walemo u wendo naa opili ononga kangima ‘pe nipili.’ ningu manda manjiku lisilimili. Aku-sipa na-koło ono keru-kuru liku lisikuli limili mélema nondopa kiri lemó. Olio keru-kuru lipu limulú méle kalólimu pe kiri naa lepa alieli lepa mindi pumbá mélemo. <sup>26</sup> Aku nimbu pilipuli, yombo mare we andoko lisilimili mele naa selio. ‘Méle kalólimu liembo kene ówana sumbi sipu pambo.’ nimbu paa tondolo mundupu lisiliu. Ye talo ki-lumunale selembele kinia ye sene ye se tombando ki-lumuni wena naa topa, tondolo mundupa enge nimba kangina sumbi sipa tolemo mele naaku sipu tondolo enge nimbu selio. <sup>27</sup> Nanga kangimu paa tondolo mundupu nokopo ‘Nanga kendemande-kongono sendélimu molopili.’ niliu. ‘Semane peangamo yomboma topo silipu andopole, pe na nanu ‘sepo kondopo naa molombomonga, méle kalólimu naa simba naa limbunje.’ nimbili ‘na aku sipu nanga kangimu tondolo mundupu nokopo molio.’

## 10

10:1-14

*Isirele Yombomane Seringimunga Ulu Umbuna Mare Wendo Orumu Mele Pilkuli  
‘Aku siku Naa Sangi.’ Nimba Liepi-Liepi Torumu Ungu Se*

<sup>1</sup> Ango-keme, ‘Sepo molamili.’ nikirumunga ‘ungu se pea niembo:’ Olionga anda-kolepalimane ‘seringi mele pilipuli ‘Aku sipu naa sepo molamili.’ nikiru. Onone, seringi mele kelko mimi siku piliangi niembo. ‘Kolea Isipi ka-kongono seko molko Isipi munduku kelko wendo ongole niringimuni, Pulu Yemone ono nokombando kupana sukundu molorumu, kupana maniakondo molko, nomu ‘Kondoli’ nili, akuna ‘oringi kinia akumu ekendo ekendo pumba pala mele serimu, aku nomu, awi-suku-singina olionga anda-kolepali yomboma aulka lierimuna kimbukongono seko ongo purungi kanumu. <sup>2</sup> ‘Olio Karasi lombili pulimulu. Yunga yomboma kamu molamili.’ nimbu no limulú mele, olionga anda-kolepalima Mosisinga yomboma molko yu-mindi lombili pungíndu kupana sukundu pungu, nomuna purungi akumu no liltingi none serimu. <sup>3</sup> ‘Kolea ku lielina pungí purungi kinia, Pulu Yemone kere-langì sirimumu ono pali nongo, <sup>4</sup> Pulu Yemone ‘kou senga, no sirimumu ono pali norangi. Kanu koumu, Pulu Yemonga koumu, kanumu ono-kinia kopu sepa purumu, kanu koumu Karasi yu. <sup>5</sup> ‘Pulu Yemone aku sipa ono nokorumu, yu ono pea purungi,-na-koło ono awisilini ‘seringi mele, Pulu Yemone kanopa kiri pilipa ‘Kolangi.’ nirimumunga, kolea ku lielina kolea lupa lupamanga ononga ónoma lierimu.

<sup>6</sup> ‘U Isirele yombomane ulu-pulu-kirima sengendo konopu siku moloringi mele olio kiniá aku sipu naa molamili.’ nimba Pulu Yemone ‘Ono seringi mele semanema bokuna molopili tangi.’ nirimu.

<sup>7</sup> U we-mélemando ‘Olio nokolemele pulu yomboma.’ ningu ambolko popo toko moloringi mele naa molayo. Aku siku seringimunga Pulu Yemonga bokuna ungu se molemo mele i-sipa:

‘Yombomane we-mélse anjiku akumundu  
“Olio nokolemo pulu yombomo.” ningu  
popo toko kaloringi mélemo  
‘Olio kanopa peanga piliepili.’ ningu  
kanumunga kumbikerena mania molko  
kere-langì nongo no nongole

ola gilku au nengu uluma seringi.'  
nimba molemo mele naa sayo.

<sup>8</sup> U yombo mare wapora toko wa ulu-kirinale selko andoringi mele ono naa sayo. U aku siku seringi kinia Pulu Yemone waltikele yombo tuwendi tere tausini torumu koloringi.

<sup>9</sup> Ye-Awilimu ,sika olio kondo kolopa taka lepa molopa popenge sepa mumindili naa kololemo-na-kolo, 'Yu aku sipa molemo molomba.' nengu 'Yunga ungumu mokoli sepo olio konopumane pilielemolo mele sepo molamili.' nengu aku siku naa nieyo. U yombo mare aku siku nengu moloringi kinia Pulu Yemone wambiyema ono moloringina lipa mundorumu, akumane ono nongo kondoringi kinia koloringi kanumu.

<sup>10</sup> U yombo mare Pulu Yemo iri toko 'Yu olio-kinia sepa kinjilimú.' niringi mele ono aku siku naa sayo. U aku siku seringi yomboma Yombo Topa Kondoli ,Angello,mone topa kondorumu.

<sup>11</sup> I ulu wendo orumuma we wendo naa orumu. 'U aku seringi uluma mele yandopa semanema pilkuli aku siku naa sangi.' nirimu-kulu i uluma wendo orumu. U aku uluma seringi kinia Pulu Yemone ono mumindili kolopale topa kondorumu. Kiniá 'Yandopa yomboma kanokole aku siku naa sangi. Aku siku senge kinia sembó mele kanangi liepi-liepi topo lipu ora siembo.' nimba 'Aku semanema bokuna tondaa.' nirimu-kulu bokuna tondoringi molemo. 'Yandopa yombo' nikiruma olio molamili kolea pora nimbá walema wendo ombá yombo akumando nikiru.

<sup>12</sup> Aku kene 'Olio konopu tondolo pepili molemolo. Ono seringi mele aku sipu manda naa semolo. Pulu Yemone na kanopa peanga pilielemo.' nengu molonge yomboma kanoko kondoko molangi. 'Kurumanga nokoli Setenene 'Ono ulu-pulu-kirima sangi.' nimba kondi tomba kinia, ono 'Ulu-pulu-kirima semolonje.' nengu pilku kanoko kondoko naa molongi liemu paa sika ulu-pulu-kirima senge. <sup>13</sup> Ono kondi tolemo ulumu kepe yombo lupama pali kondi tolemo uluma kepe kondi tolemo uluma lupa lupa mólo, selu-sipa mele mindi. Pulu Yemone olio lipa tapondombando waltikele kepe siye naa kolopa, olio pilipa kanopa mindi molopa nokolemo. Ono 'ulu sene, kondi tomba kinia kondi tomba yomboma Pulu Yemone 'Ononga engemo mania pupili. Kondi tolemo ulumunga engemo olandopa pumba yomboma topa mania mundopili.' nimba naa molemo. Ono ,mélse, kondi tomba sembá kinia ono kowa pungí aulka se akisindimba. Ono ,ulu sene, kondi tomba kinia 'Ono kamu naa lipili, enge niengi.' nimba yuni aku sembá.

10:14—11:1

### *Pulu Yemo Kinia Kuruma Kinia Sere Lepo Manda Naa Popo Tomolo Ungu Se*

<sup>14</sup> Na konopu mondolio yomboma, 'ono naa kanoko kondokole ulu-pulu-kiri se senge, kene we-mélemando 'Olio nokolemele pulu yomboma.' nengu popo toko kalolemele méle akuma bulu siku, aku selemele koleama munduku kelko kowa pangí.

<sup>15</sup> Nane konopu tondolo pelemo yombomando nikiru kene nikiru mele onono pilku apurayo. <sup>16</sup> Yesusi Karasini "Imu liku naa." nirimu mele pilipuli pellawa-berete kinia no-waene kinia nomolondo, Pulu Yemone sepa kondolemo no-waenemo "Ange." nimbu nombole nilimulumuni, Karasini olionga nimba yunga meme ondopa kolondorumu mememo-kinia lipu sere lepo molemolo kanumu. Pellawa-berete pikimaka lepo nolemolo kinia Karasinga kangimu-kinia lipu sere lepo molemolo kanumu. Sika nikiru molo móloye? <sup>17</sup> Akumunga, berete selumu mindi nolemolomonga olio ,kinia Karasi kinia, kangi selumu mele molemolo. Yombo awisili molemolo-na-kolo berete selumu, olio yomboma kangi selumula.

<sup>18</sup> Isirele yombomane ulu se pilku selemele mele piliame: Pulu Yemo popo toko kongi mélema kalko silimili kinia Pulu Yemo kaloli kongi mélema ongo nolemele

yomboma kinia, Pulu Yemo popo toko kongi mélema kalolemele yomboma kinia, ono pali konopu seluna pupili Pulu Yemo popo toko kalko molemele kanumu. <sup>19</sup> „Aku-sipa na-kolo,“ aku nikirumunga ‘Kouma kinia unjuma kinia liku anjiku ‘Ima olio nokolemele pulu yomboma.’ ningu kere-langima popo toko kalolemele langimane unguri selemo.’ konopu lepole nikiruye? Molo ‘Kanu kouma kinia unjuma kinia akumane unguri selemo.’ konopu lepole nikiruye? <sup>20</sup> Paa mólo! „Aku sipu konopu lepole naa nikiru.

Nikiru mele i-sipa: „Ultu molemele yombomane ‘we-mélema, popo toko kalolemele kinia kuruma manjiku koyoko indima siku Pulu Yemo naa silimili. „Waltikele Pulu Yemo kinia kuruma kinia liku sere leko indima manda naa singí. Kuruma lupala, Pulu Yemo lupala,“ ‘Ono kuruma pea kopu seko naa molonge kinia peanga.’ konopu lekero. <sup>21</sup> Ye-Awilimunga no-waenemo kinia kere-langimu kinia nongo, kurumanga kere-langima nongo, liku sere leko walte senga pungu nongo walte senga pungu nongo, aku manda naa senge. Ye-Awilimunga kere-langi polona kinia kurumanga kere-langi polona kinia, walte senga pungu nongo walte senga pungu nongo senge manda naala sembá. <sup>22</sup> Molo “Ye-Awilimuni olio konopu kiri panjepili.” niemiliye? Yunga tondolomo maniandopa, olionga tondolomo olandopaye? „Aku sipa mólo kene yu manjipu pilipu konopu mondopo molamili..“

**10:23—11:1**

*Alieli Selemolo Ulumane Pulu Yemonga Imbi Ambolko Paka Tondamili Ungu Se (10:14—11:1 pali)*

<sup>23</sup> „Yombo marene ninguli:“ „Olio Karasinga yombomane, uluma pali manda semolo. ‘Mólo!’ nimbá ungu-mané se naa pelemo.“ „nilimili.“ „Aku sika ungu-manemane olio naa nokolemo,-na-kolo aku ulumanga pali mare selemolo kinia aku ulumane olio lipa naa tapondolemo. “Selemolo uluma pali ungu se mólo.“ nilimilimu sika nilimili-na-kolo aku ulumanga pali mare selemolomane olio „Karasinga yomboma molomolo mele, sepa tondolo naa mundundulimú. <sup>24</sup> „Olio Karasinga yombomane,“ Nanu mindi manda molopo konopu simbú uluma sambo.” ni naa niemili. „Olionga, genupili molko kondonge uluma samili.

<sup>25-26</sup> „Akumunga ulu se i-sipa mele:“ Kere-langi makete selemele koleana punguli “I kere-langimuni kuru koyonginje? I kere-langimuni we-mélse anjiku ‘pulu yombo se’ ningu popo tonginje?” ninguaku siku kere-langima naa pilku apuruku, we ‘topo toko, liku nangi. „Akumunga ungu se Pulu Yemonga bokuna molemo, akumu i-sipa:“ ‘Mamo kinia mana lemó mélema pali kinia,

akuma pali Ye-Awili Yawenga.’

„nimba molemo. Pe mélema pali Pulu Yemonga, kene kere-langima pali konopu kimbu siku naa nangi. We walu nangi.

<sup>27</sup> Karasi naa pilieli yombo sene onondo “Kere-langi pea namili waa.” nimbá kinia ‘Pamili.’ konopu liengi liemu aku manda. Ungu se mólo. Pungí kinia singí kere-langima pali walu nangi. Konopumane pilkuli, ‘Imu manda nomolo molo i kere-langimuni kolo toli pulu yombo se popo tongi liemu nomolo kinia manda naa sembá.’ ninguaku siku konopu kimbu naa siengi. Kere-langi singíma ungu se naa mangilku walu liku nangi. <sup>28-29</sup> Aku-sipa na-kolo yombo sene onondo nimbale: “I kere-langimu pulu yombo se popo topo kalomulu.” nimbá molo “I kere-langimu kuru koyomulu.” nimu liemu manda “Akumu nomolo kinia olio nimba sikimu yombomone ‘Onone pilku selemele mele olio aku sipu pilielemolo.’ konopu lemba.” ningu pilkuli naa nangi. Sika onono konopumane ‘Unguri mólo.’ ningu pilielemelena-kolo kanu nimba simba yombomone ono Karasinga yombomane aku kere-langima pilku kanokole nonge kinia kanopale yuni konopumuni pilipale ‘Nane we-mélema popo tombo kinia ungu se mólo.’ nimba pilimba. Akumu manda naa sembá.

„Aku-sipa na-kolo ononga yombo sene mangilipa pilipa nimbale: „Nane ‘Ungu se sambo.’ nimbuli ‘Aku sembó kinia yombo sene ungu sembomonga pilipa sundupale kelepa yuyu pilipa sepa kinjimbanje.’ nimbu ungu sembóma pilipu apurupu, mare sepo mare siye kolopo naa sepo nambi semu-na sembonje? Sembó mele nambi semu-na nanu manda naa pilipu sumbi sipu semboye? <sup>30</sup> „Pulu yombo kolo tolima popo toko kalonge, kere-langima yombo mare kinia pea kere-langi nombo molomolo kinia Pulu Yemondo “Ange.” nimbuli nombó kinia yombo sene nane sembó mele yunga konopumuni apurupa pilipale nando “Seko kinjikinu.” nambi semu-na nimbáye? „Pulu Yemondo “Ange.” nimbuli nombó kere-langimanga ungu se mólo. Aku sembomonga yombo sene nando ungu se nimbá kinia mandaye?,” nimba mangilipa molemonje?

<sup>31</sup> Akumunga, „ononga yombo sene aku sipa nimba mangilimbamonga ungu se pundu topo niembo:“ Onone kere-langi nonge molo no nonge molo ulu se senge kinia aku ulu sengema pali sengendo ‘Pulu Yemo kape nimbu yunga imbi ambolopo paka tondamili.’ ninguaku uluma sangi. <sup>32</sup> Juda yombomane kanoko kiri pilielemene uluma naa seko, Juda yombo naa molemele yombomane kepe kanoko kiri pilielemene uluma naala sangi. Karasinga yombo marene kanoko kiri pilielemene uluma kepe naala sangi. Nuni sení mele yombo sene kanopale yuni sepa kinjimba ulu se naa sani. <sup>33</sup> ‘Nane sembomonga yomboma pali manda molangi.’ nimbu uluma pali pilipu apurupu selio mele, aku siku „sangi.“ ‘Nane sembomonga na manda molambo.’ molo ‘Sembomonga na imbi ola molopili.’ molo ‘Sembomonga na méle awisili taltambo.’ aku sipu naa nimbu, ‘Nane sembomonga yombo awisili Pulu Yemone lipa tapondopa mindili nolemolá aulkana wendo lipa yu-kinia pea molko kondonge aulkana lipa mondopili.’ nimbu uluma pilipu apurupu selio „mele onone aku siku sangi.“

## 11

<sup>1</sup> Na Karasi sepa molorumu mele pilipu manda manjipu molio mele ono aku siku na sepo molio mele kanokole manda manjiku molangi.

*11:2—14:40*

### Pulu Yemonga Mini Kake Sélimuni Olio Tondoloma We Silimú Mele Kinia, Maku Topo Pulu Yemo Popo Topo Kape Nimbu Imbi Ambolopo Paka Tondopo Kondomolo Mele Kinia, Akutolonga Ungu Se

*11:2-16*

*Maku Toko Pulu Yemo Popo Toko Kape Ningu Imbi Ambolko Paka Tondongendo Ononga Pengena Mélseñe Aki Toko Pakongemondo Nirimu Ungu Se*

<sup>2</sup> Alieli na „ono-kinia molopole serindu mele, konopu kimbu siku, ungu-mane sirinduma tondolo munduku ambolko selemelemonga ono kape nimbu “Paa seko kondolemele.” nikiru.

<sup>3</sup> Aku-sipa na-kolo kiniá „ungu se pea, ono piliangi niembo: „Pulu Yemo popo toko kape ningíndu i-siku sangi;“ Amboma ononga pali nokolima ononga yema; yemanga pali nokolimu Karasi; Karasinga nokolimu Pulu Yemo. Akumu pilku kondangi. <sup>4</sup> „Ono maku toko molemele kinia, ononga ye sene Pulu Yemo kinia ungu nimbá molo Pulu Yemone ungu-umbu tondomba ungu se pilipa yomboma nimba simbando yunga pengemo aki tomu liemu yunga nokoli „ye Karasi, sepa kinjilimú. <sup>5</sup> „Ono maku toko molemelena, ambo sene Pulu Yemo kinia ungu nimba mawa sembá molo Pulu Yemone ungu-umbu tondomba ungu se pilipa yomboma nimba simbando yunga pengemo aki naa tomu liemu „yu ye pulimúmu, yunga nokoli „ye Karasi, ‘Pipili kolopili.’ nimba sepa kinjilimú. Penge aki naa tolemo akumu ambo se penge

porolimu molemo mele, *yu* *aku* *sipa* *ambo* *se* *mele* *molemo*. <sup>6</sup> *Ambo* *se* *yunga* *pengemo* *aki* *naa* *tomu* *liemu* *manda*, “*„Yunga yemo lipa awi naa silimú lepomo.*” *nimba*, *yombo* *sene* *yunga* *pengemo* *kolomongo* *sepa* *ponjinddepili.*” *nipili*. *Molo* *ambo* *senga* *pengemo* *kolomongo* *senge* *molo* *poronge* *kinia* *aku* *siku* *sengemonga* *yu* *seko* *pipili* *kondonge* *liemu* ‘*Na* *pipili* *naa* *sepili.*’ *nimba* *yunga* *pengemo* *aki* *topili*. <sup>7</sup> *Yemo* *yu* *Pulu* *Yemo* *none* *sepa*, *Pulu* *Yemo* *imbi* *molopa* *tondolo* *pupili* *molemo* *mele* *lipa* *ora* *silimú* *kene* *yunga* *pengemo* *aki* *naa* *topili*. *Aku-na-kolo* *ambomo* „*yunga* *pengemo* *aki* *tolemo* *kinia* *yunga* *yemone* *yu* *nokolemo*, *yuni* *yemo* *pilipa* *molemo* *mele* *lipa* *ora* *silimúmunga*, *yuni* *yemonga* *imbimu* *ambolopa* *paka* *tondolesmo* „*kene* *yunga* *pengemo* *aki* *tomba* *kinia* *papu.*” <sup>8-9</sup> *Pulu* *Yemone* *ambomonga* *kangi* *se* *wendo* *lipale* *yemo* *naa* *serimu*. *Yemonga* *kangi* *se* *wendo* *lipale* *ambomo* *serimu*. ‘*Yemone* *ambomo* *lipa* *tapondopili.*’ *nimbale* *yemo* *naa* *serimu*. ‘*Ambomone* *yemo* *lipa* *tapondopili.*’ *nimbale* *ambomo* *serimu*. *Akumunga*, „*Ambomone* ‘*Na* *yemone* *nokopili*. *Yunga* *imbi* *ola* *molopili.*’ *nipili.*’ *nikiru.*” <sup>10</sup> *Aku* *kene* „*ono* *maku* *toko* *molongena*, *ambomo* „*Pulu* *Yemo* *kinia* *ungu* *nimbá* *molo* *Pulu* *Yemonga* *ungu* *se* *yomboma* *nimba* *simbando*, *yunga* *pengemo* *aki* *topili*. *Aku* *sembá* *kinia* *kanokole* *angellomane* ‘*Yuni* *yunga* *yemonga* *unguma* *pilipa* *lipa* *molemo.*’ *ningu* *kanonge*.

<sup>11-12</sup> *Aku-sipa* *na-kolo* *ono* *Ye-Awilimunga* *ambo* *ye* *molemelema* „*seluna* *kopu* *seko* *molonge* *kinia* *peanga.*” *Amboma* *onono* *ulu* *mare* *seko*, *yema* *onono* *ulu* *mare* *seko*, *molonge* *kinia* *manda* *naa* *sembá*. *Ambomane* *yema* *liku* *tapondoko*, *yemane* *amboma* *liku* *tapondoko*, *selemele* *kinia* *peanga*. *Sika* „*Pulu* *Yemone*,” *u-pulu-pulu* *ambomo* *yemonga* *kangimuni* *serimu*, *na-kolo* *kiniá* *yema* *ambomonga* *kangina* *wendo* *olemele*, *na-kolo* *ono* *pali* *Pulu* *Yemone* *selemo* *akumunga* „*amboma* *kinia* *ononga* *yema* *kinia* *aku* *siku* *seluna* *sere* *leko* *molemele* *kinia* *peanga.*” <sup>13</sup> *Ulu* *se* *onono* *apuruku* *piliangi*: „*Ono* *maku* *toko* *molongena*, *ambo* *sene* *yunga* *pengemo* *aki* *naa* *topa* *Pulu* *Yemo* *kinia* *ungu* *nimbá* *kinia* *peangaye?*” <sup>14</sup> *Yombomane* „*ononga* *pengema*, *selemele* *mele* *olio* *semolo* *mele* *lipa* *ora* *silimú*. ‘*Ye* *se* ‘*yunga* *penge-indi* *omba* *sulu* *pupili.*’ *nimbale* *siye* *kololemo* *kinia* *aku* *selemomone* *yuyu* *sepa* *pipili* *kondolemo.*’ *nimbu* *pilielemolo.* <sup>15</sup> *Aku-na-kolo* ‘*Ambo* *sene* ‘*yunga* *penge-indi* *omba* *sulu* *pupili.*’ *nimbale* *siye* *kololemo* *kinia* *aku* *selemomone* *yuyu* *sepa* *kondopa* *yunga* *imbi* *ambolopa* *paka* *tolemo.*’ *nimbu* *pilielemolo*. *Pulu* *Yemone* *ambomonga* *penge-indi* ‘*we* *omba* *sulu* *pumba* „*yunga* *pengemo*, *aki* *topili.*’ *nimba* *silimúmunga* „*we* *omba* *sulu* *pulimúmu* *papu.*” <sup>16</sup> *Yombo* *sene* *ya* “*Sangi.*” *nikiru* *mele* *pilipa* *kiri* *pilipale* “*Kolo* *tokomo*. *Nikimumu* *lawa* *sepa* *nimba* *kinjikimu.*” *nimba* ‘*Na-kinia* *angelema* *niembo.*’ *nimu* *liemu* *kanu* *yombomo* *i* *ungumu* *piliepili*: *Olio* *selemolo* *mele* *lupa* *mólo.* „*Koleamanga* *pali*, *Pulu* *Yemonga* *yombo* *talapemané* *kepe* *aku* *sikula* *selemele*. *Akumu* *piliepili.*

**11:17-34**

*Yesusi Kolombando Yunga Lombili Andolima Pea Kere-Langi Noringi Mele Pilipuli Kopu Sepo Molopo Kere-Langi Nomolondo Sepo Kondomolo Mele Ungu Mare*

**11:17-22**

*Korini Yomboma Ye-Awilimu Kinia Kopu Seko Kere-Langi Nongo Molongendo Seko Kinjeringi Mele Ungu Se (11:17-34 pali)*

<sup>17</sup> *Onone* *kiniá* *ungu* *se* *selemelemonga* *nane* *ono* *mane* *simbundu* *cape* *nimbu* *taka* *lepo* *mane* *simbú* *naa* *sekero*. „*Liku* *maku* *toko* *Ye-Awilimuni* *nimba* *taltopa* “*Nanga*” *nirimu* *kere-langima* *nongo* *molongendo* *maku* *toko*, *ulu* *mare* *senge* *mele* *niembo*: *Ono* *maku* *toko* *molko* *selemele* *ulumane* *ono* *lipa* *tapondopa* ‘*Konopu* *tondolo* *pupili* *molangi.*’ *nilimú* *ulu* *se* *naa* *pelemo*. *Ono* *maku* *toko* *molcole* *seko* *kinjiku*, *molko* *kinjingí* *uluma* *mindi* *selemelemonga* *nane* *ono* *cape* *nimbili* *naa* *nikiru.*” <sup>18</sup> *U kumbi* *lepo* *nane* *i-sipu* *nikiru*: ‘*Ono* *Karasinga* *yomboma* *maku* *toko* *molcole* *ono* *konopu*

talo yopoko mele liku mundukuli talape lupa-lupa ningu molemele mele.' ningu silimili pilielio 'akumu mare sika nikimili.' nimbu pilkiru. <sup>19</sup> Ono konopu talo yopoko mele liku mundukuli talape lupa-lupa ningu molemele ulumane ono mare Karasinga yomboma sika molko yunga ungumu tondolo munduku piliemele mele lipa ora silimúmunga, 'ono mare sika aku siku molko kinjilimili.' konopu lekero. <sup>20</sup> 'Ye-Awilimunga imbimu ambolopo paka tondopo yu kape nimbu, yu kinia kopu sepo kere-langi namili.' ningu maku tolemele-na-ku sika aku siku kere-langi naa nolemele. <sup>21</sup> Ono 'yomboma pea kere-langi nonge kere-langima mengo ongole, 'Yomboma pali u wang.' ningu nokoko naa molko, onone yu-mele-mele kere-langima nolemele. 'Aku selememonga, yombo mare koropa molememonga kere-langi se naa mengo pe olemele yomboma, gelene kololemele; yombo mare no-waene awisili nongo amu tolemele. Aku selememonga pilipuli, "Ye-Awilimun kinia kopu seko kere-langima naa nolemele." nikiru. <sup>22</sup> 'Akumu nambi semu-na selemeye?' Ono 'alieli, no nongo kere-langi nonge ulkama naa gilimúye? 'Ye-Awilimunga yombo talapemo kanopo kiri pilipu lipu awi naa sipu, Ye-Awilimunga yombo mare mélema mólo tolemo yomboma sepo pipili kondamili.' nimulú kinia peanga.' konopu leko aku siku selemeye? 'Aku selememonga, nane ono nambolka unguri niemboye? Ono 'aku selememanga, "Papu sekemele." nimbu ono kape niemboye? Ono paa kape naa nimbú.

**11:23-26**

*Yesusi Kolopale Mulu-Koleana Olando Pumbando Pellawa-Berete Kinia No-Waene Kinia Lipa "Nangi." Nimba Sirimumunga Semanemo Pollone Kelepa Torumu Ungumu (11:17-34 pali)*

<sup>23</sup> Ono nimbu sirindu ungumu u Ye-Awilimuni yando na nimba sirimu. 'Kanu ungumu pilielemolánje selemeye mele naa selemolá.' 'Kanu ungumu i-sipa:' Judasini, Ye-Awili Yesusi yunga opa-touma

u naa lipa sipili kanu ipulielimunga

'Ye-Awilimun kinia yu lombili andolima kinia

kere-langi nongo moloringi kinia, Ye-Awilimun yuni

pellawa-berete se lipale nirimumuni,

<sup>24</sup> 'Pulu Yemo kinia, "Ange." nimba ambolopa

pike lepa ono sipa nimbale:

"Imu nanga kangimu.

Nanga kangimu 'ononga' nimbu

'Na tangi.' nimbu simbú, sekero.

Pe pe kepe, nanga kangimu 'ononga' nimbu

sendembo mele 'Kelepo piliamili.' ningu

'i beretemo-kinia sekero mele,

ono aku siku sekole liku manjangi." nirimu.

<sup>25</sup> Pe ono kere-langima nongo pora siringi kinia

yuniaku sipala no-waene molorumu kapomo lipa

'ono sipa, nimbale:

"I no-waenemo 'Pulu Yemone 'Ono-kinia sembó.'

nimba, nimba panjipa mi lierimu ungu kondemo.

Na kolopale nanga mememo ondondombomonga

ungu kondemo kamu wendo ombá.

Pe pe kepe, na ononga nimbu

nanga mememo ondondombo sekero mele

'Kelepo piliamili.' ninguli

no-waene kelko i-siku nangi." nirimu.

<sup>26</sup> Ye-Awilimu kelepa mania naa opili i beretemo kinia no-waenemo-tolo alieli-alieli nonge kinia aku siku senge ulumuni onone Ye-Awilimu kolorumu mele yomboma liku ora singí.

**11:27-34**

*Yomboma Ye-Awilimuni 'Sangi.' Nirimu Mele Pilkuli Berete Kinia No-Waene Kinia Nongendo Ononga Konopuma Liku Sumbi Naa Siku Nonge Kinia Manda Naa Semba Mele Ungu Se (11:17-34 pali)*

<sup>27</sup> Akumunga, Ye-Awilimuni "Yu pilku nangi." nirimu beretemo kinia no-waenemo-tolo yombo sene nombando , 'Unguri mólo.' nimba Ye-Awilimuni kanopa kiri pilimba, ulu se sepa kinjilimú kinia aku selemo ulumuni yu 'Ye-Awilimunga kangimu kinia mememo-tolone uluri naa sembá.' nimba lipa awi naa silimú. Aku sipa selemo ulumu ulu-pulu-kiri se selemo. <sup>28</sup> Aku selemo kene yombo se yunga konopukundu apurupa pilipale beretemo kinia no-waenemo-tolo nopili. We walu naa nopili. <sup>29</sup> Yombo sene Ye-Awilimunga kangimu nimba naa pilipale beretemo kinia waenemo-tolo we walu nomu liemu aku selemomonga yu yuyu ulu umbuna se 'wendo opili.' nimba aku selemo, akumunga sika Pulu Yemone "Yu-kinia umbuna wendo opili." nimbá, aku kene "Konopukundu apuruku pilkuli nangi." nikiru. <sup>30</sup> Aku siku seko kinjilimili, akumunga ononga yombo awisili kangima enge naa pepili molko, kuruma kanoko liku, mare kololemele.

<sup>31</sup> Aku-sipa na-kolo olione selemolo mele oliolio ,konopukundu, apurupu pilipuli ,Ye-Awilimuni "Nangi." nirimu kere-langima nolemolá ,nje mindili nomolo ulu se naa pelka. <sup>32</sup> 'Ya ma-koleana yomboma seko kinjilimilimunga Pulu Yemone ono kolea kirina lipa mundumba kinia olio pea aku sipa naa sepili.' nimba Ye-Awilimuni olio ulu selemoloma kanopa kiri pilipale olio mane simbando ulu umbunama silimú.

<sup>33</sup> Aku kene, nanga ango-keme, ono ,Ye-Awilimu kinia genali kinia kopu seko, kere-langi nongendo ongo maku tolemele kinia yombo mare wangí nokoko molcole, pea kere-langi nangi. <sup>34</sup> Yombo se gelene kolomu liemu yunga ulkana u kere-langi nopili. 'Gelene kolopo maku topole sepo kinjimulú kinia Pulu Yemone olio pali mindili simba.' nimbale aku sipa u sepale makuna pupili.

Ungu ekendo we pelemo-na-kolo pe na ono molongena ombole ono mane simbú.

## 12

### Kolomongo-Awili 12

*Olio Karasinga Yomboma Kangi Selumu Molemolomonga Kimbu Kima Mele Pulu Yemonga Minimuni Olio Moke Sepa Silimúmunga Ungu Se  
12:1-11*

*Pulu Yemonga Minimuni 'Pulu Yemonga Uluma Olio Lupa Lupa Samili.' Nimba Tondoloma Yu-Mele-Mele Moke Sepa Silimú Ungu Se*

<sup>1</sup> 'Manda,, ango-keme, Pulu Yemonga Mini Kake Sélimuni Karasinga yomboma tondoloma moke sepa silimúmunga ,pepá toko siringi pepána mangilku pilieringimunga kiniá ungu se pundu topo 'Mini Kake Sélimuni silimú tondoloma, mimi siku piliangi.' nimbu akuma ono nimbu siembo. <sup>2</sup> Ono u Karasinga yombo talapena ultu moloringi kinia ,ye marene, ono kolo toko mane siringi kinia 'Sika.' ningu kuru mondokole onone lawa seko, méle ungu naa nili we-mélemando 'Ima olio nokolemele pulu yomboma.' ningu mélema popo toko kalko, ulu akuma u seringi mele pilielemele.

<sup>3</sup> Akumunga, ono ungu se paa piliangi, nimbu siembo: Pulu Yemonga Minimuni ambololemo yombo sene "Yesusi molopa kinjepili." paa manda naa nimbá. "Yesusi yu Ye-Awilimu." nilimili akumu we naa nilimilia. Mini Kake Sélimuni ambololemo yombomane mindi "Yesusi yu Ye-Awilimu" nilimili. Akumu piliaa!

<sup>4</sup> Minimunga we silimú tondolo lupa lupama pelemo-na-kolo silimú Mini selumu mindi. <sup>5</sup> Ye-Awylimunga kongono olione sendelemolo kongono lupa lupama pelemo-na-kolo „Kongono saa.” , nilimú Ye-Awili selumu mindi molemo. <sup>6</sup> Kongono selemolo tondolo lupa lupama pelemo-na-kolo aku tondoloma pali yomboma silimú Pulu Yemo selu mindi molemo.

<sup>7</sup> „Karasinga yomboma pali, ‘Anju yando liku tapondangi.’ nimba Minimuni olio tondoloma yu-melete-mele moke sepa silimú. We naa silimú. <sup>8</sup> „Akumu i-sipa mele:, Unguma apurupa sumbi sipa nimba kondoli tondolomo Minimuni yombo se silimú.

Pulu Yemonga ulumanga puluma pilipa kondoli tondolomo  
aku Mini selumuni mindi yombo sela silimú.

<sup>9</sup> ‘Pulu Yemo mawa sembó mele paa sika sembá.’ nimba  
kuru mondoli tondolomo Mini selumunila yombo se silimú.  
Kuru tomba yomboma sepa peanga sindeli tondolomo  
Mini selumunila yombo se silimú.

<sup>10</sup> Ulu-tonadoloma seli tondolomo yombo se sipa,  
Pulu Yemone ungu-umbu tondolemoma pilipa yomboma nimba sili tondolomo yombo se sipa,

Minimunga unguma kinia uluma kinia,  
kurumanga unguma kinia uluma kinia,  
pilipa mimi sipa apurola tondolomo yombo se sipa,  
umbu-ungu lupa lupama naa pilipa we walu lieli tondolomo  
yombo se sipa,  
kanu umbu-ungu lupa lupa we walu lieli unguma pilipa  
„‘Yomboma piliangi.’ nimba, topele topa nimba sindeli  
tonadolomo yombo se sipa,

„aku sipa tondolo lupa lupama Mini selumuni moke sepa, silimú. <sup>11</sup> Aku tondoloma awisili na-kolo Mini selumu. Aku tondoloma pali Mini selumuni mindi sendelemo. Yu yuyu konopumuni pilipa tondoloma moke sepa yomboma yu-melete-mele silimú.

12:12-31

*Kangi Selumunga Kimbu Ki Méle Awisili Gilimú Mele Olio Aku Sipu Molemolo Ungu Se (12:1—13:3,8-9, 14:1 pali)*

<sup>12</sup> „Minimuni tondolo lupa-lupama yomboma yu-melete-mele moke sepa silimúmunga pulumu i-sipa: „Kangimu kimbu ki méle awisili gilimú-na-kolo kangi selumu. Sika kangimunga kimbu ki méle awisili gilimú-na-kolo aku mélema lipa sere lepa kangi selumu. Karasi yu aku sipala molemo. „Yu kangi selumu na-kolo méle awisili. Yunga kangimunga mélema olio. „<sup>13</sup> Olio Juda yomboma kinia, Juda yombo naa molko ultukundu molemele yomboma kinia, méle kaloli naa liku kongono we sendeli kendemande-yomboma kinia, yombo sene naa nokopa ono onono we molemele yomboma kinia, olio pali ‘Ono yombo kangi selumu molangi.’ nimba Mini „Kake Séli, selumuni mindi no linderimu. „Pulu Yemone, ‘No mele nangi.’ nimba sirimu norumulu Mini selumu mindi „olionga pali konopumanga molemo.„

<sup>14</sup> Olio pilielemolo, kangimu yu méle selumu mindi mólo. Yu méle paa awisili lipa sere lepa kangi selumu. <sup>15</sup> Aku kene kimbumuni nimba: “Na kimu mólo kene na kangimunga mélse mólo.” nilkanje yu kangina gilimúmunga yu kangimunga mélse we naa gilkaye? „Kimbumuni aku nilkanje kepe yu kangina naa gilimba aulka se wendo naa olka. „<sup>16</sup> „Molo, komumuni nimba: “Na mongomo mólo kene na kangimunga mélse mólo.” nilkanje yu kangina gilimúmunga yu kangimunga mélse we naa gilkaye? „Komumuni aku nilkanje kepe yu kangina naa gilimba aulka se wendo naa olka. „<sup>17</sup> Kangimu pali mongomo mindinje kangimuni nambi

sepa unguma pilkaye? Kangimu pali komumu mindinje kangimuni nambi sepa mélemanga munama pilkaye? <sup>18</sup> Aku-sipa na-kolo „kangimu pali aku sipa mólo., Pulu Yemone ‘Kangina mélema giliepili.’ nirimuma yuyu ‘I-sipa i-sipa giliepili.’ konopumuni pilierimu mele “Giliepili.” nirimu. „Kangimunga mélema we walu naa gilimú.,<sup>19</sup> Kangimunga méle seluri mindi gilkanje yu sika kangi se mólo. <sup>20</sup> Aku-na-kolo kangimu aku sipa mólo. „Kangina, kimbu ki méle awisili gilimú-na-kolo lipa sere lepa yu kangi selumu.

<sup>21</sup> „Akumunga,, mongomone kimundu nimbale: “Nu naa molenanje na nanu molopo kondolka.” manda naa nilka. Pengemone kimbumundu “Nu naa molenanje na nanu manda molka.” manda naala nilka. <sup>22</sup> Aku-na-kolo aku sipa mólo. Kangimunga méle gilimúmanga mare pilipuli ‘Akuma unguri mólo. Akumane kongono tondolo se naa selemo.’ konopu lemolo mélema naa gilkanje kangimu paa manda naa molka. <sup>23</sup> Kangina gilimú méle mare ‘Méle peangama mólo.’ nilimuluma mimi sipu nokolemolo; ‘Kanopo peanga naa pilielemolo mélema.’ nimbu ‘Mona gilkanje olio pipili selka.’ nilimulu mélema mimi sipu aki tolemolo; <sup>24</sup> kangimunga méle mare ‘We gilimba kinia unguri mólo.’ nimbu aki naa topo ‘We liepili.’ nimbu siye kololemolo. „Aku sipu kangimunga mélema yu-mele-mele pilipu apurupu selemolo,-na-kolo kangina gilimú mélema pali Pulu Yemone ‘Sere leko giliangi.’ nirimu. Kangina méle mare ‘Imbi naa mololima.’ nilimili akuma Pulu Yemone ‘Paa kumbina molopili.’ nirimu. <sup>25</sup> ‘Kangimunga mélema pulua toko yu-mele-mele opa-tou naa giliepili. Anju yando selu-siku nokoko molangi.’ nimba „Pulu Yemone ‘Kangimunga mélema pali selu-siku giliepili. Se imbi mololi, se imbi naa mololima mólo.’ , nirimu. <sup>26</sup> Kangimunga mélse umbuna selemo molo mindili nolemo kinia kangimunga mélema pali umbuna sepili mindili nongo molemelela. Kangimunga mélse kape nilimili kinia kangimunga mélema pali kanu mélemo kinia pea konopu siku molemelela.

<sup>27</sup> Manda, „kangimundu nikirumunga ungu se onondo niembo:’ Ono pali Karasinga kangimu; ono yu-mele-mele kanu kangimunga mélema. <sup>28</sup> ‘Karasinga yombo talapemonga kongono sangi.’ nimba Pulu Yemone yomboma tondolo lupa lupama sirimu.

Yesusini “Nanga kongonomo sende-paa.” nimba lipa mundorumu yema Pulu Yemone u kumbi lepa nimba taltopa ‘Aku siku molangi.’ nimba,  
talo-sipa yuni ungu-umbu tondolemoma pilku yomboma ningu silimili yomboma  
nimba taltopa ‘Aku siku molangi.’ nimba,  
yopoko-sipa ‘unguma mimi siku pilku, yomboma mane silimili yomboma nimba  
taltopa ‘Aku siku molangi.’ nimba,  
pe ‘Pulu Yemone mindi manda selemo mele, ulu-tonadoloma selemele yomboma  
nimba taltopa ‘Aku siku molangi.’ nimba,  
kuru tolemo yomboma seko peanga sindilimili yomboma nimba taltopa,  
yomboma liku tapondolemele yomboma kinia,  
kongono lupa lupama nokoko kondolemele yomboma kinia,  
umbu-ungu lupa lupa naa pilielememele we walu lemele yomboma kinia,  
akuma pali nimba taltopa ‘Aku siku molangi.’ nimba „aku siku sumbi siku seko  
molonge tondoloma ono yu-mele-mele moke sepa sirimu.,

<sup>29</sup> Aku yomboma pali Yesusini “Nanga kongonomo sende-paa.” nimba lipa mundorumu yema molemeleye?

Molo akuma pali Pulu Yemone ungu-umbu tondolemoma pilku yomboma ningu sili yomboma molemeleye?

Molo akuma pali unguma mane sili yombomaye?

Molo akumane pali ulu-tonadoloma selemeleye?

<sup>30</sup> Molo aku yomboma pali kuru tolemo yomboma seko peanga sindingí tondolomo pele moye?

Molo akumane pali umbu-ungu lupa lupa naa pilielemelama manda we walu lemeleye?

Moloaku yombomane pali yombo marene umbu-ungu lupa-lupa we walu nilimili unguma sumbi siku pilku , 'Yomboma piliangi.' ningu, topele toko yomboma ningu silimiliye?

‘Paa mólo! Yombo selumuni mindi uluma pali manda naa selemo., <sup>31</sup> Aku-sipa na-kolo ‘Mini Kake Sélimuni, tondolo moke sepa we silimúmanga se liembo.’ konopu lekole ‘yomboma, olandopa ,lipa tapondolemo, tondoloma ono tondolo munduku ‘Paa liemili.’ ningu konopu kimbu siku molangi.

**12:31—13:13**

*Olio ,Yomboma Konopu Mondomolomonga Ungu Se (12:27-31 kinia pea kanou)*

‘Tondolo olandopa akuma liemili.’ ningi liemu peanga na-kolo, kiniá nane ono ulu paa peanga olandopa seko molonge mele nimbu simbú sekero.

## 13

<sup>1</sup> Kanu ulumu yomboma konopu mondololo ulumu., Yomboma-kinia ungu nimbúndu ma-koleana pali yombomane umbu-ungu lupa lupa lemelema kinia, angellomanga umbu-ungu lemele unguma kinia, ‘yomboma, konopu naa mondopo we nilkanje na aku sipu unguma we nilka. Bella ,we, toko, bikollo ungu ,we, silimili kinia ungu awisili we nilimú ,ungu-pulumu, mele mindi aku ungumuni uluri naa selka. <sup>2</sup> Pulu Yemone ungu-umbu tondolemoma manda pilipu yomboma konopu naa mondopo we nimbu sipu, ‘Pulu Yemonga, ungumanga puluma pali lopi selemo-na we-yombomane naa pilielemelama ungu-puluma yomboma konopu naa mondopo we pilipu, yomboma konopu naa mondopo ungu lupa pelemoma pali we pilipu kondopo, ‘Sika sembá.’ nimbu kuru mondolio ulumuni ma-pangi se ‘anju pumba senga giliepili.’ nimbu, aku sipu uluma ,yomboma, konopu naa mondopo we selkanje na imbi paa naa mololi ye wemo molka. <sup>3</sup> ‘Yombo koropama kere-lang topo toko liku nangi.’ nimbu nanga méle taltolioma pali kou lipu ono konopu naa mondopo we moke sepo silkanje, molo yomboma konopu naa mondopole , ‘Yomboma lipu tapondambo.’ nimbu, ‘Nanga kangimu sepene kamu nopili kalopole kolambo.’ nimbu aku selkanje ,yomboma, konopu naa mondolkamonga aku ulutolone na naa lipa tapondolka.

<sup>4</sup> ‘Yombo sene yomboma, konopu mondopale yombomane yu seko kinjingí kinia popenge sepa mumindili kolopa anju pundu naa tolemo. Yombo sene ,yomboma, konopu mondopale ono kondo kolopa lipa tapondolemo. Yombo sene ,yomboma, konopu mondopale yombo méle awisili taltoko tondolo pulimú yomboma kinia konopu kiri naa panjilimú. ,Yomboma, konopu mondolemo yombo sene , ‘Na paa pilipa kondoli yemo. Paa ulu-tondolo olandopama selio.’ nimba, yuni yuyu kape nimba imbi ambolopa paka naa tolemo. <sup>5</sup> ,Yomboma konopu mondolemo yombo sene yomboma-kinia, kara pumba mongo naa kondopa, yuni yuyu mindi ‘Uluma sambo.’ molo ‘Mélema liembo.’ nimba konopu kimbu sipa naa molopa, yomboma-kinia popenge sepa mumindili kolopa iri naa topa, yombomane yu seko kinjilimili kinia siye kolopa ‘Pundu tambo.’ nimba konopu kimbu sipa naa molemo. <sup>6</sup> Yombo sene ,yomboma, konopu mondopale yombo marene ulu mare seko kinjilimili kinia kanopale konopu naa sipa, ulu sumbi nilima mindi selemelama kinia kanopale konopu silimú. <sup>7</sup> ,Yomboma, konopu mondopale, ,onone yu-kinia seko kinjilimili kinia ,‘ono-kinia umbuna se wendo opili.’ naa nilimú. ‘Sika ,Pulu Yemone ono lipa tapondomba kinia konopu tondolo pupili molko, molko kondonge.’ , nimba kuru mondopa,

‘Aku siku sika topele toko molongenje.’ nimba, kanopa nokopa molopa, ulu umbuna selima selemelo kinia kepe ono siye naa kolopa konopu mondopa mindi molemo.

<sup>8-10</sup> Konopu mondoli ulu-pulu akumu pora naa nimbá, lepa mindi pumbá. „Mini Kake Sélimuni silimú tondoloma sembá mele yu aku sipa naa sembá.“ Pulu Yemone ungu-umbu tondolemoma pilku yomboma ningu silimili tondolomo lepa mindi naa pumbá; umbu-ungu lupa lupama naa pilku walu lemele tondolomo pora nimbála; „Pulu Yemonga ungumanga puluma, pilipa kondoli pelemo tondolomo mania pumbála. Kiniá ungumanga puluma pali naa pilipu kanga-kolte mindi pilipu, Pulu Yemone ungu-umbu tondolemo unguma pali pilipu naa nimbu sipu kanga-kolte mindi pilipu nimbu silimulu. Aku-sipa na-koło pe uluma pali kamu wendo ombá, aku ulu sikama wendo ombá kinia, kiniá ulu laye-kolte kiri lepa tondolo naa pulimú uluma kamu mania pumba pora nimbá, akumunga, Pulu Yemonga unguma pilku ningu silimili ulumu kinia, umbu-ungu lupa lupama walu lemele ulumu kinia, Pulu Yemonga ungumanga puluma pilku kondolemele ulumu kinia sika pora nimbá.

<sup>11</sup> „Ya ‘Ulu sikama wendo ombá kinia ulu selemolo aku uluma manda naa lemóma pora nimbá.’ nikiru akumu bolangoma awi lemele mele.“ Na kango kanga kinia molopole bolangomane ungu ningu, konopumane pilku, konopu kimbu siku molemele mele na aku sipu ungu nimbu, konopumuni pilipu, konopu sumbi sipu molorundu. Aku-sipa na-koło na awi lepo yemo molopole bolangoma selemelo mele mundupu kelierindu. <sup>12</sup> „Nikiru akumu i-sipa melela:“ Kariyápana mélemanga minima sumbi sipu naa kanolemolo mele kiniá „Pulu Yemonga, méle kanolemoloma aku sipu kanolemolo; aku-na-koło pe ‘mulu-koleana pumbu molopole, sumbi sipu kanomolo. Kiniá „Pulu Yemonga, uluma kanga sepo mindi pilielio, aku-na-koło yuni kiniá na molio mele sumbi sipa kanopa pilielemo mele pe aku sipu nane yu molemo mele sumbi sipu kanopo pilimbu.

<sup>13</sup> Aku liemu,  
 ‘Sika.’ nimbu kuru mondoli ulumu kinia,  
 ‘Pulu Yemone olio ‘mulu-koleana memba pumba,  
 ‘Kamu molko kondangi.’ nimba lipa tapondomba walemo  
 sika wendo ombá.’ nimbu konopu sipu  
 nokopo molemolo ulumu kinia,  
 ‘yomboma, konopu mondoli ulumu kinia,  
 aku ulu yopoko kiniá pelemo. Aku-na-koło ‘yomboma, konopu mondoli ulu akumu paa olandopa.

## 14

14:1-25

*Pulu Yemone Ungu-Umbu Tondorumuma Pilku Yomboma Ningu Siringi Ulumu Kinia, Umbu-Ungu Lupa Lupama Naa Pilku Walu Lieringi Ulumu Kinia, Aku Ulu Seringitolonga Pulu Yemone Yomboma Tondolo We Sirimu, Kanu Ulutolonga Ungu Se 14:1-12*

*Pollone “Pulu Yemonga Unguma Yomboma Ningu Singí Tondolomo ‘Paa Liemili.’ Konopu Leangi.” Nirimu Ungu Se (12:27—13:13 kinia pea)*

<sup>1</sup> „Yomboma konopu mondoli ulu akumu paa olandopa kene, ono yomboma alieli tondolo munduku konopu mondoko molangi. Mini Kake Sélimuni tondolo we silimúma ‘Paa liemiliya!’ ningu konopu kimbu siku molangila. Kanu tondolomanga tondolo se olandopa ‘Paa liemili.’ konopu lenge akumu Pulu Yemone ungu-umbu tondolemoma pilku yomboma ningu singí ulumu. <sup>2</sup> Aku nikirumunga pulumu i-sipa: ‘Ono pilielemele,’ yombo sene ‘yomboma kepe, yu kepe naa pilielemele umbu-ungu se we walu lepa ungu se nilimú kinia yuni ungu nilimúma yombomando naa nilimú;

yuni nilimú unguma pilielemele yombomane kepe manda naa pilingímunga yu Pulu Yemo kinia mindi nilimú kanumu. „Pulu Yemonga, Minimuni ‘Yu aku sipa ungu se nipili.’ nilimúmunga yu kinia, yuni walu nilimú unguma pilielemele yomboma kinia, ono ungu-pulumu naa pilielemele, ungu-pulu akumu lopi sepa pelemo, Pulu Yemone mindi pilielemo. <sup>3</sup> Aku-na-kolo Pulu Yemone ungu-umbu tondolemoma pilipa yomboma nimba silimú yombomone yombomando sumbi siku pilingí unguma nilimú akumunga yuni nilimú ungumuni yomboma lipa tapondopa ‘‘Sika.’’ ningu kuru mondolemele ulumu kamu olandopa kuru mondangi.’ nimba, ‘Ono ulu peangama sangi.’ nimba, ‘Ono umbuna se pemba kinia ononga konopuma tondolo pupili molangi.’ nimba, lipa tapondolemo. <sup>4</sup> Yombo sene umbu-ungu naa pilielemo se walu nilimú kinia yuni yuyu yunga konopumu mindi ‘tondolo pupili.’ nilimú; aku-na-kolo Pulu Yemone ungu-umbu tondolemoma pilipa yomboma nimba silimú ungu akumuni Karasinga talapena sukundu molemele yomboma pali lipa tapondopa ‘konopu tondolo pupili.’ nilimú. <sup>5</sup> ‘Ono pali umbu-ungu lupa lupama walu lemolánje papu.’ konopu lekero. ‘Leangi.’ konopu lekero-na-kolo nane ‘Sangi.’ olandopa konopu lekero mele i-sipa: ‘Pulu Yemone ungu-umbu tondolemoma pilku yomboma ningu singí kinia paa peanga.’ konopu lekero. Yombo sene ungu se lupa walu lepa yomboma mane simba kinia Karasinga talapena sukundu maku toko molemele yomboma yuni molo yombo sene ‘Yomboma ungumunga pulumu pilkuli konopu tondolo pupili molangi.’ nimba kanu ungumu topele topa yando yomboma nimba naa simu liemu Pulu Yemone ungu-umbu tondolemoma pilku yomboma ningu silimili ulu akumu olandopa, umbu-ungu lupama walu leko yomboma piliangi topele toko naa ningu silimili ulumu maniadopa.

<sup>6</sup> Ango-keme, imu piliaa! Na ono molemelena ombole, umbu-ungu naa pilielemele se lepole ungu nimbu silkanje aku selkamone ono manda lipu tapondolkaye? Ono lipu tapondombondo Pulu Yemone na lipa ora simba mele ono lipu ora simbú molo Pulu Yemonga ungu marenga ungu-puluma ono nimbu simbú molo Pulu Yemone ungu-umbu tondomba ungu se pilipuli ono nimbu simbú molo ono ungu mare mane simbú. „‘Ono konopu tondolo pupili lipu tapondambo.’ nimbili umbu-ungu naa pilielemele se lepole ono mane naa silka., <sup>7</sup> ‘I-sipa mele:’ We lepa lopi naa lieli méle mare kepe ungu silimilimane ungu nilimili kinia yombomane ungu-pulumu nambi seko pilielemoláye? Kolape-mingi molo gita molo kanu sili mélema ungu silimili kinia aku mélemane unguma sumbi siku naa nilimolánje yombomane aku ungumanga imbima kepe ungu-puluma kepe yu-mele-mele nambi seko apuruku pilielemoláye? ‘Manda naa pilielemolá..’ <sup>8</sup> Molo ‘Maku toko opa sangi.’ ninguli bikollo mimi siku ungu naa silimolánje nambi seko ungumu pilkuli opa sengendo maku tolemoláye? Manda mólo. <sup>9</sup> Ono kepe aku sipala. Ono kerena ungumu sumbi siku naa ningu, umbu-ungu naa pilielemele se leko yomboma mane singí kinia pe yombomane nambi seko kanu unguma pilingíye? Aku siku selenomonga nuni nunu senga molkole nini ungumu yomboma lipa tapondolka mele naa seleno. Ungumu paa we mindi nilinu. <sup>10</sup> ‘Akumunga ungu se i nikirula:’ ‘Ya ma-koleana umbu-ungu lupa lupa awisili sika lemele-na-kolo se naa pilku ungu-pulumu naa pepili walu lemele ungu se mólo.’ konopu lekero. <sup>11</sup> Akumunga, yombo sene ungu se lepale ungu se nimbámo na naa pilimbu kinia kanopale ‘Yu kolea senga lupa yere.’ konopu lemba. Nane kepe yunga nimbá ungumu naa pilipuli ‘Yu ye lupare lémo.’ konopu lemba. <sup>12</sup> ‘Ono naa pilielemele umbu-ungu lupa lupa lemele kinia, ono kepe aku siku selemelela. Pulu Yemonga Minimuni we silimú tondoloma ‘paa liemiliya.’ konopu lemele kene ‘Karasinga talapena molemele yomboma yunga unguma sumbi siku pilku liku konopu tondolo pupili molonge mele lipa tapondomba tondoloma lipuli kongono samili.’

niengi.

*14:13-25*

*Umbu-Ungu Lupa Lupama Naa Pilku Walu Lieringi Ulumunga Pollone Ungu Se Nirimu Ungumu (14:1-25 pali)*

<sup>13</sup> Akumunga, „Na tondolo se limbumunga Karasinga yomboma konopu tondolo pupili lipu tapondambo.“ nimbole, yombo sene ‘Umbu-ungu se naa pilielemolo se walu lepo yomboma ungu se niembo.’ nimbole Pulu Yemo mawa sepale ‘Ungu nimbúmu topele topo yomboma nimbu simbú tondolomo na sieni.’ nipili. <sup>14</sup> Nane Pulu Yemo kinia ungu nimbúndu umbu-ungu naa pilielio se walu liendu liemu nanga minimuni yu-kinia ungu niliu-na-kolo nanga konopumu ulu se naa sepa we pelemo. <sup>15</sup> Aku liemu na nambi semboye? „Nane i-sipu sembó.„ Nanga minimuni „umbu-ungu naa pilielio se walu lepo, Pulu Yemo-kinia sika ungu nimbú-na-kolo konopumuni kepe „umbu-ungu pilielimo lepo, Pulu Yemo-kinia ungu nimbúla; minimuni sika „umbu-ungu naa pilielio sene, konane se nimbú-na-kolo konopumuni kepe „umbu-ungu pilieliomone, konane nimbúla. <sup>16</sup> Onone ononga minimane „umbu-ungu naa pilielemene, Pulu Yemo kape ningi liemu maku toko molemele yombomanga yombo se nuni nini ungumuni Pulu Yemo-kinia “Ange.” nini mele sumbi sipa naa pilipale nambi sepa “Aku nikinu mele sepili.” nimbáye? „Manda naa nimbá..<sup>17</sup> Onone Pulu Yemo-kinia “Ange.” ningí mele sika mimi siku ningí-na-kolo ungu ningímane kanu yombomo ‘Konopu tondolo pupili.’ nimba lipa tapondomba ulu se naa sembá.

<sup>18</sup> Na umbu-ungu naa pilielio unguma walu lepo wale awisili ungu niliu, onone umbu-ungu naa pilielemene unguma walu leko wale koltalo mele ungu nilimili akumunga nane Pulu Yemo-kinia “Ange.” niliu. <sup>19</sup> Aku-sipa na-kolo ‘Karasinga talapena yomboma na-kinia pea maku topo molemolo kinia yombomane sumbi siku pilingí ungu paa ponjipu nimbu simbú kinia paa peanga. Umbu-ungu naa pilielemene se walu lepo yomboma ungu paa sulu sepo nimbu simbú kinia paa kiri.’ konopu lekero.

<sup>20</sup> Ango-keme, bolango kangamane konopu lemele mele ono aku siku konopu naa leangi. Bolango pamema ulu-kirima pilkuli seko molemele mele mindi aku siku bolango pamema mele molangi. Aku-sipa na-kolo konopu leko konopu kimbu silimili mele yombo-yuma molangi. <sup>21</sup> „Umbu-ungu naa pilielemene lemelemonga, Pulu Yemonga Ungu-Manema Molemo Bokuna ungu se molemo akumu i-sipa:

‘Ye-Awilimuni nimbale:

“I yombomando ungu se niembo.’ nimbuli

‘Ye mare umbu-ungu lupa lenge yemane  
nindangi.’ nimbú.

Kolea lupa yombo marendo

ungu-umbu tondombo kinia pilkuli

i yomboma ningu singí-na-kolo kanu yombomane

nanga ungumu ningu sindingí kinia kepe

nanga ungumu naa pilku liku bulu singí.”

nirimu’

mele bokuna molemo.

<sup>22</sup> Akumunga, umbu-ungu naa pilielemene lupa lupama walu lemele aku ulu-tondolomone Pulu Yemone ononga makuna molemele yombo mare kuru naa mondoko yunga yombo naa molemelemonga mindili simba yomboma ono lipa ora silimú. Aku-sipa na-kolo Pulu Yemone ungu-umbu tondolemoma pilku yomboma ningu silimili ungumane ononga makuna molemele yombo yunga yombo molemelema lipa ora silimú. Aku ungumane kuru naa mondoko Pulu Yemonga yomboma naa molemele yomboma naa lipa ora silimú.

<sup>23</sup> Aku liemu Karasinga talapena yomboma pali maku toko molkole, yombomane pali ungu ningíndu umbu-ungu lupa lupa naa pilielemele unguma walu leko molangi Pulu Yemonga ungumu mimi siku naa pilielemele yombo mare molo Pulu Yemonga ungumu ‘Sika.’ ningu kuru naa mondolemele yombo mare sukundu ongo umbu-ungu lupama leko ungu ningu singíma pilengi liemu ‘Ono Karasinga yomboma konopu naa pepa amu toli yomboma molemele.’ ningu naa pilingiyé? „Aku siku ningu pilingí.” <sup>24</sup> Aku-na-kolo Pulu Yemone ungu-umbu tondolemoma onone pali pilku „anju yando, makuna yomboma ningu siku molangi ‘Sika.’ ningu kuru naa mondolemele yombo mare molo Pulu Yemonga ungumu mimi siku naa pilielemele yombo mare ongo pilengi liemu onone ningu singí ungumane kanu yomboma ono yombo kirima molemele mele lipa ora sipa, onone ‘Olio ulu-pulu-kiri seli yomboma lepomo.’ ningu pilku, <sup>25</sup> ono sika konopuna lopi sepa pepili molemele mele „u naa pilielemele, akumu mona lemba-monga molemele mele sumbi siku pilingí. Kanukinia onone „ulu selemelema pilku kiri pilkuli, tamalu peko Pulu Yemo popo toko imbi ambolko paka tondoko ninguli: “Pulu Yemo ono „Karasinga yomboma, kinia sika pea molemo.” ningí.

**14:26-40**

*Karasinga Yomboma Maku Toko Molkole Pulu Yemo Popo Toko Kape Ningíndu Uluma Seko Kondonge Mele Ungu-Pulu Se*

<sup>26</sup> Ango-keme, aku liemu, ono maku toko molkole nambi sangi niemboye? Ono „Pulu Yemo popo toko kape ningu ungu pilingíndu, maku toko molkole ono yu-melemene ulu mare pemba. Yombo se konane nimba, yombo se ungu-mane se sipa, yombo se Pulu Yemone yu ungu-pulu se nimba silimúmu yomboma nimba sipa, yombo se umbu-ungu naa pilielemele ungu se walu lepale ono ungu se nimba sipa, yombo se kanu ungumu nimbá mele „Mini Kake Sélimuni yunga konopukundu nimba simba kinia pilipale, topele topa ono nimba sipa, ono aku siku seko molonge. Aku ulu sengema ‘Karasinga talapena yomboma konopu tondolo pupili molangi.’ ningu senge. „We naa senge.”

<sup>27</sup> Yombo marene umbu-ungu naa pilielemele unguma leko ungu mare walu ningíndu yombo talo mindi niengili. Molo yombo yopoko ungu mare walu níngi liemu mandanje. Kise molo se-pakara paa mólo. Onone unguma ningíndu waltikele naa ningu, yu-meles-meles niengi. Ningí kinia „onone ningí mele Mini Kake Sélimuni yombo senga konopuna molopale nimba simba kinia pilipale, kanu yombomone ononga unguma topele topa yomboma yando nimba sipili.” <sup>28</sup> Yombo sene umbu-ungu lupa se walu nimbá ungumu topele topa yomboma nimba simba yombo se naa molomu liemu Karasinga yomboma maku toko molongena ungu se naa nipili. ‘Pulu Yemo kinia oltolto piliambili.’ nimba aku ungumu nipili.

<sup>29</sup> Pulu Yemone ungu-umbu tondombama yombo talo molo yopokone pilkuli yando ningu siengi. Kanu unguma yomboma ningu singí kinia we molonge yombomane mimi siku pilku ‘Sika Pulu Yemonga unguri molo we nikiminje?’ ningu pilku apuruku kondangi. <sup>30-31</sup> „Yombo se aku sipa ungu se pilipale yomboma nimba sipa giliepili, Pulu Yemone „makuna molomba, yombo se ungu se umbu tondomu liemu u ungu nimba sipa gilimba yombomondo, „Na ungu se konopumuni pilkirumu niembo.” nimbá kinia, u nimba sipa gilimba yombomo mania molopili, „Se niembo.” nimbá yombomo ola pilipale Pulu Yemone yu ungu nimba simbambo yomboma nimba sipili.” Pulu Yemone ono selu selu nimba ungu-umbu tondombama kinia pilkuli yomboma ningu singíndu ‘Aku ungu nimbu simulúmane yomboma Pulu Yemonga unguma sumbi siku pilku liku, konopu tondolo pupili molangi.’ ninguli yu-meles-meles manda ningu singí kene liku sere leko ningu siku naa giliangi. <sup>32</sup> Pulu Yemone ungu-umbu tondolemoma pilku yomboma ningu silimili yomboma ononga

kerema manda nokolemele ,akumunga ononga ungu ningí walema wendo ombá kinia ungu pilingíma yomboma ningu singí. Wale se naa lemba kinia 'We molopo ungu pilkirumu naa niembo.' ningu manda we molongela.<sup>33</sup> Aku nikirumunga pulumu i-sipa: Pulu Yemone ,yunga talapena yomboma, 'Konopu lupa lupa pepili seko sembambu siku molangi.' nimba ,tondoloma silimú, yemo naa molemo. Yu 'Yomboma konopu seluna pupili taka leko selu siku manda molangi.' nilimú yemo molemo. ,Tondoloma silimú akumu 'Yomboma liku tapondangi.' nimba silimú.

Koleamanga pali Karasinga talapena sukundu ,Pulu Yemonga, yombo kake selima maku toko molkole ,aku siku, selemele.

<sup>34</sup> ,Makumanga ulu se pea selemele mele onone senge mele i-sipala: , Karasinga talapena yomboma maku toko molongena ambomane ungu naa niengi. Ungu-mané sene 'Makuna, ambomane ungu naa niengi.' nilimú kanumu. ,Pulu Yemonga, ungu-mané sene 'Amboma liku awi siku molangi.' nimba pelemo mele pilkuli ambomane makuna 'Yomboma nokamili.' ningu naa molko, liku awi siku molangi. <sup>35</sup> Amboma ono ungu marenga molo ulu marenga puluma ,naa pilkuli, 'piliamili.' ninguli onongaulkando pungu ononga yema mangilku piliangi. Makuna sukundu ambo sene ungu se nimu liemu paa manda naa sembá. Aku sipa sembamonga yuni yuyu sepa pipili kondomba.

<sup>36</sup> ,Nambi semuye?, 'Oliolio Pulu Yemonga ungumu u-pulu-pulu pilipuli yomboma nimbu sirimulumunga ,oliolio kanu ungumunga pulumu pilipuli 'Samili.' konopu lemolo mele papu semolo.' konopu lekemeleye? Molo 'Pulu Yemonga ungumu olionga koleana mindi orumu-na oliolio mindi pilipu liltimulu.' konopu lekemeleye?

<sup>37</sup> Ononga yombo se yu 'Pulu Yemone ungu-umbu tondolemoma pilipu yomboma nimbu siliu yombomo molio.' konopu liemu liemu, molo yu 'Mini Kake Sélimuni na yomboma lipu tapondombo tondolo se sirimu-na aku tondolomo na-kinia pepili molio.' konopu liemu liemu, nane ya pepá topo sikirumunga unguma "Sika Ye-Awilimuni "Sangi." nirimu unguma pepána tokomo." nimba, nimba sipili. <sup>38</sup> Molo kanu sili yombo sene ya "Saa." nikiru mele naa sepa , "Pepá tokoro unguma Ye-Awilimunga ungu-manema." naa nimba,, siye kolomu liemu yu kepe , "Ye-Awilimunga ungu se pilkirumu niembo." nimbá kinia, yu siye kolko yunga ungumu naala piliangi.

<sup>39</sup> Aku kene, nanga ango-keme, 'Pulu Yemone ungu se umbu tondombamo paa pilipu yomboma nimbu siembo kene ,Mini Kake Sélimuni aku sipu manda sembó tondolomo sipili.' ningu, konopu kimbu siku molangi. Aku-sipa na-kolo yombo sene ,Mini Kake Sélimuni aku sipa manda sembá tondolomo simba-na, umbu-ungu naa pilimba se lepa ungu se nimbá kinia "Nipili." niengila. <sup>40</sup> ,Ononga makuna aku siku sangi,-na-kolo ,Pulu Yemo popo toko kape ningu imbi ambolko paka tondoko kondongendo, ulu sengema pali taka leko sumbi siku seko, yomboma seko sembambu naa sindangi.

### Kolomongo-Awili 15

## Kolopole Lombokoro Ola Molomolomonga Ungu Se

### 15

15:1-11

*Karasi Kolopa Lombokoro Ola Molorumu Semanemo (15:1-58 pali)*

<sup>1</sup> Ango-keme, 'U onondo Yesusi Karasinga semane peangamo topo sirindu pilieringi mele komu kelko naa sindiku piliangi.' nimbu kelepo nimbu para sipuli kanu ungumanga puluma nimbu siembo. Kanu unguma u pilku liltingi, kiniá ambololemelemonga enge nipili gilimili. <sup>2</sup> Kanu semane peangamo, akumu Yesusi Karasini serimu mele nane onondo nimbu sirindu ungu kanumu, ambolko kondokole

'Paa sika.' ningu kuru mondoringi mele kelko munduku naa keliengi liemu kanu semane peangamone Pulu Yemone ono lipa tapondopa mindili nolemolá aulkana wendo lipa, yu kinia pea molko kondonge aulkana lipa mondorumu, akuna molemele mele molonge. Molo nane semane peangamo topo sirindu mele mimi siku naa pilku, akumu we 'Sika.' ningu kuru mondoringi liemu aku semane peangamone ono lipa naa tapondolemo naa tapondomba.

<sup>3</sup> Ungu kumbina paa olandopamo na u pilipu liltindu mele ono nimbu sirindumunga 'nane onondo aku sipu kelepo nikiru.' Kanu ungumu i-sipa: Pulu Yemonga bokumuni nilimú mele Karasi olianga ulu-pulu-kiri selemolomanga kolali sepa kolondorumu. <sup>4</sup> Pe yu óno seringi. Óno seringi kinia pe Pulu Yemonga bokumuni nilimú mele yu wale talo pepale yopoko-sipamonga lomboropa ola molorumu kanumu. <sup>5</sup> Pe 'lomboropa ola molopale' yu lombili andoli ye Pita molorumuna pumba 'Yuni na lomboropo ola molondu mele kanopili.' nimba, pumba mona gilierimu. 'Aku sepale' pe yu lombili andoli ye rurepo pali moloringina 'Onone yu kanangi.' nimba pumba mona gilierimula. <sup>6</sup> Pe genupili paip anderete mele seluna moloringina 'Yu kanangi.' nimba purumula. Yu kanoringi aku yomboma kiniá yandopa awisili we molemele, na-ku mare koloringila. <sup>7</sup> Pe yu Jemisi molorumuna 'Na kanopili.' nimba pumbale, pe yuni "Nanga kongonomo sende-paa." nimba lipa mundorumu yema pali 'yu lomboropa ola molorumu mele, 'kanangi.' nimba pumba mona gilierimu. <sup>8</sup> Paa akilepa na 'Pollo' molorunduna 'Kanambo.' nimba ombo mona gilierimu. Na ye paa kiri, na bolango nomba ombo pulimú bolango mele molopo konde manda naa molombo mele molorundu-na-ku mola serimu.

<sup>9</sup> Na Karasini "Nanga kongonomo sende-pu." nimba lipa mundorumu ye sela na-ku na paa maniandopa mele molio, yuni aku nimba lipa mundorumu ye lupama olandopa mele molemele. Nane Pulu Yemonga yombo talapemo sepo kinjipu molorundu-kulu 'Na Yesusini lipa mundorumu ye se' nilimili kinia na pipili selemo.

<sup>10</sup> Aku-sipa na-ku na molio mele Pulu Yemone na we kondo kolorumumunga aku sipu molio. Pe yuni na we kondo kolopale 'na-kinia sepa kondorumu, mele we naa pelemo. Na 'we kondo kolopale lipa tapondorumumunga' paa kála sepo kongono sepo, Yesusini "Nanga kongonomo sende-paa." nimba lipa mundorumu yemanga na kongono kála-sepo tondolo mundupu serindu mele olandopa, onone kongono seringi mele maniandopa. Aku-sipa na-ku na nanu mólo. Pulu Yemone na we kondo kolopale 'lipa tapondopa na-kinia kopu sepa molorumumunga, naaku sipu manda kongono serindu. <sup>11</sup> Aku-sipa na-ku nane Pulu Yemonga ungumu nimbu sirindu akumu mandala. Molo Yesusini lipa mundorumu ye wemane Pulu Yemonga ungumu ningu siringi akumu mandala. Olione pali nimbu sirimulu ungumu selumu mindi. Kanu ungumu ono 'Korini yombomane' pilku likuli 'Sika ungumu.' ningu kuru mondoringi.

15:12-34

*Karasi Kolopale Kangi Pali Lomboropa Ola Molorumumunga Yunga Yomboma Kepe Paa Sika Aku siku Kangi Pali Lomboroko Ola Molonge Ungu Se (15:1-58 pali)*

15:12-19

*Karasi Kolorumu Kinia Lomboropa Ola Naa Molkanje Akumunga Ungu Se*

<sup>12</sup> Aku-sipa na-ku Karasi kolopale lomboropa ola molorumu mele sika yomboma nimbu silimulu liemu ono marene "Yomboma kolkole lomboroko ola naa molonge." nambi seko aku siku mele ningu molemeleye? <sup>13</sup> Yomboma paa sika pe lomboroko ola naa molonge liemu Karasi yu kepe u lomboropa ola naa molorumu. 'Ónomo we mana pelemo.' <sup>14</sup> Pe Karasi lomboropa ola naa molkanje olione 'yunga' ungumu ono

nimbu silimulumu uluri naa selkala, ono kanu ungumu pilku ambolko molemelemo uluri naala selka. We pilku ambololemolá.

<sup>15</sup> Ulu se lupa pea selkala: Karasi lomboropa ola naa molkanje olione “Karasi yu kolorumu kinia Pulu Yemone ‘Lomboroko ola molou.’ nimba topa makisinderimu.” nimbu silimulu mele Pulu Yemondo kolo tolemolá-la. Aku-sipa na-kolo yomboma paa sika pe lomboroko ola naa molonge liemu Pulu Yemone Karasi u “Lomboroko ola molou.” naa nilkala. <sup>16</sup> Yomboma topa ola naa mondomba liemu Karasi kepe topa ola naa mondorumula.

<sup>17</sup> Pe Karasi u topa ola naa mondolkanje ono pilku ambololemele ungumuni uluri naa selka, ulu-pulu-kiri seringima yandopa kiniá kepe konopuna we pepili molemolá.

<sup>18</sup> Pe Karasi „kolopale lomboropa ola naa molkanje yu, yombomanga nimba senderimu mele ‘Sika aku senderimu.’ ningu kuru mondokole kanu ungumu pilku ambolkole uru peringi pelemele yomboma kepe „lomboroko ola naa molko,, mindili nongo molko kinjingí koleana pulimolá.

<sup>19</sup> Pe kiniá ya ma-koleana mindi yuni olio lipa tapondopale pe kolomolo kinia olio lipa naa tapondolkanje yombomane yomboma kondo kololemele mele maniadopa, yombomane olio paa olandopa kondo kololemolánje peanga.

15:20-28

*Karasi Paa Sika Lomboropa Ola Molorumu. Pe Walte Tondolo Kirima Pali Topa Mania Mundupa, Mélema Pea Pali Nokopale, ‘Pulu Yemone Nokopili.’ Nimba Yu Yuyu Pea Pulu Yemo Simba. (15:1-58 pali)*

<sup>20</sup> „Karasi lomboropa ola naa molkanje olio kolopole lomboropo ola naa molemolá-la, akumu sika, na-kolo Karasi kolopale paa sika lomboropa ola molorumu. Kanukinia, kere-langí se u pulu polopa mongo selu tolemo kinia kanopole ‘Pe pali tomba lémo.’ nimbu pilielemolo, aku sipa mele yu kolopale paa sika lomboropa ola molorumumunga pilipuli ‘Yu sika.’ ningu kuru mondokole uru pelemele yomboma kepe paa sika pe Pulu Yemone topa makisindimbala.’ nimbu pilielemolo. <sup>21</sup> Ye sene u serimu kanu ulumuni kololi ulu-pulumu ma-koleana wendo orumu pelemomonga aku sipala ye sene kepe pe serimu kanu ulumuni kololemele yomboma lomboroko ola mololi ulu-pulumu ma-koleana wendo orumu pelemóla kanumu. <sup>22</sup> Pulu-pulu mana-ye Atamene serimumunga olio yunga pulu lemó yomboma pali kololemolo, aku sipa Karasini serimumunga yunga pulu lemó yomboma pali topa makisindimbala kinia kelepo lomboropo ola molopoconde molomolo. <sup>23</sup> Aku-sipa na-kolo Karasi kinia olio waltikele lomboropo ola naa molomolo. U kumbi lepa Karasi; pe yu kelepa mania ombá kinia yunga yomboma.

<sup>24</sup> „Pe yu ombá kinia yunga yomboma lomboropo ola molomolo, kinia pe ma-koleamo pora nimbá. Yuni gapomanoma pali kinia, gapomanomanga uluma kinia, kolea sukundu yombomane nokolemele uluma kinia, ulu tondoloma kinia, „yombomanga kinia kurumanga kinia, ulu tondoloma pali yuni topa mania mundupale nimbámone, pe ye nokoli kingimu molopa mélema pali nokolemo nambamo yuni Lapa Pulu Yemo simba. <sup>25</sup> „Uluma aku sipa wendo ombá nikirumunga pulumu i-sipa: „Pulu Yemone yunga opa-touma pali topa mania mundumbando u Karasi yu ye nokoli kingimu molopa mélema pali nokomba. <sup>26</sup> Opa-touma topa mania mundupa pora sipale pe kamu kololi ulu-pulumu topa mania mundumba. <sup>27</sup> „Yuni aku sembamonga, ungu se Pulu Yemonga bokuna molemo aku ungumuni nimbale:

“Pulu Yemone nimbale:

“Mélema pali yuni nokopili.

Mélema yunga maniakondo liepili” nirimu.” nimbaaku sipa nilimú. Aku-sipa na-kolo Pulu Yemone “Mélema pali nokopili. Mélema yunga maniakondo liepili.” nirimu kanu ungumuni Pulu Yemo yuyu pea

‘Nokopili.’ nimba naa nirimu, mólo. Sika Pulu Yemone ‘Mélema pali maniandopa, Karasi mélemanga pali olandopa molopili.’ nimba nirimu yemo molemo-na-kolo Pulu Yemo yuyu nambi sepa mélsenga maniakondo molombaye? Aulka se mólo.

<sup>28</sup> Pe Malone mélema pali topa mania mundumba, yu mélemanga pali nokomba kinia kanu walemo kinia yu kepe mania mele molomba. Pe Malone nimbale: “Nando ‘Mélema pali topa mania mundupa ye nokoli kingimu molopili.’ nirimu Pulu Yemo yu mélema pali kamu alieli-alieli ye nokoli kingimu kolali sepa molopale nokopa molopili. Na kepe yunga maniakondo molambo.” nimbá. Kanu-kinia Pulu Yemo mélema paa pali nokopa molomba.

<sup>29</sup> Kiniá „yomboma kolkole lomboroko ola molongemonga ungu se i-sipu nikirula: „Yomboma kolkole sika lomboroko ola naa molonge liemu yombo mare „Karasinga yomboma molkole, kololemelemanga pulu nambolkarenga ‘Ono lipu tapondamili.’ ningu kolali seko no limilíye? „Ononga yombo marene ninguli: „„Pulu Yemone, kololemele yomboma topa naa makisindimba.” nilimili akumu sika liemu yombo mare nambi semu-na liku tapondoko kolali seko no limilíye? „Nambolka unguri sembá ningu aku selemeleye? „<sup>30</sup> „Molo yombo molemele lomboroko ola naa molonge liemu, olio kepe nambi selemolo yombomaye? „Selemolo mele nambi semu-na selemoloye? „Olio semane peangamonga kongonomo andopo selemolomonga alieli olio-kinia umbuna wendo olemomane olio topa kondomba selemo akumu nambi semu-na aku selemoloye? <sup>31</sup> Ango-keme, alieli ‘Na kolopo pora sikiru.’ konopu lelio. ‘Na ono kinia Ye-Awili Yesusi Karasi kinia pea kopu seko molemele mele na yomboma paa kape nimbu molio.’ nikiru akumu kolo naa topo paa sika nikiru mele ‘Alieli ‘Na kolopo pora sikiru.’ konopu lelio.’ nikiru akumu paa sika nikirula.

<sup>32</sup> „Ya kolea-awili, Epesasi „Karasinga semane peangamo topo siliumunga na kote sendekole, ‘Méle-takarama kinia opa sambo.’ ningu na akuna liku mundoringi akumu onone ‘Yu yuyu konopumuni pilipale i kongonomo selemo.’ konopu liengi liemu mongo toko ningu siengi. ‘Na méle nambolka mélema limbu.’ nimbili kolea-awili Epesasi méle-takarama kinia opa selemoloye? Yombo kololemelema Pulu Yemone ‘Lomboroko ola molangi.’ naa nimbá liemu

“Opali kolomolo kene

kiniá „‘Konopu sipu molamili.’ nimbu, no kinia  
kere-langki kinia „awisili we, nombo molamili.”

niemili. <sup>33</sup> „Aku-sipa na-kolo yombo marene ono kondi toko “Ulu-kiri se samili.” níngi liemu, aku ungumu pilku ‘Aku samili.’ paa naa niengi. „Akumunga ungu molemo kanumu. Akumuni nimbale: „

‘Uluma seko kinjilimili yomboma kinia  
ono kinia kopu seko molongi liemu

ononga seko kinjilimili ulumane  
ononga seko kondolemele ulu peangama  
kamu sepa mania mundumba.’

nilimú. <sup>34</sup> „Yombo marene “Yomboma lomboroko ola naa molonge.” nilimili kanu, amu toli ungu nilimilima munduku kelko, umbu-konopu pepili molangi. Ulu-pulu-kiri selemele mele kelko naa sangi. Ononga yombo marene Pulu Yemo molemo mele naa pilku yu-kinia kopu seko naa molemelemonga pilipuli “Aku siku saa.” nikiru. ‘Ono mare Pulu Yemo naa pilielemele.’ nikiru akumu pilkuli pipili kolongi liemu ono papu pipili kolonge.

15:35-58

*Olio Lomboropo Ola Molopole Kangi Lupa Giliepili Molomolo Ungu Se (15:1-58 pali)*

<sup>35</sup> Aku-sipa na-kolo yombo sene mangilipa pilipa nimbale: "Yombo kololima nambi seko lomboroko ola molongeye? „Lomboroko ola molonge kinia, kangi nambi selima gilimbaye?" nilimünje. <sup>36</sup> Aku ungumu lawa sepa nimba kinjeli ungumu. „Kere-langi umbuma selemo mele niembo piliangi; „Kere-langi umbu naa kololima kaliana mundongi liemu konde pumba wendo naa ombá. Kere-langi umbu kololima mindi kaliana mundulimili kinia konde pumba wendo olemo kanumu. <sup>37</sup> „Akumunga ungu se: „Kere-langi umbu se kaliana mundamili." ninguli unju se mongo tolimu pe molomba mele se likuli naa panjilimili. Mongo se mindi liku panjilimili. 'Konape opili.' ningu konape mongoma liku panjilimili. Konape unju mongo toli pe gilimbama naa liku panjilimili. Rasi-witi akula. Unju mongo tolima pe molomba mele liku naa mundulimili. Witi mongoma mindi. Kere-langima pali akula selememe. <sup>38</sup> Kere-langi umbu yu-mele-mele pe molomba mele Pulu Yemone u nimba panjipa 'Unju gomoma i-sipa i-sipa wendo ombo molopa kere-langi i-sipa i-sipa topili.' nilimú mele kere-langi lupa lupama kaliana mundulimili kinia 'Aku sipa ola ombo molopili.' nilimú kanumu.

<sup>39</sup> „Kangima aku sipala.. „Kangima pali selu-sipa mólo. Yombomanga kangima lupa; owá kongimanga kangima lupa; keramanga kangima lupala; omamanga kangima lupala. <sup>40</sup> Muluna gilimili mélema lupa; mana lemele mélema lupala. Aku-sipa na-kolo muluna gilimili mélema kanopo peanga pilielemolo mele lupa, mana lemele mélema kanopo peanga pilielemolo mele lupa. <sup>41</sup> Enamo yunga au nimba gilimú kanopo peanga pilielemolo mele lupa; olimu au nilimú kanopo peanga pilielemolo mele lupa; kombokandima au nilimili kanopo peanga pilielemolo mele lupa; kombokandima selu-siku au naala nilimili, kombokandima ononga yu-mele-mele au nilimilila.

<sup>42</sup> Kololemele yomboma lomboroko ola molonge kinia aku sipa sembala. U kangi gilimúmu lupa; pe kangi gilimbamo lupala. U gilimú kangi óno selememe akumu purupa kiri lemó kangimu; Pulu Yemone kanu kangimu topa makisindimba kinia lomboropa ola molomba kangimu purupa kiri naa lemba kangimu. <sup>43</sup> Kangi óno selememe kangi akumu méle kirimu, kanopo kiri pilielemolo; kangi lomboropa ola molopale gilimbamo kangi peangamo, kanopo peanga pilimulú kangimu. Kangi óno selemelomo enge naa pelemo kangimu; kangi lomboropa ola molombamo enge paa pemba kangimu. <sup>44</sup> Kangi óno selememe akumu mana „mindi, manda gilimú kangimu; kangi lomboropa ola molombamo mulu-koleana manda gilimba kangimu.

Ya mana molomolo kangi se gilimú liemu mulu-koleana molomolo kangi se paa sika gilimbala. <sup>45</sup> Aku sipa mele „Pulu Yemonga, bokuna ungu se molemo. Kanu ungumuni nimbale:

"U kumbi lepa mana-ye Atame  
„Pulu Yemone sepa wamopale,

'Mana konde molopili.' nimba  
ulu-pulu se sirimu kinia konde molorumu."

nilimú; „aku-sipa na-kolo, pe orumu Atame „Pulu Yemone konde mololi ulu-pulumu sirimumu lupa;. Yu 'Mana-yomboma „mulu-koleana, konde molangi.' manda nimbá ulu-pulumu sirimu. <sup>46</sup> Mulu-koleana konde molomolo ulu-pulumu u kumbi lepa wendo naa orumu. Mana konde molomolo ulumu u kumbi lepa wendo orumu; mulu-koleana konde molomolo ulumu pe wendo orumu. <sup>47</sup> U kumbi lepa molorumu Atame Pulu Yemone ma sene sepa wamorumu; akilepa orumu Atame mulu-koleana ye se orumu. <sup>48</sup> U kumbi lepa mana-ye molorumu Atamene mana-yomboma kalopa limúmunga ono yunga „kangimu giliepili, molorumu mele mindi molemele; mulu-koleana molonge yomboma mulu-koleana „kangimu giliepili, molemo yemo mele

molonge.<sup>49</sup> Olio „Karasinga yomboma, u mana-yemo molorumu mele molemolo mele pe aku sipula mulu-koleana yemo molemo mele molomolo.

<sup>50</sup> Ango-keme, nane onondo paa sika nimbu sikirumu: Mana meme pelemo kangimu Pulu Yemo ye nokoli kingimu molopa nokolemo mulu-koleana manda pumba naa molomba. Méle kolopa purupa kiri lemó se mélema kolopa kiri lemóma naa lemó koleana manda pumba naa molomba.<sup>51</sup> Kiniá ungu se u lopi sepa perimu se nimbú sekeromo paa mimi siku piliaa! „Karasi kelepa wale talo-sipa naa opili, olio pali uru naa pemolo. Aku-sipa na-kolo „uru pelemele yomboma kinia, olio „konde molomolo yomboma kinia, pali sika „kangimu, topele topa „kangi se lupa gilimba.“<sup>52</sup> Aku ulumu paa waltikele sembá. Mulu matolo kamu pora nimbando bikollomo ungu nimbá kinia aku ulumu wendo ombá. Waltikele, kariapá selemo mele, aku ulumu sembá. Bikollomo ungu nimbá kinia yombo kololima kelko kolou naa kolongendo lomboroko ola molonge. Pe olio „Karasinga yombo konde molomoloma olionga kangima, topele tomba.<sup>53</sup> Kangi purupa kiri lemó akumu topele topa, naa purupa kiri lemba kangimu paa gilimba; kangi kololemo akumu topele topa kangi naa kolopa konde molopa mindi pumbá kangimu paa gilimba. „Olionga mana-kangimu topele naa topa kangi se lupa naa gilkanje mulu-koleana pumbá aulka se paa naa lelka, akumungaaku sipa mele sembá.<sup>54</sup> Kanu-kinia kangi purupa kiri lemómo kelepa topele topa naa purupa kiri lemba kangimu gilimba, kanu kangi kololemomomo kelepa topele topa konde molopa mindi pumbá kangimu gilimba kinia „Pulu Yemonga, bokuna molemo ungu se molemo mele sika kamu wendo ombá. Kanu ungumu i-sipa:

“Kololi ulu-pulumu

Pulu Yemo yunga, opa-toumu,  
akumu-kinia Pulu Yemone opa sepale  
kamu topa mania mundorumumunga

kololi ulu-pulu akumu kamu mania purumu.”

nilimú.<sup>55</sup> „Aku sembamonga ungu se pea bokuna molemo, akumu i-sipa: „

“Kololi ulu-pulumu, nuni yomboma

toko mania mundoni engemo sena lemoye?

Kololi ulu-pulumu, nuni yomboma

‘Mindili nangi.’ ningu tolono tolomo sena lemoye?”

nimba molemo.<sup>56</sup> Kolólimunga yomboma mindili sipa tolemo tolo akumu ulu-pulu-kirimu. „Yombomane ulu-pulu-kiri selemelomonga ‘Kolomolo kinia Pulu Yemone olio ‘mindili namili.’ nimbá.’ ningu pilkuli kolongendo pipili kololemele kanumu., Ulu-pulu-kirimunga tondolomo „Pulu Yemonga, ungu-mané „Mosisini yando, sirimumane silimú. „Ungu-manemane nimbale: ‘Ungu-manema naa pilku liku pulua tonge kinia mindili nonge.’ nilimúmunga pilkuli yombomane kololi ulumuaku siku pilkuli pipili kololemele kanumu.,<sup>57</sup> Akumu sika na-kolo olionga Ye-Awili Yesusi Karasini olionga nimba senderimumunga „Pulu Yemonga ungu-manema kinia, ulu-pulu-kirima kinia, kololi ulumu kinia, „kanumanga tondoloma mania purumu, olio naa nokopa ulu se manda naa selemomonga Pulu Yemo kinia “Paa ange.” nikimulu.

<sup>58</sup> Nanga konopu mondolio ango-keme, „Karasinga yombo kololemelema sika lomboroko ola molko kangi se lupa konde giliepili molonge, kene ‘Sika.’ ningu kuru mondolemele mele munduku naa kelko, tondolo munduku kuru mondoko mindi molame! Ono ulu umbuna se wendo ombá kinia ‘Pipili kolkomolo kene pilipu molemolo mele mania pupili mundupu keleamili.’ paa naa niengi! Ono Ye-Awilimunga kongonomo kála seko selemelomo we mania naa pumbá, „kanu kongonomone kere-langì mongoma sika tomba, kene Ye-Awilimunga kongonomo mindi tondolo munduku, siye naa kolko seko molangi.

*Kolomongo-Awili 16*

## **Pollone Yuyu Ulu Mare Sembá Mele Konopumuni Pilierimumanga Ungu Mare**

### 16

*16:1-4*

*Jerusalleme Karasinga Yomboma Liku Tapondongendo Kou Mare Liku Maku Toko  
Siku Mundungimunga Ungu Se*

<sup>1</sup> Onone Pulu Yemonga yombo „Jerusalleme molemelema, ono „liku tapondoko, kou-mone singíndu liku maku tokomelemonga „ungu se niembo:“ U nane kolea Galla-sia poropinji kolea lupa lupamanga Karasinga yombo talapemo maku tolemelemanga “Sangi.” nimbu, nimbu sirindu mele ono aku siku sangi. „Nane i-sipu nimbu sirindu:“  
<sup>2</sup> Alieli koro senga senga „Juda yombomanga koro molemele wale Sambatemo pora nimba,“ pulu-pulu kongono walemo wendo ombá kinia ono yu-melete-melete u kou-mone lingíma apuruku pilkuli mare we taltangi. ‘Pollo ombá kene olio kou-mone lipu taltopo molamili. Yu ombá kinia kelepo mare lipu maku naa tamili.’ ninguli u aku siku maku toko taltoko molangi. <sup>3</sup> Kanu-kinia na ombole, onone Jerusalleme yomboma kou-mone mengo pungu singí ye mare ningu taltongema nane pepá mare topo ono sipuli “Onone Jerusalleme yomboma singí kou-monema mengo pangí.” nimbu lipu mundumbu. <sup>4</sup> Molo ‘Na kepe pumbú.’ konopu liendu liemu ono na kinia pea kopu sepo pamili.

*16:5-12*

*Pollone Korini Yombomando “‘Kanambo Wambo.’ Konopu Lekero.” Nimba, Yu  
Kinia Timoti Kinia Apollos Kinia Yu-Mele-Mele Korini Pungimunga Nirimu Ungu Se*

<sup>5</sup> Na kolea Masedonia poropinji „yombo molemelema, pumbu „kanopole, nimbúmuni, pe ono molemelena ombó. Na paa sika u Masedonia pumbú. <sup>6</sup> Ono molemelena „ombole, wale mare ono-kinia molombonje. Molo kolea ali sepa poporome awili sepa tolemo olima pali ono-kinia molombonje, naa pilkiru. ‘Pe na kolea marenga pumbú sembó kinia na liku tapondoko mundú-pangi.’ nimbu ono-kinia wale mare molombo. <sup>7</sup> ‘Na kiniá iseli-u ombo ono-kinia wale kanga-kolte mindi naa molombo.’ konopu leker. ‘Ye-Awilimuni, ‘Na ono-kinia wale awisili molani.’ , nimu liemu aku sambo.’ „nimbu Masedonia u pumbú. <sup>8-9</sup> Aku-sipa na-kolo ya kolea-awili Epesasi ‘yombo awisili Karasinga yomboma molangi.’ nimbu lipu tapondombo aulka se „Pulu Yemone,“ akisinderimumunga Epesasi „nondopo mundupu kelepo senga naa pumbú.“ „Olio Juda yombomane, ‘Pendikosi wale’ „nilimulu, kanu walemo u ombo pupili na ya we molombo. Aku-sipa na-kolo ‘I kongonomo naa sei!’ ningu aulkamo pipi singí sekemele yombo awisili molemele.

<sup>10</sup> ‘Ono molemelena,’ Timoti omu liemu ‘Yu pipili naa kolopili.’ ningu “Papu okono. Pea kopu sepo molamili.” niengi. Na Ye-Awilimunga kongonomo sepo molio mele yu aku sipa selemo kene ono-kinia molomba kinia ‘Taka lepa molopili.’ ningu nokangi. <sup>11</sup> „Yu Ye-Awilimunga kongonomo sendeli ye se molemo, kene ononga yombo marene yu liku bulu naa siengi. Pe ono mundupa kelepa na moliona kelepa yando ombándo ‘Yu konopu peanga pepili.’ ningu liku tapondoko liku mundangi. ‘Yu genupili kinia ombá.’ nimbu nokopo molio.

<sup>12</sup> Olionga genu Apollos „mangilku pilierimumunga kiniá ungu se pundu topo niembo:“ ‘Olionga genupilima ono kanonge onge kinia yu pea kopu seko pangí.’ nimbu tondolo mundupu niliu. Aku-sipa na-kolo iseli-u yu “Naa pumbú.” nimba molemo. “Pe walte yu yuyu aulka se kanopo lipuli pumbú.” nimba molemo.

*16:13-18*

### *Pollone Ungu Mare Pea Nirimu Unguma*

<sup>13</sup> Ono , 'Ulu se wendo ombá.' ningu, mimi siku kanoko molaa! 'Karasi sika.' ningu kuru mondolemele mele siye naa kolko tondolo munduku kuru mondoko molaa! , 'Umbuna mare wendo ombá.' ningu, pipili kolko naa molko, konopu tondolo pupili molaa! Tondolo munduku molaa! <sup>14</sup> Uluma pali sengendo ,Pulu Yemo kinia yomboma kinia pali, konopu mondoko sangi.

<sup>15</sup> Ango-keme, ono Korini yomboma, kolea Akaya poropinji ,molemele, koleana Karasinga yombo molemelemanga Sitepanasinga yomboma ono paa kumbi leko 'Karasi sika.' ningu kuru mondoringi yomboma molemele mele ono pilielemene. Yunga yombomane 'Pulu Yemonga yombo kake selima lipu tapondamili.' ningu aku siku mindi alieli seko molemele. Ango-keme, nane ono tondolo mundupu mawa sepo nimbuli: <sup>16</sup> Sitepanasinga yomboma kinia, kanu yombomane selemele mele aku siku ,Pulu Yemonga, kongonomo kála-seko seko ,yomboma liku tapondolemele, yomboma kinia pali, liku awi siengi. <sup>17</sup> Sitepanas kinia Potunatas kinia Akaikas kinia ono na molorunduna oringi kinia konopu sirindu. Ono ,Korini yomboma, 'Na kanopo lipu tapondopo nokamili.' ningu naa olemele-na-kolo i ononga ye yopoko ongo 'ononga' ningu na liku tapondoko nokoringimunga konopu sirindu. <sup>18</sup> Kanu yemane na kinia ono kinia pea 'Konopu peanga pepili molangi.' ningu seringi. Kanu ye yopokone selemele mele aku siku selemele yomboma kape ningu ononga unguma liku awi siku mimi siku pilingí kinia papu.

**16:19-24**

### *Pepámo Topa Pora Simbando Pollone Yuyu Pepá Torumu Unguma*

<sup>19</sup> ,Na ya, kolea Esia poropinji ,molio, kolea lupa lupama Karasinga talapena yombomane "Ono manda molemeleye?" ningu, ningu mundukumili.

Akuwillia kinia Pirisillatolone 'Ono olto kinia pea Ye-Awilimunga yomboma molemolo.' ningu "Ono paa manda molemeleye?" ningu, ningu mundukumbilila. Karasinga talapena yomboma olonga ulkana pungu maku tolemele yombomane akula nikimili.

<sup>20</sup> Olionga genupili ya ,Epesasi, molemele yombomane pali "Ono manda molemel-eye?" nikimili.

,Pulu Yemonga yomboma selemele mele, ono onono anju yando "Manda molemel-eye?" ningu kangulku kondo kolangi.

<sup>21</sup> Kiniá na nanu i pepámo topole na Pollone "Ono manda molemeleye?" nimbu tokoro.

<sup>22</sup> Yombo se Ye-Awilimu konopu naa mondopa 'Yunga yombomo molambo.' naa nimu liemu manda, Pulu Yemone yu 'molopa kinjepili.' nipili. Ye-Awilimu, nu paa yando oyo!

<sup>23</sup> Ye-Awili Yesusini ono we kondo kolopa molopili molangi.

<sup>24</sup> Ono kinia na kinia pea Karasi Yesusinga yomboma molemolomonga nane ono pali konopu mondokoro mele 'ono piliangi.' nimbu nikiru.

,Aku pea nikiru.,

## PE-KORINI

# Pollone KORINI Yomboma Pepá PE Topa Sirimu Bokumu

*Pollone I Pepá Topa Sirimumunga Ungu-Pulu Mare*

Ungu-pulu talo inia yakondo gomo 676 kinia 754 kinia molemo kanani.

‘ “U-Korini” nilimulu pepámo Pollone u topa sipale pe oli mare ombo purumu kinia ya “Pe-Korini” nilimulu pepá akumu **kolea-awili Korini** moloringi Karasinga yomboma kinia **Korini** lierimu kolea Akaya poropinji moloringi Karasinga yomboma kinia pepá topa sirimu.’ ningu pilielemele (**Pe-Korini** 2:13, 7:5 kanani).

Ye marene **Korini yombomando** kolo toko ninguli: “Pulu Yemonga ungu-sikama mane sikiemu. Pollone kolo topa nimba kinjilimú. Pollo yu Yesusini “Nanga kongonomo sende-pu.” nimba lipa mundorumu ye se mólo.” niringi-na pilipale Pollone i pepámo topa sirimu. Pollone sika waltikele kolo mele torumu. “Ombó.” nimba wale se nimba taltorumu-na-kolo umbuna mare wendo ombo yu pumbá serimu aulkamo pipi sirimu kinia naa purumu. “Kolo tambo.” nimba naa nirimu-na-kolo ‘Yunga ungumu yomboma naa piliangi.’ niringi yemane yu “Ombó.” nimba naa orumumunga “Yu kolo toli yemo. Yunga ungumu naa piliangi.” niringi. Akumunga ungu mare Pollone nirimu mele **Pe-Korini** kolomongo-awili 1-7 molemo.

Kolomongo-awili 8-9tolo sukundu **Korini yomboma** kolea Judia disiriki Karasinga yomboma liku tapondongendo kou-mone mare liku maku toko moloringimunga Pollo yu nondopa ombo limbamonga “Welea liku maku toko pora siengi.” nirimu.

Pe kelepa kolomongo-awili 10-13 sukundu Juda ye mare kolo toko mane sili yemando Pollone nimba: “Na Yesusini “Nanga kongonomo sende-pu.” nimba lipa mundorumu ye se sika molio. Ono molemelena sika ombó. Ombole Yesusini “Nanga kongonomo sende-pu.” nimba lipa mundorumu yemo moliomonga seko kinjilimili yema sika iri topo makorombo.” nirimu. Pollo yu sika molorumu mele ungu-pulu se “1. aposel” molemo.

Pollone Yesusi Karasinga kongonomo andopa senderimu kinia umbuna awisili yu-kinia wendo orumu, akumanga ungu awisili ya **Pe-Korini** molemo. Kanu unguma 4:8-9, 6:4-5, 7:5, 11:16-33 molemo.

Ya ungu-pulumu pora nikimu.

*Kolomongo-Awili 1-7*

**Yesusini “Nanga Kongonomo Sende-Paa.” Nimba Lipa Mundorumu Yema Pulu Yemone Kongono Sirimu Mele Pollone Nimba Sirimu Unguma**

*1:1-2*

*Pollone Pepá Tombando Pulu Polopa Torumu Unguma*

<sup>1</sup> Na Pollo, Pulu Yemone na nimba taltorumu-na Karasi Yesusini “Nanga kongonomo sende-pu.” nimba lipa mundorumu yemo, na kinia olionga ,Karasinga ungumu pilieli, genu Timoti pea molopole i pepámo topo sikiru.

Pulu Yemonga yombo talape kolea-awili Korini molemelema kinia, Pulu Yemonga yombo kake selima kolea Akaya poropinji sukundu koleamanga pali molemele yombomanga pali i pepámo ono topo sikiru.

<sup>2</sup> Olionga Lapa Pulu Yemo kinia Ye-Awili Yesusi Karasitolone ono we kondo kolko, ‘Ono konopu pe nipili taka leko molangi.’ niengili.

*1:3-11*

### *Pollone Pulu Yemo Kinia "Ange." Nirimu Ungumu*

<sup>3</sup> Olionga Ye-Awili Yesusi Karasinga Pulu Yemo molemo, yunga Lapa molemόla, aku yemo yu kondo kololi ulu-pulumu pelemo Lapamo, yu 'olio-kinia umbunama wendo olemo kinia, 'Konopu enge nimba pe nipili molangi.' nimba lipa tapondolemo Pulu Yemola, yu kape nimbu imbi ambolopo paka tondamili. <sup>4</sup> Yu, olio-kinia umbunama wendo olemo kinia 'Ono konopu enge nimba pe nipili molangi.' nilimú Pulu Yemo. 'U olio-kinia umbunama wendo olemo kinia Pulu Yemone olio 'Konopu enge nimba pe nipili molangi.' nimba lipa tapondolemo mele yombo mare umbunama wendo ombá kinia aku siku 'Konopu enge nimba pe nipili molangi.' ningu manda liku tapondonge.' nimba yuni olio u aku sipa lipa tapondolemo.

<sup>5</sup> Olione yomboma manda lipu tapondopo 'konopu enge nimba pe nipili molangi.' , nimulúmunga pulumu i-sipa: Karasi u mindili norumu mele kiniá olio yandopa mindili nombo molemolo, aku sipala 'Pulu Yemone Karasi lipa tapondopa 'Konopu enge nimba pe nipili molopili.' nirimu,munga olio 'konopu enge nimba pe nipili molangi.' nimba lipa tapondolemo. <sup>6</sup> Olio mindili nombo umbunama melemolo kinia 'Ono konopu enge nimba pe nipili molko, mindili nolemolá aulkana wendo ongo, molko kondonge aulkana pungí aku lipa tapondoli ulumu ono kinia pepili.' nimbu aku sipu mindili nombo umbunama melemolo. Pulu Yemone olio 'konopu enge nimba pe nipili molangi.' nilimúmunga olio kelepo enge nimbu molemolo kinia kanu ulumuni olione 'ono konopu pe nimba enge nipili molangi.' nimbu manda lipu tapondolemolo kanu-kinia olio mindili silimili kinia molemolo mele ono aku siku mindili silimili kinia ono kepe konopu tondolo mundupa enge nipili taka leko molongela. <sup>7</sup> Olio pilielemolo, 'Ono-kinia umbuna se ombá kinia kuru mondolemele mele siye naa kolko enge ningu kuru mondoko molongela.' nimbu tondolo mundupu kuru mondokomolo. 'Ono olio kinia kopu sepo molopo, mindili pea nolemolo mele ono olio kinia kopu sepo molopo pea konopu enge nimba pe nipili molemolola.' nimbu pilipuli 'Ono aku siku molonge.' nimbu tondolo mundupu kuru mondolemolo.

<sup>8</sup> Ango-keme, ya kolea Esia poropinji na-kinia umbunama sika wendo orumu mele 'Ono mimi siku piliangi.' nimbu siembo. Ulu-umbuna awilimane na lilitmu-kulu 'Na paa kolombonje.' konopu lierindu. <sup>9</sup> Sika nanga konopu sukundu kote senderimu pilipuli ' "Kolopili." nikimunje.' konopu lepole 'Kolombo.' konopu lierindu. Aku-sipa na-koło Pulu Yemonga kongono senderindumunga umbuna kanuma wendo orumu kinia ' 'Nanga engemone na Pulu Yemonga kongonomo selio.' konopu naa leambo.' nimbaaku ulumu wendo orumu. Pulu Yemo, yombo kololima 'Lomboroko ola molangi.' nilimú yemo, yunga engemonga mindi nane kongono ima selio. <sup>10-11</sup> Kanu ulu wendo orumumuni na kolombo serindu-na-koło ya nikiru Pulu Ye akumuni na sepa konde lilitmu. Aku sipala pe na-kinia umbunaaku sipa se wendo ombá kinia lipa tapondopa na wendo limba. 'Pe-pe-kepe, onone 'Pollo lipu tapondamili.' ningu nanga Pulu Yemo mawa sendengemonga umbunamaaku sipa kelepa wendo ombá kinia Pulu Yemo yuni na sika alieli lipa tapondopa 'Unguri naa sepili.' nimba wendo limba.' nimbu tondolo mundupu pilipu molio. Yombo awisilini nanga ningu Pulu Yemo mawa seko 'Lipa tapondopili.' ningí kinia pilipale mawa senge mele sendepa na sepa kondomba kinia yombo awisilini pilku kanokole Pulu Yemondo ninguli: "Ange. Pollo kinia ,yu kinia pea mindili nongi yema, liku tapondonumu papu senu." ningí.

**1:12—2:4**

### *Pollo Konopu Topele Topa Korini Naa Purumumunga "Kolo Naa Torundu." Nirimu Ungu Se*

<sup>12</sup> Na andopo selio mele konopumuni pilipuli 'Ungu serinduma pali sepo kondorundu. Walte sepo naa kinjerindu.' nimbu pilielio mele ono manda nimbu sikirumanga konopu sikiru. Na ono-kinia molorundu kinia Pulu Yemone kanopa 'kake

seli uluma' nimba kanolemoma mindi konopuna pepa, na konopu talo naa pepili ono-kinia sumbi sipu molopo ulu mare serindu mele pilipuli 'Molopo kondorundu.' nimbu pilipu konopu sikiru. Aku uluma konopumuni pilipuli serindu kinia makoleana pilipa kondoli ulu sene na lipa naa tapondorumu. Pulu Yemone na we kondo kolopale lipa tapondorumumunga na aku sipu andopo molorundu. <sup>13-14</sup> I pepá topo sikirumu ono kanoko sundungí unguma topo naa sikiru. Ono manda kanoko ungu-pulumu sumbi siku pilingí mele tokoro. 'Ono pilku sangi.' konopu lekero mele i-sipa: Sika u na serindu mele awisili ono mare pilku sundulimili-na-kolo 'olionga Ye-Awili Yesusi ombá walemo wendo ombá kinia ,ono lipu tapondorundumunga molko kondolemele mele, pilipuli nimbu para sipu konopu sipu kape nimbú mele aku siku kiniá onone pali na sepo molio mele pilkuli yomboma anju anju ningu siku konopu siku kape niengi.' konopu lekero.

<sup>15</sup> „Nane ono pe manda kape nimbú mele, onone kiniá na kape ningí mele,, 'Sika aku siku senge.' nimbu tondolo mundupu kuru mondopole 'Ono wale talo-siku konopu peanga pepili molangi.' nimbu nane "Ono molemelena u ombó." nirindu kanumu. <sup>16</sup> Na konopumuni pilierindu mele i-sipa: 'Kolea Masedonia poropinji pumbúndu u ono molongena ombole, pe Masedonia pumbú. Pe Masedonia mundupu kelepo ono molongena kelepo yando ombó kinia onone na kolea Judia disiriki "Pu." ningí.' konopu lierindu. <sup>17-18</sup> "Aku sembó." nirindu mele konopumuni naa pilipuli we nirinduye? Na "I sembó. I sembó." nimbu, nimbu panjiliu mele manyombomane konopu talo pepili ulu se naa sengendo kolo toko "Semolo." nilimili mele na aku sipu naa niliu. Ungu se sembondo "Sika sembó." niliu. Naa sembondo "Sika naa sembó." niliu. Pulu Yemone konopu topele-mapele naa topa sika nilimú mele nane i paa sika nikiru: Ulu se "Mólo." nimbúndu "E." nimbu, "E." nimbúndu "Mólo." nimbu, sere lepo paa naa niliu.

<sup>19</sup> Na keme Saillas keme Timoti keme olione ono moloringinaombo Pulu Yemonga Malo Yesusi Karasinga semanemo topo sirimulu, kanu yemone "Sika." nimbando "Mólo." naa nimba, "Mólo." nimbando "Sika." naa nilimú, paa mólo! Yuni "Sembó." nilimú mele paa sika alieli selemomonga ,na yunga kongonomo sendeli yemone niliu ungu-manga kolo se naala pelemo,. <sup>20</sup> Pulu Yemone "I-sipu sembó. I-sipu sembó." nimba, nimba panjerimu kanu uluma sika wendo ombá pulu yemo Karasi yu kanumu. Akumu pilipuli ,Pulu Yemonga ungu yomboma nimbu sipuli, Karasinga imbi pilipu lepole "Imu sika sembá." nimboliaku sipu Pulu Yemonga imbi ambolopo paka tondolemolo. <sup>21</sup> Na kepe ono kepe Pulu Yemone enge silimú-na Karasi kinia tondolo mundupu kopu sepo molemolo. , 'Olio yunga kongono sendangi.' nimba, Pulu Yemone olio nimba taltopa, <sup>22</sup> ' 'Olio yunga yomboma molemolo.' nimbu piliamili.' nimba olionga konopuna sukundu Pulu Yemo yuni 'Nanga' nimba imbi topa, 'Olione pilipuli ' 'Olio sika yunga yomboma.' nimba, nimba taltorumu. Pe sika yunga mélema pali olio simba.' nimbu piliamili.' nimba iseli-u yunga Minimu 'olionga konopuna molopili.' nimba sirimu. ,Mélse kou awili pulimú kinia 'Liemili.' nimboli 'Kanu mélemo taltolemo yombomone 'Pe kou pali kamu ongo singí.' nimba piliepili.' nimboli mélemo we liepili u kou-mone koltalo mele sipuli yando olelolo, aku sipa mele.,

1:23—2:4

*Korini Yomboma Moloringina Pollo Welea Naa Purumumunga Ungu-Pulumu (1:12—2:4 pali)*

<sup>23-24</sup> ,Na "Ombó." nimboli naa orundumu kolo torundu liemu, Pulu Yemone nanga konopuna kanopa kolo torundu mele mona nimba para sipili. Aku-na-kolo kolo naa tokoro. Nane ono umbuna se naa simbundu kolea-awili Korini kelepo welea naa orundu. 'Onone 'Karasinga ungu sika.' ningu kuru mondolemelemonga

'Ono kuru mondoko molangi.' nimbu na ononga ye awilimu molopo, ono nokambo.' manda naa nimbú. Ono kuru mondolemele ulu akumuni ono enge ningu molemelemonga 'Ono konopu siengi.' nimbu ono pea tapu topo kongono selemolo. Akumu Pulu Yemo mangilku pilkuli "Pollo naa orumumunga pulumu nimba sikimumu sika nikimunje?" ningu mangilielemolánje yuni "Sika nikimu." nilka.

## 2

<sup>1</sup> Akumunga, na nanu konopumuni pilipuli nimbu pilierindu mele i-sipa: 'Na ono molongena kelepo ombo wale talo-sipu umbuna simbú kinia manda naa sembá.' konopu lepole naa orundu. <sup>2</sup> Nane ono molongena ombo umbuna se silka kinia konopu kiri panjiku molemolánje pe yombo nawene na konopu simbú unguma sendelkaye? Na ombómonga ono konopu umbuna pepili molemolánje pe na konopu simbú uluma nambi seko liku tapondolemoláye? 'Nane ono umbuna simbú kinia ono konopu umbuna pepili molkole aku siku konopu simbú ungu se manda naa selemolá.' <sup>3</sup> Aku sipu pilipuli 'Ono u konopu topele toko molangi. Pe na ombó kinia olio konopu sipu konopu seluna pupili molamili.' nimbu nane 'umbuna simbúma u piliangi.' nimbu pepá se u topo sirindu kanumu. Na pilkiru, 'Na konopu siliu kinia ono kepe konopu silimili. Konopu naa siliu kinia ono konopu naala silimili.' konopu lekero. <sup>4</sup> Sika nane ono pepá se topo sirindu kinia 'ono u seko moloringi mele pilipuli, pepá tombondo na kameléna paa mindili sepa konopu umbuna sepili kola sepo molopole pepámo topo ono sirindu. 'Mindili siembo.' nimbu naa sirindu. 'Nane ono konopu paa lakopa mondolemo.' ningu piliangi.' nimbu topo sirindu.

2:5-11

### *'Yombo Sene Ono Sepa Kinjimba Kinia 'Mania Pupili.' Ningu Siye Kolangi.' Nirimu UNGU SE*

<sup>5</sup> Aku-sipa na-koło andi Korini ye sene sepa kinjerimu kanu, yemone umbuna se sirimuaku umbunamo na naa sirimu. Aku ulu umbunamo ono sirimu, ononga yombo marene aku umbunamonga mindili noringi. Nane tondolo mundupu naa nimbúndu, "Ono pali mindili noringi." naa nikiru, "Mare mindili noringi." nikiru. <sup>6</sup> Yombo awasilini kanu yemo sepa kinjerimumunga 'mane siku, mindili siringi kanumu manda mele. <sup>7</sup> Manda kene pe kiniá yu mindili siringi kanumu 'yu umbuna paa awili sene yu paa topa mania mundumba.' ningu, kiniá 'Undupa kanopili.' ningu mindili siringi mele munduku kelko yuni ulu-pulu-kiri serimumu 'Mania pupili.' ningu siye kolko yu kondo kolko, konopu peanga liepili ungu mare engi liemu papu. <sup>8</sup> Akumunga, 'Yu paa sika konopu mondolemele mele piliepili paa ningu siengi.' nimbu tondolo mundupu mawa sekero.

<sup>9</sup> U nane ono pepá topo sirindumunga pulumu i-sipa: 'Nane ono manda manjipu, "Saa." niliu mele onone pilkuli alielipilkulilikuselemele molo mólonje, piliambo.' nimbu kanu pepámo topo sirindu. <sup>10</sup> Kanu yemone sepa kinjerimu ungumu onone 'Mania pupili.' ningu siye kolkoméle mele nane kepe 'Mania pupili.' nimbu siye kolkorola. Kanu yemone siye kolombo ulu se sika sepa kinjerimu liemu koronga 'Mania pupili.' nimbu siye kolondu. Ono kondo kolopo lipu tapondopo Karasi kanopa molopili siye kololio. <sup>11</sup> 'Kurumanga nokoli, Setenenga tondolomone olio topa mania naa mundopili. 'Karasi kinia tondolo mundupu molamili.' nimbuaku sipu olio seko kinjilimili yombomane seko kinjilimili unguma 'Mania pupili.' nimbusiye kolamili. Setenene olio 'Karasinga yomboma molemolomonga, konditopa 'Topomania mundambo.' nimba ungu selemoma pali pilielemolo kanumu.

2:12-13

*Pollo Toroas Taonondo Pumbale Taitasi Naa Kanorumumunga Konopuna Umbuna Serimu Ungumu (7:5-7 kinia pea)*

<sup>12</sup> U na Karasinga semane peangamo topo simbundu Toroas taonondo purundu kinia Ye-Awili muni na akuna kongono manda sembó aulkamo lipa sumbi sinderimu mele mona lierimu kanorundu. <sup>13</sup> Aku-na-kolo nanga genu Taitasi akuna naa ‘omba, molorumu koropo kelepole nanga konopumu peanga naa lierimu-kulu Toroas yombomando “Molaa.” nimbu mundupu kelepo Masedonia poropinji purundu.

2:14-17

*Karasina Kongono Senderingi Yema Yunga Tondolomone Enge Ningu Moloringi Ungu Se*

<sup>14</sup> „Sika na konopu peanga naa lierimu,-na-kolo Pulu Yemone alieli olio ‘Yesusini ‘Yunga kongonomo sende-paa.’ nimba lipa mundorumu yema, lipa tapondolemo, olio umbuna se wendo olemo kinia Karasinga tondolomone enge nimbu molopo, Pulu Yemo yunga talape yomboma konopu sipu molemolo, akumunga nane yundu “Ange.” nikiru. Pulu Yemone olio lipa tapondolemomonga Karasi yu molemo mele ungu sembama pali semane topo silipu andolemolo. I ungu muna tolemo, koleamanga pali pilku manda sendelemele. <sup>15</sup> Karasinga muna peangamo tolema-na Pulu Yemone olio aku sipa mele muna peangamo tolemo pilielemo. Aku muna peanga tolemomo yombomanga pali, mindili nolemolá aulkana wendo ongo molko kondonge aulkana pulimili yombomanga kepe mindili nongo molko kinjingí aulkana pulimili yombomanga kepe, suku-singina muna tolemo. <sup>16</sup> Aku-sipa na-kolo aku munamone ungu talo nilimú. Mindili nonge aulkana pulimili yombomane ‘Karasinga semane peangamonga, munamo pilielemelie kinia lupendi tolemo. Kanu munamo ono ‘mini pali, kolonge ulu-pulumu pelemomonga aku sipa lupendi tolemo. Molko kondonge aulkana pulimili yombomane ‘semane peangamonga, munamo pilkuli, ono konde molko kondoko mindi pungí ulu-pulumu pelemo munamo pilielemelie. Pe yumele-mele pilingí. ‘Karasinga semane peangamone yombo mare molko kondonge ulu-pulumu papu silimú-na-kolo yombo mare molko kinjingí ulu-pulumu silimú, akumunga ‘Karasinga semane peangamo andopa topa simba, kongonomo nawene manda sembaye? ‘Oliolio manda mólo.. <sup>17</sup> Ye awisilini selemele mele olio aku sipu naa selemolo kanumu. Pulu Yemonga ungu mimi siku naa ningu kolo toko bisinisi mele seko kou-mone awisili limili mele olioaku sipu naa selemolo. Pulu Yemone olio i kongonomo silimúmunga Karasi kinia pea sere lepo molopo olionga konopu sumbi sipa pepili Pulu Yemone kanopa molopili yunga unguma yomboma nimbu silimulu.

### 3

*Kolomongo-Awili 3*

*Karasini Lipa Mundorumu Yema Pulu Yemone Pe Nimba Panjipa Mi Lierimu Ungu Kondemonga Kongonomo Sendelemele. Aku Ungu Kondemo Olandopa; Ungu Umu Maniandopa Mele Ungu Se*

3:1-6

*Pulu Yemone Ungu Konde Mi Lepa Nimba Panjerimu Ungumunga Kongono Sendeli Yombomanga Ungu Se*

<sup>1</sup> ‘Aku-sipa na-kolo ‘aku sipu selio’ nikiru akumu, nane kelepo pulu polopo nanu kape nimbu nanga imbimu nanu lipu ola mundumbu sekeroye? Molo yombo marene selemele mele pilipuli sembondo ‘Na sepo molio mele ono piliangi.’ nimbu ‘Yombo sene pepá tondopili.’ nimbu membo ombo ono lipu ora simbuye? Molo pepá aku sili se onone ‘Na lipa tapondopili.’ ningu na pepá membo pumbu yomboma lipu ora simbumu manda toko singiye? <sup>2</sup> Na molio mele yomboma lipa ora silimú pepá

akumu ono Korini Karasinga yombo nane konopu mondolioma mindi. Na molio mele 'kanamili.' ninguli yombomane ono Korini yomboma kambu mele toko pilielemele.  
<sup>3</sup> Ono Karasini pepá topa mundorumu molemele mele we-yombomane kanolemele. Nane kongono selio akumuni Karasini kanu pepámo torumu. ‚Aku-sipa na-koło, pepá kanuna penjollone ungu se naa torumu; konde molemo Pulu Yemonga Minimuni kanu pepámo torumu. Pulu Yemone yunga kini kou-paratolonga imbi topa Mosisi sirimu mele senga pepá naa torumu; ono yombomanga konopuna torumu.

<sup>4</sup> Aku sipu nikirumunga pulumu i-sipa: Karasini nanga konopuna ungu nimba silimú-na pilipuli 'Pulu Yemone na sika 'yunga kongonomo sendani.' nimba, nimba taltorumumu mundupa naa kelepa i kongono seliomo lipa tapondopa engemo silimú. Kongonomo nanga mólo.' nimbu pilipuli aku sipu konopu talo naa pepili tondolo mundupu nikiru. <sup>5</sup> I kongono seliomo 'Nanga engemone manda selio.' paa manda naa nimbú. Na tondolo se naa pelemo. Pulu Yemo yuni na enge silimú-na nane i kongonomo manda selio. <sup>6</sup> Pulu Yemone nimba panjipa mi lierimu ungu kondemonga kendemande-yemo 'molani.' nimba yuni enge silimú-na molio. Aku ungu konde nimba panjipa mi lierimumu u ‚Mosisi molopili Pulu Yemone Isirele yomboma ungu-mane sipa kouna ola, imbima topa „Saa.” nimba, nimba panjipa mi lierimu mele mólo; ungu konde nimba panjipa mi lierimu akumu Pulu Yemonga Minimuni "Wendo omba pepili." nirimu. Pulu Yemone u Mosisindu "Yomboma ungu-mane si." nimba yu nimba sirimu ungu kanumane yombo mini pali kolonge ulu-pulumu silimú; aku-na-koło ‚Pulu Yemonga, Minimuni olio konde molopo kondopo mindi pumulú ulu-pulumu silimú.

### 3:7-18

#### *Pulu Yemone Pe Nimba Panjipa Mi Lierimu Ungu Kondemonga Tondolomonga Ungu Se (3:1-18 pali)*

<sup>7</sup> Pulu Yemone kou-paratolonga ungu-mane topa ‚Mosisi, sirimu ungu-mane akumane yombo molko kinjiku mindi pungí aulkamo akisinderimu, aku-na-koło ‚kanu ungu-manema, wendo orumu kinia Pulu Yemonga tondolo pa sélimu kinia wendo orumu. Kanu tondolo pa sélimu Mosisinga kumbikeremo aki torumu kinia, ena kanolemele kinia mongoma takele selemo mele Isirele yombomane yunga kumbikeremo kanoringi kinia ononga mongoma takele serimu-na manda naa kanoringi. Aku-sipa na-koło pe ‚wale mare omba purumu kinia, kanu ‚Mosisinga kumbikerena, pa serimumu pora nirimu. Kololi ulu-pulumu perimu ungu-manema wendo orumu kinia aku sipa tondolo pa sélimu kinia wendo orumu liemu <sup>8</sup> ‚pe kiniá yombo konde molko kondoko mindi puli ulu-pulumu pelemo Pulu Yemonga, Minimuni silimú mélemo-kinia wendo olemo tondolo pa sélimu paa olandopa tondolo naa pumbaye? ‚Paa pumbá..’ <sup>9</sup> 'Yomboma seko kinjilimilimunga mindili nangi.' nimba kongono selemo mélemo méle tondolo se pea wendo orumu liemu kiniá yomboma ‚lipa tapondopa, ulu-pulu-kirima siye kolopa ono sumbi sindilimú kongono selemo mélemo méle tondolo se pea wendo okomo méle tondolo akumu paa olandopa naa pumbaye? ‚Paa pumbá..’ <sup>10</sup> Kiniá wendo okomo tondolo pa seli akumu paa lakopa tondolo pa seli olandopamo. U wendo orumu tondolo pa seli akumu paa maniadopa. Akumu unguri mólo mele. <sup>11</sup> Pe ‚Pulu Yemone mulú Sainaina ola ungu umu nimba panjipa mi lepa ungu-mane sirimu unguma, pora nimbándo wendo orumu unguma tondolo pa sélimu-kinia wendo orumu liemu kiniá ungu konde nimba panjipa mi lekemo ungumu pora naa nimba, pepa mindi pumbá ungumu-kinia wendo okomo tondolo pa sélimu paa olandopa naa pulimúye?

### 3:12—4:6

#### *Pulu Yemone Pe Nimba Panjipa Mi Lierimu Ungu Kondemonga Kongono Sendeli Yemane Pipili Naa Kolko Kongono Selememe Mele Ungu Se (3:1—4:6 pali)*

<sup>12</sup> Pe kiniá, ‘Pulu Yemone ungu konde nimba panjipa mi lekemomonga kon-gonomone yomboma paa sika lipa tapondopa kondolemo, aku ungu kondemo sika pora naa nimbá.’ nimbu tondolo mundupu kuru mondopole, ‘Yomboma pali piliangi.’ nimbu pipili naa kolopo mona nimbu silipu andolio. <sup>13</sup> Na Mosisini serimu mele naa selio. ‘Na kumbikerena pa selemomo kumbulupa pora nimbá sekemo mele Isirele yombomane naa kanangi. ‘Tondolo pa serimu mele we selemo.’ ningu piliangi.’ nimba Mosisini mulu-maminia se lipa yunga kumbikeremo pipi sirimu. <sup>14</sup> „Mosisini yunga kumbikeremo pipi sirimu, -na-kolo Isirele yombomanga konopuma mélsene pipi sirimu mele we silimú. Yandopa yandopa kiniá kepe Mosisini yunga kumbikerena pipi sirimu mulu-maminiamo Isirele yomboma-kinia we lemómonga Pulu Yemonga ungumu pilingí pilipa kondolimu ono-kinia naa pepili Pulu Yemone nimba panjipa mi lierimu ungu umunga unguma molemo bokumu we kambu toko kanoko ungu-pulumu naa pilku molemele. Yombo sene ‘Karasinga yombo se molambo.’ nimba yu-kinia kopu seko molembele kinia mindi Karasini mulu-maminiamo wendo lindilimúmunga Isirele yomboma kinia we lemó mulu-maminiamo wendo naa purumu. <sup>15</sup> Paa sika yandopa yandopa kiniá walemonga kepe Mosisini torumu bokuna molemo unguma kanoko kambu tolemelema pilielemele kinia mulu-maminia kanumuni ononga konopuma we aki tolemo. <sup>16</sup> Aku-sipa na-kolo yombo se konopu topele topa Ye-Awilimu molemona pulimú kinia „Ye-Awilimuni, mulu-maminia kanumu yombomonga konopuna wendo lindilimú, „Mosisi Pulu Yemo molorumuna pumbándo mulu-maminiamo kumbikerena wendo lipa purumu mele.. <sup>17</sup> Ye-Awilimu yu Mini kanumu. Pe yombo se Ye-Awilimunga Minimu kinia kopu sepa molemo yombomo, ‘Pulu Yemo molemona pumbu molambo.’ nilimú kinia, mélsene yu manda pipi naa silimú. „Ungu-manema molo kololi ulu-pulumu molo ulu-pulu-kirimu, akumanga sene yu manda naa nokopa, manda pipi naa simba.. <sup>18</sup> Akumunga, olio „Karasinga yomboma, pali mélsene kumbikerema aki topa pipi naa silimúmunga olionga kumbikerema kariyápa mele gilipa Ye-Awilimunga tondolo pa sélimunga mini-mana sélimu akuna pelemomo yomboma lipu ora silimulu kanolemele. Aku sipu sepo molamili yunga tondolo pa sélimu olio-kinia pepa olandopa olandopa tondolo pumba selepa pulimú kinia olio kepe yu-mele au lepo yu sepa molemo mele olandopa olandopa manda manjipu selepo pulimulu. Ye-Awilimu yu Minimu, akumuni aku ungumu selemo.

## 4

### *Kolomongo-Awili 4*

*Yesusini Lipa Mundorumu-na Yunga Kongono Sendelemele Yema Ma-ne Seli Mingima Mele Molemelemonga Ungu Se*

<sup>1</sup> „Pulu Yemone ungu konde nimba panjerimumu olandopa, akumunga tondolo pa sélimu olandopa, yombomaaku sipa lipa tapondolemo, akumunga, Pulu Yemone na kondo kolopa, ‘Sepo kondambo.’ nimba, i semane peangamo andopo topo siliu kongonomo sirimumunga pilipuli „umbunama wendo olemo kinia, ‘Siye sekemo. Kongonomo keleambo!’ naa niliu. <sup>2</sup> Lopi seko seli uluma kinia, pipili seli uluma kinia, koronga lipu bulu sirindu. Kolo toli uluma naa sepo, Pulu Yemonga ungumu topele naa tolio. Pulu Yemone kanopa molopili ‘Yombomane pali ononga konopumane pilkuli na Pulu Yemonga kongonomo sendelio mele kanokole ‘Sika sumbi sipa selemo.’ ningu piliangi.’ nimbu nane ungu sikamo mona nimbu para siliu. <sup>3</sup> Molo semane peangamo topo siliu kinia sika mélsene pipi simba kinia naa piliengi liemu molko kinjingí koleana pulimú aulkana pulimili yombomaaku selemo. <sup>4</sup> Ye nokoli Karasimu yu paa Pulu Yemo none sélimu molemo. ‘Karasinga tondolo pa sélimunga semane peangamonga pa sendélimu naa kanangi. „Kanokole ono we

kondo kolopa ‘Lipu tapondambo.’ nilimú ye nokoli Karasimu kanoko pilingí kene naa kanangi.,’ nimba ya ma-koleamo nokolemo pulu ye „kolo toli kuru Setene, yuni ‘Karasi sika.’ ningu kuru naa mondolemele yombomanga konopumane pilingí aulkamo pipi sindilimú kinia sika naa kanolemele.

<sup>5</sup> ‘Na ye peangamo molio.’ nimbu semane topo naa siliu kanumu. Nane nimbuli: “Yesusi, ‘Pulu Yemone ‘olio nokopa kondomba ye se lipu mundumbu.’ nimba taltorumu ye nokoli, Karasimu yu Ye-Awilimu. Yesusini nando “Sei.” nirimu mele sepo, na ono ‘Karasina Korini yomboma,nga kendemande-yemo molio.” niliu.

<sup>6</sup> Akumunga pulumu i-sipa:

“Kolea simbulu tolina pa sepili.” nirimu „kinia  
ma-koleana pa serimu, kanu Pulu Yemo yuni  
olionga konopuna sukundu pa senderimu.

‘Olione ‘Pulu Yemonga tondolo pa sélimuni  
Karasina kumbikerena pa selemo.’  
nimbu piliamili.’ nimba aku serimu.

<sup>7</sup> Aku-sipa na-kolo ma-ne selemene mingu, ‘akuma yombomane kanokole konopu naa mondolemele mingu, akumanga sukundu yombomane ononga méle peanga kou olandopa pulima panjilimili aku sipa mele i méle peanga nikirumu olio kangi pange seli yema-kinia pelemo. Aku selemomonga yombomane kanokole ‘I tondolo paa peanga olandopa na-kinia pelemomo nanga tondolo se mólo. Pulu Yemo yunga tondolomo mindi pelemo.’ ningu pilingí. ‘Na ma-ne seli mingu kirimu mele molio-na kanokole na kape naa ningí, akumu peanga.,’ <sup>8</sup> Alieli-alieli, koleamanga pali, na-kinia umbunama wendo olemo-na-kolo akumuni na kamu topa mania naa mundulimú; wale marenga na sembó mele konopumuni pilipu sunduliu-na-kolo nanga konopumu kamu kiri lepa sepa sembambu naa silimú; <sup>9</sup> nanga opa-toumane na seko kinjingí selemene-na-kolo Pulu Yemone na mundupa naa kelielemo; onone na tolemele-na-kolo na kamu toko naa kondolemele. <sup>10</sup> Yesusi toringi kolorumu mele alieli na ‘Mindili nongo kolani.’ ningu na seko kinjiku nanga kangimu tolemele-na-kolo naa kolopo we konde molio kanu ulumuni Yesusi kamu naa kolorumu, we konde molemo mele lipa ora silimú. ‘Na tolemele kinia Yesusini na lipa tapondolemomonga konde molio akumu Yesusi konde naa molkanje na manda naa lipa tapondolkka kanumu. ’

<sup>11</sup> Akumunga pulumu i-sipa: Na konde molio yemone Yesusinga kongonomo sendeliomonga yombomane na toko kondonge selemene kinia nanga kangikundu kololi ulu-pulumu pelemomonga kolka-na-kolo naa kolopo we konde molio akumunga nanga kangimuni ‘Yesusi konde molemo mele piliangi mona liepili.’ nimba lipa ora silimú. <sup>12</sup> Akumunga, ‘kongono seliomonga, kololi ulu-pulumu na-kinia kongono selemene-na-kolo , ‘Mindili nombo kolondu liemu unguri mólo.’ nimbu semane peangamo andopo topo siliumunga, konde mololi ulu-pulumu ono-kinia kongono selemo.

<sup>13-14</sup> U ye sene nirimu, Pulu Yemonga bokuna molemo mele i-sipa:  
“ , ‘Pulu Yemone sika na lipa tapondopa  
umbuna selemo mele wendo limba.’ ,  
nimbu kuru mondopole  
aku sipu nirindu.”

nirimu mele nane aku sipu kuru mondopole yomboma nimbu siliu. ‘Ye sene Ye-Awili Yesusi kolorumu kinia topa makisinderimu ye akumuni na kepe ono kepe olio Yesusi kinia pea topa makisindipa yu molemona lipa memba pumbá.’ nimbu pilipuli ,kololi ulumu kinia konde mololi ulumu-tolonga ungumu aku sipu, pipili naa kolopo andopo nimbu siliu. <sup>15</sup> Na-kinia aku sipa umbunama wendo olemo akumu ono ‘Karasina yomboma, lipa tapondombando wendo olemo. ‘Pulu Yemone we kondo kololi ulumuni anju anju pumba yombo awisili lipa tapondolemo-monga

yombo awisili olandopa olandopa Pulu Yemo kinia "Ange." ningyu kape ningu imbi ambolko paka tondangi.' nimba ,aku ulu umbunama na-kinia wendo olemo.,

**4:16—5:10**

*Yesusini Lipa Mundorumu-na Yunga Kongono Sendelemele Yema Siye Naa Kolko Kongono Tondolo Munduku Selemelomonga Ungu-Pulu Se*

<sup>16</sup> Aku ,selio ulumuni ono aku sipa lipa tapondolemo, na kinia ono kinia olio aku sipa ulu peangama wendo ombá mele, pilipuli ,umbunama na-kinia wendo olemo kinia, 'Apa, siye sekemo. Kongonomo keleambo!' nimbu konopuna umbuna pepili naa molio. Sika nanga kangimu kololemo-na-kolo alieli mini konoputoloconde pumba mindi pelemo. <sup>17</sup> Aku seliomonga pulumu i-sipa: Na-kinia umbuna wendo olemodoma yu ungu awili se mólo; yu wale laye-kolo wendo olemo. 'Kanu ulu umbunamane Pulu Yemo tondolo pa sélimu kinia molemona pumbu yu kinia pea aku kolea paa peangana molombolo aulkamo akisindilimú.' pilipuli 'I ulumu paa méle tondolo awilim; umbuna wendo olemodoma pe nilimú.' nimbu pilielio. <sup>18</sup> Akumunga, na mongomone kanolio mélema 'Mimi sipu kanambo.' naa niliu; naa kanolio méle kanuma 'Paa kanamboa!' nimbu molio. 'Mongomone kanolio mélema pora nimbá. Naa kanolio mélema alieli lepa mindi pumbá.' nimbu pilipuli 'Umbuna na-kinia wendo olemo akuma ulu pe nilima.' niliu.

## 5

**5:1-10**

*Mulu-Koleana Gilimú Ulkamanga Molomolomonga Ungu-Iku Se (4:16—5:10 pali)*

<sup>1</sup> Aku sipu pilipu molemolo mele nikirumunga ,ungu-pulu se i-sipala:, Olio pilkimulu, olionga ya mana-kangimu, serele-ulkamo mele, sukundu molemolo. Akumu purumba sikisingí kinia Pulu Yemone ,ulka,conde se 'Olio molamili.' nimbu sepa wamolemomo olio simba, kanu ulkamo mana-yombomane takolemele kanu sili ulka se mólo. Kanumu mulu-koleana alieli gilipa mindi pumbá ulkamo. Akumu olio pilielemolo. <sup>2</sup> 'Pe aku sipa ulkana sukundu molomolo,-na-kolo iseli-u ya makoleana i ulkana molopole, 'Olio sukundu molomolo, ulka kondemo ,Pulu Yemone, paa pakondopili!' nimbu yakala kolopo konopuna kola sepo molemolo. <sup>3</sup> 'Akumu ,wale-pakoli mele, pakondomba kinia pe we-we naa molomolo.' nimbu pilipuli kiniá 'aku sipu sepo molemolo.,' <sup>4</sup> Olio i serele-ulkana molopole 'Mulu-maminia se naa pakopo we molemolo.' nimbu pilipu 'Mulu-koleana ulkamo pakámola!' nimbu umbuna kolopo konopuna kola sepo molemolo kanumu. 'Kiniá pakopo molemolo kangimu kulupu, topo eltamili.' nimbu aku sipu naa nikimulu. 'I kangi kolombamoconde molopa mindi pumbamone aki topa, topa mania mundumba.' nimbu 'Olionga mulu-koleana gilimú kangimu pakamili.' nimbu molemolo. <sup>5</sup> Pulu Yemo yuyu 'Olioconde molopa mindi puli kangima pakangi.' nimba olio iseli-u lipa sumbi sindipale, ' 'Pe molonge nikiru mele paa sika molonge.' ningyu piliangi.' nimba iseli-u ,yunga, Minimu olio sirimu. 'Mélse kou awili pulimú kinia 'Liemili.' nimbuli 'Kanu mélemo taltolemo yombomone 'Pe kou pali kamu ongo singí.' nimba piliepili.' nimbuli mélemo we taltondopili u kou-mone koltalo mele sipuli yando olemolokuo sipa mele.,'

<sup>6-7</sup> Pe kiniá, 'Pulu Yemone olio Minimu sirimu, yu kinia pea molemolo.' nimbu pilipuli, 'Pulu Yemone nirimu mele sika wendo ombá.' nimbu pilipuli, na-kinia umbunama wendo olemo kinia siye naa kolopo alieli konopu tondolo pupili molio. Sika pe wendo ombá mele konopumuni mindi pilipuli 'Paa sika wendo ombá.' nimbu tondolo mundupu kuru mondolio. Mongomone kanopole 'Sika lepomo.' nimbu naa kanolio. 'Na ya mana-kangimunga sukundu molopole Ye-Awilimu kinia yunga koleana pea naa molembolo.' nimbu pilielio. <sup>8</sup> 'Aku-sipa na-kolo, nane u nikiru mele kelepo nikirula: ,Umbunama wendo olemo kinia kepe pe wendo ombá mele

pilipuli, siye naa kolopo konopu tondolo pupili molio. ‘Na mana-kangimu iseli-u mundupu kelepo Ye-Awilimunga koleana pumbu yu kinia pea molembolánje paa peanga.’ konopu lepo molio. <sup>9</sup> Akumunga, ma-koleana kangimu kinia molondu liemu, molo ma-koleana ulkama kinia sulu sepo molondu liemu Ye-Awilimuni kanopa peanga pilielemo unguma sembondo mindi konopu kimbu sipu molio. <sup>10</sup> Karasini olio kote sendepa pilimba kinia aulka senga lupa pumbá yombo se naa molemo. Olio pali yunga kumbikerena pumbu gilimulu. Akumu pilipuli aku sipu ‘Ye-Awilimuni kanopa peanga pilielemo unguma sambo.’ nimbu pilipu molio. Pe yunga kotena gilimulu kinia u ya ma-koleana kangima kinia molopole olio sepo kondorumulu molo sepo kinjerimulu mele pilipa apurupale méle kalomba.

**5:11—6:2**

### *Olio Pulu Yemo Kinia Kelepo Konopu Seluna Pupili Molomolomonga Ungu Se*

<sup>11</sup> Akumunga, ‘Kotena gilimulu.’ nimbu pilipu, Ye-Awilimu kinia pipili kolopo lipu awi siliu mele pilipuli ‘na Karasinga kongonomo sendeli yemo molopo niliu mele kinia, Karasini olio pe molopo naa kinjimulú aulkamo akisinderimu mele kinia, aku ungutolo, yombomane ‘Sika.’ ningu kuru mondangi.’ nimbu paa tondolo mundupu nimbu siliu. Na konopumuni pilipu uluma sepo molio mele ‘yombo marene pilku sunduku kolo tolemele-na-koło, Pulu Yemone sumbi sipa kanolemo. ‘Ono kepe nane selio mele onone kanoko konopumane pilkuli ‘Aku ungumu sika.’ ningu piliengi liemu peanga.’ nimbu pilkiru.

<sup>12</sup> I ungu nikiru akumuni ‘Onone na ‘ye peangamo’ ningu piliangi.’ nimbu ‘nanga imbi olandopa molopili.’ nimbu kelepo naa nikiru, mólo. ‘Onone na selio mele kanoko peanga pilku, ‘Pollone selemo mele ye marene kanoko sunduku yunga ungu-bulkundu kolo toko nindilimili mele yombomane naa pilku,’ yu sika molemo mele pilingí kinia peanga.’ ningu manda anju anju konopu siku ningu singí aulkamo lipu ora siembo.’ nimbu nikiru. ‘Yombo marene yombo senga konopuna molemo melemo naa kanoko, mongomane kangimu mindi kanoko peanga pilku yu kape ningu yunga imbi ambolko paka tondoko ungu nilimili mele na aku siku kanokole kolo toko nilimili yemando manda pundu toko ungu sika mare manda ningu siengi.’ nimbu i unguma nikiru. <sup>13</sup> ‘Kanu yemane na molio nilimili mele aku sipu, sika na amu tondu liemu aku mandala. Pulu Yemonga kongonomo sendembondo aku sipu amu topo molio. Molo na konopu sumbi sipa pepili ‘kongono sepo, molondu liemu ono lipu tapondombondo aku sipu ‘sepo, molio.

<sup>14</sup> Karasini na konopu mondolemo mele pilipuli i kongonomo manda mundupu naa kelepo, ‘Yombo marene na kanoko kiri pilingí kinia unguri mólo.’ nimbu, we ambolopo molio. Na pilielio: Ye selumu yombomanga pali kolondorumu akumunga olio pali kolorumulula. ‘Akumu sika serimu.’ nimbu tondolo mundupu kuru mondopole, yuni na paa lakopa konopu mondopale aku sipa senderimu mele pilipuli ‘I kongono seliomo naa sendu liemu manda naa sembá.’ nimbu kongonomo we sepo molio. <sup>15</sup> Aku-sipa na-koło olio yombomanga pali nimba we naa kolondorumu. ‘Olio ‘Karasinga, konde molemolo yomboma oliolio sepo molomolo mele konopumane pilipu naa molamili. Olionga nimba kolondopa lomboropa ola molorumu yemo mindi pilipu molopo yu kanopa peanga pilimba uluma mindi sepo molamili.’ nimba yuni olionga nimba aku senderimu.

<sup>16</sup> Aku sipu pilipuli na u Karasinga unguma naa pilipu konopu topele naa topole mana-konopumuni pilipu yomboma apurorundu mele lupa; kiniá aku sipu yomboma naa apuruliu. Konopu-umu perimu kinia sika u Karasi kepe aku sipu apurupu, yu molorumu mele pilipu sundorundu, aku-na-koło kiniá yu aku sipu pilipu naa apuruliu. <sup>17</sup> Akumunga, yombo se Karasi kinia kopu sepa molemo kinia Pulu Yemone kanu yombomo ‘Yu yombo kondemo molopili.’ nilimú, yu sika yombo kondemo

molemo. U sepa kinjipa molorumu uluma kamu mania purumu. Kiniá ulu kondema ,yu-kinia, wendo olemo. <sup>18</sup> I ulu kondema pali Pulu Yemone mindi selemo. Olio u yu-kinia opa-tou molorumulu mele 'Kiniá aku sipu naa molamili. Olio kinia yu kinia konopu seluna pupili molamili.' nimba Karasi olio sirimu akumu-mambele olio yu-kinia konopu seluna pupili kopu sepo manda molemolo. Aku sepale 'yomboma yu-kinia opa-tou molemele mele munduku kelko na-kinia konopu seluna pupili kopu sepo manda molamili.' nimba ,Pulu Yemone , aku kongonomo na sirimu. <sup>19</sup> Olio Pulu Yemo-kinia aku sipu konopu seluna pupili kopu sepo manda molemolomonga pulumu i-sipa: Karasini olionga nimba senderimumunga Pulu Yemone olio mana-yomboma-kinia yu-kinia opa-tou naa molopo konopu seluna pupili kopu sepo manda molomolo aulkamo lipa sumbi sinderimu. Aku senderimumunga Pulu Yemone yombomanga ulu-pulu-kirima mundupa kelepa, 'aku seko kinjeringimunga kote naa sendembo.' nirimu. Pe 'Yomboma-kinia na-kinia konopu seluna pupili kopu sepo manda molamili.' nimba Pulu Yemone "Kanu ungumu yomboma ningu siengi." nimba aku kongonomo na sirimu. <sup>20</sup> Na aku sipa nimba taltopa kongonomo sirimumunga na Karasinga kere-pundu manda lepo molopo yuni nando "Yomboma nindei." nilimú mele unguma andopo yomboma nimbu sindiliu. Akumu i-sipa mele: Pulu Yemo yuni 'Ono i-siku i-siku sangi.' nimbando nando "Nindefi." nirimu mele andopo nindiliu. Pe kiniá nane Karasinga kere-pundu nimbu taltopo molopo yunga kolali sepo ono paa tondolo mundupu mawa sepole "Pulu Yemo kinia opa-tou molemele mele munduku kelko yu kinia konopu seluna pupili sere leko manda molangi." nikiru. <sup>21</sup> Ulu-pulu-kiri se naa serimu yemo Pulu Yemone 'Kanu yemone olionga ulu-pulu-kirima lipa tapondopa mepili.' nimba yu sirimu. Aku serimu-kulu yu sika ulu-pulu-kiri seli ye se none serimu. Pulu Yemone aku serimumunga olio Karasi kinia pea kopu sepo molopole Pulu Yemone olio kanopale 'Yombo sumbi nilima.' nimba kanolemo.

## 6

<sup>1</sup> Na Pulu Yemo kinia kongono kopu sepo molopole ya nindu ungu kanumunga ungu se pea ono tondolo mundupu nimbú sekero: "Ono Pulu Yemone we kondo kolopale ,ono lipa tapondopa sepa kondorumu ulu kanumu, 'We naa serimu. Serimu ulumu we mania naa pupili.' niengi. ,U ono we kondo kolopale lipa tapondorumu kinia moloringi mele kiniá aku sikula molangi. Konopu topele toko ulu-pulu peangama naa seko molonge kinia manda naa sembá.," nikiru. <sup>2</sup> Aku nikirumunga ungu se Pulu Yemone nimbale:

"Nane ono we kondo kolombo serindu walemo  
wendō orumu kinia

ononga ,ungu niringima, pilierindu.

Ono mindili nolemolá aulkana wendo lipu

na-kinia pea molko kondonge aulkana

lipu mondombo walemo wendo orumu kinia

ono lipu tapondorunu."

nirimu. Nane ono paa nimbu sikiru: Piliame! ,Pulu Yemone nirimu wale akumu paa kiniá., Kiniá Pulu Yemone yomboma we kondo kolomba walemo. Kiniá Pulu Yemone yomboma lipa tapondopa, mindili nolemolá aulkana wendo lipa yu-kinia pea molko kondonge aulkana lipa mondomba walemo.

**6:3-13**

*Pollone Karasinga Kongono Senderimumunga Mindili Norumu Mele Ungu Se*

<sup>3</sup> 'Nanga kongonomo mania naa pupili, ungu-taka naa tondangi.' nimbu yombomane na kanoko kiri pilku ungumu naa pilku lingí ungu se naa selio. <sup>4</sup> Akumu mólo. 'Yombomane na kanokole 'Pulu Yemonga kendemande-yemo molio.' ningu piliangi.'

nimbu aku selio. Na-kinia ungu mare wendo olemo kinia selio mele kanokole 'Yu sika Pulu Yemonga kendemande-yemo.' ningu pilingí uluma i-sipa:

‘Umbunama, na-kinia wendo olemo kinia ‘Siye sekemo.’ naa nimbu, tondolo mundupu molio;

ulu umbuna lupa lupama na-kinia wendo omba,

na seko kinjilimili uluma wendo omba,

na mindili nombo molio uluma wendo olemo.

<sup>5</sup> Wale marenga, onone na kopene toko,

‘wale marenga, ka siku,

‘wale marenga, yombomane pali na-kinia mumindili kolko ru ningu lisiku sukundu sukundu ongo maku toko na seko pipili kondolemelela.

Na kála-sepo kongono sepo,

‘wale marenga, uru naa pepo,

‘wale marenga, gelene kolopo moliola.

<sup>6</sup> Yombomane na kanokole ‘Pulu Yemonga kendemande-yemo molemo.’ ningu pilingí mele i-sipala:,

Na ungu kake selima sepo,

pilipa kondoli peangamo ambolopo,

konopu tambu nipili molopo,

yomboma kondo kolopo sepo kondolio;

na Mini Kake Sélimu kinia kopu sepo molopo,

yomboma konopu mondolio ulu akumu kolo naa topo paa sika konopu mondolio;

<sup>7</sup> sika-unguma nimbu,

Pulu Yemonga engemone kongono selio;

yomboma opa sengendo ele tolo mélema ki ekendo ekendo ingi siku ambololemele mele na áku sipu ulu sumbi nilima ambololio;

<sup>8</sup> yombo marene nanga imbimu ambolko paka tondoko,

marene nanga imbimu toko maria munduku;

marene nanga ungu-bulkundu nindiku,

marene na kape nilimili.

Kongono sikama sumbi sipu selio-na-koło nando “Kongonomo nu kolo toko sekeno.” nilimili;

<sup>9</sup> yombomane na kanoko imbi silimili-na-koło “Pea molamili.” naa ningu, bulu silimili.

Wale mare ‘Paa kolkoro.’ konopu lelio-na-koło konde pumbu we molio.

‘Na selio mele kanoko kiri pilkuli ‘Munduku kelko konopu topele tani.’ ningu, pultane tolemele-na-koło na toko naa kondolemele.

<sup>10</sup> Na alieli konopu kiri awisili pelemo-na-koło ‘Akumu yu sepili.’ nimbu konopu sipu molio;

koropamo molio-na-koło yombo lupama ‘Yombo-kamakoma molangi.’ nimbu aulka se akisindiliu;

méle seluri kepe naa taltolio-na-koło méle paa awisili lupa-lupama taltolio.

‘Yombomane na kanokole ‘Yu sika Pulu Yemonga kendemande-yemo molemo.’ ningu piliangi.’ nimbu áku sipu sepo molio.,

<sup>11</sup> Korini yomboma, nane ungu se lopi naa sepo, pali onondo nimbu para sikiru. Nane ono paa lakopo konopu mondolio. <sup>12</sup> Nane ono ‘Kondo naa kolopo siye kolambo.’ paa manda naa niliu-na-koło onone na ‘Kondo naa kolopo siye kolamili.’ nilimilu, munga konopu seluna naa pupili molemolo. <sup>13</sup> Lapalini ononga

bolangomando nilimili mele kiniá nane ‘Ono nanga bolangoma.’ nimbuli onondo i-sipu nikiru: ‘Nane ono konopu awili sepo mondolio mele onone na aku siku konopu awili seko mondangi.’ nimbu nikiru.

**6:14—7:1**

*Karasinga Yomboma Pulu Yemonga Ulka Kake Sélimu Molemelemonga Ultukundu Molemele Yomboma Kinia Seluna Kopu Seko Naa Molangi Ungu Se*

<sup>14</sup> Karasinga yomboma ‘Karasi sika’ ningu kuru naa mondolemele yomboma-kinia seluna kopu seko naa andoko, kopu seko kongono naa seko, bisinisi kopu seko naa sangi. Ulu-pulu-kirima kinia ulu sumbi nilima kinia liku sere leko manda kongono sengeleye? Pa sélimu kinia simbulu tolimu kinia olo nambi seko kopu seko molongeleye? „Akumu paa manda mólo, kene „seluna kopu seko naa molangi.“ <sup>15</sup> Karasi kinia kurumanga nokoli sepa kinjeli „Setene, kinia konopu seluna pupili molembeleye? Karasinga ungumu pilielemele yomboma kinia Karasinga ungumu naa pilielemele yomboma kinia konopu selu-sipa pele moye? <sup>16</sup> Pulu Yemo molemo ulka-tembelemonga ulka suluminia kake selina kuru koyonge mélema manda mengo pungu popo tongeye? Olio, konde molopa mindi puli Pulu Yemonga suluminia kake sélimu molemolo, yu olio-kinia molemo kanumu. „Yu-kinia aku sipu molemolo, monga ungu se Pulu Yemone u nirimu kanumu. Yuni nimbale:

“Na nanga yomboma kinia seluna kopu sepo molopo,  
ononga suku-singina molopo ono pea andomolo.

Na ononga Pulu Yemo molombo;  
ono nanga yomboma molonge.”

nirimu. <sup>17</sup> „Ya nikiru, akumunga

‘Ye-Awilimuni nimbale:

“„Ultukundu yomboma kinia, we-mélema anjiku  
cape ningu popo tolemele yomboma kinia,“  
ono-kinia seluna naa molko, munduku kelko  
pungu kolea senga lupa molo-pangi.”

“Kalaro mololi mélema „ultukundu yombomane  
anjiku popo tolemele mélema, kinia  
ulu-pulu-kiri pelemo mélema kinia kanuma  
naa ambolko,  
aku mélema kinia ungu se naa saa.”

“Naa ambolonge kinia nane  
“Molamili waa.” nimbu ono yando limbu.”

<sup>18</sup> “Na ononga Lapamo molombo,  
ono nanga bolangoma molonge.

Na Pulu Yemo, mélemanga pali engemo  
pelemo yemone aku sipu nikiru.” nirimu.  
kanumu.

## 7

<sup>1</sup> Nanga konopu mondolio ango-keme, Pulu Yemone „yunga yombo molonge yomboma-kinia aku sipa nimba panjerimu unguma ono-kinia na-kinia pelemomonga pilipuli, kangikundu kepe konopu kinia minitolokondo kepe kalaro mondolemo uluma mundupu kelepo, Pulu Yemo kinia pipili kolopo lipu awi sipuli ulu kake seli sikama sepo molamili.

**7:2-16**

*Korini Karasinga Yomboma Kinia Ulu-Pulu-Kiri Se Perimumu Pe Konopu Topele Toko Kanoko Kiri Pilieringimunga Pollo Paa Konopu Sirimu Ungu Se*

<sup>2</sup> Onone „kelko, na konopu awili seko mondayo! Nane „ononga, yombo se sepo naa kinjipu, ‘Yombo se sepa kinjepili.’ nimbu ungu se naa sepo, kolo topo yombo senga mélema toropo naa lipu, aku uluma naa serindu. <sup>3</sup> Aku-na-kolo aku nikiru ungu kanumuni nane ‘Onone seko kinjengi.’ nimbündu naa nikiru. ‘Aku-sipa na-kolo ononga yombo se sepo naa kinjerindu kene na nambi semu-na liku bulu sikimiliye?’, Nane u onondo nindu mele i-sipa: “Nane ono paa tondolo mundupu konopu mondoliomonga ono konopu mondolio mele ulu sene manda topa mania naa mundumba kololi ulumuni kepe, we konde molopole umbuna se wendo ombá ulu sene kepe, ono konopu mondopo ‘kopu sepo molemolo mele molamili.’ nimbu molio aulkamo manda pipi naa simba.” nirindu. Nane ono aku sipu konopu mondoliomonga “Seko kinjikimili.” naa nilka. <sup>4</sup> Nane onondo nikirumu ‘Pilku naa sundungí. Uluma pali sumbi siku seko kondonge.’ nimbu tondolo mundupu kuru mondopole onondo sumbi sipu nikirumu. ‘Onone selemele mele yomboma piliangi.’ nimbu ono paa olandopa kape nimbu semane topo siliu. Ulu-umbuna awisili wendo olemo kinia ono molemele mele pilipuli na paa konopu awili-sepo sipu konopu tondolo olandopa pupili molio.

<sup>5</sup> ‘Aku sipu molio, monga pulumu „niembo:’ U na kolea Masedonia poropinji pumbuli, ‘ono Korini yomboma molko kinjeringi mele pilipuli, konopu peanga naa pepili kanga-kolte kepe manda naa molorundu. Na-kinia ulu-umbuna lupa lupama wendo orumu. Yombomane na-kinia opa mele seko angelema awisili niringi; konopuna sukundu umbuna sepa mini-wale purumu-na manda naa molorundu. <sup>6</sup> Aku-sipa na-kolo Pulu Yemone yombo paa konopu umbuna pepili molemelema ‘konopu peanga pepili molangi.’ nilimú kanu Pulu Yemone na ‘konopu peanga pepili molopili.’ nirimu kinia Taitasi na molorunduna orumu akumunga na konopu peanga pepili molorundu. <sup>7</sup> Akumu sika na-kolo yu na molorunduna orumu akumuni mindi Pulu Yemone na ‘konopu peanga lepo molambo.’ ni naa nirimu, mólo. Ono Korini yombomane Taitasi yu ‘konopu peanga lepo molopili.’ niringi akumuni Pulu Yemone na ‘konopu peanga lepo molambo.’ nirimula. Taitasini nando ‘ono seko molemele mele nimba sirimu pilipuli na konopu paa olandopa sirindu uluma i-sipa:’ “Na kanamilila!” ningu waka kolko, na u seko kinjiku, na seko konopu kiri panjinderengi mele munduku kelko, kelko konopu topele toko ono na-kinia ‘konopu seluna pupili kopu sepo manda molamili.’ ningu konopu awisili kimbu siringi mele nimba sirimu pilipuli na konopu paa awili-sepo sirindu.

<sup>8</sup> Nane pepá u topo mundorundumu kanokole ono sika umbuna serimu-na-kolo akumu mandala, ‘nane pepá topo sirindu mele pilku seringimunga, wale kanga-kolte ono konopu umbuna pepili moloringi akumu unguri mólo. Sika nane pepá topo ono sirindumuni ono wale kanga-kolte mindili noringi kinia pilipuli kondo serimu-na-kolo <sup>9</sup> kiniá na konopu sikiru. Nane ono umbuna sirindu akumunga konopu naa sikiru. Ono umbuna sirindu akumuni ono konopu topele tondorumu akumunga na konopu sikiru. Pulu Yemo yuni ‘Ulu-umbuna akumu ono-kinia wendo opili.’ nirimu-na nane pepá topo sirindu akumuni ono kanga-kolte kepe sepo naa kinjerindu. <sup>10</sup> Ono Pulu Yemone umbuna silimú akumuni ‘Ono seko kinjilimili mele kanoko kiri pilku konopu topele toko, mindili nolemolá aulkana wendo ongo, yu-kinia pea molko kondonge aulkana pang.’ nimba lipa mondoleso-na akumu peanga, unguri mólo. Aku-sipa na-kolo mana wendo olemo ulu-umbuna akumane kololi ulu-pulumu wendo olemo. <sup>11</sup> Ono pilkuli, i Pulu Yemone silimú umbuna akumuni ulu peanga lupa-lupama ono-kinia wendo olemomonga papu silimú mele mimi siku pilku molangi. Umbuna akumuni ulu peanga lupa-lupama ono-kinia wendo olemo mele i-sipa: U we moloringi-na-kolo topele toko kiniá ‘Unguma mimi sipu pilipu, ulu-pulu-kiri se olio-kinia naa pepili

paa sumbi sipu molamili.' ningu selemele ulumu kinia,  
yombomane ono kolo toko „Seko kinjilimili.” „  
nilimili unguma ono mongo toko ningíndu  
popenge seko selemele ulumu kinia,  
„ononga ye sene sepa kinjilimú kinia„  
onone pipili kolko yu iri tolemele ulumu kinia,  
‘Ye sene sepa kinjerimu kinia unguri naa sepo  
we molorumulumunga Pulu Yemone olio  
“seko kinjikimilimunga  
mongo likimili kene mindili nangi.” nimbá.’ ningu,  
mini-wale munduku molemele ulumu kinia,  
‘Olio „Pollo kelepo, kanámola, „Yu kinia,  
konopu sere lepo molamiliya.’  
ningu molemele ulumu kinia,  
ye sene sepa kinjilimú kinia onone tondolo munduku  
yu liku sumbi silimili ulumu kinia,  
„sepa kinjilimú yemo, ‘Sepa kinjilimumunga pundu topili.’  
ningu tondolo munduku selemele ulumu kinia,  
kanu ulu peanga selemelemane ulu-pulu-kiri ono-kinia pemumu onone naa ambo-  
longi mele lipa ora sipa, akumunga mongo se wendo ombá kinia ono-kinia “Pundu  
tangi.” nimbá mongo se naa pekemo mele lipa ora silimú.

<sup>12</sup> Akumunga, sika ono umbuna sirimu pepámo nane u topo sirindu-na-kolo ‘Ye  
sene sepa kinjerimu.’ nimbu pilipuli kanu pepámo topo naa sirindu. ‘Kanu yemone  
yombo se sepa kinjerimu.’ nimbu pilipuli topo naa sirindula. Yombo talonga manjipu  
pepá topo ono naa sirindu. ‘Onone na paa lakoko konopu mondolemele mele Pulu  
Yemo kanopa molopili onono paa pilku kondangi.’ nimbu kanu pepámo ono topo  
sirindu. ‘Pepá topole “Ne sepa kinjerimu yemo-kinia sangi.” nirindu mele pilku  
sumbi siku seringi kanu ulumuni onone na konopu paa lakoko mondolemele mele  
lipa ora silimú.’ <sup>13</sup> Akumunga „nane ono kanu pepámo topo sirindu kinia kanokole  
moloringi mele kanoko kiri pilku konopu topele toko, seko kondoringi mele pilipuli,  
na konopu peanga pepili molorundu.

Aku-sipa na-kolo akumunga mindi konopu peanga pepili konopu sipu naa  
molorundu. Taitasi konopu awili-sepa kimbu sipale ono moloringina orumu kinia  
onone pali yu liku tapondoringimunga Taitasi yu konopu peanga pepili molorumu  
akumu kanopole na konopu paa olandopa sirindu. <sup>14</sup> Sika u Taitasi pilipa molopili  
ono kape nirindu ungu kanuma yu pumba kanorumu kinia ‘Paa sika nimu.’ nimba  
kanorumumunga na pipili naa kolorundu. U onondo ungu nirindu unguma paa  
sika nirindu mele pe Taitasi pilipa molopili ono kape nirindu ungumu aku sipa  
sikala. <sup>15</sup> Taitasi ono moloringina orumu kinia ono mini-wale munduku pipili kolko  
‘Papu onu. Pea molamili.’ ningu, yuni ungu nirimu mele liku awi siku pilku liku  
seringi mele kanorumu mele kiniá kelepa pilipale ono kondo kolopa olandopa konopu  
mondolemo. <sup>16</sup> Kiniá na pilkiru, ‘Onone uluma pali sumbi siku seko kondonge.’  
nimbu tondolo mundupu kuru mondopole na konopu sipu molio.

*Kolomongo-Awili 8-9*

## **Pollone Karasinga Korini-Yombomando “Kolea Judia Disiriki Karasinga Yombo Molemelema Kou-Mone Siengi Liku Maku Tangi.” Nirimu Unru Se**

*"Kolea Judia Disiriki Moloringi Karasinga Yombomanga 'Kou-Mone Lipu Tapondopo Siemili.' Ningu, Pilku Liku Popenge Seko Liku Maku Tangi." Nirimu Ungu Se*

<sup>1</sup> Manda, ango-keme, kiniá ungu se lupa niembo: 'Masedonia poropinji Karasinga yombo talape molemelema pali Pulu Yemone we kondo kolopa lipa tapondorumuna molemele mele ono piliangi.' nimbu ya nimbu sikiru: <sup>2</sup> Kanu yombomakinia umbuna awisili wendo orumu, paa mindili noringi ulumane ono, 'Molko kondongenje molo molko kinjingínje.' nimba, manda manjerimu kinia ono paa awili-seko konopu siku moloringi. Ono paa koropa pupili moloringi-na-kolo, 'Karasinga yombo talape mare mélema mólo tolemoma, onone kou-mone mélema lipu tapondopo siemili.' ningu kou-mone awisili pilku liku popenge seko siringila.

<sup>3</sup> Onone seringi mele 'kanopole, nane 'Ono Korini yomboma piliangi.' nimbu para siembo. Masedonia poropinji yombomane 'Kou-mone simulú.' niringi mele sikuli, pe kelko mare pea olandopa liku siringila. Onone onono konopumane pilkuli <sup>4</sup> na paa tondolo munduku mawa seko ninguli: "Pulu Yemonga yombo kake seli, kolea Judia disiriki molemelema kolea marenga Karasinga, yombomane kou-mone liku maku toko singí sekemele olione kepe pea lipu tapondopo siemili." niringi. <sup>5</sup> Aku niringi kinia pilipuli 'Onone kou-mone singí.' nimbu pilierindu-na-kolo onone aku siku mindi naa seringi. Ono onono u Ye-Awilimurikuli, pe mindi Pulu Yemone "Saa." nirimu ungu se pilipu nane onondo nirindu unguma konopu talo sepa naa pepili 'Paa pilipu lipu samili.' ningu sumbi siku seringila.

<sup>6</sup> 'Masedonia poropinji yombomane aku siku seringimunga pilipuli, ono Korini yombomane 'Judia disiriki yomboma, we kondo kolko liku tapondoringi ulumu pulu polko seringi kinia 'Taitasini ono kou-mone liku maku tonge mele lipa tapondopili.' nimbu ono moloringina 'Pu.' nimbu lipu mundorundu mele 'Aku siku liku tapondonge ulumu kamu pora nipili.' nimbu yu kelepo ono molemelena lipu mundumbu sekero. <sup>7</sup> Onone 'Samili.' nilimili uluma pali paa tondolo munduku olandopa selemele kanumu. Karasinga ungumu 'Sika.' ningu kuru mondongendo paa olandopa kuru mondoko siye naa kololemele. 'Aku sipu pilipu molemolo mele yomboma piliangi.' ningu taka leko naa nilimili. Tondolo munduku yomboma ningu silimili. Ono paa awili-sepa pilipa kondoli pepili Pulu Yemonga ungumu pilku molemele. Konopu talo naa pepa kolo toli ungu se ono-kinia naa pepili 'Pulu Yemonga ungumu paa olandopa pilipu sepo molamili.' nilimilila. (Nane ono pulu polopo konopu mondorundumunga) onone na paa olandopa konopu mondolemelela. Aku uluma olandopa selemele mele kiniá aku siku 'Yomboma lipu tapondopo kou-mone siemili.' nilimili ulu peanga akumu kepe olandopa sangi.

<sup>8</sup> Ya ono Korini yombomane "Sangi." nikiru akumu ono tondolo mundupu mane sipu naa nikiru. 'Ono Korini yombomane konopu mondolemele mele akumu paa sika selemelenje manda manjipu piliambo.' nimbu 'Yombo marene yombo lupama kondo kolko 'paa lipu tapondamili.' nilimili mele piliangi.' nimbu, nimbu sikiru. <sup>9</sup> Olionga Ye-Awili Yesusi Karasini ono we kondo kolopale serimu mele ono pilielemele. Yuni méle awisili kande-kandema taltorumu-na-kolo yuni 'Ono lipu tapondambo.' nimbale yu ye-koropamo molorumu. 'Na koropa pumbá kinia ono méle awisili kande-kandema taltonge.' nimba ononga nimba yu 'koropamo molambo.' nimba ye-koropamo molorumu.

<sup>10</sup> 'Kou-mone liku maku toko singí, munga nane senge mele pilkiru mele niembo: 'U kalia-ingimunga ono, 'Lipu tapondamili.' ningu, kou-mone mare pulu polko liku maku toringi kanumu kiniá 'kamu liku maku toko pora siengi.' nikiru. Koleamanga pali yombomane pe 'Lipu tapondamili.' niringi-na-kolo ono Korini yombomane kumbi leko 'Lipu tapondamili.' ningu, kumbi leko kou-mone liku maku toringila. <sup>11</sup> Aku kene u liku tapondongendo konopu siku kumbi leko 'Lipu tapondamili.' niringi

mele kiniá aku siku pilkuli kou-mone yu-mele-mele ambolko molemelema mimi siku pilku kamu kou-mone singíma liku maku tangi. <sup>12</sup> Yombo sene 'Yomboma paa lipu tapondambo.' nimbale yuni taltolemo mélemanga méle mare konopu sipa lipa yomboma lipa tapondopa silimú kinia yuni silimú mélema Pulu Yemone kanopa peanga pilielemo. 'Yombo sene 'Lipu tapondambo.' nilimú kinia, Pulu Yemone yuntu "Nu kou-mone kinia mélema naa taltolenoma liku si." naa nilimú kanumu.

<sup>13</sup> Nane 'Yombo mare mindili nolemelema mindili naa nongo, mindili naa nolemelema mindili nangi.' nimbu naa nikiru. 'Nane ono pali mélema manda selu siku taltangi.' nimbu nikiru. <sup>14</sup> Kiniá ononga we taltolemele mélema mólo tolemo yomboma liku tapondonge. Kanu kinia pe walte ono mélema mólo tomba kinia onone kiniá liku tapondoko mélema sikimili yombomane méle awisili taltokole ono liku tapondonge kinia manda selu siku molonge. <sup>15</sup> 'Manda selu siku seko molongemonga, ungu se Pulu Yemonga bokuna molemo. Akumu i-sipa:

'Yomboma kere-langi mana liku maku toringi kinia,  
awisili liltingima tondolo olandopa naa taltoringi;  
kanga seko liltingima mólo naa torumu.

'Awisili liltingima kepe  
kanga seko liltingima kepe, manda serimu.'  
nimba bokuna molemo kanumu.

**8:16—9:5**

*Pollone "Taitasi Kinia Ye Talo Kinia Ono Korini-Yombomane 'Kou-Mone Taltolomelema Pungu Li-Pangi.' Nimbu Ono Molemelena Lipu Mundumbu Sekero." Nirimu Ungu Se (8:1 pulu polko kanou)*

<sup>16</sup> Nane 'Ono kondo kolopo lipu tapondambo.' nimbu pilielio mele Pulu Yemo Taitasinga konopuna molorumumunga Taitasini 'Ono kondo kolopo lipu tapondambo.' nimba pilipa molemola, akumunga Pulu Yemo-kinia "Ange." nikiru.

<sup>17</sup> 'Taitasi aku sipa pilipa molemomonga nane yuntu nimbili: "Korini yomboma molemelena pungu, yomboma liku tapondoko "Kou-mone singíma kamu liku maku tangi." pungu ni-pou." , nikiru kinia pilipale konopu sipa 'Paa aku sipu se-pumbu.' nikimu. Yuni yuyu konopumuni pilipa 'Paa aku sipu sambo.' nimba pilipa molemo akumunga 'nane aku sipu Pulu Yemo-kinia "Ange." nikiru.,

<sup>18-19</sup> Olionga genu se "Taitasi kinia pea kopu seko pangili." nimbu lipu mundukuru, semane peangamo andopa topa silimúmungaaku yemo Karasinga yombo talapemanepali 'Yu sepa peanga silimú.' ningukape nilimili yemo. Kanu yemo nimbu taltopo lipu mundukurumunga ungu-pulu se pea pelemola. Kou-monema lipuli 'Jerusallemendo, simulundu membo pumulú kinia Karasinga yombo talapemanepali kanu yemo ningukape kanokole "Olio kinia pea kopu seko pangili." niringi. Aku niringi pilipuli yu ono Korini yomboma molemelena "Pu." nimbu yu lipu mundukuru. Kanu kondo kolopa 'lipa tapondoli, kongonomo 'Yomboma Ye-Awilimu kape ningí kinia yunga imbimu ola molomba.' nimbu 'Paa samili.' nimbu molemolo. 'Olione 'Ono paa lipu tapondamili.' nimbu molemolo mele kepe kanangi.' nimbu kanu koumonema membo pumulú. <sup>20</sup> 'Onone kou-mone awisili liku tapondoko singíma olione lipuli 'Jerusallememe membo pumulú kinia kou-mone siringi, yombomane 'Olione kou sepo sembambu sirimulu.' ningukape 'olionga ungu-bulkundu nindiku iri naa tangi.' nimbu 'olionga genu ono kanoko peanga pilku kape nilimilimu kinia pea kopu sepo andamili.' nikiru. <sup>21</sup> 'I kondo kololi kongonomo semolo kinia Ye-Awilimuni 'Seko kondokomele.' nimba kanopili.' nimbu kanu kou-mone singíma mimi sipu nokombo sekero. Aku-sipa na-kolo akumu mindi mólo. 'Yombomane kepe sekemolo mele kanokole 'Seko kondokomele.' ningukape 'Kanu genumu pea samili.' nikiru.,

<sup>22</sup> Olionga genu se ‘Olo kinia pea kopu seko pang.’ nimbu lipu mundukurula. Kanu yemone wale awisili kongono tondolo mundupa mimi sipa serimu mele kanorundu. Kiniá kepe ‘Korini yombomane paa sika kou-mone liku tapondoko singí.’ nimba tondolo mundupa pilipale “Ono molemelena paa pambo.” nimba molemo.

<sup>23</sup> Taitasi lipu mundukuru aku yemonga ungu se i-sipa molemola: Yuni na kinia pea kopu sepo Pulu Yemonga kongonomo andopo sepo ononga kongonoma sendelembolo yemo. Genungulu ongeletolonga ungu se pea nikiru: Olo Karasinga yombo talapemane “Ono Korini yomboma molemelena pale.” ningu liku mundukumili yetolone kongono selembele sengelemonga Karasi kape ningu yunga imbi ambolko paka tondolembele. <sup>24</sup> Aku kene ‘Pollone olio selemolo semolo mele Karasinga yombo talapema sipa olio kape nilimú mele yombo talape lupamane ‘Paa sika aku siku molemele.’ ningu kanangi.’ ningu yomboma konopu mondolemele mele i ye yopoko ongema paa kanangi liku ora siengi.

## 9

### *Kolomongo-Awili 9*

*Pollone Korini Yombomando “Karasinga Yombo Kolea Judia Disiriki Molemelema Gelene Paa Kololemele Kene Liku — Tapondoko Méle Mare We Siengi.” Nirimu Ungu Se*

<sup>1-2</sup> Ono Korini yombomane tondolo munduku ‘Judia disiriki yomboma, paa lipu tapondamiliya!’ ningu molemele mele pilieliola. Liku tapondongendo seko molemele mele ‘Karasinga yombo, kolea Masedonia poropinji molemele yomboma konopu sipu semane topo sipu ,ono Korini yomboma, kape nimbuli nirindumuni, kolea Akaya poropinji lemó ,kolea-awili Korini, yombomane u kalia-ingimunga kinia yandopa kepe ‘Lipu tapondopo mélema siemili.’ ningu nokoko moloringi mele Masedonia yombomando nimbu sirindu kinia pilkuli ‘Korini yombomane selemene mele manda manjipu samili.’ ningu ono awisilini mélema singí uluma selemene, akumunga, Pulu Yemonga yombo konopu kake seli ,kolea Judia disiriki molemelema koleamanga pali Karasinga yombomane, liku tapondoko we singí kou-monema liku maku toko molemele ,mele ono Korini yomboma pilielemele, monga ono ungu ,awisili, pepána naa topo simbú kinia mandala. <sup>3-4</sup> Aku-sipa na-kolo na ombó kinia Masedonia poropinji ye mare pea omulu liemu ono ,Korini yomboma,ne kou-mone singíma kamu naa liku maku tongi liemu nane kape nimbu onone selemene mele yomboma semane topo sirindu mele pilipuli paa pipili kolombo. Ono ,Korini yomboma, kepe pipili kolonge. Akumunga pilipuli, ‘na ono molongena ombó kinia yomboma kape nimbu semane topo sirindu mele paa sika aku siku sangi. Yombomane ‘Pollone kolo torumu. ,Yuni Korini yomboma we kape nirimu.,’ ningu naa piliangi. ,Kou-mone limbu ombóma sika liku maku toko pora siengi.’ nimbu olionga, genu ye ,yopoko, kanuma ono molemelena lipu mundukuru. <sup>5</sup> , ‘Na kinia ono Korini yomboma kinia olio pipili naa kolamili.’ , nimbu ,olionga, genu ,ye yopoko,ndo tondolo mundupu nimbuli: “Na u naa pambo ono kumbi leko pungu, Korini yomboma liku tapondoko, singí kou-mone liku maku tolemelema kamu liku maku toko taltoko molangi wambo kene ono molemelena liku tapondangi kumbi leko pang.” nimbu lipu mundukuru. Pe “Simulú.” ningu panjeringi mele kamu liku maku tokole na nokoko molangi ombó kinia pilkuli konopu pe nipili yomboma liku tapondonge kou-mone awisili na pilku liku popenge seko singí. ,Kamu naa taltoko nokoko molangi ondu liemu ‘Pollone olio kou-takisi tomoloma ombo likimu. Olionga mélema oliolio we taltopo kolea Judia disiriki yomboma naa silimolánje papu.’ ningu, konopu kiri panjiku singí kinia

manda naa sembá. Aku sipu nimbu pilipuli na u naa wambo olionga ye genupili-pokondo "Ono liku tapondangi paa." nimbu lipu mundukuru.

**9:6-15**

*Kaliana Kere-Langi Umbu Awisili Mundulimulu Kinia Kere-Langi Awisili Yando Lipu Taltolemola, Akumunga Ungu-Pulu Se (Kolomongo-awili 8-9 palimunga ungu se.)*

<sup>6</sup> „Kou-mone pilku liku popenge seko siengi.” nimbu, nikirumunga ungu-pulumu niembo piliangi. Yombo se kere-langı koltalo umbu tolemomone kere-langı koltalo lipa nolemo; kere-langı awisili umbu tolemo yombomone awisili lipa nolemo.

<sup>7</sup> Yombomane yomboma liku tapondoko mélema konopu siku sumbi siku silimili akuma Pulu Yemone kanopa konopu mondolemo kene ono yomboma yu-mele-mele konopumane pilkuli ‘Kou-mone i-sipu yomboma lipu tapondopo siemili.’ ningui pilkuli siengi. Konopu kiri panjiku naa siengi. ‘Naa silimolá-na-kolo yombomane “Siee!” ningui tondolo munduku mawa sekemelemonga sikimulu.’ ninguli singí kinia manda naala sembá. <sup>8</sup> Pulu Yemone ono méle paa awisili manda simba taltoko manda sendenge, alieli „konopu pe nimbá uluma kinia, kongono senge uluma kinia, mélema, mólo tombama pali manda sipa manda sendemba kene „konopu kimbu naa siku yomboma liku tapondoko mélema siengi..” ‘Onone liku tapondoli ulu peangama pali manda sendangi.’ nimba aku sembá. <sup>9</sup> Aku ulumunga ungu se Pulu Yemonga bokuna molemo, akumu i-sipa:

‘Yombo sene kaliasanga kere-langı awisili  
umbu tolemo mele yombo peanga sene,  
yombo koropama lipa tapondopa  
méle awisili andopa moke sepa silimú;  
pe aku sipa kondoloko  
sepa kondolemo ulu peangama  
alieli pepa mindi pumbá,  
„Pulu Yemo pilipa molomba.”’

nilimú kanumu.

<sup>10</sup> ‘Kere-langı umbu tolemo yemone kere-langı umbu topili.’ nimba umbuma silimú „Pulu Ye,mo, yuni we-yomboma ‘kere-langı lupa lupama nangi.’ nimba silimú Pulu Yemola, yuni ‘Onone yomboma liku tapondangi.’ nimba méle paa awisili simba. Onone kondoloko sepa kondoli ulu peangama senge kinia ‘Olandopa olandopa sangi.’ nimba lipa tapondopa mélema simba. Yombo kere-langı umbu tolemo kinia kere-langı awisili tolemo mele ono kinia aku sipa wendo ombá. <sup>11</sup> ‘Alieli, yomboma mélema mólo tomba kinia onone kanu yomboma liku tapondoko méle awisili pilku liku popenge seko siengi.’ nimba „Pulu Yemone, ono méle awisili simba kinia onone ononga genali méle awisili manda singí. Kanu-kinia olione „Karasinga Judia disiriki yomboma, lipu tapondopo, ono „Korini yombomane, méle awisili pilku liku popenge seko singíma lipu membo pumbu simulú kinia aku siku genali liku tapondongemonga genalini Pulu Yemo kinia “Ange.” ningí.

<sup>12</sup> Onone aku siku Pulu Yemonga yomboma liku tapondoko mélema singí ulumu sengemonga ulu talo wendo ombá. Aku senge kinia yombo méle mólo tolemoma mólo naa topa manda sembá. Aku-sipa na-kolo aku mindi mólo. Aku sengemonga yombo awisilini „Pulu Yemo kinia, “Ange.” ningui yu kape ningila. <sup>13</sup> Ono „Korini yombomane, „Judia disiriki, yomboma „aku siku, liku tapondoko mélema singímunga kanokole „we-,yombomane ono sika Karasinga yomboma molko, yunga semane peangamo sika pilku likuli yunga unguma pilku liku sengena panjiku senge mele kepe, ononga mélemanga awisili Judia yomboma kinia yombo lupa lupama pali kinia pilku liku popenge seko liku tapondoko moke seko singí mele kepe, mona lemba kanokole Pulu Yemo kape ningui imbi ambolko paka tondonge. <sup>14</sup> Akumu kanokole

ningímuní, Pulu Yemone ono „Korini yomboma, we kondo kololemo mele akumu paa olandopa we kondo kololemo mele kanokole Pulu Yemo kinia ungu ningí kinia ono paa konopu mondoko Pulu Yemo ononga mawa sendenge.<sup>15</sup> Pulu Yemone méle paa peanga olandopa we sirimu akumu olione yomboma nimbu simulundu perelemolo akumu Pulu Yemo kinia paa awili sepo “Ange.” nikimulu.

*Kolomongo-Awili 10-13*

## **Korini Yombomanga Ye Marene Pollonga Ungu-Bulkundu Nindingi Kinia Korini Yombo Wemane Pilkuli ‘Sika.’ Konopu Lieringi-Kulu Pollone Yu Molopa Nirimu Mele ‘Sumbi Siku Piliangi.’ Nimba, Nimba Sirimu Ungumu**

### 10

*Kolomongo-Awili 10*

*Ye Marene ‘Pollone Sepa Kinjilimú.’ Niringimunga Pilipale Pollo Yu Serimu Mele  
Pepá Torumu Ungu Se*

<sup>1</sup> Kiniá nane ungu se ‘Paa piliangi.’ nimbu, nimbu sikiru. Nimbu simbundu Karasi yu kála naa sepa pangu nimba taka lepa molopa yunga imbimu ‘ola naa molopili.’ nimba molorumu mele na aku sipu nimbu molopole, ‘ono nimbu simbú ungumu paa mimi siku piliangi.’ nimbu, nimbu sikiru. „Ye marene nanga ungu-bulkundu nindiku ninguli:“ “Pollo yu ono „Korini yomboma, kinia pea molemele kinia pipili kolopa ono unguma sumbi sipa mane naa silimú, na-kolo ono-kinia naa molopa kolea senga lupa molopale, pipili naa kolopa unguma tondolo mundupa nimba silimú.” nilimili. <sup>2</sup> „Aku siku nilimili mele pilipuli, ‘Aku siku naa ningu konopu topele tangi.’ nimbu, ono tondolo mundupu mawa sekero. Molo konopu topele naa tongi liemu “„Pollo senga lupa molopale mindi olio unguma pipili naa kolopa tondolo mundupa silimú.”“ nilimili mele, ono molemelena ombo ono-kinia molopole ungu mare pipili naa kolopo paa tondolo mundupu ono mane simbú. Onone “Pollo sepa molemo uluma mana-uluma mindi selemo. Karasini kanopa peanga pilielemo uluma naa selemo.” nilimili mele aku siku ningu molangi ondu liemu na paa sika pipili naa kolopo ono tondolo mundupu mane simbú „kene ‘Aku siku naa ningu, konopu topele tangi.’ nimbu, ono mawa sekero.“ <sup>3</sup> Na sika ma-koleana „we-yomboma pea, molio-na-kolo „Karasinga opa sembondo,“ mana-yombomane konopumane pilkuli opa selememele mele lupa, na aku sipu konopumuni pilipuli opa naa selio. <sup>4</sup> Na opa sembondo ma-koleana yombomanga opa selememele mélema lipuli opa naa selio. Pulu Yemonga opa seli méle enge nilima lipu ambolopo, akumane opa-toumanga opa-pala tondoloma topo ungu tolío. <sup>5</sup> Kolo toko angelema nilimili unguma topo mania mundupu, Pulu Yemonga unguma pilingí aulkamo pipi silimú ungu aku silima sepo kinjipu, yombomanga konopu lemele unguma „‘Opa-touma.’ nimbu, ka sipu, ‘Yomboma ononga konopumane Karasinga unguma mindi piliangi.’“ niliu. <sup>6</sup> „Ono Korini yomboma kepe,“ ‘Ono yombo-wemane „konopu topele toko,“ nane “Saa.” nikiru ungumu pilku liku seko molonge kinia kanopole nanga unguma ‘naa pilimulú.’ ningu pilku mokoli senge yomboma „ombo,“ mindili nangi simbú.’ nimbu nokopo molio.

<sup>7</sup> Yombomane ulu selememele kanongendo mimi siku kanangi. Ne ye sene ‘Na Karasinga yemo molio.’ konopu liemu liemu ‘Na Karasinga yemo molio mele Pollo kepe aku sipa mele Karasinga yemo molemola.’ konopu liepili. „‘Yu yuyu mindi Karasinga yemo molio.’ konopu naa liepili.“ <sup>8</sup> Nane kongono selioma Ye-Awilimuni ‘Sani.’ nimba na namba sirimu akumu Ye-Awilimuni ‘Ono konopu tondolo pupili molangi liku tapondani.’ nimba na nimba taltopa nambamo sirimu. “‘Ono

molko kinjangi.’ nieni.” nimba na nimba taltopa nambamo naa sirimu. Aku sipa serimumunga nanga imbimu wallo-kolte ambolopo paka topo kape niliu-na-kuo aku seliomonga na pipili naa kolombo.<sup>9</sup> „Ye-Awylimuni “‘Ono molko kinjangi.’ nieni.” nimba na nambamo naa sirimu.” nikiru, akumu pilkuli, ‘Nane pepá topo ono siliu akuma ‘‘Olio pipili kolopo mini-wale mundamili.’ nimba pepá topa sikimu.’ ningu naa piliangi.’ nimbu aku sipu nikiru.<sup>10</sup> Sika ye marene ninguli: “Pollone pepá topa sipale olio iri topa ungu tondolo mare nilimú-na-kuo olio molemolona olemo kinia kanopole ‘Yu we-ye se. Imbi naa mololi ye se. Ye marene ungu-mané sumbi siku silimili mele yu aku sipa ungu-mané naa silimú.’ nimbu kanolemolo.” nilimili.<sup>11</sup> Aku siku nilimili yema ono i-siku piliangi: ‘Na ono-kinia seluna naa molopo, kolea senga lupa molopole nane pepá topo pipili naa kolopo tondolo mundupu mane siliu mele kinia, ono molemelena ombole mane simbú mele kinia, paa selu-sipamo. ‘Ya pepá topo paa tondolo mundupu mane sikiru mele ombole mane simbú.’ ningu piliangi.

<sup>12</sup> Ye marene ‘Olio ye peangama.’ ningu onono imbi ambolko paka toko kape nilimili mele na aku sipu sembó kinia paa manda naa sembá. Kanu yemane ono onono konopumane pilkuli ‘Olio i-sipu i-sipu semolo kinia ye peangama molomolo.’ ningu pilkuli aku siku selemene. Ono onono selemene mele kanoko konopumane pilku apurukuli ‘Olio ye peanga olandopama.’ ningu pilielemene. Aku selemene yema pilipa kondoli naa peli yemane lawa seko selemene, monga na ono onono kape nilimili mele na nanu aku sipu kape nilkanje paa manda naa selka.<sup>13</sup> Aku-na-kuo na nanu nanga imbi walu lipu ola mundupu kape naa nimbú. ‘Na nanu imbi ambolopo paka topo kape niembo.’ nimbu Pulu Yemone na nimba taltopa ‘Kongono sani.’ nimba sirimu mele mindi pilipuli na nanu imbi ambolopo paka topo kape nimbú. Pulu Yemone na ‘kongono sani.’ nimba sirimu kongonomo kinia ono ‘Korini, yomboma-kinia kongono selio akumu kepe kongono selumu.<sup>14</sup> Pulu Yemone ‘Na kongono sani.’ nimba namba sirimu aku nambamone ono ‘Korini yomboma, pali kepe nokolemo akumunga nane ono moloringina kumbi lepo ombo Karasinga semane peangamo topo sirindu kinia Pulu Yemone na kongono “Sei.” nimba sirimumu mundupu kelepo kongono se lupa lawa sepo naa serindu ‘akumunga na nanu imbi papu ambolopo paka tollo.’ Ono moloringina ombo semane peangamo naa topo silkanje aku sipu Pulu Yemone na kongono sirimu se mundupu kelkanje na nanu imbi ambolopo paka tollo mele paa manda naa selka. ‘Aku selkanje lawa selka-na-kuo na lawa naa selio. Andi ye mare molemele akumane mindi lawa selemene.’<sup>15</sup> Na nanu kape nimbu imbi lipu ola munduliu akumu Pulu Yemone na kongono “Sei.” nimba sirimu kongonomo seliomonga mindi aku selio. Yombo marene kongono selemelomega nanga imbi ambolopo paka naa tollo. Nane ‘Wendo ombá kinia peanga.’ konopu lekero mele i-sipa: ‘Ono ‘Sika.’ ningu kuru mondolemele mele olandopa pumbá kinia nane ono mane sipu kongono selio uluma tondolo pumba awili sepa pepili.’ konopu lekero. ‘Aku-na-kuo aku sipu ono-kinia kongono sembó kinia Pulu Yemone na kongono sirimumu mundupu kelepo kongono se lupa naa sambo.’ konopu lekero.<sup>16</sup> Kanu-kinia kongono ono-kinia seliomonga tondolo pumba awili sepa pemba kinia na ono molemele kolea anjukundu semane peangamo manda pumbu topo simbú, kanu-kinia ye marene andoko ungumu ningu siringi koleana naa pumbuli nimbúmuni, kanu yemane kongono u selemelomega nane nanga imbi ambolopo paka naa tombo.

<sup>17</sup> Aku-sipa na-kuo ‘Pulu Yemonga bokuna ungu se molemo mele pilipu semolo kinia peanga. Akumu i-sipa:’

‘Yombo sene ‘Yombo senga imbi ola molopili.’  
nimu liemu ‘Ye-Awylimunga imbimu mindi  
ola molopili.’ nimba ambolopa paka tondopili.’

„nimba bokuna molemo.,<sup>18</sup> Yombo sene kongono selemo mele kanopa apurupa yu yunga imbimu ambolopa paka tomba yombomo Pulu Yemone kanopale ‘I kongonomo papu semu. Yu yombo peangamo.’ nimba kape naa nilimú, mólo; Ye-Awilimuni yombo se molopa kongono selemo mele kanopa apurupale yundu ‘Yombo peangamo.’ nimba kape nilimú yombomo mindi sika imbi ola molemo.

## 11

11:1-15

*Pollone Kongono Serimu Mele Kinia, Ye Marene Kolo Toko “Karasini Lipa Mundorumu-na Kongono Sekemolo.” Niringi Yemane Seringi Mele Kinia “Selu Sipa Mólo.” Nirimu Mele Ungu Se (10:1-18 kinia pea)*

<sup>1</sup> Na ungu se nimbu kinjimbu kinia siye kolonge kinia peanga. Ungu se nimbu kinjimbu sekero akumu nimbu kinjambo kene siye kolangi. <sup>2</sup> Nane aku sipu mawa sekeromonga pulumu i-sipa: „Pulu Yemone yomboma nimba taltopa ‘Yu mindi liku awi siku pilku molko, ye lupa senga unguma naa pilku lombili paa naa pang. Ye se lupa lombili pungí kinia paa kanopo kiri pilipu konopu kiri panjimbu.’ nimba molemo mele na aku sipu pilipu molio. „Korini yomboma,, nane ‘‘Ono Karasinga ambomo mindi molangi.’ nimbu simbú.’ nimbu, nimbu panjerindu. ‘Ambo-wenepo se ye se kinia naa pepale ye pulimú mele ono aku siku ye se kinia naa peko ambo-wenepo mele molkole Karasi kinia pang.’ nimbu ‘yu simbú.’ nimbu pilipu molorundu mele molio. <sup>3</sup> ‘Karasi kinia mindi pang.’ nimbu molio,-na-kolo nane pilkiru, ‘Wambiye kolo toli uluma pali pilielemomone u ambo Ipu kiyongo nimba kolo topa kondi topa peké tondorumu kinia pilipa lipa lombili pumba lo liltimu mele ono aku siku ye marene kondi toko peké tondonge kinia ononga ungumu pilkuli ningímu, ‘Olio Karasinga yombo kake selima mindi.’ ningu yu kuru mondoko yunga ungumu mindi pilku liku seko moloringi mele munduku kelko konopu topele tokole, ye lupamane kondi tongema lombili pungu lo lingínje.’ nimbu mini-wale mundupu molio. <sup>4</sup> Ye sene lupa ono molemelena ombo, nane Yesusi-nga semanemo topo siliu mele naa topa silimú, yuni ‘Yesusinga semanemo topo sikiru.’ nimbale ye senga lupa semanemo topa silimú kinia ono we pilku liku molemele. Molo ‘Mini.’ nilimili akumu se lupa, ono u Mini Kake Sélimu littingi akumu mólo, se lupa, akumu ononga konopuna pumba molemo kinia ‘We molopili.’ ningu kamu limili. Molo ye marene kolo toko “Semane peangamo topo sikimulu.” nilimili kinia nane semane peanga sikamo ono topo sirindu semanemo munduku kelko kanu yemane toko silimili semanemo mindi ‘Semane peangamo.’ ningu, tako leko pilku limili ‘kene ungu se nimbu kinjimbu kinia we niembo siye kolangi’.

<sup>5</sup> Nane pilkiru, ‘Kanu yema ono ‘Sika Karasini “Nanga kongonomo sende-paa.” nimba lipa mundorumu yema molemolo.’ nilimili kanu yemando ‘Olionga ungu-mane sili ye awilima.’ nilimili, kanu yemanga na maniadopa naa molio.’ konopu lekero. <sup>6</sup> Sika na ungu-manema mimi sipu simbú mele sukuli se naa serindumunga ‘Karasinga ungumu, mane sipu kinjiliunje-na-kolo na ‘Karasinga, unguma paa mimi sipu pilielio. Ono mane siliu kinia unguma mimi sipu pilielio mele alieli ono lipu ora siliu.

<sup>7</sup> Pulu Yemonga semane peangamo ono topo simbundu ‘Nanga imbimu mania molopili.’ nimbu “Aku sekero kongonomonga méle kalangi.” naa nirindu. ‘Nanga imbimu ambolopo paka naa tambo. Ononga imbima ambolopo paka tondambo.’ nimbu aku serindu. Nane aku sipu serindu ulu akumu ulu-pulu-kiri se serindu molo ungu-mane se pulua torunduye? <sup>8</sup> Ono lipu tapondopo Karasinga kongonomo sendepo molorundu kinia Karasinga yombo talape marene kou-mone liku tapondoko siringi akumu ‘Karasinga yombo talapemanga kou-mone wa lipu ono

Korini yomboma lipu tapondorundu none sekemo.' nilka. <sup>9</sup> Na ono-kinia molopo kongono serindu kinia na mélse mólo torumu kinia nanga genupili kolea Masedonia poropinji molko oringi kanumane mindi na liku tapondoko méle mólo torumuma pali mengo ongo na siringimunga ono Korini yombomando "Na liku tapondoko mélema siee." nimbu ono umbuna se naa sirindu. 'Na onondo "Liku tapondaa." nimbu umbuna se paa naa simbú.' nimbu pilierindu mele kiniá kepe aku sipu pilipuli 'Ono na liku tapondangi.' nimbu umbuna se pe-pe-kepe paa naa simbú.

<sup>10</sup> Na aku sipu "Sika selio mele sembó." nimbu tondolo mundupu nimbu panjikiru mele paa mi lepo Karasinga ungu-sikamo na-kinia pelemomonga paa sika nikiru. 'Nane ,ono Korini yomboma molemele, kolea Akaya poropinji koleamanga pali andopo semane peangamo topo simbú kinia "Kou-monene topo toko liee." naa nimbú.' nikiru akumu paa sika nikiru. Aku sipu na nanu kape nikiru mele mania naa pumbá. <sup>11</sup> , 'Ononga kou-mone naa limbu.' nikiru akumu nambi semu-na nikiruye,? Nane ono konopu naa mondoliomonga aku sipu nikiruye? Paa mólo! Na ono paa konopu mondolio mele Pulu Yemone pilielemo. <sup>12</sup> , "Méle kalaa." paa naa nimbú akumunga pulumu i-sipa:, Ye mare ononga imbima ambolko paka toko 'Yombomane olionga unguma pilkuli 'Olione kongono selemolo mele kinia Pollone kongono selemo mele kinia selu-sipa. , Yu kinia olio kinia pea Karasini lipa mundorumu yema molopo, kongono selemolomonga méle kalólimu limulú.,' ningu kanangi.' ningu selememele mele 'Paa naa sangi. Yombomane kanu yemanga ungu kolo tolima paa naa piliangi.' nimbili 'Aku siku ningu pilingí aulkamo pipi siembo.' nimbu ,kanu yemane "Kongono sekemolomonga méle kalaa." nilimili mele nane paa naa nimbu, na yomboma lipu tapondopo Karasinga kongonomo sendeliomonga, méle kalólimu naa liu mele pe kepe paa naa limbu.

<sup>13</sup> Aku siku selememele yemane 'Yombomane 'Olio Karasini lipa mundorumu yema molemolo.' ningu kanangi.' ningu kolo toko andoko Karasini lipa mundorumu yemane kongono selememele mele ono aku siku manda manjiku andoko kongono seko molemele. <sup>14</sup> Aku selememele mele kanokole konopu kimbu siku naa molangi. ,Kurumanga nokoli, Setenene kepe ,yomboma kondi tombando, yu sika molemo mele topele topa 'Mulu-koleana angello se pa selina molemo mele molambo.' nimba aku sipa manda manjipa selemo kanumu. <sup>15</sup> ,Setenene aku sipa selemo liemu, yuni selemo mele yunga kongonomo sendeli kendemande-yema 'Yombomane olio kanokole 'Ye sumbi nílimunga kongonomo sendeli kendemande-yema molemolo.' ningu kanangi.' ninguaku siku manda manjiku kolo toko senge kinia kanokole konopu awisili kimbu naa siengi. Pe ononga aku selememonga méle kalólimu lingímu papu lingí.

11:16-33

*Pollo Karasini "Kongono Sende-Pu." Nimba Lipa Mundorumu Kongonomo Sendembando Mindili Norumu Mele UNGU Se (11:1 pulu polko kanani)*

<sup>16</sup> Nane u nindu mele kelepo nikiru. 'Nane nimbu kinjimbu kinia, nimbu kinjambo siye kolangi.' nindu kanumu. ,Aku sipu ya kamu nimbú kinia, 'Pollo yu ungu aroma topa nimbaamu tokomo.' ningu naa piliangi. Molo nane nanga imbimu nanu ambolopo paka topo nimbu kinjimbu kinia 'Pollo yu amu tokomo.' sika ningu piliengi liemu, manda, ,andi kape ningu onono imbima ambolko paka tolemele yemanga unguma taka leko pilku liku molko 'Amu tokomele.' naa nilimili mele, nanga ungumaaku siku taka leko pilku molko 'Amu tokomo.' naala niengi. <sup>17</sup> Nane 'Na ye awili peangamo.' nimbuaku sipu nimbu kinjimbu kinia Ye-Awilimunga kongonomo sendeli yombo sene nilka mele naa nimbú. Amu toli ye sene nilka mele na nanu imbi ambolopo paka topo nimbu kinjimbu. <sup>18</sup> Ma-koleana yombomane ononga imbima ambolko paka tolemele mele ye awisiliniaku siku selememonga

na aku sипу nanga imbimu nanu ambolopo paka topo kape nimbú. <sup>19</sup> Ono ‘amu naa topo pilipu kondoli peli yomboma molemolo.’ „konopu lemele-na-koło, amu tolemele yema ‘amu we tangi.’ ningu siye kolko taka leko pilku molemole. <sup>20</sup> Ye marene ono ka-mele siku mindili siku nokolemele, molo ononga kongonomo “sendaa.” nilimili, molo ono ningu pangu siku ononga mélema we limili, molo ono peké tondoko kolo tolemele, molo ‘Olio ye peanga awilima molemolo. Ono yombo kirima molemole.’ nilimili, molo „‘Olionga unguma paa piliangi. Olio paa lombili wang.’ ningu tondolo munduku kara pungu, ono laruwa tolemele kinia kepe, ono „Korini yombomane, aku siku selemele yema pali ‘Aku siku sangi.’ ningu siye kolko ‘Ye peangama. Papu selemele.’ ningu ononga unguma taka leko pilku molemole. <sup>21</sup> „Kanu yema, onone selemele mele na ono „Korini yomboma,“kinia molorundu kinia aku sипу selka-na-koło na enge naa perimu-kulu ‘Aku sипу sambo.’ naa nirindu akumu lawa serindu mele kiniá aku sипу sepo kinjerindu mele paa pipili kolopo nimbu para sikiru.

Aku-sipa na-koło ye sene yu molemo mele kinia yu-kinia uluma wendo olemo mele kinia pipili naa kolopa tondolo mundupa nimba para silimú liemu na kepe molio mele kepe na-kinia ulu wendo olemoda kepe pipili naa kolopo tondolo mundupu sumbi sипу nimbu simbula. Kiniá ya nikiru ungumu amu úngu langopo nikiru. „Ye marene onono kape ningu, seko molemole mele yomboma ningu silimili mele nane ono-kinia keru-kuru lipu na nanu kape nimbu sepo molio mele nimbu siembo..”

<sup>22</sup> Andi ye kanuma Ipuru yemaye? Na Ipuru yemola.

Kanu yema Isirele yemaye? Na Isirele yemola.

Kanu yema „pulu-pulu anda-kolepa, Eporayamone kalopa liltimu yemaye? Na Eporayamone kalopa liltimu yemola.

<sup>23</sup> Kanu yema Karasinga kongonomo sendeli kendemande-yemaye? Ono Karasinga kongonomo

sendelemele maniandopa mele; na Karasinga kongonomo paa olandopa sendeli yemo molio.

(Ya „na nanu imbi ambolopo paka topo kape nimbu, nikiru mele na konopu naa peli ye se amu topo nikiru.)

Na Karasinga kongonomo kála-sepo awili-sepo serindula.

Na wale olandopa ka-ulcana perindu.

Na wale paa awisili kopene toringi mindili norundu mele kanu yema topo mania munduliu.

Wale awisili na pondeanga kolorundu.

<sup>24</sup> Juda ye nokólimane na „walte walte ningu ka siku na ‘Olandopa llo sepili.’ ninguli, ka-pultane wane paono tene nani ningu toringi, aku walema lipa sere lepa se-pakara.

<sup>25</sup> Wale yopoko „Romo-yemane, na kopene toringi;

walte „Juda yombomane, na ‘kolambo.’ ningu kouni toringi;

wale yopoko na sipina andorundu kinia topa bultupa kamu kiri lierimu; walte sipi se aku serimu kinia na nomu-kusana sukundu ipulieli tangoli wale talo perindu;

<sup>26</sup> ulka senga wale awisili naa pepo, kolea lupa lupamanga awisili pelepo mindi andorundu;

andorundu kinia wale marenga pondeanga na nona purundula;

wale marenga wa noli yemane na toko mélema wa lingí seringila;

wale marenga nanga „Juda, yombomane na tonge seringi;

wale marenga Juda yombo talape ultukundu yombomane na tonge seringila;

wale marenga taonomanga na tonge seringi;

wale marenga na kolea ku lielina andorundu kinia na pondeanga koleana nombá serimu;

wale marenga nomu-kusana na nona wangorundula;

wale marenga ye marene kolo toko 'Olio Karasinga yema molemolo.' ninguli nanga kongonoma pipi sindingí seringila.

<sup>27</sup> Kongonoma kála-sepo umbunama membo andopo sepo, kongono serindumunga wale awisili uru naa pepo, wale awisili gele sepa no nonowale sepa sepili molopo, wale awisili kere-langí naa nombo we pepo, wale awisili ali serimu kinia wale-pakoli pakombo se naa lierimu-kulu alini paa kolorundu.

<sup>28</sup> Akumu mindi mólo. Umbuna mare pea na-kinia wendo olemo. Akuma i-sipa: Alieli nane Karasinga yombo talapema nokombondo konopu paa awisili kimbu siliumunga na konopuna umbuna awisili pepili molio.

<sup>29</sup> 'Karasinga, yombo se yu enge nimba molemo mele pora nilimú kinia na kepe ,yukinia kondo kololiomonga, konopu tondolo pupili naa molio.

Mélsene 'Karasinga, yombo se kondi tolemo kinia yuni kuru mondolemo mele mundupa kelepa sepa kinjilimú kinia na paa kameléna mindili selemo.

<sup>30</sup> Na nanu imbi ambolopo paka naa tombo kinia onone nanga ungumu naa pilku lingí liemu, manda, nanga imbimu kape nimbu ambolopo paka tambo! Aku-sipa na-kolo 'Nanga imbimu kape nimbu ambolopo paka tambo!' nimbuli méle marene na topa mania mundulimú kinia na enge se naa pelemo mele lipa ora silimú kanu mélemanga nanga imbimu ambolopo paka tombo. , 'Na enge paa pelemo. Na imbi paa molemo. Na pilipa kondoli paa pelemo.' nimbu pilipuli nanu kape naa nimbú.' <sup>31</sup> Ye-Awili Yesusinga Lapa Pulu Yemo, yunga imbimu alieli ambolopo paka tondomolo kinia paa peanga, yuni ungu ya nikiruma 'Kolo tokomo.' manda naa nimbá. <sup>32</sup> Kolea-awili Damasikas ,na purundu kinia, ye nokoli kingi Aretasinga kolea nokondorumu ye awilimuni 'Ami-yemane na ka siengi. Damasikas pala kerepuluna nokoko giliangi.' nirimu-na nokoko gilieringi. <sup>33</sup> Aku-sipa na-kolo ,pala kerepuluna nokoko gilieringimunga, nanga genupili marene na wale-basiketena lakilkuli ka moko toko liku palana ultu mundoringi. Aku seringimunga kanu ye awilimuni na ka simba serimumu 'Ka naa sipili.' nimbu kowa purundu.

## 12

### 12:1-10monga

(12:1-6) *Pollo Uru-Kaima Sepa Kanopale Ungu Tondolo Mare Awisili Pilierimu Kinia*  
 (12:7-10) *Mélsene Yunga Kangina Torumu Semanemo (11:16-33 kinia pea)*

<sup>1</sup> Nane nanu kape nimbu nanga imbimu nanu ambolopo paka tokoro mele mundupu naa kelepo paa ambolopo paka tombola. Aku naa sembó kinia seko kinjilimili nimbu simbú nikiru mele naa pilingí. Aku sembó kinia sika sepa kinjimbu, na nanu imbi ambolopo paka topo kape nimbu ulumuni sika ono kinia na kinia olio naa lipa tapondomba-na-kolo ,nanga imbimu ambolopo paka topo nanu kape nimbu ungu se pea niembo,. Ye-Awilimuni uru-kaima mele sipa ungu lopi sepa perimu ungu mare na nimba sirimumanga ungu mare ,na nanu kape nimbu, niembo.

<sup>2</sup> Karasinga ye se kanopo imbi siliu, kanu yemo kalia-ingi tene-po ombo pupili u Ye-Awilimuni yu lipa sinjipa memba mulu-kolea awi-suku-singi mulu-kolea senga sukundu memba purumu. Aku yemo kangi pali memba purumu molo minimu mindi memba purumunje, na naa pilielio. Pulu Yemone mindi yuyu pilielemo.

<sup>3-4</sup> Kanu yemo, Pulu Yemone mulu-kolea paa peangana lipa sinjipa memba purumu mele na pilkiru, ,aku-na-kolo, akumu kangi pali memba purumu molo minimu mindinje, na naa pilkiru. Pulu Yemone pilielemo. Kanu yemone ungu mare pilierimu kanu unguma , 'Yomboma piliangi.' ninguli, yombomane ningíndu perelemolá. 'Yombomane naa ningu siengi.' ningu mi tolemele unguma pilierimu.

<sup>5</sup> Ye se aku sipa ulu se serimu „nikiru, yemonga imbimu ambolopo paka tondopo kape nindimbu-na-kolo nanga imbimu ambolopo paka topo kape naa nimbú. ‘Nanga imbimu ambolopo paka tambo.’ nimbuli na tondolo se naa pelemo mele kinia umbuna na-kinia wendo olemo mele kinia mindi nimbu sипу imbi ambolopo paka tombo. <sup>6</sup> Molo nane sika nanu kape nimbu nanga imbi ambolopo paka tolkanje, sika unguma mindi nilkamonga na amu toli ye se naa molka. Aku-sipa na-kolo „Pulu Yemone uru-kumbuni lipa ora sirumu, na mélema kanorundumunga, nanu kape nimbu nanga imbi ambolopo paka tolkanje manda naala selka kene nanga imbimu ambolopo paka naa tombo. „Na-kinia aku sipa uluma wendo orumu mele mindi, yombomane pilkuli nanga imbimu ambolko paka tondoko na liku awi silimolánje manda naa selka. Na we sepo molopo ungu nimbu siliuma mindi pilkuli na molio mele sumbi siku pilingí kinia peanga. „Andi yemane ononga imbima kape ningu ambolko paka tolemele mele paa naa sembó.„

<sup>7</sup> Pulu Yemone na mulu-koleana memba pumba na méle paa peangama lipa ora sirumu kanorundumunga „na paa kara pulka-na-kolo Pulu Yemone, Na ‘kara naa pambo.’ nimba nanga kangikundu mindili nombo molombo mélse sirumu. Aku mélemo „kurumanga nokoli, Setenenga kendemande sene ‘Na mindili nambo.’ nimba alieli mindili silimú. „Pulu Yemone, ‘Na nanu ye awilimu molio.’ konopu naa leambo.’ nimba na-kinia ‘aku sipa umbuna wendo opili.’ nirimu. <sup>8-9</sup> ‘Ye-Awilimuni na lipa tapondopa umbuna kanumu wendo lindepili.’ nimbu wale yopoko yu tondolo mundupu mawa serindu-na-kolo yuni „umbunamo wendo naa lipa, nando nimba: “Yombo se tondolo naa pelemo kinia nanga tondolomone yu enge paa olandopa pelemomonga nane nu we kondo kololio ulumuni nu manda moloni.” nirimu. „Yuni aku sipa nirimu, munga na tondolo naa peli yemo moliomonga na nanga imbimu ambolopo paka tombondo konopu siliu. „Tondolo naa pepili moliomonga Karasinga tondolomo na-kinia pepa na nokolemo-na pilipuli aku sипу selio.„ <sup>10</sup> Na Karasinga kongonomo sendeliomonga

kuru tolemo molo kangi pange-mange selemo molo konopu enge naa pelemo kinia kepe,  
na seko kinjiku ungu-taka tondoko seko pipili kondolemele kinia kepe,  
na-kinia umbuna awisili wendo olemomonga mindili nolio kinia kepe,  
yombomane na konopu kiri panjikuli ‘Na umbunama wendo opili.’ ningu na seko kinjiku mindili silimili kinia kepe,  
na konopuna umbunama sepa peanga naa pepili molio kinia kepe,  
aku sipa umbunama wendo-wendo olemo kinia na tondolo se naa pelemo kinia,  
„Karasina tondolomo na-kinia pepa na nokolemo, monga tondolo pupili moliomonga konopu peanga lepo ‘Kanu uluma wendo opili.’ nimbu molio.

*12:11-21*

*Pollone “Karasina Korini Yomboma Karasinga Ungumu Kuru Mondolemele Mele Siye Naa Kolko Kamu Kuru Mondoko Molangi.” Nirimu Unru Se (11:1 pulu polku kanani)*

<sup>11</sup> „Nanga imbimu ola molopili.” nimbu nanu kape nimbu kanu ungu nikirumu, manda naa sepili, nimbu kinjipu amu tokoro-na-kolo onone ‘Na sambo.’ ningu ulku tokomele-na aku sekero. „Andi yemane na ningu kinjeringi kinia ono piliangi ono Korini yombomane, na ‘ye peangamo.’ ningu kape nindilimolánje papu. Aku-sipa na-kolo kape naa nindingimunga na nanu kape nimbu imbi ambolopo paka tombo. Na sika imbi naa molemo yemo-na-kolo andi yema “Olio Karasini “Nanga kongonomo sende-paa.” nimba lipa mundorumu ye peanga awili olandopama molemolo.” nilimili yemanga na ye mania se naa molio, akumunga onone na aku siku kape nindilimolá. <sup>12</sup> Karasini “Nanga kongonomo sende-paa.” nimba lipa

mundorumu yemane selemele mele 'na ono-kinia molopole , 'Na aku sili ye se molemo.' ningu kanangi.' nimbu, yuni lipa mundorumu yemane selemele mele nane aku sipu ulu mare serindu. Na mindili nombo kongono paa lakopo serindu umbunama 'We meambo.' nimbu siye naa kolopo tondolo mundupu molopole, Pulu Yemone mindi manda ulu-tondoloma selemo mele ulu-tondolo awisili lupa-lupama sepo, yomboma kanokole paa mini-wale mundulimili ulu-tondoloma serindu kanumu. <sup>13</sup> Nane Karasinga yombo talape mare kinia serindu mele olandopa, ono Korini Karasinga yombo talapemo kinia serindu mele maniandopaye? Ulu selu mindi yombo talape lupama-kinia serindu, ono Korini yombo talapemo-kinia naa serindu, akumu kongono senderindumunga ono umbuna sipu , "Méle kalaa." naa nirindu., Ono umbuna aku sipu naa sirindumu lawa serindu-na-kolo lawa serindumunga na-kinia konopu kiri naa panjiku, siye kolangi.

<sup>14</sup> Kiniá na ono molemelena wale yopoko-sipu ombó sekero-na-kolo ombole ono umbuna se si,pu "Mélema sииe." ni,mbúndu naa ombó. Na ononga mélema yakala kolopo limbundu naa ombó. Na ono konopu mondopo kanombondo ombó. Bolangomane anupili lapali pe liku tapondongendo mélema naa taltondolemele; anupili lapalini bolangoma liku tapondongendo mélema taltondolemele kanumu. <sup>15</sup> Aku sipu, nane 'Ono lipu tapondambo.' nimbu konopu sipu nanga mélema ono simbú, na nanu kepe ono simbú. Nane ono konopu awili-sepo mondoliomonga onone na laye-kolte seko konopu mondunge kinia peangaye?

<sup>16</sup> Akumu sikanje na-kolo nane ono umbuna se naa sirindu. Aku-na-kolo ,ononga ye marene 'Pollone olio, umbuna we sikimu. Yu ,méle naa kalolemolomonga, kou-mone wa limbando nimba pangu sikimu. ,Yomboma lipa tapondombando "Sииe." naa nikimu.' nilimili. 'Kondi toli ulu-pulumu Pollo-kinia pelemo.' nilimili. <sup>17</sup> Akumu nambi semu-na nilimiliye? Nane ye mare ono molemelena "Paa." nimbu lipu mundorundu kanumu "Ononga mélema wa lindangi paa." nimbu lipu mundorunduye? <sup>18</sup> Nane u Taitasi "Ono molemelena paa pu!" nimbu tondolo mundupu lipu mundorundu kinia olianga genu se "Taitasi kinia kopu seko pale." nimbu lipu mundorundula kanumu. Pe Taitasi ono moloringina ombale ono nimba pangu sipa mélema wa liltimuye? Taitasi kinia oltonga konopu selu-sipa pepili kongono naa selemboloye? Oltone ulu selemboloma selu-sipu naa selemboloye?

<sup>19</sup> I pepá topo sikirumu ' ' 'Yuni selemo mele sumbi sipa selemo.' ningu piliangi.' nimba topa sikimu.' ningu pilielemeleye? 'Paa mólo!' Pulu Yemo pilipa molopili i nikiru: 'Karasini "Ni." nilimú mele niliu. Nanga yombo konopu mondolio yomboma, nane ulu selioma pali ono lipu tapondopo konopu tondolo pupili molonge uluma mindi selio.' nikiru. 'Akumu kolo naa tokoro, Pulu Yemone pilielemo.' <sup>20</sup> Na ono molemelena ombo kanombondo laye-kolte mini-wale pukumu. 'Na ono molemelena ombó kinia ono 'Olio molopo kondomolomonga kanopa peanga piliepili.' konopu lemele mele yombo se naa kanombo.' nimbu pilieliomongaaku sipa mini-wale pukumu. 'Onone 'na ye peangamo' konopu leko 'Na kanamili.' ningu pilielemele mele ombó kinia na kanokole 'Yu aku sipa naa molemo.' ningu kanonge kinia manda naa sembá.' nimbu pilieioliola. 'Ombo kanombo kinia ono nambolka uluma seko molongenje.' nimbu pilieliomonga mini-wale pukumu.

'Ono angelema ningu,

'seko kondoko méle peangama taltolemele, yomboma kinia konopu kiri panjiku,

popenge seko mumindili kolko,

yomboma kondo kolko liku naa tapondoko

ono onono yu-mele-mele nokoko,

yombomanga ungu-bulkundu nindiku,

andoko kolo toko yomboma semane toko siku,  
 kála seko,  
 anju yando unguma naa pilku konopu selumu naa pepili  
 uluma yu-melete-melete seko sembambu siku,  
 ulu-kiri aku sipama seko paa molko kinjingí kinia kanombonje.' nimbu pilieliononga  
 na mini-wale pukumu. <sup>21</sup> 'Ono molemelena ombo kanombomonga ungu se pea  
 pelemóla.' 'Ono molemelena kelepo ombó kinia ono kanoko molangi nanga Pulu  
 Yemone na sepa pipili kondomba. U ulu-pulu-kiri seringi yombomane seko kinjeringi  
 mele kanoko kiri naa pilku konopu topele naa toringi liemu ulu aku sipa mele se na-  
 kinia wendo ombá.  
 Amboma kinia yema kinia wapora toringi uluma kinia,  
 ye naa pungu ambo naa lili yomboma  
 ulu-kirinale seringi uluma kinia,  
 aku siku ulu-kirima mindi sengendo yakala kolko  
 konopu kimbu siku andoko seringi uluma kinia,  
 aku siku seko kinjeringi ulu kanuma kanoko kiri pilku konopu topele naa toringinje.  
 U seringi mele we seko molemelenje.' nimbu pilipu na mini-wale mundupu molio.  
 Sika aku siku seko molangi ondu liemu kanopole na ono-kinia konopu umbuna sepili  
 kola sembó.

## 13

*13:1-10*

*Pollone Karasinga Korini Yomboma Kamu Liepi Liepi Topa, Molonge Mele Tondolo  
 Mundupa Mane Sirimu Ungu Mare*

<sup>1</sup> Kiniá na wale yopoko-sipu ono molemelena ombó sekero. 'Ombo sembomonga  
 ungu se Pulu Yemonga bokuna nilimú mele i-sipa.'

'Yomboma pilku molangi yombo sene yombo se  
 ungu se sepa kinjerimu mele nimba simba kinia  
 yombo kanumuni sepa kinjimba mele  
 yombo talone molo yopokane kanokole  
 yu sembá mele manda ningu singí kinia mindi  
 ungumu pilku

'Yombomone sika sepa kinjerimu.' ningu piliangi.

'Yombo selumuni mindi nimba simba kinia  
 naa piliangi.'

'nimba molemo' kanumu. <sup>2-3</sup> 'Karasini nanga kerena ungumu nimba silimú molo  
 mólonje?' ningu pilku "Liku ora si." nilimilimunga nane u wale talo-sipu ono kinia  
 ombo molopole liepi-liepi topo "Sembó." nirindu mele kiniá kelepo aulka suluna  
 molopole liepi-liepi topo nikirula: U ulu-pulu-kiri seringi yomboma kinia, we-yombo  
 lupama, ne pe kiniá kepe ulu-pulu-kiri selemele yomboma, kinia kepe, se mundupu  
 naa kelepo 'Ono pali mindili nangi.' nimbu.' "Ulu-pulu-kiri selemele yomboma  
 kinia, sembó." nikiru mele sembó kinia kanoko pilkuli 'Karasi yuni enge pepili ono  
 nanga kerena mane simba.' ningu kanonge. 'Seko kinjilimilimunga, mane simbando  
 enge naa pepili mane naa simba.' ningu kanonge. <sup>4</sup> Sika u yu enge se naa perimu  
 kinia unju-perana uku toko panjeringi kolorumu-na-kolo Pulu Yemonga engemone  
 yu konde molemo. Na yu-kinia kopu sepo molembolomonga yu u enge se naa pepili  
 molorumu mele na enge se naa pepili moliola, na-kolo na ono molemelena ombó kinia  
 Karasi pea kopu sepo molombolomonga Pulu Yemonga tondolomo na-kinia pepili ono  
 tondolo mundupu mane simbú.

<sup>5</sup> Ono yu-melete-melete onono ononga konopuma apuruku pilkuli, 'Olio,' 'Karasi sika.  
 Yunga ungumu sika.' nimbu kuru mondopo molemolonje. Molo mólonje.' ningu

piliangi. Onono yu-melete-melete paa mimi siku piliangi. ‘ ‘Karasí Yesusi ononga konopumanga molemo.’ ningu pilielemene.’ konopu lekero. Molo aku siku manda manjiku pilkuli ‘Sika.’ nimbu kuru naa mondopo molemolo.’ ningu piliengiye? <sup>6</sup> Se i-sipu konopu lekerola, ‘Na „kongono selio mele, mimi siku kanoko pilku apurukuli ‘Na sika Karasini “Nanga kongonomo sende-pu.” nimba lipa mundorumu yemo molio.’ ningu kanangi.’ konopu lekero. <sup>7</sup> Na Pulu Yemo kinia ungu nimbuli, ‘Onone ungu se seko naa kinjangi liku tapondou.’ nimbu mawa selio. ‘ ‘Na Karasini “Nanga kongonomo sende-pu.” nimba lipa mundorumu ye se molemo.’ ningu kanangi.’ nimbu aku sipu yu mawa naa selio. Akumu unguri molo. ‘Onone na kongono selio mele kanoko apurukuli ‘Yu kolo toli yemo.’ níngi liemu mandala na-kolo onone ulu sumbi nilima mindi seko molangi.’ konopu lekero. , ‘Aku seko molonge kinia paa peanga.’ konopu lekero., <sup>8</sup> Nane ungu-sikamo topo mania mundumbu aulka se naa lemó. Ungu-sikamo aliehi lepa mindi pumbá uluma mindi ,lipu tapondopo, sembó.

<sup>9</sup> Ono enge pepili molemelemonga na ‘ono mindili nangi.’ nimbu tondolo mundupu mane simbú enge se naa pelemo kinia konopu sipu molio. Akumunga, ‘Pulu Yemone ono Karasinga yomboma olandopa olandopa sumbi siku molko kamu sumbi siku molonge tondolomo ono sipili.’ nimbu yu aku sipula mawa sendepo molio. <sup>10</sup> Ye-Awilimuni ‘Na yunga kongonomo sendani.’ nimba ono tondolo munduku molonge nambamo na sirimu aku nambamone ono molemelena ombole nane ono tondolo mundupu mane naa siembo.’ nimbu na kolea suluna molopole i pepámo ono topo sipu , ‘olandopa olandopa sumbi siku molangi.’ nikiru. Ye-Awilimuni ‘Ono molko kinjingí kongonomo saní.’ nimba na nambamo naa sirimu kanumu.

**13:11-14**

### *Pollone Pepámo Topa Pora Simbando Torumu Unguma*

<sup>11</sup> Manda, nanga ango-keme, pepá manda tambo kene “Ono molaa.” nikiru. Ono ‘olandopa olandopa yombo sumbi nilima molamili.’ ningu aku siku molonge uluma tondolo munduku seko, nane ono “Sangi.” nikiru mele pilku liku seko, konopu seluna pupili manda selu siku molko, taka leko kopu seko molangi. ,‘Aku siku seko molonge, kinia Pulu Yemone ono konopu mondopa, “Ono konopu seluna pumba pe nipili taka leko molangi.” nilimú yemo ono-kinia molomba.

<sup>12</sup> Pulu Yemonga yombo kake selima molemelema ‘Genupili.’ ningu ono onono anju yando kangulku kondo kolko “Manda molemeleye?” niengi. <sup>13</sup> Pulu Yemonga yombo kake seli ya molemelemane pali “Ono manda molemeleye?” nikimili.

<sup>14</sup> Ye-Awili Yesusi Karasini ono pali we kondo kolopa molopili molko, Pulu Yemone ono pali konopu mondopa molopili molko, Mini Kake Sélimu ono-kinia pali kopu sepa molopili molangi. (Aku sipa sepili.)

,‘Aku pea nikiru.,

## GALLESIA

# Pollone GALLESIA Yomboma Pepá Topa Sirimu Bokumu

*Pollone I Pepá Topa Sirimumunga Ungu-Pulu Mare*

Ungu-pulu mare inia yakondo gomo 676 molemo.

Kolea **Gallesia** akumu disiriki ningu poropinji niringila. Pulu Yemonga bokuna semondo nilimúnje, mimi siku naa pilielemene. Pollo **Gallesia** pumba andorumu semane mare Lipa Mundorumu Yema 13:16—14:25 mele, 16:6, 18:23 molemo.

**Gallesia** pepámonga ungu-pulu se i-sipa: U Juda yomboma mindi Yesusinga talapemo moloringi. Aku-sipa na-kolo pe Pollo Juda yombo naa molko yombo-lupama moloringi koleamanga awisili andopa semane peangamo topa sirimu kinia kanu yombo-lupamanga mare Yesusinga talapena sukundu oringi kinia umbuna se wendo orumu. Kanu umbunamo i-sipa: Mosisini Pulu Yemonga ungu-mane sirimuma u Juda yombomane pilku liku seringi mele kanu yombo-lupamane naa pilku seringimunga Juda ye marene ninguli: "Juda yombo naa molemele yombomane Karasinga yomboma kamu molongendo yema kinia kangoma kinia Mosisini ungu-mane sirimu mele pilkuli ononga kangi se kopisiku makaye seko wendo liengi. Mosisini ungu-mane sirimuma pali pilku liku sangila." niringi. (Ungu se Lipa Mundorumu Yema 15:5 molemo. Akuna 15:1-6 pali kanani. "Mólo." niringi mele 15:19-21 molemo.)

Kanu Juda yema **Gallesia poropinjina** andoko Karasinga talapena yombo moloringimando ninguli: "'Sika.' ningu kuru mondolemele ulu akumuni mindi ono naa lipa tapondomba. Mosisini ungu-mane sirimuma pilku liku sangila." niringina-kolo Pollone nimbole: "Paa mólo!" nirimu. "Yesusi Karasi yu 'Sika.' nimbu kuru mondolemolo ulumuni mindi Pulu Yemone olio kanopale olionga ulu-pulu-kirima siye kolopa, 'konopu sumbi nimba peli yomboma' nimba kanolemo, yu-kinia pea konopu seluna pupili manda kapu sepo molemolo aulkamo akisindilimú. Kanu ulumuni mindi olio molopo kondopo mindi pumulú ulu-pulumu limulú aulkamo akisindilimú. Karasi-mambele kanu aulkamo. Mosisini ungu-mane sirimu akumane olio lipa tapondomba ulu se naa pelemo." nimba i pepámo ono topa sirimu. Ungu akumunga ungu-pulu tondolo se **Gallesia** 2:16 molemo.

Boku **Romo kinia Gallesiatolo** ungu tondolo awisili selu-sipa. Ungu-pulu mare bokumunga pealemekondo "26. lo", "18. katim skin", "31.3. pikinini bilong God", "45. stretpela man", "2. arapela lain" molemo kanani. Ya ungu-pulumu pora nikimu.

*Kolomongo-Awili 1-2*

## **Pulu Yemone Yuyu Pollo Nimba Taltopa "Karasinga Kongonomo Sende-Pu." Nimba Lipa Mundorumu Ungu Se 1:1-5**

*Pollone I Pepámo Tombando U-Pulu-Pulu Torumu Ungumu*

<sup>1</sup> Na Pollo, Yesusini "Nanga kongonomo sende-pu." nimba lipa mundorumu ye se. Mana-yombomane 'Aku kongonomo se-pu.' ningu na ningu naa taltoringi. Mana-ye sene "Nanga kongonomo sende-pu." nimba lipa naala mundorumu. Yesusi Karasi kinia Karasi kolorumu kinia topa makisinderimu Lapa Pulu Yemo-tolone mindi na "Olonga kongonomo sende-pu." ningu liku mundoringili.

<sup>2</sup> Nane ono Karasinga yombo talapemo kolea **Gallesia**, **poropinji**, taonomanga maku toko molemele yomboma i pepámo topo sikiru. Na kinia pea kongonomo kopu sepo selemolo, genupili pea molopole i pepámo topo sikiru.

<sup>3</sup> Olionga Lapa Pulu Yemo kinia Ye-Awili Yesusi Karasitolone ono we kondo kolko, 'Ono konopu pe nipili taka leko molangi.' niengili. <sup>4</sup> Kanu Ye-Awili Yesusi Karasi yuni yuyu 'Olio lipu tapondambo. Olionga ulu-pulu-kirima mania pupili. Olio, manayomboma ulu-pulu-kirimanga sukundu naa molangi lipu tapondopo wendo liembo kene ononga nimbu kolondambo.' nimba kolondorumu yemo. Aku serimumu Lapa Pulu Yemone 'Sani.' nirimu mele pilipa lipa sembando aku serimu. <sup>5</sup> Kanu Lapa Pulu Yemonga imbimu kamu alieli-alieli ola molopa mindi pulimú. Aku sipa sika sepili.

1:6-10

### *Semane Peanga Selu Mindi Pelemo Ungumu*

<sup>6</sup> Karasini ono we kondo kolopale ononga nimba senderimumunga Pulu Yemone "Ono nanga yomboma molangi waa." nirimu mele ono pilku liltingi mele nondoko konopu topele toko, 'ye marene, "Semane peangamo topo sikimulu mele piliangi." nilimili semane se lupa pilku molemelemonga na ono-kinia konopu kiri panjipu konopu awisili kimbu sipu molio. <sup>7</sup> Aku-sipa na-kolo kanu semanemo sika semane peangamo mólo. 'Semane peanga se lupa paa naa pelemo!, Ye marene ono seko sembambu siku "Karasinga semane peangamo topo sikimulu." ningu ungu mare lupa topele-mapele toko Karasinga semane peangamo seko kinjingí sekemele. <sup>8</sup> Aku-sipa na-kolo olione kepe, mulu-koleana molemo angello sene kepe, semane peanga se lupa topo sipu, olione ono u-pulu-pulu topo sirimulu semane peangamo mindi naa tomulu liemu 'aku sipa kolo tomba yemo, Pulu Yemone 'Yu alieli mindili nomba molopili.' nimba 'kolea-kirina lipa, mundopili. <sup>9</sup> U nane ya nindu mele kiniá kelepo nikiru: U semane peangamo 'Sika.' ningu pilku liltingi kanumu yombo sene naa topa sipa, "Semane peangamo tokoro." nimba semane se lupa topa simu liemu 'Pulu Yemone, 'Yu alieli mindili nomba molopili.' nimba 'kolea-kirina lipa, mundopili.

<sup>10</sup> Kiniá nane ya ungu nikirumu 'Yombomane na kape ningu 'ye peangamo.' niengi.' nimbu nikiru molo 'Pulu Yemone na kape nimba 'ye peangamo.' nipili.' nimbu nikiruye? Molo 'Yombomane pilkuli konopu siengi.' nimbu semane peangamo topo siliuye? Nane 'Yomboma konopu siengi.' nimbu unguma selkanje na Karasinga kongono sendeli kendemande ye se naa molka.

1:11-24

### *Pulu Yemone 'Pollo Kongono Andopa Sepili.' Nimba, Nimba Taltorumu Mele Semanemo*

<sup>11</sup> Nanga 'Karasí pilieli, genupilima, nane semane peanga ono topo sirindu kanumu 'mana-,yombo sene konopumuni pilipale na nimba sirimu semane se mólo. 'Akumu paa piliangi.' nimbu nikiru. <sup>12</sup> Kanu semane peangamo 'mana-,yombo sene na topa sirimu-na pilipu lipu andopo naa topo sirindu. Kanu semanemo yombo sene na mane naa sirimula. Paa mólo. Yesusi Karasini 'Kanu semanemo Pollo piliepili.' nimba na semane peanga akumu lipa ora sirimu-na pilipu liltindu.

<sup>13</sup> 'Na u 'Karasinga semanemo ungu sika se paa mólo.' nimbu pilipu paa konopu lupa pepili molorundumunga Karasini yuyu na naa lipa ora silkanje paa pilipu naa lika.. Na u molorundu mele ono semanemo pilieringi. Na u Juda yombomanga ungu-manema paa pilipu sepo molopo, ono Pulu Yemo kape ningu popo toringi mele nane aku sipu sepo molopole, Karasinga yombo Pulu Yemonga talapena moloringima paa tondolo mundupu mindili lipu sipu, 'Yomboma pali Karasinga ungumu kamu munduku keleangi. Yunga talapemo kamu pora nimba mania pupili.' nimbu aku serindu. <sup>14</sup> Na-kinia selu-wele meringi Juda yemanga awisili topo akilendepo, nane Juda yombomanga ulu-puluma paa olandopa pilipu sepo molopo, olionga andakolepalimanga ungu-manema paa tondolo mundupu pilipu lipu, 'Yomboma pilku liku seko molko, kanu ungu-manema paa munduku naa keleangi.' nimbu ungu-manema paa mimi sipu nokorundu. <sup>15</sup> Aku-sipa na-kolo na u naa meangi Pulu Yemone na

we kondo kolopa ‘yunga yemo molambo.’ nimba,, nimba taltorumu, kanu Pulu Yemone yuyu sembá mele konopumuni pilipale <sup>16</sup> ‘Nane yunga Malo kanopo imbi siembo.’ nimba lipa ora sirimu. ‘Juda yombo naa molko yombo-lupa molemelena na andopo yunga semane peangamo topo siembo.’ nimba yunga Malo na lipa ora sirimu. ‘Konopu topele topo Karasinga ye se molopole’ nane ‘mana-’yombo sendo “Na nambi sembonje? Semane peangamo piliambo na toko si.” naa nirindu. <sup>17</sup> Na u aku sipu naa molambo Yesusini u kumbi lepa “Nanga kongonomo sende-paa.” nimba lipa mundorumu yema kolea-awili Jerusalleme moloringina naala purundu. ‘Pulu Yemone na mane sipili.’ nimbu, sumbi sipu kolea Arebia pumbu akuna wale mare molorundu. Pe kelepo kolea-awili Damasikasindu yando ‘ombo ungu-mane sipu, molorundu.

<sup>18</sup> Kanu-kinia ‘Pulu Yemone yunga Malo na u lipa ora sipili pe, kalia-ingi yopoko omba purumu kinia ‘Na Pita kanopo imbi siembo.’ nimbu Jerusalleme pumbu, yu kinia pea koro talo molorundu. <sup>19</sup> Yesusini “Nanga kongonomo sende-paa.” nimba lipa mundorumu yemanga se pea naa kanorundu. Ye-Awilimunga genu Jemisi mindi kanorundu. <sup>20</sup> Nane i semane pepána topo sikirumu kolo naa tokoro. Pulu Yemo kanopa molopili mi lepo ono nimbu sikiru akumu paa sika nimbu sikiru. <sup>21</sup> Pe na kolea Siria kinia Sillisia poropinjitolonga andorundu. <sup>22</sup> Kolea Judia disiriki sukundu kolea wemanga Karasinga yombo talapemané naa kanoringi. <sup>23</sup> Serindu mele semanemo mindi u pilieringi. Akumu i-sipa: “Olio ‘Karasinga yomboma, andopa mindili lipa sirimu ye kanumuni semane peangamo u ‘Kamu mania pupili.’ nirimu semane peanga kanumu kiniá yuni andopa topa silimú.” ningu yombomane semane toko siringimu mindi pilieringi. <sup>24</sup> Pe Pulu Yemone na-kinia serimu mele pilkuli Pulu Yemo kape ningu imbi ambolko paka tondoringi.

## 2

2:1-10

*Yesusini Kumbi Lepa “Nanga Kongonomo Sende-Paa.” Nimba Lipa Mundorumu Yemane Pollo Kongono Serimu Mele “Sepili.” Ningu Ono Yu-Kinia Konopu Seluna Pupili Manda Sere Leko Moloringi Semanemo (1:11 pulu polko kanani)*

<sup>1</sup> Pe kalia-ingi tene-po omba purumu kinia na kelepo ‘wale talo-sipu, Jerusalleme purundu. Banapas kinia pea purumbulu. Taitasi nane lipu merindu, pea purumulula. <sup>2</sup> Aku-sipa na-kolo ‘Karasinga yombo Jerusalleme moloringima nokoringi yemane nando “Ou.”’ nirangi-kulu pilipu naa purundu. Pulu Yemone ‘Na pambo.’ nimba, lipa ora sirimu-na purundu. Pumbuli nane Juda yomboma naa molko yombo-lupa moloringi koleamanga andopo semane peanga topo sirindumu nimbu sirindu. Aku-na-kolo ‘Nane andopo yomboma lipa tapondoli kongonomo selio mele kinia, u kongono serindu mele kinia, kamu mania naa pupili.’ nimbu Karasinga yombo talapemo nokoringi yema kanopo imbi sipu, we-yomboma naa molangi kanu yema onono senga molangi semane peanga andopo topo sirindumu nimbu sirindu. <sup>3</sup> ‘Sika Karasinga Juda ye marene pilkuli, “Juda yombo naa molko yombo-lupa molemelemanga yema Karasinga yema kamu molongendo ononga kangi se kopisangi.”’ nirangi-na-kolo Taitasi na-kinia molorumbulu yemo yu sika Giriki yemo-na-kolo kanu ye awilimane “Yunga kangi se kopisindamili.” ningu ta naa nirangi. <sup>4</sup> ‘Kangi kopiseli ungu se wendo naa olka-na-kolo, ye kolo toli mare onone oliondo ‘Ononga genupilima.’ ningu Karasinga talapena kiyongo ningu oringi. ‘Olio Karasi Yesusinga yomboma molemolomonga Mosisini ungu-mane sirimumane olio naa nokolemo. Kanuma naa pilipu lipu ka-uliana mele naa molopo we molomolo kinia manda.’ nimbu molorumulu mele kanu kolo toli yemane ‘Kanamili.’ ningu oringi. ‘Mosisini ungu-mane sirimuma pilku limili yombomane mindi Pulu Yemone

kanopa 'yombo sumbi nilima' nimba kanolemo mele piliangi.' ningu ,kanu kolo toli yema Karasinga yombo talapena, oringi, na-kolo 'Aku seringimunga 'Mosisini ungu-mane sirimumane olio ka sipili, molko kinjangi.' ningu oringi.' konopu lekero.  
<sup>5</sup> 'Yombo-lupamanga yemanga kangi se kopisangi.' sika niringi,-na-kolo ononga niringi ungumu paa naa pilipu liltimulu. , 'Mosisini u ungu-mane sirimumane kangan-kolte kepe olio Karasinga yomboma naa nokolemo,. Semane peangamo mindi ungu sikamo, akumuni mindi ono nokopili, akumu mindi ono-kinia pepili.' nimbu "Paa mólo!" nirindu.

<sup>6</sup> Jerusalleme Karasinga yombomane, "Olionga ye awilima" niringi kanu yema 'Ono sika imbi molemo molo naa molemonje, akumu unguri mólo.' konopu lekero. Pulu Yemone kangikundu kanopa 'Yombo-kamakoma' nimba 'imbi naa mololima' nimba yomboma apurupa naa kanolemo. Kanu yemane na ungu nimbu siliumunga ungu lipa tapondomba ungu se lupa naa niringi. <sup>7</sup> Paa mólo! Pulu Yemone Pitando "Juda yomboma semane peangamo pungu toko si." nirimu mele aku sipala nando "Semane peangamo Juda yomboma naa molemele yombo-lupama pungu toko si." nirimu mele kanokole , "I-siku ni. I-siku naa ni." ningu ungu se olandopa naa niringi.,  
<sup>8</sup> Yesusini Pitando "Juda yomboma molongena nanga kongonomo sende-pu." nimba lipa mundorumu kinia Pulu Yemone yu tondolo sipa lipa tapondopa molopili kanu kongonomo senderimu kanu mele Yesusini nando "Juda yomboma naa molemele yombo-lupama molongena nanga kongonomo sende-pu." nirimu kinia Pulu Yemone na tondolo sipa lipa tapondopa molopili kanu kongonomo andopo serindu mele kanokole, <sup>9</sup> Jemisi keme, Pita keme, Jono keme, Jerusalleme, yombomane "Onone olio nokolemele ye awilima." niringi kanu yemane Pulu Yemone na i kongonomo paa sirimu mele kanokole, , 'Sika kongono selu-sipu selemolo lémo.' ningu, Banapas kinia olto 'Ononga kandi genutolo mele molangili.' ningu ki liltingi. Ono kinia olto kinia olione ungu se nimbu panjipuli, "Banapas kinia oltone yombo-lupama lipu tapondopo Pulu Yemonga kongonomo sambili. Onone Juda yomboma liku tapondoko Pulu Yemonga kongonomo sangi." nirimulu. <sup>10</sup> Ungu selu mindi "Tondolo munduku sangili." niringi. "Karasinga yombo ,Jerusalleme, talapena sukundu yombo koropa pupili molemelema liku tapondangili." niringi. Kanu kongonomo na koronga-u sembondo konopu sirindu yandopa kiniá kepe tondolo mundupu kanu kongonomo selio.

**2:11-21**

### *Pitane Sepa Kinjerimu Mele Pollone Yu Iri Topa Nimba Para Sirimu Semanemo*

<sup>11</sup> Jerusalleme ye awilimane nando "Seleno mele papu seleno. We seko molani." niringi,-na-kolo pe ,na, kolea-awili Andiyoko ,pumbu molambo, Pita orumu kinia yuni ulu se serimumu paa sepa kinjerimumunga ,kanopole, yu molorumuna pumbu, sepa kinjerimu mele sumbi sipu nimbu para sipu iri torundu. <sup>12</sup> Jemisini , "Andiyoko paa." nimba, lipa mundorumu yema u naa wangi Pita Juda yomboma naa molemele yombo-lupama kinia pea andoko kopu seko kere-lang'i norangi. Aku-sipa na-kolo pe Jemisini lipa mundorumu ye kanuma oringi kinia 'Ye-lupa Karasinga ye molemelema kangi se kopisangi.' niringi yema pipili kolopa, 'Sekero mele naa kanangi.' nimba ,Pita, yombo-lupama kinia andopa kere-lang'i norumu mele mundupa kelepa yuyu molorumu. <sup>13</sup> Kanu-kinia Pitane 'Manda sembó.' nimba konopumuni pilipale kanu yema naa ongo molangi serimu mele pe oringi kinia mundupa kelepa 'Okomele yema kinia konopu seluna pupili molemolo.' nimba topele-mapele topa ulu kolo toli se serimu mele ,Andiyoko, Juda yombo ,Karasinga yombo moloringima, kanokole ono kepe Pitane topele-mapele topa kolo toli ulumu serimu mele aku siku manda manjiku seringila. Pe onone topele-mapele toko kolo toli ulumu seringi mele Banapasini

kanopale 'U lawa sendu lepomo. Ono sekemele mele seko kondokomele. Na aku sипу sambo.' nimba yuni kepe aku sipa lawa serimu.

<sup>14</sup> Kanu-kinia onone semane peangamonga ungu sikamone 'Sangi.' nilimú mele sumbi siku naa seko lawa seringi mele kanopole, ono pali kanoko pilku molangi nane Pitando nimbuli: "Nu Juda ye se na-kolo Juda yombomane ,kere-langi nongendo ungu-manema pilkuli, selemele mele naa seko, Juda yombo naa molko yombo-lupa molemelemane selemele mele seleno, akumunga nuni yombo-lupamando "Juda yombomane ,ungu-manema, pilku selemele mele aku siku manda manjiku sangi." ningu nambi semu-na mane silinuye?" ,nirindu.,

2:15—4:31

## **"Karasi Yesusi Mindi Olionga Lipa Tapondolimu." Ningu Kuru Mondolemele Yomboma Mindi Pulu Yemone ' "Ulu-Pulu-Kiri Se Naa Peli Yombo Sumbi Nilima' Nimbu Kanokoro." Nilimú Ungu Se**

2:15-21

*'Yesusi Sika.' Ningu Kuru Mondolemele Yomboma Mindi Pulu Yemone Kanopa 'Yombo Sumbi Nilima' Nimbu Kanolemo Ungu Se (2:11-21 pali kanani)*

<sup>15</sup> "Juda yombo naa molko yombo-lupa molemelemando Juda yombomane 'ulu-pulu-kiri seli yomboma.' nilimili kanu yomboma olio Juda yomboma mólo; Juda yombomane olio meringimunga olio Juda yomboma molemolo kanuma ,Karasina yomboma molopole ungu talo pilielemolo mele i-sipa: Se: ,<sup>16</sup> 'Mosisini ungu-manne siriumana yombomane mimi siku pilku liku selemelemonga Pulu Yemone ono kanopale ononga ulu-pulu-kirima siye naa kolopa, 'konopu sumbi nimba peli yomboma' nimba naa kanolemo.' nimbu pilielemolo. ,Se: , 'Yombomane 'Yesusi Karasi sika.' ningu kuru mondolemele yomboma mindi aku siku selemelemonga Pulu Yemone ono kanopale ononga ulu-pulu-kirima siye kolopa, 'konopu sumbi nimba peli yomboma' nimba kanolemo.' nimbu pilielemolola. Aku ungutolo pilipuli 'Mosisini ungu-manne siriumana olio ,Juda yomboma, kepe manda naa lipa tapondomba.' nimbu pilipuli, 'Pulu Yemone olio kanopa olionga ulu-pulu-kirima siye kolopa, 'konopu sumbi nimba peli yomboma' nimba kanopili.' nimbu 'Yesusi Karasi ,molopa serimu mele, sika.' nimbu kuru mondorumulu. 'Mosisini ungu-manne siriumana mimi siku pilku liku selemele yombomanga paa selu kepe aku sipa sembamonga Pulu Yemone yu kanopale yunga ulu-pulu-kirima siye naa kolopa, 'konopu sumbi nimba peli yombomo' paa naa nimba kanomba.' nimbu pilipuli 'Yesusi Karasi yu-mambele Pulu Yemone olio-kinia aku sipa sembá aulkamo.' nimbu kuru mondolemolo.

<sup>17</sup> "Aku liemu, olio Juda yombo marene ' 'Pulu Yemone olio kanopa olionga ulu-pulu-kirima siye kolopa, 'konopu sumbi nimba peli yomboma' nimba kanopili.' kene 'Yesusi Karasi manjipa manda sendemba.' nimbu kuru mondamili.' nilimulu kanu ulumuni olio i-sipa mele lipa ora silimú: ,Olione "Juda yombo naa molko yombo-lupa molemelema ulu-pulu-kiri seli yomboma molemolo mele lipa ora silimú, mona lemó. Aku liemu olio ,Juda yomboma, ulu-pulu-kiri seli yomboma molemolo mele aku sipa lipa ora silimú mona lemómonga 'Karasini "Ulu-pulu-kirima sangi." nilimú lepomo.' nimbu pilielemolo kinia peangaye? Paa mólo! ,Karasini aku sipa paa naa nilimú.,<sup>18</sup> Nane u pilipuli, 'Mosisini ungu-manne siriumana na naa lipa tapondopa, Pulu Yemone 'na "mindili nopili." nimba ulu-pulu-kiri se naa peli yombo sumbi nili se molemo kanokoro.' nimba ulu se manda naa sembá.' nimbu kuru mondopo Mosisini ungu-manne siriumana mundupu kelierindu akumu

pe kelepo 'Mosisini ungu-mane sirimumane na manda lipa tapondopa Pulu Yemone na 'yombo sumbi nili se.' nimbá ulu-pulumu pelemo.' nimbu kelepo Mosisini ungu-mane sirimuna ambolopo pilipu lipu selkanje aku selka ulumuni 'Na Mosisini ungu-mane sirimuna u mundupu kelierindu kinia sepo kinjerindu.' nimba lipa ora silka.

<sup>19</sup> 'Aku nikirumunga ungu-pulu se i-sipala: 'Yombo se kololemo kinia yu nokolemo ulu-puluma mundupa kelielemo, kanu ulu-pulumanne yu kololemomonga kelepa naa nokolemo aku sipa mele, Mosisini ungu-mane sirimumane na nokorumu kinia mimi sipu pilipu lipu naa serindumunga ungu-mane kanumane Pulu Yemone na 'ulu-pulu-kiri naa peli ye sumbi nílimu' nimba kanombamonga ulu-pulumu na manda naa sirimumunga kanu ungu-manema na mundupu kelepo kanu ungu-manema kinia ye kololimu mele molorundu. Pe kiniá kanu ungu-manema kinia kololi yemo moliomonga Pulu Yemone kanopa peanga pilielemo uluma sembondo konde molio.

<sup>20</sup> Karasi unju-perana 'uku toko panjeringi kolorumu kinia, na kinia pea uku toko panjeringi kolorumbulu. Akumunga, kiniá na nanu we konde naa molio. Karasi na-kinia kopu sepa molemomonga yunga konde mololi ulumu na-kinia pelemo. Akumunga, kangikundu uluma sepo molio mele 'Pulu Yemonga Malo yu sika.' nimbu kuru mondopole aku sipu kangikundu unguma sepo molio. 'Pulu Yemonga Malo' nikiru yemo yu na konopu mondopa nanga nimba kolali sepa kolondorumu yemo.

<sup>21</sup> 'Pulu Yemone yomboma we kondo kololemo ulumu unguri mólo.' naa nimbu, mundupu naa kielio. Mosisini ungu-mane sirimumane Pulu Yemone olio 'yombo sumbi nilima' nimba kanomba ulu-pulumu manda silkanje Karasi we kolka. Yu kolorumu ulumuni unguri naa selka.' 'nimbu Pitando nirindu.'

### 3

3:1-14

*Mosisini Ungu-Mane Sirimuna Pilku Liku Selemele Ulumu Kinia, 'Karasini Sika Olionga Nimba Senderimu.' Nimbu Kuru Mondolemolo Ulumu Kinia, Kanutolonga Ungu Se (2:14 pulu polko kanani)*

<sup>1</sup> Ono 'Karasinga yombo, Gallesia molemele amu tolima, nane u Yesusi Karasi unju-perana uku toko panjeringi kolorumu mele nimbu sirindu kinia ono paa pilieringi yomboma, ono yombo nawene konopuma sepa sembambu sipa peke tondorumuye? <sup>2</sup> Nane ono ungu paa selumu mangilipu piliambo: Mini Kake Sélimu 'aulka nambolkarenga, liltingkiye? 'Mosisini, ungu-mane sirimuna pilku liku sengena panjiku seringimunga Mini Kake Sélimu liltingi, molo 'semane peanga topo sirindumu, pilkuli 'Sika.' ningu kuru mondoringimunga liltingkiye? <sup>3</sup> Ono 'nambolka unguri pilkuli, aku siku amu tolemeleye? U-pulu-pulu 'Karasinga yomboma molamili. Pulu Yemone olio kanopa peanga piliepili.', ninguli Mini Kake Sélimu liltingi kanumu, pe kiniá 'konopu topele toko, onono ononga engemane 'Mosisini ungu-mane sirimuna pilipu lipu sepole, aku sipu molamili.' ningu pilielemeleye? <sup>4</sup> 'Karasi sika.' ningu kuru mondoringi kinia, ulu 'peangaaku sipa, mare ono-kinia wendo orumu akuma we wendo orumuye? 'Uluma we wendo orumu. 'Wendo orumu kinia 'Mosisini ungu-mane sirimumane olio naa lipa tapondolemo.' ningu naa piliengi, liemu paa kiri.' konopu lekero. <sup>5</sup> 'Mosisini, ungu-mane sirimuna pilku liku selemelemonga Pulu Yemone yunga Minimu ono sipa, ono molemelena ulu-tondoloma selemonje, molo 'semane peangamo, pilkuli 'Sika.' ningu kuru mondoringimunga aku selemoye?

<sup>6</sup> Eporayamondo 'Pulu Yemonga bokuna nimba molemo mele, pilku piliaa: "Pulu Yemone yu-kinia "Sembó."

nirimu mele Eporayamone 'Sika sembá.' nimba  
kuru mondorumumunga kanopale

Pulu Yemone "Yu ye sumbi nílimu." nimba kanorumu." nimba molemo. <sup>7</sup> Akumunga, 'Semane peangamo sika.' ningu, kuru mondolemele yomboma Eporayamonga bolangoma molemele.' ningu piliaa. <sup>8</sup> Pe wendo ombá mele Pulu Yemonga bokuna u molorumu. Pe Juda yombo naa molko yombo-lupamane 'Sika.' ningu kuru mondongemonga Pulu Yemone ono kanopale 'Ononga ulu-pulu-kirima siye kolopo, 'Konopu sumbi nimba pepili molemele yomboma.' nimbu kanombo.' nimbá mele Pulu Yemone u Eporayamondo semane peangamo pumba mele topa sipa nimbale:

' "Nuni kalko lini ye sene sembamonga mana-yomboma pali molko kondonge." nirimu.' nimba molemo. <sup>9</sup> 'Pulu Yemone aku sipa Eporayamondo nimba panjerimu,munga yuni 'Pulu Yemo sika.' nimba, kuru mondorumu ye Eporayamo sewi anjipa sepa kondorumu kinia yandopa yandopa 'Pulu Yemo sika.' ningu, kuru mondolemele yomboma kepe Eporayamo kinia pea sewi anjipa sepa kondolemóla.

<sup>10</sup> 'Mosisini, ungu-manembe sirimuma pilipu lipu sengena panjipu semolo kinia 'Pulu Yemone olio 'ulu-pulu-kiri naa peli yombo sumbi nilima' nimba kanomba.', ningu kuru mondolemele yomboma Pulu Yemone 'Molko kinjangi.' nimbá. Pulu Yemone aku nimbámonga ungu se pilipuliaku nikiru akumu Pulu Yemonga bokuna molemo. Akumu i-sipa:

'Ungu-manembe molemo boku ,Mosisini torumu,munga  
ungu-manembe paa pali alieli pilku liku

sengena panjiku naa senge yomboma

Pulu Yemone 'Molko kinjangi.' nimbá.'

nimba molemo kanumu. <sup>11</sup> 'Pulu Yemonga bokumuni nimbale:,'

'Pulu Yemo 'sika.' ningu,

kuru mondonge yomboma mindi

Pulu Yemone kanopa 'Yombo sumbi nilima.'

nimba kanomba yombo kanuma mindi

konde molko kondoko mindi pungí.'

nimba molemo mele pilipuli 'Mosisini, ungu-manembe sirimuma pilku liku senge yomboma Pulu Yemone kanopa ononga ulu-pulu-kirima siye kolopo, 'konopu sumbi nimba peli yomboma molemele.' nimba kanomba aulka se paa naa lemó mele paa sumbi sipu pilielemolo. <sup>12</sup> 'Mosisini, ungu-manembe sirimumane , 'olio lipa tapondomba.' ningu,, kála seko lombolko senge ulumu kinia, 'Karasini olio lipa tapondomba.' ningu, kuru mondonge ulumu-tolo waltikele liku sere leko manda naa senge. Paa manda mólo! 'Mosisini ungu-manembe sirimuma sengemonga ungu se Pulu Yemonga bokumuni nimbale:,'

'Ungu-manembe paa pali

alieli mimi siku pilku liku sengena panjiku

senge yomboma mindi aku sengemonga

molko kondoko mindi pungí.'

'Ungu-manembe mare waltikele kepe

munduku kelko naa senge kinia

manda molko kondoko mindi naa pungí..'

nimba molemo kanumu.

<sup>13</sup> 'Pulu Yemone, Karasi 'Molopa kinjepili.' nirimu-na yu sika molopa kinjerimu aku ulumuni, Karasi yuni olio 'Juda yomboma, ungu-manembe 'Molko kinjangi.' nilimú aulkana wendo linderimu. 'Pulu Yemone Karasi sepa kinjerimumunga ungu-pulu se Pulu Yemonga bokumuni nimbale:,'

'Yombo unjuna ola 'Kolangi.' ningu

uku toko panjilimili yomboma

‘Pulu Yemone, ‘Molko kinjangi.’ nimbá.’ bokuna nimba molemo akumunga Karasiyu unjuna uku toko panjeringimunga Pulu Yemone Yesusi ‘Molko kinjani.’ nirimula. <sup>14</sup> ‘Pulu Yemone Eporayamondo, ‘Nuni kalko lini ye sene sembamonga mana-yomboma pali molko kondonge.’ nimba, nimba panjerimu ungu peangamo Karasi Yesusini ulu se sendembamonga Juda yombo naa molko yombo-lupama kinia pepili.’ nimba, ‘Pulu Yemone u, olio kolea kirina molopo kinjipu mindi pulimolá aulkana wendo linderimu. ‘Mini Kake Sélimu liengi simbú.’ nimba, nimba panjerimu akumu, ‘Karasini senderimumu olianga nimba lipa tapondombando senderimu.’ ningu, kuru mondonge yombomane paa liengi’ nimba, ‘Pulu Yemone, aku sipa nirimu.

3:15-26

*Mosisini Pulu Yemonga Ungu-Mane Sirimumane Pulu Yemone “Sembó.” Nimba, Nimba Panjerimumu Manda Topa Mania Naa Mundumba Ungu Se (2:14 pulu polko kanani)*

<sup>15</sup> Ango-keme, ‘Ungu se mane simbumu sumbi siku piliangi.’ nimbu, ya mana-yombomane ulu se selemene mele onone pilielememo nimbu siembo. Yombo talone “I-sipu i-sipu sambili.” ningu anju yando ungu se ningu panjilimbili kinia pe kanu ningu panjilimbili ungumunga yombo sene ungu se wendo naa limú, yombo sene ungu se sukundu naa mundulimú. Sika aku ungumu mana-yombotolone mindi ningu panjilimbili-na-colo pe kanu ungumu yombotolonga sene topele naa tolemo. Ungumu ningu panjilimbili mele aku sipa we pelemo. ‘Akumu manda manjipa, Pulu Yemone Eporayamo-kinia serimu mele lipa ora silimú.’ <sup>16</sup> Pulu Yemonga bokumuni nilimú mele i-sipa: ‘Pulu Yemone “Sembó.” nimba, nimba panjerimu ungumu, olio Juda yombomanga anda-kolepa, Eporayamo kinia yuni kalopa limbamo kinia olondo nimba, nimba panjerimu.’ nilimú. ‘Ye, kalopa limbamo.’ nilimú kanumu, ‘ye, selumundu mindi nilimú. ‘Nuni kalko linimu.’ nilimú. ‘Nuni kalko linima.’ naa nilimú. Yombo awasilindu naa nilimú, selumundu mindi nilimú. Aku, ‘ye, selu kanumu, ‘Pulu Yemone nimba taltorumu ye nokoli, Karasimu.

<sup>17</sup> I ungu nikirumunga pulumu i-sipa: ‘Pulu Yemone “Aku sení kinia nane i-sipu i-sipu sembó.” nimba, nimba panjipa mi lierimu kanu ungumu yu koronga kumbi lepa wendo ombo perimu. Kanu ungumu u we pepili pe kalia-ingi po anderete kelepa teti ombo purumu kinia, ‘Mosisini, ungu-mané sirimuma wendo orumu. Kanu ungu-manema sika pe akilepa wendo orumu-na-colo, Mosisini ungu-mané sirimumane Pulu Yemone u nimba panjipa mi lierimu ungumu manda naa topa mania mundumba, Pulu Yemone u nimba panjerimu ungumu we pemba mindi pelemo, ungu akumunga kongonomo mania manda naa pumbá.’ <sup>18</sup> Yomboma Pulu Yemone “We simbú.” nirimu mélemo lingíndu Mosisini ungu-mané sirimuma pilku liku sekole kanu mélemo limolanje Pulu Yemone, ‘We simbú.’ nimba, nimba panjerimu ungumu ‘Sika.’ ningu kuru mondokole manda naa limola. Aku-sipa na-colo Pulu Yemone Eporayamondo “We simbú.” nirimu mélemo ungu nimba panjerimu ungumuni mindi aku mélemo yu we simbando yuyu pilipale nimba taltorumu. ‘Eporayamone ulu se serimu-na kanopa peanga pilipale Pulu Yemone “Simbu.” naa nirimu. Yuni yuyu pilipale aku sipa nimba panjerimu.’

<sup>19</sup> ‘Pulu Yemone “We simbú.” nirimu mélemo simbando yuni u nimba panjerimu ungumu pilipale simba, liemu Mosisini ungu-mané pe sirimuma nambi semu-na sirimuye? Kanu ungu-manemane nambi selemoye? Aku, “Yomboma ulu-pulu-kirima selemene mele piliangi lipu ora siembo.” nimba Pulu Yemone, ‘I-siku saa. I-siku naa saa.’ nimba, kanu ungu-manema sirimu. ‘Pulu Yemonga ungu-mané Mosisini yando sirimuma naa pelkanje ulu-pulu-kirima sepole ‘Sepo kinjemulu.’ nimbu naa pilielemolá.’ Aku-sipa na-colo ‘Kanu ungu-manema kamu pepili.’ nimba

Pulu Yemone naa sirimu. Eporayamone kalopa limbamondo u nimba panjerimu kanu kalopa limba yemo 'u naa opili ungu-manemane yomboma nokopili. Yu ombá kinia ungu-manemanga tondolomo mania pupili.' nimba Pulu Yemone ungu-manema sirimu. Pulu Yemonga ungu-manema mulu-koleana angellomane yando ningu sinderengi, yomboma kinia mulu-koleana angelloma kinia suku-singina ye sene yando linderimu kinia kamu perimu. „Kanu suku-singina yemo yu Mosisi kanumu.„<sup>20</sup> Pulu Yemone ungu-manema simbando suku-singina ye sene sinderimu, Pulu Yemone yuyu yombomando sumbi sipa ungu se naa nirimu, na-kolo ye sene yuyu ungu se sumbi sipa nimba panjilimú kinia suku-singina yombo sene unguri naa sendelemo. Pulu Yemo yu ye selu mindi molopa yuni yuyu sumbi sipa Eporayamokinia ungu se nimba panjerimu. Yombo sene suku-singina ungu se naa senderimu.

3:21-26

*'Olio Pe Karasinga Yomboma Molamili.' Nimba Mosisini Ungu-Mane Sirimumane Olio U Nokopa Mane Sirimu Ungu Se (3:14-26 pali)*

<sup>21</sup> Pulu Yemone aku sipa serimu-kulu „Mosisini Pulu Yemonga, ungu-mané „sinderimu ungu, ma kinia Pulu Yemone „Eporayamo kinia, nimba panjerimu ungumu kinia anju yando opa-tou mele molembeleye? Paa mólo! „Pulu Yemone konopu talo lepale “Ungu-manemane ono nokopili siembo.” naa nirimu.„ Yomboma konde molko mindi puli ulu-pulumu manda simba ungu-mané se pelkanje Pulu Yemone kanu ungu-manemana pilku liku selememe „yomboma, kanopa ‘yombo, sumbi nilima’ nimba kanolka. Pe olio aku sipa ungu-mané pelkamo pilipu lipu sepole konopu sumbi nimba pelima molopole yunga kumbi-kerena manda pumbu molemolá.<sup>22</sup> Aku-na-kolo aku sipa seli ungu-mané se naa perimu, naa pelemo. Pulu Yemonga bokumuni i-sipa mele nilimú:

“Koleamanga pali yomboma pali ulu-pulu-kirimane  
ka silimú, ka-ulkana mele pelemele.

Kowa manda naa pulimili.”

nilimú. „Pulu Yemonga ungu-manemana pelemomonga aku selemo.„ „Mosisini ungu-mané sirimumane yomboma nokolemomonga ulu-pulu-kirimane yomboma pali ka silimúmunga pulumu i-sipa:„ Pulu Yemo yuni nimba panjerimu mélemo ‘yombo-mané lingíndu Yesusi Karasini senderimumu ‘Paa sika.’ ningu kuru mondonge yomboma siembo liengi kene ulu-pulu-kirimane yomboma pali ka sipa pepili.’ nirimu. Simba lingí aulka se lupa mólo.

<sup>23</sup> Yesusini olionga nimba senderimu mele ‘Sika.’ nimbu kuru mondomolo aulkamo u wendo naa opili Mosisini „Pulu Yemonga, ungu-mané „sirimu, mane olio “Mongo língi kene mindili nangi.” nimbándo ka mele sirimu. Yesusini pe ombo olionga nimba senderimu mele ‘Sika.’ nimbu kuru mondolemolo ulumu ulka-ki mele lepa, ungu-mané u perimumanga ka-ulkamonga lloko mele perimu kanumu pe ki lindimbamonga Mosisini u sirimu ungu-manemane aku serimu.<sup>24</sup> „I-sipu mele nikiru:„ ‘‘Pulu Yemone olionga ulu-pulu-kirima siye kolopa, konopu sumbi nimba peli yomboma molemele.’ nimba kanopili.’ ningu ‘Karasini olionga nimba senderimu mele ‘Sika.’ ningu kuru mondangi.’ nimba Karasi u mana naa opili Pulu Yemone ‘Ungu-manemane olio yunga nokondopili.’ nimba, ungu-manemana sirimu.<sup>25</sup> Aku-sipa na-kolo kiniá olio Karasini senderimu mele ‘Sika.’ nimbu kuru mondopo molomolo aulkamo wendo ombo pelemo-na „Pulu Yemonga, ungu-mané u sirimumane olio naa nokolemo.

3:26—4:7

*Pulu Yemonga Bolangoma Molemolo Mele Ungu Se*

<sup>26-27</sup> Kiniá Karasi Yesusini „pe senderimu mele, ‘Sika’ olionga nimba senderimu.” ningu kuru mondolememe ungu-muni ono pali kiniá Pulu Yemonga bolangoma

molonge aulkamo akisinderimu-na aku siku molemele. Ono no liltingi kanu ungumuni Karasi kinia ono kinia yombo selumu mele moloringima pali Karasi, „mulu-maminia mele,“ pakoringimunga sika Pulu Yemonga bolangoma molemele.<sup>28</sup> Ono pali Karasinga yombo molemelema, Juda yomboma lupa, Juda yombo naa molemele yomboma lupa mólo; kou-mone naa liku we kendemande kongono sendeli yomboma lupa, we molemele yomboma lupa mólolá; yema lupa, amboma lupa mólolá; kiniá ono pali Yesusi Karasinga yombo talape selumu mindi molemelemonga yombo lupa lupama naa molemele. <sup>29</sup> Ono Karasinga yomboma molongi liemu ono Eporayamone kalopa lillimu yomboma molemelela; Pulu Yemone u „Eporayamone kalopa limba yomboma, “Simbu.” nimba, nimba panjerimu mélemo ono pea lingí.

## 4

**4:1-7**

*Olio Kendemande-Yomboma Mele Molorumulu-Na-Kolo Kiniá Pulu Yemonga Bolangoma Molopo, Yunga Monge-Mélema Limulú Yomboma Molemolomonga Ungu Se (3:26—4:7 pali)*

<sup>1</sup> „Bolangoma kinia monge-mélema lingí yomboma kinia, akumando nimbú nikirumu i-sipa: Kango sene yunga lapanga monge-mélema sika limú, aku-na-kolo u yu kanga kinia lapanga kongono kendemande yombo se mele molemo. Lapanga mélema pali sika yunga, aku-na-kolo yu kango kangamo mindi molemo kinia naa limú. <sup>2</sup> Lapane ‘pe yu monge-mélema lipili.’ nimba, nimba panjilimú walemo u wendo naa opili “Kangomo kinia mélema kinia nokopili.” nimba, nimba taltolemo yombomanga unguma mindi pilipa molemo. <sup>3</sup> Olio aku sipala. Olio bolango kangama molorumulu kinia ungu-manemane mindi ‘Nanga kendemande-yomboma.’ nimba olio nokopa, kangimane ulu-puluma semolo mele mane sirimu.

<sup>4</sup> Aku-sipa na-kolo Pulu Yemone u yuyu konopumuni pilipa nimba taltorumu walemo wendo orumu kinia yuni yunga Malo lipa mana mundorumu akumu „Mosisini, ungu-mané sirimumane nokorumu yombo talapena sukundu ambo sene merimu. <sup>5</sup> „Mosisini, ungu-mané sirimumane nokolemo yombo kanuma kelepa naa nokopili. Ono we molko, „Mosisini, ungu-mané sirimuma manda naa pilku liku selemelemonga mindili nongo kolonge aulkana wendo ongo, nanga „bolango, ma molko nanga monge-mélema liengi.” nimba yuni yunga Malo ‘Ononga nimba „yunga mememo ondopa, kolali sepa kolondopili.’ nimba mana maniando lipa mundorumu. ‘Malone olionga nimba sendemba ulumuni olio manda molomolo aulkamo akisinddepili.’ nimba yu olio mana-yomboma molemolona lipa mundorumu.

<sup>6</sup> Pe Pulu Yemonga bolangoma molemolo-na yuni yunga Malonga Minimu olionga konopumanga sukundu „Molopili.” nimba, lipa mundundorumu. Aku Minimu Pulu Yemondo “Tata. Nanga Lapa.” nilimú Minimu. „Pe olionga konopumanga molopa “Tata; nanga Lapa.” nilimú kinia, pilipuli ‘Olio yunga bolangoma.’ nimbu pilielemolo.. <sup>7</sup> Pulu Yemone aku serimu-kulu kiniá mélemane u ono nokorumu kinia kanu mélemanga kendemande-yomboma moloringi mele naa molemele; Pulu Yemonga bolangoma molemele. Pe yunga bolangoma molemele-na yuni “Nanga taltolio mélema ono pe monge-mélema liengi simbú.” nirimu.

**4:8-20**

*Pollone Gallesia Yomboma Kondo Kolopa Konopu Awisili Kimbu Sirimu Ungu Se*

<sup>8</sup> U Pulu Yemo naa pilku yunga yomboma naa molkole niringimuni, Pulu Yemo naa molorumu we-mélema ‘olionga pulu yema’ ningu liku anjiku popo toringi mélemanga kendemande kongono paa kála seko senderingi. <sup>9</sup> Aku-sipa na-kolo kiniá Pulu Yemo pilku imbi siku yunga yomboma molemele. Aku-sipa na-kolo sika akumu mólo. Nane i-sipu niembo: Pulu Yemone nimbale: “Ono na pilku imbi siku nanga

yomboma molangi." nirimu. Aku liemu kiniá „aku siku, molemele mele nambi semu-na munduku kelko bulu siku, enge naa peli ungu-manema, nambi semu-na kelko pilku molemeleye? 'Kanu ulumane olio kelepa nokopili. Olio kanu ulumanga kendemande sendeli yomboma kelepo molomolo kinia papu.' ningu pilielemeye?  
**10** Juda yombomane koro senga senga wale senga koro molonge walema kinia, oli kondenga ke tomba walema kinia, kalia-ingi kondenga wendo ombá walema kinia, kere-langí nou lemba kinia pulu polko sukundu lingí walema kinia, kanu walema wendo ombá kinia ulu mare pilku senge mele Pulu Yemone „Mosisini nimba sirimu kinia pilipale Isirele yomboma ungu-mané sirimumunga pilku liku selemele, mele „ono Karasinga Gallesia yomboma 'Pulu Yemone olio kanopa peanga piliepili.' ningu, pilku liku selemele.  
**11** „Aku siku selemelemonga," 'Nane ono kála sepo mane sirindu mele we serindunje. Ono-kinia kongono serindumu we mania pumbá. Na ono mane sirindu unguma munduku kelko u pilku seringi mele kelko pilku senge kinia kiri.' nimbu na paa mini-wale mundukuru.

**12** Ango-keme, nane ono paa tondolo mundupu mawa sepole, na u „Mosisini ungu-mané sirimuma mundupu kelepo, ono Juda yombo naa molko yombo-lupa moloringimane Mosisini ungu-mané sirimuma naa pilieringi mele molorundu kene kiniá na „Karasinga ungumu pilipu, molio mele ono aku siku pilku molangi.

„Na ono-kinia molorundu kinia, onone na-kinia unguri seko naa kinjeringi.  
**13** Ono pilielemeye, na kuru se torumumunga u kumbi lepo ono moloringina ombo semane peangamo topo sirindu.  
**14** Nanga kangimu enge naa nirimumunga ono umbuna sirindu-na-kolo onone na kanoko kiri pilku bulu naa siku, na munduku naa kelieringi. Pulu Yemone angello se ono molemelena lipa mundulka kinia "Pea molamili ou." nilimolá mele, molo Karasi Yesusi yu olka kinia "Pea molamili ou." nilimolá mele na aku siku "Pea molamili ou." niringi.  
**15** Ou na-kinia konopu siku "Papu onu. Pea molamili ou." niringi mele kiniá nambi selemoye? Nane paa sika nimbu sikiru: 'U na ono kinia pea molorumulu kinia „méle paa konopu lakoko mondoringi mélema na silimolá. Nanga mongo se kiri lelkanje 'Na lipu tapondamili.' ningu, ononga mongo se akuku na silimolá.' nimbu sikiru.  
**16** „Aku liemu, nane ono ungu sikama nimbu sikirumunga kiniá na ononga opa-toumu molioye?

**17** 'Kanu „ye Mosisini ungu-mané sirimuma pilku sangi.' ningu mane silimili, yemane "Olionga unguma paa piliangi." ningu tondolo munduku mane silimili-na-kolo aku selemele ulumu 'Ono lipu tapondamili.' ningu naa selemele. 'Ono „na kinia nanga genupilima kinia, kopu seko naa molangi.' ningu pipi siku, 'Ono-kinia mindi kopu seko molko ononga unguma mindi konopu kimbu siku pilku liku molangi.' ningu aku siku tondolo munduku mane silimili.  
**18** Na ono-kinia naa molio kinia ye lupa marene 'Ono lipu tapondamili.' ningu tondolo munduku 'Pulu liepili. Kopu sepo molamili.' nilimolánje papu. Ye marene aku siku ongo alieli selemolánje papu-na-kolo ye marene ongo 'Olionga unguma pilku liengi,' ningu kolo toko tondolo mane silimili akumu kiri.  
**19** Nanga konopu mondolio bolangoma, amboma bolango mengendo mindili nolemele mele 'Ono Karasi yu-mele molko yunga ungumu mindi pilku liku molangi.' nimbu na aku sipu kelepo mindili nokoro yemo molopole,  
**20** 'Na ono-kinia molopole ononga kumbikerema kanopo unguma kerena sumbi sipu nimbu silkanje papu. 'Pepá mindi topo mundukurumu laye-kolte manda mólo.' nimbu molopo, 'onone kiniá selemele mele pilipuli, 'Nane ono nambi sepo lipu tapondombonje.' nimbu pilkirumunga ono paa kondo sepa umbuna sekemo.

**4:21—5:1**

*Eporayamonga Ambo Aka Kinia Seratolo Moloringili Mele Unzu-Iku Se (3:15 pulu polko kanani)*

<sup>21</sup> Ono ‘Juda yombomanga, ungu-manemane olio nokopili.’ nilimili yomboma, kanu ungu-manemane nilimú mele ono naa pilielemeleye? Na nengu sieme. <sup>22</sup> „Pulu Yemonga, bokumuni nimbale: “Eporayamone kango talo merimu, se kongono we sendepa méle kaloli se naa lili kendemande-ambomone merimu; se mindili se naa nomba we molorumu ambomone merimu.” nilimú. <sup>23</sup> Kendemande-ambomone kango menderimumu bolangoma melemele mele aku sipa we menderimu. Aku-na-kolo we molorumu ambomone yunga kango menderimumu we naa menderimu. Pulu Yemone ‘Yuni kango se mendemba.’ nimba, nimba panjerimumunga kanu kangomo menderimu.

<sup>24</sup> Kanu ambotolo Pulu Yemone ungu talo nimba panjipa mi lierimutolo mele manda manjiku, olone seringili ulu-tolonga ungu-iku se pelemo. „Kendemande-, ambo Aka yu Pulu Yemone ungu se mulú Sainaina nimba panjipa mi lierimu ungumu mele molemo. Kanu ungumu „Pulu Yemone Mosisi sirimu,muni kongono kendemande yombo molonge bolangoma melemó. <sup>25</sup> Ambo Aka kinia kolea Arebia mulú Sainai pololemotolonga ungu-pulumu selumu. Kolea-awili Jerusalleme molemele yomboma „Mosisini ungu-mane sirimumanga, kongono kendemande sendeli yomboma mele molemelemonga Jerusalleme kiniá lemó akumu mulú Sainai polorumu mele aku sipala lemó. „Jerusalleme akumu akuna molemele yombomanga anumu yu kongono kendemande sendeli ambomo mele kanumu.” <sup>26</sup> Aku-sipa na-kolo Jerusalleme se mulu-koleana lemónonga yomboma mindili se naa nongo we molemele. Aku Jerusalleme olio „Karasinga yomboma,nga anumu. <sup>27</sup> Aku nikirumunga pulumu „Pulu Yemonga, bokuna molemo kanu ungumu i-sipa:

“Ambo-simbumu,

bolango naa meleno ambomo, nu konopu siyo.

„Bolango mengendo

konopu siku mindili nolemele mele

bolango naa melenomonga,

mindili naa noleno ambomo,

nu konopu peanga pepili konane nengu

tondolo ru niyo.

Ambo-simbumuni melemó bolangoma paa awisili,

we-ambomanga bolangoma koltalo mele,

akumunga paa konopu siku aku seyo.”

nimba ungumu aku sipa bokuna molemo.

<sup>28</sup> Ango-keme, „Pulu Yemone Eporayamondo, “Wendo ombá.” nimba, nimba panjerimu mele akumu wendo ombádo „Eporayamone yunga kango, Aisake merimu, aku sipa mele, kiniá ono „Karasinga yomboma, kinia kepe „Pulu Yemone “Wendo ombá.” nimba, nimba panjerimu ungumu wendo ombádo „Pulu Yemonga, bolangoma molemelela. <sup>29</sup> „Eporayamonga kangotolo, meringili kinia bolango we melemele mele meringi kangomone „Pulu Yemonga, Minimunga tondolomone meringi kangomo sepa kinjipa mindili sirimu. Kiniá aku sipala „Mosisini ungu-mane sirimumanga kendemande-yombomane Karasinga yomboma mindili silimili.” <sup>30</sup> Aku-sipa na-kolo kanu ambotolo kinia olonga kangotolo kinia Pulu Yemonga bokumuni nambolka nilimúye? „I-sipa mele nilimú:”

„Pulu Yemone Eporayamondo nimbale:”

“Kongono kendemande ambomonga malo kangomo kinia

we molemo ambomonga malo kangomo kinia

lapanga monge-mélema

moke seko paa naa liengili kene

kendemande-ambomo kinia malotolo

kamu makorou.” „nirimu.”

nimba molemo kanumu. <sup>31</sup> Akumunga, ango-keme, olio kendemande-ambomonga bolangoma naa molemolo; ka-kongono naa sepa we molorumu ambomonga bolangoma molemolo.

*Kolomongo-Awili 5-6tolo:*

## **Karasini Olio 'Ka-Ulkana Mele Naa Peko We Molangi.'**

### **Nilimú Kinia Mini Kake Sélimuni Olio Aulkana Pumbu Selemolo Mele Lipa Sumbi Sirimu; Olio Yomboma Lipu Tapondopo Sepo Kondolemolola, Akumanga Ungu Mare**

## 5

5:1-15

*Olio Mélseñe Pipi Sipa Naa Nokopili Paa We Molemolo Mele 'Aku Sipu We Molamili. Mélseñe Kelepa Nokopa Ka Naa Sipili.' Nimbu Mimi Sipu Kanopo Molamili Ungu Se*

<sup>1</sup> „Ka-kongono naa sepa we molorumu ambomonga bolangoma molemolomonga pulumu i-sipa: „Mosisini u ungu-mané sirimumane olio naa nokopili. We manda molangi.“ nimba Karasini olio wendo liltimu. Akumunga, ‘Mélseñe kelepa naa ambolopili; mélseñga kendemande-yomboma naa molopo, we mindi molamili.’ nengu tondolo munduku molangi.

<sup>2</sup> Nanga unguma paa piliangi. Na Pollone onondo nimbili: Ono „Karasinga yema, ononga kangi se ‘kopisiku wendo lindangi.’ níngi liemu Karasini ‘yombomanga’ nimba lipa tapondorumu ulumuni, ono kanga-kolte kepe paa unguri manda naa sembá. <sup>3</sup> Kelepo yemando pali sumbi sipu nikiru: ‘Pulu Yemone na kanopa peanga piliepili kene, kangi se kopisindangi.’ níngi yema ‘Mosisini, ungu-mané sirimumane pali nokomba. ‘Kangi se kopisangi.’ nilimú ungu-manemo pilku liku selemene yemane kanu ungu-manema pali pilku senge aulkamo akisingí. <sup>4</sup> Ono „Karasinga Gallesia yombomanga yombo mare, ‘Pulu Yemone olio kanopale olionga ulu-pulu-kirima siye kolopa, ‘konopu sumbi nimba peli yomboma’ nimba kanopili.’ nengu ‘Mosisini, ungu-mané sirimuma pilku liku selemene yomboma Karasi munduku kelko, yu-kinia seluna moloringi aulkamo pipi siringi; Pulu Yemone yomboma we kondo kololemo ulumuni ono naa nokolemo. <sup>5</sup> Aku-sipa na-kolo ‘Mosisini ungu-mané sirimumane manda naa lipa tapondomba.’ nilimulu yomboma, „Mini Kake Sélimuni ‘Sika’ nimbu kuru mondolemolo ulumu tondolo pupili.’ nilimúmunga ‘pe yombo sumbi nilima sika molomolo.’ nimbu konopu sipu nokopo molemolo. <sup>6</sup> Karasi Yesusi kinia kopu sepo molemolo kinia yomboma kangi se kopisilimili molo kangi se naa kopisilimili aku ulumane unguri naa selemo. ‘Yu sika olionga lipa tapondólimu.’ nengu, kuru mondokole yomboma konopu mondolemele ulu kanumu mindi sika tondolo se pelemo.

<sup>7</sup> ‘Méle kalólimu liemili.’ nengu, keru-kuru liku lisiku kondoringi. Pe kiniá yombo nawene ombo ono „Karasinga, ungu sikamo pilku liku selemene aulkamo pipi silimúye? <sup>8</sup> Nawene ono kondi topa “Ungu sikamo munduku keleangi.” nimuye? Kiniá ono konopumuni pilielemene ulu akumu ‘Nanga yomboma molangi waa.’ nimba mangilielemo ‘Pulu, Yemone ‘Aku siku piliangi.’ naa nilimú. <sup>9</sup> ‘Piliame! Ungu-iku toko,

“Pellawa akoli méle isi  
pellawana mundulimili kinia

isi paa kanga-koltene pellawa awisili akolemo.”

„nilimili kanumu. Ono kondi tolemo ye kolo tolimu aku sipa selemo. Yu ono-kinia molemomonga ono awisili yunga ungumu lombili pulimolá.. <sup>10</sup> ‘Aku-sipa na-kolo, ono sika senge mele tondolo mundupu kuru mondokoro. Ye-Awilimu kinia kopu sepo

molemolomonga yuni ono lipa tapondomba kinia nane u ungu sikamo nimbu sirindu unguma 'Sika.' ninguli 'ungu se lupa konopu kimbu naa singí.' nimbu tondolo mundupu kuru mondokoro. Ye sene ono sepa sembambu sipa kondi tolemo akumu nawenje, na naa pilkiru-na-kolo aku selemomonga sika méle kaloli kirimu limba.

<sup>11</sup> Ango-keme, 'Pollone "Kangi se kopisangi." nilimú.' nilimili mele sika aku sipu nane niliu liemu nambi semu-na 'Juda yombomane, na mindili silimiliye? Aku sipu nilkanje na mindili silimili aulka se naa lelka.' Aku sipu nilkanje 'Karasi, unjuperana 'olionga nimba kolondoru mu mele nimbu siliu, ungu akumu pilkuli 'Juda yombomane, pilku kiri pilku na umbuna se naa silimolá.' <sup>12</sup> 'Kanu yemane ono 'Karasinga yomboma, ningu sembambu siku " 'Pulu Yemonga yomboma molangi.' ningu kangi se kopisiku wendo liengi.", nilimili yemane ononga kangi se kopisikuli ononga láka kamu limolanje papu.' konopu leker.

<sup>13</sup> Nanga ango-keme, Pulu Yemone 'Ungu-mane sene ono nokopa umbuna se naa sipa ono naa ambolopili paa we molangi.' sika u nimba ono nimba talorumu-nakolo pe onone ninguli: 'Manda, ungu-mane sene olio naa nokolemo, we molemolo kene u-we-konopumane ulu pilkimulu mele samili.' ningu ulu-pulu-kirima naa sangi. 'Ungu-mane sene olio naa nokolemo.' ningu ono onono anju yando konopu mondoko onono anju yando liku tapondoko kongono sendangi. <sup>14</sup> Mosisini ungu-mane sirimu pelemomanga pali ungu-mane selumuni lipa sere lemó, akumu i-sipa: 'Onono yu-meletele konopu mondoko,

ononga kangima onono kondo kolko nokolemele mele  
aku sikula pulu lemó yomboma  
konopu mondoko nokoko molangi.'

nimba pelemo ungu-manemo. <sup>15</sup> Aku-sipa na-kolo onone onono anju yando irinale seko mumindili kolko angelema ningu, aku selko púngi liemu 'Aku semolomonga olio pali molopo kinjimulú.' ningu, pilku kondoko molangi.

5:16-26

### *Yomboma Pulu Yemonga Minimuni Ambololemo Kinia Selemele Uluma Kinia, U-We-Konopumane Pilku Selemele Uluma Kinia, Kanu Ulumanga Ungu Se*

<sup>16-17</sup> Akumunga, nane onondo mane sipuli paa i-sipu nikiru: Ononga u-we-konopumane konopu mondoemele ulumane Mini 'Kake Séli, mu topa mania mundumba selemóla; Minimuni u-we-konopuma topa mania mundumbala selemo kene 'Mini 'konopuna molemo, mone olio ambolopili.' ningu molko, yunga unguma pilku, yuni "Saa." nilimú mele pilku liku seko molayo. Aku sekole ononga u-we-konopumane pilku konopu mondoko selememele uluma kelko paa manda naa senge. Olone 'I yombomo na pilipa molopili.' ningu keru-kuru limbilimunga onone 'Samili.' konopu lemele mele manda naa selememele kene 'Minimuni olio ambolopili.' ningu, yunga unguma mindi pilku liku seko molangi. <sup>18</sup> Aku-sipa na-kolo Minimuni ono ambololemo, yuni nilimú unguma pilku liku seko molongi liemu 'Mosisini, ungu-mane sirimumane ono ka sipa enge nimba naa nokolemo.

<sup>19</sup> We-konopu-umane pilku ulu selememele ono pilielememele. Yombomane we-konopu-umane pilku ulu selememele uluma i-sipa:

Wa ulu-kirinale seko,  
ambo yema anju yando kanoko yama ungu leko 'ungu se samili.' ningu konopu kimbú siku,  
amboma kinia yema kinia ungu-kirima mindi selko andoko,  
aku siku selememele uluma kinia;  
<sup>20</sup> 'I mélema olionga pulu yema.' ningu akuma anjiku popo toko kalko kuru koyoko, ala toko pindu toko,  
'Yombo topo kondamili.' ningu neambo liku tomo ambolko kuru koyoko selememele,

aku siku selemele uluma kinia;  
 yomboma-kinia konopu kiri panjiku, opa-tou molko, irinale seko,  
 'Nanga mélema nanu ambolambo. Yombo lupamane naa liengi!' ningu paa  
 ambolko kondoko,  
 mumindili kolko,  
 'Na mindi sepo kondopo, molopo kondolio.' konopu leko, yombo lupamane  
 selemele mele alieli kanoko kiri pilku "Seko kinjikinu." ningu iri toko,  
 yomboma-kinia 'Konopu seluna pupili manda sere lepo naa molopo konopu seluna  
 pupili naa molamili.' ningu sungu siku,

<sup>21</sup> yombo lupama molemele mele kepe ononga mélema yama mengo 'Ono maloya.'  
 konopu leko,

aku siku selemele uluma kinia;  
 no tondolo awisili nongo amu toko,  
 maku toko no-tonadoloma nongo amu tokole ungu kirima ningu konane kirima  
 ningu ulu kirima seko molko,

aku siku selemele uluma kinia.  
 Ulu kiri lupa lupa selemele we-konopu-umane pilkuli selemele. Ono u liepi-liepi  
 torundu mele kelepo liepi-liepi tokoro: aku siku seko molemele yomboma Pulu Yemo  
 ye nokoli kingimu molopa nokolemo koleana naa pungu yunga mélema naa lingí.

<sup>22</sup> Aku-sipa na-kolo Mini ,Kake Séli,muni konopumanga molopa ambololemo  
 yombomane ulu selemelema i-sipa:

Yomboma konopu mondoko,  
 konopu siku molko,  
 konopu pe nipili taka leko molko,  
 olo taka lieli pepili molko,  
 yomboma kondo kolko liku tapondoko,  
 yombo mélema mólo tolemoma liku tapondoko mélema siku,  
 ulu sikama mindi sumbi siku seko,

<sup>23</sup> yomboma-kinia kara naa pungu pangu ningu taka leko molko,  
 'U-we-konopumuni pilierindu mele paa naa pilimbu.' ningu munduku kelko taka  
 leko molko,

ulu peanga akuma seko molemele. Ulu peanga aku sipama 'naa sangi.' nimba ungu-  
 mane se paa naa pelemo.

<sup>24</sup> Yesusi Karasinga yombo molemelemane ononga u-we-konopuma 'Kamu kolopa  
 mania pupili.' ningu koronga unju-perana uku toko panjeringi kinia kanu konop-  
 umane yakala kololemo uluma kinia, yakala kolko 'Paa samili.' nilimili uluma  
 kinia, akuma pali unju-perana uku toko panjeringila. 'Unju-perana uku toko  
 panjeringimunga kiniá kelko u-we-konopumane pilku ulu-pulu-kiri akuma senge  
 aulka se naa lemó.'

<sup>25</sup> Minimuni olio konde molopa kondoli ulu-pulumu silimú kene yuni 'Seko  
 molangi.' nilimú mele pilipu lipu sepo molamili. <sup>26</sup> Oliolio olionga imbima we  
 ambolopo paka naa topo, olionga yombomanga se 'Mumindili kolopili.' nimbu anju  
 yando konopu naa lepo, yombo lupamanga mélema kinia uluma kinia yama membo  
 'Ono maloya!' nimbu yakala anju yando naa kolamili.

## 6

6:1-10

### Karasinga Ungu-Manemo Pilipu Lipu Semolo Mele Ungu Se

<sup>1</sup> Ango-keme, ononga genu sene ulu-pulu-kiri se sembá kinia kanokole ono ,Pulu  
 Yemonga, Minimuni nilimú mele pilku liku molko kondolemele yombomane kanu  
 yombomo 'Konopu topele topa kelepa Pulu Yemo kinia manda molopili.' ningu

liku tapondongendo yu kondo kolko taka leko, liku tapondayo. Ono kepe yu-mele-mele 'Na aku sipa kondi-ka sembá kinia i sekemo mele sembone naa sembone?' ningu pilkuli kanu yombo ulu-kiri se sembamo iri naa toko taka leko liku tapondaa. <sup>2</sup> 'Karasini ungu-mane sipa "Saa." nirimu aku mele samili.' ningu onone genalinga umbuna we wendo omba pemba uluma ono pea menda. <sup>3</sup> Yombo sene yu imbi ola naa molemo kinia 'Na imbi ola molemo akumunga 'nanga genu naa lipu tapondombo.' konopu lemó yombomo yu yuyu kolo topale 'yunga imbi sika ola molemo.' nimba konopumuni pilielemo. <sup>4</sup> Aku sipa konopu lemba manda naa sembá kene yombomane yu-mele-mele konopu leko ulu selemelema manda manjiku apuruku 'Nane imu sepo kondokoro molo imu sepo kinjikiruye?' ningu ono onono yu-mele-mele piliangi. Yombo sene yuyu mindi kanopa pilipale sepa kondombamanga 'Paa sekero.' nimba manda kape nimba konopu simba. Akumu peanga. Yunga uluma kepe yombo lupamanga uluma kepe seluna sere lepa manda manjipa apurupa kanopale 'Nanga peanga, ononga kiri.' nimba apurumba akumu kiri. <sup>5</sup> Yomboma yu-mele-mele ulu selemelemonga umbuna wendo ombáma onono yu-mele-mele umbuna menge kene 'aku siku sangi.'

<sup>6</sup> „Karasinga,“ unguma mane sili yombo senga ungumu pilku molemele yombomane kanu yombomo ‘Lipu tapondamili.’ ningu ononga méle peanga ‚taltolemele,‘ ma moke seko yu siengi.

<sup>7</sup> 'Nane ungu nimbu konopu lepo ulu sembóma Pulu Yemone naa kanomba.' ning  
pilku ononga onono konopumanga kolo toko naa piliayo. Yomboma Pulu Yemone  
naa pilipa naa kanomba senga manda lopi naa seko, Pulu Yemo manda kolo toko  
naa singí kanumu. Yombomane kalia-ingina méle-umbu mundulimilimanga mindi  
mélema tolemo inia toko yando limili aku mele, yombomane selemele mele yuni  
apurupa pilipale mare sepa kinjipa mare sepa peanga simba. <sup>8</sup> Méle kiri senga  
umbu kaliana panjilimolanje méle kiri se wendo olka inia toko limola mele aku  
sipa yombo sene yunga u-we-konopumuni pilipa konopu sipa selemo yombomo  
aku selemomonga kere-langí kiri purulimú mele aku sipa kanu yombomo yu mini  
pali molopa kinjimba. Yombo sene ‚Pulu Yemonga, Minimuni nilimú mele konopu  
sipa pilipa lipa selemo yombomo aku selemomonga kere-langí umbu peanga se  
mundulimú mele selemomonga Minimuni yu mini pali konde molopa kondopa mindi  
puli ulu-pulumu simba.

<sup>9</sup> Yombomane kere-langı umbuma panjikuli, 'Ombá.' ningu siye naa kolko takə leko nokoko molemele mele olio aku sipu ulu peangama semolondo siye naa kolamili. Kere-langı umbu panjilimili kinia pe sika wendo om̄ba kere-langı tolemo, liku nolemele mele olio ulu peangama semolondo tondolo mundupu sepo u we siye naa kolopo molomulu liemu pe Pulu Yemone pilimba walemo kinia sika yuni méle peangama simba limulú. <sup>10</sup> Akumunga, yomboma lipu tapondomolo aulka se mona lemba kinia kanopole ono pali lipu tapondamili. Aku-sipa na-kolo Karasi 'Sika.' ningu kuru mondolemele yomboma kumbi lepo lipu tapondamili.

6:11-18

*Kangikundu Uluma Selemele Ulumane Naa Lipa Tapondolemo; Karasi Kolorumu Unju-Peramone Mindi Manda Yomboma Lipa Tapondolemo Kene Akumu Mindi Kape Niemili Ungu Se*

<sup>11</sup> Kiniá i pepámo nanu ya topo imbi paa awili-sepo tokoro mele kanayo.

<sup>12</sup> Yemane tondolo munduku 'Kangi se kopisaa.' nilimili ye kanumane 'Juda yombomane, olio kanoko peanga piliangi.' ninguli aku selemele. Ono pipili kolkole 'Karasini sika ,olionga nimba, unju-perana ,kolondorumu.' nimbu kuru mondolemolo mele 'Juda yombomane pilkuli, pilku kiri pilku olio seko kinjiku mindili naa siengi.' ningu aku selemele. We naa selemele. <sup>13</sup> Kangi kopisilimili

yemane kepe „Mosisini, ungu-mane siriumma naa pilku liku selemele-na-kolo ‘Juda yombomane, olio semolo mele kanokole olio kape niengi.’ ninguli ono „Karasina Gallesia yomboma,ndo “Kangi se kopisangi.” nilimili.

<sup>14</sup> „Aku-sipa na-kolo, nane ‘Nanga imbi ola molopili.’ molo ‘Yombo senga imbi ola molopili.’ molo ‘Ulu senga imbi ola molopili.’ nimbuli paa kape naa nimbú. Ye-Awili Yesusi Karasi olionga nimba kolondorumu unju-peramo mindi na konopu sipu kape nimbu imbi ambolopo paka tondombo. Mélse lupa paa mólo! Yu unju-perana kolondorumu akumuni na ye kololimu mele moliomonga ma-koleamanga ulumane na unguri manda naa selemo; ma-kolea uluma kepe unju-perana kolopa pora sirimu none selemomonga nane kanu uluma naa konopu mondopo moliola.

<sup>15</sup> „Juda yombomane, kangi se kopisilimili molo ‘yombo-lupamane, kangi se naa kopisilimili akumu unguri mólo. „Pulu Yemone, ‘Olio yombo kondema molangi.’ nilimú aku ulumu mindi sika ungu se pelemo. „Aku ulumu mindi Pulu Yemone kanopale yomboma kanopa imbi silimú..” <sup>16</sup> Ya nikiru mele ‘Sika.’ ningu pilku liku selemele yomboma ono Pulu Yemonga „sika, Isirele yomboma molemele. Kanu yomboma konopu pe nipili molangi; Pulu Yemone ono kondo kolopa, u seko kinjeringi mele mundupa kelepa ‘Pundu tangi.’ naa nipili.

<sup>17</sup> Ungu se kamu niembo: Na Yesusinga „kongonomo andopo senderindumunga, na toringi úruma nanga kangina pelemo kene yombo sene na sepa kinjipa umbuna se naa sipili.

<sup>18</sup> Ango-keme, olionga Ye-Awili Yesusi Karasini ononga minima we kondo kolopa molopili molangi. Aku sipa sika sepili.

„Aku pea nikuru..”

## EPESASI Pollone EPESASI Yomboma Pepá Topa Sirimu Bokumu

*Pollone I Pepá Topa Sirimumunga Ungu-Pulu Mare*

Pollo yuyu kinia yuni pepá topa sirimumanga ungu-pulu mare inia yakondo gomo 676 molemo.

Pollone i pepámo topa **Epesasi yomboma** sipa mundorumu ungumu **Epesasi** inia 1:1, 3:1 molemo. ‘Yu ka-ulcana pepa i pepámo torumunje (**Epesasi** 3:1, 4:1, 6:20). Aku liemu kolea-awili Romo ka-ulcana pepale topa mundorumunje.’ ningu pilielemele. (Akumunga ungu se Pillipai kumbi lepa gomo 940 kananila.)

**Epesasi** akumu kolea-awili se. Koleamanga pikisamo gomo 613 molemo akuna nomú kelona lierimu mele kanani. Kou-kongono kambani bisinisi awisili akuna seko, sipi awilima akuna ongo pu-pu-pu seringi. “Olio nokolemo Pulu Ambomo” ningu popo toko kape niringi kolo toli pulu ambo Dayana Atemis akumu popo toringi ulka-tembele se **Epesasi** gilierimu. (Lipa Mundorumu Yema 19:23-28). Pollo akuna pumba kalia-ingi yopoko molopa serimu semanemo Lipa Mundorumu Yema 19:1—20:1 molopa, **Karasinga Epesasi yombomanga** tapu-yema kinia seringi semanemo 20:17—21:1 molemo. **Karasinga Epesasi yombo talapemonga** ungu se Lipa Ora Sirimu 2:1-7 molemola.

**Karasinga Epesasi yombomanga** talapena umbuna se pepili i pepámo naa torumu. We mele torumu. Pulu Yemone ono sepa kondolemo mele Pollone ono pepá topa nimba sirimu ungu mare i-sipa: “Karasi yu yunga yombo talapemonga ye nokolimu” nirimu. Aku talapena molkole senge mele nimba sirimula. U ono pali mongo liltingimunga Pulu Yemone “Mindili nangi.” nimbá aulkana puringi. Wendo pungí aulka se mólo. Ulu peanga se naa seko molangi Pulu Yemone ono paa we kondo kolopale aulka se akisinderimu. Pe kiniá ono Juda yomboma kinia Juda yombo naa molemele yomboma kinia ononga pali Karasi yu mindi aulkamo. Unga se lupa sengemone unguri naa sembá, aku sipa nirimula. Karasinga yomboma bolangoma mindi naa molko, yombo yuma molonge mele nimba sipa, ono ambo yema kinia, anupili lapali bolangoma kinia, kongono nokoli yomboma kinia kongono sendeli yomboma kinia, ono seko molonge mele mane sirimula.

**Ungu paa tondolo peanga se** 1:3-14 molemo. 1:15-23, 3:14-21, 6:10-18 bokumunga pealemekondo “43. sios”, aku unguma paa kananila.

Ya ungu-pulumu pora nikimu.

*Kolomongo-Awili 1-3*

## **Karasini Olionga Nimba Senderimumunga Pulu Yemone ‘Olio Yombo Kondema Molangi.’ Nirimu-Na Molemolo Ungumu**

*1:1-2*

*Pollone Pepámo Tombando U-Pulu-Pulu Torumu Ungumu*

<sup>1</sup> Na Pollo, Pulu Yemone na nimba talitorumu-na Karasi Yesusini “Nanga kongonomo sende-pu.” nimba lipa mundorumu yemo molopole i pepámo topo sikiru.

Ono Pulu Yemonga yombo kake selima kolea-awili Epesasi molko, Yesusi Karasi ‘Sika’ ningu kuru mondoko siye naa kolko molemele yomboma i pepámo topo sikiru.

<sup>2</sup> Olionga Lapa Pulu Yemo kinia Ye-Awili Yesusi Karasi-tolone ono we kondo kolko, ‘Ono konopu pe nipili taka leko molangi.’ niengili.

*1:3-14*

*Karasini Olionga Nimba Senderimumunga Pulu Yemone Mulu-Koleana Olio Méle Peangama Silimú Ungu Se*

<sup>3-4</sup> „Pulu Yemone, mulu matolo u naa sepili Karasini pe olionga nimba sendemba mele pilipale olio ‘yombo kake seli yombo mongo liltingimunga mindili nonge ulu se naa peli yomboma molangi.’ nimba, nimba taltorumu kene Pulu Yemo, olionga Ye-Awili Yesusi Karasinga Lapamo, kape nimbu imbi ambolopo paka tondamili. Karasini olionga nimba senderimu, olio-kinia kopu sepa molemomonga Pulu Yemone olio sewi anjipa mulu-koleana yando olionga konopuma kinia minima kinia sewi anjipa ‘tondolo pumba manda pepili.’ nimba, méle peangama sipa mundorumu. „Mulu matolo u naa sepili, olio konopu mondopale <sup>5</sup> olio nimba taltopa ‘Yesusi olio lipa tapondombamonga ono nanga bolangoma sepo limbu.’ nirimu. ‘Konopu siembo kene aku sambo.’ nimba pilipa aku sipa nimba panjerimu. <sup>6</sup> „Pulu Yemone yunga Malo, pea konopu mondorumumu olionga nimba senderimumunga olio-kinia kopu sepa molemomonga Pulu Yemone olio olandopa we kondo kolopa we lipa tapondolemomonga Pulu Yemo yunga imbi ambolopo paka tondopo yu kape niemili.

<sup>7</sup> Pulu Yemo we kondo kololi ulumu yu-kinia sengepea sepa pelemomone ‘Yesusi, olionga nimba yunga meme ondondopa kolorumu aku mememone olionga ulu-pulu-kirima ‘kamu mania pupili.’ nimba akuma siye kolopa, ka sipa ambolorumu aulkana wendo lipa ‘We manda molangi.’ nirimu-na aku sipu molemolo. <sup>8</sup> „Pulu Yemone yunga we kondo kololi ulu peangamone olio aku sipa lipa tapondopa, olio pilipa kondolimu kinia uluma pilipa apuroli ulu-pulumu kinia awisili pilipa lipa popenge sepa sirimu-na ‘aku sipu molemolo’. <sup>9</sup> „Mulu matolo u naa sepili, Karasini olionga nimba sendembamonga Pulu Yemone olio-kinia konopu sipa sembá mele nimba panjerimumu lopi sepa perimu-na-koło pe kiniá olio nimba para sirimu. <sup>10</sup> Ulu lupa lupama u wendo ombá kinia ‘Wendo ombá.’ nimba panjerimu ulumu wendo ombá walemo pilipale ‘Wendo opili.’ nimbá. ‘Ulu wendo opili.’ nimbá u lopi sepa perimu akumu i-sipa: ‘Mulu matolo serimu mélema kinia yandopa mélema pali aku mélemanga pali ye senga kelepa lipa sere lepa liepili. Karasi kanu mélemanga pali nokoli yemo molopili.’ nimbá.

<sup>11</sup> Yuyu konopumuni pilipa mélema kinia uluma pali nimba taltopa ‘Nanga kongono sendangi.’ nimba u nimba panjerimu Pulu Yemone olio ‘Juda yomboma, kanu ye nokoli Karasimuni olionga nimba sendemba mele pilipale ‘mulu matolo u naa sepili, ‘Nanga yomboma molangi.’ nimba, nimba taltorumu. <sup>12</sup> Olio ‘Juda yomboma, u-pulu-pulu’, ‘Pulu Yemone ‘olio nokopa kondomba ye se lipu mundumbu.’ nimba, nimba taltorumu ye nokoli, Karasimun sika ombá.’ nimbu nokopo molorumulu yombomane semolo uluma ‘we-yombomane kanokole Pulu Yemo paa ye awili tondolo olandopa pumba tondolo pa sélimu kanoko yu kape niengi.’ nimba ‘Pulu Yemone aku sipa olio nimba taltopa ‘Nanga yomboma molangi.’ nirimu. <sup>13</sup> Ono ‘Juda yombo naa molemele yombo talape lupama, kepe i ungu-sikamo pilku liltingi kinia Karasinga yomboma moloringila. Kanu ungumu Karasini ononga nimba senderimumuni Pulu Yemone ono lipa tapondopa, mindili nolemolá aulkana wendo lipa, yu-kinia pea molko kondonge aulkana lipa mondomu ungumu. Karasi molorumu mele kepe ononga nimba senderimu mele kepe ‘Sika.’ ningu kuru mondoringimunga ‘‘Olio sika Pulu Yemonga yomboma molemolo.’ ningu kanangi.’ nimba ‘Simbu.’ nimba, nimba panjerimu Mini Kake Sélimu sirimu liltingi. <sup>14</sup> ‘Yombo sene méle kou-mone awili-sepa pulimú mélse limbando ‘Mélemo u we taltondangi. Pe ombo kou pali kamu simbú.’ nimba ‘‘Sika nikiru.’ nimba kuru mondopili.’ nimba kou mare u sipale mélemo sitoana we liepili anju pulimú mele aku sipa, Mini Kake Séli liltimulu akumunga Pulu Yemone olio ‘pe monge-méle simbú’ nimba panjerimu méle peangama yunga yomboma sika simbando lipa ora silimú. ‘Pe sika simba

limulú.' nimbu kuru mondopole 'Pulu Yemone olio yunga yomboma kamu limba kinia ,kurumanga nokoli, Setenenga ulu-kiri sene olio kelepa manda naa ambolomba. Manda molomolo.' nimbu kuru mondolemolo. Olionga nimba aku sendemba kinia kanopole 'olio yu kape niemili.' nimba sendemba kene yunga imbimu sika ambolopo paka tondopo yu kape niemili.

**1:15-23**

*Pollone Epesasi Yombomanga Nindipa Pulu Yemo Nimba 'Pulu Yemone Sewi Anjepili.' Nimba Mawa Senderimu Ungumu*

<sup>15</sup> Akumunga, ono Ye-Awili Yesusi 'Sika' ningu kuru mondoko Pulu Yemonga yomboma pali konopu mondolemelo mele u-pulu-pulu pilierindu kinia yandopa kiniá kepe <sup>16</sup> ono aku selemelemonga Pulu Yemondo alieli "Ange" nimbu, nane Pulu Yemo kinia ungu nimbu molopole ononga mawa sendelio. <sup>17</sup> Olionga Ye-Awili Yesusi Karasinga Pulu Yemo, yu tondolo pa sélimu pelemo Lapamo, nane alieli yu mawa sepole 'Onone yu molemo mele paa olandopa olandopa piliangi kene pilipa kondolimu kinia ungumanga ungu-pulumu pilipa nimba para silimú tondolomo kinia pelemo Minimu ono sipili.' nimbu mawa sendelio. <sup>18-19</sup> 'Ononga konopumuni yunga ungumanga pulumu paa piliangi.' nimbu yu-kinia ononga mawa sendeliola. Yuni 'Ono mele-peangama simbú. Ono molko kondonge.' nimba, nimba panjerimu mélema nokoko molemele akuma kinia, 'Nanga yomboma mongeméle paa peangama simbú.' nirimuma kinia, 'Yu sika.' nimbu kuru mondolemolo yomboma yuni lipa tapondolemo tondolo paa olandopa olandopa pelemomo kinia, 'mona liepili paa piliangi.' nimbuaku sipu yu-kinia ononga mawa sendeliola. Kanu tondolomo olione manda naa manda manjilimulu tondolomo. Pulu Yemonga tondolo olandopa pelemo akumuni kongono tondolo mundupa selemo akumuni <sup>20</sup> Karasi kolorumu kinia Pulu Yemo yunga Lapane yu topa makisindipa yu , 'imbi ola molopili.' nimba, mulu-koleana ,olando lipa 'Mélema pea nokopo molambili.' nimba, yunga ki-lomekondo 'molopili.' nimba lipa mondorumu. <sup>21</sup> Mélema nokongendo tondolo pelemo kuruma kinia, mulu-koleana yombo namba molemo yombo awilima kinia, imbi paa olandopa molopa méle awisili nokolemelema kinia, enge nilima kinia, pali, akuma kiniá molemelema kepe pe mulu ma pora nimbá kinia imbi molomba yomboma kepe, Pulu Yemone yu kanu yombo awilimanga pali ye paa olandopamo lipa mondorumu. <sup>22</sup> Pulu Yemone 'Karasi, yu mélemanga pali olandopa molopili. Mélema pali yunga kimbumuni kulupa molopili.' nirimu. Aku nirimumunga Karasi yunga yombo talapemonga yu ye awili olandopamo molemóla. <sup>23</sup> Karasinga yombo talapemo yunga kangimu, yu kangimunga pengemo. Yunga yombo talape molemelena yu pumba molopa sengepea selemo. Yu yunga yombo talape molemelemanga pali yu pumba molopa manda sendelemo, yunga yombo talapemanga pali Karasi yu liku manda sendelemele. Karasi kinia yunga yombo-talapemo kinia ono lipa sere lepa yombo selumu mele molemele.

## 2

**2:1-10**

*Olio Yombo Kololima Pulu Yemone 'Karasi Kinia Pea Konde Molangi.' Nirimu Ungu Se*

<sup>1</sup> Ono 'Juda yombo naa molemelema', ono seko kinjeringi uluma kinia, ulu-pulu-kirima kinia, perimumunga ono u yombo kololima moloringi. <sup>2</sup> Kanu walemanga ya ma-koleamanga ulu-pulu-kirima mindi seko, kuruma nokolemo yemo mindi lombili pungu pilku moloringi. Kiniá yombo mare Pulu Yemonga ungumu pilku mokoli seko naa pilielemene yomboma kanu kurumanga ye nokolimuni tondolo mundupa nokopa ononga konopuna molemo. <sup>3</sup> Kanu yomboma kiniá molemele mele u olio yomboma

pali seluna molopo, u-konopu-kiri pelimane yakala koloringi ulu-pulu-kirima mindi pilipu sepo, kanu konopumane kinia kangimane kinia yakala kolko 'samili.' niringi mele mindi pilipu lombili pumbu sepo molorumulu. U we-yomboma kinia aku sipu molorumulu mele ,we molemolánje, Pulu Yemone we-yomboma 'Mindili nongo pundu tangi.' nimbá mele oliondo pea papu nilka.

<sup>4-5</sup> Sika olio sepo kinjerimulumunga yombo kololima molorumulu-na-kolo Pulu Yemone 'olio Karasi kinia pea kelko konde molangi' nirimu. Sepo kinjerimulumunga Pulu Yemone "pundu taa." nilka-na-kolo paa we kondo kololi ulumu pelemo Pulu Yemone olio paa konopu mondopale 'olio Karasi kinia pea kelko konde molangi.' nirimu. Pulu Yemonga we kondo kololi ulumuni mindi olio lipa tapondopa mindili nolemolá aulkana wendo lipa yu-kinia pea konde molomolo aulkana lipa mondorumu. <sup>6</sup> Yesusi Karasini olionga nimba senderimumuni olio yunga yomboma molemolomonga Pulu Yemone Karasi topa makisinderimu kinia olio kinia pea topa makisindipa Pulu Yemo nokolemo mulu-koleana yu molopa mélema nokolemo polona 'Karasi kinia pea molangi.' nimba lipa mondorumu. <sup>7</sup> 'Pe-pe-kepe yombo molongema na „Pulu Yemo, yomboma na-kinia paa olandopa olandopa we kondo kololi ulumu pelemo mele piliangi lipu ora siembo.' nimba Pulu Yemone olio aku sipa Karasi Yesusini olionga nimba senderimumunga kondo kolopa sepa kondorumu. <sup>8</sup> 'Karasi molopa ononga nimba senderimu mele, 'Sika' ningu kuru mondoringimunga Pulu Yemonga we kondo kololimuni ono lipa tapondopa mindili nolemolá aulkana wendo lipa yu-kinia pea molko kondonge aulkana lipa mondorumu. Aku ulumu ono onono naa seringi, Pulu Yemone ono we sirimu. <sup>9</sup> Aku ulumu onone kongono seringimunga mele kalólimu naa liltingi. Akumunga i ulumu limú yombo sene , 'Nanga kongono sendumunga i ulumu likiru.' nimba, yunga imbi yuyu manda ambolopa paka naa tomba. <sup>10</sup> Olio molemolo mele Pulu Yemone senderimu-na molemolo kanumu. 'Olio oliolio ulu se serimulumunga mólo.' Karasi Yesusini olionga nimba senderimumuni Pulu Yemone olio yombo kondema sepa wamorumu. Olio ulu peangama Pulu Yemone koronga-u 'sangi.' nimba, nimba panjerimu mele 'sangi' nimba olio 'aku siku yombo kondema molangi.' nirimu.

2:11-22

*'Juda Yomboma Kinia Yombo-Lupama Kinia Pali Pulu Yemonga Yombo Talape Selumu Molangi.' Nimba Karasini Lipa Sere Lenderimu Ungu Se*

<sup>11</sup> Akumunga, Epesasi yomboma ono kelko ulu se konopumuni piliangi. Ono Juda yombomane naa meringi. Juda yomboma naa moloringimunga ono imbi leko "kangi kopiseli yomboma" nilimili yombomane onondo "kangi naa kopiseli yomboma" niringi. (Aku ulumu yemane ono onono kangikundu seringi ulumu mindi.) Akumu kiniá kelko piliangi. <sup>12</sup> U aku siku moloringi walemanga ono Karasi kinia pea seluna naa molko yu-mele-mele moloringi mele kiniá kelko piliaa. Aku walemanga ono Isirele yombo talapena sukundu onge aulka se naa lierimu, Pulu Yemone "yunga yomboma kinia sembó." nimba, nimba panjipa mi lierimu ungu akumu ono-kinia naa perimula. Ononga ulu peanga se 'pe wendo ombá.' ningu konopu siku nokoko molonge ulu-pulu se naa pepa, ya ma-koleana Pulu Yemonga imbi pilku yu-kinia kopu seko molonge aulka se naa perimu mele kiniá piliaa. <sup>13</sup> Aku-sipa na-kolo kiniá ono u walte Pulu Yemo kinia sulu seko moloringi yomboma Karasi yunga meme ondondorumumuni Karasi Yesusi yuni ono-kinia kopu sepa molopa 'ono Pulu Yemo kinia nondoko molangi.' nimba lipa sere lenderimu, yu-kinia seluna molemele.

<sup>14</sup> Konopu seluna pupili molomolo ulu-pulumu Karasi yu-kinia pelemo yemo yuni Juda yomboma kinia ono we-yombo-lupama kinia opa-tou molorumulu ulu-pulumu topa mania mundupa, anju yando konopu kiri panjerimulu palamo akundupale 'yombo talape talo sere leko talape selumu molangi.' nirimu. <sup>15</sup> 'Pulu Yemone Mosisi,

ungu-mane sirimuna kinia, aku ungu-mane sipale "Saa." nirimu unguma kinia, ungu-manemanga sukundu perimu unguma kinia, pali yunga kangimuni serimu ulumuni 'kamu mania pupili kelepa uluri naa sepili.' nirimumunga kanu palamo akundorumu. Yuni 'molangi' nimba pilipa aku serimu mele i-sipa: 'Ono yombo talape talo nanga yombo talape selumu molangi.' nimba lipa sere lenderimula. 'Aku siku molkole ono konopu seluna pupili selu siku molangi.' nimbale aku sipa serimula. <sup>16</sup> Yu unju-perana kolorumumuni kanu yombo talape talo u opa-tou moloringima 'kamu kangi selumu molko, Pulu Yemonga yomboma molangi.' nimba lipa sere lenderimu. Yu unju-perana kolorumumuni u opa-tou moloringi ulumu topa mania mundorumu. <sup>17</sup> Ono 'Juda yombo naa molko, Pulu Yemo kinia sulu seko moloringi yomboma kinia, 'Juda yombo, Pulu Yemo kinia nondoko moloringi yomboma kinia, Karasi ombo ono pali semane peanga se topa sipa nimbale: "Ono konopu seluna pupili selu siku molonge aulkamo akisindendu." nirimu. <sup>18</sup> Yuni yombomanga nimba senderimumuni yu-mambele olio 'Juda yomboma kinia we-yombo-lupama kinia, pali Mini selumuni lipa tapondopa aulka akisindilimúmunga Lapa molemona nondopo manda pulimulu.

*2:19-22*

### *Olio Karasinga Yomboma Pulu Yemonga Ulkamo Molemolo Ungu Se*

<sup>19</sup> 'Aku senderimu-na aku sipu molemolo, akumunga kiniá ono yombo mare ma naa lepa yombo ombo gili yomboma mele naa molemele. Ono Pulu Yemonga 'Juda, yomboma kinia talape selumu molko, Pulu Yemonga yombo talape sikamo molko, <sup>20</sup> 'Pulu Yemo molemo ulkamo mele molemele.' Pulu Yemone ungu-umbu tondorumuma pilku yomboma ningu siringi yema kinia, Yesusini "Nanga kongonomo sende-paa." nimba lipa mundorumu yema kinia, kanu yema kanu ulkamonga pongama; Karasi Yesusi yu kanu ulkamonga simumu. <sup>21</sup> Ulka simumuni pele kokeyama ingi sipa ambololemo kinia ulkamo tondolo pumba gilimú, aku ulka simumu Karasi yu. Pulu Yemone ulkamo pele kokeya sepa molemo, aku ulkamo kamu takomba kinia Ye-Awilimu yunga ulka kake sélimu gilimba. <sup>22</sup> Ono 'Karasini senderimumunga, yu-kinia tapu toko molemele yomboma kepe, 'Pulu Yemone, lipa sere lendepa Pulu Yemo yunga ulkamo takolemo, aku ulkana Pulu Yemonga Minimu molemo, akumu Pulu Yemo molemo.

## 3

*3:1-13*

### *Pollo Yombo Talape Lupamanga Ungu Nimba Sili Yemo Molorumu Mele Ungu Se*

<sup>1</sup> 'Karasini 'yombo lupama kinia Juda yomboma kinia pea Pulu Yemonga yomboma molangi.' nimba aku sipa yombo talape talo lipa sere lierimu, akumunga na Pollo 'Pulu Yemo kinia ungu nimbu ononga mawa sendelio.' Ono we-yombo-lupama lipu tapondoliomonga na ka-ulkana peli yemo molopole, 'ononga mawa sendelio.'

<sup>2</sup> 'Ungu se u pilkirumu niembo:'

'Pulu Yemone na-kinia ono-kinia serimu mele pilieringi.' konopu lekero. Akumu i-sipa: Pulu Yemone ono we kondo kolorumumunga lipa tapondomba mele 'Kamu piliangi.' nimba na nimba taltorumu. <sup>3</sup> Akumu Pulu Yemone ulu sembá mele u lopi serimu akumu nando nimba para sirimu, akumu u wallopole pepá topo nimbu sindu kanumu. <sup>4</sup> I pepá tokoromo kanokole pilingí kinia Pulu Yemone sembá mele lopi sepa perimumu Karasini serimumunga mona lierimu pilielio mele pilingí. <sup>5</sup> Ulu sembamo lopi sepa perimu kanumu u moloringi yomboma kepe yandopa yandopa moloringi yombomando kepe nimba para naa sirimu. 'Yombo mare mindi wallopole nimba para sirimu.' Kiniá mindi Yesusini 'Nanga kongonomo sende-paa.' nimba lipa mundorumu yema kinia, Pulu Yemone ungu-umbu tondolemoma pilku yomboma

ningu silimili yomboma kinia, yunga yombo kake seli aku yombomando „mindí, Pulu Yemonga Minimuni nimba para silimú. <sup>6</sup> Kanu ulu u lopi serimumu kiniá para lemómo i-sipa: Karasi Yesusini yombomanga nimba senderimumuni semane peanga pelemo akumuni we-yombo-lupama kinia „olio Juda yomboma, kinia lipa sere lendepa ‘kangi selumu molangi.’ nimba, Pulu Yemone ‘yomboma-kinia sembó’ nimba panjerimu mele „Juda yomboma kinia we-yomboma kinia, pali selemóla.

<sup>7</sup> Pulu Yemone we kondo kolopa yuni yuyu ‘na semane peangamo andopo topo siembo.’ nimba, nimba taltopa, ‘aku kongonomo sambo.’ nimba tondolomo na sirimu. <sup>8</sup> Pulu Yemonga yombo molemelemanga pali na paa maniadopa molio, aku-na-kolo Pulu Yemone na we kondo kolopale kongono i-sipa mele sirimu: “Juda yombo naa molemele yomboma semane peangamo toko siliku andou.” nirimu. Aku semane peangamo Karasinga méle-peanga, olione manda naa apurupu pilipu kambu manda naa tolemolo mélema. <sup>9</sup> Mulu matolo u naa sepili yuyu molopale Pulu Yemone “‘Sembó.’ nimba panjerimu ulumu kamu sembá mele ‘yomboma pali piliangi.’ ningu semane peangamo toko siliku andou.” nirimu. Mulu ma mélema pali serimu Pulu Yemone ‘Pe sembó.’ nimba panjerimu mele koronga-u yuyu pilipa yu-kinia lopi sepa perimu mele pe yombo se naa pilierimu kanumu kiniá nando “Yomboma piliangi ningu sindi-pu.” nirimu.

<sup>10</sup> ‘Aku ungumu Karasinga yombo talapemo pilingí kinia mélema nokongendo tondolo pelemo kuru muluna molemelema kinia, mulu-koleana yombo namba molemo yombo awilima kinia, aku yombo tondolo awisili pelemomane Pulu Yemonga pilipa kondoli lupa lupa pelemoma pilingí kene.’ nimba „nando “aku semane peangamo ningu siliku andou.” nirimu,. <sup>11</sup> Pulu Yemone „aku sipa serimumu, mulu ma u naa sepili paa koronga-u “Sembó.” nimba panjerimu mele olionga Ye-Awili Karasi Yesusini serimumunga ‘kamu wendo opili.’ nimba Pulu Yemone aku sipa serimu. <sup>12</sup> „Karasi,“ yu olionga nimba senderimumu ‘Sika.’ nimbu kuru mondopo yu-kinia kopu sepo molopole, olio Pulu Yemo kinia pumbu ungu nimulúndu pipili naa kolopo sumbi sipu manda pulimulu. Karasi yu-mambele olio Pulu Yemo molemona pulimulu aulkamo, akumunga yu molemona pumulú selemolo kinia mélsene olio pipi naa simba. <sup>13</sup> Akumunga, nane ono mawa sepo nimbili: “Na ono lipu tapondombondo mindili nombo molio mele konopu awisili naa kimbu sikuli ‘Sika.’ ningu kuru mondoko molemele mele pange naa sepili. Na mindili nolio ulumuni Pulu Yemo kinia pea kopu seko molemele mele lipa tapondolemomonga ‘konopu siku molangi.’” nikiru.

3:14-21

### *Pollone Pulu Yemo Kinia Ungu Nimba Epesasi Yombomanga Mawa Senderimu Ungu Se*

<sup>14</sup> „U nimbú sendu akumu kiniá ya kamu nikiru.“ Pulu Yemone Juda yombo talapemo kepe we-yombo-lupama kepe olio pali “Sembó.” nimba panjerimu mele kiniá selemo ulumu pilipuli, akumunga na ‘Olionga Lapamo „kinia ungu nimbu ononga mawa sendambo.’ nimbu, yunga kumbikerena komorongo langolio. <sup>15</sup> Pulu Yemonga yombo talape akumu mulu-koleana sukundu molemelema kinia, ya ma-koleana molemoloma kinia, pali ‘Yombo talape selumu.’ nimba yuni ononga imbi simba. Mulu-koleana yomboma kinia, ma-koleana yomboma kinia, anju yando “lapa” nilimili kanumu Pulu Yemo mélemanga pali lapa molemomonga pilku imbi “Lapa” ningu pilkuli akula nilimili. <sup>16</sup> Nane „‘Lapamo-kinia ungu niembo.’ nimbu yu molemona komorongo langopole, yu-kinia ungu nimbu mawa sepo nimbili: ‘Yunga méle paa peanga taltolemomanga ‘Ononga konopuma enge nipili.’ nimba yunga tondolomo ono sipili.’ nimbu mawa sekero. Aku tondolomo yunga Minimu ‘ono kinia molopale ono tondolo, silimú kanumu. <sup>17</sup> ‘Ono ‘Sika.’ ningu kuru

mondongemonga Karasi yu ononga konopumanga ‘yunga ulkamo’ nimba kamu alieli molopili.’ nimbu aku sipula ononga mawa sendelio. ‘Unju se ,tondolo mundupa gilimbando, yunga pulkoniomo mana mania pulimú mele ono aku siku konopu mondoli ulu-pulumunga sukundu molko tondolo pupili molangi.’ ,nimbu mawa sendeliola.,<sup>18</sup> Aku siku moltkole Karasini olio pali konopu mondolemo mele paa manda manjiku pilku kondonge tondolomo Pulu Yemonga yomboma pali kinia ono kinia pea pepili. Karasini olio pali konopu mondolemo akumu paa sulu sepa pumba paa pera topa paa olando sipa pumba paa maniendo sipa pulimú mele pilingí tondolomo ono kinia pepili.<sup>19</sup> ‘Pulu Yemo yunga ulu-pulu peanga taltopa silimúma ononga konopumanga aku uluma pali sengepea sepa pepili.’ nimbu ‘Karasini konopu mondolemo ulu-pulu kanumu onone piliangi.’ nimbu ononga mawa sendeliola. Aku Karasini konopu mondolemo ulumu we-konopumuni mindi manda apurupu pilielemolo aulka se naa lemó.

<sup>20-21</sup> Akumunga, ‘Pulu Yemonga imbimu paa olandopa molopa mindi pupili.’ niemili. Pulu Yemo yunga tondolomone olionga konopumanga kongono selemomonga olione mawa semolo uluma kinia ‘Sambo.’ molo ‘Aku sipu molambo.’ molo aku sipu ulu lupa lupa konopumuni pilielemolo mele uluma pali yuni yunga tondolomone paa olandopa manda sembá yemo molemo, ,akumunga, Karasinga yombo talapena sukundu molopo Karasi Yesusi pea olio kopu sepo molemolo yombomane kanu kongono selemo Pulu Yemonga imbimu ‘pe-pe-kepe paa kamu alieli paa olandopa molopa pupili.’ nimbu yu kape nimbu imbi ambolopo paka tondamili. Aku sipa sepili.

#### *Kolomongo-Awili 4-6*

### **Pollone ‘Olio Karasinga Yomboma Yunga Kangimu Molopole Pulu Yemone “Saa.” Nilimú Unguma Mindi Pilipu Lipu Samili.’ Nirimu Ungu Se**

## 4

4:1-16

*Olio Karasinga Yomboma Molopole Yu-Kinia Yombo Kangi Selumu Molemolo Ungu Se*

<sup>1</sup> Akumunga, na Ye-Awilimunga kongono serindumunga ka-ulcana pepo molio yemo, nane tondolo mundupu ono ungu-mane sipu nimbili: Pulu Yemone onondo ‘Ono nanga yomboma molko nanga kongonomo sendangi wangi.’ nimba, nimba talitorumu-na ongo yunga yomboma moloringi mele molemele kene yuni kanopa peanga pilielemo uluma seko molaa. <sup>2</sup> Alieli ‘Nanga imbi ola naa molopili.’ ningu molko, yomboma-kinia kara naa pungu pangu ningu taka leko molko, yombomane ono yando seko kinjingí kinia anju onone konopu mondoko pundu naa toko we siye kolko konopu awisili kimbu naa sieyo. <sup>3</sup> ‘Olio Karasinga yombo talape selumu molemolo yomboma konopu seluna pupili taka lepo molamili.’ ningu ‘Konopu seluna pupili.’ nilimú Minimuni ono ‘Ambolopili.’ ningu molaa.

<sup>4</sup> ‘Pulu Yemone, oliondo ‘Yunga yomboma molangi waa.’ nirimumunga ,koleapeangana pumbu molomolo.’ nimbu konopu sipu nokopo molemolo ulu-selumu mindi, aku sipala olio yombo kangi selumu mele molemolo; Mini Kake Séli olionga konopumanga molemomo selumula; <sup>5</sup> olionga Ye-Awilimu selumula; kuru mondoli ulumu selumula; no lili ulu-pulumu selumula; <sup>6</sup> olionga pali Lapa Pulu Yemo selumula. Yu olio Karasinga yombomanga pali olandopa molemo; yu olio molemolomanga pali suku-singina molemo; yu olionga pali konopumanga molemo.

<sup>7</sup> Pulu Yemo we kondo kololimunga Karasini olio sepo molomolo tondoloma moke sepa olio selu selu nimba awili sepa we sirimu. <sup>8</sup> Pulu Yemonga bokuna aku sipa nilimú kanumu. Yuni nimbale:

“Yu paa muluna olandopa pumbá pumbale  
yunga opa-touma topa mundupa

yombo awisili ka sipa memba pumbale  
ya mana yunga yomboma mélema we sirimu.”

nirimu. <sup>9</sup> Yu ‘olandopa purumu’ nirimu akumu olando purumumunga lipa ora sirimuye? Mólo. U yu paa mana maniendo purumumunga lipa ora sirimu. <sup>10</sup> Ye muluna paa olandopa purumu ye kanumu u mana maniendo purumu yemo. ‘Mulu ma koleamanga pali molambo.’ nimba aku serimu.

<sup>11</sup> Kanu yemone mindi ‚mana,-yomboma tondoloma moke sepa we sirimu.

Yombo mare “Nanga kongonomo sende-paa.” nimba lipa mundumbando ono aku

kongonomo senge tondoloma sipa,

mare nimba taltopa yuni ungu-umbu tondombama pilku yomboma ningú singí tondoloma sipa,

mare nimba taltopa semane peangamo toko siliku andonge tondoloma sipa,

mare Karasinga yombo talapemanga tapu-yema molko ‚Pulu Yemone kanopa peanga pilimba mele, mane singíma nimba taltopa aku senge tondoloma sirimu.

<sup>12</sup> Karasini ‘Nanga yombo talapemo nanga kangimu enge nimba molopa kondopili kene Pulu Yemonga yomboma pali Karasinga kendemande-kongonomo seko molangi.’ nimba aku sipa tondoloma yunga yomboma moke sepa we sirimu. <sup>13</sup> Olio ‚yunga yomboma,’ ‘Sika’ nimbu kuru mondolemolomonga konopu seluna pupili molopo, Pulu Yemonga Malone konopu- muni pilipa molemo mele olio pali selu sipu pilipu kondopo, umbu-konopu enge nimba pepili mololipu pumbu, kamu Karasi molemo mele olio umbu-konopu pepili molamili.’ nimba aku serimu.

<sup>14</sup> Aku sipu sepo molomolo kinia bolango kangama konopu naa pepili molemele mele naa molomolo. Nomuna poporome topa nona andoli sipi mare we topa memba andolemo mele ye mare kondi toko kolo tolemele yema ongo ono “I-siku sangi. I-siku sangi.” ningú mane silimili kinia we pilku konopuma topele-mapele toko lombili pulimili mele olio aku sipu naa semolo. <sup>15</sup> ‚Kolo toli yemane ningí mele komu sendepo naa pilipuli, Karasinga kangimu molemolo yombomane ‘Olio nokopa olionga penge molemo ye nokoli Karasimu molemo mele molamili.’ nimbu anju yando konopu mondopo ungu-sikama mindi nimbu molamili. <sup>16</sup> Yu kimbu ki kangi mélemanga pali nokolemo pengemo. Yuni bele pulkonio mélema pali ‘enge nipili.’ nimba tondolo mundundulimú. Akumunga, kangimunga mélema pali anju yando konopu mondopa lipa tapondolemo kinia kangimu olandopa olandopa tondolo pumba enge awili sepa pelemo.

4:17—5:21

*Pollone ‘U Simbulu Tolina Andoringimu Kamu Munduku Kelko Pa Sélimunga Bolangoma Molangi.’ Nirimu Ungu Se*

4:17-32

*Karasinga Yomboma U-Uluma Munduku Kelko Ulu-Pulu Kondema Seko Molonge Ungu Se*

<sup>17</sup> Akumunga, Ye-Awilimuni ‘Ono nokopili.’ nimba na namba sirimumunga nane ono tondolo mundupu ungu se i-sipu nimbu sikiru: Karasinga yombo talapena ultukundu molemele yombomane seko molemele mele paa naa sangi. Kanu yomboma ‚Pulu Yemonga unguma naa pilielemolo.’ nilimilimunga, ononga konopuma mimi sipa naa pepa amu mele tolemele. <sup>18</sup> Kanu yomboma ono uluma pali naa pilku ononga konopuma pipi silimilimunga Pulu Yemo molopa selemo mele

naa pilku, ononga pilipa kondolima simbulu tolemo akumunga ono Pulu Yemonga konde molopa kondolimunga ultukundu molemele.<sup>19</sup> Ulu selemelema pilku apuruku pipili kolonge ulu-pulumu ‚mania purumu, ono-kinia naa pelemomonga ono ulu kirimanga sukundu walu sumbi siku pungu, yomboma kanokole pipili kololemele ulu kalaro mololima konopu kimbu siku seko molemele.<sup>20-21</sup> ‚Kanu yomboma sika aku selemele,-na-kolo ‚Karasinga ungumu mane sipu ‚Sangi.’ nirimulu mele ono Epesasi yomboma pilieringi unguma lupa, ‚kanu yombomane selemele mele lupa.’ aku konopu lekero. ‘Ono Karasinga ungumu pilku liku yu-kinia kopu seko moloringi kinia Yesusi molemo mele kinia yu-kinia ungu sikamo pelemo mele kinia mane sirimulu pilieringi.’ konopu lekero. ‚Ultu molemele yomboma selemele mele mane naa sirimulu.’<sup>22</sup> Ono senge mele ningu mane sirimulu mele i-sipa: “Ono u moloringi kinia ononga u-we-konopumane ulu-pulu-kirima yakala kolko seko kinjiku moloringi kanu konopuma munduku keleangi. Aku serigi ulumane ya ma-koleana molko kinjilimolá; kolcole kolea kirinala pungu mindili nongo molko kinjiku mindi pulimolámo.”<sup>23</sup> Kanu u-we-konopuma munduku kelko ono konopu kondema pepili molangi.<sup>24</sup> ‘Pulu Yemo konopu pelemo mele olio konopu konde aku sipa pepili.’ ninguli Pulu Yemone ulu-pulu peanga sumbi nilima sepa paa kake sepili molemo mele aku siku molangi.” nimbu ungu-mané aku sipu sirimulu.

<sup>25</sup> Akumunga, ‚u-we-konopuma munduku kelko konopu kondema liku panjikuli, ono ungu kolo toli ulu-pulumu munduku kelko, kangi selumunga kimbu-ki mélema gilimú mele aku sipu olio Karasinga yomboma pali konopu selumu pepili molemolo kene olionga pulu lemó yombomando ungu-sikama mindi ningu molangi.

<sup>26</sup> Ono mumindili sembá kinia ‚Ulu-pulu-kiri se naa samili.’ ningu, pilku kondoko molangi. Ono mumindili kolko molangi ena pumu liemu<sup>27</sup> ono ‚kurumanga nokoli, depelemone olio kamu kondi topili.’ ningu aku senge. Akumu manda naa sembá.

<sup>28</sup> Mélema wa limili yomboma aku ulumu munduku kelko kiniá wa naa liku, koumone kongono sangi. Ononga kimane mélema wa naa likuli ningimuni, ‚Yombo mare méle mólo tombama lipu tapondopo mélema siemili.’ ninguli kanu wa noli yombomane ononga kimane kongono peangama sangi.

<sup>29</sup> Ononga keremanga ‚Ungu kiri se wendo naa opili.’ niengi. Karasinga yombo konopu pange sembama kinia molko kinjingima kinia ono tondolo mundundumba unguma mindi niengi. Ungu mare kanu yomboma pilingí kinia ono lipa tapondomba unguma mindi niengi.<sup>30</sup> ‘Mini Kake Sélimuni ono yomboma ulu-pulu-kirimane kondi tolemo koleamonga pe kamu wendo pungu, ulu-pulu-kiri se naa pelemo, manda molonge koleana wangí kene ono iseli-u nokopa molopili.’ nimba Pulu Yemone Minimu sirimu aku Minimuni kanopa kiri pilipa konopu peanga naa lemba uluma naa sangi.

<sup>31</sup> Yombo lupama kinia konopu kiri panjiku seko kinjiku, iri toko mumindili kolko, opa seko ungu-bulkundu nindiku, aku ulu-selemelema ulu-puluma toko mania mundangi.<sup>32</sup> Onone onono anju yando kondo kolko seko kondoko, Karasini ononga nimba senderimumunga Pulu Yemone ononga ulu-pulu-kirima ‚Mania pupili.’ nimba we siye kolorumu mele aku siku yombomane ono seko kinjingí uluma ‚Mania pupili.’ ningu we siye kolangi.

## 5

5:1-21

*‘Pa Sélimunga Bolangoma Molangi.’ Nirimu Unru Se (4:17—5:21 pali)*

<sup>1</sup> Akumunga, ono ‚Pulu Yemone,’ paa konopu mondolemo bolangoma molkole Pulu Yemo yu yuyu sepa molemo mele manda manjiku seko molko,<sup>2</sup> ono onono anju yando konopu mondoko mindi molangi. Karasini olio konopu mondopale olionga

nimba kolali sepa kolondorumu aku siku yomboma konopu mondoko molangi. U kongi kinia mélema kalko Pulu Yemo popo toko siringi kinia, munamo pilipa peanga pilipa liltimu mele Karasini olio konopu mondopa Pulu Yemo popo topa yunga kangi toringimu sirimu akumu aku sipa pilipa liltimu.

<sup>3</sup> „Ono Pulu Yemonga bolangoma molemele kene,  
wa ulu-kirinale naa seko,  
yombo senga kangina ulu kalaro mololi uluma naa seko,  
méle taltolemele mélema ‘Manda naa sekemo.’ ningu yombo marenga mélema  
yama mengo ‘Na lipu taltamboa!’ ningu naa sangi.

Aku ulumanga semane kanga-kolte kepe paa naa tangi. Pulu Yemonga yombo kake selima aku uluma senge molo semane tonge kinia manda naa sembá kene aku siku paa naa sangi.

<sup>4</sup> Yomboma pilkuli pipili kolonge ungu kirima kepe naa ningu,  
marake seko ‘Yomboma tawe sangi.’ ningu semane kirima toko aku lawa seko unguma naa niengi.

Aku sipa ungu kirima olio „Karasinga yomboma, nimulú kinia manda naa sembá.  
Aku unguma naa ningu,

„Pulu Yemone ono sepa kondolemomonga, yu “Ange.” ningu molangi. Aku senge kinia peanga.

<sup>5</sup> Ono paa i-siku mimi siku piliangi:

Wa ulu-kirinale seko,  
yombo senga kangina ulu kalaro mololi uluma seko,  
méle taltolemele mélema ‘Manda naa sekemo.’ ningu yombo marenga mélema  
yama mengo ‘Na lipu taltamboa!’ nilimili yomboma

Pulu Yemo kinia Karasitolo ye nokoli kingitolo molko nokolembele koleana pungu méle peangama lingí aulka se paa naa lemó. Mélema yama melemele yombomane we-mélemando ‘Olionga pulu yemo.’ ningu popo toko kape nilimili yomboma molemele. Akumu paa sika nikiru.

<sup>6</sup> ‘Yombo sene olio ‘seko kinjikimili.’ nimba ungu-pulu se naa peli we-unguma kolo topa kondi tomba.’ ningu paa kanoko kondoko molaa. Aku siku selemele yomboma Pulu Yemone ‘Nanga ungumu pilku mokoli seko naa seko molemele.’ nimba ono-kinia lakopa mumindili kolopa paa mindili lipa simba kene ono kanoko kondoko molaa.

<sup>7</sup> „Pulu Yemone kanu yomboma paa mindili lipa simba, kene ono-kinia kopu seko naala molangi.

<sup>8</sup> U ono simbulu tolina moloringi-na-ko lo kiniá Ye-Awilimunga yomboma molemele-monga pa selina molemele kanumu. Akumunga, pa sélimunga bolangoma selemele mele seko molangi. <sup>9</sup> (Pa sélimunga ulu-pulu akuma ulu peangama kinia ulu sumbi nilima kinia ungu sikama kanumu.) <sup>10</sup> ‘Ye-Awilimuni kanopa konopu silimú uluma pilipu kondopo samili.’ ningu molangila. <sup>11</sup> Simbulu tolimunga ulu-puluma paa naa saa! Simbulu tolimunga ulu-puluma ono lipa tapondomba tondolo se naa pelemo kanumu. „Simbulu toli-munga ulu-puluma naa seko,“ yombomando ‘Simbulu tolimunga ulu-puluma kiri.’ ningu, ningu singí kinia papu. <sup>12</sup> Pulu Yemonga ungumu pilku mokoli seko naa selemele yombomane lopi seko konopu siku selemele mele nimbu simulundu kepe pipili kololemolá.

<sup>13</sup> Aku-na-ko lo pa sélimuni méle sepa mona lendelemoma pali ulumanga puluma pára lemó. <sup>14</sup> Pa sélimuni mélse sepa mona lendelemo kinia kanu mélema kepe pa selemo akumunga mélemanga puluma pára lemó. Akumu pilku konane senga ungu se toringi kanumu. Akumu i-sipa:

“Yombo uru pélimu, nu ola moloyo.  
Lomboroko ola moloyo.

Aku sení kinia

Karasini nu molonina pa sendemba."

nilimú.

<sup>15</sup> Akumunga, ono seko molonge mele kanoko kondoko molaa! Ono yombo pilipa kondoli naa peli yomboma mele naa andangi. Pilipa kondoli peli yomboma andoko molangi. <sup>16</sup> Kiniá molkomele walema yombomane seko kinjilimili kinjingí walema akumunga ono pilipa kondoli peli yomboma andoko molkole, ulu-peangama senge enama wendo wendo ombá kinia 'Popenge sepo naa semolo kinia ulu marene omba pipi simba kene popenge sepo samili.' ningu kanu ulu-peangama sumbi siku sangi. <sup>17</sup> Akumunga, ulu lawa seli uluma naa sangi. Ye-Awilimuni "Ono saa." nilimú mele pilku kondokole aku siku sangi.

<sup>18</sup> No awisili nongo amu naa tangi. Aku senge kinia ono onono sepa kinjimba uluma senge kene aku naa saa. Aku senge kinia kiri. 'Pulu Yemonga, Minimu ononga konopuna 'molopa manda sepili.' niengi. Aku siku ningí kinia peanga. <sup>19</sup> 'Minimu ononga konopuna molopa sepili, ono onono anju yando 'Pulu Yemonga, yomboma-kinia 'ungu niemili.' ninguli Pulu Yemonga bokuna molemo konanema kinia, ono maku toko konane nilimili konanema kinia, Minimuni ononga konopuna nimbá pilingí konanema kinia, ningu; 'Ye-Awilimu kape niemili.' ningu kerena kepe konopumuni kepe konane ningu; <sup>20</sup> olionga Ye-Awili Yesusi Karasi 'ononga nimba sendepa aulka akisinderimumunga, yu imbi leko alieli Lapa Pulu Yemondo mélemanga pali "Ange." niengi.

5:21—6:9

### *Olio Olionga Yomboma Kinia Ungu Pilipu Taka Lepo Molomolo Mele Ungu Mare*

<sup>21</sup> 'Karasí yu olionga Ye Nokoli Awilimu.' ningu yunga ungumu liku awi siku molkole anju yando 'Pulu Yemonga, yombomanga unguma kepe taka leko pilku liku molangi.

5:22-33

### *Ambo Yema Molonge Mele Ungu Se (5:21—6:9 pali)*

<sup>22</sup> Ono ambomane Ye-Awilimunga ungumu taka leko pilku liku molemele mele ononga yemanga unguma taka leko pilku liku molangi. <sup>23</sup> Karasi yu yunga yombo talapemonga Lipa Tapondopa Mindili Nolemolá Aulkana Wendo Lili Yemo molopa, kanu yombo talapemo yunga kangimu yu kangimunga pengemo molopa yunga kangimu nokolemo, aku sipa yema ono ambomanga pengema akumunga ambomane aku siku sangi. <sup>24</sup> Karasinga yombo talapemone 'Karasí nanga Ye-Awilimuni na nokolemo.' nimba yunga ungumu taka lepa pilipa lipa molemo mele ambomane aku siku ononga yema 'Olio nokangi.' ningu ononga unguma pali alieli pilku liku molangi.

<sup>25</sup> Ono yema, Karasini yunga yombo talapemo paa konopu mondopale yunga kolali sepa kolondorumu aku siku mele ononga amboma konopu mondangi. <sup>26</sup> 'Yunga yombo talapemo Pulu Yemonga talape yunga manjipa kene kake sélimu molopili.' nimba Karasini yunga kolali sepa kolondopa, yunga ungumuni kanu yombo talapemo kulumiye torumu. <sup>27</sup> 'Yunga yombo talapemo yunga kangimu' nimba 'kalaro se naa molopa erili se naa sepa, aku sipa selu kepe naa sepa kangi paa kake sélimu gilipa Pulu Yemone kanopa kiri pilimba mélse naa giliepili nane nanu nanga ambo paa peangamo na nanu liembo.' nimba aku sipa serimu.

<sup>28</sup> Aku siku yemane ononga kangima konopu mondokole nokolemele mele ononga amboma konopu mondonge kinia peanga. Ye sene yunga ambomo konopu mondolemo akumu yu yuyu konopu mondolemo. <sup>29</sup> Yombo sene yunga kangimu kanopa kiri pilipa naa nokopa kondolemoye? Karasini yunga yombo talapemo nokopa kondolemo mele aku sipa yombo sene yunga kangimu nokolemo kanumu.

<sup>30</sup> Olio Karasinga kímbu ki mongo mélema molemolo-na, olio yunga yombo talapemo aku sipa nokopa kondolemo.<sup>31</sup> ‘Ye sene yunga ambomo konopu mondolemo akumu yunga kangimu konopu mondolemo.’ nikiru, akumunga pulumu Pulu Yemonga bokuna i-sipa ungu se molemo:

“Pulu Yemone ambomo kinia yemo kinia  
aku sipa serimumunga,  
ye sene anumu lapatolo mundupa kelepa  
yunga ambomo kinia peko  
olo kangi selumu mele molongele.”

nimba molemo kanumu.<sup>32</sup> Aku ungumunga ungu-pulu tondolo se lopi mele selemo. Nane pilkiru, ‘Karasi kinia yunga yombo talapemo kinia akutolondo nirimu.’ konopu lekero.<sup>33</sup> Aku-na-kolo aku ungumunga sumbi sipa ungu-pulu se ononga molemóla. Ono yema yu-meletele konopu mondolemele mele ononga amboma aku siku konopu mondangi. Ambomane ononga yemane ningí unguma liku awi siku ono seko kondoko molangi.

## 6

6:1-4

### *Bolangoma Kinia Anupili Lapali Kinia Ono Senge Mele Ungo Se (5:21—6:9 pali)*

<sup>1</sup> Bolangoma, Pulu Yemone “Anupili lapalini ono nokangi.” nilimú kene aminieli lanielinga unguma pilku sengena panjiku sangi. Aku senge kinia papu.<sup>2</sup> Pulu Yemone u ungu-mane sirimu bokuna molemo mele i-sipa:

“Aminieli lanieli kinia molko kondoko  
ononga unguma pilku liku sangi.”

nilimú kanumu. Aku-na-kolo ungu-mane lupama we sirimu mele imu aku sipa we naa sirimu. I ungu-manemo sipale “Aku senge kinia nane sembó.” nimba, nimba panjerimu mele i-sipa:

<sup>3</sup> “Ono ‘Ma-koleana molopo kondopo,  
kalia-ingi awisili konde molamili.’ ningu aku sangi.”

nimba aku sipa olandopa nimba panjerimu.

<sup>4</sup> Bolangomanga lapali, ononga bolangoma seko mumindili naa kondangi. Ono Ye-Awilimunga unguma mane siku nokoko kondangi.

6:5-9

### *Kou-Mone Naa Liku Kongono We Senderingi Kendemande-Yomboma Kinia Kongono Nokoli Yema Kinia Ononga Ungo Se (5:21—6:9 pali)*

<sup>5</sup> Kongono we sendeli kendemande-yomboma, ono ononga kongono nokolemele mana-yemane ningí ungumu liku awi siku pipili kolko sangi. Ono konopu talo sepa pepili ononga kongono nokoli yemanga kongono naa sendangi. Onone Karasinga ungumu pilku liku selememele mele aku siku kongono nokoli yemanga unguma pilku liku sangi.<sup>6</sup> Ononga kongono nokoli yemane “Saa.” nilimili mele kanoko molangi ‘Sengena panjipu semolo kinia kape ningí.’ ningu aku siku mindi ningu pilkuli unguma sengena panjiku naa sangi. Onone ‘Karasinga kendemande-yomboma molopo yunga kongono sendelemolo.’ ningu pilku aku siku mele ononga kongono nokoli yemanga kongonoma sendengendo ‘Pulu Yemonga kongonoma’ konopumuni pilkuli kongonoma tondolo munduku sendangi.<sup>7</sup> ‘Yombomanga kongono mindi sendekemolo kene unguri molo.’ ningu kongono nokoli yemanga kongonoma naa sendangi. Kongono nokoli yemanga kongono kanumu Ye-Awilimunga kongono sendelemolá mele aku siku kongono nokoli ye kanumanga kongonoma konopu peanga pepili pilku liku popenge seko sendangi.<sup>8</sup> ‘Ye-Awilimuni kongono sendelemele yomboma kepe, we molemele yomboma kepe pali seko kondonge mele

kanopale méle kalomba.' ningu pilkuli ononga kongono nokoli yemanga kongonoma aku siku tondolo munduku sendangi.

<sup>9</sup> Kongono nokoli yema, onone aku siku kongono we sendeli kendemande-yomboma seko kondangila. Mulu-koleana molemo yemo yu kendemande-yomboma kinia nokoli yema kinia ononga pali Nokoli Yemo. 'Yuni yombomanga imbima kanopale ono naa apurulimú.' ningu pilkuli onone ononga kongono we sendeli kendemande-yomboma seko mini-wale naa mundundangi.

6:10-20

*Karasinga Yomboma Opa Sengendo 'Kuna Kinia Ele Mélema Tondolo Munduku Ambolangi' Nirimu Ungu Se*

<sup>10</sup> Kiniá ungu se kamu niembo: 'Olio enge olandopa-olandopa nipili molamili.' ningu Ye-Awilimu kinia kopu seko molko 'yunga enge awili-sepa pélimu olio liemili sipili.' ningu molaa. <sup>11</sup> 'Kurumanga nokoli, depelemone uluma kolo topa sepa olio kondi tolemo kene enge nimbu giliamili.' ningu ono Pulu Yemone opa seli mulu-wambale silimúma pali liku pakoko molaa. <sup>12</sup> 'Mimi siku piliaa.,' Olio manayombo mongone kanolemoloma kinia opa naa selemolo. Mélema nokongendo tondolo pelemo kuruma kinia, namba molopa kolea lupa lupa nokolemele kuruma kinia, i 'mulu ma naa pora nilimú, wale simbulu tolima ma-koleana nokolemele kuruma kinia, muluna ola molemele kuruma kinia, akuma kinia opa sepo molemolo.

<sup>13</sup> Akumunga, Pulu Yemone opa seli méle silimúma pali liku pakoko ambolko molaa. Aku senge kinia umbuna walema wendo ombá kinia ono manda enge ningu gilku opa manda senge. Kanu-kinia wale mare opa welea pora naa nimba opa-touma welea toko mania naa mundukuli we naa molko opa-tapu sengendo enge ningu giliangila.

<sup>14</sup> Akumunga, 'Olio topa mania naa mundopili.  
Enge nimbu giliamili.' ningu

ungu-sikama kako toko,

ulu sumbi nilima kapane seli wale-pakoli mele uluwikundu pakoko,

<sup>15</sup> yomboma Pulu Yemo-kinia selu siku manda molonge semane peangamo toko siliku andonge kimbu-suma mondcaa.

<sup>16</sup> Aku mélema pakokole,

'Pulu Yemo sika. Yesusi Karasi sika. 'Nanga' nimba senderimumu, sika.' ningu kuru mondoli ulumu 'ononga kuna-tapiyemo.' ningu liku alieli ambolko molangi. Aku kuna-tapiyemone ulu-kirimanga pali ulu-pulumu pelemo 'kuru,muni mera sepe nomba pelimane ono tomba kinia sepemo manda toko ku mundungi.'

<sup>17</sup> Pulu Yemone yomboma lipa tapondopa mindili nolemolá aulkana wendo lipa yu-kinia pea molko kondonge aulkana lipa mondolemo wanie kapane sélimu liku pakoko,

Minimunga opa seli lu-pultamo liku ambolangi. Lu-pulta akumu Pulu Yemonga ungumu.

<sup>18</sup> Minimuni ono tondolo simbamone alieli Pulu Yemo-kinia ungu niengi. Ono molongena ulu lupa-lupama pali wendo ombá kinia Pulu Yemo-kinia ungu lupa-lupa ningu mawa sangi. 'Yuni yunga yomboma lipa tapondopili.' ningu tangoli kepe ipulieli kepe alieli mimi siku pilku kanoko koro naa molko Pulu Yemo ononga mawa sendeko molangi.

<sup>19</sup> 'Pulu Yemone na lipa tapondopili.' ningu nanga kepe yu mawa sendekole, 'Na yomboma ungu nimbu simbú sembó kinia na mini-wale naa mundupu yomboma pipili naa kolopo semane peangamonga ungu-pulu lopi sepa pelemoma sumbi sipu nimbu para siembo kene Pulu Yemone nanga kerena ombo molopa ungumu nimba sipili.' niengi. <sup>20</sup> Kanu semane peangamo nando 'Toko si-pu.' nimba Pulu Yemone lipa mundorumu-na andopo topo siliumunga na ka-ulvana pelio. 'Kanu semane

peangamo Ye-Awili muni nando ‘toko siliku andou.’ nimba kongono sirimu kene na yomboma pipili naa kolopo nimbu siembo.’ ningu Pulu Yemo mawa sendangi.

*6:21-24*

*Pollone Pepá Topa Pora Simbando Pulu Yemo Mawa Sepa ‘Yomboma Sewi Anji.’  
Nirimu Unguma*

<sup>21</sup> ‘Ungu ninduma pora nikimu., Na kongono sepo, ungu nimbu, konopumuni pilipu, molio mele ye Tikikasini ono molemelena ombo nimba simba. Tikikas yu nanga konopu mondolio genumu, Ye-Awili munga kongonomo tondolo mundupa lipa tapondopa selemo yemone na molio mele nimba simba. <sup>22</sup> ‘Ono konopu peanga leko molangi.’ nimba olio molemolo mele ono nimba sipili.’ nimbu ono molemelena yu lipu mundukuru.

<sup>23</sup> Lapa Pulu Yemo kinia Ye-Awili Yesusi Karasitolone ‘Ono Karasinga yomboma konopu pe nipili molko, anju yando yomboma konopu mondoko, ‘Olone sika olio seko kondongele.’ ningu kuru mondoko molangi.’ niengili. <sup>24</sup> Yombo olionga Ye-Awili Yesusi Karasi konopu mondolemele mele siye naa kolko yu konopu mondoko mindi molemele yomboma ,Pulu Yemone, we kondo kolopa molopili molangi.

‘Aku pea nikiru. ’

## **PILLIPAI** **Pollone PILLIPAI Yomboma Pepá Topa Sirimu Bokumu**

*Pollone I Pepá Topa Sirimumunga Ungu-Pulu Mare*

Pollo kinia yuni pepá topa sirimumanga ungu-pulu mare inia yakondo gomo 676 molemo.

Pollo ka-ulkana pepale i pepámo topa sirimu (1:13-14). ‘Ka-ulkana pepale **Epesasi**, **Pillipai**, **Kollosi** yombomanga pepáma topa, **ye Pillimononga** pepámo topa sirimu.’ ningu pilielemele. Ka-ulka semonje, naa pilielemolo-na-kolo yombo marene pilkuli ‘Romo molopale pepáma torumu.’ ningu pilielemele (Lipa Mundorumu Yema 28:14-31).

Pollo u-pulu-pulu **kolea-awili Pillipai** orumu semanemo Lipa Mundorumu Yema 16:8-15 molemo. Pepámo paa pe mele torumu. **Pillipai** akumu Masedonia poropinji lierimu kolea-awili se. Kambani bisinisi kongono akuna paa seringi. Romo-yombo awisili akuna molko, Juda-yombo paa koltalo moloringi.

**Pillipai yomboma**-kinia umbuna se pepili Pollone i pepámo naa torumu. Ungu mare nirimu akuma i-sipa:

**Ungu Se:** Karasi pilieli **Pillipai yombomane** kou-mone mare ‘Pollone kongono selemomo lipu tapondamili.’ ningu, siku mundoringimunga ono-kinia “Ange.” nirimu (1:5, 4:10-19).

**Ungu Se:** ‘Karasinga yomboma molemelemonga mindili nolemele akumu konopu tondolo pupili molko, kele toko mini-wale naa munduku konopu siku molangi.’ nirimu (1:27-30, 4:4-7).

**Ungu Se:** ‘Imbi naa mololi yomboma mele molko, anju yando taka leko yombomanga unguma pilku konopu seluna pupili molangi.’ nirimu (2:1-11, 4:2-5). (Pulu Yemone nimba taltopa “Pu.” nimba mana lipa mundorumu ye nokoli Karasi Yesusi akumunga ungu awili paa tondolo se 2:5-11 molemo, akumu paa kanou.)

**Ungu Se:** ‘Timoti kinia Epapodaitasitolo ongele kinia konopu siku “Pea kopu sepo molamili.” niengi.’ nirimu (2:19-30).

**Ungu Se:** ‘Ye mare ono-kinia molko ungu-mane mare kolo toko siringimanga unguma pilku naa liee.’ nirimu (kolomongo-awili 3).

Ya ungu-pulumu pora nikimu.

*Kolomongo-Awili 1-4*

### **Karasinga Pillipai Yomboma Pollo Kinia Kopu Seko Moloringimunga Pollo Paa Konopu Sirimu Ungumu**

1:1-2

*Pollone Pepámo Tombando Pulu Polopa Torumu Unguma*

<sup>1</sup> Olto Pollo Timotitolo, Karasi Yesusinga kongono sendeli kendemande-yetolone ono Pulu Yemonga yombo kake selima kolea-awili Pillipai molemelema i pepámo topo sikimbulu. Ono ungu pilieli yombo wema kinia, ononga tapu-yema kinia, Karasinga yombomanga kongono sendeli yema kinia, ono pali i pepámo topo sikimbulu.

<sup>2</sup> Olionga Lapa Pulu Yemo kinia Ye-Awili Yesusi Karasitolone ono we kondo kolko, ‘Ono konopu pe nipili taka leko molangi.’ niengili.

1:3-11

*Pollone Pulu Yemondo “Ange.” Nirimu Ungu Se*

<sup>3</sup> Nane ono walte walte konopuni pilipuli nanga Pulu Yemo kinia "Ange." niliu. <sup>4-5</sup> Na semane peangamo pulu polopo ono topo sirindu kinia kepe, yandopa yandopa kanu kongonomo selio kinia kepe, onone na liku tapondoringi mele liku tapondolemelemonga Pulu Yemo kinia ungu nimbu ononga mawa sendembondo konopu sипу mawa sendelio. <sup>6</sup> Nane pilipuli, 'Pulu Yemone ononga konopuna kongono pulu polopa serimu kongono peangamo selepa pumba pumba, Karasi Yesusi yando ombo olio limba walemonga kanu kongonomo sepa limba.' nimbu tondolo mundupu kuru mondolio.

<sup>7</sup> Na ono konopuni pilipu andopo molio-na na onondo konopu lelio mele papu lelio. Na ka-ulana pelio kinia kepe, semane peangamo topo sипу "Yu paa sika semanemo yomboma paa pilku liengi." nilipu andoruntu kinia kepe, onone na liku tapondolemele-na na kinia ono kinia olio Pulu Yemone we kondo kolopa lipa tapondolemo. <sup>8</sup> "Karasi Yesusini ono kondo kolopa konopu mondolemo mele nane aku sипу ono kondo kolopo konopu mondopo yakala kolopo molio." nikiru akumu sika nikiru. Pulu Yemone ungu nilkanje nane "Sika nikimu." nilkala.

<sup>9-10</sup> Nane Pulu Yemo ononga mawa sendelio mele i-sipa: " 'Onone ulu kiri peangama apuruku kondokole ulu peangama mindi pilku liku sangi.' nimbu ono Pulu Yemo kinia Karasi-tolo pea olonga yomboma pea konopu mondolemele mele paa olandopa olandopa mondoko mololko pungu, ononga pilipa kondolima kinia ulu kiri peangama apuroli ulu-pulumu kinia ononga konopumanga pepa sengepea selepa pupili konopu mondoko molangi." nimbu Pulu Yemo mawa sendelio. 'Aku siku molonge kinia Karasi kelepa ombá walemo wendo ombá kinia ono konopu kake sepili molko yu kanopa peanga pilielemo ulu-puluma mindi ononga konopumanga pepili molko, <sup>11</sup> Yesusi Karasini ono-kinia kopu sepa molopa lipa tapondolemomonga yu kanopa sumbi nili uluma nimba kanolemo uluma mindi seko molonge. Ono aku siku seko molongemone Pulu Yemonga imbi ambolko paka tondoko yu kape ningí.' nimbu aku sипу Pulu Yemo ononga mawa sendelio.

1:12-30

### *Pollo Ka-Ulkana Perimu Ulumuni Semane Peangamo Lipa Tapondolemo Ungumu*

<sup>12</sup> Ango-keme, na-kinia ulu umbuna wendo omu akumuni semane peangamo pipi naa simu. Na ka siringi ka-ulana pelio ulumuni semane peangamo sepa tondolo mundundulimú. <sup>13</sup> Akumunga, Romo Gapomano Ye Paa Awili Kumbina Sisamonga ulkamo nokolemele ami-yema kinia we-yomboma pali 'Na Karasinga kongonomo sendeliomonga ka siringi ka-ulana pelio.' ningu kanolemele. <sup>14</sup> Na ka-ulana peliomonga nanga genupili awisilini kanokole 'Ye-Awylimuni olio sika lipa tapondomba.' ningu pilku konopu tondolo pupili, 'Yombomane olio mindili singi liemu unguri mólo.' ningu, Pulu Yemonga ungumu pipili naa kolko tondolo munduku ningu siliku andolemele.

<sup>15</sup> Sika ye marene ,na kolea awisilinga andopo ungumu nimbu sirindumunga yombo awisili kanu ungumu pilku limili mele, kanoko kiri pilkuli 'Pollonga imbimu mania pupili. Olionga imbima ola molopili.' ningu Karasinga semanemo toko silimili-na-koło marene konopu peanga pepili , 'Karasinga imbimu ola molopili.' ningu, Karasinga semanemo toko silimili. <sup>16</sup> Nane 'semane peangamo yu paa sika.' nilipu andoliomonga ka-ulana pelio mele kanokole na konopu mondolemelemonga Karasinga semanemo toko silimili; <sup>17</sup> aku-na-koło ye marene konopu sumbi sипа naa pepili ononga imbima 'ola molopili.' ningu Karasinga semanemo toko silimili. 'Na ka-ulana pelio kinia umbuna mare olandopa siemili.' ningu aku selemele. <sup>18-19</sup> Aku-sипа na-koło 'Na mindili nopili.' ninguaku selemele mele uluri pelemoye? Ono konopu peanga pepili semanemo toko silimili molo konopu sumbi sипа naa pepili toko silimili

akumu unguri mólo. Onone pali Karasinga semanemo yomboma toko silimilimunga na paa konopu sipu molio.

*1:18-26*

*Pollo Ka-Ulkana Pepale “Na Kolombo Kinia Molo Molombo Kinia Karasi Kinia Pea Molembolo Mele Molombolo.” Nirimu Ungu Se (ka-ulka ungumu 1:12-30 pali)*

‘Konopu sipu molombomonga ulu se pelemóla..’ Na pilipuli, ‘na ka-ulkana pepo mindili nolio kinia onone Pulu Yemo kinia nanga ningu mawa sendelemelemonga kepe, Yesusi Karasinga Minimu yu na-kinia molopa na lipa tapondolemomonga kepe, i ulutolonga na manda molombo.’ nimbu pilipuli konopu sipu molio mele molombo. <sup>20</sup> ‘Nane sambo.’ konopu lekero mele i-sipa: ‘Na selio mele kepe molio mele kepe akumunga pipili naa kolopo Karasinga kumbi-kerena gilimbu kinia paa peanga.’ nimbu yunga kongonomo tondolo mundupu selio. ‘Molombo kinia kepe molo kolombo kinia kepe nanga kangimuni Karasinga imbimu ambolopo paka tondorundu tondolio mele aku sipu tondombo.’ nimbu aku selio. <sup>21</sup> Na konde molio kinia Karasi nanga konopuna molemo pea kopu sepo molembolo akumu peangala; kolopole molombo mele paa olandopa. <sup>22</sup> Mana we molondu liemu nane nanga kongono peanga we lemómo manda sembó. Akumunga kolombomo kinia konde molombomo kinia kanu ulutolonga se sembó mele na pilipu sundupu lo liu.

<sup>23</sup> Na konopu talo pelemo. Ma-koleamo mundupu kelepo Karasi molemona pumbu pea molombolondo na konopu sipu molio. Aku sendu liemu paa peanga. <sup>24</sup> Aku-sipa na-ko lo kolondu liemu nane ono nambi sepo manda lipu tapondomboyé? Pe ono nambi sengenje? Aku sipu nimbu pilipuli mana we molondu liemu paa peangala. <sup>25</sup> ‘Nane ono lipu tapondombo kinia ono Karasinga yomboma molko kondoko ‘yu sika’ ningu kuru mondoko konopu siku molonge.’ nimbu pilipuli ‘Na ono kinia pea ma-koleana sika molomolo.’ nimbu tondolo mundupu kuru mondokoro. <sup>26</sup> ‘Pe na ono molongena kelepo yando ombo pea molomolo kinia onone Karasi Yesusinga imbimu ambolko paka tondoko molonge.’ nimbu pilipu ‘Sika aku sipu ono-kinia kelepo molombo.’ konopu lekero.

*1:27-30*

*Pulu Yemone Pillipai Yomboma Sepa Kondolemo-Na-Kolo ‘Mindili Nangi.’ Nilimúla, Ungu Se*

<sup>27</sup> Aku-sipa na-ko lo na ondu liemu kepe naa ondu liemu kepe unguri mólo. ‘We-yombomane olio kanokole ‘Sika Karasinga yomboma molemele.’ ningu piliangi.’ ningu Karasini yu lombili andolima molonge mele nimba sirimu mele ono aku siku molangi. Aku siku molonge ulumu olandopamo. Pe aku siku seko molangi ombo mongone kanondu liemu molo ono seko molemele mele semane se ka-ulkana molopole piliendu liemu ‘ono konopu seluna pupili tondolo munduku molko, ‘yomboma ‘Pulu Yemone nimba taltorumu ye nokoli Karasi Yesusinga nimba senderimumunga molko kondonge mele, ‘sika.’ ningu kuru mondangi.’ ningu semane peangamo toko siku, <sup>28</sup> ononga opa-tou yombomane ‘ono mini-wale mundangi.’ ningu ulu mare selemele kinia ‘Unguri mólo.’ ningu mini-wale naa munduku we gilimili mele piliambo.’ nimbu molio. Ononga opa-toumane ono mini-wale naa munduku we gilimili kinia kanokole ‘Ono opa-touma mindili nongo molko kinjingí-na-ko lo ono Karasinga yomboma mindili nolemolá aulkana wendo ongo, molko kondonge aulkana pungí.’ ningu kanonge. Pulu Yemone ono lipa tapondopa opa-touma topa mania mundumbamongaaku siku ningu kanonge. <sup>29</sup> Pulu Yemone ono sepa kondopale ‘Karasi yu sika. Yu manjipa manda.’ ningu kuru mondangi.’ nilimú. ‘Karasinga imbimu ola molopili kene mindili nangi.’ nilimúla. ‘Akumunga opa-toumane aku siku ningu kanonge..’ <sup>30</sup> U na, ‘Yesusi Karasi yu sika.’, nimbu kuru mondorundumunga opa-toumane na toko mania mundungí seringi kinia tondolo

mundupu molopo mindili norundu mele ono Karasinga yombomane kanoringi, pe kiniá aku sипу molio mele pilielemelela. Kiniá ono mindili nolemelele mele selu-sipala.

## 2

2:1-5

*Olio Konopu Seluna Pupili Molopo Yombo Lupama Sepo Kondamili Ungu Se*

<sup>1</sup> Ono Karasi pea kopu seko molemelemonga ono toembo toko molko, yuni konopu mondolemo ulumuni ono kundopili molko, ono onono Minimuni anju yando manda kopu seko molko, yombo lupama konopu mondoko kondo kolko, aku siku molongi liemu <sup>2</sup> na 'Konopu awili-sepa sipa molopili.' ningu ono konopu selumu pepili molko, onono anju yando konopu mondoko molko, ononga konopu seluna pupili molko, méle lupa lupama yu-mele-mele naa konopu mondoko molaa. <sup>3</sup> Ono 'Na yombo awili se molambo. Nanga imbi ola molopili.' ningu naa molaa. 'Na kamakomo molio. Nanga imbi paa olandopa molemo.' ningu pilku kara pungu naa molaa. Ono molonge mele i-sipa: 'Yomboma awili mele molemele, na mania mele molio.' ningu aku siku anju yando pilku molaa. <sup>4</sup> Ono onono yu-mele-mele konopumane pilku senge mele manjiku pilku naa molaa. Ononga yombomane 'Samili.' ningí mele molo umbuna pembama kepe pilku ,liku tapondoko, molaa. <sup>5</sup> Karasi Yesusi mele molaa.

2:5-11

*Karasi Yesusi Yuyu 'We-Ye Se Molopo Ye Koropa Se Mele Molambo.' Nimba Aku Sipa Molorumu-Kulu Pulu Yemone Yu Lipa Paa Olandopa Mondorumu Semanemo (2:1-5 pea)*

Karasi Yesusi pilipa sepa molorumu mele ono aku siku pilku seko molongi liemu paa peanga. <sup>6</sup> Karasi Yesusi yu serimu mele i-sipa:

Yu Pulu Yemo molorumu mele molorumu-na-kolo  
'Pulu Yemo molio mele kamu molambo.'  
ni naa nirimu.

<sup>7</sup> Yu Pulu Yemo molorumu mele mundupa kelepa  
'Kongono kendemande ye se molambo.' nimba  
yu olio molemolo mele au lepa molorumu.  
Yu mana-ye se meringimu molorumu.

<sup>8</sup> Yu mana-ye se molorumu kanoringi kanu-kinia  
'Na we-ye molambo.' nimba molopa,  
Pulu Yemone "Sei." nirimu uluma pali  
pilipa lipa serimu.

"Nu kolani, unju-perana uku toko panjangi."  
nirimu ungumu kepe mundupa naa kelepa  
pilipa lipa yu kolorumu.

<sup>9</sup> Pe ,yu Pulu Yemonga unguma pali  
pilipa lipa serimumunga,  
Pulu Yemone yu paa olandopa lipa mondopa,  
imbi se we-imbima pali topa mania mundupa  
paa olandopa molemo imbimu sirimu.

<sup>10</sup> 'Yesusinga imbimu pilkuli  
mulu-koleana sukundu molemele yomboma kinia  
mania molemele yomboma kinia  
mania mania pelemele yomboma kinia  
onone pali yunga imbi ambolko paka tondoko  
'Yu ye awilimu molopili,  
olio maniadopa molamili.' ningu  
yunga kumbikerena, komorongo toko pondoko,

**11 Lapa Pulu Yemo imbi ambolko paka tondongendo  
“Yesusi Karasi yu Ye-Awilimu.” niengi.’ nimba  
Pulu Yemone Yesusi yu kanu imbimu sirimu.**

**2:12-18**

***Olio Yombomanga Pa Sendelima Molamili Ungu Se***

**12 Nanga pulu lemó yomboma, Karasi Yesusini aku serimu mele pilkuli nanga unguma u alieli pilku sengena panjiku seringi mele kiniá kepe sengena panjiku sangi. Na ono-kinia molopo “Saa.” nirindu kinia pilku liku seringi mele kiniá na ono-kinia naa molio kinia kepe nane “Saa.” niliu mele liku awi siku pilku liku seko molangi. Pulu Yemone ono lipa tapondopa mindili nolemolá aulkana wendo liltimumunga yu-kinia pea konopu seluna pupili manda molemele mele ‘Aku sipu we molamili. Aku sipu molomolo mele mélsene pipi simbanje.’ ningu ‘Pulu Yemonga kumbikerena, pipili kolko mini-wale munduku ‘Pulu Yemone ‘We simbú.’ nirimu mélema paa liemili.’ ningu akuma lingí kongonomo kála-seko seko molangi. **13** Olio pilielemolo, Pulu Yemo ono-kinia molopa, yuni ‘Seko molangi.’ nimba konopu lemó mele ‘Sangi.’ nimba tondoloma sipa lipa tapondopa, ‘Sengendo yakala kolangi.’ nilimú kene aku siku seko molangi.**

**14-16** Pulu Yemone olio kotena “Seko kinjeringimunga mindili nangi.” nimbá ulu se naa pepili kanopa yombo kake selima mindi nimba kanopili. Kiniá yombo ulu peangama munduku kelko ulu kalaro mololima kinia ulu-pulu-kirima mindi selemele yomboma kinia pea molopo yunga bolangoma sumbi sipu molopo yuni olio kanopa ulu kalaro mololi uluma nimba naa kanopa ‘yombo sumbi nilima mindi molemele’ nimba kanopili.’ ninguli ono ulu selemelema pali sengendo ungu awisili ningu angelema naa ningu taka leko sangi. ‘Kanu yombo kirima konde mololi ulumu pelemo ungumu pilku liengi.’ ningu silimilimunga kanu yomboma molemelena sepe-llame mele molko pa sendelemele. Aku senge kinia Karasinga walemo wendo ombá kinia ono kanopole ‘Nane ono kinia kála sepo kongono selioma we naa selio. Nanga ungu tondolo mundupu niliuma mania naa pumu.’ nimbu kanopole na paa konopu sipu molombo. **17** Juda yombomane Pulu Yemo popo toko mélema kalko sikuli, mingi se no-waene molemomo liku Pulu Yemonga kumbikerena kamu ondoko munduku silimili mele onone ‘Yu sika.’ ningu kuru mondolemele ulumu kinia yunga kongonomo sendelemele kinia yu popo toko kalko silimili mele akumunga olandopa na ‘Pollo,’ ‘kolambo.’ ningu tonge kinia nanga mememo no-waene mele ondopa omba pumbanje. Aku liemu na konopu sipu, ono kinia pea paa konopu siliu. **18** ‘Na-kinia aku sipa wendo omu liemu na ono-kinia konopu simbú,’ akumunga ono kepe konopu siku na kinia pea paa konopu silimili liemu peangala.

**2:19-30**

***Pollone (19-24) ‘Timoti Kinia (25-30) Epapodaitas Kinia “Kolea-Awili Pillipai Pale.”  
Nimbú Sekero.’ Nirimu Ungumu***

**19** Ye-Awili Yesusini “E.” nimu liemu nane nondopo ‘Timoti ono molemelena opili.’ nimbú. ‘Yu kelepa yando ombale ono molemele mele na semane topa simba mele pilimbu kinia na konopu peanga pemba.’ nimbuli ‘Aku sambo.’ nimbu molio.

**20** Timoti na-kinia kopu sepa molopa ‘Ono molko kondangi lipu tapondambo.’ nimba molemo mele yombo se lupa aku sipa naa molemo. **21** We-yomboma pali ‘Yesusi Karasi lipu tapondopo yunga kongonomo samili.’ naa ningu ononga mélema mindi konopu kimbu siku pilku molemele. **22** Aku-sipa na-kolo Timoti sepa kondolemo mele ono pilielemole. Kango sene yunga lapamo lipa tapondopa nokolemo mele yu-kinia olto semane peangamonga kongonomo pea kopu sepo selembolo. **23** Akumunga, ‘Ono molemelena yu opili.’ nimbu lipu mundumbu sekero., ‘Opali talu na-kinia nambolka uluri wendo ombánje.’ nimbu nokokoro. Pe pilipuli, “Yu ono molemelena

opili." nimbu sumbi sipu lipu mundumbu. <sup>24</sup> 'Na kepe Ye-Awylimuni na lipa tapondomba kinia nondopo ono ombo kanombo.' nimbu tondolo mundupu kuru mondokoro.

**2:25-30**

*(Ungumunga imbimu inia yakondo 2:19 kanou)*

<sup>25</sup> Aku-sipa na-kolo kiniá iseli-u onone 'Na lipa tapondopa nokopili.' ningu liku mundoringi ye Epapodaitas 'Ono molemelena kelepo opili paa lipu mundumbu.' konopu lekero. Yu olionga genu, na kinia pea kopu sepo kongono sepo, 'semane peangamo mania naa pupili.' nimbu pea opa selembolo yemo. <sup>26</sup> 'Ono kelepo kanamboa.' nimba molopa, yu kuru torumu pilieringimunga yu konopu umbuna sepili molemola. <sup>27</sup> Yu paa sika kuru torumu, yu pondeanga kamu kolorumu. 'Kamu kolka,-na-kolo Pulu Yemone yu kondo kolopa 'Peanga lepaconde pupili.' nirimu. Pulu Yemone yu mindi kondo naa kolorumu. 'Yu kolomba kinia, na-kinia umbuna awilima olandopa olandopa ombá.' nimba pilipale na kepe kondo kolopa yu sepaconde liltimu. <sup>28</sup> Akumunga, 'Ono yu kelko kanokole, 'Kuru pora nirimu lémo.' ningu, konopu siengi. Na konopu umbuna awili-sepa naala sepili kene "Ono molemelena yu opili." nimbú kinia paa papu.' nimbu tondolo mundupu pilipu moltoro. <sup>29-30</sup> Akumunga, yu ombá kinia konopu siku 'Papu okono.' niengi. Yu yuyu umbuna se wendo ombá mele konopumuni naa pilipa, yuni Karasinga kongonomo mindi pilipa sepa molopale kolomba sepa, onone 'Na lipa tapondopili.' ningu kongono siringimu 'sepo molambo.' nimba yu kuru torumu kinia kepe piliekelie sepa we-kongono serimu kene 'Yu pea Ye-Awylimunga yomboma molemolo.' ningu 'Ange.' ningu konopu siku "Papu okono. Pea kopu sepo molamili." ningu, yu molemo mele molemele yomboma liku awi siku ononga imbima ambolko paka tondangi.

### 3

**3:1-11**

*'Karasi Sika' Nilimili Yomboma Mindi Paa Yombo Sumbi Nilima Molemele. Aulka Se Lupa Naa Lemó Ungu Se*

<sup>1</sup> Nanga ango-keme, i pepámo topo pora simbundu i-sipu nikiru: Ono Ye-Awylimu kinia, kopu seko molemelemonga, konopu siku molangi.

U pepá se topo, liepi-liepi topo, nirindu mele kelepo pepá tombo kinia siye naa sembá. Aku sembó kinia ono lipa tapondomba, kene kelepo niembo,:

<sup>2</sup> Ye owá-palako mele molemelema kanoko kondoko molaa. Kanu yema ono seko kinjingí yema, kangimu kopisiku seko kinjilimili yema. <sup>3</sup> Olio Karasinga yomboma mindi paa sika kangi kopiseli Isirele yomboma molemolo. Olio Pulu Yemonga Minimuni lipa tapondolemomonga Pulu Yemo popo tolemolo yomboma molemolo. Karasi Yesusinga imbimu mindi ambolopo paka tondopo, 'kangikundu unguri selemele akumu olio naa lipa tapondolemo.' nimbu pilielemolo yomboma molemolo. <sup>4</sup> Kangikundu ulumane manda lipa tapondolkanje 'Na Pulu Yemone uluri naa sembá. Molopo kondombo.' nimbu tondolo mundupu kuru mondopo pipili naa kolka.

Yombo marene 'Kangikundu unguri selemolomonga sika manda molomolo.' ningu kuru mondolemele liemu nane kepe aku sipu manda 'Sika.' nimbu olandopa tondolo mundupu kuru mondombo. <sup>5</sup> Amane na merimu kinia wale yopoko-pakara ombo purumu kinia engaki-sipamonga nanga kangi kopiseringi. Na Isirele ye sela, Isirelene merimu ye Benjaminini kalopa liltimu ye se; ama tatatolo Ipuru yombotolo, na Ipuru kangomola. Na Parisi ye se molopo Parisi yemane Pulu Yemonga ungu-manema pilku tondolo munduku selemele mele aku sipu pilipu paa serindu. <sup>6</sup> 'Pulu Yemonga

ungumu tondolo mundupu kuru mondopo sepo, yu paa lipu tapondambo.' nimbu Karasinga yombo talapemo sepo kinjipu mindili sirindu. 'Na Karasinga yemo naa molopole, Pulu Yemone "Saa." nirimu ungu-manema pali paa mimi sipu pilipu lipu serindumunga 'Nane ulu se lawa seko, seko kinjikinu.' ningu paa naa kanoringi. 'Kangikundu aku sipu sepo molorundumunga kangikundu selemele mele uluri lipa tapondolkanje na paa sika lipa tapondolka.'

<sup>7</sup> Aku-sipa na-kolo kiniá Karasinga yemo molopo yu lombili pumbu kongono sendembomonga 'Karasi na molorunduna naa opili, u molorundu mele kinia serindu mele kinia 'paa olandopa lipa tapondolka uluma, 'Tondolo se naa pelemo. Unguri mólo. 'Aku sipu sepo molorundu uluma Pulu Yemone kanopa peanga pilimba ulu se naa pelemo.,' nimbu pilielio. <sup>8-9</sup> Nane Juda yombomanga ulu-pulumando mindi naa nikiru. 'Karasi Yesusi nanga Ye-Awilimu paa pilipu paa kopu sepo molembolo aku ulumu paa peanga.' nimbu we-mélema kinia uluma yakala naa kolopo 'unguri mólo' nimbu mundupu kelepo yu mindi lombili puliu. 'Karasi mindi ambolopo yunga unguma kuru mondopo lipu sepo, yu-kinia kopu sepo molambili.' nimbu 'we-uluma kere-langi purupa lupendi tolemo kinia toko eltolemele mélema mele lemó.' nimbu pilipu molio. Kiniá nane 'Ungu-manema pilipu lipu serindumunga na Pulu Yemone 'na ye sumbi nili se.' nimba kanolemo.' nimbu naa pilielio. 'Na ye sumbi nili se molambo.' nimbu aulka se lupa puliu. 'Karasi 'kinia yuni 'nanga' nimba senderimumu kinia, sika.' nimbu kuru mondolio akumu mindi ye sumbi nílimu molio aulkamo akisindilimú. 'Karasi sika' ningu kuru mondoemele yomboma mindi Pulu Yemone 'yombo sumbi nilima' nimba kanolemo. <sup>10</sup> 'Na Karasi molemo mele paa pilipu, yu-kinia paa kopu sepo konopu seluna pupili sere leko molambili.' konopu lekero. 'Karasi kolopa lomboropa ola molopale tondolo se liltimu aku tondolomone na molopo sembó mele paa lipa tapondopili. Yu kolombando mindili norumu mele na yu-kinia pea kopu sepo mindili nambo. Kolombando konopumuni pilipa molorumu mele na aku sipu molambo. <sup>11</sup> Pe kamu kolombo kinia yuni na "Lomboroko ola molou." paa nipili.' konopu lekero.

3:12—4:1

*Pollone Nimble: "Yomboma Mélse Lingíndu Keru-Kuru Liku Lisiku Pulimili Mele Na Aku Sipu Mélse Limbundu Tondolo Mundupu Lisipu Puliu." Nirimu Ungu Se*

<sup>12</sup> Aku-sipa na-kolo 'Na i-sipu i-sipu molambo.' nikiru akumu 'u aku sipu moltoro.' nimbili naa nikiru. 'Ye paa peanga ulu-pulu-kiri naa pélimu molio.' naala nikiru. Karasini na 'molopo kondambo.' nimba na ambolorumumunga 'na aku sipu ulu akumu paa ambolambo.' nimbu kongono tondolo mundupu sepo molio. <sup>13-14</sup> Angokeme, 'Ulu akumu u ambolopo molio.' nimbu naa pilkiru. Aku-na-kolo ulu se sika sepo molio, akumu i-sipa: Yombomane mélse singí kinia lingíndu ningu taltolemele ówana 'Na u kumbi lepo lisipu pumbu liemboa.' ningu keru-kuru liku lisilimili mele na aku sipu 'Karasi Yesusini olionga nimba senderimumunga Pulu Yemone 'na konde molko kondoko mindi pani ou.' nirimu ulumu paa liembo.' nimbu na umbuna sipa ambololemo mélema wendo wendo lipu mundupu kelepo, mulu naa pilipu we méle lupama konopumuni naa pilipu ówa torumu ówana pumbúndu tondolo mundupu lisiliu.

<sup>15</sup> Olio Karasinga yombo pilipa kondoli molemoloma pali aku sipu nimbu pilipu molomulu liemu papu. Molo ononga yombo marene i nikiru mele 'Sika nikimu.' ningu naa pilku konopu lupa liengi liemu ono konopumane sika ungu pilingí mele Pulu Yemone lipa sumbi sindimba. <sup>16</sup> Aku-sipa na-kolo 'ulu peangama samili.' iseliu nimbu sepo molemolo mele mundupu naa kelepo paa kamu aku sipu tondolo mundupu sepo molamili.

<sup>17</sup> Ango-keme, onone pali nane selio mele manda manjiku seko molangi. Olio sepo molemolo mele mimi siku manda manjiku seko molemele yomboma mimi siku kanoko molangi. <sup>18</sup> U wale awisili nane onondo nimbili: "Yombo awisili Karasi kolorumu unju-peramo kinia opa-touma molemele. ,Kanu yombomane seko kinjilimili ulumane Karasi unju-perana olionga nimba kolondorumu tondolomo 'unguri naa selemo.' nilimili.," nimbu sirindu akumu kiniá kelepo kola sepo ono nimbu sikiru. <sup>19</sup> Ono 'kangikundu uluma ononga pulu yemo mele' ningu pilielememonga alieli molko kinjiku mindi puli kolea kirina pungí. Ono pipili kololemolá uluma kape ningu 'ulu peangama' ningu, mana-mélema mindi konopu kimbu siku molemele. <sup>20</sup> Aku-na-kolo 'olio mulu-koleana yomboma molemolo. Olio Lipa Tapondopa Mindili Nolemolá Aulkana Wendo Limú Ye, akumu Ye-Awili Yesusi Karasi, yu aku koleamo mundupa kelepa ombá.' nimbu konopu sipu nokopo molemolo. <sup>21</sup> Kanu yemo 'omba olio lipale nimbámone,, yunga tondolo pelemomone yu mélema pali topa mania mundupa yu ye awilimu molomba tondolo akumuni olionga kangi kirima topele tondopa yunga kangi paa peanga olandopa pulimú mele olio kangima simba.

## 4

<sup>1</sup> Akumunga, nanga ango-keme, na konopu mondopo 'Paa ono kanamboa!' nimbu kondo kolopo molio yomboma, na ono-kinia kongonomo serindumunga ona nanga méle kaloli namba peangamo molemememonga konopu sipu molio yomboma, nanga pulu lemó yombo konopu mondolioma, Ye-Awili Karasini aku sipa ono-kinia manda sembá kene pilkuli ono Ye-Awilimu munduku naa kelko tondolo munduku ambolko molangi.

4:2-9

*Pollone Pillipai Yomboma Ungo-Mane Simbando (4:2-3) "Ono Konopu Seluna Pupili Molko (4:4-7) Ye-Awilimu Kinia Konopu Siku (4:8-9) Ulu Sikama Kinia Ulu Peangama Kinia Mindi Konopumuni Pilku Molangi." Nirimu Ungo Se*

<sup>2</sup> Ambo Yoria kinia Sindiketolo, Ye-Awilimunga yomboma 'Molangi.' nimba pelemo ungu-manemo mele olo aku siku Ye-Awilimunga ambotolo molembele kene 'konopu seluna pupili molangili.' nimbu olo paa mawa sekero. <sup>3</sup> Sisikosi, 'nunga imbiungu pulumu pilkuli, kopu sepo pea kongono selembolo sikamo nuni ambotolo , 'Konopu selu pupili taka leko molangili.' ningu, liku tapondani.' nimbu mawa sekero. 'Yombomane semane peangamo piliangi.' ningu olo na-kinia pea kopu sepo kongono kála-sepo sepo molorumulu kene aku sani. Ye Killemene kepe yombo mare pea kopu sepo andopo kongono serimulula, aku yombomanga imbima konde molko mindi pungí yombomanga imbima molemo bokuna molemo.

<sup>4</sup> ,Ono Pillipai yomboma,, Ye-Awilimu kinia kopu seko molemele kene alieli konopu siku molaa. Kelepo nikiru. Konopu siku molaa.

<sup>5</sup> Ye-Awilimu ono molemelena nondopa ombá sekemo kene onone 'Yombomane seko kinjingí kinia ono popenge sepo iri topo tondolo mundupu mane naa sipu, yomboma taka lepo lipu tapondopo molemolo mele yombomane pali kanangi.' ninguaku siku seko molaa.

<sup>6</sup> Méle seluri kepe ono kele toko mini-wale naa mundaa. Ononga mélema kinia uluma kinia ononga konopuna umbuna pelemoma pali Pulu Yemo ningu para siku, yu-kinia ungu ningindu mawa sekole yu-kinia "Ange." ningu,aku siku seko molaa.

<sup>7</sup> Aku senge kinia Pulu Yemone ono konopu pe nili silimú ulumu, kanumu yombomane pilkuli manda naa pilielememle, kanu pe nilimuni Karasi Yesusi kinia kopu seko molangi ononga konopuma nokomba.

<sup>8</sup> Ungu se kamu niembo. Ango-keme, ulu paa peanga olandopa, yombomane kanokole konopu siku kape nilimili aku sipa uluma mindi konopu kimbu siku pilku molangi.

Ulu sikama kinia,  
yombomane kanoko peanga pilielemele ulu sumbi nilima kinia,  
ulu kalaro naa mololi uluma kinia,  
yombomane pilku peanga pilielemele uluma kinia,  
kanoko "Seko kondokono." nilimili uluma kinia,  
aku sipa uluma mindi konopu kimbu siku pilku molangi. <sup>9</sup> Nane ono mane siliu pilieringi mele kinia, ulu selioma pilku kanolemele mele kinia, aku uluma ono alieli seko molangi. Aku senge kinia 'Ono konopu pe nipili taka leko molangi.' nilimú Pulu Yemo ono-kinia molomba.

**4:10-20**

*Pillipai Yombomane Mélema We Siku Mundoringimunga Pollone Konopu Sipa "Ange." Nirimu Ungumu*

<sup>10</sup> Na Ye-Awilimunga yemo molopole onone na kondo kolko liku tapondoringi mele talko kelko seringimunga paa konopu sikiru. U sika, 'Lipu tapondamili.' niringila na-kolo liku tapondonge aulka se naa lierimu. <sup>11</sup> Na mélema mólo tokomo-na naa nikiru. Ulu lupa lupa kiri peangama na-kinia wendo olemo kinia 'Unguri mólo. Aku uluma mandala.' nimbu konopu kimbu sipu pilipu naa molio. <sup>12</sup> Na wale mare méle mólo tolemo mele kepe, wale mare méle awisili ambololio mele kepe pilipu molio. 'Aku-na-kolo,' na kere-langi awisili lemó walema kepe gele lemó walema kepe, mélema mólo tolemo kinia kepe méle awisili taltolio kinia kepe, ulu kiri peanga aku sipama pali na-kinia wendo olemo kinia 'Unguri mólo.' nimbu konopu awisili kimbu naa siliu ulu-pulumu na pilielio. <sup>13</sup> 'Karasini, na tondolo silimú aku tondolomone na uluma pali manda selio.

<sup>14</sup> Akumu sika na-kolo ono na-kinia kopu sepo nanga umbunama talko meringi akumu papu. <sup>15</sup> Ono Pillipai yombomane pilielemele, nane u pulu polopo semane peangamo topo silipu andopole ono moloringina ombo topo sirindu pilieringi kinia pe ononga kolea Masedonia poropinji mundupu kelepo kolea lupa marenga purundu kinia onone mindi na liku tapondoko kou-mone mare siku mundoringi liltindu. We Karasinga yombo talape lupa marene naa siringi. <sup>16</sup> 'Kolea Masedonia poropinji u mundupu naa kelepo, kolea-awili Tesallonaika pumbu molorundu kinia kepe 'Na mélse mólo naa topili.' ningu wale mare ono Pillipai yombomane liku tapondoko mélema siku mundoringila. <sup>17</sup> 'Na mélema we siengi.' nimbu mawa sepo naa nikiru. 'Na liku tapondoko mélema we singímunga 'Pulu Yemone, ono méle peangama olandopa simba lingí, aku-kinia na konopu simbú.' nimbu aku sipu nikiru. <sup>18</sup> Akumunga, mélema pali síngimunga pepámo i topo sikiru. Mélema siringi liltindu akuma na mólo torumu mélemanga olandopa siringi liltindu. Kiniá onone méle siku mundoringi mélema Epapodaitasini mendepa orumu-na liltindumunga na méle paa awisili taltolio. Aku mélema síngi, olio Pulu Yemo popo topo méle kalopo silimuluma Pulu Yemone muna pilipa peanga pilipa limú mele aku sipa kanu mélema popo topa kaloli mélema mele yuni kanopa peanga pilielemo. <sup>19</sup> Karasi Yesusini ononga nimba senderimu, yunga yomboma molemelemonga, nanga Pulu Yemone méle peanga awisili taltolemo mélemanga mare 'ono méle mólo tolemoma pali taltangi.' nimba simba.

<sup>20</sup> Alieli olionga Lapa Pulu Yemonga imbi ambolopo paka tondopo yu kape nimbu mololipu mindi pamili. Sika aku samili.

**4:21-23**

*Pollone Pepámo Topa Pora Simbando "Ono Molko Kondaa." Nirimu Unguma*

<sup>21</sup> Ono Karasi Yesusinga yomboma pali nane “Ono manda molemeleye?” nikiru. Na kinia pea molemolo genupilimane kepe “Ono manda molemeleye?” nikimilila.

<sup>22</sup> Pulu Yemonga yomboma pali, Romo Gapomano Ye Paa Awili Kumbina Sisamongaulkana pelemele yomboma kinia pea, onone “Ono manda molemeleye?” nikimilila.

<sup>23</sup> Ye-Awili Yesusi Karasini ononga minima we kondo kolopa molopili molangi. Aku sipa sepili.

„Aku pea nikiru.„

## KOLLOSI Pollone KOLLOSI Yomboma Pepá Topa Sirimu Bokumu

*Pollone I Pepá Topa Sirimumunga Ungu-Pulu Mare*

Pollo kinia yuni pepá topa sirimumanga ungu-pulu mare inia yakondo gomo 676 molemo.

‘Pollo u-pulu-pulu kolea-awili Romo ka siku ulka senga pepili ami-yemane nokoringi kinia i pepámo kinia Epesasi, Pillipai, Pillimono kinia pea torumu.’ ningu pilielemele (Lipa Mundorumu Yema 28:16-31).

**Kollosi** akumu Esia poropinji lierimu taono awili se (gomo 628 pikisana kanou). Akumu Epesasi taono nondopa lierimu-na-kolo Pollo yuyu akuna naa purumunje. Semane se naa molemo. Epesasi taono molopale ye mare **Kollosi** akuna “Semane toko siengi paa.” nimba lipa mundorumunje. Ye Epaparasini unguma nimba sirimu mele **Kollosi** 1:7-8 molemo. U-Korini 16:19 molemo ungu akumu **Kollosi yombomando** nirimulanje?

I pepámo Pollone nambi semu-na topa sirimunje? Ye marene kolo toko mane siringi mele Karasinga yomboma pilku lombili puringi mele pilipale pepá topa sirimu. **Seko kinjeringi mele i-sipa:** **Se:** Pulu Yemonga yomboma molongendo kere-lang mare kinia no kinia walema kinia kangi kopiseli ulumu kinia u Mosisini mane sirimu mele pilku liku seringi mele Pollone ‘naa piliangi.’ nirimu (2:16-17, 2:11, 3:11). **Se:** Kolo toko ‘Mélema naa ambolko, naa nongo piliangi, mólo.’ ningu mane siringi (2:21,23). **Se:** Angelloma popo toko imbi ambolko paka tondoringi (2:18). **Se:** Karasi toko mania mundoringinje. Pollone Karasi tondolo mundupa kape nirimu (1:15-20, 2:2-3,9). **Se:** Kolo toko ‘Ungu mare lopi serimu.’ niringi akumu Pollone nimbale: “Karasi kinia pea mindi pilipa kondoli ungu lopi selima pelemo.” nirimu (2:18, 2:2-3). **Se:** ‘Mana-yombomane pilipa kondoli pelemo unguma kinia mana-yombomane ulu-pulu seringi mele kinia pilipu samili.’ niringi. Pollone aku siku pilku aku siku seringi mele ‘Paa manda mólo.’ nirimu. ‘Manda molamili.’ ningu Karasi mindi pilku, Karasi mindi pea molangi.’ nirimu. Yu Pulu Yemo mele molopa, yu mindi mélema kinia ungumanga kinia paa olandopa (1:15,16,17,18,19, 2:9, 1:20-22, 2:10). ‘Kolo toli ungumane naa lipa tapondolemo.’ nirimu (2:8, 2:23).

Ya ungu-pulumu pora nikimu.

1:1—3:4

## **Karasi Mélemanga Pali Ye-Awili, Pulu Yemonga Konde Mololi Ulu-Pulumu Kinia Uluma Pali Yu-Kinia Pelemo Ungu Mare**

1:1-2

*Pollone Pepámo Tombando Pulu Polopa Torumu Unguma*

<sup>1</sup> Na Pollo, Pulu Yemone na nimba taltorumu-na Karasi Yesusini “Nanga kongonomo sende-pu.” nimba lipa mundorumu yemo, na kinia olianga ‘Karasinga ungumu pilieli, genu Timoti pea molopole i pepámo topo sikiru. <sup>2</sup> Ono Pulu Yemonga yombo kolea-awili Kollosi pelelemele, ono Karasi kinia kopu seko molemele-na yu ‘Sika.’ ningu kuru mondoko ambolko molemele genupilima i pepámo topo sikiru.

Olionga Lapa Pulu Yemone ono we kondo kolopa, ‘Ono konopu pe nipili takat leko molangi.’ nipili.

1:3-14

*(1:3-8) Pollone Kollosi Yomboma Yesusi 'Sika.' Ningu Kuru Mondoringi Mele Pilipale Pulu Yemo Kinia 'Ange.' Nimba (1:9-14) Ononga Nimba Pulu Yemo Mawa Sendepa 'Tondolo Pupili Molangi.' Ni.' Nirimu Ungumu*

<sup>3</sup> Oltone Pulu Yemo, olionga Ye-Awili Yesusi Karasinga Lapa, yu-kinia ungu nimbu mawa sendelembolo kinia alieli "Ange." nilimbulu. <sup>4</sup> Ono Karasi Yesusi 'Sika.' ningu kuru mondolemele mele kinia, Pulu Yemonga yomboma pali konopu mondolemelemonga aku selembolo. <sup>5-6</sup> Semane peanga, akumu ungu sikamo, ono moloringina orumu kinia, méle Pulu Yemone 'ononga' nimba, nimba taltopa mulukoleana taltondorumu lemó, 'Akumu sika.' ningu pilku 'Akumu paa liemili.' ningu nokoko molemele. Pe aku nokoko molemele ulumuni ono 'Sika.' ningu kuru mondolemele ulumu kinia konopu mondolemele ulumu kinia 'Ono liengi.' nirimu. Ono u-pulu-pulu semane peangamo pilku Pulu Yemone ono we kondo kolorumu ungu sikama pilkuli akumunga pulumu paa pilku kondoringi kinia yandopa aku semane peangamone ono sepa kondopa ulu peangama 'wendo wendo opili.' nilimú mele ma-koleamanga pali aku sipa ulu peangama 'wendo wendo opili.' nilimú. <sup>7</sup> Pulu Yemone ono we kondo kolorumu semane peangamo, ye Epaparasini ono u nimba sirimu-na pilieringi. Kanu yemo yu olio pea kopu sepo kendemande sepo molemolo yombomanga ye se, olio konopu mondolemolo yemo. Yu 'olionga kongonomo sendambo.' nimba Karasinga kongono sendélimu paa ambolopa kondopa siye naa kololemo yemo. <sup>8</sup> Ononga konopumanga Mini molemomone ono lipa tapondorumuna konopu mondolemele mele kepe Epaparas yuni olio nimba sirimu.

<sup>9</sup> Akumunga, ono-kinia aku sipa uluma wendo orumumunga u-pulu-pulu pilierimbulu kinia yandopa alieli Pulu Yemo kinia ononga nimbu mawa sendepole, "Pulu Yemone 'Sangi.' nimba pilipa molemo mele ono paa pilkuli, akumunga ungu-puluma paa piliangi kene Mini Kake Sélimu ononga konopumanga molopa pilipa kondolimu sipili." nilimbulu. <sup>10</sup> "Aku siku pilku seko molcole, Ye-Awilimuni ono kanopa peanga piliepili kene yunga yomboma seko molemele mele aku siku seko molko, ulu peanga lupa lupama awisili seko, Pulu Yemo molemo mele kinia, nilimú unguma kinia, pilku molemele mele paa olandopa pupili." nimbu mawa sendelembolo. <sup>11-12</sup> "Ono, umbuna pemba kinia mini-wale naa munduku, 'Umbuna walema pora nimbá.' ningu taka leko nokoko molangi kene Pulu Yemo tondolo paa olandopa pulimúmanga yuni 'Ono enge nipili molangi.' nimba ono tondolo lupa lupama sipili. 'Yunga yombomanga' nimba yu ye nokoli kingimu molopa nokolemo kolea pa sélimunga méle taltondolemoma ono Kollosi yombomanga kepe pea taltondolemo lingí aulkamo akisinderimu ye, akumu ononga Lapamo, yu-kinia paa konopu siku 'Ange' niengi." nimbu Pulu Yemo ononga mawa sendelembolola. <sup>13</sup> "Yuni olio lipa tapondopa simbulu tolimu yu kingimu molopa nokolemo tondolomonga wendo lipa, yunga konopu mondolemo Malone nokolemo tondolomonga sukundu lipa mondorumu kene 'aku siku sangi.'" nimbu mawa sendelembolo. <sup>14</sup> Yunga Malo akumu (yunga meme ondondorumumuni) olionga ulu-pulu-kirima 'Kamu mania pupili.' nimba siye kolopa, olio ka sipa ambolorumu aulkana wendo lipa 'We manda molangi.' nirimu yemo.

**1:15-23**

*Karasi Yu Molopa Ulu Selemomanga Pali Yu Olandopamonga Ungu Se*

<sup>15</sup> Pulu Yemonga Malo Karasi akumu,  
Pulu Ye naa kanolemolomo none seli yemo.

Pulu Yemo molemo mele  
Malo yu mona molemo kanolemolo.

Mulu ma mélema u wendo naa opili yu u molorumu,  
mélemanga pali yu ye nokoli olandopamo molemo yemo.

- 16 Malomo aku sipa yemo molemomonga pulumu i-sipa:  
 Muluna gilimú mélema kinia mana lemó mélema kinia,  
 kanolemolo mélema kinia naa kanolemolo mélema kinia,  
 aku méle Pulu Yemone 'Sepo wamambo.'  
 nirimu mélema pali Malonga kimuni serimu.  
 Tondolo pelemo kuruma kinia,  
 mulu-koleana yombo namba molemo yombo awilima kinia,  
 imbi paa olandopa molopa  
 méle awisili nokolemelema kinia,  
 enge nilima kinia,  
 aku méle paa enge nilima muluna kinia  
 mulu-koleana kinia molemelema pali kepe  
 méle mongone kanolemolo mélema pali pea  
 yunga kimuni serimu.  
 Mélema paa pali Malone mindi sepa wamorumu.  
 'Aku mélema yunga mindi liepili.  
 Yunga imbi ambolko paka tondangi.' nimba aku mélema  
 serimu akumunga yu aku sipa yemo molemo.
- 17 Mélemanga pali yu kumbi lepa molorumu;  
 mélema pali yunga engemone wendo orumu;  
 pe kiniá Karasi yunga engemonela mélema pali  
 wendo olemo.
- 18 Karasinga talape yomboma yunga kangimu;  
 Karasi yu kangimunga pengemo.  
 Yu yunga kangimu konde molemomonga ulu-pulumu.  
 Yu mélemanga pali kumbi lepa molemo yemo,  
 'Yu mélemanga pali ye nokoli awilimu molopili.'  
 nimba ,yu kolorumu kinia, Pulu Yemone yu  
 topa makisinderimu-na  
 yu kumbi lepa lomboropa ola molorumu yemo molemo.
- 19 Pulu Yemo yuyu molopa selemo mele 'aku sipa  
 ulu-puluma Malo-kinia pepili.' konopu lierimu-na  
 Pulu Yemo yuyu sengepea sepa pelemo mele  
 Malo-kinia aku sipa pelemo,  
 'Pulu Yemonga Malo, Lapa molemo mele molemo.'
- 20 Pulu Yemone 'Mulu ma mélema pali yu-kinia konopu  
 seluna pupili, manda selu sипу molamili kene  
 Malone aku sembá aulkamo akisinddepili.' nimba pilipale  
 Karasinga mememo unju-perana ondorumumuni  
 Pulu Yemone olio-kinia opa-tou molorumulu ulu-pulumu  
 kamu topa mania mundorumu.
- 21 Aku senderimu nikirumuni ono lipa sere lendelemo. U onone ulu-kirima seko  
 ononga konopumane yu-kinia opa-tou moloringimunga Pulu Yemo kinia sulu seko  
 moloringi. 22 Aku-sipa na-kolo kiniá 'Malo Karasinga, kangimu toringi kolorumu aku  
 ulumuni Pulu Yemone ono yu-kinia 'konopu seluna pupili nondoko ongo molangi.'  
 nirimu. 'Ono yunga yombo kake selima molko, kalaro se naa pepa, yuni kanopa kiri  
 pilielemo ulu se naa pepili yu molemona ongo molangi.' nimbale aku serimu. 23 Aku-  
 sipa na-kolo 'Karasi, 'Sika.' ningu kuru mondoringi mele kuru mondoko, 'Karasi  
 ononga ulka simu mele.' ningu yu tondolo munduku ambolko siye naa kolangi. Aku  
 sengi liemu 'yuni molonge mele nikimu aku siku molonge.. Semane peangamo u-  
 pulu-pulu pilieringi kinia 'Sika.' ningu kuru mondoko kanu semanemone wendo

ombá mele kinia ono molonge mele kinia nilimú ‘aku sipa mele olio-kinia paa wendo opili.’ ningu konopu siku nokoko moloringi mele ulu umbuna se wendo ombá kinia siye kolonge kene mimi siku kanoko molaa. Kanu semane peangamo ma-koleamanga pali toko siringi, ono pilielemele semanemo. „Karasini, na Pollo ‘Kanu semane peangamonga kendemande-yemo molani.’ nirimu-na molio.

**1:24—2:5**

*Pollone Karasinga Yombo Talapemo Kollosi Molemelema Mindili Sipa Lipa Tapon-dorumu Semanemo*

<sup>24</sup> Pe kiniá na ono lipu tapondombondo mindili noliomonga konopu sikiru. Karasinga kangimu, akumu yunga yombo talape kanumu, yuni ononga nimba lipa tapondopa mindili norumu mele mindili mare we pelemo akumu na yunga talapemo ‘lipu tapondambo.’ konopu lepo „Karasi mindili norumu mele, nanga kangina mindili nombo manda sendelio.” <sup>25</sup> Pulu Yemone ‘na Karasinga talape yombomanga kendemande-yemo molopili.’ nimba ononga nimbu lipu tapondombo kongono se sirimu. Aku kongonomo ‘Ono Pulu Yemone nilimú unguma sumbi siku pilku, akumunga ungu-puluma pali paa piliangi.’ nimbu, nimbu simbú kongonomo. <sup>26</sup> Paa koronga-u walemanga pali Pulu Yemone i ungumu lopi serimu yomboma pali naa pilieringi, aku-na-koło kiniá ‘yunga yomboma piliangi.’ nimba, nimba para silimú. <sup>27</sup> I ungu lopi serimu ungu ‘akumu paa peanga olandopa, Juda yombo naa molko yombo-lupa molemelema paa manda lipa tapondomba mele yunga yombomane pali piliangi kene mona liepili.’ nimba, Pulu Yemone nimba para sirimu. Aku ungu lopi serimumu i-sipa: Karasi yu ono-kinia molemo. Yu ono-kinia molemomonga yuni ‘ono Pulu Yemo mulu-koleana tondoloma kinia pea pepili molemo akuna kopu sepo molamili lipu membo pumbú.’ nirimu-na pilkuli ‘Sika.’ ningu konopu siku nokoko molemele kanumu.

<sup>28</sup> I nikiru ye Karasi akumuni selemomo yomboma semane topo nimbu silimulu. ‘Ono Karasi kinia pea kopu seko molko yunga yombo konopu tondolo peli yombo yuma molonge kinia membo pumbu „Pulu Yemo, siemili.’ nimbu, pilipa kondoli pelemomone yomboma mimi sipu liepi-liepi topo mane silimulu. <sup>29</sup> ‘Aku sambo.’ nimbu yuni na enge sipa tondolo mundupa lipa tapondolemo ulumane pali tondolo mundupu kála-sepo kongono selio.

## 2

**2:1-5**

*Karasinga Ungumu ‘Sika.’ Ningü Kuru Mondoko, Kolo Toli Unguma Pilku Mokoli Sengemonga Ungu Se*

<sup>1</sup> Ono kinia, Karasinga yombo talape LLadosia taono molemele yomboma kinia, koleamanga pali yombo na naa kanolemele yomboma kinia, ono ‘Paa lipu tapondambo.’ nimbu kála-sepo kongono sendelio mele ‘ono piliangi.’ konopu lekero. <sup>2</sup> ‘Ono konopu tondolo pupili molko, anju yando konopu mondonge ulumuni ono lipa sere lendemba kinia ono „Karasinga, ulu-puluma pali mimi siku pilkuli ‘Sika.’ ningu kuru mondolemele mele kamu alieli-alieli aku siku olandopa pilku molangi.’ nimbu na paa kála selio. Aku siku pilkuli Pulu Yemonga ungu lopi sepa pelemomonga ono piliangila.’ nimbu na kála seliola. Aku lopi sepa pelemo ungumu Karasi yu. <sup>3</sup> Pilipa kondoli ulu-puluma kinia, konopumane pilielemele ulu-puluma kinia, aku ulu-puluma Karasi yu-kinia lopi sepa pelemo. Akuma kou-mone mele bengena sengepea sepa lemó mele yu-kinia aku sipa pelemo. <sup>4</sup> ‘Yombo marene onondo kolo toko ungu peanga mare ningu kondi tonge.’ nimbuli i ungumu ono nimbu sikiru. <sup>5</sup> Na ono-kinia naa molio-na-koło ‘ono-kinia molio.’ konopu lepo, ono kopu seko tondolo

munduku kongonoma sumbi siku seko Karasi 'Sika.' ningu kuru mondoko siye naa kololemele mele nanga konopumuni kanopole lakopo konopu siliu.

**2:6-23**

*Karasi Kinia Pea Kopu Sepo Molemolomonga We-Mana-Yombomane 'Saa' Ningu, Ningu Panjilimili Ungu-Manemane Olio Naa Nokolemomonga Ungu Se 2:6-15*

*Olio Karasi Kinia Pea Kopu Sepo Molopo Konde Molopa Kondoli Ulu Sikamo Limulú Ungu Se*

**6** Pe kiniá 'Karasi Yesusi olionga Ye-Awilimu molopili, pea molamili konopumanga opili.' niringi mele yu kinia pea kopu seko molangi. **7** Unju se 'tondolo mundupa gilimbando, yunga pulkonioma mana mania mundulimú, ulka se , 'tondolo pumba giliepili.' ningu, simu enge nili se pololemele, ono 'aku sipu tondolo mundupu giliamili.' ningu unjumu mamo kinia kopu sepa gilipa ulkamo simu kinia kopu sepa gilimú mele ono Karasi kinia aku siku kopu seko gilku, olione ono mane sirimulu unguma 'Sika.' ningu kuru mondoringi mele olandopa kuru mondokole, aliel Pulu Yemo kinia 'Ange.' niengi.

**8** 'Yombo sene 'yunga konopumuni pilielemo mele ono aku siku mele paa konopumane pilku molangi.' nimba we-unguma kolo topa ono nimba simba.' ningu kanoko kondoko molangi. Anda-kolepalimane u mane siringi yandopa pilieringi mele kinia, ma-koleamanga pali nokolemele kurumanga unguma kinia, kanu yombomane pilkuli ono ningu silimili. Karasinga konopumuni pilielemo unguma naa pilku ningu silimili.

**9** Karasi mana-ye au lierimu kinia Pulu Yemo yuyu molopa selemo mele aku sipa ulu-pulumu Karasi yunga kangina pepa sengepea selemo mele ono pilielemele kanumu. **10** Akumunga, aku yemo Pulu Yemo molopa selemo ulumu yu-kinia pelemo akumu ono yu-kinia kopu seko molemele kinia Pulu Yemone ono kepe silimú ono-kinia sengepea sepa pelemóla. Kanu ye Karasimu yu muluna kuru enge nilima kepe, aku méle namba pelemo-na mélema nokolemelemanga pali, yu ye olandopamo molemo.

**11** Ono yu-kinia ongo kopu seko moloringi kinia kangi se kopisiku wendo lili ulu-pulumu ono sirimu litingi. Aku kangi se kopiseli ungu sirimumu yombomane kangikundu selemene akumundu naa nirimu. Karasini senderimu ulumuni olio kangi se kopisipa wendo lili ulumu liltimulu, akumu olio ulu-pulu-kiri serimulumanga u-we-konopumanga tondoloma mania purumu. Aku ulumu kangi se kopisipa wendo lili ulu sikamo. **12** Ono no linderingi kinia Karasi kinia pea ono 'koloringi, óno seringi kanumu. Pe ono 'Sika Pulu Yemone yunga tondolomone Karasi topa makisinderimu.' ningu kuru mondoringimunga Karasi topa makisinderimu Pulu Yemone ono no litingi kinia Karasi kinia pea topa makisinderimula.

**13** Ono u-we-konopuma pepili ulu-pulu-kirima seringi kinia kepe, ono Juda yomboma naa molko yombo-lupama moloringimunga Pulu Yemonga ungu-manemane ono naa nokorumu kepe, aku ulutolone ono topa kondorumu, yombo kololima mele moloringi, aku-na-kolo Pulu Yemone 'Ono Karasi kinia pea konde molangi.' nirimu. Yuni olionga ulu-pulu-kirima siye kolopa 'Kamu mania pupili.' nimba, **14** Mosisini Pulu Yemonga ungu-manema bokuna torumumane oliondo aliel 'Seko kinjilimili.' nilimú ungu-manema olio tondolo mundupa nokorumu tondolomo 'Olio kotena unguri naa sendepili. Kamu mania pupili topo mania mundambo.' nimba 'Pulu Yemone, aku ungu-mane,ma lipa Karasinga, unju-perana pirimuni uku topa panjerimu. **15** Mulúna kuru enge nilima kepe, aku méle namba pelemo-na mélema nokolemelema pali ononga tondoloma unju-perana 'kolorumumunga, topa

mania mundupa, ‘ ‘Kurumanga enge se naa pepa kamu mania purumu lémo.’ ningū kanangi.’ nimba ono lipa ora sirimu.

*2:16-23*

*Karasi Kinia Pea Kolorumulumunga We-Ungu-Manemane Olio Naa Lipa Tapon-dolemo Ungu Se (2:6-23 pali)*

<sup>16</sup> Yuní aku serimu, kene ‘Yombo sene olio kere-langí nombo no nombo wale kake selimanga uluma sepo, oli ke tolemo kinia uluma sepo, koro mololi wale Sambatemanga uluma sepo, aku ulumanga yombo sene semolo mele apurupa ungu-mane se naa nimba panjipa, iri topa “Seko kinjikimili.” ni naa nipili.’ niengi. <sup>17</sup> Ulu akuma ‘Sangi.’ ningū u ungu-manema ningū panjeringi akuma pe wendo ombá ulu se manda manjiku aku uluma seringi. Aku ulumanga sika ulumu Karasi-kinia pelemo.

<sup>18</sup> Yombo se kaima sepa kanolemo mélema semane topa yu yuyu ‘Konopu siembo kene nanga imbi ola naa molopili molambo.’ nimba kolo topa, angellomanga imbima ambolopa paka tondopa kape nilimú yombo sene ‘Aku sipu seliomonga na nanu pilipa kondoli olandopa pelemo.’ nimba “Ono selemene mele seko kinjilimilimunga Pulu Yemone ono méle naa kalomba lingí.” nimbá kinia yunga ungumu naa piliangi. Kanu yombomo yu yuyu yunga u-we-konopumuniaku sipa pilipa yuyu imbi ambolopa paka tolemo. <sup>19</sup> Kanu yombomo yu Karasi kinia sere leko naa molembele, lupa-lupa molembele. Olio Karasinga kangimu, yu kangimunga pengemo. Pengemone kimbu ki kangi mélemanga pali nokopa, bele pulkonio mélema pali ‘enge nipili.’ nimba kere-langí silimú, aku sipa mele Karasi olionga pengemone olio yunga kangimu yu-kinia lipu sere lepo molemolo kinia aku selemo. Aku selemomonga Pulu Yemonga engemone ‘Karasinga, kangimu sepa awi silimú.

<sup>20</sup> Ono Karasi kinia pea kolkole ma-koleana uluma kamu siye koloringi, seluna manda naa molongemonga nambi semu-na kiniá ono ya ma-koleana yomboma mele molko ma-koleana ungu-manema pilku liku seko molemeleye? <sup>21</sup> Ungu-manemane ‘kere-langí mare kinia no mare kinia akumando, “Naa ambolaa!” nimba, “Naa naa!” nimba, “Kini simbi naa tondangila.” nilimú aku ungu-manema mele nambi semu-na pilku liku selemeneleye? <sup>22</sup> Aku ungu-manema pali mana-yombomane mindi konopumane pilku “I-siku saa. I-siku saa.” ningū ungu-mane silimilimunga aku ungu-manemane “Pilku saa.” nilimili mélema kinia ulu mare selemene kinia waltikele kamu kiri lepa mania pulimú. ‘Kanu mélemene ono lipa tapondomba ulu se naa pelemo.,’ <sup>23</sup> Kanu ungu-manemane ‘olio imbi naa molopili molamili.’ ningū, mélema kape ningū imbi ambolko paka tondoko, ‘olionga kangima mindili nopili.’ niengi.’ ningū ulu mare aku siku selemene mele kanokole ‘aku ungu-manema pilipa kondoli paa pepa peanga lemó.’ sika nimbu kanolemolo-na-ko lipa u-we-konopumuni ulu-kirima mindi pilipu ulu-pulu-kirima mindi yakala kololemo uluma ‘Topo mania mundamili.’ nimba lipa tapondomba ungu se kanu ungu-manema kinia paa naa pelemo.

### 3

*3:1-17*

*Ulu Kake Selima Sepo Molomolo Mele Ungu-Mane Mare 3:1-4 Karasi Pea Lomboropo Ola Molorumumunga Ungu Se*

<sup>1</sup> Pulu Yemone ono Karasi kinia pea topa makisinderimu kene Karasi wi ola Pulu Yemonga ki-lomekondo molemo koleamonga uluma mindi konopumane pilku yakala kolko molangi. <sup>2</sup> Mulu-koleana mélema mindi paa konopu kimbu siku, ma-koleana mélema konopu naa kimbu siku molaa. <sup>3</sup> Ono ‘ononga u-we-konopuma kinia, pea Karasi kinia kolkole yu pea ‘lomboroko ola moloringi, kiniá konde molemelemonga Karasi yu mulu-koleana Pulu Yemo kinia pea seluna kopu seko molembele naa

kanolemolo mele ono aku siku olo kinia pea seluna kopu seko molko paa sika molonge mele u naa kanolemele kene ,aku siku mulu-koleana mélema mindi konopu kimbu siku molaa,. <sup>4</sup> Ononga sika molemele ulu-pulumu Karasi yu, akumunga yu omba mona gilimba kinia ono yu kinia pea molko, tondolo pa selemo koleana yu ye awili olandopamo molopa méle tondoloma taltopa mélema nokolemo koleana yu kinia pea kopu seko molonge.

*3:5—4:18*

## **Karasi Olionga Konopumanga Sukundu Molopa Olio-Kinia Kopu Sepa Molemomonga Olio Yombo Kondema Molemolo Ungu Se**

*3:5-11*

*Olio Yombo Kondema Molopole Naa Semolo Mele Ungu Se (3:1-17 pali)*

<sup>5</sup> Akumunga, ononga u-we-konopuma Karasi kinia pea kolkole yu pea lomboroko ola moloringi, kene mana-ulu ononga konopumane pilkuli sengendo yakala kololemele uluma toko mania mundaa! Ulu akuma i-sipa:

Wa ulu-kirinale seli ulu-pulumu kinia,  
we-mélema kinia kepe ulu-kirinale sengendo  
alieli konopu kimbu siku molemele ulu-pulumu kinia,  
ambomané ye peangama kanoko 'Pea kopu sepo  
andolembolánje peanga.' ningu yakala kolko,  
yemane amboma kanoko yakala kolko  
aku siku seli ulu-pulumu kinia,  
yombo lupamanga mélema yama meli ulu-pulumu kinia,  
aku uluma.

Yombo lupamanga mélema yama melemele mele kinia,  
kuruma kinia pulu ye kolo tolima kinia popo toko  
kafe nilimili mele kinia,  
aku ulutolo selu-sipa mele.

<sup>6</sup> Aku ulu-pulu-kirima selemelemonga Pulu Yemone yomboma mumindili kolopa tomba walemo yunga ungu-manema pilku mokoli selemele yomboma molemelena wendo ombá okomo.

<sup>7</sup> We-mana-yomboma seko molemele mele u ono Karasinga Kollosi yomboma kepe Karasi naa pilku molkole aku siku ulu-kirima mindi seko moloringi.

<sup>8</sup> Aku-sipa na-koło kiniá 'Aku uluma naa samili.' ningu we siye kolaa.  
Yombo mumindili kololi ulu-pulumu kinia,  
yombo iri toli ulu-pulumu kinia,  
yombo pilku kiri pilieli ulu-pulumu kinia,  
'Yomboma pipili kolko molko kinjangi.' ningu  
koloko toko ungu-bulkundu nindeli ulu-pulumu kinia,  
'Tawe sangi.' ningu ungu kiri nili ulu-pulumu kinia,  
aku ulu-puluma siye kolaa.

<sup>9-10</sup> U-we-konopuma kinia aku konopumane pilku seringi uluma kinia siye kolko, 'Yombo kondema molamili.' ningu Karasi liltingimunga ono yombo kondema sepa wamorumu-Pulu Yemone ono konopu kondemo lipa panjinderimu, yandopa-yandopa 'yu molemo mele ono olandopa-olandopa pilkuli aku siku molangi.' nimba aku selemo kene anju yando kolo naa taa.

<sup>11</sup> 'Pulu Yemone yuyu yombo kondema pea pali sepa wamolemomonga, olio yombo kondema mele molemolo yomboma selu-sipu molemolo. Juda yombo naa molemelema lupa, Juda yomboma lupa mólo; yombo kangi se kopiseli yomboma lupa, kangi se naa kopiseli yomboma lupa mólo; kewa yomboma lupa, umbu yomboma

lupa mólo; ,yombo kamakoma lupa, yombo koropama lupa mólo;, méle kalólimu naa liku kongono we sendeli kendemande yomboma lupa, we molemele yomboma lupa mólo. Karasi yu olionga pali olandopa molemo; yu olionga pali konopumanga molemo, akumunga olio yombo lupa lupa manda apurupu naa nimbu naa kanomolo. Olio pali selu-sipu molemolo.

**3:12-17**

*Yomboma Kondo Kolomolo Uluma Lipu Ambolopo Karasinga Unguma Olio-Kinia Pepili Molamili Ungu Se (3:1-17 pali)*

<sup>12</sup> Akumunga, ono Pulu Yemone 'Nanga yomboma molangi.' nimba, nimba taltorumu yombo konopu awili-sepa mondopa, 'konopu kake sepa peli yomboma' nimba kanolemo yomboma molemele kene

yombo lupama kondo kolko liku tapondoko,  
ononga imbima ambolko paka naa toko,  
yomboma-kinia kara naa pungu pangu ning  
taka leko molko,  
olo taka lieli pepili molko,  
aku siku seko molangi.

<sup>13</sup> Ononga genu sene ono sepa kinjipa ulu sepa mumindili kondoli ulu se sembá kinia ono yundu ungu se naa ning, siye kolangi. Ono Pulu Yemo seko kinjeringi ulu-pulu-kirima yu 'Mania pupili.' nimba we siye kolorumu mele ono aku siku seko kinjingí uluma 'Mania pupili.' ning we siye kolangi.

<sup>14</sup> Aku-sipa na-kolo aku ulu-pulu peanga nikiru ulu-pulumanga pali konopu mondoli ulu-pulumu paa olandopa pelemo kene yomboma tondolo munduku konopu mon-dangi. Aku senge kinia aku siku ulu-pulu peanga lupama pali we sumbi siku seko paa manda selu siku molonge.

<sup>15</sup> Karasinga yomboma kinia konopu seluna pupili manda selu siku molopo konopu pe nili ulu-pulumu Karasini silimú aku ulu-pulumuni 'Ono aku siku taka leko konopu peanga leko molangi.' nimba ombo nokopili. Kangi selumunga kimbu ki mélema lupa lupa gilimú-na-kolo kangi selumu mindi gilimú aku mele ono yomboma pali selu mele molemele. Ono aku siku molkole Pulu Yemone "Ono anju yando konopu seluna pupili manda selu siku molangi waa." nirimu. Akumunga, Pulu Yemo-kinia alieli "Ange." ning molangi.

<sup>16</sup> Karasinga unguma ononga konopumanga paa sengepea sepa pepili molangi. Aku siku molkole ono pilipa kondolimu pepili onone yomboma ungu-mane siku, yomboma ulu kiri peangama pali senge mele 'Pilku kondangi.' ningu siku; Pulu Yemone ononga nimba senderimu sendelemomonga yu-kinia "Ange." ningíndu Pulu Yemonga bokuna molemo konanema kinia, makuna sukundu konane nilimili konanema kinia, Mini Kake Sélimuni ononga konopumanga nimba silimú pilielemele konanema kinia, niengi.

<sup>17</sup> Unzu ning uuluma seko kongono senge ulu akuma pali sengendo 'I ulumane Ye-Awili Yesusinga imbi ambolopo paka tondamili.' ningu aku uluma seko, Lapa Pulu Yemo kinia "Ange." ningíndu Ye-Awili Yesusi yuni ononga nimba senderimumungu Lapa Pulu Yemo kinia "Ange." niengi.

**3:18—4:1**

*Olionga Ulkamanga Sukundu Anju Yando Semolo Mele Unzu Se 3:18-21 Karasinga Ambo Yema Kinia Bolangoma Kinia Molonge Mele Unzu Se*

<sup>18</sup> Ono amboma, ononga emenali yemanga unguma taka leko pilku liku molaa. Aku ulumu Ye-Awilimuni kanopa peanga pilielemo ulu-pulu se kene aku saa.

<sup>19</sup> Ono yema, ononga amboma konopu mondoko, amboma seko mumindili naa kondoko iri naa tangi.

<sup>20</sup> Bolangoma, ono aminieli lanielini ningí unguma pali aliei pilku sengena panjiku molko kondaa. Aku ulumu Ye-Awilimuni kanopa peanga pilielemo.

<sup>21</sup> Bolangomanga lapali, ononga bolangoma ‘Popenge seko mumindili naa kolko, nikimulu mele bulu siku siye naa kolangi.’ ningu taka leko ungu-manema siku popenge seko iri naa toko ungu-manema tondolo munduku naa siee.

3:22—4:1

*Kongono Kendemande Yomboma Kinia Ononga Nokoli Yema Kinia Ononga Ungu Se (3:18—4:1 pali)*

<sup>22</sup> Méle kaloli se naa liku kongono we sendeli kendemande yomboma, ononga kongono nokolemele mana-yombomane ningí unguma pali pilku liku sangi. ‘Nokoli yomboma kanoko molangi kongono sepo kondombo kinia kanokole kape niengi.’ ningu kongono naa sangi. Ye-Awili ‘Karasi,nga ungumu liku awi siku pilku liku selemele mele aku siku kongono nokoli yombomane “Saa.” ningí unguma pilku liku kongono konopu siku seko kondangi. <sup>23</sup> Ono konopu talo-sepa pepili ononga kongono nokoli yombomanga kongono naa sendangi. Kongono sengema pali sengendo Ye-Awilimunga kongonomo sendelemolá mele aku siku kongono nokoli ye kanumanga kongonoma konopu peanga pepili tondolo munduku sendangi. ‘Manayombomanga kongonoma mindi sendekemolo, akumu unguri mólo.’ ningu kongono naa sangi. <sup>24</sup> ‘Ye-Awilimuni pe yunga yomboma méle kalombando taltondolemo méle peangama olio simba.’ ningu pilkuli ‘konopu peanga pepili kongono nokoli yemanga kongono tondolo munduku sendangi.. Karasinga kongono kendemande sendelemele; yu ononga Ye Nokoli Paa Awili kanumu. <sup>25</sup> ‘Seko kinjingí yomboma pali seko kinjingimunga méle kalólimu lingí. Ye-Awilimuni ‘Yombo imbi molemoma lupa, imbi naa molemoma lupa.’ nimba kanopa apurupa méle naa kalomba. ‘Selemolo mele kanopa apurupale méle kalomba,’ kene,’ ningu kongono aku siku tondolo munduku sangi.

## 4

<sup>1</sup> Kongono nokoli yomboma, ononga kongono we sendeli kendemande yomboma taka leko nokoko seko kondoko, seko mini-wale naa mundundangi. ‘Olio kongono nokoli yombomanga kepe Nokoli Ye se mulu-koleana molemo.’ ningu pilkuli kongono we sendeli kendemande yomboma aku siku seko kondangi.

4:2-6

*‘Pulu Yemo Kinia Ungu Nilimili Ulumu Tondolo Munduku Ambolko, Molko Kondangi.’ Nirimu Ungumu*

<sup>2</sup> Pulu Yemo kinia paa aliei ungu ningu siye naa kolko, ‘Pulu Yemo kinia ungu ningíndu, umbu-konopu pepili ‘Pulu Yemo kinia ungu ningu,, Pulu Yemo kinia “Ange.” ningu molangi. <sup>3</sup> Pulu Yemo kinia ungu ningu molkole olionga kepe mawa sendekole, “Olio yunga semane peangamo andopo topo siemili aulka se akisindepili.” niengi. Aku semanemo Karasinga semanemo, akumu u lopi sepa perimu kanumu. Aku semanemo topo siliumunga na ka-ulvana pelio.

<sup>4</sup> Pulu Yemo kinia nanga mawa sendekole “Karasinga semane lopi sepa perimumu yomboma paa sumbi siku piliangi nimbu para sipu kondambo.” niengi. ‘Na aku sipu kongono sambo.’ nimba Pulu Yemone sirimu ‘kene aku sendangi..

<sup>5</sup> Karasinga yombo talapena naa molko ultukundu molemele yomboma ono Karasinga yombo molemelemane kanoko kondoko aulka andoko, Karasinga ungumu kanu yomboma ningu singíndu aulkamo mimi siku kanoko, aulka se mona lemba kinia kanokole ungumu ono piliangi sumbi siku ningu siengi. <sup>6</sup> Ono ungu ningu singíma aliei api mele songo sepili. Yomboma yakala kolko ‘Paa piliamiliya.’ ningu

komu sendenge ungu peangama niengi. ‘Yombomane mangilingí kinia olione ungu peangama pundu topo niemili.’ ningu aku siku sangi.

**4:7-18**

*Pollone Pepá Topa Pora Simbando Kamu Torumu Unguma 4:7-9 Pollone Tikikas Kinia Onesimasitolo Kollosi Yomboma Moloringina Lipa Mundorumu Semanemo*

<sup>7</sup> Olio paa konopu mondolemolo genu Tikikas ,ombá kinia, na molio mele pali ono semane topa simba. Yu Ye-Awylimunga kongonomo paa sendepa siye naa kolopa, olio kinia pea kopu sepo selemolo yemo. <sup>8</sup> Yuaku sipa olio kinia pea kopu sepo kongono selemolomonga ‘Olio molemolo mele ono piliangi. ‘Ono konopu tondolo pumba pe nipili molangi.’ nipili.’ nimbu nane yu ono molemelena lipu mundukuru. <sup>9</sup> Ono Kollosi yombomanga ye Onesimasi, olionga konopu mondolemolo genumu kongono paa sepa kondopa siye naa kololemo yemo, yu Tikikas kinia pea lipu mundukuru. Ya olio molemolona ulu wendo oleloma pali ono ningu singilí.

**4:10-18**

*Pollo Kinia Ye Mare Kinia Onone Kollosi Yombomando “Manda Molemeleye?” Niringi Semanemo*

<sup>10</sup> Na pea ka-ulkana pelembolo ye Arisitakasini “Ono manda molemeleye?” nimba, nimba mundukumu. Banapasinga pelepa Mako ,ya kopu sepo molemolo yemone, “Ono manda molemeleye?” nimba, nimba mundukumula. (Mako-kinia ono senge mele u nimbu mundorunu kanumu. Ono molongena omu liemu “Pea molamili ou.” niengi.) <sup>11</sup> Ye se, yunga imbi, Yesusi, aku yemo yunga imbi se “Jasitas” nilimili, aku yemone “Ono manda molemeleye?” nimba, nimba mundukumula. Pulu Yemo ye nokoli kingimu molopa mélema nokombamonga nimbu siliu kongonomo na liku tapondoko pea selemele yombomanga aku yema mindi Juda yema. Kanu yemane ‘kongono tondolo mundupu sambo.’ ningu paa liku tapondolemele.

<sup>12</sup> Epaparas, ono Kollosi yombomanga ye se, yuni kepe “Ono manda molemeleye?” nimba, nimba mundukumu. Yu Karasi Yesusinga kongonomo sendeli ye se molopa, Pulu Yemo kinia ungu nimbándo siye naa kolopa alieli ononga nimba tondolo mundupa mawa sendepale “Ono Karasinga yombo yuma molko, ‘Sika.’ ningu kuru mondoko molemele mele konopu topele-mapele naa toko Pulu Yemo kanopa peanga pilimba ulu “Saa.” nilimúma pilku liku sengendo tondolo munduku seko molangi.” nilimú. <sup>13</sup> Yuni ononga kepe, LLadosia taono yombomanga kepe Irapollisi taono yombomanga kepe, ‘Ono lipu tapondambo.’ nimba paa kongonomo kála-sepa selemo ‘akumu ono paa piliangi.’ nimbu nikiru.

<sup>14</sup> Olionga konopu mondolemolo ye doketa LLukuni “Ono manda molemeleye?” nikimula. Ye Dimasini aku sipa nikimula.

<sup>15</sup> Olionga genu LLadosia taonona molemelema keme ambo Nimipa keme Karasinga yombo talape Nimipa yunga ulkana maku toko molemelema yomboma keme “Ono manda molemeleye?” nindangi.

<sup>16</sup> Ono Kollosi yomboma i pepámo piliangi kambu tondoko pora singí kinia ‘Karasinga yombo talape LLadosia taonona molemelema kanoko piliangi.’ ningu liku mundangi. LLadosia yomboma pepá topo sindumu ‘Olio kanamili yando siengi.’ niengila.

<sup>17</sup> Akipasindu i-siku ningu siengi: “Nu Ye-Awylimunga kongono ‘Sendei.’ ningu siringimu paa pali tondolo munduku seko kondou.” niengi.

<sup>18</sup> Na Pollo nanu i pepámo topo “Ono manda molemeleye?” nikiru.

Na ka-ulkana we pelio mele komu naa sindangi.

‘Pulu Yemone,’ ono we kondo kolopa molopili molangi.

‘Aku pea nikiru.,

## **TESALLONAIKA Yomboma Pollone Wale Talo Pepá Topa Sirimu Bokutolo**

*Pollone I Pepá Topa Sirimutolonga UNGU-PULU MARE*

Pollo kinia yuni pepá torumumanga ungu-pulu mare bokumunga yakondo gomo 676 molemo.

Pollo kolea-awili **Tesallonaika** purumu semanemo Lipa Mundorumu Yema 17:1-10 molopa, yu mindili siringi kinia kowa pumba Beria taono molopale, pe kelepa kowa pumba kolea-awili Atenesi purumu semanemo 17:11-15 molemo. **Tesallonaika** akuna Karasinga yombo talapemonga yombo koltalo sika Juda yomboma-na-kolo awisili yombo-lupama moloringi (Lipa Mundorumu Yema 17:4, ya **U-Tesallonaika 1:9-10**). **Tesallonaika** akumu Masedonia poropinji kolea se, no kelona lierimu.

Pollo kolea-awili Korini molopa Karasinga **Tesallonaika yomboma pepá u topa sirimumunga pulumu i-sipanje:** **Pollo Tesallonaika yomboma**-kinia molopale Karasinga ungumu kamu mane naa sipili Juda yombo ungumu pilku mokoli seringimane yu toko makororingi. Pe **Tesallonaika yomboma Karasi lombili puringimunga mindili nongo moloringi pilipale Pollone ‘Timoti ono lipa tapondopili.’ nimba yu ono moloringina lipa mundorumu** (**U-Tesallonaika 3:1-5**). Pe Timoti kelepa Pollo molorumuna omba ono moloringi mele Pollo semane topa sirimu kinia Pollone i pepámo ono sipa mundumbando torumu. Ono konopu tondolo pupili moloringimunga konopu sipa Pulu Yemo kinia “Ange.” nirimu mele ono nimba sipa, ono mimi siku molonge mele mane sipa, Ye-Awili Yesusi pe kelepa ombámonga ungu awisili nimba sirimu (1:9-10, 2:19-20, 3:13, 4:13-18, 5:1-3,23-24). Ungu mare pea nu nunu kanani.

‘Oli mare mindi omba pupili Pollo kolea-awili Korini we molopale **wale talo-sipa pepá se Karasinga Tesallonaika yomboma topa sirimu.**’ ningi pilielemene. Imbi lepo “Pe-Tesallonaika” nilimulu pepá akumunga ungu-pulumu **U-Tesallonaika** kinia selu-sipa. Ye-Awilimu pe kelepa ombámonga ungu awisili torumu molemo. Ono mindili nongo moloringi-na-kolo konopu tondolo pupili ‘Karasi sika.’ ningi kuru mondoring mele munduku naa kelieringimunga Pollone Pulu Yemo kinia “Ange.” nirimula. Kote walemo wendo ombá kinia Pulu Yemone mindili siringi yomboma pundu tomba mele nimba sirimula. Ononga yombo mare kongonomo manda naa seko we moloringimunga ungu tondolo se 3:6-15 molemo.

Ya **U-Tesallonaikakinia Pe-Tesallonaika** kinia ungu-pulumu pora nikimu.

### **U-TESALLONAIKA Pollone TESALLONAIKA Yomboma Pepá U Topa Sirimu Bokumu**

I pepámonga ungu-pulu mare inia yakondo gomo 974 molemo, akuna kanoko piliani.

*Kolomongo-Awili 1-3*

**Pollo Yu Kinia, Pea Kongono Seringi Yema Kinia,  
‘Tesallonaika Yomboma Nambi Seko Molemelenje?’ Ningu  
Konopu Awisili Kimbu Siku Moloringi Mele Unguma  
1:1**

*Pollone Pepámo Tombando Pulu Polopa Torumu Ungumu*

<sup>1</sup> Pollo kinia Saillas kinia Timoti kinia olione ono Karasinga yombo talape koleawili Tesallonaika molemelema

i pepámo topo sikitulu.

Ono Lapa Pulu Yemo kinia Ye-Awili Yesusi Karasi kinia kopu seko molemele yomboma, ‚olone, ono we kondo kolko, ‘Ono konopu pe nipili taka leko molangi.’ ‚niengili.‘

1:2-10

*Tesallonaika Yomboma Kuru Mondoringimunga Pollone Konopu Sipa Pulu Yemo-Kinia “Ange.” Nirimu Ungumu*

<sup>2</sup> Olio ‚ono molemele mele pilipuli, alieli Pulu Yemo-kinia “Ange.” nimbu, yu-kinia ungu nimulúndu ononga kepe mawa sendelemolo. <sup>3</sup> Olionga Lapa Pulu Yemo ononga nimbu alieli mawa sendepo molomolondo ulu selemelemane ono ‚Yesusinga semanemo ‘Sika.’ ningu, kuru mondolemele mele lipa ora sipa, yomboma kála seko liku tapondolemele ulumane konopu mondolemele mele lipa ora sipa, tondolo munduku molko siye naa kololemele ulumuni ono Ye-Awili Yesusi Karasi, ‚Kelepa ombá.’ ningu, konopu siku nokoko molemele mele lipa ora silimúmunga aku siku molemele mele pilipuli alieli, ‚Ange.’ nilimulu.‘

<sup>4-5</sup> Ono olionga genupili Pulu Yemone konopu mondolemoma, Pulu Yemone ‘ono yunga yomboma molangi.’ nimba taltorumu mele olio pilipuli akumunga kepe ‚Ange.’ nilimulu. Olione semane peangamo ono moloringina ombo topo sirimulu kinia ungumu yuyu mindi wendo orumu-na pilku naa moloringi. Aku semane peangamo topo sirimulu kinia yunga tondolomo kinia Mini Kake Sélimu kinia wendo orumu mele pilku kanoko, olione aku semanemo ‘Sika.’ nimbu kuru mondopole onondo tondolo mundupu nirimulu mele kepe pilku kanokole ‚Sika nikimili.’ ningu kuru mondoringi-kulu kanopole ‚Pulu Yemone sika ono konopu mondopa ‘Nanga yomboma molangi.’ nimba taltorumu lémo.’ nimbu kanorumulu. Olio ono lipu tapondomolondo ono-kinia ombo molorumulu mele ono pilielemene.

<sup>6</sup> Ono olio kinia Ye-Awilimu kinia molorumulu mele manda manjiku moloringi; ono-kinia umbuna awisili wendo orumu-na-kolo ‚Pulu Yemonga, ungumu konopu siku pilku liltingi. Kanu konopu sili ulumu Mini Kake Sélimuni sirimu. <sup>7</sup> Aku seringimunga kolea Masedonia poropinji kinia Akaya poropinjitolonga ‘Sika.’ ningu kuru mondoko moloringi yomboma molonge mele kolea-awili Tesallonaika yomboma onone liku ora siringi.

<sup>8</sup> Ono ‚Karasinga Tesallonaika yomboma, moloringina Ye-Awilimunga ungumu Masedonia kinia Akaya poropinjitolonga yomboma moloringina purumu, pali pilieringi-na-kolo aku kolea pokorenga mindi naa purumu. Onone Pulu Yemo ‘Sika ‚olionga Lipa Tapondolim.’ ningu kuru mondoringi semanemo koleamanga pali anju anju purumu pilieringi. Akumunga, ono ‚Tesallonaika Karasinga yomboma, molemele mele olione kelepo semane se topo simulú aulka se naa lemó. <sup>9</sup> Olio ono moloringina orumulu kinia ono-kinia uluma wendo orumu, onone seringi mele we-yomboma onono olio semane toko silimili akumunga ‚kelepo yomboma ononga semanemo topo simulú aulka se naa lemó.‘ Ono ‚Tesallonaika yombomane, we-mélema popo toringi pulu ye kolo tolima munduku kelko konopu topele toko, konde molopa mindi puli Pulu Ye sikamo molorumuna puringi mele we-yombomane olio semane toko silimili. ‘Yunga kendemande-yomboma molamili.’ ningu molko, <sup>10</sup> Yunga Malo mulu-koleamo mundupa kelepa kelepa ombá.’ ningu konopu siku nokoko molongendo ‚Pulu Ye Sikamo molorumuna puringi, mele ‚semanemo toko silimili.‘ Aku Malomo kolorumu kinia Pulu Ye Sika kanumuni topa makisinderimu yemo; akumu Yesusi, olio ‚yunga yomboma, lipa tapondolemomonga Pulu Yemo pe

yomboma mumindili kolomba walemo wendo ombá kinia olionga unguri naa pumba yemo.

## 2

*2:1-16*

*Pollone Tesallonaika Yomboma Kinia Kongono Serimu Mele Nirimu Ungu Se*

<sup>1</sup> Ango-keme, ono moloringina ombo kongono serimulu kanumu we mania naa purumu ono pilielemene. <sup>2</sup> Ononga koleana u naa ombo kolea-awili Pillipai molorumulu kinia olionga kangikundu mindili siku olio ungu-taka tondoringi mele ono pilielemene. Aku-sipa na-koło pe Tesallonaika orumulu kinia 'Kongono naa sangi.' ningu kongono semolo aulkamo pipi singí seringi kinia olionga Pulu Yemone olio lipa tapondorumu kinia pipili naa kolopo tondolo mundupu yunga semane peangamo ono topo sirimulu. <sup>3</sup> Olione onondo tondolo mundupu "Yesusi Karasi piliangi." nimulúndu olione ungu mare lawa sepo pilipu naa nimbu, 'Kalaro mololi uluma pea samili.' nimbu konopu talo pepili unguma naa nimbu, 'Ono aulka senga lupa pangí kene kondi tamili.' nimbu kolo naa torumulu. Aku paa naa serimulu. <sup>4</sup> Pulu Yemone olio apurupa kanopale 'Nanga semane peangamo manda sumbi siku toko singí.' nimba kanopale "Ningu sindangi." nirimu, akumunga 'I-siku i-siku ningu siee.' nilimú mele mindi alieli nilimulu. 'Yombomane olio kanoko peanga pilku kape niengi.' nimbu unguma andopo naa nimbu silimulu. 'Olionga konopuma kanopa apurulimú-Pulu Yemone kanopa peanga piliepili.' nimbu kongono selemolo. <sup>5</sup> 'Olio sumbi sipu serimulu mele, ono pilielemene. Pulu Yemo mangilielemolánje yuni 'Sika.' nilkala. 'Olio-kinia ulu se seko kondangi kene ono kape nimbu imbi ambolopo paka tondamili.' nimbu unguma naala nirimulu. 'Ononga mélema olio siengi.' nimbu unguma naala nirimulu. Kolo naa tokomolo ono pilielemene; Pulu Yemone pilielemóla. <sup>6</sup> Onone kepe ma-kolea lupamanga yombomane kepe olio kape niengi.' nimbu Pulu Yemonga ungumu andopo naa nirimulu.

Sika olio Karasini 'Kongono sende-paa.' nimba lipa mundorumu yema molorumulunguna ono lipu tapondopole umbuna lipu sipu „Onone mélema siku olio nokaa.” , nimbu tondolo mundupu nilimolánje peanga. <sup>7</sup> Aku-na-koło ,aku sipu naa nirimulu. Ono-kinia molopole ambomane ononga bolangoma taka leko nokoko ,ame siku, molemele mele ono aku sipu nokorumulu. <sup>8</sup> Olio ono paa konopu mondopo kondo kolopole 'Pulu Yemonga semane peangamo topo siemili.' nimbu mindi naa serimulu; 'Ono lipu tapondomolondo olio umbuna mare membo mindili nomulu liemu unguri molo.' nimbu konopu sipu serimulula.

<sup>9</sup> Ango-keme, 'Olio ono-kinia molopole kongono semolondo kála sepo kongono serimulu mele ono pilkimili.' konopu lekero. 'Olione ono Pulu Yemonga semane peangamo topo sipu molomolo kinia 'Onone olio nokoko kere-langi siengi.' naa nimulú.' nimbu ipulieli kepe tangoli kepe kongono serimulu. 'Aku kongonomo kou limulúndu kongono sepo, ono lipu tapondopo kongono sepo, peatolo lipu sere lepo serimulu..'

<sup>10</sup> Ono Karasi 'Sika.' ningu kuru mondolemele yomboma pea kopu sepo molorumulu kinia Pulu Yemone kanopa 'ulu kake selima' nimba kanolemo uluma kinia, yombomane 'ulu sumbi nilima' ningu kanolemele uluma kinia sepo, ulu se sepo naa kinjerimulu akumu ono pilielemene; Pulu Yemo pilielemóla. Olio "ulu se seko kinjeringi." manda naa ningí. <sup>11</sup> Yemane ononga bolangoma nokoko seko kondolemele mele olione ono aku sipu serimulu akumu ono pilielemene. <sup>12</sup> Ono konopu tondolo pumba konopu peanga liepili molangi.' nimbu, "Ye nokoli kingimu molopo kolea paa peanga, tondolo pa seli koleana molopo nokolio koleana ono pea

molamili waa.' nimba ono mangilielemo Pulu Yemone kanopa peanga pilielemo mele mindi alieli seko molangi." nimbu paa tondolo mundupu mane sirimulu.

**2:13-16**

*Karasinga Yomboma 'Sika.' Ningu Kuru Mondokole Umbunama Wendo Orumu Kinia Kanu Umbunama Enge Ningu Meringi Ungu Se*

<sup>13</sup> Alieli Pulu Yemo-kinia "Ange." nilimulu akumunga ulu se pea pelemo. „Akumu i-sipa: „ Olio ono moloringina ombo Pulu Yemone olio ungu-umbu tondorumumu pilipuli nimbu sirimulu kinia mana-yombo sene ungu se nimba silimú kinia pilku limili mele mindi naa pilku liltingi. Pilkuli ‘Akumu Pulu Yemonga ungumu ningu sikimili.’ ninguli pilku liltingi. „Akumu papu seringi.„ Aku ungumu paa sika Pulu Yemonga ungumu. Kanu ungumuni ono ‘Karasi,’ ‘Sika.’ ningu kuru mondolemele yombomanga konopumanga kongono selemo.

<sup>14</sup> Ango-keme, ono-kinia ulu wendo orumu mele kolea Judia disiriki Pulu Yemonga yombo talape moloringima-kinia u aku sipa wendo orumula. Ono Tesallonaika yomboma ononga pulu lemó yombomane ‘Mindili nangi.’ ningu seko kinjeringi mele, Judia koleana Karasi Yesusi pea kopu seko molemele yombomanga pulu lemó Juda yombomane u aku siku kepe ‘Mindili nangi.’ ningu seko kinjeringi. Akumunga pilipuli ‘Ono ungu nimbu sirimulumu sika onone ‘Pulu Yemonga ungumu’ ningu, pilku liltingi.’ nimbu pilielemolo. <sup>15</sup> Juda yombomane u Pulu Yemone ungu-umbu tondorumuma pilku yomboma ningu siringi yema toko kondoko, pe Ye-Awili Yesusi toko kondoringi yombomane pe olio kepe mindili liku siku toko makororingi. Pulu Yemone kanopa kiri pilielemo uluma seko, yomboma kinia pali opa-tou molemele.

<sup>16</sup> Olio Pulu Yemone Juda yombo naa molemele yomboma lipa tapondopa, mindili nolemolá aulkana wendo lipa, yu-kinia molko kondonge aulkana lipa mondomba mele naa niemili.’ ningu, olio andopo kanu yombo lupama ungu nimbu simulú aulkamo pipi singí selemene. Aku selememonga ono ulu-pulu-kiri selemene mele alieli olandopa-olandopa paa pea pali selemene, akumunga, ulu-pulu-kiri awisili ono-kinia kamu pumba. Pe kiniá Pulu Yemonga mumindili kolomba walemo ono molemelena koronga kamu alieli-alieli omba lemó.

**2:17—3:5**

*Pollone “Tesallonaika Yomboma Kelepo Paa Kanamboa.” Nirimu Ungu Se*

<sup>17</sup> Aku-sipa na-koło ango-keme, „Juda yombomane, olio toko makororingi kinia olio ono mundupu kelepo senga purumulu kinia sika olio ono kinia kopu sepo naa molemolo-na-koło olionga konopumane ‘ono kinia kopu sepo molemolo.’ konopu lemolo. „Lapalini bolangoma munduku kelko kolea suluna pungu molko ononga bolangoma konopu kimbu siku pilku molemele mele, olione aku sipu ono mundupu kelepo pumbu laye-koło mindi molopole, ono konopumuni pilipu molopo ‘Ono paa kanamiliya.’ nimbu omolondo aulka se kororumulu. <sup>18</sup> Olio ono molemelena omolo.’ nimbu serimulu. Na „Pollo, nanu kepe wale awisili kelepo ombó serindula, aku-na-koło „kurumanga nokoli, Setenene ‘Mólo.’ nimba olio pipi sirimu. <sup>19</sup> Olionga Ye-Awili Yesusi Karasi kelepa ombá kinia méle nambolkarene olio ‘Konopu tondolo pupili molangi.’ nimbá kinia yunga kumbikerena konopu sipu gilimuluye? Olione kongono tondolo mundupu sepo kondorumulu mele nambolka mélsene ‘lipa ora sipili.’ nimbu membo pumuluye? Ono lipu tapondorumulu yomboma mindi kape nimbu lipu ora simulú. Akumunga kepe ‘Ono molemelena wamili.’ nimbu serimulu. <sup>20</sup> Sika, ‘olione ono lipu tapondorumulu kinia ono Karasinga yomboma molko uluma selememonga, ono mindi kanopo olio konopu peanga pepili molopo, ono-kinia konopu silimulu.

## 3

3:1-5

*Pollone 'Tesallonaika Karasinga Yomboma Konopu Tondolo Pupili Molangi.' Nimba Timotindu "Pungu Ni-Pu." Nimba Lipa Mundorumu Semanemo (2:17 pulu polko kanani)*

<sup>1</sup> Akumunga, 'Ono nambi seko molemelenje.' nimbu olio paa konopu awisili kimbu sipu , 'Ungu se ningu mundunginje.' nimbu, nokopo molorumulu kinia ungu se naa ningu mundoringi-kulu siye serimumunga 'Saillas kinia, olto ya kolea-awili Atenesi molambili.' nimbu panjerimulu kinia <sup>2</sup> oltone Timoti "Ono molemelen pu." nirimbulu. Timoti yu oltonga genu, pea kopu sepo Pulu Yemonga kongono sendepo Karasinga semane peangamo andopo topo silimulu yemo. "Yuni ono 'enge ningu molko Karasi 'Sika.' ningu kuru mondolemele mele munduku naa kelko paa ambolko molangi.' nipili." nimbu yu ono molemelen lipu mundorumbulu. <sup>3</sup> Ono mindili nongo umbuna melemelemonga konopu kimbu siku molongenje.' nimbu aku seribulu. 'Karasinga yomboma aku siku umbunama menge.' nimba Pulu Yemone nilimú mele ono pilielemene. <sup>4</sup> Olio ono-kinia pea molopole ono liepi-liepi topo nimbili: "Olio paa sika mindili singí, olio-kinia umbuna awisili wendo ombá." nirimulu kanumu sika aku sipa wendo orumu mele ono kanolemele.

<sup>5</sup> Akumunga, 'Ono nambi seko molemelenje.' nimbu konopu kimbu sirindu mele siye serimu-kulu 'Konopu kimbu sikiru mele mania pupili.' nimbu nane Timoti ono moloringina lipu mundorundu. 'Ono kuru mondoko molemelenje molo kondi tolemo yemone ono kondi torumu kinia ononga kuru mondoringi mele we aku siku kuru mondolemele molo aku siku seko moloringi ulumu munduku kelieringinje. Kongono kála-sepo serimulumu we mania purumunje, piliambo.' nimbu yu lipu mundorundu.

3:6-10

*Timoti Kelepa Pollo Molorumuna Yando Ombo Tesallonaika Yomboma Seko Moloringi Mele Semane Topa Sirimu Kinia Pilipale Pollo Yu Paa Konopu Sirimu Semanemo (2:17 pulu polko kanani)*

<sup>6</sup> Aku-sipa na-kolo kiniá mindi Timoti yando ombale ono 'Sika' ningu kuru mondoko yomboma konopu mondoko molemele mele semane peanga se ombo topa simu. Alieli olio ono-kinia pea molorumulu mele onone konopu kimbu siku pilkuli paa konopu siku molemele mele nimba sipa, olione 'Ono paa kanamiliya!' nimbu molemolo mele ono aku sikula 'Olio paa kanamiliya.' ningu molemele mele nimba simu.

<sup>7</sup> Akumunga, ango-keme, sika olio umbuna membo mindili nolemolo-na-kolo ono 'Sika.' ningu kuru mondoko molemele mele semanemo pilipuli konopu peanga pepili tondolo mundupu molemolo. <sup>8</sup> Ono Ye-Awilimu munduku naa kelko yu tondolo munduku ambolko molemelemonga pilipuli yombo konde pulimili mele kiniá paa manda molemolo. <sup>9</sup> Olio Pulu Yemo-kinia ungu nimbu molopo ono konopumuni pilipuli, ono seko molemelemonga paa awili sepo konopu sipu molemolo akumu nambi sepo Pulu Yemo-kinia manda "Ange." nimulúye? Pulu Yemone aku sipa olio 'konopu siemili.' nilimúmunga yunga kumbikerena pumbu konopu lakopo sipu molemolomonga olione alieli yu-kinia "Ange." nimulú manda naa sembá.

3:10-13

*Pollone Tesallonaika Karasinga Yombomanga Pulu Yemo Mawa Senderimu Ungu Se*

<sup>10</sup> Ipulielie kepe tangoli kepe Pulu Yemo-kinia ungu nimbili 'Olio ono ombo kanamili. Aulka se akisindepili.' nimbu paa tondolo mundupu mawa selemolo. 'Ononga kuru mondolemele mele kamu kuru mondonge ungu se pilku naa molongi liemu aku mólo tolemo unguma ombo nimbu siemili.' nimbuaku sipu mawa selemolo.

<sup>11</sup> Kiniá Pulu Ye olionga Lapa akumu kinia olionga Ye-Awili Yesusi kinia alone olio ono molemelena ‘Wamili.’ ningu aulka se akisindengili.

*3:12—4:8*

### *Pulu Yemone Kanopa Peanga Pilielemo Ulumanga Ungu Se*

<sup>12</sup> Olione ono konopu paa awili sepo mondolemolo mele Ye-Awilimuni ‘Onone aku siku ononga Karasinga yomboma kinia we-yomboma kinia pali konopu paa olandopa olandopa mondangi.’ nipili.

<sup>13</sup> Olionga Ye-Awili Yesusi yunga yombo kake selima kinia kelepa ombá walemonga ono Pulu Ye olionga Lapamo molombana pungu molonge kinia konopu kake sepa Pulu Yemone kanopa kiri pilipa kote sendemba ulu-pulu se konopuna naa pepili molonge kinia ‘yuni kanopili.’ nimba Ye-Awilimuni ononga konopuma tondolo mundundopili.

*Kolomongo-Awili 4-5tolo*

## **“Karasinga Tesallonaika Yomboma ‘Ulu Peangama Mindi Tondolo Mundupu Samili.’ Niengi.” Nimba Pollone Nirimu Ungu-Mare**

### 4

*4:1-8*

*Pulu Yemone “Saa.” Nilimú Ulu Peangama Kinia “Naa Saa.” Nilimú Ulu Kirima Kinia Akumanga Ungu Se (3:12—4:8 pali)*

<sup>1</sup> Ango-keme, ungu se kamu niembo. U ono mane sipu Pulu Yemone kanopa peanga pilielemo uluma senge mele u nimbu sirimulu. Aku siku sika seko molemele. Aku-na-kolo kiniá “Ono Ye-Awili Yesusinga yomboma molemelemonga aku uluma siye naa kolko seko molko mindi pang.” nimbu tondolo mundupu mawa sekemolo. <sup>2</sup> Ye-Awili Yesusingi olio ungu-umbu tondorumuma ono nimbu sirimulu ungu-manema ono pilielemele kanumu.

<sup>3</sup> Pulu Yemone ‘Ono sangi.’ konopu lepa molemo mele i-sipa:

Ono konopu kake sepili  
Pulu Yemonga yomboma manjiku molko,  
wa ulu-kirinale seli ulu-pulumu munduku keleangi.

<sup>4-5</sup> Juda yomboma naa molko

Pulu Yemo naa pilielemele yombomane  
anju-yando yomboma kanoko pea ulu-kirinale sengendo  
yakala kolko wa ulu-kirinale selemele aku mele  
aku uluma yakala kolko naa sangi.  
Ono yu-meles-meles ambo lingí molo ye pungíma  
‘Ononga kangimu emenalinga manjipa giliepili.’ ningu  
ulu-peanga kake selima manjiku seko molaa.

<sup>6</sup> Yema, ononga genali ‘Sepo naa kinjamili.’ ningu

aku ulu-pulu-kirimu naa seko,

ononga genalinga amboma kinia

‘Ulu-kirinale samili.’ ningu kondi naa tangi.

‘Nanga mólo, yunga.’ ningu yu-kinia ulu se naa sangi.

Olione u ono nimbu sipu liepi-liepi torumulu mele paa sika nirimulu. “Aku ulu-pulu-kiri mele uluma senge yomboma Pulu Yemone aku sengemonga “Mindili nangi.” nimba.” nimbu u liepi-liepi topo nirimulu kanumu. <sup>7</sup> Pulu Yemone “Ulu-pulu kalaro mololi aku sipama seko molangi waa.” ni naa nirimu. “Nanga yomboma manjiku molko ulu-pulu kake selima seko molangi waa.” nirimu. <sup>8</sup> Aku sipa nirimu-kulu ‘I

ungu-manemo naa pilipu lipu semolo.' ningu bulu silimili yomboma yombo se lupa bulu naa silimili; Mini Kake Sélimu ono silimú Pulu Yemo mindi bulu silimili.

**4:9-12**

### *Yomboma Kinia Molopo Kondomolomonga Ungu Se*

<sup>9</sup> 'Ono Karasinga yomboma, ononga genupilima konopu mondangi niemili.' nimbu pepá naa tomolo. Pulu Yemone ono anju yando konopu mondonge mele u ,ononga konopuna om̄ba molopa, mane sirimu kanumu, akumunga olione aku ungumunga pepá se naa tomulu liemu mandala. <sup>10</sup> Masedonia poropinji Karasinga yomboma pali kepe onone aku siku konopu monolemele kanumu. Aku-na-kolo ango-keme, onone aku ungumu selemene mele 'olandopa olandopa sangi.' nimbu tondolo mundupu mawa sekemolo.

<sup>11</sup> Olione u ono mane sipuli "Taka leko molaa. Ono onono yu-melete-melete mindi kongono pilku saa. Ono onono yu-melete-melete kongono sekole kere-langima naa." nirimulu mele 'Paa aku sipu samili.' ningu tondolo munduku seko molaa. <sup>12</sup> Aku sipu semolo kinia Karasinga yombo naa molko ultu molemele yombomane olio aku sipu semolo mele kanokole olio 'yombo peanga' ningu olionga ungumu pilingí. Olio yu-melete-melete mélse mólo naa tombala.' ningu aku siku seko molangi.

**4:13—5:11**

### *Ye-Awilimu Ombámonga Ungu Se*

**4:13-18**

### *Ye-Awilimu Kelepa Wale Talo-Sipa Ombá Kinia Yu Pilkuli Kololemele Yomboma Lombokoroko Ola Molonge, Olio Konde Molomolo Yomboma Pea Om̄ba Limbamonga Ungu Se*

<sup>13</sup> Ango-keme, Karasinga yombo koloringimanga ungu se niemili. Kanu uru pelemele yomboma-kinia ,pe wendo ombá mele, ono ,kiniá we molemele yomboma,ne mimi siku naa pilku molongi liemu olio pilkimulu manda naa sekemo. Karasi naa pilieli yombomanga yombo se kololemo kinia we-yombo kanuma kondo awili-seko kololemele mele ono Karasinga yomboma aku siku kondo awili-seko naa kolangi. We-yombomane pilkuli 'Kolopole walte lomboropo ola molopo, olionga yomboma kinia kelepo seluna kopu sepo molomolo.' ningu naa pilkuli aku siku kondo awili-seko kololemele kanumu. <sup>14</sup> Olio ,Karasinga yombomane, 'Yesusi kolopa lomboropa ola molorumu.' nimbu kuru monolemolo. Aku nimbu pilipuli 'Yu serimu mele aku siku yombo 'Yesusi ,sika nanga nimba kolali sepa kolondorumu. Kiniá pea molemolo.' ningu, kuru mondokole koloringi yomboma aku siku sengela.' nimbu kuru monolemolola. Kanu yomboma pe Pulu Yemone Yesusi-kinia pea kelepa yando memba ombá.

<sup>15</sup> Kiniá Ye-Awilimuni yuyu nirimu ungu se ono nimbu siemili. Yuni nimbale: "Ye-Awilimu ,kelepa mania, ombá kinia olio we konde molomolo yomboma u koloringi uru pelemele yomboma mundupu kelepo olio kumbi lepo naa pumulú. Paa mólo!" nirimu. <sup>16</sup> Ye-Awilimu mulu-koleana mundupa kelepa mania ombándo ombá kinia ungu tondolo se wendo om̄ba, mulu-koleana angello awili nokoli sene ungu se nimba, Pulu Yemonga bikollomone ungu se nimba, Ye-Awilimu yuyu kanu unguma kinia mulu-koleana mania ombá. Ombá kinia Karasinga yomboma molkole kololemelema u lomboroko ola molonge. <sup>17</sup> Kanu-kinia olio we konde molomolo yomboma kinia koloringi yomboma kinia pea Ye-Awilimu yu 'Kupana kanopo liemili.' nimba olio olando limba, olio ola muluna pumbu yu kanopo limulú. Aku sipa wendo ombámonga olio Ye-Awilimu kinia pea kamu-alieli-alieli kopu sepo mololepo mindi pumulú. <sup>18</sup> Ulu akumu wendo ombá kene ononga yombo ,kondo kolongema, 'Konopu tondolo pupili molangi.' ningu "Kololemele yomboma pe konde molonge." i nikiru mele anju yando ningu siee.

## 5

5:1-11

*Ye-Awilimu Waltikele Lipa Sinjipa Ombá Ungu Se (4:13 pulu polko kanani)*

<sup>1</sup> Aku-sipa na-kolo ango-keme, kalia-ingimu kepe enamo kepe Ye-Awilimu ombá wale akumanga ungumu ono pilielememonga nane aku walemonga ungu se pepá manda naa topo simbú. <sup>2</sup> Wa noli yombo se ombá walemo yombomane naa piliangi ipulieli lipa sinjipa olelo mele Ye-Awilimu ombá walemoaku sipala wendo ombámo ono paa pilielemele kanumu. <sup>3</sup> Yombomane 'Olio konopu seluna pupili molopo mini-wale mundupu umbuna kolomolo ulu se wendo naa olemo. Molopo kondolemolo.' ningí kinia yomboma kote sendepa "Seko kinjeringimunga mindili nangi." nimbá ulu kanumu waltikele lipa sinjipa wendo ombá. Ambo se bolango membándo waltikele lipa sinjipa mindili nolemo, kanu mindilimu mundupa kelepa pumbá aulka se naa lemó. Aku siku mele 'Konopu seluna pupili molemolo.' ningí kanu yomboma kote sendepa "Seko kinjeringimunga mindili nangi." nimbá ulumu waltikele lipa sinjipa wendo ombá, kanu-kinia yomboma kowa manda naa pungí.

<sup>4</sup> Aku-sipa na-kolo ango-keme, ono simbulu tolina naa molemele-na 'Wa noli yombo se ombá.' ningu nokoko naa kanangi kiyongo nimba lipa sinjipa olemo kinia yomboma pungu-pungu nilimili mele ono aku siku naa senge. 'Kanu walemo wendo ombá.' ningu kanoko nokoko molangi wendo ombámonga ono-kinia umbuna se naa pemba. <sup>5</sup> Ono tangoli pa selina molemele yomboma; olio pea ipulieli simbulu tolina yomboma naa molemolo. <sup>6</sup> Aku sipu molemolo kene we-yomboma uru pelemele mele olio aku sipu uru naa peamili. Olio mongo makilipu umbu-konopu pepili molamili. <sup>7</sup> Uru pelemele yomboma ipulieli uru pelemele. No-tondolo nongo amu tolemele yomboma ipulieli no-tondolo nongo amu tolemele.

<sup>8</sup> Aku-sipa na-kolo olio tangoli molemolo yomboma molemolo kene umbu-konopu pepili molamili. Ami-yema ono 'olokondo naa tangi.' ningu wale-pakoli kapane selima pakolemele mele olio aku sipu, 'Yesusinga semanemo sika.' ningu, kuru mondoli ulumu kinia, konopu mondoli ulumu-tolo tondolo mundupu ambolamili. 'Pengena naa tangi.' ningu wanie kapane selima pakolemele mele olio aku sipu 'Jesusini sika yunga yomboma lipa tapondopa, mindili nolemolá aulkana wendo lipa, yu-kinia pea molko kondonge aulkamo lipa mondolemo.' nimbu konopu sipu nokopo molemolo ulumu paa ambolopo kondamili. 'Kurumanga nokoli Setenene olio sepa naa kinjepili kene molopo kondamili. Kondi toli ulu sene olio topa mania naa mundopili.' nimbu aku samili. <sup>9</sup> Pulu Yemone olio-kinia "'mumindili kolopole paa mindili nongo molko kinjangi.' niembo.' nimba olio nimba naa taltorumu kanumu. 'Olionga Ye-Awili Yesusi Karasini olio lipa tapondopa mindili nolemolá aulkana wendo lipa yu-kinia pea molopo kondomolo aulkana lipa mondopili.' nimba, nimba panjipa olio nimba taltorumu kene 'Yesusingi aku sipa lipa tapondomba.' nimbu nokopo mololi ulu-pulumu tondolo mundupu ambolamili. <sup>10</sup> Olio 'Pea kopu sepo molamili.' nimba Yesusingi olianga nimba kolali sepa kolondorumu. Olio aku sipa lipa tapondorumumunga, 'Sika nanga nimba senderimu.' ningu kuru mondolemele yombomanga yu ombá kinia, olio yunga we molomolo yomboma kinia, kolko uru penge yomboma kinia, 'mulu-koleana ola pumbu, yu pea molomolo.'

<sup>11</sup> 'Pe olio-kinia aku sipa wendo ombá, kene kiniá selemele mele aku siku yu-melete-mele 'Enge olandopa olandopa pupili ningu, konopu tondolo pupili.' ningu anju yando niee.

5:12-28

*Pepá Topa Pora Sirimu Ungu Pokore*

<sup>12</sup> Ango-keme, kiniá olione ono mawa sepo nikimulu: Ono nokolemele yema, Ye-Awilimuni yunga 'Tesallonaika yombo talapemo nokangi.' nimba, nimba taltorumu

yema, ononga unguma liku awi siku molangi. Kanumane ono kinia pea molko kongono kála-seko seko, 'Ono i-siku i-siku sangi.' ningu mane silimili, 'Kanu yemane olio nokokomele.' ningu pilku ononga unguma liku awi siku molangi. <sup>13</sup> Onone kongono selemelemonga 'Ono kape niemili.' ningu ononga unguma paa taka leko pilku molko ono konopu mondangi. Ono genali kinia anju yando konopu seluna pupili molangi.

<sup>14</sup> Ango-keme, olione ono tondolo mundupu mawa sekemolo:

Kongono naa seko siye kolko we molemele yomboma

‘Aku siku paa naa saa.’ , ningu liepi-liepi toko niengi.

Pipili kololemele yomboma ‘Pipili naa kolko

konopu enge nipili molangi.’ niengi.

Pange selemo yomboma ‘kondo kolko’ liku tapondangi.

Ono yomboma-kinia taka leko molangi.

<sup>15</sup> Yombo marene ono seko kinjingí kinia

anju pundu toko seko naa kinjangi.

Alieli genali kinia ultu molemele yomboma kinia ‘kondo

kolko, ulu peangama mindi tondolo munduku seko molangi.

<sup>16</sup> Alieli konopu siku molangi.

<sup>17</sup> Alieli-aliei Pulu Yemo kinia ungu ningu mawa seko molangi.

<sup>18</sup> Ono mindili nonge kinia kepe umbuna wendo ombá kinia

kepe molko kondonge kinia kepe, aku siku ono-kinia ulu lupa lupama wendo ombá  
kinia Pulu Yemo kinia “Ange.” ningu molangi. Ono Karasi Yesusinga yombo

molemelema Pulu Yemone ‘Aku siku sangi.’ nilimúmungaaku siku seko molangi.

<sup>19</sup> Mini Kake Sélimunga sepemo toko naa kumundangi. <sup>20</sup> Pulu Yemonga ungu-umbu  
tondolemoma pilku

yando ningu silimili unguma liku bulu naa siengi.

<sup>21</sup> Uluma pali apuruku kanokole, peangama mindi ambolko,

<sup>22</sup> ulu kirima pali munduku kelko óko liengi.

<sup>23</sup> Ono konopu seluna pumba pe nipili taka leko molangi.’ nilimú Pulu Yemo yuyu,  
yuni ononga mini kangima pali ‘Nanga manjipa kene kake sepa liepili.’ nipili.

‘Ye-Awili Yesusi Karasi kelepa ombá kinia ononga konopumu kepe minimu kepe  
kangimu kepe pali yuni “Mindili nangi.” nimbá mongo se naa pepili molangi.’ nipili.

<sup>24</sup> Olio ‘yunga yomboma molangi.’ nimba mangilielemo yemone konopu topele naa  
topa “Sembó.” nilimú uluma aku sipa sika selemo-na olio-kinia paa sika aku sipa  
sembá.

<sup>25</sup> Ango-keme, ‘Pulu Yemone olio lipa tapondopili.’ ningu, onone olionga mawa  
sendangi.

<sup>26</sup> Karasinga yomboma “Olionga genupili.” ningu ki liku kangulangi.

<sup>27</sup> Ye-Awilimuni ‘I kongonomo sani pu.’ nimba na lipa mundorumumunga nane  
ono paa tondolo mundupu nimbuli: “I pepá topo sikirumu genali pali piliangi kanoko  
ningu siengi.” nimbu nikiru.

<sup>28</sup> Olionga Ye-Awili Yesusi Karasini ono we kondo kolopa molopili molangi.

‘Aku pea nikiru.,

## PE-TESALLONAIKA Pollone TESALLONAIKA Yomboma Pepá PE Topa Sirimu Bokumu

I pepámonga ungu-pulu mare inia yakondo gomo 974 molemo, akuna kanoko piliani.

*Kolomongo-Awili 1-2tolo*

### **Awilimunga Walemo Pe Wendo Ombá Ungu Se**

1:1-2

*Pollone Pepámo Tombando Pulu Polopa Torumu Ungumu*

<sup>1</sup> Pollo kinia Saillas kinia Timoti kinia olione ono Karasinga yombo talape kolea-awili Tesallonaika molemelema

i pepámó topo sikimulu. Pulu Yemo ono kinia olionga pea pali Lapamo kinia, Ye-Awili Yesusi Karasi kinia, pea kopu seko molemele yomboma, pepá topo sikimulu.

<sup>2</sup> Lapa Pulu Yemo kinia Ye-Awili Yesusi Karasitolone ono we kondo kolko, ‘Ono konopu pe nipili taka leko molangi.’ niengili.

1:3-12

*Pollone Pulu Yemo-Kinia “Ange.” Nimba Karasinga Tesallonaika Yombomanga Mawa Senderimu Semanemo*

1:3-4

*Karasinga Tesallonaika Yomboma-Kinia Umbunama Wendo Orumu Kinia Tondolo Munduku Moloringi Semane Se*

<sup>3</sup> Ango-keme, alieli ono nimbu pilipu konopu kimbu sipuli Pulu Yemo-kinia “Ange.” nimulú mele mundupu keliemulu liemu kiri. Ono ‘Karasi kinia yunga ungumu ‘Sika.’ ningi, kuru mondolemele mele olandopa olandopa kuru mondoko, ono onono anju yando konopu mondolemele mele olandopa pulimú akumunga alieli Pulu Yemo-kinia “Ange.” nilimulu mele alieli aku sipu nimbu molomolo kinia peanga.

<sup>4</sup> Onone aku siku selemelemonga Pulu Yemonga yombo talape kolea lupa lupa molemelemanga andopo, ono kape nimbu imbi ambolopo paka tondopo, yombomane ono umbuna silimili kinia ono mindili nolemele-na-kolo tondolo munduku molko Karasinga ungumu ‘Sika.’ ningi kuru mondoringi mele siye naa kolko, kiniá kepe ‘Akumu sika.’ ningi kuru mondoko molemele mele konopu sipu semane topo silimulu.

1:5-10

*Pulu Yemone Yunga Ulu Sumbi Nílimuni Olio Yomboma Sumbi Sipa Apurulimú Ungu Se (1:3-12 pali)*

<sup>5</sup> Ono seko molemele mele kanopole, ‘Pulu Yemone yomboma sumbi sipa apurulimú apurumba.’ nimbu kanolemolo. ‘Ono ulu aku sipama wendo olemo, akumunga Pulu Yemone ono pilipa apurupa kondopale Pulu Yemo ye nokoli kingimu molopa nokolemo koleana manda “Kamu sukundu wangi.” nimbá mele lipa ora silimú. Kiniá Pulu Yemo ye nokoli kingimu molopa nokolemo talapena molemelemonga mindili nolemele kanumu. <sup>6</sup> Pulu Yemone yomboma sumbi sipa apurulimú, akumunga ono mindili silimili yomboma yuni ‘Mindili nangi.’ nimba, <sup>7</sup> ono mindili nolemele yomboma kinia olio kinia pea ‘konopu peanga leko molangi.’ nimbá. Ye-Awili Yesusi yunga angello enge nilima kinia mulu-koleamo mundupa kelepa sepe awili-sepa nomba pembana ombo mona gilimba kinia i ulumu wendo ombá. <sup>8</sup> Yu aku sipa ombale, Pulu Yemo naa pilku kopu seko naa molko, Ye-Awili Yesusinga semane

peangamo pilku liku sengena panjiku naa selemele yomboma ,aku selemelemonga, pundu tombando "Mindili nangi." nimbá. <sup>9</sup> Seko kinjilimilimunga pundu tomba mindili nonge mele i-sipa: Pulu Yemone "Ye-Awilimu molombana pungu naa molko, yunga tondolo paa ololandopamonga pa tondolo-sepa selina ongo naa molko, paa anju pangí." nimba makoropa, ono kamu topa mania mundumba, molko kinjiku mindi pungi. <sup>10</sup> 'Yunga yombo kake selimane yu kape ningu, 'yu sika' ningu kuru mondolemele yombomane yunga imbi ambolko paka tondangi.' nimba ombá walemonga kanu uluma wendo ombá. Olione ono ungu nimbu sirimuluma 'Sika' ningu kuru mondoringimunga ,yu ombá kinia, onone kepe pea yu kape ningu imbi ambolko paka tondongela.

1:11-12

*Pollo Keme Yemane 'Karasinga Tesallonaika Yomboma Tondolo Munduku Molangi.'*  
*Ningu Pulu Yemo Mawa Senderingi Ungu Se (1:3-12 pali)*

<sup>11</sup> Akumunga, 'Pulu Yemone "Ono nanga yomboma molangi waa." nirimu-na moloringi mele kiniá ono kanopa peanga pilipa ' "Waa." nirindu mele mania naa pupili.' nipili.' nimbu olione alieli Pulu Yemo-kinia ononga nimbu mawa sendelemolo. 'Yunga tondolomone ono 'ulu peangama samili.' nilimili uluma 'Sika sangi.' nimba lipa tapondopa, ono 'Yu sika.' ningu kuru mondokole kongono selemele kongonoma 'Peanga liepili. Seko kondangi.' nipili.' nimbu yu mawa sendelemolo. <sup>12</sup> 'Aku sengemonga ,yombomane, olionga Ye-Awili Yesusinga imbi ambolko paka tondonge kepe, yu ono-kinia molombamonga ononga imbi ola molombala.' nimbuli aku sipu ononga nimbu Pulu Yemo mawa sendelemolo. Olionga Pulu Yemo kinia Ye-Awili Yesusi Karasitolonga we kondo kololi ulumuni aku uluma paa sika wendo opili.

## 2

2:1-12

*Ye Sene Ungu-Manema Pulua Topa Paa Sepa Kinjimbamonga Ungu Se*

<sup>1</sup> Ango-keme, olionga Ye-Awili Yesusi Karasi ,kelepa yando, omba olio lipa maku tomba aku ulutolo wendo ombámonga olio ungu se nimulú sekemolomo 'ono komu sendeko molangi.' nimbu nikimulu. <sup>2</sup> 'Yombomane tondolo munduku ninguli "Ye-Awilimunga walemo koronga wendo omu." ningí kinia ono konopu awisili kimbu siku mini-wale munduku pungu-pungu ningu naa molangi.' nimbu ono tondolo mundupu mawa sekemolo. Kolo tokole "Pulu Yemone ungu-umbu tondomu ungu se piliendu nimbu siembo." ninguli aku siku ningí kinia, molo "Pollone ungu se nimba mundomumu niembo." ninguli aku siku ningí kinia, molo pepá toko sikuli "Na Pollone i pepámo topo sikiru." ningí kinia, aku siku kolo toko , "Ye-Awilimunga Walemo koronga wendo omu." , ningí kene ,unguri naa saa.. <sup>3</sup> 'Aku-na-kolo,' 'Yombo sene aku sipa kolo topa kondi tomba.' ningu ungu nimbáma naa pilku, 'Nikiru ungumu piliangi.' nimba, ulu mare sembá kinia naa kanangi. Kanu walemo u we wendo naa ombá. U yombo awisilini Pulu Yemo-kinia kara pungu 'Yunga ungumu paa naa pilimulú.' ningu bulu siku mokoli senge walemo u wendo ombá. 'Aku sene walemonga ,ye sene ungu-manema pulua topa paa sepa kinjimba yemo, Pulu Yemone u nimba taltopa "Kolea-kirina lipu mundumbu." nimba, nimba panje-rimu yemo wendo omba mona molomba. 'Aku ulumu u wendo ombá, Ye-Awilimunga walemo pe wendo ombá.' <sup>4</sup> Kanu yemone yomboma 'Olionga pulu yema' ningu popo toko kape ningí pulu yema 'Mania pupili.' nimba, 'Na aku pulu yemanga kolali sepo molopo nanga imbi mindi ambolko paka tondoko na mindi kape niengi.' nimbá. 'Pulu Yemo popo toko kalolemele ulka-tembelena sukundu, Pulu Yemo molemo kisipina kepe pumba polo se lipa akuna molopa "Na nanu Pulu Yemo." nimbá. <sup>5</sup> Kiniá ya

nikiru mele u na ono-kinia molopole nimbu sirindu kanu unguma komu sindiku naa pilkimiliye?

<sup>6</sup> Aku-sipa na-kolo kanu ulumu iseli-u wendo ombá aulkamo mélsene pipi silimú, aku mélemo ono pilielemele. „Pulu Yemone, yu wendo om̄ba mona molomba wale nimba taltorumumu wendo ombá kinia akumu sika wendo om̄ba mona molomba. <sup>7</sup> Yombomane ungu-manema pulua toko paa seko kinjilimili ulu-pulumu koronga kiyongo nimba pelemo kanumu. Aku-na-kolo pe wendo ombámo we kamu wendo om̄ba mona naa molomba. ‘Iseli-u wendo om̄ba mona naa molopili.’ nimba aulkamo pipi silimú yemo „Pulu Yemone, “Wendo pupili.” nimba yu wendo pumbá kinia paa sepa kínjelimu kamu wendo om̄ba mona molomba. <sup>8</sup> Aulkamo pipi silimú yemo wendo pumbá kinia, ungu-manema pulua topa paa sepa kinjimba yemo popenge sepa mona gilimba. Mona gilimba kinia Ye-Awili Yesusini yunga kere-múlumuni yu topa mania mundupa, yu tondolo pa sélimu kinia ombá kanu pa sélimuni kanu yemo topa kondomba.

<sup>9</sup> Ungu-manema pulua topa paa sepa kinjimba ye kanumu „kurumanga nokoli, Setenenga tondolomo-kinia ombale, „Setenenga, ulu kolo tólimuni ulu-tondoloma sepa, yomboma kanokole mini-wale mundungi ulu lupa lupama sembá, <sup>10</sup> „Setenene yu lipa tapondombamonga, mindili nongo molko kinjingí aulkana pulimili yombomane ‘Sika’ ningu kuru mondonge ulu kolo topa kondi tomba ulu kiri lupa lupama sepa ungu kiri lupa lupama nimbá. Kanu yombomane ‘Ye-Awilimuni olio lipa tapondopa, mindili nolemolá aulkana wendo lipa, yu-kinia pea molopo kondomolo aulkana lipa mondopili.’ naa ningu ungu-sikamo konopu naa mondoko ‘Paa pilipu liemili.’ naa niringimunga kolea-kirina pungu mindili nongo molko kinjingí. <sup>11</sup> Akumunga, Pulu Yemone ‘kanu yombomane kolo toli ungumu ‘sika-ungumu’ niengi.’ nimba lo lingí tondolomo ono silimú. <sup>12</sup> Yuni aku selemomonga yombo ungu-sikamo naa pilku ulu-pulu-kirima mindi konopu siku selememe yomboma kote walemo wendo ombá kinia Pulu Yemone kote pilipa ono apurupa méle kalopa ‘Ono seko kinjeringimunga molko kinjangi.’ nimbá.

2:13-17

*Pollone “Pulu Yemone ‘Ono Molko Kinjingí Aulkana Wendo Lipu, Molko Kondonge Aulkana Lipu Mondombo.’ U Aku Nimba Olio Nimba Taltorumu Kene Tondolo Munduku Molaa!” Nirimu Ungu Se*

<sup>13</sup> Aku-sipa na-kolo Ye-Awilimuni konopu mondolemo ango-keme, Pulu Yemone ono lipa tapondopa, ‘Mindili nolemolá aulkana wendo ongo, yu-kinia pea molko kondonge aulkana pangí.’ nimba ono u kumbi lepa nimba taltorumu. Minimunga tondolomone ono Pulu Yemonga yombo manjiku molko yombo kake selima molemele ulumu kinia, ungu-sikamo kuru mondolemele ulu akutolo pelemomonga Pulu Yemone ono lipa tapondopa mindili nolemolá aulkana wendo liitimu akumunga pilipu molopole olione alieli Pulu Yemo-kinia “Ange.” nimbu molomulu liemu papu. <sup>14</sup> Olione ono semane peanga topo sirimulumuni Pulu Yemone ‘Ono aku siku yomboma molangi waa.’ nirimu. ‘Yomboma olionga Ye-Awili Yesusi Karasinga tondolo pa sélimu kinia yunga tondolomo kinia seluna kopu seko molonge kinia, ono kinia pea seluna kopu seko molangi kene.’ nimbu onondo aku sipa “Waa.” nirimu. <sup>15</sup> Olionga ango-keme, aku serimu kene tondolo munduku molko, olione ono-kinia molopole, Pulu Yemonga unguma nimbu sipu, ‘pe, pepá topo sipu, aku sipu mane sirimulu ungu-sika akuma munduku naa kelko tondolo munduku kuru mondoko molangi.

<sup>16</sup> Pulu Ye olionga Lapa, oliongona yemone olio we kondo kolopale konopu tondolo pumba pora naa nimbá ulumu kinia, ‘Pulu Yemone olio kinia ulu peangama sembá.’ nimbu, tondolo mundupu konopu sipu nokopo molemolo ulumu kinia, silimú yemo kinia, olionga Ye-Awili Yesusi Karasi yu kinia alone <sup>17</sup> ono konopu

tondolo pupili toembo toko enge ningu molkole alieli ulu peangama mindi seko ungu peangama mindi ningu molonge tondolomo siengili.

*Kolomongo-Awili 3*

## **“Tesallonaika Yombomane Kongono Naa Seko Siye Kololemele Yomboma Mane Siengi.” Nirimu Ungumu**

### 3

*3:1-5*

“‘Pulu Yemone Olio Lipa Tapondopili.’ Ningu Yu-Kinia Olionga Mawa Sendangi.”  
*Nirimu Ungu Se*

<sup>1</sup> Manda, ango-keme, kiniá ungu se kamu niembo: Pulu Yemo-kinia ungu ningu olionga mawa sendekole i-siku niengi: “Ono Tesallonaika yomboma Ye-Awilimunga semanemo topo sirimulu kinia pilkuli ‘Ungu-peangamo. Yuni sika olionga nimba aku senderimu.’ ningu popenge seko pilku liltingi mele aku siku anju anju yomboma i ungumu pilingí aulkamo nondopa wendo opili. Ungumu pilkuli onone seringi mele akula sangi.” ningu mawa sendeko, <sup>2</sup> “Ye kirimane ulu kirima mindi seko, seko kinjiku molemele yema olio ulu se naa seko umbuna se naa siengi kene Pulu Yemone lipa tapondopili.” ningu mawa sendangila. Ono pilkimili, yombo awisilini ‘Ye-Awilimunga semane akumu sika.’ ningu kuru naa mondolemele kanumu. Akumunga aku siku Pulu Yemo kinia olionga ningu mawa sendangi.

<sup>3</sup> „Ye kirimane olio seko kinjingí selemele,-na-kolo Ye-Awilimu olio paa naa mundupa kelemba. ‘Ulu kirimanga pali ulu-pulumu pelemo „kuru,muni ono topa mania naa mundopili.’ nimba ono tondolo mundundupa nokopa molomba. <sup>4</sup> ‘Ono Ye-Awilimu kinia kopu seko molemelemonga olione “Sangi.” nilimulu mele kiniá seko kondoko molemele. Pe aku sikula sika seko mindi molonge.’ nimbu pilipu molemolo.

<sup>5</sup> ‘Pulu Yemone yomboma konopu mondolemo mele kinia, ono konopu mondonge mele kinia, Karasini tondolo mundupa molopa siye naa kolopa molemo mele ono aku siku manda manjiku seko molonge mele kinia, Ye-Awilimuni mane sipa aulka se lipa ora sipili.’ nimbu yu mawa sekemolo.

*3:6-15*

“*Yomboma We Naa Molko Kongono Seko Molangi.*” *Nirimu Ungu Se*

<sup>6</sup> Ango-keme, Ye-Awili Yesusi Karasinga imbi lepo ono tondolo mundupu nimbili: Ononga genu sene ‘Kongono naa sembó.’ nimba siye kolopa, ono mane sirimulu mele aku sipa naa selemo yombomo pea seluna kopu seko paa naa molko ono anjupa molaa! <sup>7</sup> Ono pilkuli, ‘Olio selemolo mele ono aku siku manda manjiku senge kinia papu.’ ningu pilielemene. U ono kinia pea molorumulu kinia olio we naa molorumulu. <sup>8</sup> Yombo marene olio kere-langì siringi kinia kepe we naa norumulu. Topo topo lipuli norumulu. Ono kinia pea molorumulu kinia ‘Ono kinia pea molemolomonga ono umbuna se naa sepili.’ nimbu ipulieli kepe tangoli kepe olio tondolo mundupu „Pulu Yemonga kongonomo semolondo kou-kongono serimulula, Pulu Yemonga kongono serimulula, akumunga, olio paa kála sepo molorumulu.

<sup>9</sup> “Olione ono lipu tapondolemolo kene olio pundu toko mélse siee.” nilimolánje papu nilimolá. Aku-na-kolo ‘Kongono selemolo mele kanokole ono aku siku manda manjiku seko we naa molangi.’ nimbu lipu ora simulundu aku sipu kála sepo kongono sepo we naa molorumulu. <sup>10</sup> Aku nikirumunga ungu se olio ono kinia pea molopole mane sirimulu kanumu ono pilielemene. Kanu ungu-manemo i-sipa: “Yombo se kongono naa semu liemu aku yu ga naa nopilila.” nirimulu kanumu.

<sup>11</sup> „Nambi semu-na olione aku sipu nikimuluye?“ Ononga yombo mare kongono sengendo „sika kongono se naa seko,“ yombo mare ulu seko ungu nilimilima ‘Paa

piliamili.' ningu andoko mangilku pilku komu sendeko mindi molemele-na pilipuli aku sипу nikimulu. <sup>12</sup> Ye-Awili Yesusi Karasinga imbi lepole kanu yomboma senge mele i-sipu tondolo mundupu nikimulu: "Ono taka leko molko, ononga kere-langi nongendo ono onono kongono sekole kere-langi liku nangi." nikimulu.

<sup>13</sup> Aku-sipa na-kolo ango-keme, ono marendo i-sipu nikimulu: "Ono ulu peangama sengendo siye naa kolko, enge ningu saa!" nikimulu.

<sup>14</sup> I pepá topo sikimulumunga sukundu ungu-mane sikimuluma yombo sene pilipa lipa sengena panjipa naa sepa molomu liemu onone kanokole 'Yu aku sipa selemomonga pilipa pipili kolopili.' ningu yu molombana ono naa pungu anju molangi. <sup>15</sup> Aku-sipa na-kolo 'Onone 'Aku yombomo olionga opa-toumu.' konopu leangi.' nimbu naa nikimulu. 'Yu olionga genu kene yu sepa kinjemu mele piliepili.' ningu liepi-liepi toko ningu molangi.

3:16-18

### *Pollone Pepá Topa Pora Simbando Nirimu Ungu Pokore*

<sup>16</sup> Ye-Awilimu, konopu seluna pumba konopu pe nipili ulu-pulumu pelemo yemo, yuni 'Ulu lupa lupama wendo ombá kinia ono alieli konopu seluna pumba pe nipili molangi.' nipili. Ye-Awilimu ono kinia pali kopu sepa molopili.

<sup>17</sup> 'Nane pepá topo siliuma ye sene lipa tapondopa tondolemo,-na-kolo 'Yombomane 'I pepámo paa sika Pollo yuyu tomu lémo.' ningu kanangi.' nimbu ungumu kamu topo pora simbundu na nanu topo nanga imbimu tollo mele kiniá kepe i pepána topo

<sup>18</sup> "Olionga Ye-Awili Yesusi Karasini ono pali we kondo kolopa molopili molangi." nikiru.

„Aku pea nikiru..»

## U-TIMOTI Pollone Ye TIMOTI Pepá U Topa Sirimu Bokumu

*Pollone I Pepá Topa Sirimumunga Ungu-Pulu Mare*

Ungu-pulu mare inia yakondo gomo 676 molemo.

**Timoti** yu Gallesia poropinji LLisira taono yemo. Yunga anumu Juda ambo se, lapa Giriki yemo. Yunga anumu kinia yunga bamu kinia Karasinga ambotolo moloringili. Anumunga imbimu Yunisi, bamunga imbimu LLoisi (**Pe-Timoti** 1:5). Yu Karasinga yemo molorumu kinia Pollone Karasinga semane peangamo andopa topa simbando **Timotindu** “Pea kopu sepo pambili ou.” nimba lipa memba purumu. Aku semanemo Lipa Mundorumu Yema 16:1-3 molemo. Pe, **Timoti** kolea-awili Epesasi Karasinga yombo talapemonga nokoli yemo molopili Pollone i pepámo yu topa sirimu (**U-Timoti** 1:3). Lipa Mundorumu Yemanga bokumu pora nimbándo Pollo yu Romo molorumu (kolomongo-awili 28). Yu kalia-ingi mare kelepa andopale pe kelko yu Romo ka siringi kinia pepale i pepámo **Timoti** topa sirimu.

**Timoti** molorumu mele ungu mare **Pe-Timoti** 3:15, **U-Timoti** 1:2, Lipa Mundorumu Yema 17:14-15, 18:5, 19:22, 20:1-6 kinia molemo. Yunga kongonomonga ungu mare **U-Timoti** 3:1-7, 5:17-22, **Taitasi** 1:5 kinia molemo. Pillipai 2:19-22, **Pe-Timoti** 4:9,21, Ipuru 13:23 kinia kananila. Yu Pollo-kinia pea molangili Pollone Pe-Korini kinia Pillipai kinia Kollosi kinia U-Tesallonaika kinia Pe-Tesallonaika kinia Pillimono kinia boku akuma pali pepá topa sirimu.

Ungu-pulu se: **U-Timoti** kinia **Pe-Timoti** kinia **Taitasi** kinia ungu awisili selu-sipa mele molemo. Aku boku yopoko liku sere leko “Tapu- yemanga pepáma.” nilimili, akumu kewa unguna “pasotollomanga pasema” molo “pasitamanga pasema” nilimili, nambi semu-na, **Timoti** kinia **Taitasi** kinia Karasinga yombo talapema nokoko molangili Pollone olo i pepáma topa sipale, Karasinga yomboma tapu seko nokoko kondongele mele mane sirimumunga aku siku nilimili. Yetolo molko kondongele mele mane sirimula.

Pepáma ungu mare selu-sipa molemo mele **Pe-Timoti** ungu-puluna inia anjukundu nondopa gomo 1022 molemo akumunga maniakondo unguma pora nimbándo kanani.

Ungu-pulu tondolo se bokumunga pealemekondo “21. kisim bek”, “21.3 Man Bilong Kisim Bek Yumi” kanani.

Ya ungu-pulumu pora nikimu.

*Kolomongo-Awili 1-6 pali*

**Pollone Timotindu “Nunu Ulu Senima Kinia Karasinga  
Yomboma Ulu Sengema Kinia Mimi Siku Nokoko Molani.”  
Nirimu Ungu Mare**

1:1-2

*Pollone I Pepámo Tombando U Pulu Polopa Torumu Ungumu*

<sup>1</sup> Na Pollo, Yesusi Karasini “Nanga kongonomo sende-pu.” nimba lipa mundorumu yemo. Olionga Lipa Tapondopa Mindili Nolemolá Aulkana Wendo Linderimu Pulu Yemo kinia ‘Olio paa sika sepa kondomba.’ nimbu konopu sipu nokopo molemolo ye Karasi Yesusi kinia na ningu taltoko “I kongonomo sende-pu.” niringili-na aku sipu andopo nimbu siliu yemone

<sup>2</sup> „nu ‘Karasinga yemo molko kondani.’ nimbu nane nu nokolio,„ nu kinia olto Karasinga yetolo molembolomonga nu nanga kandi malo Timoti nu i pepámo topo sikiru.

Lapa Pulu Yemo kinia olionga Ye-Awili Karasi Yesusitolone nu we kondo kolko seko kondoko, nuni wale marenga ulu mare seko kinjení kinia nu kondo kolko “Mindili nani.” naa ningu, ‘Nu konopu pe nipili taka leko molani.’ niengili.

**1:3-11**

*Ungu Kolo Tolima Mane Silimili Yombomane Nilimili Unguma Naa Pilipu Bulu Simulú Ungu Se*

<sup>3</sup> Nane kolea Masedonia poropinji pumbúndu nu tondolo mundupu mawa sepole “Kolea-awili Epesasi molani.” nirindu mele kiniá nu kelepo mawa sepole “Akuna we molani.” nikiru. Ye marene akuna kolo toko ungu lupama mane siku molemele kene “Akuna we molko kanu yemando “Aku naa saa.” ni.” nimbu nu mawa sekero. <sup>4</sup> Kanu yemane „Juda yombomanga, kangema toko anda-kolepalimanga imbima sulu seko toko mindi molemele ungumane ononga konopuma topa bulu-balú sipa, ungumanga pulumu pilingindu we angelema mindi ningí aulkamo akisindipa, Pulu Yemonga ungu sikama pilingí aulkamo pipi silimú „kene onondo “Aku naa saa.” ni.“ Kanu yemane mane silimili ungumane Pulu Yemo pilielemolo aulkamo naa akisindilimú. Pulu Yemonga ungumu kinia, yuni “Olio kinia sembó.” nimba, nimba panjerimu uluma kinia, ‘Karasi Yesusi molopa olionga nimba senderimu mele, ‘Akumu sika.’ nimbu kuru mondolemolo ulumuni mindi akutolo pilielemolo aulkamo akisindilimú. <sup>5</sup> „Kanu yemane ningu kinjiku yomboma seko sembambu silimili yemando, “Aku siku naa saa.” ni.” nikiru mele ‘Karasinga yomboma anju yando onono konopu mondoko molangi.’ nimbu “Kanu yemando aku siku ni.” nikiru. ‘Sika.’ ningu kuru mondolememele ulumu paa sika selemele ulumu kinia, konopu kake seli ulumu kinia, konopumuni pilkuli ‘Pulu Yemone kanopa kiri pilielemo ulu kiri se konopuna naa pelemo lémo.’ ningu pilieri ulumu kinia,aku sipa konopu peanga pepili yomboma anju yando onono konopu mondoli ulumundu nikiru. <sup>6</sup> Yombo mare aku sipa konopu peangama naa pepili molko kanu ulu peangama munduku kelkole we-unguma angelema ningu amu tolemele. <sup>7</sup> ‘Mosisini Pulu Yemonga ungu-manema pilipale yando nimba sirimu, ungu-manemanga mane sílima molamili.’ nilimili-nakolo ungu-manemanga puluma naa pilku, tondolo munduku mane singíndu nilimili ungumanga puluma ono onono mimi siku naa pilielememele.

<sup>8</sup> Olio pilielemolo, ‘Mosisini ungu-mane sirimuma sumbi sipu pilipu, aku ungu-manemanga ungu-pulumu mimi sipu pilipuli ulu akuma semolo kinia aku ungu-manema paa peanga.’ nimbu pilielemolo. <sup>9-11</sup> Pulu Yemone kanu ungu-manema simbando ‘Sumbi siku molemele yomboma pilku sangi.’ nimba naa sirimu.’ nimbu pilielemola. Kanu ungu-manemane kongono mimi sipa selemo mele kanopole ‘Kanu ungu-manema peanga.’ nimbu pilielemolomonga ungu-pulumu i-sipa:

Ungu-manema pulua toko kara pulimili yomboma kinia,  
 Pulu Yemonga unguma liku bulu siku ulu-pulu kirima  
 selemele yomboma kinia,  
 Pulu Yemonga unguma naa pilku ‘ulu kake selima  
 pilipu samili.’ naa nilimili yomboma kinia,  
 yombomane ononga anupili lapali toko kondolememele  
 yomboma kinia,  
 yombo lupama toko kondolememele yomboma kinia,  
 wa ulu-kirinale selemele ye-kangoma kinia  
 ambo-wenepoma kinia yombo yuma pea,

kolea-awili Sodomo yombomane yema onono ulu-kirinale seko amboma onono ulu-kirinale  
 seringi mele selemele yomboma kinia,  
 'Makete sepo kou liemili.' ningu yomboma  
 wa limili yomboma kinia,  
 kolo tolemele yomboma kinia,  
 kotena pungu 'Sika nimulú.' ningu panjikuli  
 kolo tolemele yomboma kinia,  
 Pulu Yemonga unguma pilipu 'Karasinga yomboma  
 seko molangi.' nimbu mane silimulu ungu lupama pea pulua tongendo ulu-kirima  
 selemele yomboma pali kinia,  
 Mosisini sirimu ungu-manemane aku siku seko kinjiku molemele yomboma pali  
 'nokopili.' nimba Pulu Yemone  
 'Aku ungu-manema pepili.' nimba, nimba panjerimu.  
 Pulu Yemonga unguma mane silimulu ungu-sika akuma Pulu Yemone na nimba  
 taltopa "Andoko ningu si." nirimu unguma kinia selu-sipa. Aku ungumu semane  
 paa peanga olandopamo, imbi paa pelemo Pulu Yemonga semanemo.

*1:12-17*

*Pulu Yemone Pollo We Kondo Kolorumumunga "Ange." Nirimu Ungu Se*

<sup>12</sup> Yesusi Karasi olionga Ye-Awilimuni i kongono sendeliomonga engemo sirimu yemo "Ange." nikiru. Yuni na kanopa peanga pilipa 'Nanga kongonomo mundupa naa kelepa manda sepa kondomba.' nimba pilipale i kongono sendeliomo na sirimumunga yundu "Ange." nikiru. <sup>13</sup> Sika u yunga imbimu lipu ungu-taka tondopo, yunga yomboma kinia opa-tou molopo kara pumbu mindili sipu topo kondombo serindu-na-kuo yu sika Pulu Yemonga Malo molopa Pulu Yemone 'Olio nokopili.' nimba mana lipa mundorumu ye Karasimu molorumu mele pilipu sundupuli, yunga semanemo toringi pilipuli "Kolo tokomele." nimbu kuru naa mondorundu mele akumu sepo lawa serindumunga yuni kanopale na kondo kolopa 'Mindili nambo.' naa nirimu. <sup>14</sup> Na Karasi Yesusi kinia pea kopu sepo molorumbulu-kulu olionga Ye-Awilimuni na paa we kondo kolopale, 'Yu sika.' nimbu kuru mondoli ulumu kinia konopu mondoli ulumu kinia na-kinia awisili pelemo kanu ulutolo Ye-Awilimuni sirimu.

<sup>15</sup> 'Olio ulu-pulu-kiri serimulu yomboma lipa tapondopa, mindili nolemolá aulkana wendo lipa yu kinia pea molopo kondomolo aulkana 'lipu mondambó.' nimba 'Pulu Yemone mana lipa mundorumu ye nokoli, Karasi Yesusi mana mania orumu.' aku ungumu paa sika ungumu, yombomane konopu talo naa pepili 'Paa sika aku serimu.' ningu paa tondolo munduku kuru mondonge kinia peanga. Aku semolo kinia paa sika ku naa pemolo. Ulu-pulu-kiri seringi selemele yombomanga na ulu-pulu-kiri serindu mele paa olandopa, <sup>16</sup> aku-na-kuo Karasi Yesusini 'Yomboma konopu topele tangi.' nimbu taka lepo nokopo molopo, molko kinjilimilimunga welea mumindili naa kolopo konopu tambu nipili mindi molio. 'Nane sika manda lipa tapondomba.' ningu pilingí yomboma sika kondo kolopo lipu tapondopo, konde molko kondoko mindi pungí ulu-pulumu simbú ningu kanangi.' nimbale yuni na ulu-pulu-kiri olandopa serindu yemo u kondo kolopa 'Sepo kinjerindumunga mindili naa nambo.' nimba lipa tapondorumu.

<sup>17</sup> Alieli molopa mindi puli ye nokoli kingimu molopa, kolou naa kololemo yemo molopa, yombo sene naa kanolemo yemo molopa, yu selumu mindi sika Pulu Yemo molopa, aku sipa molemo Pulu Yemo yu mindi imbi ola molopa tondolo pepa, tondolo mundupa pa sepa,aku sipa pépa mindi pupili! Aku sipa mele paa sika sepili!

*1:18-20*

*Pollone Timotindu “‘Ulu-Kirima Kamu Mania Pupili.’ Ningu Tondolo Munduku Kongono Sei.” Nirimu Ungumu*

18-19 Nanga malo Timoti, Pulu Yemone ungu-umbu tondolima pilku yando ningu silimili Karasinga ye marene nu moloni mele u ningu siringi mele pilipuli ‘Nu paa aku siku sani.’ nimbu, nimbu sikiru. ‘Yomboma seko kinjiku molangi.’ nilimili mélema mania pumba, Pulu Yemonga kongono sepo moliomo tondolo pupili kene, tondolo mundupu opa paa sambo.’ ninguli nu sení mele u ningu siringi ungu akuma pilku liku sani. ‘Karasi Yesusi, sika.’ ningu kuru mondoleno mele munduku naa kelko, alieli konopumuni pilkuli ‘Pulu Yemone kanopa kiri pilielemo ulu-kiri se nanga konopuna naa pelemo. Kongono selioma sepo kondolio lémo.’ ningu pilku molanila! Aku ulutolo ambolkole ‘Opa tondolo mundupu sambo.’ ningu nu sení mele u ningu siringi ungu akuma paa pilku liku seko molani. Yombo marene ‘Kanu ulutolo naa sembó kinia unguri mólo.’ niringimunga, nona andoli sipi se nona kou sene topa bultulimú kinia paa kiri lemó mele kanu yomboma aku siku mele ‘Sika.’ ningu kuru mondoringi ulumu paa kamu kiri lierimu. 20 Aku seringi yombomanga ye Amenias kinia Allekesanda olo aku siku seringili-kulu ‘kurumanga nokoli, Setene molorumuna pangili.’ nimbu lipu mundorundu. ‘Aku siku molko kinjikuli Pulu Yemo ungu-taka tondoko yunga imbimu seko naa kinjingilí mele piliangili.’ nimbu aku sipu serindu.

## 2

2:1-15

*Karasinga Yomboma Maku Toko Molko Pulu Yemo Popo Toko Kape Ningu Yunga Imbi Ambolko Paka Tondonge Mele Ungu-Mane Se*

2:1-8

*Pulu Yemo Kinia Ungu Nimulú Mele Ungu Mare*

<sup>1</sup> Manda, nane ‘Ono sangi.’ nimbú ulumanga u kumbi lepo tondolo mundupu ‘Sangi.’ nimbu nikirumu i-sipa: Yombomanga pali Pulu Yemondo unguma nindiku, mawa sendeko, “Ono lipa tapondopili.” nindiku, “Ange, papu sendekeno.” nindangi.

<sup>2</sup> Ono nokolemele ye nokoli kingima kinia gapomano-yomboma kinia kanumanga Pulu Yemo mawa sendangi. ‘Pulu Yemo kanopa peanga pilielemo uluma sepo molopo konopu kake sepili molopole olio konopu sere lepo taka lepo molamili.’ ninguli aku sangi. <sup>3</sup> Aku siku seko molonge kinia peanga; olionga Lipa Tapondopa Mindili Nolemolá Aulkana Wendo Linderimu Pulu Yemo kanopa konopu silimú. <sup>4</sup> Aku Lipa Tapondoli Pulu Yemo, yuni ‘Yomboma pali mindili nolemolá aulkana wendo ongo na-kinia pea molko kondonge aulkana pungu, ungu-sikamo pilku ambolongi liemu papu.’ konopu lepa molemo ye kanumu. <sup>5</sup> Kanumunga ungu-pulumu i-sipa: Pulu Ye selumu mindi molemo; ye selumu mindi Pulu Yemo kinia olio mana-yomboma kinia olionga suku-singina yu molopa ‘Olio Pulu Yemo kinia anjupa molemele mele naa molangi. Yu kinia seluna konopu seluna pupili molangi.’ nimba molemo, kanu yemo mana-ye Karasi Yesusi. <sup>6</sup> Kanu yemone ‘Mana-yomboma ulu-pulu-kiri selemelemonga Pulu Yemone ono naa topili mindili naa nangi. Ulu-pulu-kirimane ono kelepa ka sipa naa nokopili manda molangi kene na ononga nimbu kolali sepo kolondambo.’ nimba yombomanga pali aku senderimu. Aku sipa ‘sendemba kinia aku sipu molomolo, walemo wendo ombá u ningu siringi mele aku walemo Pulu Yemone nimba taltorumu walemo pe wendo orumu. Yesusini olionga nimba senderimumuni Pulu Yemo mana-yomboma lipa tapondomba mele nimba sirimu. <sup>7</sup> Karasini “Nanga ungumu pungu ningu sindiku, nanga kongonomo sende-pu.” nimba na lipa mundorumu akumunga pulumu ‘Pulu Yemo kinia yomboma kinia seluna kopu seko molonge aulkamo akisindimbando kolorumu, kanumu. Kolo naa tokoro. Paa sika nikiru. ‘Juda

yombo naa molemele yombo-lupama ‘Sika.’ ningu kuru mondonge ulu-sikamo ono mane siengi.’ nimba na lipa mundorumu.

**2:8-15**

*Pulu Yemo Popo Toko Kape Ningí Makuna Molkole (2:8) Yema Seko Molonge Mele Kinia (2:9-15) Amboma Seko Molonge Mele Kinia Ungu-Mane Se (2:1-15 pali)*

<sup>8</sup> Aku kene kolea lupa lupamanga pali ‘Karasina yombomane Pulu Yemo popo toko kape ningíndu maku toko molonge kinia,’ ‘Olionga kangi konopuma pali Pulu Yemonga.’ ningu konopu kake sepili molonge yema ‘Pulu Yemo-kinia ungu niemili.’ ninguli, mumindili kolko angelema ningí ulu se naa pepili ki ola munduku Pulu Yemo-kinia ungu niengi.

<sup>9</sup> Ambomanga ungu se ya nikirula: ‘Olio kara pumbu mongo-kenge samili. Yemane olio kanoko yama meangi.’ ningu mulu-maminia peangama naa pakangi. Ononga penge-indima au siku lapisa langoko, kou-gollone seli mélema kinia kulumbu peanga kou-mone olandopa pulimúma kinia, akumane ononga kangima au siku mulu-maminia kou olandopa pulima pakoko, naa sangi. We-mulu-maminiam mindi pakangi. <sup>10</sup> ‘Yomboma olio kanoko peanga piliangi.’ ninguli ungu peangama mindi sangi. Aku uluma ‘Pulu Yemonga amboma molemolo.’ ningu yunga ungumu pilku molemele amboma au singí mele peangama. <sup>11</sup> ‘Mulu-maminia pakomolomane olio lipa tapondopili.’ naa niengi..

<sup>11</sup> ‘Karasina yombo maku toko molongena, amboma taka leko molko unguma naa ningu, ‘yemane, mane singí unguma mimi siku pilku, unguma pilku liku awi siku molangi. <sup>12</sup> ‘Ambomane yema naa nokoko, Pulu Yemonga unguma mane naa siengi.’ niliu. Unku naa ningu we taka leko molangi. <sup>13-14</sup> Pulu Yemone ye Atame u kumbi lepa sepa, pe ambo Ipu serimu. Pe ‘kurumanga nokoli Setenene, kolo topa kondi torumu unguma Atamene ‘Sika nikimu.’ nimba pilipa naa liltimu. Ambomone ‘Wambiyemone, sika nikimu.’ nimbale Pulu Yemone nirimu ungumu pulua topa ulu-pulu-kirimu serimu. Akumunga, amboma aku siku seko molangi. <sup>15</sup> Aku sika na-kolo amboma ‘Karasi Yesusi molopa senderimu sendemba mele, sika.’ ningu kuru mondolemele mele munduku naa kelko alieli kuru mondoko mindi molko, alieli yomboma konopu mondoko, ‘Olio Pulu Yemonga amboma molamili.’ ningu yuni ulu kake selima nimba kanolemo uluma seko, ononga imbima toko mania munduku taka leko molkole, bolango menge kinia Pulu Yemone ‘Ono molko kondangi.’ nimba lipa tapondomba.

### 3

**3:1-13**

*Karasina Yombo Talapemanga Nokonge Yema Kinia , Onongau Amboma Kinia Molonge Mele Unku Talo  
Se 3:1-7*

*Karasina Yombo Talapemanga Tapu-Yema Molonge Mele Unku Se*

<sup>1</sup> “Ye se yu ‘Karasina yombo talapemonga tapu-yemo molopo nokondu liemu paa papu.’ nimba pilielemo akumu kongono paa peanga tondolomo konopu mondolemo.” nirimu yemone ungu paa sika se nirimu. <sup>2</sup> Akumunga, Karasinga yombomanga tapu-yemo molomba yemo yu

ye paa sumbi nili ye se molopa, yombomane kanoko kiri  
pilingí ulu se yu-kinia naa peli yemo molopili.

Tapu-ye molomba yemo yu ambo selumunga menu mindi  
molopili.

Yu molopa kondopa, ulu peangama mindi

konopu kimbu sipa, kimbu ki kangi konopu mélema yakala kolopa sembá mele  
 mimi sipa nokopa,  
 yombomane yu kanoko peanga pilku yunga unguma  
 liku awi singí ulu peangama mindi sepa,  
 yunga ulkana onge yomboma 'Sukundu wangi.' nimba  
 nokopa kondopa,  
 'Pulu Yemonga unguma, yomboma paa mimi siku pilingí  
 mele sumbi sipa mane simba mele mimi sipa pilipa,  
 aku sipa yemo molopili.

<sup>3</sup> No nomba amu naa topa,  
 yomboma-kinia mumindili kolopa opa naa sepa,  
 yomboma kinia taka lepa molopa,  
 irinale konopu sipa sembá yemo naa molopa,  
 kou-mone olandopa konopu naa mondopili.

<sup>4</sup> Yunga ambo bolangoma nokopa kondopa, yunga bolangoma  
 yunga unguma taka leko pilku liku, liku awi siku molonge mele mane sipili.  
<sup>5</sup> (Ye sene yunga ambo bolangoma nokopa kondomba mele naa piliemu liemu Pulu  
 Yemonga yombo talapemo nambi sepa, "Molko kondangi." nimba, nokombaye?  
 'Manda mólo.' Akumu pilipuli 'yunga ambo bolangoma nokomba mele u kanani.'  
 nimbu nikiru.)

<sup>6</sup> Ye kokele Karasinga ye molombamo Karasinga yombo talapemonga tapu-ye se  
 naa molopili. Aku sipa yemo tapu- yemo molopale kara pumbá kinia Pulu Yemone  
 'kurumanga nokoli, depelemo kote sendepa "Kara purumumunga mindili nani."  
 nirimu mele yu aku sipa sembá kinia manda naa sembá 'kene wale mare awisili mele  
 Karasinga yemo molopa umbu-konopu pemba kinia 'Tapu-yemo molopili.' nieni.'

<sup>7</sup> Yu molomba mele ungu se pea nikirula. Tapu-ye molomba yemo ultu molonge  
 yombomane yu kanoko peanga pilku 'Yu ye peangamo.' ningí yemo mindi tapu-yemo  
 molopili. Yu tapu-yemo molomba kinia ultu molemele yombomane "Yu ye kirimu."  
 ningí kinia ultu-yombomane ningu kinjingí unguma 'kurumanga nokoli, depelemone  
 lipa tapu-yemonga melu lemba kinia kanu yemo molopa kinjimba.

*Se: 3:8-13*

*Karasinga Yombo Talapemanga Kongono Sendeli Yema Kinia Amboma Kinia  
 Molonge Mele Ungu Se (3:1-13 pali)*

<sup>8</sup> Karasinga yombo talapemonga kongono sendeli ye molongema ono kepe aku siku  
 mele molko kondangi:

Yombomane ono kanoko peanga pilku ononga unguma  
 liku awi siku, 'ono olionga kongono sendeli yema molongi liemu papu.' ningí uluma  
 sekole kongono sengendo mimi siku pilku taka leko senge yema molko;  
 konopuna ungu lupa pilku kerena ungu lupa ningu  
 naa seko, yombo marendo ungu lupa ningu  
 marendo topele toko ungu lupa ningu naa seko;  
 no-tondolo awisili nongo amu naa toko,  
 'Karasinga, yombomanga kongono sendepole  
 kou-mone awisili limbu.' ningí yema naa molangi.

<sup>9</sup> Kanu yema, olio Yesusi Karasini olionga nimba senderimu lipa tapondolemo mele  
 'Sika.' nimbu kuru mondolemolo yomboma Pulu Yemone ungu lopi serimuma  
 nimba para sirimu ungu-sikama paa ambolonge yema molangi. Onone ungu sikama  
 ambolongendo konopumuni pilkuli 'Pulu Yemone kanopa kiri pilielemo ulu se  
 konopuna naa pelemo. Kongono selioma sepo kondolio lémo.' ningú pilkuli, ungu  
 sikama ambolangi.

10 Molonge mele u manda manjiku kanokole, ono molko kondoko, yombomane kanoko kiri pilingí ulu se ono kinia naa pepili molongi liemu ‘Karasinga, yombo talapemonga kongono sendeli yema molangi.’ nieni.

11 Amboma kepe, aku siku mele  
yombomane kanoko kiri pilingí uluma naa seko,  
uluma senge mele mimi siku pilku  
taka leko seko molonge amboma molko,  
yombo senga ungu-bulkundu naa nindiku,  
molko kondoko, ononga kongonoma mimi siku pilku  
seko kondonge amboma molangi.

12 Karasinga yombo talapemonga kongono sendemba yemo yu  
ambo selumunga menu mindi molopili.

Yunga ambo bolangoma nokopa kondopa, yunga bolangoma  
yunga unguma taka leko pilku liku, liku awi siku molonge mele mane sipa  
kondopili.

13 Yombo talapemonga kongono seko kondonge yema yombomane liku awi siku  
ononga imbima ambolko paka tondolemele; Karasi Yesusi , ‘Sika.’ ningu, kuru  
mondolemele mele olandopa kuru mondokole, aku siku kuru mondolemele mele  
pipili naa kolko yomboma sumbi siku ningu silimilila.

*3:14-16*

### *Pollone Timoti I Pepámo Topa Sirimumunga Ungu-Pulumu*

14 I pepámo nu simbundu topo molopole ‘Nu kanambo.’ nimbu ‘Nu molenona nondopo paa wambo.’ konopu lepo molio. 15 Aku-na-kolo ‘Ulu sene na pipi simba kinia manda nondopo naa ombónje kene’ nimbuli ‘Pulu Yemonga yombo molemelema seko molonge mele piliani.’ nimbu i pepámo u topo sikiru. Aku yomboma konde molopa mindi puli Pulu Yemonga yombo talapemo. Aku talapemo ungu-sikamo lipa tapondopa tondolo pumba pepili nilimú talapemo. Ungu-sika akumu ulkamo mele, Pulu Yemonga yombo talape akumu ungu-sikamonga ulka-simu mele.

*3:16*

### *Pulu Yemonga Ulumanga Ulu-Pulumu Paa Olandopamonga Ungu Se*

16 U Pulu Yemonga ungu se yuni mane sirimu ungu lopi serimumu kiniá mona nimba para sirimu aku ungumuni olio Pulu Yemonga yomboma molopo yuni kanopa peanga pilielemo uluma semolo mele lipa ora silimú aku ungumunga ulu-pulumu paa tondolomo, yombomane aku ungumunga pulumu manda toko mania naa mundungi. Aku ungu-pulumu i-sipa:

Yu mana-ye se omba mona molorumu.

Yu ulu-peangama sepa molopa kondorumu mele

Minimuni lipa ora sirimu.

Mulu-koleana angellomane yu kanoringi.

Yunga semanemo ma-koleana pali

‘yunga yombomane, toko siliku andoringi.

Yomboma kanu semanemo pilkuli

‘Sika.’ ningu kuru mondoringi.

Pulu Yemone yu mulu-koleana olando lipa,

yu u ye tondolomo molorumu kolea

tondolo pa selina memba pumba mondorumu.

*Yombo Marene Kolo Toko Nilimili Ungumane Yombomanga Konopuma Topa Bulu-Balu Sindilimú Ungu Se*

<sup>1</sup> „Kiniá ulu mare wendo olemomonga ungu mare, Mini Kake Sélimuni i-sipa mele sumbi sipa nimba para silimú: Mulu ma pora nimbá walemanga kolo toli kurumane ungu ningíma kinia, kuru marene mane singí unguma kinia, yombo marene pilkuli Karasi ‘Sika.’ ningu kuru mondonge mele munduku kelenge. <sup>2</sup> Kanu unguma ye topele-mapele tolimate kolo toko mane silimili. Kanu yemanga penge-kikimi naa pepa, ononga konopumuni naa pilku ulu-pulu-kiri selemele mele naa pilku molemele. <sup>3</sup> Kanu yemane mane siku ninguli: “Yema ambo naa liku amboma ye naa pangí.” ningu, kere-langi mare imbi sikuli “Aku kere-langima kalaro molemo kene mi leko naa naa!” nilimili. Aku-sipa na-kolo kere-langi akuma Pulu Yemone ‘Olio ‘Yesusi yu sika.’ nimbu kuru mondopo, ungu-sikama pilipu limulú yombomane nangi.’ nimba serimu. Aku kere-langima lipu Pulu Yemo-kinia “Ange.” nimbu nomolo kinia unguri mólo. <sup>4-5</sup> Pulu Yemone serimu mélema pali peanga kanumu. Pulu Yemonga ungumu kinia olione Pulu Yemo-kinia ungu nimulú ungutolone kere-langi kinia mélema pali Pulu Yemonga méle kake selima lemba akumunga kere-langi akuma munduku kelko naa nonge kinia manda mólo. Pulu Yemo-kinia “Ange.” ningu liku nonge kinia unguri naa sembá.

4:6-16

*Timoti Karasinga Kongono Sendeli Ye Peangamo Molomba Mele Ungu Se*

<sup>6</sup> I nikiru mele „Karasinga, genupili ‘Aku siku sangi.’ ningu mane sini kinia, nu Karasi Yesusinga kongono sendeli ye peangamo moloni. Olio ungu peangama ‘Sika.’ nimbu kuru mondolemolo unguma kinia, Karasinga ungu-puluma mane sirimuluma kinia, u kepe yandopa kepe pilku liku seko molenoma, ‘Nanga konopu minitolonga kere-langima.’ ningu, pilku liku sení kinia nunga konopu minitolo tondolo mundupa pepili moloni. <sup>7</sup> „Juda yombomanga, aroma topa Pulu Yemonga ungumu topa mania mundumba selemolo kange kirima tolemele akuma bulu siku, ‘Pulu Yemone kanopa peanga pilielemo uluma mindi pilipu sambo.’ ningu aku uluma mimi siku pilku kondoko seko molou. <sup>8</sup> Sika ‘kangimu enge nipili.’ nimbu ulu mare selemolo kinia akumu peanga. Aku selemolo kinia kangimu sika enge nilimúmunga sika olio wallokalte lipa tapondolemo. Aku-na-kolo Pulu Yemone kanopa peanga pilielemo uluma mimi sipu pilipu semolo ulu akumu paa olandopa peangamo. Aku semolo ulumuni olio lipa tapondopa, kiniá ya mana molemolo mele kinia pe mulu-koleana molomolo mele kinia simbamonga akumu paa olandopa kene Pulu Yemone kanopa peanga pilielemo uluma mimi siku pilku seko molou.

<sup>9</sup> I nikiru ungu akumu paa sika. Aku ungumu yombomane konopu talo sepa naa pepili ‘Paa sika.’ ningu kuru mondonge kinia papu. <sup>10</sup> Alieli konde molopa mindi puli Pulu Yemone yomboma pali Lipa Tapondopa Mindili Nolemolá Aulkana Wendo Limú Yemo yuni paa sika olio ‘Yu sika.’ nimbu kuru mondolemolo yomboma lipa tapondopa mindili nolemolá aulkana paa sika wendo limú. Aku selemomonga pilipuli, ‘Yuni olio lipa tapondopa sepa kondomba.’ nimbu nokopo molopole olio yunga kongonoma tondolo mundupu kála-sepo selemolo.

<sup>11</sup> I ungu nikiruma pali „andi Epesasi Karasinga yomboma pali, ningu siku, ono seko molonge mele mane siku molou. <sup>12</sup> Nu sika ye-kangomo mindi, aku-na-kolo ‘Yombomane ‘Nu ye yamu mólo. Nu pilipa kondoli naa peli yemo.’ konopu leko nunga ungumu bulu singí aulka se naa liepili. Nunga ungumu pilku liengi.’ ningu moloyo. ‘‘Karasi, sika.’ ningu kuru mondolemele yomboma na molopo sembó mele manda manjiku molko senge mele kanangi.’ ninguli ninimuni, ungu peangama ningí mele nu aku siku ningu, molko peanga senge mele nu aku siku selko andoko, yomboma konopu mondonge mele nu aku siku konopu mondoko; ‘Karasinga unguma

kinia yuni 'yombomanga' nimba senderimu sendelemo mele, 'Paa sika.' ningu kuru mondoko molonge mele aku siku seko; ulu peangama manjiku seko, Pulu Yemone 'ulu kake selima' nimba kanolemo uluma seko, konopu kimbu sikuli ninimuni; aku uluma seko molou.

<sup>13</sup> Na u naa wambo nuni Pulu Yemonga bokuna ungu molemoma yomboma piliangi kambu toko, aku ungumanga ungu-puluma yomboma ningu siku, 'Karasinga yomboma seko molonge mele, mane siku molani na wambo. <sup>14</sup> Karasinga yombo talapemonga tapu-yemane nu ambolko , "Pulu Yemone 'Yunga kongonomo seko kondani.' nimba lipa tapondopili." niringi kinia, Pulu Yemone ungu-umbu tondorumumu ye sene pilipale yando nu nimba sirimu kinia Pulu Yemone 'nu kongono sani.' nimba tondolo sirimu akumu nu munduku naa keliei. <sup>15</sup> Aku tondolomo ambolko kondoko kongonomo tondolo munduku sei. Aku kongonomo ambolko seko kondoko moloni mele yombomane pali kanangi. <sup>16</sup> Nu moloni mele kinia, nuni yomboma mane sini unguma kinia, aku ulutolo nokoko kondani. Siye naa kolko tondolo munduku aku siku sení kinia aku siku senimunga Pulu Yemone nu kepe nunga ungumu pilingí yomboma kepe pea lipa tapondopa mindili nolemolá aulkana wendo lipa yu kinia pea molko kondonge aulkana lipa mondomba.

## 5

5:1—6:2

*Ambo-Wayama Kinia Tapu-Yema Kinia Kongono Kendemande We Sendeli Yomboma Kinia Timoti Yu Kinia Onone Seko Molonge Mele Unru Mare Pollone Timoti Mane Sirimu Unguma*

5:1-2

*Pollone Timotindu "Yomboma Kanokole 'Nanga Pulu Lemó Yombo Kandima.' Ning Kanou." Nirimu Ungumu*

<sup>1</sup> Kiniá Karasinga yombo talapena molemelema-kinia sení mele niembo:,

Ye-anda se iri naa tani. 'Sepa kinjimba kinia kanokole, 'Yu nanga lapamo.' ningu taka leko mane sieni.

Nunga genali nokolena mele aku siku kango-yema nokani. <sup>2</sup> Ambo yuma 'Nanga anupilima.' ningu,

ambo-wenepoma 'Nanga kemulupili.' ninguaku sikula nokani. Aku-na-kolo ambo-wenepoma nokonindu 'Na kinia ono kinia umbuna se wendo naa opili.' ningu paa mimi siku kanoko nokou.

5:3-16

*Pollone "Namelele Ambo-Wayama Nokongeye?" Nirimu Unru Se (5:1—6:2 pali)*

<sup>3</sup> Ambo-wayama yombo marene ono liku naa tapondonge kanuma paa liku tapondoko nokani. <sup>4</sup> Aku-na-kolo ambo-waya se yunga bolangoma molo yunga bamupilima molongi liemu kanu yombomane 'Pulu Yemonga ungumu pilipu samili.'

ninguli u kumbi leko ononga yombo pulu lemóma nokoko, kanu yomboma ono bolangoma moloringi kinia anupilini ono nokoringimunga onone kiniá aku siku pundu toko kanu ambo-wayama liku tapondoko nokangi. Aku siku selemele uluma Pulu Yemone kanopa peanga pilielemomonga aku siku sangi. <sup>5</sup> Ambo-waya se yu yombo sene nokomba yombo se naa molemomonga yu paa sika ambo-waya penge-akoli molemo ambo akumu 'Pulu Yemone na sika lipa tapondopa nokomba.' nimba pilipale, ipulieli tangoli kepe Pulu Yemo-kinia ungu nimba 'Liku tapondou.' nimba mawa sepa molemo. 'Kanu sili ambo-wayama liku tapondoko nokoni kinia peanga.,

<sup>6</sup> Ambo-waya se yu yuyu konopumuni pilipa wapora topa uluma selemo ambo kanumu yu sika we molemo-na-kolo ambomo yombo kololimu mele molemo. <sup>7</sup> Kanu ambo-wayama kinia ononga yomboma kinia 'Yombomane kanoko kiri pilingí uluma

naa sangi.' ningu ono aku siku mane sieni. <sup>8</sup> Yombo sene yunga anumu lapatolo kinia kemulupili genupili mélse mólo tolemo molo umbuna se pelemo kinia naa lipa tapondopa nokopa, yunga pulu lemó yombo wema kinia naa nokomu liemu aku selemo yombomo aku sipa selemomonga yu , 'Karasi sika.' nimba, kuru mondolemo mele mundupa kelepa bulu sipa, paa sepa kinjilimú. Karasinga yombo naa molko ultu molemele yombomane seko kinjilimili mele maniadopa, kanu yombomone sepa kinjilimú mele olandopa.

<sup>9</sup> 'Karasinga yombo talapena molemele ambo-wayamanga imbima tamili.' ninguli, ambo-waya mare, sika ambu leko, waltikele mindi ye pulima mindi 'ambo-wayama' ningu imbi tangi. <sup>10</sup> Kanu ambo-wayama onone u seringi mele piliangi. U ononga bolangoma kere-langi siku nokoko kondoko, yombo ponengema "Ulkana wang." ningu nokoko kondoko, Karasinga yombomanga kongono kendemande sendeko, umbuna pelemo yomboma liku tapondoko, aku siku ulu peangama tondolo munduku seko moloringi mele ningu singí pilingí ambo-wayamanga imbima mindi tangi.

<sup>11-12</sup> Aku-sipa na-kolo ambo-waya kondema 'Ambo-wayama.' ningu imbi naa tangi. Ono Karasi konopu mondoko pilielemele mele ye se lupa konopu mondoko pilingí ulumuni topa mania mundumba kinia u kokele ambo-wayama molkole "Karasinga kongonomo manjipu sendepo molomolo." ningu, ningu panjeringi mele munduku kelenge kinia , 'Pulu Yemone, ono 'Seko kinjeringi.' nimbá kene ononga imbima ambo-wayamanga imbima kinia sere leko naa tangi. <sup>13</sup> Ulu se i-siku selemelela: Ono 'yomboma kinia we-unguma nimbu kopu sepo molamili.' ningu yombomanga ulkamanga andokole kongono naa seko siye kololi ulumu mindi pilku liku selemel. Aku mindi mólola. Yombomane ulu se selemel mele naa kanoko yombomanga anju anju we nindiku semane toko siliku andoko, yombo mare ulu seko ungu nilimilima 'paa piliamili!' ningu andoko mangilku pilku komu sendeko molemele. Yomboma ungu kiyongo-ningu nilimilima wa pilku anju pungu ningu silimili. Aku siku selemel mele olio kanopo kiri pilielemolo uluma ono andoko selemel. <sup>14</sup> Aku siku selemel monga nane ambo-waya kondema senge mele i-sipu nikiru: "Ono kelko ye pungu, bolango mengo, ononga yema kinia bolangoma kinia nokangi." nikiru. Aku senge kinia olionga opa-toumanga sene onone seko molonge ulu se kanokole olio Karasinga yombomanga bulkundu ungu kiri se nindingí aulka se naa lemba. <sup>15</sup> Mare u moloringi mele koronga munduku kelko bulu siku , 'kurumanga nokoli, Setene lombili pulimili kene , 'Wemaaku siku konopu topele toko naa sangi.' ningu ya nikiru mele sangi.,'

<sup>16</sup> Ambo se Karasi 'Sika.' nimba kuru mondolemo ambo se yunga pulu lemó ambo mare ambo-wayama molemelema aku ambomo yuni ono lipa tapondopa nokopili. Karasinga yombo talapemone kanu ambo-wayama nokongendo umbuna se naa sepili. 'Karasinga yombo talapemone ambo-waya sika penge-akolima mindi nokangi. Wema nokonge kongonomone penge-akolima nokonge aulkamo pipi simba.' ningu aku siku sangi.

5:17-20

*'Karasinga Yombomane Ononga Tapu-Yemane Kongono Seko Kondolemelema Nokoko Kondangi.' Nirimu Ungu Se (5:1—6:2 pali)*

<sup>17</sup> Karasinga yombo talapemo kinia, talapemonga mélema kinia, paa nokoko kondolemele tapu-yema we-yombomane olandopa kape ningu méle olandopa kalonge kinia papu. Pulu Yemonga ungumu ningu siku, yomboma mane silimili tapu-yema kepe paa sika aku siku méle kalonge kinia papu. <sup>18</sup> Pulu Yemonga bokuna aku sengemonga ungu se nimba molemo kene aku siku sangi. Aku ungumuni nimbale: " 'Rasi-witi mongoma wendo pupili.' ningu kongi kaoma witi-unjuma

andoko kulungí kinia  
 'Ono witi mare naa nangi.' ningu  
 kerema pipi singí kinia  
 manda naa sembá kene  
 pipi naa siengi.  
 'Kongi kaoma witi nonge senge kinia  
 'Ononga méle kalólimu papu nokomele.'  
 ningu siye kolangi.."

nimba aku sipa ungu se molemo. Ungu se molemóna, akumuni nimba:  
 "Kongono sendelemele yomboma  
 papu méle kalolima lingí."  
 nimba molemóna.

<sup>19</sup> Yombo sene nimba: "Tapu-ye sene i-sipa sepa kinjemu." nimba kinia naa piliani. Yombo talo molo yopokone "Sika aku sipa semu. Olio mongomone kanomulu." molo "Komumuni piliemulu." ningi kinia mindi 'Sika aku sipa semu lepomo.' ningu piliani. <sup>20</sup> Tapu-ye marene ulu-pulu-kiri mare 'sika, senyi liemu we-yomboma pilku molangi ono mane siku iri tani. 'Ono mane siku iri toni kinia we-tapu-yema pilkuli pipili kolko 'Olio aku sipu naa samili.' niengi.' ningu yomboma pilku molangi ono mane siku iri tani.

**5:21-25**

*'Timoti Yu Yuyu Kongono Selemoma Nokopa Kondopili.' Nirimu Ungu Se (5:1—6:2 pali)*

<sup>21</sup> Nane nundu nimbú mele Pulu Yemo kinia Karasi Yesusi kinia Pulu Yemonga angelloma kinia akumane 'Papu nikinu.' ningu molangi. Nane nundu tondolo mundupu nimbili: "Nuni "Sei." nikiru mele paa aku siku sumbi siku sei." nikiru. "Yomboma nokoko 'Sangi.' ninindu ono kinia pali selu siku nokani. 'Yombo mare konopu mondoni yomboma molo nunga pulu lemó yomboma manjiku taka leko nokoko, wema tondolo munduku nokoko, naa sani.' nikiru.

<sup>22</sup> Nuni ye se liku 'Pulu Yemonga tapu-ye se molopili.' ningu yu kini ambolko lisiku ningu naa mondou. Yema mimi siku kanoko apurukuli ningu mondou. Ningu mondoni ye marene pe ulu-pulu-kiri senge kinia nu ono kinia umbunama menge akumunga mimi siku kanoko tapu-yema ningu mondani. Ulu peangama manjiku seko, Pulu Yemone 'Ulu kake selima.' nimba kanolemo uluma seko, konopu kimbu siku moloyo.

<sup>23</sup> ('Aku-sipa na-kolo 'Sumbi sipu molambo.' ningu, umbu-no manjiku noleno mele pe aku siku naa sani. Nu kuru alieli topa nunga olona manda naa selemo kene 'Kuru pora nimba kangi tondolo pupili.' ningu no-waene kolte nani.)

<sup>24</sup> 'Tapu-ye marene ulu-pulu-kiri selemelena sumbi sipa para lemó akumunga kotena u naa pangí kote pilielemo yemone u seko kinjilimili mele sumbi sipa pilielemo; ye marene ulu-pulu-kiri lopi seko selemelena u sumbi sipa para naa lemba-na-kolo pe kotena mona lemba. <sup>25</sup> Aku sipala, yombo marene ulu peangama selemelena sumbi sipa mona lemó; marene selemelena lopi sepa pelemo, aku-na-kolo pe lopi sepa naa pemba. Pe akuma pali mona lemba.

## 6

**6:1-2**

*Kongono We Sendeli Yombomane Ononga Nokoli Yomboma Liku Awi Singí Mele Ungu Se (5:1—6:2 pali)*

<sup>1</sup> 'Karasinga yema molemele, yombo kendemande kongono we sendeli yombomane 'Ononga kongono nokoli yombo akuma peangama.' ningu ononga unguma pilku

liku, liku awi siku molangi. <sup>1</sup> ‘Kongono nokoli yema kinia ultukundu molemele yombomane sepo kinjimulu mele kanokole, Pulu Yemonga imbimu kinia, Karasinga unguma Pollo kinia ye mare kinia onone mane siringi unguma kinia, ungu-taka tondoko naa niengi.’ ningu aku siku taka leko kongono seko kondoko molangi.

**6:2-11,17-19**

*Méle Kande-Kandema Liku Taltolemelemanga Ungu Pokore*

**6:2-11**

*Méle Kande-Kandema Konopu Mondolemelemonga Ungu-Pulu Se*

<sup>2</sup> Kendemande-yomboma ononga kongono nokoli yomboma Karasinga yomboma molemele kinia ‘Ono kinia olio kinia genupili molemolomonga ononga unguma pilipu naa limulu kinia unguri mólo.’ ningu ononga unguma bulu siku kongono sumbi siku naa senge kinia kiri. Aku siku paa naa sangi! ‘Kongono nokoli yomboma olionga genupilima. Ononga unguma pilipu lipu kongono sepo kondomolo kinia ono molko kondonge.’ ningu ononga kongono ningíma olandopa seko kondangi. Karasinga yombo naa molemele nokoli yombomanga unguma pilku liku kongono we selemene mele naa seko, olandopa seko kondangi.

I nu mane sikiru mele ‘Yomboma paa aku siku sangi.’ ningu tondolo munduku mane sieni.

<sup>3</sup> Olionga Ye-Awili Yesusi Karasinga ungu akumu ungu-sikama mindi pelemo, kolo toli ungu se naa pelemo; akumu Pulu Yemone olio ‘I-siku i-siku seko molko kondangi.’ nimba mane silimú ungumu kinia, kanu unguma ye sene mundupa kelepa ungu se lupa kolo topa mane simu liemu <sup>4</sup> yu kara pumba yuyu pilielemo mele unguma mindi ‘Ungu peanga sikama.’ nimba kanu unguma mindi konopu mondopa ‘Na pilipa kondoli pelemo yemo molio.’ nimba pilielemo-na-kolo yu konopu naa pelemo, ungu selu kepe mimi sipa naa pilielemo. ‘Konopu siembo.’ nimba yu ungumanga pulumu yomboma kinia keru-kuru lipa angelema nilimú. Aku sipa selemo ulumane i-sipa uluma ‘Yomboma sangi.’ nilimú: Yombo marene anju yando imbi olandopa molemo yomboma kanokole ono kinia konopu kiri panjiku, yomboma kinia irinale seko, yombomanga ungu-bulkundu nindiku, yombo sene ungu se nilimú kinia molo ulu se selemo kinia konopu awisili kimbu siku, <sup>5</sup> alieli konopu sumbi sipa naa pelemo yomboma kinia irinale selemene. Aku siku selemene yema ungu-sikama konopuna naa pelemo. Ononga konopumuni pilkuli, ‘Pulu Yemonga kongono sendemolo kinia méle kande-kandema lipu kamakoma molomolo.’ konopu lemele.

<sup>6</sup> Sika Pulu Yemonga kongono sendemba yombomoaku sipa sembamonga méle peanga awisili limba, na-kolo akumu i-sipa mele: Pulu Yemonga kongono sendeli yombo sene konopumuni pilipale ‘Nane Pulu Yemonga ungumu pilipu sepo molio. Méle taltokoroma manda sekemo.’ konopu lepa konopu pe nipili molomu liemu yuaku sipa molemomonga yu méle kande-kandema taltolemo none selemomonga yu molopa kondolemo. <sup>7</sup> Olio meringi kinia mélse naa meli we orumulu kanumu. Kelepo kolomolo kinia mélse naa meli we pumulúla. <sup>8</sup> Mulu-maminia kepe kere-langí kepe manda semu liemu konopu sipu pe nipili molamili. <sup>9</sup> Yombo sene ‘Na méle kande-kandema taltopo yombo kamakomo molambo.’ konopu lepale kanu sili mélema limba selemomonga ‘kurumanga nokoli Setenene’ yu kondi tolemo kinia mélema limbando sepa kinjilimú. Kanu yemone aku sipa konopu lemó kanumu yunga konopuna melu mele lemó. Méle kande-kandema konopu kimbu sipale yu amu topa molopa kinjimba aulka kirina kamu pulimú. <sup>10</sup> Kou-mone konopu mondoli ulu akumu ulu-pulu-kiri awisili wendo olemomonga pulumu. Yombo marene ‘Kou-mone liemboa!’ ningu konopu paa olandopa kimbu sikuli ungu-sika kuru mondolemelemo

munduku kelkole konopuna pilku kiri pilku konopuna sukundu mindili awisili nongo molemele.

*6:11-16*

*Pollone Timoti Yuyu Sepa Molomba Mele Mane Sirimu Ungu Se*

<sup>11</sup> Aku-sipa na-kolo nu Pulu Yemonga yemo kene ulu-pulu-kirima munduku kelko kowa punguli, ulu-peanga i-silima mindi konopu kimbu siku seko molani: „Ulu sumbi nilima kinia, Pulu Yemonga kongonomo kinia, kuru mondoli ulumu kinia, yomboma konopu mondoli ulumu kinia, ulu peangama senindu tondolo munduku ambolko munduku naa kelieli ulumu kinia, yombo sene nu sepa kinjimba kinia pundu naa toko, taka leko mololi ulumu kinia, ‘Aku sipa uluma mindi sepo molambo.’ ningu konopu kimbu siku molani. <sup>12</sup> Yombo se méle kalólimu limbando yomboma kinia pea keru-kuru liku lisilimili kinia paa tondolo mundupa lisipa siye naa kololemo mele Karasinga ye ‘Sika.’ ningu kuru mondoleno yemo molenomonga paa aku siku ‘Méle kalólimu liembo.’ ningu keru-kuru paa liku tondolo munduku lisei! Nu ‘konde molopa kondopa mindi puli ulu-pulumu paa lipu ambolambo!’ ningu tondolo munduku lisiku siye naa kolko molani. ‘Konde molopa kondopa mindi puli ulu-pulu’ nikiru kanumu yombo awisili pilku molangi nuni ‘Sika.’ ningu kuru mondorunu mele ningu para sirinu kinia Pulu Yemone ‘Konde molopa kondopa mindi puli ulu-pulumu simbú lieni.’ nimba nu u mangilierimu kanumundu nikiru.

<sup>13</sup> Pulu Yemone mélema pali ‘Konde pupili.’ nilimú yemo kinia, Yesusi Karasi Pondiasi Paillatenga kumbikerena Yesusi Karasi yunga ungu-pulu sikamo pipili naa kolopa sumbi sipa nimba para sirimu yemo kinia, kanu Pulu Yemo kinia kanu Yesusi Karasi kinia pilku kanoko molangili i kongonomo nu paa sení mele nimbu sipu nimbili: <sup>14</sup> ‘Nu Pulu Yemonga kongonomo sendani.’ nimbu nu nimbu taltorumulu mele pilku, Pulu Yemonga ungumu nokoko kondoko molou! ‘Aku ungumu yombomane kanoko kiri naa piliangi. Nane ungu se sembó kanoko kiri naala kanangi.’ ningu kalaro mololi uluma kinia ulu kirima kinia naa seko Pulu Yemonga kongonomo mindi seko kondoko molani. Olionga Ye-Awili Yesusi Karasi mona yando ombá kene nu aku siku mele munduku naa kelko seko mindi molani. <sup>15</sup> Yu yando ombá walemo Pulu Yemone u nimba taltorumu aku walemonga “Pu.” nimbá kinia mona yando ombá.

*6:15-16*

*Pollone Pulu Yemo Kape Nirimu Ungu Se (6:11-16 pali)*

Aku sipa pilipa semba Pulu Yemo yu  
molopa kondoli ulu-pulumu pelemo yemo,  
olio nokolemele yombomanga engema maniadopa,  
yuni olio nokolemo engemo olandopa,  
ye nokoli kingimanga pali  
yu ye nokoli kingi awili olandopamo,  
yombo awilimanga yu ye awili olandopamo.

<sup>16</sup> Kololi ulu-pulumunga yu mindi manda naa kolomba,  
alieli molopa mindi pulimú pumbá.

Yu molemona pa awili-sepa selemomonga  
olio akuna manda sukundu naa pumulú.

U yombo sene yu naa kanorumu.

Kiniá yombo sene yu manda naala kanomba.

Kanu Pulu Yemo yunga imbi olandopa molemomo kinia  
yunga tondolomo kinia alieli pepa mindi pupili.

Aku sipa sepili.

*6:17-19*

*Pollone Yombo Kamakomando "Pulu Yemo Mindi Kuru Mondoko, We-Yomboma Kou-Mone Siku Liku Tapondangi." Nirimu Ungu Se (6:2-11 kinia pea)*

<sup>17</sup> Ya mana méle awisili taltolemele yombo kamakomando i-siku mane sieni: "Aku mélema kiri lemba kene kara naa pungu, 'Méle awisili taltolemolomonga manda molomolo.' naa niengi. 'Olio konopu sipu molamili.' nimba méle peanga awisili silimú simba Pulu Yemo , 'Sika olio nokopa kondomba.' , ningu pilku kuru mondoko nokoko molangi." nieni. <sup>18</sup> Kanu yombo kamakomando i-siku mane sieni: "Yomboma liku tapondoko, ulu peanga awisili seko, méle taltolemele mélema konopu kimbu siku naa molko, mare yombo méle mólo tombama popenge seko moke seko siengi." niyo. <sup>19</sup> "Aku senge kinia ono pe manda molonge ungumunga méle tondolo awisili taltonge kanu-kinia paa molko kondonge ulu-pulu sikamo liku ambolonge." ningu aku siku onondo niyo.

6:20-21

*Timotini Kongono Semba Mele Yu Yuyu Mimi Sipa Nokopili Ungu Se*

<sup>20</sup> Kango Timoti, Pulu Yemone nu kongono sirimumu mimi siku nokoko molou. Ma-koleamonga ungu wema, Pulu Yemone pilipa kiri pilielemo unguma kinia, kolo toli ungumane Pulu Yemonga ungumu topa mania mundumba selemo unguma kinia, naa pilku, bulu sieni. Aku ungumando kolo toko "Ononga pilipa kondoli pelemomane nimbu sikimulu." nilimili kanumu. <sup>21</sup> Kanu unguma yombo marene 'Sika unguma.' ningu kuru mondoringimunga Pulu Yemonga ungu-sikama u kuru mondoringi mele munduku kelko aulka lo litingi kene ,nu kanu unguma bulu siku naa piliani.,

,Pulu Yemone, ono we kondo kolopa molopili molangi.

,Aku pea nikiru.,

## PE-TIMOTI Pollone Ye TIMOTI Pepá PE Topa Sirimu Bokumu

*Pollone I Pepá Topa Sirimumunga Ungu Pulu Mare*

Pollo kinia **Timotitolonga** ungu-pulu mare bokumunga yakondo gomo 676 kinia gomo 998 kinia molemo.

Pilipa kondoli yombo marene pilkuli 'Ye Niro, Romo-Gapomano Ye Paa Awili Kumbina molorumu kinia Pollo wale talo-siku Romo ka siringi, ka-ulcana pepa i pepámo torumu.' ningu pilielemene. Yu kolea-awili Romo u kumbi leko ka siringi kinia we-ulka senga perimu (Lipa Mundorumu Yema 28:30) aku-na-kolo pe yu ka siringi kinia yu ka-ulka suluminia kiri senga panjeringi. 'Kolea akumu pa awili-sepa naa sepa, no molopa, ali sepa, serimu koleamo.' ningu pilielemene. I pepána 4:13 kanani. Aku suluminia kirina pepale i pepámo torumunje.

Ka-ulka nokoli yemane Pollo nokoko naa kondoringi. Yunga pulu lemó yomboma naala moloringi. Yu 'Nondopo kamu kolombo.' nimba pilierimula. Akumunga inia 1:16, 2:9, 1:15,17, 4:6-8 kanani.

'**Timoti** kolea-awili Epesasi molopili Pollone i pepámo topa sirimu.' ningu pilielemene.

**Timoti** yu kinia pea kongono andoko seringilimunga Pollone 'Yu ulu peangama sepa molopili.' nimba i pepámo topa sirimu. 'Yombomane yu umbuna siku mindili singí kinia kepe Pulu Yemonga kongonomo mundupa naa kelepa tondolo mundupa sepa molopili.' nimba i pepámo topa sirimu. "Yombomane kolo toko kondi tonge kinia komu sendeko naa piliani. Aku siku ungu nilimilima pilielemene yomboma ononga Pulu Yemo kuru mondolemele mele munduku kelielemene." nirimula.

**Pe-Timoti** 1:14 kinia **U-Timoti** 6:20 kinia Pollone **Timotindu** "Semane peangamo nokoko kondou!" nirimu. Akumundu **Pe-Timoti** 2:1,2; 3:8,10-12,14-16; 4:1-8,17 ungu mare molemola.

Ungu-pulu se: **U-Timoti** kinia **Pe-Timoti** kinia **Taitasi** kinia ungu awisili selu-sipa molemo mele i-sipa: **U-Timoti** 3:2-5 tapu-yema molonge mele ungu se **Taitasi** 1:6-9 molopa, **U-Timoti** 1:4 mele **Taitasi** 1:14 molopa, **U-Timoti** 4:12 mele **Taitasi** 2:15 kinia 2:6 kinia molopa, opa semolo ulumu kinia keru-kuru lipu lisimulú ulumu-tolo **Pe-Timoti** 4:7, 2:5 mele ungu mare **U-Timoti** 1:18-19 kinia 6:12 kinia molemo. Aku kene pepá yopoko peama liku sere leko mimi siku kanonu liemu papu.

Ya ungu-pulumu pora nikimu.

*Kolomongo-Awili 1-4pali*

**Pollone Timotindu " 'Pulu Yemonga Sika Kongono Sendeli Yemo Molambo.' Ningu Tondolo Munduku Seko Molani."**  
**Nirimu Ungumu**

1:1-2

*Pollone I Pepámo Tombando Pulu Polopa Torumu Ungumu*

<sup>1</sup> Na Pollo, Pulu Yemone na nimba taltorumu-na Karasi Yesusini "Nanga kongonomo sende-pu." nimba lipa mundorumu yemo molio. 'Karasi Yesusi kinia pea kopu seko molemele yomboma konde molko kondoko mindi pungí mele ungumu andopa yomboma nimba sipili.' nimba Pulu Yemone na nimba taltorumu.

<sup>2</sup> Nane Timoti nu nanga malo konopu mondoliomo i pepámo topo sikiru.

Lapa Pulu Yemo kinia olionga Ye-Awilimu Karasi Yesusitolone nu we kondo kolko seko kondoko, nuni wale marenga ulu mare seko kinjení kinia nu kondo kolko "Mindili nani." naa ningu, 'Nu konopu pe nipili taka leko molani.' niengili.

**1:3—2:13**

*Pollone Timotindu "Tondolo Pupili Molopa, Pulu Yemonga Kongonomo Sendembando Siye Naa Kolopa Semane Peangamo Pipili Naa Kolopa Molopili." Nirimu Ungu Se*

**1:3-18**

### *Semané Peangamo Pipili Naa Kolomolomonga Ungu Se*

<sup>3</sup> Nanga anda-kolepalimane Pulu Yemonga ungu-manema pilku liku seringi mele na aku sipu ulu selioma konopumuni pilipuli 'Se sepo kinjikiru.' nimbu naa pilielio. 'Selio mele Pulu Yemone kanopa peanga pilielemo.' nimbu pilielio. Aku kongonomo sendelio Pulu Yemo-kinia tangoli kepe ipulielo kepe ungu nimbu mawa sepo molopo, nuni seko moleno mele pilipu nunga mawa sendepole, yu-kinia "Ange." niliu. <sup>4</sup> Nu u kola serinu mele kelepo pilipuli 'Na konopu awili-sepo siembo. Nu kanamboa!' konopu lelio. <sup>5</sup> Nu moleno mele pilipuli, nu Pulu Yemonga ungumu 'Sika.' ningu kuru mondoleno mele kelepo pilielio. 'Kuru mondoleno mele kolo se naa tolono.' nimbu pilikiru. Nu kuru mondoleno mele bami LLoisi kinia aminia Yunisitolo u pilieringili. 'Olo kuru mondoringili mele nu aku siku kuru mondoleno.' nimbu pilipuli 'Pulu Yemo kinia "Ange." niliu.. <sup>6</sup> Nu aku siku pilku moleno mele pilipuli, nane nu ambolorundu kinia Pulu Yemone nu tondolo se we sirimu akumu yombomane 'Sepe tondolo awili sepa nopili.' ningu popo tolemele mele nu aku siku 'Pulu Yemone tondolo sirimumu enge paa olandopa nipili.' ninguaku tondolomone 'nu aliei enge ningu kongono sani.' nimbu nikiru. <sup>7</sup> Pulu Yemone olio pipili kololi ulu-pulumu naa sirimu. Tondolo puli ulu-pulumu kinia, konopu mondoli ulu-pulumu kinia, olio oliolio nokopo kondomolo ulu-pulumu sirimu kene 'aku siku kongonomo sani'.

<sup>8</sup> Akumunga, olionga Ye-Awilimunga ungumu 'yomboma, ningu sinindu 'Aku sembó kinia na mindili siku toko kondonganje.' ningu, mini-wale naa mundani. Na yunga kongonomo sendeliomonga ka-ulcana pelio akumu nu 'Aku siku ka singinje.' ningu, mini-wale naa mundani. 'Na semane peangamo topo simbú kinia Pollo mindili silimili mindili nolemo mele na aku sipu mindili síngi mindili nondu liemu unguri molo.' ningu kongono sani. Pe sika mindili síngi mindili nonu liemu Pulu Yemone nu tondolo silimúmuni nu tondolo munduku moloni. <sup>9</sup> 'Tondolo mundupu molamili.' nimba tondolo silimú Pulu Ye akumu olio lipa tapondopa kotena molopo mindili nolemolá aulkana wendo lipa yu-kinia pea molopo kondomolo aulkana lipa mondopa, olio nimba taltopa 'Yunga yombo kake selima molangi waa.' nirimu Pulu Yemo. Olio aku sipa lipa tapondopa nimba taltorumu akumu olione oliolio ungu se serimulumunga kanopale aku sipa naa senderimu. Yuni yuyu olio semolo mele pilipa nimba taltopa olio we kondo kolopale olio 'Waa.' nimba lipa tapondorumu. Paa koronga-u yuyu molopale yuni 'Karasi Yesusini olionga nimba sendembamonga olio we kondo kolopo 'lipu tapondombo.' nirimu, <sup>10</sup> aku-na-ko lo kiniá olionga Lipa Tapondopa Mindili Nolemolá Aulkana Wendo Lili Ye Karasi Yesusi mana ombo olionga nimba senderumumunga Pulu Yemone olio we kondo kololemo mele mona wendo orumu. Lipa Tapondoli Ye Karasi Yesusini kololi ulumu kamu topa mania mundupa, yunga semane peangamo 'Sika.' ningu kuru mondolemele ulumu, ni naa kolopa konde molopa mindi puli ulu-pulumu limulú aulkamo wendo ombo mona lierimu.

<sup>11</sup> Kanu semane peangamonga Pulu Yemone na 'Pollo, nimba taltopale, 'I semane peangamo andoko ningu siku, Karasini lipa mundorumu ye se molko, yunga ungumu yomboma mane sini yemo molani.' nirimu. <sup>12</sup> Na aku sipu kongono seliomonga

na aku siku mindili silimili mindili nolio. Aku-sipa na-kolo na ‘Sika.’ nimbu kuru mondolio yemo sepa molemo mele pilipuli, na semane peangamo ‘Sika.’ nimbu kuru mondolio ulumu kinia, yunga kongono sirimu seliomo kinia, yuni mimi sipa nokombamonga kiri naa lepa we lepa mindi pupili mulu matolo pora nimbá walemo wendo ombámonga pilipuli na pipili kolopo konopu umbuna pepili naa molio.

<sup>13</sup> „Timoti, nu Karasi Yesusini lipa tapondomba kinia nuni ‘Yu sika.’ ningu pilieleno mele kuru mondoko, Yesusi kinia yomboma kinia konopu mondokole nane unguma nu nimbu sipu, mane sipu, nirindu pilierinu mele mimi siku pilkuli aku siku mindi manda manjiku yomboma mane sieni. <sup>14</sup> Pulu Yemone nu semane peangamonga kongono sirimu akumu ‘Méle paa peangamo. Kou olandopa pulimú mélse mele.’ ningu nokoko kondani. Olionga konopuna Mini Kake Séli molemomone nu enge simbamone aku kongonomo mimi siku nokani.

<sup>15</sup> Esia poropinji „nu molenó, koleana molemele „Karasinga, yomboma pali na munduku kelieringi mele nu pilieleno. Kanu yombomanga Pikillusí kinia Emekenesitolone na munduku kelieringilila.

<sup>16</sup> Ye Onesiporas na ka-ulkana perindu kinia pipili naa kolopa, ‘Na konopu peanga liepili molambo.’ nimba wale awisili lipa tapondorumumunga Ye-Awilimuni yu kinia yunga yomboma kinia kondo kolopa lipa tapondopili. <sup>17</sup> „Na ka-ulkana perindu kinia yuni na pipili naa kolorumu nikiru akumunga ungu se niembo: „Yu kolea-awili Romo ombale na kála sepa koropa pe na molorunduna ombo kanopa lenderimu. <sup>18</sup> Kote walemo wendo ombá kinia Ye-Awilimuni yu kondo kolopa sepa kondopili. Na kolea-awili Epesasi molorundu kinia kepe yuni na wale awisili lipa tapondoru mele „Timoti, nu pilieleno kanumu.

## 2

2:1-13

*Pollone Timotindu “Nu Karasi Yesusinga Opa Seli Ami Ye Enge Nili Se Molani.”  
Nirimu Ungu Se*

<sup>1</sup> Nanga kangomo, „Pulu Yemone nu kongono sirimu akumu mimi siku nokani.’ nikiru, akumunga, Karasi Yesusinga we kondo kololi ulumuni nu sepa tondolo mundundopili. <sup>2</sup> Kanu-kinia yombo awisili pilku molangi nane nu nimbu sirindu ungu kanuma Karasinga ungumu nokoko kondolemele yema, yomboma manda mane siku kondonge ye mare ningu sieni.

<sup>3</sup> ‘Karasi Yesusinga opa seli ami-ye peangamo molio.’ ningu na mindili nolio mele mindili noni kinia ‘Unguri mólo.’ ningu tondolo munduku molani. <sup>4</sup> Ye se opa seli ami-ye se molopale, yu we-kongono lupa lupama konopumuni naa pilipa, yunga opa seli ye-awilimuni ‘yu selemo mele kanopa peanga piliepili.’ nimba aku kongonomo mindi tondolo mundupa pilipa molemo.

<sup>5</sup> Aku sipala, yombo se yombo mare kinia pea keru-kuru liku aulka lisilimili yombomo yu ‘Lisambo.’ nimba keru-kuru liku liseli ungu-manema pilipale lisilimú. Ungumanema naa pilipale lisemu liemu yu keru-kuru lipa lisilimúmunga méle kaloli se naa limú.

<sup>6</sup> „Aku sipala,„ yombo sene kalia kála-sepa sepa nokopa kondolemo yombomone kumbi lepa kere-langí awisili peangama paa limba.

<sup>7</sup> Ya „nundu, nikiru ungumunga puluma Ye-Awilimuni nu lipa ora simba kene nikiru mele paa mimi siku pilku molou.

<sup>8</sup> Yesusi, Pulu Yemone nimba taltorumu ye nokoli Karasimu, yu „ye nokoli kingi, Depitini kalopa liltimu yemo, kolopale lomboropa ola molorumu mele semane peangamo topo siliu, aku yemo „molemo mele, konopu kimbu siku molani. <sup>9</sup> Kanu

semane peangamo nane topo silipu andoliomonga yombomane 'Na Gapomano ungu-manema pulua topa sepa kinjeli yemo.' ningu na umbuna awisili siku ka silimili mindili nolio-na-kolo Pulu Yemonga ungumu ka manda naa silimili. <sup>10</sup> Akumunga, 'Pulu Yemone "Nanga yomboma molangi." nimba, nimba taltorumu yomboma kepe Karasi Yesusi kinia pea kopu seko molemelemonga pe mindili nolemolá aulkana wendo lipa yu-kinia pea molko kondonge aulkana lipa mondopili.' nimbu na alieli ononga nimbu mindili awisili noliomo 'Unguri mólo.' nimbu taka lepo mindili nombo molio.

<sup>11</sup> Ungu se, akumu paa sika mania naa pumbámonga olione 'Aku ungumu sika.' nimbu manda kuru mondolemolo ungu se, akumu i-sipa:

'Karasi kinia pea kolomulu liemu  
yuconde molomba mele  
olio yu kinia peaconde molomolo;

<sup>12</sup> olio mindili nomolo kinia  
tondolo mundupu molopo siye naa kolomulu liemu  
olio yu kinia pea ye nokoli kingima molopo  
mélema nokomolo;  
olione 'yombomando' "Yesusi yu  
kanopo imbi naa silimulu.

Yunga yomboma naa molemolo." nímulu liemu  
yuni 'Lapando' "I yomboma  
na kanopo imbi naa siliu.

Ono nanga yomboma mólo." nimbála.

<sup>13</sup> Yuni yunga unguma topele naa tolemomonga  
'olio u 'Yu sika. Yunga ungumu sika.' nimbuli  
pe konopu topele topo, 'Yu sika mólo.  
Yunga ungumu sika mólo.' nímulu liemu

yuni nilimú mele sika wendo olemo ombá.'  
'ungu akuma nimba molemo mele paa sika.'

2:14-26

*Pollone Timotindu "Nu Pulu Yemone Kanopa Peanga Pilimba Kongono Sendeli Yemo Molani." Nirimu Ungu Se*

<sup>14</sup> 'Timoti,' 'Aku unguma yomboma alieli pilku molangi.' ningu alieli ningu sieni. 'Pulu Yemo pilku molou.' ningu yu mangilkuli yombomando i-siku nieni: "Ono naa lipa tapondopa, angelema ningí ungumuni pilku molonge yomboma 'Sika.' ningu kuru mondolemele mele topa mania mundulimú ungu lupa lupama angelema naa ningu molangi." niyo. <sup>15</sup> 'Pulu Yemone na kanopa peanga pilimba mele molambo. Yunga kumbikerena pipili naa kolopo molambo.' ningu yu kanopa peanga pilimba kongonoma mindi tondolo munduku seko molko, aku ungu-sikamanga puluma mimi siku pilku sumbi siku mane silinu yemo molani. <sup>16</sup> Mana we-ungu lupa lupa nilimilima, Pulu Yemone pilipa kiri pilielemo unguma, naa pilku bulu sieni. Aku unguma pilkuli selemele yomboma Pulu Yemonga unguma bulu siku yu kanopa kiri pilielemo uluma selemele mele pe aku sikula olandopa seko mololko pungí kene 'paa komu naa sendeko molani'. <sup>17</sup> Kanu mane silimili unguma erili kanga selemo mele selemo. Erili kanga mele sepale pe kamu awi lepa kangi awisili nomba purupa lupendi topa pe kangi pali kamu topa kondolemo mele kanu mane silimili unguma anju anju pumba 'Yomboma molko kinjangi.' nilimú. Aku ungu-mane silimili yemanga ye talo Amenias kinia Pallitasitolo molembele. <sup>18</sup> Kanu yetolone ungu-sikama munduku kelko lo limbilí. Olone ninguli: "Olio koronga lomboropo ola molorumulumunga pe kangi pali lomboropo ola naa molomolo." nilimbilí ungumuni

yombo marene 'Sika.' ningu kuru mondolemele mele seko sembambu silimbilimunga ononga 'Sika.' ningu kuru mondolemele ulumu mania pulimú. <sup>19</sup> Sika na-kolo ulka-simu se ye tondolo sene pololemo kinia we tondolo mundupa gilimú mele, Pulu Yemo 'Sika.' ningu kuru mondolemelemonga ungu-pulumu tondolo pumba, pora naa nilimú. Aku ulka-simu melemonga ola imbi se molemo, akumu i-sipa:

"Ye-Awilimu yunga yomboma kanopa imbi silimú."

nimba molopa,

"Yombo marene 'Ye-Awilimu yu nanga Pulu Yemo.'

nilimili yombomane ulu-kirima pali munduku keleangi."  
nimba molemola.

<sup>20</sup> Ulka-awili senga mingi kou-gollone selima kinia kou-sillipane selima kinia lepa, mingi unjuni selima kinia mane selima kinia lemóla. U nikiru mingima kou-mone olandopa pulimúmane kongono olandopa peangama seko, mingi pe nikiru kou-mone koltalo mele pulimú wemane we-kongonoma selemele. Mingi lupa-lupama aku sipa lemó. <sup>21</sup> Yombo sene ya yombo ningu kinjilimili ye kiri nikiruma mundupa keliemu liemu yu Pulu Yemonga mingi manjipa molopa, yunga mingi kake seli paa peanga se molopale, yuni kongono peangama manda sembando molombamonga yunga nokoli yemone yu ,mingi paa peangamo mele, kongono peangama manda simba.

<sup>22</sup> 'Sika nu kango-yemo na-kolo, kango-yemane yakala kolko konopu siku selemele ulu-pulu-kirima 'Aku sipu paa naa sambo.' ningu popenge seko liku bulu siku kowa punguli ulu-peangama mindi konopu kimbu siku seko molani. Ulu sumbi nilima kinia, kuru mondoli uluma kinia, konopu mondoli uluma kinia, yomboma kinia taka leko mololi uluma kinia, 'Aku uluma mindi paa sepo molambo.' ningu konopu kimbu siku molani. Yombo mare molko kondoko paa sika Ye-Awilimunga yomboma mindi molemele yomboma kinia aku siku uluma seko molani. <sup>23</sup> Konopu naa pelemo yemane aroma toko 'Anju yando angelema niemili.' nilimili yemanga unguma 'Paa naa pilimbu.' ningu bulu sieni. Ungu kanuma pilku nilimili yomboma kinia, ungu kanuma ningu silimili yomboma kinia, ungu kanumane 'Irinale seko opanale sangi.' nimba perelemo mele nu pilieleno.

<sup>24</sup> Ye-Awilimunga kongono sendeli kendemande-yombomone mumindili kolopa 'Angelema niemili.' nimbá kinia manda naa sembá. Yuni i-sipa sepili: Yu yomboma kondo kolopa lipa tapondopa, unguma sumbi sipa mane simba tondolomo peli yemo molopa, yombomane yu-kinia mumindili kolko seko kinjingí kinia pundu naa topa siye kolopa, <sup>25</sup> yu uluma sepa ungu nimba silimú mele kanoko kiri pilku yu toko mania mundungí senge yomboma seko kinjilimili mele nimba para simbando taka lepa mane sipili. Yuniaku sembá kinia Pulu Yemone kanu yomboma lipa tapondopa, konopu topele toko, selemele mele pilku kiri pilku munduku kelko ungu-sikama tondolo munduku pilingí aulkamo akisindimbanje. <sup>26</sup> 'Kanu-kinia, ononga umbu-konopu kelepa pepa pilipa kondoli pemba kinia u ,kurumanga nokoli, depelemone 'Yunga yomboma molko yunga kongonoma sendangi.' nimba kondi-ka sepa ka sirimu ka-ulkana mele peringi ka-ulkamo munduku kelko ultu pungu konopu peanga pepili manda molonge.

### 3

3:1-9

*Mulu Matolo Pora Nimbá Walemanga Yombomane Ulu-Pulu-Kiri Awisili Senge Ungu Se*

<sup>1</sup> 'Kanu yema Setene munduku kelko, kelko umbu-konopu pepili molongenje,-na-kolo ,kiniá umbuna wendo olemomando, nu i ungumu paa pilku molani: Walema

pora nimbá sembá kinia ulu-umbuna awisili wendo ombá. <sup>2</sup> Kanu walemanga yombomane

ono onono mindi konopu mondoko;  
kou-mone konopu mondoko;  
ononga imbima ambolko paka toko kara pungu;  
we-yomboma marake seko iri toko;  
anupili lapalinga unguma liku awi naa siku;  
'ulu-peangamanga,' "Ange." naa ningu;  
'ulu kake selima pilipu samili.' naa ningu;

<sup>3</sup> yomboma-kinia kondo naa kolko;

yombomane ono seko kinjingí kinia siye naa kolko;  
ungu-bulkundu nindiku;  
ononga kangi nokoko naa kondokole,  
we yakala lemó uluma pilku, umbu-konopu naa pepili  
konopumuni ulu-kirima mindi pilku seko;  
owá-palakoma konopu naa pelemo kinia seko kinjilimili  
mele onone yomboma aku siku seko kinjiku;  
ulu-peangama kinia opa-tou molko;

<sup>4</sup> onone ononga genupili yomboma 'molko  
kinjangi!' ningu ononga opa-touma kondi toko;  
ulu mare sengendo 'I ulumu sembó kinia  
sepo kinjimbunje.' molo 'I ulumu sembó kinia  
yombo se umbuna simbunje.' ningu naa pilku  
sumbi siku walu we seko;  
ono onono konopumuni pilkuli  
'Olio ye imbi ola molemo yomboma.' ningu pilku;  
ononga kangikundu konopu singí uluma konopu mondoko  
Pulu Yemone nilimú mele pilku sengendo  
konopu naa mondoko;

<sup>5</sup> Pulu Yemonga uluma kangikundu mindi 'kolo toko, senge,  
konopuna sukundu 'Pulu Yemonga tondolomone olio  
lipa naa tapondopili olio oliolio manda selemolo.' ningu aku siku selemele.

Aku siku seko molemele yema-kinia seluna kongono seko naa molko ononga unguma  
naa pilku bulu sieni.

<sup>6-7</sup> Kanu yemanga marene 'Ambo mare olionga unguma piliangi kondi tamili.'  
ningu pungu mane singíndu yombomanga ulka marenga taká leko sukundu punguli  
ningimuni, aku ulkamanga molemele ambo mare 'Pulu Yemonga, unguma mimi siku  
naa pilku, konopumane pilkuli 'Ulu-pulu-kirima sepo ambo kirima molemolo.' ningu  
pilku, ononga konopu mimi sipa naa pelemo kinia ulu lupa lupama sengendo konopu  
siku walu seko, yemane pali mane silimili unguma alielie komumane pilielemene-  
na-kolo ungu-sikama mindi mimi siku naa pilku limili ambo kanuma kondi tonge  
kinia kanu amboma ononga ungu 'kolo toli, ma pilku lingí. <sup>8</sup> U ye Janesi kinia  
Jambirisitolone 'Mosinga ungu nikimuma kolo tokomo. Isipi ye nokoli kingimu naa  
piliepili.' ningu Mosisinga unguma kinia opa-tou moloringili mele seko kinjilimili ye  
nikirumane kepe aku siku 'yomboma ungu-sikama naa piliangi.' ningu ono ungu-  
sikama kinia opa-tou molemele. Ono konopu paa kirima pepili molkole konopuna  
kolo toli ungu mane singí ulu-pulu se naa pepili  
molemelemonga ononga kuru mondolemele ulumu paa lupa. <sup>9</sup> Aku-sipa na-kolo  
ungu-sikama-kinia opa-tou molemele yemane senge mele yombomane pali kanokole  
ningimuni, kanu yema amu mele toko senge mele sumbi siku kanongemonga ono

seko kinjilimili mele tondolo awili sepa olandopa naa pumbá. U ye Janesi kinia Jambirisitoline seringili mele tondolo naa purumu mele aku sipa mele sembá.

**3:10—4:8**

*Pollone Timotindu "Sei." Nirimu Ungu Mare  
3:10-17*

*Pollone Timotindu "Nu Pulu Yemonga Ungumu Tondolo Munduku Ambolou."  
Nirimu Ungu Se*

**10** Onone aku selemele senge,-na-koło Timoti, nu na ulu peanga lupa lupama selio mele, pilku moleno.

Nane yombo ungu mane sirindu mele kinia,  
nanu uluma sepo molorundu mele kinia,  
na ulu serindumanga pulumu kinia,  
Karasi 'Sika.' nimbu kuru mondorundu mele kinia,  
yomboma-kinia kara naa pumbu pangu nimbu  
taka lepo molorundu mele kinia,  
yomboma konopu mondorundu mele kinia,  
yombomane na seko kinjiku mindili siringi kinia  
kongonoma mundupu naa kelepo  
tondolo mundupu serindu mele kinia,  
nu pilieleno.

**11** Na kolea Andiyoko kinia Akoniamo kinia LLisira kinia ,aku taonomanga andopo Pulu Yemonga kongonomo sendepo molorundu kinia, na seko kinjiku mindili siku umbuna awisili siringi merindu mele nu pilieleno. Aku siku umbuna kiri awisili siringi paa mindili norundu kanumu. Aku-sipa na-koło Ye-Awilimuni 'Na iseli-u naa kolambo.' nimba na lipa tapondorumu kinia manda molorundu.

**12** Ungu se paa sika pelemo akumu i-sipa: Karasi Yesusi kinia pea kopu seko molcole 'Pulu Yemone kanopa peanga pilielemo uluma manjipu sepo molamili.' ningu aku siku seko molonge yomboma pali we-yombomane seko kinjiku mindili singí; **13** aku-na-koło seko kinjiku, kolo toko 'Ungu-sikama nikimulu.' ningu mane singí yema olandopa olandopa seko kinjiku molko kinjingí. Onone yomboma anju kolo toko mane singí kinia kanu ungumane topele topa ono kondi tombala, kanu-kinia ono onono kanu ungu-koloma 'Ungu-sikama.' ningu pilingila.

**14** Aku-sipa na-koło Timoti, nu ungu-sikama pilku likuli 'Akumu paa sika.' ningu kuru mondorunu unguma 'Karasinga yombo peangamane, nu kanu unguma mane siringi kene pilkuli 'aku unguma ungu-sikama.' ningu pilku tondolo munduku kuru mondoleno mele kamu mimi siku pilku kondoko molani. **15** Pulu Yemonga bokuna ungu molemomane Karasi Yesusi 'Sika.' ningu kuru mondolemele yomboma Pulu Yemone lipa tapondopa mindili nolemolá aulkana wendo lipa yu-kinia molko kondonge aulkana lipa mondolemo mele nimba silimú unguma nu kango paa kangamo molcole pulu polko pilierinu 'kene 'Sika.' ningu kuru mondoleno mele kamu mimi siku pilku kondoko molani. **16** Pulu Yemonga bokuna molemo unguma pali Pulu Yemonga Minimuni nimba sirimu-na pilkuli toringi. Aku ungumane yomboma lipa tapondolemo mele i-sipa: Aku ungumane olio 'Pulu Yemonga yomboma molomolo mele, mane sipa, 'ulu-pulu-kiri selemoloma 'naa samili.' nimba, mane sipa, 'ulu-pulu-kirima mundupu kelepo molopo kondomolo mele, mane sipa, 'Pulu Yemone "Séko mola." nimba, ulu sumbi nilima nimba kanolemo uluma semolo mele, mane silimú. **17** 'Pulu Yemonga 'kongono sendelemolo, yomboma yunga kongonoma sendemolomanga pilipa kondolima pepili kongono peangama sumbi sипу sepo kondomolomonga tondoloma olio-kinia pepili.' nimba 'olio aku sipa mane silimú.'

## 4

4:1-5

*Pollone Timotindu "Nu Pulu Yemonga Unguma Paa Yomboma Mane Si." Nirimu Ungu Se*

<sup>1</sup> „Timoti,“ Pulu Yemo kinia Karasi Yesusitolone yombo kondema kinia kololima kinia ononga kote pilingilí yetolo kanoko molangili Karasi Yesusi ombo mona molopa ye nokoli kingimu molopa mélema nokombamonga nane nundu i-sipu tondolo mundupu nikiru:

<sup>2</sup> „Karasinga, unguma yomboma ningu sieni.

Ningu sini kinia yomboma ungu pilingí kinia  
molo naa pilingí kinia kepe  
alieli unguma ningu siku munduku naa kelko,  
‘Ononga ulu selemelema ‘Sepo kinjilimulu.’ ningu pilku  
konopu topele tangi.’ ningu mane siku,  
ulu-pulu-kiri selemelema naa sangi iri toko mane siku,  
‘Ono Pulu Yemone kanopa peanga pilielemo uluma seko  
konopu tondolo pupili molangi.’ ningu mane sieni.

Ono mane sinindu alieli pangu ningu taka leko mimi siku mane sieni. <sup>3</sup> Yomboma ungu-sikama ‘Naa pilimulú.’ ningu bulu siku komu pipi sikuli ningimuni, ono yakala kololemele ungu konopu siku pilingí unguma mane singí ye awisili ningu tal tonge walemo pe wendo ombá kene, ungu-sikama munduku naa kelko mane siku kondani. <sup>4</sup>

Ono ungu-sikamo bulu siku, kolo toko kange semane lupa lupa tongema mindi komu sendeko pilku molonge kene, ungu-sikama munduku naa kelko mane siku kondani. <sup>5</sup>

Aku-sipa na-kolo nu, alieli umbu-konopu pepili unguma mimi siku apuruku kondoko pilkuli, mindili se noni molo umbuna se nu-kinia wendo omu liemu aku umbunama we mengo, ‘Yomboma semane peangamo paa pilku liku konopu topele tangi.’ ningu toko siliku andoko, Pulu Yemone ‘Nu nanga kendemande-yemo molani.’ nimba kongono sirimuma pali sani.

4:6-8

*Pollone Yu Nondopa Kolomba Serimumunga Yunga Kongonomo Pora Nimbá Serimumunga Ungu Se*

<sup>6</sup> „Na-kinia nondopa ungu se wendo ombá mele pilipuli nu aku siku sani nikiru.“ Na, u „Isirele, yombomane Pulu Yemo popo toko kongi mélema kaloringi polomonga puluna Pulu Yemo popo toko no-waene ondoko munduku yu siringi mele kiniá na kolombondo nanga kangimu Pulu Yemo popo topo simbú sekero. Na ma-koleamo mundupu kelepo pumbú walemo nondopa wendo ombá sekemo. <sup>7</sup> „Méle peangama liembo.“ nimbu, na tondolo mundupu keru-kuru lipu liserindu. ‘Lisiku pang.’ ningu ówa toringina kamu pumbu pora sikiru. „Karasinga, unguma mundupu naa kelepo tondolo mundupu kuru mondopo liserindu. <sup>8</sup> Aku sipu sepo molorundumunga kiniá „ulu selu mindi we pelemo.“ Ówana kamu okoromonga na méle kalomba méle peangamo taltopa molemo, kanu méle peangamo Ye-Awilimu, kote sumbi sipa pilielemo yemone nando “Nu ye sumbi nñlimu.” nimbá kanumu. Na mindi móloola. Yuni „yombomanga kote pilipa apurumba, walemonga na kinia yu ombá mele ‘Paa kanamboa.’ ningu nokoko molemele yomboma kinia pea kanu méle peangamo simba.

4:9-22

*Pollone Timotindu Ungu Ponjili Mare Nirimu Unguma*  
4:9-13,21

*Pollone Timotindu “Na Moliona Welea Ou.” Nirimu Ungumu*

<sup>9-11</sup> Dimasini na mundupa kelepa purumu yemo yu mana-uluma olandopa konopu mondopale kolea-awili Tesallonaikando purumu. Ye Keresenje kolea Gallesia poropinji pumba, Taitasi kolea Dallemesia disiriki purumu. LLuku mindi ya na kinia pea molembolo kene nu na moliona aulka se paa korokole welea nondoko wani. Makone na kongono manda lipa tapondopa sembá kene yu opili liku mengo pea wangili. <sup>12</sup> „Andi nu, kolea-awili Epesasi, molenona, Tikikas “pu.” nimbu lipu mundorundu. <sup>13</sup> Oni kinia aulkana ongo kolea-awili Toroas ongole, ali-wale-pakoli kinia boku mare kinia kongimanga kangimane seli bokuma kepe, Kapasinga ulkana taltorundu lemó akuma liku mengo wani. Kongimanga kangimane seli boku „paa peanga, kou awili sepa puli, ma paa naa komu sindiku paa liku mengo wani.

4:14-18

*Pollo Molopa Kinjerimu Kinia Pulu Yemone Yu Lipa Tapondopa Tondoloma Sirimu Ungu Se*

<sup>14</sup> Allekesanda, kou-kapane mélema sepa wamoli yemo, yuni na paa sepa kinjerimu. Yuni „na kinia, sepa kinjerimumunga Ye-Awilimuni yu pundu tomba. <sup>15</sup> Yuni olionga ungu nilimuluma paa konopu naa mondopa aku unguma kinia opa-tou molopa ‘Mania pupili.’ nirimu kene „nu aku sipa sepa kinjimba kene, yu mimi siku kanoko molou!

<sup>16</sup> Nanga kotemo pulu polko pilieringi kinia yombo sene na kote serindu mele naa lipa tapondorumu. Onone pali na munduku kelieringi. Pulu Yemone kanu yemane seko kinjeringimunga pundu naa topa siye kolopili. <sup>17</sup> „Yemane na munduku kelieringi,-na-kolo Ye-Awilimu na kinia kopu sepa kotena gilipa na engemo sirimumunga kote-koleana Juda yombo naa molko yombo-lupama moloringi yomboma na semane peangamo topo sirindu kinia manda pilieringi. Na kotena enge naa silkanje ‘Lopa-posi llayonomane na toko nangi.’ nilimolá-na-kolo Ye-Awilimuni ‘Na naa kolambo.’ nimba lipa tapondorumu-na „ya ka-ulkana, we molio. <sup>18</sup> ‘Yu mindili nopili, sepo kinjamili.’ ningí walemanga pali Ye-Awilimuni na lipa tapondopa wendo lipale nimbámone, yu ye nokoli kingimu molopa nokolemo mulu-koleana ‘Na manda opili kene u mana molopa kondopili.’ nimbá. Alieli yu kape nimbu imbi ambolopo paka tondolepo mindi pamili. Aku sipa paa sika sepili.

4:19-22

*Pepámo Topa Pora Simbando Pollone Kamu Nirimu Unguma*

<sup>19</sup> Ambo Pirisilla kinia yunga menu Akuwillatolo keme, Onesiporas yunga yomboma keme, “Pollone “Ono manda molemeleye?” nikimu.” nindani.

<sup>20</sup> Ye Erasitas kolea-awili Korini we molemo. Toropimas kuru torumu-na kolea-awili Maillitas molopili mundupu kelepo orundu.

<sup>21</sup> ‘Kolea ali selemo walema u wendo naa opili na moliona wambo.’ ningú aulka se tondolo munduku korokole wani.

Yupullasi keme Pudenji keme LLainasi keme „ambo,“ Kollodia kinia „olionga, genupilima „Karasina, yombomane pali “Nu manda molenoye?” nikimili.

<sup>22</sup> Ye-Awilimu nunga minimu kinia molopili molani.  
Yuni ono we kondo kolopa molopili molangi.

„Aku pea nikiru.,

## TAITASI Pollone Ye TAITASI Pepá Topa Sirimu Bokumu

*Pollone I Pepá Topa Sirimumunga Ungu-Pulu Mare*

Pollo kinia yuni pepá topa sirimumanga ungu-pulu mare inia yakondo gomo 676 molemo.

**Taitasi** yu Juda ye se mólo na-kolo Pollone Yesusi Karasinga semane peangamo topa sirimu kinia pilipale yu konopu topele topa 'Yesusi yu sika Pulu Yemone lipa mundorumu ye nokoli Karasimu, nanga nimba mindili nondorumu yemo.' nimba kuru mondopa 'Yunga yemo molambo.' nirimu. Pe Karasinga yemo molopale Pollo lipa tapondopa, pea Yesusinga kongonomo kopu seko seringili. Walte kolea Kiriti puringili kinia Pollone **Taitasindu** "Aku koleana molko Karasinga yombo talapemo nokou." nirimu, akuna nokopa molopili Pollo yu senga purumu.

**Taitasi** molopa serimu ungu mare i bokuna 1:4-5, 2:15, 3:12-13 kinia molopa, Pe-Korini 2:12-13, 7:5-7,13-14,12-18, 8:6 kinia, Gallesia 2:1-5 kinia, Pe-Timoti 2:8, 4:10 kinia, molemo.

Kolea Kiriti akumu nomu Meditereniana suku lierimu ma awili se (Lipa Mundorumu Yema 27:7-13. Kanu koleamo kolea pikisana molemomo bokumunga yakondo gomo 666 manda kanoni.) Pollone i pepámo topa sipale u nimbale: "Kiriti yombo wemane ungu selemelema seko kinjilimili." nirimu. "Ye marene 'Karasinga yombo talapemonga tapu-yema molamili.' konopu lemele yemane ulu sumbi nilima mindi sangi." nirimu. **Taitasini** yombo ambu-andama kepe, kango-yomboma kepe, kou naa liku we kendemande seringi yomboma kepe, akuma mane simba mele Pollone **Taitasi** mane sirimu.

Pollone **Taitasi** kamu mane sipa nimbale: " 'Yomboma konopu seluna pupili molko, yomboma kinia ulu peangama seko, irinale naa seko, angelema naa niengi.' ningu mane si." nirimu.

Ungu paa tondolo se 1:16, 2:7,14, 3:1,8,14 kinia molemo. Se 2:11-14 molopa, se 3:4-7 molemo.

Ungu-pulu talo boku ambolkonomonga pealemekondo "21. kisim bek", "21.3. Man Bilong Kisim Bek Yumi" kananila.

Ungu-pulu se: **U-Timoti** kinia **Pe-Timoti** kinia **Taitasi** kinia pepámanga ungu awisili selu-sipa mele molemomonga ungu-pulu talo gomo 998 kinia 1022 molemo, gomo akutolonga maniakondo kanani.

Ya ungu-pulumu pora nikimu.

*Kolomongo-Awili 1-3 pali*

**"Nomuna Lierimu Koleana Karasinga Yombo  
Moloringima ' 'Sika.' Ning Kuru Mondoko Molemele  
Mele Kamu Tondolo Munduku Kuru Mondoko Molangi.'  
Ningu Mane Siku, Ulu Sumbi Nilima Senge Mele Mane  
Sieni." Nimba Pollone Taitasindu Nirimu Ungumu**

*1:1-4*

*Pollone I Pepámo Tombando Pulu Polopa Torumu Unguma*

<sup>1</sup> Na Pollo, Pulu Yemonga kongono sendeli kendemande- yemo, na Yesusi Karasini "Nanga kongonomo sende-pou." nimba lipa mundorumu yemo. Yuni na lipa mundupale, "Pulu Yemone "Nanga yomboma molangi." nimba, nimba talitorumu yomboma 'Sika.' ningu kuru mondolemele mele olandopa tondolo munduku kuru

mondoko, ungu-sikamone yomboma Pulu Yemone kanopa peanga pilielemo uluma pilku taka leko senge mele lipa ora silimú ungumu pilku kondangi liku tapondopou.” nimba na lipa mundorumu. <sup>2</sup> “Pulu Yemone alieli konde molko kondoko mindi pungí ulu simbambo nokoko molangi.’ ningu liku tapondani.” nirimu. Kanu ulumu waltikele kepe kolo paa naa tolemo Pulu Ye akumuni paa koronga-u yuyu molopale ‘Olio konde molopo kondopo mindi pumulú ulumu simbú.’ nimba, nimba panjerimu ulumu. Yuni “Sembó.” nilimú mele paa sika selemo yemo. <sup>3</sup> Pe yuyu nimba taltopa ‘Yombomane ungumu piliangi wendo opili.’ nirimu walemo wendo orumu kinia na nimba taltopa yunga ungumu “andoko ningu sindei.” nirimu. Aku nirimu Pulu Yemo, olionga Lipa Tapondopa Mindili Nolemolá Aulkana Wendo Limú Yemo. „Yuni na “Ungu kanumu andoko ningu si.” nirimu-na na ungu kanumu nimbu silipu andolio.,

<sup>4</sup> Taitasi, nu kinia olto Karasinga yetolo molembolo „nu ‘Karasinga yemo molko kondani.’ nimbu nane nu nokolio, monga nu nanga kandi-malomo moleno, nane i pepámo topo nu sikiru. Lapa Pulu Yemo kinia, olionga Lipa Tapondopa Mindili Nolemolá Aulkana Wendo Lili Ye Karasi Yesusi kinia, alone nu we kondo kolko, ‘Nu konopu pe nipili taka leko molani.’ niengili.

1:5-16

*Taitasi Kolea Kiriti Yomboma Kinia Molopa Kongono Sembra Mele Pollone Nimba Sirimu Ungumu*

1:5-10

“Titasini Karasinga Yomboma Nokoko Kondonge Ye Peanga Mare Nimba Taltopili.”  
*Nirimu Ungumu*

<sup>5</sup> Nu kinia pea kolea Kiriti kongono serimulumu ‘Nuni seko pora sieni. U nane nu “Sei.” nirindu mele nuni aku siku taonomanga pali andoko ‘Karasinga yombo talapema nokangi.’ ningu tapu-ye mare ningu mondani.’ nimbu “Akuna molou.” nimbu orundu. <sup>6</sup> Tapu-yema ningu mondondiu ono uluma seko molonge mele kanokole ningu mondani.

Kanu yema yombomane kanoko kiri pilingí ulu se  
ono-kinia naa peli yema molonge.

Ono ambo selu mindi lili yema molonge.

Ononga bolangoma Karasi , ‘Sika.’ ningu, kuru mondoko,  
yombomane “I bolangoma ulu-kirima seko kara  
pulimili.” naa ningu, ononga anupili lapalinga unguma mokoli naa senge.

Aku sili yema mindi tapu-yema molangi ningu mondani.

<sup>7</sup> Karasinga yombo talapemanga tapu-yemane Pulu Yemonga kongonomo nokolemele kene

yombomane kanoko kiri pilingí ulu se  
ono-kinia naa peli yema molangi.

‘Olio paa pilipa kondoli pelemo.’ yema ningu yomboma  
tondolo munduku nokoko,  
nondoko mumindili kolko,  
no tondolo nongendo ‘Awisili nombó kinia amu tombo.’

ningu naa pilku walu nongo,  
yomboma kinia opa seko,

kou-mone kinia mélema yama mengo ‘Aku kongonomonga  
kou awisili limulú.’ ningu,

aku siku molko kinjingí yema ‘Tapu-yema naa molangi.’ ningu ningu naa mondani.

<sup>8</sup> Yombo ponenge olemelema nokoko kondoko,  
ulu peangama mindi sengendo konopu siku seko,

we yakala kololi uluma bulu siku naa pilku umbu-konopu  
 pepili konopumane ulu peangama mindi pilku seko,  
 ulu sumbi nilima mindi seko,  
 Pulu Yemonga ye kake selima molko,  
 ono onono yu-mele-mele tondolo munduku  
 nokoko kondolemele yema  
 tapu-yema molangi.

<sup>9</sup> Karasinga ungu-sika u mane sirimulu akumu tondolo munduku ambolongendo ambololemele yema mindi 'tapu-yema molangi.' ningu, ningu mondani. 'Aku sipa molemo ye sene mindi yomboma manda lipa tapondopa, yombomane pilkuli 'Sika Pulu Yemonga ungumu' ningu kuru mondonge ungu-sikamo manda mane sipa, ungumu naa pilku "Kolo tolemele." ningu enge nilimili yombomane pilku lawa selememele mele paa piliangi tondolo mundupa mane simba.' ningu 'Aku sili yema tapu-yema molangi.' ningu, ningu mondani.

1:10-16

*Nomuna Lierimu Kolea Kiriti 'Karasinga Yomboma 'Ningu Kuru Mondolemele Mele Munduku Kelko Molko Kinjangi.' Ningu Moloringi Yombo Awisili Moloringi Ungumu (1:5-16 pali)*

<sup>10</sup> Karasinga yombo kolea Kiriti, molemelemanga ye awisili kara pungu Pulu Yemonga sika unguma naa pilku "Kolo unguma." ningu mokoli seko, yomboma kolo toko siku ungu awisili we nilimili. 'Juda yemane, 'Pulu Yemonga u ungu-manema pilipu kangi se kopisamili.' nilimili yemanga awisili aku siku selememele kene 'mimi siku kanokole tapu-yema ningu mondani.'. <sup>11</sup> Kanu yemane ningu kinjilimilimunga manga-umbu marenga ambo bolango yomboma pali 'Sika.' ningu kuru mondolemele mele seko sembambu siku kelko 'Sika.' ningu kuru mondongendo perelemele kene "Kolo toko mane silimili mele naa niengi, mólo!" nieni. 'Kou-mone liemili.' ningu olio Karasinga yomboma manda naa semolo uluma 'Sangi.' ningu kondi toko ungu-mane silimili mele paa manda mólo. <sup>12</sup> Kanu kolea Kiriti yemanga pilipa kondoli perimu ye sene kepe u nimbale:

"Kiriti yomboma alieli kolo toko,  
 méle takarama mele yombo kirima molko,

kere-langi awisili nongo  
 kongono naa seko siye kolko we molemele."

nimba ononga ye sene nirimu kanumu. <sup>13</sup> Yuni aku sipa nirimu ungumu paa sika nirimu kene ne aku siku seko kinjilimili yema ' 'Karasinga ungumu mindi sika.' ningu kuru mondoko, kolo toli unguma munduku kelko naa piliangi.' ningu tondolo munduku iri tani. <sup>14</sup> "Juda yombomanga kangema kinia, 'Ungu-sikamo naa pilimulú.' nilimili yemane ungu lupama mane silimili unguma kinia, naa pilku molangi." tondolo munduku niyo.

<sup>15</sup> Yombo mare kake sepili molemelemane kere-langi kinia mélema kake selima ningu kanokole limili. Aku-na-kolo ulu- pulu-kirimane kalaro mondondolemo yomboma, 'Karasi sika.' ningu kuru naa mondoko molemele yombomane kere-langi kinia mélema kalaro molemo ningu kanoko naa ambololemele. Kanu yemanga konopuma kepe konopumane uluma pilku apurulimili mele kepe kalaro mindi molopa kiri lemó. <sup>16</sup> Keremane 'Pulu Yemo pilielemolo.' nilimili-na-kolo ulu selememelemane 'Pulu Yemo naa pilku yunga unguma pilku mokoli selememele.' nimba lipa ora silimú. Kanu yema Pulu Yemone paa kanopa kiri pilielemo, Pulu Yemonga unguma naa pilku liku seko, ulu-peanga selu kepe manda naa selememele senge.

## 2

2:1-15

*Taitasini Yombo Lupa Lupama Mane Simba Mele Pollone Nimba Sirimu Unguma*

<sup>1</sup> Kanu yemane aku siku seko kinjilimili,-na-ku nuni Karasinga ungumu 'Ungusikamo' ningu kuru mondoko molemele yombomane pilkuli uluma seko molonge mele yomboma mane sieni.

2:2-5

"*Ambu-Andama Pulu Yemone Kanopa Peanga Pilielemo Uluma Sangi.*" *Nimba*, (2:4-5) *Ambo-Yuma Seko Kondonge Mele Nirimu Ungumu* (2:1-15 pali)

<sup>2</sup> Ye-andama ungu-mané siku ninguli: "Ono no awisili nongo amu naa toko, mimi siku konopu leko, we yakala kololi uluma bulu siku naa pilku umbu-konopu pepili konopumuni ulu-peangama mindi pilku seko, Pulu Yemonga ungumu 'Sika.' ningu kuru mondoko, munduku naa kelko, yomboma konopu mondoli ulumu paa ambolko, ono-kinia umbunama wendo ombá kinia tondolo munduku molangi." nieni.

<sup>3</sup> Aku sikula ambo-ambuma mane siku ninguli: "Pulu Yemonga unguma taka leko pilku yuni kanopa peanga pilielemo uluma seko molko, yombomanga ungu-bulkundu naa nindiku, 'No tondolomane ono naa ambolopili.' ningu molko, 'amboma kinia ononga bolangoma kinia, ulu-peangama sengema mane siengi.' nieni.

<sup>4</sup> Ambo-ambuma aku siku ulu peangama seko molongemonga ambo-yuma seko molonge mele manda mane siku ninguli: "Ononga yema kinia bolangoma kinia konopu mondoko, <sup>5</sup> we yakala kololi uluma bulu siku naa pilku umbu-konopu pepili konopumuni ulu peangama mindi pilku seko, we-yema kinia ulu-kirima naa seko, aku ulu-kirimanga konopu kepe naa leko, ononga ulkama nokoko kondoko, ononga yomboma nokoko kondoko, ononga yemanga unguma taka leko pilku liku seko, molangi." ningí. 'We-yombomane Pulu Yemonga unguma marake naa sangi.' ningu 'ambo-ambumane, aku siku sangi.

2:6-7

"*Kango-Yema Kanoko Senge Ulu-Peangama Mindi Taitasini Aku Sipa Mindi Sepili.*" *Nimba*, 2:7-8

*Pollone Taitasi Yuyu Molomba Mele Mane Sirimu Ungumu* (2:1-15 pali)

<sup>6</sup> Kango-yema kepe aku siku mane siku ninguli: "Ononga konopuma kinia ulu sengema kinia lakoko nokoko kondangi." tondolo munduku ningu, <sup>7</sup> nu nunu ungu selenoma ono kanoko manda manjiku senge ungu peangama mindi sani.

'Yombomane na kape ningu kou-mone siengi.' ningu mane naa si. 'Unguma yomboma mane siembo.' ninguli konopumuni pilku kondoko ungu sumbi nilima mindi ningu kolo naa toko, 'Yomboma tawe sangi.' ningu ungu-ururumi toko kara naa pani. <sup>8</sup> Unku peanga sikama mindi ningu, yombomane pilkuli "Kolo tokomo." ningí unguma naa nieni. 'Olionga opa-toumane olio bulkundu manda nindingí aulka se naa liepili. Olio ningu kinjingí kinia pipili kolangi.' ningu aku siku sumbi siku mane sieni.

2:9-10

"*Kongono We Sendeli Kendemande Yomboma Ononga Nokoli Yemanga Unguma Pilku Sengena Panjiku Sangi.*" *Nirimu Ungo Se* (2:1-15 pali)

<sup>9</sup> Kou naa liku kongono we sendeli kendemande yomboma mane siku ninguli: "Ononga nokoli yemanga unguma taka leko pilku liku, onone kanoko peanga pilku konopu singí kongonoma mindi seko, ningí unguma mokoli naa seko ono-kinia angelema naa ningu, <sup>10</sup> ononga nokoli yemane 'Nokaa.' nilimili mélema kepe wa naa liku, 'kongono yombomane kongono sumbi siku naa seko, mélema wa lingí.'

ningu konopu awisili kimbu naa singí uluma mindi sangi. ‘Sepo molemolo mele we-yombomane kanokole olio Lipa Tapondopa Mindili Nolemolá Aulkana Wendo Lili Pulu Yemonga semane peangama kape ningu pilku liengi.’ ningu kongono sendeli kendemande yomboma aku siku seko molangi.” nieni.

**2:11-14**

*‘Yesusi Karasi Kelepa Ombá.’ Nimbu Nokopo Molopo, Konopukundu Kake Sepili Molamili Ungu Se (2:1-15 pali)*

<sup>11</sup> Pulu Yemone olio yomboma pali we kondo kolorumu mele mona lierimu kanumu. Mona lepale, Pulu Yemone ‘Mana-yomboma mindili nolemolá aulkana wendo ongo, na-kinia pea molko kondonge aulkana pangipu lipu tapondambo.’ nimba , ‘Yesusi ononga nimba kolondopili.’ nimba, yu sirimu pilipuli Pulu Yemone aku sipa olio we kondo kolorumu mele pilierimulu.

<sup>12-13</sup> Pulu Yemonga we kondo kololi ulu-pulumuni olio molopo kondomolo mele mane silimú. Kanu ulu-pulumuni olio Pulu Yemonga unguma lipu bulu sipu, „kurumanga nokoli, Setenenga unguma pilielemolo mele mundupu kelepo “Mólo!” nimulú mele mane sipa; olio oliolio konopumane pilielemolo ulu-kirima yakala naa kolopo siye kolopo, konopuma kinia ulu semoloma kinia lakopo nokopo kondopo, ulu-pulu peangama sepo sumbi sipu molopo Pulu Yemone kanopa peanga pilimba uluma mindi sepo molomolo mele mane silimú. Yesusi Karasi Olionga Pulu Ye Awilimu, olionga Lipa Tapondopa Mindili Nolemolá Aulkana Wendo Lili Yemo pa seli tondolomo kinia ombámonga olio ya mana konopu sipu nokopo molemolo kinia Pulu Yemonga we kondo kololi ulu-pulumuni “Sangi.” nimba mane silimú uluma sepo molomolo mele mane silimú. <sup>14</sup> „Ombá kanu ye Yesusi Karasimuni, ‘Yombo mare nanga yomboma molangi kene ulu-pulu kirima naa seko, ononga konopumanga ulu-pulu kirima naa pepa kake sepili molangi.’ nimba olionga pundu tondombando olionga nimba kolali sepa kolondopa yunga mememo ondondorumu. ‘Ulu-pulu peangama mindi sengendo konopu siku seko molonge yombo talape se wendo ongo, na nanu nokombo talapena ongo molangi.’ nimba yuni aku sipa senderimu.

<sup>15</sup> Ungu aku sipama ,tapu seleno, yomboma paa mane sieni.

‘Ononga tapu-yemo molio.’ ningu ‘ungumu pilku ulu peangama seko molemele yomboma, ulu peangama seko molko kondolemele mele munduku naa kelko konopu enge nipili molangi.’ tondolo munduku ningu; „yombo ungumu naa pilku seko kinjilimili, yomboma siye naa kolko iri toko , ‘Ulu akuma munduku kelko ulu-peangama mindi seko molangi.’ ningu, tondolo munduku mane sieni.

‘Nunga ungu ninima pilku mokoli seko ungu-taka tondonge aulka se naa liepili. Nunga unguma yomboma pali piliangi.’ ningu sumbi siku molko unguma sumbi siku mane sieni.

### 3

**3:1-11**

*Karasinga Yomboma Seko Kondonge Mele Unku Se*

<sup>1</sup> Nuni yomboma kelko mane siku ninguli:

“Ononga ye nokolima kinia gapomano yomboma kinia  
onone ungu ningíma takaleko pilku liku,  
liku awi siku seko molangi.

Onone ungu ningíma munduku naa kelko,  
kongono singíma alieli sumbi siku seko kondoko,

<sup>2</sup> yombo senga ungu-bulkundu naa nindiku,  
yomboma kinia tondolo munduku angelema naa ningu,  
yomboma kinia pangu ningu takaleko molko,

ono ononga imbima liku ola naa munduku,  
yomboma pali liku awi siku molangi.”  
niyo!

### 3:3-8 ekendo

#### *Olio Sepo Kinjipu Molorumulu Kinia Pulu Yemone Olio We Kondo Kolorumu Semanemo (3:1-11 palila)*

<sup>3</sup> Olio kepe u ulu kiri peangama konopu lepo apurupu kondopo naa molopo, olionga ye nokolimanga unguma pilipu mokoli sepo, kurumanga nokoli, Setenene olio kolo topa ungu nirimuma pilipu lipu amu topo ulu-kiri lupa lupama serimulu. Ulu-pulu-kiri akuma mindi semolondo kamelé akopo konopu sipu molorumulu. Yombo lupama sepo kinjipu ononga mélema kanopo yama membo molorumulu. Olio anju yando yomboma kinia kanopo kiri pilierimulu.

<sup>4</sup> U olio aku sipu sepo kinjipu molorumulu-na-kolo kiniá olio Lipa Tapondopa Mindili Nolemolá Aulkana Wendo Lili Pulu Yemone ‘Yomboma nane ono we kondo kolopo ono we konopu mondopo selio mele kanangi.’ nimba <sup>5</sup> yuni olio lipa tapondopa, mindili nolemolá aulkana wendo lipa, yu-kinia pea molopo kondomolo aulkana lipa mondorumu. Olione ulu-pulu peanga mare serimulu-kulu kanopale yuni olio naa lipa tapondorumu. Ulu-pulu peanga selu kepe paa naa serimulu. Ulu-pulu kirima mindi sepo molamili yuni olio we kondo kolopale lipa tapondorumu. ‘Yesusini senderimu akumu sika olionga nimba senderimu.’ nimbu kuru mondopole, no liltimulu kinia kanopale Mini Kake Sélimuni olio ‘Pulu Yemonga bolangoma molangi.’ nimba aku sendepa, ‘Ononga minima konde pang.’ nimba aku senderimu. Pulu Yemo yuni olio aku sipa lipa tapondorumu.

<sup>6</sup> Olio Lipa Tapondopa Mindili Nolemolá Aulkana Wendo Lili Ye Yesusi Karasimuni olionga nimba senderimumunga Pulu Yemone Mini Kake Séli kanumu simbando konopu talo naa lepa olio paa awili sepa sumbi sipa sirimu. <sup>7</sup> Karasini olio we konopu mondopa kondo kolopa senderimu kanumunga Pulu Yemone olio kanopale olionga ulu-pulu-kirima siye kolopa ‘konopu sumbi nimba peli yomboma.’ nimba kanopa, ono ‘Sika konde molopo kondopo mindi pumulú.’ ningku kuru mondoko konopu siku nokoko kondoko molemele ulumu ‘paa sika wendo opili.’ nimba yuni Mini Kake Sélimu olio sirimu.

<sup>8</sup> I ungu nikirumu paa sika.

‘Pulu Yemo yu sika.’ ningku kuru mondolemele yombomane ulu peangama paa mimi siku pilku sangi.’ ningku i ungu nikiruma ‘yomboma paa pilku liku sangi.’ ningku tondolo munduku mane sieni. Aku sipa uluma paa ulu peangama, akumane yomboma lipa tapondolemo uluma.

<sup>9</sup> Aku-sipa na-kolo yombomane amu toko Karasinga unguma sumbi siku naa pilkuli ‘Ungu marenga puluma piliamili.’ ningku angelema we nilimili unguma kinia, anda-kolepalimanga imbima sulu seko toko silimili unguma kinia, yomboma-kinia we irinale selemele unguma kinia, ‘Mosisini, ungu-mane’ nimba sirimu, ma angelema we nilimili unguma kinia, aku ungumane ono molko kondonge mele naa lipa tapondolemomonga aku unguma bulu siku, aku siku nilimili yomboma-kinia irinale seko angelema naa nieni. <sup>10</sup> Yombo sene ungu-mane se simba molo ulu se sembamonga Karasinga yomboma konopu seluna pupili naa molongi liemu kanu yombomo mimi siku liepi-liepi toko mane siku ‘Semba mele mundupa kelepa sumbi sipa molopili.’ nieni. Pe kelko wale talo-siku aku siku liepi-liepi toko mane siku “Naa sei.” nini kinia naa piliemu liemu yu kamu munduku kelko bulu sieni. <sup>11</sup> Nuni pilieleno, ‘Nunga ungumu naa pilipa we aku sipa sembá yombo kanumu ulu-pulu-kirimane yunga konopumu sepa aroma tondomba, yuni sepa kinjimba mele yuyu

kepe pilipale ‘Sepo kinjiliu.’ nimba pilimba.’ ningu pilieleno. Yuni ‘Selio mele keleambo.’ naa nimbámonga aku nikiru.

*3:12-15*

*Pepámo Topa Pora Simbando Pollone Kamu Nirimu Unguma*

<sup>12</sup> Nane ye Atemasi molo Tikikas nu molonina “Pu.” nimbu lipu mundumbu ombá kinia na Nikopolis taono molombona ‘Paa pambo.’ ningu aulka se kanoko liku paa lisiku wani. Kolea poporome topa ali sembá walemanga na akuna we molombo kene akuna wani.

<sup>13</sup> Apollos kinia ungu-manema pilieli ye Sinasi kinia olo aulkana pungilí kinia mélse mólo naa topili kene paa liku tapondoni aulka se kanani.

<sup>14</sup> Olionga ‚Karasina,‘ yombomane mimi siku pilku kondokole ‘Mélse mólo tomba yomboma kinia umbuna pemba yomboma kinia lipu tapondamili.’ ningu kongono peangama seko molangi. Ono we molko kongono peangama naa seko yomboma lipa tapondomba uluma naa seko molonge kinia kiri.

<sup>15</sup> Na-kinia molemele yombomane pali “Nu manda molenoye?” ningu, ningu mundukumili.

Karasini “Konopu mondaa.” nirimu mele olio aku siku konopu mondolemele yomboma nuni “Manda molemeleye?” nindani.

„Pulu Yemone, ono pali we kondo kolopa molopili molangi.

„Aku pea nikiru.„

## **PILLIMONO Pollone Ye PILLIMONO Pepá Topa Sirimu Bokumu**

*Pollone I Pepá Topa Sirimumunga Ungu-Pulu Mare*

Pollo kinia yuni pepá topa sirimumanga ungu-pulu mare inia yakondo gomo 676 molemo.

‘I pepámo Romo ka-ulcana pepale torumu.’ ningu pilielemene. ‘Epesasi kinia Pillipai kinia Kollosi kinia aku taonomanga yombomanga pepáma yu ka-ulka seluna pepale torumula.’ ningu pilielemene.

**Pillimono** yu ye-awili molopa yombo mare yunga kongono we sendeko méle kalolima naa lili yomboma nokopa molorumu. Yunga kongono we sendeli ye se, Onesimasi nili se, kowa pumba Romo purumu kinia Pollonga ungumu pilipa konopu topele topa ‘Karasi sika.’ nimba kuru mondorumu. Pe yuni Pollo nokorumu.

Kongono we sendeli yomboma kowa pulimili kinia Romo-gapomanomonga ungu-mane sene nimbale: ‘Aku siku mongo lingímunga “Pundu tangi.” ningu toko kondangi.’ nimba perimu. Aku-sipa na-kolo Pollone Onesimasi konopu mondopa **Pillimono** pepá topa sipa nimbale: ‘Yu kelko ulcana liku “Ano.” ningu taka leko nokani.’ nirimu. Aku-na-kolo Pollone **Pillimono** aku sipa mele mawa sembando sumbi sipa naa nimba u ungu mare we nirimumunga ungu marenga ungu-pulumu kála sepo pilielemolo. Kowa purumu ye Onesimasinga imbimu kolomongo-kanga 10 pulu polopa nimba, pepámo topa pora simbando kamu ungu se mawa serimu.

Ya ungu-pulumu pora nikimu.

*1-25 pali*

**Pillimononga Kongono We Sendeli Kendemande-Yemo U  
Talopa Lepa Purumu, Aku Yemo Pe Konopu Topele Topa  
Karasinga Yemo Molorumu Kinia Pollone Pillimono  
Molorumuna Kelepa Lipa Mundorumumunga Ungumu**

*1-3*

*Pollone Pepámo Tombando Pulu Polopa Torumu Ungumu*

*1-2* Na Pollo, Karasi Yesusinga kongono sendeliomonga ka-ulcana pelio yemo, na kinia olionga genu Timoti pea molopole i pepámo topo sikiru.

Oltonga paa pulu lemó ye Pillimono, tapu topo kongono selemelo yemo, nu kinia, olionga kemulu Apia keme, olio pea kopu sepo opa seli ye Akipasi keme, Karasinga yombo talape Pillimono nunga ulcana maku tolemele yomboma kinia, ono i pepámo topo sikiru.

*3* Olionga Lapa Pulu Yemo kinia Ye-Awili Yesusi Karasitolone ono we kondo kolko, ‘Ono konopu pe nipili taka leko molangi.’ niengili.

*4-7*

*Pillimono UNGU Peangama Sepa Molorumu Mele Pilipale Pollone Konopu Sipa Pulu  
Yemo-Kinia “Ange.” Nirimu Semanemo*

*4-5* Nanga pulu lemó ye ‘Pillimono’, nu Ye-Awili Yesusi ‘molopa, olionga nimba senderimu mele sendelemo akumu,’ ‘Sika.’ ningu kuru mondoko, Pulu Yemonga yomboma pali konopu mondoko moleno mele pilipuli Pulu Yemo-kinia ungu nimbúndu alieli nunga mawa sendepo, nanga Pulu Yemo-kinia “Ange.” niliu. *6* Pulu Yemo-kinia nunga mawa sendepole, ‘Nu kinia olio ‘Yesusi Karasi, sika.’ nimbu kuru mondolemolomonga konopu seluna pupili kopu sepo molemolo ulumuni nu

paa pilipa kondolimu sipili. Aku pilipa kondolimu pemba kinia Karasinga méle peanga olio silimú limulúma kamu tondolo munduku piliani.' niliu. <sup>7</sup> Ango, nuni Pulu Yemonga yomboma konopu mondokole konopu peanga pepili molonge unguma senderinu mele pilipuli na konopu sipu konopu paa tondolo pupili molio.

8-22

*Pollone Pillimonondo "Onesimasi Kelko Sukundu Likuli 'Nunga Kandi-Genu Mele Molopili.' Ni." Nirimu Ungumu*

<sup>8</sup> Nane nu ungu se 'sei.' nimbu mawa sembó sekero akumu nu kinia olto Karasinga yetolo molembolomonga 'Nu paa sika sei.' nimbu tondolo mundupu manda nilka-nakolo ,nuni seleno mele nikiru aku siku molko Pulu Yemonga yomboma kondo kolko seleno, akumunga <sup>9</sup> ,aku sipu naa nimbú,. Konopu mondoli ulumuni olto lipa sere lendepa 'Seluna molambili.' nilimú-na aku sipu molembolomonga nane , 'Nu i-siku sei.' nimbu tondolo mundupu naa nimbu, 'Ungu se sani.' nimbu, nu taka lepo mawa sembó sekero. Sika na Pollo, na ye-andamo, Karasi Yesusinga kongono sendeliomonga ka-ulkana pelio, na aku sipu yemo moliomonga <sup>10</sup> nanga malo Onesimasinga mawa sendepole 'nuni yu seko kondani.' nikiru. Na ka-ulkana pepole yu mane sirindu kinia yu ,konopu topele topa, 'Sika.' nimba kuru mondopa ,Karasinga yemo, molorumu mele molemomonga kiniá yu nanga malo ,mele,, na yunga lapamo molio. <sup>11</sup> U sika yuni nunga kongono peanga se mimi sipa naa senderimu-na-kolo kiniá nu kinia olto pea yuni mimi sipa lipa tapondopa kongono sendemba yemo molemo.

<sup>12</sup> Kiniá yu nu molenona "Kelko pu." nikiru-na-kolo pukumu kinia na paa konopu umbuna sekemo. <sup>13-14</sup> Nane semane peangamo topo silipu andorundumunga ka siringi ka-ulkana pelio kinia Onesimasini nunga kolali sepa "Na liku tapondoko ka-ulkana nokani molou." nilka na-kolo 'nuni paa sika na liku tapondani kene nu molenona yu u naa opili. Yu pipi sipu nunga nimba na lipa tapondopili.' nimbu we ta nimbu naa nimbú. 'Nu nunu konopumuni pilkuli sani.' nimbu 'nu molenona yu opili.' nikiru. ,Nu molenona ombá kinia yu pe molopa sembá mele nu nunu piliani.'

<sup>15</sup> Pe nu molonina kelepa sukundu omba nu-kinia kamu-alieli molombando Onesimasi u wallopkolte nu molenona mundupa kelepa kolea senga purumunje. <sup>16</sup> Aku-sipa na-kolo aku liemu yu nunga kongono we sendeli kendemande-yemo mindi molombando aku sipa ulumu wendo naa orumu. Yu sika nunga kongono we sendeli yemo molemo-na-kolo kiniá akumu mindi mólo. Kiniá nunga gena kepe molomba kinia nuni yu paa konopu mondonimunga aku sipa mele ulumu wendo orumunje. Nane Onesimasi paa konopu mondopo 'Yu nanga paa sika kandi-genunje.' konopu lelio. Pe yu kinia nu pea Ye-Awilimunga genungulutolo molongelemonga kepe, yu nunga gena molopa kendemande-kongonomo sendepa kondombamonga kepe, 'nuni Onesimasi yu konopu mondoni mele olandopamo, nane yu konopu mondolio mele maniandopa.' konopu lekero.

<sup>17</sup> Akumunga, 'Na nu kinia pea Karasinga kongonomo kopu-sepo selembolo.' konopu leno liemu na olka kinia "Pea molambili ou." nilina mele yu ombá kinia "Pea molambili ou." nieni. <sup>18</sup> Yuni nu-kinia ungu se sepa kinjerimu liemu, molo yunga pundu se nu-kinia gilierimu liemu akuma Onesimasindu "Pundu tou." naa ningi, siye kolani. Aku punduma pali nane tombo kene nanga imbi tondani. <sup>19</sup> Na Pollo, nanu aku punduma tombomonga nanga kimuni nanga imbimu i pepána tokoro. Aku-sipa na-kolo nu na-kinia pundu se gilimú, 'aku pundumu naa nindu liemu nu we pilku moleno.' konopu lekero. Nu na kinia pundu gilimú akumu, nane nu lipu tapondorundumunga nu konde molko kondoko mindi puni ungumu nu kinia pelemo kanumu. <sup>20</sup> Ano, 'Ye-Awilimunga kongono se sendambo.' ningi na liku tapondoko

ungu peanga se sani. Olto Karasinga yetolo molembolomonga nuni na konopu peanga pepili ungu se sani.

<sup>21</sup> Na paa mimi sipu pilkiru: ‘Nane “Sei.” nikiru ungumu nu paa pilku liku sení.’ konopu lepole i pepámo nu topo sikiru. ‘Nane nu „Onesimasi kinia, sani.” nimbu mawa sekero akumu nuni paa olandopa yu liku tapondoko sení.’ konopu lekero.

<sup>22</sup> Na ungu se pea mawa sekerola: Na pilkirumu, ‘Onone Pulu Yemo kinia mawa selememele mele yuni pilipale ‘Na ono molemelena wambo.’ nimba.’ konopu lekero. Akumunga ‘na nunga ulkana ombo pembo kene suluminia se seko wamoko taltondani.’ ‘nimbu mawa sekero.»

**23-25**

*Pollone Pepá Topa Pora Sipale “Molou.” Nirimu Unguma*

<sup>23</sup> Epaparas, yu Karasi Yesusinga kongono senderimumunga yu ka siringi, kiniá olto pea ka-ulkana kopu sepo pelembolomo, yuni “Nu manda molenoye?” nimba, nimba mundukumu. <sup>24</sup> Na kinia pea kopu sepo kongono selemolo ye Mako kinia Arisitakas kinia Dimasi kinia LLuku kinia onone “Nu manda molenoye?” nikimilila.

<sup>25</sup> Ye-Awili Yesusi Karasini ononga minima we kondo kolopa molopili molangi.

„Aku pea nikiru.»

## IPURU IPURU Yomboma Pepá Topa Sirimu bokumu

*I Bokumunga Ungu-Pulu Mare*

**Isirele yomboma** nga anda-kolepa Jekopo, yunga imbi se ‘Isirele’ niringi, akumuni yandopa Yesusi molopili kalopa liltimu yombomando ‘**Isirele yomboma**’ niringi; ‘**Juda yomboma**’ niringila; ‘**Ipuru yomboma**’ niringila. U-pulu-pulu ‘**Ipuru yomboma**’ niringi ungumu Wendo Oringi 1:22 molemo. Aku-na-kolo i pepá topa sirimu **Ipuru yombo** akuma **Juda yombo** konopu topele toko ‘Yesusi yu sika Pulu Yemonga Malo. Yu sika Pulu Yemone “Ono nokopa kondomba ye se lipu mundumbu.” u nimba, nimba taltorumu ye nokoli Karasimu.’ ningu kuru mondoringi yomboma.

**Kanu Ipuru yomboma** u Mosisini sirimu ungu-manema pilku liku Pulu Yemo popo tongendo kongima toko kalko kongimanga memema Pulu Yemo siringi yomboma moloringi-kulu pilipale pepámo torumu yombomone **kanu Ipuru yomboma** Karasinga unguma mane simbando “Mosisi kinia, kongi toko Pulu Yemo siringi kongima kinia kongimanga memema kinia, Pulu Yemo popo toringi ulka-tembelemo kinia, Pulu Yemo popo tondoli yema kinia kanu yemanga ye awili olandopamo kinia, kanuma paa maniandopa.” nimba, “Yesusi kinia Yesusinga mememo kinia Yesusi yuyu kepe paa olandopa.” nirimu. ‘Yu munduku kelko u pilku seko moloringi mele kelko naa sangi.’ nimba i pepámo topa sirimu.

**Ungu-pulu mare** boku pealemekondo molemo akuma i-sipa:

“32.2. **Pikinini Bilong God**”, “26. **Io**”, “34. **pris**”, “34.3. **het pris**”.

**I pepámo topa sirimu yemo nawenje**, naa pilielemolo. Marene ‘Pollone torumu’ konopu lemele. Aku-na-kolo Matini LLuta kinia yombo marene ‘Pollo mólo. Ye sene ‘lupa torumu.’ niringi. Yombo marene Lipa Mundorumu Yema 18:24-28 kanokole ‘Aku ye Apollosini torumu.’ konopu lemele. Marene aku semanemo kanoko ninguli: “Ambo Pirisillane torumunje.” nilimili. Koronga-u ye pilipa kondoli ye sene “Banapasini torumunje.” nirimu. Lipa Mundorumu Yema 4:36, 13:1-4 kanopale aku sipa pilierimunje. “Mólo, LLukuni torumunje. Molo ye sene lupa torumunje.” nilimili. Aku-sipa na-kolo i pepá torumu yombomonga imbimu unguri mólo. Pulu Yemonga Mini Kake Sélimuni ‘Pulu Yemonga ungumu tondopili.’ nirimu kinia pilipale yombo sene torumu, akumunga i bokuna molemo ungumu sika Pulu Yemonga ungumu.

Ya ungu-pulumu pora nikimu.

*1:1—10:18*

### **I Pepámo Topa Sirimu Yemone Mane Sirimu Unguma Kolomongo-Awili 1-2**

*Mulu-Koleana Angelloma Maniandopa, Yesusi Olandopamonga Ungumu  
1:1-3*

*Kiniá Pulu Yemonga Malone Olio Pulu Yemonga Unguma Nimba Silimú Ungu Se*

<sup>1</sup> Paa u Pulu Yemone alieli olio Ipuru yombomanga anda- kolepalimando ‘Nanga unguma piliangi.’ nimba yunga ungumu pilku yando ningu siringi yema yuni ungu-umbu tondorumuma pilkuli olionga anda-kolepalima ningu siringi. ‘Yomboma paa piliangi.’ nimba lipa tapondorumu kinia kanu yemane ulu awisili liku ora siku seko ungu awisili ningu siringi. <sup>2</sup> Aku-sipa na-kolo pe kiniá ‘Yunga Malone olio yunga unguma nimba sindepili.’ nimba Pulu Yemone yu mana maniando lipa mundorumu.

Kanu kangomo Pulu Yemone 'Nanga mélema kamu yu simbú, lipa taltopa molomba.' nirimu kangomo. Kanu kangomo yu Pulu Yemone u mulu ma mélema "Sambo." nirimu mélema pali serimu yemola. <sup>3</sup> Enamo pa selemo mele aku sipa, Malo pa selemo akumuni Pulu Yemonga pa tondolo mundupa selemo pa sélimu olio lipa ora silimú. Pulu Yemo molemo mele Malo aku sipa molemo. Malonga ungu tondolomone mélema pali manda molemele. Yuni 'olionga ulu-pulu-kirima omba mania pupili, olio yombo kalaro naa mololima molangi.' nimba kongono sepa pora sipale, mélema pali nokombando, mulu-koleana Ye Nokoli Kingi Awili Olandopamonga ki-lomekondo pumba molorumu molemo.

**1:4-14**

*Pulu Yemonga Malo Paa Olandopa Molemo, Angelloma Maniandopa Molemele Akumunga Ungu Se*

<sup>4</sup> Aku serimu-na yunga imbi lepa 'Nanga Malo' nirimu aku imbimu paa olandopa purumu, mulu-koleana angellomando imbi lepa 'Pulu Yemonga kongono sendeli yema' nirimu aku imbimu paa maniandopa, aku sipa mele yu yuyu paa olandopa angelloma maniandopa. <sup>5</sup> Pulu Yemone nimbale:

"Nu nanga Malo. Kiniá na nunga Lanie."

nirimu mele angello sendo walte aku sipa nirimuye? „Mólo. Yunga Malondo mindi aku sipa nirimu.”

Molo yuni nimbale:

"Na yunga Lapa molombo,

    yu nanga Malo molomba."

nirimu akumu angello sendo nirimuye? „Mólola. Malondo mindi aku sipa nirimu.”

<sup>6</sup> Yundu ungu se pea nirimula. Yunga kango-komolayemo mana lipa maniendo mundupale Pulu Yemone yunga angellomando nimbale:

"Kangomo popo toko kape nengu

    yunga imbi ambolko paka tondaa."

nirimu. Aku unguma pilipuli 'Malo olandopa angelloma maniandopa.' nimbu pilielemolo. <sup>7</sup> Angellomando Pulu Yemone nimbale:

"Yunga angelloma poporomema mele molko,

    yunga kongono sendeli yema sepe mele molangi."

nilimú. <sup>8</sup> Aku-sipa na-koło Pulu Yemone Malondo nimbale:

"Pulu Yemo, nu alieli ye nokoli kingimu moleno mele  
    molko mindi puni.

Nuni ulu sumbi nilima seko yomboma nokoni.

<sup>9</sup> Nuni ulu-pulu sumbi nilima manjiku  
    konopu siku seleno.

Ulu-pulu-kirima konopu naa mondoko  
    paa naa seleno, akumunga

nunga Pulu Yemone 'Nu ye nokoli kingimu molko  
    mélema pali nokani.' nimba, nimba taltopale

nunga pulu lemó yombomanga pali  
    namba paa olandopamo nu sirimu.

Nuaku sipa sepa kondorumumunga  
    nu kinia nunga pulu lemó yomboma kinia  
        konopu singí."

nirimu.

<sup>10</sup> Pulu Yemone „Malondo, ungu se pea nimbale:

"Ye-Awilimu, u-pulu-pulu nuni mamo seko,  
    nunga kimuni nunu mulumu seko wamorunu.

<sup>11</sup> Aku méletolo pora nimbá, aku-na-kolo  
nu alieli molko mindi pulinu.

Mulu-maminiama pingi pumba sungu nimba  
kiri lemó mele  
mulu matolo aku sembá.

<sup>12</sup> Yombomane wale-pakoli suluma  
toko eltongendo kimbulimili mele  
nuni mulu matolo aku siku kimboni;  
mulu-maminia se lupa panjingindu topele tolemele mele  
nuniaku siku aku méletolo topele toni.

Aku-sipa na-kolo nu nunuaku siku topele naa toko,  
molenomele alieli molko,  
anda naa leko, alieli molko mindi puni.”

nirimu. <sup>13</sup> Pulu Yemone u walte nimbale:  
“ ‘Nunga opa-touma nuni nokani.’ nimbu  
pe ono topo mania mundundumbukene  
iseli-u nu ‘na kinia pea kopu sepo  
ye nokolitolo molopo mélema nokambili,  
nanga ki-lomekondo ongo molani.”

nirimuaku ungumu angellomando nirimuye? <sup>14</sup> ‘Aku ungumu angellomando naa  
nirimu liemu, angelloma nameleye? Angelloma mini mele molko Pulu Yemonga  
kongono sendeli yema molemele. Kanu angello yema Pulu Yemone yombo lipa  
tapondopa, mindili nolemolá aulkana wendo lipa, yu-kinia pea molko kondonge  
aulkana lipa mondolemo ulu-pulumu lingí yomboma ‘Liku tapondoko nokangi paa.’  
nimbalipamundulimú yema molemele.

## 2

2:1-4

*Pulu Yemone Olio Lipa Tapondomba Kinia Mindili Naa Nombo Yu Pea Molomolo  
Akumu Paa Ulu Awili Olandopamo Kene ‘Wendo Naa Pamili.’ Ning Nokoko Kondangi  
Akumunga Ungu Se*

<sup>1</sup> Manda, Malo sika angellomanga olandopa molemo, akumunga, ‘Pulu Yemone  
olio-kinia ungu peangama sembá mele Yesusini nimba sirimu, sika u pilierimuluma  
siye kolopo naa pilipuli kamu mundupukelemolo kene aku ungumu konopukimbu  
sipu ambolopo molamili. <sup>2-3</sup> ‘Pulu Yemone u olianga anda-kolepalima-kinia ungu  
nimba panjipa mi lierimu ungumuni ononokorumu kinia, Pulu Yemone olianga  
anda-kolepalima ‘ungu-mané ‘Mosisini sipili.’ nimba, ‘angellomane ‘Mosisi ning  
sieu.’ nirimu kinia, yunga ungu-mané niringiaku ungu-manema tondolo pumba  
perimu. Kanu ungu-manema naa pilku pulua toringiyomboma sekokinjeringimunga  
méle kalolima liltingi. Kiniá Pulu Yemone olio lipa tapondopa, ‘Mindili nolemolá  
ulkana wendo ongo na-kinia pea molko kondonge aulkana pangí.’ nilimú ulu akumu  
paa olandopamo. Pe angellomane u ningusiringi unguma pulua toringi kinia mindili  
noringiliemu Pulu Yemone olio kiniá lipa tapondombando tapondolemo ulu Ye-Awili  
‘Yesusi, yuni yuyu u kumbi lepa nimba sirimuaku ulu paa olandopamo mundupu  
keliemulu liemu pe olio ulu-pulu-kiri selemolomanga nambi sepo kowa pumbu  
mindili naanomoloye? ‘Kiniá Pulu Yemone olio-kinia ungu konde se nimba panjipa  
mi lierimumupelemele walemanga, Pulu Yemone olio lipa tapondoli kongonomo paa  
olandopakumunga olio manda kowa paa naa pumulú.

Pulu Yemone olio lipa tapondomba mele ungu akumu u kumbi lepa Ye-Awili  
‘Yesusi, yuni yuyu nimba sirimu kinia peaku ungu nirimumupilieringiyemane  
yando oliondo ninguli: “I ungumu paa sika.” niringi. <sup>4</sup> Aku siku ningumolangi Pulu

Yemone kepe ' 'Malonga ungumu paa sika.' ningu kuru mondangi.' nimba kanu yema lipa tapondopa tondoloma sirimu kinia onone lipa ora sirimu ulu-tonadoloma seringi. Pulu Yemone Mini Kake Sélimunga tondolomo lipa yuyu konopumuni pilipale kongono molo ungu lupa lupama senge tondoloma ungu ningu siringi yomboma moke sepa sirimu. 'Pe kanu ungu kondemo 'Paa piliangi.' nimba Pulu Yemone yuyu kanu ungu kondemo lipa tapondorumu liemu kanu ungumu pilku likuli munduku kelenge yomboma "Mindili nangi." naa nimbáye?'

2:5-18

*Pulu Yemone 'Yesusi Yu Yunga Genupilima Mele Molopili.' Nirimu Ungu Se 2:5-13*

*Yesusi Yu Ye Paa Peanga Olandopamone Olio Lipa Tapondopa Molopo Kondomolo Aulkamo Akisinderimu Yemonga Ungu Se*

<sup>5</sup> Ma konde se wendo ombámondo nikimulu aku mamo Pulu Yemone 'nokangi.' nirimu akumu angellomando naa nirimu. <sup>6</sup> Aku mólo. Pulu Yemonga bokuna yombomane ma pe wendo ombámo nokongema, ungu se nimba sipa nimbale: „Pulu Yemo,„

nuni olio yomboma nambolka mélema  
konopu lekole  
olio kanoko imbi silinuye?

Mana-yombomane melemele yomboma  
nambi semu-na nuni kondo kolko nokolenoye?

<sup>7</sup> „Nuni yombomando ninindu:„  
“Yomboma angellomanga laye-kolo  
maniandopa molangi.' nimbú." nirinu.

„Pe, nuni ononga imbima ambolko paka tondoko,  
nambama siku,  
<sup>8</sup> 'onone mélema pali nokangi.' nirinu."

nimba molemo. Pulu Yemone 'Mana-yombomane mélema pali nokangi.' nirimu bokuna molemo liemu Pulu Yemone méle serimumanga seluri kepe 'Onone naa nokangi.' nirimu mélse paa naa lemó.

Aku-sipa na-kolo 'yombomane mélema pali nokonge' nilimú nimba molemo mele kiniá aku sipu nimbu naa kanolemolo., Kiniá 'yombomane mélemanga mare naa nokolemele.' nimbu kanolemolo. <sup>9</sup> 'Aku sika na-kolo kiniá 'mana-ye selu sika, yunga imbi kinia nambatolo mélemanga pali paa olandopa molkomo.' nimbu kanolemolo. Akumu Yesusi. U Pulu Yemone olio we kondo kolopa 'yu yomboma lipa tapondopa ononga pali kolali sepa mindili nomba kolondopili.' nimba 'yu angellomanga mania mele molopili.' nirimu. Yu mindili nomba kolorumumunga Pulu Yemone yu mélemanga pali namba olandopa sipa yunga imbi ambolopa paka tondorumu nimbu kanolemolo.

<sup>10</sup> Akumunga ungu se pea niembo: Pulu Yemone mélema pali serimu, yu mélemanga pali Pulu Yemo. Yuni yuyu pilipale mélema serimu, akuma kiniá nokolemo akumunga yuni yombo awisili nimba taltopa 'Nanga bolangoma molko, na kinia pea kopu sepo molamili.' nirimu kinia ono lipa tapondopa, mindili nolemolá aulkana wendo lipa, yu-kinia molko kondonge aulkana lipa mondorumu yemo 'mindili nopili.' nirimu akumu papu nirimu. Yu mindili norumumunga yu ye paa peanga sumbi nílimu molopa ono lipa tapondopa mulu-koleana pungí aulkamo lipa ora simbando memba pulimú. <sup>11</sup> 'Yuni Pulu Yemonga bolango awisili manda mulu-koleana memba pulimúmunga pulumu i-sipa:„ Yu kinia ono kinia yombo talape selumu. Ye sene yomboma lipa tapondopa 'Pulu Yemone kanopa 'yunga yombo kake selima' nimba kanopili.' nilimú yemo kinia kanu yemone yomboma

lipa tapondolemo-na ono Pulu Yemone kanopa ‘nanga yombo kake selima’ nimba kanolemo yomboma kinia olionga Lapa selumu. Akumunga yuni onondo “Ango” nimbando pipili naa kololemo. <sup>12</sup> Akumunga u ungu se nimbale:

“Pulu Yemo,, nu moleno mele  
nanga genupilindu nimbu simbú.

Ono-kinia pea nu popo tomolondo  
maku topo molomolo kinia ono pilku molangi  
konane nimbu nu kape nimbú.”

nirimu. <sup>13</sup> Akumunga kelepa walte yuni ungu se nimbale:

“Nanga genupilimane selemele mele,  
nane ‘aku sipu, Pulu Yemone  
“Na nokombo.” nirimu mele ‘Sika sembá.’  
nimbu pilipu taka lepo molombo.”

nirimula.

Akumunga ungu se pea nimbale:  
“Pulu Yemone na bolango sirimuma kinia  
pea molemolo.”

nirimula.

**2:14-18**

### *Yesusi Olio Lipa Tapondombando Mana-Ye Au Lierimu Ungu Se*

<sup>14</sup> Bolangomando ‘Nanga genupilima’, nirimu akumu mana-yombomando nirimu, akumunga, Yesusi yu ‘ono-mele molambo.’ nimba mana-ye au lepa molorumu. ‘Ononga nimbu kolondopole kololi ulu-pulumu nokolemo yemo topo mania mundambo.’ nimba aku sipa mana-ye au lepale kolorumu. Kololi ulu-pulumu nokolemo ye akumu ‘kurumanga nokoli, depelemo. <sup>15</sup> ‘Kolongendo alieli konopu kimbu siku pipili kolko mindi molemele yomboma aku siku molemele aulkana wendo liembo.’ nimba Yesusi kolorumu. ‘Kurumanga nokoli Setenene,’ ‘Ono pipili kolangi.’ nilimú akumu ka-ulana mele panjilimú. <sup>16</sup> ‘Yesusini aku sipa serimu akumu angelloma lipa tapondombando paa naa serimu.’ nimbu kanolemolo; ‘Eporayamone kalopa liltimu yomboma lipa tapondombando paa sika serimu.’ nimbu kanolemolo.

<sup>17</sup> Akumunga, yunga genupilima mana molemele mele yu aku sipa mana molopa ono umbuna selemo molo mindili nolemele aku sipa uluma pali yu-kinia selu-sipa wendo naa olkanje manda mólo. Yu yombomanga kondo kolopa Pulu Yemo popo tondoli ye-awili olandopamo molopa Pulu Yemonga kumbikerena aku kongonomo tondolo mundupa ambolopa molomba aulka se lupa naa perimu. Yu Pulu Yemone ‘yombomanga ulu-pulu- kirima ombo mania pupili.’ nimbá, yu-kinia konopu seluna pupili molonge kongonomo sembando aku sipa mana-ye se mindi ombo molorumumunga kiniá aku kongonomo manda sepa molemo. Wenje manda naa sepa molka. <sup>18</sup> Yu-kinia kondi topa manda lieli ulu awisili wendo ombo, mindili norumu akumunga, yomboma-kinia kondi topa manda lieli uluma wendo olemo kinia yuni manda ono lipa tapondolemo.

**3:1—4:13**

### **Yesusinga Imbi Awilimu Paa Olandopa, Mosisinga Imbi Awilimu Maniandopamonga Ungumu**

**3**

**3:1-6**

*Mosisinga Imbimu Olandopa-Na-Kolo Yesusinga Imbimu Paa Olandopa Pulimú Ungu Se*

<sup>1</sup> Ango-keme, na kinia pea Karasinga yombo molemelema, mulu-koleana molemo Pulu Yemone ono kepe nimba taltopa ‘Nanga yomboma molangi.’ nilimú yomboma, aku nikiru ungumu ungu-sikamo kene Yesusi molemo mele paa konopu kimbu siku molangi. Yu Pulu Yemone “Nanga kongonomo sende-pu.” nimba lipa mundorumu yemo, akumu Pulu Yemo Popo Tondoli Ye Awili Olandopamola, aku yemo ‘Sika’ nimbu yu molemo mele yomboma semane topo silimulu akumu mimi siku piliangi.

<sup>2</sup> U Mosisini Pulu Yemonga yomboma nokopale Pulu Yemone “Sei.” nirimu mele pilipa sumbi sipa sepa ungu se siye naa kolorumu aku sipala Pulu Yemone Yesusi nimba taltopa kongono sipa “Sei.” nirimu mele pilipa lipa sengena panjipa serimu. „Pulu Yemonga yomboma yunga ulkamo mele..” <sup>3</sup> Ye sene ulka takolemo aku „ulka pulu, yemo yunga imbi olandopa molemo, yu paa kape nilimili, ulkamo yunga imbi olandopa naa molemo, aku sipa mele i ye Yesusi „Pulu Yemo kinia pea ulkamo takoringilimunga, yunga imbimu ‘Paa ola molopili.’ ningu yu olandopa kape ningu, ye nokoli Mosisi „ulkamonga ponga molo simu mele gilierimumunga, yu mania mele kape níngi liemu papu.” <sup>4</sup> Ulka se we wendo naa ombo gilimú. Yombo sene ulka se takolemo kinia gilimú. Aku-sipa na-koło Pulu Yemone mélema pali ‘giliepili’ nirimu-na gilimú.

<sup>5</sup> „Yesusi kinia Mosisi kinia lupa lupatolo mele, ungu se pea „i-sipala:” Mosisi yu Pulu Yemonga kongono sendeli yemo molopa Pulu Yemone “Sei.” nirimu mele paa pilipa lipa Pulu Yemo yunga ulkana kongono sembando siye naa kolopa kongono sepa mindi molorumu. Yunga kongono serimu i-sipa: Pulu Yemone pe nimba simba mele Mosisini u nimba sirimu. <sup>6</sup> „Mosisi ulkana kongono kendemande sendeli yemo molorumu,- na-koło Pulu Yemone pe lipa mundorumu ye nokoli Karasimu yu Pulu Yemonga Malo molopa yomboma Pulu Yemonga ulkamo moloringima yuni nokopa Pulu Yemone “Sei.” nirimu mele paa pilipa lipa kongono sembando siye naa kolopa kongono sepa mindi molorumu. ‘Jesusini olio lipa tapondomba.’ nimbu kuru mondorumulu mele mundupu naa kelepo, konopu tondolo pupili ‘Sika aku sembá.’ nimbu kuru mondopo pipili naa kolopo konopu sipu nokopo molomulu liemu olio yunga ulkamo molemolo. „Olio kepe Pulu Yemonga yomboma molemolo.”

3:7-19

### *Ungumu Pilku Mokoli Selemene Yomboma Konopu Taka Lepa Pepili Naa Molonge Ungu Se (4:1-13 pea)*

<sup>7</sup> Pe kiniá „olio Pulu Yemonga yomboma molemolo,monga Mini Kake Sélimuni nilimú mele piliamili. Yuni nimbale:

“Pulu Yemone kiniá nikimu ungumu kiniá piliengi liemu

8-9 u ononga anda-kolepalimane

kolea ku lielina ‘Pulu Yemone  
mumindili kolombanje?’ ningu kála seko  
ungu nirinduma ‘Paa naa pilimulú.’ ningu  
mokoli seringi mele naa sayo.

Akuna kalia-ingi paono talo ombo pupili

ono kanoko molangi

nane ,‘Ono lipu tapondambo’ nimbu,  
ulu-tondolo mare serindu-na-koło kanokole

‘Pulu Yemone olio unguri naa sembanje,

kanopo kanamili.’ ningu

nanga ungumu naa pilku mokoli seko,  
‘na ono nokambo.’ naa niringi.

<sup>10</sup> Akumunga, nane kanu yomboma-kinia

paa mumindili kolopo nimbili:

"I yomboma nane ungu niliuma naa pilku  
 mokoli seko ononga aulka nimbu taltorunduna  
 naa pungu munduku kelielemele." nirindu.

<sup>11</sup> Ono-kinia mumindili kolopole mi lepo nimbili:  
 'Nane 'Konopu taka lepa pepili molangi.'  
 nirindu ulu-pulumu  
 ono paa naa lingí.' nirindu."

nirimu.

<sup>12</sup> Nanga ango-keme, ono yombo molemelemanga sene ,u olionga anda-kolepalimane aku seringi mele, sembá kene kanoko kondoko molaa. Ononga yombo sene 'Ulu-pulu-kirima sambo.' nimba konopu kimbu sipa yu ,Pulu Yemone nirimu mele 'Sika.' nimba, kuru mondolemo mele mundupa kelepale yomboma tondolo mundupa nokolemo tondolomo pelemo Pulu Yemo bulu simba kene kanoko kondoko molaa. <sup>13</sup> Aku naa sekole ,i-siku sangi: 'Ulu-pulu-kirimane olio kondi topa 'Seko kinjangi.' nimbá kene' ningu 'yomboma anju yando konopuma tondolo pupili.' ningu liku tapondangi. Pulu Yemone "Kiniá" nirimu inia olakondo tondu akumu olione alieli "Kiniá unguma manda semolo. Kiniá manda kuru mondomolo." nilimulu aku walemanga aku sipu nimbu pilipu anju yando yomboma ungu peangama nimbu siemili. ,Opali talu nambolka uluri wendo ombánje kene kiniá mindi aku samili.,  
<sup>14</sup> ,Aku nikirumunga pulumu, i-sipa: Olio 'Pulu Yemone sika lipa tapondomba.' nimbu kuru mondorumulu mele aku sipu kamu paa tondolo mundupu kuru mondopo ambolopole kolomulu liemu Pulu Yemone mélema Karasi simba kinia Karasini 'Yunga yomboma simbú.' nimba panjerimu mélema olio moke sepa simbala akumunga 'aku siku sangi.' nikiru. <sup>15</sup> Aku mele inia olakondo tondu mele ,paa konopu kimbu siku molangi., Akumu i-sipa:

"Pulu Yemone kiniá nikimu ungumu  
 kiniá piliengi liemu  
 u ononga anda-kolepalimane kara pungu  
 ungu nirinduma 'Paa naa pilimulú.' ningu  
 mokoli seringi mele naa saa."

nirimu kanumu.

<sup>16</sup> Namelene u Pulu Yemone ungu nirimuma pilkuli 'Naa pilimulú.' ningu kála seringiye? Akumu Mosisini kolea Isipi mundupa kelepa memba ultu purumu aku yombomane aku siku naa seringiye? <sup>17</sup> Kalia-ingi paono talo ombo pupili Pulu Yemone namele-kinia mumindili kolopa molorumuye? Ulu-pulu-kiri sekole kolea ku lielina koloringi ónoma akuna liepili siye koloringi yomboma-kinia ,ulu-pulu-kiri seringimunga, mumindili kolorumu kanumu.

<sup>18</sup> "Na Pulu Yemone  
 ' 'Konopu taka lepa pepili molangi.'  
 nirindu ulu-pulumu  
 ono paa naa lingí.' nirindu."

nirimu akumu namelendo nirimuye? Akumu yunga ungu 'naa pilimulú.' ningu mokoli seringi yombomando naa nirimuye? <sup>19</sup> Akumu pilipuli 'Pulu Yemonga ungumu ' 'Sika nikimu.' nimbu kuru naa mondomolo.' ningu moloringimunga Pulu Yemone "Konopu taka lepa pepili molangi." nilka koleana u akuna pungí aulka se paa naa lierimu.' nimbu pilielemolo kanumu.

## 4

4:1-13

*Pulu Yemonga Yomboma Konopu Taka Lepa Pepili Molongemonga Ungu Se (3:7-19  
 pea)*

<sup>1</sup> Akumunga, Pulu Yemone ,olionga anda-kolepalimando ‘ ‘Konopu taka lepa pepili molangi.’ nimbú koleana membo pambo.’ u nimba panjerimu ungumu,, kiniá kepe we pelemo kene yuni ononga yombo se apurupa kanopale “ ‘Konopu taka lepa pepili molangi.’ nirindu ulu-pulumu naa lipili.” nimbá kene pipili kolko molangi. <sup>2</sup> Nambi semu-na ,aku nimbu pipili kolamiliye?, U olionga anda-kolepali ,Mosisini kolea Isipi mundupa kelepa memba ultu purumu, kanu yomboma semane peangamo pilieringi, kiniá olio semane peangamo pilielemolola. Aku-sipa na-kolo kanu anda-kolepalima aku ungumu pilkuli ‘Pulu Yemone sika nikimu.’ ningu kuru naa mondoringimunga ungu pilieringimuni ono lipa naa tapondorumu, akumunga, ‘Kiniá olio-kinia ulu aku sipa wendo ombá.’, ningu pipili kolko molangi. <sup>3</sup> Olio Pulu Yemonga ‘Sembó’ nilimú mele ‘Sika sembá.’ nimbu kuru mondorumulu yomboma ,‘mindí, kiniá sika Pulu Yemone ‘ ‘Konopu taka lepa pepili molangi.’ nimbú.’ nirimu ulu-pulumu manda limulú. U Pulu Yemone nirimu mele aku sipa pelemóla. U yuni nimbale:  
“Ono-kinia mumindili kolopole mi lepo nimbili:

Nane ‘Konopu taka lepa pepili molangi.’

nirindu ulu-pulumu ono paa naa lingí.”

nirimu. I ulumu u Mosisi naa molopili we perimu. U Pulu Yemone mulu ma mélema serimu aku kongonomo sepa pora sirimu kinia aku koro mololi ulu-pulumu perimu. <sup>4</sup> Pulu Yemonga bokuna ungu se molemo mele pilipale ,‘Konopu taka lepa pepili mololi ulu-pulumu Mosisi naa molopili u perimu.’ nimbu pilielemolo., Bokuna molemo ungu akumuni wale yopoko-pakara sipamondo nimbale:  
‘Wale se-pakara talo-pakara

Pulu Yemone kongonoma sepa pora sipale  
wale yopoko-pakara sipamonga  
mulu pilipa koro molorumu.’  
nimba molemo. <sup>5</sup> ,Koro molorumumunga, ungu se pea nirimu akumu inia olakondo molemóna. Akumu i-sipa:  
“Nane ‘Konopu taka lepa pepili molangi.’  
nirindu ulu-pulumu ono paa naa lingí.”

nimba molemo. <sup>6</sup> Aku ungumuni olio lipa ora silimú mele i-sipa: Pulu Yemonga konopu taka lepa pepili mololi ulu-pulu u perimu akumu kiniá we pelemo akumunga kiniá yombo mare aku konopu taka lepa pepili molonge ulu-pulumu limili. Sika Mosisini memba purumu anda-kolepalima semane peangamo pilkuli kara pungu ungumu naa pilku likuli koro naa moloringi,-na-kolo kiniá yombo mare manda konopu taka lepa pepili molemele., <sup>7</sup> U ono konopu taka lepa pepili koro naa moloringimunga kalia-ingi awisili ombo pupili pe walte Pulu Yemone kelepa ,‘ye nokoli kingi, Depitinga kerena kelepa “Kiniá” nirimu. Depitini u nirimu nindu kanumu i-sipa:

“Pulu Yemone kiniá nikimu ungumu

kiniá piliengi liemu

kara pungu ‘Paa naa pilimulú.’ naa niengi.”

nirimu kanumu. “Kiniá.” nirimu akumunga pulumu i-sipa: Pulu Yemone kelepa wale se nimba taltopale ‘I walemo konopu taka lepa pepili molonge walemo.’ nimba nirimu.

<sup>8</sup> ,Mosisi kolorumu kinia, Josua yu ,kolali sepa olionga anda- kolepalima nokorumu yemo, yuni koro molonge ulu-pulumu ono sirimu kinia Pulu Yemone u onondo “ ‘Koro molangi.’ nimbú.” nimba panjerimu mele kamu pora nilkanje Pulu Yemone pe kelepa ,‘Koro molangi.’ nimbá, wale sendo naa nilka. <sup>9</sup> Akumunga, Pulu Yemone yunga yombomando ‘Konopu taka lepa pepili molangi.’ nilimú ulu-pulumu kiniá kepe we pelemo. Aku koro mololi ulu-pulumu Pulu Yemone mulu matolo kinia mélema sepa pora sipale wale yopoko- pakara sipamonga Sambate walena mulu

pilipa koro molorumu aku sipa mele pelemo. <sup>10</sup> „Aku nikirumunga pulumu i-sipa: „Pulu Yemone ‘Konopu taka lepa pepili molangi.’ nilimú ulu-pulumu limili yomboma Pulu Yemone yyu kongonoma sepa pora sipale kamu koro molorumu mele aku siku ono yu-mele-mele Pulu Yemone “Saa.” nilimú kongonomo seko pora sikuli walemanga pali konopu taka lepa pepili molemele. <sup>11</sup> Akumunga, Pulu Yemone ‘‘Konopu taka lepa pepili molangi.’ nimbu’’ nimba panjerimu ulu-pulumu ‘Lipuli konopu taka lepa pepili molamili.’ ninguli konopu taka lepa pepili molonge uluma mindi tondolo munduku seko siye naa kolayo. U anda-kolepalima ungu naa pilku kála sekole ‘Konopu taka lepa pepili molangi.’ nirimu mele koro naa moloringi mele olio aku sipu olionga anda-kolepalimane seringi mele naa samili. U aku sekole molko kinjeringi mele kiniá olio Karasinga yombomanga yombo se aku sipa sepale molopa kinjimba kinia manda naa sembá.

<sup>12</sup> „Nirimu mele sika aku sipa wendo orumu pilipuli, ‘Pulu Yemone nirimu ungumu we naa molemo. Yunga ungumuconde molopa unguma sepa enge nilimú.’ nimbu pilielemolo. Kanu ungumu nee paa molemo, opa seli lu-pulta ekendo ekendo nee molemo akumu maniandopa, yu paa olandopa. Opa seli lu-pultamone belemo kinia kikimimu kinia sumbi sipa topa suru tolemo mele Pulu Yemonga ungumuni aku sipa minimu kinia konopumu kinia topa suru tolemo, akumunga olio konopu kimbu silimulu mele kinia, konopumuni pilipu ‘Semolo.’ konopu lemolo mele kinia, pali pilipa apurulimú. <sup>13</sup> Pulu Yemone méle serimumanga pali se ‘Pulu Yemone naa kanopili.’ ningu manda lopi naa senge. Yombo se mulu-maminama naa panjipa we-we gilimú mele yunga kangina mélema mona gilimú manda sumbi sipu kanolemolo mele aku sipa mélema pali Pulu Yemonga kumbikerena mona lemó, aku Pulu Yemone olio ulu selemoloma pali pilipa apurumba.

4:14—10:18

## **Pulu Yemone Olio-Kinia Ungu Konde Nimba Panjipa Mi Lierimumunga Yesusi Mulu-Koleana Olionga Popo Tondoli Yemo Molemo Akumunga Ungumu**

4:14—5:10

*Yesusi Pulu Yemonga Kumbikerena Olionga Popo Tondoli Ye Awili Paa Olandopa  
Molemomonga Ungu Se*

<sup>14</sup> Manda, „u ungu se nindu akumu kiniá kamu niembo: „Olionga mulu-koleana Pulu Yemo molemona purumu Pulu Yemo popo tondoli ye awili paa olandopa akumu „olio u lipa tapondorumu ye, Yesusi, Pulu Yemonga Malo. Kiniá ‘Yuni lipa tapondorumu, tapondolemo mele aku sipa sika sembal.’ nimbu kuru mondopole nimbu para silimulu mele siye naa kolopo aku sipu ingi sipu ambolopo molamili.

<sup>15</sup> „Kurumanga nokoli Setenene, olio kondi tolemo kinia ‘Mólo!’ nimbu ulu- pulu-kirima topo mania mundumulúndu tondolo naa pupili molemolo kinia olionga popo tondoli ye awili olandopamone kanopa naa kondo kololemoye? Yu kanopa kondo kololemo. „Setenene, olio ulu lupa lupama pali kondi tolemo mele u aku sipa olionga popo tondoli ye awili olandopa Yesusi kondi torumu, aku-na-kolo kondi torumu kinia naa pilipa lipa ulu- pulu-kirimanga se naa serimu. <sup>16</sup> Akumunga, „Setenene olio kondi tolemo mele u Yesusi kepe aku sipa kondi torumu mele pilipuli, olio Pulu Yemo molemona pipili naa kolopo nondopo pumbu yunga kumbikerena yu-kinia ungu niemili. Setenene olio kondi tomba molo umbuna se pemba kinia ‘Pulu Yemo yu we kondo kololi ulu-pulumu pelemo yemo, olio kanopale kondo kolomba yemo, akumunga olio lipa tapondomba.’ nimbu aku sipu pipili naa kolopo yunga kumbikerena sumbi sipu pamili.

## 5

5:1-10

*Pulu Yemo Olionga Popo Tondoli Ye Awili Paa Olandopa Yesusini 'Olio Molopo Kondamili.' Nimba Manda Lipa Tapondomba Ungu Se (4:14—5:10 pali)*

<sup>1</sup> Walte waltenga „Juda yombomanga ningu, Pulu Yemo popo tondoli yemanga ye se ‘popo tondoli ye awili olandopamo molopili.’ ningu, kanoko ningu taltoko ‘kongono sepili.’ nilimili mele i-sipa: ‘Pulu Yemone mana-yombomanga ye se nimba taltopale ‘yu Pulu Yemonga kumbikerena yunga kongono sendepa mana-yombomoma lipa tapondopili.’ nilimú. Popo tondoli ye awili olandopamo yuni yombomoma lipa tapondombando yombomane Pulu Yemondo ‘Ange’ ningu silimili méle lupa lupama yuni lipa Pulu Yemo sindipa, ‘Yombomanga ulu-pulu-kirima mundupa keliepili.’ nimba kongi mélema Pulu Yemo popo topa kalondopa silimú.

<sup>2</sup> Kanu popo tondoli ye awili olandopamo yu kepe mana-ye sela; Pulu Yemone “Saa.” nilimú unguma pilipa lipa sembando yu umbuna pelemóla, akumunga, yomboma Pulu Yemonga unguma pilku sundukuli yunga aulkana lo liku molemele yomboma kondo kolopa lipa tapondolemo. „Yu yuyu kepe mana-ye se naa molopa Pulu Yemonga ungumu sembando umbuna naa pelkanje yuni yomboma kondo kolopa lipa tapondomba aulka se naa lelka..” <sup>3</sup> Wale marenga yu yuyu kepe Pulu Yemone yombomando ‘Saa.’ nirimu mele yuni naa selemóla, akumunga yombomane ulu-pulu-kiri seringimanga popo tondopa mélema kalopa Pulu Yemo silimú aku mele ‘yunga ulu-pulu-kirima mundupa keliepili.’ nimba popo topa kalopa silimúla.

<sup>4</sup> Pulu Yemo popo tondoli ye awili olandopamonga ungu se pelemóla. Ye sene yuyu ‘Nanga imbimu ola molopili, popo tondoli ye awili olandopamo molambo.’ naa nilimú. U-pulu- pulu Pulu Yemone Erono nimba taltorumu meleaku sipa yandopa yandopa kepe nimba taltopa ‘Aku kongonomo sei.’ nilimú yemo mindi aku kongonomo selemo. <sup>5</sup> Aku sipa mele „Pulu Yemone lipa mundorumu, ye nokoli Karasimu yu kepe yuyu ‘Nanga imbi ola molopili kene popo tondoli ye awili olandopamo molambo.’ naa nirimu. Pulu Yemone ‘Yu imbi ola molopili.’ nimba nimbale:

“Nu nanga Malo. Kiniá na nunga Lanie.”

nirimu. „Yu nimba taltopa ‘nanga kongono sendepa mélema nokondopili.’ nikiru mele yomboma piliangi.” nimbale aku sipa nirimu kanumu..” <sup>6</sup> Boku senga Pulu Yemone ungu se pea nimbale:

“Mellekisedeke molorumu mele nu nunu  
aku siku Pulu Yemo popo tondoli ye se  
alieli molko mindi puni.”

nirimu.

<sup>7</sup> „Karasinga ungu se pea i-sipa: „Yesusi ya ma-koleana molopale nirimumuni, Pulu Yemone “Sei.” nirimu mele tako lepa pilipa lipa sepa ‘Yunga imbi mania molopili.’ nirimumunga yu kolomba aulkana manda wendo lindimba „Pulu, Yemo kinia ungu nimba tondolo mundupa mangilipa kola sepa mawa serimu kinia mawa serimu mele Pulu Yemone pilierimu. <sup>8</sup> Sika yu Pulu Yemonga Malo na-kolo yu mindili norumu akumuni yu Pulu Yemone “Sei.” nirimu unguma pilipa lipa sengena panjipa sembá mele pilierimu. <sup>9</sup> Aku sipa serimumunga yu Pulu Yemone “Sei.” nilimú unguma paa pilipa lipa popenge sepa pilipa lipa sepa, kongono simbama paa sepa kondomba yemo molopale, yunga ungumu pilku liku sengena panjiku selemele yomboma lipa tapondopa, ono mindili nolemolá aulkana wendo lipa, yu-kinia pea molko kondonge aulkana lipa mondolesmo yemo molemo. <sup>10</sup> „Aku sipa sepa molomba yemo molopili kene ‘Pulu Yemo popo tondoli ye awili olandopamo molopili.’ niembo.” nimba Pulu

Yemone yuntu 'Ye Mellekisedeke popo tondoli yemo molorumu mele nu aku siku popo tondoli ye awili olandopamo molani.' nimba, nimba taltorumu.

**5:11—6:12**

' 'Olio Kelepo Molopo Naa Kinjamili.' Ning Nokoko Kondaa.' Nirimu Ungu Se  
5:11-14

*Olio Bolango Kangama Mele Naa Molamili Ungu Se*

**11** Yesusi yu Mellekisedeke popo tondoli yemo molorumu mele popo tondoli ye awili olandopamo molemo mele ungu awisili we pelemo nimbúndu nane kepe perekero. I ungumunga ungu-pulumu „paa tondolomo“. Nimbu silka-na-koło ono ungu awisili nimbu siliuma pilingindu kala sekole naa pilielemelomong i ungu nikirumunga ungu-pulumu ono nimbu simbú mele koropo kelker. **12** Ono paa koronga-u Karasinga yomboma moloringi, akumunga kiniá ono Pulu Yemonga unguma mane sili yomboma molko yombo mare mane silimolá-na-koło bolango kokele sukuli sengendo "A B D piliangi." ning mani silimiliaku mele ono aku siku Pulu Yemonga u-pulupulu ungu-pulu u kumbi leko pilielemoláma naa pilielemelomong yombo sene 'Ono mani siembo.' nimba „Pulu Yemone Karasi mana lipa mundorumu, yu olionga nimba kolali sepa kolondorumu, ungu akuma mindi kelepa manda mane simba kinia pilinginje, „ungu tondoloma manda mane naa simba. Naa pilielemolá. Ono bolango pamema mele ame mindi nolemele, kere-langı tondoloma manda naa nolemele. **13** „Karasinga, yombo ame mindi nolemele akuma bolango pamema mindi molemele. Nambolka unguma selemele kinia Pulu Yemone 'yombo sumbi nilima' nimba kanopa, nambolka unguma selemele kinia Pulu Yemone 'yombo sumbi nilima naa molemele.' nimba kanolemo aku ulumanga puluma mimi siku naa pilielemelomong akumunga , 'ono bolango pamema mindi molemele.' nikiru.. **14** Aku-sipa na-koło kere-langı enge nili akuma yombo yumane mindi nolemele. Yombo mare mimi siku kanoko pilkuli 'I ulu peangama, i ulu kirima.' ning apuruku pilku molemelema mindi kere-langı enge nilima manda nolemele.

## 6

**6:1-12**

*Yesusi Mundupu Naa Kelepo 'Pulu Yemone Olio Sepa Kondopili.' Nimbu Konopu Tondolo Pupili Nokopo Molamili Ungu Se (5:11 pulu polko kanani.)*

**1-2** Manda, „Karasi olionga popo tondoli ye awili olandopamone olionga nimba manda sendembamonga, ungu tondolo mare pilielemoloma we pelemo kene kokele Karasinga yomboma molorumulu kinia mane siringi pilierimulu A B D unguma mindi konopu kimbu sипу naa molamili. 'U ning siringi A B D unguma mindi kelepo piliamili mane siengi.' ningi liemu i-siku mele selemele: Ulka takongendo ponga pololemele akumu mindi konopu kimbu siku molko, wale awisili ponga mindi pololemele-na-koło ulkamo kamu naa takolemele mele ono A B D unguma mindi pilku molko, olandopa ungu tondoloma naa pilku molemele yombomane aku siku selemele. „U kumbi leko ning siringi ungu kanuma i-sipa mele: „Konopu topele toko „Pulu Yemonga ungumu 'Sika' ningu, kuru mondolemele.

Konde molko kondoko mindi puli ulu-pulumu naa pepa kololi ulu-pulumu mindi pelemo uluma pali liku bulu silimili unguma.

No lingíndu no limilímunga ungu-pulu awisili nilimili.  
'Pulu Yemone sewi anjepili.' ning yombomanga pengena molo pendokona ola kini ambolongemonga unguma.  
'Yomboma kolkole lomboroko ola molonge.' ningu

ungu awisili ningu,  
 Pulu Yemone mana-yomboma kote sendepa pilipale  
 yombo mare ‘molko kondoko mindi pang.’ nimba,  
 yombo mare ‘molko kinjiku mindi pang.’ nimbámonga  
 ungu-mane silimili unguma.

Aku ulumanga unguma mindi ningu pilku naa molangi. Yombo yuma ungu-manema pilielemene mele aku sipu pilipu molamili.<sup>3</sup> Manda, u kumbi leko mane siringi ungu akuma munduku kelko Pulu Yemone oliondo ‘Umbu-konopu peli yombo yuma molko ungu olandopa piliangi.’ nimu liemu aku sipu semolo.

<sup>4-6</sup> ‘Pulu Yemone “Manda.” nimu liemu semolo.’ nikiru, akumunga „pulumu i-sipa:” Pulu Yemone Karasi lipa mundorumu kinia yuni ombo senderimumunga pulumu pilku kondoko ‘Sika’ ningu kuru mondoko limili yomboma mulu-koleana méle we silimú mélema liku, yombo-lupama kinia pea Mini Kake Sélimu konopuna liku, Pulu Yemonga ungumu u pilku likuli ‘Aku ungumu paa peanga.’ ningu pilku, Pulu Yemonga tondolomone pe kolea pora nimbá walemonga ulu enge nilima sembá aku tondolomone kiniá ulu-pondoloma selemo uluma kanoko, aku uluma pali sekole kelko konopu topele toko ‘Naa pilimulú.’ ningu Karasi munduku keliengi liemu kelko manda konopu topele toko Karasinga unguma ‘Sika’ ningu kuru mondoko yando onge aulka se paa naa lemó. Yombo sene u “Sika.” nimba kuru mondopale pe kelepa mundupa kelemba aku ulumuni Pulu Yemonga Malo kelepa ‘kolopili.’ nimba unjuperana uku topa panjipa, ‘yombomane „Pulu Yemonga Malo, yu kanoko ungu-taka tondangi.’ nilimú.

<sup>7</sup> „Karasi munduku kelkole kelko konopu topele toko Karasinga yomboma kelko manda naa molongemonga ungu-iku se tambo:” Lo tolemo kinia mana no awisili pumba, aku mana kalia selemene yombomane kere-langí manda liku nonge kere-langima ombo kondolemo kinia Pulu Yemone aku sipa kanu mamo sepa kondolemomonga aku selemo. <sup>8</sup> Aku-sipa na-ku ma senga siri-ka kinia era kiri lupa lupa olemo kinia kanu mamo ma kiri, Pulu Yemone ‘Kanu mamo lepa kinjepili.’ nimbá uluma selemo. Pe walte ma akumu sepene nombá.

<sup>9</sup> Nanga paa pulu lemó ango-keme, „Karasinga yomboma molkole pe yu munduku kelielemene yombomando, aku sipu niliu-na-ku ono „pepá topo sikiru yomboma, ‘aku siku naa senge’ nimbu pilipu molio. ‘Ono „ma peanga mele molko, Pulu Yemone ono lipa tapondolemomonga ono mindili nolemolá aulkana wendo ongo, yu-kinia pea molko kondonge aulkana pungí uluma seko molemele.’ nimbu kanolio.” <sup>10</sup> Pulu Yemone ononga uluma pilipa sundupa naa apurulimú. Ulu sumbi nilima mindi selemo. Ononga kongono selemene kinia, ono Pulu Yemo konopu mondongendo yunga yomboma liku tapondolemele mele kiniá kepe alieli selemene uluma kinia, kanopa kiri pilipa mundupa naa kelielemo. „Pilipa mindi molemo.” <sup>11</sup> ‘Ono pali aku siku selemene mele tondolo munduku seko molko siye naa kolangi mana molonge walema pora nipili.’ nimbu paa konopu lelio. ‘Pe Pulu Yemone ‘Olio simbú.’ nirimu méle peangama sika limulú.’ ningu kuru mondolemele mele ‘mania naa pupili.’ ningu aku saa. <sup>12</sup> ‘Ono siye naa sepili.’ konopu lepo molio. ‘Yombo Pulu Yemo ‘Sika’ ningu kuru mondoko siye naa kolkole Pulu Yemone ‘yunga bolangoma mongémélema simbú.’ nirimu mélema sirimu liltingi yomboma mele manda manjiku molangi.’ konopu lepo molio.

6:13-20

*Pulu Yemone ‘Sembó.’ Nimba Panjerimu Mele ‘Sika Sembá.’ Nimbu Nokopo Molemolo Ungu Se*

<sup>13</sup> U Pulu Yemone „olionga anda-kolepa, Eporayamo-kinia ungu se nimba panjipale, ipaa olandopa molemo yombo senga imbi lepa, mi lembando Pulu Yemo yu

maniandopa yombo se paa olandopa se naa molorumumunga Pulu Yemo yuyu yunga imbi lepa mi lepale <sup>14</sup> nimbale:

“Nane paa sika nikiru.

Nane nu sewi anjipu,

‘Yombo awisili kalko lieni.’ nimbú.”

nirimu. <sup>15</sup> Aku nirimumunga pilipale Eporayamo „Pulu Yemone,“ yu ‘méle simbú’ nimba panjerimumu ‘Pe sika sepa kondopale simba.’ nimba u siye naa kolopa we nokopa molopale sika liltimu.

<sup>16</sup> Yombo sene ‘‘Paa sika nikimu.’ ningu piliangi.’ nimba yunga yombo se awili olandopa molemomo imbi lepa “Paa sika nikiru.” nimba mi lemó. ‘Yombomane yunga ungumu toko mania naa mundundangi.’ nimbale aku selemo. <sup>17</sup> Akumunga, aku sipa melela Pulu Yemone ‘‘Eporayamo-kinia nimbu panjikiru mele yuni kalopa limba yombomane paa pilku kondangi. Nane “Sembó.” nimbu panjiliu mele konopu topele naa topo paa sika selio.’ ningu kanangi.’ nimba ‘yunga imbi yuyu lepa, “Paa sika nikiru.” nimba mi lierimu. <sup>18</sup> Pulu Yemo yu ‘konopu topele naa tolemo, ono-kinia “Sembó.” nimbu panjikiru mele pe-pe-kepe ‘Sika sembá.’ ningu konopu kimbu siku molangi.’ nimba aku ulutolo serimu. „Ulu se: Ungumu u nimba panjerimu. Ulu se: Ungumu nimba panjipale pe yunga imbi yuyu lepa ‘Paa sika sembó.’ nimba mi lierimu aku ulutolo serimu kanumu. Aku ulutolo Pulu Yemo konopu topele manda naa topa, kolo paa manda naa tolemo ulutolo. Akumu pilipuli ‘Pulu Yemone olio ‘simbú.’ nimba panjerimu mélema sika simba.’ nimbu pilipu ‘Umbuna se wendo naa opili, olio nokopili.’ nimbu Pulu Yemo molemona nondopo pulimulu yomboma olionga konopu tondolo pupili siye naa kolopo manda nokopo molomolo.

<sup>19</sup> „Aku ungumunga ungu-iku se topo siembo:‘ Nona andoli sipi se poporomene nona topa memba pumbá.’ ningu senga ka seko koyapo seko panjilimili. Aku sipa olionga minima nona andoli sipi-mele. ‘Pulu Yemone olio-kinia ‘sembó’ nilimú ungumu kolo naa topa sika selemo sembá.’ nimbu kuru mondolemolo ulu akumu minimanga ka mele senga ka selemo. Aku selemomonga yunga ungumu mundupu kelepo anju pumbu molopo naa kinjimulú. Aku kamo Pulu Yemo molemo suluminia paa kake selina, múlu awili sene pipi silimú, akuna sukundu pumba ka selemo. <sup>20</sup> Kanu suluminia paa kake selina ye se olionga nimba lipa tapondombando kumbi lepa sukundu purumu. Pumbale Mellekisedeke molorumu mele yu aku sipa alieli olionga nimba Pulu Yemo popo tondoli ye awili olandopamo molemo. Akumu Yesusi.

## 7

7:1-10

*Popo Tondoli Ye Paa Imbi Olandopa Mololi Mellekisedekenga Semanemo (7:11-28 pea)*

<sup>1</sup> ‘Karasi yu Mellekisedeke mele molemo.’ nikiru, kanu ye Mellekisedeke yu kolea-awili Salleme yombomanga ye nokoli kingimu molopale, Pulu Ye Paa Olandopa Koleamanga Pali Nokorumumunga kongono sendembando yombomanga Pulu Yemo popo tondopa molorumula. U Eporayamo kolea senga pumba opa sepa ye nokoli kingi kisenga ami-yema topa mundupale ‘ononga meringi mélema lipa memba, kelepa ulkando ombá orumu kinia kanu ye Mellekisedeke kanumu yu ombo aulkana kanopale ‘Pulu Yemone nu sewi anjepili.’ nirimu. <sup>2</sup> Yuni aku sipa Pulu Yemo-kinia ungu nimba Eporayamonga mawa senderimu kinia, Eporayamone rureponga talo rureponga talo nimba merimu mélemanga pali selu selu nimba ‘peangama, wendo lipa Mellekisedeke sirimu. Mellekisedeke yunga imbirunga ungu-pulumu ‘ulu sumbi nilima selemo ye nokoli kingimu’. Yu nokorumu kolea-awili Sallemenga imbirunga ungu-pulumu ‘yomboma-kinia tako leko konopu seluna pupili mololi ulu-pulumu’

akumunga yemonga imbi talo-sipamo 'Yomboma-Kinia Taka Leko Konopu Seluna Pupili Mololi Ulu-Pulumu Nokolemo Ye Nokoli Kingimu'. <sup>3</sup> Yunga 'Semanemo bokuna tondorumu yemone yunga anumu lapatolonga imbitolo naa topa, yunga anda-kolepa senga imbimu kepe naa tondorumu. Yu meringi walemo kepe naa tondopa, kolorumu walemo kepe naa tondorumu. Yuni popo tondoli yemo molorumu mele walte mundupa kelierimu ungu se bokuna naa tondorumu naa pilielemolomonga yu Pulu Yemonga Malo alieli konde molopa mindi pulimú mele yu aku sipa mele molorumu.' nimbu pilielemolo.

<sup>4</sup> Mellekisedeke yu imbi paa olandopa molorumu mele piliayo. Olio yombo talape awisilinga pulu-pulu anda-kolepa paa awili Eporayamone opa sepale méle liltimumanga pali rureponga talo rureponga talo nimba mélemanga selu selu nimba wendo lipa yu sirimu. <sup>5</sup> ,U ye nokoli awili sene yunga yombomanga méle rureponga talo rureponga talo ningua taltoringimanga selu selu nimba yuni wendo liltimu-na-kolo Isirele yomboma laye-kolte lupa mele seringi., LLipaini kalopa liltimu ye mare Pulu Yemo popo tondoli yema moloringi, kanu yemanga ungu-mane se pelemo, akumu i-sipa mele:

'Isirele yombomanga méle rureponga talo rureponga

talo ningua taltonge mélemanga

selu selu ningua wendo liku LLipai yema siengi.'

nimba pelemo. Mélema siringi yomboma-kinia LLipai yema-kinia genupili, ono pea pali Isirele yomboma Eporayamone kalopa liltimu-na-kolo LLipai yemane genupilinga mélemaaku siku mare liltingi. <sup>6</sup> Mellekisedeke yu LLipaini kalopa liltimu ye se mólo, aku-na-kolo ,Eporayamone LLipai yomboma u naa kalopa lipili, yunga méle rureponga talo rureponga talo nimba mélemanga pali selu selu nimba wendo lipa Mellekisedeke sirimu liltimu. Pulu Yemone kanu yemo 'yukinia sembó.' nimba panjerimu yemondo Mellekisedekene 'Pulu Yemone sewi anjepili.' nirimula. <sup>7</sup> Olio pilielemolo: 'Ye sene 'Pulu Yemone nu sewi anjepili.' nilimú aku yemo yu ye olandopamo, ye sendo 'Pulu Yemone nu sewi anjepili.' nilimú ye akumu maniandopamo.' nimbu pilielemolo. ,Aku liemu Mellekisedeke olandopa, Eporayamo maniandopamo., <sup>8</sup> ,Akumunga ungu se pea pelemo mele i-sipa:, LLipai yemane Isirele yombomanga méle rureponga talo rureponga talo ningua taltoringi mélemanga selu selu ningua liltingi yema koloringi, aku-na-kolo Eporayamonga méle rureponga talo rureponga talo nimba merimumanga selu selu nimba liltimu yemo Pulu Yemonga bokuna yu kolorumu ungu se nimba naa molemo, akumu pilielemolola. <sup>9</sup> ,Aku ungumunga, olione ungu se pea i-sipu mele manda nilimolá: Eporayamone yunga méle rureponga talo rureponga talo nimba merimu mélemanga selu selu nimba lipa Mellekisedeke sirimu kinia 'Pe LLipai yemane rureponga talo rureponga talo ningua taltoringi mélemanga selu selu ningua liltingi yema kalopa liltimu anda-kolepa LLipaini u yunga méle rureponga talo rureponga talo nimba taltorumu mélemangala Eporayamone selu selu nimba lipa Mellekisedeke sinderimu.' aku nilimolá. <sup>10</sup> Sika LLipai u naa meringi-na-kolo LLipai yunga anda-kolepa Eporayamonga olona sukundu molopili Mellekisedekene Eporayamo aulkana kanorumu akumunga ,aku sipu nilimolá.,

7:11-28

*U Popo Tondoli Ye Moloringima Maniandopa, Popo Tondoli Ye Mellekisedeke Mele Konde Molemo Yemo Olandopamonga Ungu Se (7:1-10 pea)*

<sup>11</sup> ,Manda, akumu pilipu pora sipuli kiniá Yesusi Karasi molemo mele kelepo piliamili., U Mosisini Isirele yombomando Pulu Yemonga ungu-manema simbando ungu-mane se sipa nimbale: "LLipai yombomane Pulu Yemo popo tondoli kongonomo sangi." nirimu. 'Aku siku sangi.' nirimu kinia kanu popo tondoli yemane kongono

seringi mele manda serimu liemu „U-pulu-pulu popo tondoli ye awili olandopa, Eronone kalopa liltimu popo tondoli yema mele kiniá aku sipa ye se naa molopili. Mellekisedeke mele ye se kiniá molopili.“ nirimu akumu nambi semu-na nirimuye? „Kanu popo tondoli yemane yombomanga ningu senderingimunga yombomane ulupulu- kirima konopuna we perimu-kulu Pulu Yemonga kumbikerena manda naa puringimunga Pulu Yemone aku nirimu.,<sup>12</sup> Akumunga, Pulu Yemone yu popo tondoli yema topele tombando ungu-manemo kepe topele naa tomu liemu manda naa sembá. „Akumunga, ungu-manemo sika topele torumu.,<sup>13</sup> Pulu Yemone ,‘popo tondoli ye awili olandopamo kolali sepa molopili.’ nirimu kanu yemo ,yu Isirelenga malo LLipaini kalopa liltimu yombo talapemonga sukundu molorumu ye se mólo., Yu Isirelenga malo sene lupa kalopa liltimu yombo talapemonga sukundu molorumu ye se. Yunga genupili lapali kepe se Pulu Yemo popo toko kongi mélema kaloringi polona pungu kongono naa seringi.<sup>14</sup> Olio pilielemolo, olionga Ye-Awilimu ,Isirelenga malo, Judane kalopa liltimu, aku yombomanga ‘se Pulu Yemo popo tondoli ye se molomba.’ nimba Mosisini u naa nirimu kanumu.

<sup>15</sup> Kiniá ye konde se popo tondopa molemo paa mona lemo-na kanokomolo akumu ‘Mellekisedeke yu molorumu mele aku sipa yu popo tondoli ye se lupa, popo tondoringi LLipai ye akuma lupa.’ nimbu akumu manda sumbi sipu nimbu kanopole ,‘U Pulu Yemo popo toringi aulkamo maniandopa; kiniá olio Pulu Yemo popo tomolo aulka olandopamo wendo okomo.’ nimbu sumbi sipu kanokomolola.,<sup>16</sup> Kanu yemo ungu- manemone ‘LLipaini kalopa limba yema popo tondoli yema molangi.’ nirimu akumanga yu popo tondoli ye se naa molorumu, mólo. Aku-sipa na-kolo yu alieli konde molopa mindi pumbámonga tondolomo perimumunga yu popo tondoli ye se molorumu, yu toko mania mundungí aulka se mólo. <sup>17</sup> Pulu Yemone yundu u ungu se nirimu. Yuni nimbale:

“Mellekisedeke molorumu mele

nu nunu aku siku Pulu Yemo popo tondoli ye se  
alieli molko mindi puni.”

nirimu.

<sup>18</sup> „Aku unggumuni olio i-sipa mele lipa ora silimú: ‘LLipai yemane ‘yombomanga’ ningu Pulu Yemo popo tondoko molangi.’ nirimu., Ungu-mane umu pange sepa olio lipa tapondomba enge se naa perimu-na Pulu Yemone ‘kanu ungu-manemo kamu mania pupili.’ nirimu, akumu lipa ora silimú. <sup>19</sup> ,Mosisini, ungu-mane sirimumane Pulu Yemone yomboma kanopa ‘ulu-pulu-kirima konopuna naa peli yomboma’ nimba kanomba aulka se naa lierimu kanumu. Akumunga, ,kanu popo tondoli yemanga ungu-manemo topele topale, Pulu Yemone aulka konde peanga se lupa akiserimu, akumu olandopa, u ungu-manemo maniandopa, aku aulka kondemonga pumbuli olio Pulu Yemo molemona nondopo manda pulimulu.

<sup>20</sup> Akumunga ungu se pea i-sipa: „Pulu Yemone ‘Yesusi kanu aulka kondemonga popo tondoli yemo molopili.’ nirimu, akumu kepe we naa nirimu. Yu ‘aku popo tondoli yemo molopili.’ nimba “Paa sika nikiru.” nimba, nimba panjipa mi lierimu. U popo tondoli ye moloringima ‘aku siku seko molangi.’ nimba Pulu Yemone mi naa lierimu, <sup>21</sup> aku-na-kolo ‘Yesusi Pulu Yemo popo tondoli ye se molopili.’ nimba Pulu Yemone ,“Paa sika nikiru.” nimba, mi lierimu. Yuni yundu nimba panjipale

“Ye-Awilimuni yunga imbi yuyu lepa

“Paa sika nikiru.” nimba mi lepale

“Nu popo tondoli ye se moleno mele

alieli aku siku molko mindi puni.”

nimba panjipa mi lierimu.

Yu pe konopu topele topa

ungu se lupa paa naa nimbá.”

nirimu. <sup>22</sup> Pulu Yemone Yesusi nimba taltopa yu-kinia aku sipa nimba panjipale ‘Paa sika nikiru.’ nimba mi lierimumunga Yesusi olionga popo tondoli yemone olionga nimba lipa tapondolemomonga Pulu Yemone olio-kinia nimba panjerimu ungu kondemo olandopa, ‚u Isirele yomboma-kinia nimba panjerimu ungumu maniandopa.‘

<sup>23</sup> ‚Akumunga ungu se pea i-sipa:‘ U popo tondoringi yema alieli konde molko mindi naa pungu, alieli kolkole kelko mare kolali seko moloringi akumunga ono awisili moloringi, <sup>24</sup> aku-na-kolo Yesusi alieli konde molopa mindi pulimú-na yu kamu-alieli popo tondoli yemo molemo mele molomba. Yu olionga popo tondoli yemo molemo mele yombo sene ‘Naa sepili. Mania pupili.’ nimbá aulka se mólo. Akumunga alieli popo tondoli kongonomo mundupa naa kelepa, sepa mindi pumbá, ‚ye sene yu manda topele naa tomba.‘ <sup>25</sup> Akumunga alieli konde molopa mindi pumbale ‘Pulu Yemone ono lipa tapondopili.’ nimba alieli mawa sepa molemomonga yombo marene ninguli ‘Yesusini sika nanga nimba senderimu.’ ningu kuru mondoko yunga imbi mangilkuli Pulu Yemo molemona nondoko pulimili yombo akuma yuni ‘Mindili nolemolá aulkana wendo ongo Pulu Yemo-kinia molko kondonge aulkana pangi.’ nimba alieli aku sipa manda lipa tapondolemo.

<sup>26</sup> Popo tondoli ye awili olandopaaku sili sene olionga nimba sendelemo mele papu sendepa molemo. Yu Pulu Yemone kanopa ‘ye paa kake seli’ nimba pilielemo yemo molopa, ulu se sepa naa kinjipa, ulu-kiri se waltikele kepe ‘Sambo.’ konopu naa lepa, yombomane ulu-pulu-kiri seringi kinia ‘Na-kinia pea samili.’ nimba naa serimu, akumunga Pulu Yemo yuyu mulu-koleana paa olandopa molemona ‘molopili.’ nimba mondorumu. <sup>27</sup> U popo tondoringi ye awili olandopamane seringi mele selemo aulka se naa lemó. Onone walemanga alieli Pulu Yemo popo toko kongi mélema kalko singíndu u ‘ononga ulu-pulu-kirima mania pupili.’ ningu mélema popo toko kalko sikuli, pe ‘yombomanga ulu-pulu-kirima mania pupili.’ ningu mélema popo toko kalondoko siringi, aku-na-kolo Yesusini aku sipa naa selemo. Yu yuyu waltikele mindi Pulu Yemo popo topa yunga kangimu sirimuaku sipa ‚Yombomanga ulu-pulu-kirima kamu mania pupili.’ nimba, waltikele mindi Pulu Yemo popo topa kalondopa sirimu. <sup>28</sup> ‚Aku nikiru ungumunga ungu se kelepo kamu niembo,: Ungu-mane se pelemomo pilku sengena panjiku sengendo ye ningu taltoko ‘popo tondoli ye awili olandopama molangi.’ nilimili ye enge naa pelima, aku-na-kolo Mosisini kanu ungu-mane sirimumu u wendo orumu, Pulu Yemone Malondo “Nu popo tondoli ye awili olandopamo molani.” nimba “Paa sika nikiru.” nimba, nimba panjipa mi lierimu ungu akumu pe wendo orumu. Kanu Malo ulu-pulu-kiri se paa naa sepa Pulu Yemone “Sei.” nirimu unguma paa pali pilipa lipa sumbi sipa serimu ye topele naa topa konopu tondolo pupili konde molopa mindi pumbá yemo molemo.

## 8

8:1-13

*Pulu Yemone Ungu Konde Se Nimba Panjipa Mi Lierimumunga Yesusi Mulu-Koleana  
Popo Tondoli Ye Awili Olandopamo Molemomonga Ungu Se*

<sup>1</sup> Nane ‚Pulu Yemone nimba taltopa, ‘Olionga popo tondoli yemo molopili.’ nirimu.’ nikiru akumunga ungu-pulumu i-sipa: Ye nindu kanu-sili ye se olionga popo tondoli ye awili olandopamo molemo kanumu ‚mélema pali nokombando, mulu-koleana Ye Nokoli Kingi Awili Olandopamo kolea nokopa molemo polomonga ki-lomekondo pumba molemo. <sup>2</sup> Akuna molopa yu mulu-koleana gilimú ‚serele-ulcamonga, suluminia paa kake sélimunga olionga nimba Pulu Yemo popo tondopa molemo. ‚Yu aku kongonomo sendepa molemo, serele-ulka akumu Pulu Yemo

molemo serele-ulka sikamo. Akumu ye sene naa takorumu, Ye-Awilimu yuyu takorumu.

<sup>3</sup> „Yu mulu-koleana gilimú serele-ulcamonga suluminia akuna selemomonga pulumu i-sipa:„ Pulu Yemo popo tondoli ye awili olandopamane „Mosisini sirimu ungu-manemone nirimu mele pilkuli sengendo, Pulu Yemo popo toko we-mélema kinia kongi méle kalolima kinia mengo ongo siringi, akumunga, ye Pulu Yemo popo tondoli ye nokoli awili olandopa „pe orumu ye Yesusi, nikiru akumuni Pulu Yemo popo topa „meme peli, mélse naa silkanje manda naa selka akumunga yuni kepe mélse popo topa sirimula. <sup>4</sup> Aku-na-kolo ma-koleana Pulu Yemo popo tondoli ye ungu-manemone nilimú mele pilkuli Pulu Yemo popo toko kongi mélema kalko silimili yema molemelemonga kanu yemo yu ma-koleana molkanje Pulu Yemo popo tondoli ye se naa molka. <sup>5</sup> Kanu yemane popo tondoli kongono selemene akumu Pulu Yemo molemo mulu-koleana selemo kongonoma none sepa, mulu-koleamonga minimu mele none seko molemele. Akumunga, Pulu Yemo mana molomba serele-ulkamo Mosisini kokele takomba serimu kinia Pulu Yemone yu mane sipa nimbale: „Nane mulú Sainai ola

Mosisi nu lipu ora sindu aku sipa mele  
mélema pali paa sumbi siku manda manjiku sani.”

nirimu. <sup>6</sup> „Akumu sika na-kolo, kanu yemanga Pulu Yemo popo tondoli kongonomo paa maniadopa. Pulu Yemone Yesindu ‘Sei.’ nimba sirimu popo tondoli kongonomo paa peanga olandopa. Yunga kongonomo olandopa selemomonga pulumu i-sipa: Pulu Yemone olio-kinia ungu konde nimba panjipa mi lierimumu Yesusi awi-suku-singina gilipa ‘Pulu Yemo-kinia olio-kinia konopu seluna pupili molangi.’ nimba lipa tapondolemo yemone ‘kamu wendo opili.’ nimba senderimu, aku ungu kondemo olandopala. Ungu kondemone ‘olio simbú.’ nimba panjilimú aku mélema olandopa, ungu umuni ‘simbú.’ nirimu aku mélema maniadopa, akumunga, ungu kondemo olandopa.

8:7-13

*Pulu Yemone Ungu Konde Nimba Panjipa Mi Lierimu Ungumu Olandopa, UNGU U  
Nimba Panjipa Mi Lierimu Ungumu Maniadopamonga UNGU Se (8:1-13 pali)*

<sup>7</sup> Piliame! Pulu Yemone nimba panjipa mi lierimu ungu-umunga tondolomo pelkanje Pulu Yemone kelepa ungu se naa nimba panjilka. <sup>8</sup> „Ungu-umunga tondolomo pelkanje Pulu Yemone yomboma seringi mele kanopa kiri naa pilka.“ Aku-na-kolo yombomane seringi mele Pulu Yemone kanopa kiri pilipa nimbale:

“Na Ye-Awili „Yawe\_ne „onondo, nimbili:

„Piliaa!, Nane Isirele yomboma-kinia

Juda yomboma-kinia ungu konde se  
nimbu panjipu mi lembo walemo wendo ombá.

<sup>9</sup> I ungu konde nikiru akumu

u ononga anda-kolepalima kolea Isipi wendo lipu  
ultu membo orundu walemonga  
kanu yomboma-kinia  
nimbu panjipu mi lierindu mele selu-sipa mólo.

Nane ono-kinia ungu nimbu panjipu

mi lierindu ungumu naa pilieringimunga  
nane ‘Ono molko kinjangi.’ nimbu lipu bulu sirindu.

<sup>10</sup> Isirelene kalopa liltimu yomboma-kinia

kelepo sembó mele pe ungu konde se  
nimbu panjipu mi lembo, akumu i-sipa:

„Ono seko molonge kinia

nane ono kanopo peanga pilimbu.' nirindu mele  
 'konopumuni pilku kondangi.' nimbu,  
 nanga ungu-manema ononga konopuna pepili panjindipu,  
 'Nanga ungu-manema konopu mondoko 'Pilipu samili.'  
 ningu molangi.' nimbu nane kanu ungu-manema  
 boku mele ononga konopuna imbi tombo.  
 Na mindi ono pilku popo tonge Pulu Yemo molombo,  
 ono nane nokombo yomboma molonge.

<sup>11</sup> Aku walema wendo ombá kinia  
 yombo kamako imbi molombama kepe,  
 koropa imbi naa molombama kepe, akumane pali  
 'Na Ye-Awilimu.' ningu, kanoko imbi singímunga  
 yombomane ononga kandi pulu lemó yomboma kepe  
 ulka kere-pongolo penge yomboma kepe  
 'Ye-Awilimu molemo mele piliangi.' naa nimulú.  
 Ono pali na pilku pora singímunga kelko ningu naa singí.

<sup>12</sup> Nane ono kondo kolopo  
 onone seko kinjingí uluma mundupu kelendepo  
 ononga ulu-pulu-kirima  
 kelepo paa naa pilimbu." nimbu  
 na Pulu Ye Awilimuni nikiru."  
 nirimu.

<sup>13</sup> Pulu Yemone pe olio-kinia nimba panjipa mi lierimu ungu akumu "Ungu kondemo" nirimu ungu akumuni u Isirele yomboma-kinia nimba panjipa mi lierimu ungu u akumu yuni 'Kamu nondopa mania pumbá sekemo.' nimba nirimu. Pe kiniá olio pilielemolo, méle u se kamu nondopa mania pumbá sekemo mele, akumu sika nondopa kamu pora nimbá.

## 9

9:1-28

*Ungu Umu Perimu Kinia Popo Tondoli Ye Awili Olandopamane Mememane Seringi  
 Mele Kinia Ungu Kondemo Pelemo Kinia Karasini Yunga Mememone Selemo Mele Kinia  
 Akutolonga Ungu Se*

9:1-10

*U Mana Pulu Yemo Popo Tondoli Ye Awili Olandopamane Serele-Ulkana Kongi  
 Mélemanga Memema Mengo Pungu Pulu Yemo Siringimunga Ungu Se*

<sup>1</sup> 'Karasina kongonomo kinia ungu kondemo kinia olandopa, popo tondoli ye umanga kongonomo kinia ungu umu kinia maniadopa.' nindu kanumunga kiniá ungu mare pea niembo. <sup>2</sup> U 'Pulu Yemone Isirele yomboma kinia, nimba panjipa mi lierimu ungumuni Pulu Yemo popo toko kape ningí mele nirimu ungu-manema perimu, kanu ungu umunga Pulu Yemo popo toringi ulka se mana gilierimula. <sup>3</sup> Aku ulkamo serele-ulka se takoringi, akuna sukundu suluminia talo lierimu. Takokole, yunga suluminia kiyakondo lierimuna sepe-llame yopoko-pakara norumu mélemo kinia pellawa kaloli 'Pulu Yemonga' ningu taltoringi polomo kinia taltoringi, aku suluminiamo imbi leko 'Suluminia Kake Sélimu' niringi. <sup>4</sup> Anjukundu múlu awili sulu sene pipi sirimu akuna anjukundu Suluminia Paa Kake Sélimu lierimu. <sup>5</sup> Pulu Yemo popo tongendo méle muna tolima kaloringi polo kou-gollo kandoringimu kinia okolo kou-gollo kandoringimu kinia aku méletolo aku koleamonga méletolo lierimu. Aku okolona sukundu kere-lang'i mana perimu mingi se kinia, Erononga apulu-mingi ambolorumu kiri-kiri serimu apulumu kinia, Pulu Yemone Isirele yomboma kinia

mi lierimu unguma kou-pará talonga imbi topa mendorumu koutolo kinia, akuma perimu. <sup>5</sup> Aku okolomonga pipina ola méle talo mulu- koleana angello none selitolo Pulu Yemonga tondolomo molorumuna lierimutolonga kongomane pipimu kunungu mele pakondorumu. Aku pipimu 'Pulu Yemone yomboma kondo kolopa ononga ulu-pulu-kirima mundupa kelenderimu pipimu' niringi. Aku-sipa na-kolo kiniá ena se naa pelemomonga aku mélemanga ungu awisili manda naa nimbú.

<sup>6</sup> Aku siku ,serele-ulkamo kinia akuna sukundu suluminiatolo kinia, seko wamoko mélema seko wamoko akuna sukundu taltoko pora siringi kinia popo tondoli yema pulu polko suluminia kiyakondo lierimuna alieli sukundu pungu Pulu Yemo popo tondoli kongonomo se-pu-pu seringi. <sup>7</sup> Aku-na-kolo popo tondoli ye awili olandopamo mindi anjukundu suluminia lierimuna sukundu purumu. Alieli naa purumula. Kaliasingi senga senga waltikele mindi purumu. We naala purumu. Kongi méle se topale meme mare memba sukundu pumbale yuni ulu-pulu-kiri naa pilipa walu serimuna kinia yombomane ulu-pulu-kiri naa pilku walu seringima kinia konopumuni pilipa aku mememo Pulu Yemo popo topa sirimu. <sup>8</sup> 'Popo tondoli ye awili olandopamo yu manjipa Suluminia Paa Kake Selina sukundu pupili.' nimba ungu-mané se perimu aku ulumuni olio lipa ora silimú mele Mini Kake Sélimuni nimba silimú. Akumu i-sipa: U Pulu Yemo popo toringi serele-ulkamo we giliepili olio Pulu Yemo molemona manda pumulú aulka se naa lierimu mele Mini Kake Sélimuni nimba silimú. <sup>9</sup> Kanu serele-ulkana ulu seringimane olio kiniá molemoloma ungu se lipa ora silimú. Aku ulumuni olio lipa ora silimú mele i-sipa: U alieli Pulu Yemo popo toko we-mélema siku, kongi mélema kalko siringi akumane Pulu Yemo aku siku popo toringi yombomanga konopuna ulu-pulu-kiri perimuna kamu kulu naa tondorumu, we pilku mindi moloringi. <sup>10</sup> U Pulu Yemo popo toringi ungu-manemane kere-langi nongo, no nongo, kimbu ki kangima kulumiye tongue aku uluma mindi mane sirimu. Pulu Yemo yu 'onone sumbi siku popo tongue kinia ono yombo konopu sumbi nilima nimba kanomba ulu kondema wendo ombámonga i ungu-mané yombomanga kangikundu senge mele sirimu ungu- manema iseli-u seko molangi.' nirimu. 'Aku ulu u seringima manda naa serimu mele aku sipa olio kiniá lipa ora silimú.,

9:11-22

**(9:11-14) Karasini Yunga Mememo Ondondopa Yuyu Popo Topa Pulu Yemo Sirimu, (9:15-22) Aku Mememone Pulu Yemone Nimba Panjipa Mi Lierimu Ungu Kondemo 'Kamu Tondolo Pupili.' Nirimu Ungu Se (9:1-28 pali)**

<sup>11</sup> ,U aku sipa ,na-kolo kiniá Karasi yu Pulu Yemo popo tondoli ye awili olandopamo molemo, Pulu Yemone 'méle peangama simbú.' nirimu mélema yuni silimú. U Isirele yombomanga popo tondoli ye awili olandopamane kongi kera mélema kalko Pulu Yemonga kumbikerena pungu popo toringi serele-ulka akumu maniandopa; akuna seringi uluma maniandopala. Pe Karasi yu Pulu Yemo mulu-koleana molorumu koleana pumba popo to-porumu aku koleamo olandopa peangamo; akumu mulu-koleana gilimú serele-ulkamonga sukundu Karasi yu purumu aku serele-ulkamo mana-yombomane kini naa seringi, akumu mana lemó mélemanga mélse mólo.

<sup>12</sup> Yu Pulu Yemo mulu-koleana molorumu Suluminia Paa Kake Sélina kamu waltikele sukundu purumu. Aku-na-kolo akuna pumbándo u mana serele-ulkamonga sukundu pungíndu seringi mele yu naa serimu. Onone kongi meme pokore kinia kongi kao walo pokore kinia toko memema mingi senga kolko akumu Pulu Yemonga kumbikerena mengo puringi mele aku sipa naa serimu, mólo. Yunga mememo mindi yuyu memba pumba waltikele mindi Pulu Yemo popo topa sirimu. Aku serimumunga 'olio ulu-pulu-kirimane ka sipa nokolemo mele naa sepili.' nimba yunga mememone mindili nolemolá aulkana wendo lipa Pulu Yemo kinia kamu kopu sepo manda molomolo aulka pumulúmu akisinderimu. <sup>13</sup> Pulu Yemone yombo

kanopa ‘kangimanga kalaro molopili molemele’ nimba kanolemo yomboma ‘yuni kanopa ‘kake sepili molonge’ nimba kanopili.’ ninguli niringimuni, u kongi memema kinia kao peleama kinia toko memema kolko, kongi kao ambu kondoli, walo u naa lieli se toko ‘sepene nomba pora sipili.’ ningu kaloringi kinia norumu kekumu liku, memena sukundu ondoko munduku taltokole, kanu yombomanga kangimanga tanda sinderingi kinia kanu yomboma kelepa kanorumu kinia kangikundu yombo kake selima nimba kanorumu-kulu ‚Pulu Yemo kinia kelko manda moloringi.’<sup>14</sup> „Pulu Yemone ungu nimba panjipa mi lierimu ungu umunga uluma sengendo, aku kongimanga mememane yomboma aku sipa lipa tapondorumu liemu pe Karasinga mememone kiniá paa olandopa manda lipa tapondolemo. Yu ulu-pulu-kiri se paa naa pepili alielo molopa mindi puli Mini Kake Sélimunga tondolomo yu-kinia molopili, yunga kangimu Pulu Yemo popo topa simbando yu kolorumu. Aku yemonga mememone olionga kangikundu mindi kulumiye naa tondolemo. ‘Yuni olio ulu-pulu-kiri selemolomonga kolea kirina pumbu molopo kinjipu mindi pulimolá ulu-pulu-kiri konopumuni pilielemoloma kulu tondolemomonga Pulu Yemone olio kanopa kiri pilimba ulu se konopuna naa pelemo.’ nimbu pilielemolo. Oione ‘Konde Mololi Pulu Yemonga unguma pilku liku yu kanopa peanga pilielemo uluma sangi.’ nimba aku serimu.

<sup>15</sup> „Akumunga ungu se pea i-sipa: Karasini olionga ulu-pulu- kirimanga kolali sepa mindili norumu-na olio pipili naa kolopo Pulu Yemonga kongonomo manda semolo, akumunga yunga mememo ondondopa kolorumu aku ulumuni Pulu Yemone ungu nimba panjipa mi lierimu ungu kondemo Yesusini ‘Kamu wendo omba liepili.’ nirimu. Yombomanga nimba kolondorumu ulumuni ulu talo serimu.

„Se i-sipa: „Pulu Yemone nimba panjipa mi lierimu ungu umu sungu siku yunga ungu-manema pilku mokoli seko ulu-pulu-kiri seringima Yesusini ‘Mania pupili. Pulu Yemo akuma siye kolopa, akumanga ono “Pundu tangi.” naa nipili. Aku seringimanga ono mini pali molko kinjiku mindi pungí aulkana wendo wangí.’ nimba ononga nimba kolali sepa mindili nomba kolopa yunga mememone ononga pundu tondorumu.

„Se i-sipa: „Yunga mememo ondondopa kolorumumunga ungu umuni nokorumu yomboma Pulu Yemo pilku moloringimanga konopuma yunga mememone kamu kulumiye tondopale Yesusini yombomanga nimba senderimumuni olione ulu-pulu-kiri selemoloma omba mania pulimú, akuma Pulu Yemone kelepa naa pilipa molemo-na Pulu Yemo yuni nimba taltopa “Waa.” nilimú mele pilkuli olemele yomboma Pulu Yemo yuni molko kondoko mindi puli ulu-pulumu kinia méle peangama kinia “Nanga pulu lemba yomboma simbú.” nimba, nimba panjerimu akuma simba lingí.

<sup>16</sup> „Karasi kolorumumunga pulumu niembo: „Ye sene ‘pe walte na kolombo kinia nanga méle taltolioma nanga bolangomane liengi!’ nimba pepá topa nimba panjilimú. Aku-na-kolo bolangomane kanu mélema we manda naa limili. Pe lapa kololemo kinia yombomane kanokole ‘Manda. Kiniá lapane ‘Moke seko liengi!’ nimba panjerimu mele kamu liengi!’ nilimili. <sup>17</sup> Ye sene ungu nimba panjilimú yemo we molemo kinia yunga ungu nimba panjilimúmu uluri manda naa selemo. Yemo kololemo kinia mindi ungu nimba panjilimú mele sika aku siku manda mélema limili. <sup>18</sup> Ulu-pulu akumu pilku seringi aku sipa, u Pulu Yemone ungu nimba panjipa mi lierimu mele ‘Wendo opili.’ ningu ‚Mélse kolopili.’ ningu, kongi méle se toko mememo ondoringi. ‚Mélse naa kolkanje Pulu Yemone u nimba panjerimu mele wendo naa olka..’

<sup>19</sup> „I-siku mele seringi: „Mosisini u ‘yomboma piliangi.’ nimba Pulu Yemonga ungu-manema pali nimba sipale kongi kao walo mare kinia kongi meme mare kinia topa memema mingina kolopa, no kinia topele-mapele topale, unju kanga isopo kola mare lipa sipisipi indi kondoli marene ka topale, memena sukundu mundupale Pulu

Yemone sirimu ungu-manema molorumu bokuna kinia yombomanga kangina kinia tanda sipa kandondorumu. <sup>20</sup> Tanda sipa kandondopa molopa nimbale:

"I mememo Pulu Yemone ono-kinia  
ungu nimba panjipa mi lierimu ungumu  
'Pilku seko molangi.' nikimumu  
'ono-kinia wendo ombo tondolo pupili.'  
nilimú mememo."

nirimu. 'Mélse kolopili.' nimba naa tolkanje Pulu Yemone nimba panjerimu ungumu kamu wendo naa ombo tondolo naa pulka.' <sup>21</sup> Aku sipa mele Pulu Yemo popo toko kaloringi serele-ulcame kinia serele-ulcame sukundu Pulu Yemo popo tongendo taltoringi mélema kinia pali, 'Pulu Yemonga méle kake selima liepili.' nimba Mosisini kongi méle topa meme mingi senga ondopa, mememo tanda sipa kandorumula. <sup>22</sup> Pulu Yemonga ungu-mane se nimba perimu mele pilipale Mosisini aku serimu. Kanu ungu-manemo nimba molorumu mele i-sipa mele: 'Méle awisili 'Pulu Yemone kanopa 'méle kake selima' nimba kanopili.' nimba mememane mindi manda sendemba. 'Kongi senga mememo ombo wendo pupili.' ningu 'Yu kolopili.' ningu yunga nomi kari naa lenge kinia Pulu Yemone meme se ombo naa pumbá kanopale mésenga kalaro molo yombo senga ulu-pulu-kirima "Mania pupili. Kelepo naa kanombo." manda naa nimbá.' ungu-mane se aku sipa nimba pelemo.

**9:23-28**

*'Yombomanga Ulu-Pulu-Kirima Pulu Yemone Mundupa Kelendepili.' Nimba Karasi Yu Yuyu Pulu Yemo Popo Topa Sirimu Ungu Se (9:1-28 pali)*

<sup>23</sup> Pulu Yemone "Mélemanga kalaroma mememane topa mania mundundopili." nimba ungu-mane akumu sirimumunga mulu-koleana lierimu mélema kepe mana manda manjiku sengendo Pulu Yemone nimba sirimu mele pilkuli seringi kanu méle none seli mana lierimuma 'Kake sepili.' ningu kongimanga mememane aku uluma seringi. Aku-sipa na-kolo mulu-koleana lemó mélema, sika mélema lémo, aku mélema 'Kake sepili.' ningu kongimanga memema ondojemolá kinia manda kake naa sendelka. 'Karasi yunga mememo ondopale kolorumu aku, meme peanga paa olandopamone mindi manda kake senderimu. <sup>24</sup> Karasi yu 'kolopa lomboropa ola molopale, ya mana Pulu Yemonga suluminia none seli seringi lierimu suluminia akuna sukundu naa purumu. Yu 'Paa sika suluminiamonga pambo.' nimba sumbi sipa mulu-koleana mindi purumu, we senga lupa mólo. Akuna 'olio lipu tapondambo.' nimba Pulu Yemonga kumbikerena pumba molemo.

<sup>25</sup> Ya mana-yombomanga nimba Pulu Yemo popo tondoli ye awili olandopamo Pulu Yemo molemo Suluminia Paa Kake Sélinia kalia-ingimanga pali walte walte nimba méle lupamanga memema memba sukundu pumba 'Pulu Yemone yombomanga ulu-pulu-kirima we siye kolopili.' nimba Pulu Yemo sirimu. Aku-sipa na-kolo 'ya mana Pulu Yemo popo tondoli ye awili olandopamone, yombomanga nimba aku sipa alieli Suluminia Paa Kake Sélimunga sukundu meme se lupa memba pu-pu-pu serimu mele Yesusi Karasini aku sipa 'Pulu Yemo molemo, mulu-koleana alieli pumba yunga mememo popo topa si-pu-pu sembando naa purumu. <sup>26</sup> Mana popo tondoli ye awili olandopamone serimu mele Karasini aku selkanje 'alieli mindili nambo.' nimba, Pulu Yemone u-pulu-pulu ma serimu kinia yuni pulu polopa mindili nomba pe yandopa yandopa mindili nomba mololepa pulka. Aku-sipa na-kolo aku naa serimu. Ma-kolea nondopa pora nimbá wale akumunga 'Pulu Yemone yombomanga ulu-pulu-kirima we siye kolopa kamu naa pilipa molopili.' nimba mana ombo, waltikele mindi yunga mememo olionga nimba ondondopa Pulu Yemo popo topa sirimu.

<sup>27-28</sup> Yomboma pali ya mana waltikele mindi kolkole pe kote sendepa pilimba koleana pungí ulu-pulumu pelemo. Aku ulu-pulumu paa sika pelemo mele ulu-pulu

se lupa paa pelemóla. Akumu i-sipa: Karasini waltikele mindi 'Yombo awisilinga ulu-pulu-kirima omba mania pupili.' nimba yu yuyu 'Waltikele tangi.' nirimu. Pe wale talo-sipa kelepa ombá-na-kolo 'Yombomanga ulu-pulu-kirima nane lipu membo kelepo kolondambo.' nimba naa ombá. "Yu ombá." ningu nokoko molemele yomboma 'Ulu-pulu-kiri pelemo koleamo paa kamu munduku kelko kolea paa peangana pungu molko kondoko mindi pangí.' nimba ono limbando ombá. Ulu-pulumu aku sipa pelemo. Yomboma kiniá kolkole pe kote sendemba koleana pungí akumu paa sika mele, aku sipa Karasi u olionga nimba senderimu pe omba sembá mele akumu paa sikala.

## 10

10:1-18

*Karasini Olionga Nimba Kamu Popo Tondombando Waltikele Mindi Yu Yuyu Pulu Yemo Sirimu Kinia Kongi Mélema Kalko Siringi Uluma Kamu Mania Purumu. (10:1-10)  
**U Kalko Siringi Mélemane Ulu-Pulu-Kirima Manda Kulu Naa Tondorumu;**  
(10:11-18) **Karasini Pulu Yemo Popo Topa Sirimu Mélemane Mindi Ulu-Pulu-Kirima Paa Manda Kulu Tondolemo, Akumunga Ungu Se***

<sup>1</sup> „Karasini olionga nimba kolondorumumunga ungu se kelepo niembo., Nomuna kinia kariyápana kinia kanopole nilimulumuni, méle sikama naa kanopo mélemanga minima mindi gilimú kanolemolo. Mélemanga minima kinia mélemanga pikisa doro selemelema kinia akumane sika mélema molemo mele we lipa ora silimú, yu yuyu méle sika se mólo. Aku sipa, Mosisini yombomane Pulu Yemo popo tonge méle ungu-manema pilku seringi uluma paa sika mélema mele mólo. Akumunga ‘Pulu Yemo popo tamili.’ ninguli aku ungu-manema pilkuli kongi mélema kalko Pulu Yemo siringimane yombomanga ulu-pulu-kirima kamu kulumiye naa tondopa, Pulu Yemone ono kamu kanopa ‘konopu peanga kake sepili molemele.’ nimba kanomba unguri naa sepa, ‘Onone “Pulu Yemo-kinia sepo kinjerimulu.” ningu konopumuni naa pilku molangi.’ nimba unguri naa serumungu alieli kalia-ingimanga pali ono Pulu Yemo popo tongendo u-pulu- pulu seringi mele selu-siku mindi sengendo kongi mélema kalo-pu-pu seringi.

<sup>2</sup> Aku siku seringi ulumane ononga konopuma kamu alieli- alieli kulumiye tondolkanje kelko kongi mélema kalolemoláye? Kamu-alieli-alieli kulumiye tolkanje waltikele Pulu Yemo popo toko kalko sikuli, ononga ulu-pulu-kirima mania pulka, kanu-kinia onone ‘Konopukundu umbuna se naa pepa, ulu- pulu-kirima we naa pelemomonga Pulu Yemone olio molopo kinjimulú ulu se naa sembá.’ ningu pilkuli kelko kongi méle mare naa kalko aku uluma munduku kelielemolá. <sup>3-4</sup> Aku-sipa na-kolo kongi kao peleama kinia kongi memema kinia toko kaloringimanga mememane ononga ulu-pulu-kirima kamu kulumiye manda naa tondorumumunga alieli ipulieli tangoli kalia-ingimanga pali Pulu Yemo kelko kongi mélema kalko punguli Pulu Yemonga ungu-manema pulua toringimunga ononga konopumanga ulu-pulu-kirima we pepa mindi purumu mele kelko pilieringi.

<sup>5</sup> „Pe kongi méle toko Pulu Yemo popo toko kaloringimanga mememane yombomanga ulu-pulu-kirima konopuna perimuma manda kamu kulumiye naa tondorumu,-kulu pilipale Karasi ma-koleana ombá sepale nirimumuni, ‘Pulu Yemondo, nimbale:

“Kongi méle toko nu kalko siringima kinia,  
méle nu we siringi mélema kinia,  
konopu naa mondokole nuni na  
“Yombomanga ningu ma-koleana kolondani pu.”

ningu umbu-kangi se seko taltorunumu sikanu.

<sup>6</sup> 'Pulu Yemo kape niemili.' ningu

'Sepene nomba pora sipili.' ningu

kaloringi kongi mélema kinia,

'Ulu-pulu-kiri selemolomanga kalopo sikimulu.'

ningu kaloringi kongi mélema kinia, akuma

nu kanoko kiri pilierinu.

<sup>7</sup> Aku kongi méle kaloringima

konopu naa mondorunumunga nane nimbuli:

"Pulu Yemo, na ya molio kanuyo.

Nuni nando "Sani pu." nirinu mele

'Sambo.' nimbu ,nanga kangimu yombomanga nimbu

nu popo topo simbú, ombó sekero.

Nane aku sipu sembó mele

u bokuna toringi molemo kanumu." nirindu."

nirimu.

<sup>8</sup> ,Sika Pulu Yemone yuyu yombomando "Saa." nimba ungu- mane sirimu mele pilkuli sengendo kongi mélema kalko yu siringi-na-olo, Karasini nirimu mele nikiru aku ungumunga u Karasini nimbole:

"Kongi méle toko nu kalko siringima kinia,

méle nu we siringi mélema kinia,

'Sepene nomba pora sipili.' ningu

kaloringi kongi mélema kinia,

'Ulu-pulu-kiri konopuna pelemomanga

kalopo sikimulu.' ningu

kaloringi kongi mélema kinia, akuma kanokole

nu konopu naa siku kanoko kiri pilierinula."

nirimu. <sup>9</sup> ,Kongi méle kaloringimunga aku sipa nimbole, pe nimbole:

"Na ya molio kanuyo. Nuni nando "Sani pu."

nirinu mele 'Sambo.' nimbu ombó sekero."

nirimu. 'Pulu Yemo olio kanopa peanga piliepili.' ningu yu u popo tongendo kongi mélema kaloringi ulu-pulumu ,Pulu Yemone, topa mania mundupa, kiniá yu molemona nondopo manda pumulú aulkamonga ulu-pulu konde pe nirimumu 'Kamu wendo ombo tondolo mundupa pepili.' nimba yuni Yesusi Karasindu "Sei." nirimu mele pilipale ombo serimu. <sup>10</sup> Pulu Yemone yundu "Sei." nirimu ulumu pilipa lipale ,Yesusi Karasini, 'Sambo.' nimba ombo yunga kangimu waltikele mindi yuyu kamu Pulu Yemo popo topa sirimumunga ,Pulu Yemone kanopa peanga pilipale, olionga ulu-pulu-kirima mundupa kelendepa 'olio yunga yombo kake selima molangi.' nirimu.

<sup>11</sup> ,Akumunga ungu se pea i-sipa:, Walemanga pali Pulu Yemo popo tondoli yema ola gilku popo tondoli kongono se-pu-pu selemele. Paa alieli ipulieli tangoli ola gilku ulu-pulu-kirima paa manda naa kulu tondolemo kongi mélema popo toko kalondoko silimili. <sup>12</sup> Aku-sipa na-olo pe orumu Pulu Yemo popo tondoli ye kanumuni yombomanga pali alieli selemele senge ulu-pulu-kirima paa kamu manda kulu tondomba ungu se sendembando yuni kamu waltikele mindi yunga toringi kangimu Pulu Yemo popo topa sirimu kinia ,kongi mélema toko kalko Pulu Yemo siringi ulu-pulumu kamu mania purumu. Yu aku sepale imbi ola molopili Pulu Yemo kinia mélema nokombando, Pulu Yemonga ki-lomekondo pumba molorumu. ,Mana Pulu Yemo popo tondoringi yemanga kongonomo pora naa nirimumunga alieli ola gilku popo toko mindi gilieringi-na-olo Karasini waltikele mindi Pulu Yemo popo torumu kinia manda serimu-kulu we molorumu., <sup>13</sup> Akuna molorumu mele

kiniá yandopa Pulu Yemone Yesusi yunga opa-touma kamu topa mania mundumba walemo wendo ombámonga we nokopa molemo. <sup>14</sup> Yuni 'Yombomanga ulu-pulu-kiri selemele konopumanga we pelemoma kamu mania pupili.' nimba yombomanga nimba yuyu yunga meme waltikele ondondopa kolorumu aku ungumuni yombo konopuna kake sembá selemo yomboma Pulu Yemo kamu-alieli-alieli kanopa peanga pilimba ungumu senderimumunga kelepa, 'Pulu Yemo pe mélse popo topa naa kalombamonga u molorumu mele kiniá we molemo.'

<sup>15</sup> Yuni olionga nimba senderimumunga olio konopu kake sepili molomolo aku ungumundi Mini Kake Sélimuni ungu talo nilimú. U Mini Kake Sélimuni nimbale:

<sup>16</sup> "Na Ye-Awilimuni nimbale:

"Isirelene kalopa liltimu yomboma kinia  
kelepo sembó mele pe ungu konde  
nimbu panjipu mi lembo akumu i-sipa:

'Nanga ungu-manema 'konopu mondoko  
'Pilipu samili.' ningu molangi.' nimbu,  
ononga konopuna pepili panjindipu,  
'Ono seko molonge kinia  
nane ono kanopo peanga pilimbu nirindu mele  
konopumuni pilku kondangi.' nimbu,  
nane kanu ungu-manema boku mele  
ononga konopuna imbi tombo." nirimu."

yuni nilimú. <sup>17</sup> Aku nimbale ungu se pea nimbale:

'"Ononga ulu-pulu-kirima kinia  
'Pulu Yemonga ungu-manema naa pilipu semolo.'  
ningu pulua tolemele uluma kinia  
na kelepo naa pilimbu." nirimu.'

nilimú. <sup>18</sup> Akumunga, Karasini olionga nimba senderimumunga Ye-Awilimuni olionga ulu-pulu-kirima 'Mania pupili.' nimba siye kolorumu-kulu kiniá olione 'Olionga ulu-pulu-kirima mania pupili.' nimbu kelepo kongi mélema topo kalopo yu popo topo simulú aulka se naa lemó.

*10:19–13:25*

## **'Sika.' Ningu Kuru Mondokole, Karasinga Ipuru Yomboma Tondolo Munduku Molonge Mele Ungu Mare**

*10:19-39*

*Karasinga Uluma Selemolo Mele Mindi Sepo Molopole Mundupu Naa Keleamili Ungu Se*

*10:19-25*

*'Sika.' Nimbu Kuru Mondopole 'Pulu Yemo Molemo Suluminiana Sukundu Pumbu Yu Molemona Nondopo Pamolo.' Nirimu Ungu Se*

<sup>19-21</sup> Ango-keme, 'Olio Pulu Yemo paa sika molemo kolea paa kake sélimunga sukundu pipili naa kolopo manda sumbi sipu pumbu yunga kumbikerena molomolo.' ningu tondolo munduku kuru mondolemelemonga pulu pokore i-sipa:

'Se:' 'Yesusini olionga nimba yunga meme ondondomu mememone olionga ulu-pulu-kirima kamu ombo wendo pulimúmunga kiniá yunga mememone olio Pulu Yemonga kumbikerena manda pumulú.' nimbu kuru mondolemolo.

'Se:' 'Pulu Yemonga mana suluminia Paa Kake Sélimunga sukundu 'We-yomboma naa pang.' ningu u kerepuluna mulu-maminia awili tondolo sene pipi siringi. Aku-na-kolo pe Yesusi yombomanga nimba kolondorumu kinia kanu mulu-maminiamo 'olakondo maniando sipa, olá topa anju yando purumu. Yesusi toringi kinia yunga kangimu suku nirimu akumu Pulu Yemo yu paa sika molemona olio 'we-yomboma

pali, kiniá manda pumulú aulka kondemo. Yunga mana-kangimuni senderimumuni konopu konde pepili ulu peangama sepo molopo kondopo pumulú aulka kondemo lipa taltondorumumunga kepe, Pulu Yemonga kumbikerena kiniá manda pumulú.' nimbu kuru mondolemolola.

‘Se:’ ‘Kiniá olionga Pulu Yemo popo tondoli ye awili paa olandopamone Pulu Yemonga yomboma nokolemomonga kepe Pulu Yemonga kumbikerena kiniá pipili naa kolopo manda pumulú.’ nimbu kuru mondolemolola.

Akumunga, <sup>22</sup> Pulu Yemo molemona nondopo pamolo. ‘Pulu Yemo molemona nondopo pamolo.’ nimbili nimulúmuni, Karasini yunga mememo olionga konopumanga kandondorumu-muni olio ulu-pulu-kiri se konopuna naa pepa konopu peanga sepa pepili molopo, ‘u popo tondoringi yemane no paa kake seli se lekole kangi peanga sepa giliepili Pulu Yemonga ulkana sukundu puringi mele, olio aku sipu ulu peangama mindi sepo molopo kondopo, kolo toli ungu se konopuna naa pepili ‘Yuni kanopa peanga pilielemo uluma mindi samili.’ nimbu, ‘Yuni “Sembó.” nilimú mele paa sika sembá.’ nimbu kuru mondopole, ‘Pulu Yemone “Sembó.” nilimú mele sika sembá molo naa sembanje.’ nimbu konopu talo sepo kimbu naa sipu, olio Pulu Yemo molemona pipili paa naa kolopo nondopo pumbu molamili.

<sup>23</sup> “Ono-kinia sembó.” nimba panjerimu yemone kolo naa topa “Sembó.” nilimú mele sika selemo kene ono ‘Yu ‘olio-kinia sepo kondombo.’ nimba panjerimu mele sika sembá.’ ningu u kuru mondoringi mele siye naa kolko, ambolko kondoko likuli ‘yu paa sika ombo sembá.’ ningu konopu siku nokoko molangi.

<sup>24</sup> ‘Anju yando konopu mondoko liku tapondaa.’ ningí aulka se koroko pilku molaa. <sup>25-27</sup> Yombo mare genupili kinia liku maku naa toko ultu molemele aku mele naa saa. Ono Karasinga yomboma liku maku toko moltcole anju yando yomboma ‘Konopuna tondolo pupili molko, ‘Karasi yu, sika.’ ningu kuru mondolemele mele aku siku ningu kuru mondoko molangi.’ niengi. Ye-Awilimuni yombomanga kote pilimba walemo nondopa wendo ombá sekemo pilkuli i “Sangi.” nikiru mele tondolo munduku seko molaa.

**10:26-31**

### *Pulu Yemonga Malo Ungu-Taka Paa Naa Tondamili Ungu Se (10:19-39 pali)*

‘Jesusini olionga nimba yunga toringi kangimu Pulu Yemo popo tondopa sirimu, ungu sikama pilku likuli kelko ‘Naa pilimulú. Ulu-pulu-kirima we sepo molamili.’ ningu munduku kelko ulu-pulu-kirima alieli seko mindi molongi liemu kelko ulu-pulu-kiri sengema kulu tondomba mele Pulu Yemo popo toko singí mélse paa naa lemó. ‘Ungu sikamo pilku likuli kelko munduku kelielemelemonga,’ ‘Pulu Yemonga kote walemo wendo ombá kinia sepe paa awili nomba pelemomone yunga opa-touma nombá kinia olio pea nombá.’ ningu pilku pipili kolko mindi molonge akumunga, ‘Maku toko anju yando ononga yomboma ‘Konopu tondolo pupili.’ niee.’ nikiru.

<sup>28</sup> Yombo sene Mosisini ungu-mané sirimuna ‘Naa pilipu sembó.’ nimba pulua torumu kinia ye talone molo yopokone kanoko ningu siringi kinia yu kondo naa kolko sumbi siku kamu toko kondoringi. <sup>29</sup> ‘U aku sika seko kinjeringi yomboma aku siku mindili siringi, liemu ‘yombo sene Pulu Yemonga Malo ‘Yu unguri mólo.’ nimba mundupa kelepa ‘ungu-taka tondopa’, Pulu Yemone ungu konde nimba panjipa mi lierimu ungumu Karasinga mememone tondolo mundundorumu aku mememone kanu yombomo ‘Pulu Yemonga yombo konopu kake sélimu molopili.’ nirimu aku mememo ‘unguri mólo’ nimba ungu-taka tondopa, Pulu Yemone olio konopu mondopa lipa tapondolemo mele lipa ora silimú Mini Kake Sélimu ungu-taka tondolemo aku yombomo papu olandopa mindili nombá molo mólo.’ konopu lekemeleye? <sup>30</sup> Aku nikirumunga ungu talo i-sipa bokuna molemo:  
Se: Seko kinjilimilimanga pundu toli kongonomo

nanga kongonomo.

Nanu mindi pundu topo ono mindili simbú.

„Yombo se lupane aku naa sembá.“

nimba aku ungumu molemo.

Se: “Ye-Awilimuni yunga yombomanga kotemo

yuyu sendepa pilimba.”

nimba aku ungumu molemola. Aku ungutolo nirimu „Pulu Yemo olio pilipuli ‘aku siku yunga Malo kinia Malonga mememo kinia Mini Kake Sélimu kinia seko kinjingí yomboma sika paa mindili nonge.’ nimbu pilielemolo.“<sup>31</sup> Konde molopa mindi puli Pulu Ye paa tondolo puli olandopamone yombo sendo mumindili kolopale ‘Mindili nani.’ nimba liemu papu yu paa mini-wale mundumba. „Aku kene maku topo anju yando yomboma ‘konopu tondolo pupili.’ niemili.“

*10:32-39*

### *Olio ‘Sika.’ Nimbu Paa Tondolo Mundupu Kuru Mondopo Ambolopo Mundupu Naa Keleamili Ungu Se (10:19-39 pali)*

<sup>32</sup> Ono u Pulu Yemonga ungumu pulu-pulu pilkuli pilku littingi kinia seringi mele kelko piliaa. Ono mindili siringi kinia we mindili nongo tondolo munduku molko Pulu Yemo munduku naa kelieringi.<sup>33</sup> Wale mare ono liku yombomanga kumbikerena anjiku ono ungu-taka tondoko ‘mindili nangi.’ niringi. Wale mare aku siku mindili noringi yomboma ono- kinia kopu seko molko liku tapondoringila.<sup>34</sup> Ka siringi ka-ulkana peringi yomboma onone kondo koloringi. ‘Ononga méle paa peanga alieli lepa mindi pumbá mélema we lemó.’ ningu pilkuli ‘Molko kinjangi.’ ningu ononga mana-mélema littingi kinia ‘We liengi.’ ningu we siye kolko konopu siringi. Aku siku seringi walema kelko konopu liku munduku piliaa!

<sup>35</sup> U aku siku seringi mele kelko pilkuli ‘Sika lipa tapondolemo. Sika aku sipu molomolo.’ ningu kuru mondoringi mele kiniá munduku naa keleangi. Tondolo munduku kuru mondoko molonge kinia akumunga, méle kaloli peangama ono awili seko lingí.<sup>36</sup> ‘Pulu Yemone olio “Saa.” nilimú mele semolo kinia yuni “Simbu.” nimba panjerimu méle peangama limulú.’ ningu pilkuli kuru mondolemele mele munduku naa kelko, seko mindi molangi. Munduku kelenge kinia naa lingí.<sup>37</sup> Ungu se pilipuli aku sipu nikiru. Aku ungumu i-sipa:

‘Wale koltalo mindi ombo pumbá kinia

“Ombó.” nirimu yemo sika ombá.

Yu waltikele lisipa ombá.

<sup>38</sup> “Nane ‘yombo sumbi nilima’ nimbu

kanolio yomboma nane nimbu molio mele

‘Sika.’ ningu kuru mondolemele monga

konde molko kondoko mindi pungi.

Aku-na-kolo kuru mondolemele mele

munduku keliengi liemu

na ono-kinia konopu naa simbú.” nirimu’

nimba aku sipa molemo.<sup>39</sup> Aku-sipa na-kolo olio yombo kuru mondolemele mele munduku kelkole kolea-kirina pulimili yombomanga yomboma naa molemolo. Olio ‘Sika.’ nimbu kuru mondolemolo yomboma Pulu Yemone lipa tapondopa, mindili nolemolá aulkana wendo lipa, ‘yu-kinia pea molko kondonge aulkana pangí.’ nilimú yomboma molemolo.

*Kolomongo-Awili 11-13*

### **‘Pulu Yemo Sika.’ Nimbu Kuru Mondopole Tondolo Mundupu Molamili Ungu Se**

# 11

*Kolomongo-Awili 11*

*Pulu Yemone Nirimu Mele 'Sika.' Ningu Kuru Mondokole Seringi Mele Semane Mare 11:1-3*

*Unguma 'Sika.' Nimbu Kuru Mondolemolomonga Ungu-Pulumu*

<sup>1</sup> „Pulu Yemo ‘Sika.’ nimbu kuru mondolemolo.”, nikiru aku kuru mondólimunga ungu-pulumu i-sipa: Pulu Yemone olio “Simbu.” nimba panjerimu mélema ‘Paa sika limulú.’ nimbu kuru mondopo nokopo molemolo. Mélema mongone naa kanolemolo-na-kolo ‘Méle akuma paa sika lemó.’ nimbu kuru mondolemolo. <sup>2</sup> Yombo u moloringimane aku siku ‘Sika.’ ningu kuru mondoringimunga Pulu Yemone ono kanopa peanga pilipale ‘Seko kondokomele.’ nirimu.

<sup>3</sup> Pulu Yemone nilimú mele olio ‘Sika.’ nimbu kuru mondolemolomonga „Mosisini bokuna torumu mele pilipuli, ‘Pulu Yemone mulu kinia ma kinia sembando “Wendo opili.”’ nirimu kinia ungumuni mulu matolo wendo orumu.’ nimbu kuru mondolemolo. ‘Akumunga, méle naa lierimu mélemane Pulu Yemone olio kanolemolo mélema sika serimu.’ nimbu kuru mondolemolo.

**11:4-7**

*Epele Keme Inoko Keme Noa Keme ‘Pulu Yemo Sika.’ Ningu Kuru Mondokole Seringi Semane Mare (11:1-40 pali)*

<sup>4</sup> Epelene Pulu Yemone nirimu mele ‘Sika.’ nimba kuru mondopa molorumumunga Pulu Yemone kanopa peanga pilierimu méle se Pulu Yemo popo topa kalopa sirimu-na-kolo Kénene Pulu Yemo popo topa kalopa sirimu mélema Pulu Yemone kanopa kiri pilierimu. Epelene Pulu Yemo ‘Sika.’ nimba kuru mondorumumunga Pulu Yemone ‘Epele ye sumbi nílimu’ nimba kanorumu. Yuni Pulu Yemo popo topa kalopa sirimu mélema Pulu Yemone konopu mondopale “Papu sekено.” nirimu. Aku ulumuni Pulu Yemone ‘Epele yu ye sumbi nílimu’ nimba kanorumu mele olio lipa ora sirimu. Epele u kolorumu-na-kolo „yunga semanemo bokuna molemo-na, yuni Pulu Yemo ‘Sika.’ nimba kuru mondorumumunga olio kiniá „Pulu Yemo manda popo tomolo mele, ungu we nimba silimú.

<sup>5</sup> Inokone Pulu Yemone nirimu mele ‘Sika.’ nimba kuru mondopa molorumumunga naa kolorumu. Yuconde molopili Pulu Yemone yu lipa memba purumu. Pulu Yemone yu lipa memba purumu-kulu yombomane yu naa kanoko litingi. Pulu Yemone Inoko lipa memba naa pupili Inokone Pulu Yemo kanopa peanga pilierimu uluma serimumunga Pulu Yemone aku serimu. <sup>6</sup> Yombo sene ‘Pulu Yemo popo topo kape niembo kene yu molemona nondopo pambo.’ nimbale, ‘Pulu Yemo sika molemo. Yu molemona pumbu “Seko kondoko liku tapondou.” nimbu kinia sika sepa kondopa lipa tapondomba.’ nimba kuru mondopale yunga kumbikerena manda pumbá. Aku sipa kuru naa mondomu liemu paa manda naa pumbá. Akumunga, Pulu Yemone nilimú mele ‘Sika.’ nimba kuru naa mondopale Pulu Yemone kanopa peanga pilimba ulu mare paa manda naa sembá.

<sup>7</sup> Noane Pulu Yemone nirimu mele ‘Sika.’ nimba kuru mondopa molorumumunga Pulu Yemone yundu “‘Mana umbuna se wendo opili.’ nimbu sekero.” nirimu kinia pilipale, Noane ‘Sika nikimu.’ nimba ‘Pulu Yemone “Sei.”’ nirimu mele pilipa manda manjipa, nona lemba sipi awili se sepa wamorumu. Pulu Yemone “sembó” nirimu mele sika u waltikele kepe yombomane naa kanoringi-na-kolo Noane ‘Sika nikimu.’ nimba kuru mondopale sipi se sepa wamorumu. Aku serimumunga no torumu kinia yu-kinia yunga yomboma-kinia manda moloringi-na-kolo we-yomboma kinia mélema pali none torumu. Yuni Pulu Yemone nirimu mele ‘Sika.’ nimba kuru mondopale ‘serimu, ungumuni Pulu Yemone yomboma kanopa kiri pilipale tomba

serimumu yomboma lipa ora sirimu. Aku sipa kuru mondorumumunga Pulu Yemone 'yu ye sumbi nílimu' nimba kanorumula.

**11:8-19**

*Eporayamo Kinia Menu Sera Kinia 'Pulu Yemo Sika.' Ningu Kuru Mondokole Seringili Semane Mare (11:1-40 pali)*

<sup>8</sup> Eporayamone Pulu Yemone nirimu mele 'Sika.' nimba kuru mondopa molorumumunga Pulu Yemone yundu "Nu moleno koleamo munduku kelko pe simbú koleana pu." nirimu kinia pilipale kanu koleamo suluna lierimumunga u naa kanorumuna-kolo ungumu pilipa lipa sengena panjipa we walu purumu. <sup>9</sup> Pulu Yemone nirimu mele 'Sika.' nimba kuru mondorumumunga Pulu Yemone "Simbu." nimba panjerimu koleana pumbale ye ombo gilieli akuna kamu perimu. Sika ulka se kamu naa takopa, serele-ulka se takopa pelepa aku koleana andorumu. Pe anjupa Pulu Yemone Eporayamondo "Simbu." nirimu koleamo Eporayamo yunga malo Aisake kinia Aisake yunga malo Jekopo kinia olondo aku sipala nirimu-kulu pilkuli olo kepe 'olonga yomboma kinia, serele-ulka takoko peringi. <sup>10</sup> 'Pulu Yemone yuyu pilipale kolea-awili senga kamu gilimba ulkama takopa pora sirimu koleana pe walte kamu pembo.' nimba kuru mondopale Eporayamone 'Iseli-u serele-ulkana pembo kinia mandala. Unguri molo.' nimba serele-ulkana perimu.

<sup>11</sup> Eporayamo bolango membá kalia-ingima pora nirimu, yunga ambo Sera simbu perimu, aku-na-kolo Pulu Yemone nirimu mele 'Sika.' ningu kuru mondoko moloringilimunga Pulu Yemone olo tondolo sirimu kinia bolango meringili. 'Pulu Yemone "Sembó." nimba panjilimú mele sika selemo. Kolo naa tolemo.' ningu kuru mondokole meringili. <sup>12</sup> Akumunga, ye se anda lepa ye kololi mele molorumu yemo yombo paa awisilinga anda-kolepamo molorumu. Yombo kombokandi mele molo kou-okiya mele kambu paa manda naa tonge yomboma yuni kalopa liltimu.

<sup>13</sup> Kanu yemane Pulu Yemo 'Sika.' ningu kuru mondoko mololko punguli koloringi. Ono ma-koleana u we molcole Pulu Yemone "Simbu." nimba panjerimu mélema u naa litingi. 'Pe sika limulú.' ningu konopumane pilieringi akumu suluna mele lierimu-na mongone-melete kanokole 'Likimulu.' ningu konopu siku molcole yombo moloringi kinia pipili naa kolko "Olio ya ma-koleana yombo ponenge lepo ombo gilimulu." niringi. <sup>14</sup> Yombomane aku siku nilimili kinia pilipuli 'Ononga kamu molonge kolea se koroko kanoko lingíndu nilimili.' nimbu pilielemolo kanumu, akumunga 'kanu yema aku siku kuru mondoringi.' nimbu pilielemolo. <sup>15</sup> Kolea munduku kelko oringi koleana 'kelepo pumulú.' ningu pilielemolánje ono kelko manda pulimolá. <sup>16</sup> Aku-sipa na-kolo molko oringi kolea akumu kelko konopu kimbu siku naa molcole 'kolea paa peanga olandopa se lupa akuna pamiliya.' ningu pilieringi. Aku koleamo mulu-koleamo. Akumunga Pulu Yemone 'yu sika' ningu kuru mondoemele, yomboma akuna molangi.' nimba kolea-awili 'peanga se, sepa wamorumumunga kolea Kenane yomboma kanu yemane ononga Pulu Yemo molopa selemo mele ningu siringi kinia Pulu Yemo yu pipili naa kolorumu.

<sup>17-18</sup> Pulu Yemone 'Eporayamone "Sei." nimbu mele sika pilipa lipa sembanje kanambo.' nimba manda manjerimu kinia Eporayamone 'Pulu Yemone "Sembó." nirimu mele sika sembá.' nimba kuru mondopale yunga malo Aisake Pulu Yemo popo topa kalopa simba serimu. Sika u Pulu Yemone Eporayamondo nimba panjipa nimbale: "Nunga malo Aisakene kalopa limba yomboma mindi "Nuni kalko lini." nimbu, nimbu panjerindu yomboma molonge." nirimu-na-kolo aku pilipa 'Sika nikimu. Sika aku sipa sembá.' nimba kuru mondopale yunga malo selu mindi molorumumu aku sipa sembá serimu. 'Eporayamone Aisake kalomba serimu kinia Pulu Yemone "Mólo." naa nilkanje sika kamu topa kalka.' <sup>19</sup> Eporayamone konopumuni pilipale, 'Aisake' kolomba kinia Pulu Yemone 'yu lomboropa ola

molou.' nimbá kinia manda konde molomba. „Konde molopili manda ulkando membo pumbú.' nimba pilierimu. „Pulu Yemone u "Nu kinia malo Aisake kinia sembó." nimba panjerimu mele 'Sika sembá.' nimba kuru mondopa malo konopu talo naa kimbu sipa topa kalomba serimu, kinia Pulu Yemone "Mólo." nirimumunga yunga kangomo kolopa lieli none serimu akumu kelepa konde molopili liltimu.

**11:20-22**

*Aisake Keme Jekopo Keme Josepo Keme 'Pulu Yemo Sika.' Ningu Kuru Mondokole Seringi Semane Mare (11:1-40 pali)*

<sup>20</sup> Aisakene Pulu Yemone nirimu mele 'Sika.' nimba kuru mondopa molorumumunga yu kolombando malo ,akiliu, Jekopo kinia malo ,komolaye, Isotolo ungu peanga tondolo se nimba sipale pe Pulu Yemone nokomba kinia seko molongele mele u nimba sirimu.

<sup>21</sup> Jekopone Pulu Yemone nirimu mele 'Sika.' nimba kuru mondopa molorumumunga yu paa anda lepa apulu ambolopa andorumumu ambolopa pi polopa ma kanopa Pulu Yemo kape nimba imbi ambolopa paka tondorumu. Kolomba sepale yunga malo ,konopu mondorumu, Joseponga kango ,akiliumu kinia komomo,-tolo ungu peanga tondolo se nimba ,sipale pe Pulu Yemone olo nokomba kinia seko molongele mele nimba, sirimu.

<sup>22</sup> Josepone Pulu Yemone nirimu mele 'Sika.' nimba kuru mondopa molorumumunga Josepo yu nondopa kolomba sepale yunga Isirele yombomando nimbale: „Ya kolea Isipi kamu naa molonge. Pulu Yemone "Simbu." nirimu koleamo sika pe walte kamu simba akuna sika kamu pungu molonge kene, ono pe kolea Isipi munduku kelko Pulu Yemone "Simbu." nirimu koleana pungí sekole nanga ónomo ya naa liepili, mengo pungu aku koleana kamu óno sangi." nirimu.

**11:23-28**

*Mosisini 'Pulu Yemo Sika.' Nimba Kuru Mondopale Serimu Semane Mare (11:1-40 pali)*

<sup>23</sup> Mosisinga anumu lapatolone Pulu Yemone nirimu mele 'Sika.' ningu kuru mondoko moloringilimunga Mosisi mengole yu oli yopoko lopi seringili. 'Yu kango paa peanga.' ningu kanoko 'Pulu Yemone lipa tapondomba kango se lémo.' ningu kanokole Isipi ye nokoli kingimuni yunga Isipi yomboma kinia ungu-mane sipa panjipale "Ipuru yomboma kango mengema pali toko kondangi." nirimu mele pulua tongelendo pipili naa kolkole kangomo oli yopoko lopi seringili.

<sup>24</sup> „Pe Isipi ye nokoli kingimunga lemenuni Mosisi nona kanopa lipa 'Nanga kangomo' nimba nokorumu-na-kolo Mosisi yu Isipi ye nokoli kingimunga ulkana molopa awi lepale, Pulu Yemone nirimu mele 'Sika.' nimba kuru mondopale Na, 'Pulu Yemonga Isirele yombomanga ye se molio akumunga na, Isipi ye nokoli kingimunga lemenunga malo na naa molombo.' nirimu. <sup>25</sup> Isipi ye nokoli kingimunga ulkana, konopu siku ulu-pulu-kirima seringi mele 'wale mare pea samili.' nimba naa pilipale 'Pulu Yemonga yomboma umbuna melemele mele aku sipu meambo.' nimba pilierimu. <sup>26</sup> Yuni konopumuni pilipale 'Isipi koleana méle kande-kande awisili peangama nanga taltolkanje unguri mólo.' nimba pilipale 'Pulu Yemone "méle peanga simbú." nirimu mélema pe limbu.' nimba pilipale, 'Pulu Yemone " 'Nanga yomboma nokopa kondomba.' nimbu lipu mundumbu." nimba, nimba taltorumu ye nokoli Karasimu mindili singí nombá mele na aku sipu mindili nombó kinia paa peanga.' nimba pilipa molorumu.

<sup>27</sup> Mosisi Isipi mundupa kelepa purumu kinia Isipi ye nokoli kingimuni yu-kinia mumindili kolorumumunga pipili kolopa kowa naa purumu. Pulu Yemone nirimu mele 'Sika.' nimba kuru mondopa molorumumunga yu Isipi mundupa kelepa ,kolea ku lielina, purumu. Yombomane mongone naa kanolemele yemo konopumuni mele

kanopale yu Pulu Yemone ‘Sei.’ nirimu mele pilipa sembando siye naa kolopa tondolo mundupa serimu. <sup>28</sup> „Isirele yomboma Isipi moloringi kinia, Pulu Yemone Mosisindu nirimu mele Mosisini ‘Sika nikimu. Sika aku sembá.’ nimba kuru mondopale yuni Isirele yombomando nimbale: “Pulu Yemonga angellomone ononga kango-komolayema kinia kongimanga komolayema kinia ‘naa topa kondopili.’ ningu kongi sipisipi molo meme walo mare tokole memema kolko ulka kerepulumanga ape kandondangi. Naa senge kinia komolayema sika tomba.” nirimu. Pe yunga ungumu pilku likuli seringi kinia Pulu Yemonga angellomone ononga komolayema sika naa torumu.

*11:29-40*

*Isirele Yombo Mare Pea Awisilini ‘Pulu Yemo Sika.’ Ningu Kuru Mondokole Seringi Semane Mare (11:1-40 pali)*

<sup>29</sup> Isirele yombomane ‘Pulu Yemone “Sembó.”’ nirimu mele sika sembá.’ ningu kuru mondoko moloringimunga Nomu Kondoli kumbulupa mamo we lierimu kinia nekendo puringi. Aku-na-kolo Isipi yemane Isirele yomboma tongendo akileko lombili puringi kinia nomo kelepa ombo nunumu sipa ono lipa aki torumu kinia no wangoko koloringi.

<sup>30</sup> Jeriko taono , ‘yomboma ononga opa-touma naa wang.’ ningu, kou-pala paa awili tondolo se seringi-na-kolo Isirele yombomane ,kokele kolea Kenane sukundu pungu Jeriko lierimuna pungu, ‘Pulu Yemone “Sembó.”’ nirimu mele sika sembá.’ ningu kuru mondokole, palana makaye seko pungu molangi wale yopoko-pakara ombo purumu kinia yopoko-pakara akumunga kou-pala kanuma ungu-mangu torumu.

<sup>31</sup> Wapora-ambo Reyapo Pulu Yemone nirimu mele ‘Sika.’ nimba kuru mondopa molorumumunga Isirele ye talone ‘Jeriko yomboma nambi selemelenje?’ ningu kanoko panjingilí oringili kinia yuni olo lipa tapondopa “Nanga ulkana sukundu wangili.” nimba lipa lopi sepa mondorumumunga Isirele yombomane ,Jeriko, yombo Pulu Yemonga ungu naa pilku liltingi yomboma ongo toringi kinia yu naa toringi.

<sup>32</sup> Pulu Yemone nirimu mele ‘Sika.’ ningu kuru mondoko moloringimunga Pulu Yemone yu ‘Sika.’ ningu kuru mondoringi yombo kanuma lipa tapondoramu yombo marenga semanema pea tamboye? Tolkanje ena we pora nilka. ,Olionga anda-kolepali, Gidiono, Barake, Samisono, Jepita, Depiti, Samuele keme, Pulu Yemone ungu-umbu tondorumuma pilku yomboma ningu siringi yema ono-keme, semane mare topo silka-na-kolo aku semanema topo simbú ena se naa lekemo.

<sup>33</sup> Pulu Yemone nirimu mele ‘Sika.’ ningu kuru mondoko moloringimunga olianga anda-kolepali marene ye nokoli kingi marenga ami-yema kinia opa sekole onone nokoringi koleama toko kaloringi. Marene ‘Yomboma molko kondangi.’ ningu ulu sumbi nilima seko nokoringi. Marene Pulu Yemone “Ono sepo kondombo.” nimba panjerimu mele ono molangi sika wendo orumula. Marene ‘Lopa-posi llayonone olio naa nomba kondopili.’ ningu kerema pipi siringi. <sup>34</sup> ,Pulu Yemone nirimu mele ‘Sika.’ ningu kuru mondoko moloringimunga yuni ono lipa tapondoramu-kulu, marene sepe awili-sepa norumumu ‘Naa nopili.’ niringi. Marene ‘Opa seli lu-pultane naa toko kondangi.’ ningu kowa puringi. Mare u enge se naa perimu- na-kolo pe enge pepili moloringi. Mare opa sengendo paa ye enge nilima molko, ononga opatou ami-yema toko mundoringila. <sup>35</sup> ,Pulu Yemone nirimu mele ‘Sika.’ ningu kuru mondoko moloringimunga, yombo mare koloringima kelko lomboroko ola moloringi kinia anupilini ,ono konde moloringi kinia, kelko liltingila.

Aku-sipa na-kolo mare ka siku ‘Mindili nongo kolangi.’ ningu kopene toko ninguli: “Onone ‘Pulu Yemonga ungu mu mundupu kelemolo.’ ningí kinia ‘We pang.’ nimulú.” niringi kinia ‘Kolomulu liemu kelepo lomboropo ola molopo, kamu paa konde molopo kondopo mindi pumulú.’ konopu lekole ononga opa-toumane niringi

mele naa pilieringimunga toko kondoringi. <sup>36</sup> Mare ungu-taka tondoko ka-pultane tondolo toko, mare ka-sénene ka toko ka-ulkana panjeringila. <sup>37</sup> „Pulu Yemone nirimu mele ‘Sika.’ ningu kuru mondoko moloringi yombo, mare ‘Kolangi.’ ningu kouni toringi; mare ‘konde molangi, so liku suku-singina kolomongo seringi; mare opa seli lu-pultane toko kondoringila. Mare mulu-maminia mólo torumu kinia kongi sipisipi molo mememanga kangima liku panjeringila. Mélema mólo topa paa koropa pupili moloringila. Mare mindili noringi. Mare yombomane seko kinjeringi. <sup>38</sup> Mare kolea ku lielimanga kinia, ma-pangimanga kinia, kou-kandemanga kinia, maiyangamanga pungu peleko andoringi. Kanu yomboma mindili siringi-na-kolo Pulu Yemo ‘Sika’ ningu kuru mondoko moloringi akumunga, mana we moloringi yomboma kinia, kanu yomboma kinia, pea seluna papu naa moloringi. „Pulu Yemone nirimu mele ‘Sika.’ ningu kuru mondoringi, yombo kanuma ‘yombo kirima’ ninguli we-yombomane toko makororingi-na-kolo kanu yomboma kinia we-yomboma kinia selu-sipa mólo. Ono Pulu Yemonga ungumu pilku moloringi, we-yomboma naa pilieringimunga ono we-yomboma kinia pea seluna papu naa moloringi.

<sup>39</sup> Ya nikiru yombomane pali ‘Pulu Yemone “Sembó.”’ nirimu mele sika sembá.’ ningu kuru mondoko moloringimunga Pulu Yemone ono kanopa peanga pilierimu mele ‘Piliangi.’ nimba lipa ora sirimu. Akumu sika na-kolo ma-koleana molkole Pulu Yemone “Simbu.” nimba panjerimu mélema naa liltingi. <sup>40</sup> Pulu Yemone méle olandopa olandopa seriuma yuni nimba panjipa mi lierimu ungu umu pepili moloringi yomboma kinia, pe kiniá nimba panjipa mi lierimu ungu kondemo pepili molemolo yomboma kinia, ‘pea pali waltikele simbú.’ nirimumunga ono u naa liltingi.

## 12

12:1-3

*‘Pulu Yemonga Yomboma Molemolo Mele Tondolo Mundupu Molopo Siye Naa Kolamili.’ Nimbu Yesusi Mimi Sipu Kanamili Ungu Se*

<sup>1</sup> U yombo paa awisili aku siku Pulu Yemone nirimu mele ‘Sika’ ningu kuru mondokole seko kondoko moloringimunga aku sipu olio sepo kondomolo mele liku ora silimili kene kanopo pilipuli pe kiniá olio kepe aku sipu méle-peangama limulíndu Pulu Yemone ówa se topa talorumu ówamonga ‘Lisiku pangí.’ nirimu-na pilipuli ‘Paa lisamili.’ nimbu olio lipa naa tapondolemo ulu lupa lupama mundupu kelepo, ulu-pulu-kirima kepe ‘Olio naa ambolopa pipi naa sipili.’ nimbu siye naa kolopo konopu tondolo pupili keru-kuru lipu lisamili. <sup>2</sup> ‘Tondolo mundupu lisimulíndu, olio kuru mondolemolo ulu-pulumunga pulu ye Yesusi mimi sipu kanolepo pamili. ‘Kuru mondopo, sepo kondopo, siye naa kololepo pumulú ulu-pulumu yula.’ nimbu yu ‘sepa molorumu mele kinia molemo mele kinia nilimú mele ‘Sika.’ nimbu kuru mondolemolo mele, siye naa kolopo, pilipu pamili. Yuni serimu mele manda manjipu samili. Yu pilipale, ‘Pulu Yemone “Sei.”’ nilimú mele sepo kondombo kinia paa konopu sipu molopo kondombo.’ nimbole yu mindili nomba unju-perana kolorumu. We-yombomane unju-perana kololemele yomboma ‘yombo kirima’ nilimili-na-kolo Yesusi unju-perana uku toko panjingímunga pipili naa kolopa konopu awisili lipa naa mundupale akuna gilipa kolorumumunga kiniá ‘mélema pali nokombando, Pulu Yemo kolea nokopa molemo polomonga ki-lomekondo yu pumba molorumu ‘molemo.’

<sup>3</sup> ‘Olio siye naa sepili.’ ningu Yesusi serimu mele mimi siku piliayo. Ulu-pulu-ki seli yombomane Yesusi-kinia mumindili kolko mindili siringi kinia yu tondolo mundupa molorumu mele mimi siku pilku molaa. Yuaku siku seringi kinia

molorumu mele ningu kanokole ono sika konopu tondolo pupili molko, mini-wale naa munduku kuru mondolemele mele munduku naa kelenge.

**12:4-11**

*'Molko Kondangi.' Nimba Pulu Yemone Yunga Bolangoma Mindili Silimú Ungu Se*

<sup>4</sup> Ono sika ulu-pulu-kirima seli yombomane 'mindili nangi.' ningu ono seko kinjilimili kinia tondolo munduku molemele-na- kolo selemele ulumuni ononga yombo se u topa naa kondorumu kanumu. <sup>5-6</sup> 'Pulu Yemonga bokuna molemo, ungu sene 'ono tondolo munduku molangi.' nimba ono 'yunga bolangoma' nimbale onondo nirimu ungumu komu sindengi lémo. Aku ungumuni nimbale:

"Nanga bolangomo,

Ye-Awilimuni yombo konopu mondolemoma

'Molko kondangi.' nimba mindili silimú.

'Yunga bolangoma molangi.' nilimú yombo akuma

kopene tolemóla. Akumunga,

Ye-Awilimuni 'Nanga ungumu piliepili.' nimbuli

mindili simbú kinia 'Akumu unguri mólo.' naa ningu,

yuni nu iri topa mane simba kinia

umbuna awisili naa kolani."

nirimu.

<sup>7</sup> 'Pulu Yemo olionga Lapamone 'olio yunga bolangoma.' nimba aku selemo.' ninguli mindili nonge molo umbuna se ono-kinia wendo ombá kinia 'Pulu Yemone 'yunga ungumu pilku sangi.' nimba sekemo.' ningu tondolo munduku molangi. Bolango se yunga lapane mane naa silimú bolango se molemoye? „Mólo..

<sup>8</sup> (Bolangoma pali ononga lapalini 'Molko kondangi.' ningu kopene toko mane silimili) akumunga, Pulu Yemone ono 'Molko kondangi.' nimba mindili naa simu liemu ono wakangoma molemele, yunga bolango sikama naa molemele. <sup>9</sup> Imu piliangila: Olio bolangoma molorumulu kinia olionga ya mana lapalini 'Molko kondangi.' ningu mindili siku mane siringi kinia olione ononga unguma lipu awi sipu taka lepo molopo 'Papu sekemele.' nimbu molorumulu. Aku liemu olionga minima kinia konopuma kinia nokolemo Lapamone olio mane silimú kinia 'Alieli konde molopo kondopo mindi pamili.' nimbili yunga ungumu paa olandopa pilipu lipu taka lepo molomulu liemu peangala. <sup>10</sup> Wale laye-koło mele olionga lapalini olio 'Molko kondangi.' ninguli onono konopumane pilkuli mindili siku mane siringi, aku-na-koło Pulu Yemone pilipa kondopa olio sumbi sipa mane silimú akumuni olio alieli paa lipa tapondolemo. Yu kake selemo mele olio 'aku sipa kake sepili.' nimbale aku selemo. <sup>11</sup> Olionga lapalini 'Molko kondangi.' ninguli olio mindili silimili kinia konopu naa sipu molemolo. Mindili nombole konopu kiri mindi panjipu molemolo. Aku-na-koło u mane silimili kinia pilipu lipuli pe ulu sumbi nilima sepo konopu pe nipili taka lepo molemolo.

**12:12-17**

*Ungu-Iku Topale " 'Enge Nimbu Molamili.' Ninguli 'Kangi Tondolo Pupili.' Niensi." Nirimu Ungu Se*

<sup>12</sup> Akumunga, yomboma keru-kuru liku lisilimili kinia ononga kima enge naa nimba pange sepa maniando sipa we lemó kinia ola liku enge nipili we lisiku, ononga komorongoma limú kinia munduku naa kelko tondolo munduku we lisilimili mele ono aku siku sangi. Kangima molo konopuma pange sembá kinia tondolo pupili ola gilku kongono siye naa kolko tondolo munduku sangi. <sup>13</sup> 'Kimbu kiri lemó yomboma ononga kimbuma kamu kiri naa liepili. Kelepa peanga liepili.' ninguli 'aulka sumbi nilina pangí'.

<sup>14</sup> Yomboma-kinia konopu seluna pupili taka leko molko kondonge uluma tondolo munduku seko molko, ononga konopuma kinia kangima pali 'Pulu Yemonga' ningu

Pulu Yemone kanopa 'kake selemo' nimba kanolemo uluma tondolo munduku seko molangi. Aku naa senge kinia Ye-Awiliwu naa kanonge kene aku saa.

<sup>15</sup> Ono mimi siku kanoko molonge mele i-sipa:

Pulu Yemone ono we kondo kolopale lipa tapondorumu aulkamo ono yombo se mundupa kelemba kene mimi siku kanoko molaa.

Unju se mongo kombili selima tolemo aku mongomanga se liku kere-langi kaloleme-lena sukundu mundulimili kinia kere-langima pali kombili selemo, aku sipa mele ononga yombo se molopa kinjimba kinia ono pali yu manda manjiku seko umbuna ono-kinia pepili molko Pulu Yemone 'ono kalaro molopili molemele' nimba kanomba kene mimi siku kanoko molangila.

<sup>16</sup> Wa ulu-kirinale naa seko, Pulu Yemone 'Ambo yema kangikundu ulu sangi.' nirimu mele mindi pilku seko molangi.

U Isone Pulu Yemo bulu sirimu mele aku siku naa sangila. Iso yu komomo molopale lapane monge-méle simbama 'unguri mólo' nimba genuni kere-langi se 'nopili.' nimba sirimu kinia 'gelene kolopa kere-langi lipa nombando, lapane monge-méle simba seriumma pali genundu 'Lieni!' nirimu mele aku siku onone Pulu Yemo bulu siku aku naa saa. <sup>17</sup> 'Iso yu sika Pulu Yemo bulu sirimu.' nimbu pilielemolo mele i-sipa: Pe Iso lapa Aisakene kango akiliu Jekopo monge-mélema kamu sirimu kinia yu 'paa liemboa.' nirimu kinia 'Pulu Yemone, "Mólo!"' nirimu. Yuni lapando "Na molombo mele ungu peanga se ningu si." nimba mawa sepa kola serimu-na-kolo u sepa kinjerimu mele mundupa kelepa, kelepa ulu peanga se sembá aulka se naa lierimu kanumu. 'Akumu pilkuli ungu-pulumu mimi siku piliaa.'

**12:18-24**

### *Mulu-Koleana Kolea-Awili Jerusalleme Lemó Akuna Olio Purumulu Molemolo Ungu Se*

<sup>18</sup> 'Ono mimi siku kanaa.' nikirumunga ungu-pulu se i nikirula: Ono 'mulú, senga oringi molemele mulúmu kinia u Isirele yomboma nondoko moloringi 'mulú Sainai, kinia lupa lupatolo. Ono kiniá molemele mulú kanumu 'mongone kanoko, kini ambolonge aulka se naa lemó. Isirele yomboma nondoko moloringi mulú Sainai akuna kuli-sepe mele awili-sepa nomba, kupa pombora toli awili sene aki topa, ilia paa awili-sepa sepa, simbulu paa awili-sepa topa, poporome tondolo mundupa topa, kariapá sepa, mulú torumu mele kanoko pilku moloringi. <sup>19</sup> Akuna bikollo se ungu paa tondolo mundupa nimba, yombo sene ungu tondolo mundupa nirimu pilkuli yomboma mini-wale munduku Mosisindu ninguli: "Pulu Yemone, oliondo kelepa 'sumbi sipa, naa nipili.' nirringi. <sup>20</sup> Ungu pilkuli mini-wale mundoringi akumu i-sipa: "Yombo se molo, kongi se kepe mulúna nondopa pumba olando pumbá sembá kinia kouni toko kondangi." nirimumunga pilkuli mini-wale munduku aku siku Mosisindu nirringi. <sup>21</sup> Ulu mare wendo orumu kanokole mini-wale mundoringi uluma Mosisi yu pilipa kanopale "Na kepe mini-wale mundupu pungu-pungu nikiru." nirimu.

<sup>22</sup> Isirele yombomaaku mulúna puringi,-na-kolo ono 'pepá topo sikiru yomboma Pulu Yemone pe nimba panjipa mi lierimu ungu kondemo pepili molemele yomboma ono Pulu Yemo molomu, mulú Sainai none seli mulú senga naa oringi. Ono 'Pulu Yemo molemo, mulú Sayono oringi. Akumu kolea-awili Jerusalleme. Aku kolea-awilimukonde molopa mindi puli Pulu Ye tondolo púlimu molemo kolea mulukoleana lemó koleamo. Angello kambu manda naa tolima konopu siku maku toko molemelena ono oringila. <sup>23</sup> Akuna Pulu Yemonga yomboma, onondo "Nanga bolango komomo." nilimú yomboma molemelena oringila, kanu yombomanga imbima mulukoleana boku senga molemo yomboma. Yombomanga pali kote pilipa apuroli Pulu Yemo molemona oringila. 'Yesusi kolondorumu-munga, Pulu Yemone kanopa 'yombo sumbi nilima' nimba kanorumu yomboma koloringi kinia 'mulu-koleana

manda wangi.' nirimu-na puringi molemelena oringi molemelela. <sup>24</sup> Ungu kondemo 'kamu wendo opili.' nimba serimu ye Yesusi molemona oringi molemelela. 'Olionga ulu-pulu-kirima kinia kalaroma pali kamu mania pupili.' nimba akuna memba pumba tanda sirimu mememo lemó koleana oringila. Aku mememo kinia u Kénene 'Epele kolopili.' nimba Epele torumu kinia yunga mememo omba purumu mememotolone ungu niringilitolo selu-sipa mele mólo. Akumunga, memetolo kepe selu-sipa mele mólo. Yesusinga mememone ungu nilimú akumu olandopa, akumunga yunga mememo olandopala. Aku mememo lemó koleana oringi.

**12:25-29**

*"Pulu Yemonga Ungumu 'Naa Pilielemolo.' Ningí Yomboma "Mindili Nangi." Nimbá Kene Kanoko Kondoko Molaa." Nirimu Ungu Se*

<sup>25</sup> „Akumunga ono kanaa!, Ungu nilimú yemonga ungumu paa mimi siku pilku molangi. Pulu Yemone u ya ma-koleana „mulú Sainai molopale, olionga anda-kolepalima ungu tondolo mare nimba sipa liepi-liepi torumu kinia 'Naa pilielemolo.' niringi kinia seko kinjeringimunga umbuna sirimu kinia ono kowa pungí aulka se naa lierimu. „Mana moloringimunga aku sipa liemu, kiniá Pulu Yemone mulu-koleana molopale ungu tondoloma oliondo yando nimba sipa liepi-liepi tolemo kinia 'Naa pilimulú.' nimbu bulu símulu liemu mindili simba kinia kowa pumulú aulka se lembaye? Paa naa lemba. <sup>26</sup> U „Isirele yomboma mulú Sainai moloringi kinia Pulu Yemone, ungu nirimu ungumuni ma lope-lope senderimu, aku-na-kolo kiniá yuni ungu se nimba panjipa nimbale:

“Kelepo waltikele kamu ‘lope-lope sepili.’

nimbú akumu mamondo mindi naa nimbú.  
‘Mamo kinia mulúmu kinia pea jimi-jimi sepili.’  
nimbú kinia sembá.”

nirimu. <sup>27</sup> Yuni “kelepo waltikele kamu ‘sepili.’ nimbú.” nirimu akumu i-sipa nimbá nirimu: ‘ ‘Mulúmu kinia mamo kinia méle serindumanga we lepa mindi pumbá mélema we liepili, pora nimbá mélema pora nipili.’ nimba mélema pali lope-lope sendemba kinia we lepa mindi pumbá mélema mindi lope-lope naa seli we lemba.’ aku sipa Pulu Yemone nirimu.

<sup>28-29</sup> Pe kiniá ye nokoli kingimuni nokolemo koleamo jimi-jimi sepa pora naa nimbá koleana pulimulumunga „Pulu Yemo kinia, ‘Ange.’ niemili.

“Sepene mélema nomba pora silimú mele.”

olionga “Pulu Yemo sepe mélemo molemo.”  
akumunga, Pulu Yemo popo topo imbi ambolopo paka tondopo kape nimulúndu yuni kanopa peanga pilielemo uluma sepo pipili kolopo ‘Yu ye paa awili olandopa tondolo púlimu.’ nimbu yunga ungumu taka lepo pilipuli, kanopa kiri pilielemo uluma naa sepo molamili.

## 13

**13:1-25**

*Pepá Topa Sirimu Yemone Kamu Torumu Ungu Pokore  
13:1-6*

*Olio Anju Yando Yombo Lupama Konopu Paa Mondamili Ungu Se*

<sup>1</sup> „Senge kinia Pulu Yemone kanopa peanga pilimba ungu mare kamu niembo., Ono Karasinga yomboma ‘Nanga genupili’ ningu konopu anju yando mondoko molaa. „Konopu mondokole i-siku sangi: <sup>2</sup> Kolea suluna ‘Karasinga’ yombo ponenge mare onge kinia munduku naa kelko ononga ulkando mengo pangí. U yombo marene aku seringi kinia ‘We-yombo mare nokokomolo.’ konopu lieringi-na-kolo

mulu-koleana angelloma nokoringi kene ‚aku siku saa..<sup>3</sup> Karasinga yombo ka-ulcana pelemelema ono we molemele yombomane ‘Olio ono kinia pea ka-ulcana pelemolánje ‘Olionga yombomane olio ongo nokangi.’ nimbu pilielemolá.’ ningu pilkuli kanu ka-ulcana pelemele yomboma kondo kolko nokaa. Ononga opa-toumane ononga yombo mare seko kinjingí kinia ono we molemelemane ‘Opa-toumane olio aku siku seko kinjilimolá mele ono seko kinjikimili.’ ningu pilku kondo kolko nokaa.

<sup>4</sup> Amboma ye pungu yema ambo liku selemele mele ‘akumu paa peanga’ ningu pilku molangi. Ambo yema onono seluna peangi. Ambo ye pulima kinia ye ambo lilima kinia wa ulu- pulu-kiri selemelema Pulu Yemone apurupa mindili lipa simba kene ambo yetolo onono seluna peangi.

<sup>5-6</sup> Kou-monema kanoko yama naa mengo molaa. Pulu Yemone nimbale:

“Nane ono paa mundupu naa kelepo  
anju paa naa pumbú.

‘Ono onono molangi nane naa nokombo.  
paa naa nimbú.’

nirimu. Aku nirimumunga pilipuli  
“Ye-Awilimu nanga lipa tapondólimu;  
na mini-wale naa mundumbu.

Yombo sene na-kinia  
nambolka ulu kiri se manda sembaye?”

nimbu manda tondolo mundupu kuru mondolemolo kene méle taltolemelema  
‘Manda taltolemolo.’ ningu pilku molaa.

**13:7-17**

*Olio U Nokoringi Yema Kinia, Kiniá Nokolemele Yema Kinia Ononga Ungumu Taka Lepo Pilipu Molopo, Yesusi Mundupu Naa Keleamili Ungo Se*

<sup>7</sup> Ono ‚Karasinga yomboma,‘ ono u nokoringi tapu-yemane u-pulu-pulu Pulu Yemonga ungu ningu siringi yema pilku molaa. Kanu yema molkole koloringi mele pilkuli ‚Pulu Yemone lipa yando mundorumu ye nokoli Karasimu yu, sika. ‚Yuni sika olio lipa tapondolemo tapondomba.‘ ningu kuru mondoko moloringi mele pilkuli aku siku manda manjiku seko molangi. <sup>8</sup> Yesusi Karasi u molorumu mele kiniá kepe aku sipa we molemo, pe aliehi topele naa topa aku sipa molopa mindi pumbá kanumu. <sup>9</sup> Akumunga, ‚ononga u tapu-yemane mane siringi mele munduku naa kelkole ningímini, ungu-mané uma pilku Pulu Yemo popo tolemele yemane, kolo toko ungu lupa lupa ningu mane silimilima naa piliangi. ‘Aku ungu mané olio Karasinga sika yomboma molomolo aulkamo ‘munduku keleangi.’ nimbá.’ ningu pilku aku ungu mané komu naa sendeko molaa. Pulu Yemone olio we kondo kololemo ulumuni olionga konopuma sepa tondolo mundundulimú kinia papu. ‚Ye marene ungu-mané sikuli, ‘Ono ‘Pulu Yemo-kinia konopu seluna pupili molamili.’ ningu kere-langi i-sipa i-sipama nangi.’ nilimili ungu-manema pilkuli kere-langi ‘Nangi.’ nilimilima nongi liemu aku senge ulumuni ononga konopuma sepa tondolo naa mundundumba. Aku ungu-manema pilkuli aku kere- langima nolemele yomboma aku kere-langimane unguri naa selemo.

<sup>10</sup> U Pulu Yemone ‘na popo toko serele-ulcana sukundu kongi mélema kalaa.’ nirimu mele pilkuli Pulu Yemo popo toko kongi mélema kalko silimili yombomane olio ‚Karasinga yomboma, ne Pulu Yemo popo tolemelema mele kopu seko manda pea naa senge.

<sup>11</sup> U serele-ulcana seringi mele pilipale aku sipa mele sembando, Pulu Yemo popo tondoli ye awili olundopamone ‘Pulu Yemone yombomanga ulu-pulu-kirima kanopa siye kolopili.’ nimba kongi senga mememo kolopa memba suluminia paa kake selina sukundu memba pumba ‚Pulu Yemo, sirimu, na-kolo aku kongimu yombo molko

peringi koleamo munduku kelko ultu mengo pungu ‘Sepene nopili.’ ningu kaloringi.  
<sup>12</sup> U aku siku seringimunga Yesusi kepe ‘yunga mememone Pulu Yemone yomboma kanopa ‘kake selima’ nimba kanopili.’ nimba yombo molko peringi kolea-awilimunga pala ultukundu mindili norumu. <sup>13</sup> Akumunga, Yesusi pala ultukundu molemona lombili ultu pumbu ‘yu seko pipili kondoringi mele olio kepe yu pea seko pipili kondangi kopu sepo molamili.’ nimbu akuna pamili. <sup>14</sup> Ya mana olionga kolea lepa mindi pumbá kolea se naa lemó, kolea se pe wendo ombámo nokopo molemolo akumunga, ‘Pulu Yemo popo toli ulu uma mundupu kelepo ‘seko pipili kondongi liemu unguri mólo.’ nimbu Yesusi lombili pamili.‘

<sup>15</sup> ‘Yesusi ,olionga kolali sepa kolondorumu; yuni yuyu olionga Pulu Yemo popo tondopa sirimu, kene’ pilipu, ‘Aku sipa serimumunga Pulu Yemo molemona manda pumulú.’ nimbu pilipuli ‘Pulu Yemo popo topo mélse kalopo siemili.’ nimbu Pulu Yemo alieli kape nimbu molamili. ‘Pulu Yemo paa awili olandopamo.’ nimbu yu popo tomolondo olionga keremané yu alieli kape niemili. <sup>16</sup> ‘Pulu Yemo popo tamili.’ ninguli i-siku mele sangila:, ‘Yomboma sepo kondamili.’ ningu liku tapondoko, méle mólo tomba yomboma ononga méle mare moke seko siengi. Pulu Yemo popo tongendo aku siku selemene uluma yuni kanopa peanga pilipa konopu silimú kene komu naa sindiku aku siku seko molaa.

<sup>17</sup> Ononga nokoli yemane “Saa.” nilimili mele pilku liku seko tako leko molaa. Kanu yemane ‘pe Pulu Yemo kongono selemolo mele nimbu simulú kinia “Seko kondoringi.” nipili.’ ningu pilku ‘ono molko kondangi.’ ningu nokolemele. Akumunga ononga ningí unguma pilku liku, ‘Olio aku sipu kongono semolo kinia olionga nokoli yema konopu siku konopu umbuna naa pepili olio nokangi.’ ningu onone “Saa.” ningí mele seko molaa. Onone ononga nokoli yemanga unguma pilku liku naa seko anju púngi liemu nokoli yema konopuna umbuna se pembuaku ulumuni ono manda naa lipa tapondomba kene aku sangi.

13:18-21

*I Pepá Torumu Yemone Nimbole: “ ‘Pulu Yemone Na Lipa Tapondopili.’ Ningu Yu-Kinia Nanga Mawa Sendangi. Pulu Yemone ‘Ono Molko Kondangi.’ Nipili.” Nirimu Ungu Pokore*

<sup>18</sup> Pulu Yemone olio lipa tapondopili mawa sendangi. Olio konopuni pilipuli ‘ulu se sepo kinjilimulu.’ nimbu naa pilipu, ‘Olio alieli sumbi sipu andamili.’ nimbu pilipu molemolomonga ,onone aku siku Pulu Yemo olionga mawa sendenge kinia pilimba,. <sup>19</sup> Ungu se pea ono tondolo mundupu mawa sekerola. Pulu Yemo-kinia ungu ninguli na ono molemelena paa nondopo kelepo wambo kene ‘Pulu Yemone na lipa tapondopili.’ ningu mawa sendangila.

<sup>20-21</sup> ‘Kiniá Pulu Yemo-kinia ononga mawa sendambo:, ‘Konopu pe nipili tako leko molangi.’ nilimú Pulu Yemone onone senge kinia kanopa peanga pilimba uluma manda senge tondolo paa peangama sipili. Yu olionga Ye-Awili Yesusi kolorumu kinia Pulu Yemone yunga yomboma-kinia ungu konde nimba panjipa mi lierimu ungumu yunga mememone ‘kamu pepa mindi pupili.’ nirimu kinia ‘kelepa ola molopili.’ nirimu Pulu Yemo. Yesusi Karasini olio lipa tapondolemo kene Pulu Yemo yu kanopa peanga pilimba uluma Pulu Yemo yuni olio- kinia sepili. Olionga Ye-Awili Yesusi yu kongi sipisipimanga tapu-ye enge nílimu. Yu alieli kape nimbu imbi ambolopo paka tondamili. Aku sipu semolo kinia peanga.

13:22-25

*Pepá Topa Pora Simbando Torumu Ungumu*

<sup>22</sup> Ango-keme, ‘nane ono i pepá topo sikiru akumu ungu wallopelte mindi tokoro kene akuna sukundu ‘Saa.’ nikiru mele siye naa sepili mimi siku pilku molaa.’ nimbu tondolo mundupu mawa sekero.

<sup>23</sup> Nane ‘ono piliangi.’ nimbu i nikiru: Olionga genu Timoti kiniá ka-ulkana we naa pelemo, yu ultu mundoringi. Yu nondopa na moliona omu liemu olto pea ono molemelena ombolo.

<sup>24</sup> Ono nokolemele yema kinia Pulu Yemonga yomboma pali “Manda molemeleye?” nindangi.

Kolea Italli yombo ya „molkorona oringi, molemelemane ono Ipuru yombo Karasinga yombo molemelema “Manda molemeleye?” nikimilila.

<sup>25</sup> „Pulu Yemone, ono pali we kondo kolopa molopili molangi.

„Aku pea nikiru.„

## JEMISI

### JEMISINI Pepá Topa Sirimu Bokumu

*Jemisini I Pepá Topa Sirimumunga Ungu-Pulu Mare*

I pepá torumu **ye Jemisi** kanumu 'Yesusi lombili andorumu **Jemisi** mólo.' konopu lemele. Kanu yemo u toko kondoringi kolorumu (Lipa Mundorumu Yema 12:2 kanani). '**Yesusi genu Jemisi** ni i pepámo torumunje.' ningu pilielemene. 'Yu molorumu mele piliambo.' ninguli Mateyu 13:55, Jono 7:2-5 kanoko, U-Korini 15:7, Gallesia 2:9, 1:19, Lipa Mundorumu Yema 21:18, 12:17, 15:13, Jutu 1:1 kanani. 'Kaliaingi sikitu tu (62) yu toko kondoringi.' ningu pilielemene. Pilipa kondoli yombo mare awisilini Lipa Mundorumu Yema 8:1 kinia 11:19 kinia kanoko, **Jemisi** 1:1 kanokole, 'Ye Sitipen toko kondoringi kinia Karasinga yombo moloringi Juda yombo awisili bulu-balu ningu kowa pungu kolea lupa-lupa awisilinga anju anju pungu moloringi kanu yomboma i pepámo topa sirimunje.' ningu pilielemene.

**Pepá torumumunga ungu-pulu mare:** **Se:** **Jemisi** ni i pepá torumu akumu 'Pulu Yemonga yomboma molko kondangi.' nimba mane simbando pepá topa ungu peanga awisili nirimu. 'Pepána tokoro ungumu yomboma paa piliangi. Ulu peangama mindi konopu siku seko molangi.' nimba ungu mare awisili iku topa nirimu (1:23-25, 3:3-12, 4:14, 5:7). 'Umbunama wendo ombá, mindili nonge kinia tondolo munduku molko munduku naa keleangi.' nirimula (1:2-12, akumunga 1:12 paa kanou, 5:7-11, 13-18). **Ungu se:** 'Yombo se 'Yesusi Karasi sika.' nimba kuru mondolemo yombomo we naa molopili.' nimba **Jemisi** ni tondolo mundupa nirimu. 'Kanu yombomone yombo mare lipa tapondopa ulu peangama sepili. Aku sipa sembá kinia yombomane kanokole 'Yu sika Karasi kuru mondolemo lémo.' ningu pilingí.' nirimu. Bokumunga pealemekondo "**8. bilip**", "**45. stretpela man**" kananila. **Ungu se:** Yombo kamakomando liepi-liepi topa nirimu ungu mare 1:10-11, 2:1-7, 5:1-6 kinia molemo. **Ungu se:** Yesusini mane sirimu ungu mare kinia, **Jemisi** ni i pepána torumu ungu mare kinia, selu-sipa mele molemo i-siku mele kanani: **Jemisi** 2:5 mele Mateyu 5:3 molopa, **Jemisi** 3:10-12 mele Mateyu 7:15-20 molopa, **Jemisi** 3:18 mele Mateyu 5:9 molopa, **Jemisi** 5:2-3 mele Mateyu 6:19-20 molopa, **Jemisi** 5:12 mele Mateyu 5:33-37 molemo.

Ya ungu-pulumu pora nikimu.

*1:1-18*

**Olio Topa Mania Mundumba Sembá Umbunama Olio  
Molomolona Wendo Ombá Kinia Tondolo Mundupu  
Molomolo Kinia Pulu Yemo Kinia Molopo Kondomolo  
Ungu Se**

*1:1*

*Jemisini Pepámo Tombando Pulu Polopa Torumu Ungumu*

<sup>1</sup> Na Jemisi, Pulu Yemo kinia Ye-Awili Yesusi Karasitolonga kongono sendeli kendemande ye se,

nane i pepámo topo,

'Isirele yombo, talape rureponga yombo bulu-balu ningu kowa pungu, kolea Judia disiriki ultukundu, kolea lupa-lupamanga molemele yomboma topo sikiru.'

Ono manda molemeleye?

*1:2-4*

### *Umbuna Wendo Olemomane Olio Enge Silimú Ungu Se*

<sup>2-3</sup> Nanga ango-keme, ‘Ono ‘Sika.’ ningu kuru mondolemele ulumu manda pembane mania pumbane.’ nimba manda manjilimú umbunamane ononga konopuma sepa tondolo mundundulimú.’ ningu pilielemene kene ono topa mania mundumba sembá umbuna lupa lupama ono molemelena wendo ombá kinia ‘Papu wendo okomo.’ ningu konopu siengi. <sup>4</sup> Ono molko kondoko, kamu umbu-konopu pepili Pulu Yemonga yombo yuma molko, Pulu Yemone kanopa peanga pilielemo ulu peanga se ononga konopumanga mólo naa topili molangi kene aliei tondolo munduku umbunama meangi; konopu tondolo mundundoli uluma ono-kinia tondolo mundupa pepili.

1:5-8

### *Yombo Senga Pilipa Kondolimu Manda Naa Pemu Liemu Yu Pulu Yemo Mawa Sepili Ungu Se*

<sup>5</sup> Yombo se pilipa kondoli naa pemu liemu Pulu Yemo kinia ungu nimba mawa sepale “Pilipa kondoli se si.” nimbá kinia mélema mawa selemele kinia iri naa topa méle awisili pilipa lipa popenge sepa silimú Pulu Yemone sika simba. <sup>6</sup> Aku-sipa na-colo kanu yombomo ‘Mawa sembó mele sika simba.’ nimba kuru mondopale mawa sepili. Konopu talo sepa kimbu silimú yombomo, poporomene unju mumu memba andolemo mele, yunga konopumu aku selemo kene ‘Simbane naa simbane. Lipa tapondombane naa tapondombane.’ nimba konopu talo sepa naa kimbu sipale ‘mélema mawa sepili’. <sup>7-8</sup> Yombo se aku sipa konopu talo sepa pelemo yombomo yu konopu talo sepa pelemomonga yunga konopumu bulu-balu nimba, méle selu mindi konopumu pilipa ungu se sembá aulka se naa lemó kene ‘Ye-Awilimuni na mélse simba.’ nimba naa piliepili.

1:9-11

### *Ye Koropama Kinia Ye Kamakoma Kinia Ononga Ungu Se*

<sup>9</sup> Ono ‘Karasinga yombomanga, genu se koropa pupili molopa imbi naa molemo yombomo ‘Pulu Yemone, yu-kinia ungu peanga se sepa, ‘Imbi ola molopili.’ nimbá kene konopu sipili. <sup>10</sup> Aku-sipa na-colo pellawa sindi se enge naa nimba nondopa tanda lemó mele yomboma aku siku kamu naa molko nondoko kololemele kene pilipale ‘Karasinga, yombo kamakomo ‘Pulu Yemone, ‘Yu imbi naa molopa we-yombo mele molopili.’ nimbá kinia konopu sipili. <sup>11</sup> Ena paa kondolemo kinia era mélema topa kondolemo kinia pellawa sindi peanga tolemoma kolopa ole lepa mania pulimú. Aku sipala yombo se méle awisili taltolemo yombomo kou límba kongonomo sepa molopale kolomba.

1:12-18

### *Pulu Yemone Olio-Kinia Ulu Peangama Mindi Sepa, ‘Ulu Kirima Sangi.’ Nimba Kondi Naa Tolemo Ungu Se*

<sup>12</sup> Yombo se umbuna lupa lupama wendo olemo kinia aku umbunama memba tondolo mundupa molemo yombo akumu umbuna wendo olemomane yu topa mania naa mundulimúmunga Pulu Yemone aliei konopu peanga pepili molopa kondopa mindi puli ulu-pulumu silimú, akumu yunga méle kalólimu limú kene umbuna lupa lupama wendo ombá kinia ‘Aku umbunama papu na-kinia wendo okomo.’ nimba konopu sipili. Kanu méle kalólimu koronga-u Pulu Yemone “Yu paa konopu mondonge yomboma aku sipu méle kalombo.” nimba, nimba panjerimu méle kalólimu.

<sup>13</sup> Ulu sene yombo se ‘Ulu-pulu-kiri se sei.’ nimba ulu se manda manjimba kinia kanu yombomone ‘Pulu Yemone na ‘sepo kinjambo.’ nimba kondi tokomo.’ ni naa nipili. Ulu-pulu- kirimuni Pulu Yemondo ‘Ulu-pulu-kiri se sei.’ manda naa nimbá. Nimbá mele Pulu Yemone pilimba aulka se paa naa pelemo. Pulu Yemone yombo

sendo 'Ulu-pulu-kiri se sei.' paa manda naa nimbála kene 'aku siku naa niengi.'<sup>14</sup> Yomboma ononga konopumane aku ulu-pulu-kirima 'sangi.' nimba kondi tolemo kinia ononga konopu kiri akumane 'Ulu-pulu-kirima sangi.' nimba kondi topa ono kundulimú.<sup>15</sup> Kanu-kinia ambo se bolango mondopale melemó mele konopumuni yakala kolopale ulu-pulu-kiri se melemó. Kanu-kinia ulu-pulu-kirimu akopa pora sipale kololi ulu-pulumu melemó.

**1:16-18**

### *Ungu Nimba Ulu Selemoma Paa Topele-Mapele Naa Tolemo Yemonga Ungu Se*

<sup>16</sup> Nanga paa konopu mondolio ango-keme, ononga konopumane 'Sika nikiru.' ningu kolo toko ononga konopuma liku amu naa tondaa.<sup>17</sup> Méle peangama kinia ulu peangama kinia, aku sipa ulu paa peangama pali yando we naa limulú. Kanu mélema mulu-koleana wendo olemo. Muluna pa sendeli gilimuma sepa panjerimu Lapamone kanu méle paa peangama silimú. Muluna gilimú pa sendelima ombo pulimú kinia kolea tangopa simbulu topa, unju kinia mélemanga minima gilimú mele topele-mapele toko pulimili mele kanu Pulu Yemo aku sipa topele-mapele naa topa, olio simbulu tondomba mele se yu-kinia paa naa pepa, konopu selumu mindi pepili molemo.<sup>18</sup> 'Kanu topele-mapele naa tolemo yemone,' 'Olio yunga bolangoma molangi meambo.' nimba 'Yunga semanemo, olio lipa tapondopa yomboma konde molonge tondolomo pelemo semane paa sikamone olio mendepili.' nirimu. Yuni olio 'mélema serindumanga pali kumbi leko molangi.' nimba olio aku sipa merimu.

**1:19—5:6**

## **Pulu Yemo Paa Sika Kuru Mondopole Ulu Peangama Sepo Molomolomonga Ungu Mare**

**1:19-27**

*"Pulu Yemonga Ungumu Komumuni Mindi We Naa Piliangi. Pilkuli Pilku Liku Sengena Panjiku Sangi." Nirimu Ungu Se*

<sup>19-20</sup> Paa nanga ango-keme, yombo sene ungu se nimbá kinia 'Mimi sipu piliamili.' ningu komu sendeko molko, ungu se nondoko pundu toko naa ningu, sumbi siku mumindili naa kolangi. Kanu ungumu yombomane pali paa mimi siku pilku konopumanga panjangi. Pulu Yemone 'yomboma sumbi siku molonge kinia papu.' konopu lepa kanolemo mele yombomanga mumindili kololi ulu akumuni 'Aku siku molangi.' nimba naa lipa tapondolemo kene nondoko mumindili naa kolangi.<sup>21</sup> Akumunga, 'Ga pupili.' ningu era selemele mele, ulu kalaro mololima kinia ulu kirima kinia selemelema pali 'Na-kinia naa molopili.' ningu munduku kelko, 'Pulu Yemone, ungu u ononga konopumanga panjinderimu, aku ungumuni ono mini pali lipa tapondopa mindili nolemolá aulkana manda wendo lipa Pulu Yemo kinia pea molko kondonge aulkana manda lipa mondomba akumu taka leko pilku liku molangi.

<sup>22</sup> 'Pulu Yemonga, ungumuni nilimú mele we komumane mindi naa piliangi. Pilkuli pilku liku sengena panjiku sangi. We komumane mindi pilkuli nilimú mele naa selemele liemu ono onono kolo toko 'Peanga sepo molemolo.' konopu lemele.<sup>23-24</sup> 'Aku sangi.' nikirumunga ungu-pulu se i-sipa mele: 'Yombo sene ungumu we komumuni mindi pilipale, nilimú mele pilipa lipa naa semu liemu yu yombo sene ungu se selemo mele yu aku sipa manda manjipa selemo. Yombo se yunga kumbi-keremo kariyápana kanopale, pe yunga minimu kanopa pora sipale 'yu sumbi sipa molomba mele ungu se naa sepa, anju pumba yu molemo mele popenge sepa komu sindipa naa pilielemo, aku sipa mele yombo nikirumuni aku selemo.<sup>25</sup> Aku-sipa na-kolo yombo sene, ulu-pulu-kirimane olio ambolopa ka-kongono silimú aulkana 'Mindili naa nongo we molangi.' nimba wendo lindilimú ungu-mane peangamo kariyápa mele mimi sipa kanopa siye naa kolopa molopa, nilimú mele komu naa

sindipa pilipa lipa sepa molomu liemu kanu yombomone ulu selemomane yu sepa kondombamonga yu konopu peanga pepili molopa kondomba.

<sup>26</sup> Yombo sene 'Na Pulu Yemonga ungumu paa pilipu lipu yu popo topo kape nimbu kondopo molio.' nimba pilipa molemo-na-kolo yunga alimbolomo nokopa naa kondomu liemu yuni yuyu kolo topa konopumuni mindi 'Sika aku selio.' nimba pilipa, yunga konopumu lipa amu tondolemo. Yu 'Pulu Yemonga ungumu pilipu lipu, yu popo topo kape nimbú ungu-manema paa pilipu molio.' nilimú ulu akumuni yu lipa tapondomba unguri naa selemo. <sup>27</sup> Olione 'Pulu Yemonga yomboma molopo yu popo topo kape niemili.' nimulú yombomane olionga Lapa Pulu Yemone ulu kake sepa kalaro naa molemo nimba kanolemo uluma semolo mele i-sipa: Anupili lapali kololemele bolango kolumuluma kinia, ambo wayama kinia, kála seko umbunama wendo opili molemelema 'aku siku naa molangi.' ningu nokoko, 'Mana-yombomane ulu-pulu-kirima selememele mele naa senge. Kanu ulu-pulu-kirimane olio ulu se naa sepa, olio kalaro se naa mondopili.' ningu molko kondolemele.  
'Aku selememele yomboma olionga Lapa Pulu Yemone 'yombo sumbi nilima molemele.' nimba kanolemo.'

## 2

2:1-13

### *Olione Yomboma Apurou Naa Apurupu Pali Kondo Kolopo Lipu Tapondamili Ungu Se*

<sup>1</sup> Nanga ango-keme, ono olionga Ye-Awili Yesusi Karasi ye paa peanga imbi ola molopa tondolo púlimu 'Sika.' ningu kuru mondolemelemane 'yomboma apuruku, yombo se ,imbi ola mololimu, liku tapondoko, yombo se ,imbi ola naa mololimu, naa liku tapondoko, naa sangi. <sup>2</sup> Ye se mulu- maminia paa peangama panjipa kougollone seli ki-ongi se mondomba ye se kinia, ye koropa se mulu-maminia kirima panjimba ye se kinia, aku yetolo ono maku toko molongena ongele kinia kanokole <sup>3</sup> ye mulu-maminia peangama panjimba yemo 'kanoko peanga pilkuli, paa nokoko "I polo peangana ongo molou." ningu, ye koropamo 'kanoko kiri pilkuli, yundu "Inia ongo ola giliei." molo "Nanga kimbu munduliuna ongo mania molou." níngi liemu <sup>4</sup> aku sengemonga ono konopu kiri pepili ono onono anju yando apuruku naa kinjilimiliye? Ono aku siku yomboma apurulimili mele onono konopumuni pilkuli 'I yombomone na manda lipa tapondomba. Imuni na naa lipa tapondomba.' nimbu kanopo apurupu kinjilimulu lémo.' ningu naa pilieemeleye?

<sup>5</sup> Paa nanga ango-keme, piliam! Pulu Yemone 'Yombo mare nanga yomboma molangi.' nimba, nimba taltombando ya ma-koleana yombomane yomboma kanoko 'yombo koropa pupili molemele.' ningu kanolemele yombo kanuma Pulu Yemone nimba taltopale 'Yombo kamako mele molangi.' nimba 'onondo nimbale:' "Onone 'Yu sika.' ningu olando siku kuru mondokole 'Yombo na konopu mondonge yomboma nane ye nokoli kingimu molopo nokolio koleana na-kinia pea molamili.' nimbu panjerindu akumu ono pea aku sipu molamili wang." koronga nilimú. <sup>6</sup> Aku-sipa na-kolo 'nanga ango-keme' onone yombo koropama 'Pipili kolangi.' ningu seko kinjilimili. 'Ango-keme,' yombo namelene ono kondi toko ononga mélema liku, mindili siku, 'Kote sendamili waa.' ningu, selememele yombo akuma nameleye? 'Ye koropamane aku selemeye? Mólo!', Ye kamakomane ono-kinia aku selememele kanumu. <sup>7</sup> Ono Yesusi Karasinga yomboma molemele kanu yemonga imbi peangamo namelene ungu-taka tondolemeleye? 'Ye koropamane aku selemeye? Mólo!', Ye kamakomane aku selememele kanumu.

<sup>8</sup> Pulu Yemonga bokuna ungu-mané se sirimu paa olandopa molemo kanu ungu-manemo pilku liku sengena panjiku senyi liemu paa papu. Kanu ungu-manemone nimbale:

“Onono yu-mele-mele konopu mondoko,  
ononga kangima onono kondo kolko  
nokolemele mele  
aku sikula pulu lemó yomboma  
konopu mondoko nokoko molangi.”

nimba molemo ungu-mané kanumu pilku liku senyi liemu peanga. <sup>9</sup> Aku-sipa na-kolo yomboma kanoko apurukuli ‘Yu peanga. Lipu tapondambo. Yu kiri. Naa lipu tapondambo.’ níngi liemu ulu-pulu-kiri se selemene, akumunga ‘Pulu Yemonga, ungu-manemane ‘Nu ungu-mané se pulua tonu lémo.’ nimba lipa ora simba. <sup>10-11</sup> ‘Aku nikirumunga pulumu i-sipa:’ Olio pilielemolo, “Ambo ye puli se molo ye ambo lili se yombo se lupa-kinia wa ulu-kirinale naa sangili.” nimba ungu-mané sirimu yemone “Yombo se toko naa kondangi.” nimba mane sirimu pilielemolola. Aku liemu nu wa ulu-kirinale naa sekole yombo se toko kondonu liemu ungu-manema pulua toli yombomo moleno. Akumunga, yombo se ungu-manema pali pilipa lipa selemo-na-kolo selu mindi pulua tomu liemu aku selemomonga ungu-manema pali pulua tolemo kanumu.

<sup>12-13</sup> ‘Ulu se sengendo molo ungu se ningíndu u i-siku ningu piliangi:’ ‘Ulu-pulu-kirimane olio ambolopa ka-kongono silimú aulkana ‘Mindili naa nongo we molangi.’ nimba wendo lindilimú ungu-mané peangamone nilimú mele pilipale Pulu Yemone olio uluma sepo unguma nimbu selemolo mele pilipa apurumba kene.’ pilkuli kanu ungu-manemo pilku uluma seko unguma ningu seko molemele mele pilku seko kondangi. Yombo sene yombo se kondo naa kolomu liemu pe Pulu Yemone kote pilipale yu kepe kondo naa kolombala. Yombo sene yombo se kondo kolomba yombomo Pulu Yemone yunga kote pilipale yu kepe kondo kolomba. Pulu Yemone aku sipa kote pilipa sembá kene pilkuli unguma ningu uluma senge mele pilku kondokole sangi.

2:14-26

*‘Pulu Yemo Sika. Yuni ‘Sembó.’ Nilimú Mele Sika Selemo.’ Ningu Kuru Mondolemele Ulumu Kinia Ulu Peangama Selemene Ulumu Kinia Kanutolonga Ungu Se*

<sup>14</sup> Nanga ango-keme, yombo sene nimbale: “Na ‘Pulu Yemone lipa mundorumu ye nokoli Yesusi Karasi, sika.’ nimbu kuru mondolio.” nilimú-na-kolo ‘Sika.’ ningu kuru mondolemele yombomane selemene mele, ulu peangama naa selemo liemu yuni kuru mondolemo ulumuni yu lipa tapondolemoye? Yuni kuru mondolemo ulumuni yu mindili nolka aulkana wendo lipa Pulu Yemo kinia molopa kondomba aulkana manda lipa mondombaye? ‘Ulu peangama naa selemo liemu paa manda mólo..’ <sup>15</sup> Gena se mulu-maminia kiri se panjipa, kere-langí nombá se naa lemba kinia, <sup>16</sup> ononga yombo sene yu kere-langí kinia mulu-maminia mare naa sipa yundu nimbale: “Nu konopu pe nipili pungu, ali naa sepili mulu-maminia peanga se pakoko, olo sembá kere-langí mare nani pu.” nimu liemu aku sipa nimbámone yu sika lipa tapondombaye? ‘Unguri manda naa sembá..’ <sup>17</sup> ‘Yombo sene yombo se naa lipa tapondopa kerena “Manda molani pu.” we nilimú kinia kanu yombomo naa lipa tapondopa unguri naa selemo, aku sipala. Yombo sene ‘Sika.’ nimba, kuru mondopale ulu peangama naa semu liemu yunga kuru mondolemo ulumu méle kololimu mele; unguri manda naa sembá.

<sup>18</sup> Aku-sipa na-kolo yombo sene ‘nane ya nikirumu ‘Kolo tokomo.’ nimba nando, nimbale: “Yombo marene ‘Sika.’ ningu kuru mondolemele ‘ulu akumu mandala..’ Yombo marene ulu peangama seko yomboma liku tapondolemele ‘ulu akumu

mandala. „Ulu talo pea selu-sipamo. Yombo sene kanu ulutolonga ulu se mundupa kelepa se pilipale sembá kinia kanu ulu selumuni manda lipa tapondomba.“ nilkanje.

„Aku sipa nilka yombomondo nane pundu topo i-sipu nilka;“ Nu ‘Karasini, sika, “nanga” nimba senderimu sendelemo.’ nimbu kuru mondolio mele lipu ora siembo.” ningu ulu peanga se naa senu liemu nu sika kuru mondoleno mele nane nambi sepo kanomboye? „Manda naa kanombo. Na ulu peangama sepo yomboma lipu tapondombo ulumane ‘Sika.’ nimbu, kuru mondolio mele lipu ora simbú. <sup>19</sup> Nuni ‘Pulu Yemo selu mindi molemo.’ ningu kuru mondoleno. Akumu papu seleno. „Aku-sipa na-kolo, kurumane kepe aku siku kuru mondolemele. Pilkuli pungu-pungu ningu mini-wale mundulimili.

<sup>20</sup> Aroma toli yombomo, we ‘Sika.’ ningu kuru mondoko ulu peangama naa seleno ulumuni uluri manda naa sembá mele ungu-pulumu piliani nimbu siemboye?

<sup>21</sup> Olionga anda-kolepa Eporayamone ulu se serimu mele kanopale Pulu Yemone yunga ulu-pulu-kirima siye kolopo, ‘Yu konopu sumbi nimba peli yemo.’ nimba kanorumu. Eporayamone yunga malo Aisake Pulu Yemo popo topa kalopa simbando polona ola taltorumu kinia kanopale Pulu Yemone ‘Yu ye sumbi nílimu.’ nimba kanorumu. <sup>22</sup> Mimi siku piliaa! Eporayamone ‘Sika.’ nimba kuru mondorumu ulumu kinia ulu serimumunga kinia manda selu sipa serimu kinia yuni serimu ulumane yunga ‘Sika.’ nimba kuru mondorumu ulumu kamu sepa tondolo mundundorumu kanumu. <sup>23</sup> Aku sipa serimumunga Pulu Yemonga bokuna yundu ungu se nilimúmunga pulumu wendo orumu. Kanu ungumu i-sipa:

‘Pulu Yemone yu-kinia “Sembó.” nirimu mele

Eporayamone ‘Sika sembá.’ nimba  
kuru mondorumumunga kanopale

Pulu Yemone “Yu ye sumbi nílimu.”

nimba kanorumu.’

Eporayamone aku serimumunga Pulu Yemone yundu

‘“Nanga pulu lemó yemo.” nirimula.’

aku sipa molemo kanumu. „Yombo sene nando ungu se aku sipa nilkanje nane aku sipu pundu topo nilka.” <sup>24</sup> Eporayamo kinia Pulu Yemo kinia olone seringili mele, pilkuli, yombo sene we ‘Sika.’ nimba kuru mondolemo kinia kanopale ‘Pulu Yemone,’ ‘Yunga ulu-pulu-kirima siye kolopo, ‘Yu konopu sumbi nimba peli yombomo.’ nimbu kanolio.’ naa nilimú. Yombo se ‘Sika.’ nimba kuru mondopale, ulu peangama selemo kinia kanopale Pulu Yemone ‘Yunga ulu-pulu-kirima siye kolopo, ‘Yu konopu sumbi nimba peli yombomo.’ nimbu kanolio.’ nilimú mele pilieemele.

<sup>25</sup> Aku sipala, ‘Josuane ye talo Jeriko taonona lipa mundorumu kinia, ‘Yomboma nambi selemelenje.’ ningu kanoko panjingilí puringili kinia ambo-wapora Reyapone ‘Olo naa tangi.’ nimba lipa tapondopa ‘Ya lopi seko peangili.’ nimba nokopale, pe ‘Aulka senga lupa kelko yando wangili.’ nimba lipa mundorumu kinia aku sipa serimumunga kanopale ‘Pulu Yemone,’ ‘Yu ambo sumbi nílimu.’ nimba kanorumu.

<sup>26</sup> Yombo senga minimu kangimu mundupa kelepa pulimú kinia kangimu kololemo, aku sipa yombo sene ‘Sika.’ nimba kuru mondopale ulu peangama naa selemo kinia yunga kuru mondolemo ulumu kololemóla. ‘Minimu kangimunga sukundu peleme kangimu manda konde molemo mele aku sipa, ‘Sika.’ ningu kuru mondolemele ulumu kinia yomboma liku tapondonge ulu peangama kinia liku sere leko senge kinia manda sembá. Se seko se naa senge kinia manda naa sembá..’

### *Olionga Alimboloma Nokopo Kondopo Ungu Peangama Mindi Nimulúmunga Ungu Se*

<sup>1</sup> Nanga ango-keme, ‚Pulu Yemone yombomanga ulu selemelema apurupa pilimba kinia, olio yomboma ‚yunga unguma, mane silimulu yemanga ulu selemoloma paa tondolo mundupa apurupa pilimba kene ononga ye mare awisilini ‚Pulu Yemonga unguma, yomboma mane siemili.’ naa niengi. <sup>2</sup> ‚Aku nikirumunga pulumu niembo:’ Wale awisili olio ‚ulu ‚peanga, se semolo.’ konopu lepole naa selemolo; ‚Ulu kiri se naa semolo.’ konopu lepole selemolo. Aku sipa uluma olio yomboma kinia pali wendo olemo. Yombo sene waltikele kepe ungu kiri se naa nilimú liemu kanu yombomo yu yombo paa peangamo, yunga kangima pali manda nokopa kondomba.

<sup>3</sup> Unku nikirumunga pulumu i-sipa mele: Yombo sene ‚Kongi ose se nanga ungumu piliepili.’ nimba yunga kerena aini se panjindilimú kanu-kinia yuni ‚Osemo i-sipa pupili, i-sipa pupili.’ nimba ainimu lipa sumbi sindilimú kinia osemo aku sipa topele topa pulimú. <sup>4</sup> Nona andoli sipi selemo mele piliangila. Sipima paa méle awilima na-kolo poporomene kolea lupa marenga topa mundumba selemo kinia sipimanga sitiyama paa méle kangama na-kolo sipi kongono selemele yemane ‚Kolea senga pumulú.’ konopu lekole sitiyama ambolko pupú tolemele kinia ‚Pumulú.’ nilimili kolea akuna pulimú. <sup>5</sup> Aku sipa mele olionga alimbolomo kangimunga méle kangamo na-kolo yu yuyu kape nimba yunga imbi ambolopa paka tolemo. Sepe kanga sene kolea awisili kuli-sepe nolemo mele ono piliangi. <sup>6</sup> Alimbolomo sepe mélemola. Olionga kangimanga pali yu méle kangamo na-kolo yuni ulu-pulu-kiri awisili sepale kangima pali sepa kalaro mondopa, ‚akumuni ungu nilimulu ungumane,’ kuli-sepene koleamanga pali nolemo mele yomboma sepo kinjilimulu. Aku sepemo yu ‚Pulu Yemone kurumanga nokoli Setene lipa mundumba,’ sepe-koleana wendo omba kalolemo sepemo.

<sup>7</sup> Yombomane kongi kinia kera kinia wambiye kinia takara méle lupama kinia nomu-kusana sukundu molemo mélema kinia aku méle lupa lupa awisili liku ‚Aku mélemane olionga nimulú unguma pilku sangi.’ ningu mane siku nokolemele, <sup>8</sup> akuna-kolo yombo sene yunga alimbolomo aku sipa manda mane sipa naa nokolemo. Yu ulu-kiri sembando taka lepa naa pelemo mélemo; yomboma kololemele tomoma mele olionga alimbolona sengepea sepa pelemo.

<sup>9</sup> Alimbolomane keremanga Ye-Awilimu olionga Lapamo kape nimbu imbi ambolopo paka tondolemolo; Pulu Yemone yu molemo mele aku sipa serimu yomboma alimbolomone kepe ‚Molko kinjangi.’ nimbu, nimbu kinjilimulu. <sup>10</sup> Kere seluna ‚Pulu Yemo molo yombo se, kape nimba imbi ambolopa paka tondolemolo ungu peangama kinia, nimba kinjilimú ungu kirima kinia, wendo olemo. Nanga ango-keme, aku sipa ulumu ulu peanga se mólo. <sup>11</sup> Mana no selu pilkipa wendo olemona no peanga se kinia no kombili seli se kinia seluna wendo naa olemo. <sup>12</sup> Nanga ango-keme, unju piki se unju ollipi mongo manda tombaye? Molo unju waene se unju piki mongo manda tombaye? Aku sipa, no kombili seli senga no peanga se manda wendo naa ombá.

**3:13-18**

### *Yombomanga Pilipa Kondoli Peangamo Kinia Pilipa Kondoli Kirimu-tolonga Ungu Se*

<sup>13</sup> Ononga yombo se unguma mimi sipa pilipa, yombomanga uluma pilipa apurupa kondopa, pilipa kondoli pelemoye? Aku sipa selemo yombo se molomu liemu ‚Yombomane yu sika aku sipa yombomo molemo mele ningu kanangi.’ nimba yunga aulka andopa ulu sembama paa peanga liepili. Yu kara pumba yunga imbi ambolopa paka naa topa, konopumuni pilipa kondopa, pilipa kondoli pelemo ulu peangama mindi sepili. Aku sembá kinia yombomane kanokole ‚yu sika pilipa kondoli peli yombomo molemo.’ ningu kanonge. <sup>14</sup> Aku-sipa na-kolo yombo mare imbi ola

molemo molo seko kondolemele molo ulu selemele mele kanokole 'Aku siku naa molangi. Aku siku naa sangi. Olio aku sipu molemolánje papu.' ningu ono-kinia konopu kiri panjiku mumindili kolongi liemu aku siku konopumane pilielemene mele 'Sepo kondokomolo. Olio pilipa kondoli pelemo.' ningu onono kape ningu imbi ambolko paka naa toko, aku siku kolo toko ungu sikama toko mania naa mundayo.

<sup>15</sup> Aku sipa pilipa kondolimu mulu- koleana wendo naa olemo; ya ma-koleana wendo olemo. We-konopu-umanga 'Pulu Yemonga, Minimu naa molorumuma perimu kanu konopumanga wendo olemo; aku sipa ulu wendo olemomanga lapamo 'kurumanga nokoli, depelemo yu. <sup>16</sup> 'Aku ungu nikirumunga pulumu i-sipa: ' Yombo mare imbi ola molemo molo seko kondolemele molo ulu selemele mele kanokole 'Aku siku naa molangi. Aku siku naa sangi. Olio aku sipu molemolánje papu.' ningu ono-kinia konopu kiri panjiku mumindili kololemele uluma selemele yomboma molemele kinia ono molemelena yomboma konopu seluna pupili naa molko konopu lupa lupa pepili molko, marene ulu-pulu-kiri lupa lupama selemele akumunga 'kanu pilipa kondolimu mulu- koleana wendo naa olemo.' nikiru.,

<sup>17</sup> Aku-sipa na-kolo mulu-koleana wendo olemo pilipa kondoli akumu 'lupa.. Pulu Yemone pilipa kondolimu yomboma silimú kinia kanu yombomane i-siku selemele: Ulu kumbinamo ulu kake selima selemele.

Ulu mare i-sipala: 'Yomboma mindili naa siku ono-kinia konopu seluna pupili taka leko molko, yomboma-kinia kara naa pungu pangu ningu taka leko molko,

ononga nokoli yemane ungu nilimilima mimi siku pilku seko, yombo mare umbuna pelemoma kondo kolko liku tapondoko, we yombo koropama molo kamakoma apurou naa apuruku yomboma kinia pali aku siku seko kondoko, kolo toko 'Ulu peangama samili.' naa ningu, 'Semolo.' nilimili mele sika selemele.

<sup>18</sup> 'Yomboma konopu seluna pupili.' ningu uluma selemele yombomane kaliana kere-lang'i umbu mele mundulimili. Konopu seluna pupili uluma kaliana mundulimili kinia yomboma sumbi siku molko ulu peangama senge uluma kaliana wendo ombá.

## 4

4:1-10

### *Mana-Ulu Konopu Mondolemele Yomboma Pulu Yemo Kinia Opa-Tou Molemele Ungu Se*

<sup>1</sup> Ono irinale seko, opa seko, selemele akumu pulu nambolkarenga aku selemeleye? Ononga konopumanga mélema kinia uluma kinia 'Samili.' konopu lemele ulu akumane ononga konopumanga sukundu angelema ningu opa-mele selemomonga onone konopu talo yopoko pepiliaku siku selemele. <sup>2</sup> Mélse kanokole yakala kolko 'Liemili.' konopu lemele-na-kolo naa limili. Naa likuli yomboma toko kondolemele. Yombo senga mélema kanoko yama melemele-na-kolo aku mélema lingí aulka se naa lemómonga 'paa mumindili kolko, lakoko irinale seko opa selemele. Ono 'Pulu Yemone mélema sipili.' ningu yu-kinia ungu ningu mélema mawa naa selemelemonga 'Liemili.' nilimili mélema, naa limili. <sup>3</sup> 'Mélema liemili.' ningu 'Pulu Yemo' mawa selemele akuma 'Liemili.' nilimili mele ononga konopuma Pulu Yemone kanopale mawa selemele mélema naa silimú. Ono onono 'konopu sipu manda molamili.' ningu mawa selemelemonga kanopale naa silimú.

<sup>4</sup> Ambo sene yunga yemo mundupa kelepa wapora andopa tolemo mele 'ono pepá topo sikiru yomboma, Pulu Yemo munduku kelko mélema yakala kololemele yomboma, ma-koleana uluma kinia mélema 'pulu lemó.' ningu kopu seko molemele

yomboma aku siku molemelemonga Pulu Yemo kinia opa-tou mele molemele akumu ono naa pilielemeye? Ma-koleana mélema kinia uluma kinia yakala kolko 'olio-kinia pulu liepili kopu sepo molamili.' nilimili yombomane aku siku nilimilimunga 'Pulu Yemo kinia opa-tou molamili.' nilimili.<sup>5</sup> Molo 'Pulu Yemonga bokuna molemo ungumuni we nilimú.' konopu lemeleye? Kanu ungumuni nimbale:

"Olio yombomanga minima Pulu Yemone sirimumane

'Yunga unguma mindi pilku,

yunga kongonoma manjiku seko molangi.

Ungu se lupa pilku liku senge kinia

'olio minimane, paa kanopo kiri pilipu

konopu kiri panjimulú.' nilimili."

nimba molemo aku ungumu 'We nilimú.' konopu lekemeleye?<sup>6</sup> Aku-sipa na-kolo Pulu Yemone olio we kondo kolopale 'lipa tapondolemo.' Aku sipa selemomonga ungu se Pulu Yemonga bokuna nimba molemo. Akumu i-sipa:

'Yombo se yunga imbimu yuyu ambolopa paka tolemomo

Pulu Yemone yunga imbimu

topa mania mundundupa naa lipa tapondolemo.

Yombo se yuyu yunga imbimu topa mania mundulimúmu

Pulu Yemone we kondo kolopa lipa tapondolemo.'

nimba molemo kanumu.

<sup>7</sup> Akumunga, Pulu Yemo liku awi siku yunga unguma pilku molangi. Kondi tolemo depelemone ungu nimbáma paa naa pilku tondolo munduku liku bulu siengi. Aku senge kinia ono mundupa kelepa kowa pumbá.<sup>8</sup> 'Pulu Yemo kinia kopu sepo molamili.' ningu yu molemona nondoko wangi. Nondoko onge kinia 'Ono-kinia kopu sepo molamili.' nimba yu ono molongena nondopa ombá. Ono ulu-pulu-kiri selemene yombomane 'Pulu Yemo molemona nondopo pamili.' ninguli, yombo senga ki kalaro molemo kinia kulumiye tolemo mele 'ononga konopumanga onono pilielemene uluma kulumiye tangi.' Ono yombo konopu talo pepa, 'Pulu Yemo kinia ma-koleana mélema kinia konopu mondolemele, yombomane 'Konopuma kake sepili. We-mélema konopu kimbu sипу molemolo mele mania pupili.' niengi.<sup>9</sup> 'Ono ulu selemene, kanoko kiri pilku, konopu umbuna sepa kamelé mindili sepili kola awisili seko molangi. Tawe selemene ulumu munduku kelko yombo senga pulu lemó yombo se kololemo kinia konopu kiri panjipa kola selemo mele aku siku sangi. Paa konopu siku molemele ulumu munduku kelko konopu paa umbuna pepili molangi.<sup>10</sup> Ye-Awylimunga kumbikerena 'Yu ye awilimu. Olionga imbima mania molopili.' ningu taka leko molangi. Aku senge kinia yuni ononga imbima ambolopa paka tondomba.

4:11-12

### Anju Yando Yombomanga Ungu-Bulkundu Naa Nindamili Ungu Se

<sup>11</sup> Ango-keme, anju yando ononga genali marenga ungu- bulkundu naa nindang. Yombo sene yunga genu senga ungu-bulkundu nindipa, "Sepa kinjilimú yombo kirimu." nilimú yombomone 'Pulu Yemonga, ungu-manemanga kepe ungu-bulkundu nindipa, 'Méle kirimu.' nilimú. Unku-manema apurupa 'méle kirimu' nilimú yombomo ungu-manema pilipa lipa naa sepa, ungu-manemanga pilipa apuroli yombomo mele molemo. <sup>12</sup> Ye selu mindi ungu-manema sipa panjipa, uluma pilipa apuroli yemo molemo, 'akumu Pulu Yemo.' Kanu yemo yombo mindili nolemolá aulkana pulimili yombo mare lipa tapondopa wendo lipa, yombo mare 'Mindili nangi.' nimba topa mania mundulimú yemola. Pe nu nambi selenomone nunga pulu lemó yombo senga uluma pilku apuruku 'Sepa kinjilimú.' nilinuye?

4:13-17

*Opali Talu 'I-Sipu I-Sipu Paa Semolo.' Ningu Tondolo Munduku Ningu Naa Panjangi  
Ungu Se*

<sup>13</sup> Kiniá „nane ungu se nimbú sekeromo, piliaa. Yombo marene ninguli: “Kiniá molo opali kolea-awili senga pumbu bisinisi se-pumulú. Akuna pumbu kalia-ingi selu bisinisi sepo kou-mone awisili limulú.” nilimili yomboma piliaa. <sup>14</sup> Opali ulu se wendo ombá kinia molonge mele ono naa pilielemene kanumu. Ononga konde mololi ulu akumu kondena sepe kalolemele kinia waltikele ilia wendo ombo nondopa pora nilimú mele. <sup>15</sup> Akumunga aku siku naa ningu, i-siku niengi: “Ye-Awilimuni ‘Na aku siku sani.’ nimu liemu kolou naa kolopo konde molopole i ‘Sambo.’ nikiru mele sika sembó.” niengi. <sup>16</sup> Aku-na-kolo onone aku siku naa nilimili. Ono kara pungu onono kape ningu imbi ambolko paka toko “Kongono awili se semolo.” ningu yomboma ningu silimili. Aku siku ningu kape nilimili ulumu paa ulu kirimu. <sup>17</sup> Akumunga, yombo sene ulu peanga se konopumuni pilipa ‘Aku sipu sembó kinia papu.’ nimba pilipale pe naa semu liemu aku sipa selemo ulumu ulu-pulu-kiri se selemo.

## 5

5:1-6

*Mele Awisili Taltolemele Yomboma Méle Kaloli Kirimu Lingí Mele Liepi-Liepi Topa  
Nirimu Ungu Se*

<sup>1</sup> Ono méle awisili taltolemele yomboma, onondo nimbú sekero ungumu piliayo. Ono molongena umbuna awili mare wendo ombá kene tondolo ru ningu kola saa! <sup>2</sup> Ononga méle awisili taltolemelema purupa lupendi topa, ononga mulu- maminia méle peangama luriniane nomba, <sup>3</sup> ononga kou- golloma kinia kou-sillipama kinia urolo tolemo. Kouma urolo tolemomonga onone seko kinjilimili mele mona lepa, kouma urolo tolemomone ononga kangina sepe mele nombá. Mulu ma nondopa pora nimbá sepili ono aku siku méle awisili sukundu sukundu liku we maku tolemele kene „tondolo ru ningu kola sayo.»

<sup>4</sup> Mimi siku piliaa. Ononga rasi-witima inia tondoringi kongono kendemande yema kolo toko mélema mimi siku naa kaloringimane tondolo munduku ninguli: “Olio seko kinjikimili.” ningu mangilielemene. Onone aku siku mangilieringi mele Ye-Awili Paa Tondolo Olandopa Pelimuni yunga komumuni pilipale „onone kendemande-yema seko kinjeringimunga ono pundu tomba.» <sup>5</sup> Ya ma-koleana molkole méle lupa lupa peangama yakala kolko ‘Liemili.’ ningu topo toko liku taltoko konopu siku molko, molko kondoringi. „Kongi toko nongendo ‘Kongi akopili.’ ningu kere-langi awisili nopili silimili mele, ono kere-langi paa awisili nongo yombo kapoma molemele-na- kolo kiniá toko kondonge walemo wendo okomo. <sup>6</sup> Yombo mare ono-kinia karaye naa seko, ulu kiri se naa seko yombo sumbi nilima moloringi yomboma onone kote sendeko toko kondoringi. Kanu yomboma toko kondongendo amboloringi kinia “Naa tangi, mólo.” naa ningu we moloringi.

5:7-20

**‘Ye-Awilimu Kelepa Ombá.’ Ningu Iseli-U Tondolo  
Munduku Molko, Pulu Yemo-Kinia Ungu Ningu, ‘Yuni Lipa  
Tapondopili.’ Ningu Mawa Seko Molangi Ungu Se**

5:7-11

*Ono Molongena Umbunama Wendo Ombá Kinia ‘Ye-Awilimu Sika Kelepa Ombá.’  
Ningu Konopu Tondolo Pupili Siye Naa Kolko Molangi Ungu Se*

<sup>7-8</sup> Akumunga, ango-keme, „yombomane ono umbunama silimili kinia, Ye-Awilimu u naa opili we-umbunama meaa. Yombo kalia selemelane ‘ononga kaliana kere- langi peanga se wendo ombá, lipu nomolo.’ ningu nokolemele. „Kere-langi umbu

mundukuli, 'Lo omba ena sepa sembá kinia kere-lang'i ola ombo nou lemba.' ningu taka leko nokoko molemele mele ono pilielemene. Ono kepe, kalia selemo yombo sene kere-lang'i umbu panjipale 'Lang'i wendo ombo nou lemba kinia nombó.' nimba taka lepa nokolemo mele aku siku ononga konopu tondolo pupili umbunama we mengo taka leko molangi. 'Ye-Awilim'u yando ombá walemo paa nondopa ombá sekemo kene' ,ningu, aku siku nokoko molangi.

<sup>9</sup> Ango-keme, anju yando "Pulu Yemonga, yombomane ulu selemelemonga umbunama wendo-wendo olemo." ningu iri toko ungu-bulkundu nindiku naa sangi. 'Pulu Yemonga, kotena naa giliamili.' ningu aku siku naa sangi. Kote Pilimba Yemo nondopa okomo.

<sup>10</sup> Ango-keme, Ye-Awilimuni ungu-umbu tondorumuma pilku yomboma ningu siringi yemane Ye-Awilimunga ungu ningu siringimunga ,opa-toumane, ono seko kinjeringi kinia tondolo munduku umbunama taka leko meringi mele pilkuli aku siku manda manjiku sangi. <sup>11</sup> Ono pilielemene. 'Yombo konopu tondolo pupili umbunama we mengo ,Sika.' ningu kuru mondolemele mele, munduku naa kelielemene yomboma ono Pulu Yemone "Konopu peanga pepili molko kondangi." nilimú aulkana moleno.' nimbu pilielemolo kanumu. ,U molorumu, ye Jopo tondolo mundupa, yu-kinia umbuna wendo orumuma we memba molorumu kinia pe Ye-Awilimuni 'Yu kelepa molopa kondopili.' nimba ulu mare serimu mele semanemo ono pilielemela. Olio pilielemolo, Ye-Awilimuni yomboma paa kondo kolopa, ulu selemelemanga pundu topa mindili silka-na-ko lo we mundupa kelielemo kanumu.

5:12

*"Ulu Se Semolo." Ninguli "Paa Sika Nikimulu." Ningu Pulu Yemonga Imbi Leko Mi Naa Leangi Ungu Se*

<sup>12</sup> Nanga ango-keme, ulu se kumbi leko senge mele i-sipa: Mulu-koleana molo ma-koleana molo mélsga imbi leko "Paa sika nikiru," ningu mi naa leangi. Ulu se "Semolo." níngi liemu paa sika sangi. Ulu se "Naa semolo." níngi liemu paa sika naa sangi. Kolo toko "E." ningu ulu se naa senge molo kolo toko "Mólo." ninguli ulu se senge kinia ,Pulu Yemonga kotena gilingí kinia, 'Seko kinjeringi kene mindili nangi.' nimbá.

5:13-18

*Yombo Se Konopu Sumbi Nipili Molemomone 'Mawa Sembó Mele Ye-Awilimuni Sika Pilipale Semb'a.' Nimba Kuru Mondopale Pulu Yemo-Kinia Mawa Semb'a Mele Pulu Yemone Sika Pilipa Semb'a Ungu Se*

<sup>13</sup> Ononga yombo se umbuna melemóye?

Umbuna se melemó liemu ,Pulu Yemo, mawa sepili.

Ononga yombo se konopu silimúye?

Konopu silimú liemu yu konane nimba

,Pulu Yemo, kape nimba imbi ambolopa paka tondopili.

<sup>14</sup> Ononga yombo se kuru tolemoye?

Kuru tolemo liemu Karasinga talapena molemele tapu-yema mangilipale 'Onone yunga ningu ,Pulu Yemo-kinia, ungu ningu ,Yu kelepa manda molopili.' nipili.' ningu, mawa sendekole Ye-Awilimunga imbimu mangilku yunga kangina wambola kandondangi wangi.' nimba mangiliepili.

<sup>15</sup> Kanu-kinia mangilimba yema ongole 'Pulu Yemone sika sembá.' ningu kuru mondokole yu mawa senge kinia Ye-Awilimuni 'Yunga kurumu pora nipili.' nimbá kinia yu kelepa manda molomba. Aku yombomo ulu-kiri mare semu liemu Ye-Awilimuni 'Mania pupili.' nimba siye kolombala. <sup>16</sup> Akumunga, ononga kuru tolemoma 'pora nipili, peanga liepili.' ninguli ono yu-mele-mele ononga ulu-pulu-kiri selemelema yombomando ningu para siengi, onone ononga ningu ,Pulu Yemo,

mawa sendangi. Aku senge kinia „Pulu Yemone, ‘Ono kelko manda molangi.’ nimbá. Yombo konopu sumbi nimba pélimuni yombo senga „Pulu Yemo, mawa sendelemo kinia yuni mawa sendelemo mele paa tondolo enge nimba yombomo paa manda lipa tapondolemo. „Akumunga, aku siku Pulu Yemo-kinia yombomanga ningu mawa sendenge kinia pilipale aku sipa sendemba..»

<sup>17</sup> „Aku nikirumunga semane se tambo: „Pulu Yemone ungu-umbu tondorumuma pilipa yando nimba sirimu ye, Illainja yu olio mele ye se molorumu. Aku-sipa na-kolo yuni „Pulu Yemo-kinia, tondolo mundupa mawa sepa “‘Lo naa opili.’ ni.” nirimu kinia kalia-ingi yopoko oli talo-pakara lo naa orumu. <sup>18</sup> Kelepa „‘Lo opili.’ nimba, mawa serimu kinia lo kelepa omба kaliana kere-langima kelepa wendo orumu. „Kiniá kepe Pulu Yemo aku sipa yombomane mawa senge mele pilipale sembá..»

5:19-20

*Yombo Se Ungu Sikamo Mundupa Kelemba Kinia Yu Kelko Yando Lingí Ungu Se*

<sup>19</sup> Nanga ango-keme, ononga yombo sene „Pulu Yemonga, ungu-sikamo mundupa kelepa ultu pumbá kinia ononga yombo sene yu kelepa yando límu liemu <sup>20</sup>, sepa peanga sembá mele, i-siku piliangi: Yombo sene ulu-pulu-kiri seli yombomo sepa kinjilimú aulkana pumbá kinia „kanopale, ‘Pulu Yemonga ungumu pilipa yunga talapena omба molopili.’ nimba lipa tapondopa yando limbamonga ulu-pulu-kiri seli yombo mini pali kolka aulkana kelepa limba. Aku sipa sembamonga „Pulu Yemone, ulu-pulu-kiri awisili mundupa kelendemba akumu mimi siku piliangi.

„Aku pea nikiru..»

## U-PITA PITAné Pepá U Topa Mundorumu Bokumu

*Pitane I Pepá Topa Mundorumumunga Ungu-Pulu Mare*

I pepámo “**U-Pita**” nilimulu akumu kinia, “**Pe-Pita**” nilimulu pepámo-tolo torumu yemo Yesusi lombili purumu **ye Pita**, Yesusini “Nanga kongonomo sende-pu.” nimba lipa mundorumu ye se; **U-Pita** 1:1, 5:1, **Pe-Pita** 1:1, 1:12-15 (Jono 21:18-19), 1:16-18 (Mateyu 17:1-5).

‘Karasinga talapena yomboma umbuna awilima melemele kanu yomboma ‘Karasi sika.’ ningu kuru mondolemele ulumu mania naa pupili tondolo munduku molangi.’ nimba **Pita** ne i pepámo torumu. “Ono Karasinga yombomane Yesusi Karasinga semane peangamo kelko mimi siku piliangi. Yesusi kolopa lomboropa ola molopale, “Kelepo yando ombó.” nimba, nimba panjerimu. Aku sipa nimba panjerimu mele pilkuli ‘Yu kelepa yando ombá.’ ningu nokoko molaa.” nirimu.

“Sika Karasinga yomboma-kinia umbunama wendo olemo-na-colo aku sipa wendo olemo umbunamane olío ‘Karasi sika.’ nimbu kuru mondomolo mele manda manjilimú. Akumunga, kuru mondoko molemele mele Karasi kelepa naa opili we kuru mondoko molangi. Pe yu ombá walemo ono méle kaloli peangamo lingí.” nirimu.

Jono 21:15-17 akuna Yesusini **Pita** ndo nimba: “Nanga kongi sipisipima tapu seko nokondani.” nirimu kanu ungumu pilipale **Pita** ne i pepána 2:25 kinia 5:2-4 kinia torumunje?

Ya ungu-pulumu pora nikimu.

1:1—2:10

### **Olio Pulu Yemonga Paa Sika Yomboma Kene Ulu Peangama Sepo, ‘Olio Méle Peanga Se Limulú.’ Konopu Lemolo Mélemo Limulúndu Nokopo Molamili Ungu Se**

1:1-2

*Pitane Pepámo Tombando Pulu Polopa Torumu Ungumu*

<sup>1</sup> Na Pita, Yesusi Karasini “Nanga kongonomo sende-pu.” nimba lipa mundorumu ye sene

i pepámo topo, Pulu Yemone ‘Nanga yomboma molangi.’ nimba, nimba taltorumu yomboma sikiru. Ono ononga koleamo munduku kelko pungu, kolea Pondasi poropinji kinia Gallesia poropinji kinia Kapadosia poropinji kinia Esia poropinji kinia Bitinia poropinji kinia,aku koleamanga pali pungu yombo ponengema mele molemele yomboma topo sikiru. <sup>2</sup> I pepá topo sikiru yomboma ono u naa molangi Lapa Pulu Yemone ono u ‘Yunga yomboma molonge.’ nimba pilipa kanopa imbi sipale ‘Yunga yomboma.’ nimba, nimba taltorumumunga pe moloringi kinia Mini ‘Kake Séli,muni ‘Ono Pulu Yemonga yombo kake selima molangi.’ nimba lipa tapondorumu. ‘Yesusi Karasinga ungumu pilku liku sengena panjiku molangi. Yunga mememone ono , ‘Pulu Yemonga kumbikerena konopu kake sepa pepili molangi.’ nimba, kulumiye topili.’ nimba aku sipa lipa tapondorumu. Ono yombo aku siku molemelema i pepámo topo sikiru.

‘Pulu Yemone’ ono we kondo kolopa sepa kondolemo mele kinia, ‘Ono konopu pe nipili tako leko molangi.’ nilimú mele kinia, olandopa olandopa pupili.

1:3-12

*'Pe Molopo Kondopo Mindi Pumulú.' Nimbu Konopu Sipu Nokopo Molemolomonga  
Pulu Yemo Kape Nimbu Yunga Imbi Ambolopo Paka Tondamili Ungu Se*

<sup>3</sup> Olionga Ye-Awili Yesusi Karasinga Lapa Pulu Yemo kape nimbu yunga imbi ambolopo paka tondamili. Yuni olio 'mindili nangi,' nilka-na-kolo olio paa kondo kolopa "Naa tombo." nimba mundupa kelepale 'Yesusi Karasi yombo-óno-koleana lomboropa ola molopili.' nirimu kanu ulumuni Pulu Yemone konde mololi ulupulu kondemo olio sirimu. „Yombomane bolangoma melemele mele ono aku siku yombo kondema molemele.. Aku konde mololi ulumuni olio sepa tondolo mundundulimúmunga , 'Yuni 'méle peangama simbú' konopu lemóma pali, sika simba.' nimbu nokopo molemolo mele pora naa nimbá. <sup>4</sup> Olio 'Monge-mélema simbú.' nimba, nimba panjerimu mele akuma kiri naa lepa, kalaro se naa molopa, pora naa nimba alieli lepa mindi pumbá mele akuma Pulu Yemone "Mulu-koleana onge kinia simbú." nimba taltondolemoma 'Limulú.' nimbu, konopu sipu nokopo molemolola. <sup>5</sup> "Ono simbú." nilimú yomboma ono 'Karasi sika.' ningu kuru mondolemelemonga Pulu Yemonga tondolomo, kuna-tapiye mele, akumuni 'Ono molko kondangi.' nimba nokolemo. Pe mulu matolo pora nimbá kinia 'Lipa tapondopa, mindili nolemolá aulkana wendo lipa, yu-kinia pea molko kondonge koleana memba pumbá kanu ulumu wendo ombá kinia paa sika kamu liengi.' nimba yunga tondolomone aku sipa iseli-u nokolemo.

<sup>6</sup> Akumu pilkuli paa konopu siku molemele, aku-na-kolo kiniá wale laye-kolonga ono-kinia umbuna lupa lupama wendo olemo-na konopuna mindili nongo molemele.

<sup>7</sup> Umbunama wendo olemomonga pulumu i-sipa: Pulu Yemone 'Ono sika kuru mondolemele mele manda molo mólonje.' nimba kanombando manda manjilimú. Ononga kuru mondoli ulu akumu olandopa; kou-gollo sika méle paa peanga kou-mone awili sepa pulimú-na-kolo akumu paa maniadopa. Kou-gollomo seko kinjilimili kinia pora nilimú-na-kolo 'Yu sika kou-gollo molo mólonje, kanamili.' ningu sepena manda manjiku kalolemele. „Aku sipa mele,, ono-kinia umbuna wendo olemomane 'Ono sika ,Karasi, kuru mondolemele molo mólonje?' nimba manda manjipa kanopa, 'Yesusi Karasi kelepa omnia mona gilimba kinia ,Pulu Yemone, ono konopu sipa kape nimba imbi ambolopa paka tondopili.' nimba iseli-u ononga kuru mondolemele ulumuaku sipa manda manjilimú. <sup>8</sup> 'Yesusi Karasi, yu sika naa kanolemele-na-kolo yu konopu mondolemele. Kiniá yu sika naa kanolemele-na-kolo 'Yu sika.' ningu kuru mondoko paa konopu silimili. Aku konopu silimili mele ya mana konopu silimili mele mólo. Konopu silimili mele paa olandopa akumunga anju yombomando ningu singíndu perenge. Paa manda naa ningu singí. <sup>9</sup> Ono 'Karasi sika.' ningu kuru mondolemelemonga pulu akumu Pulu Yemone ono mini pali lipa tapondopa, mindili nolemolá aulkana wendo lipa, Pulu Yemo yu kinia pea molko kondonge aulkana lipa mondolemo, akumunga ,paa olandopa konopu silimili.,

<sup>10-11</sup> Mindili nolemolá aulkana wendo lipa, molko kondonge aulkana lipa mondolemomonga ungu mare Pulu Yemone ungu- umbu tondorumuma pilku yomboma ningu siringi yemane u ,Karasi u naa opili, ningu siringi. Pulu Yemone pe yomboma we kondo kolopa lipa tapondomba ulumundu u ningu siringi. Ningu sikuli, 'I ulumu sewale wendo ombánje? ,Pulu Yemone nimba talitorumu ye nokoli, Karasimu mana omnia mindili nombá ulumu kepe, aku sembá kinia ulu peanga olandopama wendo ombá mele uluma kepe, Karasinga Minimu ononga konopumanga sukundu molopale nimba sirimu ulu kanuma nambi sepa wendo ombánje.' ningu ,Karasi u naa opili, kanu yemane onono alieli konopu kimbu siku mangilku, ,akumunga pulumu, paa mimi siku kororingi. <sup>12</sup> ,Pulu Yemone, kanu yemane yunga kongono senderingi aku kongonomo 'ono onono lipa tapondomba kongonomo mólo.' nimba, nimba para sirimu. ,Ulu pe wendo ombá u ningu siringi ulu akuma ono molangi wendo naa

orumu., Ulu pe wendo ombá u ningu siringi ulu akuma ono kiniá molemele yomboma 'ononga' ningu, u ningu sinderengi. Yesusinga kongono-yemane ono kiniá molemele yomboma ningu silimili unguma Pulu Yemone u kanu yemando nimba sirimu. Kanu unguma ,pe, kiniá mulu-koleana Mini Kake Séli lipa mundorumumunga tondolomone Karasinga ungumu andoko ningu silimili yemane semane peangamo toko siringi pilieringi unguma. Angellomane kepe 'Ono ningu silimili ungumanga puluma paa piliamili!' ningu molemele.

*1:13—2:3*

*Ulu-Pulu-Kirima Paa Naa Sepo Pulu Yemonga Yombo Kake Selima Manjipu Molamili  
Ungu Se*

<sup>13</sup> Akumunga, ononga konopuma 'kongono tondolo mundupa sepili.' ningu liku sumbi sindiku, ulu sengema mimi siku pilku kondoko seko, 'Yesusi Karasi pe omba mona gilimba kinia ,Pulu Yemone, ono sika we kondo kolopale sepa kondomba.' ningu kuru mondoko nokoko molangi. <sup>14</sup> Unguma pilku liku sengena panjiku selemene bolangoma molko, u ono ,i ungumu naa pilku, walu molkole ulu-kirima konopu mondoko pilku seringi mele kiniá aku siku pilku naa sangi. <sup>15</sup> Aku siku naa seko, "Ono nanga yomboma molangi wangi." nimba mangilierimu yemo paa kake sepili ulu peangama kinia ulu sumbi nilima kinia mindi selemene ulu-pulumu pelemo yemo molemo mele ono aku siku 'Alieli Pulu Yemonga yomboma manjipu molamili.' ningu ono onono Pulu Yemo siku, ,uluma pali sengendo, ono kake sepili ,molko, ulu peangama kinia ulu sumbi nilima kinia seko, molangi. <sup>16</sup> Akumunga ungu se ,Pulu Yemonga, bokuna molemo, akumu i-sipa:

'Pulu Yemone nimbale:,'

"Na ,ononga, Pulu Yemo kake sepili  
    ulu peangama kinia ulu sumbi nilima kinia mindi  
        sepo molio kene  
ono ,aku siku, 'Nanga yomboma.' ningu  
    konopu kake sepili molko  
        ulu sumbi nili peangama mindi seko molangi."

,nirimu.'

nimba bokuna molemo kanumu pilkuli ,aku siku seko molangi..

*1:17-21*

*'Yomboma Yando Liembo.' Nimba Pulu Yemone Méle Paa Peanga Se Sirimu Ungu  
Se (1:13—2:3 pali)*

<sup>17</sup> Ono "Tata." ningu Pulu Yemo mangilku yu-kinia ungu nilimili yemone yomboma manga imbima pilipale onone ulu selemene naa apurupa pilielemo. Yombomanga yu-meles-meles uluma apurumbando ononga imbima naa pilipale ono pali selu-sipa sumbi sipa apurulimú. Kanu "Tata." nilimili yemo aku sipa yemo molemo kene ma-koleana molkole 'I koleamo olionga sika pulu koleamo mólo. Ya ma-koleana yombo ponengema molemolo.' ningu pilkuli 'Yu ye paa awili olundopamo.' ningu yunga unguma liku awi siku pilku molangi. <sup>18</sup> Yuni ononga nimbale senderimu mele pilkuli aku siku molangi. Ono pilielemene, ononga anda-kolenalima konopu kimbu naa siku walu moloringi mele ono yandopa yandopa aku siku moloringi mele 'Munduku kelko, molko kondonge aulkana pang.' nimba ,Pulu Yemone, lipa tapondopa wendo liltimu akumu 'Wendo liembo.' nimbale kou-sillipa molo kou-gollo sene wendo naa liltimu. <sup>19</sup> Karasinga meme paa méle awili sene ,Pulu Yemone ono lipa tapondopa manda naa moloringi aulkana wendo liltimu,. Karasi yu erili molo úru se paa naa peli kongi sipisipi walo se, yunga mememone aku sipa serimu. <sup>20</sup> Pulu Yemone mulu matolo u naa sepale ,Karasi, aku kongonomo sepili.' nimba, nimba talitorumu yemo, kiniá molkomolo walema, ,Pulu Yemone yomboma kote pilimba walemo, wendo ombá

sekemo walemo-kinia pelemo walemanga yu ononga nimba lipa tapondombando mana mania ombo mona molorumu. <sup>21</sup> Yuni ononga nimba senderimu mele pilkuli 'Yu yombo óno-koleana topa makisindipale 'Yunga imbimu paa ola molopili.' nirimu Pulu Yemo sika.' ningu kuru mondolemele. Aku serimumunga ono 'Pulu Yemo mindi sika.' ningu kuru mondoko, 'Yuni "Pe sembó." nimba, nimba panjerimu mele sika sembá.' ningu konopu siku nokoko molemele.

**1:22-25**

*Olionga Genupilima Paa Sika Konopu Mondamili Ungu Se (1:13—2:3 pali)*

<sup>22</sup> Ono ungu sikama pilku liku sengena panjiku selemene aku ulumuni ononga konopuma kulumiye toringi, konopu kake sepili molemelemonga kolo toko 'Genali konopu mondokomolo.' naa ningu, sika konopu mondolemele kene kiniá genali kinia konopu paa tondolo munduku mondayo. <sup>23</sup> Kere-langi umbuma kaliana mundulimili kinia toko nimba wendo ombo kere-langi konde pulimú mele ono aku sipa mele mélsene kelepa wale talo-sipa merimu-na yombo kondema molemele. Kere-langi umbu manda wendo naa ombo, ombo kiri lepa kololemo umbumuni ono naa merimu. Kere-langi umbu wendo ombo molopa mindi pulimú akumuni ono wale talo-sipa merimu. Aku kere-langi umbumu Pulu Yemonga ungumu; akumu molopa mindi pumba konde mololi ungumu; akumuni ono wale talo-sipa merimu. <sup>24</sup> 'Aku ungumu pora naa nilimú mele ungu se Pulu Yemonga bokuna molemo,' akumu i-sipa: 'Yomboma pali era mele,

ono molko kondolemele pellawa sindi mele.

Erama kololemo kinia

pellawa sindima olé lepa mana mania pulimú

<sup>25</sup> aku-na-kolo Ye-Awilimunga ungumu

alieli lepa mindi pulimú pumbá.'

'nimba aku sipa molemo.' Aku ungumu ono semane peangamo toko siringi kanu ungumu.

## 2

**2:1-3**

*Karasinga Yombo Peangama Molomolondo Semolo Mele Ungu Se (1:13—2:3 pali)*

<sup>1</sup> 'Ono wale talo-sipa merimu konde molemele, kene onone i-siku sangi: We-yomboma seko kinjilimili uluma kinia, konopumane lupa pilku liku kerena lupa kolo toko ningu topele-mapele toli uluma kinia, we-ulü lupa mare seko kolo toli uluma kinia, yomboma méle awisili taltoko molko kondolemele mele kanokole yama mengo konopu kiri panjeli uluma kinia, yombo senga ungu-bulkundu nindeli uluma kinia, ulu-kiri akuma pali munduku kelko toko makoraa. <sup>2-3</sup> Ye-Awilimuni ono kondo kolopa we sepa kondolemo mele kanga-kolte pilkuli pilku peanga pilieringi kene bolango pamema ame paa waka kololemele mele ono aku siku ame peangamo, méle kiri se naa peli ame, kanumu waka kolangi. Kanu amemo kangimunga mólo, minimunga amemo. Bolango pamema ame naa nongole awi naa leko molko kinjilimili mele aku siku ononga minima Pulu Yemonga ungumu naa nonge kinia minima manda naa pepa, tondolo naa pumbá.

**2:4-12**

*Ye-Awilimu Kou Konde Mololi Peangamonga Ungu Se*

<sup>4</sup> Ono Karasi molemona wangi. Yu kou konde mololi mélemo. Yombomane 'Yu kiri.' ningu pilkuli toko makororingi-na-kolo Pulu Yemone yu kanopa 'Paa peanga.' nimba kanopale nimba taltorumu. <sup>5</sup> Ono pea kou konde mololi melema molemele. Ulka mare kouni takolemele mele Pulu Yemone yunga Minimunga ulkamo takondombando ono nimba taltopa ulka takombamonga kou melema nilimú. Ono

Pulu Yemonga popo tondoli yombo kake selima molemele. Popo tondoli yemane Pulu Yemo popo tongendo yuni kanopa peanga pilierimu mélema kalko yu siringi aku siku ono onono Pulu Yemo popo tongendo yu kanopa peanga pilimba mélema siengi. Kanu-kinia, Yesusi Karasini ononga nimba senderimumunga Pulu Yemo méle singíma Pulu Yemo yuni sika kanopa peanga pilipa limba.<sup>6</sup> Akumunga ungu se Pulu Yemonga bokuna molemo kanumu. Akumu i-sipa nilimú:

“Nane kou-mulu paa peanga se,

‘ponga mele polko ‘Ulka enge nipili.’ ningu  
simu mele polangi.’ nimbu, nimbu taltorundu,  
kanu koumu paa olandopa mulu Sayono taltokoro.

Kanu-kinia ‘Yu sika.’ ningu kuru mondonge yombomane  
pipili naa kolko konopu kiri naa panjingi.’

nimba molemo.<sup>7</sup> Ono ‘Karasi sika.’ ningu kuru mondolemele yombomane kanu koumulumu kanoko peanga pilielemene- na-kolo kuru naa mondolemele yombomane yu kanoko kiri pilielemene mele i-sipa:

‘Ulka takoringi yemane kanoko kiri pilku  
toko eltoringi kou kanumu

kiniá kelepa ulka simu mele  
ulka enge sindeli kou awili peangamo.’

nimba molemo.<sup>8</sup> ‘Sika.’ ningu kuru naa mondolemele yombo kanuma kinia, kanu koumu kinia,, i-sipa mele:

“Kanu koumu

yu kou kanga se yombo se kululimú kinia  
koropele topa sepa  
a tondomba selemo kou se mele;

yu kou awili sene

yombo topa mania mundulimú kou se mele.”

nimba molemo. Kanu yomboma Pulu Yemonga ungumu pilku mokoli selemelemonga sepa a tondolemo. Pulu Yemone u aku sipa nimba panjerimu kanumu.

<sup>9</sup> Kanu yomboma-kinia uluma aku sipa wendo olemo,-na-kolo ono ,‘Sika.’ ningu, kuru mondolemele yomboma aku sipa mólo. Ono yuni nimba taltorumu yombo talapemo molko, ye nokoli kingimunga popo tondoli yomboma molko, yunga manjiku molongemonga yombo kake selima molko, paa sika Pulu Yemonga yomboma molemele. Yuni ‘Aku siku molangi.’ nimba ono nimba taltorumumunga pulumu i-sipa: Ono simbulu tolina moloringi kinia Pulu Yemone “Ono simbulu tolina wendo ongo nanga pa seli paa peangamonga sukundu waa.” nirimu, kanu Pulu Yemo yuni ,‘Na molopo kondolio mele kepe sepo peanga selio mele kepe yomboma piliangi, kape ningu semane toko siengi.’ nimba ono ‘Nanga yomboma molangi.’ nimba, nimba taltorumu.<sup>10</sup> Ono u we-yomboma moloringi-na-kolo kiniá ono Pulu Yemonga yombo talapemo molemele. U yombomane seko kinjeringimunga Pulu Yemone kondo kolopa mindili naa lipa sipa siye kololi ulu se ono-kinia naa perimu-na-kolo pe yuni kondo kolopa ulu-pulu-kirima we siye kololi ulumu sirimu liltangi, kiniá ono-kinia pelemo.

2:11—3:22

## Olio Ultu Molemele Yomboma Molongena Sumbi Sipu Andopo Molamili Ungu Se

<sup>11</sup> Nanga pulu lemó yomboma, nane ono tondolo mundupu mawa sepole ya makoleana ono yombo ombo gilielima mele, yombo ponenge mele molemelemonga ononga kangimane ‘ulu-kirima samili.’ nilimili mele paa liku bulu siengi. Kangina u-we-konopu pelemo konopumane yakala kololemo ulumane ononga minima ‘Topo mania mundamili.’ ningu alieli minima kinia opa selemele.<sup>12</sup> Ono ultukundu

yomboma molongena ulu peangama mindi seko sumbi siku molangi. Ultu yombo-mane kiniá sika onondo "Seko kinjilimili yomboma molemele." ningu ungu-bulkundu nindilimili-na-kolo 'Olime ulu peangama semolo kinia kanokole pe Pulu Yemo yomboma molongena ombá walemonga kanu yombomane Pulu Yemonga imbimu ambolko paka tondangi.' ningu aku siku ulu peangama seko sumbi siku molangi.

**2:13—3:7**

*Yomboma Lipu Awi Simulúmunga Ungu Mare*

**2:13-17**

*Olio Nokolemele Yombo Nokoli Awilima Lipu Awi Siemili Ungu Se*

**13-14** 'Ye-Awylimunga imbimu ola molopili.' ningu gapomano yemanga pali unguma liku awi siku pilku molangi. Ye nokoli kumbina kingimu kinia kepe, gapomano poraminisamo kinia peremiamo molo gaponamo kinia kingimuni nimba taltopa "Seko kinjilimili yomboma 'Mindili nangi.' ningu, seko kondolemele yombomanga imbima ambolko paka tondoko kape niengi pang." nimba koleamanga lipa mundulimúma kepe, kanu ye awylimanga pali unguma liku awi siku pilku molangi. **15** Ono 'Karasina yomboma, kinia mumindili kolko seko kinjilimili yombo aromamane, 'Onone seko kinjikimili.' ningí, ungu se naa pepili.' nimba Pulu Yemone 'Ono 'Karasina yomboma, ulu peangama mindi seko molangi.' konopu lemó, akumunga, 'ye awylimanga ungumaaku siku pilku molangi.' **16** Ungu-mane sene nokopa ka naa silimú yomboma we molemele mele onoaku siku andoko molangi. Aku-sipa na-kolo 'Ungu-mane sene olio naa nokolemomonga ulu-kirima semulu liemu unguri mólo.' ningu ulu-kirima andoko naa sangi. 'Olio Pulu Yemonga kongono kendemande yomboma.' ningu yunga kongono kendemande yombomane selemele mele seko molangi. **17** Ono 'pepá topo sikiru yomboma, ne yomboma pali seko kondoko, unguma liku awi siengi. 'Sika.' ningu kuru mondolemele genalima konopu mondoko, Pulu Yemo pipili kolko liku awi siku, ye nokoli kingimunga imbimu ambolko paka tondangi.

**2:18-25**

*Pulu Yemonga Kongonomo Sendepole Mindili Nomolomonga Ungu Se (2:13—3:7 pali)*

**18** Ono méle kalolima naa liku kongono we sendeli yomboma, ononga nokoli yombomane ungu ningíma taka leko pilku liku awi siku molangi. 'Ono-kinia mumindili naa kolko taka leko nokolemele tapu-yombomanga unguma manjiku pilku liku sangi.' nimbu naa nikiru. 'Ono mindili siku seko kinjilimili tapu-yombomane ningí unguma kepe pilku liku sangi.' nimbu nikiru. **19** Aku nikirumu i-sipu pilipuli nikiru. Pulu Yemonga unguma pilku likuli seko kondonge kinia yombomane onoseko kinjiku seko mindili kondongi liemu 'Manda, mindili nomolo kinia manda-na-kolo sepo naa kinjipu Pulu Yemonga ungu olandopamo kumbi lepo pilipu semolo.' ningí kinia Pulu Yemone konopu simba. **20** Seko kinjingimunga mane siku seko mindili kondonge kinia konopu tondolo pupili molkole 'Manda, olio sepo kinjemulumunga papu mindili sikimili kene we mindili namili.' ningí kinia yombomane ono kape ningí kinia mandaye? Manda mólo. Papu mindili nonge. Aku-sipa na-kolo seko kondongemonga mindili singí kinia we mindili nongo pundu tou naa toko we siye kolongi liemu peanga. Aku senge kinia Pulu Yemone kanopa peanga pilipale onosepa kondomba. **21** Ono mindili nangi.' nimba Pulu Yemone 'Ono nanga kongonomo sendangi waa.' nimba ono mangilierimu. Karasi yu Pulu Yemone "Sei." nirimu mele sembando ononga nimba mindili nondorumu kanu ulumu onoaku siku manda manjiku senge mele lipa ora sirimu. 'Akumunga, Pulu Yemone "Saa." nirimu nilimú ulu akuma 'Samili.' ninguli sengendo mindili nongi liemu manda.'

<sup>22</sup> „Karasi yu sepa molorumu mele Pulu Yemonga bokuna ungu se i-sipa nimba molemo: „

‘Yuni ulu-pulu-kiri se naa serimu.

Yuni waltikele kepe kolo topa ungu se  
paa naa nirimu pilieringi.’

„nimba molemo kanumu., <sup>23</sup> Yu ungu-taka tondoko iri toko seringi kinia yuni onondo ungu se pundu topa naa nirimu. Onone yu we mindili siringi-na-ku yu ‘We mindili nambo.’ nimba ungu se naa nirimu. ‘Kote pilipa uluma pali sumbi sipa apurulimú Yemone yu seko kinjeringi yombomanga kote sendemba.’ nimba pilipa onone yu seringi mele siye kolorumu. <sup>24</sup> Yuni olianga ulu-pulu-kirima ‘Nangama.’ nimbale akuma yuyu memba unju-perana kolorumu. Aku serimumunga pulumu i-sipa: ‘Yombo se kololemo kinia kelepa mana uluma manda naa selemo aku sipa mele, olio yombo kololima mele molopole ulu-pulu-kirima semolo aulka se naa liepili. Kamu mundupu kelepo naa samili. ‘Pulu Yemone ulu sumbi nili nimba kanolemo uluma mindi semolondo yombo kondema molamili. Kanu uluma mindi samili.’ nimbu konopu kimbu sipu molamili.’ nimba yuni aku serimu. Yombomane yu toringimunga ono konde purungi. <sup>25</sup> Kongi sipisipi aulka lo limili mele ono aku siku aulka lo liltingi, aku-na-ku pe kiniá kelko ononga minima nokopa tapu selemo ye „Karasi, mu molemona yando oringi molemele.

### 3

3:1-7

#### *Ambo Yemanga Ungu Se (2:13—3:7 pali)*

<sup>1-2</sup> „Karasinga yombomane gapomano yombo awilimanga unguma pilku liku awi siku molko, kendemande- yombomane ononga yombo awilimanga unguma pilku ono liku awi siku molangi. Karasi yuni yuyu sepa molorumu mele pilkuli aku siku sangi.’ nikiru, aku siku mele amboma ono ononga yemanga unguma pilku ono liku awi siku molangi. ‘Amboma ononga ye mare Pulu Yemonga ungumu pilku naa limilimane ononga ambomane ulu peanga sumbi nilima mindi seko, yemane ungu ningíma mimi siku pilku taka leko molonge mele kanokole konopu topele toko ‘Pulu Yemonga yema molamili.’ niengi.’ ninguli ono amboma aku siku seko molangi. <sup>3</sup> Olio ambo peangama kanoko niengi.’ ningu kangikundu ‘mindi, au siku pengema lapisa mengo, kou-gollone seli méle peangama nomina leko ononga mulu-wambalemanga moko toko mondoko, mulu-maminia peanga kou awili pulimúma pakoko, naa sangi. <sup>4</sup> ‘Olio ambo peangama kanoko niengi.’ ninguli, méle paa peanga, kiri naa lebamane ononga konopumanga sukundu au siengi. Aku mélema ono konopu peanga pepa, konopu seluna pupili taka leko molonge ulumu. Aku ulumu kanopale Pulu Yemone ‘Méle paa peanga olandopamo.’ nimba kanolemo. <sup>5</sup> Koronga-u moloringi ambo marene ‘Pulu Yemone olio-kinia “Sembó.” nilimú mele sika sembá.’ ningu pilku nokoko moloringi ambo kake selimane ‘Olio au niemili.’ ninguliaku siku moloringi kene pilkuli aku siku molangi. Kanu ambomane ononga yemanga unguma pilku ono liku awi siku moloringi kanumu. <sup>6</sup> Ambo Serane ye Eporayamonga unguma pilipa lipa, yundu ‘Nanga nokoli ye awilimu.’ nirimu kanumu. Ono ambomane aku siku ‘ononga yema kinia, ulu peangama seko mélse pipili naa kolongi liemu ono Seranga lemenupili molemele.

<sup>7</sup> Yema, ono aku siku ononga amboma kinia molongendo ‘Amboma molko kondangi.’ ningu ono konopumanga mimi siku pilku molko, ambomanga kangima enge se naa pelemo kene ono yemane amboma liku tapondangi. ‘Pulu Yemone, molopa kondopa mindi puli ulu-pulumu ono yema mindi naa simba. Amboma simbala.’ ningu pilkuli amboma-kinia aku siku seko molangi. Ono yemane ‘Pulu

Yemo kinia ungu nimbu méle mare mawa semolo kinia ulu sene olionga unguma pipi naa sipili.' ningu ononga amboma-kinia aku siku sangi.

*3:8-12*

*Olio Konopu Seluna Pupili Molamili Ungu Se (3:8—4:1 pali)*

<sup>8</sup> I pepá tokoromo topo pora siembo, ungu se pea kamu niembo.  
Ono ononga konopuma 'Seluna pupili seluna  
sere lepo taka lepo molamili.' ningu,  
kandi-genupilimane anju yando kondo kolko  
konopu mondolemele mele aku siku onone  
anju yando 'Karasinga yomboma, 'Olionga genupili.' ningu  
kondo kolko, konopu mondoko, liku tapondoko,  
'Ono imbi ola mele molopili, olio imbi mania mele molopili.'  
ningu taka leko yombomanga unguma pilku molangi.

<sup>9</sup> Yando ono-kinia seko kinjingí kinia  
anju pundu toko seko naa kinjangi.  
Yando iri toko ungu kiri se ningí kinia  
anju pundu toko iri toko ungu kiri se ningu naa sangi.  
Yando ono seko kinjingí kinia  
anju 'Sepo kondopo lipu tapondamili.' ningu  
'Pulu Yemone nono sepa kondopa,  
'Ono konopu siku molko kondangi.' nipili.' ningu  
Pulu Yemo ononga ningu mawa sendangi.

U Pulu Yemone "Ono lipu tapondopo sepo kondambo waa." nirimu kene onone aku siku yomboma liku tapondoko seko kondaa. <sup>10</sup> Aku nikiru ungumunga ungu se 'Pulu Yemonga bokuna molemo mele, i-sipa:  
'Yombo sene 'Na manda molopo,

konopu sipu molambo.' nimbale  
yu 'Ungu kiri se naa nimbu,  
kolo naa tambo.' nimba  
yunga keremo nokopilila.

<sup>11</sup> Ulu-pulu-kirima mundupa kelepa bulu sipa  
ulu peangama sepilila.

'Yomboma-kinia  
konopu seluna puli ulu-pulumu pepili.' nimba  
aku ulumu tondolo mundupa koropa  
andopa molopale lipilila.

<sup>12</sup> Aku ulu peangama nambi semu-na aku sipa sepiliye?  
Akumunga pulumu niembo.

Ye-Awilimuni yombo ulu sumbi nilima  
seko molemele yomboma kanopa peanga pilipa,  
onone yu mawa seko ningí unguma  
alieli komu sendepa molemo,  
aku-na-kolo ulu-kirima selemele yomboma  
lipa bulu silimú kene  
yuní aku sipa sepili.'  
nimba bokuna molemo kanumu.

*3:13-17, 4:1*

*Karasi Ambololemele Yomboma Mindili Nonge Ungu Se (3:8—4:1 pali)*

<sup>13</sup> Ungu peangama manjipu samili.' ningu molonge kinia nawene ono mindili  
lipa simbaye? 'Yombo se mólo kanumu.' <sup>14</sup> Molo ulu sumbi nilima senge kinia

kanumanga sika mindili nongo molongi liemu ono Pulu Yemone "Aku siku molongi kene konopu peanga pepili molko kondangi." nimbá. Yombomane ono seko pipili kondonge senyi liemu ono pipili naa kolko ono konopu umbuna sepili naa molaa.<sup>15</sup> Ononga konopumanga 'Karasi yu manjipa molopa, yunga ungumu manjipu pilipu lipu sepo molamili.' ningu 'Yu mindi olianga Ye-Awilimu molopili.' ningu 'yu mindi pipili kolaa.' Kanu-kinia ono aku siku seko wale peanga wendo ombá walemo nokoko molonge kinia yombo sene kanopale, "Ono aku siku nambi semu-na seko molemeleye?" nimba mangilipa piliemu liemu onone anju ungu se pundu toko ononga ulu selemelemanga puluma ningu singí mele liku sumbi siku mola. Aku-sipa na-kolo puluma ningu singíndu ungu tondolo munduku ningu seko pipili naa kondokole taka leko ningu liku sumbi siee.<sup>16</sup> Ononga konopumanga 'Ulu-kiri se paa naa pepili.' nieyo. Pe ono Karasi pilku ambolkole molko peanga selemele mele kanu ulumunga yombomane "Ono seko kinjilimili." kolo toko ningu ononga ungu-bulkundu nindingí kinia ono ulu-kiri se naa pepili molonge-na kanu yomboma pipili kolonge.

<sup>17</sup> Pulu Yemone 'Olio mindili nangi.' nimbámonga ulu peanga se sepole mindili nomulu liemu papu; olio ulu-kirma sepole mindili nomulu liemu kiri; aku kene ,aku siku konopu peanga pepili molangi.

3:18—4:1

*Karasini Olio Pe Mindili Nombo Molopo Kinjilimolá Aulkana Wendo Limbando Yu Kolopa Lomboropa Ola Molorumu Ungu Se (3:8—4:1 pali)*

<sup>18</sup> Karasi ,ye peanga se molopale mindili norumu mele, piliangila. Yu ye sumbi nílimu molopale, ulu-kiri seli yombomanga kolali sepa kolondorumu kanumu.

'Ononga ulu-pulu-kirma pali kamu mania pupili. Ono Pulu Yemo molemona pungu konopu seluna pupili seluna manda molangi.' nimba Karasi waltikele kolondorumu. Pe ,yu yuyu molo yombo se lupa, ulu-pulu-kirimanga nimba kelepa wale talo-sipa kolondomba aulka se paa naa lemó naa lemba. Yunga kangimu toko kondoringi kolorumu-na-kolo pe yunga minimuni yu lomboropa ola molopa mulukoleana pumba molorumu mele molemo.<sup>19</sup> Yunga mini akumu ,kangi kolopa liepili, ,yombo koloringimanga, minima ka-ulcana moloringina pumba unguma nimba sirimu.<sup>20</sup> Kanu minima u Noa molorumu kinia Pulu Yemonga ungu nirimuma naa pilku, liku bulu siku moloringi ,yombomanga minima. ,Yomboma ulu-kiri awisili seringi-na-kolo, Pulu Yemone lisipa pundu naa torumu. Noane nona ola lemba sipimu sepa wamopa molopili , 'Yomboma u naa tambo.' nimba, taka lepa nokopa molorumu. ,Pe Noane sipimu sepa pora sirimu kinia Pulu Yemone 'No topa yomboma topa kondopili.' nirimu kinia, yombo engaki mindi none naa torumu. Aku yombo pokore mindi Pulu Yemone 'Naa kolko konde pangí ,kene sipina sukundu pangí.' nimba lipa tapondopa nona wendo liltimu.<sup>21</sup> Kanu ,nona 'yombo engaki naa kolangi.' nimba, lipa tapondopa wendo liltimu kanu nomone kiniá no limili ulupulumu lipa ora silimú. No limili nomone kangikundu unguri naa sepa, kangina kalaro molemoma kulumiye topa wendo naa lindilimú. No limilimuni ono i-siku nilimili: "Pulu Yemo, no likiru kanou. No likiru aku ulumuni na konopuna ulu-kiri se naa pelemo. Nu mawa sepo 'Nanga konopu kamu peanga pepili kene liku tapondou.' nikiru." nilimili mele Pulu Yemone Noa wendo liltimu nomone lipa ora silimú. Pulu Yemone Yesusi Karasi yombo-óno-koleana topa makisinderimumunga no limilimuni ono lipa tapondopa mindili nolemolá aulkana wendo lipa yu-kinia pea molko kondonge aulkana lipa mondolemo.<sup>22</sup> Aku yemo yu ,lomboropa ola molopale, mulukoleana purumu, kiniá yu ,imbi ola molopili, Pulu Yemonga ki-lomekondo molopa, mulukoleana angelloma kepe, mana-yombo awilima kepe, kuru enge nili awilima kepe, akumanga pali yu ye awilimu molopa nokolemo.

*Kolomongo-Awili 4-5tolo*

## **Karasinga Yomboma Kinia Manda Manjeli Umbuna Awili Se Wendo Orumu Kinia Paa Mindili Noringi Ungu Se**

### **4**

*4:1-11*

*Pulu Yemonga Yomboma Mindi Molamili Ungu Se 4:1-6 U-Konopu-Kirimunga  
Unguma Pilipu Serimulu Mele Mundupu Keleamili Ungu Se*

<sup>1</sup> Akumunga, Karasi yunga kangina mindili nombale ‘Unguri mólo.’ nimba, siye kolorumu mele pilkuli ono kepe yuni konopumuni pilipa molorumu mele sangi. Yombo sene yunga kangina mindili nomba umbuna melemó yombomo ulu-pulu-kirima mundupa kelepa, kelepa naa selemo kene yuni konopumuni pilipa molorumu mele sangi. <sup>2</sup> Aku sepale kanu yombomone yu naa kolopa, kangimu kinia we molopale yunga konopu-umuni yakala kololemo ulu-kirima naa selemo. Yu Pulu Yemone “Seni kinia peanga.” nilimú uluma mindi ‘Sambo.’ nimba selemo. <sup>3</sup> Ultu molemele yombomane pilku selememele mele ono Karasinga yombomane u aku siku serengi. Aku uluma wale paa awisili u seko moloringi mele manda seko, munduku keleangi. ‘Aku uluma i-sipa:’

Amboma kinia yema kinia andoko wapora toko  
ulu-kirinale seko kinjilimili ulumu kinia;  
ulu-kirima sengendo yakala kololemele ulumu kinia;  
no nongoamu tolemele ulumu kinia;  
liku maku toko no enge nili awisili nongo  
amu toko ulu kiri awisili selememele ulumu kinia;  
‘Pulu Yemone ungu-mane nimba panjerimuma liku bulu siku,  
Pulu Yemone paa kanopa kiri pilipa  
‘Kalaro mololi uluma.’ nimba kanolemo uluma sengendo  
we-mélema liku anjiku ‘olio nokolemele pulu yema’ ningu  
popo toko kape nilimili ulumu kinia;  
ultukundu yombomane aku siku uluma selememele mele onone u aku siku wale awisili serengi. <sup>4</sup> Kiniá ono ultukundu yomboma kinia seluna molko kanu ulu-pulu-kiri awisili yakala kolko selememele mele naa seko molemelemonga kanokole ultukundu yombomane ‘U serengi mele naa selememele.’ ningu pungu-pungu ningu ono iri toko ungu-taka tondolemele. <sup>5</sup> Aku-sipa na-kolo konde molemele yombomanga kepe kololemele yombomanga kepe pe walte kote pilipa, onone ulu selememele apurumbando molemo yemo kote pilimbando molombana gilingí, yuni aku siku seko kinjilimili yombomando “Nambi semu-na aku uluma seringiye?” nimbá kinia onone ulu selememele yundu paa sika ningu singí. <sup>6</sup> Semane peangamo u koloringi yomboma kepe toko siringila, akumunga pulumu i-sipa: U-pulu-pulu yombotolone Pulu Yemonga ungumu pilku mokoli seko ulu-pulu-kiri seringili kinia Pulu Yemone yomboma pali “Mongo likimili kene mindili nangi.” nimbándo “Kololi ulu-pulumu yomboma-kinia pepili.” nirimu-na kololemele. Sika Pulu Yemone kanu “Mindili nangi.” nirimumunga yomboma kangina koloringi-na-kolo ‘Pulu Yemonga ungumu pilku liku, kangina kolkole Pulu Yemo konde molopa mindi pulimú mele yomboma ononga minima molko mindi pungí. ‘Akumu piliangi.’ ningu u koloringi yomboma kepe semane peangamo toko siringi.

*4:7-11*

*Mulu Matolo Pora Nimbá Walemo Wendo Ombá Sekemomonga Karasi Amabololemele Yomboma Seko Molonge Mele Ungu Se (4:1-11 pali)*

<sup>7</sup> Mana-mélema pali pora nimbá walemo nondopa wendo ombá sekemo. Nondopa wendo ombá sekemo kene

ono umbu-konopu pepili molko kondoko, Pulu Yemo-kinia ungu ningu molangi.

<sup>8</sup> Aku-sipa na-koło aku ulumanga ulu olandopa se ono onono anju yando tondolo munduku konopu mondoko molayo. Yombo sene yombo se konopu mondolemo kinia yu konopu mondolemo yombomone yu-kinia wale marenga sepa kinjimba kinia yuni 'Pundu tambo.' naa nimba we mundupa kelemba kene yomboma paa lakoko konopu mondaa.

<sup>9</sup> Ononga yombo se ononga ulka senga ombá kinia ono ulka pulu yombomane konopu kiri naa panjiku yu "Molamili ou." ningu nokoko kondaa.

<sup>10</sup> „Pulu Yemone, 'Kongonoma seko kondangi.' nimba ono yu-meletele we kondo kolopa tondolo lupa lupama moke sepa we silimú kanu tondolomane ono anju yando liku tapondoko molaa. Pulu Yemone kongono kendemande sendeli yombo peangama molkole aku siku saa.

<sup>11</sup> Yombo sene ungu nimba simba liemu Pulu Yemonga unguma mindi nimba sindepili. Yombo sene yombo marenga kongono sendemba liemu Pulu Yemone enge silimú engemone mindi sendepili.

'Ulu semoloma pali yombomane kanokole Pulu Yemo kape ningu yunga imbi ambolko paka tondangi.' ningu Yesusi Karasi pea kopu seko molkole aku uluma saa.

„Yomboma kinia mélema kinia pali,

yu imbi kamu alieli-alieli ola molopa mindi pumba,  
yunga tondolomo alieli pepa mindi pupili molemo.

Aku sipa sika sepili.

**4:12-19**

### *Karasinga Yomboma Molopole Mindili Nomolo Kinia 'Unguri Mólo.' Niemili UNGU Se*

<sup>12</sup> Paa nanga ango-keme, ono manda manjilimú ulu umbuna sene, sepe mele, ono mindili silimú akumu 'I ulumu nambi semu-na wendo ole moye? Olio Pulu Yemonga yomboma molemolo kanumu.' ningu konopu kimbu naa siengi. <sup>13</sup> Karasi mindili norumu mele olio mindili nolemolomonga papu mindili nolemolo.' ningu konopu siengi. 'Yunga tondolo pa sélimu kinia imbi ola molopili ombá kinia olio konopu sipu kamelé peanga panjimulú.' ninguaku siku konopu siku we mindili nongo molangi. <sup>14</sup> Ono Karasinga yomboma molemelemonga ungu-taka tondongi liemu peanga. Pa tondolo sepa peli Minimu, yu Pulu Yemonga Mini kanumu, ono-kinia molemomonga ono Pulu Yemone "Aku siku molongi kene konopu peanga pepili molko kondangi." nimbá. <sup>15</sup> Ono mindili nongi liemu yombo toko kondonge molo mélse wa lingí molo gapomanomonga ungu-mane lupa lupama pulua toko ulu se seko kinjingí molo yombo senga kongono selemomo seko sembambu singímunga mindili naa nangi. <sup>16</sup> Aku-sipa na-koło ono mindili singí yomboma molemelemonga mindili nongi liemu pipili naa kolangi. Ono 'Karasinga yomboma molemele.' ningu pilku Pulu Yemo kape ningu imbi ambolko paka tondangi. <sup>17</sup> Pulu Yemone yomboma kote sendembando yunga yomboma kumbi lepa kote sendemba walemo u wendo ombo pelemo kene, 'konopu siku mindili nongo molangi.. Pe, „Pulu Yemone, olio aku sipa kumbi lepa kote sendepale 'Aku siku mindili nangi.' nimu liemu Pulu Yemonga semane peangamo liku bulu silimili yomboma kote pilipale nambi sembaye? 'Aku yomboma 'Mindili awili seko nangi.' nimbá lémo..」 <sup>18</sup> „Aku nikirumunga ungu se Pulu Yemonga bokuna molemo. Akumuni nimbale:」

"Yombo konopu sumbi sipa pepili molemelema

mindili nolemolá aulkana wendo ongo

molko kondonge aulkana pungíndu

aku siku kála sengi liemu

Pulu Yemo liku bulu siku  
 ulu-pulu-kirima selemele yomboma  
 nambi seko aulka kirina wendo ongeye?

„Ono aulka kirina pungu  
 mindili awili seko nonge.“

„nimba molemo kanumu.“<sup>19</sup> Akumunga, Pulu Yemone ‘Mindili nangi.’ nilimúmunga mindili nolemele yombomane ‘Mulu matolo kinia olio yomboma kinia sepa wamoramu Pulu Yemone “Sembó.” nimba, nimba panjilimú mele sika sepa, alieli olio nokopa kondopa siye naa kololemo.’ ninguli ononga konopu kangima kinia pali ‘Pulu Yemone nokopili.’ ningu yu siku, ulu peangama mindi seko molangi.

## 5

5:1-5

*Karasinga Talapena Yombomanga Tapu-Yema Kinia Kango-Yema Kinia Ononga Ungu Se*

<sup>1</sup> Ono-kinia molemele tapu-yema, ono tapu-ye molemele mele na kepe aku sipu tapu-yemola molio, na Karasi mindili norumu kinia kanorundu yemo, na „Pulu Yemonga mulu-koleana, tondolo pa seli nondopa mona lemba ulumu „Karasinga yomboma, kinia pea limulú ye sela, nane ono-kinia molemele tapu-yemando paa tondolo mundupu mawa sepo nimbili: <sup>2</sup> Pulu Yemonga sipisipi ono nokolemelema mimi siku tapu seko nokangi. „Pulu Yemone, i kongono ‘Ono sangi.’ nimba sirimu akumu ‘Saa.’ nikimu kene samili.’ ningu konopu kiri panjiku we naa sangi. Konopu pe nipili sangi. „Pulu Yemone ‘Sangi.’ nirimu, kongono akumu ‘Kou-mone limulú.’ ningu naa sangi. ‘Yomboma paa lipu tapondopo nokamili.’ ningu paa konopu siku sangi. <sup>3</sup> „Pulu Yemone, “Ono nokangi.” nimba sirimu yomboma ‘Maniandopa molangi. Olionga imbima paa olandopa molopili.’ ningu ono mindili siku naa nokoko molangi. Ono nokolemele sipisipima molonge mele ono tapu-yema aku siku ulu peangama mindi seko molangi. ‘Onone kanokole manda manjiku sangi.’ ningu aku siku seko molaa. <sup>4</sup> „Sipisipima aku siku nokoko molonge kinia, Sipisipi Tapu-Ye Awilimu ombá kinia ono méle tondolo pa seli paa peangamo, alieli kiri naa lepa, we lepa mindi pumbá méle kalólimu lingí.

<sup>5</sup> Kango-yema, aku siku mele ono ye yumanga unguma taka leko pilku ono liku awi siengi.

5:5-11

*Nuni Nunu ‘Imbi Naa Mololi Yombomo Mele Molambo.’ Ningu Molani Ungu Se*

„Pulu Yemonga bokuna ungu se nimba molemo akumu i-sipa:“

“Na ye awilimu molio.

Na pilipa kondoli pelemo yemo.

Yombo lupama tondolo se naa pelemo.”

ningu kara pungu ononga imbima

we ambolko paka tolemele yomboma

Pulu Yemone ‘Nanga opa-touma.’ nimba

topa mania mundulimú,

aku-na-kolo yombo onono

“Na imbi naa molemo yombo kirimu.

Yombo lupama pilipa kondolimu pelemomonga

ononga unguma taka lepo pilipu molambo.”

nilimili yomboma

yuni we kondo kolopa sepa kondolemo.”

Aku sipa nimba molemo kene ono onono pali anju yando “Olio imbi naa molemo. Yomboma pilipu taka lepo molamili.” nieyo. <sup>6</sup> Aku sipa ungu se molemo kene ‘Pulu Yemo yu paa tondolo pepili yomboma nokolemo.’ ningu onone “Na ye awilimu naa molambo. Na imbi naa molopili.” ningu ono onono imbi toko mania munduku taka leko molaa. ‘Aku sipu semolo kinia yuyu pilimba wale senga olionga imbima ambolopa paka tondomba.’ ningu aku siku saa. <sup>7</sup> Yuni ono kondo kolopa nokopa molemo kene yu molemona pungu ononga konopumanga umbuna pembama kinia mini-wale pumbáma yundu ningu para siee.

<sup>8</sup> Ono umbu-konopu pepili molko, alieli kanoko kondoko molaa. Lopa-posi llayono gele kolopale kongi se topa nombando andolemo mele aku sipa ononga opa-tou ‘kurumanga nokoli, depelemone ‘Na yomboma ambolopo sepo kinjambo.’ nimba aku sembando andopa molemo kene aku siku molaa. <sup>9</sup> Pulu Yemone na alieli nokopa kondolemo. Pe kiniá kepe yuni na mundupa naa kelembala.’ ningu kuru mondoko molkole ‘Depelemo nanga opa-toumu, yuni na naa ambolopili.’ ningu yunga ungumu naa pilku, mokoli seko, yu toko anjupa anjaa. Ono pilkuli ‘Ya olio konopumanga umbuna sepili molemolo mele we ma-koleana pali molemele yombo olionga genupilima aku siku umbuna sepili molemelela.’ ningu pilkuli depelemo-kinia aku siku saa.

<sup>10</sup> Kanu-kinia, ono wale kanga-kolte umbuna sepili molonge kinia Pulu Yemo yuni yuyu ono kelepa sukundu lipa anjipa, ‘Ono „nanga yomboma molemele mele, munduku naa kelko tondolo pupili molangi.’ nimba. Pulu Yemo ono we kondo kolopale yuni pe ono yu pea ‘Kamu alieli-alieli tondolo pa sepa mindi púlimu kinia molio koleana pea molamili wang.’ nimba ya mana maniendo sirimu ye nokoli Karasi kanumuni olionga nimba senderimumunga Pulu Yemone oliondo aku sipa manda nimba. <sup>11</sup> ‘Yomboma kinia mélema kinia pali, Pulu Yemo yuyu mindi kamu alieli-alieli tondolo pumba imbi ola molopa mindi pupili molemo. Aku sipa sika sepili.

5:12-14

### *Pepá Topa Pora Simbando Unzu Kanga Mare Kamu Torumu Unguma*

<sup>12</sup> I pepá ponjili topo sikirumu Saillasini tondokomo. ‘Yu kongonoma siye naa kolopa paa tondolo mundupa selemo genumu.’ nimbu pilipu molio. I pepá tokoromo ‘Pulu Yemone yomboma we kondo kolopale lipa tapondolemo mele piliangi.’ nimbu tokoro. Pulu Yemone yomboma paa sika we kondo kolopa konopu mondolemomondo nikiru akumu ‘Paa sika.’ ningu kuru mondolemele mele munduku naa kelko, tondolo munduku molangi.

<sup>13</sup> Karasinga yombo talape ‘kolea-awili, Bepillono molemelema, kanu yomboma-kinia ono ‘pepá topo sikiru, yomboma kinia Pulu Yemone u ‘Nanga yomboma molangi.’ nimba, nimba talitorumu, kanu Bepillono yombomane “Ono manda molemeleye?” ningu, ningu mundukumili.

Nanga malo Makone “Ono manda molemeleye?” nimba, nimba mundukumula.

<sup>14</sup> Ono onono anju yando kondo kolko kangulku “Manda molemeleye?” niengi.

Ono Karasi kinia kopu seko molemele yomboma pali konopu pe nipili taka leko molangi.

‘Aku pea nikiru..’

## PE-PITA PITAné Pepá PE Topa Mundorumu Bokumu

*Pitane I Pepá Topa Mundorumumunga Ungu-Pulu Mare*

**Pita** yuyu yunga ungu se inia yakondo gomo 1143 molemo.

**Pitane** konopumuni pilipale pepá se u topo mundorumumu kinia i pepá pe topa mundorumu akutolonga pulumu inia **Pe-Pita** 3:1 molemo. "Ulu peanga kake selima mindi konopu kimbu siengi.' nimbu i pepá talo topo sikiru." nirimu. Aku-sipa na-kolo "Pepá se u topo mundorundu." nirimu bokumu olio "**U-Pita**" nilimulu bokumu molo se lupanje, mimi sipu naa pilielemolo.

**I pepámonga ungu-pulumu i-sipa mele:** 'Ungu kolo tolima mane silimili yemane 'Karasinga yomboma 'Sika.' ningu kuru mondolemele ulumu kinia molko kondolemele ulumu kinia sepo kinjipu, topo mania mundamili.' ningu andoko selememele yemanga unguma Karasinga yombomane paa naa piliangi. Yesusini "Nanga kongonomo sende-paa." nimba lipa mundorumu yemane ningu siringi unguma mindi 'Sika.' ningu kuru mondangi. Aku siku senge ulumuni Pulu Yemo kinia Ye-Awili Yesusi Karasitolo molembele mele paa pilingí. Yesusini u lipa mundorumu yemane Yesusi yu mongone kanoko, yu-kinia andoko, yuni ono mane sirimu unguma sumbi siku pilieringi.' nimba pepá torumu.

**Ungu se:** Yesusi olionga Lipa Tapondopa Mindili Nolemolá Aulkana Wendo Lili Yemo wale awisili nirimu akumu 1:1,11, 2:20, 3:1-2,18 molopa, aku mele ungu se 3:15 molemo. Aku ungumunga ungu-pulumu boku ambolkonomonga pealemekondo "**21. kisim bek**", "**21.3. Man Bilong Kisim Bek Yumi**".

**Ungu se:** Yombo marene ninguli: "Yesusi kelepa naa ombá." niringi. Aku-na-kolo i pepámone nimbale: "Sika yu welea naa olemo, aku-na-kolo Pulu Yemone 'Yombo selu kepe kolea-kirina naa pupili. Konopu topele tangi.' nimba taka lepa nokopa molemomonga Yesusi welea naa olemo." nilimú (3:9).

**Pe-Pita** kolomongo-awili 2 kinia Jutu kolomongo 4-18 kinia ungu awisili paa selu-sipa mele molemo.

Ya ungu-pulumu pora nikimu.

*Kolomongo-Awili 1-3pali*

**Olio Ulu Peangama Mindi Tondolo Mundupu Sepo  
Molamili. Ye Kirimane Mane Silimili Unguma Paa Naa  
Pilipu, Bulu Siemili Ungu Mare**

1:1-2

*Pitane Pepámo Tombando Pulu Polopa Torumu Ungumu*

<sup>1</sup> Na Saimono Pita, Yesusi Karasini "Nanga kongonomo sende-pu." nimba lipa mundorumu yemo, na yunga kongono sendeli kendemande yemo molopole ,i pepámo topo sikiru,.

Olionga Pulu Yemo, olionga Lipa Tapondopa Mindili Nolemolá Aulkana Wendo Lili Ye Yesusi, „Pulu Yemone "Simbu." nimba mana lipa mundorumu ye, Karasimu, yuni uluma sumbi sipa selemomonga olio 'Sika.' nimbu kuru mondolemolo ungu peangamo ono aku siku 'Sika.' ningu kuru mondolemele yomboma, ono i pepámo topo sikiru.

<sup>2</sup> Pulu Yemo kinia olionga Ye-Awili Yesusitolo pilku imbi silimilimunga olone ono paa we kondo kolko seko kondolembele mele kinia, 'Ono konopu pe nipili taka leko molangi.' nilimbilí mele kinia olandopa olandopa pupili.

**1:3-15**

*Pulu Yemone Olio Nimba Taltopa "Nanga Yomboma Molangi Waa." Nirimu Ungumu 'Paa Mania Naa Pupili.' Niemili Ungu Se*

<sup>3</sup> Pulu Yemonga tondolomo Yesusi-kinia pelemo, aku tondolomone olio molopo kondopo Pulu Yemonga unguma mindi pilipu lipu semolo ulu-pulumu sirimu. Tondolo pa sélimu pepa, ulu peangamanga pulumu pelemo yemone olio "Nanga yomboma molangi waa." nimba mangilierimu yemo pilipu imbi silimulumunga yunga tondolomone aku sipa ulu-pulumu sirimu. <sup>4</sup> Aku sipa molopa aku serimumunga yunga mélema olio 'Simbu.' nimba u nimba panjerimu méle paa tondolo puli peangama sirimu. ' "Simbu." nimbu, nimbu panjerindu mélema simbú ono-kinia pemba kinia Pulu Yemo yu molemo mele ulu-pulumu ono-kinia pepili molko; manayombomanga konopumane mélema kanoko konopu mondoko paa molko kinjiku, ulukiri selemele uluma ono 'Pulu Yemonga yomboma, aku siku seko molko naa kinjangi. 'Aku sili ulu-kirima liku bulu siku, Pulu Yemonga yomboma molko, molko kondangi.' nimba, yu "Simbu." nirimu méle paa tondolo puli peangama sirimu.

<sup>5</sup> Aku 'serimu-na ono aku siku molemele, kene ono 'Sika.' ningu kuru mondolemele mele aku siku kepe ungu peangama mindi paa mimi siku pilku tondolo munduku sangi. Pe tondolo munduku ungu peangama senge mele aku siku kepe 'Pulu Yemo kinia Yesusi Karasitolo molembele mele kinia nilimbilí unguma, paa pilku kondangi.

<sup>6</sup> Pe Pulu Yemo kinia Yesusi Karasitolo pilku kondolemele mele, aku siku kepe ono onono ulu-pulu-kirima yakala semba kinia 'Paa naa samili.' ningu onono kangimu nokoko kondoko ulu-kirima naa sangi. Pe onono kangimu nokoko kondoko ulu-kirima naa senge mele aku siku kepe ono-kinia umbunama wendo ombá kinia tondolo munduku molko taka leko umbunama meangi. Pe umbunama tondolo munduku taka leko menge mele aku siku kepe 'Pulu Yemonga yomboma molemolo.' ningu yunga unguma mindi pilku liku seko molangi. <sup>7</sup> Pe Pulu Yemonga yomboma molkole yu kanopa peanga pilielemo uluma senge mele aku siku kepe Karasinga yomboma 'Olionga kandi genupilima.' ningu konopu seluna pupili manda selusiku molangi. Pe Karasinga yomboma 'Pulu lemóma.' ningu molonge mele aku siku kepe 'anju yando, paa konopu mondoko molangi. <sup>8</sup> I ulu peangama tondolo munduku ambolko aku uluma ono-kinia tondolo pupili molongi liemu olionga Ye-Awili Yesusi Karasi ono pilku imbi silimili mele olandopa olandopa kere-langi awisili mongo tomba. We mania naa pumbá kene 'aku siku uluma seko molangi.' <sup>9</sup> Aku-nakolo 'Karasinga, yombo se aku sipa ulu peangama naa sepa molemo yombomo yu mongo ki ri lemó yombo se sulu sepa lemó mélema naa kanopa, paa nondopa lemó mélema mindi kanolemo yombo aku sipa se molemo. Yuni ulu-pulu-kiri u seriumma 'Pulu Yemone, kulumiyé topa yunga konopu sepa kake senderimu mele kiniá komu sindipa naa pilielemo.

<sup>10</sup> Akumunga, nanga ango-keme, ono Pulu Yemone 'Nanga yomboma molangi wangi.' nimba mangilipa nimba taltorumu kene 'Paa yunga yomboma molopo mindi pamili.' ningu tondolo munduku molangi. Aku siku senge kinia ono umbuna sene topa mania naa mundumba, onone yu manda munduku naa kelenge. <sup>11</sup> 'Aku siku seko molonge kinia, olionga Ye-Awili, olionga Lipa Tapondopa Mindili Nolemolá Aulkana Wendo Lili Ye Yesusi Karasimunga kolea, yu ye nokoli kingimu molopa nokopa mindi pumbá akuna "Molamili. Sukundu waa." nimba konopu sipa kuna lipa taltondomba.

<sup>12</sup> Akumunga, sika nane nikiru mele ono ungu sikamo pilku ‘Paa sika.’ ningu kuru mondoringi mele kiniá we pilielememe-na-kolo ‘Aku unguma komu naa sindiku munduku naa keleangi.’ nimbu alieli nimbu simbundu kelepo nimbu sikiru.  
<sup>13-14</sup> Olionga Ye-Awili Yesusi Karasini na nimba sirimumunga ‘Na wale laye- kolo nanga kangimu serele-ulka melena molopole, mundupu kelembó.’ nimbu pilipuli ‘Kiniá na i serele-ulkana we molopole ‘Ono u ungu pilieringima paa konopu kimbu siku molangi.’ nimbu nane kelepo nimbu siliu akumu papu selio.’ konopu lekero.  
<sup>15</sup> ‘Pe kepe, ,nanga kangimu mundupu kelepo, pumbú kinia ono ungu nimbu siliuma kelko mimi siku pilku konopu kimbu siku molangi.’ nimbu ono unguma mimi sipu nimbu sikiru mele tondolo mundupu nimbu simbú.

1:16-21

*Yesusini “Nanga Kongonomo Sende-Paa.” Nimba Lipa Mundorumu Yemane U Pulu Yemonga Pa Seli Karasi-Kinia Perimumu Kanoringi Ungu Se*

<sup>16</sup> Olionga Ye-Awili Yesusi Karasi yu paa tondolo pelemo mele kepe, yu pe kelepa yando ombá mele kepe, ono nimbu sirimulu kinia olione olionga konopuna pilipa kondoli pelemomone kange semanema sepo wamopole naa nimbu sirimulumunga ‘Yesusi mana molorumu kinia pea molopole,’ tondolo pa sélimu yu-kinia molorumu mele mongone kanorumulu mele ono semane topo sirimulu. We naa nirimulu.  
<sup>17</sup> ‘Olio kanopo molamili mulu,-kolea tondolo pa sélimu pelemo koleana ungu se wendo ombo yuntu nimbale: “I nanga paa konopu mondolio kangomo. Yu nane konopu sipu molio yemo.” nirimu kinia Lapa Pulu Yemone ‘Yunga imbimu paa ola molopili. Tondolo pa sélimu yu-kinia pepili.’ nirimu. <sup>18</sup> Olio yu-kinia Pulu Yemonga ma-pangina ola molorumulu kinia kanu ungumu mulu-koleana maniando orumu kinia olio pilierimulu kanumu.

<sup>19</sup> Akumu kanopo pilipuli, Pulu Yemone ungu-umbu tondorumuma pilkuli yando yomboma ningu siringi yemane ninguli ,bokuna toringi, mele pilipuli ‘Paa sika niringi.’ nimbu kuru mondolemolo akumunga kanu yemanga unguma mimi siku pilkuli pilku língi liemu paa papu. ‘Pilkuli pilku lingí kinia, ono lipa tapondomba mele i-sipa: Ipulieli kolea simbulu tolemo kinia sepe-llame pa sendepa nomba molopili kolea tangolemo. ‘Aku ye Pulu Yemonga unguma ningu moloringima ono sepe- llame mele. Pe, kolea tangombando kombokandima pali kumbulupa, selu mindi kamu tondolo pa sepa gilimú mele aku sipa mele ‘Yesusi,’ kanu kombokandimu mele ombo ‘olionga konopumanga sukundu ombo giliepili.’ ningu kanu yemanga unguma iseli-u konopumanga pepili mimi siku pilku molangi. <sup>20</sup> Ono ungu awili se pilingímu i-sipa: Pulu Yemone ungu-umbu tondorumuma pilku yando yomboma ningu siringi ye kanumane Pulu Yemonga bokuna toringi unguma ono onono ungu-pulu se konopumane pilkuli bokuna naa toringi. <sup>21</sup> “Pulu Yemone ungu-umbu tondomu ungu se pilipu i-sipu i-sipu nikimulu. I-sipa i-sipa wendo ombá.” niringi ungu akumanga ungu selu kepe yemane onono ‘Ungu mare konopumane pilipuli yomboma nimbu siemili.’ naa niringi. Mini Kake Sélimuni ononga konopumanga sukundu molopale nimba sirimu mele pilkuli “Pulu Yemonga ungu se nikimulu.” ningu yomboma ningu siringi.

## 2

*Kolomongo-Awili 2*

*Kolo Toko Mane Siringi Yemane Karasinga Yomboma Ningu Sembambu Siringi Ungu Mare*

<sup>1</sup> ‘Sika u ye marene Pulu Yemone ungu-umbu tondorumuma mindi pilkuli yomboma sumbi siku ningu siringi,-na-kolo marene Pulu Yemone ungu-umbu tondolima naa pilku we kolo toko yomboma ningu siringila. Kiniá aku sipala ono

molemelena ye marene ‘Yesusi Karasinga unguma mane sikimulu.’ ningu, kolo toko mane singí. Kanu kolo toko mane singí yemane ‘Ono kuru mondolemele mele munduku keleangi.

Olio mane sikimulu unguma ‘Sika.’ ningu kuru mondangi.’ ningu kiyongo ningu ongo kolo toko kondi toko “Pulu Yemo-kinia konopu seluna pupili kopu seko molongendo i-siku i-siku sangi.” ningu, ungu paa lupa mare mane singí. Ye-Awilimuni ‘Ono kolea-kirina naa pang.’ nimba ononga nimba kolondorumu, yunga mememone ono kelepa yando liltimu akumu kepe ‘Mólo.’ ningu bulu singí. Aku sengemonga ono onono popenge seko mindili nongo molko kinjingí aulkamo akisingí.<sup>2</sup> ‘Karasinga, yombo awisilini kanu yemane pipili naa kolko amboma-kinia andoko wapora toko senge mele manda manjiku senge. Aku sengemonga, yombo mare kanokole ungu sikamo pelemo semane peangamo marake mele seko ungu-taka tondonge.<sup>3</sup> Kanu mane sili yemane ‘Méle awisili lipu taltamili.’ ninguli ono onono konopumane pilingí semanema kolo toko, ono semane toko sikuli “Kou-mone mélema siee.” ningu pangu singí. ‘Aku-sipa na-kolo, aku senge mele Pulu Yemone koronga-u pilipale ono kote pilipa “Mindili nangi.” nimba, nimba panjerimu. ‘Ono mindili nonge.’ nirimu ungu kanumu mania naa purumu. We nokopa molemo.

<sup>4</sup> ‘Pulu Yemone kanu yema sika mindili simba.’ nimbu kuru mondolemolomonga pulumu i-sipa:’ U ,mulu-koleana, angello marene ulu-pulu-kirima seringi kinia Pulu Yemone ono mundupa naa kelepa, ‘Kote walemo wendo ombá kinia kote sangi, u ka-ulka paa simbulu toli koleana nokoko molangi.’ nimba ka-sénene ka topa mindili nonge kolea-kirina lipa mundorumu kanumu. <sup>5</sup> Koronga-u moloringi yomboma kepe Pulu Yemonga ungumu naa pilku yu bulu siringi kinia mundupa naa kelierimu. ‘Ono kolangi none topili.’ nirimu kanumu. ‘Aku-sipa na-kolo none yomboma torumu kinia, Noane ‘Yomboma sumbi siku molangi.’ nimba yomboma mane sirimu ye kanumu kinia yunga yombo yopoko-pakara kinia ono Pulu Yemone ‘None naa topili.’ nimba lipa tapondorumumunga ono manda moloringi. <sup>6</sup> Kolea-awili Sodomo kinia Gomoratolonga yomboma ‘Seko kinjikimili kene kolangi.’ nimba Pulu Yemone kanu koleatolo sepene topa kalorumu kinia kanu koleatolo sepe keku lierimu kanumu. ‘Yombomane na kolea Sodomo Gomoratolo topo kalorundu mele pilkuli nanga unguma naa pilku na bulu singí yomboma kinia aku sipu umbuna mare simbú mele piliangi.’ nimba aku serimu. <sup>7</sup> ‘Kanu koleatolo sepene topa kalorumu kinia, Pulu Yemone ye sumbi nili LLote mindi lipa tapondopa ‘Naa kolopili.’ nimba wendo liltimu kanumu. Yombomane ulu paa kirima seko wapora toli ulu lupa lupama seringi kinia LLote yu paa kanopa kiri pilipa paa kamelé umbuna kolorumumunga lipa tapondorumu. <sup>8</sup> (Kanu ye konopu sumbi nimba pélimu Sodomo molopa walemanga pali kanorumu kinia ‘Sodomo yomboma, alieli ungu-manema pulua toko paa ulu lupa lupama seko kinjeringi mele kanopale yu mini-wale mundupa konopu paa umbuna sepili molorumu.)

<sup>9</sup> Ye-Awilimuni ‘seko kinjeringi yomboma kinia yombo sumbi nilima kinia, sika aku sipa mele serimu liemu yuni yunga ungumu pilku liku ulu peangama selememe yomboma-kinia umbuna wendo olemo kinia yuni ‘Umbuna naa sepili.’ nimba manda lipa tapondomba mele yuyu pilipa, ulu sumbi nilima naa seko, seko kinjilimili yomboma kote walemo wendo ombá kinia pundu tomba mele yuyu pilipa, aku walemo wendo ombándo kiniá kepe ono mindili lipa sipa molemo. <sup>10</sup> U-we-konopu-kirimuni yakala kololemo mele pilkuli yombo mare ambo molo ye mare kanoko ‘Ulu se selemolánje peanga.’ konopu leko, wapora toko ulu paa kalaro mololima seko, ‘Pulu Yemo kinia namba pelemo yombo awilima kinia akumanga, ungu-mané sene olio naa nokolemo.’ ningu liku bulu siku, aku selemele yomboma méle kaloli ki ri awisili olandopa simba lingí.

Kanu yombo kirima ono molemelena andoko kála seko, ononga konopumane pilielemene uluma mindi andoko seko, mulu-koleana ‚angello, tondolo pulimú awilima kepe pipili naa kolko ungu-taka tondoko, selemele.<sup>11</sup> Kanu yema maniadopa, enge se naa pelemo, angelloma ono olandopa, enge paa pelemo, aku-na-kuo kanu yemane seko kinjilimili mele angellomane kepe Ye-Awilimunga kumbikerena kanu yemanga ungu-bulkundu nindiku ‘Paa seko kinjilimili.’ naa nilimili.<sup>12</sup> Aku-sipa na-kuo kanu yema, méle-takarama konopu naa pelemo mele, aku sipa konopu naa pelemo. Méle-takarama konopu kimbu naa silimili. Ulu se senge mele naa pilkuli walu selemele. Méle-takarama walu molko, waloma walu leko, yomboma molemelena walu andolemele kinia yombomane ono toko kondolemele aku sipa mele ‚kuo toko mane sili, ye kanumane ungu ningíma mimi siku pilku naa ningu, unguma ningu kinjilimili. Aku siku selemeleonga méle-takarama walu andolemele kinia yombomane ono toko kondoko mindili silimili mele ono yomboma kepe aku siku mindili nonge.

<sup>13</sup> Kanu yemane yomboma seko kinjiku umbunama silimilimunga ono onono méle kalólimu lingíndu mindili nongela. Tangoli kepe ‘kere-langí awisili nombo notondolomo nombole konopu simulú.’ ninguli, ono ‚pepá topo sikiru yomboma, kinia kere-langí nongo no nongo, seko kalaro mondoko ononga imbima seko kinjiku, seko pipili kondolemele. ‚Kanu yema aku siku kolo toli, uluma selemele akumu konopu siku selemele.<sup>14</sup> Alieli amboma kanoko mongo-kenge seko ‘onokinia pea wa ulu-kirinale samili.’ ningu, aku ulu-kirima mindi seko molemele. Karasinga yombo mare tondolo munduku naa molemelema kondi toko “Olione selemolo mele pea samili.” ninguli ono-kinia ulu-pulu-kirima selemele. Ono mélema kanoko konopu mondolemele ulu akumu onono sukuli mele seringimunga kiniá yombomanga mélema ‘liemili.’ ningu konopu mondoko molemele. ‚Pulu Yemone, aku selemele yema “Paa molko kinjangi.” nimba, nimba panjerimu.<sup>15</sup> Kolo toko kondi tolemele kanu yema aulka sumbi nilse munduku kelko ono amu toko, ‚ye, Beo malo Bellame purumu aulkana lombili pulimili. Bellame yu ‚Pulu Yemone ungu-umbu tondorumumu pilipa yomboma nimba sirimu ye se molorumu-na-kuo, ulu-kiri se sepa kinjimbamonga kou-mone méle kalólimu singí limba akumu yakala kolopale ulu se sika sepa kinjerimu.<sup>16</sup> Kongi dongimane yomba mele ungu naa nilimili-na-kuo selu mindi, Bellame amu topa ulu se sepa kinjimba serimu kinia, ‘mundupa keliepili.’ nimba, Bellame yu pumbá aulkamo pipi sipa, yu iri topa yombo ungu nilimili mele ungu se nimba Pulu Yemone ungu-umbu tondorumuma pilipa yomboma nimba sirimu ye kanumundu “Seko kinjikinu.” nirimu.

<sup>17</sup> Kanu yema no pilkipa wendo ombo kumbululimú mele ono aku silima. ‚Yombomane ‘no namili.’ ningu no pilkipa wendo olemona pilku pulimili kinia kumbululimú-na manda naa nolemele., ‚Kupa topa pombora tolemele kinia kanokole ‘Lo tomba.’ ningu konopu siku nokoko molemele-na-kuo, poporomene kupama we topa memba pulimú mele kanu yema aku silima molemele. ‚Aku sipa, yomboma lipa tapondomba ungu se kanu yema-kinia naa pelemo. Pulu Yemone, aku yemanga kolea simbulu topa paa pombora tolina molonge koleamo sepa mimi serimu.<sup>18</sup> Onone ungu nilimili akuma aroma toko nilimili, kanu unguma tondolo se naa pelemo ungu wema. Unku awisili kara pungu ningu, yomboma kondi toko “Ononga uwé-konopumu pepili kangimuni wapora andopa topa, ulu-kirima sembando yakala kololemo uluma sangi.” nilimili. Pulu Yemone “Naa sangi.” nilimú uluma ultukundu-yombomane selemele uluma yombo mare iseli mindi wendo ongo Karasinga ungumu ‘Sika.’ ningu molemele yomboma ‘Olianga unguma piliangi.’ ningu kondi tongendo aku selemele.<sup>19</sup> Seko kinjilimili ye kanumane onondo ninguli: “Olio selemolo mele manda manjiku senge kinia uluma pali ononga konopumane pilielemene mele

manda senge. Yombo sene molo ungu sene ono naa nokomba.” nilimili-na-kolo ono onono ulu kalaro molemomane ono sepa kinjimba ulumanga kendemande-yema molemele, aku ulu kalaro molemo ulumane kanu yema gelu nimba nokolemo. Mélsene yombo se “Kongono kendemande sendei.” nimbu liemu yu aku mélemonga kongono kendemande-yombomo molemo akumunga kanu yema aku siku kongono kendemande yema molko, ‚We molemolo.’ konopu lemele mele sika we naa molemele..”

<sup>20</sup> Yesusi Karasi, olionga Ye-Awilimu, olionga Lipa Tapondopa Mindili Nolemolá Aulkana Wendo Lili Yemo, kanu yemane u pilkuli ‚Yu sika aku sipa yemo molemo.’ ningu kuru mondolemele ulumuni ‘Ma-koleana ulu-pulu-kirimane ono pipi sipa naa ambolopili. Kanu uluma munduku kelko wendo wangí.’ nimba lipa tapondorumunga we manda molemele-na-kolo kelko sukundu púngi liemu ulu-pulu-kirimane ono ka singí kanu-kinia ono kamu paa molko kinjingí. U wendo naa wangí sika kaulkana mele molko, molko kinjeringi-na-kolo kelko sukundu púngi liemu paa kamu olandopa molko kinjingí. <sup>21</sup> ‚Aku nikirumunga,’ pulumu i-sipa: Yomboma sumbi siku molonge aulkamo kanoko ‚sukundu ongole kelko ultu puringi, ye kanumane yomboma sumbi siku molonge aulkamo u naa kanolemolánje papu. Kiniá aku aulkamo kanokole, ‚Yesusinga, ungu-mané nimbu sirimuluma pilku likuli munduku kelko liku bulu siringi liemu paa manda mólo. <sup>22</sup> Aku selemele yombomanga ungu-iku tondolo kanga talo sika pelemo. Akutolone nimbale:

„Se: „Owá sene meku topale anju pumba  
pe kelepa yuyu ombo nolemo.”

„Se: „Kongi se no lendelemele kinia  
pe kelepa olina pumba pepeke pelemo.”

nilimú kanutolondo nikiru.

### 3

#### *Kolomongo-Awili 3*

*Yesusi Sika Kelepa Ombá. Ombá Kinia Mulu Matolo Pora Nimbá, Aku Walemonga  
Ungu Se  
3:1-10*

#### *Ye-Awili Yesusi Paa Sika Kelepa Wale Talo-Sipa Ombámonga Ungu Se*

<sup>1-2</sup> Nanga konopu mondolio yomboma, i pepá tokoromo ononga topo mundundumbundu wale talo-sipu tokoro. Nane pilipuli i pepá tokoro mele nimbu siembo: Yesusi u mana naa opili koronga-u Pulu Yemone ungu-umbu tondorumuma pilku yomboma ningu siringi yemane ‚Ye-Awilimu pe ombá mele, ningu siringi bokuna molemo unguma kepe, pe kiniá Yesusingi ‚Nanga kongonomo sende-paa.’ nimba lipa mundorumu yemane Ye-Awilimu olionga Lipa Tapondopa Mindili Nolemolá Aulkana Wendo Lili Ye Yesusingi ungu-manema ono nimba sirimuma pilkuli yando yomboma ningu siringi unguma kepe, onone kanu unguma u-pulu-pulu pilieringi mele ‚kelko pilku konopu kimbu siku molangi.’ nimbu pepá se u topo sirindula, kiniá imu kepe topo mundumbundu ungu-pulu selumu pilipuli i pepámo tokoro.

<sup>3</sup> Unku se u nimbú sekeromo mimi siku piliaa: ‚Yesusi ombá kinia mulu matolo, pora nimbá walemo nondopa wendo ombá walemanga yombo mare ongo onono ononga konopu leko ‚Paa samili.’ ningu pilingí ulu-kirima mindi senge yombo mare ono molongena ongo ungu-taka tondoko <sup>4</sup> ninguli: ‚Yesusi yu ‚Pe kelepo yando ombó.’ nimba, sika nimba panjerimuye? Aku liemu kiniá sena molemoye? ‚Olionga, lapalima koloringi wale kinia kepe, yandopa yandopa kiniá wale kinia kepe, u-pulu-pulu mélema wendo ombale lierimu mele yandopa kiniá we aku sipa lepa mindi pulimú. Ulu se lupa wendo naa olemo.’ ningí. <sup>5</sup> Aku-sipa na-kolo aku yombomane

"Uluma u-pulu-pulu wendo orumu mele paa naa pilimulú." ningú komuma pipi silimili. Pulu Yemone nirimu ungumuni mulúmu wendo omba, mamo nona wendo omba lierimu. <sup>6</sup> Kanu-kinia pe „Pulu Yemone nirimu ungumuni, u nona mamo wendo orumu kanu nomo kelepa molopa ola ombale mama pali aki topa, molo ringi mélema pali topa kondorumu. <sup>7</sup> Aku sipa mele Pulu Yemone "Pe sembó." nirimu mele paa sika aku ungumuni sembá. Pulu Yemone yu liku bulu siku seko kinjilimili yombomanga kote sendepa ono "Mindili nangi." nimbá walemo wendo ombámonga 'Iseli-u mulu matolo we liepili.' nilimú. 'Kanu kote walemo wendo ombá kinia mulumu kinia mamo-tolo sepene nopili. Iseli-u we liepili.' nirimumunga kiniá yunga ungu nirimumuni mulu matolo aku walemo wendo ombándo we nokoko lembele.

<sup>8</sup> Nanga konopu mondolio yomboma, ulu selumu komu naa sindangi. Ye-Awilimuni pilipale, kalia-ingi wane tausini wale selu mele pilipa, wale selumu kalia-ingi wane tausini mele pilipa molemo kanumu komu naa sindayo. <sup>9</sup> Ye-Awilimuni „Ombó." nimba, nimba panjerimu kanumunga yombo marene "Welea naa okomo." ningú pilielemele. Aku-na-kolo yombomane ningú pilielemele mele yuni aku sipa nimba naa pilielemo. 'Yombo mare ,ulu-pulu-kiri selemelema konopuna we pepili molemelemonga, mindili nongo molko kinjingí koleana pungí, manda naa sembá. Ono kondo kolopole, ulu-pulu-kiri selemelema kanoko kiri pilku munduku kelko konopu topele tangi kene ono molemelena welea naa pambo. U konopu topele tangi kene ya u we nokopo molambo.' nimba pilipa welea naa olemo.

3:10-18

### *Ye-Awilimunga Walemo Wendo Ombá Kinia Mulu Matolo Sika Pora Nimbá Kene Mimi Siku Molangi Ungu Se (3:pali kanani.)*

<sup>10</sup> Aku-na-kolo Ye-Awilimú ombá walemo paa sika wendo ombá. 'Wa noli ye se ombá.' ningú nokoko naa molangi lipa sinjipa olemo mele aku sipa wendo ombá. Ombá kinia mulúmu sepe ungu nilimú mele sukuraka nimba pora nimba, Pulu Yemone méle kangamane mana lemó méle seriumma „pali, sepene nomba pora simba. Pe mamo kinia mana lemó mélema kinia pora nimbála.

<sup>11-12</sup> 'Kanu mélema pali aku sipa pora nimbá.' ningú pilkuli kiniá ono nambolka yombo mele molonge kinia peangaye? Onone 'Pulu Yemonga walemo ombá.' ningú nokoko molkole 'Paa welea opili.' ningú ulu-pulu peangama kinia 'Pulu Yemonga yomboma manjipu molamili.' ningú yuni ulu kake selima nimba kanolemo uluma seko molangi. Pulu Yemonga Walemo wendo ombá kinia sepene mulumu nomba pora sipa, sepe paa kondolina Pulu Yemone méle kangamane mana lemó méle seriumma „pali, no lemba. <sup>13</sup> 'Sika aku sipa ulumu wendo ombá,-na-kolo olione pilipuli Pulu Yemone „olionga, "Mulu konde se kinia ma konde se kinia sendembo. Kanuna ulu sumbi nilima manjipa pemba." nimba, nimba panjerimu. Kanu mulu ma kondetolo 'wendo ombá.' nimbu olio konopu sipu nokopo molemolo.

<sup>14</sup> Akumunga, nanga konopu mondolio yomboma, 'Aku sipa uluma wendo ombá.' ningú konopu siku nokoko molemele kene 'Yuni ombo na kanomba kinia, na paa konopu kake sepili, mongo pemba ulu se paa naa pepili, yu pea paa seluna-seluna molambili, paa aku sipu molambo ombo kanopili.' ningú yu-mele-mele aku siku molko yu nokoko molaa. <sup>15</sup> Olionga Ye-Awilimú welea naa ombo taka lepa molemo kanumunga pulumu ono pilku molangi. Yomboma lipa tapondopa, 'Mindili nolemolá aulkana wendo ongo, yu-kinia pea molko kondonge aulkana pangí.' nimba taka lepa nokopa molemo kanumu pilku molaa. Olionga konopu mondolemolo genu Pollo Pulu Yemone pilipa kondoli sirimumunga nane ya nikiru mele yuni aku sipa pepá topa sirimula. <sup>16</sup> Yuni koleamanga pali pepá topa sirimu akupokonga pali nane ya pepá topo , 'Ye-Awilimú kelepa ombá.', nikiru mele selu-sipa mindi nirimu. Sika yunga pepána ungu tolemomanga pulu mare pilimulúndu kála sepo pilielemolo,

kanu unguma pilipa kondoli naa pepa, tondolo munduku naa pilielemele yombomane lawa seko mane silimili, kanu yombomane Pulu Yemonga bokuna molemo ungu mare kepe yomboma lawa seko mane silimili. Aku selemelemonga ‚Pulu Yemonga kote walemo wendo ombá kinia, mindili awili seko nonge aulkamo ono onono akisilimili.

<sup>17</sup> Akumunga, paa nanga pulu lemó yomboma, ‚kanu yemane pe ono kondi tonge, ulu aku sipama wendo ombá mele u pilku molemele kene mimi siku pilku kondoko molangi. ‚Pulu Yemonga, ungu-manema naa pilku, pulua toko kolo toli yemane olio kondi toko mane singíndu lawa seko unguma ningú singí kinia pilipuli kuru mondopo molemolo mele mundupu kelemolo. Akumu mania pumbá.’ ningú mimi siku pilku molaa. <sup>18</sup> Yesusi Karasi olionga Ye-Awilimu, olionga Lipa Tapondopa Mindili Nolemolá Aulkana Wendo Lili Yemo, ‘Yuni olio we kondo kolopa sepa kondolemo mele pilipu molemolo akumu olandopa-olandopa aku sipu pilipu molamili.’ ningú molko, yuni selemo mele kinia yu molemo mele kinia olandopa-olandopa tondolo munduku mimi siku pilku molangi.

Imbi paa ola molemo yemonga imbimu kiniá kepe pe-pe alieli kepe yombomane ambolko paka tondoko molangi. Aku sipa sika sepili.

„Aku pea nikiru..”

## JONONE PEPÁ YOPOKO TOPA SIRIMU BOKUMA

*Jonone Topa Sirimu Pepámanga Ungu-Pulu Mare*

I pepá yopoko topa sirimu yemonga imbimu pepá senga naa molemo, aku-na-kolo 'Semane peangamo kinia i pepá yopoko kinia Jonone sika torumu.' ningu pilielemene. Akumunga pulumu i-sipa: U i boku ambolkonomonga yakondo **boku JONO** semane peangamonga ungu- pulumu gomo 424 kanani. Pe semanemo kinia ya pepá yopoko kinia anju yando ungu mare selu-sipa mele i-siku mimi siku kanani:

Semanemo.....	Jono Kumbi-Lepamo...Talo-Sipamo....	Yopoko-Sipamo
1:1,14 .....	1:1	
1:14,18, 3:16 .....	4:9	
3:19-21 .....	1:6-7	
3:36 .....	5:12	
5:24 .....	3:14	
5:32,37 .....	5:9	
8:44 .....	3:8	
8:47 .....	4:6	
13:34-35 .....	2:7.....	5
14:23 .....	5:3.....	6
15:11, 16:24 .....	1:4.....	12
.....	4:2-3 .....	7
.....	1 .....	1
.....	4 .....	4

**Jono Kumbi-Lepamo** kinia **Jono Talo-Sipamo** -tolo pepá topa sirimumunga ungu-pulumu i-sipa:

Ye mare andoko Karasinga yomboma mane siku ninguli: "Kangimu méle kiri akumunga kangimuni ulu peanga se paa manda naa semolo. Ulu peanga se selemolo kinia aku ulumu ulu kirila. Akumunga, ulu peangama selemolo molo ulu kirima selemolo aku uluma pali kiri. Minimu mindi peanga. Pulu Yemo yu minimu akumunga yu peanga. Yesusi yu Pulu Yemo molopale paa sika mana-kangi senga naa orumu. Yu Pulu Yemo molopili yu ye peanga. Sika mana-ye se molkanje ye kiri se molka akumunga yu sika mana-ye se au naa lierimu." niringi. "Molo sika manayombo kangi senga ombo molorumu liemu kangina sukundu molorumu yombomo lupa, yu lupala. Kangimu kinia minimu kinia yombo selumu mólo." niringi. "Ono i-sipa i-sipa pilipa kondoli mare kuru mondongi liemu molko kondonge aulkana pungí." niringi. Pe Karasinga yombo marene kanu unguma pilku likuli 'Pilipa kondoli awisili konopuna pepili.' ningu konopumuni pilingindu kála seko molko, kangimane paa ulu kirima mindi seko moloringi. Jonone onondo nimba: "Kanu ye kolo toko simbulu tolina molemele yomboma ononga talapena ono-kinia paa naa molangi, toko makorangi." nimba sika sumbi siku molko, molko kondonge aulkana pungí mele ungu mare kelepa mane sirimu.

'Jono ye-andamo molopa Epesasi taono molopale, Epesasi taono lierimu kolea Esia poropinji koleamanga Karasinga yombo talapema i pepámo topa sirimu.' ningu pilielemene.

Ya ungu-pulumu pora nikimu.

## JONO KUMBI-LEPAMO JONOne KUMBI-LEPA Pepá Topa Sirimu Bokumu

*Jonone I Pepá Topa Sirimumunga Ungu-Pulu Mare*

Ungu-pulu mare inia yakondo nondopa gomo 1179 molemomo paa kanani. Unzu paa tondolo se 1:5—2:2 molopa, se 3:1-2, se 5:11-12 molemo.

Ungu-pulu mare boku ambolkonomonga pealemekondo “**24. laip**”, “**31.3. pikinini bilong God**”, “**32.2. Pikinini Bilong God**”, “**42.4. wapelam samting nogut**” molemo. Ya ungu-pulumu pora nikimu.

*1:1—3:10*

## **Olio Pa Selina Andopo Molopo, ‘Simbulu Tolina Molemele Yombomane Olio Kondi Naa Tangi.’ Nimbu Molamili Ungu Se**

*1:1-4*

*“Konde Molopa Kondoli Ungu Akumu Yesusi.” Nirimu Ungumu*

<sup>1</sup> Konde molopa kondoli ulu-pulumu-kinia molemo yemo ono nimbu siemili. Yu u-pulu-pulu molorumu yemo; yu olio pilierimulu yemo; yu mongone kanorumulu yemo; yu neme-neme nimbu kanorumulu yemo; yu kini ambolorumulu yemo; akumu Pulu Yemonga Ungu Yesusindu nikimulu. <sup>2</sup> Konde molopa kondoli ulu-pulu kanumu wendo omba mona molorumu, olione yu kanopole paa sika kanorumulu mele nimbu sikimulu. Molopa mindi puli ulu-pulumu Lapa kinia molopale olio molorumuluna omba mona molorumu kanorumulu mele ono nimbu sikimulu. <sup>3</sup> Ono olio kinia pea kopu sepo molamili.’ nimbu olione kanopo pilierimulu mele ono kepe nimbu sikimulu. Kopu sepo molemolomonga pulu kanumu i-sipa: Olio Lapa kinia yunga Malo Yesusi Karasi kinia pea kopu sepo molemolo akumu. <sup>4</sup> Ono pea olio konopu kamu siemili.’ nimbu i ungumu nimbu pepána tokomolo.

*1:5-10*

*“Pa Selina Andopo Molamili.” Nirimu Ungumu*

<sup>5</sup> Pulu Yemonga Malone olio nimba sirimu ungumu ono nimbu sikimulu akumu i-sipa: Pulu Yemo pa sélimu. Yu-kinia simbulu toli se paa naa pelemo. Ulu-pulu-kiri se kepe kalaro se kepe yu-kinia naa pepa, yu ye pilipa kondoli pepa kake sepa molopa kondoli yemo. <sup>6</sup> Olio ‘Pulu Yemo yu-kinia manda kopu sepo molemolo.’ nimbili simbulu tolina andopo molomulu liemu kolo topo, “Selemolo.” nilimulu mele naa selemolo. <sup>7</sup> Aku-sipa na-kolo yu pa selina molemo mele olio pa selina andopo molomulu liemu olionga genupili kinia manda kopu sepo molemolo kinia yunga Malone yunga meme olionga nimba ondondorumumuni olio ulu-pulu-kiri selemolo konopuna pelemoma pali kulu tondolemo.

<sup>8</sup> Olione nimbili: “Ulu-pulu-kirima naa selemolo, se naa pelemo.” nímulu liemu kolo tolemolo, ungu sikama olio-kinia naa pelemo. <sup>9</sup> Aku-sipa na-kolo ulu-pulu-kiri selemolo semoloma nimbu para símulu liemu Sumbi Sipa Selemolo Pulu Yemone “Sembó.” nimba panjerimu mele pilipale sembando olionga ulu-pulu-kirima nimbu para simulúma ‘Mania pupili.’ nimba siye kolopa, olionga konopuna kalaro mele molemo molombama kanopale ‘Kelepa kake sepili.’ nimba kulumiye tondolemo tondomba. <sup>10</sup> Aku-sipa na-kolo olione nimbili: “Olione ulu-pulu-kiri se paa naa selemolo, paa naa serimulu.” nímulu liemu aku ungu nilimulumuni “Pulu Yemo yu kolo toli yemo.” nilimulu, yunga ungumu olio-kinia naa pelemo.

## 2

*2:1-6*

*Karasi Olionga Lipa Tapondólímu*

<sup>1</sup> Nanga bolango-nanama, ‘Ono ulu-pulu-kirima naa sangi.’ nimbu i pepámo ono simbú tokoro. Aku-na-kolo ononga yombo sene ulu-pulu-kiri se semu liemu olionga nimba lipa tapondopa Lapanga kumbikerena mawa sendelemo yemo molemo. Akumu ulu sumbi nilima mindi seli ye Yesusi Karasi. <sup>2</sup> Yu “‘Ononga ulu-kiri

selemelemanga Pulu Yemone ono naa topili. Ono kolea-kirina pungu molko kinjiku mindi naa pang.’ nimbu, ‘Ononga ulu-pulu-kirma omba mania pupili.’ nimbu, nanga mememo ondondopa kolambo.” nirimu yemo. Olio Isirele yombomanga mindi mólola. Ma-koleana yombomanga pali ulu-pulu-kiri seringi selemelema ‘Pulu Yemone ‘Omiba mania pupili. Pe kelepo naa pilipu molopole ono sepo naa kinjambo.’ nipili.’ nimba Karasi yu mana- yombomanga pali kolondorumu.

<sup>3</sup> Karasini oliondo “Saa.” nirimu mele pilipu lipu semulu liemu ‘Yu paa sika kanopo pilipu molemolo.’ nimbu pilielemolo. <sup>4</sup> Yombomane ‘Yu olio kanopo pilielemolo.’ ninguli yuni “Saa.” nirimu mele pilku liku naa selemele, kanu yomboma ono ungu kolo toli yomboma, yunga ungu-sikama konopuna naa pelemo. <sup>5-6</sup> Aku-sipa na-kolo yuni “Saa.” nirimuma pilku liku selemele yomboma paa kamu Pulu Yemo konopu mondoko kondolemele. ‘Olio yunga yomboma molopo yu pea kopu sepo molemolo.’ nilimili yomboma Pulu Yemone “Sei.” nirimu mele Yesusini pilipa lipa sepa molorumu mele onone aku siku Yesusini “Saa.” nilimú mele pilku liku seko molangi. Yesusi Pulu Yemonga unguma sepa molorumu aku mele Yesusinga ungu-manema pilipu lipu sepo molopole ‘Olio sika yunga yomboma molopo, sika yu pea kopu sepo molemolo.’ nimbu pilielemolo.

2:7-17

*Ungu-Mane Kondemo “Oliolio Anju Yando Konopu Mondamili.” Nirimu Ungumu*  
2:7-14

*Yombo Sene Genupili Konopu Mondolemomo Pa Sélina Molemo Ungumu*

<sup>7</sup> Nanga pulu lemó yomboma, i pepá tokoro ungu-manemoconde se mólo. Akumu koronga-u Karasinga yomboma pulu polko molkole nirimulu pilieringi ungu-manemo. <sup>8</sup> Aku sika na-kolo kiniá i pepá tokorona ungu-maneconde se sikiru. I ungu-manemonga pulu yumu u Karasini sepa molorumu mele kanopo, yandopa ono seko molemele mele kanopole ‘Aku ungu-mane kondemo yu sika lémo.’ nimbu kanolemolo. Simbulu tolímu kamu pora nimbá sekemo, pa sélimu koronga wendo orumumu kiniá pa selemomonga ono aku siku molemele mele kanopo ‘Akumu ungu-mane sikamo.’ nimbu kanolemolo.

<sup>9</sup> Yombo sene “Na pa selina molio.” nilimú-na-kolo yunga genupili kinia konopu kiri panjilimú akumunga yu simbulu tolina we molemo. <sup>10</sup> Yombo se yunga genupili konopu mondolemomo pa selina molemo, yu kelepa a tomba mélse pa selina naa lemó. <sup>11</sup> Aku-sipa na-kolo yombo se genupili kinia konopu kiri panjilimú yombomo simbulu tolina molopa, simbulu tólimuni yunga mongomo pipi silimú-na aulkama manda kanopa sumbi sipa naa pulimú.

<sup>12</sup> Nanga bolangoma,  
Karasinga imbimu mangilieringimunga  
Pulu Yemone ononga ulu-pulu-kirma  
‘Mania pupili.’ nimba siye kolorumumunga  
i pepámo ono topo sikiru.

<sup>13</sup> Tata keme,  
i ye u-pulu-pulu molorumu kiniá we molemo yemo  
pilku imbi silimilimunga  
nane ono i pepámo topo sikiru.

Kango-yema, onone  
ulu-kirimanga pali ulu-pulumu pelemo ,kuru, mu  
toko mania mundoringimunga  
nane ono i pepámo topo sikiru.

<sup>14</sup> Bolango-nanama,  
Lapamo kanoko imbi silimilimunga

i pepámo ono topo sikiru.  
 Tata keme,  
 i ye u molorumumu kiniá we molemomo  
 pilku imbi silimilimunga  
 i pepámo ono topo sikiru.

Kango-yema,  
 ono enge nengu, Pulu Yemonga ungumu  
 ononga konopumanga pelemo,  
 onone ulu-kirimanga pali ulu-pulumu pelemo ,kuru,mu  
 toko mania mundoringimunga  
 ono i pepámo topo sikiru.

*2:15-17*

*Ma-Koleana-Mélema Olio Konopu Awili Sepo Naa Mondamili Ungumu (2:7-17 pali)*

<sup>15</sup> Mana-uluma kinia mana-mélema kinia konopu naa mondoko, aku mélema konopu kimbu siku naa molangi. Yombo se mana-uluma konopu mondoru liemu kanu yombomone Lapa konopu mondoleso ulu-pulumu yu-kinia naa pelemo. <sup>16</sup> Aku nambi semu-na, mana-mélema pali, ulu-pulu-kiri selemene yombomane mélse kanoko “Liemboa!” molo “Samboa!” nimba konopu mondoleso mélema kinia, yombomane mongo-kenge selemene uluma kinia, mongo kondoko kála selemene uluma kinia, aku mana-uluma pali Lapa-kinia wendo naa olemo, ma-koleana mindi wendo olemo kene aku mana-uluma konopu naa mondangi. <sup>17</sup> Mamo kinia méle konopu mondoleso mélema pali pora nimbá-na-kolo yombo se Lapane “Sei.” nilimú mele pilipa lipa sengena panjipa sepa molemo yombomane alieli molopa kondopa mindi pumbá.

*2:18-27*

*Karasinga Opa-Touma Koronga Wendo Oringi Ungumu*

<sup>18</sup> Nanga bolangoma, ma-kolea pora nimbá walemo kiniá wendo okomo. Karasinga opa-toumu ombá ono u pilieringi kanumu. Kiniá kepe Karasinga opa-tou awisili wendo olemele kanopole ‘Ma-koleamo nondopa pora nimbá sekemo.’ nimbu pilielemolo. <sup>19</sup> Kanuma olio munduku kelko ultu puringi, aku-na-kolo u olio-kinia pea molorumulu kinia kanuma olionga yomboma sika naa moloringi. Ono sika olionga yomboma molemolánje olio-kinia pea we molemolá. Aku-sipa na-kolo olio munduku kelko puringi akumunga, kiniá lipu manjikimulu akumu olionga yombo mare mólo.

<sup>20</sup> Aku-na-kolo Mini Kake Sélimu Karasini lipa mundorumu liltingi akumunga, kiniá ono pali sika uluma pilku apuruku kondolemele. <sup>21</sup> Ono ungu sikama naa pilielemole.’ nimbu i pepámo naa topo sikiru. ‘Ono ungu sikama pilielemole, aku ungumanga ungu kolo tolima wendo naa olemo.’ nimbu i pepámo tokoro. <sup>22</sup> Kolo toli yomboma nameleye? ‘Yesusi yu Pulu Yemone ‘Lipu mundumbu.’ nimba taltorumu ye nokoli Karasimu mólo.’ nilimili yomboma ono kolo toli yomboma. Kanu yombomane Lapa kinia Malotolo “Mólo.” nengu liku bulu silimilimunga ono Karasinga opa-touma molemele. <sup>23</sup> Yombo sene Malo “Mólo.” nimba lipa bulu silimú yombomone Lapa kepe “Mólo.” nimba lipa bulu silimúla. Yombo sene Malo ‘Sika.’ nimba ‘Pea kopu sepo molambili.’ nilimú yombomone Lapa kepe ‘Sikala.’ nimba ‘Pea kopu sepo molambili.’ nilimúla.

*2:24-28*

*Ungu-Sikama Mini Kake Sélimuni Olio Mane Silimú Ungumu*

<sup>24</sup> Ono u pilieringi unguma ‘Konopuna paa kamu pepili.’ nengu konopumuni tondolo munduku pilku molangi. Aku siku senyi liemu ono Malo kinia Lapatolo kinia pea alieli kopu seko molonge. <sup>25</sup> Yuni olio “Simbu.” nirimumu i-sipa mele: “Ono alieli molko kondoko mindi pungí ulu-pulumu simbú.” nirimu.

<sup>26</sup> Yombo marene ono kolo toko kondi tolemele aku yombomanga nane ono i pepámo topo sikiru. „Akuma Karasinga opa-touma.“ <sup>27</sup> Aku-na-kolo ono Karasini Mini Kake Sélimu sirimu liltingi akumu ono-kinia molemomonga, yombo sene ono ungu-mané simba ungu se mólo. Mini Kake Sélimuni ono uluma pali mane silimú. Aku ungu-mané silimúma kolo naa tolemo, ungu-sikama mindi. Akumunga, yuni ono mane silimú mele Karasi-kinia alieli kopu seko molangi.

2:28—3:10

### *Pulu Yemonga Bolangomanga Ungu Se*

<sup>28</sup> Sika, nanga bolangoma, kiniá ono yu-kinia kopu seko molko mindi pangí. ‘Aku semolo kinia pe yu ombá kinia kanopole pipili naa kolopo yunga kumbi-kerena sumbi sipu pumbu ola gilimulu.’ ningu aku siku yu-kinia alieli kopu seko molangi.

<sup>29</sup> Karasi ye paa sumbi nílimu.’ ningu pilkuli nilimilimuni, ulu sumbi nilima sepa molemo yombo se kanokole ‘Yu Pulu Yemone “Nanga bolango molani.”’ nirimu, yunga bolangomo molemo lémo.’ ningu pilielimelela.

## 3

<sup>1</sup> Olionga Lapane olio paa konopu mondolemo mele kanayo. Olio konopu awili sepa mondopale nilimúmuni, yuni imbi lepa oliondo “Nanga bolangoma.” nilimú. Pe olio paa sika aku sipu molemolo. We-yombomane olio Karasinga yombomando ‘Pulu Yemonga bolangoma.’ ningu naa pilielememonga pulumu niembo. Onone u Yesusi kanokole ‘Yu Pulu Yemonga Malo.’ ningu naa pilieringi mele kiniá aku mele olio ‘Pulu Yemonga bolangoma.’ ningu naala pilielememele.

<sup>2</sup> Nane konopu mondolio pulu lemó yomboma, kiniá olio Pulu Yemonga bolangoma molemolo-na-kolo pe olio molomolo mele iseli-u naa pilielemolo. Naa pilielemolo-na-kolo pe Karasi yando omba mona molomba kinia yu molemo mele kanopole nimulúmuni, ‘olio yu molemo mele aku sipu molomolo lémo.’ nimbu pilipu molemolo. <sup>3</sup> Yombomane “Yu ombá.” ningu yu nokoko molememelane pali “Karasi yu konopu kake sepili molemo mele olio aku sipu molamili.” ningu ononga konopukundu kulumiyé toko molemele.

<sup>4</sup> Ulu-pulu-kiri selemele yombomane Pulu Yemonga ungu-manema pilku mokoli seko pulua tolemele. Ulu-pulu-kirimanga pulumu i-sipa: Pulu Yemonga ungu-manema pilku mokoli seko pulua tolemele aku ulumu ulu-pulu-kirimanga pulu akumu. <sup>5</sup> Karasini ‘Ulu-pulu-kirima mania pupili.’ nimba mana mania orumu ono pilielememele. Ulu-pulu-kiri seluri kepe yu-kinia paa naa pelemo. <sup>6</sup> Yu-kinia kopu seko molemele yomboma ulu-pulu-kirima seko mololeko naa pulimili. Yombo ulu-pulu-kirima seko mololeko pulimili yomboma Karasi naa kanoko naa pilielememele.

<sup>7</sup> Nanga bolango-nanama, yombo sene ono kondi topa ultu memba pumbá kene nokoko kondoko molangi. Yombo se ulu sumbi nili uluma selemo yombomo Karasi ye sumbi nílimu molemo mele yu aku sipa molemola. <sup>8</sup> U-pulu-pulu kepe kiniá kepe „kurumanga nokoli, depelemone ulu-pulu-kirima serimu selemomonga kiniá ulu-pulu-kiri selemele yomboma depelemonga yomboma molemele. Pulu Yemonga Malone depelemonga kongonomo topa mania mundumbando mana omba kongono serimu. <sup>9</sup> Pulu Yemone merimu yombo yunga bolango molemo yombomo Pulu Yemo yu molemo mele ulu-pulumuaku yombomo kinia pelemomongaaku yombomone ulu-pulu-kirima manda alieli pilipa naa selemo sembá. Pulu Yemoneaku yombomo merimu-na yuni ulu-pulu-kirima sepa molomba aulka se naa pelemo. <sup>10</sup> Akumunga yomboma kanopole, ‘I yombomo Pulu Yemonga bolangomo lémo. Imu depelemonga bolangomo lémo.’ nimbu manda kanopo apurulimulu. Yombo sene Pulu Yemone kanopa peanga pilielemo ulu-puluma naa selemo yombomo yu Pulu Yemone merimu

bolango se mólo. Yombo sene yunga genumu kanopa konopu naa mondolemo yombomo yu Pulu Yemonga bolango se mólolola.

3:11—5:21

## **Olione Yu-Mele-Mele Yomboma Paa Sika Konopu Mondamili Ungu Se**

*3:11-18(-24) Konopu Paa Sika Mondonge Mele Ungu Se*

<sup>11</sup> U-pulu-pulu pilku moloringi mele yandopa yandopa kiniá pilku molemele ungumu i-sipa: Olio “Anju yando konopu mondangi.” nirimu ungu kanumu. <sup>12</sup> Ye Kénene serimu mele manda manjipu sepo naa molamili. Yu ulu-kirimanga pali ulu-pulumu pelemo ‘kuru,munga ye se molopale nirimumuni, genu topa kondoramu. Nambi semu-na topa kondorumuye? Yu ulu kirima serimu, genu ulu kake selima serimu-kulu yu topa kondoramu kanumu.

<sup>13</sup> Ango-keme, we-yombomane ono sika konopu kiri panjilimili-na-kolo “Nambi semu-na aku selemeleye?” ningu mangilku naa piliame. Aku siku seringi mele selemele senge mindi. <sup>14</sup> Olio genupili konopu mondopo molemolomonga olio kolomolo aulkamo mundupu kelepole,conde molopo kondopo mindi pumulú aulkana molemolo.’ nimbu pililemolo. Yombo genupili konopu naa mondopa molemo yombomo yu kololi aulkamonga molemo. <sup>15</sup> Yombo genu konopu kiri panjilimú yombomo yu yomboma topa kondoli yombomo. Akumunga pilipuli ‘Yomboma topa kondoli yombo se molopa kondopa mindi puli ulu-pulumu yunga konopuna naa pelemo.’ nimbu pilipu molemolo.

<sup>16</sup> Konopu mondoli ulu-pulumu pililemolo mele i-sipa: Yesusi Karasi yu olionga ‘Kolali sepo kolondambo.’ nimba kolorumu. Akumu olio paa konopu mondopale we lipa tapondorumu. Pe kiniá akumu pilipuli olio ‘Genupilinga kolali sepo kolondamili.’ nilimolánje peanga. <sup>17</sup> Yombo sene mana-mélema taltopa molopale genu se mélse mólo tomba kinia kanopale kondo naa kolomu liemu Pulu Yemonga konopu mondoli ulu-pulumu yunga konopuna nambi sepa pelemoye? ‘Naa pelemo.‘

<sup>18</sup> Bolango-nanama, “Na yomboma konopu mondopo molio.” nimbu keremone mindi nimbu naa molamili. Yomboma paa sika konopu mondomolondo ono kondo kolopo ononga uluma sendepo molamili.

3:19-24

*Konopu Mondolemele Yomboma Pulu Yemo Kanongendo Mini-Wale Naa Mundulimili  
Ungu Se*

<sup>19-20</sup> Yomboma paa sika konopu mondopo kondo kolopo molomulu liemu ‘Olio ungu sikamo pilipu lipu molemolo lémo.’ nimbu pililemolo. Kanu-kinia ulu se semolomondo olionga konopumane pilipuli ‘Aku sipu sekemolomo sepo kinjikimulu.’ konopu lepole nimulúmuni, kelepo nimbili: ‘Olionga konopumane apurulimili mele maniadopa; Pulu Yemone mindi uluma pali mimi sipa pilipale yuni mindi ‘oliione selemolo, uluma pilipa lipa apurulimú mele olandopa kene yomboma konopu mondopo kondo kolopole olio ungu-sika pelemo aulkana pumbu ulu selemolomando konopumane ‘Sepo kinjikimulu.’ nimbu pililemolo mele naa pilipu, aku uluma konopu kimbu naa siemili.’ nimbili nimulúmuni, mini-wale naa mundupu yunga kumbi-kerena pipili naa kolopo pumbu molomolo.

<sup>21</sup> Nanga pulu lemó yomboma, olionga konopumane ‘I-siku i-siku sengima seko kinjengi.’ ni naa níngi liemu ‘Olio Pulu Yemone unguri naa sembá.’ nimbu pilipu yunga kumbi-kerena mini-wale paa naa mundupu we molomolo. <sup>22</sup> Kanu-kinia, yuni “Saa.” nirimu mele pilipu lipu sepo, yu kanopa peanga pililemo unguma sepole yundu “Si.” nimbu mawa semolo mélema pali yuni simba limulú. <sup>23</sup> Yuni “Saa.” nirimu mele i-sipa: “Nanga Malo Yesusi Karasimunga imbimunga pulumu kinia

molorumu mele kinia, yuni u serimu, kiniá manda sembá mele ‘Paa sika.’ ningu kuru mondoko, yuni ‘Onono anju yando konopu mondaa.’ nirimu mele aku siku saa.” nirimu. <sup>24</sup> Pulu Yemone “Saa.” nirimu mele pilku liku selememe yomboma pali ono Pulu Yemo-kinia kopu seko molemele, yu ono-kinia kopu sepa molemo. Yuni yunga Minimu olio sirimu akumunga ‘Yu olio-kinia kopu sepa molemo.’ nimbu pilielemolo.

## 4

*4:1-6*

*Pulu Yemonga Minimu Kinia Kuruma Kinia Ononga Unguma Olione Manda Apurumulú Mele Ungu Se*

<sup>1</sup> Nanga pulu lemó yomboma, “Pulu Yemonga Minimuni na ungu-umbu tondomuma pilipu ono nimbu sikiru.” ningu kolo toli yombo awisili molemele akumunga, yombo se ombo aku sipa nimbá kinia ono sumbi siku ‘Sika lepomo.’ ningu yunga ungumu kuru naa mondangi. U ononga mololi ulu-pulumua kanoko apurukuli ‘Sika Pulu Yemonga Minimuni nimba simu-na pilipale nikimunje molo kolo tokomonje?’ ningu kanangi. <sup>2-3</sup> Yombo sene konopumuni pilipa ungu nilimú ungumu ‘Sika Pulu Yemonga Minimuni yu ungu-umbu tondomunje apurupu piliamili.’ ningu i-siku kanoko piliangi: Yombo sene “Yesusi Karasi sika mana-ye se ombo molorumu.” nimbá yombomo sika Pulu Yemonga Minimu yunga konopuna molopili nilimú. Aku-na-kolo yombo sene Yesusindu aku sipa naa nimbá kinia kanokole ‘Pulu Yemonga Minimu yunga konopuna naa molemo, kuru se yunga konopuna molemo.’ ningu pilingí. Kanu kurumu Karasi-kinia opa-toumu, akumunga kanu yombomo Karasi-kinia opa-toumu molemola. U “Ombá.” niringi pilieringi opa-tou kanumu kiniá ma-koleana koronga ombo molemo.

<sup>4</sup> Nanga bolango-nanama, ononga konopuna molemo Minimu yunga tondolomo olandopa, we-mana-yomboma kinia molemo „kurumanga nokoli,munga tondolomo maniandopa, akumunga ono Pulu Yemonga yomboma molko, “Pulu Yemonga ungu nimbu sikiru.” ningu kolo tolemele yomboma toko mania mundoringi. <sup>5</sup> Kanu yomboma we-mana-yomboma mindi, akumunga ononga ungu nilimilima manunguma mindi pilku nilimili, akumunga we-mana-yombomane ononga unguma pilku molemele. <sup>6</sup> Aku-sipa na-kolo olio Pulu Yemonga yomboma molemolo. Pulu Yemone konopumuni pilipa ulu selemoma paa pilielememe yombomane olione nilimulu unguma pilku molemele. Aku-sipa na-kolo Pulu Yemonga yombo naa molemelemane olianga unguma naa pilku molemele. Akumunga, yombomane ungu nilimilima pilipuli ‘I yomboma Pulu Yemonga Minimuni ungu-sikama mindi nilimú Minimu konopuna molemo, i yomboma yunga konopuna kolo toli kurumu molemo lepomo.’ nimbu kanolemolo.

*4:7-21*

*Konopu Mondoli Ulu-Pulumunga Unku Se*

<sup>7</sup> Na konopu mondolio pulu lemó yomboma, Pulu Yemone u-pulu-pulu olio konopu mondorumu kene olione oliolio anju yando aku sipu konopu mondamili. Konopu mondoko molko pulimili yomboma Pulu Yemonga bolangoma molko yu selemo mele pilku imbi silimili. <sup>8</sup> Konopu mondoli ulu-pulumu Pulu Yemo kinia mindi pepa wendo olemo-na yomboma konopu naa mondolemele yombomane Pulu Yemo selemo mele kepe, molemo mele kepe, imbimu kepe, naa pilielememe. <sup>9</sup> Pulu Yemone konopu mondolemo mele olio lipa ora sirimu mele i-sipa: Yunga Malo selu mindi molorumu, aku-na-kolo ‘Ono konde molko kondoko mindi pangí kene nanga kangomo ononga nimba kolali sepa kolondopili.’ nimba yuni akumu lipa ma-koleana olio yombo kirimanga nimba mundundorumu, aku sipa Pulu Yemone konopu mondolemo mele olio lipa ora sirimu. <sup>10</sup> Konopu mondoli ulu-pulumu i-sipa: Olione Pulu Yemo

u konopu naa mondamili yuni olio we konopu mondopale nirimumuni, ‘Nanga kangomo yunga meme ondopa ononga nimba kolali sepa kolondombamonga ononga ulu-pulu-kiri seringi selemelema kamu mania pupili, kelepo naa piliambo.’ nimba, yuni yunga Malo ‘Olionga kolondopili.’ nimba olio sirimu kanumu.

<sup>11</sup> Na konopu mondolio pulu lemóma, Pulu Yemone ‘olio konopu mondopale yunga Malo olionga nimba sirimu, aku sipa olio konopu mondorumu-kulu olione yombo lupama anju yando konopu mondolemolánje peanga. <sup>12</sup> Mana-yombo selurini kepe Pulu Yemo mongone naa kanoringi. Aku-na-kolo olione oliolio anju yando konopu mondorumu liemu Pulu Yemo olionga konopuna molemo, yuni olio konopu mondopa kondolemo mele olio oliolio aku sipu kamu konopu mondopo kondolemolo.

<sup>13</sup> Yuni yunga Minimu olio sirimu-kulu pilipuli ‘Yu olio-kinia kopu sepa molemo olio yu-kinia kopu sepo molemolo.’ nimbu pilielemolo. <sup>14</sup> Lapane “Mana-yombomane ulu-pulu-kiri selemelemonga ‘Mindili nangi.’ nimbú molko kinjingí kene molko naa kinjangi liku tapondani pu.” nimba yunga Malo lipa mundorumu olio mongone kanorumulu mele semanemo topo yomboma silimulu. <sup>15</sup> ‘Yesusi yu sika Pulu Yemonga Malo.’ ningi, ningi para singí yomboma Pulu Yemo ono-kinia kopu sepa molomba ono Pulu Yemo-kinia kopu seko molonge. <sup>16</sup> Aku pilipuli, Pulu Yemone olio konopu mondolemo pilipuli ‘Yuni sika olio paa konopu mondolemo mondomba.’ nimbu tondolo mundupu kuru mondolemolo.

Pulu Yemo yu konopu mondolimunga pulumu. Konopu mondolko andoko molemele yomboma Pulu Yemo pea kopu seko molemele, yu ono-kinia kopu sepa molemo. <sup>17</sup> Yesusi mana molopa yomboma konopu paa sika mondopa molorumu mele olio aku sipu molomolo kinia olio-kinia konopu paa mondopa kondolimunga ulu-pulumu pemba. Kanu-kinia konopu mondopa kondoli ulu-pulumu olio-kinia pemba kinia Pulu Yemonga kote walemo wendo ombá kinia olio pipili naa kolomolo, ‘Olio akumunga unguri mólo.’ nimbu tondolo mundupu kuru mondopo molemolo. <sup>18</sup> Konopu mondoli ulu-pulumu kinia pipili kololi ulu-pulumu kinia seluna naa pelemelemonga konopu mondopa kondolimuni pipili kololi ulu-pulumu makorolemomonga konopu mondoli ulu-pulumu pelemo yomboma Pulu Yemo kinia yomboma kinia konopu mondokole pipili naa kololemele naa kolonge. Yomboma ulu-pulu-kirima selemele kinia aku siku mongo limili kanu mongomanga pundu tongendo pipili kololemelela. Pipili kololemele yomboma ononga konopumanga konopu mondoli ulu-pulumu kamu naa pelemóla.

<sup>19</sup> Pulu Yemone olio pulu-pulu konopu mondorumu-kulu kiniá olione yu kinia yombo pulu lemóma kinia konopu mondolemolo. <sup>20</sup> Yombo sene ‘Na Pulu Yemo konopu mondolio.’ nilimú-na-kolo yunga genu konopu kiri panjilimú kinia yu kolo toli yombomo mindi molemo. Yuni yunga genu mongone kanopale yu konopu naa mondolemo kinia yuni mongone naa kanolemo Pulu Yemo nambi sepa konopu mondombaye? ‘Manda mólo.’ <sup>21</sup> Pulu Yemone olio ungu-mane sirimu se i-sipa: ‘Yombo se Pulu Yemo konopu mondolemo yombomo yuni yunga genu konopu mondopilila!’ aku sipa ungu-mane se sipa panjerimu kanumu.

## 5

5:1-5

### *Yombomane ‘Pulu Yemonga Bolangoma Molamili.’ Ninguli Selemele Mele*

<sup>1</sup> Pulu Yemone olio ‘Nokopa kondomba ye se lipu mundumbu.’ u nimba talitorumu ye nokoli Karasi akumundu pe Yesusi kanu ye nokoli Karasimu ombo molorumu.’ ningi kuru mondolemele yomboma Pulu Yemonga bolangoma molemele. Yombo sene ye se konopu mondolemo yombomone kanu yemonga bolangomo konopu mondolemóla. <sup>2</sup> Olione Pulu Yemo konopu mondopo, yuni “Saa.” nirimu

uluma pilipu lipu selemolo.' nimbu pilipuli 'Olione yunga bolangoma konopu mondolemolo.' nimbu pilielemolo. <sup>3</sup> Pulu Yemo konopu mondomolondo yuni "Saa." nirimu uluma pilipu lipu semolo. Yuni "Saa." nirimu uluma semolondo kála naa sepo semolo. <sup>4</sup> Pulu Yemonga bolango molemele yomboma mana kondi tolemele uluma "Mólo!" ningú ulu-pulu-kirima toko mania mundukuli kelko naa selemene. 'Pulu Yemonga Malo Yesusi olionga.' nimbu kuru mondolemolumonga olione manalu kanuma "Mólo!" nimbu topo mania mundulimulu. <sup>5</sup> Namelene mana ulu-pulu-kirima "Mólo!" ningú toko mania mundulimiliye? Olio 'Yesusi yu Pulu Yemonga Malo nimbu kuru mondolemolo yombomane mindi kanu uluma "Mólo!" nimbu topo mania mundulimulu lémo.

**5:6-12**

*Pulu Yemone Malo Molomo Mele Nimba Para Sipa, Konde Molopo Kondopo Mindi Pumulú Aulkamo Nimba Sirimu Ungumu*

<sup>6</sup> Pulu Yemone "Ono nokopa kondomba ye se lipu mundumbu." u nimba taltorumu ye nokoli Karasimu pe Yesusi orumu. Yesusi Karasi Pulu Yemonga Malo molopa no lillimula; Pulu Yemonga Malo molopa yunga mememo 'ondondopili.' nirimula. Yu Pulu Yemonga Malo molopa no lillimumu manjipa mólo. Pulu Yemonga Malo molopa no lillimula, meme 'ondondopili.' nimba kolorumula. Mini Kake Sélimu ungu- sikamanga pulumu molopale yuni "Yesusi yu sika Ye Nokoli Karasimu omba molorumu, yu sika Pulu Yemonga Malo." nilimúmu paa sika nilimú. <sup>7</sup> Méle yopokone Yesusi Karasi omba molorumu mele lipa ora silimú. <sup>8</sup> Akuma Minimu kinia nomo kinia mememo kinia, aku yopokonga ungu-pulu selumu.

<sup>9</sup> Mana-yombomane unguma ningú silimili kinia pilipuli 'Sika lepomo.' nimbu pilielemolo-na-kuo mana-yombomane ningú silimili unguma maniadopa. Pulu Yemone yuyu nimba silimú unguma olandopamonga yuni yunga Malo molemo mele nimba sirimu unguma "Paa sika." nimbu piliemulu liemu papu. <sup>10</sup> Akumunga, yombo sene 'Pulu Yemonga Malo yu sika.' nimba kuru mondolemo yombomo yunga konopumuni 'Pulu Yemone aku nimba silimú unguma sika lémo.' nimba kuru mondolemola. Yombo sene 'Pulu Yemone nilimú unguma sika mólo.' nimba kuru naa mondolemo yombomone aku sipa nimba kuru naa mondolemomone 'Pulu Yemo yu kolo tolemo yemo.' nimba kuru mondolemo. Nambi semu-na, kanu yombomone Pulu Yemone yunga Malo molemo mele nimba silimú unguma 'Kolo tokomo.' nimba kuru naa mondolemo kinia aku sipa 'Pulu Yemone nilimú unguma ungu-sikama mólo.' nimba kuru naa mondolemola. <sup>11</sup> Pulu Yemone nimba silimú ungumu i-sipa: Pulu Yemone olio alieli konde molopo mindi pumulú ulu-pulumu sirimu. Kanu molopa mindi puli ulu-pulumu yunga Malo-kinia pelemo. <sup>12</sup> Pulu Yemonga Malo-kinia kopu seko molemele yombomaaku konde molemele molonge ulu-pulumu 'Pulu Yemone sirimu kanumu, ono-kinia pelemo. Pulu Yemonga Malo-kinia kopu seko naa molemele yombomaaku konde mololi ulu-pulumu ono-kinia naa pelemo. Akumu Pulu Yemone nimba silimú ungumu.

**5:13-21**

*Pepá Topa Pora Simbando Olio Alieli Molopo Mindi Pumulú Mele Nirimu Ungo Se*

<sup>13</sup> Ono Pulu Yemonga Malonga imbi pilku yu molemo mele 'Sika.' ningú kuru mondolemele yomboma 'ono 'Alieli molko mindi pungí ulu-pulumu sika ono-kinia pelemo.' ningú tondolo munduku piliangi.' nimbu i pepámo ono topo sikiru. <sup>14</sup> Olio Pulu Yemonga kumbi-kerena pumbu ulu mare mawa semolondo tondolo mundupu kuru mondopole pumulú mele i-sipa: Pulu Yemo yuni 'Wendo opili.' nimba pilipa molemo mele pilipuli yu molemona pumbu mawa semolo kinia 'yu paa sika olionga unguma pilimba.' nimbu kuru mondopo olio pipili naa kolopo yunga kumbikerena sumbi sipu pulimulu. <sup>15</sup> Kanu-kinia 'Olio yu mawa semolo mele sika pilimba.' nimbu

pilipuli u naa sipili 'Mawa semolo kanu mélema olio sika koronga simu lipu pora símulu.' nimbu kuru mondolemolola.

<sup>16</sup> Karasinga yombo sene Karasinga yombo se ulu-pulu-kiri se sembá kanopale, aku ulu-pulu-kiri sembamonga yu kolomba ulu se naa pemu liemu ulu-pulu-kiri sembá mele kanomba yombomone kanu genunga Pulu Yemo mawa sendepili. Aku sembá kinia Pulu Yemone yu 'kelepa konde molopili.' nimbá. We-ulu-pulu-kirimando nikiru. Yombo sene ulu-pulu-kiri se sembamonga yu kolomba ulu-pulu se paa sika pelemo, yombo sene kanu ulu-pulu-kirimu sembá kinia 'Kanu yombomonga Pulu Yemo mawa sendangi.' nimbu naa nikiru. <sup>17</sup> Pulu Yemo kinia yomboma kinia sepo kinjilimulu uluma pali Pulu Yemone 'Ulu-pulu-kirima.' nilimú. Aku-sipa na-kolo ulu-pulu-kiri mare yombomane selemele aku ulu-pulu-kirimanga yombo kolonge uluri naa pelemo. Aku-sipa na-kolo ulu-pulu-kiri selemelemanga mare, yombomaaku uluma selemelemonga kolonge uluri naa pelemo.

<sup>18</sup> Olio pilielemolo, 'Pulu Yemone merimu yunga bolango molemele yomboma ulu-pulu-kirima aliei sekó naa molemele. Pulu Yemonga Malone kanu yomboma nokopa kondolemomonga ulu-kirimanga pali ulu-pulumu pelemo ,kuru,muni ono kamu manda ambolopa mindili naa simba.' aku nimbu pilielemolo. <sup>19</sup> Olio pilielemolo: 'Sika ulu-kirimanga pali ulu-pulumu pelemo ,kuru,muni ma-koleana yombomanga ye nokoli molopa ono ambolopa nokolemo-na-kolo olio Pulu Yemonga bolangoma molemolo.' nimbu pilielemolo. <sup>20</sup> Ulu se pilielemolola. Akumu i-sipa: 'Olio 'Sika-ye molemomo molopa konopumuni pilielemo mele piliangi.' nimba Pulu Yemonga Malo ombo olio pilipa kondoli sirimu. Olio sika-ye molemomo-kinia konopu seluna pupili kopu sepo molemolo, yunga Malo Yesusi Karasi yu-kinia kepe pea kopu sepo molemolola. I Pulu Yemo Pulu Ye Sikamo, aliei konde molopa mindi puli ulu-pulumu pelemo yemo.' nimbu pilielemolola.

<sup>21</sup> Nanga bolango-nanama, we-mélema anjiku 'Olio nokolemele pulu yema.' ningupopo toko mélema kalko silimili méle akuma liku bulu siku 'paa ambolopo popo naa tomolo.' ningu molangi.

'Aku pea nikiru.'

## JONO TALO-SIPAMO

### JONOne Wale TALO-SIPA Pepá Topa Mundorumumu

### Jonone I Pepá Topa Sirimumunga Ungu-Pulu Mare

Ungu-pulu mare inia yakondo gomo 1179 molemo, aku ungumu paa kanani. 'Ye mare andoko "Ungu mare piliangi mane siemili, pea peamili wamili." ningí kinia paa mimi siku kanoko apuruku, kolo tolemele yemando "Pea peamili waa." ni paa naa niengi.' nimba **i pepá talo-sipamo** kepe topa sirimu.

Ya ungu-pulumu pora nikimu.

*1-13 pali*

### Pulu Yemonga Ungu-Sikama Tondolo Mundupu Ambolopo, Ungu-Sikama Naa Ningu Ungu-Lupama Mane Silimili Yemanga Unguma Apurupu Kondopo Paa Naa Piliamili Akumunga Ungu Se

*1-3*

*Jonone Pepámo Tombando Pulu Polopa Torumu Unguma*

<sup>1-2</sup> Na 'Karasinga yombomanga, tapu-ye-andamone ,i pepámo topo,  
Pulu Yemone nimba taltorumu ambomo kinia yunga bolangoma kinia sika konopu mondolio yomboma ,ono pepá topo mundukuru'.

Nane mindi ono konopu naa mondolio. Ungu-sikama olio-kinia pelemo mele pe kepe pepa mindi pumbá akumunga ungu-sikama pilielemene yombomane pali ono konopu mondolemelela.

<sup>3</sup> Ungu-sikamonga ulu-pulumu kinia konopu mondoli ulu-pulumu kinia olio-kinia pepili, Lapa Pulu Yemo kinia, yunga Malo Yesusi Karasi-tolone olio we kondo kolko seko kondoko, olione wale marenga ulu mare sepo kinjimulú kinia olio kondo kolko 'Mindili nangi.' naa ningu, 'Olio konopu pe nipili taka leko molangi.' ningilí.

*4-6*

*Olio Konopu Mondomolo Ulumu Samili Ungu Se*

<sup>4</sup> Lapane olio "ungu-sikama pilku liku saa." nirimu mele nunga bolango marene pilku liku seko molemele kinia kanopole na paa konopu sipu molio. <sup>5</sup> Ambo peangamo, 'Olio oliolio anju yando konopu mondamili.' nikiru akumu nane ungu-maneconde se pepá topo naa sikiru, mólo. Olio kokele Karasinga yomboma molopole pilierimulu ungu-manemo nimbu pepá topo sikiru. <sup>6</sup> Konopu mondomolo mele i-sipa: Olio yuni "Saa." nirimu mele ungu-manema pilipu samili. Yuni "Saa." nimba ungu-mane sirimu ono u-pulu-pulu pilieringi ungu-mane kanumu "Ono anju yando yomboma konopu mondoko molaa." nirimu kanumu.

*7-11*

*Karasinga Ungumu Tondolo Mundupu Ambolopo Molamili Ungu Se*

<sup>7</sup> Kolo toko yombo kondi toko, 'Yesusi Karasi mania omiba mana-ye au lierimu.' naa nilimili yombo awisili koleamanga pali andoko molemele. 'Akumunga 'Olio oliolio anju yando yomboma konopu mondamili.' nimbu pepá tokoro.' Aku yomboma kolo toko yombo kondi tolemele yomboma, Karasi-kinia opa-touma molemele. <sup>8</sup> Ono 'Méle limulú.' ningu kongono kála-seko selemelema 'Omiba mania pumbá.' ningu nokoko kondoko ingi siku ambolko molangi. Ono méle kaloli komindi simbama pali lingí kinia peanga. <sup>9</sup> Yombo se Karasinga unguma tondolo mundupa ambolopa naa molopa, ungu se lupa 'piliambo.' nimba pumu liemu Pulu Yemo yu-kinia pea

kopu seko naa molembele. Yombo se Karasini ungu-mane silimú unguma tondolo mundupa ambolopa molomu liemu Lapa kinia Malotolo yu-kinia pea kopu seko molemele.

<sup>10</sup> Yombo sene ‘Ungu se nimbu simbú okoro.’ nimbale i unguma mele naa nimba ungu se lupa nimba simu liemu yu ononga ulkamanga naa mengo pungu, “Nu okonoye?” ningi ki naa liengi. <sup>11</sup> Yombo sene “Nu okonoye?” nimba ki lipa “Papu okono.” nimbá yombomo ombá yombomone sepa kinjipa molomba yombomo lipa tapondopa yu pea selembele.

**12-13**

*Pepá Topa Pora Sipale Unzu Wallo-Kolte Torumu Unguma*

<sup>12</sup> Nane ungu awisili pepá topo ono silka-na-kolo na ‘olio paa kamu konopu awili sepo sipu molamili kene ono molemelena ombo mongone kanopo ono-kinia ungu nimbu sipu molambo.’ nimbu pilipuli pepá naa toli siye kolkoro.

<sup>13</sup> Nunga gena, Pulu Yemone ‘Nanga molopili.’ nimba, nimba talorumu ambomonga bolangomane “Nu molou.” nilimili.

„Aku pea nikiru.„

## JONO YOPOKO-SIPAMO

### JONOne Wale YOPOKO-SIPA Pepá Topa Sirimu Bokumu

*Jonone I Pepá Topa Sirimumunga Ungu-Pulu Mare*

Ungu-pulu mare inia yakondo gomo 1179 molemo, aku ungumu kanani.

Jonone ye mare “Karasinga unguma andoko mane siengi pang.” nimba lipa mundorumu yema Esia poropinji kolea senga Karasinga yombo talapemonga ye sene “Ya naa wangi. Anju paa.” nimba topa makororumu. Kanu yemonga imbibu Diyotepas. Yombo marene Jonone lipa mundorumu-na oringi yemando “Pea peamili wangi.” niringi kinia Diyotepasini kanu yombomando “Karasinga yombo talapena ultu paa.” nimba topa makororumula. Jonone i pepámo ye Gayasi molorumuna topa mundupa nimbale: “Ye mare “Koleamanga andoko mane siengi.” nimbu lipu munduliu yema “Pea peamili wangi. Ononga unguma pilamili.” ningu selenomo paa seko kondoleno.” nimba pepámo topa, “Diyotepasini sepa kinjilimumunga yu ombo kanopole yu tondolo mundupu mane simbú.” nimba pepámo torumula.

Ya ungu-pulumu pora nikimu.

*1-15 pali*

**‘Sika.’ Nimbu Kuru Mondolemolo Mele Mindi Pilipu  
Lipu Molamili.’ Ningu Kanoko Kondoko Molko, Semane  
Peangamonga Opa-Toumane Nilimili Unguma Naa Pilku  
Bulu Siengi Ungu Se**

*1*

*Pepámo Tombando Pulu Polopa Torumu Ungumu*

<sup>1</sup> Na ,Karasinga yombomanga, tapu-ye-andamone nanga genu peangamo, sika paa konopu mondolio ye Gayasi nu ,i pepámo topo sikiru.

*2-4*

*Ye Gayasi Sumbi Sipa Molorumu Mele Pilipale Jono Konopu Sirimu Semanemo*

<sup>2</sup> Nanga genu peangamo, nane ‘nunga minimu pepa kondolemo aku sipa nuni kongonoma senindu umbuna se wendo naa opili seko kondoko, nu kuru se naa topili molko kondani.’ konopu leker. <sup>3</sup> Genupili ye mare ongo nando semane toko ninguli: “Nu sika-ungumu paa ambolko kondoko, nuni ungu-sikama paa pilku liku seko moleno.” niringi pilipuli na paa konopu sirindu. <sup>4</sup> Nanga bolangomane ungu-sikama pilku liku seko molemele mele pilipuli konopu siliu mele paa olandopa.

*5-8*

*Ye Gayasini Sepa Kondorumu Semanemo*

<sup>5</sup> Nanga genu peangamo, ,olionga, genupili nunga koleana olemelema sika paa ponenge leko olemele-na-kolo ono paa liku tapondoko nokoko molenomonga paa seko kondoleno. <sup>6</sup> Nuni ono konopu mondoko nokoleno mele onone Karasinga talape- yomboma ningu siringi. Nuni ‘Pulu Yemonga kongonomo sekero.’ konopu leko ‘Aulkana kere-langì nolko pang.’ ningu liku tapondonu liemu peanga. <sup>7</sup> ‘We ultu molemele yombomane naa liku tapondangi.’ ningu kanu yema ono ‘Yomboma Yesusinga imbi paa piliangi.’ ningu ,ononga pulu-koleama munduku kelko, andolemele. <sup>8</sup> Akumunga, olione kanu yema lipu tapondopo kere-langì sipu

‘Ulkamanga peangi.’ nilimulu kinia peanga. Onone ‘Ungu-sikamonga kongono selemelemonga lipu tapondamili.’ nimbu aku samili.

**9-11**

*Ye Diyotepasini Sepa Kinjerimu Semanemo*

<sup>9</sup> Karasinga yombo talapemo pepá se topo sirindu-na-kolo Diyotepasini yu ‘ononga ye-awilimu molombo.’ konopu lepa molemo yemone olionga unguma naa pilipa limú.

<sup>10</sup> Akumunga, na ono molemelena ondu liemu yuni olionga ungu-bulkundu nindilimú mele nimbu para simbú. Akumu mindi mólo. Yuni genupili ponenge leko olemele kinia ‘Okomeleye?’ nimba ki naa lipa “Pea molamili.” naa nimba, yombo-ponenge olemelema “Pea pe-pamili waa.” nilimili kinia yuni “Naa mengo pangí. Mólo!” nimba, Karasinga yombo talape molemele ulkana makoropa pena pena selemo.

**11-12**

*Ye Demitiasini Ulu-Peangama Serimu Semanemo*

<sup>11</sup> Nanga genu peangamo, ulu-kirima kanoko manda manjiku naa sei. Ulu-peangama mindi kanoko manda manjiku sani. Yombo se ulu-peangama selemo yombomo Pulu Yemonga yombomo molemo. Yombo se ulu-kirima selemo yombomone ‘Pulu Yemo-kinia kopu sepo molambili.’ u naa nimba yu molemo mele kuru naa mondorumu.

<sup>12</sup> Yombomane ye Demitias ‘yu ye peangamo’ nilimili. Yuni sepa kondolemo mele ungu-sikamone lipa ora silimúla. Nane kepe ungu-sikama mindi niliu nu pilieleno yemo molio kanumu nane ‘Yu molopa kondolemo.’ niliula.

**13-15**

*Pepá Topa Pora Sipale Ungu Wallo-Kolte Torumu Unguma*

<sup>13-14</sup> Na ungu awisili pepá topo silka-na-kolo ‘olto paa kamu konopu awili-sepo sipu molambili kene nu molenona ombo mongomone kanopo nu-kinia ungu nimbu sipu molambo.’ nimbu pilipuli pepá naa toli siye kolkoro.

<sup>15</sup> Nu konopu pe nipili molani.

Nunga yombo pulu lemomane “Nu molou.” nilimili.

Nuni olionga yombo pulu lemó nu-kinia molemelema yu-mele-mele imbi leko “Olione ‘Ono molaa.’ nikimulu.” nieni.

„Aku pea nikiru..”

## JUTU JUTUni Pepá Topa Mundorumu Bokumu

*Jutuni I Pepá Topa Mundorumumunga Ungu-Pulu Mare*

Imbi “**Jutu**” niringi akumu ponjiku niringi (Kewa-unguna we “**Jut**” niringi). Ipurunguna “**Juda**” ningi, Giriki-unguna “**Judasí**” niringi. **Ye Judasi se** Yesusi lipa yunga opa-touma sirimu ye Judasi Isikeriote. Kanu yemo u kolorumu kanumu. **Judasí se** Yesusi lombili andoli ye se, pe Yesusini “Nanga kongonomo sende-paa.” nimba lipa mundorumu yemanga ye sela molorumu. Kanu yemo yunga ungu mare LLuku 6:16, Lipa Mundorumu Yema 1:13 kinia molemo.

**Judasí se** Yesusi genu Judasi. Yunga ungu mare Mateyu 13:55, Mako 6:3 kinia molemo. ‘Kanu yemo yuni i pepámo torumu.’ konopu lemele. Jutu kolomongo 1 kana. Jutu kinia Jemisi kinia genungulutolo, kanu genungulutolo Yesusinga genutolo niringi ungu mare Mateyu 13:55, Jono 7:3-10, Lipa Mundorumu Yema 1:14, U-Korini 9:5, Gallesia 1:19 kinia molemo.

**Jutu** ni yombo namele i pepámo topa sirimuye? Mimi sipu naa pilielemolo. Kolomongo 1 kolea se naa nimba, Juda yomboma molo Juda naa molko yombo lupama naa nirimu. ‘Lapa Pulu Yemo kinia Yesusi Karasitolonga yomboma topo sikiru.’ mindi nirimu.

I pepámo kinia **Pe-Pita** kinia selu-sipa mele; Karasinga yomboma toko siringilimunga ungu-pulumu selumu. **Pe-Pita** kolomongo-awili 2 kinia **Jutu** kolomongo 4-18 kinia sika paa nondopa selu-sipa mele. **Pe-Pita** 2:1 kinia **Jutu** 4 kinia paa kana. Inia yakondo gomo 1166 **Pe-Pita** pepámonga ungu-pulumu kananila. **Jutuni** ‘Karasinga yomboma semane peangamonga opa-toumanga unguma naa piliangi.’ nimbándo i pepámo torumu. **Jutu** 3 nimbale: “‘Sika.’ nimbu kuru mondolemolo aulka selumu mindi Pulu Yemone olio yunga yomboma sirimu. Olio ‘Sika.’ nimbu kuru mondolemolo ulu akumu yombo sene manda topele naa tomba.” nilimú.

Ya ungu-pulumu pora nikimu.

*1-25 pali*

**Ono ‘Sika.’ Ningu Kuru Mondolemele Mele Paa Mimi Siku  
Pilku Molko, Semane Peangamonga Opa-Tou  
Yombomanga Ungumu Naa Pilku Bulu Siengi Ungu Mare**

*1-2*

*Jutuni I Pepámo Tombando Pulu Polopa Torumu Ungumu*

<sup>1</sup> Na Jutu, Yesusi Karasinga kongonomo sendeli kendemande-ye se, na Jemisinga genuni i pepámo topo,

‘Pulu Yemone,’ “Nanga yomboma molangi waa.” nirimu yomboma, Lapa Pulu Yemone konopu mondopa, Yesusi Karasini nokolemo yomboma i pepámo topo sikiru.

<sup>2</sup> ‘Pulu Yemone,’ onone wale marenga ulu mare seko kinjingí kinia ono kondo kolopa “Mindili nangi.” naa nimbá mele kinia, ‘Ono konopu pe nipili taka leko molangi.’ nilimú mele kinia, ono konopu mondopa molopa, anju yando konopu mondonge ulu-pulumu silimú mele kinia, olandopa olandopa pupili.

*3-19*

*Semane Peangamonga Opa-Touma Karasinga Yombo Talapena Oringi Yomboma  
Molko Kinjingí Mele Ungu Se*

<sup>3</sup> Paa nanga pulu lemó yomboma, i pepámo ono topo simbundu Pulu Yemone na kinia ono kinia olio lipa tapondopa, mindili nolemolá aulkana wendo lipa, yu-kinia pea molopo kondomolo aulkana lipa mondolemo mele ‘Pepá topo nimbu siembo.’ nimbu tondolo mundupu konopu liendu. Aku-sipa na-kolo kelepo pilipuli kiniá pepá topo ono nimbu simbú sekero akumu ‘Sika.’ ningu kuru mondolemele ulumu ‘Pulu Yemone,’ u yunga yomboma paa kamu waltikele sirimu kanumu ‘Mania naa pupili. Akumu yombo sene paa topele naa topili.’ ningu nokoko kondangi.’ nimbu ‘pepá se topo simbú.’ nimbu pilipuli i pepámo ya lisipu tombo tokoro. <sup>4</sup> Kanumunga pulumu i-sipa: Ono Karasinga yombo talapema molemele ye mare kiyongo ningu ongo molemele, kanu yemando Pulu Yemone koronga-u nirimu, yunga bokuna molemo mele, nimbale:

‘Kanu yemanga kote walemo wendo ombá kinia

“Seko kinjeringi kene

kolea-kirina pungu molko kinjangi.” nimbu.’

nimba bokuna molemo kanumu. Ono Pulu Yemo liku bulu siku molko kinjiku, yunga unguma topele toko, ‘Yuni yomboma we kondo kolopa lipa tapondolemo semane peangamo mania pupili.’ ningu topele toko, aku semanemo munduku kelko kolali seko, ‘Pulu Yemone yomboma we kondo kololemomonga olio amboma kinia wa ulu-kirinale semolo kinia olio we kondo kolopa unguri naa sembá.’ ningu aku seko mindi molemele. Kanu yemane olionga Ye Awili Tondolo Olandopa Ye Nokoli Yesusi Karasimu liku bulu siku “Yu uluri mólo.” nilimilila. ‘Kanu yema ono molemele ongo molko aku siku selemelemonga pilipuli i pepámo tokoro.‘

<sup>5</sup> Ye-Awilimuni yunga ‘Isirele,’ yomboma lipa tapondopa ‘mindili nongo moloringi, kolea Isipi wendo lipa memba purumu akumu ono pilieemele-na-kolo ‘Kelko piliangi.’ nimbu pepá topo aku semanemo kelepo topo siembo. Ye-Awilimuni ono wendo lipa memba pumbale nirimumuni, pe ‘Yuni olio lipa tapondomba.’ ningu kuru naa mondoko ‘yu liku bulu siringi,’ yombo awisili topa kondorumu akumu ono pilieemele-na-kolo kelko piliangi.

<sup>6</sup> Mulu-koleana angello mare Pulu Yemone ‘ono méle mare nokangi.’ nimba tondolo se sirimu mélema taka leko naa nokoko, moloringi koleamo munduku kelko anju puringi angellomanga semanemo pilieemele akumu kelko piliangila. Aku seringimunga Pulu Yemone ono ka sipa, lepa mindi pumbá ka-sénene ka topa, kolea paa simbulu tolina lipa sukundu mundorumu. Pulu Yemonga kote-wale awilimu wendo ombámonga nokoko molemele.

<sup>7</sup> Kanu angellomane seko kinjeringi mele kolea-awili Sodomo Gomoratolo kinia, aku koleatolonga nondopa lierimu kolea mare kinia, kanu koleamanga moloringi yombomane aku siku seringila. Kanu yomboma andoko wapora toko, ambomane amboma kinia ulu-kirinale seko, yemane yema kinia ulu-kirinale seko, aku ulu paa kirima seringi kanumu. Kanu yomboma sepe alieli nomba pepa mindi pulimú sepemone topa kalorumu. Aku semanemo kelko piliangila. Ono seko kinjeringimunga ‘Pulu Yemone,’ mindili sirimu aku ulumuni ‘Olio manda manjipu semolo kinia Pulu Yemone olio aku sipa sepa kinjimba.’ ningu piliangi.’ nimba liepi-liepi tolemo.

<sup>8</sup> Aku siku mele ‘ono-kinia ne molemele,’ yema ‘ononga konopu seko sembambu sindingí selemele kanu yemane,’ aku siku ulu kirimu selemele. Uru-kaima lupa lupa mare seko kanokole ono onono ononga kangikundu ulu kalaro mololima selemele. ‘Pulu Yemo kinia namba pelemo yombo awilima kinia, akumanga ungu-mane sene olio naa nokolemo.’ ningu liku bulu siku, mulu-koleana ‘angello,’ tondolo pulimú awilima ungu-taka tondolemelela. <sup>9</sup> Aku-sipa na-kolo ‘kanu yemane angellomanga ungu-taka tondolemele mele,’ angellomanga ye nokoli awili Maikelene kepe naa serimu.

Maikele kinia ‚kurumanga nokoli, depelemo-tolone “Mosinga óromo liembili.” ningū aranale seringili kinia Maikelene yundu “Depelemo, nu seko kinjikinu mele nu iri topo ungu-taka tondambo.” nimba ‚sembando paa pipili kolopa, naa serimu. Yuni ‚depelemondo, nimbale: “Seko kinjikinumunga Ye-Awilimuni nu iri topa “Seko kinjikinu.” nipili!” nirimu. <sup>10</sup> Maikelene depelemo iri tombando pipili kolorumu, na-kolo ne ‚ono-kinia molemele, yemane ungu marenga puluma pilku sundulimili unguma ‘Ungu kirima.’ ningū ungu-taka tondolemele. ‚Ono méle-takaramane selemele mele selemele.,’ Méle-takaramane ulu se sengendo konopu kimbú naa siku walu selemele. Aku siku konopu kimbú naa siku uluma walu andoko selemelemonga ono mélse molo yombo se topa kondomba aulkana pulimili kinia mindili nongo kololemele. Kanu yema aku sipa. Méle-takaramane ungu kanga-kolte pilkuli andoko selemele mele kanu yema onone-la ungu kanga-kolte mindi pilkuli walu uluma seko unguma nilimili akumunga ono mindili nonge aulkana pungíla.

<sup>11</sup> Ono paa mindili nongo molko kinjing! Kénene serimu mele ono aku siku selemele. ‚Pulu Yemone ungu-umbu tondorumuma pilipa yomboma nimba sirimu ye, Bellamene sepa lawa serimu mele ono aku siku ‚Yomboma lipu tapondopo kongonomo we samili.’ naa ningū, ‚Kou-mone liemili.’ ningū uluma selemele. U ‚Pulu Yemone “Yomboma nokangili.” nimba Mosisi Eronotolo nimba taltopa tondolomo sirimu yetolonga, unguma ye Korane “Naa pilimbu.” nimba siye kolorumu mele ne yema ‚aku siku Pulu Yemo seko kinjilimilimunga, Kora kinia, Kora-kinia seko kinjiku kála seringi yema kinia, akuma topa kondorumu mele ne yema kepe Pulu Yemone “Mindili nongo kolangi.” nimbála.

<sup>12</sup> Erili se yombo senga kangina selemo kinia yombomo manda naa molemo, molo nona andoli sipi se nona pulimú kinia kou sene ne sipimu topa bultumbando nona mania pelemo, aku sipa mele, ono Karasinga yomboma anju yando konopu mondoko, seluna kere-langí nongo molemele kinia kanu ‚kolo toli, tapu-yema ono onono tapu seko, ono ‚Karasinga yomboma, molemelena pungu pea molko kalaro mololi uluma seko, ono onono molko kere-langí awisili kinia no awisili nongo sengendo pipili naa kolko we nolemele. ‚Kupa topa pombora tolemo kinia kanokole ‘Lo tomba.’ ningū konopu siku nokoko molemele-na-kolo, poporomene kupama we topa memba pulimú mele kanu yema aku silima molemele. Unju se mongo naa topa kololemo kinia pulu akuku eltolemele mele ono aku siku molemele. Ono wale talo-siku kololemele yema. ‚Aku sipa yomboma lipa tapondomba ungu se kanu yema-kinia naa pelemo.,’ <sup>13</sup> Poporome tolemo kinia nomu-kusa bea lepa anju yando pulimú mele ono aku siku ulu-kirima sengendo pipili naa kolko we selemele. Noma meke-make melemó kinia yombomane kanolemele mele onone pipili naa kolko ulu-kirima selemele mele aku sipa mona lemó. Kombokandi mare ononga aulkana naa pungu aulka lupamanga andoko pulimilimunga ‚Pulu Yemone, kanu kombokandima kolea simbulu topa paa pombora tolemo kolea kiri se nimba taltopa ‘Pangi.’ nirimu kanu kombokandima mele ne yema aku siku molemelemonga akuna pungíla.

<sup>14-15</sup> Inoko yu pulu-pulu anda-kolepa Atamenga moloringi yemanga yopoko-pakara sipamonga molorumu yemo, yu Pulu Yemone ungu-umbu tondorumu ungu se pilipale kanu ‚kolo toli, yemando nimbale:

“Kaname!  
Ye-Awilimu yunga ‚angello, kake seli  
tausini paa awisili-kinia okomo.

Yu yombomanga pali kote sendepa,  
yunga ungumu naa pilku, liku bulu siku,  
yu kanopa kiri pilielemo uluma  
selemele yomboma kinia,  
yunga ungumu naa pilku

ulu-pulu-kiri selemelemane  
 yu ungu-taka tondoko ungu kirima  
 tondolo munduku nilimili yomboma kinia  
 "Ono seko kinjeringi ulumanga pundu toko  
 mindili nangi." nimbá."

nirimu. <sup>16</sup> Ulu „peanga,“ mare kanu yema-kinia wendo olemo kinia alieli konopu kiri panjiku “Ulu-kirima.” ningu “Seko kinjikimili.” ningu, aku siku ungu awisili nilimili. Ono onono konopumuni pilku ‘I-sipu semolo kinia konopu simulú.’ ningu pilielemelé ulu-kirima mindi seko, ono kála seko ono onono kape ningu imbima ambolko paka toko, ‘Yombomane olio méle mare siengi.’ ningu kondi toko ningu pangu singíndu yomboma kape ningu “Ono yombo peangama.” nilimili.

**17-23**

*Ononga ‘Sika.’ Ningu Kuru Mondolemele Ulumuni ‘Sepa Tondolo Mundundopili.’  
 Ningu Molangi Ungu Se*

<sup>17</sup> Aku-sipa na-kolo paa nanga pulu lemó yomboma, olionga Ye-Awili Yesusi Karasini “Nanga kongonomo sende-paa.” nimba lipa mundorumu yemane u niringi ungu se pilieringi mele kelko piliangi. Pe wendo ombá mele u ningu sikuli <sup>18</sup> ono ‘Karasinga yombomando, ninguli: “Yesusi kelepa ombá kinia mulu matolo pora nimbá, walemo nondopa wendo ombá kanu walemanga ye mare ongo ‘Pulu Yemonga unguma, ungu-taka tondoko liku bulu siku,’ ononga konopumuni pilingí uluma Pulu Yemone kanopa kiri pilimba uluma mindi seko, ‘Sumbi sipu molamili.’ ningí yomboma, ungu-taka tondoko, senge.” niringi kanumu kelko piliaa. <sup>19</sup> ‘Yesusini lipa mundorumu yemane pe aku sipa yema wendo onge niringi mele, kiniá kanu yema ono molemelena ongo molko, ono Karasinga talape yomboma toko bulu-balú siku ‘lupa lupa molangi.’ nilimili. Kanu yema ya ma-koleana we-yombomane pilku selemele mele mindi seko, Mini ‘Kake Sélimu, konopumanga naa molemo yema molemele.

<sup>20</sup> Aku-sipa na-kolo nanga paa pulu lemó yomboma, ononga ‘Sika.’ ningu kuru mondolemele ulu paa kake seli uluma Pulu Yemone yuyu sirimu akumuni onono tondolo paa olandopa pumbá uluma seko, Mini Kake Sélimu konopumanga molopa lipa tapondolemomonga ‘Pulu Yemo,’ kinia ungu niengi. <sup>21</sup> ‘Olionga Ye-Awili Yesusi Karasi omba ono kondo kolopa mindili silka uluma mundupa kelepa, ono alieli konde molko kondoko mindi pungí ulu-pulumu simbando ombá.’ ningu nokoko molkole ‘Pulu Yemone ono konopu mondolemo mele paa kamu konopu mondopa mindi pupili.’ ningu mimi siku pilku, yu-kinia nondoko pungu molangi.

<sup>22</sup> Yombo mare ‘Sika.’ ningu kuru mondoringi mele kelko konopu talo sepa pepili molemele yomboma kondo kolko ‘liku tapondoko,’ <sup>23</sup> yombo mare sepe-koleana pungí selemelema lisiku yando liengi! Yombo mare ‘seko kinjingí kinia kanokole, kondo kolko liku tapondangi. Liku tapondongendo ‘Olione kepe mindili nomolo uluma semolo.’ ningu, pipili kolko, ononga u-konopumane pilku seringi ulu-pulu-kirimane ononga mulu- maminama kepe kalaro mondorumu kalaroma molemo mulu-maminama paa kanoko kiri pilkuli, kanu méle kalaro molemo mélema ‘Pulu Yemone kanopa kiri pilielemo mélema.’ ningu, ambolongendo ‘Olio kalaro se mondomba.’ ningu kanu yomboma paa mimi siku kanoko liku tapondangi.

**24-25**

*Pulu Yemonga Imbimu Ambolopo Paka Tondamili Ungu Se*

<sup>24</sup> ‘Ono ulu-pulu-kiri sene naa ambolopa topa mania naa mundopili. Karasi tondolo munduku ambolko, munduku naa keleangi.’ nimba ono manda nokopa kondopa, pe yu “Mindili nangi.” nimbá ulu se konopumanga paa naa pepili konopu awisili siku molangi ono yu molemo kolea tondolo pa selina manda memba pumba,

<sup>25</sup> aku sipa manda sembá Pulu Ye selumu mindi molemomone olionga Lipa Tapondopa Mindili Nolemolá Aulkana Wendo Limú Yemo yu, olionga Ye-Awili Yesusi Karasini olionga nimba senderimumunga aku sipa molemo Pulu Yemonga imbi paa ola molopa, mélemanga pali yu paa ye nokoli awili olandopamo molopa, yu tondolo awili-sepa pumba, namba pelemo yombomanga pali yu namba olandopa pepa, yu awili-sepa pa sélimu-kinia molopa, koronga-u mulu matolo naa liepili kepe yandopa kiniá kepe pe-pe kepe aku sipa molorumu mele we molopa mindi pulimú pumbámonga yu kape nimbu imbi ambolopo paka tondamili. Sika aku sipa sepili.

„Aku pea nikiru.„

## **LIPA ORA SIRIMU Pe Wendo Ombá Mele Karasini Jono U LIPA ORA SIRIMU Bokumu**

### *I Bokumunga Ungu-Pulu Mare*

I bokumu ye Jonone torumu (1:1,4,9, 22:8). Aku-sipa na-kolo **Jono semonje?** Yombo awisilini pilkuli 'I ye Jono yu Yesusini "Nanga kongonomo sende-paa." nimba lipa mundorumu yemanga ye Jono.' ningi pilielemele (Mateyu 10:2). Aku liemu Semane Peangamo kinia pepá yopoko kinia i bokumu kinia ye selumuni torumu.

Jonone i bokumu torumumunga ungu-pulu se i-sipa: Romo ye paa awili kumbina Sisamone nimbale: "Pulu ye se molio kene nokolio yombomane pali na kape ningi popo tangi." nimba ungu-mane se sipa panjerimu. Aku-na-kolo Juda yomboma kinia Karasinga yomboma kinia ononga Pulu Ye selu mindi 'Pulu Yemo' ningi popo toko kape ningi imbi ambolko paka tondoringimunga "Sisamo paa naa popo tomolo. Mólo." niringi. Karasinga yombomane "Mólo." niringimunga Romo gapomanomone ononga yombo awisili mindili sipa ka sipa ono sepa kinjerimu. Jono kepe nomuna kolea kanga se lierimu akuna ka sipa panjerimu. Patemosi akuna pepale i bokumu torumu (1:9, ma-koleamanga pikisamo gomo 1213).

Jonone pepá torumu unguma yuyu konopumuni pilipale naa torumu. **Yesusini yu lipa ora sirimu uluma** kanopale pepá torumu (1:10-11). Kanu ulu kanorumumanga ulu mare olio naa molamili u sika kamu wendo orumunje, naa pilielemolo. Ulu mare sika pe wendo ombánje (1:1,19). Aku-sipa na-kolo ulu mare kinia méle mare kinia kanorumu akuma sika mélema mólonje. Unzu-ikuma perimu. Unzu paa awisili ungu-iku torumu, akumanga ungu-pulumu yombo marene ungu awisili angelema nilimili.

Kurumanga nokoli Setene yu sika tondolo pulimú-na-kolo yunga tondolomo mania purumu pumbá; Pulu Yemonga Sipisipi Walomonga tondolo olundopamo sika paa pelemo pembamo. Pulu Yemonga opa-touma wendo onge, umbuna mare sika wendo ombá-na-kolo Yesusi sika walte ombo Setene kamu topa mania mundupa yunga yomboma lipa memba pumbála, yu kinia pea kamu molopo kondomolo. 'Akumu pilkuli Karasinga yomboma Yesusi tondolo munduku ambolko molko, ungu talo pea naa pilku, ungu sikamo munduku naa kelko, tako leko molangi.' nimba pepá torumu. Unzu mare i-siku kanoko piliani: 2:10, 3:10; 2:13, 6:9; 2:14-15.

Pulu Yemo kinia Yesusitolo kape ningi olonga imbi ambolko paka tondoringi ungu awisili molemola. Umbu-Unguna topele tomolondo pererimulu-na-kolo ungu paa peangama. Paa kanokole aku sikula olo kape ningi imbi ambolko paka tondaa! I unguma kanangi: 4:8,11, 5:9-10,12,13ekendo, 7:10,12, 11:15,17-18, 12:10-12, 15:3-4, 16:5,7, 19:1,5-7.

Ungu-pulu pokore boku ambolkonomonga pealemekondo "24. laip", "44.3. Pikinini Sipsip" molemo.

Ya ungu-pulumu pora nikimu.

### *Kolomongo-Awili 1-3*

## **Karasinga Yombo Talape Yopoko-Pakara Moloringina Jonone Pepá Topa Mundorumu Unguma**

1:1-3

*Boku Tombando Pulu Polopa Torumu Ungumu*

<sup>1</sup> Pe wendo ombá mele Pulu Yemone ‘Yunga kendemande yomboma piliangi.’ nimba Yesusi Karasi lipa ora sirimu mele inia molemo. ‘Olio piliamili.’ nimba Yesusi Karasi yuni yunga angellomo na yunga kendemande ye Jono molorunduna lipa mundorumu. <sup>2</sup> Nane kanoruntu mele pali nimbu para sikiru. Pulu Yemonga unguma kinia, Yesusi Karasini “Pulu Yemone nilimú unguma sika-unguma.” nilimú mele kinia, lipu ora sikiru.

<sup>3</sup> Pe wendo ombá mele i bokuna nimba silimú unguma yomboma pilku molangi kanoko nengu singí yomboma kinia, bokuna molemo unguma pilkuli konopumanga mondoko pilingí yomboma kinia ono Pulu Yemone “Konopu peanga pepili molko kondangi.” nilimú aulkana molonge. Ulu wendo ombá nilimúma nondopa wendo ombá akumunga, aku siku senge yomboma ono Pulu Yemone “Konopu peanga pepili molko kondangi.” nilimú aulkana molonge.

1:4-8

### *Jonone “Molko Kondaa.” Nirimu Ungumu*

<sup>4</sup> Ono kolea Esia poropinji Karasinga yombo talape yopoko-pakara molemelena na Jonone i pepámo topo sikiru.

We kondo kololi ulu-pulumu kinia konopu pe nili ulu-pulumu-tolo ono-kinia pepili. U molorumu, kiniá molemo, pe ombá Pulu Yemone aku ulu-pulutolo sipili. Kanu yemo molopa koleama nokolemo koleana wendo olemele mini yopoko-pakarane aku ulu-pulutolo siengila. <sup>5</sup> Yesusi Karasi, Pulu Yemonga unguma kolo naa topa sumbi sipa nimba silimú yemo, yombo kololima lomboroko ola molonge yombomanga yu kumbi lepa lomboropa ola molorumu yemo, ma-koleana pali molemele ye nokoli awilimanga ye nokolimu molopa nokolemo ye nokoli paa awilimu, yuni aku ulu-pulutolo ono sipilila.

Olio konopu mondolemo yemo, yuni yunga meme ‘olionga’ nimba ondondorumu mememone olionga ulu-pulu-kirima ‘Mania pupili.’ nimba kulu tondopa, <sup>6</sup> ‘Yunga Lapa Pulu Yemonga kongonomo sendangi.’ nimba ‘Olio yu-kinia mélema nokopo molopo, Pulu Yemo popo tondoli yomboma molangi.’ nirimu yemo, yunga imbimu alieli-alieli paa ola molopa, yomboma nokomba tondolomo yu-kinia kamu alieli-alieli pepa mindi pupili. Aku sipa wendo opili.

<sup>7</sup> Kaname! Yu kupana molopa ombá sepa molemo.

Ombá kinia yombomane pali

ononga mongomone kanonge.

Yu toko kondoringi yombomane kanongela.

Yu ombá kinia

ma-koleana yomboma pali kola awili-seko senge.

Sikaaku sipa wendo ombá.

Aku sipa sepili.

<sup>8</sup> Tondoloma pali yu-kinia pelemo Pulu Ye Awilimuni nimbale: “Na u kumbi lepo moloruntu pe akilepo molombo yemo.” nikimu. Kanu Yemo yu kiniá molemo mele u molorumu, pe ombá yemo.

1:9-20

### *Jonone Karasi Kanorumu Semanemo*

<sup>9</sup> Na ononga genu Jono, ono-kinia olio Yesusinga yomboma molemolomonga mindili nombo umbuna melemolo. Mindili molo umbuna se wendo olemo kinia ‘Olio mindilima we namili.’ nimbu tondolo mundupu molopo, olio Pulu Yemo ye nokoli kingimu molopa nokolemo talapena molemolo yomboma. Na Pulu Yemonga unguma yomboma nimbu sипу, Yesusinga semanemo topo siliumunga na ka siku nomu-kusana sukundu ma-kanga lemó akumu ‘Kolea Patemosi’ nilimili akuna ka siku mengo oringi molio. <sup>10</sup> Ye-Awilimunga wale se wendo orumu kinia Mini Kake Sélimuni na

molorunduna ombo na ambolorumu kinia nanga bulkundu ungu tondolo se, bikollo mele, pilierindu. <sup>11</sup> Aku ungu nirimumuni nimbale: "Nu mongone kanoni mele pepána tokole Karasinga talape yopoko-pakara, Epesasi kinia, Simena, Pekamame, Tayataira, Sadisi, Pilladepia, LLadosia kinia, aku taonomanga Karasinga yombo talape molemelemanga pepá toko mundani." nirimu.

<sup>12</sup> 'Nawene nikimunje?' nimbu bulkundu topele topo kanorundu kinia kou-gollone seli sepe-llame yopoko-pakara lierimu kanorundu. <sup>13</sup> Kanu sepe-llamema lierimu suku-singina ye se gilierimu, yu mana-ye none seli se, yu ye nokolimane selemele mele wale-pakoli sulu se pakopa kimbu aki topa, kou-gollone seli kako mele se uluwina lierimu. <sup>14</sup> Yunga pengemo kinia penge-indi pali paa kake sélimu, yu kongi sipisipimanga indi kinia kalopora kinia akutolo kake selemo mele serimu. Yunga mongotolo sepe mele tondolo pa serimu. <sup>15</sup> Yunga kimbutolo kou-kopa sepena kalolemele kinia tondolo pa selemo mele pa serimu. Yunga ungumu no topa ungu nilimú mele ungu nirimu. <sup>16</sup> Yunga ki-lomekondo kombokandi yopoko-pakara ambolorumu. Opa seli lu-pulta ekendo ekendo pea nee mololimu yunga kerena perimu. Enane tondolo mongo takele selemo mele yunga kumbikeremo aku sipa none serimu.

<sup>17</sup> Nane yu kanorundu kinia na yombo kololi none sélimu yunga kumbikerena sumbi sipu tamalu perindu. Kanu-kinia yuni yunga ki-lomekondo na ambolopa nimbale: "Nu pipili naa kolou. Na Kumbina ,Ye,mo Pe Akilipa ,Ye,mo. <sup>18</sup> Na Konde Mololi ,Ye,mo. U sika kolorundu-na-koło kiniá na kamu konde molopo mindi púlimu molio kanumu. Na kololi ulu-pulumu kinia kololi yombomanga koleamo-tolonga kitolo ambololio.

<sup>19</sup> Akumunga, nu kanokono mele semanema pepána tani. Ulu kiniá wendo ole-moma kinia pe wendo ombá uluma kinia pepána tani. <sup>20</sup> Kombokandi yopoko-pakara kinia kou-gollone seli sepe-llame yopoko-pakara kinia kanonu akuma ungu-iku mele akumanga ungu-pulumu i-sipa: Kombokandi yopoko-pakara nanga ki-lomekondo ambolondu akuma na Karasinga yombo talape yopoko-pakaranga angelloma; sepe-llame yopoko-pakara akuma na Karasinga yombo talape yopoko-pakara." ,nirimu..

## 2

2:1-7

### *Epesasi Taono Karasinga Yomboma Nimba Mundorumu Ungumu*

<sup>1</sup> 'Aku yemone aku nimbale pe nando nimbale:,' "Epesasi taono Karasinga yombo talapemonga angellomondo pepá toko i-siku ningu mundou:

"I ungu pepána tokoromo ye kombokandi yopoko-pakara ki-lomekondo ambolopa, kou-gollone seli sepe-llame yopoko-pakara lemóna andolemo yemone 'aku angel-lomondo nieni.' nimba, nimba mundukumu. Yuni nimbale:

<sup>2</sup> seleno mele pali na kanolio. Kongonomo tondolo munduku seko, umbunama wendo olemo kinia munduku naa kelko tondolo munduku molemele mele kanolio. Ulu-pulu-kiri selemele yema kanoko paa kiri pilku seluna andoko naa molemele mele kanoliola. Ye marene "Olio Yesusini lipa mundorumu yema molemolo." nilimili-na-koło kolo tolemele yema nuni 'Sikanje.' ningu apuruku pilku kanokole 'Ono kolo tokomele.' ningu kanoleno mele kanolio. <sup>3</sup> Nanga imbimu ambololenomonga yombomane nu seko kinjilimili-na-koło nu kanu umbunama we mengo nanga kongonomo siye naa kololeno akumu na kanolio.

<sup>4</sup> Akumu peanga-na-koło nane nu-kinia ungu se pelemomo niembo: Nuni u pulu polko na mondoko pilkuli paa konopu mondorunu mele kiniá aku siku na konopu naa mondoleno. <sup>5</sup> U-pulu-pulu na konopu mondoko nanga ungumu ambolorunu-na-koło kiniá siye selemo mele pilku konopu topele toko,

u serinu mele pilku kelko aku siku sani. Molo aku naa senu liemu nu molonina ombole nunga sepe-llamemo lemó koleana wendo limbu. <sup>6</sup> Aku-sipa na-kolo ulu peanga se selenomone nu lipa tapondolemo: Nu ye Nikollasi lombili pulimili yombomane selemele uluma paa kanoko kiri pilieleno. Nane kepe Nikollasinga talape yombomane selemele uluma kanopo kiri pilieliola.

<sup>7</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliepili. Yombo se enge nimba opa-toumu kamu topa mania mundumbamo 'Alieli molopa mindi puli ulu-pulumu pelemo unjumunga mongoma nopili.' nimbú. Aku unjumu Pulu Yemonga kaliana gilimú."

ningu pepá toko Epesasi yombomanga nokolemo angellomo sieni." nikiru." ,nirimu., 2:8-11

### *Simena Taono Karasinga Yomboma Nimba Mundorumu Ungumu*

<sup>8</sup> „Yemone kelepa nimbale: „Simena taono Karasinga yombo talapemonga angellomondo i-siku pepá toko mundani:

"I ungu pepána tokoromo u kumbi lepa molorumu pe akilepa molomba yemonga ungumu. U kolorumu pe lomboropa ola molorumu we molemo aku ,ye,mone i ungumu nimba mundukumu. Yuni nimbale:

<sup>9</sup> "Ono mindili nongo koropa pupili molemele mele kanolio. „Sika kangikundu koropa pupili molemele-na-kolo konopukundu kamakoma molemele..„ Yombo marene 'Juda yomboma molemolo.' nilimilimane ono-nга ungu-taka tondoko ungu-bulkundu nindilimili mele kanolio. Kanu yomboma paa sika Juda yomboma mólo. Ono „kurumanga nokoli, Setenenga talapena molemele yomboma. <sup>10</sup> Ono mindili nonge mele pilku mini-wale naa mundangi. „Kurumanga nokoli, depelemone ono yombomanga mare 'Na munduku keleangi.' nimba ka-ulkana panjimba kinia wale rureponga talo ono mindili nonge. Pe na munduku naa kelko nanga yomboma molkole kamu kolongi liemu nane 'Ono méle kaloli siembo.' nimbu alieli molko kondoko mindi pungí ulu-pulumu simbú.

<sup>11</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliepili. Enge nimba opa-toumu kamu topa mania mundumba yombomo 'Yomboma wale talo-siku kolangi.' nimbú kinia yu-kinia ulu se paa naa pembeda."

ningu pepá toko Simena yombomanga nokolemo angellomo sieni." nikiru." ,nirimu., 2:12-17

### *Pekamame Taono Karasinga Yomboma Nimba Mundorumu Ungumu*

<sup>12</sup> „Yemone kelepa nimbale: „Pekamame taono Karasinga yombo talapemonga angellomondo i-siku pepá toko mundani:

"I ungu pepána tokoroma ye opa seli lu-pulta ekendo-ekendo nee molemomo taltopa molemo yemone aku angellomondo nimba mundukumu. Yuni nimbale:

<sup>13</sup> "Nu moleno koleamo na pilkiru. Nu „kurumanga nokoli, Setene ye nokoli kingimu molopa nokolemo koleana moleno. Aku-sipa na-kolo na ambolko kondoko, na mondoko pilierinu mele 'Naa piliambo.' ningu na munduku naa kelierinu. Nanga unguma pipili naa kolopa yomboma nimba sirimu ye Andipasi ononga kolea Simena, Setene akuna nokopa molemo kolea kanuna toko kondoringi wale kinia kepe na munduku naa kelko 'Karasi yu Ye-Awilimu mólo.' ni naa nirinu.

<sup>14</sup> Aku-sipa na-kolo nane nu-kinia kanopo kiri pilielio ungu mare pelemo, akuma i-sipa: Nuni na Karasinga yombo nokoleno talapemonga ye mare ye Bellamene mane sirimu mele kuru mondoko pilku molemele. Bellamene ye nokoli kingi Bellake mane sirimu mele i-sipa: "Nuni 'Isirele yomboma molko kinjang!' ningu ono kondi toko, we-mélema 'Olionga pulu yema.' ningu popo toko kalolemele kere-langima nongo, wa ulu-kirinale senge mele aulka se liku ora sieni." nirimu. <sup>15</sup> Aku sikula nu-kinia

molemele yombo mare ye Nikollasi lombili pulimili yomboma unguma pilku limili mele aku siku unguma pilku likuli seko kinjiku molemele. <sup>16</sup> Akumunga, nu akumu kanoko kiri pilku konopu topele tani. Naa senu liemu nane nu molonina ombo nanga opa seli lu-pulta kerena gilimúmuni nu-kinia ombo opa sembó.

<sup>17</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliepili. Yombo se enge nimba opa-toumu kamu topa mania mundumba yombomo nane kere-langi mana lopi sepa lemómo simbú. Kou kake seli se, akumunga imbi konde se tombo molombamo, yombo se paa manda naa kanopa imbi simba, kou simbú limba yombomo mindi kanu imbi tombomo kanopa imbi simba."

ningu pepá toko Pekamame yombomanga nokolemo angellomo sieni." nikiru." „nirimu.”

**2:18-29**

### *Tayataira Taono Karasinga Yomboma Nimba Mundorumu Ungumu*

<sup>18</sup> „Kanu-kinia yemone kelepa nimbale: „Tayataira taono Karasinga yombo talapemonga angellomondo pepá toko munduku i-siku nieni:

“I ungu pepána tokoroma Pulu Yemonga Malo, sepe nolemo mele yunga mongomo tondolo pa sepa, kopa konde kariyápa mele mini-mana selemo mele aku sipa kimbu pa selemo ye akumuni nimba mundukumu. Yuni nimbale: <sup>19</sup> “Nu ulu selenoma kanolio. Nu konopu mondoko, na kuru mondoko, nanga kongonomo sendeko, umbunama wendo olemo kinia tondolo munduku molko, nu u serinu mele maniandopa, kiniá seleno mele olandopa, akumu nane kanolio.

<sup>20</sup> Aku sika na-kolo nane nu kanopo kiri pilielio mele i-sipa: Kolo topa “Pulu Yemonga ungu-umbu tondolemoma pilipu nimbu siliu.” nilimú ambo Jesepéle, yuni nanga kendemande-yomboma kondi topa mane sipa nimbale: “Wa ulu-kirinale seko, we-mélemando ‘Olionga pulu yema.’ ningu popo toko kere-langi kalolemele kere-langima nonge kinia papu.” nilimú kanu ambomo iri toko “Pu.” naa ningu we molopili siye kololeno. <sup>21</sup> ‘Yu wapora tolemo mele kanopo kiri pilipa konopu topele topili.’ nimbu wale mare we molorundu-na-kolo yu ‘Konopu topele naa tombo.’ nimba sepa kinjerimu mele we sepa molemo. <sup>22</sup> Akumunga, nane ‘Yu kuru awili-sepa topili.’ nimbú. Yu pea wa ulu-kirinale selemene yema yuni ulu selemoma kanoko kiri naa pilku konopu topele naa tongi liemu ‘Mindili awili-seko nangi.’ nimbúla. <sup>23</sup> Yunga bolangoma paa topo kondombóla. Aku sembó kinia na Karasinga talape yombomane kanokole, ‘Yunga yombomane konopumanga pilielemene mele kepe ulu se sengendo konopu mondolemele mele kepe yuni apurupa kanopale, ononga ulu selemelanga yu-mele-mele méle kalomba.’ ningu pilingí.

<sup>24</sup> Ono na Karasinga yombo mare Tayataira taonona molko, kanu ambomonga ungu nilimúma yombo marene “Aku unguma ‘kurumanga nokoli, Setenenga ungu tondoloma.’ nilimili aku unguma naa pilku limili yombomando ungu se nimbú sekero. Umbuna se pea ‘ono meangi.’ naa nimbú. I selu mindi niembo: <sup>25</sup> Ono méle ambolkomelema tondolo munduku ambolko molangi na wambo.

<sup>26</sup> Yombo se enge nimba opa-toumu kamu topa mania mundupa, nane “Sei.” niliu unguma pilipa sepa molopili walemo pora nimba kinia nane aku sembá yombomo ‘Yombo talapema nokopili.’ nimbu namba simbú. <sup>27</sup> Tatane na ‘Yomboma nokambo.’ nimba namba sirimu mele yombo kanumu simbú kinia

‘yuni kanu yombo talapema  
tondolo mundupa nokomba.

Mane selemelanga mingima  
kopene tondolo toko norupulu tolemele mele  
yuniaku sipa enge nimba nokomba.’

<sup>28</sup> Kombokandi kolea tangombando orili-u gilimú akumu kepe yu simbú. <sup>29</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliepili.”

ningu pepá toko Tayataira yombomanga nokolemo angellomo sieni.” nikiru.” „nirimu..”

### 3

3:1-6

#### *Sadisi Taono Karasinga Yomboma Nimba Mundorumu Ungumu*

<sup>1</sup> „Yemone kelepa nimbale:” “Sadisi taono Karasinga yombo talapemonga angel-lomondo i-siku pepá toko mundani:

“Pulu Yemonga mini yopoko-pakara kinia kombokandi yopoko-pakara kinia ambolopa molemo yemone ‘Pepá toko mundani.’ nimba, aku angellomondo nimba mundukumu. Yuni nimbale:

“Nane nu uluma seleno mele pilipu kanolio. Yombomane ‘Nu konde moleno.’ nilimili-na-kolo nu kolko pora sirinu. <sup>2</sup> Nu uru naa peli makilku ola molou. Ulu peanga kanga-kolte selenoma ‘kamu mania naa pupili.’ ningu aku uluma tondolo munduku kelko sei. Nuni seleno uluma nane kanolio kinia nanga Pulu Yemone kanopa peanga pilielemo uluma aku sipu mele naa kanolio kene aku sei. <sup>3</sup> Aku kene ungu u pilku liltinu unguma kelko konopu kimbu siku pilku, pilku liku sengena panjiku konopu topele tou. Molo kelko nu makilku ola naa molonu liemu na wa noli ye se olemo mele kiyongo nimbu nu molonina ombó. Ombó walemo nu naa pilku molani ombó.

<sup>4</sup> Aku-na-kolo nunga kolea Sadisi yombomanga mare ononga mulu-maminiamanga ‘kalaro naa molopili.’ niringi. Ono kanopo peanga pilielio uluma seko molemele-monga mulu-maminia kake selima simbú pakoko na kinia pea kopu sepo molomolo.

<sup>5</sup> Yombo se enge nimba opa-toumu kamu topa mania mundumba yombomo ono mulu-maminia kake selima simbú pakonge mele aku sipa yu mulu-maminia kake sélimu simbú pakopa molombala, kanu yombomonga imbimu konde molko mindi pungí yombomanga imbima molemo bokuna pe-pe kepe paa kulu naa tondombo. Tata kinia yunga angelloma kinia ononga kumbikerena yunga imbimu lepo ‘Nanga yombomo.’ nimbu lémo. <sup>6</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliangi.”

ningu pepá toko Sadisi yomboma nokolemo angellomo sieni.” nikiru.” „nirimu..”

3:7-13

#### *Pilladepia Taono Karasinga Yomboma Nimba Mundorumu Ungumu*

<sup>7</sup> „Yemone kelepa nimbale:” “Pilladepia taono Karasinga yombo talapemonga angellomondo i-siku pepá toko munduku nieni:

“Ye paa sika kake sepa, ulu-pulu sikamo yu-kinia pepa, u ye nokoli kingi Depitini yunga yomboma nokopa ‘Paa.’ nirimu kinia pungu, ‘Kongono i-siku saa.’ nirimu kinia seringi tondolomo yu-kinia perimu mele kanu yemo aku sipa tondolo pepili yunga talape yomboma nokopa yuni kuna wendo limú kinia yombo sene manda lloko naa tolemo, lloko tolemo kinia yombo sene manda ki naa limú, kanu yemone ungu se nimba mundupa nimbale:

<sup>8</sup> “Nane nu uluma seleno mele pilipu kanolio. Kána! Nu molenona ombo kuna se wendo lindu kanumu yombo sene manda pipi naa simba. Kanolio kinia nunga enge kanga-kolte mindi pelemo-na-kolo nanga ungumu munduku naa kelko, nanga imbimu seko naa kinjiku ‘Yu naa pilielio.’ naa nilinu. <sup>9</sup> Yombo mare “Juda yomboma molemolo.” nilimili-na-kolo kolo tolemele. Ono Juda yomboma mólo, ono „kurumanga nokoli, Setenenga talape molemele yombo kanuma ‘Nunga

kumbikerena ongo tamalu pekole 'Nane nu sika konopu mondolemo.' niengi.' nimbú. <sup>10</sup> Nane 'Nu enge ningu nanga unguma munduku naa keliei.' niliu mele seko molenomonga ulu-umbunama koleamanga pali wendo ombá kinia nane nu lipu tapondombo. 'Mana-yomboma enge ningu molemelenje.' nimba kanombando umbuna kanuma wendo ombá.

<sup>11</sup> Na nondopo ombó sekero kene nu ambololeno mélema tondolo munduku ambolko molou. Nunga méle kaloli taltondoliomo 'yombo sene lupa naa lipili.' ningu aku siku seko moloyo. <sup>12</sup> Enge nimba opa-toumu kamu topa mania mundumba yombomo nanga Pulu Yemonga ulka-tembelemonga ulka simu mele 'giliepili.' nimbú. Kanu-kinia yu kelepo ulkamo mundupa kelepa penando manda naa pumbá. Nanga Pulu Yemonga imbimu kinia, nanga Pulu Yemone kolea-awili Jerusallemeconde sembá Pulu Yemo molemo mulu-koleana lepa mania ombámonga imbimu kinia, nanga imbi kondemo kepe, aku imbi-poko nane yunga mambelena imbi topo mondombo. <sup>13</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliangi."

ningu pepá toko Pilladepia yomboma nokolemo angellomo sieni." nikiru." ,nirimu.,  
3:14-22

### *LLadosia Taono Karasinga Yomboma Nimba Mundorum Ungumu*

<sup>14</sup> „Yemone kelepa nimbale:，“LLadosia taono Karasinga yombo talapemonga angellomondo pepá toko munduku i-siku nieni:

"Ungu i pepána tokoroma ungu sikama mindi pelemo yemo, Pulu Yemonga unguma kolo naa topo sumbi sipu mindi nimbu siliu yemo, Pulu Yemone méle serimumanga pali pulumu, mélemanga pali nokolemo ye nokoli olandopamo, akumuni i unguma nundu nimba mundukumu. Yuni nimbale:

<sup>15</sup> "Ulu selenoma pali nane pilipu kanolio. Nu tondolo monda naa topa, tondolo mulu-mulu naa nimba, suku-singina mele moleno kanolio. 'Nu kamu monda topili molenanje peanga. Molo nu kamu mulu-mulu nipili molenanje peangala.' konopu lekero. <sup>16</sup> Aku-sipa na-koło nu tondolo monda naa topa, tondolo mulu-mulu naa nimba kuma-kuma liepili molenomonga nane nu meku topo eltombo sekero. <sup>17</sup> Nuni ninguli:

'Kou-mone kinia méle awisili  
taltopo molopo kamako molio.

Mélse mólo naa tolemo.'

nilinu-na-koło koropa pupili mindili nongo molko kinjiku, mélse naa panjiku we-we molko, mongotolo kiri liepili kolea naa kanoko moleno mele nu nunu 'Molopo kinjikiru.' ningu naa pilieleno. Yombomane yombo koropama kondo kololemele mele nu aku siku moleno. <sup>18</sup> Sekole molko kondoni mele nimbu siembo: 'Kamako leambo.' ningu kou-gollo sepena kamu kalopa kake seli taltoliomo topo toko liku, 'We-we naa andopo molambo. Pipili naa sepili.' ningu mulu-maminia kake taltolioma pakani topo toko liku, 'Kolea kanambo.' ningu mongona kandoni marasene taltoliomo topo toko lieni.

<sup>19</sup> Yombo konopu mondolioma 'Molko kondangi.' nimbu mane sipu iri tollo kene nu konopu kimbu sikuli seko kinjilinu mele kanoko kiri pilku munduku kelko konopu topele taa! <sup>20</sup> Kána! "Na sukundu wamboye?" nimbu kerepuluna mangilipu giliu. Yombo se nanga ungumu pilipa imbi sipale "Sukundu ou." nimu liemu na sukundu ombo yu-kinia pea kopu sepo molopo, na pea ga nombo molombolo.

<sup>21</sup> U na enge nimbu opa-toumu topo mania mundorundu kinia Tata ye nokoli kingimu molopa kolea nokopa molorumu polona pumbu pea molorumbulu molembolo mele aku sipa enge nimbu opa-toumu kamu topa mania mundumba yombomo na ye nokoli kingimu molopo koleama nokopo molio polona "Pea nokopo molambili

ou." nimbú. <sup>22</sup> Yombo se komu gilimbamone Mini Kake Sélimuni Karasinga yombo talapemando nimba sikimu ungumu piliangi." ningu pepá toko LLadosia yomboma nokolemo angellomo sieni." nikiru." ,nimba kanu yemone na Jonondo, nirimu.

*Kolomongo-Awili 4-11*

## **Mulu-Koleana Sipisipi Walomone Lemó Bokumunga Pipima Wendo Liltimu Kinia Mana Ulu Mare Yomboma-Kinia Wendo Orumu Semanema**

### 4

*Kolomongo-Awili 4*

#### *Mulu-Koleana Pulu Yemo Kape Ningu Imbi Ambolko Paka Tondoringi Semanemo*

<sup>1</sup> Aku unguma pilipu pora sipuli pe kanorundu kinia mulu-koleana ulka nangapemo topa lierimu kanorundu. Kanu-kinia ungu u pilierindu kinia bikollo mele ungu nirimu akumuni nimbale: "Pe wendo ombá uluma nane nu lipu ora siembo inia olando ou." nirimu. <sup>2</sup> Aku nirimu kinia waltikele na molorunduna Mini Kake Sélimu ombo na ambolorumu-na kanorundu kinia mulu-koleana ye nokoli kingimu molopa koleama nokolemo polo se lierimu, akuna ye se molorumu. <sup>3</sup> Akuna ola molorumu yemo i-sipa mele molorumu: Kou-mone olandopa pulimú kou jasipa kinia kou kondoli konillianetolo pa selemo mele yu aku sipa pa serimu. Kou-mone olandopa pulimú kou kondili nili emera pa selemo mele mulúna-wambiye se kolomba-kaweya melemele aku sipa ye nokoli kingimunga polomo lipa makaye sendepa kanu kou emera mele tondolo pa sepa lierimu.

<sup>4</sup> Kanu ye nokoli kingimunga polona ye nokoli kingimanga polo towapu selu taltoko makaye seringi, aku polomanga ola ye nokoli towapu selu moloringi. Ono wale-pakoli kake selima pakoko, ye nokoli kingima wanie kou-gollone selima pakolemele mele wanie-karaonoma pakoko moloringi. <sup>5</sup> Ye nokoli kingimunga polona kariapá sepa, ungu tondolo mundupa nimba, mulú torumu. Polomonga kumbina kiya yopoko-pakara norumu, akuma Pulu Yemonga Mini yopoko-pakara. <sup>6</sup> Polomonga kumbina nomu-kusa molorumu akumu gallási none sepa paa kake serimu.

Méle kise konde mololima kolea awi-suku-singina ye nokoli kingimunga polomonga liku kakapu seko moloringi, aku mélemanga bulkundu olokondo pali mongo awisili gilierimu. <sup>7</sup> Aku mélemanga se lopa-posi llayono melemele, se kongi kao melemele, se yunga kumbikeremo yombo melemele, se muluna mangopa andolemo kera iliaka melemele aku siku mele moloringi. <sup>8</sup> Konde mololi méle kise aku poko ononga yu-melemele pou talo-pakara nimba gilipa, mongo paa awisili kangimanga gilipa, poumanga pea olakondo kepe maniakondo kepe gilierimu. Ipulieli tangoli ono múlu naa pilku alieli-alieli ninguli:

"Pulu Ye Olandopa Molopa Enge Nílimu

yu paa kake sélimu,  
yu paa kake sélimu,  
yu paa kake sélimu,

u molorumu, kiniá molemo, pe ombá yemo."

ningu molemele. <sup>9</sup> Ye nokoli kingimunga polomonga molemo ye, alieli molopa mindi pulimú pumbá yemo yu konde mololi méle kisene alieli-alieli kape ningu imbi ambolko paka tondoko "Ange." nilimili kinia <sup>10</sup> ye nokoli towapu selu ono ne ye polona molemomonga kumbikerena mania pungu tamalu peko, kanu ye alieli konde molopa mindi pulimú pumbá yemo kape ningu imbi ambolko paka tondoko, ononga

ye nokoli kingi pakolemele wanie-karaono mele pakolemelema wendo liku yunga kumbikerena mania taltoko ninguli:

11 "Olionga Ye-Awilimu, olionga Pulu Yemo,  
méléma pali nuni wengendeko serinu.  
Nunu konopumuni pilkuli nunga engemone  
méléma serinu kinia wendo oringi,  
nunga engemone méléma kinia  
wendu wendo onto molemele, akumunga,  
yombomane pali  
"Nu Ye-Awilimuni seleno mele paa seleno." ningu  
"Ange." ningu  
"Nunga imbimu paa ola molemo.  
Nu ye nokoli paa awilimu molko  
méléma pali nokoleno nokoni tondolomo  
pelemo yemo." ningu  
nu aku siku kape ningu molonge kinia peanga."  
ningu, se-pu-pu seko molemele.

## 5

*5:1-5*

### *Jonone Boku Se Tambu Siringimu Kanorumu Semanemo*

<sup>1</sup> Pe na kanorundu kinia ye nokoli kingimunga polona molorumu yemo yunga kilomekondo boku kimboli se lierimu kanorundu, akumunga olakondo maniakondo pea imbi mare molopa, wale yopoko-pakara wakaya leko tambu siringi. <sup>2</sup> Kanorundu kinia angello enge nili se molorumu kanumuni tondolo ru nimba nimbale: "Yombo nawe molopa kondolemomone boku wakaya leko tambu siringima manda wendo limbaye?" nirimu. <sup>3</sup> Aku-na-kolo mulu-koleana kepe mana kepe mana sukundu kepe yombo sene manda wendo lipa, sukundu imbi molorumuma manda kanomba yombo se molopa paa kondolemo yombo se naa molorumu. <sup>4</sup> Kanu-kinia yombo molopa kondopale manda bokumu wendo lipa kanomba yombo se naa molorumumunga kanopole na kola awisili serindu. <sup>5</sup> Kanu-kinia ye nokoli towapu selu moloringimanga sene nando nimbale: "Kola naa séa! Piliei! Juda Talapemonga Lopa-Posi LLayono, ye nokoli kingi Depitini kalopa liltimu yemo, yuni enge nimba opa-toumu *kamu*, topa mania mundorumu. Ye akumu molopa paa kondolemomone boku wakaya lieli yopoko-pakara manda wendo lipa sukundu kanomba." nirimu.

*5:6-10*

### *Jonone Sipisipi Walomo Kanorumu Semanemo*

<sup>6</sup> Kanu-kinia na kanorundu kinia Kongi Sipisipi Walo se *gilierimu*, kanorundu. Yu kongi sipisipi toko kondoko taltolemele mele yuaku sipa molopa, yu ye nokoli kingi polona awi-suku-singina gilierimu. Méle konde mololi kise kinia ye nokoli towapu kinia yu liku sukundu munduku ono molko makaye seringi. Yunga pengena ola kongi kao ungú mele yopoko-pakara wendo ombo gilipa, mongo yopoko-pakara gilierimu, kanu mongoma Pulu Yemo yunga mini yopoko-pakara yuni ma-koleamanga pali lipa mundorumu akuma. <sup>7</sup> Kanu Kongi Sipisipi Walomo yu ombo ye nokoli kingi polona molorumu yemonga ki-lomekondo lierimu bokumu liltimu. <sup>8</sup> Liltimu kinia méle konde mololi kise kinia ye nokoli towapu kinia yunga kumbikerena mania pungu tamalu peringi. Ono yu-mele-mele gita mele mare ambolko, pellete kou-gollone seli, akuna paura kaloringi kinia muna paa torumu pauroamo peke liepili amboloringi. Aku pauroama Pulu Yemonga yombomanga pali Pulu Yemo popo toko mawa selemele unguma. <sup>9</sup> Onone konane konde se ningu ninguli:

“Nu toringi kinia

yombo ungu lupa lupa lielima kinia,  
kangi lupa lupa gilielima kinia,  
talape lupa lupama kinia,  
kolea lupa lupa molemelema kinia,

nunga mememone

Pulu Yemo kinia kopu seko molonge aulkamo  
akisinderinu akumunga

nuni boku manda liku wakaya lielima wendo lini.

<sup>10</sup> Nuni ‘Kanu yomboma olionga Pulu Yemonga

kongonomo sendangi!’ ningu

‘Pulu Yemonga popo tondoli yombo

Pulu Yemo ononga ye nokoli kingimu molopa  
ono nokomba yombo talapemo molangi!’  
ningu serinu, akumunga

ono ye nokoli kingima molko

ma-koleana mélema nokoko molonge.”

niringi.

*5:11-14*

### *Sipisipi Walomonga Imbi Ambolko Paka Tondoko Kape Niringi Semanemo*

<sup>11</sup> Pe kelepo kanorundu kinia angello paa awisili ungu niringi unguma pilierindu. Angelloma kambu tolemolánje tausini kelepo olandopa tausini nimbu, milliono kelepo olandopa milliono nilimolá. Akuma ye nokoli kingi polomo kinia méle konde mololi kise kinia ye nokoli towapu kinia liku kakapu seko sukundu munduku moloringi.

<sup>12</sup> Aku angellomane tondolo munduku ninguli:

“Sipisipi Walo u toko kondoringimundu  
yombomane pali ninguli:

“Yu yomboma nokomba tondolomo kinia

yu kamako molomba méle peanga-peanga  
awisili kinia pilipa kondolimu kinia engemo kinia  
yu-kinia pepa manda sepa,

yunga imbimu paa ola molopa,

tondolo pa sélimu yu-kinia pelemo.” ningu  
yu ange ningu kape ningí kinia papu.”

niringi.

<sup>13</sup> Kanu-kinia mulu-koleana molemele mélema kepe, mana molemele mélema kepe, mana sukundu molemele mélema kepe, nomu-kusana molemele mélema kepe, koleamanga pali molemele mélemane niringi mele pilierindu. Onone ninguli:

“Ye nokoli kingi polona molemo yemo kinia

Sipisipi Walomo kinia olondo

“ ‘Molko kondangili!’ nimbu alieli kape nimbu  
imbimu paa olandopa molopa,

tondolo pa sélimu kinia

yomboma nokomba tondolomo kinia

kamu alieli-alieli olo-kinia pepa mindi pulimú pumbá.”

nimbu molamili!”

niringi. <sup>14</sup> Aku niringi kinia méle konde mololi kisene ninguli: “Paa aku sipa wendo opili!” niringi. Ye nokoli towapuni mania molko tamalu peko kape ningu olonga imbi ambolko paka tondoringi.

## 6

*Kolomongo-Awili 6*

*Sipisipi Walomone Boku Wakaya Leko Tambu Siringimanga Talo-Pakara Wendo  
Liltimu Semanemo (Se 6:1, se 6:3, se 6:5, se 6:7, se 6:9, se 6:12, pe 8:1 se kamu wendo  
liltimu.)*

<sup>1</sup> Na kanopo molorundu kinia Sipisipi Walomone bokumu wakaya leko tambu siringi yopoko-pakara kanumanga se wendo liltimu. Kanu-kinia méle konde mololi kise kanumanga sene mulú tolemo mele tondolo mundupa ru nimba nimbale: "Ou." nirimu. <sup>2</sup> Kanu-kinia pilipuli kanorundu kinia kongi ose kake se molorumu. Aku osemonga bulu-mingina ola ye se molorumu kanumuni ele ambolorumu. Yomboma keru-kuru limili kinia se enge nilimúmu wanie pakondolemele mele yu aku siku wanie se siringi, pakopale, yu opa sepale enge nimbá engemo pepili pumba opa sepa yunga opa-touma topa mundumba purumu.

<sup>3</sup> Sipisipi Walomone bokumu wakaya leko tambu siringi talo-sipamo wendo liltimu kinia méle konde mololi kise kanumanga talo-sipamone "Ou." nirimu. <sup>4</sup> Kanu-kinia kongi ose paa kondoli se wendo orumu, aku osemonga bulu-mingina ola ye se molorumu, 'Mana-yomboma opa naa seko we molemele wale peangama pora nipili. Yomboma opa seko anju yando yomboma toko kondoko, sangi.' nimbá tondolomo siku, opa seli lu-pulta se siringi.

<sup>5</sup> Sipisipi Walomone bokumu wakaya leko tambu siringi yopoko-sipamo wendo liltimu kinia méle konde mololi kise kanumanga yopoko-sipamone "Ou." nirimu. Kanorundu kinia kongi ose pombora se molorumu. Akumunga bulu-mingina ola ye se molorumu, kanumuni mélema manda manjilimili sikele se ambolorumu. <sup>6</sup> Kanu-kinia méle konde mololi kise moloringi suku-singina yombo senga ungu mele se wendo orumu pilierindu, akumuni nimbale: "Gele awili se lebamonga, kere-langi peangamanga manda manjeli killokaram selu selu ningu ye sene wale senga kou-kongono sepale kou-mone limú aku sipa mele kou-mone pumbá mele manda manjiku, kere-langi wemanga killokaram yopoko yopoko ningu ye sene wale senga kou-kongono sepale kou-mone limú aku sipa mele kou-mone pumbá mele manda manjani. Aku-na-kolo wambola selemele unju ollipima kinia no-waene selemele unjuma kinia seko naa kinjani." niringi.

<sup>7</sup> Sipisipi Walomone bokumu tambu sirimu wakaya kise-sipamo wendo liltimu kinia méle konde mololi kise kanumanga kise-sipamone "Ou." nirimu. <sup>8</sup> Kanorundu kinia kongi ose wandeya none seli se molorumu. Aku osemonga bulu-mingina ola molorumu yemonga imbimu Kololimu. Yombo Kololemelema Pulimili Koleamo yu pea oringili. ' 'Mana-yombomanga pali yombo kisenga se kisenga se ningu kolangi.' ningu 'Mare opa seli lu-pultane tonge kinia kolko, mare gelene kamu kolko, mare kuru tomba kinia kolko, mare méle-takaramane nongo kondangi.' niengili.' ningu olo engemo siringi.

<sup>9</sup> Sipisipi Walomone bokumu tambu sirimu wakaya se-pakara sipamo wendo liltimu kinia yombo kololimanga minima Pulu Yemo popo toko mélema kaloringi polona mania moloringi kanorundu. Aku minima u ma-koleana molkole Pulu Yemonga ungumu 'Sika ungumu.' ningu kuru mondoko, 'Yomboma aku ungumu piliangi.' ningu andoko ningu siringi kinia ono toko kondoringi yombomanga minima. <sup>10</sup> Onone tondolo ru ningu ninguli: "Ye Awili Tondolo Olandopamo, ye kake sepa ungu sikama pelemo yemo, wale nambi sepa ombo pumbá kinia mana-yombo olio toko kondoringimanga kote pilkuli pundu tondoniye?" niringi. <sup>11</sup> Aku niringi kinia yuni ono yu-mele-mele wale-pakoli kake selima sipa nimbale: "Laye-kolte nokoko molangi. Pe ononga opa-toumane ononga genali kongono pea seringi kiniá

we seko molemele kanuma kamu toko kondonge kinia Pulu Yemone opa-toumanga kote pilipale pundu tondomba.” nirimu.

<sup>12</sup> Pe na kanopo molorundu kinia Sipisipi Walomone bokumu tambu sirimu wakaya talo-pakara sipamo wendo liltimu. Wendo liltimu kinia ma jimi-jimi paa awili se sepa, enamo paa pombora topa kolea pa naa sepa, olimu kondopa meme sepa, <sup>13</sup> unju piki mongoma nou naa liepili poporome tondolo sepa tolemo kinia mania olemo mele kombokandima aku sipa mana mania oringi. <sup>14</sup> Kunungu mele mulumu kimbupa anju anju pumba kolea senga lepa, ma-pangima kinia kolea nomu-kusana lierimuma pumba senga lupa lierimu.

<sup>15</sup> Aku sipa uluma wendo orumu kinia ma-kolea ye nokoli kingima kinia, ye awili imbi molorumuma kinia, opa seli ami yemanga ye nokolima kinia, kamakoma kinia, ye enge nilima kinia, yombo kou naa liku kongono we seringi kendemande-yema kinia, we moloringi yomboma kinia, pali kou-kandemanga kepe ma-koyangamanga kepe kowa pungu lopi seko molkole niringimuni, <sup>16</sup> ma-pangima kinia kou-mulu awilima kinia akumando ru ningu ninguli: “Ye nokoli kingi polona molemo yemone olio naa kanopa, Sipisipi Walomone olio-kinia mumindili kolopa “Mindili nangi.” nimbá ulumu wendo naa opili kene olio molemolona ongo aki taa.” „niringi..” <sup>17</sup> Pulu Yemo kinia Sipisipi Walomo-tolonga mumindili walemo wendo okomomonga aku siku olio aki tangi. Aku walemo kinia yombo nawe mindili naa nomba we molombaye?” niringi.

## 7

7:1-8

### *Isirele Yombo Wane Anderete Poti Po Tausini Pulu Yemone Ononga Mambelena Kongilina Serimu Semanemo*

<sup>1</sup> Akumu kanopole pe kelepo kanorundu kinia ma-kolea pundu kisenga angello kise gilku, mana tolemo poporome kise ‘Ma kinia nomu-kusa kinia unju kinia akumanga poporome naa topili.’ ningu ambolko gilieringi. <sup>2</sup> Kanu-kinia kelepo angello se kanorundu, yu ena mundi olemokondo Konde Molopa Mindi Puli Pulu Yemone yunga yomboma kongilina semba mele yunga imbi molemomo memba orumu. Kanu angellomone angello kise ‘Ma kinia nomu-kusa kinia seko kinjangi.’ nimba engemo sirimu angellomando tondolo ru nimba nimba: <sup>3</sup> Mamo kepe nomu-kusamo kepe unjuma kepe u mélse seko naa kinjangi. U olionga Pulu Yemonga kendemande-yombo molemele manga mambelena olio andopo ‘Ono Pulu Yemonga yomboma ningu kanangi.’ nimbu, kongilina samili. ‘Pe kolea seko kinjangi..’ nirimu. <sup>4</sup> Kanu-kinia yombo kongilina seringimanga kambu toringimu pilierindu. Isirelene kalopa liltimu yombo talape rureponga pali wane anderete poti po tausini kongilina seringi.

<sup>5</sup> Judane kalopa liltimu yombo talapemonga

tuwellepo tausini kongilina seko,

Rumbenene kalopa liltimu yombo talapemonga

tuwellepo tausini kongilina seko,

Getene kalopa liltimu yombo talapemonga

tuwellepo tausini kongilina seko,

<sup>6</sup> Asane kalopa liltimu yombo talapemonga

tuwellepo tausini kongilina seko,

Napatallaini kalopa liltimu yombo talapemonga

tuwellepo tausini kongilina seko,

Manasane kalopa liltimu yombo talapemonga

tuwellepo tausini kongilina seko,

<sup>7</sup> Simionone kalopa liltimu yombo talapemonga

tuwellepo tausini kongilina seko,  
 LLipaini kalopa liltimu yombo talapemonga  
     tuwellepo tausini kongilina seko,  
 Isakane kalopa liltimu yombo talapemonga  
     tuwellepo tausini kongilina seko,  
<sup>8</sup> Sepullanone kalopa liltimu yombo talapemonga  
     tuwellepo tausini kongilina seko,  
 Josepone kalopa liltimu yombo talapemonga  
     tuwellepo tausini kongilina seko,  
 Benjaminini kalopa liltimu yombo talapemonga  
     tuwellepo tausini kongilina seringi.  
 Yombo talape ima Pulu Yemonga kongilinamo liltingi yomboma.,  
 7:9-17

*Yombo Paa Awisili Wale-Pakoli Kake Seli Suluma Pakoko Pulu Yemonga Imbi Ambolko Paka Tondoko Kape Niringi Semanemo*

9 Akumu kanopole, pe kelepo kanorundu mele i-sipa: Yombo paa awisili, yombo sene paa manda kambu naa tomba mele, moloringi kanorundu. Aku yomboma ono kolea lupa-lupa yomboma, talape lupa-lupa yomboma, kangi lupa-lupa gilieli yomboma, umbu-ungu lupa-lupa lieli yomboma moloringi. Ye nokoli kingi polona yakondo gilku, Sipisipi Walomonga kumbikerena gilieringi. Ono wale-pakoli kake seli suluma pakoko kipi-gomo ambolkole niringimuni, <sup>10</sup> tondolo munduku ninguli:  
 "Olione Pulu Yemo  
     ye nokoli kingi polona molemo yemo yu kinia  
 Sipisipi Walomo kinia olone  
     olio liku tapondoringilimunga  
     mindili naa nombo molopo kondolemolo."  
 niringi.

11 Ye nokoli kingi polomo kinia, ye nokoli towapu kinia, méle konde mololi méle kise kinia, akuma sukuna molangi angelloma pali gilku liku makapu sekole ye nokoli kingi polona kumbikundu tamalu peko Pulu Yemo kape ningu <sup>12</sup> ninguli:  
 "Paa sika aku serimu.  
 Kape nili ulumu kinia,  
     tondolo pa seli ulumu kinia,  
     pilipa kondoli pelemo ulumu kinia,  
     ange nili ulumu kinia,  
     imbimu paa olandopa mololi ulumu kinia,  
     yu mélema pali nokomba tondolomo kinia,  
     yu paa enge olandopa pelemo ulumu kinia,  
 aku uluma pali yu-kinia mindi  
     kamu pepa mindi pupili.  
 Paa sika aku sipa sepili."  
 niringi.  
 7:13-17

*Kanu Yombomanga Mindili Noringi Uluma Pora Nirimu Semanemo (7:9-17 pali kana)*

13 Kanu-kinia ye nokoli towapu selu kanumanga sene na mangilipa nimbale: "I yombo wale-pakoli kake seli sulu pakokomelema nameleye? Kolea sena moltkole oringiye?" nirimu.

14 Nane pundu topo yundu nimbili: "Nanga awilimu, na naa pilkiru. Nu pilkinu." nirindu.

Yuni nimbale: "I yomboma ononga opa-toumane mindili siku umbuna awisili siringi walemanga mindili paa awili seko noringi yomboma. Ono ononga wale-pakoli suluma Sipisipi Walomonga mememone kulumiyé toringi-na kake sekemo.

<sup>15</sup> Akumunga,

"Ono Pulu Yemonga ye nokoli kingi polo  
kumbikundu gilku,  
yunga ulka suluminia paa kake selina  
ipulieli tangoli kongono senderingi.

Ye nokoli kingi polona molemo yemo  
ono-kinia kopu sepa molopa ono nokomba.

<sup>16</sup> Pe-pe kepe ono kelko  
gelene naa kolko no nonowalene naa kolko,  
enane naa nomba, sepe molo mélse  
ononga kangimu naa nopili molonge.

<sup>17</sup> Sipisipi Walomo  
ye nokoli kingi polona suku-singina molemomo  
yuni 'ono nanga sipisipima' nimba  
ono tapu sembamonga  
ono aku siku manda molko kondonge.

'Ono no nangi.' nimba  
konde molopa mindi puli no pikilimúmanga  
memba pumbá.

Pulu Yemone 'Ono kelko kola naa sangi.' nimba  
kolama pali kulu tondomba."  
nirimu.

## 8

8:1-5

*Sipisipi Walomone Bokuna Wakaya Yopoko-Pakara Siku Lieringimu Wendo Lilltimu Semanemo (6:1-17pea)*

<sup>1</sup> Sipisipi Walomone bokuna wakaya yopoko-pakara siku lieringimu wendo lilltimu kinia ena-mongo selu mele mulu-koleana mélse paa ungu naa nirimu.

<sup>2</sup> Kanu-kinia pe kanorundu kinia angello yopoko-pakara Pulu Yemonga kumbiker-ena gilielemelema kanorundu, bikollo yopoko-pakara sirimu liltingi.

<sup>3</sup> Angello se lupa kou-gollone seli pellete, muna toli paura-kekuma kalko Pulu Yemo siringi pellete ambolorumu kanumu memba omba Pulu Yemo popo toko mélema kaloringi polona nondopa omba gilierimu. Kanu-kinia paura-keku kaloringi kinia muna paa torumu paura-keku awisili kanu angellomo sirimu. 'Pulu Yemonga ningu paura-keku aku sipa muna tolemoma kaloringi polo kou-gollone seli, aku polomo ye nokoli kingi polona lierimumungaaku paura-kekumu kalopa Pulu Yemonga yombomane pali Pulu Yemo-kinia ungu ningu mawa seringi unguma Pulu Yemo yu piliepili.' nimba paura-keku kanuma kalopa muna tombamo yu sipili.' nimba aku paura awisili sirimu. <sup>4</sup> Aku serimu kinia paura-keku kalorumumunga iliama kinia Pulu Yemonga yombomane Pulu Yemo-kinia ungu ningu mawa seringi unguma angellomo gilierimuna mundupa kelepa Pulu Yemo molorumuna purumu. <sup>5</sup> Kanu-kinia angello kanumuni paura-keku kaloringi pelletemo lipa, Pulu Yemo mélema popo toko kaloringi polona sepe norumu sepe mare lipa pelletena mundupa peke sipale mana topa mundorumu kinia mulú topa kolea kariapá sepa ma jimi-jimi serimu.

8:6—9:21, 11:15-18

*Wakaya Yopoko-Pakara Siku Lieringimu Wendo Liltimu Kinia Bikollo Yopoko-Pakara Angello Yopoko-Pakarane Ungu Siringi Semanemo (8:1-5 pea)*  
8:6-13

*Bikollo Kise Angello Kisene Ungu Siringi Semanemo (8:1 pulu polko kanani)*

<sup>6</sup> Kanu-kinia angello yopoko-pakara bikollo u siringi amboloringima ungu singí seringi.

<sup>7</sup> Angello sene kumbi lepa bikollo ungu sirimu kinia lo kopu-mongo kinia sepe kinia meme kinia waka-maka mana mania purumu. Kanu-kinia ma kinia unju kinia ówa topa yopoko sepa, ówa se ma kinia unju kinia pali sepene nomba, era kondema pali sepe norumu.

<sup>8</sup> Angello talo-sipamone bikollo ungu sirimu kinia ma-pangi paa awili se kuli-sepene nomba aki torumu none seli se nomu-kusana toko mundoringi kinia nomu-kusamo ówa topa yopoko serimu, ówa se meme au lepa, <sup>9</sup> nomu-kusana moloringi mélema ówa topa yopoko serimu, ówa se koloringi, nomu-kusana sipi lierimuma ówa topa yopoko serimu, ówa se kiri lierimu.

<sup>10</sup> Angello yopoko-sipamone bikollo ambolorumumu ungu sirimu kinia kombokandi paa kapo se, paa kiya mele nomba, muluna mania omba noma ówa topa yopoko sepa, ówa senga yu nona sukundu purumu. <sup>11</sup> Kombokandimu yunga imbimu 'Kombili Sélimu'. Akumu nona sukundu purumu noma ówa topa yopoko sepa, ówa se kombili serimu. No kombili serimu akuma yombo awisili noringima koloringi.

<sup>12</sup> Angello bikollo ambolko gilieringimanga kise-sipamone yunga bikollo ambolorumumu ungu sirimu kinia ena kinia oli kinia kombokandima kinia yu-melete-melete yopoko yopoko ningú ówa toringi, ówa se kiri lepa simbulu topa pa naa serimu, akumunga tangoli ówa topa yopoko sepa ówa se kolea pa naa sepa, ipulieli ówa topa yopoko sepa, ówa se kolea pa naala serimu.

<sup>13</sup> Na kanopo molorundu kinia kera iliaka se muluna ola mangopa andopale tondolo ru nimba nimba: "Mana molemele yomboma ono-kinia paa umbuna awili pokore wendo ombá, paa umbuna awili pokore wendo ombá, paa umbuna awili pokore wendo ombá. Angello yopoko ononga bikollo ungu naa sili we ambolko gilielemelé ungu singí kinia mini-wale mundungí umbuna paa awili pokore wendo ombá." nirimu.

## 9

9:1-12

*Bikollo Se-Pakara Sipamo Ungu Sirimu Kinia Wendo Orumu Mele Semanemo (8:6—9:21 pali)*

<sup>1</sup> Bikollo ambolko gilieringi angellomanga se-pakara sipamone yunga bikollomo ungu sirimu kinia kombokandi se muluna mundupa kelepa mana mania omba lierimumu kanorundu. Kanu kombokandimu mana mania komuru se paa lepa mindi pumba naa pora nilimúmunga kerepulu kimu sirimu. <sup>2</sup> Aku komurumunga kerepulumu omba ki liltimu kinia kuli-sepe nombale ilia selemo mele muruna paa awili sepa ilia wendo ombale ena kinia mulu kinia pipi sipa simbulu tondorumu. <sup>3</sup> Kanu iliana sukundu kulkumba paa awisili wendo wendo ongo ma-koleana ongo moloringi. 'Pilimu kerena tomo pelimuni yombo nolemo kinia mindili nolemele mele aku sipa aku kulkumbamanga alina tomo pelimuni yomboma topili.' nirimu.

<sup>4</sup> Kulkumbamando nimba: "Unju kepe era kepe mana gilimú mélemele gomoma naa nangi. Pulu Yemonga kongilinamo yombo senga mambelena naa molomba yomboma mindi nangi." nirimu. <sup>5</sup> 'Yomboma toko kondangi.' nimba tondolomo naa sirimu. 'Nonge kinia oli se-pakara mindili nongo molangi.' nimba tondolomo sirimu. Kanu-kinia pilimumuni yombo tolemo kinia mindili nolemele

mele kulkumbamane yombo toringi kinia yomboma aku siku mindili awili seko nongo moloringi. Aku-sipa na-kolo pilimumuni tolemo kinia mindili nolemele akumu kanga-kolle seko nolemele. Ne kulkumbamane toringi kinia paa mindili awili-seko noringi.<sup>6</sup> Aku ulumu wendo ombá kinia mindili nonge yombomane "Paa kolamiliya!" ningí-na-kolo kololi ulu-pulumu kowa pumbá naa kolonge. Mindili nongo mindi molonge.

<sup>7</sup> Kulkumbama kanorundu kinia ami-yema opa sengendo kongi osena pulimili kongi ose none selima kanorundu. Kulkumbamanga pengena kou-gollone seli ye nokoli kingima pakolemele wanie mele pakoko, ononga kumbikerema yombo kumbikere none serimu. <sup>8</sup> Ononga penge-indima paa sulu pumba, ononga ungúma lopa-posi llayono ungú none serimu. <sup>9</sup> Ami-yema opa sengendo wale-pakoli kapane selima uluwina pakolemele mele kanu kulkumbamanga olona aku sipa none sepa, opa sengendo kongi osene karo kundupa lisipa ombo pulimú kinia ungu nilimú mele aku sipa ononga pouma ungu nirimu. <sup>10</sup> Kanu kulkumbamanga alina kale-nili mele gilipa yombomanga kangina tonge kinia tomomo alina pepale kangina sukundu pumbá kinia oli se-pakara mindili nongo molonge tomomo sirimu. <sup>11</sup> Kulkumbama nokorumu ye nokoli kingimu komuru lepa mindi pumba pora naa nilimú komurumu nokolemo angello kirimu, kanumunga imbimu Ipuru unguna 'Apadono' ningu, Giriki-unguna 'Apolliono' nilimili. 'Aku ungutolonga pulumu 'Mélema Pali Topa Kondolimu'.'

<sup>12</sup> 'Kera iliakamone "Umbuna yopoko wendo ombá." nirimumunga, umbuna se i pora nirimu. Talo we perimutolo pe wendo ombá serimu.

9:13-21

*Bikollo Talo-Pakara Sipamo Ungu Sirimu Kinia Wendo Orumu Mele Semanemo (8:6—9:21 pali)*

<sup>13</sup> Bikollo ambolko gilieringi angellomanga talo-pakara sipamone yunga bikollomo ungu sirimu kinia ungu se wendo orumu pilierindu. Paura-keku muna tolima kaloringi polo kou-gollone sélimu Pulu Yemonga kumbikerena lierimu akuna ola kongi kao ungú mele kise seko wamoko anjeringi akuna kanu ungumu wendo orumu pilierindu. <sup>14</sup> Akumuni angello bikollo ambolorumumundu nimbale: "Angello kise no awili Yuperetis ka siku panjeringi akuma wendo liku mundou." nirimu. <sup>15</sup> Kanu-kinia 'Kalia-ingi imunga, oli imunga, wale imu kinia, ena-mongo imunga yomboma ówa toko yopoko seko, ówa se toko kondangi.' nimba, nimba taltopa ka sipa panjerimu angelloma wendo lipa mundorumu. <sup>16</sup> Ami-ye kongi ose bulu-mingina ola moloringimanga kambumu pilierindu mele i-sipa: tu anderete milliono.

<sup>17</sup> Kongi osema kinia osemanga bulu-mingina moloringi yema kinia kanorundu mele i-sipa: 'Uluwina mera naa molopili.' ningu wale-pakoli kapane selima pakoringi akuma mare kondolima pakoko, mare muki selima pakoko, mare wandeya none selima pakoringi. Kongi osemanga pengema lopa-posi llayono pengema none sepa, sepe kinia ilia kinia kou-sallapa sepene noli kinia akuma ononga keremanga wendo orumu. <sup>18</sup> Yomboma ówa toko yopoko sekole, kongi osemanga keremanga umbuna simba mele yopoko wendo orumumane ówa senga yomboma toko kondoringi. <sup>19</sup> Kanu kongi osemanga engema ononga keremanga kinia alimanga pea perimu. Ononga alima yombo nomba kondoli kongi-ka-wambiye mele, akumanga pengemane yomboma toko mindili siringi.

<sup>20</sup> Umbuna wendo orumumane toko naa kondoringi we moloringi yomboma aku umbunama wendo orumu kinia kepe kini seko kinjeringi uluma kanoko kiri naa pilku konopu topele naa toringi. Kuruma popo toko, kou-gollo kinia kou-sillipa kinia kou-barase kinia kou kinia unju kinia akumane mélema kini seko wamoko anjiku, kanu méle mongomane naa kanoko ungu manda naa ningu aulka manda naa andoringi

akuma ‘Olionga pulu yema’ ningu popo toringi mélema munduku naa kelieringi.  
<sup>21</sup> Yombo toko kondoko, tomo ambolko, neambo liku, wa ulu-kirinale seko, mélema wa nongo, aku ulu seko kinjeringima kepe pali munduku kelko konopu topele naala toringi.

## 10

### *Kolomongo-Awili 10*

#### *Angello Sene Boku Kanga Se Jono Sirimu Norumu Semanemo*

<sup>1</sup> Aku uluma pora nirimu kinia pe angello enge nili se mulu-koleana mania orumu kanorundu. Yu kupamo wale-pakoli mele pakopa, yunga pengena ola wambiye kolomba-kaweya lepa, yunga kumbikeremo ena mele pa sepa, yunga kimbutolo ulka simu sepene nomba peli none sepa gilierimu. <sup>2</sup> Yu boku kanga kimboli se wendo lipa ambolopa gilierimu. Yunga kimbu lomekondo nomu-kusana kulupa, koyakondo mana kulupa, <sup>3</sup> lopa-posi llayonone tondolo mundupa kalli nilimú mele aku sipa yuni tondolo mundupa ru nirimu. Tondolo ru nirimu kinia mulú yopoko-pakara tokole onono ungu mare niringi. <sup>4</sup> Kanu-kinia mulú yopoko-pakara toko ungu niringi mele pilipuli bokuna tombo serindu kinia mulu-koleana ungu se wendo orumumu pilierindu. Akumuni nimba: “Mulú yopoko-pakarane ungu níngi mele nunga konopuna mindi piliani. Bokuna imbi naa tou.” nirimu.

<sup>5</sup> Kanu-kinia angello kimbu se nomu-kusana kulupa se mana kulupa gilierimu u kanorundu kanumuni yunga ki-lomekondo mulu-koleana ola mundorumu. <sup>6</sup> Alieli molopa mindi pulimú yemone mulúma sepa akuna méle lemóma sepa, mamo sepa mana-mélema sepa, nomu-kusamo sepa akuna molemele mélema serimu aku yemonga imbi lepa mi lepa nimba: “Pulu Yemone “Sembó.” nirimu uluma kamu sembá walemo wendo okomo. <sup>7</sup> Bikollo yopoko-pakara ambolko gilimili angellomanga yopoko-pakara sipamone yunga bikollomo ungu simba kanu walemanga Pulu Yemone u nimba para naa sipa lopi-sepa sepa panjerimu mele kamu wendo ombá. U yunga kendemande-yema yuni ungu-umbu tondorumuma pilku yomboma ningu siringi yemando nirimu mele, aku sipa kamu wendo ombá.” nirimu.

<sup>8</sup> Kanu-kinia ungu u mulu-koleana wendo orumu pilierindumuni kelepa wale talo-sipa nirimu pilierindu kinia nimba: “Nu pungu, angellomo nomu-kusana kinia mana kulupa gilipa boku kimbolimu wendo lipa kína ambololemomo pungu li-pou.” nirimu.

<sup>9</sup> Aku nirimu pilipuli angellomo gilierimuna pumbu “Boku kanga kimbolimu na si.” nirindu.

Yuni nando nimba: “Liku nou.” nirimu. “Noni kinia sika kerena pilimu-no mele songo sembá-na-kolo nongo merekendo mundoni kinia olona nombá.” nirimu.

<sup>10</sup> Aku nirimu kinia pilipuli, angellomonga kína ambolorumu boku kangamo na lipu norundu. Norundu kinia pilimu-no mele songo serimu-na-kolo nombo merekendo mundorundu kinia na olona norumu.

<sup>11</sup> Kanu-kinia ungu sene nando nimba: “Nane nu u ungu-umbu tondorunduma nuni pilku yomboma ningu sirinu mele kiniá kangi lupa lupa gilieli yomboma kinia, kolea lupa lupa molemele yomboma kinia, ungu lupa lupa lemele yomboma kinia, ye nokoli kingima kinia, ono pali uluma wendo ombá mele “kelko ningu si.” nimbú kinia kelko ningu sini.” nirimu.

## 11

### 11:1-14

#### *Ye Talone Pulu Yemonga Ungu Ningu Siringili Semanemo*

<sup>1</sup> Manda manjeli koló pepena se na sipa nimbale: "Pulu Yemo popo toko kalolemele ulka-tembelemo kinia akuna mélema popo toko kalolemele polomo kinia akutolo pungu manda manjiku, akuna Pulu Yemo popo toko kape ningu imbi ambolko paka tondoko molemele yomboma kambu siliani pu." „nirimu.” <sup>2</sup> Aku-na-kolo Pulu Yemonga ulka-tembele palana sukundu koleamo yombo talape lupama sirimulu kene akumu manda naa manjani. Kanu yomboma Pulu Yemonga kolea awili kake sélimunga kululiku andoko molangi oli paono talo kelepa talo omba pumbá. <sup>3</sup> Nane nanga unguma andoko ningu sindingilí yetolo 'Olo tondolo pupili.' nimbu enge simbú kinia wale wane tausini tu anderete sikit andoko nane ungu-umbu tondomboma pilku pe wendo ombá mele ningu siliku andongele. Yomboma kola-ulka molongendo méle pingi kirima pakolemele mele olo aku siku wale-pakoli pingi kirima pakoko yomboma nanga unguma ningu siliku andongele.” nirimu.

<sup>4</sup> I yetolo u Pulu Yemone ungu-umbu tondorumuma pilipa yomboma nimba sirimu ye Sekarayane “Unju ollipi talo kinia sepe-llame talo kinia ma-koleamo nokolemo Ye Nokoli Ye Awilimunga kumbikerena gilimbili.” nirimu akumu i yetolondo nirimu. <sup>5</sup> Yombo sene kanu yetolo ulu se sepa kinjimba sembá kinia olonga kerena sepe wendo omba olonga opa-touma nomba kondomba. Yombo sene 'Olo ulu se sepo kinjambo.' nimba yombomo yu paa sika aku sipa kolomba. <sup>6</sup> Olo Pulu Yemonga ungu wendo ombá mele ningu siliku andongele kinia 'Lo naa opili.' ningu pipi singilí engemo olo-kinia pembala. Olone 'Noma meme topili.' ningilí engemo olo-kinia pembala. Olone 'Mana we-yomboma ulu umbunama wendo opili.' ningilí engemo pembala. Aku siku olone 'Yomboma mindili simbulú.' konopu lengèle kinia manda mindili singilí.

<sup>7</sup> Olone Pulu Yemonga unguma andoko ningu siku pora singilí kinia méle-takara enge nili se komuru se paa lepa mindi pumba pora naa nilimúmunga wendo olemomomo wendo omba olo molongelena 'Tambo.' nimba omba olo topa kondomba.

<sup>8</sup> Olonga ónotolo kolea-awili, u olonga Ye-Awilimu unjuna toringi kolorumu kolea paa awili akumunga aulka senga akuna we lemba. Aku koleamo imbi leko ungu-iku tokole 'Sodomo' ningu 'Isipi' nilimili. <sup>9</sup> Yombo talape lupa lupama, ungu lupa lupa leko, kangi lupa lupa gilipa, kolea lupa lupa molonge yombomane olonga ónotolo neme-neme ningu kano-pu-pu senge-na-kolo marene 'Óno samili.' naa ningí. Aku seko molangi wale yopoko omba pumba kise-sipamo wendo ombá. <sup>10</sup> Mana molonge yombomane olonga ónotolo kanokole konopu siku, kere-langí koyoko nongo, ononga pulu lemó yomboma mélema we siku mundungí. Kanu yetolone mana molonge yomboma u mindili liku singilímunga aku senge.

<sup>11</sup> Aku-sipa na-kolo wale yopoko omba pumba kise-sipamo wendo orumu kinia Pulu Yemone konde mololi popomo lipa mundorumu kinia yetolonga kangina sukundu purumu kinia olo konde molko ola gilieringili kinia yombomane kanokole paa pungu-pungu ningu mini-wale mundoringi. <sup>12</sup> Kanu-kinia olone mulu-koleana ungu se tondolo mundupale nirimumu pilieringili. Kanumuni olondo nimbale: "Inia olando wale." nirimu. Kanu-kinia olonga opa-touma kanoko giliangi olo kupa senga mulu-koleana olando puringili.

<sup>13</sup> Olando pungilí puringili kinia waltikele ma jimi-jimi tondolo mundupa serimu kinia kolea-awilimu ówa topa rureponga talo sepa, ówa senga ulka mélema pali topa kalorumu. Ma jimi-jimi serimumuni yombo sepen tausini topa kondorumu kinia yombo naa kolko we moloringimane paa pungu-pungu ningu mini-wale munduku mulu-koleana molemo Pulu Yemo kape ningu yunga imbi ambolko paka tondoringi.

<sup>14</sup> Ulu umbuna talo-sipamo pora nimu; yopoko-sipamo nondopa wendo ombá sekemo.

*Bikollo Yopoko-Pakara Sipamo Ungu Sirimu Kinia Ulu Mare Wendo Orumu Mele Semanemo (8:6—9:21 pea)*

<sup>15</sup> Kanu-kinia pe angello yopoko-pakarane bikolloma amboloringimanga yopoko-pakara sipamone yunga bikollo ungu sirimu kinia mulu-koleana kere awisilinga ungu se tondolo mundupa wendo omba nimbale:

“ ‘Ma-koleamo nanga.’ nimba  
u nokopa ye nokoli kingi awilimu molorumumunga  
kolali sepa olionga Ye-Awili ‚Pulu Yemo, kinia  
yuni ‘Yomboma nokopa kondomba ye se  
lipu mundumbu.’ nimba, nimba talorumu  
ye nokoli Karasimu kinia alone  
‘Kiniá oltonga.’ ningu  
olo kamu alieli-alieli kingitolo molko  
nokoko mindi molko pungilí.”

nirimu. <sup>16</sup> Kanu-kinia ye awili towapu Pulu Yemonga kumbikerena ononga ye nokoli kingi polomanga moloringi akuma mania pungu tamalu peko Pulu Yemo kape ningu imbi ambolko paka tondokole <sup>17</sup> ninguli:

“Pulu Ye Awili,  
Tondoloma Pali Nu-Kinia Pelemo Yemo,  
u molorunu mele kiniá kepe  
molko mindi puli yemo,  
nuni kolea mélema pali  
nokoni ulu-pulu tondolo olandopamo likuli  
nu nunu ye nokoli kingimu kamu pulu polko molko  
mélema nokoni nokokono akumunga  
nu-kinia “Ange” nikimulu.

<sup>18</sup> Koleamanga pali we-yombomane  
nu-kinia paa mumindili koloringi-na-kolo  
kiniá nu yomboma-kinia mumindili kolko  
kote sendeko kamu toni walemo kamu wendo omu.

Yombo kololima apuruku,  
nunga kendemande-yombo

u nuni ungu-umbu tondorunuma pilku  
yomboma ningu siringi yomboma kinia  
nunga yombo kake selima kinia  
‘Nu olionga ye awilimu.’ ningu  
nunga ungumu taka leko pilku sengena panjiku

nunga imbi ambolko  
paka tondoringi yomboma kinia,  
yombo awilima kepe  
yombo imbi naa mololima kepe  
‘ono pali, méle kaloli peangama siku,  
ma-koleamo seko kinjeringi yomboma  
seko kinjini walemo  
kiniá kamu wendo omu.”

<sup>19</sup> Ye nokoli towapu seluni ‘Pulu Yemo imbi ola molopili.’ ningu aku siku niringi, kinia Pulu Yemo popo toko kalolemele ulka-tembele mulu-koleana sukundu gilierimu akumu kuna lipa lierimu, akuna sukundu Pulu Yemone mi lepa nimba panjerimu ungumu sukundu perimu okolomo mona lierimu kanorundu. Kanu-kinia kariapá

sepa, ungu mare wendo omba, mulú kilkala nimba, ma jimi-jimi sepa, lo kopu-mongo awisili torumu.

*Kolomongo-Awili 12-20*

## **Kurumanga Nokoli Setene Kinia Yunga Talape Kuruma Kinia Pali Pulu Yemone Kamu Topa Mania Mundorumu Semanemo**

### 12

*Kolomongo-Awili 12*

*Ambomo Kinia Wambyie Derekonotolonga Semanemo*

<sup>1</sup> Kanu-kinia, mulu-koleana sukundu ulu paa awili tondolo se ungu-pulu perimu ulu se wendo orumu. Akumu i-sipa: Ambo se molopa, enamo mulu mele pakopa, olimu yunga kimbumuni kulupa, pengena ambo nokoli kuwininga wanie-karaono se kombokandi rurepo akuna giliepili pakopa molorumu. <sup>2</sup> Yunga olona bolango mondopale, membándo mindili paa awili sepa nomba perepa kalli nimba molorumu.

<sup>3</sup> Kanu-kinia mulu-koleana sukundu ulu paa awili tondolo ungu-pulu perimu ulu se kelepa wendo orumula: Wambyie derekono paa awili kondoli se molopa, yunga penge yopoko-pakara gilipa, kongi kao ungú mele rureponga talo wendo omba, yunga pengemanga ye nokoli kingimunga wanie-karaono yopoko-pakara pakopa molorumu.

<sup>4</sup> Kombokandima ówa yopoko sepa topa, kanu wambyie derekonomo yunga álimuni kombokandi ówa se muluna ola topa mana mania mundorumu. Bolango membá serimu ambomonga kumbikerena gilipa kanu bolangomo ambomone membá kinia nombando nokopa gilierimu.

<sup>5</sup> Ambomone kango se merimu. Kanu kangomo ma-kolea yombo talapema pali paa tondolo mundupa nokopa molomba. Merimu kinia popenge seko liku kangulku Pulu Yemo kolea pali nokopa molorumu polona mengo puringi. <sup>6</sup> Ambomo kolea ku lielimunga sukundu lisipa kowa pumba, kolea se Pulu Yemone u sepa wamondorumu kolea akuna purumu. Akuna Pulu Yemone “Yu wale wane tausini tu anderete kelepa sikití molopili nokondangi.” nirimu.

*12:7-9*

*Setene Kinia Angello Nokoli Awili Maikeli Kinia Opa Seringili Semanemo (12:1-18  
pali)*

<sup>7</sup> Kanu-kinia mulu-koleana sukundu opa awili se wendo orumu. Mulu-koleana angello awili Maikeli kinia yunga mulu-koleana we-angelloma kinia wambyie derekonomo molorumuna opa oringi. Derekonomo kinia yunga angelloma kinia kanokole opa seringi-na-kolo <sup>8</sup> Maikelenga talapemone ono toko mundoringi aku-munga pe derekonomo kinia yunga angelloma kinia mulu-koleana sukundu molonge kolea se naa lierimu. <sup>9</sup> Derekono gelu nilimu yu koronga-u molorumu wambiyemo; yu “kurumanga nokoli, depelemo” ningu; yu “Setene” nilimili yemo; yu manayomboma pali kondi topa peke tondopa “Aulka senga lupa pang.” nilimú yemo. Kanumu toko mana mania mundoringi, yu kinia yunga angelloma kinia toko mana mania mundoringi.

<sup>10</sup> Kanu-kinia mulu-koleana sukundu ungu tondolo se wendo orumu pilierindu. Aku ungumu ru nimba nimbale:

“Olionga genupilima alieli  
ipulieli kepe tangoli kepe  
Pulu Yemonga kumbikerena kote sendelemo yemo  
kiniá mana mania toko mundongimunga  
Pulu Yemo yunga tondolo pelemomone

'Setenene olio naa ambolopa sepa kinjipa  
 mindili nolemolá koleana naa memba pupili.'  
 nimba, olio lipa tapondopa,  
 yu paa sika ye nokoli kingimu molopa  
 yu mélema pali nokopa molopa,  
 yu Pulu Yemone "Ono nokopa kondomba ye se  
 lipu mundumbu." nimba, nimba taltorumu  
 ye nokoli Karasimunga,  
 méle nokomba namba pelemomone  
 Karasimu yuni mélema pali  
 nokopa kondomba walemo kiniá kamu wendo omu.

<sup>11</sup> Kongi Sipisipi Walomone  
 meme ondondorumumu kinia  
 Pulu Yemonga ungumu ningu siku seringimu kinia  
 aku ulutolone olionga genupilima  
 enge ningu opa-toumu toko mundoringi.  
 Ono 'mana molopo kondamili.' ningu naa pilku,  
 'opa-toumane toko kondongi liemu mandala.'  
 ningu pilieringimunga aku sipa  
 engemo perimu kinia aku seringi.

<sup>12</sup> Akumunga, nu mulu-koleamo kinia  
 akuna molemele yomboma kinia ono konopu siengi.  
 Aku-sipa na-koło nu mamo kinia  
 nu nomu-kusamo kinia  
 depelemo akuna mania purumumunga  
 olo-kinia umbuna awili se wendo omu.  
 'Pulu Yemone yu kamu topa mundumba enamo  
 nondopa wendo ombá.' nimba pilipa  
 yu paa mumindili kolopa molemo."  
 nirimu.

<sup>13</sup> Wambiye derekonomo yu toko mana mania mundoringi kinia kanopale pe kango  
 merimu ambomo andopa pulu sirimu. <sup>14</sup> Aku-na-koło 'Yu wambiyemone naa topili.'  
 nimba kolea ku lieli sulu senga lierimuna yu kalia-ingi yopoko oli talo-pakara molopili  
 nokonge kolea se Pulu Yemone sepa wamorumumu 'yu akuna mangopa yu kowa  
 pupili.' nimba ambo kanumu kera iliaka pou awili talo sirimu. <sup>15</sup> Yu kowa purumu  
 kinia kanopale wambiyemone 'Yu none topa memba pupili.' nimba yunga kerena  
 meku torumu kinia ambomo purumu aulkana no awili sepa topa pulu sirimu. <sup>16</sup> Aku-  
 na-koło mamone ambomo lipa tapondopa ma awili sepa kengeya lepa wambiye  
 derekonomone meku torumu nomo pali akuna ombo mania purumu. <sup>17</sup> Kanu-  
 kinia wambiyemone aku serimu kanopale ambomo-kinia paa mumindili kolopale  
 ambomonga bolango wema kinia opa sembá purumu. Ambomonga bolango kanuma  
 Pulu Yemone "Saa." nilimú ungu-manema pilku liku sengena panjiku seko, Yesusinga  
 unguma ningu siku molemele yomboma. <sup>18</sup> Wambiye derekonomo nomu-kusa kelona  
 gilierimu.

## 13

### Kolomongo-Awili 13

*Jonone Méle-Takara Talo Kanorumu Semanemo  
 13:1-10*

*Méle-Takara Se Nomu-Kusana Wendo Orumu Semanemo*

<sup>1</sup> Pe nane kanorundu kinia méle-takara se nomu-kusana wendo orumu. Yu kongi-kao ungú mele rureponga talo gilipa, penge yopoko-pakara gilierimu. Yunga ungúmanga ye nokoli kingimanga wanie-karaono rureponga talo pakorumu. Yunga pengemanga yu-melete-melete imbi molorumu, kanu imbi yopoko-pakara Pulu Yemo marake sepa ungu-taka tondorumu unguma molorumu. <sup>2</sup> Méle-takara kanorundu kanumu lopa-posi llepate mele, na-kolo yunga kimbuma lopa bea kimbu melemo, yunga keremo lopa-posi llayono kere melemo. Wambiye-derekonomone yu yuyu ye nokoli kingi molopa mélema nokorumu polomo kinia, yunga tondolomo kinia, mélema paa tondolo mundupa nokomba nambamo kinia, sirimu. <sup>3</sup> Méle-takaramonga penge se 'Yu kolopili.' ningu toringi erili se perimu. Sika kolka-na-kolo yu toringi erilim uru lierimu kiniaconde purumu. Aku sipaconde purumu kanoko mini-wale mundukuli yomboma pali yu lombili puringi. <sup>4</sup> Wambiye derekonomone aku méle-takaramo yu mélema nokorumu tondoloma sirimu-kulu yombomane 'Wambiyemo olionga pulu yemo.' ningu yu kape ningu imbi ambolko paka tondoringi. Méle-takaramo kepe akula seko yunga imbi ambolko paka tondoko kape ningu ninguli: "Méle-takaramo mele nawe molemoye? Yu-kinia nawene manda omba opa sembaye?" niringi.

<sup>5</sup> Pulu Yemone 'Oli tu paono tu méle-takaramo we aku sipa yu yuyu ye nokoli mele imbi ambolopa paka tondopa na marake sepa, mélema tondolo mundupa nokopa molopili.' nimba siye kolorumu. <sup>6</sup> Yu pulu polopa Pulu Yemo marake sepa yunga imbimu kinia yu molorumu koleamo kinia mulu-koleana moloringi yomboma kinia ungu-taka tondorumu. <sup>7</sup> Setenene méle-takaramo 'Pulu Yemonga yomboma kinia opa sepa enge nipili.' nimba tondolomo sipa, yu ye nokoli kingimu molopa makoleana pali yombo talape lupa lupama kinia, ungu lupa lupa lieringi yomboma kinia, kangi lupa lupa gilieli yomboma kinia nokomba nambamo sirimu kinia Pulu Yemone "Mólo." naa nimba, 'Aku sepili.' nimba siye kolorumu. <sup>8</sup> Mana-yomboma u Pulu Yemone mulu ma naa sepili Sipisipi Walo toko kondoringimunga alieli molopa mindi puli bokuna imbi naa molorumu yombomane pali 'Méle-takaramo olio nokolemo pulu yemo.' ningu kape ningu imbi ambolko paka tondonge.

<sup>9</sup> Yombo se komu gilimbamone i ungumu mimi siku piliangi:

<sup>10</sup> Yombo se 'Ka-ulkana pupili ka siemili.' ningí kinia  
yu paa sika ka-ulkana pumbá.

„Pulu Yemone ungu se naa sembá..,

Yombo sene yombo se opa seli lu-pulta sene  
topa kondomu liemu  
yu opa seli lu-pulta sene toko kondongela.

Aku sipa uluma wendo ombá kinia Pulu Yemonga yomboma ono ungu pilku ambololemelema munduku naa kelko ambolko kondoko molangi.

**13:11-18**

### *Méle-Takara Se Mana Wendo Orumu Semanemo (13:1-18 pali)*

<sup>11</sup> Pe kanorundu kinia méle-takara se lupa mana wendo orumu. Ungú talo kongi sipisipi walo senga ungu gilimú mele gilierimu-na-kolo yunga ungu nirimumu wambiye derekono sene nilimú mele aku sipa nirimu. <sup>12</sup> Akilepa orumu méle-takaramone u kumbi lepa orumu méle-takaramonga ye nokoli kingimu molopa mélema nokomba nambamo akilepa orumumuni lipa ambolopa kumbi lepa orumumuni lipa tapondopa yuni mélema pali nokondopa; kumbi lepa orumu méle-takara, akumunga penge senga 'Yu kolopili.' ningu toringi erilim uru lierimu-kuluconde purumu kanumu 'Ma-koleana molemele yombomane pali 'Yu ye-awilim.' ningu yunga imbi ambolko paka tondoko kape niengi.' nimbaaku kongonoma senderimu. <sup>13</sup> Méle-takara talo-sipamone ulu-tonadoloma mana-yombomane manda naa selemele

uluma serimu. Se i-sipa: 'Yomboma kanoko molangi mulu-koleana sepe se mana mania opili.' nirimu. <sup>14</sup> 'U kumbi lepa orumu méle-takaramonga kongonoma sendepili.' nimba akilepa orumu méle-takaramo tondoloma sirimu aku tondolomane yu kanu ulu-tondolo awisili sepa, yomboma kondi topa nimbale: "Méle-takara kumbi lepa orumumu, yu opa seli lu-pultane toringi kolka-na-koło naa kolorumu akumu yu-mele mélse manda manjiku seko wamoko anjiku, yunga imbi ambolko paka tondoko kape ningí mélemo saa." nirimu. <sup>15</sup> Méle-takara kumbi lierimu méle seko wamoko anjeringimu 'Yombo-mele ungu nipili.' nimba akilepa orumu méle-takaramone konde mololi mólumu popo topa sukundu mundorumu kinia Pulu Yemone 'Aku manda, ungu nipili.' nirimu kinia méle seko wamoringimuni ungu nirimu. Yombo marene méle seko wamoko anjeringimu 'Kape nimbu imbi ambolopo paka naa tondomolo.' niringi kinia ono topa kondorumu kinia Pulu Yemone kanopale ungu se naa sepa siye kolorumu. <sup>16</sup> 'Yomboma pali, kamakoma kinia koropama kinia, yombo nokolima kinia imbi naa mololima kinia, yombo marenga kendemande sendeko méle kaloli naa lili yomboma kinia, yombo we molko ononga konopumane pilku seringi yomboma kinia, ononga pali mambelena molo ki-lomekondo kongilina se kusi mele molopili tondangi.' nirimu kinia tondoringi. <sup>17</sup> Yombo senga mambelena molo ki-lomekondo kongilinamo naa molorumu yombomo yu bisinisi sepa kou-mone limba aulka se naa lepa, kere-langı kepe mélema topo topa limba aulka se naa lierimula. Kongilina akumu kumbi lepa orumu méle-takaramonga imbimu molo yunga imbibunga kambu sili nambamo.

<sup>18</sup> Mimi sipa konopu kimbu sipa pilimba yombomone imunga ungu-pulumu pilimbanje? Yombo imbibanga nambamo mimi sipa kambu silimúmuni kanu méle-takaramonga nambamo mimi sipa kambu topa piliepili. Yunga nambamo ye senga nambamo. Yunga nambamo Sikis anderete Sikiti Sikis.

## 14

14:1-5

### Kongi Sipisipi Walomonga Yombomane Konane Konde Se Niringi Semanemo

<sup>1</sup> Pe kelepo kanoruntu kinia Kongi Sipisipi Walomo mulu Sayono ola gilipa, yombo mambelena yunga imbibimu kinia yunga Lapanga imbibimu-tolo molorumu yombo wane anderete poti po tausini yu pea gilieringi. <sup>2</sup> Mulu-koleana ungu se wendo orumu pilierindu akumu no topa ungu tondolo nilimú mele, molo mulú kilkala tondolo nilimú mele, molo gitama tolemele ungu nilimú mele,aku sipa ungu se wendo orumu pilierindu. <sup>3</sup> Ye nokoli kingi polomonga kumbikundu méle konde mololi kise kinia ye nokoli towapu selu kinia, ono moloringimanga kumbikerena onone konane konde se niringi. Yombo wane anderete poti po tausini u mana moloringi kinia Pulu Yemone 'Lipu tapondambo.' nimba Malonga mememone mindili nolemolá aulkana wendo linderimu aku yombomane mindi i konanemo manda pilku niringi. We-yombo sene aku konane niringimu manda naa pilieringi. <sup>4</sup> Yombo wane anderete poti po tausini akuma 'Pulu Yemone olio kanopale 'Kake sepili molemele.' nipili.' ningu yuni kanopa kiri pilielemo uluma amboma kinia naa seringi. Kanuma Sipisipi Walomo pulimú koleamanga pali lombili pulimili. Olio Isirele yombomane kere-langı kumbi lepa nou lemóma lipuli Pulu Yemo 'yunga' nimbu silimulu mele ma-koleana ima Pulu Yemone lipa tapondopa Malonga mememone mindili nolemolá aulkana wendo lipa 'Sipisipi Walomo kinia oltonga.' nirimu. <sup>5</sup> Ono kolo paa naa toringi. Pulu Yemone ono kanopale kalaro naa molopa kake selima nimba kanorumu.

14:6-13

### Angello Yopokone Ungu Niringi Semanemo

<sup>6</sup> Angello se mulu awi-suku-singina mangopa andopa molorumu kanorundu. Yombo talape awilima kinia yombo talape kangama kinia, ungu lupa lupa lemelema kinia, yombo lupa lupama mana molemele yombo akuma pali kanu angellomone semane peanga alieli pepa mindi pumbá semanemo topa simbando mangopa andopale, <sup>7</sup> ru nimba nimbale: "Pulu Yemone yomboma kote sendepa apurupa pilimba walemo kamu wendo omu kene yu pipili kolko yunga imbi ambolko paka tondaa. Mulumu kinia mamo kinia nomuma kinia no pilkipa wendo olemoma kinia pali serimu yemo popo toko kape niee." nirimu.

<sup>8</sup> Kanu angellomo purumu kinia angello se ombo nimba nimbale: "Kolea-awili imbi paa ola molemo Bepillono kamu kiri liemu. Sika kamu kiri liemu. Kanu koleana moloringi yombomane we-koleamanga pali yombo talapema 'Wa ulu-kirinale senge pelemo no-waene paa tondolomo nangi.' nimba ta niringimunga aku koleamo kamu kiri liemu." nirimu.

<sup>9</sup> Angello talo-sipamo purumu kinia angello se kelepa ombale tondolo mundupa nimbale: "Méle-takaramo kinia méle-takaramo yu-melete manda manjiku seko wamoko anjeringi mélemo kinia olonga imbi ambolko paka tondoko kape ningu, yunga imbimu ononga mambelena molo kína molomba yomboma <sup>10</sup> ono kepe Pulu Yemone ono-kinia mumindili paa kolomba ulu-pulamu pelemo no-waenemo "nangi." nimbá. „Onone aku siku seko kinjingimunga, yuni mumindili kolopa sembá pelemo no-waenemo no pange seli se kinia waka-maka yunga mumindili kolomba mingina naa mundupa, no-waenemo paa enge nipili kanu yomboma simba. Pulu Yemonga angello kake selima kinia Sipisipi Walomo kinia kanoko molangi kanu yomboma kou-sallapa sepe nombámone ono nombá kinia paa mindili nongo molonge. <sup>11</sup> Ono mindili simba sepemonga iliamo pora naa nimba alieli ilia sepa mindi pemba. Méle-takaramo kinia yu none seli manda manjiku seko wamoringi mélemo kinia popo toko imbi ambolko paka tondonge, molo yunga imbimu mambelena molo kína molomba yomboma múlu naa pilku ipulieli tangoli mindili nongo mindi molonge." nirimu. <sup>12</sup> „Aku ulumu wendo ombá kinia, Pulu Yemonga yombo yuni "Saa." nimba mane sirimu ungumu pilku liku sengena panjiku, Yesusi kuru mondoemele yomboma konopu tondolo pupili enge ningu molangi.

<sup>13</sup> Kanu-kinia na ungu se mulu-koleana wendo orumu pilierindu kinia nimbale: "Pepá toko i-siku nieni: 'Kiniá kepe pe kepe Ye-Awiliimunga yomboma molkole kololemele kolonge yomboma ono "Konopu peanga pepili molko kondangi." nilimú aulkana molemele.' ningu pepá tou." nirimu.

Minimuni kepe nimbale: "Sika, ono 'Konopu peanga pepili molko kondangi.' nilimú aulkana molemele. Ono ulu-pulu peanga selemelema Ye-Awiliimuni pilipa molombamonga kála-seko selemele kongonoma munduku kelko sika múlu pilingí." nirimu.

**14:14-20**

### *Mana Kere-Langi Nou Lierimuma Liku Maku Toringi Semanemo*

<sup>14</sup> Kanu-kinia kanorundu kinia kupa kake se torumu. Akuna ola ye se mania molorumu, akumu Mania Ombo Mana-Ye Au Lierimu Ye none sélimu molorumu. Yu ye nokoli kingimunga wanie-karaono kou-gollone seli se pakopa, kere-langi nou lielima kolomongo seko limili lu-pulta nee mololi se ambolorumu. <sup>15</sup> Kanu-kinia angello se „Pulu Yemo popo toringi, ulka-tembele mulu-koleana gilierimu akuna wendo ombo kupa polona ola molorumumundu ru nimba nimbale: "Kiniá ma-koleana kere-langima kamu nou liemu-na kamu kolomongo seko sukundu lingí walemo kamu wendo okomo kene nunga kere-langi kolomongo seli lu-pultamo liku kere-langima kolomongo seko li." nirimu. <sup>16</sup> Aku nirimu kinia pilipale kupa polona

ola molorumu yemo mania pumba mana kere-langima kolomongo sepa sukundu liltimu.

<sup>17</sup> Kanu-kinia angello se ulka-tembele mulu-koleana gilierimu akuna wendo orumu. Yu kepe kere-langi nou lielima kolomongo selemele lu-pulta nee mololi se ambolorumula. <sup>18</sup> Kanu-kinia angello se lupa, yu sepe nokorumu angellomo, yu Pulu Yemo popo toko mélema kaloringi polomo mundupa kelepa omba, angello lu-pultamo ambolorumumundu tondolo ru nimba nimbale: "Nunga lu-pulta nee mololimu likuli unju-waene tolemo mongoma polo tomu kene inia toko maku tou." nirimu. <sup>19</sup> Nirimu ungumu pilipale lu-pulta ambolorumu angellomo mania pumba mana waene-mongo polo torumuma inia topale, waene-no seko wamongendo kimbuni kulku nakele-makele selemele mele Pulu Yemone paa mumindili kolorumu ulumu perimumu lierimuna memba pumba sukundu mundorumu. <sup>20</sup> Kolea-awilina ultukundu waene mongoma mingina kimbuni kulku nakele-makele seringi kinia mingina meme wendo omba manda manjeli tere anderete killomita mele omba pumba, olando olando omba kongi ose se ola gilierimu senga kumbina mele orumu.

## 15

### Kolomongo-Awili 15

#### *Yomboma Kinia Kamu Umbuna Pemba Mele Angello Yopoko-Pakarane Méle Yopoko-Pakara Ambolko Gilieringimanga Semanemo*

<sup>1</sup> Kanu-kinia mulu-koleana sukundu ulu paa awili tondolo se kanopole konopu awisili kimbu sirindu. Akumu i-sipa: Yomboma-kinia kamu umbuna pemba mele angello yopoko-pakarane méle yopoko-pakara ambolko gilieringi. Akumunga pulumu i-sipa: Kanu umbunama pora nimbá kinia Pulu Yemone yomboma-kinia mumindili kolomba uluma kamu pora nimbá.

<sup>2</sup> Na kanorundu kinia nomu-kusa mololi none sepa se gallási kinia sepe kinia waka-maka peli none serimu. Aku nomúmunga kelona yombo mare gilieringi. Kanu yomboma méle-takaramo kinia, yu-mele manda manjiku seko wamoko anjeringi mélemo kinia, méle-takaramonga imbi manda manjipa perimu nambamo kinia, toko mania munduku enge niringi yomboma. Ono Pulu Yemonga gita melema ambolko nomú none sélimunga kelona gilkuli niringimuni, <sup>3</sup> Pulu Yemonga kongono sendeli ye Mosisini konane nirimumu kinia Sipisipi Walomonga konanemo-tolo ningu ninguli: "Pulu Ye Awili Olandopamo

nuni ulu selenoma pali paa olandopa,  
akuma kanopole konopu awisili kimbu silimulu.

Yombomanga Pali Ye Nokoli Kingi

Alieli Molopa Mindi Puli Yemo,  
nuni ulu paa sika sumbi siku selenoma  
mona lemó kanolemolo.

<sup>4</sup> Ye-Awilimu,  
nu mindi paa kake sepili moleno akumunga,  
yombo nawene nu pipili naa kolopa,  
nunga imbi ambolopa paka naa tondombaye?

Nuni ulu sumbi siku selenoma pali  
mona wendo olemo kanolemele akumunga,  
ma-koleamanga pali yomboma  
nu molenona ongo nu popo toko kape ningí."

<sup>5</sup> Pe mulu-koleana kelepo kanorundu kinia Pulu Yemo popo toringi serele-ulka-tembelena sukundu suluminia paa kake sélimu kuna lipa lierimu. Akuna sukundu

Pulu Yemone nimba panjerimu unguma perimu suluminiamo kanumu. Akumu kuna lipa lierimu. <sup>6</sup> Akuna yomboma umbuna singí mele yopoko-pakara angello yopoko-pakarane ambolko mengo wendo oringi. Akuma mulu-maminia paa kake sepa pa selima pakoko, kako kou-gollone selima toringi. <sup>7</sup> Wendo oringi kinia méle konde mololi kise akumanga sene mingi kou-gollone seli yopoko-pakara, alieli konde molopa mindi puli Pulu Yemo yunga mumindili kololi uluma perimuma angello yopoko-pakara sirimu. <sup>8</sup> Serele-ulka-tembele kake selina Pulu Yemonga imbi ola molopa tondolo pa sélimu kinia yunga tondolomo kinia akutolonga ilia sepa ulka kake sélimu si nirimu, akuna yombo se manda sukundu naa pumbá. Angello yopoko-pakara yomboma umbuna singí mele yopoko-pakara amboloringima u kamu umbunama yomboma siku pora singí kinia pe mindi yomboma serele-ulka-tembelena sukundu manda pungí, u mólo.

## 16

### *Kolomongo-Awili 16*

*Pulu Yemonga Mumindili Kololi Uluma Mingi Yopoko-Pakara Sukundu Perimu Semanemo (Se 16:1, se 16:3, se 16:4, se 16:8, se 16:10, se 16:12, se 16:17.)*

<sup>1</sup> Kanu-kinia pe nane ungu se Pulu Yemo popo toringi ulka-tembelemonga wendo orumu pilierindu. Akumuni angello yopoko-pakarando tondolo mundupa nimbale: "Ono pungu Pulu Yemonga mumindili kololimu pelemo mingi yopoko-pakara akuma mengo pungu mana ondo-paa." nirimu.

<sup>2</sup> Kanu-kinia angello sene yunga mingi ambolorumumu memba pumba mana ondorumu kinia méle-takaramonga imbimu ononga kangina molopa, takaramo none seli se seko wamoko anjeringi mélemo popo toko kape niringi yombomanga kangina paa mindili sirimu erili kiri lupendi toli awisili serimu.

<sup>3</sup> Angello talo-sipamo yunga mingi ambolorumumu nomu-kusana memba pumba ondorumu kinia nomu-kusamo yombo kololi senga mememo mele au lierimu kinia nona moloringi mélema pali koloringi.

<sup>4</sup> Angello yopoko-sipamo yunga mingi ambolorumumu memba pumba no ombo purumumanga kinia no pilkipa wendo orumumanga kinia ondorumu kinia noma pali meme au lierimu. <sup>5</sup> Kanu-kinia noma nokorumu angellomone ungu se nirimumu pilierindu. Yunimimbale:

"Nu kiniá moleno, u molorunu,  
ye paa kake sélimu,  
nuni yombo seko kinjeringimanga  
kote pilku apuruku kondokole  
aku siku ono "Mindili nongo molko kinjangi." ninumu  
papu senu.

<sup>6</sup> Aku yombomane  
nunga yomboma kinia  
nuni ungu-umbu tondorunuma pilku yomboma  
ningu siringi yomboma kinia  
toko kondoringi kinia meme ombo purumumunga  
'Kiniá onone pundu toko meme nangi.'

ningu sakinu akumu ononga seko kinjeringimunga  
méle kaloli likimili akumu papu likimili."  
nirimu. <sup>7</sup> Kanu-kinia Pulu Yemo popo toko mélema kaloringi polona ungu se wendo ombo nimbole:  
"Pulu Ye Awili Olandopamo,  
nuni sika nikinu.  
Nuni kote pilkuli yomboma selemele mele

sumbi siku pilku apuruku kondoleno lémo.”  
nirimu.

<sup>8</sup> Angello kise-sipamone yunga mingi ambolorumumu memba pumba enana ondorumu kinia Pulu Yemone ‘Enana sepe tondolomone yomboma nopili.’ nirimu. <sup>9</sup> Kanukinia enana sepe wendo omba paa kondorumumuni ‘Yomboma paa mindili nangi.’ nimba ono norumu-kulu onone Pulu Yemonga imbimu ungu-taka tondoko marake seringi. Aku ulu umbuna sirimu wendo orumuma Pulu Yemonga tondolomone ‘I uluma wendo opili.’ nirimu-na-kolo onone ‘konopu topele naa tomolo.’ ningu Pulu Yemonga imbimu ambolko paka naa tondoringi.

<sup>10</sup> Angello se-pakara sipamone mingi ambolorumumu memba pumba méle-takaramonga ye nokoli kingi molopa nokorumu polona ondorumu kinia yuni nokorumu koleama pali simbulu torumu. Yomboma paa mindili nongo ononga alimboloma kongilku nongo, <sup>11</sup> ono mindili nongo erili sepa serimu akumanga pilkuli mulu-koleana molemo Pulu Yemonga imbimu ungu-taka tondoko marake seringi. Ononga ulu-pulu-kiri seringima ‘Mundupu naa kelepo konopu topele naa tomolo.’ niringi.

<sup>12</sup> Angello talo-pakara sipamone mingi ambolorumumu memba pumba no awili Yuperetis omba purumuna ondorumu kinia nomo kumbulupa ena mundi olemona moloringi ye nokoli kingi moloringima onge aulkamo akisinderimu. <sup>13</sup> Kanu-kinia na kanorundu kinia wambiyé derekonomo kinia, méle-takaramo kinia, Pulu Yemone ungu-umbu tondorumuma naa pilipa ungumu we kolo topa yando nimba sirimu yemo kinia, ononga keremanga kuru paa kanopo kiri pilierindu kuru, warekele none seli, yopoko wendo orumu. <sup>14</sup> I kurumane ulu-tondoloma selemele, ononga kongonomo i-sipa: Pulu Ye Olandopamonga wale awilimunga ‘ma-koleamanga pali ye nokoli kingima sukundu sukundu ongo opa sangi wangi.’ ningu pungu liku maku tolemele. <sup>15</sup> (“Piliame! ‘Wa noli ye se ombá.’ ningu naa pilku walu siku molemele kinia lipa sinjipa olemo mele na ono molongena aku sipu ombó. Yombo sene ‘Yu ombá kinia na we-we molopo pipili naa kolambo.’ nimba uru naa pepa makilipa kanopa, yunga mulu-maminiamma pakopa molomba yombomo yu Pulu Yemone “Konopu peanga pepili molko kondangi.” nilimú aulkana molemo.” nirimu.)

<sup>16</sup> Kanu-kinia kurumane ye nokoli kingima kolea senga liku maku toringi, aku koleamonga imbimu Ipuru unguna Amakedono.

<sup>17</sup> Angello yopoko-pakara sipamone mingi ambolorumumu muluna ondorumu kinia Pulu Yemonga úlka-tembele kake selina ye nokoli kingimunga polomonga ungu tondolo se wendo omba nimbale: “Kiniá pora nikimu.” nirimu. <sup>18</sup> Aku nirimu kinia kariapá sepa, ungu mare wendo omba, mulu kilkala nimba, ma jimi-jimi awili se serimu. Ma jimi-jimi serimu akumu paa olandopa; u yomboma pulu-pulu makoleana moloringi kinia aku sipa se paa naa serimu. <sup>19</sup> Aku serimu kinia kolea paa awili Bepillono ówa topa yopoko sepa, yombomanga kolea lierimumanga kole-awilima kiri lepa pora sirimu. Pulu Yemone kolea paa awili Bepillono komu naa sindipale Pulu Yemo yunga mumindili paa kolorumumu perimu no-waene mingimu ‘yu pali nopili.’ nimba sirimu. <sup>20</sup> Nomuna sukundu lierimu kolea kangama pali kowa puringi, koleama pali ma-pangi se kepe wendo naa orumu. <sup>21</sup> Mulúna lo kopu-mongo awili-sepa topa yomboma torumu. Lo kopu-mongo akupokonga umbunamo rasi-beko talonga mele. Lo kopu-mongo olandopa forumumuni ono umbuna sirimu ono mindili noringimunga Pulu Yemonga imbimu ungu-taka tondoko marake seringi.

### *Ambo-Waporamonga Semanemo (17:1-19:5 pali)*

<sup>1</sup> „Pulu Yemonga mumindili kololi uluma perimu, mingi yopoko-pakara u ambolko moloringi angellomanga sene na molorunduna omba nimbole: “Ambo wapora toli awilimu, no awisili omba pulimúmanga ola molemomo, aku sipa selemomonga mindili singí limba mele lipu ora siembo ou.” nirimu. <sup>2</sup> Mana moloringi ye nokoli kingima kinia yu-kinia wa ulu-kirinale seringi; we-yombo mana moloringima-kinia yu wa ulu-kirinale serimumunga no-waene nongo amu tolemele mele aku siku amu toringi.” nirimu.

<sup>3</sup> Kanu-kinia pe na molorunduna Minimu omba ambolorumu kinia angellomone na kolea ku lielina memba purumu kinia akuna ambo se méle-takara kondoli senga bulu-mingina molorumu kanorundu. Aku méle-takaramonga kangina imbi awisili molorumu, aku imbima Pulu Yemo marake seko ungu-taka tondoringi imbima molorumu. Aku mélemonga penge yopoko-pakara kinia ungú rureponga talo kinia gilierimu. <sup>4</sup> Aku ambomo ambo kamako nokolima pakolemele mele wale-pakoli kondoli talo pakopa, kou-gollo kinia kou kangi lupa-lupa kololi kou-mone awili sepa pulimúma kinia kulumbu kake sepa kou-mone awili sepa pulimúma kinia akumane yu au nimba molorumu. Yu no-mingi kou-gollone seli se ambolorumu, aku mingimunga sukundu yu wa ulu-kirinale serimumunga méle paa kiri kalaro mololi awisili pepa peke lierimu. <sup>5</sup> Yunga mambelena yunga imbi molorumu, aku imbimu ungu-iku se molorumu, akumu i-sipa:

BEPILLONO PAA AWILIMU, WAPORA TOLEMELEMA KINIA'  
MANA-YOMBOMANE ULU-PULU PAA KALARO MOLOLI KIRIMA  
SELEMELEMA KINIA ONONGA ANUMU

nimba molorumu. <sup>6</sup> Pulu Yemonga yomboma kinia, Yesusi kuru mondoko yunga unguma andoko yomboma ningu siringi yomboma kinia, aku siku seko moloringimunga kanu ambomone ono topa kondorumu. Yombo se no-tondolo nombale amu tolemo mele yuni ono torumumanga memema omba purumumunga yu paa konopu sipa amu mele torumu.

Akumu kanopole paa mini-wale mundupu konopu awisili kimbu sirindu. <sup>7</sup> Aku serindu kinia angellomone nimbole: “Nu nambi semu-na konopu awisili kimbu sakinuye? I ambomo kinia méle-takara penge yopoko-pakara kinia ungú rureponga talo kinia gilimúmuni ambomo memba pulimúmu akutolonga ungu-pulumu nu nimbu siembo. <sup>8</sup> Méle-takara kanonumu u molorumu, kiniá naa molemo, pe komuru se paa lepa mindi pumba naa pora nilimúmunga wendo omba yu kolomba aulkana pumbá. Mana-yombo mare, mamo u wendo naa opili Pulu Yemone konde molopa mindi puli bokuna imbi naa torumu naa molemo yombomane kanu méle-takaramo kanokole, u molorumu kiniá naa molemo-na-kolo kelepa wendo ombá kinia kanokole konopu awisili kimbu singí.

<sup>9</sup> Mimi siku konopu kimbu siku pilingí yombomane imunga ungu-pulumu pilingínje. Penge yopoko-pakara akuma ambomo mania molemo ma-pangi yopoko-pakara. <sup>10</sup> Penge yopoko-pakara akumanga pulu talo-sipamo ye nokoli kingi yopoko-pakara. Aku kingimanga se-pakara koloringi; se kiniá we molemo; se u wendo naa oli. Aku-na-kolo yu wendo ombá kinia wale kanga-kolte mindi kolea nokopa molomba. <sup>11</sup> Méle-takara u molorumu kiniá naa molemo akumu ye nokoli kingi engaki-ipamo. Yu kinia kingi yopoko-pakara kinia ono talape selumu, yu kolomba aulkana pulimú.

<sup>12</sup> Ungú rureponga talo kanonu akumu ye rureponga talo u ye nokoli kingi naa molko koleama naa nokolemelema. Aku-na-kolo pe méle-takaramo kinia pea ono ye nokoli kingi nambama likuli ena mongo selu mindi koleama nokonge. <sup>13</sup> Kingima ononga konopu selu sipa pepili molkole, ononga tondoloma kinia kolea nokonge nambama kinia méle-takaramo singí. <sup>14</sup> Ono Sipisipi Walomo kinia opa senge, aku-na-kolo Sipisipi Walomone ono topa mania mundumba. Yu ye awilimanga ye awili

olandopamo, yu ye nokoli kingimanga kingi olandopamo molopa, yuni u nimba taltopa ‘Nanga yomboma molangi waa.’ nirimu-na yuni nilimú unguma tondolo munduku kuru mondoko lombili pulimili yomboma yu-kinia kopu seko puringi-na ono topa mania mundumba.” nirimu.

<sup>15</sup> Aku nimbale angellomone nando nimbale: “Nu no omba pumu kanonu, akumanga ola ambo wapora tolemomo ola molomu, aku noma yomboma kinia yombo talapema kinia yombo kangi lupa lupa gilimuma kinia yombo ungu lupa lupa lemele yomboma. <sup>16</sup> Méle-takaramo kinia ungú rureponga talo kinia kanonu akumane ambo wapora tolemomo-kinia konopu kiri panjikuli, yu paa seko kinjiku ‘Yu we-we andopa molopili.’ ningu mulu-maminama pali kulunduku, yunga kangina míndi mare toko nongo, ‘yu kamu sepene nopili.’ ningu kalonge. <sup>17</sup> Pulu Yemone ‘Kingima yunga kongonomo sendangi.’ nimba ‘konopumuni pilku sangi.’ nimba pilierimu mele onone aku siku pilku ‘ono kinia méle-takaramo kinia konopu seluna pupili molamili.’ ningu ononga koleama nokonge nambama méle-takaramo singi. Ono aku siku seko molangi Pulu Yemone ‘Wendo opili.’ u nimba panjerimu unguma wendo ombá. Kanu-kinia ononga kongonomo pora nimbá.

<sup>18</sup> Ambo kanonumu mana molemele ye nokoli kingima pali nokolemo kolea paa awilimu.” nirimu.

## 18

### Kolomongo-Awili 18

#### *Kolea-Awili Bepillono Kamu Kiri Lierimu Semanemo (17:1-19:5 pali)*

<sup>1</sup> U akumu kanopole nirindumuni, pe kelepo kanoruntu kinia angello se mulu-koleana mania orumu. Akumu yu kolea nokomba namba paa awili se mondopa, yunga tondolo pa sélimuni ma-koleana pa senderimu. <sup>2</sup> Yuni paa tondolo ru nimba nimbale:

“Kolea-Awili Imbi Paa Olandopa Mololi Bepillono  
kamu kiri liemu. Kiri lepa pora simu.  
U yombo awisili akuna moloringi-na-kolo kiniá,  
Setenenga kendemande-kuruma  
‘Olionga koleamo.’ ningu akuna pelemele.  
Kuru kiri kalaro mololima kinia  
kera kalaro mololima kinia  
kanopo kiri pilielemolo kerama kinia  
akuna pelemele.

<sup>3</sup> ‘Kanu koleana yombo moloringimane  
we-koleamanga pali yombo talapema  
wa ulu-kirinale senge uluma pelemo no-waene  
paa tondolomo nangi.’ nimba  
ta nirimu noringimunga kamu kiri lierimu.

Koleamanga pali ye nokoli kingimane kepe  
yu-kinia wa ulu-kirinale seringila.

Mana topo-ropo toringi yemane  
kála seko méle kirima yakala koloringimunga  
ono yu-kinia topo-ropo toko  
kou-mone awisili liltingi.”

nirimu.

<sup>4-5</sup> Kanu-kinia pe mulu-koleana ungu se lupa wendo orumu pilierindu kinia nimbale:

“Nanga yomboma,  
aku koleamonga ulu-pulu-kirima

lepa mulu-koleana ola olemo,  
aku koleamone sepa kinjerimu uluma  
Pulu Yemone pilipa molemo kene  
ono aku koleamo munduku kelko ultu wangi.  
'Yunga ulu-pulu-kiri selemo akuma  
pea kopu sepo naa samili.  
Ulu-pulu-kiri selemo akumanga Pulu Yemone  
umbuna simbama olio pea naa liemili.' ningu  
wendo wangi.

<sup>6</sup> Yuní yando sepa kinjerimu akumunga  
onone anju aku siku yu pundu toko siengi.

Yuni yando serimu akumunga  
onone anju sere leko pundu tangi.

Yuni no enge nili mingu kapona  
sepa wamorumumu liku sere leko  
no enge nili olandopa púlimu yu nopili siengi.

<sup>7</sup> Yu yuyu u 'molopo kondambo.' nimba  
yunga imbi ambolopa paka topa kála sepa molorumu  
akumunga pundu toko yu mindili siku  
umbunama mepili siengi.

Yuni konopuni pilipale  
"Na ambo nokoli kuwini molopo  
kuwininga polona molio.  
Na ambo wayere naa molio.

Na waltikele kepe kola sepa kola-ulka naa molombo."  
nimba pilielemo.

<sup>8</sup> Akumunga, ena selumunga  
yunga umbuna wendo ombáma wendo ombá.

Yombo kolonge kuru awisili wendo om̄ba,  
yombo awisili kola seko, kolea gele lemba.

Sepene yu nomba pora simba.

Yuni uluma aku sipa sepa kinjimbamonga  
yu kote sendepa pilielemo Pulu Ye Awilimu  
paa enge nili olandopa pelemo yemone  
yu apurupa mindili akuma simba.

<sup>9</sup> "Yu-kinia wa ulu-kirinale seko, mongo kondoko yu yakala kolorumu uluma pea  
yakala kolko seringi ye nokoli kingimane yu sepene nomba ilia wendo ombá kinia  
kanokole kola seko kola-ulkana wale awisili molonge. <sup>10</sup> Yu mindili nombá mele  
kanokole paa mini-wale munduku paa sulu seko gilku ninguli:

"Ai ya! Ai ya! Kolea imbi paa ola mololimu,  
kolea paa awili enge nili Bepillono!

Ena-mongo selumunga mindi  
nunga seko kinjerinumunga  
uluma waltikele wendo okomo." ningí.

<sup>11</sup> Mana topo-ropo tonge yema ononga topo-ropo toko kou-mone lingí mélema naa  
lingímunga ono kola seko wale awisili kola-ulka molonge. <sup>12</sup> Topo-ropo toko tal tongue  
mele akuma i-sipa: Kou-gollo kinia kou-sillipa kinia umbu-kou kou-mone awili sepa  
pulimúma kinia kulumbu kake kou-mone paa olandopa pulimúma kinia; múlu kake  
peangama kinia, múlu kondoli lupa-lupama kinia; unju lupa-lupa muna tolima kinia,  
méle lupa-lupa kongi ellepene ungúni seko wamonge mélema kinia, unju kou-mone

awili sepa pulimane seko wamonge mélema kinia, kou-boronisi kinia kou-aini kinia kou puni-mana nilima kinia aku koumane seko wamonge mélema kinia, aku mélema taltoko,<sup>13</sup> kangina ‘muna topili.’ ningu wambola seko wamoko kalolemele sinamono kinia sipási kinia, paura-keku kalolemele kinia muna tolemoma kinia, wambola lupa-lupa muna tolima kinia, no-waene kinia unju-ollipi wambola kinia, rasi-witi kinia, rasi-witimuni seko wamolemele pellawa kinia; kongi kao sipisipima kinia; kongi ose kinia osene kundulimú karoma kinia; kongono we sendenge kendemande molonge yombo, ‘konopu naa pepa kongi mele molemele.’ ningu mengo pungu kou-mone topo-ropo tonge yomboma kinia; aku méle taltongema pali yombomane kelko koleamanga lupa liku mengo ongo makete seko kou lingí aulkamo mania pumbámonga kola senge.

<sup>14</sup> Onone ninguli: ‘Nu méle peanga kou-mone olandopa pulimú mélema ‘paa liemboa!’ konopu lenoma mania pumu. Méle peanga kande-kandema nu yakala kolonuma kinia nunga au nilinu méle kou-mone olandopa pulimú peangama kinia kamu nu mundupa kelepa mania pumu. Mélema kelepa nu-kinia naa lemba kanoni.’ ningí. <sup>15</sup> Aku mélema topo-ropo toko kou-mone awisili liku singí yemane sulu seko gilku yu mindili awili sepa nombá mele kanokole paa mini-wale mundungí. Kola seko kola-ulka moltkole <sup>16</sup> ru ningu ninguli:

“Ai ya! Ai ya! Kolea imbi paa ola mololimu,  
ambo kamakoma pakoko molemele mele  
wale-pakoli kondoli pakopa,  
kou-gollo kinia kou kangi lupa-lupa kololi  
kou-mone awili sepa pulimúma kinia,  
kulumbu kake sepa  
kou-mone awili sepa pulimúma kinia  
akumane yu au nimba molorumu.

<sup>17</sup> Ena-mongo selumunga yuni kou-mone  
awili sepa purumu taltolemo mélema  
paa kamu kiri liemu.” ningí.

“Nomu-kusana andoli pipi nokolemele yema kinia pipimanga kongono selemele yema kinia nona andoko topo-ropo toko kou-mone limili yomboma kinia aulka sulu seko gilkuli kanonge. <sup>18</sup> Sepe nombámonga iliamo kanoko ninguli: “I kolea-awilimú none seli se lierimuye?” ningí. <sup>19</sup> Ma-kungupu liku pakoko kola seko kola-ulka moltkole ningímuni ru ningu ninguli:  
“Ai ya! Ai ya! Kolea imbi paa ola mololimu,  
sipi nomuna mengo andoko  
akuna kou-mone awili sepa talitorumu  
kou-mone awili seko liltingi koleamo!

Ena-mongo selumunga  
aku koleamo kamu kiri liemu.” ningí.

<sup>20</sup> Mulu-koleana molemele yomboma kinia,  
Pulu Yemonge yomboma kinia  
Karasini “Nanga kongonomo sende-paa.”  
nimba lipa mundorumu yema kinia  
Pulu Yemone ungu-umbu tondorumuma pilku  
yomboma ningu siringi yomboma kinia  
i koleamone ono mindili pipi sepa kinjerimumunga  
Pulu Yemone apurupale  
yu mindili pipi sepa kinjikimumunga  
yu lepa kinjilimumunga  
konopu awili seko siee!”

nirimu.

<sup>21</sup> Kanu-kinia angello paa enge nili sene kou paa awili se ola lipa nomu-kusana topa mania mundupa nimbale:

"I sekeromo mele aku sipa

    ulu-tondolo wendo ombá sene  
kolea-awili imbi paa ola mololi kolea Bepillono  
    topa kinjimba kinia  
        yombomane i koleamo kelko naa kanonge.

<sup>22</sup> Gita toko, kolape-mingi langoko,

    bikollo ungu siku, konane ningu,  
    aku siku ulu selemelé unguma  
        kelko kamu kelko naa pilingí.

Ulka takoko méle seko wamolemele kongonomanga  
    yomboma kelko kamu naa kanongela.

'Pellawa samili.' ningu kou awili sene

    rasi-witi kali lemele kinia ungu nilimú ungumu  
        kelepa kamu naa nimbá naa pilingí.

<sup>23</sup> Nu koleamo kamu kelepa sepe-llame pa naa sembá.

Ye se ambo limba molo ambo se ye pumbándo  
    ungu nilimili mele

        nu koleamo kelko kamu naa pilingí.

U nunga topo-ropo toringi yema

    koleamanga pali ye kamakoma moloringi.

Nuni ma-koleana yomboma pali

    ambo konga mélema  
        colo toko kondi toko sirinu akumuni  
        yombomane ulu-kiri awisili seringi.

<sup>24</sup> Pulu Yemone ungu-umbu tondorumu unguma pilku  
    yomboma ningu siringi yomboma kinia

Pulu Yemo yunga yomboma kinia  
    yuni topa kondorumumanga memema  
        yunga koleana lemó;

ma-koleamanga pali toko kondoringi yombomanga  
    memema kepe aku koleana lemó.

Aku uluma pali wendo orumuma

    kolea Bepillonone sepa kinjerimumunga  
        wendo orumu."

nirimu.

## 19

19:1-10

*Pulu Yemo Kape Ningí Unguma*

19:1-5

*Kolea Bepillono Kamu Kiri Lierimumunga Yomboma Konopu Siku Pulu Yemo Kape Ningí Semanemo*

<sup>1-2</sup> Aku uluma pora nirimu kinia pe pilierindu kinia mulu-koleana yombo awisili ungu nilimili mele ungu se wendo orumu pilierindu. Akumane ru ningu ninguli:

"Pulu Yemone uluma pali

    paa sika sumbi sipa apurupa selemo.

Wapora topa imbi paa ola mololi ambomo yuni  
    wapora toli uluma serimumuni

ma-koleana yomboma  
 ‘molko kinjangi!’ nirimumunga  
 aku ulu serimuma Pulu Yemone pilipa apurupa  
 ‘Yu mindili nopili.’ nirimu.  
 Aku ambomone Pulu Yemonga kendemande-yomboma  
 topa kondorumu aku yombomanga mememanga  
 Pulu Yemone pundu tondopa ambomo mindili sirimu  
 akumunga, Pulu Yemo yu kape nimbu  
 imbi ambolopo paka tondamili!  
 Mindili nolemolá aulkana  
 lipa tapondopa wendo lipa  
 yu-kinia molko kondonge aulkana  
 lipa mondolemo ulumu yu-kinia pepa,  
 yunga imbi paa olandopa molopa,  
 tondolo pa sélimu yu-kinia pepa  
 yu mélema pali nokomba nambamo kinia  
 engemo-tolo pelemo yemo.”  
 niringi.

<sup>3</sup> Kelko ru ningu ninguli:  
 “Yuni yu topa kalomumunga ilia  
 alieli omba mindi pelemomonga  
 Pulu Yemo kape nimbu  
 imbi ambolopo paka tondamili!”  
 niringi.

<sup>4</sup> Ye nokoli towapu selu kinia, méle konde mololi kise kinia, ono ye nokoli kingi  
 polona molemo Pulu Yemonga kumbikerena mania pungu tamalu peko, yu kape  
 ningu imbi ambolko paka tondoko ninguli:

“Aku sipa sepili.  
 Pulu Yemo kape nimbu  
 imbi ambolopo paka tondamili!”  
 niringi.

<sup>5</sup> Kanu-kinia ungu se ye nokoli kingi polona wendo omba nimbale:  
 “Ono yunga kongono yombo kendemande  
 molemelema pali,  
 ‘Nu olionga ye awilimu.’ ningu  
 pipili kolko yunga ungumu taka leko  
 pilku selemele yombo awilima kepe  
 imbi naa mololima kepe  
 onone olionga Pulu Yemo kape ningu  
 imbi ambolko paka tondangi!”  
 niringi.

*19:6-10*

*Kongi Sipisipi Walomo Ambo Limbamo Kere-Langi Awili Seko Koyonge Semanemo (19:1-10 pali)*

<sup>6</sup> Pe kelepo pilierindu kinia ungu se, yombo awisilini ungu panjilimili mele ungu se,  
 no awili sepa topale ungu nilimú mele molo mulú tondolo kilkala nilimú mele ungu  
 se pilierindu. Akumane ru ningu ninguli:

“Olionga Pulu Ye Awili Tondolo Pepa  
 Namba Awili Olandopamo Lemó Yemo  
 kamu ye nokoli kingimu molopa

mélema pali nokolemomonga  
yu kape nimbu imbi ambolopo paka tondamili!

<sup>7</sup> Sipisipi Walomo ambo limba walemo  
kamu wendo okomo.

Yu ambo limbamone 'Na ombo limba.' nimba  
nokopa molemomonga

olio konopu peanga pepili konopu sипу

'Papu serimu.' nimbu imbi ambolopo paka tondamili!

<sup>8</sup> Pulu Yemone  
'Mulu-maminia paa peanga tondolo pa sepa  
kake selima pakopili.' nimba simu."

niringi. (Mulu-maminia peangamanga pulumu Pulu Yemonga yombomane ulu peanga selemene uluma yuni kanopa 'ulu sumbi nilima' nimba kanolemo uluma.)

<sup>9</sup> Kanu-kinia angellomone nando nimbale: "Ungu nimbúmu pepána imbi tani: 'Sipisipi Walomo ambo limba kere-langì koyongena Pulu Yemone yombomando 'Wangi.' nimbá yomboma ono "Konopu peanga pepili molko kondangi." nilimú aulkana molemele.' aku mele pepána tou." nirimu. Aku nimbale kelepa ungu se pea nimbale: "I unguma paa sika Pulu Yemonga ungu sikama." nirimu. <sup>10</sup> Aku nirimu kinia pilipuli angellomonga kumbikerena tamalu pepo kape nimbú serinduna-kolo yuni nando nimbale: "Nu aku siku naa sei! Nunga genalimane Yesusinga unguma yomboma ningu silimilima kinia nu kinia na kinia olio pali Pulu Yemonga kendemande-yomboma molopo kongono sendelemolo kene nuni Pulu Yemo mindi popo toko kape nieni. Pulu Yemonga ungu nimbu silimulu akumunga pulumu Yesusinga unguma nimbu silimulu ulumu akumunga 'nu kinia genali kinia na kinia olio peama yunga kendemande-yema molemolo.' nikiru." nirimu.

19:11-21

### *Ye Se Kongi Ose Kakemonga Bulu-Mingina Ola Molorumumunga Semanemo*

<sup>11</sup> Kanorundu kinia mulu-koleamo nangape toli lierimu kanorundu kinia kongi ose kake se gilierimu, akumunga bulu-mingina ola ye se molorumu, akumu imbi leko 'Kongono Ambolopa Nokopa Kondopa Konopu Topele Naa Toli Yemo' ningi, 'Ungu Sikama Mindi Pelemo Yemo' nilimili. Yu kote pilipa sumbi sipa apurupa we naa lipa tapondolemo. Yu we 'Opa sambo.' nimba naa selemo. Ungo-pulu se pelemo kinia pilipale selemo. <sup>12</sup> Yunga mongotolo sepe mele tondolo pa sepa, ye nokoli kingima wanie-karaono pakolemele mele wanie-karaono awisili yunga pengena pakolemo. Yunga kangina imbi se molemo, aku imbimu yuyu pilielemo yombo sene lupa naa pilielemene. <sup>13</sup> Yu mulu-maminia meme kaloli sulu se pakolemo. Yunga imbimu Pulu Yemonga Ungumu. <sup>14</sup> Mulu-koleana amima kongi ose kakemanga molko yu lombili pungí purungi, akuma mulu-maminia kake paa peanga mare, kalaro naa mololima pakoringi. <sup>15</sup> Yunga kerena ma-koleana yombo talapema pali tomba opa seli lu-pulta paa nee mololi se pelemo.

'Yu yombomanga pali ye awilimu molopa  
yomboma paa tondolo mundupa nokopa molomba.'

Tondolo Puli Pulu Ye Olandopamonga mumindili paa olandopa kololi ulumu pelemo waene-mongoma kimbuni kulupa nakele-makele selemo. <sup>16</sup> Yunga mulu-maminia sulu akuna kinia yunga porona kinia imbi se molemo, akumu i-sipa:

YE NOKOLI KINGIMANGA YU YE NOKOLI KINGI PAA OLANDOPAMO;  
YE AWILIMANGA YU YE PAA AWILI OLANDOPAMO.

nimba molemo.

<sup>17</sup> Kanorundu kinia enana sukundu angello se gilierimu, akumuni muluna mangoko andoringi keramando tondolo ru nimba nimbale: "Pulu Yemone kere-langì awili koyomumu nangi waa." nirimu. <sup>18</sup> "Ye nokoli kingimanga 'kolko lemele' ónama

kepe, amimanga ye nokolimanga ónama kepe, ye enge nilimanga ónama kepe, osema kinia ononga bulu-mingina ola molko andolemele yema kinia ononga ónama kepe, yombomanga pali we molemele yomboma kepe, kongonoma we sendeko méle kaloli naa limili kendemande-yombomanga kepe, imbi naa mololima kepe, imbi mololima kepe, ononga ónomanga míndima nangi waa.” nirimu.

<sup>19</sup> Kelepo kanorundu kinia méle-takaramo kinia mana ye nokoli kingima kinia kingimanga amima kinia onone ‘Kongi ose bulu-mingina ola molemo yemo kinia yunga amima kinia opa samili.’ ningu maku toringi. <sup>20</sup> Aku-sipa na-kolo Pulu Yemone ungu-umbu tondorumuma naa pilipa ungumu we kolo topa yando nimba sirimu ye kanumu méle-takaramone lipa tapondorumu-na ulu-tondolo awisili serimu akumu kinia, méle-takaramo kinia, olo ambolko ka siringi. U ulu-tondolo serimu ulumane yombo méle-takaramonga kongilinamo ‘kangina molopili.’ ningu, yu none seli se seko wamoko anjeringimu popo toko kape niringi kanu yomboma kondi torumu. Yu kinia méle-takaramo kinia ka sikuli, kou-sallapa sepe nomba kondopa perimu muru paa awilimunga liku mania mundoringi. <sup>21</sup> Kongi ose bulu-mingina ola molorumu yemonga kerena opa seli lu-pulta perimumuni wema pali topa kondorumu, kanukinia ononga ónomanga míndima keramane ongo ono olo serimu.

## 20

20:1-6

### *Kurumanga Nokoli Setene Kalia-Ingi Wane Tausini Ka-Ulkana Pemba Semanemo*

<sup>1</sup> Kanorundu kinia mulu-koleana angello se, komuru se paa lepa mindi pumba naa pora nilimúmunga kere-pulu kimu kinia ka-séne paa awili se kinia ambolopa memba, mania orumu. <sup>2</sup> Aku angellomone wambiye derekonomo ambolopa lipa ‘Kalia-ingi wane tausini aku sipa molopili.’ nimba ka-sénene ka torumu. Aku wambiye derekonomo yu koronga-u molorumu kongi-ka-wambiyemo, yu kurumanga nokoli, depelemo, yu Setene. <sup>3</sup> Angellomone yu ambolopa lipa ka-senene ka topale yu mana mania komuru se paa lepa mindi pumba naa pora nilimúmunga topa mania mundupa, ‘Kalia-ingi wane tausini ombo pupili yu kelepa wendo ombo ma-koleana yombo talapema andopa kolo topa kondi naa topili.’ nimba kerepulumu pipi sipa lloko torumu. Kalia-ingi akuma pora nimbá kinia ‘Yu wendo ombo laye-kolte andopili.’ ningu wendo liku mundungí.

<sup>4</sup> Ye nokoli kingi molemele poloma kanorundu, akumanga Pulu Yemone ‘Yomboma apurangi.’ nimba namba sirimu yomboma moloringi. Yombomane mana molko Yesusinga unguma andoko ningu siku, Pulu Yemonga ungumu kuru mondoko amboloringi-kulu ono nomima kari leko toko kondo-ringi, akumanga minima kanorundu. Ono méle-takaramo kinia méle-takaramo none seli mélse seko wamoko anjeringimu-tolo popo toko kape ningu imbi ambolko paka naa tondoko, méle-takaramonga kongilinamo ononga mambelena molo kína ‘Naa molopili.’ niringi yomboma kanorundu. Akuma lomboroko ola molko, kalia-ingi wane tausini Karasi kinia pea ye nokoli kingima molko mélema nokoringi. <sup>5</sup> Yomboma pali lomboroko ola molongemonga ono kumbi leko lomboroko ola moloringi. (We-yombo koloringima aku yomboma kinia waltikele lomboroko ola naa moloringi. Kalia-ingi wane tausini pora nirimu kinia lomboroko ola moloringi.) <sup>6</sup> Kumbi leko ola moloringi akuma Pulu Yemonga yombo kake selima, ono “Konopu peanga pepili molko kondangi.” nilimú aulkana molemele. Yomboma wale talo-siku kolonge aku ulumuni ono unguri manda naa sembá. Ono Pulu Yemo kinia Karasitolo popo tondoli yomboma molko, Karasi kinia pea kalia-ingi wane tausini ye nokoli kingima molko mélema nokonge.

20:7-10

### *Setene Kamu Mindili Nomba Mania Pumbá Semanemo*

<sup>7</sup> Kalia-ingi wane tausini pora nimbá kinia „kurumanga nokoli, Setene ka-ulka na wendo liku mundungí kinia <sup>8</sup> ma-koleana pali molemele yomboma, Goko kinia Mekoko kinia kondi topa ‘Opa sangi wangi.’ nimba sukundu sukundu limba. Aku yomboma kou-okiya manda mele. <sup>9</sup> Ma-koleana pali kimbu kongono seko ongo ongole, Pulu Yemonga yomboma moloringi koleamo, Pulu Yemo konopu mondolemo kolea-awilimu, liku kakapu seko tonge seringi-na-kolo mulu-koleana sepe se mania ombo aku amima norumu. <sup>10</sup> Kanu-kinia „kurumanga nokoli, depelemone ono kolo topa sipa kondi torumu yemo, liku kou-sallapa sepe nomba kondopa perimu muru paa awilina, méle-takaramo kinia, Pulu Yemone ungu-umbu tondorumuma naa pilipa ungumu we kolo topa yando nimba sirimu yemo kinia, olo u liku toko mania mundoringi muruna, yu liku toko mania mundoringila. Akuna ono ipulieli tangoli alieli mindili nongo mindi molonge.

20:11-15

### *Yombomanga Kotemo Kamu Wendo Ombá Semanemo*

<sup>11</sup> Kanu-kinia pe kanorundu kinia ye nokoli kingi senga polo kake seli awili se lierimu, akuna ye se molorumu kanorundu. Mamo kinia mulumu-tolo yu-kinia sere leko molonge kolea se naa lierimu-kulu yu molorumuna munduku kelko kowa puringi. <sup>12</sup> Yombo koloringima pali, wema kinia imbi mololima kinia yu molorumu polomonga kumbikundu gilieringi kanorundu. Boku mare wendo lipa kanorumu. Pe boku se lipa kanorumu, akumuconde molopa mindi puli bokumu. Kanu-kinia bokumanga sukundu ononga ulu seringima kanopa apurupa kote pilierimu. <sup>13</sup> Nomu-kusana koloringi yomboma lomboroko ola molko, yombo óno-koleana peringi yomboma kepe Yombo Kololemelemanga Minima Pulimili Koleana puringi yomboma kepe lomboroko ola molko kotena pungu gilieringi. Kanu-kinia ononga ulu seringimanga yombo selu selu nimba kote pilierimu. <sup>14</sup> Kanu-kinia kololi ulu-pulumu kinia u kolkole minima moloringi murumu kinia akutolo sepe nomba perimu muru paa awilimunga topa mania mundorumu. I sepe nomba pelemo muru paa awilimu yomboma wale talo-siku kololemele ulumu. <sup>15</sup> Kote pilimba yemone yombo senga imbibimba konde molopa mindi puli bokuna naa molorumu kinia kanopale kanu yombomo sepe nomba perimu muru paa awilimunga topa mania mundorumu.

21:1-22:5

### **Jerusalleme Kondemonga Semanemo**

## 21

21:1-8

### *Mulu Ma Kondetolonga Semanemo*

<sup>1</sup> Pe muluconde se kinia ma konde se kinia kanorundu. Ma umu kinia mulu umu-tolo pora nimba, nomu-kusamo kamu naa molorumu. <sup>2</sup> Kolea-awili kake seli, akumu Jerusalleme kondemo, Pulu Yemo molorumu mulu-koleana mundupa kelepa mania ombá orumu kanorundula. Ambo se ye pumbándo au nilimú mele yu aku sipa au nimba kondopa orumu. <sup>3</sup> Pe pilierindu kinia ye nokoli kingi polona ungu se wendo omba tondolo ru nimba nimbale: “Kiniá Pulu Yemo molemo ulkamo ‘omba, yomboma molemelena gilimú, yu ono-kinia kopu sepa molomba. Ono yunga yomboma molonge, yu ononga Pulu Yemo molopa ono nokopa, ono-kinia molomba. <sup>4</sup> Yuni ononga mongona kola sengema kulu tondomba. U uluma pora nirimu-na yomboma kelko kolou naa kolko, kola naa seko, kola-ulka naa molko, mindili naa nonge.” nirimu.

<sup>5</sup> Ye nokoli kingi polona molorumu yemone nimbale: “Nane mélema pali kondenga sekero.” nirimu. Pe kelepa nimbale: “I nikiru unguma ungu sikama, yombomane

manda 'Nane nikiru mele sika selemo.' ningu pilingí unguma kene aku unguma pepána imbi tou." nirimu.

<sup>6</sup> Nando kelepa nimbale: "Uluma pali wendo omba pora simu. Na U Kumbi Lepa Yemo, Pe Akilepa Yemo; na Mélemanga Pali Pulu Yemo, 'Kongono Sembó.' Konopu Lelioma Alieli Sepo Pora Siliu Yemo. Yombo se no nonowale selemo yombomo alieliconde molopa mindi puli ulu-pulumu pelemo no pilkipa wendo olemomo koumone naa lipu 'We nou.' nimbú. <sup>7</sup> Yombo se enge nimba opa-toumu topa mania mundumbamo monge-mélema pali limba, na yunga Pulu Yemo molombo, yu nanga bolangomo molomba.

<sup>8</sup> Aku-sipa na-kolo yombo

'Opa naa samili.' ningu pipili kololemele yomboma kinia,  
 'Na kolo tolemo.' ningu pilku  
 na kuru naa mondolemele yomboma kinia,  
 ulu-pulu paa kirima selememele yomboma kinia,  
 yombo toko kondolemele yomboma kinia,  
 wa ulu-kirinale selememele yomboma kinia,  
 tomo ambolko neambo liku  
 kuru ala tolemele yomboma kinia,  
 we-mélema anjiku 'Olionga pulu yema. Olio nokolemele.'  
 ningu popo toko kape nilimili yomboma kinia,  
 kolo tolemele yomboma kinia,  
 aku siku selememele yomboma pali kou-sallapa sepe nomba kondopa pelemo muru paa awilimunga pungu molonge, akumu ononga molonge koleamo. Aku ulu ono-kinia wendo ombámo wale talo-siku kolonge ulumu." nirimu.

21:9-27

### *Jonone Jerusalleme Kondemo Kanorumu Semanemo (21:1 pulu polko kana)*

<sup>9</sup> Kanu-kinia angello yopoko-pakara, kamu umbuna yopoko-pakara perimu mingima amboloringi kanumanga se na molorunduna omba nando nimbale: "Sipisipi Walomo Ambo Limbamo, yu kiniá ambo limba sekemomo, nu lipu ora siembo, kanani ou." nirimu. <sup>10</sup> Kanu-kinia Mini Kake Sélimuni na ambolorumu kinia angellomone na memba ma-pangi paa olandopa kou polarumu senga memba pumba mondopale, kolea-awili kake seli Jerusalleme Pulu Yemo molorumu mulu-koleana mundupa kelepa mania ombá orumumu na lipa ora sirimu. <sup>11</sup> Jerusalleme pa serimumu Pulu Yemonga tondolo pa sélimuni pa sepa, umbu-kou se kou-mone paa olandopa puli se tondolo pa selemo mele, kou-jasipa mele, yu aku sipa tondolo pa sepa mini-mana sepa, paa kariyápa mele pa serimu. <sup>12</sup> Aku kolea-awilimou kou-pala paa awili olana pepa, kerepulu rurepo lierimu. Angello rurepo aku kerepulu rurepomanga nokoko gilieringi. Kou-pala kunamanga Isirele yombo talape rurepo akumanga imbima selu selu nimba molorumu. <sup>13</sup> Ena mundi olemokondo kerepulu yopoko lepa, ena pulimükundu kerepulu yopoko lepa, wikindu kerepulu yopoko lepa, merekendo kerepulu yopoko lierimu. <sup>14</sup> Kolea-awilimunga kou-palamonga kou awili rurepo mondoringi kou-polomanga ola Sipisipi Walomone u 'Yunga kongonomo sende-paa.' nimba lipa mundorumu ye rurepomanga imbima molorumu.

<sup>15</sup> Angello na-kinia ungu nirimumu mélema manda manjeli koló pepena kou-gollone seli méle se ambolorumu. Akumuni kolea-awilimou kinia kou-pala kerepuluma kinia kou-palamo kinia manda manjimbando ambolorumu. <sup>16</sup> Koleamonga ekendo ekendo sululia-ponjilia naa sepa selu-sipa serimu. Kolea-awilimou winju sipa manda manjerimu kinia tu tausini po anderete killomita mele; pera topa manda manjerimu kinia aku sipala serimu; olando sipa manda manjerimu kinia selula serimu. <sup>17</sup> Kou-palamo manda manjerimu kinia akumu mita tere paono tene mele.

Angellomone mita manda manjerimumu mana-yombomane manda manjilimili aku sipa manda manjerimu. <sup>18</sup> Palamo kou-jasipane seko, kolea-awilimu kou-gollo paa norupulu se naa pélimuni seringi, yu kariyápa mele pa serimu. <sup>19</sup> Koleamonga pala-sipína kou lupa lupa peanga kou-mone olandopa pulimane au siringi. Palasipí kumbinamo kou peanga jasipa panjiku, sipí talo-sipamo kou peanga muki seli kou-sapaia panjiku, sipí yopoko-sipamo kou peanga kake seli kou-akete panjiku, sipí kise-sipamo kou peanga kondili nili kou-emera panjiku, <sup>20</sup> sipí se-pakara sipamo kou peanga kondoli sepa kake sepa seli kou-saronikisi panjiku, sipí talo-pakara sipamo kou peanga kondoli kou-konilliane panjiku, sipí yopoko-pakara sipamo kou peanga kanie seli kou-kirisollaite panjiku, sipí engaki-sipamo kou peanga kondili nili se lupa sepa nili kou-berili panjiku, sipí rureponga selu sipamo kou peanga kanie se lupa sepa seli kou-topasi panjiku, sipí rureponga talo sipamo kou peanga kondili nimba kanie sepa seli kou-kirisoperesi panjiku, sipí rureponga yopoko sipamo kou peanga muki seli se lupa sepa seli kou-aiyasini panjiku, sipí rurepo sipamo kou peanga kondoli se lupa kou-ametisi panjeringi. <sup>21</sup> Pala kuna rurepo kulumbu kake sepa kou-mone paa olandopa puli rurepo gilierimu. Kunama selu selu ningu kulumbu awili selu selu ningu seringi. Kolea-awilimunga aulka-barisima kou-gollo paa peanga norupulu se naa pelima mundoringi, aulka akuma kariyápa mele pa serimu.

<sup>22</sup> Kolea-awilimunga sukundu Pulu Yemo ongo popo tonge ulka-tembele se gilierimu naa kanorundu. Aku nambi semu-na, mana Pulu Yemo molorumuna ulka-tembelena pungu yu popo toko kaloringi-na-colo aku kolea-awilimunga Pulu Ye Awili Tondolo Púlimu kinia Sipisipi Walomo-tolo moloringilimunga ulka-tembele se akuna naa gilierimu. <sup>23</sup> Pulu Yemonga tondolo pa sélimuni koleamo pa sendelemo, Sipisipi Walomo koleamonga sepe-llame molorumumunga ena kepe oli kepe sene akuna pa naa sendelemo. <sup>24</sup> Koleamanga pali yomboma kolea-awilimu pa sembamonga manda andoko molonge; mana ye nokoli kingima ononga méle kou olando pumbá kande-kandema aku koleana mengo onge. <sup>25</sup> Aku koleamo simbulu naa tombamonga wale senga pala kunama pipi naa singí. <sup>26</sup> Yombomane ononga méle kou-mone olandopa pumbá méle kande-kandema akuna sukundu mengo pungí. <sup>27</sup> Aku-sipa na-colo méle kalaro mololima kinia, yomboma seko pipili kondoli uluma selemene yomboma kinia, kolo tolemele yomboma kinia, akumaaku koleana sukundu paa naa pungí. Sipisipi Walomonga konde molopa mindi puli bokuna imbi molomba yomboma mindi akuna sukundu pungí.

## 22

22:1-5

*Konde Molopa Mindi Puli Ulu-Pulumu Pelemo Nomo Kinia Unjumu-tolonga Semanemo (21:1 pulu polko kanou)*

<sup>1</sup> Kanu-kinia angellomone alieli konde molopa mindi puli ulu-pulumu pelemo no ombo purumumu na lipa ora sirimu, akumu kariyápa mele pa serimu. Pulu Yemo kinia Sipisipi Walomo kinia olonga ye nokoli kingi polomonga no akumu wendo ombo, <sup>2</sup> kolea-awilimunga aulka-barisi suku-singina ombo purumu. No ekendo ekendo kelotolonga alieli konde molopa mindi puli ulu-pulumu pelemo unjumu gilierimu, akumu kalia-ingi senga senga wale rurepo nimba mongo tolemo, oli senga senga mongo tolemo. Unjumunga gomomane yombo kuru tolemoma sepa peanga silimú. <sup>3</sup> Pulu Yemone mana umbuna sirimu mele umbuna paa selu kepe aku koleana naa pemba. Pulu Yemo kinia Sipisipi Walomo-tolonga ye nokoli kingi polomo aku koleana lemba, Pulu Yemonga kongono sendeli kendemande yombomane yu popo toko kape ningi. <sup>4</sup> Onone yunga kumbikeremo kanonge, yunga imbimu ononga mambelena molomba. <sup>5</sup> Aku koleana ipu naa lemba. Pulu Ye Awilimuni ono

molongena pa sendembamonga ‘Ena sepili.’ molo ‘Sepe-llame kandamili.’ naa ningí. Ono yombo nokoli kingima alieli molko nokoko mindi pungí.

<sup>6</sup> Angellomone nando nimbole: “I unguma ungu sikama, yombomane manda ‘Yuni nikimu mele sika selemo.’ ningu kuru mondonge unguma. Ye-Awilimu, Pulu Yemone ungu-umbu tondorumuma pilku yomboma ningu siringi yombomanga minimanga Pulu Yemo, yuni ‘Yunga kendemande-yombomane uluma nondopa wendo ombá mele kanangi lipa ora sipili.’ nimba yunga angellomo lipa mundorumu.” nirimu.

22:7-20

### *Yesusi Nondopa Ombá Semane Se*

<sup>7</sup> Yesusini nimbole: “Piliame! Na nondopo ombó.” nirimu. I bokuna nimba molemo ungu pe wendo ombáma pilipa lipa sengena panjipa sembá yombomo yu Pulu Yemone “Konopu peanga pepili molko kondangi.” nilimú aulkana molomba.

<sup>8-9</sup> Na Jono, na i uluma pilipu kanorundu yemo. Pilipu kanopole na uluma lipa ora sirimu angellomo ‘Yu popo topo kape niembo.’ nimbu yunga kumbikerena tamalu perindu-na-kolo yuni nando nimbole: “Paa aku naa sei! Nunga genali Pulu Yemone ungu-umbu tondorumuma pilku yomboma ningu siringi yema kinia, i bokuna nimba molemo unguma pilku liku selemele yomboma kinia, nu kinia na kinia olio pali Pulu Yemonga kendemande-yomboma molopo kongono sendelemolo kene nuni Pulu Yemo yu mindi popo toko kape nieni.” nirimu.

<sup>10</sup> Aku nimba kelepa nando nimbole: “I bokuna ulu pe wendo ombá mele nimba molemo uluma nondopa kamu wendo ombá kene ‘Naa piliangi. Naa nimbu para siembo.’ ningu lopi naa sani.

<sup>11</sup> Yombo se sepa kinjilimú yombomo

yu kamu sepa kinjipa molopili.

Yombo se kalaro molopili molemo yombomo

kamu kalaro molopili yombo akumu molopili.

Yombo se sepa kondolemo yombomo

kamu sepa kondopa molopili.

Yombo se kake sepili molemo yombomo

kamu kake sepili molopili.”

nirimu.

<sup>12</sup> Yesusini nimbole: “Piliame! Na nondopo ombó sekero. Ombó kinia yomboma ononga ulu selemelemanga yu-mele-mele méle kalombondo méle kalombo mélema membo ombó. <sup>13</sup> Na U Kumbi Lepo Molorundu Pe Akilepo Molombo ‘Ye,mo; Na Kumbina ‘Ye,mo Pe Akilipa ‘Ye,mo; Na Mélemanga Pali Pulu Yemo, Na ‘Kongono Sembó.’ Konopu Lelioma Alieli Sepo Pora Siliu Yemo.

<sup>14</sup> “Yomboma ononga mulu-maminiamma kulumiye tolemele yomboma aku selemelemonga ‘Alieli konde molopa mindi puli ulu-pulumu pelemo unjumunga mongoma ongo nongo, kolea-awilimunga kou-pala kerepulumanga ongo sukundu paa.’ nimulémunga kanu yomboma ono Pulu Yemone “Konopu peanga pepili molko kondangi.” nilimú aulkana molemele.

<sup>15</sup> Ulu-kirima mindi konopu kimbú siku

molemele yomboma kinia,

tomo ambolko neambo liku selemele yomboma kinia,

wapora andoko selemelema kinia,

yombo toko kondolemelema kinia,

we-mélema anjiku ‘pulu yema’ ningu popo toko

kapé nilimili yomboma kinia,

kolò toli uluma yakala kolko kolo toko selemelema kinia,

kanu yomboma ono kolea-awilimunga kou-palamonga ultukundu molonge.

<sup>16</sup> Na Yesusi, nane ‘Nanga yombo talapema i unguma piliangi, pumba nimba sindepili.’ nimbu nanga angellomo ‘Nu pungu ningu si-pu.’ nimbu lipu mundorundu. Na ye nokoli kingi Depitini kalopa liltimu yemo; yu nanga anda-kolepamo; orili-u kolea tangombando kombokandima pali kumbulupa, selu mindi kamu tondolo pa sepa gilimú akumu na.” nirimu.

<sup>17</sup> Minimu kinia „Sipisipi Walomonga, Ambo Limba Ambomo kinia olone ninguli: “Nu paa ou!” nilimbilí. I unguma pilimba yombomone “Nu paa ou!” nipili. No nonowale selemo yombomo opili. Yombo se ‘No nombo.’ konopu lemba yombomo kou-mone naa lipa we simba no, alieki konde molopa mindi puli ulu-pulamu pelemo nomo, ombo nopili.

<sup>18</sup> I bokumunga pe wendo ombá mele nimba molemo unguma pilingí yombomando liepi-liepi topo nimbili: “Yombo sene i bokuna sukundu molemo ungumanga ungu se sukundu mundupa nimu liemu i bokumunga ulu umbuna tondolo mare ‘wendo ombá’ nimba molemo ulu umbunama Pulu Yemone ‘aku yombomo-kinia wendo opili.’ nimbá. <sup>19</sup> Molo yombo sene i bokumunga ulu pe wendo ombá nimba molemomanga ungu se naa nimba kulu topa wendo límu liemu Pulu Yemone yu mundupa kelepa, ‘Yu alieki konde molopa mindi puli ulu-pulamu pelemo unju i bokumuni nimba silimúmunga mongo mare naa nomba, kolea-awili kake seli i bokumuni nimba silimú koleana naa opili.’ nimbá.” nikiru.

<sup>20</sup> I uluma wendo ombá nimba silimú yemone nimbale: “Sika. Na nondopo ombó sekero.” nilimú.

Paa aku sipa sepili! Ye-Awili Yesusi, paa oyo!

<sup>21</sup> Ye-Awili Yesusini Pulu Yemonga yomboma „pali, we kondo kolopa molopili molangi. Aku sipa sepili!

„Aku pea..”

## PULU YEMONGA BOKUNA IMBI MOLEMO MARENKA UNGU-PULUMA

### 1. aposel

I ungumu Giriki-ungumu, akumu kongono-imbi mele. Akumunga ungu-pulumu “lipa mundolimu”. Akumu i-sipa mele: Papua Nu Gini gapomanomone ye molo ambo se nimba taltopa, Asitaralliya molo Amerika molo Japane lipa mundupa nimbale: “Nu akuna pungu olionga keremo nindiku, olionga kongonomo sendeko, molani pu.” nilimili yombo akumu “yombo aposollo” mele.

Yesusi u ye mare nimba taltopale “Na lombili waa.” nirimu ye akuma “lombili andoli yema” nilimulu. (Akumunga pulumu inia anju-kundu **10. disaipel molemo**.) Pe Yesusini kanu yemando nimbale: “Nanga kongonomo sendangi pang.” nimba lipa mundorumu kinia ono Giriki-unguna imbi leko “aposollo-loma” niringi. Akumunga i Pulu Yemonga bokuna Kewa-unguna naa topo, Umbu-Unguna kanu kongono-imbimu lemolondo ‘Yesusini “Nanga kongonomo sende-paa.” nimba lipa mundorumu yema’ nimbu bokuna torumulu molemo.

Ono pali Yesusi kanokole yu pea andoringi yema (LLuku 6:12-16, Lipa Mundorumu Yema 1:12-26). U ye engaki rurepo moloringi. (Akumu Kewa-unguna “tuwellepo” kanumu.) Pe Pollo yu Yesusini nimba taltopa “Nanga kongonomo sende-pu.” nimba lipa mundorumu ye se molorumula. Juda yombo naa moloringi ultukundu yomboma moloringina ‘Ungumu piliangi.’ nimba lipa mundorumu (Lipa Mundorumu Yema 9:15, 26:17-18, Romo 11:13, U-Korini 9:1-2). Unga mare Romo 1:1, U-Korini 1:1, Pe-Korini 1:1, Gallesia 1:1, Epesasi 1:1 molemo. Banapas akula niringi (Lipa Mundorumu Yema 13:2-3, 14:14).

Aku imbibunga ungu mare U-Korini 12:28-29, Epesasi 2:20, 4:11, Lipa Ora Sirimu 21:14. Yesusi yu kepe “**aposollo**” se, yu Pulu Yemone “**Nanga kongonomo sende-pu.**” nimba lipa mundorumu yemo (Ipuru 3:1).

### 2. arapela lain

Pisini-unguna “**ol arapela lain**” kinia “**ol manmeri bilong ol arapela lain**” kinia inia anjukundu **15. haiden** kinia, aku unguma wale awisili Giriki-ungu selumu, aku Giriki-ungumunga pulumu “**ol arapela lain**”, Umbu-Unguna “**yombo talape lupa lupama**” molo “**koleamanga lupa lupa yomboma**”. Aku-sipa na-kolo Juda yombomane i ungumu niringi akumu **Juda yomboma naa moloringi yombo-lupama** ndo niringi. “**ultukundu yomboma**” molo “**Kewa yomboma**” ninguli aku siku niringi. ‘Ono onono Pulu Yemonga yomboma, yombo paa peangama. Yombo talape lupama yombo kirima, yombo ulu-pulu-kiri selima.’ ningu pilkuli aku siku niringi. “**arapela lain**” nimba molemo ungu mare Umbu-Unguna Mateyu 4:15, 12:18, 21, 20:19, 25, Lipa Mundorumu Yema 4:25, 9:15, 13:44-48, 14:1, 2, 5, 15:3, 5, mare awisili pea, Pe-Korini 11:26, Romo 1:13, 2:14, 24, 9:24, Gallesia 1:16, 2:2, 8, 9, 12, 3:8, Epesasi 3:1 molemo.

Juda yombomane pilkuli, ‘**Yombo-lupama kalaro mololi yomboma**’ ningu pilieringi-na-kolo Pulu Yemone “Mólo.” nirimu (Lipa Mundorumu Yema 10:14, 19, 29, 34-35, 11:5). Pollo **yombo-lupama** Pulu Yemonga ungumu nimba sirimumu kanoko kirila pilieringi (Lipa Mundorumu Yema 22:21-22). Karasinga Juda yombomane Karasinga yombo-lupama umbuna singí seringimunga ungumu Lipa Mundorumu Yema 15:1-31 molemo. Gallesia 2:11-21 kananila.

Wale mare “**arapela lain**” bokuna molemo akumunga ungu se inia anjukundu **14. Grik** molemo mele kananila.

### 3. baim bek

Ingillisi-unguna “**ransom**” .

Yesusini olionga nimba senderimumunga ungu tondolo talo molemo, se “**baim bek**”, se “**kisim bek**” . Aku-sipa na-kolo Giriki-unguna pondeanga selu-sipala. ‘Yesusini olionga nimba senderimu mele paa piliambo.’ ninguli Pulu Yemonga bokuna i ungu talo pea mimi siku kanoko piliayo. Pisini Baipelena kinia Umbu-Unguna kinia kanokole U-Timoti 2:6 (“**baim bek**”) molopa, Taitasi 2:14 (“**kisim bek**”) molemo mele mimi siku kanani. Giriki-unguna pondeanga selu-sipamo. U-Pita 1:18-19 (“**baim bek**”) akumunga Giriki-ungumu kinia Taitasi 2:14 kinia (“**kisim bek**”) paa nondopa selu-sipa mele.

Giriki-ungumunga ungu-pulumu Pisini-unguna “**lusim**”. Umbu-Unguna “‘**Wendo pupili**.’ ningu liku ultu mundulimili”, molo “‘**Wendo pupili**.’ ningu kuna llokomo wendo limilinje”. Gallesia 3:13 (“**kisim bek**”) kinia 4:5 (“**baim bek**”) kinia Giriki-ungumu selu-sipamola, aku-na-kolo akumunga pulumu “**baim na lusim**” .

Ui-siku mele seringi: Yombo sene Yombo se ‘Yunga kongonomo sendepili.’ nimba topo topa lipa yunga ulkana memba ombale, kou- mone se naa sipa méle naa kalopa, ka-kongono mele serimu. Kanu kendemande-yombomo ultu pumbá aulka se paa naa lierimu. Kamu alieli-alieli kanu yemonga kongono sendeli kendemande-yombomo mindi molorumu. Yuyu ultu pumba kowa pulkanje nokoli yemone kelepa lipale ‘Paa mindili nopili.’ nilka. Pe yombo sene kanu kendemande-yombomo kála sepa kongono sendepa manda naa molorumu mele kanopa kondo kolopa ‘Wendo ombo pumba we molopili.’ nimbale, kendemande-yombomonga ye nokolimu kou- mone molo mélse sirimu kinia ye nokólimuni ‘Kendemande-yombomo we ombo pupili.’ nimbu ungu se naa semolo. Molo “Naa simulú.” ningí liemu yu topo kondomolo.” ningí. Aku selemele kinia kou-monemondo Ingillisi-unguna “**ransom**” nilimili. Kou-monema kinia, wa liku mondolemele yombomonga konde mololi ulu- pulumu kinia, selu-sipa mele none selemo. Kou-monema anju siku mundungí kinia kolali seko likuli “Yombomo we pupili.” ningu yando siku mundulimili. Molo kou-monema kolali seko naa síngi liemu yombomo sika toko kondongenje. Pundu mele tolemele-na-kolo paa sika pundu mólo.

Pulu Yemonga bokuna aku sipa melela. Aku-na-kolo “Yombomo topo topa lipa wendo liltimu” mele Umbu-Unguna naa nilimolá. Mélema sitoana topo toko limili. Akumunga Mateyu 20:28, Mako 10:45 akuna Yesusini olionga nimba senderimu akumu Umbu-Unguna “**baim bek**” nimulúndu ungu sumbi nili se naa pilierimulu. Akumunga Mateyu 20:28 i-sipu mele molemo: Yesusini nimbale: “Mania Ombo Mana-Ye Au Lierimu Yemone ‘Ulu-pulu-kirimane yomboma kelepa ka sipa nokolemo mele naa sepili, manda molangi kene na yombo awisilinga nimbu pundu tondopo nanga kangimu sipu, ononga kolali sepo kolondambo.’ nimba orumu.” nirimu. U-Timoti 2:6 paa selu-sipamo.

LLuku 21:28 (“**kisim bek**”), Ipuru 9:12,15 (“**baim bek**”). Romo 8:23, U-Korini 1:30, Epesasi 1:7,14, 4:30, Kollosi 1:14, U-Pita 1:18-19, Kambu Toringi 18:16 kananila. Lipa Ora Sirimu 5:9, 14:3,4 Giriki-unguna “yunga mememone topo topa lillimu” mele, akumu Pisini-unguna “**baim bek**” molemo. Umbu-Unguna “topo topa lillimu” nilimolá-na-kolo pilku sundulimolánje? Ingillisi-unguna mare “**purchase**” molopa, mare “**redeem**” molemo. Lipa Ora Sirimu 5:9 kinia 14:4tolo Giriki-unguna sika “‘Pulu Yemonga molangi.’ nimba mememone topo topa lillimu.” molo “Pulu Yemo simbando topo topa lillimu.” mele nimbu tolemolá.

#### 4. Belsebul

Pisini Baipelena aku sipa molemo, Pisini-ungu Nupella Testamen umunga “**Bielsebul**” molemo. Akumu Setenenga imbi se. Imbimunga pulumu ‘kurumanga nokoli awilimu’ (Mako 3:22-23). Juda ye awilimane Yesusi-kinia konopu kiri panjiku yuntu “Nu Belsipuli.” niringi (Mateyu 10:25, 12:22-28, 9:32-34, LLuku 11:14-22). Mateyu 12:28 kinia Mako 3:28-30 kinia paa kanani. Ungu-pulu se Lluku 11:18 molemola.

#### 5. bikman

“**bikman**” kinia “**bikpela**” kinia kanga-kolte lupa lupa. Yesusindu “**Bikman**” niringi Umbu-Unguna “**Ye Nokolimu**” molemo. “**Nokoli Yemo**” manda nilimolála. Pisini-unguna “**Bos**” molo “**Bosman**” nilimilila. Kanu yema yomboma nokongendo namba molemo mele. ‘Yomboma yunga kongono kendemande yema.’ ningu pilkuli Yesusindu “**Bikman**” niringinje. Boku LLuku mindi molemo (5:5, 8:24,45, 9:33,49, 17:13). (Ingillisi-unguna “**master**”.)

#### 6. bikpela

“**bikpela**” kinia “**bikman**” kinia kanga-kolte selu-sipa. Yesusindu “**Bikpela**” niringi, akumu ‘Yu ononga imbi mololi yemo. Ono mania, yu ola.’ ningu yu aku siku niringi mele. Imbi talo pea Umbu-Unguna “**Ye Nokolimu**” nilimolá-na-kolo “**Bikpela**” Pisini-unguna lombili pungu manda manjiku “**Ye-Awilimu**” niringi mele pilipuli bokuna torumulu molemo. Ingillisi-unguna wale awisili “**Lord**” molopa (Mateyu 7:21, 8:25, 15:22, Mako 5:19, LLuku 5:8, 6:46, Jono 6:68, Lipa Mundorumu Yema 2:36, Romo 1:3), wale mare “**Master**” molemo (Mateyu 6:24, Mako 13:35, LLuku 14:21, Romo 14:4). Wale mare “**Ye-Awilimu**” nilimú kinia Pulu Ye Yawendo nilimú (Mateyu 1:20-24, Mako 12:11,29-30, LLuku 1:6,9,11, 19:38, Lipa Mundorumu Yema 2:34, Ipuru 7:21, 8:8-11).

#### 7. bikpris

(Inia anjukundu **34. pris 34.2.** kanani.)

#### 8. bilip

Akumunga ungu-pulumu nambolkaye? Mimi siku naa pilkuli, yomboma mane siku Kewa-unguna nilimili mele manda manjiku “**bilip** sangi.” nilimili akumu manda naa sekemo. Ungu-pulumu mimi siku pilkuli yomboma Umbu-Ungu mindi leko ningu silimolánje papu. “**bilip**” akumunga pulumu i-sipa mele:

**Se** Kango se unjuna ola molomba kinia lapane nimbale: “Nu po ningu mania oni kinia nu naa topili kangulupu limbu.” nimbá kinia kangomone ‘Sika nikimu.’ nimba kuru mondopale mini-wale naa mundupa walu po nimba mania ombá. Aku sembá kangomone “**bilip**” sepa aku sembá.

**Se** Yombo sene nimbale: “Opali ye nokoli poraminisamo ombá kene ya maku tamili wang.” nimbá kinia “Sika nikimu.” ningu pilkuli yu ombá kanongendo pungu maku toko nokoko molonge. “**Bilip**” sekole aku siku senge.

**Se** Yombo sene Pulu Yemonga Bokuna kanomba kinia ‘‘Nu mindili naa nani.’ nimba Yesusi nunga nimba kolali sepa kolondorumu.’ nimba bokuna

molomba kanopale, 'Sika aku serimu.' nimba kuru mondopale yu konopu pe nipili 'Kolea-kirina pumbu mindili naa nombo.' nimba pilimba molo kuru mondomba.

Akumunga, Kewa-unguna "**bilip**" Umbu-Unguna topele topo bokuna tomolondo walu naa torumulu. UNGU-pulumu mimi sipu pilipuli topele topo bokuna torumulu. Wale mare "**'Sika.'** **ningu kuru mondoringi.**" torumulu-na-kolo wale mare "Sika." mindi we molomba kinia pilku sundungí kinia ungu-pulu se torumulu molemo. Jono 3:16 "**manmeri i save bilip long en**" akuna "**long en**" akumunga pulumu nambolkanje? "**long**" akumu paa ungu-pulu se pelemola. I-sipa melenje: "'Yu Pulu Yemone sika lipa mundorumu yemo. Sika olio lipa tapondopa mindili nolemolá aulkana wendo limba yemo.' **ningu kuru mondonge yomboma**", aku sipa mele. Jono 11:27 kinia 20:31 kuru mondomo-monga ungu-pulu tondolo se molemo. Akumunga, wale mare "**bilip**" topele topo bokuna tomolondo ungu-pulumu mimi sipu pilipuli bokuna torumulu molemo.

Giriki-unguna kinia Ingillisi-unguna kinia ungu talo "**believe**" kinia "**faith**" kinia molemo. Aku ungu talonga ungu-pulumu Umbu-Unguna nimulúndu manda mólo. Giriki-unguna imbi talo paa nondopa selu-sipa mele, aku-na-kolo "**believe**" akumu ulu se selemolo; "**faith**" akumu mélsenga imbibmu. "**faith**" konopuna pelemo kinia manda "**believe**" selemolo. Aku-na-kolo Pisini-unguna kinia Umbu-Unguna kinia ungu selumu mindi bokuna toringi molemo.

Ingillisi-unguna "**believe**" ungu mare: Mateyu 8:13, 9:28, 27:42, Mako 5:36, 9:23,24, LLuku 1:20, Jono 1:7,12,50, 3:12,15,16,18,36, 4:39,41,42, 6:29-47, 12:44-46, 20:8,25,27-31, Lipa Mundorumu Yema 5:14, 9:42, 16:31, 17:12, 18:8, Romo 1:16, 3:22, 10:9-11, U-Timoti 4:12, Pe-Timoti 1:12.

Ingillisi-unguna "**faith**" ungu mare: Mateyu 8:10, 14:31, 21:21, Mako 2:5, 5:34, LLuku 7:50, 18:42, Lipa Mundorumu Yema 3:16, Gallesia 2:16 wale talo, 2:20, 3:wale awisili, U-Timoti 1:4,5,14,19, 2:15, Ipuru 10:22,38, 11:pali.

## 9. devil

I ungumu Giriki-unguna kinia Ingillisi-unguna kinia molemo. Akumu **Setene** nga ungu-pulu se pelemo imbi se (Mateyu 4:8-11). Inia anjukundu **42. Seten** kananila. "**Devil**" akumunga ungu-pulumu "**kote kolo topa sendélimu**" kinia "**ungu bulkundu nindelimu**" kinia. Yu Pulu Yemonga kumbikerena yombomanga kolo topa kondi tolemo yemo. Jopo 1:6-12 kanani. Akuna "Setene" nimba molemo.

Ingillisi-unguna "**devil**" ya molemo lupa, Pisini-unguna "**tewel**" akumu Umbu-Unguna "mini", akumu paa lupa. "**Devil**" akumu Umbu-Unguna "**depele**" molemo. Pisini Baipelena "**devil**" naa toringi, naa molemo. "**Satan**" mindi toringi molemo. Lipa Ora Sirimu 12:9 mindi ungu-pulumu tongendo Pisini Baipelena "**Man I Save Kotim Olgeta Manmeri**" toringi molemo.

Giriki-unguna kinia Umbu-Unguna kinia Mateyu 4:3 "kondi tólimu" molopa, Mateyu 4:5,8, LLuku 4:2,3,5,6,13 "depelemo" molopa, Mateyu 4:10, LLuku 4:8 "Setene" molemo. Kurumanga nokoli "**depelemo**" yu molemo mele Jono 8:44, Pe-Korini 11:14, U-Pita 5:8, Jono Kumbi-Lepamo 3:8 molemo. Lipa Ora Sirimu 12:9,10, 20:2, U-Pulu-Pulu 3:1,2,14, Mateyu 25:41, Lipa Ora Sirimu 20:10 kananila.

**Yu ma-koleamonga ye-nokoli kingimu** Mateyu 4:8-9, Jono 12:31, 14:30, 16:11, Pe-Korini 4:4, Epesasi 2:2, Jono Kumbi-Lepamo 5:19), aku-na-kolo yunga tondolomo mania, Pulu Yemonga tondolomo olandopa mele nilimú ungu mare pea Mateyu 4:8-11, Epesasi 6:11, Ipuru 2:14, Jemisi 4:7, Jono Kumbi-Lepamo 3:8, 4:4 molemo. Pe-Timoti 3:3 kinia Taitasi 2:3 kinia Giriki-unguna paa selu-

sipa mele molemo-na-kolo akuna Pollone **depele** mondo naa nirimu, we-yombomando nirimu pilkuli Pisini-unguna kinia Ingillisi-unguna kinia ungu-pulumu topele toko bokuna toringi.

Ingillisi-ungu pilku imbi kanolemele yombomando i-sipu nikimulula: Giriki-unguna “**dimon**” akumu “**kuru**” mindi, aku-na-kolo wale mare Ingillisi-unguna lawa seko “**devil**” toringi molemo. “**devil**” paa selumu mindi molemo, akumu **Setene**. Pulu Yemone kurumanga nokoli “**depelemo**” kinia kuruma pali sepe nomba mindi pelemo pembamonga ‘mindili nongo molko mindi pang.’ nimba sepa mimi sepa kalorumu akuna Karasinga yombo naa molko ultu molemele yomboma lipa mundumbala (Mateyu 25:41). Akuna kurumando “angelloma” nimba molemo. Pe-Pita 2:4 kepe. Kanu angelloma kepe **depelemo** yu kepe u mulu-koleana angelloma moloringi ungu talo LLuku 10:18, Lipa Ora Sirimu 12:7-12 molemo. Aisaya 14:12-15 yundu nirimulanje.

#### 10. disaipel

Giriki-ungumunga ungu-pulumu “**mane sili ye se lombili pungu unguma pilielemele yomboma**” (Mateyu 10:24,25). Pisini-unguna u kumbi leko toringina ya “**skulboi**” molopa, pe toringimunga “**sumatin**” molemo. (Yesusinga semane peangamo molemo bokumanga Giriki-ungumundu Ingillisi-unguna wale awisili “**disciple**” molopa, wale mare “**student**” molopa, “**pupil**” molemo.) Kewa anjukundu Imbo-Unguna “yunga ki-sipi kanoli yema” nilimili, akumu peangala. Akumu Ingillisi-unguna “**aperendisi (apprentice)**” mele. “**Yesusi lombili andoko yuni serimu mele wamoko kanoringi yema**” nilimolá-lanje.

Umbu-Unguna “**Yesusinga lombili andoli yema**” bokuna torumulu molemo akumunga pulumu Mateyu 4:18-22 molemo. Wale mare bokuna “**lombili andolima**” nimba molemo kinia ye rurepondo nilimú. Aku-na-kolo yombo mare pea yu paa alieli lombili pungu yunga ungumu pilku liltingila, akumando wale mare bokuna “**lombili andolima**” molo “**lombili andoli yomboma**” nimba molemola. Mare amboma (Lipa Mundorumu Yema 1:14, LLuku 23:49, 8:1-3). We-yomboma yuni uluma sepa unguma nirimu mele ‘Kanamili. Piliamili.’ ningu yu wale marenge lombili purringila, na-kolo we mele, kamu mólo (Mateyu 4:25, Jono 6:60,61,66-69). **No Lindeli Jononga** lombili andolimanga ungu talo Mateyu 9:14, 11:2 molopa (Yesusinga lombili andolima 11:1 kanumu), **Parisimanga** lombili andolima Mateyu 22:16 molopa, **Mosisinga** lombili andolima Jono 9:28 molemo. **Olio pali Yesusinga** lombili andolima molemolo mele Jono 8:31 molemo. Aku-na-kolo Yesusini nimbale: “Na we lombili naa wang.” nirimu (LLuku 12:49-53, 14:25-27,33, Mateyu 10:17-18,21-25,32-33,34-39). **Yesusinga lombili andoli ye rurepo** nga imbima Mateyu 10:1-5a molemo.

#### 11. Farisi-“**na Sadyusi**” (Mateyu 16:1) (Inia anjukundu 38. **Sadyusi** kananila.)

Yesusi mana molorumu kinia **Parisi yema** kinia **Sadusi yema** kinia Pulu Yemonga ungu-manema nokoringi ye talape talo moloringi. Onone pali Pulu Yemonga ungu-manema pilku sengena panjiku sengendo kála- seko seko moloringi-na-kolo yombomane ‘kangikundu mindi kanangi.’ ningu aku seringi. Konopumanga sukundu ono ye sumbi nilima naa moloringi-na-kolo ‘Ye sumbi nilima molemolo. We-yomboma seko kinjeli yomboma molemele.’ ningu we-yomboma kinia seluna kopu seko naa moloringi. We-yomboma kanoko kiri pilku ono onono aku-siku konopu talo pepa topele-mapele toli yema moloringimunga No Lindeli Jono kinia Yesusi kinia olone kanu yema iri toko “Kolo toli kongi-ka-wambiyemonga waloma molemele.” niringili (Mateyu 3:7

(**Parisima** kinia **Sadusima** kinia), 12:34, 23:33). Onone “Yombo ulu-pulu-kiri selima” niringi yomboma Yesusi kanu yomboma-kinia molopa ga norumu-kulu kanokole ‘Yesusi yu kepe ye kirimu.’ ningu pilieringi (Mateyu 9:9-13, LLuku 7:36-50, 18:9-15).

Yesusi-kinia konopu kiri panjiku ‘Yu nimba kinjimba kinia ‘Yu mongo likimu kene pundu topa umbuna mepili.’ nimulú.’ ningu yu aliei-alieli ungu mare mangilieringi mele ungu-pulu se Mateyu 16:1 molemo. Yesusindu “Nu sika Pulu Yemonga Malo molenonje kanamili liku ora si.” niringi ungu mare Jono 2:11 molemo. Yesusini ono kanopa kiri pilipa, wale awisili ono iri torumu. Iri torumu mele ungu se seluna mindi kanoni liemu yuni “Ono topele-mapele toli yema.” nirimu mele Mateyu 23:1-36 molemo kanani. Se LLuku 11:37-54. Topele-mapele tolimunga ungu-pulumu inia anjukundu **47.** tupela maus molemo.

**Parisima** ne Pulu Yemonga ungu-manemanga ungu-mane awisili olandopa olandopa ono onono pilku ningu panjeringila. ‘**Parisima** kinia **Sadusima** kinia onone seko kinjilimili mele paa aku siku naa sangi.’ nimbando Yesusini ungu-iku topa “Kanu yemanga pellawana mundulimili méle isi akumu paa naa liengi.” nirimu (Mateyu 16:6,11-12). Inia anjukundu **49.** **yis** kananila. Onone Mosisini Pulu Yemonga ungu-mane sirimuma paa kála-seko pilku seringi-nakolo yomboma konopu naa mondoringi. ‘Yesusi Pulu Yemone mana naa lipa mundorumu.’ ningu yu toko kondoringila. Unga mare Mateyu 21:28-32, LLuku 5:27-31, 7:29-30,33-35,36-50, 18:9-14, Jono 8:1-11, Mateyu 21:33-46, 22:1-14,15-22,34-40,41-46.

Ono Juda yombomanga tapu-yema moloringi (Mateyu 21:23,45). Mare Juda yombomanga kanjollo yema moloringi (Lipa Mundorumu Yema 5:34).

Nikodimasi yu **Parisi** yemo molopa, konopu topele topa ‘Yesusi sika.’ nimba kuru mondorumu ungu mare Jono 3:1, 7:50-51, 19:39 molemo.

Pollo yu **Parisi** yemola. U yu we-ye **Parisi** se molopale, ‘Yesusinga ungumu sika.’ ningu kuru mondoringi yomboma torumu (Lipa Mundorumu Yema 8:1,3, 9:1-2, 23:6, 26:5), aku-na-kolo pe **Parisi** yemane pilku seringi mele yu mundupa kelierimu (Pillipai 3:5-11).

**Parisima** kinia **Sarusima** lupa lupa ningu pilku kuru mondoringi mele ungu se Lipa Mundorumu Yema 23:6-10 molemo.

## 12. Giaman, “**man bilong giaman**”

(Inia anjukundu **47.** tupela maus kanani.)

## 13. **God, god giaman**

“**God**” akumu yombo senga sika imbimu mólo. Akumu yunga kongono mele, molo yu molemo mele imbimu. “poraminisa” molo “peremia” nilimulu akumu yombo senga imbi mólolá. Yunga kongonomo. Aku-na-kolo pe yu yuyula imbi lepo “Poraminisa” molo “Peremia” nilimulu. Unga “**god**” aku sipa melela. Aku ungumunga pulumu i-sipa mele: ‘Yombo sene molo mélsene olio mana-yomboma kinia mélema pali nokolemo yombomo.’ nimbu pilipuli, yu popo topo mélema kalopo silimulu yombomo. Yombo talape lupa lupamane “**god**” lupa lupala nilimili. Marene “Enamo olionga **god**” nilimili; marene “Olimu olionga **god**” nilimili; marene “Opa selemolo kinia **god** sene olio lipa tapondolemo” nilimili; marene “**god** sene kaliama nokolemo” nilimili. Marene “Olionga ye nomi kingimu olionga **god** .” **nilimili. Paa awisili. Awisili “ye” ningu, mare “ambo” niringi** (Wendo Oringi 32, Josua 24:2,14-18,23-24, Nokoli Yema 16:23-30, U-Samuele 5:1-5, U-Kingima 18:16-40, Jeremaya 2:11, Konane 115, Lipa Mundorumu Yema 19:23-28). ‘**Olio nokolemo pulu yemo** .’ molo ‘Olio nokolemo pulu ambomo .’ ningu yombo molo kongi

mélé mare toko kondoko popo toko siringi. Umbu-yombomane kurumando 'Olio nokolemele.' ningu popo toko koyoringimunga ungu se U-Korini 10:14-22 molemo. U-Korini 8:1-13, Lipa Mundorumu Yema 19:23-28,35-37 kananila.

Aku-na-kolo olione "**God** sikamo yuni mélema pali sepa wamopa, yomboma kinia mélema pali nokolemo. Naa nokolkanje naa lelka." nimbili 'Yu mélemanga pali **pulu yemo** .' nimbu yu imbi lepo "**Pulu Yemo**" nilimulu (Jono 1:1-4, Lipa Mundorumu Yema 14:8-17, 17:16-31). Yombo marene yundu "**Ola Yemo**" nilimili mandala. Miti yombomane nomuna yombomanga imbi se mengo ongole "**Anutu**" niringi nilimili. Ye selumu.

Kanu **Pulu Yemo** yunga sika imbi nawe? Yu uluma selemo mele pilkuli yunga imbi lupa lupa lemele, aku-na-kolo se sika yunga imbimu "**Yawe**". Akumunga pulumu Wendo Oringi 3:14-15 molemo (Pisini Baipelena ungu-pulumu molemo).

#### 14. Grik

Romo-yombomane koleamanga pali opa selko andoko yomboma toko mania munduku gapomano molko yomboma naa nokangi u Giriki-yombomane aku seringi. Giriki-yombomanga ye Allekesanda yu paa opa tondolo mundupa seli yemo, yuni koleamanga pali yunga ele-yema memba andopa koleama topa kalopa mundupa nokorumu. Kanu-kinia, ya Papua Nu Gini u Kewa-yomboma gapomano moloringi kinia Pisini-ungu kinia Ingillisi-ungu kinia anju anju purumu kinia yombo awisili pilku lieringi mele, Allekisanda Giriki-gapomano ye awilimu molopili koleamanga pali **Giriki-ungumu** pilku lieringi (Jono 19:20, Lipa Mundorumu Yema 21:37). Pulu Yemonga Ungu Kondemo molemo bokuna (Nupella Tesamene) u-pulu-pulu Giriki-unguna toringi. Pe Romo-yomboma gapomano moloringi kinia koleamanga pali yombomane Giriki-ungu niringi. Yesusi mana andopa molorumu kinia aku siku niringila.

Pulu Yemonga bokuna wale mare **Giriki** ye molo **Giriki** yomboma nimba molemo kinia paa sika **Giriki** yombomando nirimunje, mimi sipu naa pilielemolo (Jono 12:20).

Aku-na-kolo ya umbu-yombomane ultukundu yombomando "**Kewa-yomboma**" nilimili mele aku sipa wale awisili Juda yombomane Juda yombo naa moloringi yombo-lupamando ungu-iku mele toko "**Giriki-yomboma**" niringi. Pisini-unguna wale mare "**Grik**" molopa, wale mare "**arapela lain**" molemo (Lipa Mundorumu Yema 11:19-20 14:1, 16:1,3, 17:4, 18:4, Romo 1:14,16, 2:9,10, 10:12, Gallesia 3:28, Kollosi 3:11). Wale mare Pisini-unguna "Nupela Testamen" u-pulu-pulu toringi kinia pe toringi kinia yandopa Boku Baipelena toringi lupa lupa. Akumu unguri mólo.

Inia yakondo **2. arapela lain** nimba molemo aku sipa mele.

#### 15. haiden

Pisini Baipelena i ungumu Mateyu 6:7,32, 18:17 molemo. Giriki-ungu selumunga Pisini-unguna ungu talo bokuna molopa, Ingillisi-unguna ungu yopoko molemo. Giriki-ungumunga ungu-pulumu inia yakondo **14. Grik, 2. arapela lain** nimba molemo.

#### 16. hetman

Kanu yemo yombo talape se nokolemo yemo. Akuma Umbu-Unguna "**tapu-yema**" nilimulu. Pulu Yemonga Ungu Konde Molemo Bokuna "**tapu-yema**" nimba molemo akumanga kongono talo pelemo.

**16.1.** Juda yombomanga ye nokolima, ono Juda yombomanga "**kanjollo**" sukundu moloringi ye mare (Mateyu 21:23, 26:3, LLuku 9:22, 22:66, Lipa Mundorumu Yema 4:5). Inia anjukundu **19. kaunsil** kananila.

**16.2.** Karasinga yombo talape lupa lupama nokoringi yema (Lipa Mundorumu

Yema 14:23, 20:17, U-Timoti 5:17). U-Timoti 3:1,2 Pisini-unguna “**wasmantapu-yema**”-la torumulu molemo. Taitasi 1:5-7 kinia U-Timoti 3:1,2 kinia paa ungu selumu mele na-kolo Giriki-unguna Taitasi 1:5 “**hetmanwasman**” mele molemo. Karasinga yombo talapema nokonge tapu-yema ningu ‘**tapu-yema** molangi.’ ningíndu kanoko apurungí mele ungu mare Lipa Mundorumu Yema 20:28-31, U-Timoti 3:1-7, Taitasi 1:5-9 molemo.

(Karasinga yombo talapemanga kongono sendenge yema, Kewa-unguna “diken” nilimulu, kanu yema aku sikula molonge mele ungu mare Lipa Mundorumu Yema 6:1-6, U-Timoti 3:8-13 molemo.)

#### 17. hetpris

(Inia anjukundu **34. pris, 34.3. kanani.**)

#### 18. katim skin bilong pikinini man

U-pulu-pulu, Isirele yombomanga pulu-pulu anda-kolepa Eporayamo, yunga imbi Eporamo liepili, yu molorumuna Pulu Yemo omba yu sewi anjipa kamu alieli-alieli pulu lemba mele ungu se nimba, nimba panjipa mi lierimu. Eporamonga imbimu topele topa “Eporayamo” nimba imbi sipa, ‘Eporayamo kinia yuni kalopa limba yomboma kinia nane “Ono-kinia sembó.” nimbu, nimbu panjipu mi lierindu ungumu kamu pepa mindi pupili kene,’ nimba yundu “Kangomanga kangi se kopisangi.” nirimu. Aku semanemo kinia ungu-manemo U-Pulu-Pulu 17:pali molemo (17:10-12). Akumunga ungu mare U-Pulu-Pulu 34:14-17, Wendo Oringi 12:48, 4:24-26, LLipai 12:3 molemola. Kanu ungu-manemo pilkuli Isirele yombomane yandopa- yandopa, kiniá kepe, kangomanga kangi se kopisilimili.

Kangi se kopiseringi mele i-sipa: Ombe punduna kangi se we gilimú akumu kopisiku makapu seko wendo liku toko eltoringi. Kanu ungu-manemo pilkuli No Lindeli Jono keme Yesusi keme Pollo keme kango kikima molangi aku sikula sekole imbi siringi (LLuku 1:59, 2:21, Pillipai 3:5). Kangoma kanoko liltingi kinia pe koro se omba pumba wale engaki sipamo wendo orumu kinia aku siku seringi. Wale engaki sipa akumu Sambate Walemo liemu kanu ulumu munduku naa kelko we seringila (Jono 7:22-23).

Isirele yombomane aku siku seringimunga ononga imbi leko “kangi kopisilimili yomboma” niringila. Isirele yombomane Isirele yombo naa moloringi yomboma konopu kiri panjikuli imbi kiri mele lengendo “kangi naa kopiselma yomboma” niringi. Aku mele ungu mare U-Pulu-Pulu 34:14, Nokoli Yema 14:3, 15:18, Lipa Mundorumu Yema 7:51, Romo 2:25,29, U-Korini 7:18,19, Gallesia 5:2-6 molemo. Gallesia 2:7,8, Pillipai 3:3, Kollosi 2:13, 3:11 akuna Giriki-unguna “kangi kopiselma” kinia “kangi naa kopiselma” nimba molemo-na-kolo Pisini-unguna kinia Umbu-Unguna kinia Ingillisi-unguna boku mare kinia ungu-pulumu sumbi sipa molemo. Gallesia 2:12, Kollosi 2:11 akuna Giriki-unguna molemo mele sumbi sipa molemo.

Isirele yombomando pe imbi talo leko “Juda yomboma” niringila kanumane pilkuli, ‘Olio ungu-manemo pilipuli kangomanga kangi se kopisilimulungu Pulu Yemone olio yombo sumbi nilima nimba kanolemo.’ ningu pilieringi. Aku-na-kolo Pollone “Mólo!” nirimu. “Pulu Yemone kangimu kanopa yomboma naa apurulimú. Konopuna sukundu kanopa yomboma apurulimú.” nirimu (Romo 2:25-29, 3:20-30).

Juda ye mare ‘Yesusi Karasi sika.’ ningu kuru mondoko Karasinga yomboma molkole, i-siku mele niringi: “Juda yombo naa molemele yombo-lupama

‘Karasinga yomboma molamili. Pulu Yemone olio yombo sumbi nilima nimba kanopili.’ ningi i ungu-manemo pilku kangimu naa kopisengi liemu Karasinga sika-yomboma paa manda naa molonge.” niringi (Lipa Mundorumu Yema 11:1-4, 15:1,5, Gallesia 6:12-13). Aku-na-kolo Pollone nimbale: “Nikimili mele paa mólo! ‘Karasinga yomboma paa sika molamili.’ ninguli Karasini olionga nimba senderimu mele olandopa ungu-manene sene pilku liku seko molonge kinia paa seko kinjingí. Paa unguri manda naa sepa naa lipa tapondomba.” nirimu (U-Korini 7:19, Romo 4:9-12, Gallesia 6:15). Akumunga ungu-iku se Romo 2:29 molemo.

#### 19. kaunsil

Juda yombomanga kanjollomonga ungu mare LLuku 9:22, 22:66, 23:50, Lipa Mundorumu Yema 4:5-6, 5:21,27,34, 22:30, 23:1-9,15,20,28 molemo. Romo gapomanomone Juda yomboma nokorumu, yunga ungu- manema olandopa na-kolo Juda yomboma onono ononga ungu-manema pilkuli seringila. Juda yomboma seringi mele kinia moloringi mele kinia ononga **kanjollo yema** ne nokoringi. Ye tere paono tene wane (71) **kanjollo yema** moloringi. Se Pulu Yemo popo tondoringi ye awili olandopamo, yu **kanjollo yema** nga nokorumu ye peresidenemo. **Kanjollo** sukundu Pulu Yemo popo tondoli ye awili mare Sadusi yema moloringi; ungu-manema pilku mane siringi ye mare Parisi yema moloringi. Kanu yemane Yesusi kinia Pita Jonotolo kinia Pollo kinia ononga kotema sendeko pilieringi. Kanoni ungu mare Mateyu 26:57-67, Lipa Mundorumu Yema 4:1-22, 5:17-42, 22:30, 23:6-9, Jono 3:1,10 molemo. Ungu mare inia **11. Farisi** kinia **38. Sadyusi** kinia **16. hetman** molemola.

#### 20. kingdom bilong God, **kingdom bilong heven**

I ungu talonga Mateyuni alieli “**kingdom bilong heven**” nimba bokuna torumu molemo (3:2, 4:17, 5:3,10, 10:7, 11:11, 25:1,34 molemo mele). 6:33, 12:28, 21:43 mindinje Mateyuni “**kingdom bilong God**” nimba torumu molemo. Mako kinia LLuku kinia Jono akumane alieli “**kingdom bilong God**” ningi toringi molemo (Mako 1:15, 4:26, 12:34, LLuku 4:43, 7:28, 21:31, Jono 3:3,5 molemo mele.) Aku-na-kolo ungu talonga ungu-pulumu selumu. “**kingdom bilong** Pulu Yemo” lupa, “**kingdom bilong**” mulu-koleamo” lupa mólo.

Talo pea bokuna toringi molemo ungutolonga ungu-pulu se i-sipa: Juda yombomane imbi leko “Pulu Yemo” ningíndu wale awisili pipili serimumunga “mulu-koleamo” niringi kanumu. “Mulu-koleamo” Pisini-unguna “**heven**” nilimili kanumu.

“**kingdom**” akumu Lapangala (Mateyu 6:10, 13:43), Yesusingala (Mateyu 16:28). No Lindeli Jono kinia Yesusi kinia alone “akumu nondopa wendo ombá sekemo.” niringili (Mateyu 3:2, 4:17).

“**kingdom**” (**king-dom**) akumunga ungu ekendo “**king**” kana! Kewa-unguna “**king**” akumu Umbu-Unguna ungu se mólo, aku-na-kolo yu ye nokoli paa awili, kolea-awili nokopa, yombo awisili tondolo mundupa nokolemo. Akumunga, Umbu-Unguna “**ye nokoli kingimu**” nimbu bokuna torumulu molemo (Mateyu 27:37, Lipa Ora Sirimu 17:14, 19:16).

Umbu-Unguna “**kingdom bilong God**” kinia “**kingdom bilong heven**” kinia selu-sipa mele bokuna torumulu molemo-na-kolo sumbi sipu manda naa torumulumunga Pulu Yemo ye nokoli kingimu molopa nokolemo akumunga, bokuna wale mare “kolea” topo, “yomboma kinia mélema” topo, “walemo” molo “enamo” bokuna torumulu molemo. Wale mare “kiniá wendo okomo” bokuna topo, wale mare “pe wendo ombá” torumulu. “**Kingdom**” akumu limulúla. Akuna sukundu pulimulula. Mimi sipu pilipuli ungu-pulumu bokuna torumulu molemo. Mateyu 13:11,24,31,33,44,45,47, 20:1; LLuku 9:60,62, 10:9,11,

11:20, 16:16, 17:20-21, 18:29, 21:31, 22:16, Jono 3:3,5.

Mateyu 18:1,3 akuna "koleana pungí" nímulu liemu mandala, molo "yombo talapena sukundu pungí" mandalanje. Kolea Arimatia ye Josepo 'Kanu walemo wendo opili.' nimba nokopa molorumu (LLuku 23:50-51). Yombo mare ungu selu-sipa melela seringi (LLuku 2:25,38, 24:21). Unku mare Lipa Mundorumu Yema 1:3,6, 8:12, Romo 14:7, U-Korini 6:9, Gallesia 5:21, Epesasi 5:5, U-Tesallonaika 2:12 molemo.

21. kisim bek

(Inia yakondo 3. **baim bek** kananila.)

"**kisim bek**" lupa, "**baim bek**" lupala. Aku-na-kolo Pisini-unguna "**kisim bek**" ungu-pulu talo pepa, "**baim bek**" ungu-pulu talola pelemo. "**kisim bek**" Giriki-unguna kinia Ingillisi-unguna kinia ungu talo molemo. Ingillisi-unguna se "**redeem**" (ya 21.1. ), se "**save**" (ya 21.2. ). Unku-pulumu nambolkanje? Umbu-Unguna nambolka nimulú, nambi sepa molombanje? **21.1.** Ingillisi-unguna "**redeem**" akumunga pulumu i-sipa:

**Se** Opa-toumane yombo talape se topa mundupa kolea sepe mundungí molo kolea kamu liku molonge kinia kowa pungí yombomanga opa-geramemane 'Lipu tapondamili.' ningu ongo opa-touma kinia opa seko toko mundunduku koleamo 'kolea pulu yomboma kelko molangi.' ningu liku singí. Opa-geramemane kowa pungí yomboma "**kisim bek**" senge.

Romo yombomane Juda yomboma tondolo munduku nokoringimunga Juda yomboma ono onono we manda naa moloringimunga Juda yombomane pilkuli, 'Pulu Yemone nimba taltopa 'ono molongena lipu mundumbu.' nimba, nimba panjerimu ye nokoli Karasimuni ono lipa tapondombando Romo yomboma topa ononga koleana ultu mundupa ono onono 'Manda molangi.' nimbá.' konopu lieringi. 'Yuni ono "**kisim bek**" sembá.' konopu lieringi (LLuku 1:68-75, 24:21).

**Se:** Ya u nirimulu ungumu kinia i ungumu kinia selu-sipamo. Isirele yomboma kolea Isipi moloringi kinia Isipi yombomane ono ka-kongono siringi, Isirele yomboma paa mindili awili-seko nongo moloringi kinia Pulu Yemone nimbale: "Ono lipu tapondopo, ono ka-kongono silimili yombomanga kína wendo lipu, senga manda we molangi, membo pumbu mondombo." nimba sika aku sipa serimu (Wendo Oringi 6:6). Aku sipa nirimumu "Ono "**kisim bek**" sembó." nirimu.

**Se:** Yombo sene sepa kinjimba kinia yu "Llo sepili." ningí. Kou-mone naa pemba kinia yu ka singí. Kanu-kinia yombo sene yu kondo kolopale 'Wendo omba pumba we molopili.' nimba kote pilieli yombomo kou-mone ningíma sindimba. Aku sipa mele, Pulu Yemone olio "Pundu tangi." nimba mindili lipa simba aulkana pulimulu kinia Yesusini yuyu yunga kangimu kinia mememotolo ("**baim bek**" méletolo) olionga nimba Pulu Yemo sinderimu. Aku sipa serimu ulumuni olionga pundu tondopa Pulu Yemone olio mindili lipa silka nolemolá aulkana wendo liltimu. "**Kisim bek yumi**" serimu (Mako 10:45, U-Pita 1:18-19).

Imunga ungu awisili kinia ungu mare Pulu Yemonga bokuna molemo unguma kinia inia yakondo 3. **baim bek** molemóna. **21.2.** Ingillisi-unguna "**save**" akumunga pulumu i-sipa:

**Se:** Yombo se nona wangolemo kinia 'Yu nona naa wangopa kolopili.' ningu liku tapondoko nona pungu yu wendo limili (Lipa Mundorumu Yema 27:20).

**Se:** Yomboma ulka suluminiana uru peangi ulkamo sepene nombá kinia 'Ono sepene naa nopili, naa kolangi.' ningu liku tapondoko ulkana sukundu pungu yomboma toko makisiku wendo limili (U-Korini 3:15).

**Se:** Bolango se aulka-baresena andopa molopili karo se ombá kinia kanokole ‘Tomba.’ ningu liku tapondoko lisiku pungu yu liku aulka lapulapuna mengo pulimili.

Kanu ungumunga Umbu-Unguna ungu ponjili naa pelemomonga Pulu Yemonga bokuna Ingillisi-unguna “**save**” kanopo, ungu-pulumu pilipu topo, Yesusi ye “**Saviour**” kanopole ungu-pulumu pilipu torumulu. Pisini-unguna “**Helpim**” molo Umbu-Unguna “Lipa tapondomba” molo “Lipa Tapondólimu” manjipu tomolo manda mólo. Aku ungumu pange selemo. Yombomane yomboma we liku tapondolemelela. Ulka takolemele kinia liku tapondolemele. Kalia kepe liku tapondoko selemene. Kou-mone sene liku tapondolemele. Akumu we-uluma.

Wale mare we-mana-umbunamando Ingillisi-unguna “**save**” nimba molemo. Juda yombomane pilkuli, ‘Pulu Yemone ye se sipa mundumba, yuni olio lipa tapondopa Romo yombomane tondolo munduku nokolemeleanga kína wendo limba.’ ningu pilieringi. Giriki-unguna kinia Ingillisi-unguna kinia ungu talo nimba molemo, se “**redeem**”, se “**save**”, aku-na-kolo ungu-pulumu paa selu-sipa mele pelemomonga Pisini-unguna kinia Umbu-Unguna kinia ungu selu-sipa mele torumulu molemo. LLuku 1:68 akumu inia yakondo nondopa ungu-pulu 21.1. “**redeem**” akumunga ungu se, aku-na-kolo LLuku 1:69,71 akumu ya ungu-pulu 21.2. “**save**” akumunga ungu se.

LLuku 1:71 “**kisim bek**” kinia 1:74 “**tekewe**” kinia sika Giriki-unguna ungu lupa lupa, aku-na-kolo ungu-pulumu paa selumu. Akuna ‘opa-touma Romo yomboma’ ningu pilieringinje, aku-na-kolo kiniá ‘opa-tou kurumanga nokoli Setene’ nimbu pilielemolo kinia mandala.

Wale awisili olio Pulu Yemo kinia konopu seluna pupili manda naa mole-molomondo nilimú. Olione Pulu Yemonga ungumu pilipu naa lipu, yu bulu sipu, ulu-pulu-kiri aku sipu mele selemolomonga mindili nomolo aulkana pulimulu. Aku-na-kolo Yesusini olio “**save**” molo “**kisim bek**” sembando ulu mare serimu. Mateyu 1:21, LLuku 1:47 (Pisini-unguna ya “**Helpim**” molo “**Lipa Tapondólimu**” mindi molemo), LLuku 2:11,30, Jono 10:9, LLuku 19:10, Romo 10:1,9, Epesasi 2:5,8, U-Timoti 1:15, 2:4, Taitasi 2:13, U-Pita 1:9. Yombo talape talo molemelemonga ungu tondolo se Mako 16:16. U-Pita 3:18 akuna “**kisim bek**” nimba naa molemo-na-kolo “**kisim bek**” akumunga ungu-pulu se sika molemo.

**I-siku piliangila:** Yesusini olio “**kisim bek**” selemomonga ungu-pulu talo mele.

**Se:** Yomboma lipa tapondopa mindili nolemolá aulkana wendo limú. **Se:** Molopo kondopo mindi pumulú aulkana lipa mondolemo. Aku pilipuli Umbu-Unguna aku sipu bokuna torumulu molemo. Jono 3:17 “**kisim bek**” akumunga ungu-pulumu 3:16 kinia 3:18ekendo kinia molemo (Jono 3:16-18 ungu mare molemola). Ungu mare i-siku kananila: Lipa Mundorumu Yema 2:21, 4:12, Ipuru 9:12,15. **21.3. Man Bilong Kisim Bek Yumi**

Akumunga ungu-pulumu ya 21.1. “**redeem**” kinia 21.2. “**save**” pea lipa sere lepa i imbiunga pelemo. LLuku 2:11, Jono 4:42, Epesasi 5:23, Taitasi 1:3, Pe-Pita 1:1, 2:20, 3:18 kanani. LLuku 1:47 akuna Pisini-unguna “**Helpim bilong mi**” mindi molemo, Umbu-Unguna “**nanga Lipa Tapondólimu**” mindi naa torumulu. Torumulu molemo mele i-sipa: **Olio Lipa Tapondopa Mindili Nolemolá Aulkana Wendo Lili Yemo**. LLuku 1:47 kinia 2:11 kinia Giriki-unguna kinia Ingillisi-unguna kinia talo pea selu-sipamo. Yemo mindi lupa lupa. LLuku 1:47 akumu “Pulu Yemo” nilimú, 2:11 akumu “Karasi” nilimú.

22. kontrak

Akumunga pulumu i-sipa melenje: Yombo se kinia yombo se kinia anju yando

ninguli: “**Nuni i-siku sení kinia nane i-sipu sembó.**” **ningu, ningu panjikuli, “Ungumu mania naa pupili. Paa kamu alieli-alieli pepa mindi pupili.”** **ningu mi leko olonga imbitolo pepána tolembale.** Pulu Yemone u Eporayamo kinia Eporayamo yuni kalopa liltimu Isirele yomboma kinia aku sipa mele serimula-na-kolo yombomane ungu se naa niengi Pulu Yemo yuni yuyu nimbale: “Onone i-siku i-siku seko molonge kinia nane ono-kinia i-sipu i-sipu sepo kondombo.” nimba, nimba panjipa mi lierimu. U-Pulu-Pulu 15 akuna Pulu Yemone kongi yopoko kinia kera talo kinia Eporayamondo “Tou.” nirimu-kulu torumu kinia yuni Eporayamo-kinia sembá mele nimba panjipa mi lierimu. Pe U-Pulu-Pulu 17:1-14 akuna ‘kamu pemba mele lipa ora simba mako se pepili.’ nimba ungu-mane se sirimu (17:11-14). Aku makomo i-sipa: “Kangomanga kangi se kopisangi.” nirimu; akumunga ungu mare pea inia yakondo **18. katim skin bilong pikinini man** kananila.

Pe Mosisi molopili Isirele yomboma kinia ungu se nimba panjipa mi lierimu ungu umunga ungu mare Wendo Oringi 31:16, Ungu-Manema 4:13,23, 5:2, 29:1, 9:11, Kambu Toringi 10:33 molopa, akumunga ungu tondolo se Wendo Oringi 24:3-8 molemo. Wendo Oringi 24:8 paa kanou! Ungu-manema sipale “Senge kinia i-sipu i-sipu ono sepo kondombo.” nirimu mele Ungu-Manema 28:1-14 molopa, “Naa senge kinia i-sipu i-sipu ono sepo kinjimbu.” nirimu mele Ungu-Manema 28:15-68 molemo. (U Pulu Yemone Isirele yomboma mindili noringi aulkana wendo limba sepale, pe-pe-kepe pilku molonge mele ungu-mane se nimba panjerimu ungumu Wendo Oringi kolomongo-awili 14-20 molemo. Akumu kananila.) Unzu umu kinia kondetolonga ungu se Gallesia 4:24-26 molemola.

Yesusi mana naa opili Pulu Yemone uaku sipa serimu mele molopa, yunga Isirele yomboma nokorumu mele unguma molemo bokumu Kewa-unguna **“Olpela Testamen”** molo **“Olpela Kontrak”** nilimulu. Akumu Umbu-Unguna **“Pulu Yemone Nimba Panjipa Mi Lierimu Unzu Umu”** nimbu, ponjipu **“Unzu Umu”** nilimulu. Pe Yesusi mana mania ombale ‘Pulu Yemone ungu konde se nimba panjipa mi lierimumu kamu wendo omba pepili.’ nirimumunga yunga semanemo kinia yunga unguma kinia molemo bokumu imbi lepo **“Pulu Yemone Nimba Panjipa Mi Lierimu Unzu Kondemo”** nimbu, ponjipu **“Unzu Kondemo”** nilimulu. Kewa-unguna **“Nupela Testamen”** molo **“Nupela Kontrak”** nilimulu. Aku ungtolole bokuna torumulu molemo. Pulu Yemone “Unzu konde se nimbu panjipu mi lembo.” u nirimu mele ungu talo Jeremaya 31:31-34 kinia Ipuru 8:6-13 kinia molemo (Esikiele 37:26 kananila).

U-yombomane ungu se ningu panjiku mi lekole, ‘Kamu wendo omba pepili.’ ningu wale mare mélsga mememo ondondoringi. Aku sipa mele pilipale Pulu Yemone olio yunga yombo molomoloma-kinia ungu se nimba panjipa mi lemba serimumunga ungu se nirimu mele i-sipa: “Na ononga ulu-pulu-kiri selemele sengema naa pilipu siye kolopo akumanga ono ungu se naa sepo, ono konopu kake sepili kelepo kopu sepo konopu seluna pupili manda selu sipu molamili kene nanga Malo ononga nimba yunga mememo ondopa kolali sepa kolondopili.” nimba yunga Malo mana lipa mundorumu. Akumunga, Yesusi kolomba walemo wendo orumu kinia yu kolopa meme olionga nimba ondondombamonga ungu kondemo kamu wendo omba pemba mele ungu-pulumu yu lombili andoli yemando nimba para sirimu. Kanu ungumu Mateyu 26:28, Mako 14:24, LLuku 22:20, U-Korini 11:25 kinia molemo. “Pe-pe-kepe pilku molangi.” nirimu ungu-manemo U-Korini 11:25-26 molemo. Yesusinga mememonga ungu mare pea Ipuru 7:18-22, 9:11-28 molemo. Mememonga ungu talo pea LLipai 4:1-5:10 kinia Wendo Oringi 24:8 molemo.

## 23. Krais

“**Krais**” akumu Giriki-ungu. Ipuru-unguna “**Mesaya**” niringi. Ungu-pulumu selumu. Akumu Yesusi (Mateyu 1:1,17,18,25, Jono 20:31, Lipa Mundorumu Yema 5:42, 8:12). **Karasi** munga pulumu inia anjukundu 27. **Mesaia** molemo, akumu u inia anjukundu gomomo wendo liku kanokole, pe kelko yakondo i gomomo i ungumu wendo liku kanani.

Ye **Mesaya Karasimu** nga kongono sembá orumu talo i-sipa mele: **Se:** Ye nokoli kingimu molopa yomboma nokopa kondombando orumula. Aku pilkuli Yesindu wale mare “**ye nokoli kingimu**” sumbi siku niringila (LLuku 1:32-33, Mateyu 2:2-6, 21:5, 27:11,37,42, Mako 15:26,32, Jono 1:49, 11:27, 12:13, 18:33-37, 19:12,14-15,19-22, Lipa Mundorumu Yema 17:7). **Se:** ‘Olio kinia Pulu Yemo kinia kelepo konopu seluna pupili seluna sere leko molamili.’ nimba olionga Pulu Yemo popo tondoli ye paa awili olandopamo molombando orumula (Ipuru 7:21-28, 9:11-15, Mateyu 27:51. Inia anjukundu 34.3. **hetpris** kananila.).

Ingillisi Baipelena kinia Pisini Baipele kondena kinia wale awisili ungu-pulumu naa toko, we “**Krais**” mindi sumbi siku toringi (Mateyu 1:1,17,18), aku-na-kolo wale mare Pisini Baipelena ungu-pulumu toringi (Jono 3:28, 1:41, 4:25,42, Mateyu 16:16, 22:42, 24:23, 27:17, Mako 13:21, LLuku 2:11, 9:20). Jono 4:29 kinia 7:31 kinia ungu-pulu sela toringi. Mateyu 1:16 Pisini Baipelena imbi kinia ungu-pulumu kinia toringi molemo. Yu meringi molemo mele ungu se Romo 9:5, 1:3-4 molopa, orumumunga ungu-pulu se Lipa Mundorumu Yema 3:18, 2:31-36 molemola.

Yesindu “**Karasimu**” niringi we imbi leko naa niringi, ungu-pulumu pilku niringi. Akumu pilipuli Umbu-Unguna semane peanga toringi bokumanga alieli imbimunga ungu-pulumu torumulu. ‘Sumbi siku piliangi.’ nimbu ungu-pulumu kinia Kewa-ungu “**Karasi**” kinia lipu sere lepo torumulu molemo. Aku-na-kolo ‘Pe pepáma siku mundungíndu toringi pepámanga “Karasi” wale awisili we walu mele imbi toringinje.’ nimbu pilipuli imbi “Karasi” sumbi sипу torumulu. Pasemanga wale koltalo mindi ungu-pulumu torumulu.

“**Ye Nokoli Karasimu**” kinia “**Pikinini Bilong Devit**” kinia “**Pikinini Bilong God**” kinia “**Pikinini Bilong Man**” kinia ye selumu. Kanu imbi **Pikinini** manga ungu mare inia anjukundu 32. molemo. **Karasimu** nga kongono-imbi se inia anjukundu 35. **profet** molemola.

## 24. laip

Yombo marene Pulu Yemonga ungumu yomboma ningu singíndu Kewa-unguna “**laip**” **nilimili paa manda naa sekemo**. **Ungu-pulumu pilkuli Umbu-Unguna niengi**. **We ungu-pulu akumu konde mololi**. “**i stap laip**” akumu “**konde molemo**” (U-Pulu-Pulu 2:7, Gallesia 2:20).

Aku-na-kolo wale awisili Pulu Yemonga bokuna “**laip**” molemo akumunga ungu-pulumu we ya mana konde molomolomondo mindi naa nilimú. Mulu-koleana molopo kondopo mindi pumulúmundu nilimú (Mateyu 7:14, Mako 9:43,45, 10:17,30, LLuku 12:15, Jono 1:4, 3:15,16, 6:27-68, 8:12, 10:28, 14:6, 17:2,3, 20:31, Lipa Mundorumu Yema 3:15, 11:18, 13:48, Romo 6:4,22,23, Gallesia 6:8, Lipa Ora Sirimu 2:10).

Umbu-Unguna ungu-pulumu torumulu molemo mele i-siku kanoko piliani:

**Se:** “**bret bilong laip**” Jono 6:35,48,51.

**Se:** “**buk bilong laip**” Pillipai 4:3, Lipa Ora Sirimu 3:5, 13:8, 20:12,15, 21:27 (LLuku 10:20 kananila).

**Se:** “**diwai bilong givim laip**” akumu Pulu Yemone pulu-pulu ambo yetolo mondorumu kaliana panjerimu unjumu, akumu mulu-koleana gilimúla (U-Pulu-Pulu 2:9, 3:22-24, Lipa Ora Sirimu 2:7, 22:2,14,17,19).

**Se: “wara i gat laip”, “wara bilong givim laip”** Ungu talo peatolonga ungu-pulu selumu. “**wara i gat laip**” Jono 4:10-15, 7:37-39, Lipa Ora Sirimu 7:17 molopa, “**wara bilong givim laip**” Lipa Ora Sirimu 21:6, 22:1,17 molemo. No nonowalene kololemolo-monga ungu se Aisaya 55:1 molemola.

## 25. lepra

Umbu-Unguna “**kuru-laká nolemo**” nilimili kanumu. U Isirele koleana kuru-laká norumu akumu kinia ya umbu-koleana nolemomo kinia selu-sipa melenje? Mimi sipu naa pilielemolo. ‘Wale mare aku sipa mele sikanje, aku-na-kuolo wale mare erili katekate selemo akumundu kinia pea niringinje.’ ningi pilielemele. Isirele yombomanga kimbu kimanga mongoma, aku mele kamu wendo purumu molo erili serimuna we serimunje. Naa pilielemolo.

Isirele yomboma kangina kuru-laká norumumunga kangi se kake serimu molo kondoli serimu kanokole i-siku mele seringi: Pulu Yemonga ungu-manse se Mosisini Isirele yomboma mane sirimu akumu LLipai 13:1-46 molemo, akumu pilkuli, Pulu Yemo popo tondoli yema moloringina pungu ononga kangimu liku ora siringi. Pulu Yemo popo tondoli ye sene kangina mimi sipa kanopale, “Unguri mólo. Kangimu kalaro se naa molemo.” nirimu kinia manda. Aku-na-kuolo kangina uluri serimu mele kanopale kamu “Nu kangina kalaro mololi yombo se.” nirimu kinia pilipale kuru-laká norumu yombomo we-yombo peringi koleana ultukundu pumba perimu. Aulkana andombando ungu se tondolo mundupa nimbale: “Kalaro mololimu! Kalaro mololimu!” nilipa andorumu. ‘We-yomboma olio kuru-laká noli yomboma molemolona nondoko naa wang.’ ningi aku seringi. Kuru-lakámo nomba kelierimu kinia kanokole kelko Pulu Yemo popo tondoli ye se molorumuna pungu ononga kangimu liku ora siringi kinia yemone kanopale “Kelepa umbu kangi gilimú.” nimbale “Kangi kake seli molemo.” nirimu kinia pilkuli kuru-laká nomba kelierimu yomboma ononga pulu koleana kelko pungu peringi. ‘U ulkando naa pang Pulu Yemo popo tondoli yemone mélse kalondopa Pulu Yemo popo topa simba mélse kanu yemo sikuli ulkando pang. We mólo.’ nirimu mele LLipai 14:1-32 molemo.

Yesusini aku sipa seli ye mare sepa peanga sirimu kinia LLipai 14 molemo ungu-manema pilkuli seringi mele semane talo LLuku 5:12-16, 17:11-19 molemo. Ungu pokore pea Mateyu 10:8, 26:6, LLuku 4:27 molemo. (LLuku 4:27 nilimú semanemo Pe-Kingima 5:1-14 molemo.)

## 26. lo

Akumu Umbu-Unguna “**ungu-manema**” nilimulu. Akumu we nilimulula. Romo gapomano **llo** molo Papua Nu Gini gapomano **llo** mando “**ungu-manema**”-la nilimulu. **26.1.** Aku-na-kuolo Umbu-Unguna Pulu Yemone u Mosisi ungu-umbu tondopa **tenpela lo** sirimumando we “**ungu-manema**” mindi naa torumulu. ‘Ungu-pulumu sumbi siku pilangi.’ nimbu “**Mosisini sirimu, ungu-manema**” torumulu bokuna molemo (Mateyu 5:17,18, LLuku 10:26). Kanu ungu-manemanga ungu awisili boku Romo molemo (Romo 2:pali, 3:pali, 10:4, 13:10, awisili pea). Wendo Oringi 20:1-17 sirimu ungu-manne rureponga talondo Miti yombomane “**mi unguma**” nilimili, yombo awisilini we Kewa-unguna manda manjiku “**tenepella llo**” nilimili.

Pulu Yemonga Ungu Kondemo bokuna wale mare Pisini-unguna “**lo**” molemo kinia sika we “**ungu-mane rureponga talo**” ndo nilimú (LLuku 18:20), aku-na-kuolo wale awisili **Mosisini Pulu Yemonga ungu-mane sinderimuma** ndo pali nirimu. U-Pulu-Pulu, Wendo Oringi, LLipai, Kambu Toringi, Ungu-Manema, kanu boku se-pakara pali Mosisini torumu, aku bokuma liku sere leko “**Mosisini torumu bokuma**” niringila; “**Ungu-Manemo**” niringila. (Mosisini

torumu bokumanga ungu se inia anjukundu nondopa 26.2. “**Lo**” nimba molemo.)

Juda yombomane pilkuli ‘**Mosisini sirimu ungu-manema** semolo kinia Pulu Yemone olio kanopa peanga pilimba.’ ningu pilieringi. Juda yombo mare Yesini yombomanga nimba senderimu mele pilkuli kamu ‘Sika nanga nimba senderimu.’ ningu yunga yomboma molkole **ungu-manema** pea pilku moloringi. **Ungu-manema** se aku siku pilkuli niringimunga ungu se inia yakondo **18. katim skin** akuna molemo. Kanu yombomane ninguli: “Yesusinga mememo mindi manda mólo. Yesini olionga nimba kolali sepa kolondorumu akumu mindi manda mólo. Akumu ‘Sika.’ nimbu kuru mondopo, **ungu-manema** kepe pilipu lipu semolo kinia Pulu Yemone olio kanopa ‘yombo sumbi nilima’ nimba kanomba.” niringi. Aku-na-kolo akumu paa mólo. Romo 3:19-31, 4:1-8, 9:30-33, Gallesia 2:14-21, 3:1-25, 5:1-12 kanani. Romo 3:20-22, Gallesia 2:16, 3:24 paa mimi siku kanani. **26.2.** Wale mare “**Lo**” molo “**Lo na Profet**” molo “**Mosis na Profet**” bokuna molemo akumunga ungu-pulumu paa lupa. **Ungu-manema** ndo molo Mosisindu we naa nilimú. Pulu Yemone ungu-umbu tondorumuma pilku yomboma ningu siringi yemane toringi bokumando mindi naala nilimú. Yesusi mana naa omba molopili, yunga semanemo u naa tangi, Isirele yombomane Pulu Yemonga Bokumu liku sere leko imbi lengendo “**Lo**” molo “**Lo na Profet**” niringi. Kewa-unguna “**Olpela Testamen**” akumundu niringi. Akumu pilkuli LLuku 24:27,44,45-46 paa mimi siku kanani. LLuku 24:44 mindi **Konane Bokumu** pea nimba molemo. (Romo 3:21 ungu talo pea molemo. Se: Mosisini Pulu Yemonga ungu-manema sirimuma; se: Pulu Yemonga Boku Umunga pali. Akumu kanani.) Boku palinga ungu mare i-sipala: Mateyu 5:17, 7:12, 11:12-13, 22:40, LLuku 16:16,29,31, Lipa Mundorumu Yema 24:14, 26:22, 28:23. Wale mare “**Lo**” mindi bokuna molemo Mosisini torumu bokuma ndo sika nilimú (Jono 8:17 kinia Mateyu 18:16tolo Kambu Toringi 35:30 kinia Ungu-Manema 17:6 kinia molemo), aku-na-kolo Jono 10:34 kinia 12:34 kinia ungu niringitolo Mosisini torumu bokuma nga naa molemonje. Jono 10:34 mele Konane 82:6 molopa, Jono 12:34 mele Konane 110:4, Aisaya 9:7, Esikiele 37:25, Deniele 7:14 kinia molemo.

## 27. Mesaia

Akumu Isirele yombomane Ipuru ungu lieringi akumunga ungu se. Pe Giriki-unguna “**Krais**” niringi akumu ungu-pulu selumu. Yesusi mana omba naa molopili **Ye Mesayamo** pe ombá kinia toko kondonge ungumu Deniele 9:25,26 mindi molemo. Deniele 9:25,26 akuna Pisini Baipelena imbi “**Mesaia**” tongendo “**Mesaia**” naa toringi, ungu-pulumu mindi toringi. Ingillisi Baipele marenga akula imbi toringi molemo. Pisini-unguna “**dispela bikman God i bin makim**” molemo.

U Isirele yombomane yombo se “**i bin makim**” seringi akumu “**makim**” we naa seringi. Aku seringimunga pulu talo i-sipa mele: **Se:** Ye se ‘Ye nokoli kingimu molopili.’ ningu, ningu taltoko namba singíndu wambola se yunga pengena ondoko kandondoringi (U-Samuele 9:15-16, 10:1, 16:1,12-13, Pe-Samuele 2:1-4). **Se:** Ye se ‘Pulu Yemo popo tondoli ye awili olandopamo molopili.’ ningu, ningu taltoko namba singíndu akula seringi (Wendo Oringi 29:5-7, LLipai 8:10-12). Ungu “**Mesaia**” akumunga pulumu akumu mindi. “**Ye se ningu taltoko wambola pengena ondoko kandondoko kongono sembá namba se singí**” yemo.

Wale talo mindi Giriki-unguna “**Krais**” bokuna naa toko, Ipuru ungumu manda manjiku “**Mesaia**” ningu toringi. Aku ungutolo Jono 1:41 kinia 4:25 kinia mindi. Akumu Pisini-unguna ungu-pulumu naa toringi, “**Mesaia**” ningu we

imbi toringi. Ungu-pulumu tongendo Jono 1:41 kinia 4:25 tolonga “**Karasi**” molemola, akumu tongendo ‘**Mesaya**’ kinia **Karasi** kinia ye selumu, ungu-pulumu selumu.’ ningu ungu **Karasi** munga ungu-pulumu toringi. Imbi “**Krais**” akumunga ungu-pulu mare inia yakondo **23.** molemo kananila.

28. nem

“**Em i gat nem**” akumu “**yu imbi molemo**” molo “**yu imbi ola molemo**” sumbi siku nilimili. Aku-na-kolo wale mare “**nem**” bokuna molemo kanumu aku sipa mólo. Ungu marenga ungu-pulumu pilipuli torumulu bokuna molemo. Imbi lieringi molo imbi mangilieringi kinia ye imbi molorumumunga tondolomo pilkuli imbimu lieringi. Imbimu yuyu unguri mólo. Yemo yuyu tondolo perimu mele pilkuli yunga imbi lieringi molo mangilieringi.

**Se:** i-sipa mele: “**Mi i kam long nem bilong en.**” nimulúndu “Yuni na lipa mundomu-na okoro.” nilimulu (Konane 118:26, Mateyu 21:9, 23:39, LLuku 19:38, Jono 12:13).

**Se:** i-sipa mele: “**baptaisim long nem bilong Papa na Pikinini na Holi Spirit**” nimulúndu yomboma no lindipu, “Lapa kinia Malo kinia Mini Kake Sélimu kinia mangilipu imbi lepo nu no lindikiru.” nilimulu (Mateyu 28:19, Lipa Mundorumu Yema 2:38, 8:16). Olione oliolio pilipu we naa selemolo. Ononga kongonomo sendepo, “Sendaa.” nilimili mele pilipu, ‘Ononga tondolomo yomboma-kinia pepili.’ nimbili ononga imbima lepo ono mangilipu yomboma no lindilimulu.

**Se:** “**bilip long nem bilong en**” : Lipa Mundorumu Yema 3:16, Jono 2:23, 3:18 kinia kanani. (Jono 8:30,31, Lipa Mundorumu Yema 2:21 selu-sipa mele).

**Se:** “**askim long nem bilong en**” : Jono 14:13, 15:16 kanani. Jono 15:16 akumu Kewa-unguna pilipuli i-sipu mele bokuna tolemolánje: ‘Nanga imbi leko Tata mawa senge mele simba.’ nimbu tolemolá-na-kolo ‘Nanga imbi leko’ akumunga pulumu nambolkanje? Ungu-pulumu sulu sepo i-sipu mele tolemolá: ‘Tata kinia ungu ninguli: “‘Nunga Marena Yesusi nanga nimba kolondorumumunga nuni na liku tapondoni aulkamo yuni lipa taltondorumu.’ nimbu pilipuli nu mawa sekero.” ningu mawa sayo.’ aku sipu tolemolá.

**Se:** “**tokaut long nem bilong en**” : Lipa Mundorumu Yema 4:17,18, 5:28,40, 9:27,29 kanani.

**Se:** “**sik i ken pinis long nem bilong en**” : Lipa Mundorumu Yema 3:6,16 kanani.

**Ungu mare i-sipa:** Mateyu 7:22, 12:21, 28:19, Mako 9:37-41, 11:9-10, 13:6,13, 16:17, Jono 1:12, 2:23, 17:6,11,12,26, 20:31, Lipa Mundorumu Yema 5:40, 8:12, Romo 9:17, 10:13, U-Korini 1:2,10,13,15, 6:11, Epesasi 5:20, Pillipai 2:9,10, Kollosi 3:17, Jemisi 5:10,14, U-Pita 4:14, Jono Yopoko-Sipamo 7, Lipa Ora Sirimu 2:3,13, 3:8.

29. olpela bel

Akumunga pulumu i-sipa mele: U konopu topele naa topo, Mini Kake Sélimu konopuna naa molopili Yesusinga yomboma naa molamili olionga konopu pelemoma paa umbu-konopu kirima mindi. Kanu konopumane ‘olio sepo kinjamili.’ mindi nirimu mele we walu pilipuli serimulu. Yesusi olionga konopumanga ombo topele tondolemo kinia olionga **u-we-konopu-kirima** kololemo none selemo. Pe olio konopu konde Yesusini topele tondopa silimúma pelemo, akumane nilimú pilielemolo mele lupa. Aku-na-kolo umbu-konopu-kirimu kamu mania naa pulimú. Akumuni ‘Yu paa piliamili!’ nimba ta nilimú. Akumu bokuna imbi lepo “**u-we-konopumu**” nimbu torumulu molemo. Akumunga ungu mare Romo 6:1-14, 7:5, 8:1-12, 13:14, U-Korini 3:3, Gallesia 5:19-21,24, Epesasi 2:3, Jemisi 3:15 kinia molemo.

## 30. Pasova

Ingillisi-unguna “**pass over**” akumu Umbu-Unguna “**olakondo omba puli**” mele. Kera molo balloesi mangopa olionga **pengena olakondo muluna omba pulimú** akumu “**pasova**” selemo. Aku-na-kolo Ipuru-unguna ungu-pulu se pelemo, akumu “**naa topa mundupa kelepa olakondo we omba puli**” .

“**Pasova**” aku walemonga ungu yopoko pelemo.

**Se:** Pulu Yemone ‘Yomboma kinia kongima kinia mélemanga pali komolayema topo kondambo.’ nirimu kinia yunga angellomo kolea Isipi andopa Isipi yomboma kinia mélemanga komolayema topa kondorumu. Aku-na-kolo Pulu Yemone “I-siku i-siku senge kinia kanopole yombo se naa tombo.” nirimu mele pilkuli Isirele yombomane kongi sipisipi walo senga meme ulka kere-puluna ape kandoringi yombomanga komolayema naa torumu. Pulu Yemone lipa mundorumu angellomone mememo ulka senga senga kerepuluna molorumu kinia kanopale kanu ulkamanga sukundu naa pumba **ola we omba purumu** . Aku semanemo kinia ungu-manema kinia Wendo Oringi 12 molemo. Pe kalia-ingimanga pali oli se kinia wale se kinia nimba sipa, wale yopoko-pakara ‘Pulu Yemonga wale kake selima.’ ningu koro molko “Ono lipu tapondorunu mele pilku molangi.” nimba mane sirimu mele Wendo Oringi 12:2-3,14-16 kinia Ungu-Manema 16:1-8 kinia Ipuru 11:28 kinia molemo. Aku ungu- manemo pilkuli yandopa yandopa kalia-ingi senga senga aku siku seringi. Paa kiniá kepe Isirele yombo marene aku siku selemelela. Yesusi mana molopili i walema bokuna “**Pulu Yemone Isirele Yombomanga Anda-Kolepalima Naa Topa We Omba Purumu Mele Pilieringi Walemo**” nimba molemo (LLuku 2:41-43, Jono 2:13,23, Mateyu 26:2,17).

**Se:** Pulu Yemone Juda yombomanga komolayema naa torumu walema pilingindu pulu-pulu walemo wendo orumu kinia kongi sipisipi walo se toko nongo, “‘Pellawa se kalopo namili.’ ningu pellawana mundulimili kinia akolemo méle isimu naa mundukuli pellawa we kalko nangi.’ nimba mane sirimu (Wendo Oringi 12:3,5,8,17,18; 23:14-15 kanani). Aku walemo pe kiniá bokuna “**Pellawa Akoli Méle Isimu Naa Munduku Pellawa We Kalko Norangi Walemo**” nimba molemola (Mako 14:1, Mateyu 26:17, LLuku 22:1-2,7-16, Lipa Mundorumu Yema 12:3, 20:6).

**Se:** Pulu Yemone we omba pumba olio naa topa kondombamonga kongi sipisipi walomo Yesusi yu. U-Korini 5:6-8 kanani. Akumunga, Juda yomboma Pulu Yemone ononga anda-kolepalimanga komolayema naa torumu mele semanemo pilieringi walemanga Yesusi naa tolemolá naa kolkanje paa manda naa selka. Akumunga, ‘kanu walemonga kolambo.’ nirimu (LLuku 9:51). Pe paa sika sipisipi walo se toko nongo u Pulu Yemone serimu mele pilieringi walemanga Yesusi toko kondoringi (Wendo Oringi 12:21 mele Mako 14:1-2,12,22-25,63-64; 15:1,6-15, LLuku 22:7,14-16, Jono 18:28).

Yesusi yu “**Pasova**” kongi sipisipi walo paa kake sélimu, Wendo Oringi 12:5 mele (Mateyu 27:4, Jono 18:38, LLuku 23:47, U-Korini 5:7, Ipuru 4:15, U-Pita 1:19). Yesusi sipisipi walomo molorumu mele ungu mare inia anjukundu **44. sipsip, 44.3. molemo**.

## 31. pikinini

Pulu Yemonga bokuna “**bolango**” nimba molemo akumu wale mare sika bolangomando nilimú. Aku-na-kolo wale mare Kewa-unguna “**pikinini**” molemo kinia kanopole ungu-pulumu pilipuli torumulu.

(Yesusi yuyu “**Pikinini Bilong Devit**”, “**Pikinini Bilong God**”, “**Pikinini Bilong Man**” molorumu mele inia anjukundu nondopa 32. nimba molemo.) **31.1. pikinini bilong Abraham**

Akumu “**Eporayamone kalopa liitimu yomboma**” nimbu torumulu molemo (Mateyu 3:9, Jono 8:39). Aku-na-kolo akumunga ungu-iku mare toringi molemola. ‘Yesusi sika.’ ningu kuru naa mondoringi yomboma kurumanga nokoli depelemonga bolangoma molemele; ‘Yesusi sika.’ ningu **kuru mondoemele yomboma Eporayamone sika kalopa liitimu yomboma** molemele (LLuku 3:8, 9:9, Jono 8:33-44, Romo 4:pali, 9:6-8, Gallesia 3:5-14). 31.2. **pikinini bilong Isrel**

Akumu “**Isirele yomboma**” (LLuku 1:16, Lipa Mundorumu Yema 5:21, Romo 9:3-5, Mako 7:27nje). Ungu-pulu se LLuku 22:30 molemola. **31.3. pikinini bilong God**

Wale marenga Giriki-unguna Pulu Yemonga kangoma molo bolangoma nimba molemo akumu olio ‘Yesusi sika.’ nimbu yunga yomboma molemolo, sika **Pulu Yemonga bolangoma** molemolola (Mateyu 5:9, Jono 1:12-13, 8:41-47, LLuku (8:19-21), 6:35, 20:36, Romo 8:13-17, 23, 9:24-26, Pe-Korini 6:18, Gallesia 3:26, 4:5, Epesasi 1:5, 5:1, Ipuru 2:10-17, 12:5-6, U-Pita 1:14, Jono Kumbi- Lepamo 3:1-6, Jono Talo-Sipamo 1). Mare pea selu-sipamo ima: Jono 3:3-8, Taitasi 3:5, U-Pita 1:23, Jono Kumbi-Lepamo 3:9-10, 4:7, 5:1-2, 4, 18-19. Isirele yombomanga ungu se Romo 9:4 molemo.

(Yesusi yu “**Pikinini Bilong God**” molemomonga ungumu inia anjukundu **32.2. molemo.**) **31.4. tok bokis bilong pikinini**

Jesusini ungu-iku topale, bolango kangamane anupili lapalimanga unguma taka leko pilku liku karaye naa selemele mele yombo aku siku Pulu Yemonga ungumu taka leko pilku selemelema mindi yu ye nokoli kingimu molemo mulu-koleana manda pungí (Mateyu 18:1-6, 10-14, Mako 9:33-37, 10:13-16). Imu pílie: Mateyu 18:2, 3, 4, 5 Giriki-ungu se molemo, akumunga ungu-pulumu sumbi sipa “**bolango kanga**”. Aku-na-kolo Mateyu 18:6, 10, 14, 10:42 Giriki-ungu sela molemo, akumunga pulumu sumbi sipa “bolangoma” mólo. Ungu-pulumu lipa sere lepa “**nanama**” kepe, “**kangama**” kepe, “**imbi naa mololima**” kepe aku sipa mele. **Imbi naa mololi** manga ungu talo LLuku 22:24-27 kinia Jono 13:12-17 kinia molemo.

Giriki-unguna imbi sela molemo. Akumu “**bolango kiki**” molo “**bolango pame, ungu naa nili**”. Sika ungu se Mateyu 21:16 molemo. Ungu-iku topa, “**konopu tondolo naa puli yomboma**” molo “**umbu-konopu naa peli yomboma**”ndo nilimú ungu mare Mateyu 11:16, LLuku 10:21, Romo 2:20, U-Korini 3:1, Epesasi 4:14, Ipuru 5:13 kinia molemo.

U-Korini 14:20 akumunga ungu-pulumu i-sipanje: Bolango pamemanga konopu tondolo se naa pepili molkole ulu-kirima walu seko, mimi siku naa pilielemene akumu ya naa nikimunje. Bolango pamemane ‘Ulu-pulu-kirima samili.’ ningu konopu kimbu siku naa molko, ‘Bolango pamemane ‘Yomboma mindili nongo, molko kinjangi!’ ningu naa pilku walu molemele mele ono yombo yuma aku siku molangi.’ nimba nirimunje?

### 32. Pikinini

Yesusi, yunga imbi se “**Karasi**” ningu kanumunga imbi mare “**Pikinini Bilong Devit**”, “**Pikinini Bilong God**”, “**Pikinini Bilong Man**” ningu lieringila. **32.1. Pikinini Bilong Devit**

**Devit** - Yu u Isirele yombomanga ye nokoli kingi awilimu. Yombomane yu konopu siringi. Pulu Yemone yu konopu sirimula (U-Samuele 13:14, U-Kingima 15:5, Jeremaya 3:15, Lipa Mundorumu Yema 7:45-46, 13:22).

“**Pikinini Bilong Devit**” - Akumu Yesusindu niringi.

Yu “**Pikinini Man Bilong Devit**” .

Depitini sika Yesusi kalopa liitimu (Mateyu 1:1, 17, LLuku 3:31). Aku-na-kolo

pe walte Mateyu 9:27 ye talone niringili imbimunga pulumu sela, aku ungu-pulumu Mateyu 22:41-44 molemo. **Depitini kalopa limba ye se** Pulu Yemone ‘Ono nokopa kondomba ye se lipu mundumbu.’ nimba, nimba taltorumu ye nokoli kingi Mesaya Karasimu molomba.’ ningi pilku, ‘Yesusi yu aku yemo omba molemo.’ ningi pilkuli Yesusi yundu **“Depitini Kalopa Liltimu Yemo”** niringi. Depitini kalopa limba yemo kamu alieli ye nokoli kingimu molopa mindi pumbá. Pe-Samuele 7:11ekendo-16, Aisaya 9:6-7, 11:1, Jeremaya 23:5-6, Mateyu 12:22-23, 21:9, LLuku 1:32-33,68-69, Lipa Ora Sirimu 22:16, (Mateyu 1:1,6,16,17, 9:27, 15:21-22, 20:29-31, LLuku 2:11). Inia yakondo **“23. Krais”** kananila. **32.2. Pikinini Bilong God**

(I imbimunga ungu se inia yakondo **31.4.** molemola.)

Pisini-unguna **Yesusi** ndu **“Pikinini Man Bilong God”** nilimolánje papu. Umbu-Unguna **“Pulu Yemonga Malo”** torumulu molemo. Yesusi yu paa sika Pulu Yemonga Kandi Malo.

**Pulu Yemone Yesusindu “Nanga Kangomo” nirimu** (Mateyu 3:17, **17:5, Lipa Mundorumu Yema 13:33, Pe-Pita 1:16-18**). **Yesusini Pulu Yemondo “Tata” nirimu** (Mateyu 11:25-27, Jono 5:19-27; LLuku 22:70-71 kananila).

No Lindeli Jonone **“Yesusi yu Pulu Yemonga Malo”** nirimula (Jono 1:34).

Yu aku sipa molorumu mele kurumanga nokoli Setene kinia kuruma kinia onone ningi para siringila (Mateyu 4:3,6, Mako 3:11, 5:7, LLuku 4:41).

Yesusi lombili andoli yemane yu aku sipa molorumu mele ningi para siringila (Mateyu 14:33, 16:16, Jono 11:27, 1:49) aku-na-kolo we-yombo awisilini ‘Yu Pulu Yemonga Malo naa molemo.’ ningi pilieringi (Mateyu 26:63-66, 27:40,43).

‘Yesusi yu sika Pulu Yemonga Malo.’ ningi kuru mondolemele yomboma konde molko mindi puli ulu-pulumu limili (Jono 20:31).

Yesusi Pulu Yemonga Malo ungu mare pea i-sipa: Mateyu 11:27, 27:54, Mako 1:1, LLuku 1:35, 9:35, Jono 1:14,49, 3:16,36, 5:17-26, 6:40, Lipa Mundorumu Yema 9:20, Romo 8:3,29,32, Gallesia 2:20, U-Tesallonaika 1:10, Ipuru 1:1-8, 3:3,6, 4:14, 5:5 (Konane 2:7, Lipa Mundorumu Yema 13:33), Ipuru 7:3, Jono Kumbi-Lepamo 1:3,7, 2:23, 3:8, 4:9,14, 5:5,11. **32.3. Pikinini Bilong Man**

Akumunga Umbu-Unguna “Mana Ye Senga Malo” molo “Mana Yombo Senga Malo” bokuna tolemolá-na-kolo ‘Yombomane we walu kambu toko, akumu ye senga imbi tondolo se naa pilinginje.’ nimbu, ‘Kanu yemo we-mana-ye se naa molorumu sumbi siku ningi piliangi.’ nimbu **“Mulu-Koleana Molopa Mania Ombo Mana-Ye Au Lierimu Yemo”** nimbu bokuna torumulu. Pe ponjipu **“Mania Ombo Mana-Ye Au Lierimu Yemo”** torumulu akumu bokuna molemo.

Aku imbimu u-pulu-pulu niringi mele Deniele 7:13-14 molemo. Akuna nimba molemo kanu yemo yu Isirele yombomane pilkuli, ‘Yu Pulu Yemone nimba taltopa, “Ono nokopa kondomba ye se lipu mundumbu.” nimba, nimba panjerimu ye nokoli awili Mesayamo.’ ningi ‘Yu ombá.’ ningi nokoko moloringina-kolo Yesusi yu kanu yemo omba molorumu mele Juda yombomane naa pilieringi. Mako 14:62, Lipa Ora Sirimu 1:7,13 kanani. **“Mania Ombo Mana-Ye Au Lierimu Yemo”** kinia **“Pulu Yemonga Malo”** kinia **“Pulu Yemone nimba taltopa mana lipa mundorumu ye nokoli Karasi Mesayamo”** kinia ye selumu mele ungu talo Mateyu 16:13-17, 26:63-64 molemo (LLuku 22:66-71). Yesusini wale awisili “Pulu Yemone nimba taltopa mana lipa mundorumu yemo na.” nimbando **“Mania Ombo Mana-Ye Au Lierimu Yemo”** i-sipa i-sipa sembá.” nirimu (Mateyu 12:8,32,40, 13:37,41, 20:18,28, 24:30,44, Mako 8:38, LLuku 9:22,58, 19:10, Jono 3:14, Lipa Mundorumu Yema 7:56). Inia yakondo

**23. Krais** kinia **27. Mesaia** kinia kananila.

33. pikinini sipsip

(Inia anjukundu **44. sipsip**, **44.3. kanani.**)

34. pris

“**pris**” kinia “**profet**” kinia ye lupa lupama. Kongono seringi mele lupa lupala. Sika talo pea yomboma kinia Pulu Yemo kinia awi-suku-singi yema moloringina-kolo “**pris**” yema yomboma kinia Pulu Yemo kinia awi-suku-singina molko yombomanga unguma kinia umbunama kinia Pulu Yemonga kumbikerena mengo puringi; “**profet**” yema Pulu Yemo kinia yomboma kinia awi-suku-singina molko Pulu Yemonga unguma yombomanga kumbikerena mengo oringi. “**profet**” yemanga ungumu inia anjukundu **35. molemo**. **34.1. pris** yema onone ‘Pulu Yemone yomboma kanopa kiri naa piliepili. Pulu Yemo kinia seluna sere leko konopu seluna pupili molangi.’ ningu awi-suku-singi yema molko yombomanga ningu mélema kalko Pulu Yemo popo toko sinderingi. Aku seringimunga Umbu-Unguna u “**Pulu Yemonga ala-yema** .” nimbu bokuna torumulu. Pe i bokumu topele toli tapu-yemane ninguli: “Akumu paa manda naa sekemo. Mólo.” niringi. “Yombomane kuruma mindi ningu pilingí.” niringi. Kanu-kinia kongono seringi mele imbi sulu sepo bokuna torumulu. Pe ponjipu imbi lepo “**Pulu Yemo popo tondoli yema**” nimbu bokuna torumulu molemo.

**Pulu Yemo popo tondoli yema** nga ungu mare i-sipa molemo: **Se:** U-Pulu-Pulu 14:18 (Yesusi yu mele, Konane 110:4, Ipuru 5:6, 7:1-17). **Se:** Wendo Oringi 28:1, 29:9. Onone kongono seringi mele boku LLipai nimba silimú (1:5, 4:3, 6:24-26, 7:31-36, 21:pali). Kambu Toringi 4:46-48, 18:1-7, Josua 3:3,6,14, Mateyu 8:4, 12:5, Mako 2:26, LLuku 10:31, Jono 1:19. Kanu yemane paa alieli Pulu Yemo mélema kalko popo tondoringi-na-kolo Yesusini waltikele kamu olionga nimba yuyu yunga mememo Pulu Yemo popo topa sinderimu (Ipuru 10:8-14). Yu olionga Pulu Yemo popo tondoli yemo (Ipuru 7:11-25).

Olio Karasinga yomboma pali Pulu Yemo popo tondoli yomboma molemolola (U-Pita 2:5,9). **34.2. bikpris**

Akuma Umbu-Unguna “**Pulu Yemo popo tondoli ye awilima**” nimbu bokuna torumulu molemo. Kanu yemane Yesusi-kinia paa konopu kiri panjiku, yu toko kondonge aulka se koroko kanoko likuli yu toko kondoringi (Mateyu 2:4, 16:21, 20:18, 21:15,23,45, 26:3,47, Mako 14:1,10, 15:1,3,10,11,31, LLuku 23:4,10, Jono 7:32,45). **34.3. hetpris**

Paa selu mindi **Pulu Yemo popo tondoli ye awili olandopamo** molorumu. Se kolorumu kinia mindi se topele toko mondoringi. U-pulu-pulu Mosisi genu Erono kanu yemo molorumu (Wendo Oringi 28:1, 29:1,10,15,44, LLipai 8:pali, 16:pali, 21:10-17). Pe yunga malo se yu kolali sepa molorumu (Kambu Toringi 20:22-29). Mare: Mako 2:25-26, Akai 1:12,14, 2:2,4.

Yesusi mana omba molopili Anasi yu **Pulu Yemo popo tondoli ye awili olandopamo** molorumu, aku-na-kolo Romo gapomanomone yu toko mania munduku se lupa liku mondoringi, kanu yemo Kayapasi. Aku seringi-na-kolo Juda yombomane Anasinga unguma mindi pilieringi. Romo-Gapomanomone aku sipa serimumunga wale awisili Anasi kinia Kayapasi olonga imbi talo pea liku sere leko bokuna toringi (LLuku 3:2, Jono 11:49-51, 18:13-14,24, Lipa Mundorumu Yema 4:6). **Pulu Yemo popo tondoli ye awili olandopamo** yu Juda yombomanga kanjollo makumunga nokoli yemo (Kewa-unguna “peresiden”) (Jono 18:12-14,19-24, Mateyu 26:57,62,63,65, Lipa Mundorumu Yema 23:1-5).

Pe Yesusi yu kamu **Pulu Yemo popo tondoli ye awili olandopamo** molorumu

(Ipuru 2:17-18, 3:1, 5:1-5,10, 6:20, 7:26-28, 8:1-6, 9:6-15, 13:11-12). **Pulu Yemo popo tondoli ye awili ololandopamanga pali yu ye paa awili ololandopamo** molorumu molemo (Ipuru 4:14-16).

35. profet

“**Profet**” yombomanga ungu se inia yakondo nondopa **34. pris** molemo. “**Pris**” yemane yombomanga kongonomo Pulu Yemonga kumbikerena senderingi. “**Profet**” yombomane Pulu Yemonga kongonomo yombomanga kumbikerena senderingi. “**Poropetema** ne” kongono seringi mele i-sipa: Pulu Yemone Mosisi ungu-umbu tondorumu mele pilipale Mosisi Erono nimba sirimu. Mosisini ungu-umbu tondorumu unguma Eronone pilipale Isipi ye nokoli kingimu nimba sirimu. Mosisi Pulu Yemonga keremo, yunga “**poropet** emo” (Ungu-Manema 18:15). Erono yu Mosisinga keremo, yunga “**poropet** emo”-la (Wendo Oringi 6:28—7:2). Imbi bokuna torumulu molemo akumu i-sipa mele: “**Pulu Yemone ungu-umbu tondorumuma pilku yando yomboma ningu siringi yomboma**”.

Pulu Yemonga keremo moloringi yombomanga kongonomo kinia kolo toli yombomanga unguma kinia pilingí mele ungu mare Ungu-Manema 13:1-5, 18:15-22 (Wendo Oringi 20:18-22) molemo. Jeremaya 1:1-5, 2:1-5, 7:1-3, Jona 1:1-3, 3:1-3, Akai 1:1-13, 2:1-2, Wendo Oringi 15:20, Nokoli Yema 4:4 kananila.

Kanu yemanga ye mare imbima alieli pilielemolo i-sipama: Illainja, Illaisa, Aisaya, Jeremaya, Esikiele, Deniele, Osia, Joele, Emosi, Opadaya, Jona, Maika, Neyame, Apakake, Sepenaya, Akai, Sekaraya, Mallakai.

Yesusi paa pe wendo omba molopa sembá mele Pulu Yemone nirimu ungu-umbu tondorumu awisili u pilku bokuna toringi. Pe Yesusi kamu orumu kinia yunga yomboma kanu unguma pilieringi. Aisaya 7:14 mele Mateyu 1:22-23 molopa; Maika 5:2 mele Mateyu 2:3-6 molopa; Osia 11:1 mele Mateyu 2:14-15 molopa; Jeremaya 31:15 mele Mateyu 2:16-18 molopa; Aisaya 40:3-5 mele LLuku 3:2-6 molopa; Sekaraya 9:9 mele Mateyu 21:1-5 molopa; Konane 22:18 mele Jono 19:23-24 molopa; Konane 22:1 mele Mateyu 27:46 molopa; Wendo Oringi 12:46, Kambu Toringi 9:12, Konane 34:20, Sekaraya 12:10 mele Jono 19:33-37 molemo. Unga talo LLuku 24:25-27, Lipa Mundorumu Yema 8:30-35 molemola.

Yesusi kamu omba Pulu Yemonga kongono sendembando **No Lindeli Jono kamu Pulu Yemone ungu-umbu tondorumuma pilipa yomboma nimba sirimu yemo** wendo omba Yesusi ombá aulkamo akisinderimu (LLuku 1:76, 3:2-3, 7:24-28). Jono yu omba kongono sembá mele Mallakaini u nimba sirimula (Mallakai 3:1).

**Yesusi yu kepe Pulu Yemone ungu-umbu tondoruunguma pilipa yomboma nimba sirimu ye se** (Mateyu 21:46, LLuku 7:16, 13:33-34, 4:24, Mako 6:4, Jono 4:19,44, 7:40, 9:17, 15:15). Mosisini Ungu-Manema 18:15,17-19 nirimu yandopa yandopa ye mare yu-mele-mele aku kongono senge yemando nimba nirimu-na-kolo Juda yombomane ‘Ye selu ombá.’ ningu pilku nokoko moloringi. ‘Yu kinia ‘Pulu Yemone nimba taltopa sipa mundumba.’ ningu nokoko moloringi yemo kinia ye selumu.’ ningu pilieringi (Jono 1:21,25,45, 5:46, 6:14, Lipa Mundorumu Yema 3:17-24, 7:37).

Yombo marene kolo toko “Pulu Yemone ungu-umbu tondomu se pilipuli nikiru.” ningi yombomanga ungu mare Mateyu 7:15, 24:11,24, Lipa Mundorumu Yema 13:6, Pe-Pita 2:1, Lipa Ora Sirimu 16:13, 19:20, 20:10 molemo.

36. Rabai, **Rabonai**

(Akumunga ungu-pulumu Jono 1:38 molemo.)

37. Sabat

Wale talo-pakara Pulu Yemone mulu ma mélema sepa wamopa molopale wale

yopoko-sipamonga we mulu pilipa koro molorumu (U-Pulu-Pulu 2:1-3). Pe Mosisini Isirele yomboma aku siku pilku sangi nirimu mele Wendo Oringi 16:21-30 molemo. Akuna imbi "**Sambate**" nimba pulu polopa molemo. Kanu imbibunga ungu-pulumu "**mulu pilku koro mololi**". Pe Pulu Yemone Isirele yomboma kinia ulu mare senge kinia yuni ono nokopa ononga Pulu Yemo molomba ungumu (Kewa-unguna "**kontrak**" nilimulu) nimba panjipa mi lembando ungu-mané rureponga talo sirimu kanu ungu-manemanga sene nimba: "Wale se '**Sambate**' ningu '**Pulu Yemonga wale kake sélimu**' ningu kongono naa seko koro molangi." nirimu (Wendo Oringi 20:8-11, 31:12-17).

Mateyu 24:20, Lipa Mundorumu Yema 1:12: Juda yomboma **Sambate** walemonga aulka sulu senga manda naa andoko, wane killomita mele mindi manda pungimunga ungu-mané se perimu, akumunga ungu-pulu mare Wendo Oringi 16:29, Kambu Toringi 35:5, Josua 3:4 molemo. Aku-na-kolo Pulu Yemone aku ungu-manemo sumbi sipa nirimu ungu se Pulu Yemonga bokuna naa molemo. Juda yombomane ono onono kanu ungu-manemo ningu panjeringinje. Onono pilku seringi mele pilipale Yesusini Mateyu 24:20 molemo mele nirimunje.

Juda yomboma **Sambate** walemonga koro moloringi ungu mare Jono 19:31, 41-42, LLuku 23:54-56, 24:1 molemo. **Sambate** walemonga ono maku toko Mosisinga ungu-manema kinia Pulu Yemonga ungumu kinia pilku, Pulu Yemo-kinia ungu niringi. Yesusi ono pea maku toringi ungu se LLuku 4:16 molemo. Pollo pea maku toringi ungu mare Lipa Mundorumu Yema 13:5, 14-15, 14:1, 17:1-3 molemo.

Kiniá walemanga imbima nimbu walema kambu tolemolo mele olio sepa sem-bambu silimú. Kiniá "**Koro Awili**" molo "**Sande**" nilimulu aku walemo Juda yombomanga kongono wale selumu. "**Sarere**" molo "**Koro Kanga**" nilimulu wale akumu Juda yombomane "**Sambate Walemo**" niringi. Akumunga, Umbu-Unguna "**namba wan de bilong wik**" nimbu bokuna tomolondo ungu se sumbi sipu pilipu nimulú ungu se naa pilierimulu. Yesusi kolopale, "**namba wan de bilong wik**" lomboropa ola molorumu (Mateyu 28:1, Mako 16:1-2, LLuku 24:1, Jono 20:1).

Kiniá Karasinga yombo mare kanu ungu-manemo pilkuli Sarere kinia "**Koro Awili**" molo "**Sambate**" ningu kanu walemonga koro molko maku toko Pulu Yemo popo toko imbi ambolko paka tondoko yunga ungumu pilielemele. Ya Papua Niu Gini sukundu Sepende yombomane aku siku pilku selemele-na-kolo kolea marenga Karasinga yombo mare pea akula pilku selemele.

Aku-na-kolo Karasinga yombo awisilini 'Yesusi lomboropa ola molorumu walemo 'olianga **Sambate** walemo' ningu kanu walemonga koro molko maku toko Pulu Yemo popo toko imbi ambolko paka tondoko yunga ungumu pilielemele. Koro konde senga pulu-pulu wale, Kewa-unguna "**Sande**" nilimili, akumu "**Sambate**" ningu "**Ye-Awylimunga Walemo**" ningu koro molemelemonga pulumu i-sipa mele: 'Yesusi Juda yombomanga koro konde senga pulu-pulu walemo kinia lomboropa ola molorumu kene Sande kinia maku topo yuni serimu mele semanemo pilipu yunga ungumu pilielemolo kinia peanga.' nilimili. 'U-pulu-pulu Karasinga yomboma moloringimane aku sikula seringi.' nilimili. Lipa Mundorumu Yema 20:7 koro kondemonga pulu-pulu walemonga Karasinga yomboma maku toko Yesusini "berete kinia no-waene kinia nangi" nirimu mele pilkuli seringi. U-Korini 16:2 kinia Lipa Ora Sirimu 1:10-tolonga ungu se molemola. Pe yandopa yandopa Sande kinia koro molko, Pulu Yemo popo toko yunga ungumu pilingindu maku tolko oringi. Aku-na-kolo "**Sande-kinia** koro molaa." nimba ungu-mané aku-sipa se bokuna naa nimba molemo. Yesusi mana molopa andopa yunga kongonomo serimu kinia wale awisili Juda

yombomanga ye awilima kinia angelema niringi. Onone '**Sambate** walemonga manda semolo.' ningu pilieringi mele lupa, yuni **Sambate** walemonga pilipale serimu mele lupa. Walte yu lombili andolima witi-mongoma inie toko nolko purungi kinia (Mateyu 12:1-8) Juda yombomanga ye awilimane ono iri toringi kinia yuni onondo "Na **Sambate** walemonga nokoli yemo." nirimu (Mateyu 12:8). Yesusini **Sambate** walemonga yombo kuru torumuma sepa peanga sirimu kinia kanoko kiri pilieringi mele LLuku 6:6-11, 14:1-6 molemo. **Sambate** walemonga semane mare i-sipa mele manda kanonila: LLuku 6:1-5, 13:10-17, Jono 5:1-15,16-18, 7:21-24, 9:pali.

### 38. Sadyusi

"**Sadusi**" yema ono Juda yombomanga ye awilimanga ye talape se. Onone 'Pulu Yemonga ye sumbi nilima molemolo.' ningu pilieringi-na-kolo Yesusi mana andopa molorumu kinia **Sadusi yema** kinia **Parisi yema** kinia yuni serimu mele paa kanoko kiri pilieringi. Onone pali pilku seringi mele ungu mare inia yakondo **11. Farisi** kanani.

**Sadusi** yema i-siku ningu pilieringi: "Yomboma kolkole lomboroko ola naa molonge." ningu pilieringi (Mateyu 22:23,(29-32), Lipa Mundorumu Yema 23:8, (U-Korini 15:12-20)). "Angelloma kinia kuruma kinia naa molemele." ningu pilieringila. **Parisi** yeman "Kolopole sika lomboropo ola molomolo. Angelloma kinia kuruma kinia sika molemele." ningu kuru mondoringi.

### 39. Sameria

Yesusi mania naa opili paa koronga-u, Isirele yomboma kolea Isipi ka-kongono seringi kinia Pulu Yemone ono lipa tapondopa kolea Kenane memba pumba kanu koleamo sirimu, akuna peringi. Pe Isirele yombomanga talapemo pulua tokole ekendo yombo talape se molko ye nokoli kingi se mondoko, ekendo yombo talape se molko ye nokoli kingi se mondoringi. Yombo talape se imbi Isirele ningu, se Juda niringi. Ekendonga kolea-awili, Mosipi mele, kingimu molorumu kolea-awili Jerusalleme, ekendonga **kolea-awili Sameria** . Pe yombo talape se, Asiria nili, kolea-awili Sameria ongo Sameria yomboma-kinia opa seko yombo awisili ka siku mengo punguli yombo lupa mare yando siku munduku "Kolali seko Sameria akuna peangi." niringi. Kanu semanemo Pe-Kingima 17:24-34 molemo. Kolea pulu yombo koltalo moloringima kinia ongo peringi yomboma kinia anju yando ambo liku ye pungu, Pulu Yemo kinia we-mélema kinia 'olio nokolemele pulu yema' ningu liku sere leko popo toringi. Kanu yombomane bolango meringima paa sika Juda yomboma naa molko meme kangi lupa lupa moloringimunga Juda yombo sikamane ono paa kanoko kiri pilieringi. Kanu yombomando "**Sameria yomboma**" niringi. **Sameria yomboma** ne Pulu Yemo popo tongendo ononga ma-pangi senga aku seringi. Pulu Yemone 'kolea-awili Jerusalleme mindi ongo na popo taa.' nirimu-na-kolo Jerusalleme pungu naa seringi. Pe Yesusi mana mania ombo andopa molorumu kinia Juda yombomane **Sameria yomboma** lakoko konopu kiri panjiku seluna paa naa moloringi. **Sameria yomboma** kolea **Sameria disiriki** peringi, disirikinga **kolea-awili akumu Sameria** niringila. Juda yomboma winju mendo pungindu **Sameria disiriki** makaye seko purungi-na-kolo Yesusi aku sipa naa serimu. Jono 4:1-42, LLuku 9:51-55, 10:25-37, 17:11-19, Mateyu 10:5-6 molemo semanemanga ungu-pulumu akumu mindi.

### 40. Satan

(Akumu inia anjukundu nondopa **42. Seten** kanani.)

### 41. saveman bilong lo

Pisini-unguna ungu selumu mindi bokuna toringi molemo, aku-na-kolo Giriki-unguna ungu talo molemomonga Umbu-Unguna ungu talola bokuna torumulu

molemo. Kanu yemane 'Ye paa sumbi nilima molemolo.' ningu pilieringi. Aku siku ningu pilieringimunga Yesusini Parisi yema iri torumu mele ono kepe iri torumula. Parisi yemane Yesusi kanoko kiri pilku, iri toringi mele kanu "**saveman bilong lo**" yemane kepe aku siku seringila (LLuku 5:30, 9:22, 19:47, 20:19, 22:2, 23:10). "Yesusini Pulu Yemonga ungu-manema pulua tolemo." niringi. Moloringi ungu-pulu mare inia yakondo **11. Farisi** kinia **38.** Sadyusi kinia molemo.

**"Saveman bilong lo"** akumunga ungu-pulu talo i-sipa:

**Se:** Wale paa awisili "**Pulu Yemonga ungu-manemanga puluma pilku mane siringi yema**" nimba molemo. Kanu yema Juda ye awili Parisi yema pea Yesusi molorumuna ongo ungu niringi (Mateyu 2:4, 5:20, 7:29, 9:3, 12:38, 15:1, 16:21, 17:10, 20:18, 21:15, 23:2,13, (14),15,23,25,27,29, 26:57, 27:41, Mako 2:6-7, 12:28,32,35,38, 14:1, LLuku 9:22, 20:46). Mare sika Parisi yema moloringi (LLuku 5:30, Lipa Mundorumu Yema 23:9).

**Se:** Wale koltalo mele **Pulu Yemonga ungu-manema pilku kondoringi yema** naga unguma molemo. Ingillisi-unguna "**lloya**" nilimili (Mateyu 22:35, LLuku 7:30, 10:25, 11:45,46,52, 14:3, Lipa Mundorumu Yema 24:1,2-3).

#### 42. Seten, Satan

Pisini-unguna u nomi-ka lemolo mele pilkuli "**Seten**" toringi-na-kolo kinia Ingillisi-unguna boku tolemele mele manda manjiku "**Satan**" tolemele.

Yu molorumu mele ungu awisili bokuna naa molemo. Angellonje? Mateyu 25:41, Pe-Korini 11:14, Lipa Ora Sirimu 12:9. **42.1. Seten**

Kanu imbimunga pulumu "**opa-toumu**" kinia "**kote kolo topa sendélimu**" kinia. Yu kurumanga nokolimu (Mateyu 4:10, 12:26, 16:23, LLuku 10:18, 22:3, Romo 16:20, Pe-Korini 11:14, U-Tesallonaika 2:18, Lipa Ora Sirimu 12:9, 20:2,7).

"**Setene**" yunga tondolomo kinia kurumanga tondolomo kinia mania, Yesusinga tondolomo olandopa mele ungu mare inia yakondo **9. devil** nimba molemona molemo. Akumunga ungu mare ya niemilila:

**Se:** Mateyu 4:11, LLuku 4:13, Ipuru 4:15 Setenene Yesusi kondi torumu kinia yunga ungumu naa pilipa liltimu.

**Se:** Kuruma yombomanga konopumanga moloringima Yesusini topa makororumu semane awisili molemo. Mare i-sipa molemola: Mako 1:23-27, 3:11-12,14-15, 5:1-20, Mateyu 12:22-23, LLuku 4:41.

**Se:** Kollosi 2:10,15, Epesasi 1:21, 6:10-13.

**Se:** Setenenga imbi se Giriki-unguna "**Belliele**" molemo (Pe-Korini 6:15), Pisini-unguna "**Seten**" nimba molopa, Ingillisi-ungu **Baipele** marenga "**devil molopa**", **marenga** "**Belliele**" molopa, marenga "**mélema anjiku**" "**pulu yemo**" ningu popo tolemele **mélema**" nimba molemo. **42.2. devil**

Akumu Setenenga kongono ungu-pulu peli imbi se, akumunga pulumu inia yakondo **9. devil** paa kananila. **42.3. Belsebul**

Akumu Setenenga imbi sela, akumunga pulumu inia yakondo **4. Belsebul** kananila. **42.4. wanpela samting nogut**

Akumu Setenenga imbi sela. "**wanpela samting nogut**" yu "**Setene**" kinia "**depelemo**" kinia molemo mele Mateyu 13:19, Mako 4:15, LLuku 8:12 molemo. Aku unguma semane selumu.

Giriki-unguna "**kirimu**" mele mindi molemo. Pisini-unguna "**Satan**" toko, "**man nogut**" toko, "**man nogut Satan**" toko, "**ol samting nogut**" toko, "**Man bilong mekim ol pasin nogut**" ningu toringi molemo. Umbu-Unguna topele topo bokuna torumulu molemo mele i-sipa: "**ulu-kirimanga pali ulu-pulumu pelemo ,kuru nokolimu ,**" nimbu torumulu (Mateyu 5:37, 6:13, 13:19,38,

Jono 17:15, Epesasi 6:16, Pe-Tesallonnaika 3:3, Jono Kumbi-Lepamo 2:13,14, 3:12, 5:18,19).

#### 43. sios

Kiniá Karasinga yomboma maku tolemele ulkama “**sios**” nilimulu-na-kolo Pulu Yemonga bokuna “**sios**” nimba molemo akumu ulkamando naa nirimu, yombomando nirimu. Giriki-ungumunga ungu-pulumu i-sipanje: “Yomboma ungu se pelemo kinia pilkuli ningíndu maku tolemele.” Umbu-Unguna “yombo talape” nilimulu. Karasinga yombo talapemando pali liku sere leko ningíndu “**yunga sios**” niringi (Mateyu 16:18, Lipa Mundorumu Yema 2:47, Epesasi 5:23-32, Pillipai 3:6, Kollosi 1:18,24). Akumu Pulu Yemongala (U-Timoti 3:15). Karasinga yomboma kolea yu-melete-mele maku toringi yombo talapemando yu-melete-mele “**sios**” niringila (Lipa Mundorumu Yema 9:31, 20:17, Romo 16:5,16, U-Korini 1:2, Pillipai 4:15, Kollosi 4:15,16, Lipa Ora Sirimu kolomongo-awili 1-3).

Olio **Yesusi Karasinga yombo talapemo** olio yunga ambomo molemolo mele Epesasi 5:25-32 molemo. Olio kangi selumu, yu olionga pengemo, molemolo mele ungu mare Epesasi 1:22-23, 4:12,15-16, Kollosi 1:18,24, 3:15, U-Korini 6:13-20 molemo.

#### 44. Sipsip, pikinini sipsip, man i save lukautim sipsip

**44.1.** Olio ‘Sika.’ nimbu kuru mondolemolo yomboma olio **Yesusinga kongi sipisipima**, yu **olionga tapu-yemo** (Jono 10:pali, Mako 14:27, Ipuru 13:20, Jono 21:15-17, Konane 23).

**44.2. Sipisipi yu walu molopa aulka lo lipa pulimú** mele olio yomboma aku sипу selemolo. Tapu-yemanе sipisipima nokoko naa kondolemele kinia manda naa molemo (Mateyu 9:36, LLuku 15:1-7, U-Pita 2:25, Lipa Mundorumu Yema 20:28).

**44.1. kinia 44.2. kinia ungu se Pisini Baipelena Esikiele 34:pali molopa, boku ambolkonomonga Mateyu 2:5-6 molemόla.**

#### 44.3. Pikinini Sipsip

No Lindeli Jonone nimbale: “**Yesusi yu Pulu Yemonga sipisipi walomo.**” nirimu (Jono 1:29,36). Aisaya 53:7-8 kinia, Lipa Mundorumu Yema 8:31-35 kinia kananila. Yesusi yu “**sipisipi walomo**” molorumu mele ungu-pulu talo pelemo.

**Se:** Yesusi mana naa opili Isirele yomboma Pulu Yemone mane sirimu mele pilkuli sengendo ‘Ulu-pulu-kirima mania pupili.’ ningu **kongi sipisipi** molo kao molo meme paa peanga se toko kalko Pulu Yemo popo toko siringi (LLipai 1-7). Kongi peangama mindi, kirima paa mólo (Wendo Oringi 12:15, LLipai 22:18-25). **Kongimanga meme** monga pulumu ungu mare U-Pulu-Pulu 9:4-6, LLipai 17:11,14, Mateyu 26:28, Ipuru 9:22 molemo. Yesusini yu yuyu yunga **kangimu kinia mememo-tolo** olionga nimba Pulu **Yemo popo topa sinderimu.**

**Se:** Isirele yomboma kolea Isipi wendo pungíndu ‘Pulu Yemone olionga bolango komolayema kinia kongimanga komolayema topa naa kondopili.’ ningu **sipisipi walo** paa peanga se liku toko kondoko **meme** mone ungu se seringi. Kiniá Yesusinga **meme** ondondorumumuni aki tolemo yomboma Pulu Yemone naa tolemo. Imunga ungu awisili inia yakondo “**30. Pasova**” molemo kananila.

**Sipisipi walo** kinia **meme** kinia aku méletolonga ungu mare niringi molemo akuma ulu talo pea pilkuli niringinje. Nuni nunu mimi siku kanoko piliani: Jono 1:29,36, Romo 3:25, 5:9, Epesasi 1:7, 2:13, Kollosi 1:20, Ipuru 9(:14,22), U-Pita 1:18-19, Jono Kumbi-Lepamo 1:7, Lipa Ora Sirimu kolomongo-awili 5(:6,9), 6, 7, 12, 13(:8), 14, 15, 17, 19, 21, 22 molemo.

#### 45. stretpela man o meri

Ungu-pulu mare i-sipa:

**Se:** Yombomane yombo se molemo mele kanokole “**yombo sumbi nílimu**” molo

**"yombo peangamo"** nilimili (Mateyu 1:19, Mako 6:20, LLuku 2:25, 23:50, Lipa Mundorumu Yema 10:22).

**Se:** Pulu Yemone yomboma aku sipa naa kanopa nilimú. Yuni olio '**yombo sumbi nilima' nimba kanomba**' ulu se oliolio manda naa semolo. Kangikundu kanopa naa nilimú. Konopuna sukundu kanopa nilimú. Aku-munga ungu awisili boku Romo molemo: 2:13, 3:5,9-10, 4:3, 9:30-32 kanani.

**Se:** Unga se Giriki-unguna selu-sipa mele molemo-na-kolo ungu-pulumu kanga-kolte lupa mele perimu kinia kanga-kolte lupa mele imbi torumulu molemo. Akumu Pisini Baipelena selu-sipamo toringi-na-kolo Umbu-Unguna ungu-pulumu mimi sipu pilipuli torumulu (mare Romo 3:30, 4:25, 5:1). **Pulu Yemone yombo konopu sumbi nimba pelima nimba kanombando ononga ulu-pulu-kirima mundupa kelielemóla.** Aku-na-kolo we naa selemo. 'Karasi sika.' ningu kuru mondolemele yomboma-kinia aku sipa selemo (Gallesia 2:16 paa kanani). Imunga ungu mare inia yakondo **26.1. lo** molemóna.

46. tisa

(Akumunga imbi talo inia yakondo kanani.

Se **36. Rapai**, se **41. saveman bilong lo**.)

47. tupela maus

Yomboma aku siku molemelemando Giriki-unguna kinia Ingillisi-ungutolone ungu selu "**hypocrite**" mindi Pulu Yemonga bokuna nimba molemo. Unga selumu na-kolo Pisini-unguna kinia Umbu-Unguna kinia ungu selumu sumbi siku naa nilimili. Unga-pulumu bokuna tomolondo pererimulu. Pisini Baipelena ungu talo molo yopoko mele molemo.

**Se: man bilong tupela maus** - (Mateyu 6:2,5,16, 7:15, 16:3, 23:13,15,23,25,27). Mateyu 23 pali mimi siku kanokole ungu akumunga pulumu pilinginje. Mare Mako 7:6, LLuku 6:42, 11:44, 12:56, 13:5 molemóna. Pulu Yemonga ungu-manema pilku yomboma mane siringi yema kinia (akuma inia yakondo **41. saveman bilong lo**), Parisi yema kinia (inia yakondo **11. Farisi**), Sadusi yema kinia (inia yakondo **38. Sadyusi**), onone pilku konopu kimbu siringi mele lupa, kerena niringi mele lupa. Andoko seringi mele yombomane kanokole 'Ono ye peanga sumbi nilima' ningu kanoringi-na-kolo konopu sukundu kalaro molorumu (Mateyu 23:25-26, 15:1-20). Akumunga ungu tondolo se Gallesia 2:6 molemo (U-Samuele 16:6-7 kepe). Yombo se naa kanopa molopili ono onono molkole nambolka uluma seringinje. Kanu yema konopuna perimu mele lupa, kangina molko seringi mele lupa, yombo selu yombo talo mele moloringimunga pilipale Yesusini wale awisili ono imbi lengendo iri topa "**man bilong tupela maus**" nirimu.

**Se: man bilong giaman** - Yesusini yombomando aku sipa nirimu ungu mare Mateyu 6:16, 7:5 kinia LLuku 6:42 selu, 12:56, 20:20-23, (boku marenga LLuku 11:44 kepe) molemo. Yesusini Pulu Yemonga ungu-manema pilku kondoko yomboma mane siringi yema kinia Parisi yema onondo nirimu mele Mateyu 15:1-9 (Mako 7:5-15) molemo, akuna ungu-pulu tondolo se molemo. **Se** Mako 12:15 molemo. U-Timoti 4:2, U-Pita 2:1 kananila.

**Se:** Mateyu 24:51 ungu talo lipa sere lepa molemo, "**man bilong giaman em ol man bilong tupela maus**".

**Se:** Mateyu 6:2, "**Ol dispela man i laik giamanim ol manmeri**", kanu yema sepe-koleana pungí lémo (Mateyu 24:51).

**Se:** LLuku 12:1 kanga-kolte selu-sipa mele ("giaman pasin bilong ol"). Yesusini Sadusi yemando aku sipa nirimula (Mateyu 16:6; Gallesia 2:13 kananila).

Akumanga pali Ingillisi-ungumu kinia Giriki-ungumu kinia "**hypocrite**" mindi nimba molemo. Gallesia 2:13 mindi Ingillisi boku lupa lupamanga ungu laye-

kolte lupa lupa toringi molemo.

“**tupela maus**” molo “**man bilong giaman**” akumu Umbu-Unguna u bokuna i-sipu torumulula: “ ‘Yombomane olio kanokole ‘Pulu Yemonga ye sumbi nilima molemolo. Sika-unguma nilimulu.’ ningu kanangi.’ ningu kolo toko konopu talo seko kimbu silimili yema.” nimbu bokuna torumulu-na-kolo akumu ungu paa sulu. Kiniá ponjipa, “**topele-mapele toli yema**” kinia “**topele-mapele toli yomboma**” kinia Pulu Yemonga bokuna molemo-na-kolo kanu ungumu wallop-kolte pange selemonje. Wale mare ‘Ungu-pulumu paa sumbi siku piliangi.’ nimbu kanga-kolte sulu sepo torumulu molemo. “**topele-mapele toli yema**” bokuna Mateyu 23:pali, Mako 7:1-14 kanokole ungu-pulu sikamo paa mimi siku piliangi. Olio yombomane pali konopumane pilielemolo mele kinia, lopi sepo selemolo uluma kinia, kiyongo nimbu nilimulu unguma kinia, walte mona lemba (LLuku 12:3, 16:14-15). Olio papu molomolo mele ungu se LLuku 14:9-14 molemo. Olio naa molamili mele ungu talo LLuku 6:39-42, 20:45-47 molemo.

48. wasman

(Inia yakondo **16. hetman** kanani.)

49. yis

Pellawa sikono molo berete ‘kalamili.’ ningu pellawa awisilina **isi** paa koltalo mundulimili kinia pellawa akolemo, akumunga ungu-iku mare Pulu Yemonga bokuna molemo. Ungu-iku peanga se Mateyu 13:33 molemo. **Isi** akumu mele peangamo, aku-na-kolo ungu-mane sikuli ungu-iku awisili tongendo ‘**isi** niringi akumu ulu-pulu-kiri molo ungu-mane kirimando niringi. Ungu kiri molo ulu kiri koltalo anju anju pulimú kinia ulu kiri awisili wendo wendo olemo molo yombo awisili ambolopa sepa kinjilimú. Akumunga ungu talo U-Korini 5:6-8 kinia Gallesia 5:7-10 kinia molemo. Pollone kanu isimu “wendō wendō liku toko eltaa!” nirimu akumu Wendo Oringi 12:8,15,17-20 akuna Pulu Yemone Isirele yombomando “sangi” nirimu mele pilipale aku sipa ungu-iku topa nirimunje. Parisi yema kinia Sadusi yema kinia ononga isimunga ungu talo Mateyu 16:6,11-12, LLuku 12:1-3, Mako 8:15 molemo. (Kanu yemanga ungu-pulu mare inia yakondo **11. kinia 38. kinia molemo.**)